

Tuhun Ndyoo Sihin Tyehen Ñi

El Nuevo Testamento
en el mixteco de Chayuco



La Liga Bíblica

Las Sagradas Escrituras para Todos

El Nuevo Testamento
en el mixteco de Chayuco

La Liga Bíblica 5C primera edición 1979 [mih]
La Liga Bíblica versión electrónica 2009

Publicado por

© La Liga Bíblica 1979

Se permite copiar, distribuir y comunicar públicamente esta obra bajo las siguientes condiciones:

- ▶ Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- ▶ No comercial. No puede utilizar esta obra para fines lucrativos.
- ▶ Sin obras modificadas. No se puede alterar, transformar o generar una obra a partir de ésta.

Aclaraciones sobre el Alfabeto Mixteco

En el idioma mixteco la **h** significa el saltillo, un sonido que se hace en la garganta. Es muy importante pronunciar este sonido en el mixteco, porque por medio de él se distinguen muchas palabras, como por ejemplo:

ñuhu	tierra	ñuu	pueblo
cahan	hablar	caan	acostumbrarse
ndahva	extinguir	ndava	saltar
tyahyu	podrir	tyayu	silla
zoho	oreja	zoo	cáscara

También es importante saber que no siempre se pronuncia la **n** del mixteco como la **n** del español. Cuando se encuentra al fin de la palabra, la **n** del mixteco significa la nasalización de la vocal anterior. Es decir, no es más que una modificación nasalizada de la vocal. Así como la **h** distingue muchas palabras, la **n** también las distingue. Por ejemplo:

cuaan	amarillo	cuaa	oscuro
cuahan	irse	cuaha	rojo
cahan	hablar	caha	barato
ziin	distinto	zii	agosto

Cuando se encuentra la **n** al principio de una palabra o entre dos vocales, se pronuncia como en el español, como por ejemplo:

nama	jabón	sino	correr
-------------	-------	-------------	--------

También hay tres tonos en el mixteco pero los símbolos se usan solamente cuando hay dos o tres palabras que solo pueden ser distinguidos por los tonos. El tono alto está marcado así (´); tono medio así (¨); y el tono bajo con esta marca (`). Por ejemplo:

yūū	petate	Vícō	fiesta
yūù	rio	vìcò	nube
yùù	piedra		

Índice

SAN MATEO	1
SAN MARCOS	68
SAN LUCAS.....	108
SAN JUAN	179
HECHOS	228
ROMANOS.....	298
1 CORINTIOS.....	330
2 CORINTIOS.....	358
GÁLATAS.....	377
EFESIOS.....	388
FILIPENSES.....	398
COLOSENSES.....	405
1 TESALONICENSES	412
2 TESALONICENSES	418
1 TIMOTEO.....	422
2 TIMOTEO.....	431
TITO	437
FILEMÓN	441
HEBREOS.....	443
SANTIAGO.....	466
1 PEDRO.....	474
2 PEDRO.....	483
1 JUAN	488
2 JUAN	496
3 JUAN	498
JUDAS	500
APOCALIPSIS.....	503

Tuhun Vaha Sa I Tyaa Ra San Mateo

Ñiyivi sahnũ sii ra Jesús

1 Ihya cuu tandihi ñiyivi sahnũ sii ra Jesucristo, ra cu ñiyivi sii ra David ta sii ra Abraham.

²Ra Abraham i cuu zutu ra Isaac. Ta ra Isaac i cuu zutu ra Jacob. Ta ra Jacob i cuu zutu ra Judá ta yañi ra.

³Ra Judá i cuu zutu ra Fares ta ra Zara. Tamar i sinañi zihĩ ra. Ra Fares i cuu zutu ra Esrom. Ta ra Esrom i cuu zutu ra Aram.

⁴Ra Aram i cuu zutu ra Aminadab. Ta ra Aminadab i cuu zutu ra Naasón. Ta ra Naasón i cuu zutu ra Salmón.

⁵Ra Salmón i cuu zutu ra Booz. Ta Rahab nañi zihĩ ra. Ra Booz i cuu zutu ra Obed. Rut nañi zihĩ ra. Ta ra Obed i cuu zutu ra Isaí.

⁶Ra Isaí i cuu zutu ra rey David. Ta ra rey David i cuu zutu ra Salomón vatyi i quihin ra sii ñazihĩ ra Urías.

⁷Ra Salomón i cuu zutu ra Roboam. Ta Roboam i cuu zutu ra Abías. Ra Abías i cuu zutu ra Asa.

⁸Ra Asa i cuu zutu ra Josafat. Ta ra Josafat i cuu zutu ra Joram. Ta ra Joram i cuu zutu ra Uzías.

⁹Ra Uzías i cuu zutu ra Jotam. Ta ra Jotam i cuu zutu ra Acáz. Ta ra Acáz i cuu zutu ra Ezequías.

¹⁰Ra Ezequías i cuu zutu ra Manasés. Ta ra Manasés i cuu zutu ra Amón. Ta ra Amón i cuu zutu ra Josías.

¹¹Ta ra Josías i cuu zutu ra Jeconías sihin yañi ra quivi i sicoo cuaty i ta i quihin ñiyivi sii ñu hebreo sindyaca ra sii tandihi ñu ndya ñuu Babilonia cua cuu ñu muzu ñiyivi indyacuan.

¹²Yaha cuan ta ziqui ra Jeconías i cuu zutu ra Salatiel. Ta ra Salatiel i cuu zutu ra Zorobabel.

¹³Ta ra Zorobabel i cuu zutu ra Abiud. Ta ra Abiud i cuu zutu ra Eliaquim. Ta ra Eliaquim i cuu zutu ra Azor.

¹⁴Ta ra Azor i cuu zutu ra Sadoc, ta ra Sadoc i cuu zutu ra Aquim. Ta ra Aquim i cuu zutu ra Eliud.

¹⁵Ra Eliud i cuu zutu ra Eleazar. Ra Eleazar i cuu zutu ra Matán. Ra Matán i cuu zutu ra Jacob,

¹⁶ta ra Jacob i cuu zutu ra José yĩ ña María. Ta maa ña i cuu zihĩ ra Jesús ra sa nañi Cristo.

¹⁷Ndya quivi ra Abraham ta ndya ra David i sicoo usi cumi tahan ra sahnũ sii ra Jesús cuhva vasi tata ra. Ta ndya quivi ra David ta ndya quivi i sindyaca ñiyivi sii tandihi ñu hebreo ndya ñuu Babilonia i

sicoo inga usi cumi tahan ra sahanu sii ra Jesús cuhva vasi tata ra. Ta i sicoo inga usi cumi tahan ra ndya ta sa yaha sahan ñu ñuu Babilonia ta ndya quivi i cacu ra Jesús.

Cuhva i cacu ra Jesucristo

¹⁸Ihya cuu cuhva i cacu ra Jesucristo. Sa cundaa tyiño ña María zihí ra Jesús sihin minoo ra sa nañi José, zoco cumañi ca ndu-ñin ñu ta i sito ña vatyi sa ñihi ña minoo zehe sa cuenda Tatyí Ii maa ra Ndyoo.

¹⁹Ta ra José, ra cua cuu yí ña, i cuu ra minoo ra ndoo xaan, ta ñá cuñi ra zandoo ra sii ña minoo cuhva sa cua cahan xaan ñiyivi sii ña. I cuñi ra vatyi cua natani xehe tutu ñu.

²⁰Zoco cuhva sa nacañi xaan iñi ra yozo caa cua zavaha ra, i quituu minoo ángel ra Ndyoo nuu ra sisi ñimahna, ta i catyi ángel cuan sihin ra: José, ñiyivi sii ra David, ma yuhun ta cuhun sii ña María sa cuu ña ñazihun vatyi zehe ña sa cua cacu cuu zehe Tatyí Ii ra Ndyoo.

²¹Cua cacu zehe ña. Ta cua cunañi ra Jesús vatyi cua zandasi ra cuatyi ñiyivi cuñi sii ra. Tacuan i catyi ángel.

²²Ta i cuu tandíhi cuhva ya vatyi cua quita si tañi cuhva i catyi ra Ndyoo quivi i cahan minoo ra profeta ta i catyi ra:

²³Minoo ñaha yoco, cua ñihi ña minoo zehe,

ta rayíi cua cuu zehe ña.

Emanuel cua cunañi ra.

Zivi Emanuel cuan cuñi si catyi si: Ra Ndyoo ndyaa sihin yo.

²⁴Ta cuhva sa ndoyo ra José i zavaha ra cuhva i catyi ángel cuan sihin ra. I quihin ra sii ña María sa cuu ña ñazihí ra.

²⁵Zoco ñá quixi ra sihin ña ndya sa cacu zehe nuu ña. Ta i zacunañi ra sii ra Jesús.

Zuhva ra sito xaan cahvi, i quisi ndyehe ra sii ra Jesús

2 I cacu ra Jesús ñuu Belén nu cu si Judea quivi i cuu ra Herodes rey yucuan. Ta ñuu Jerusalén i saa zuhva ra sito xaan cahvi. Mago nañi ra. Ityi caña ñicandyi i quisi ra.

²Ta i ndaca tuhun ra: ¿Ndyamaa iyo ra i cacu sa cuu ra rey cuenda ñiyivi hebreo? Ityi caña ñicandyi ndyaa ndi, ta i ndyehe ndi minoo tiño sa cuu cuenda ra. Ta vasi ndi vatyi cua zacahnu ndi sii ra. Catyi ra.

³I ñihi ra rey Herodes tuhun ya, ta sica xaan iñi ra ta tacuan tucu tandíhi ñiyivi ñuu Jerusalén.

⁴I cana ra Herodes sii tandíhi ra zutu nahnu ta ra cu maestro cuenda ley, ta i ndaca tuhun ra sii ra ndyamaa tahan si cacu ra Cristo.

⁵Ta i nacatyi ra cuan sihin ra: Cua cacu ra ñuu Belén nu cu si Judea vatyi tyehen i tyaa minoo ra profeta ta sa naha:

⁶Yoho ñuu Belén nu cu si Judea, ña luhlu ca moo ta ziqui tandíhi inga ca ñuu nu cu si Judea.

Vatyi ñuu Belén cua cacu minoo ra cua cundyaca ñaha, ta cua zacuenda ra sii ñu hebreo, ñiyivi mi.

Tacuan catyi Tuhun Ndyoo nacatyi ra cuan sihin ra Herodes.

⁷Ta ziqui xehe ñi i cana ra Herodes sii ra mago cuan, ta i ndaca tuhun ra sii ra ñaa cuhva quituu tiño cuan.

⁸Ta ziqui i tasi ra sii ra ndya ñuu Belén, ta catyi ra: Nanducu vaha xaan ndo sii ra luhlu cuan. Ta tatu sa nañihi ndo sii ra, zacoto ndo sii, vatyi cua cuhun tuqui, ta cua zacahni sii ra.

⁹Ta sa siñi ra mago cuan sa i catyi rey cuan, i quihin ra ityi cuahan ra. Ta tiño sa i ndyehe ra ityi caña ñicandyi, cuahan ti ityi nuu ra ndya i saa ti ta sicuñi ti nu ndyaa lee cuan.

¹⁰Ta sa i ndyehe ra mago vatyi i sicuñi tiño cuan, zii xaan i cuñi ra.

¹¹Ta i quihvi ra sisi vehe, ta i ndyehe ra sii lee cuan sihin ña María zihí ra. Ta i sicuñi siti ra, ta zacahnu ra sii ra Jesús. Ta ziqui i nuña ra ndaha tyiño ra, ta i saha maa ra xuhun cuan, ta cutu ta ndutya vixi.

¹²Ta sa yaha ndyehe ra sii ra Jesús, ta ziqui zii ityi i cua nuhu ra ndya ñuu ra vatyi i zacoto minoo ángel ra Ndyoo sii ra sisi ñimahna vatyi ma cunanuhu ra nu ndyaa ra Herodes.

**Sino ña María ta ra José
ndya nu cu si Egipto**

¹³Cuahan ra mago cuan ta ziqui i quituu minoo ángel ra Ndyoo nuu ra José sisi ñimahna, ta i catyi si: Nduvita ta cuhun sii ra luhlu ta sii zihí ra, ta cuhun ndo ndya Egipto. Yucuan ndoo ndo ndya quivi cua

catyi sihin ndo vatyi cuñi cahñi ra Herodes sii ra luhlu.

¹⁴Tacuan i catyi ángel cuan ta i nduvita ra José, ta i quihin ra sii ra luhlu ta sii zihí ra. Ta zuun ñi sa cuaa cuan i quita ñu ta cuahan ñu ndya Egipto.

¹⁵I ndoo ñu yucuan ndya i sihi ra rey Herodes. Cuhva ya i cuu si vatyi tacuan ta cua quita si cuhva i catyi minoo ra profeta nu i catyi ra cuhva i nacatyi maa ra Ndyoo: “Cua nacane sii Zehi ndya Egipto.” Catyi ra.

**Tava ra Herodes tyiño vatyi
cua cuu tandihi ra ndyihí**

¹⁶Quivi i sito ra Herodes vatyi sacu ndyaa ra mago sii ra, ta ñá zavaha ra cuhva i catyi ra, yaha xaan i cuxaan ra. Ta i tava ra tyiño vatyi cahñi zandaru sii tandihi ra ndyihí sa uu cuiya ta sa ndyihí ca ñuu Belén ta inga ñuu ndyaa yatyi. Tacuan i zavaha ra vatyi tañi tacuan cuu cuiya ra Jesús sica iñi ra sa cuenda cuhva i catyi ra mago cuan sihin ra.

¹⁷Ta cuhva i sahñi ra Herodes sii ra ndyihí, i quita si cuhva i tyaa ra Jeremías, minoo ra profeta ta sa naha. Tyehen i tyaa ra:

¹⁸I quita minoo nduzu ñihi nu cu si Ramá.

Sacu xaan ñiyivi, ta sacu saa ñu. Maha Raquel sacu sa cuenda zehe ña, ta ma cutaxi ña vatyi yoñi ca si.

I catyi Tuhun Ndyoo vatyi cua cuu si cuhva cuan. Ta zuun ñi cuhva cuan i quita si.

¹⁹Ta sa yaha sihi ra Herodes, ta i quituu tucu minoo ángel ra Ndyoo

ityi nuu ra José sisi ñimahna nu ndyaa ra Egipto, ta i catyi si sihin ra:

²⁰Nduvita ta cuhun sii ra luhlu ta sii zihí ra ta cunanuhu ndo ndya Israel vatyi sa sihi ra cuñi cahñi sii ra luhlu.

²¹Tacuan i catyi ángel cuan, ta i nduvita ra José, ta i quihin ra sii ra luhlu ta sii zihí ra, ta i sinanuhu ñu ndya Israel.

²²Zoco i ñihi ra José tuhun vatyi ndyaca ñaha ra Arquelao nu cu si Judea sa cuenda ra Herodes zutu ra, ta i yuhu xaan ra José cuhun ra yucuan. Ta i cahan tucu ángel sihin ra sisi ñimahna, ta yucuan cuenda cuahan ñu ndya nu cu si Galilea.

²³Ta sa saa ñu yucuan, i ndoo ñu ñuu Nazaret. Ta cuhva cuan i quita si tañi catyi minoo ra profeta vatyi i catyi ra vatyi cua catyi ñiyivi vatyi minoo ra nazareno cuu ra Jesús.

Cuhva i cahan ra Juan, ra i zacoo ndutya sii ñiyivi

3 Quivi cuan i quisi ra Juan, ra zacoo ndutya sii ñiyivi, ndya nu cu si Judea. Minoo nu ityi xaan nu yoñi maa ñiyivi iyo i saa ra, ta i nacatyi ra Tuhun Ndyoo sihin ñiyivi i saa nu ndyaa ra.

²Ihya cuu cuhva i catyi ra: Zama ndo cuhva iyo ndo vatyi sa cuñi saa quivi cundyaca ñaha ra Ndyoo ihya ñuu ñiyivi. Catyi ra.

³Ta ra Juan cuu ra i cahan ra Isaías tuhun quivi i tyaa ra tuhun i saha ra Ndyoo sii ra, ta i catyi ra:

Cua cuiñi ndo nduzu minoo ra cana saa minoo nu ityi xaan.

Ta catyi ra cuan: “Tañi zanduvaha ndo minoo ityi,

tacuan zanduvaha ndo ñima ndo vatyi cua quisi ra ndyaca ñaha sii yo.

Tañi zandundoo ndo ityi, tacuan zama ndo cuhva iyo ndo.”

Tacuan i tyaa ra Isaías ta sa naha sa cuenda ra Juan, ra cua quisi cueca.

⁴Ta ra Juan cuan, siñoho ra zahma ixi camello. Ta sinuhñi zinda ñhi sisi ra. Ta i sasi ra minoo nuu quití tañi tica, ta sihi ra tyahiñu ñuñu.

⁵Ñiyivi ñuu Jerusalén ta tandihi yuñuu Judea ta ñu ndyaa vatyi yuu Jordán, cuahan ñu cua tyizoho ñu sa cahan ra Juan.

⁶Ta sa yaha nahma ñu cuatyi ñu, ta i zacoo ndutya ra Juan sii ñu yuu Jordán cuan.

⁷I ndyehe ra Juan vatyi saa cuaha xaan ra fariseo sihin ra saduceo vatyi cuñi ra coo ndutya ra, ta i catyi ra Juan sihin ra: iÑiyivi quiñi xaan iyo cuu ndo tañi coo! ¿Yoo sa catyi sihin ndo vatyi cuu cacu ndo sihin cuhva sa cua tasi tuñi ra Ndyoo sii ñiyivi?

⁸Cuñi si sa zama ndisa cuii ndo cuhva iyo ndo, ta zavaha ndo sa vaha.

⁹Ta ma caca iñi ndo sihin ñima ndo vatyi ra Abraham cuu zutu ndo, ta ma caca iñi ndo vatyi maa ra cua zacacu sii ndo. Ma zacahnu ndo sii ndo vatyi vazu sihin yuu ya, ta cuu zavaha ra Ndyoo ñiyivi sii ra Abraham sihin si.

¹⁰Tañi yutu ña saha siti cuu maa ndo vatyi ña zavaha ndo cuhva cuñi ra Ndyoo. Ta yutu sa ña saha siti, sahndya ñiyivi sii tu. Ta sahmi ñu sii tu. Ta zuun ñi cuhva cuan cua cuhun maa ndo nu cayu ñuhu.

¹¹Ndisa zacoo ndutye sii ndo sihin ndutya tatu zama ndo cuhva iyo ndo. Zoco vasi inga ra cahnu ca ta ziqui mi. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii. Ta maa ra cua zacoo ndutya sii ndo sihin Tatyí li ta sihin ñúhu.

¹²Sa ndaha ra pala ra ta cua zanduvii ra siti trigo ra, ta cua tava ziin ra zoo si. Cua zandu-iin ra sii trigo ra, ta cua cucumi vaha ra sii si, ta cua cahmi ra zoo si sisi minoo ñúhu sa ma ndahva. Tacuan i catyi ra Juan sihin ñiyivi.

Cuhva i sicoo ndutya ra Jesús

¹³Tacuan ta i quita ra Jesús nu cu si Galilea, ta i quisi ra ndya yuu Jordán nu ndyaa ra Juan vatyí cuñi ra sa cua zacoo ndutya ra Juan sii ra.

¹⁴Ta ñá cuñi ra Juan zacoo ndutya sii ra vatyí catyi ra: Tahan si sa zacoo ndutya moo sii mi. ¿Ta ñaa cuenda catyun sa zacoo ndutye suun?

¹⁵Zoco i catyi ra Jesús sihin ra: Nacuu si cuhva catyi suhun vityí vatyí tacuan cuñi si zavaha yo tandíhi cuhva ndoo, cuhva cuñi ra Ndyoo. Tacuan i catyi ra Jesús, ta ziqui i ndoo ra Juan vaha.

¹⁶Ta sa yaha i sicoo ndutya ra Jesús, ta i quita ra sisi ndutya cuan. Ta zuun ñi caa cuhva cuan i nuña andívi, ta i ndyehe ra Jesús Tatyí li ra Ndyoo. Noo si tañi noo minoo paloma ziqui ra.

¹⁷Ta tacuan ta i cahan minoo ra cahan sisi andívi ta i catyi ra: Ihya cuu zehi. Cuñi xein sii ra. Zií xaan cuñi sihin ra.

Cuhva i nducu coto ihñi cuihna sii ra Jesús atu tyaa ra yahvi sii Ndyoo a sii cuihna

4 Ta ziqui i sindyaca Tatyí li sii ra Jesús minoo nu ityi xaan nu yoñi maa ñiyivi iyo vatyí cua nducu coto ihñi cuihna sii ra.

²Ta ñá sasi ra Jesús uu xico quívi ta uu xico sa cuaa, ta ziqui i sizoco ra.

³Ta cuhva cuan i tuhva cuihna sii ra vatyí cua nducu coto ihñi ra sii ra, ta catyi ra: Tatu ndisa vatyí Zehe ra Ndyoo cuu suun, catyun sihin yuu sa catuu ihya vatyí nanduu si pan.

⁴Zoco i nacahan ra Jesús ta catyi ra: Catyi Tuhun Ndyoo vatyí ña maa sihin sa casi ñi yo cundito yo. Sihin sa sasi yo ndito coño ñuhu yo, zoco sihin sa tyaa yo yahvi tuhun cahan ra Ndyoo ta ndito ñima yo sa ndisa cuii. Catyi ra Jesús sihin cuihna.

⁵Tacuan ta i sindyaca cuihna sii ra Jesús ndya ñuu Jerusalén. Ta i zandaa ra sii ra xiñi vehe ñuhu cahnu. Ta i catyi ra sihin ra Jesús:

⁶Tatu ndisa vatyí Zehe ra Ndyoo cuu suun, ndavon ndya nu ñuhu vatyí catyi Tuhun Ndyoo: “Cua cuhva ra Ndyoo tyiño sii ángel ra vatyí zacuenda ra suun. Cua naqueen ra suun sihin ndaha ra, ta ma ñicuehe sohon sihin minoo yuu.”

⁷Tacuan i catyi cuihna, ta i catyi ra Jesús sihin ra: Catyi tucu Tuhun Ndyoo vatyí ma nducu coto ihñi ndi sii ra Ndyoo ra ndyaca ñaha sii ndi.

⁸Yaha cuan ta i sindyaca cuihna sii ra Jesús xiñi minoo yucu zucu xaan, ta i zañaha ra tandíhi ñuu

ñiyivi sii ra ta cuhva sa tyaqui xaan caa si.

⁹Ta i catyi ra sihin ra Jesús:

Ndaha mi ndyaa tandihi ya vatyí saha ra Ndyoo sa cundyaca ñehi tandihi ñuu ñiyivi ya. Ta cua cuhve tandihi si suun tatu cua cuiñi situn nui ta zacahnun sii. Catyi cuihna.

¹⁰Zoco i catyi ra Jesús sihin ra:

Cuiñi siyo suun sii, cuihna vatyí catyi Tuhun Ndyoo vatyí iin ñi sii maa ra Ndyoo ra ndyaca ñaha sii ndi cua zacahnu ndi. Ta iin ñi tyiño maa ra cua zacuu ndi. Catyi ra Jesús sihin cuihna.

¹¹Ta ziqui i zandoo cuihna sii ra Jesús, ta i quisi tyindyee ángel sii ra.

I quisaha ra Jesús zatyíño ra tyiño ra Ndyoo nu cu si Galilea

¹²Quivi i ñihi ra Jesús tuhun vatyí i tyihi ñiyivi sii ra Juan vehe caa, i quita ra yucuan ta cuahan ra ndya Galilea.

¹³Zoco ñá ndoo ra ñuu Nazaret. Cuahan ra cua cundyaa ra ñuu Capernaum. Mínoo ñuu sa ndyaa yatyí ñi yuhu miñi yatyí nu cu si Zabulón ta Neftalí cuu si.

¹⁴Tacuan i cuu si vatyí cua quita si cuhva i tyaa ra Isaías, mínoo ra profeta ta sa naha. Tyehen i tyaa ra Isaías:

¹⁵Nu cu si Zabulón ta Neftalí, ityi cuahan yo miñi tatu sa yaha yo yuu Jordán, yucuan cuu nu cu si Galilea nu ndyaa ñiyivi sa yivi ñiyivi hebreo cuu.

¹⁶Ñiyivi cuan sicoo ñu nu ñaa xaan, zoco i ndyehe ñu mínoo ñúhu ndisi xaan.

Quivi cuan cua cuu cuii ñu, zoco i zandundisi ñúhu cuan nu ndyaa ñu.

¹⁷Ndya quivi i quihvi ra Jesús Galilea, ta i quisaha nacatyí ra Tuhun Ndyoo sihin ñiyivi. Tyehen i catyi ra: Zandoo ndo cuatyí ndo, ta zama ndo cuhva iyo ndo vatyí sa cuiñi saa quivi cua cundyaca ñaha ra Ndyoo ñuu ñiyivi.

Cuhva i cana ra Jesús sii cumi tahan ra tiin tyiyaca

¹⁸Ta i sica noo ra Jesús yuhu miñi Galilea. Ta i ndyehe ra sii uu tahan ra sihin yañi ra. Mínoo ra nañi ra Simón, ta Pedro nañi tucu ra. Ta inga ra nañi ra Andrés. Cañi ra traya ra nu ndutya vatyí yucuan cuu tyiño i zacuu ra.

¹⁹Ta i catyi ra Jesús sihin ra: Coho ndo sihin, ta cua cuhve cuhva nducu ndo sii ñiyivi tañi cuhva nducu ndo sii tyiyaca. Tacuan i catyi ra Jesús sihin ra.

²⁰Ta ta sica ñi i zandoo ihno ra traya ra, ta cuahan ra sihin ra Jesús.

²¹Ta i sica ra Jesús zuhva ca sihin ra ityi nuu ca ta i ndyehe ra sii ra Jacobo sihin ra Juan zehe ra Zebedeo. Ñoho ra mínoo barco sihin zutu ra. Nazuhva ra traya ra. Ta i cana ra Jesús sii ra.

²²Ta zuun ñi caa cuhva cuan i zandoo ra sii zutu ra sihin barco ra, ta i sindyico ra sii ra Jesús.

Zacuaha ra Jesús sii cuaha xaan ñiyivi

²³Sica noo ra Jesús nacahnu Galilea. Zacuaha ra sii ñiyivi sisi vehe ñuhu tahan tahan ñuu. Ta nacatyí ra Tuhun Vaha sihin ñiyivi

cuhva cua cundyaca ñaha ra Ndyoo. Ta i zanduvaha ra sii ñiyivi cuhu tandihi cuii nuu cuehe.

²⁴I sito ñiyivi tuhun ra Jesús nacahnu Siria. Ta i quisi ndyaca ñu sii tandihi ñu cuhu ziin ziin nuu cuehe a tatu iyo sa uhu sii ñu. Ta i quisi ndyaca ñu sii ñu ñoho tatyí cuihna, ta ñu cuhu cuehe meme, ta ñu xii. Ta i zanduvaha ra Jesús sii ñu.

²⁵Ta cuaha xaan ñiyivi sa ndyaa Galilea i sindyico ñu sii ra. Ta tacuan tucu ñiyivi ñuu Decápolis, ta ñuu Jerusalén ta nacahnu Judea ta ñiyivi ndyaa inga siyo yuu Jordán ndihi ca.

Cuhva i sahan ra Jesús xiñi minoo yucu ta i zacuaha ra sii ñiyivi

5 I ndyehe ra Jesús vatyí cuaha xaan ñiyivi, ta i ndaa ra minoo yucu, ta i sicundyaa ra yucuan. Ta i siconduu i sicundyaa ñiyivi ndyico sii ra nu ndyaa ra.

²Ta i quisaha zacuaha ra Jesús sii ñu, ta tyeheh catyí ra:

Ñiyivi sa zii xaan cuñi

³Sa iyo sa vaha sii ñiyivi vityí tatu sa sito ñu vatyí siñi ñuhu ra Ndyoo sii ñu vatyí tahan si sii ñu sa cundyaca ñaha ra Ndyoo sii ñu.

⁴Sa iyo sa vaha sii ñiyivi cuihya iñi vityí vatyí cua zanaa ra Ndyoo tucuihya iñi sii ñu.

⁵Sa iyo sa vaha sii ñiyivi zanduluhlu sii, vatyí cuee ca cua cuhva maa ra Ndyoo sa cundyaca ñaha ñu ñuu ñiyivi ya.

⁶Sa iyo sa vaha sii ñiyivi cuñi xaan zavaha tandihi sa ndoo, cuhva cuñi ra Ndyoo vatyí cua tyindyee

ra Ndyoo sii ñu, ta cua cuu xaan zavaha ñu sa vaha.

⁷Sa iyo sa vaha sii ñiyivi cundahvi iñi sii inga ñiyivi vatyí Ndyoo cua cundahvi xaan iñi ra sii maa ñu.

⁸Sa iyo sa vaha sii ñiyivi sa ñahñi cuatyí iyo añima vatyí cua ndyehe ñu sii maa ra Ndyoo.

⁹Sa iyo sa vaha sii ñiyivi nducu cuhva zacoo sa taxi nu iyo cuatyí vatyí cua catyí ra Ndyoo vatyí zehe maa ra cuu sii ñu.

¹⁰Sa iyo sa vaha sii ñiyivi tatu zandyehe inga ñiyivi tundoho sii ñu sa cuenda sa vaha sa zavaha ñu. Ndisa vatyí sa ndyaca ñaha ra Ndyoo sii ñu.

¹¹Sa iyo sa vaha sii ndo tatu quiñi xaan cahan ñiyivi sihin ndo sa cuenda mi ta tatu zavaha xaan ñu sa ndya vaha ñi sihin ndo ta tatu cahan ñu ndya vaha ñi sii ndo ta ña ndisa cuu si.

¹²Cuzii xaan iñi ndo tatu tacuan zavaha ñu sihin ndo vatyí cahnu xaan sa vaha cua ñihi ndo andivi vatyí zuun ñi cuhva ña vaha cuan i zavaha ñiyivi sihin ra profeta quivi cumañi ca cacu maa ndo.

Tañi ñii ta ñúhu cuu maa yo ñuu ñiyivi ya

¹³Maa ndo cuu tañi ñii sa cuenda ñuu ñiyivi ya. Zoco tatu ña uhva ca ñii, ¿yozo caa tyindyee si? Tatu ña uhva ca si ña vaha ca si. Zavita yo sii si, ta cuañi ñiyivi ziquí si.

¹⁴Maa ndo cuu tañi ñúhu sa cuenda ñuu ñiyivi ya. Tatu ndyaa minoo ñuu xiñi minoo yucu ma cuu sa cundyaa xehe si.

¹⁵Ta ña tuhva ñiyivi tyaa minoo lámpara ta tyihi ñu sii si xu minoo

cajón. Ña tacuan vatyi zucu tyaa ñu sii si, ta zandisi si sa cuenda tandihi ñiyivi yucu vehe.

¹⁶Tacuan tucu maa ndo, zavaha ndo sa vaha ityi nuu ñiyivi, ta cua ndyehe ñu tyiño ndo, ta cua zacahnu ñu sii Zutu mañi yo, ra ndyaa andivi.

**Cuñi si sa tyaa yo yahvi
sii ley ra Ndyoo**

¹⁷Ma caca iñi ndo vatyi yuhvi vasi zanei cuhva tyaa ñiyivi yahvi sii ley ra Ndyoo sa i tyaa ra Moisés a cuhva i tyaa ra profeta. Ña vasi zandihi cuhva iyo sii si cuan. Vasi ta tyei yahvi sii tandihi sa catyi tuhun cuan.

¹⁸Sa ndisa catyi sihin ndo vatyi nii ñi sa iyo andivi ta ñuhu ñuu ñiyivi, ma naa nu siin cuhva iyo sii ley ra Ndyoo. Tandihi sa catyi ley sa tahan si cuu, ta cua cuu si.

¹⁹Yucuan cuenda yoo ra ma zavaha minoo ley ra Ndyoo, vazú ley luhlu cuu ley cuan, ta tatu cua nacatyi tucu ra sihin ñiyivi vatyi ma zavaha ñu sii si, ra zavaha cuhva cuan cua cuu ra ra luhlu ca nu ndyaca ñaha ra Ndyoo. Zoco ra zavaha sii si ta zacuaha ra sii inga ñiyivi vatyi tahan si zavaha ñu sii si, minoo ra cahnu cua cuu ra nu ndyaca ñaha ra Ndyoo andivi.

²⁰Vatyi catyi sihin maa ndo vatyi tatu ma zavaha ndo sa ndoo ca ta zavaha ndo tañi ra maestro cuenda ley ta ra fariseo, nu yozo cuui ca ta ma cuu quihvi ndo nu ndyaca ñaha ra Ndyoo.

Ña vaha cuxaan yo sihin ñiyivi

²¹Sa siñi ndo cuhva i catyi ra Ndyoo sihin ñiyivi ta sa naha. I

catyi ra: “Ma cahñi ndo sii ñiyivi. Yoo ra cua cahñi sii minoo ñiyivi, tahan si sa cutuñi ra.”

²²Zoco yuhvi catyi sihin ndo tatu cuxaan ndo sihin minoo ñiyivi, tahan si sa tasi tuñi ra Ndyoo sii ndo. Ta tatu cahan cuehe ndo sii minoo ñiyivi, tahan si sa tasi tuñi ra cu tyiño sii ndo. A tatu catyi ndo vatyi laa xaan minoo ñiyivi, coto vaha ndo coto cuhun ndo andyaya.

²³Yucuan cuenda quivi cuhun vehe ñuhu ta ndohon ofrenda sa cua cuhvon sii ra Ndyoo, tatu nacohon iñun vatyi iyo sa zavohon sii inga ñiyivi

²⁴zandoon sa cua cuhvon sii ra Ndyoo yucuan. Ta cuhun xihnon ta ndacon tucahnu iñi sii ñu cuan, ta nacoo vohon sihin ñu, ta ziqui cuhun ta cuhvon ofrendon sii ra Ndyoo.

²⁵Tatu iyo ra sica cuatyi sohon, ta cuahan ra suhun nu ndyaa juez, nducun cuhva nacoo vohon sihin ra ityi cuahan ndo coto nacuhva cuenda ra suun sii ra juez. Ta ra juez cua nacuhva cuenda suun sii policia, ta cua tyihi ra cuan suun vehe caa.

²⁶Ta sa ndisa catyi suhun vatyi tatu tacuan cua cuu, ma quiton ndya tyiyahvun tandihi sa tahan si tyiyahvun.

**Nacatyi ra Jesús vatyi ña vaha
caca iñi rayii ndyehe ra inga
ñaha tatu yivi ñazihí ra cuu**

²⁷Sa siñi maa ndo tuhun i catyi ra Ndyoo ta sa naha vatyi ma cuu coo inga ñaha ndo ta ma cuu coo inga yii ndo.

²⁸Zoco yuhvi catyi sihin ndo vatyi tatu ndyehe ndo sii minoo

ñaha ta cuñi ndo sii ña, sa zavaha ndo cuatyí sa cuu adulterio sihin ña sisi añima ndo cuu si cuhva cuan.

²⁹Ta tatu ndyehe ndo minoo sa ndyehe ndo ta sa cuenda si ta cuñi xaan ndo zavaha ndo sa ña vaha, ma ndyehe ca ndo sii si coto coo cuatyí ndo ta cuhun ndo andyaya.

³⁰A tatu iyo sa tuhva ndo zavaha sihin ndaha ndo ta sihin si cuan quisaha coo cuatyí ndo, ma zavaha ca ndo sii si inga saha coto cuhun ndo andyaya.

**Ma cuu zandoo rayii sii
ñazihí ra ta tani tutu ñu**

³¹Ta catyí tucu Tuhun Ndyoo sihin ñiyivi ta sa naha: “Yoo ra cuñi zandoo sii ñazihí, cuñi si sa nducu ra cuhva tani tutu ñu sihin ley.”

³²Zoco yuhvi catyí sihin ndo vatyí tatu iyo minoo ra cua nducu ra cuhva tani tutu ra sihin ñazihí ra ta ñahñi cuatyí ña iyo sihin inga rayii, zoco cua coo cuatyí adulterio sii ña tatu zandoo yí ña sii ña ta quihin ña sii inga rayii. Ta ra cua tindaha sihin minoo ñaha zandoo yí sii, zavaha tucu maa ra cuatyí adulterio cuan.

Ña vaha sa tyiñaha yo Ndyoo

³³Ta sito tucu ndo vatyí i catyí ra Ndyoo sihin ñiyivi ta sa naha vatyí tatu sa tyiñaha ñu Ndyoo, cuñi si sa zavaha ñu cuhva catyí ñu.

³⁴Zoco yuhvi catyí sihin ndo vatyí ma cuaha xaan cahan ndo tatu cuñi ndo sa cua sino iñi ñiyivi sa cahan ndo. Ma catyí ndo: “Sito vaha Ndyoo.” Ma cahan ndo tuhun andiví vatyí yucuan cuu nu ndyaa maa ra Ndyoo.

³⁵Ma cahan ndo tuhun ñuu ñiyivi vatyí yucuan cuu nu sañi saha ra. Ta nu tuhun ñuu Jerusalén ta ma cahan ndo vatyí yucuan cuu ñuu ra Ndyoo, ra rey cahnu.

³⁶Ta nu tuhun xiñi ndo ta ma catyí ndo, vatyí maa ndo ta ma cuu zanducuisi ndo a zandutoon ndo numinoo ixi xiñi ndo sa ndisa.

³⁷Cuenda catyí ñi ndo: “Ndisa.” A catyí ndo: “Yívi.” Ta ñahñi ca sa cua cahan ndo. Tatu ñaa ca sa tuhva ndo cahan, zañaha si vatyí ña ndisa ndo.

**Ma zavaha yo sa ña vaha sihin
ñiyivi zavaha sa ña vaha sihin yo**

³⁸Sa siñi tucu ndo cuhva i tyaa ra Moisés ta sa naha nu catyí si vatyí tatu cañi ñiyivi sii ndo ta zativi ñu minoo siti nuu ndo cuñi tucu si sa zativi minoo ra cu tyiño siti nuu ñu. A tatu coco ñu minoo noho ndo, zuun ñi sihin cuhva cuan cua ndoho maa ñu, ta cua quita minoo noho ñu.

³⁹Zoco yuhvi catyí sihin ndo: Ma zavaha ndo sa ña vaha sihin ñiyivi zavaha sa ña vaha sihin ndo. Tatu iyo ra cati minoo siyo xitun, cuhva ndihun inga siyo nacati ra.

⁴⁰A tatu iyo ra tyaa cuatyí saton nuu ra cu tyiño ta ñahñi cuatyun ta cuñi ra quindyaa ra camison, cuhva ndihun siqueton sii ra.

⁴¹A tatu yoo ra zañiñi suun sa cuizon carga ra minoo kilómetro, cuizon sii si uu kilómetro.

⁴²Cuhvon sii yoo ra sica suun, ta tatu cua caca noo ñiyivi sa suun, ma catyun vatyí ma cuhvon.

**Cuñi si sa cuñi yo sii
ñiyivi xaan iñi sii yo**

⁴³Ta sa siñi ndo cuhva tuhva ñiyivi catyi vaty vaty ñu vaty nacuñi xaan yo sii ra tahan yo, ta nacuxaan xaan yo ndyehe yo sii ra xaan iñi sii yo.

⁴⁴Zoco yuhvi catyi sihin ndo vaty cuñi ndo sii ñu xaan iñi sii ndo. Vaha cahan ndo sihin ñiyivi cahan ndya vaha ñi sihin ndo. Zavaha ndo sa vaha sihin ñiyivi ña cuu ndyehe sii ndo. Ta cahan ndo sihin ra Ndyoo cuenda ñiyivi cahan cuehe sii ndo ta ñu zavaha sa ña vaha sihin ndo.

⁴⁵Tatu zavaha ndo tacuan, cua cuu ndo zehe ra Ndyoo Zutu yo sa ndisa cuui, ra ndya andivi, vaty maa ra i tyaa ñicandyi, ta zandisi si nu yucu ñiyivi ña vaha ta ñiyivi vaha. Ta zacoon ra zavi ziqui ñu vaha ta ziqui ñu ña vaha.

⁴⁶Tatu iin ñi sii ñiyivi cuñi sii ndo cuñi tucu ndo, ñahñi sa vaha zavaha ndo cuhva cuan vaty tacuan tucu zavaha ñiyivi quiñi iyo tañi ra tava xuhun cuenda ra ndyaca ñaha. (Ta quiñi xaan iyo ra cuan cuñi maa ndo.)

⁴⁷Ta tatu saha ndo ndyoo nacucumi iin ñi sii ra tahan ndo, ¿ña sa vaha zavaha ndo cuhva cuan? Ndyo ñiyivi ña sito sii ra Ndyoo ta cahan ñu sihin tahan ñu cuhva cuan.

⁴⁸Cuu ndo ñiyivi ñahñi maa cuaty. Tañi Zutu yo, ra ndyaa andivi, vaty ñahñi maa cuaty ra iyo caña ñi.

**Nacaty ra Jesús yozo caa tahan
si cuhva yo caridad sii ñiyivi**

6 Ma zavaha ndo sa vaha nuu ñiyivi ñi vaty cuñi ndo sa

ndyehe ñu. Tatu tacuan zavaha ndo, ñahñi sa cua cuhva Zutu yo, ra ndyaa andivi, sii ndo.

²Yucuan cuenda tatu tyindyee ndo sii ñu ndahvi, ma nacaty ndo sihin tandihi ñiyivi tañi zavaha ra sahan vehe ñuhu ta nuyahvi ta zaha ra tuhun vaty vaha xaan ra. Zavaha ra sa vaha vaty cuñi ra sa cua zacahnu ñiyivi sii ra. Ta sa ndisa catyi sihin ndo vaty sihin sa yucuan ñi ta sa ñihi ra sa vaha. Ñahñi ca sa cua cuhva maa ra Ndyoo sii ra.

³Zoco tatu zavaha maa ndo tumañi iñi sii ñiyivi ndahvi, xehe ñi zavaha ndo sii si, minoo cuhva sa ma coto nu amigo ndo.

⁴Xehe ñi tyindyee ndo sii ñiyivi ndahvi. Ta cua ndyehe ra Ndyoo Zutu yo cuhva zavaha ndo sa xehe ñi, ta cua cuhva maa ra sa vaha sii ndo sa cuenda si.

**Zañaha ra Jesús yozo caa cuñi
si cahan yo sihin ra Ndyoo**

⁵Ta tatu cua cahan ndo sihin ra Ndyoo, ma cuu ndo tañi ra zaha tuhun vaty vaha xaan ra, ta ña ndisa ra vaty tahan iñi ra cahan ra sihin ra Ndyoo nu tuu ñiyivi vaty cuñi ra sa cua ndyehe ñu. Yucuan cuenda cua cuñi ndyaa ra sisi vehe ñuhu a ityi cahnu ta cahan ra sihin ra Ndyoo. Sa ndisa catyi sihin ndo vaty sihin sa ndyehe ñiyivi sii ra sihin sa zavaha ra, ta sa ñihi ra sa cua ñihi ra.

⁶Zoco tatu cua cahan maa ndo sihin ra Ndyoo, quihvi ndo nu yoñi ndyehe, ta nacazi ndo yuvehe ta cahan ndo sihin ra Ndyoo Zutu yo sa maa ñi maa ndo. Cua ndyehe

maa ra cuhva zavaha ndo sa xehe ñi, ta cua cuhva ra sa vaha sii ndo sa cuenda si.

⁷Cuhva cahan ndo sihin ra Ndyoo ma cahan ndo zuun ñi sa cahan ndo uu a uñi saha tañi zavaha ñiyivi ña sito sii ra Ndyoo. Sica iñi ñu vatyí cua cuiñi ra Ndyoo sa cahan ñu tatu cuaha xaan cahan ñu.

⁸Ma cuu ndo tañi maa ñu vatyí sa sito ra Ndyoo Zutu yo ñaa sa siñi ñuhu sii ndo cuee ca sa caca ndo sii ra.

⁹Yucuan cuenda cahan ndo sihin ra Ndyoo tyehen:

Ndyoo Zutu ndi, ra ndyaa andivi, ii xaan cuu zivi moo.

¹⁰Nasaa quivi cua cundyaca ñohon ihya ñuu ñiyivi.

Nazavaha ñiyivi cuhva cuñi moo ihya ñuu ñiyivi tañi cuu si ndya gloria.

¹¹Cuhvon sa siñi ñuhu sii ndi minoo minoo quivi.

¹²Ta zohon tucahnu iñi sii ndi sa cuenda cuatyí ndi tañi maa ndi zaha ndi tucahnu iñi sii ñiyivi zavaha sa ña vaha sihin ndi.

¹³Ma cuhvon sa nducu coto ihñi cuihna sii ndi coto zavaha ndi sa ña vaha.

Vatyí moo cuu ra ndyaca ñaha, ta moo cuu ra iyo xaan tundyee iñi sii, ta tahan si zacahnu tandihí ñiyivi suun tandihí cuii tyiemvu. Ta nacuu si sa ndisa.

Tacuan cahan ndo sihin ra Ndyoo.

¹⁴Vatyí tatu zaha maa ndo tucahnu iñi sii ñiyivi zavaha sa ña vaha sihin ndo, tacuan tucu cua zavaha Zutu yo ra ndyaa andivi.

Cua zaha ra tucahnu iñi sii maa ndo.

¹⁵Zoco tatu ma zaha maa ndo tucahnu iñi sii inga ñiyivi, ma zaha tucu Zutu yo tucahnu iñi sii maa ndo, ta ma zandasi ra cuatyí ndo.

Zacuaha ra Jesús ziquí cuhva cuñi si coo ndyitya yo

¹⁶Ta ziquí i catyí ra Jesús sihin ñiyivi: Quivi ma casi ndo ta cahan ndo sihin ra Ndyoo, ma zanducuihya ndo iñi ndo tañi zavaha ñiyivi zaha tuhun vatyí vaha xaan ñu. Ta ma cahyí ndo ñiyaa nuu ndo tañi zavaha maa ñu. Tacuan zavaha ñu vatyí cuñi ñu sa cua ndyehe ñiyivi sii ñu ta nacoto ñu vatyí ña sasi ñu. Zoco catyí sihin ndo vatyí ñahñi cua ñihi ñu sihin ra Ndyoo vatyí yivi sa cuenda maa ra zavaha ñu sii si.

¹⁷Zoco maa ndo tatu ñaa quivi cua coo ndyitya ndo ta cahan ndo sihin ra ndyoo, nacatya ndo nuu ndo, ta tyihi ndo xahan xiñi ndo.

¹⁸Tacuan zavaha ndo vatyí ma coto ñiyivi vatyí ñá sasi ndo. Minoo tuhun ñi maa ra Ndyoo cua ndyehe cuhva zavaha ndo, ta cuaha sa vaha cua cuhva ra sii ndo ta cua ndyehe ñiyivi.

Cuhva zavaha yo ta cua coo cuaha sa vaha sii yo ndya andivi

¹⁹Ma zacaya xaan ndo xuhun a ndaha tyiño ndo ihya ñuu ñiyivi coto tiví si a coto zativi tiquixi sii si. Ta coto quihvi ra zuhu ta quihin ra sii si.

²⁰Vaha ca tatu zacaya ndo ndaha tyiño ndo ndya andivi vatyí yucuan ma zativi tiquixi sii si. Ta ma tiví si.

Ta ma cuu quihvi ra zuhu ta quihin ra sii si.

²¹Vatyi catyi sihin ndo vatyi nu ndyaa sa cuca ndo, yucuan cuu nu ndyaa añima ndo.

Siti nuu yo cuu tañi minoo sa zandisi sii yo ta cuu ndyehe yo nu cuahan yo, ta tacuan tucu tatu iyo sa ndisi sa saha ra Ndyoo añima yo, vaha ñiyivi cuu yo

²²Siti nuu ndo cuu tañi minoo sa zandisi sii ndo. Ta tacuan tucu añima ndo, tatu maa ñi sa vaha ra Ndyoo iyo añima ndo, vaha ñiyivi cuu ndo.

²³Zoco tatu ña vaha siti nuu ndo, ñahñi sa zandisi nu cuahan ndo. Ta zuun ñi cuhva cuan, tatu ñahñi sa ndisi ra Ndyoo iyo añima ndo, a tatu iyo si zoco ña tyaa ndo yahvi sii si, cuaha xaan cuatyi ndo iyo, ta sica noo ndo nu ñaa.

Ma cuu cuñi xaan yo sii ra Ndyoo tatu cuñi xaan yo xuhun

²⁴Ma cuu zatyño minoo muzu sa cuenda uu tahan patrón vatyi cua cuñi ca ra sii minoo patrón ra, ta ma cuñi ca ra sii inga ra. A sii minoo ra cua tyaa ra yahvi, ta sii inga ra ma tyaa ra yahvi. Ma cuu cuñi ndo sii ra Ndyoo ta cuñi ndo sii xuhun.

Zacuenda ra Ndyoo sii tandihi zehe ra

²⁵Ta i catyi tucu ra Jesús: Yucuan cuenda catyi sihin ndo, ma caca xaan iñi ndo yozo caa cua ñihi ndo sa casi ndo ta sa coho ndo ñuu ñiyivi ya. Ta ma caca xaan iñi ndo yozo caa cua ñihi ndo zahma

quihvi ndo. Zoco nuu ra Ndyoo ñiñi ca añima ndo ta coño ñuhu ndo ta ziqui sa casi ndo ta sa ndihvi ndo. Maa ra saha sa ndito ndo, ta cua cuhva ra tandihi sa siñi ñuhu sii ndo.

²⁶Ndyehe ndo cuhva iyo zaa sa sica noo ityi ziqui. Ña tasi ti. Ña zatyño ti. Ñahñi nu naquihin vaha ti tyiño zacuu ti, ndihi ca. Zoco sasi ti vatyi maa ra Ndyoo zacasi sii ti. Ta ñiñi xaan ca cuu maa ndo ityi nuu ra Ndyoo ta ziqui zaa cuan.

²⁷¿Ta yoo ndo cuu nduzucu ca ndo siin ca tatu caca xaan iñi ndo sa cuenda si? Ma cuu ca.

²⁸¿Ta ñaa cuenda sica xaan iñi ndo sa cuenda zahma ndo? Ndyehe ndo cuhva sahnu ita sisi cuhu vatyi ña tavi si, ta ña cono si iza.

²⁹Zoco catyi sihin ndo vatyi cuca xaan ra rey Salomón ta tyaqui xaan zahma ra, zoco ña tyaqui ca si ta ziqui minoo ita cuan.

³⁰Ta tatu zandutyaku xaan ra Ndyoo sii tu-ita sa iyo vityi ta ityaan cua nduu tu nducu ta cayu tu, tyaqui xaan tucu zahma cua cuhva ra sii maa ndo. Zoco maa ndo ña sino vaha iñi ndo sii ra.

³¹Yucuan cuenda catyi sihin ndo: Ma caca xaan iñi ndo ta catyi ndo: “¿Ñaa sa cua casi ndi? ta ¿naa sa cua coho ndi? ta ¿yozo caa ñihi ndi zahma quihvi ndi?”

³²Vatyi sica xaan iñi ñiyivi ña sito sii ra Ndyoo sa cuenda tandihi si cuan. Zoco maa Zutu mañi yo sa sito ra vatyi siñi ñuhu tandihi si cuan sii ndo.

³³Vaha ca nducu ndo cuhva yozo caa cua cuhva cuenda ndo sii ndo sii ra Ndyoo vatyi cundyaca ñaha

ra sii ndo ta maa ñi sa vaha xaan zavaha ndo tañi zavaha maa ra, ta tacuan ta cua kuhva ra tandihi sa siñi ñuhu sii ndo.

³⁴Zacuenda maa ra Ndyoo sii ndo vityi ta ityaan, ndihi ca. Yucuan cuenda ma caca xaan iñi ndo sa cuenda sa cua cuñi si sii ndo ityaan. Caca iñi ndo vityi iin ñi sa cuenda sa siñi ñuhu sii ndo vityi.

Ma cahan cuehe ndo sii ñiyivi

7 Ma cahan cuehe ndo sii ñiyivi coto catyi tucu ra Ndyoo vatyi ña vaha zavaha tucu maa ndo.

²Vatyí kuhva ndyehe maa ndo sii inga ñiyivi, tacuan tucu cua ndyehe ra Ndyoo sii ndo. Ta tatu tyaa ndo cuatyí sata ñiyivi, zuun ñi kuhva cuan cua tyaa ra Ndyoo cuatyí sata maa ndo.

³¿Yozo caa vatyí cuu ndyehe ndo cuatyí luhlu ñi sa iyo sii inga ñiyivi ta tañi minoo mihin luhlu ñi sa ñoho siti nuu ñu cuu si? Ta ña ndyehe ndo cuatyí cahnu xaan sa iyo sii maa ndo, ta cuu si tañi minoo mihin cahnu sa ñoho nuu maa ndo.

⁴Ta ñaa cuenda catyun sihin yañun vatyí nacuhva ra sa tavon mihin luhlu sa ñoho siti nuu ra, ta ña tuu iñun sa ñoho minoo mihin cahnu siti nuu moo.

⁵Cuhva cuan, zohon tuhun vatyí vaha xoon, ta ña ndisa. Tava xihnon mihin sa ñoho siti nuu moo, ta ziquí cua ndundisi ndyehun, ta cua cuu tavon mihin luhlu sa ñoho siti nuu yañun.

⁶Ta ma zañiñi ndo ta cahan ndo Tuhun Ndyoo sihin ñiyivi ña cuñi coto, coto cañi ñu sii ndo. Tañi ina

cuu ñiyivi ña cuñi Tuhun Ndyoo. Ta tañi zativi quiñi sii sa vaha, tacuan tucu iyo maa ñu. Cua cahan ñu ndya vaha ñi sii Tuhun Ndyoo.

Ma cundihí iñi ndo cahan ndo sihin ra Ndyoo

⁷Caca ndo sii ra Ndyoo, ta cua kuhva ra sa sica ndo. Nanducu ndo, ta cua nañihi ndo. Cati ndo yuvehe, ta cua nuña si.

⁸Vatyí tandihi ndoho ra sica, cua ñihi ndo. Ta tatu nanducu ndo, cua nañihi ndo. Ta tatu cati ndo yuvehe, cua nuña si.

⁹Maa ndo ra cu zutu sa ndyihí, tatu cua caca zehun minoo pan, ¿atu cua kuhva ndo minoo yuu sii ra? Ña tacuan.

¹⁰A tatu cua caca ra minoo tyiyaca, ¿atu cua kuhva ndo minoo coo?

¹¹Ñiyivi quiñi cuu maa ndo, zoco sito ndo yozo caa kuhva ndo sa vaha sii zehe ndo, vaha xaan ca cua zavaha Zutu yo, ra ndyaa andivi. Cua kuhva ra sa vaha sii ñiyivi sica sii ra.

¹²Ta tatu cuñi ndo sa cua zavaha ñiyivi sa vaha sihin maa ndo, tacuan zavaha tucu maa ndo sihin maa ñu tandihi saha vatyí yucuan cuu sa catyi ley ra Moisés ta libro i tyaa ra profeta ta sa naha.

Tihin yuvehe ta cuiñi ityi sa cuahan nu ndyaa ra Ndyoo

¹³Nducu ndo kuhva quihvi ndo yuvehe tihin vatyí quihin yuvehe ta quihin ityi sa cuahan nu cunaa ñiyivi andyaya. Ta cuaha xaan ñiyivi cuahan ityi cuan.

¹⁴Zoco tihin yuvehe ta cuiñi ityi sa cuahan nu ma cuu ca ñiyivi, ta

zuhva cuii ñi ñiyivi cua nañihi ityi cuan.

**Nacoto yo tatu vaha ñiyivi
tatu zavaha ñu sa vaha**

¹⁵Zacuenda ndo sii ndo sihin ra vatya ta catyi ra vatyi cahan ra sa cuenda ra Ndyoo. Vasi ra tañi minoo mvee ticaty, zoco añima ra ñoho sa quiñi caa.

¹⁶Cuu nacoto ndo sii ra sa cuenda cuhva zavaha ra. Tañi yutu ña vaha, tacuan iyo ra vatyi minoo tu mihndya ma cuu cuhva tu mango. Ta minoo iñu ma cuhva tu uva.

¹⁷Ta tacuan cuu si. Tandihí yutu vaha, saha tu siti vaha. Ta tandihí yutu ña vaha, ña vaha siti tu.

¹⁸Minoo yutu vaha, ma cuu cuhva tu siti ña vaha. Ta minoo yutu ña vaha, ma cuu cuhva tu siti vaha.

¹⁹Ta tandihí yutu sa ña saha siti vaha, tuhva ñiyivi cahndya sii tu, ta cayu tu.

²⁰Ta zuun ñi sihin cuhva cuan, cuu nacoto yo sii ñiyivi sihin cuhva zavaha ñu.

**Ña tandihí ñiyivi cuu quihvi nu
ndyaca ñaha ra Ndyoo andivi**

²¹Ña tandihí ñiyivi sa catyi sihin: “Zutu mañi yuu, Zutu mañi yuu”, cuu quihvi ñu nu ndyaca ñaha ra Ndyoo andivi. Maa ñi ñiyivi zavaha cuhva cuñi ra Ndyoo Zuti, cuu quihvi ñu.

²²Quivi cua tasi tuñi ra Ndyoo sii ñiyivi, cuaha xaan ñu cua catyi tyehen sihin: “Zutu mañi yuu, nduhvi i cahan ndi sihin zivi moo, ta sihin zivi moo tava ndi tatyí ña vaha, ta i zavaha ndi cuaha xaan sa ndyityi.” Cua catyi ñu.

²³Zoco yuhvi cua catyi: “Ña site sii ndo. Cuini siyo ndo sii, ta cuahan ndo vatyi ñá zavaha ndo sa vaha sa i catyi sihin ndo.”

**Cuhva cua cuu si sihin ñiyivi tyaa
yahvi sa cahan ra Jesús, ta cuhva
cua cuu si sihin ñiyivi ña tyaa yahvi**

²⁴Tyehen catyi sihin ndo, tatu yoo ra tyizoho sa quehin ta zavaha ra sii si, cuu ra tañi minoo ra siñi tuñi vaha. Cono xaan i sitya ra ndya tahan ra minoo yuu cahnu, ta i zandaa ra vehe ra ziqui yuu cuan.

²⁵Ta i coon xaan zavi, ta i cucono yuu. Ta ñihi xaan i ñoho tatyí, zoco ñá nduva vehe cuan vatyi i zandaa ra sii si ziqui yuu cuan.

²⁶Zoco ra siñi sa quehin ta ña zavaha ra sii si, cuu ra tañi minoo ra tondo xaan, ra i zandaa vehe nu ñiyiti ñi. Ñá zavaha ra cimientu si.

²⁷Ta i coon zavi. Ta i cucono yuu, ta ñihi xaan i sicaa tatyí, ta i nduva vehe cuan, ta cua naa si.

²⁸Ta nu i ndihí cahan ra Jesús, iyo xaan i cuñi ñiyivi sihin cuhva zacuaha ra

²⁹vatyi zacuaha ra tañi minoo ra ndyaca ñaha. Ñá zacuaha ra tañi ra maestro cuenda ley.

**Cuhva i zanduvaha ra Jesús
sii minoo ra tyahyu**

8 Cuhva i noo ra Jesús yucu cuan, cuaha xaan ñiyivi i sindyico sii ra.

²Ta i tuhva minoo ra cuhu cuehe tyahyu sii ra Jesús. Ta i sicuñi siti ra nuu ra ta catyi ra: Tata, iyo cuhva suun, ta cuu zanduvohon sii tatu cuñun.

³Ta i tyizo ra Jesús ndaha ra xiñi ra, ta i catyi ra: Cuñi. Sa nduvohon.

Ta zuun ñi caa cuhva cuan, i quita cuehe cuan sii ra, ta ndaha nduvaha ñi ra.

⁴Ta i catyi ra Jesús sihin ra: Ndyehun vatyí ma nacatyun sihin numinoo ñiyívi. Cuhun nu ndyaa ra cu zutu, ta cuhvon ofrenda sii ra Ndyoo tañi i catyi ra Moisés cua cuhva ñiyívi tatu sa nduvaha ñu. Ta tacuan ta cua coto tandíhi ñiyívi vatyí sa i nduvohon.

Zanduvaha ra Jesús sii minoo muzu ra ndyaca ñaha sii zandaru

⁵I quíhvi ra Jesús ñuu Capernaum, ta minoo ra ndyaca ñaha sii minoo ziendu zandaru i tuhva sii ra ta i sica ra tumañi iñi sii ra, ta catyi ra:

⁶Tata, cuhu xaan minoo ra luhlu, ra cu muzi. Catuu ra, ta sa cuñi xii ra, ta ndyehe xaan ra tundoho.

⁷Ta i catyi ra Jesús sihin ra: Cua cuhin, ta cua zanduvehi sii ra.

⁸Ta i nacahan ra ndyaca ñaha sii zandaru cuan, ta i catyi ra: Ña tahan si sa cuhun vehi vatyí ra cahnu xaan ca cuu moo. Tatu cua catyi moo vatyí cua nduvaha muzi, cua nduvaha ra.

⁹Vatyí zuun ñi iyo tucu ra ndyaca ñaha sii, ta iyo tucu zandaru ra ndyaca ñehi. Tatu catyi sihin minoo ra vatyí cuhun ra, cuhun ra. Ta tatu catyi sihin inga ra vatyí quisi ra, cua quisi ra. Ta tatu ñaa tyiño tave sii minoo muzi, zavaha ra sii si.

¹⁰Tacuan i catyi ra, ta sa siñi ra Jesús cuhva cahan ra, iyo xaan i cuñi ra, ta i catyi ra sihin ñiyívi ndyico sii ra: Catyi sihin ndo vatyí tañaha ca nañihi sii minoo ra hebreo ra sino iñi sii ra Ndyoo tañi sino iñi ra ya.

¹¹Ta catyi sihin ndo vatyí cua quisi cuaha xaan ñiyívi ndya ityi caña ñicandyi ta ndya ityi cua iñi, ta cua cundyaa ñu ta casi ñu sihin ra Abraham, ta ra Isaac ta ra Jacob nu ndyaca ñaha ra Ndyoo andivi.

¹²Zoco ñiyívi i tahan si cuhun yucuan, ma cuu cuhun ñu. Cua tyihi ra Ndyoo sii ñu minoo nu ñaa nu cua vacu xaan ñu, ta cua casi quihñi noho ñu sa cuenda tundoho sa ndyehe ñu.

¹³Ta ziqui i catyi ra Jesús sihin ra ndyaca ñaha sii zandaru: Cuahan ndya vehun vatyí cuu si tañi cuhva sino iñun. Tacuan i catyi ra Jesús, ta zuun ñi caa cuhva cuan i nduvaha muzu ra.

Zanduvaha ra Jesús sii tyizo ra Simón Pedro

¹⁴Cuahan ra Jesús ndya vehe ra Pedro, ta yucuan i ndyehe ra sii tyizo ra Pedro. Catuu ña nu sito. Cuhu ña sihin cahñi.

¹⁵I tiin ra Jesús ndaha ña, ta i quita cahñi cuan. Ta i nduvita ña, ta i quisaha zavaha ña sa casi ra.

Zanduvaha ra Jesús sii cuaha xaan ñiyívi cuhu

¹⁶Sa tyizo ñicandyi, ta sa tyahan cuan i quisi ndyaca ñiyívi sii cuaha xaan ñu ñoho tatyí cuihna nu ndyaa ra Jesús. Ta i tava ra tatyí ña vaha cuan sihin minoo ñi tuhun cahan ra, ta i zanduvaha tucu ra sii tandíhi ñu cuhu.

¹⁷Tacuan i cuu si vatyí cua quita si cuhva i catyi ra Isaías; minoo ra profeta i cuu ra ta sa naha. Tyehen i catyi ra: “I quindyaa ra cuehe yo, ta i zanduvaha ra sii yo.”

Ñu sa cuñi cundyico sii ra Jesús

¹⁸Ta cuhva sa ndyehe ra Jesús vatyi cuaha xaan ñiyivi siconduu cuii yucu ñu sihin ra, i catyi ra vatyi cua yaha ra inga siyo miñi.

¹⁹Ta i tuhva minoo ra maestro cuenda ley sii ra Jesús, ta i catyi ra sihin ra: Maestro, cuñi cundyique suun vazu ndya ndya maa cuohon.

²⁰Ta i catyi ra Jesús sihin ra: ¿Atu cundyeen iñun? vatyi ñicuii ca ta iyo vehe ti, ta zaa iyo taca ti. Zoco ra i quisi ndya gloria, ñahñi maa vehe ra iyo.

²¹Ta ziqui inga ra ndyico sii ra Jesús, i catyi ra sihin ra: Tata, cua cundyique suun, zoco cuatu noo ndya nacuu xihna zuti ta ziqui cua cundyique suun.

²²Ta i catyi ra Jesús sihin ra: Yoho cundyicon sii vityi, ta natyihii ñiyivi ña sito sii ra Ndyoo sii tahan sihi sihin ñu sisi ñuhu.

Zacutaxi ra Jesús taty sihin ndutyaa

²³Tacuan ta i quihvi ra Jesús minoo barco sihin ra i casi ra.

²⁴Ta i quisaha caa minoo taty ñihi xaan ndya cuhva ndya cuñi zahvi ndutyaa sii barco cuan. Ta quixi ra Jesús.

²⁵Ta sahan ra sica noo sihin ra, ta i zandoyo ra sii ra, ta catyi ra sihin ra: ¡Tata, zacacun sii yo; sa cuñi cunaa yo!

²⁶Ta i nacahan ra Jesús, ta catyi ra: ¿Ñacu yuhu xaan ndo? Zuhva cuii ñi sino iñi ndo. Catyi ra. Tacuan ta i nduvita ra, ta i cahan ra sihin taty ta sihin ndutyaa, ta i cutaxi si.

²⁷Ta iyo xaan i cuñi ra ndihi sihin ra, ta catyi ra: ¿Yoo ra cuu ra ya?

vaty cuhva ndya taty ta cuhva ndya ndutyaa ta tyaa si yahvi sii ra.

Ra sa ñoho taty cuihna

²⁸Ta cuhva sa i saa ra Jesús inga siyo miñi cuan ndya nu cu si Gadara, i quita uu tahan ra nu ñaña, ta i tuhva ra sii ra. Ñoho taty cuihna sii nduu tahan ra cuan, ta xaan xaan ra ndya cuhva yoñi cuu yaha ityi cuan.

²⁹Ta i quisaha cana saa ra, ta catyi ra: ¿Ñaa sa cuñun sihin ndi, yoho Jesús zehe ra Ndyoo? ¿Atu vasi zandyehun tundo ho sii ndi cumañi ca sa tahan si quivi?

³⁰Tacuan i zacahan cuihna sii ra cuan. Ta yatyi ñi yucuan sica noo cuaha xaan quini. Sasi ti.

³¹Ta i sica taty cuihna cuan tumañi iñi sii ra Jesús vatyi tatu cua tava ra sii si, naquihvi si sisi quini cuan.

³²Ta i catyi ra Jesús sihin si: Vaha, cuahan ndo. Ta i quita taty cuihna sii nduu tahan rayii cuan, ta i quihvi si sisi quini cuan. Ta ziqui tandihi quini cuan, i sino ti nu iñi noo yuhu miñi, ta i sihi tandihi ti sisi ndutyaa.

³³Ta ra zacuenda quini cuan, i sino ra, ta cuahan ra ndya ñuu, ta i nacaty ra sihin ñiyivi tandihi sa i tahan ra siñoho taty cuihna cuan.

³⁴Ta ziqui i quita tandihi ñiyivi ñuu cuan, ta cuahan ñu nu ndyaa ra Jesús vatyi cuñi ñu ndyehe ñu sii ra. Ta sa ndyehe ñu sii ra, i zañiñi ñu sii ra sa naquita ra ñuu ñu.

Zanduvaha ra Jesús sii minoo ra xii

9 I quihvi ra Jesús sisi minoo barco, ta i yaha ra ta saa ra inga siyo miñi, ta i saa ra zuun ñi ñuu maa ra.

²Ta i sindyaca ñiyivi sii minoo ra cuhu nu ndyaa ra Jesús. Ndyizo ra sii ra cuan sihin minoo tyuhva. Ta sa ndyehe ra Jesús cuhva sino xaan iñi tandihi ra, ta i catyi ra sihin ra cuhu cuan: Ra luhlu, ma nducuihya iñun. Sa ndasi cuatyun.

³Tacuan ta zuhva ra maestro cuenda ley, i sica iñi ra: “Quiñi xaan cahan ra ya sii ra Ndyoo.” (Vatyí zaha ra Jesús tuhun vatyí Ndyoo cuu ra, cuñi ra cuan.)

⁴Ta ra Jesús i sito ra ñaa sa sica iñi ra, ta i catyi ra sihin ra cuan: ¿Ñaa cuenda sica iñi ndo minoo cuhva ña vaha?

⁵¿Ñaa sa yii ca catyi yo? ¿Atu yii ca catyi yo: “Sa ndasi cuatyun”, a yii ca catyi yo: “Nduviton ta cacón”? (Ña yii catyi yo: “Sa ndasi cuatyun.” Vatyí yivi sa ndyehe yo cuu cuhva cuan. Ma coto ñiyivi tatu ndisa a ña ndisa. Zoco cua ndyehe ñu tatu zanduvaha yo sii minoo ñiyivi sa ndisa.)

⁶Cua zañehi sii ndo vatyí iyo cuhva sii vii, ra i quisi ndya gloria, sa zandasi cuatyí ñiyivi ñuu ñiyivi. Ta ziqui i catyi ra Jesús sihin ra xii: Nduviton. Nacuhun tyuhvon, ta cuhun ndya vehun.

⁷Tacuan ta i nduvita ra xii cuan, ta cuahan ra ndya vehe ra.

⁸Ta sa ndyehe ñiyivi cuhva cuan, i yuhu xaan ñu, ta i zacahnu xaan ñu sii ra Ndyoo vatyí i saha xaan ra cuhva sii ra Jesús.

Cana ra Jesús sii ra Mateo

⁹I quita ra Jesús yucuan, ta i ndyehe ra sii minoo ra nañi Mateo. Ndyaa ra nu zatyyihvi ra sii ñiyivi cuenda xuhun ra ndyaca ñaha.

Ta i catyi ra sihin ra: Coho sihin. Tacuan ta i nduvita ra Mateo, ta cuahan ra sihin ra.

¹⁰Yaha zuhva quivi ta sahan ra Jesús sa casi ra xita vehe ra Mateo. Ta iin ñi sihin ra Jesús ta sihin ra sica noo sihin ra sasi cuaha xaan ra tava xuhun cuenda ra ndyaca ñaha ta inga ra iyo cuatyí.

¹¹Ta sa ndyehe ra fariseo cuhva cuan, i ndaca tuhun ra sii ra sica noo sihin ra Jesús ta catyi ra: ¿Ñaa cuenda sasi ra maestro ndo sihin ra tava xuhun ta sihin inga ra iyo cuatyí?

¹²Ta i siñi ra Jesús tuhun cuan, ta i catyi ra: Ñiyivi iyo vaha, ña siñi ñuhu minoo médico sii ñu, zoco sii ñu cuhu siñi ñuhu médico.

¹³Cuhun ndo ta cutuhva ndo cuhva catyi si nuu tutu ra Ndyoo nu catyi si tyehen: “Cuñi sa cua cundahvi iñi ndo sii ñiyivi, ta ma zañiñi xaan ndo sa cahñi ndo quiti sa cuenda cuatyí ndo.” Vatyí ña vasi cane sii ñiyivi vaha, vasi cane sii ñu iyo cuatyí vatyí cuñi sa cua zama ñu cuhva iyo ñu.

Ndaca tuhun ñiyivi sii ra Jesús tatu cuñi si sa coo ndyitya ñiyivi

¹⁴Tacuan ta ra ndyico sii ra Juan, ra zacoo ndutyá sii ñiyivi, i tuhva ra sii ra Jesús, ta i ndaca tuhun ra sii ra: ¿Ñaa cuenda vatyí maa ndi ta ra fariseo tuhva xaan ndi coo ndyitya, ta ra sica noo sihin moo, ña tuhva ra?

¹⁵Ta i nacahan ra Jesús ta catyi ra: ¿Atu cuu sa ma casi ñu ñoho minoo vico tindaha nii ñi sa ndyaa ra i tindaha sihin ñu? Ma cuu. Zoco cua saa quivi cua cuhun ra

i tindaha, ta ziqui ndisa vatyi ma casi ñu.

¹⁶Tacuan i catyi ra Jesús, ta ziqui i cahan ra ziqui inga cuhva ta catyi ra: Yoñi ñiyivi natyaa zuhva zahma saa sii zahma sahnú vatyi cua ndiyi zahma saa cuan, ta cua tahndya ca zahma sahnú cuan.

¹⁷Ta inga cuhva, yoñi zavaha ndixi panela saa sisi quizi sahnú vatyi cua cuizo si ta ndaa si ta cua cahndi quizi sahnú cuan. Cuñi si quizi saa tatu zavaha ñiyivi ndixi panela saa vatyi ma tahvi quizi cuan, ta ma ndoyo ñuhu ndixi cuan. (I cahan ra Jesús cuhva ya vatyi ma cuu nazaca yo cuhva zacuaha maa ra sihin costumbre sahnú.)

Nduvaha zehe ra Jairo, ta i tiin minoo ñaha yuzahma ra Jesús

¹⁸Ñi ñi sa cahan ra Jesús cuhva cuan, ta i saa minoo ra cu tyiño cuenda ñu hebreo, ta i sicuñi siti ra nuu ra Jesús, ta catyi ra: Sa sihi minoo zehi, zoco tatu cua cuhun ndya vehi ta tyizon ndohon sii ña, cua nandoto ña. Catyi ra.

¹⁹Ta i nduvita ra Jesús sihin ra sica noo sihin ra, ta cuahan ra sihin ra cuan.

²⁰Ta ityi cuahan ra Jesús, i tuhva minoo ñaha sii ra. Sa usi uu cuiya sa cuhun ña, cuehe sa cuu ña niñi. Ta i quisi ña ityi sata ra Jesús, ta i tiin ña yuzahma ra.

²¹Vatyi sica iñi ña: “Vazu zahma ñi ra cua tiin, ta nduvehi.”

²²Zoco i nasico cava ra Jesús, ta i ndyehe ra sii ña, ta catyi ra: Cuzii xaan iñun, zihí. I nduvohon vatyi i sino iñun sii. Ta zuun ñi caa cuhva cuan i nduvaha ña.

²³Ta cuhva sa saa ra Jesús vehe ra cu tyiño cuan, i ndyehe ra vatyi sa tiví música, ta cuvaa xaan ñiyivi, ta sacú saa ñu.

²⁴Ta i catyi ra sihin ñu: Quita ndo ihya. Ñá sihi ña luhlu ya. Quixi ña. Tacuan i catyi ra, ta i sacú ndyaa ñu sii ra.

²⁵Zoco i tava ra Jesús sii ñu, ta ziqui i quihvi ra, ta i tiin ra ndaha ña, ta i nduvita ña.

²⁶Ta nacahnú cuii ityi cuan i sito ñiyivi cuhva i cuu.

Zanduvaha ra Jesús sii uu tahan ra cuaa

²⁷Ta sa quita ra Jesús yucuan, i sindyico uu tahan ra cuaa sii ra, ta cana saa ra, ta catyi ra: ¡Cundahvi iñun sii ndi Zehe ra David!

²⁸Ta sa yaha quihvi ra Jesús sisi vehe, i tuhva ra cuaa cuan sii ra. Ta i ndaca tuhun ra Jesús sii ra: ¿Atu sino iñi ndo vatyi cuu zanduvehi sii ndo? Ta i nacahan ra cuan, ta catyi ra: Sino iñi ndi, tata.

²⁹Tacuan ta i tiin ra Jesús siti nuu ra, ta i catyi ra: Nacuu si tañi cuhva sino iñi ndo.

³⁰Tacuan i catyi ra Jesús, ta i nduvaha siti nuu ra cuan. Ta i nacatyi ra Jesús sihin ra vatyi ma nacatyi ra sihin numinoo ñiyivi.

³¹Zoco cuahan ra ta i nacatyi ra sihin tandíhi ñiyivi ityi cuan cuhva i zavaha ra Jesús.

Zanduvaha ra Jesús sii minoo ra ñehe

³²Ta cuhva sa cua quita ra yucuan, i quisi ndyaca ñiyivi sii minoo ra ñehe sii ra Jesús. Ñoho minoo tatyi cuihna sii ra cuan.

³³I tava ra Jesús sii tatyí cuihna cuan, ta ziquí i quisaha cahan ra ñehe cuan. Ta iyo xaan i cuñi ñiyivi, ta i catyi ñu: Tañaha ca ndyehe maa yo ñiyivi hebreo minoo sa tyehen.

³⁴Zoco i catyi ra fariseo: Ihya ra tava tatyí cuihna sihin tundyee iñi sii ra cu nuu sii cuihna.

Cundahvi xaan iñi ra Jesús sii ñiyivi

³⁵I sica noo ra Jesús tahan tahan ñuu nahnu ta ñuu ndyihí. Zacuahá ra sii ñiyivi sisi vehe ñuhu tahan tahan nu cuahan ra. I nacatyí ra Tuhun Vaha sa cuenda cuhva ndyaca ñaha ra Ndyoo. Ta zanduvaha ra sii ñiyivi tandihí cuii nuu cuehe.

³⁶Ta sa ndyehe ra sii ñiyivi, i cundahvi xaan iñi ra sii ñu vatyí ndyehe xaan ñu tundoho, ta sica noo ñu ityi cuan ityi ya tañi mvee ticatyí sa yoñi zacuenda sii.

³⁷Tacuan ta i catyi ra Jesús sihin ra sica noo sihin ra: Sa ndisa quehin vatyí cahnu xaan itu, zoco yoñi cuñi zatyíño ta zaquee ra sii si.

³⁸Yucuan cuenda caca ndo sii sitofo itu vatyí natasi ra muzu cua zaquee sii si.

I casi ra Jesús usi uu tahan ra apóstol

10 I casi ra Jesús usi uu tahan ra. Ta i saha ra tundyee iñi sii ra, ta i cuu tava ra tatyí cuihna, ta zanduvaha ra tandihí nuu cuehe ta tundoho.

²Ta ihya cuu zivi sa usi uu tahan ra cuan. Xihna ca ra Simón. Pedro nañi tucu ra, ta ra Andrés yañi ra. Inga ra nañi Jacobo, ta ra Juan

yañi ra. Nduu tahan ra cuu zehe ra Zebedeo.

³Ta ra Felipe tucu, ta ra Bartolomé, ta ra Tomás, ta ra Mateo; ra i tava xuhun cuenda ra ndyaca ñaha cuu ra Mateo. Ta ra Jacobo zehe ra Alfeo, ta ra Lebeo. Nañi tucu ra Tadeo.

⁴Ta inga ra nañi ra Simón. Maa ra cuu cuenda minoo ityi ra cuñi zama sii ra ndyaca ñaha. Ta inga ra nañi ra Judas Iscariote. Cuae ca ta i xico ra sii ra Jesús.

I tasi ra Jesús sii sa usi uu tahan ra i casi ra vatyí cua nacatyí ra Tuhun Ndyoo sihin ñiyivi

⁵I tasi ra Jesús sii sa usi uu tahan ra cuan, ta ihya cuu sa i catyi ra sihin ra: Ma cuhun ndo nu yoñi ñiyivi hebreo, ta ma quihvi ndo ñuu nu cu si Samaria.

⁶Zoco cuhun ndo nu yucu ñiyivi hebreo vatyí tañi mvee ticatyí sa cua naa cuu ñu.

⁷Ta ityi cuahan ndo, nacatyí ndo Tuhun Ndyoo sihin ñiyivi, ta catyi ndo vatyí sa cuñi saa quivi cundyaca ñaha ra Ndyoo ñuu ñiyivi.

⁸Zanduvaha ndo sii ñu cuhu.

Zanandoto ndo sii ñu i sihi. Zanduvaha ndo sii ñiyivi cuhu cuehe tyahyu, ta tava ndo tatyí cuihna. Sa caha ñi ñihi maa ndo cuhva ya, ta sa caha ñi tyindyee maa ndo sii ñiyivi.

⁹Ma cuizo ndo xuhun cuenda ityi, nu xuhun cuaan, ta nu xuhun cui, ta nu xuhun cuatyí.

¹⁰Numinoo yiti ma cuizo ndo. Ma cuizo ndo inga camisa a zapato a minoo tutatu vatyí tahan si sa cuhva ñiyivi sa casi ra zatyíño tañi maa ndo.

¹¹Tatu cua saa ndo minoo ñuu cahnu a ñuu luhlu, nanducu ndo sii minoo ra vaha, ta ndoo ndo vehe ra ndya quivi cua quita ndo ñuu cuan.

¹²Cuhva sa saa ndo minoo vehe catyi ndo: “Nacoo sa vaha sii ra Ndyoo sihin ndo.”

¹³Ta tatu vaha ñiyivi cuu ñu vehe cuan, nandoo si tacuan, zoco tatu yivi ñiyivi vaha cuu ñu, naquihin ndo tuhun vaha i cahan ndo sihin ñu.

¹⁴Ta tatu ma tiin cuenda ñiyivi sii ndo, ta ña cuñi ñu tyizoho ñu sa cahan ndo, quita ndo vehe cuan ta ñuu cuan ta naquizi ndo saha ndo vaty ma cahun nu ñiyaca ñuu cuan sihin ndo.

¹⁵Sa ndisa catyi sihin ndo vaty quivi cua tasi tuñi ra Ndyoo sii ñiyivi, cuaha ca tundoho cua ndyehe ñiyivi ñuu cuan ta ziqui niyivi ñuu Sodoma ta ñuu Gomorra.

Cuhva cua zavaha ñiyivi sa ña vaha sihin ñiyivi sino iñi

¹⁶Ndyehe ndo, tañi mvee ticaty cuu maa ndo, ta tasi sii ndo nu yucu lobo. Listo xaan cuu ndo tañi coo, zoco mazu xaan cuu iñi ndo tañi paloma.

¹⁷Ta zacuenda vaha ndo sii ndo sihin ñiyivi vaty cua cuhva cuenda ñu sii ndo sii ra cu tyiño. Ta cua cañi ñu sii ndo sisi vehe ñuhu.

¹⁸Ta cundyaca ñu sii ndo nuu ra ndyaca ñaha ta nuu ra gobierno sa cuenda mi. Ta tacuan ta cua ñihi ndo cuhva cahan ndo sa cuenda mi nuu ra cuan ta nuu ñiyivi sa yivi ñiyivi hebreo cuu.

¹⁹Ta cuhva sa cua cuhva cuenda ñu sii ndo sii ra cu tyiño, ma caca

xaan iñi ndo ñaa sa cua cahan ndo vaty sa zuun ñi caa cuhva cuan cua cuhva maa ra Ndyoo tuhun cua cahan ndo.

²⁰Vaty yivi maa ndo cua cahan. Taty li maa ra Ndyoo sa iyo añima ndo cua cuhva ra tuhun cua cahan ndo.

²¹Cua xico tuhun rayii zuun ñi sii yañi ra, ta cua cahñi ñiyivi sii ra. Ta cua xico tuhun zutu sa ndyihii sii zehe ra. Ta cua cuxaan zehe ñiyivi sihin zutu ñu ta sihin zihii ñu, ta cua cuhva cuenda ñu sii ñu vaty cahñi niyivi sii ñu.

²²Tandihii ñiyivi ñuu ñiyivi cua cuxaan sihin maa ndo sa cuenda mi, zoco ra ma zaña tuhun ndya nu cua ndihii tyiemvu, yucuan ra cua cacu.

²³Tatu quiñi xaan zavaha ñiyivi sihin ndo minoo ñuu, cono ndo ta cahun ndo ndya inga ñuu. Vaty sa ndisa catyi sihin ndo vaty tañaha ca ndihii cahun ndo tandihii ñuu ñiyivi hebreo ta cua quisi tucu ra i quisi ndya gloria.

²⁴Ña cahnu ca cuu minoo ra ndyico sii ra ta ziqui ra cu nuu sii ra. Ta ña cahnu ca cuu minoo muzu ta ziqui patrón ra.

²⁵Ra ndyico sii ra, nandoo ra vaha cuu ra tañi ra cu nuu sii ra. Ta nandoo ra cu muzu vaha cuu ra tañi patrón ra. Tatu mi, ra cu nuu vehe, ta catyi ñiyivi vaty ra cu nuu sii cuihna sa nañi Beelzebú cui, cuaha ca sa cua cahan ñu sii zehi.

Ra tahan si yuhu yo

²⁶Yucuan cuenda ma yuhu ndo sii ñiyivi. Ñahñi tuhun xehe sa ma quita nu ndisi. Ta ñahñi sa ñoho xehe ta ma coto ñiyivi sii si.

²⁷Tandihí tuhun cahan xehi sihin ndo, nacatyí ndo sihin ñiyívi. Ta tuhun sa xehe xaan quehin sihin ndo, cana saa ndo sii si ndya xiñi vehe.

²⁸Ma yuhu ndo sii ñiyívi cahñi coño ñuhu ndo vatyí ma cuu cahñi ñu añima ndo. Vaha ca cuyuhu ndo sii ra sa cuu cahñi sii ndo sa ndisa cuii ta zacuhun ra sii ndo andyaya.

²⁹Cuyahvi uu tahan zaa ndyíhi sa minoo peso. Caha xaan ndyaa tí, zoco ma cuu cuu numinoo tí ta canacava tí nu ñuhu tatu ma cuhva Zutu yo.

³⁰Ta ndya cuhva ndya ixi xiñi ndo, ta sito ra Ndyoo yozo tahan si.

³¹Yucuan cuenda ma yuhu ndo. Yahvi xaan ca ndyaa maa ndo ta ziquí ca cuaha xaan zaa ndyíhi.

**Ma yuhu yo cahan yo Tuhun
Ndyoo sihin ñiyívi**

³²Tandihí ñiyívi sa cua catyí sihin inga ñiyívi vatyí sito ñu sii, yuhví cua catyí tuquí sihin Zuti, ra ndyaa andívi, vatyí site sii ñu cuan.

³³Zoco ñiyívi cua catyí ityí nuu inga ñiyívi vatyí ña sito ñu sii, yuhví cua catyí tuquí ityí nuu Zuti, ra ndyaa andívi, vatyí ña site sii ñu cuan.

**Sa cuenda ra Jesús ta ma
cuu cu-iin ñiyívi**

³⁴Ma caca iñi ndo vatyí vasi cuhve sa coo sa taxi ñuu ñiyívi. Ña tacuan cuu si. Vasi ndyaque cuhva cahñi tahan ñiyívi.

³⁵Vasi zacahñi tehin rayíi sihin zutu ra ta ñu zihí sihin zihí ñu. Ta cua cahñi tahan sono ñiyívi sihin tyizo ñu.

³⁶Ta cua cuxaan tahan xaan ñiyívi sihin ñiyívi sii ñu.

³⁷Ra cuñi ca sii zutu ra a sii zihí ra ta ziquí sii mi, ña tahan si cuu ra ñiyívi cuenda mi. Ta ra cuñi ca sii zehe yíi ra a sii zehe zihí ra ta ziquí sii mi, ña tahan si cuu ra ñiyívi cuenda.

³⁸Ta ra ña cuñi cundyico sii, vazu cuu ra cuende, ña tahan si cuu ra ñiyívi cuenda.

³⁹Ra sa cuñi coo vaha xaan ta zacuenda ra sii ra ñuu ñiyívi, cunaa ra, ta cunaa ndaha tyiño ra sihin ra. Zoco ra saha sa cuu sa cuenda mi, cua cundito ra tandihí cuii tyiemvu.

**Cuhva ñihi ñiyívi sa
vaha sii ra Ndyoo**

⁴⁰Tatu tiin cuenda ñiyívi sii maa ndo, tiin cuenda ñu sii mi. Ta tatu tiin cuenda ñiyívi sii mi, tiin cuenda ñu sii ra i tasi sii.

⁴¹Ra tiin cuenda sii minoo ra profeta vatyí vasi ra sa cuenda ra Ndyoo, zuun ñi sa vaha cua cuhva ra Ndyoo sii ra tiin cuenda cuan tañi cua cuhva ra sii ra profeta cuan. Ta minoo ra tiin cuenda sii minoo ra vaha vatyí vaha ra, zuun ñi sa vaha cua cuhva ra Ndyoo sii ra tañi sa cua cuhva ra sii ra vaha cuan.

⁴²Ta yoo ra cua cuhva, vazu minoo vaso ndutyá visi ñi, sii minoo ra luhlu. Ndisa cuii cua cuhve sa vaha sii ra tatu zavaha ra cuhva cuan sa cuenda sa vatyí ndyico ra sii mi.

**Tasi ra Juan sii uu tahan ra sica noo
sihin ra ndya nu ndyaa ra Jesús**

11 Sa ndihí zacuaha ra Jesús cuhva ya sii sa usi uu

tahan ra i casi ra, ta ziqui i quita ra yucuan ta cuahan ra ziin ziin ñuu ityi cuan cua zacuaha ra ta nacatyí ra Tuhun Ndyoo sihin ñiyivi.

²Ñoho ra Juan vehe caa, ta i saa tyiño nu ndyaa ra sa cuenda cuhva zavaha ra Jesús. Yucuan cuenda i tasi ra sii uu tahan ra ndyico sii ra vatyí cua cahan ra sihin ra Jesús.

³Ta i ndaca tuhun ra cuan sii ra Jesús: ¿Atu yoho cuu ra Cristo, ra cua zacacu sii ndi a cuatu ca ndi naquisi inga ra?

⁴Ta i nacahan ra Jesús, ta i catyi ra sihin ra cuan: Cuahan ndo ta nacatyí ndo sihin ra Juan tandihi sa i ndyehe ndo ta sa siñi ndo.

⁵Nacatyí ndo sihin ra cuhva nandyehe ra cuaa, ta nacaca ra coxo ta nduvaha ra tyahyu ta nacuiñi ra zoho, ta cuhva nandoto ñiyivi i sihi. Ta nacatyí ndo cuhva siñi ñiyivi ndahvi Tuhun Vaha, cuhva cua cacu ñu.

⁶Ta catyi ndo sihin ra vatyí zii xaan cua cuñi ñiyivi tatu ma zaña ñu sa sino iñi ñu sii.

⁷Tacuan i catyi ra Jesús sihin ra ndyico sii ra Juan. Ta sa yaha cuahan ra cuan ta ziqui i quisaha cahan ra Jesús sihin ñiyivi sa cuenda ra Juan, ta catyi ra: ¿Ñaa sa sindyehe ndo quivi i sahan ndo nu ityi xaan nu yoñi ñiyivi iyo? ¿Atu sahan ndo vatyí cua ndyehe ndo minoo tuñi sa zacanda tatyí?

⁸Tatu yivi si cuan ñaa sa sindyehe ndo? ¿Atu sahan ndo vatyí cua ndyehe ndo sii minoo ra ñoho zahma vaha? Ña tacuan vatyí sa sito ndo vatyí ñiyivi ñoho zahma vaha xaan, iyo ñu vehe rey.

⁹¿Ñaa sa sindyehe ndo? ¿Atu sahan ndo vatyí cua ndyehe ndo

sii minoo profeta? Zuumi. Ta catyi sihin ndo vatyí ñiñi xaan ca ra cuu maa ra Juan ta ziqui ca tandihi ca ra profeta.

¹⁰Vatyí ra cuan cuu ra cahan si tuhun nuu tutu ra Ndyoo nu catyi si: “Yuhvi ra Ndyoo cua tasi sii minoo ra ityi nuu ca, ta cua zanduvaha ra cuhva iyo ñiyivi vatyí cua saa moo cuee ca, ta cua tyizoho ñu sa cohon.”

¹¹Sa ndisa catyi sihin ndo vatyí tandihi rayii ra cacu, yoñi inga ca ra ñiñi ca ta ziqui ra Juan. Zoco ra luhlu ca, ra cuhun nu ndyaca ñaha ra Ndyoo, cahnu ca ra ta ziqui ra Juan, ra zacoo ndutya sii ñiyivi.

¹²Ta ndya quivi i saa ra Juan ta ndya vityi cuahan coyo ñiyivi gloria, ñu cuñi ndisa cuii cuhun. Zoco zañihi ñu ta cua zahacanaa ñu sii si.

¹³Tandihi ra profeta ta ley ra Moisés ndihi ca, i cahan si sa cuenda cuhva cua cundyaca ñaha ra Ndyoo ndya cuhva ndya quivi i saa ra Juan.

¹⁴Ta tatu cuñi ndo sino iñi ndo sa quehin, ra Juan cuu ra Elías, ra tahan si quisi.

¹⁵Tatu ndyaa zoho ndo, cuiñi ndo.

¹⁶¿Ñaa ñi cuhva quehin sihin ñiyivi iyo vityí? ¿Tañi yoo ñi sa caa caa ñu? Caa ñu tañi sa ndyihí sa ndyaa nuyahvi, ta cana saa si sii tahan si, ta catyi si:

¹⁷“Tivi ndi cutu, ta ñá sata saha ndo. Ta sata ndi yaa tucuihya iñi, ta ñá sacu ndo.”

¹⁸Tacuan iyo maa ndo vatyí i quisi ra Juan, ta ñá sasi vaha ra, ta ñá sihi ra vino, ta catyi ndo vatyí ñoho minoo tatyí cuihna sii ra.

¹⁹Ta ziqui i saa mi, ra i quisi ndya gloria. Ta sasi ta sihi, ta catyi ndo vatyí tuhva xein coho ta cuahyi xein. Ta cuxaan ndo vatyí vaha ñiyívi cui sihin ra iyo cuatyí ta sihin ra tava xuhun cuenda ra ndyaca ñaha. Tacuan catyi ndo, zoco saha ra Ndyoo sa siñi tuñi maa ra sii ñiyívi sino iñi sii ra. Ta cua zañaha ñu sii maa ndo vatyí vaha sa siñi tuñi ra Ndyoo.

Cua ndyehe xaan ñiyívi tundoho vatyí ña tyaa ñu yahvi sa cahan ra Jesús

²⁰Tacuan ta ziqui i quisaha cuxaan ra Jesús ta cahan ra sihin sa minoo minoo ñuu nu i zavaha xaan ra sa ndyityi vatyí ñiyívi ñuu cuan, ñá zama ñu cuhva iyo ñu. Tyehen i catyi ra Jesús:

²¹iNdahvi yoho ñuu Corazín! iTa ndahvi yoho ñuu Betsaida! Vatyí tatu i zavehi sa ndyityi ndya ñuu Tiro ta ñuu Sidón tañi sa ndyehe maa ndo, sa ndisa vatyí cua zama ñu cuhva iyo ñu, ta cua nducuihya xaan iñi ñu sa cuenda cuatyí ñu ndya cuhva ndihvi ñu zahma toon ta tyaa ñu ñiyaa xiñi ñu.

²²Zoco quívi cua tasi tuñi ra Ndyoo sii ñiyívi, ñihi ca cua tasi tuñi ra sii maa ndo ta ziqui sii ñiyívi ñuu Tiro ta ñuu Sidón cuan.

²³Ta yoho ñuu Capernaum, ¿atu sica iñun vatyí cua ndoon ndya gloria? Cua noon ndya andyaya vatyí tatu i zavehi sa ndyityi ndya ñuu Sodoma tañi sa ndyehe ñiyívi ñuu Capernaum, ndisa vatyí ma zanaa ra Ndyoo ñuu Sodoma cuan ta cua coo si ndya cuhva ndya vityi.

²⁴Zoco catyi sihin ndo vatyí quívi cua tasi tuñi ra Ndyoo sii ñiyívi, ñihi

ca cua tasi tuñi ra sii ndoho ra ñuu Capernaum ta ziqui sii ñiyívi ñuu Sodoma.

Ñaha ndo, ta cuhve sa quitatu ndo, catyi ra Jesús

²⁵Ta cuhva cuan i catyi ra Jesús: Zacahnu xein suun Ndyoo Zuti. Yoho ndyaca ñohon andívi ta ñuu ñiyívi. Tyixehun sa siñi tuñi suun sii ñiyívi sica iñi vatyí sito xaan ñu, ta zañohon sii si sii ñu cuu tañi sa ndyihí ñuu ñiyívi ya.

²⁶Tacuan zavohon vatyí tacuan cuñi moo.

²⁷Ta ziqui i catyi tucu ra Jesús: Saha maa ra Ndyoo Zuti tandíhi sa iyo sii maa ra sii mi. Ta yoñi sa sito sii. Maa ñi ra Ndyoo Zuti cuu ra sito sii. Ta maa ñi mi site sii ra Ndyoo Zuti. Yoñi inga ra sito sii ra sa ndisa cuii. Ta zañehi sii yoo ra cuñi, cuhva iyo Zuti sa ndisa.

²⁸Ñaha ndo, tandíhi ndoho ra sitatu xaan sa cuenda tyiño ndo ta sa cuenda sa vee xaan ndyizo ndo cuatyí ndo ta cua cuhve sa quitatu ndo.

²⁹Cuhva ndo sa tyize yugo sa yozo xiñi mi xiñi ndo, ta cutuhva ndo sa cua zañehi sii ndo vatyí mi, vii xaan iye, ta zanduluhlu xein sii, ta cua nañihí ndo cuhva quitatu añima ndo.

³⁰Vatyí ña yíi maa cua cuizo ndo yugo sa cua tyize xiñi ndo, ta carga sa cua cuizo ndo sa cuenda mi, ña vee si.

Tohon ra i casi ra Jesús yoco trigo quívi quitatu ñiyívi

12 Minoo quívi quitatu ñiyívi i yaha ra Jesús mahñu itu trigo ñiyívi. Ta i sizoco ra i casi ra Jesús, ta i quisaha tohon ra zuhva

yoco trigo, ta i zavii ra, ta sasi ra sii si.

²Ta cuhva sa ndyehe ra fariseo cuhva zavaha ra, i catyi ra sihin ra Jesús: Ndyehe, zatyíño ra sica noo suhun, ta ña catyi ley yo sa zatyíño yo quivi quitatu ñiyivi.

³Zoco i catyi ra Jesús sihin ra: ¿Atu tañaha ca cahvi ndo cuhva i zavaha ra David ta ra ndíhi sihin ra minoo quivi i sizoco xaan ra?

⁴I quihvi ra sisi vehe ñuhu, ta i quihin ra pan ii. Ta i sasi ra sii si, ta ña catyi ley sa casi ra sii si ta nu ra ndíhi sihin ra. Maa ñi ra cu zutu tahan si casi pan cuan.

⁵¿Atu tañaha ca cahvi ndo nu ley nu catyi si vatyi zatyíño ra cu zutu sisi vehe ñuhu quivi quitatu ñiyivi ta yivi cuatyí cuu si?

⁶Ta catyi sihin ndo vatyi ihya iyo minoo ra cahnu ca ta ziqui vehe ñuhu.

⁷Tatu sa sito ndo ñaa cuñi si catyi si nu i catyi ra Ndyoo vatyi cuñi ra sa cundahvi iñi ndo sii ñiyivi ta yivi ca sa cahñi ndo quiti ta cuhva ndo niñi ti sa cuenda cuatyí ndo, ma tyaa ndo cuatyí sata ñiyivi sa ñahñi cuatyí iyo.

⁸Ta ra i quisi ndya gloria cui, ta ndyaca ñaha tuqui quivi quitatu ñiyivi.

Zanduvaha ra Jesús sii minoo ra na-ityi ndaha

⁹Tacuan ta cuahan ra Jesús, ta i quihvi ra vehe ñuhu.

¹⁰Ta yucuan ndyaa minoo ra na-ityi ndaha. Ta inga ra yucu yucuan, i cuñi ra nducu ra cuhva tyaa ra cuatyí sata ra Jesús, ta yucuan cuenda i ndaca tuhun

ra sii ra Jesús: ¿Atu catyi ley sa zanduvaha yo sii ñiyivi quivi quitatu yo?

¹¹Ta i nacahan ra Jesús ta catyi ra: ¿Yoo ndoho tatu iyo minoo mvee ticatyí zono ndo ta canacava ti sisi minoo xahva quivi quitatu ñiyivi, atu ma tava ndo sii ti?

¹²Ta iñiñi xaan ca cuu minoo ñiyivi ta ziqui minoo mvee ticatyí! Yucuan cuenda catyi ley vatyi cuu zavaha yo sa vaha quivi quitatu ñiyivi.

¹³Tacuan ta i catyi ra Jesús sihin ra na-ityi ndaha cuan: Nandica ndohon. Ta i nandica ra ndaha ra, ta i nduvaha si tañi caa inga si.

¹⁴Tacuan ta i quita ra fariseo, ta i quisaha sihñi tahan ra tyíño yozo caa cua cahñi ra sii ra Jesús.

Zavaha ra Jesús cuhva i tyaa minoo ra profeta ta sa naha

¹⁵Ta sa sito ra Jesús cuhva cuan, i quita ra yucuan, ta cuaha xaan ñiyivi i sindyico sii ra. Ta i zanduvaha ra Jesús sii tandíhi ñu cuhu.

¹⁶Ta i saha ra tyíño sii ñiyivi i nduvaha vatyi ma nacatyí ñu yoo ra cuu ra.

¹⁷Cuhva cuan i natahan si cuhva i nacatyí ra Isaías, minoo ra profeta, sa cuenda ra Jesús. Ihya cuu Tuhun ra Ndyoo i tyaa ra Isaías:

¹⁸Ihya ra cuu muzi; i casi sii ra; cuñi xein sii ra, ta zii xaan cuñi sihin ra.

Cua cuhva xein Tatyí Ii sii ra, Ta cua nacatyí ra sihin ñiyivi sa yivi ñiyivi hebreo cuu vatyi ndoo xaan zavehi.

¹⁹Ma tusi tahan ra tuhun.

Ta ma cana saa ñi ca ra ta cahan ra. Ta ma zacahnu ra sii ra nuu ñiyivi.

²⁰Ma cahnu ndihi ra numinoo tuñii yacua, ta ma ndahva ndihi ra ñúhu sa siin ñi cayu. (Cuñi si catyi si vaty ma quindyaa ndihi ra tatu siin ñi sino iñi ñiyivi.)

Cua quindyaa ra cuhva ndyaca ñaha ñiyivi ña vaha, ta cua cundyaca ñaha ra minoo cuhva ndoo xaan.

²¹Ta tandihi cuii ñiyivi cuu cunii xaan iñi ñu sii ra vaty cua tyindyee ra sii ñu.

**Caty ra xaan iñi sii ra
Jesús vaty zatyño ra sihin
tundyee iñi sii cuihna**

²²Tacuan ta i quisi ndyaca ñiyivi sii minoo ra cuaa ta ñehe ra nu ndyaa ra Jesús. Ta ñoho minoo taty cuihna sii ra cuan. Ta i zanduvaha ra Jesús sii ra, ta i cuu nandyeha ra ta nacahan ra.

²³Ta iyo xaan i cuñi tandihi ñiyivi, ta i catyi ñu: ¿Atu ra ihya cuu ra cu tata ra David, ra cua zacacu sii yo?

²⁴Zoco sa i siñi ra fariseo cuhva cahan ñiyivi, ta i catyi ra: Ra ihya tava ra taty cuihna maa ñi sihin tundyee iñi iyo sii ra Beelzebú, ra cu nuu sii cuihna.

²⁵Ta sa sito ra Jesús cuhva sica iñi ra, ta i catyi ra: Tatu sahñi tahan xaan ñiyivi minoo ñuu, ndaha cua tivi ta naa ñuu cuan. Ta tacuan tucu minoo vehe ñiyivi, tatu sahñi tahan ñu sihin tahan ñu, yaty xaan cua ndihi cuhva vaha yucu ñu.

²⁶Ta ma cahñi tahan ra cu nuu sii cuihna sihin inga cuihna vaty

tatu tacuan zavaha ra, yaty xaan cua ndihi cuhva iyo sii ra. Ma tava cuihna sii cuihna.

²⁷Ta tatu yuhvi tave sii cuihna sihin tundyee iñi ra Beelzebú, ¿yoo sii tundyee iñi tava ra ndyico sii maa ndo sii si? Maa ra cua zacoto sii ndo vaty ma tava minoo cuihna sii inga cuihna.

²⁸Ta yuhvi tave sii cuihna sihin tundyee iñi maa ra Ndyoo. Ta cuñi si catyi si vaty ndisa cui sa saa cuhva ndyaca ñaha ra Ndyoo.

²⁹Ta ¿yoo ra cua cuu quihvi vehe minoo ra ñihi xaan ta quihin ra ndaha tyiño ra tatu ma cuhñi xihna ra sii ra? Cuñi si sa cuhñi xihna ra sii ra ta ziqui cuu quindyaa ra ndaha tyiño ra.

³⁰Tatu ña zatyño ñiyivi sihin, zativi ñu tyiñe. Ta tatu ma tyindyee ñu sii, sa nacaty Tuhun Ndyoo sihin ñiyivi, cuñi si catyi si vaty ña saha ñu sa coto ñiyivi tuhin.

³¹Yucuan cuenda catyi sihin ndo vaty cua zaha ra Ndyoo tucahnu iñi tandihi cuaty zavaha ñiyivi ta tandihi sa quiñi cahan ñu, zoco tatu cahan ñiyivi ndya vaha ñi sii Taty Ii ra Ndyoo, ma zaha ra Ndyoo tucahnu iñi sii ñu.

³²Tatu quiñi cahan ñiyivi sii vii, ra i quisi ndya gloria, cua zaha ra Ndyoo tucahnu iñi sii ñu. Zoco yoo ra cahan quiñi sii Taty Ii, ma zaha ra Ndyoo tucahnu iñi sii ra nu ihya ñuu ñiyivi ta nu inga ñuu ñiyivi sa cua coo cuee ca.

**Nacoto yo tatu vaha minoo yutu
tatu saha tu yucu vixi vaha**

³³Minoo yutu vaha, saha tu siti vaha. Ta minoo yutu ña vaha, saha

tu siti ña vaha. Nacoto yo ñaa yutu cuu tahan tahan tu sa cuenda siti saha tu.

³⁴iCoo xaan cuu maa ndo! ¿Yozo caa cuu cahan ndo tuhun vaha ta ña vaha maa ndo? Yuhu ndo cahan sa situ cuii añima ndo.

³⁵Minoo ra vaha, cahan ra tuhun vaha vatyi iyo sa vaha añima ra. Ta minoo ra ña vaha, ña vaha sa cahan ra vatyi iyo sa ña vaha añima ra.

³⁶Ta catyi sihin ndo vatyi quivi cua tyicuhva ra Ndyoo sii ñiyivi, ta cua nacatyí ñu ñaa cuenda i cahan ñu sa minoo minoo tuhun sa ña ñiñi.

³⁷Vatyi sa cuenda tuhun cahan ndo ta cua catyi ra Ndyoo tatu vaha ndo a ña vaha ndo.

Ñiyivi ña vaha cuñi ñu ndyehe ñu minoo sa ndyityi

³⁸Tacuan ta zuhva ra fariseo ta ra maestro cuenda ley i catyi ra sihin ra Jesús: Maestro, cuñi ndi ndyehe ndi minoo zeña sa ndyityi.

³⁹Ta i nacahan ra Jesús, ta catyi ra sihin ra: Ñiyivi quiñi xaan iyo ta ñu ña vaha, sica ñu sa ndyehe ñu sa ndyityi, zoco ma ndyehe ca ñu inga zeña ta ziqui cuhva i cuu ra Jonás, minoo ra profeta ta sa naha.

⁴⁰Vatyi tañi i ñoho ra Jonás uñi quivi ta uñi sa cuaa sisi tyiyaca cahnu, tacuan tucu cua quihí ra i quisi ndya gloria uñi quivi ta uñi sa cuaa sisi ñuhu.

⁴¹Ñiyivi ñuu Nínive cua nduvita ñu ta cua tyaa ñu cuatyí sata ñiyivi iyo vityí, ta cua catyi ñu vatyi iyo cuatyí ndo vatyi ñiyivi ñuu Nínive cuan, i zama ñu cuhva iyo ñu sa i

nacatyí ra Jonás Tuhun Ndyoo sihin ñu. Ta ihya iyo minoo ra ñiñi ca ta ziqui ra Jonás.

⁴²Ta tacuan tucu minoo ñaha i sindyaca ñaha ndya siyo tyañuhu, cua nandoto ña quivi cua tyicuhva ra Ndyoo sii ñiyivi, ta cua tyaa ña cuatyí sata ndo vatyi sica xaan i quisi ña quivi cuan vatyi cua tyizoho ña sa siñi tuñi sa saha ra Ndyoo sii ra Salomón. Ta ihya iyo minoo ra ñiñi ca ta ziqui ra Salomón.

Cuhva cua nandisi tucu vatyi ña vaha inga saha

⁴³Tatu quita minoo tatyí ña vaha sii minoo ra, sica noo tatyí cuihna cuan nu ityi xaan, ta nanducu si nu cua quitatu si, zoco ña nañihi si nu quitatu si, ta catyi si:

⁴⁴“Cunuhu tuqui ndya vehi nu i quite.” Ta sa nasaa si, nañihi si sii ra i quita si cuan. Ta añima ra cuu tañi minoo vehe sa yoñi ndyaa. Tihvi ta nduvii vehe cuan.

⁴⁵Tacuan ta cuahan tatyí cuihna cuan ta quihin si inga usa tahan tahan si sa xaan ca ta ziqui maa si. Ta cuahan tandihí si cuan cua ndihvi si añima ra cuan. Ta yaha ca cuhva cua nanduu ra cuan ta ziqui sa xihna ñi. Ta tacuan tucu cua tahan ñiyivi ña vaha ya.

Zihí ra Jesús ta yañi ra

⁴⁶Cahan ca ra Jesús sihin ñiyivi, ta i saa zihí ra ta yañi ra. I sicuyucu ñu sata vehe, ta i cuñi ñu cahan ñu sihin ra.

⁴⁷Ta i nacatyí minoo ñiyivi sihin ra Jesús: Zihun ta yañun, nandyaa ñu sata vehe, cuñi ñu cahan ñu suhun.

⁴⁸Zoco i catyi ra Jesús sihin ra cahan sihin ra: ¿Yoo sa cuu zihí? ¿Ta yoo sa cuu yañi?

⁴⁹Tacuan i catyi ra, ta ziqui i zañaha ndaha ra nu yucu ñiyivi sica noo sihin ra, ta i catyi ra: Ñu ihya cuu tañi zihí, ta ra ihya cuu tañi yañi.

⁵⁰Vatyí yoo ñiyivi zavaha cuhva cuñi Zuti, ra ndyaa andivi, yucuan ñu cuu tañi cuhve ta yañi ta zihí.

Cahan ra Jesús ziqui minoo cuhva, cuhva ra tasi

13 Quivi cuan i quita ra Jesús vehe, ta i sicundyaa ra yuhu miñi.

²I titahan cuaha xaan ñiyivi nu ndyaa ra, ta yucuan cuenda i quihvi ra Jesús sisi minoo barco, ta i sicundyaa ra. Ta i ndoo tandihí ñiyivi nu ñiyiti.

³Tacuan ta i zacuaha ra sii ñu ziqui cuaha xaan cuhva, ta catyi ra: Cuahan minoo ra nu iyo tyiño ra vatyí cua quití ra siti trigo nu ñuhu ra.

⁴Ta cuhva sa quití ra sii si, zuhva si i canacoyo ityi. Ta i quisi zaa, ta sasi ti sii si.

⁵Ta inga si i canacoyo nu yaxi ñoho ñuhu vatyí ñoho xaan yuu. Ta yatyi xaan i caña si vatyí yaxi xaan ñoho ñuhu.

⁶Ta cuhva i ndyehe ñicandyi i naxii si vatyí ñahñi yoho si, ta i na-ityi si.

⁷Ta zuhva ca siti cuan i canacoyo ticui iñu. Ta i caña si, zoco i zahvi iñu sii si.

⁸Zoco inga tucu zuhva ca siti cuan, i canacoyo si nu vaha ñuhu, ta vaha xaan i saha si. Iyo si saha si

ziendu siti si sa minoo ñi si. Iyo si saha si uñi xico usi. Ta iyo si saha si oco usi.

⁹Tatu siñi ndo, icuiñi ndo!

Cuenda sa i cahan xaan ra Jesús ziqui minoo cuhva

¹⁰Tacuan ta i tuhva ra i casi ra Jesús, ta i ndaca tuhun ra sii ra: ¿Ñaa cuenda tuhvon cahan sihin ñiyivi ziqui minoo cuhva?

¹¹Ta i nacahan ra Jesús, ta catyi ra: Saha ra Ndyoo sa coto maa ndo tuhun xehe sa cuenda cuhva ndyaca ñaha maa ra. Zoco ma cuu coto inga ñiyivi.

¹²Ra sa cutuñi iñi zuhva, cuaha ca cua cuhva ra Ndyoo sa cutuñi iñi ra. Ta ra ña cutuñi iñi, cua quindyaa ndihí ra Ndyoo ndya sa siin cuiñi ñi cutuñi iñi ra.

¹³Yucuan cuenda quehin sihin ñu ziqui minoo cuhva vatyí cua ndyehe ñu, zoco ma coto ñu ñaa sa ndyehe ñu. Cua cuiñi ñu, zoco ma cutuñi iñi ñu. Cua cuu si tañi sa ñá siñi ñu.

¹⁴Ta sa cuenda maa ñu cua natahan si cuhva i catyi ra Isaías. Ihya cuu cuhva i catyi ra:

Ndisa cua cuiñi ndo, zoco ma cutuñi iñi ndo;

Cua ndyehe ndo, zoco ma nacoto ndo ñaa sa ndyehe ndo.

¹⁵Vatyí ñihi xaan iñi ndo, ta ña siñi ndo, ta ndaha titahan siti nuu ndo; coto ndyehe ndo ta coto cuiñi ndo ta coto cutuñi iñi ndo ta quisi ndo nu ndyei ta zanduvehi sii ndo.

Tacuan i tyaa ra Isaías sa cuenda ñiyivi ña sino iñi cuan.

¹⁶Zoco maa ndo, zii xaan cuu sii ndo vatyí ndyehe ndo sihin siti nuu ndo, ta siñi ndo sihin zoho ndo.

¹⁷Ta sa ndisa catyi sihin ndo vatyí cuaha xaan ra profeta ta inga ñiyívi vaha, i cuñi ñu ndyehe ñu sa ndyehe maa ndo vityi, zoco ñá ndyehe ñu sii si. Ta i cuñi ñu cuiñi ñu sa siñi maa ndo, ta ñá siñi ñu sii si.

Nacatyí ra Jesús ñaa cuñi si catyi si cuhva ra quití siti trigo nu ñuhu

¹⁸Ta ziquí i catyi ra Jesús: Cuiñi ndo cuhva cuñi si catyi si sa cuenda cuhva ra quití siti trigo nu ñuhu.

¹⁹Ñiyívi sa siñi tuhun sa cuenda cuhva ndyaca ñaha ra Ndyoo ta ña cutuñi iñi ñu sii si cuu ñu tañi siti sa canacoyo ityi. Ta saa cuihna, ta quindyaa ra tuhun i tasi ra Ndyoo añima ñu.

²⁰Siti sa canacoyo ticui yuu cuu tañi ñiyívi sa siñi Tuhun Ndyoo, ta zii xaan i cuñi ñu.

²¹Zoco ñá quihvi vaha Tuhun Ndyoo añima ñu. Ta ña naha cua sino iñi ñu. Tatu sa quisi minoo tundoho ziquí ñu a cuxaan ñiyívi sihin ñu sa cuenda Tuhun Ndyoo, yatyí xaan cua zaña ñu sii si.

²²Ta siti sa canacoyo ticui iñu cuu tañi ñiyívi sa siñi Tuhun Ndyoo, zoco sica xaan iñi ñu sa cuenda sa iyo ñuu ñiyívi ya. Ta tuhun cuca, tuhun zandavi ñaha ñi cuu si. Ta tandihí cuhva cuan, sahñi si Tuhun Ndyoo, ta ña zatyíño vaha si sihin ñiyívi cuan.

²³Zoco siti sa canacoyo nu vaha ñuhu, cuu si tañi ñiyívi sa siñi Tuhun Ndyoo ta cutuñi iñi ñu sii si, ta vaha xaan zatyíño si sihin ñu. Iyo ñu cuu ñu tañi siti sa saha minoo ziendu sa minoo si. Ta inga ñu cuu tañi siti sa saha uñi xico usi.

Ta inga ñu cuu tañi siti sa saha oco usi tahan sa minoo si.

Cuhva yucu ña vaha sa sahnú ticui trigo

²⁴Tacuan ta ziquí i cahan ra Jesús ziquí inga cuhva, ta catyi ra: Cuhva ndyaca ñaha ra Ndyoo cuu si tañi minoo cuhva i tasi minoo ra siti vaha nu ñuhu ra.

²⁵Zoco cuhva sa i quixi ñiyívi, ta i quihvi minoo ra xaan iñi sii sito ho ñuhu cuan, ta i tasi ra siti ña vaha ticui trigo, ta cuahan ra.

²⁶I sahnú trigo, ta i caña yoco si. Ta ticui trigo i sahnú tucu yucu ña vaha cuan.

²⁷Tacuan ta sahan muzú i sinacatyí ra sihin sito ho ñuhu cuan: “Tata, tatu vaha siti i tasun nu ñuhun, ¿yozo caa vatyí i caña tucu yucu ña vaha cuan?”

²⁸Ta i catyi sito ho si: “Minoo ra xaan iñi sii, i zavaha cuhva cuan.” Ta ziquí i ndaca tuhun muzú ra sii ra: “¿Atu cuñun vatyí cutohon ndi yucu ña vaha cuan?”

²⁹Zoco i catyi ra sihin ra: “Ma tohon ndo sii si coto quita ndihí trigo cuan.

³⁰Vaha ca zandoo yo sii si, nacuahnu si ndya sa sisa si. Ta cua tasi muzú, ta cua tava xihna ra yucu ña vaha cuan ta cuhñi ra cuenda zucu si vatyí cua cayú si. Ta ziquí cua naquihin ra trigo ta tyihi ra sii si nu cua cucumi vehi sii si.”

Cuhva siti mostaza

³¹Ta ziquí i cahan tucu ra Jesús ziquí inga cuhva, ta catyi ra: Cuhva ndyaca ñaha ra Ndyoo cuu si tañi minoo siti mostaza sa i tasi minoo ra nu ñuhu ra.

³²Ndisa vatyi luhlu ca maa siti cuan ta ziqui tandihi inga nuu siti, zoco tatu sa sahnu si, nducahnu ca si ta ziqui tandihi ca numa, ta nduu si tañi minoo yutu. Ta vasi zaa ta zavaha ti taca ti zoco tu.

**Tañi yusa iya cuu cuhva
ndyaca ñaha ra Ndyoo**

³³Ta i cahan tucu ra Jesús ziqui inga cuhva ya: Cuhva ndyaca ñaha ra Ndyoo cuu si tañi yusa iya sa nazaca minoo ñaha sihin uñi taha arroba yutyi pan, ta cua zanandaa yusa iya cuan sii tandihi yutyi pan cuan. (Ta tacuan tucu cuahan nducahnu ca sa ndyaca ñaha ra Ndyoo.)

**Tuhva xaan ra Jesús cahan
ziqui minoo cuhva**

³⁴I catyi ra Jesús tandihi ihya sihin ñiyivi ziqui minoo cuhva ta ziqui inga cuhva, ta ma cahan maa ra tatu ma cahan ra ziqui minoo cuhva.

³⁵Tacuan i cuu si vatyi cua natahan si cuhva i tyaa minoo ra profeta. Ihya cuu sa i tyaa ra:

Cua quehin ziqui minoo cuhva;
cua nacatyi tuhun i sicoo xehe
ndya quivi i zavaha ra Ndyoo
ñuu ñiyivi.

**Nacatyi ra Jesús ñaa cuñi si
catyi si sa cuenda cuhva sahnu
yucu ña vaha ticui trigo**

³⁶Tacuan ta i natasi ra Jesús sii ñiyivi, ta i quihvi ra sisi vehe, ta i tuhva ra i casi ra sii ra, ta catyi ra: Nacatyun sihin ndi ñaa cuñi si catyi si sa cuenda yucu ña vaha sa sahnu ticui trigo cuan.

³⁷Ta i nacahan ra Jesús, ta catyi ra sihin ra: Ra i tasi siti vaha cuu ra i quisi ndya gloria.

³⁸Ta ñuhu ra cuu ñuu ñiyivi. Ta siti vaha cuu tañi ñiyivi sa cuu cuenda ra Ndyoo. Ta yucu ña vaha cuan cuu tañi ñiyivi sa cuu cuenda cuihna.

³⁹Ta ra xaan iñi sii, cuu ra tasi yucu ña vaha cuan. Cuihna cuu ra cuan. Ta ra cua nacuaan ndaha tyiño cuan cuu ángel. Ta quivi cua naquihin ra trigo cuan cuu si tañi nu cua ndihi ñuu ñiyivi.

⁴⁰Ta tañi cuhva i tohon ra yucu ña vaha ta i sahmi ra, tacuan tucu cua cuu si nu ndihi ñuu ñiyivi.

⁴¹Cua tasi ra i quisi ndya gloria sii ángel ra vatyi cua tava ziin ra sii tandihi ñiyivi tyiyuhu sii inga ñiyivi ta zavaha ñu sa ña vaha ta sii inga ñiyivi zavaha sa ña vaha, ndihi ca.

⁴²Cua tyihi ángel sii ñu nu cayu ñuhu. Ta yucuan cua vacu ñu, ta cua casi quihñi noho ñu.

⁴³Ta ñiyivi zavaha sa vaha cuhva cuñi ra Ndyoo, cua ndundisi xaan ñu tañi ñicandyi nu ndyaca ñaha ra Ndyoo Zutu yo. Tatu siñi ndo sa quehin, cuiñi ndo.

**Cuhva minoo sa ñoho xehe
ta yahvi xaan ndyaa si**

⁴⁴Cuhva ñihi yo sa cundyaca ñaha ra Ndyoo sii yo cuu tañi minoo sa yahvi xaan ndyaa ta ñoho xehe si sisi ñuhu. Ta i nañihi minoo ra sii si, ta natyixehe tucu ra sii si zuun ñi yucuan. Ta zii xaan i cuñi ra ta cuahan ra ta i xico ra tandihi sa iyo sii ra, ta i nazata ra ñuhu cuan.

**Minoo cuhva perla sa
yahvi xaan ndyaa**

⁴⁵Ta cuhva ndyaca ñaha ra Ndyoo sii yo vale xaan si tañi minoo

cuhva minoo ra zata ndaha tyiño ta naxico ra. Sica noo ra ta nanducu ra perla vaha xaan.

⁴⁶Ta quivi i nañihi ra minoo sa yahvi xaan ndyaa, cuahan ra ta i naxico ra tandihi sa iyo sii ra, ta i nazata ra perla cuan. (Ta tacuan tucu vale xaan Tuhun Ndyoo tañi perla cuan.)

Minoo cuhva sa cuenda minoo taraya

⁴⁷Ta inga tucu cuhva, vatyi cuhva ndyaca ñaha ra Ndyoo cuu si tañi minoo taraya sa cañi ra tiin tyiyaca nu tyañuhu ta ñihi ra tandihi nuu tyiyaca.

⁴⁸Tatu sa situ taraya ra, tava ra sii si nu ñiyiti ta yucuan cua cundyaa ra ta cua nacasi ra ñaa tyiyaca cuñi ra. Cua tyihi ra tyiyaca vaha sisi tyica, ta cua zavita ra tyiyaca ña vaha cuan.

⁴⁹Ta tacuan cua cuu si nu cua ndihi ñuu ñiyivi. Cua quisi ángel vatyi cua tava zñin ra sii ñiyivi ña vaha sihin ñiyivi vaha.

⁵⁰Ta ñiyivi ña vaha cuan cua tyihi ra nu cayu ñúhu, ta cua vacu ñu, ta cua casi quihñi noho ñu.

Sa vaha xaan sa saa ta sa sahnú

⁵¹Tacuan ta ziqui i ndaca tuhun ra Jesús sii ra i casi ra: ¿Atu cutuñi iñi ndo tandihi cuhva ya? Ta i catyi ra: Cutuñi iñi ndi, tata.

⁵²Ta ziqui i catyi ra Jesús sihin ra: Tatu cua cutuhva minoo maestro cuenda ley sa cuenda cuhva ndyaca ñaha ra Ndyoo vityi cua cuu ra tañi minoo ra xu vehe sa cumi vaha sa sahnú ta sa saa sa vaha xaan, ta cuu zañaha ra nduu tahan si.

Sinuhu ra Jesús ñuu ra, ñuu Nazaret

⁵³Sa ndihi cahan ra Jesús ziqui cuhva ya ta ziqui i quita ra yucuan, ta cuahan ra.

⁵⁴Ta i nasaa ra zuun ñi ñuu maa ra. Ta yucuan i quisaha zacuaha ra sii ñiyivi sisi vehe ñuhu. Ta iyo xaan i cuñi ñiyivi, ta catyi ñu: ¿Yozo caa ñihi ra ya cuhva sa casi xaan iñi ra? ¿Ta yozo caa ñihi ra cuhva zavaha ra sa ndyityi?

⁵⁵Ta zehe ra carpintero cuu sii ra. Ta ña María cuu zihí ra. Ta ra Jacobo, ta ra José, ta ra Simón, ta ra Judas cuu yañi ra.

⁵⁶Ta cuhva ra iyo tucu ñu ihya sihin yo. ¿Ta yozo caa vatyi sito ra tandihi cuhva ya?

⁵⁷Tacuan i cahan ñiyivi, ta yucuan cuenda ñá cuñi ñu tyaa ñu yahvi sii ra Jesús. Zoco i catyi ra Jesús sihin ñu: Tyaa ñiyivi yahvi sii minoo ra profeta, zoco ñiyivi ñuu ra ta ñiyivi vehe ra ña tyaa ñu yahvi sii ra.

⁵⁸Ta ñá zavaha ra Jesús cuaha sa ndyityi yucuan vatyi ñá sino iñi ñiyivi sii ra.

Cuhva i sihi ra Juan, ra i zacoo ndutya

14 Quivi cuan, ra Herodes ndyaca ñaha nacahnu Galilea, ta i siñi ra tuhun ra Jesús.

²Ta i catyi ra sihin muzu ra: Ra Juan Bautista cuu ra cuan. Sa nandoto ra, ta yucuan cuenda ndyityi xaan ra.

³Tacuan i catyi ra Herodes vatyi maa ra cuu ra i tava tyiño ta i tiin ra sii ra Juan, ta sihñi ra sii ra, ta cuahan ra vehe caa. I zavaha ra sii

si sa cuenda ña Herodías, ñazihí ra Felipe yañi ra.

⁴Ra Juan cuu ra i catyi sihin ra Herodes: Ña vaha sa nacuhun ñazihí yañun.

⁵I cuñi ra Herodes cahñi ra sii ra Juan, zoco i yuhu ra sii ñiyivi vatyí sino iñi tandihí ñu vatyí cahan ra Juan sa cuenda ra Ndyoo.

⁶Zoco quiví tahan si cuiya ra Herodes, i quita zehe ña Herodías vatyí cua cata saha ña nuu ñiyivi i quisi vico ra. Ta i tahan xaan iñi ra Herodes cuhva i sata saha ña.

⁷Ta i tyiñaha ra Herodes Ndyoo, ta i catyi ra sa ndisa cuí vatyí cua cuhva ra ñaa ñi maa sa cua caca ña.

⁸Ta sa i nacatyí zihí ña sihin ña ñaa sa cua caca ña, ta i catyi ña sihin ra Herodes: Cuhvon xiñi ra Juan Bautista sii sihin minoo nu coho. Catyi ña.

⁹I nducuihya xaan iñi ra rey Herodes sa siñi ra sa cahan ña, zoco sa tyiñaha ra Ndyoo, ta sa siñi ñiyivi yucu vico cuan. Ta yucuan cuenda i tasi ra tyiño, ta catyi ra vatyí cuhva ra sii si sii ña.

¹⁰Ta i catyi ra vatyí cahndya yuu ra zucu ra Juan sisi vehe caa.

¹¹Ta i quisi ndyaca ra sii si sihin minoo nu coho, ta saha ra sii ña luhlu. Ta i saha maa ña sii si sii zihí ña.

¹²Tacuan ta i quisi ra sica noo sihin ra Juan, ta i quihin ra coño ñuhu ra Juan, ta i sityihi ra sii si sisi ñuhu. Ta ziquí cuahan ra ta i nacatyí ra sihin ra Jesús.

**Cuhva i saha ra Jesús sa
casi ohon mil rayii**

¹³Ta sa sito ra Jesús cuhva cuan, ta i quita ra sisi minoo barco, ta

cuahan ra maa tuhun ñi ra ndya minoo nu yoñi maa ñiyivi iyo. Zoco i ñihi ñiyivi tuhun, ta i quita ñu ñuu ñu, ta i sindyico ñu sii ra ityi nu ñuhu.

¹⁴Ta sa i quita ra Jesús barco, i ndyehe ra cuaha xaan ñiyivi. Ta i cundahvi xaan iñi ra sii ñu, ta i zanduvaha ra sii ñu cuhu sa sindyaca ñu.

¹⁵Ta cuhva sa cua iñi, i quisi ra i casi ra nu ndyaa ra, ta catyi ra sihin ra: Sahiñi xaan. Ta yoñi ñiyivi iyo ihya. Catyun sihin ñiyivi nacuhun ñu. Nacuhun ñu nu iyo ñuu ta zata ñu sa casi ñu.

¹⁶Zoco i catyi ra Jesús sihin ra: Ña tahan si sa cuhun ñu. Cuhva maa ndo sa casi ñu.

¹⁷Ta i catyi ra i casi ra Jesús sihin ra: Ñahñi maa sa cumi ndi ihya. Ohon tahan ñi pan, ta uu tahan ñi tyiyaca.

¹⁸Ta i catyi ra Jesús sihin ra: Ta ndyaca ndo sii si ihya.

¹⁹Tacuan ta i tava ra Jesús tyiño vatyí nacundyaa ñiyivi nu cuhu. Ta i quihin ra sihin ndaha ra sa ohon tahan pan cuan ta uu tahan tyiyaca cuan, ta i nandyehé ndaa ra. Ta i saha ra tyahvi ndyoo sii ra Ndyoo, ta ziquí i sahnu ndyihí ra pan cuan, ta saha ra sii si sii ra i casi ra. Ta i zasa maa ra sii si sii ñiyivi.

²⁰Ta i sasi tandihí ñiyivi. Ta ndaha xaan iñi ñu. Ta ziquí i zanacutu ñu usi uu tahan tyica sihin yiquí pan sa nandoo ta tyiyaca cuan.

²¹Ta ñiyivi i sasi i cuu ohon mil rayii ta ziiñ ñu zihí ta sa ndyihí.

Cuhva i sica ra Jesús nu ndutyá

²²Tacuan ta i catyi ra Jesús sihin ra i casi ra vatyí nandihvi ra barco

ta cuyaha ra inga siyo miñi. Ta cua nandoo ra Jesús, ta cua catyi ra sihin tandihi ñiyivi vatyí cunuhu ñu ndya ñuu ñu.

²³Ta sa yaha natasi ra Jesús sii ñu, ta ziqui i sahan ra minoo yucu maa tuhun ñi ra vatyí cua cahan ra sihin ra Ndyoo. Ta i cuaa, ta ndyaa ra yucuan maa tuhun ñi ra.

²⁴Ta sa cuahan barco cuan mahñu miñi. Nandaa, nanoo tu zacuu ndutya vatyí ñihi xaan ñoho tatyí nu cuahan tu.

²⁵Ta ñaa ca i tuhva ra Jesús nu yucu ra. Sica ra nu ndutya.

²⁶Ta cuhva sa ndyehe ra sii ra Jesús vatyí sica ra nu ndutya, i yuhu xaan ra, ta i sacu saa ra sihin sa yuhu ra, ta catyi ra: ¡Minoo añima cuu si!

²⁷Zoco i cahan ra Jesús, ta catyi ra: Zandyee ndo iñi ndo. Ma yuhu ndo vatyí mi cui.

²⁸Tacuan ta i catyi ra Pedro sihin ra: Tata, tatu zuun yoho cuu, catyun sihin vatyí caque nu ndutya ta sei ndya nu vasun.

²⁹Ta i catyi ra Jesús sihin ra: Ñaha. Ta ziqui i quita ra Pedro barco ta i quisaha sica ra nu ndutya ndya nu vasi ra Jesús.

³⁰Zoco cuhva sa i tuu iñi ra vatyí ñihi xaan ñoho tatyí, ta i yuhu ra. Ta i quisaha ndyee ra sisi ndutya, ta i cana saa ra, ta catyi ra: ¡Tata, zacacun sii!

³¹Ta zuun ñi caa cuhva cuan i natiin ra Jesús ndaha ra, ta i catyi ra sihin ra: ¡Siin xaan sino iñun sii! ¿Ñacu ña nii iñun? Catyi ra.

³²Ta i ndihvi ra Jesús ta ra Pedro sisi barco, ta i cutaxi tatyí.

³³Ta ziqui ra ñoho barco cuan, i sicuiñi siti ra, ta i zacahnu ra sii ra Jesús, ta catyi ra: Sa ndisa cuii vatyí Zehe ra Ndyoo cuu suun.

Cuhva i zanduvaha ra Jesús sii ñiyivi cuhu nu cu si Genesaret

³⁴Ta i yaha ra miñi, ta i saa ra nu cu si Genesaret.

³⁵Ta cuhva sa i nacoto ñiyivi yucuan sii ra Jesús, ta i zacoto ñu naca cahnu, ta i quisi ndyaca ñiyivi sii tandihi ñu cuhu ndya nu ndyaa ra Jesús.

³⁶Ta i sica ñu tumañi iñi sii ra vatyí nacuhva ra sa tiin ñu vazú yuzahma ñi ra. Ta tandihi ñiyivi i tiin sii si, i nduvaha ñu.

Sa zativi añima ñiyivi

15 Tacuan ta ziqui i tuhva zuhva ra fariseo ta ra maestro cuenda ley sii ra Jesús. I quisi ra ndya ñuu Jerusalén, ta i ndaca tuhun ra sii ra Jesús:

²¿Ñaa cuenda ña zavaha ñiyivi sica noo suhun costumbre i zandoo ñiyivi sahnu? Vatyí ña nacatya vaha ñu ndaha ñu ta casi ñu.

³Tacuan i catyi ra cuan, ta ziqui i ndaca tuhun ra Jesús sii ra: ¿Ta ñaa cuenda vatyí ña tyaa maa ndo yahvi sii ley ra Ndyoo vatyí cuñi ndo cundyico ndo costumbre?

⁴Vatyí i catyi maa ra Ndyoo: “Tyaa ndo yahvi sii zutu ndo ta sii zihí ndo”, ta “Yoo ra cahan ndya vaha ñi sihin zutu ra a sihin zihí ra, nacahñi ñiyivi sii ra.”

⁵Zoco catyi maa ndo vatyí cuu catyi minoo ra sihin zutu ra a sihin zihí ra: “Ma cuu tyindyei suun

vatyi tandihi sa iyo sii, saha cuende sii ra Ndyoo.”

⁶Ta yoo ra catyi cuhva cuan, ña cuñi ca si sa tyindyee ra sii zutu ra a sii zihhi ra, catyi maa ndo. Ta sihin cuhva cuan tyaa siyo ndo ley maa ra Ndyoo vatyi cuñi ndo cundyico ndo sii costumbre maa ndo.

⁷iZaha ndo tuhun vatyi vaha xaan ñiyivi cuu ndo, zoco ña ndisa! Vaha xaan i cahan ra Isaías sa cuenda ndo quivi i tyaa ra ihya tuhun i saha ra Ndyoo sii ra:

⁸Ihya ñiyivi zacahnu ñu sii, sihin yuhu ñu.

Zoco ña zacahnu ñu sii, sa ndisa.

⁹Nahñi tuhun cuu sa zavaha ñu culto;

Zacuaha ñu sii ñiyivi maa maa cuhva costumbre ñiyivi.

Ta ña zavaha ñu cuhva catyi Tuhun Ndyoo sa ndisa.

¹⁰Tacuan i nacaty i ra Jesús cuhva i tyaa ra Isaías ta sa naha, ta ziqui i cana ra sii ñiyivi, ta catyi ra sihin ñu: Tyizoho ndo, ta tyituñi iñi ndo.

¹¹Yivi sa sasi ñiyivi ta yivi sa sihi ñu cuu sa zativi añima ñu. Zoco sa quiñi sica iñi ñu ta cahan ñu cuu sa zativi añima ñu.

¹²Tacuan i catyi ra Jesús, ta ziqui i quisi ra i casi ra, ta i catyi ra sihin ra: ¿Atu siton vaty i cuxaan ra fariseo sihin cuhva cohon?

¹³Zoco i nacahan ra Jesús ta catyi ra: Tandihhi yava sa ñá tasi Zuti ra ndyaa andivi, cua quita ndya yoho si.

¹⁴Ma tyaa ndo yahvi sii ra fariseo. Cuu ra tañi ra cuaa ta zañaha ra ityi sii inga ra cuaa. Ta tatu zañaha minoo ra cuaa ityi sii inga ra cuaa cua canacava nduu tahan ra sisi minoo xahva. Catyi ra Jesús.

¹⁵Ta ziqui i catyi ra Pedro sihin ra Jesús: Nacatyun sihin ndi ñaa cuñi si catyi si cuhva i cohon cuan.

¹⁶Ta i catyi ra Jesús: ¿Atu ndya maa ndo ta ña cutuñi iñi ndo?

¹⁷¿Atu ña cutuñi iñi ndo vaty i tandihhi sa sasi ñiyivi cuahan si ndya sisi ñu ta ziqui quita tucu si?

¹⁸Zoco sa quita yuhu ñiyivi, quita si añima ñu. Ta yucuan cuu sa zativi sii ñiyivi.

¹⁹Vaty añima ñu quita tandihhi tuhun ña vaha sa sica iñi ñu. Quita tuhun sa cuñi ñu cahñi ñu sii inga ñiyivi, sa cuñi rayi sii inga ñaha ta yivi ñazihhi ra cuu, sa quiñi zavaha ñu, sa zuhu ñiyivi, sa vaty ñiyivi, ta sa cahan ñu ndya vaha ñi sii inga ñiyivi.

²⁰Tandihhi ihya cuu sa zativi añima ñiyivi. Zoco tatu casi ñu ta ma nacaty ñu ndaha ñu tañi catyi costumbre, yivi sa yucuan cua zativi sii ñu.

Cuhva i sino iñi minoo ñaha inga ñuu sii ra Jesús

²¹I quita ra Jesús yucuan, ta cuahan ra ndya ñuu Tiro ta ñuu Sidón.

²²Ta minoo ñaha cananea sa ndyaa yucuan i ndyehe ña sii ra Jesús, ta i cana saa ña, ta catyi ña: iTata, zehe ra David, cundahvi iñun sii! Noho minoo taty cuihna sii ña luhlu zehi, ta ndyehe xaan ña tundoho. Catyi ñaha cuan sihin ra Jesús.

²³Zoco ñá nacahan ra Jesús sa cahan ña. Ta ziqui i quisi ra i casi ra Jesús, ta i zañiñi ra sii ra, ta catyi ra: Catyun sihin ña vaty i nacuhun ña vaty i ndyico xaan ña sii yo ta cana saa xaan ña.

²⁴Tacuan i catyi ra, ta ziqui i catyi ra Jesús sihin ña: I tasi ra Ndyoo sii mi maa ñi sa cuenda mvee ticatyi hebreo sa cua naa. Catyi ra.

²⁵Zoco i tuhva ñaha cuan, ta i sicuñi siti ña nuu ra Jesús, ta catyi ña: ¡Tyindyeyun sii, tata!

²⁶Zoco i catyi ra Jesús sihin ña: Natyindyee xihna que sii ñiyivi ñui vatyi ña vaha sa quindyeyi pan sa casi zehi ta cuhve sii si casi ina. Catyi ra.

²⁷Zoco i catyi maa ña sihin ra: Ndisa, tata; zoco ndya cuhva ndya ina ta sasi ti yu pan sa canacava yumesa nu sasi sitocho ti. Ta tacuan tucu ii.

²⁸Tacuan i catyi ña, ta ziqui i catyi ra Jesús: ¡Maha, sino xaan iñun sii! Cua cuu si cuhva cuñi moo. Ta zuun ñi cuhva cuan, ndaha nduvaha ñi zehe ña.

Zanduvaha ra Jesús sii cuaha xaan ñu cuhu

²⁹I quita ra Jesús yucuan, ta i yaha ra yuhu miñi sa nañi Galilea, ta ziqui i ndaa ra minoo yucu, ta i sicundyaa ra yucuan.

³⁰I saa cuaha xaan ñiyivi nu ndyaa ra. Sindyaca ñu sii ñu coxo, ta ñu cuaa, ta ñu ñehe, ta ñu cumañi ndaha ta cuaha xaan inga ñu cuhu. I saqui ñu sii ñu nu ndyaa ra Jesús, ta i zanduvaha ra sii ñu.

³¹Ta iyo xaan i cuñi ñiyivi vatyi i cuu nacahan ñu ñehe, ta ñu cumañi ndaha i nacundyaa ndaha ñu. Ta i cuu nacaca ñu coxo ta nandyehhe ñu cuaa. Ta i quisaha zacahnu xaan ñiyivi sii ra cu Ndyoo cuenda ñiyivi hebreo.

Cuhva i saha ra Jesús sa casi cumi mil rayii

³²Tacuan ta ziqui i cana ra Jesús sii ra i casi ra, ta i catyi ra sihin ra: Cundahvi xaan iñi sii ñiyivi ya vatyi sa uñi quivi ndyaa ñu ihya sihin, ta ñahñi maa sasi ñu. Ña cuñi natasi sii ñu ndya vehe ñu tatu ma casi ñu coto cuaña ñu ityi cuhun ñu.

³³Tacuan ta i catyi ra i casi ra Jesús sihin ra: Zoco ¿ndya ityi cua quihin yo sa casi cuaha xaan ñiyivi ya sicuhu ya? Ta yoñi ñiyivi iyo ihya. Catyi ra.

³⁴I ndaca tuhun ra Jesús sii ra: ¿Yozo tahan pan cumi ndo? Ta i catyi ra cuan: Usa tahan ta uu tahan tyiyaca ndyihhi. Catyi ra.

³⁵Ta ziqui i catyi ra Jesús vatyi nacundyaa ñiyivi nu ñuhu.

³⁶Ta i quihin ra sa usa tahan pan cuan ta tyiyaca ndyihhi cuan sihin ndaha ra, ta saha ra tyahvi ndyoo sii ra Ndyoo. Ta ziqui i sahnu ndyihhi ra sii si, ta saha ra sii ra i casi ra, ta i zasa maa ra sii si sii ñiyivi.

³⁷I sasi tandihhi ñu, ta ndaha xaan iñi ñu. Ta ziqui i zacutu ñu usa tahan tyica sihin yu pan cuan ta tyiyaca sa nandoo cuan.

³⁸Ñiyivi i sasi i cuu cumi mil rayii ta ziqui ñu zihhi ta sa ndyihhi.

³⁹Yaha cuan ta i natasi ra Jesús sii ñiyivi ndya vehe ñu, ta i ndihvi ra barco ta cuahan ra ndya nu cu si Magdala.

Sica ra fariseo ta ra saduceo minoo sa ndyityi sii ra Jesús

16 I quisi ra fariseo ta ra saduceo nu ndyaa ra Jesús

vatyí cuñi ra coto ihñi ra sii ra, ta i sica ra sii ra vatyí zañaha ra minoo sa ndyityi sii ra sa quita ndya andivi.

²Zoco i nacahan ra Jesús ta catyi ra sihin ra: Sa sahiñi tuhva maa ndo catyi: “Cua cundisi vaha ityaan vatyí cuaha xaan vico.”

³Ta sa ñaha ñi tatu cuaha vico, tuhva ndo catyi: “Ña vaha cua cuu quivi vityi vatyí iñi ñaa.” Zaha ndo tuhun vatyí vaha xaan ndo, zoco ña ndisa ndo. Tuhva ndo nacoto ñaa sa cua coo sa cuenda cuhva caa andivi, zoco ña nacoto ndo ñaa sa cua cuu ñuu ñiyivi sa cuenda cuhva ya vityi.

⁴Ñiyivi ña vaha sa iyo vityi, iyo xaan cuatyí ñu, ta sica ñu sa ndyehe ñu sa ndyityi, zoco minoo ñi zeña cua ndyehe ñu tañi cuhva i cuu sii ra Jonás. Tacuan i catyi ra Jesús, ta ziqui i zandoo ra sii ra cuan ta cuahan ra.

Tuhun cahan ra fariseo cua tañi yusa i siya

⁵Cuhva sa yaha ra i casi ra Jesús ndya inga siyo miñi, i naa iñi ra cuizo ra pan casi ra.

⁶Ta ziqui i catyi ra Jesús sihin ra: Ndyehé ndo. Zacuenda ndo sii ndo sihin yusa i siya sii ra fariseo ta ra saduceo.

⁷Tacuan i catyi ra Jesús, ta i natuhun tahan ra i casi ra, ta i catyi ra: Cahan ra tacuan vatyí ñahñi pan ndyizo yo.

⁸I sito ra Jesús sa natuhun ra, ta catyi ra: ¿Ñaa cuenda catyi ndo vatyí ñahñi pan ndyizo ndo? iSiin xaan sino iñi ndo!

⁹¿Atu tañaha ca cutuñi iñi ndo? ¿Atu ña nacohon iñi ndo sa ohon

tahan pan i zase sii ohon mil rayii? ¿Ta yozo tahan ca tyica si i naquihin ndo?

¹⁰Ta ¿atu ña nacohon iñi ndo sa usa tahan pan i zase sii cumi mil rayii? ¿Ta yozo tahan ca tyica si i naquihin ndo?

¹¹¿Ta yozo caa vatyí ña tuu iñi ndo vatyí ñá quehin sa cuenda pan cuhva i catyi vatyí nazacuenda ndo sii ndo sihin yusa i siya sii ra fariseo ta ra saduceo?

¹²Tacuan i catyi ra Jesús, ta ziqui i cutuñi iñi ra i casi ra vatyí ña cahan ra Jesús tuhun pan, zoco cahan ra sa cuenda cuhva zacuahá ra fariseo ta ra saduceo (vatyí ña vaha si).

Nacatyí ra Pedro vatyí ra Jesús cua ra cua zacacu sii ñiyivi

¹³Cuhva i saa ra Jesús ndya nu cu si Cesarea de Filipino i ndaca tuhun ra sii ra i casi ra: ¿Ñaa catyi ñiyivi yoo ra cuu vii, ra i quisi ndya gloria?

¹⁴Ta i catyi ra sihin ra: Iyo ñiyivi catyi vatyí minoo ra i nandoto cuun tañi ra Juan, ra i zacoo ndutya sii ñiyivi a ra Elías a ra Jeremías a inga ra cu profeta ta sa naha cuun.

¹⁵Ta ziqui i catyi ra Jesús sihin ra: Ta maa ndo, ¿yoo ra cui catyi maa ndo?

¹⁶Ta i catyi ra Simón Pedro: Yoho cuu ra Cristo, ra cua zacacu sii ndi. Ta zehe ra Ndyoo ndito cuu suun.

¹⁷Ta i nacahan ra Jesús, ta catyi ra sihin ra: Zii xaan cuu suun, Simón, zehe ra Jonás, vatyí yoñi ñiyivi zañaha cuhva cuan suun. Maa Zuti ra ndyaa andivi i zañaha cuhva cuan suun.

¹⁸Ta yuhvi catyi suhun vatyi yoho cuu ra Pedro. Ta nu yuu ya cua zandei vehe ñuhi, ta ma cuu zahacanaa tuhun sihi ta andyaya sii vehe ñuhi.

¹⁹Ta yuhvi cua kuhve ndaha ticui suun sa cuenda nu ndyaca ñaha ra Ndyoo, ta ñaa sa cua kuhñun ihya ñuu ñiyivi, cua cunuhñi tucu si ityi nuu ra Ndyoo. Ta sa cua ndasun ihya, ñuu ñiyivi, cua ndasi tucu si ityi nuu ra Ndyoo.

²⁰Tacuan i catyi ra Jesús, ta ziqui ñihi xaan i saha ra tyiño sii ra i casi ra vatyi ma nacatyi ra nu sihin minoo ñiyivi vatyi ra Cristo cuu ra.

Zacoto ra Jesús kuhva cua cuu ra

²¹Ta ndya kuhva cuan i zacoto ra Jesús casi xaan sii ra i casi ra yozo caa cuñi si sa cahun ra ñuu Jerusalén. Ta ra mandoñi ta ra zutu nahnu ta ra cu maestro cuenda ley cua zandyehe xaan ra tundoho sii ra. I catyi ra Jesús sihin ra i casi ra vatyi cua cahñi ra cuan sii ra, zoco sa cu uñi quivi ta cua nandoto ra.

²²Ta ziqui i tava ziin ra Pedro sii ra, ta ñihi xaan i cahan ra sihin ra, ta catyi ra: iNuminoo saha, ta ma tahan si suun, tata! iNatyindyee ra Ndyoo suun, ta ma tohon sa tacuan!

²³Zoco i nasico cava ra Jesús, ta i catyi ra sihin ra Pedro: iCuñi siyon sii, cuihna! Zayanga xoon sii, vatyi ña sica iñun kuhva sica iñi ra Ndyoo. Sica iñun kuhva sica iñi ñiyivi.

²⁴Ta ziqui i catyi ra Jesús sihin ra i casi ra: Tatu iyo ra cuñi cundyico sii, nazama ra kuhva iyo ra. Ta ma zacahnu ra sii ra. Ta nandyehe ra tundoho sa cuenda mi. Ta nazavaha ra kuhva zavehi.

²⁵Tatu ña cuñi ñiyivi sa cuu ñu sa cuenda Tuhun Ndyoo, cua cuu ñu, ta cua cahun ñu andyaya, ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo cua cundito ñu sihin ra Ndyoo.

²⁶¿Ñaa sa ñihi ñiyivi sa zahacanaa ñu tandihi sa iyo ñuu ñiyivi ta quivi cua cuu ñu, ndaha cua naa ñi ñu? ¿Ta yozo caa cuu tyiyahvi ñiyivi ta ñihi tahvi aña ñu?

²⁷Vaty yuhvi, ra i quisi ndya gloria, cua quisi inga saha, ta tyaqui xaan cua cui tañi kuhva caa Zuti. Cua quisi sihin ángel, ta ziqui cua tyiyahvi sii minoo minoo ñiyivi sa cuenda kuhva i zavaha ñu.

²⁸Sa ndisa cuii catyi sihin ndo vaty iyo zuhva ra yucu ihya, ma cuu ra ndya kuhva ndya cua ndyehe ra vaty ndisi tucu ra i quisi ndya gloria inga saha sihin kuhva cua cundyaca ñaha ra sii ñiyivi.

Cuhva i zama ra Ndyoo kuhva caa ra Jesús minoo saha

17 I yaha iñu quivi, ta ziqui i quihin ra Jesús sii ra Pedro ta ra Jacobo ta ra Juan yañi ra Jacobo ta cuahan ra sihin maa ñi maa ra ndya minoo yucu zucu xaan.

²Ta yucuan i zama kuhva caa ra Jesús ityi nuu ra cuan. Ndisi xaan i nduu nuu ra tañi ñicandyi, ta cui si xaan i nduu zahma ra tañi ñúhu.

³Ta zuun ñi kuhva cuan, i ndyehe ra sii ra Moisés ta ra Elías. (Ra i sihi ta sa naha cuu nduu tahan ra cuan.) Natuhun ra sihin ra Jesús.

⁴Ta ziqui i catyi ra Pedro sihin ra Jesús: Tata, ivaha xaan yucu yo

ihya! Tatu cuñun cua zavaha ndi uñi tahan vehe tyiyahva, minoo cuenda moo, ta minoo cuenda ra Moisés, ta inga si cuenda ra Elías.

⁵Nii ñi sa cahan ra Pedro, ta i quisi minoo vico ndisi xaan si, ta ndaha tyazi si sii tandihi ra; ta sisi vico cuan i siñi ra minoo nduzu, ta catyi si: Ra ihya cuu Zehi. Cuñi xein sii ra. Zii xaan cuñi sihin ra. Cuiñi ndo sa cahan ra.

⁶Ta sa siñi ra i casi ra Jesús tuhun cuan, i sicava ndyayu ra nu ñuhu, ta i yuhu xaan ra.

⁷Ta ziqui i tuhva ra Jesús sii ra, ta i tyizo ra ndaha ra sii ra, ta catyi ra: Nduvita ndo. Ma yuhu ndo.

⁸Ta cuhva sa nandyeha ra, yoñi inga ca ra ndyeha ra, maa ñi ca ra Jesús.

⁹Ta cuhva sa vasi noo ra yucu cuan, ñihi xaan i saha ra Jesús tyiño sii ra, ta catyi ra: Ma nacatyi ndo sa ndyeha ndo nu sihin minoo ñiyivi ndya sa yaha nandoto ra i quisi ndya gloria sisi sa i sihi ra.

¹⁰Tacuan i catyi ra Jesús, ta ziqui i ndaca tuhun ra i casi ra sii ra: ¿Ñaa cuenda catyi ra maestro cuenda ley vatyí tahan si sa quisi xihna ca ra Elías?

¹¹Ta i nacahan ra Jesús, ta catyi ra: Sa ndisa vatyí xihna ca cua quisi ra Elías, ta cua zanduvaha ra tandihi.

¹²Zoco yuhvi catyi sihin ndo vatyí sa i quisi ra Elías, ta ñá nacoto ñiyivi sii ra. I zavaha ñu sihin ra tandihi sa cuñi maa ñu. Ta zuun ñi cuhva cuan cua ndyeha tucu ra i quisi ndya gloria tundoho zacuu ñiyivi.

¹³Tacuan i catyi ra Jesús, ta ziqui cutuñi iñi ra i casi ra vatyí cahan

ra Jesús tuhun ra Juan, ra i zacoo ndutya sii ñiyivi.

I zanduvaha ra Jesús sii minoo ra luhlu sa ñoho tatyí cuihna

¹⁴Cuhva sa i nasaa ra nu yucu tuu xaan ñiyivi, i tuhva minoo ra sii ra Jesús, ta i sicuiñi siti ra nuu ra, ta catyi ra:

¹⁵Tata, cundahvi iñun sii ra luhlu zehi. Ñihi xaan tahan ra, ta ndyeha xaan ra tundoho. Cuaha xaan saha nduva ra nu ñoho ñuhu a sisi ndutya.

¹⁶I quisi ndyaque sii ra sii ra sica noo suhun, zoco ñá cuu zanduvaha ra sii ra.

¹⁷Ta i nacahan ra Jesús, ta i catyi ra: iNdoho cuu ñiyivi ña sino iñi, ta ña vaha ndo! Ma cundyea iñi cundyei sihin ndo naha xaan ca. Ta ndyaca ndo sii ra luhlu ña ihya.

¹⁸Tacuan ta ziqui i cahan ra Jesús sihin tatyí cuihna, ta i tava ra sii si sii ra luhlu, ta i nduvaha ra zuun ñi caa cuhva cuan.

¹⁹Cuee ca i cahan ra i casi ra sihin maa ñi maa ra Jesús, ta i catyi ra: ¿Ñacu ñá cuu tava maa ndi sii tatyí cuihna cuan?

²⁰Ta i catyi ra Jesús sihin ra: Ñá cuu sii ndo vatyí siin cuiñi ñi sino iñi ndo. Sa ndisa catyi sihin ndo vatyí tatu sino iñi ndo vazu zuhva ñi tañi cuhva caa minoo siti mostaza, cua cuu catyi ndo sihin yucu ya: “Cuiñi siyon ihya, ta cuhun inga ityi.” Ta cua cuiñi siyo si. Ta ñahñi maa sa ma cuu sii ndo.

²¹Zoco nuu tatyí cuihna sa ñoho sii ra luhlu cuan, quita si maa ñi sa caca ndo sii ra Ndyoo ta coo ndyitya ndo.

**Zacoto tucu ra Jesús inga
saha cuhva cua cuu ra**

²²Nii ñi sa iin ñi sica noo ra nu cu si Galilea, i catyi ra Jesús sihin ra: Cua xico minoo ra sii ii, yuhvi ra i quisi ndya gloria.

²³Ta cua cahñi ñiyivi sii, ta sa cu uñi quivi cua nandoto tuqui. Ta sa catyi ra Jesús cuhva cuan, cuihya xaan i cuñi ra i casi ra.

Xuhun cuenda vehe ñuhu

²⁴Cuhva i saa ra Jesús sihin ra i casi ra ndya ñuu Capernaum, ra zatiyahvi sii ñiyivi xuhun cuenda vehe ñuhu i sahan ra i sicahan ra sihin ra Pedro, ta i ndaca tuhun ra sii ra: ¿Atu ña tuhva ra maestro ndo tyiyahvi xuhun cuenda vehe ñuhu?

²⁵Ta i catyi ra Pedro: Tuhva ra. Ta cuhva sa quihvi ra Pedro sisi vehe i cahan xihna ra Jesús sihin maa ra, ta catyi ra: ¿Yozo caa cuñi oo, Simón? ¿Yoo sii zatiyahvi ra rey, ra ndyaca ñaha ñuu ñiyivi ya? ¿Atu zatiyahvi ra sii ñiyivi sii ra a sii ñiyivi inga ñuu?

²⁶Ta i nacahan ra Pedro ta catyi ra: Sii ñiyivi inga ñuu zatiyahvi ra. Ta yivi sii ñiyivi sii ra. Ta i catyi ra Jesús sihin ra: Ndisa. Ta ñiyivi sii ra, ña tahan si tyiyahvi ñu.

²⁷Zoco ña cuñi yo sa zacuxaan yo sii ñiyivi. Yucuan cuenda cuahan ndya miñi ta cañun zuelun. Tyiyaca sa cua tiin sii si sa xihna ñi, ndyehun yuhu ti, ta cua nañuhun minoo xuhun. Ta maa cuhva ñi tyiyahvun sa cuenda mi ta sa cuenda moo. Cuhun sihin si, ta tyiyahvun.

¿Yoo ra cuu ra ñiñi ca?

18 Cuhva cuan i tuhva ra i casi ra Jesús sii ra, ta i ndaca tuhun ra sii ra: ¿Yoo nduhvi cuu ra ñiñi ca sa cuenda ra Ndyoo?

²Tacuan i catyi ra, ta i cana ra Jesús sii minoo ra luhlu ndya nu ndyaa ra. Ta i sañi ndyaa ra sii ra mahñu nu yucu ra.

³Ta i catyi ra sihin ra sica noo sihin ra: Sa ndisa catyi sihin ndo vatyi tatu ma zama ndo cuhva iyo ndo ta nduu ndo tañi sa ndyihhi sa ñahñi cuaty, ma cuu quihvi ndo nu ndyaca ñaha ra Ndyoo.

⁴Ra ñiñi ca nu ndyaca ñaha ra Ndyoo cuu ra zanduluhlu sii ra ta nduu ra tañi minoo ra luhlu.

⁵Ta yoo cua tiin cuenda vaha sii minoo ra luhlu tañi ra ya sa cuenda mi, tiin cuenda tucu ra sii mi cuhva cuan.

Ica xaan tatu zavaha yo cuaty

⁶Yoo ra cua zañaha sii minoo ra luhlu sa sino iñi sii, tañi ra luhlu ya cuhva zavaha ra sa ña vaha ta ma cundyico ca ra sii, vaha ca tatu sa i sihñi ñiyivi zucu ra cuan sihin minoo yuu yozo vee xaan ta zavita ñu sii ra sisi tyañuhu yaty ca.

⁷Indahvi ñiyivi ñuu ñiyivi vatyi tandihi tyiemvu iyo sa ña vaha sa cuñi ñu zavaha ñu! Ta tacuan cua cuu si, zoco ndahvi ñi cuu ra tyiyuhu sii ñiyivi ta zavaha ñu cuaty.

⁸Yucuan cuenda tatu cuñun zavohon sa ña vaha sihin ndohon a sihin sohon, cahndya ndaxun sii si ta zaviton sii si vatyi vaha ca cahun gloria tañi minoo ra ñahñi

ndaha a minoo ra coxo ta ma cahun andyaya sihin nduu tahan ndohon ta nduu tahan sohon sisi ñuhu sa ma ndahva.

⁹Ta tatu cuñun ndyehun sa ña vaha sihin minoo siti nuun, tavon sii si ta zaviton sii si vatyí vaha ca cua quihvun gloria sihin minoo ñi siti nuun nu ndyaca ñaha ra Ndyoo, ta ma cahun sihin nduu tahan siti nuun andyaya nu cayu ñuhu.

Cahan ra Jesús ziqui minoo cuhva, cuhva minoo mvee ticatyí sa cua naa

¹⁰Zaha ndo cuenda sii ndo, ta ma catyí ndo sa ma tyaa ndo yahvi vazu sii ra ndyíhi vatyí catyí sihin ndo vatyí ndya gloria ta ángel zacuenda sii ra ndyíhi tandíhi cuii tyiemvu nandyaa ra ityí nuu ra Ndyoo Zuti, ra ndyaa gloria.

¹¹Vatyí yuhvi, ra i quisi ndya gloria, vasi zacaqui sii ra cua naa.

¹²¿Yozo caa sica iñi ndo? Tatu iyo minoo ra, ta iyo minoo zieldu mvee ticatyí zono ra ta tatu cua naa minoo tí, ¿atu ma zandoo ra sii inga cumi xico sahun cumi tahan tí ta cahun ra ndya yucu ta nanducu ra sii quití sa cua naa cuan?

¹³Ta tatu sa nañihi ra sii tí, sa ndisa catyí sihin ndo vatyí zii xaan ca cua cuñi ra sa cuenda tí ta ziqui sa cuenda tandíhi inga cumi xico sahun cumi tahan tí sa ñá cua naa.

¹⁴Ta zuun ñi cuhva cuan ña cuñi Zutu yo ra ndyaa andiví sa cua naa numinoo ra luhlu tañi ra ya.

Cuhva cuñi si sa zaha yo tucahnu iñi sii hermano yo

¹⁵Tatu zavaha minoo hermano sa ña vaha suhun. Cuahan ndya vehe

ra ta nacahan vohon sihin ra maa tuhun ñi ra ta nacatyun sihin ra ñaa sa ña vaha i zavaha ra suhun. Tatu tyaa ra yahvi sa cohon ta ndaca ra tucahnu iñi suun hermano vaha cua cuu ra.

¹⁶Zoco tatu ma tyaa ra yahvi sa cohon sa xihna ñi, cahun inga saha sihin minoo a uu tahan hermano. Tacuan ta tandíhi sa cohon sihin ra ta cua catyí inga ra ndíhi suhun vatyí sa ndisa cohon, cua cuu ra sa ndaa.

¹⁷Ta tatu ma tyaa ra yahvi sa cahan inga hermano. Nacatyun nuu tandíhi ra hermano vehe ñuhu ñaa sa ña vaha i zavaha ra suhun. Ta tatu ma tyaa ra yahvi sa cahan tandíhi hermano, catyí ndo vatyí yiví ca ra sino iñi cuu ra, ta cuu ra tañi minoo ra zavaha sa ña vaha, tañi zavaha ra tava xuhun cuenda ra ndyaca ñaha vatyí sica ra cuaha ca.

¹⁸Sa ndisa catyí sihin ndo ñaa sa cua cuhñi ndo ñuu ñiyiví ya, cua cunuhñi tucu si andiví. Ta ñaa sa cua ndasi ndo ñuu ñiyiví ya, cua ndasi tucu si andiví.

¹⁹Ta catyí tuqui sihin ndo vatyí tatu cua ndu-íin uu tahan ndo ihya ñuu ñiyiví sa cuenda sa cua caca ndo, ra Ndyoo Zuti, ra ndyaa andiví, cua cuhva ra sii si sii ndo.

²⁰Vatyí tatu titahan vazu uu a uñi tahan ndo sa cuenda mi, yucuan ndyei sihin ndo.

²¹Tacuan i catyí ra Jesús, ta ziqui i tuhva ra Pedro sii ra, ta i ndaca tuhun ra sii ra: Tata, ¿yozo tahan saha cuñi si sa zehi tucahnu iñi sii minoo hermano tatu zavaha ra sa ña vaha sihin? ¿Atu zehi tucahnu iñi sii ra usa tahan saha?

²²Ta i catyi ra Jesús sihin ra: Ña catyi suhun vatyi usa tahan saha ñi. Catyi vatyi ndya tañi cumi ziendu cumi xico usi tahan saha a cuaha ca.

Cuhva iyo minoo muzu ña cuñi zaha tucahnu iñi sii ñiyivi

²³Cuhva ndyaca ñaha ra Ndyoo cuu si tañi minoo rey, ra cuñi coto yozo tavi muzu ra sii ra.

²⁴Ta sa quisaha tava ra cuenda sa cuenda minoo minoo ra, ta i quisi ndyaca ñu minoo ra tavi xaan sii ra. Cuaha xaan millón tavi ra sii ra.

²⁵Ñá cuu tyiyahvi ra sii ra ta yucuan cuenda i catyi rey cuan vatyi cua xico ra sii ra sihin ñazihhi ra ta zehe ra, ta cua zatyño ñu tyiño ñiyivi. Ta cua nduyahvi tandihhi ndaha tyiño ra, ta tacuan ta cua nañihhi rey cuan xuhun sa tavi ra cuan sii ra.

²⁶Yucuan cuenda i sicuñi siti muzu ra, ta i zacahnu ra sii ra, ta i catyi ra sihin ra: “Tata, zandyeun iñun ndyehun sii, ta cua tyiyahvi tandihhi sa tavi suun.”

²⁷Tacuan ta i cundahvi iñi rey cuan sii muzu ra, ta i zaña ra sii ra, ta i zaha ra tucahnu iñi sii ra sa cuenda tandihhi sa tavi ra sii ra, ta ma tyiyahvi ra sii ra.

²⁸Zoco zuun ñi muzu cuan i quita ra, ta i nañihhi ra sii inga ra cu muzu sihin ra. Tavi ra uu mil ñi sii ra. Ta i tiin cuiti ra zucu ra, ta i catyi ra: “¡Tyiyahvun sa tavon sii!”

²⁹Ta inga muzu cuan i sicuñi siti ra ityi nuu ra, ta i sica ra tumañi iñi sii ra, ta i catyi ra: “Zandyeun iñun ndyehun sii. Ta cua tyiyahvi tandihhi sa tavi suun.” Catyi ra.

³⁰Zoco ñá cuñi ra cundahvi iñi sii ra. Ta cuahan ra sihin ra, i sityihhi ra sii ra vehe caa ndya cua tyiyahvi ra sa tavi ra sii ra.

³¹Ta sa ndyehe inga ra tahan ra, ra cu muzu sihin ra, cuhva i zavaha ra sihin ra ta cuihya xaan i cuñi ra, ta i sahan inga ra ta i nacatyi ra sihin rey tandihhi sa i zacuu ra sii ra.

³²Ta i cana rey sii ra cu muzu, ra tavi xaan sii ra, ta i catyi ra sihin ra: “¡Yoho, muzu ña vaha cuun! Yuhvi i zaha xein tucahnu iñi suun sa cuenda tandihhi sa tavon sii, ta ñá tyiyahvun vatyi i sica xoon tumañi iñi sii.

³³Ta ¿ña cuenda ñá cundahvi iñun sii inga ra cu muzu suhun tañi i cundahvi iñi mi suun?”

³⁴Tacuan i catyi rey sito ho muzu cuan, ta i cuxaan xaan ra sihin ra, ta i tava ra tyiño sa cua ndoho ra ndya cua tyiyahvi ra tandihhi sa tavi ra sii ra.

³⁵Tacuan i catyi ra Jesús, ta ziqui i catyi ra: Ta zuun ñi cuhva cuan cua zavaha Zuti, ra ndyaa andivi, sihin maa ndo tatu ma zaha ndo tucahnu iñi sa ndisa cuii sii inga hermano tatu zavaha ra sa ña vaha suhun.

Cuhva i zacuaha ra Jesús vatyi ña vaha cua zandoo minoo ra sii ñazihhi ra

19 Sa yaha cahan ra Jesús cuhva cuan, ta i quita ra Galilea, ta i nasaa ra nu cu si Judea sa ndyaa siyo ityi caña ñicandyi siyo yuu Jordán.

²Cuaha xaan ñiyivi i sindyico sii ra, ta yucuan i zanduvaha ra sii ñu cuhu.

³Ta i tuhva tucu ra fariseo sii ra Jesús vatyí cuñi ra nducu ra cuhva tyaa ra cuatyí sata ra. Ta i ndaca tuhun ra sii ra Jesús: ¿Atu cuu zandoo rayii sii ñazihí ra sa cuñi ñi maa ra? Catyi ra.

⁴Ta i nacahan ra Jesús, ta catyi ra sihin ra: ¿Atu ta cahvi ca ndo Tuhun Ndyoo nu catyi si vatyí ra i zavaha ñiyivi sa xihna ñi, i zavaha ra sii minoo rayii ta sii minoo ñaha?

⁵Yucuan cuenda cua zandoo rayii sii zutu ra ta zihí ra, ta cua ndu-ñin ra sihin ñazihí ra. Ta sa nduu tahan ñu cua nduu ñu tañi minoo ñi ñiyivi ityi nuu ra Ndyoo.

⁶Yucuan cuenda ña uu tahan ñiyivi cuu ñu, minoo ñi. Ta minoo sa zandu-ñin ra Ndyoo, ña vaha zanduziñ ñiyivi sii si.

⁷Tacuan i catyi ra Jesús ta ziqui i ndaca tuhun ra fariseo sii ra: ¿Ñaa cuenda i saha ra Moisés tyiño vatyí cuu cuhva rayii minoo tutu divorcio sii ñazihí ra, ta tacuan ta cuu zandoo ra sii ña?

⁸Ta i catyi ra Jesús sihin ra: Ndava xaan iñi ndo. Yucuan cuenda i saha ra Moisés sa zandoo ndo sii ñazihí ndo. Zoco ña tacuan i cuu si nu quisaha si.

⁹Ta catyi sihin ndo vatyí tatu zandoo minoo rayii sii ñazihí ra ta yivi cuatyí sa quixi ña sihin inga rayii cu si ta zandoo ra sii ña ta tindaha ra sihin inga ñaha. Ra zandoo sii ñazihí sa ñahñi cuatyí cuan, zavaha ra cuatyí sa nañi adulterio. Ta tatu cua tindaha inga ra sihin minoo ñaha i zandoo yii, ra cua tindaha sihin ña, zavaha tucu maa ra cuatyí adulterio.

¹⁰Tacuan i catyi ra Jesús, ta ziqui i catyi ra i casi ra sihin ra: Tatu tacuan cuu si sihin rayii ta ñazihí ra, vaha ca ma tindaha yo. Catyi ra.

¹¹Ta ziqui i catyi ra Jesús sihin ra: Ña tandihí ñiyivi cuu cutuñi iñi cuhva ya, maa ñi ñiyivi sa tyindyee ra Ndyoo sii.

¹²Iyo ñiyivi ma cuu tindaha ñu vatyí tacuan ndyaa maa ñu cuhva ndya quivi i cacu ñu. Ta iyo inga ñiyivi ma cuu tindaha ñu vatyí sa sicoo cuhva zavaha ñiyivi sihin ñu. Ta iyo tucu inga ñiyivi ma tindaha ñu vatyí cuñi ñu zatyiño ñu tyiño ra Ndyoo. Tatu cuu zavaha ndo cuhva ya, zavaha ndo sii si.

Cuhva i zoco ñaha ra Jesús sii sa ndyihí

¹³Tacuan ta ziqui i quisi ndyaca ñiyivi sii sa ndyihí nu ndyaa ra Jesús vatyí cua tyizo ra ndaha ra xiñi si ta cahan ra sihin ra Ndyoo. Zoco i catyi ra i casi ra Jesús sihin ñiyivi vatyí ma quisi ndyaca ñu sii sa ndyihí sii ra.

¹⁴Zoco i catyi ra Jesús: Ma cahan ndo. Naquisi ndyaca maa ñu sii sa ndyihí sii, vatyí tatu cuñi ñiyivi sa cua cundyaca ñaha ra Ndyoo sii ñu, cua sino iñi ñu sii, tañi sino iñi sa ndyihí ya.

¹⁵Tacuan i catyi ra Jesús, ta i tyizo ra ndaha ra xiñi sa ndyihí. Ta ziqui i quita ra yucuan.

Catyí ra Jesús vatyí yii xaan cua cuhva cuenda minoo ra cuca sii ra sii Ndyoo

¹⁶I sahan minoo ra yoco nu ndyaa ra Jesús, ta i ndaca tuhun ra sii ra: Yoho maestro vaha xoon. ¿Yozo caa zacui ta ñihi tahvi añime?

¹⁷Ta i catyi ra Jesús sihin ra: ¿Ñaa cuenda catyun vatyi vaha xein? Minoo tuhun ñi ra vaha iyo, maa ra Ndyoo. Tatu cuñun sa ñihi tahvi añimon, zavohon cuhva catyi sa usi tahan ley ra Ndyoo.

¹⁸Ta i catyi ra cuan sihin ra Jesús: ¿Ndya ley? Ta i catyi ra Jesús sihin ra: Ma cahñun sii ñiyivi. Ma cuzun sihin inga ñaha sa yivi ñazihun cuu. Ma zuhun. Ma cohon cuendu ziqui ñiyivi.

¹⁹Tyoon yahvi sii zutun ta sii zihun. Ta cuñi xoon sii inga ñiyivi tañi cuñun sii moo.

²⁰Tacuan i catyi ra Jesús, ta i catyi ra yoco cuan sihin ra: Tyei yahvi sii tandihi tuhun cuan cuhva ndya ta luhlí. ¿Ñaa ca sa cumañi sii?

²¹Ta i catyi ra Jesús sihin ra: Tatu cuñun sa ma coo ca cuatyun caña ñi, cuahan, ta xicon tandihi sa iyo suun, ta cuhvon xuhun cuan sii ñiyivi ndahvi ta cua coo sa cuca suun gloria, ta quisun ta cundyicon sii. Catyi ra.

²²Ta sa siñi ra yoco cuhva cuan, ta i nducuihya xaan iñi ra vatyi cuca xaan ra.

²³Tacuan ta ziqui i catyi ra Jesús sihin ra i casi ra: Sa ndisa cuii catyi sihin ndo vatyi yii xaan ta cua quihvi ñiyivi cuca nu ndyaca ñaha ra Ndyoo.

²⁴Ta catyi tuqui inga saha vatyi yii ca quihvi minoo ra cuca nu ndyaca ñaha ra Ndyoo ta ziqui ca minoo camello yaha ti xuu minoo yicui ticui.

²⁵Ta sa siñi ra i casi ra Jesús cuhva i cahan ra, ta iyo xaan i cuñi ra, ta i catyi ra: Tatu tacuan cuu si çyoo ra cuu cacu?

²⁶Ta i ndyehe ra Jesús sii ra, ta catyi ra sihin ra: Tandihi sa ña cuu zavaha ñiyivi, cuu zavaha ra Ndyoo sii si. Catyi ra.

²⁷Tacuan ta i catyi ra Pedro sihin ra: Sa zandoo ndi tandihi sa sii ndi, ta ndyico ndi suun. ¿Ñaa sa cua ñihi maa ndi?

²⁸Ta i catyi ra Jesús sihin ra: Sa ndisa catyi sihin ndo vatyi ndoho ra ndyico sii, cuee ca, quivi cua cundyaa ra i quisi ndya gloria nu tyayu vaha ra sisi gloria ta cua cundyaa tucu maa ndo nu tyayu vaha. Minoo si sii minoo minoo ndo, ta cua tyicuhva ndo sii ñiyivi hebreo, tandihi sa usi uu tahan ityi ñu.

²⁹Ta tandihi ñiyivi sa zandoo vehe ñu a tahan ñu a zutu ñu a zihí ñu a ñuhu ñu sa cuenda mi, cua ñihi ñu minoo ziendu ca si, ta cua ñihi tahvi añima ñu, ta cua cundito ñu tandihi cuii tyiemvu.

³⁰Zoco cuaha ñiyivi ñiñi vityi, yivi ca ñiyivi ñiñi cua cuu ñu. Ta ñiyivi ña ñiñi, cua nduu ñu ñiyivi ñiñi xaan.

Cahan ra Jesús ziqui minoo cuhva, cuhva ra zatyíño

20 Cuhva ndyaca ñaha ra Ndyoo cuu si tañi minoo sito ho ñuhu. I quita ra ñaha ñi, ta cuahan ra vatyi cua nducu ra muzu sa cua tohon uva ra.

²Ta sa yaha zandaa ra tyiño sihin muzu cuan vatyi cua tyiyahvi ra oco usi peso sa minoo quivi, ta ziqui i tasi ra sii ra nu ndyaa tyiño ra.

³Ta i quita tucu sito ho si cuhva caa iin sa ñaha ñi, ta i ndyehe ra

vatyí yucu xaan ñiyívi nuyahvi, yucu ñi maa ra.

⁴Ta i catyi ra sihin ra: Cuahan tucu ndoho nu iyo tyiñe, ta cua tyiyahvi sii ndo cuhva tahan si. Ta cuahan muzu cuan cuhva catyi ra.

⁵Ta i quita tucu sitoho si cuhva maa ora, ta zuun ñi cuhva cuan i zavaha tucu ra. Ta tacuan tucu caa uñi sa sahiñi.

⁶Ta caa ohon sa sahiñi i sahan tucu ra nuyahvi, ta i nañihi ra sii inga ra ña zatyíño, ta i catyi ra sihin ra: “¿Ñacu yucu ñi maa ndo ihya ndiyaca, ta ña zatyíño ndo?”

⁷Ta i catyi ra cuan sihin ra: “Vatyí yoñi i saha tyiño sii ndi.” Ta ziqui i catyi sitoho si: “Cuahan tucu ndoho. Cua zatyíño ndo nu iyo tyiñe. Ta cua tyiyahvi sii ndo cuhva tahan si.”

⁸Ta tacuan i cuu si, ta sa sahiñi cuan i catyi sitoho ndaha tyiño cuan sihin ra zacuenda xuhun ra: “Cana sii ra zatyíño, ta tyiyahvun sii ra. Quisohon sihin ra i quisaha zatyíño sa sahiñi ta ndya cuhva ndya ra i quisaha sa xihna ñi.”

⁹Tacuan ta i saa ra i quisaha zatyíño cuhva caa ohon. Ta minoo minoo ra i ñihi ra oco usi peso.

¹⁰Cuee ca i tahan si tyiyahvi ra sii ra i quisaha zatyíño sa ñaha ñi, ta i sica iñi ra cuan vatyí cua ñihi ra cuaha ca, zoco zuun ñi cuhva i ñihi maa ra, oco usi peso sa minoo minoo ra.

¹¹Sa yaha quihin ra sii si, ta ziqui i quisaha cahan ra sii ra cu patrón ra.

¹²Ta catyi ra: “Inga ra cuan, i saa ra ndya nu ndihi. I zatyíño ra minoo ora ñi, ta iñi ñi cuhva i tyiyahvun sii ra tañi i tyiyahvun

sii maa ndi, ta maa ndi ñihi xaan i zatyíño ndi ndiyaca cuii nu ndyii.”

¹³Zoco i catyi sitoho si sihin minoo ra cuan: “Amigo, ñahñi sa ña vaha i zavehi suhun. ¿Atu ñá zandaa yo tyiño vatyí cua tyiyahvi oco usi peso suun?”

¹⁴Quihin xuhun ya ta cuhun. Inuu ñi cua tyiyahvi sii ra i saa ta sa cuñi ndihi tyiño tañi cua tyiyahvi suun.

¹⁵¿Atu ñahñi cuhva iyo sii, sa zavehi cuhva cuñi sihin xuhin? ¿Atu cuxoon sa vaha ñiyívi cui?”

¹⁶Ta ziqui i catyi tucu ra Jesús: Zuun ñi cuhva cuan, ra saa nu ndihi, cua cuu ra ra nuu. Ta ra quisaha sa xihna ñi, cua cuu ra nu ndihi vatyí cane sii cuaha xaan ñiyívi, zoco zuhva cuii ñi cuu ñiyívi i casi.

Nacatyí ra Jesús inga saha vatyí cua cahñi ñiyívi sii ra

¹⁷Cuahan ra Jesús ñuu Jerusalén. Ta ityi cuahan ra i tava ziin ra sii sa usi uu tahan ra i casi ra, ta i catyi ra sihin ra:

¹⁸Cuahan yo ñuu Jerusalén ya. Ta cua cuhva cuenda ñiyívi sii ra i quisi ndya gloria ndaha ra cu zutu nahnu ta ra cu maestro cuenda ley, ta cua catyi ra vatyí cua cuu ra.

¹⁹Ta cua cuhva cuenda ra sii ra sii ñiyívi sa yívi ñiyívi hebreo cuu, ta cua vacu ndyaa ñu sii ra, ta cua cañi xaan ñu sii ra, ta cua cahñi ñu sii ra nu cruz. Ta sa cu uñi quívi cua nandoto tucu ra.

Minoo sa i sica zihí ra Jacobo ta ra Juan

²⁰Ta ziqui i tuhva zihí ra Jacobo ta ra Juan sii ra Jesús. Yíi ña sii ra

Zebedeo. I zacahnu ña sii ra Jesús, ta i sica ña minoo tumañi iñi sii ra.

²¹Ta i ndaca tuhun ra Jesús sii ña, ta i catyi ra: ¿Ñaa sa cuñun zavehi? Ta i catyi ña sihin ra: Cuhvon vatyí quívi cua cundyaca ñohon, cua cundyaa nduu tahan zehi suhun. Minoo ra siyo cuohon ta minoo ra siyo zatyun.

²²Zoco i catyi ra Jesús: Ña siton ñaa sa sicon. Ta i catyi ra sihin ra Jacobo ta ra Juan: ¿Atu cundyee ndoho ndyehe ndo tundoho tañi cua ndyehe mi? Ta i catyi ra: Cundyee iñi ndi.

²³Ta i catyi ra Jesús sihin ra: Ndisa cuii cua ndyehi tundoho ta cua ndyehe ndoho tundoho sa cuenda mi. Zoco sa cundyaa ndo siyo cuehi, ta siyo zatyí, ña tahan si sa yuhvi cuhva. Maa ra Ndyoo Zuti cua catyi yoo ra cua ñihi ndatu cuan.

²⁴Ta sa siñi inga usi tahan ra i casi ra Jesús ta i cuxaan ra sihin ra Jacobo ta ra Juan.

²⁵Zoco i cana ra Jesús sii tandíhi ra, ta i catyi ra sihin ra: Sa sito maa ndo cuhva ndyaca ñaha ñiyívi ñuu ñiyívi. Iyo ra cu nuu, ta zacoto ra sii tandíhi ñiyívi vatyí ndyaca ñaha ra sii ñu.

²⁶Zoco ña tacuan cuu si sa cuenda ndoho. Zama si cuhva. Tatu cuñi minoo ra cuu ra ra cahnu, natyindyee ra sii ra tahan ra.

²⁷Ta yoo ra cuñi sa cuu ra minoo ra cahnu ityi nuu ra Ndyoo, cuñi si sa nduu ra muzu sii tandíhi ndo.

²⁸Vatyí cuhva ndya ra i quisi ndya gloria, ña vasi ra sa vatyí tyindyee ñiyívi sii ra. Vasi ra sa tyindyee ra sii ñiyívi. Ta vasi ra sa cuenda

sa cua cuu ra sa cuenda ñiyívi, ta ziqui cua cuu cuhun cuaha ñiyívi gloria.

Zanduvaha ra Jesús sii uu tahan ra cuaa

²⁹Quita ra ñuu Jericó, ta cuaha xaan ñiyívi i sindyico sii ra.

³⁰Ta ityi cuahan ra ndyaa uu tahan ra cuaa yu-ityi. Ta sa i siñi ra sa cua yaha ra Jesús, i cana saa ra, ta catyi ra: ¡Yoho Jesús, zehe ra David, cundahvi iñun sii ndi! Catyi ra.

³¹Cuaha xaan ñiyívi i cuxaan, ta catyi ñu nacutaxi ra, zoco ñihi ca nduu ra cana saa ra, ta catyi ra: ¡Yoho ra ndyaca ñaha ta ñiyívi ra David cuun! ¡Cundahvi iñun sii ndi!

³²Tacuan ta i sicuñi ra Jesús, ta i cana ra sii ra, ta catyi ra: ¿Ñaa sa cuñi ndo sa zavehi sihin ndo?

³³Ta i catyi ra cuaa cuan: Maestro, cuñi xaan ndi sa nandyehi ndi. Catyi ra.

³⁴Ta i cundahvi xaan iñi ra Jesús sii ra, ta i tiin ra siti nuu ra, ta zuun ñi caa cuhva cuan i cuu nandyehi ra, ta i sindyico ra sii ra Jesús.

Cuhva i quihvi ra Jesús ñuu Jerusalén

21 Ta cuhva sa cua saa ra ñuu Jerusalén, i saa ra sa xihna ñi ndya ñuu Betfagé vatyí ñi minoo yucu sa nañi yucu Olivos, ta ziqui i tasi ra Jesús sii uu tahan ra sica noo sihin ra minoo tyiño.

²I catyi ra sihin ra: Cuahan ndo minoo ñuu sa ndyaa vatyí ñi yucuan, ta cuhva sa quihvi ndo ñuu cuan, cua nañihi ndo sii minoo burro. Nuhñi ti, ta nandyaa zehe

ti sihin ti. Ndasi ndo sii ti, ta quisi ndo sihin ti.

³Ta tatu iyo ñiyivi ndaca tuhun sii ndo ñaa cuenda ndasi ndo sii ti, catyi ndo: “Siñi ñuhu ti sii ra ndyaca ñaha sii yo.” Ta tacuan ta cua cuhva ra sii ti.

⁴Ta i cuu tandihi cuhva cuan vatyí cua natahan si cuhva i catyi minoo ra profeta nu i tyaa ra tyehen:

⁵Ndyehe ndo, vasi rey ndo.

Zanduluhlu xaan ra sii ra, ta yozo ra minoo burro luhlu.

⁶Ta cuahan ra sica noo sihin ra Jesús, ta i zavaha ra cuhva i tava ra Jesús tyiño sii ra.

⁷I quisi ndyaca ra sii burro cuan sihin zehe ti, ta i tyizo ra zahma sata ti, ta i sicozo ra Jesús sii ti.

⁸Ta cuaha xaan ñiyivi i saqui zahma ñu ityi. Inga ñu i sahndya ndaha numa ta saqui ñu ityi nu cuahan ra.

⁹Ta ñu cuahan ityi nuu ra Jesús, ta ñu vasi ityi sata ra, i cana saa ñu, ta catyi ñu: ¡Cahnu xaan cuu zehe ra David! ¡Vaha xaan cuu ra vasi sa cuenda ra Ndyoo! ¡Nazacahnu yo sii ra Ndyoo!

¹⁰Ta cuhva sa quihvi ra ñuu Jerusalén, i ndutihvi tandihi ñiyivi ñuu cuan, ta catyi tandihi ñu: ¿Yoo ra cuu ra ya?

¹¹Ta i catyi ñu: Ihya ra cuu ra Jesús, minoo ra cu profeta. Ra ñuu Nazaret cuu ra nu cu si Galilea.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

¹²Tacuan ta i quihvi ra Jesús nu cuu nuquehe vehe ñuhu cahnu, ta

i tava ndyizo ra sii ñu xico ta ñu zata yucuan. Ta i zanduva ihno ra mesa ñiyivi nazama xuhun ñiyivi, ta tacuan tucu tyayu ñiyivi xico paloma.

¹³Ta i catyi ra sihin ñu: Catyi Tuhun Ndyoo: “Vehe mi cuu vehe nu cahan ñiyivi sihin ra Ndyoo”; zoco maa ndo zacuu ndo vehe ra zuhu sii si. Catyi ra.

¹⁴Ta i quisi ra cuaa ta ra coxo nu ndyaa ra Jesús sisi vehe ñuhu, ta i zanduvaha ra sii ra.

¹⁵Zoco i ndyehe ra zutu nahnu ta ra maestro cuenda ley sa ndyityi i zavaha ra Jesús. Ta i siñi ra vatyí cana saa sa ndyihí sisi vehe ñuhu, ta catyi si: “Cahnu xaan cuu Zehe ra David.” Ta i cuxaan xaan ra.

¹⁶Ta i catyi ra sihin ra Jesús: ¿Atu siñun sa cahan sa ndyihí cuan? Ta i catyi ra Jesús sihin ra: Siñi sa cahan si. ¿Atu ta cahvi ca ndo Tuhun Ndyoo nu cahan si sa cuenda cuhva ya? Catyi si:

Maa ra Ndyoo saha sa cata sa ndyihí ta sa lee, ta vaha xaan cuu cuhva zacahnu si sii ra.

¹⁷Tacuan ta ziquí i zandoo ra Jesús sii ñiyivi sisi vehe ñuhu. I quita ra ñuu Jerusalén, ta cuahan ra ndya ñuu Betania cua cuzu ra.

Ña zii maa i cuñi ra Jesús sihin minoo yutu ñahñi yucu vixi iñi nuu

¹⁸Inga quivi ñaha ñi cua nanuhu tucu ra Jesús ndya ñuu Jerusalén, ta i sizoco ra.

¹⁹Ityi cuahan ra i ndyehe ra minoo yutu higuera, ta i sahan ra i sindyehe ra tatu iñi siti tu, zoco ñá ñihí maa ra ndaha ñi. Maa maa ndaha ñi tu iñi. Ta i catyi ra Jesús

sihin yutu cuan: Ma cuhva ca moo yucu vixi casi ñiyivi. Ta zuun ñi caa cuhva cuan, ndaha i na-ityi ñi tu.

²⁰Ta cuhva sa ndyehe ra i casi ra Jesús sii tu, iyo xaan i cuñi ra ta i catyi ra sihin ra Jesús: ¡Yatyí xaan i na-ityi yutu higuera ya!

²¹Ta i nacahan ra Jesús, ta catyi ra sihin ra: Sa ndisa catyi sihin ndo vatyi tatu ñii xaan cuu iñi ndo, ta ma caca xaan iñi ndo tatu cuu a ma cuu zavaha ndo, cua zavaha ndo cuhva i zavehi sihin yutu higuera ya. Ta ña maa ñi tacuan. Cua cuu tucu cahan ndo sihin yucu ya:

“Cuiñi siyon ihya, ta cua ndihvun sisi tyañuhun”, cua catyi ndo.

²²Ta tandihi cuii ñaa sa cua caca ndo sii ra Ndyoo, tatu cua sino iñi ndo vatyi cua ñihi ndo sii si, cua ñihi ndisa cuii ndo sii si.

Iyo xaan cuhva sii ra Jesús

²³I quihvi ra Jesús sisi vehe ñuhu, ta i tuhva ra zutu nahnu ta ra mandoñi sii ra cuhva zacuahá ra, ta i ndaca tuhun ra sii ra: ¿Yoo sa saha tyiño suun vatyi zavohon tandihi cuhva ya? ¿Ta yoo ra catyi suhun vatyi zavohon sii si?

²⁴Ta i nacahan ra Jesús, ta catyi ra sihin ra: Cuñi tuqui nducu tuhin minoo cuhva sii maa ndo. Tatu nacatyí ndo, tacuan ta ziqui cua nacatyí sihin ndo yoo ra saha cuhva sii, ta zavehi cuhva ya.

²⁵¿Yoo ra i tasi sii ra Juan sa zacoo ndutya ra? ¿Atu i tasi ra Ndyoo sii ra a ñiyivi? Catyi ndo. Tacuan ta i natuhun tahan ra cuan sihin tahan ra, ta catyi ra: Tatu catyi yo vatyi i tasi ra Ndyoo sii ra Juan, cua catyi ra ya: “¿Ñaa cuenda ñá sino iñi ndo sa cahan ra?”

²⁶Zoco ma cuu catyi yo vatyi ñiyivi i tasi sii ra Juan vatyi yuhu yo sii ñiyivi vatyi sica iñi tandihi maa ñu vatyi ra Juan cuu minoo ra profeta.

²⁷Yucuan cuenda i catyi ra sihin ra Jesús: Ña sito ndi yoo ra i tasi sii ra Juan. Ta i catyi ra Jesús sihin ra: Ta yuhvi tucu ma nacatyí tucu vii yoo ra i saha cuhva ya sii.

Cahan ra Jesús cuhva minoo ra iyo uu tahan zehe

²⁸I catyi tucu ra Jesús sihin ra zutu nahnu ta sihin ra mandoñi: ¿Yozo caa sica iñi ndo sa cuenda tuhun ya? Sicoo minoo ra, ta sicoo uu tahan zehe yii ra. Ta i cahan ra sihin minoo ra, ta catyi ra: “Zehe luhli, cuahan vatyi cua tohon uva.”

²⁹Ta i catyi zehe ra: “Ma cuhin.” Zoco cuee ca i ndu-uu iñi ra cuhva ña vaha i cahan ra sihin zutu ra, ta cuahan ra.

³⁰Ta i sahan zutu ra i sicahan ra zuun ñi cuhva cuan sihin inga zehe ra. Ta i catyi inga zehe ra: “Cuhin, tata.” Catyi ra. Zoco ñá sahan ra.

³¹Ta vityi catyi ndo ¿ndya ra i zavaha cuhva cuñi zutu ra? Ta i catyi ra cuan sihin ra Jesús: Ra sa xihna ñi. Ta i catyi ra Jesús sihin ra: Sa ndisa catyi sihin ndo vatyi sa cuu quihvi ra tava xuhun cuenda ra ndyaca ñaha ta ñiyivi zii iñi nu ndyaca ñaha ra Ndyoo, zoco maa ndo ma cuu quihvi ndo.

³²Vatyi i quisi ra Juan, ta i zacuahá ra minoo cuhva ndoo xaan sii ndo, ta ñá sino iñi ndo sii ra, zoco ra tava xuhun cuenda ra ndyaca ñaha ta ñu zii iñi i sino iñi ñu sa cahan ra. Ta vazu ndyehe

maa ndo cuhva cuan, zoco ñá zama ndo cuhva iyo ndo, ta ña sino iñi ndo.

Tañi ra ña cuñi zatyíño vaha tacuan iyo ra cua cahñi sii ra Jesús

³³Cuiñi ndo inga cuhva ya. Sicoo minoo ra iyo ñuhu, ta i zavaha ra minoo sacu, ta i tasi ra yoho uva sisi si. Ta ziqui i zavaha ra nu cua tava ra ndutya uva ta minoo vehe tyiyahva vatyí cua zacuenda ra sacu ra. Ta i saha noo ra sacu ra sii minoo ityi ra cua zatyíño yucuan. Ta cuahan ra nusica.

³⁴Ta saa quivi sa iyo yucu vixi cuan ta i tasi ra sii muzu ra nu ndyaa ra zatyíño yucuan vatyí cua quihin ra zuhva yucu vixi cuhva tahan si sii patrón ra.

³⁵Zoco ra zatyíño yucuan, i tiin ra sii muzu cuan. I cañi ra sii minoo ra. Minoo ra i sahñi ra. Ta i cañi ra sihin yuu sii inga ra.

³⁶Inga saha i tasi tucu patrón cuan sii inga muzu ra. Cuaha ca ra i tasi ra ta ziqui sa xihna ñi. Ta zuun ñi cuhva ña vaha cuan i zavaha ra sihin ra.

³⁷Ta nu ndihi tuhun, i tasi ra sii zehe ra nu ndyaa ra zatyíño cuan vatyí catyi ra: “Cua tyaa ra cuan yahvi sii zehi.”

³⁸Zoco cuhva sa ndyehe ra zatyíño sii zehe ra, i natuhun tahan ra sihin tahan ra, ta i catyi ra: “Ihya ra cuu ra cua nañihi ndaha tyíño quivi cua cuu zutu ra. Nacahñi yo sii ra vatyí ndoo maa yo sihin sacu ya.” Catyi ra.

³⁹Ta i tiin ra cuan sii zehe ra, ta i tava ndyizo ra sii ra sata sacu, ta i sahñi ra sii ra.

⁴⁰Tacuan i catyi ra Jesús, ta ziqui i ndaca tuhun ra sii ra tyizoho: ¿Yozo caa cua zavaha sitocho sacu cuan sihin ra sahñi sii zehe ra?

⁴¹Ta i nacahan ra yucu yucuan, ta catyi ra: Cua zanaa ra sii ra ña vaha cuan, ta cua cuhva noo ra sacu ra sii inga ra zatyíño vaha, ra cua cuhva yucu vixi cuhva tahan si sii ra.

⁴²Ta i catyi ra Jesús sihin ra: ¿Atu ta cahvi ca ndo Tuhun Ndyoo? nu catyi si tyehen: “I zavita ihno ñiyivi zandaa vehe sii yuu sa cuñi si sa cuenda siqui vehe. Ta vityi yuu cuan cuu sa ñiñi ca ta ziqui tandihi sa cuenda vehe cuan vatyí tacuan catyi maa ra Ndyoo. Ta vaha xaan cuñi yo sihin cuhva ya.”

⁴³Yucuan cuenda catyi sihin ndo vatyí ma cuu cuhun ndo nu ndyaca ñaha ra Ndyoo, zoco inga ñiyivi sa yivi ñiyivi hebreo cuu cua cuhun ñu vatyí vaha cuhva zavaha ñu.

⁴⁴Ta yoo ra cua nduva ziqui yuu sa quehin tuhun cuan, cua tahnu cuatyí ra, zoco yoo ra cua canacava yuu cuan ziqui, cua cahnu cuatyí si sii ra sehe sehe.

⁴⁵Ta sa siñi ra zutu nahnu ta ra fariseo cuhva cahan ra Jesús, i cutuñi iñi ra vatyí cahan ra Jesús sa cuenda maa ra.

⁴⁶I cuñi ra tiin ra sii ra Jesús, zoco i yuhu ra sii ñiyivi vatyí sica iñi ñu vatyí minoo profeta cuu ra Jesús.

Cuhva minoo vico tindaha

22 I quisaha cahan ra Jesús inga saha ziqui minoo cuhva, ta i catyi ra:

²Cuhva ndyaca ñaha ra Ndyoo cuu si tañi minoo rey i zavaha

minoo vico tindaha sa cuenda zehe ra.

³Ta i tasi ra sii muzu ra vatyi cua cana ra sii ñiyivi cua quisi vico cuan, zoco ñá cuñi ñu quisi.

⁴Inga saha i tasi tucu ra sii inga muzu ra, ta catyi ra sihin ra: “Catyí ndo sihin ñiyivi i cane vatyi sa ndyaa listo sa casi ñu. Sa sahñi zindiqui zone ta inga quití xahan. Sa ndyaa listo tandihí. Naquisi maa ñu vico.”

⁵Ta tacuan i nacatyí muzu ra, zoco ñá tyaa ñiyivi yahvi. Minoo ra cuahan ra nu iyo itu ra, ta inga ra cuahan ra nu iyo inga tyiño ra.

⁶Ta inga ñiyivi i tiin sii muzu rey cuan, ta i cañi xaan ra sii ra ndya cuhva ndya sahñi ra sii ra.

⁷Ta sa siñi rey cuan cuhva cuan, i cuxaan xaan ra, ta i tasi ra sii zandaru ra vatyi cua cahñi ra sii ra sahñi sii ra cuan, ta i sahmi ra ñuu ra.

⁸Ta ziqui i catyi rey cuan sihin muzu ra: “Sa ndyaa listo tandihí sa cuenda vico tindaha, zoco ñiyivi i cane, ña vaha ñu vatyi ñá tyaa ñu yahvi sa quehin, ta ña tahan si sii ñu quisi ñu.

⁹Yucuan cuenda cuahan ndo calle nahnu, ta yoo ra ndyehe ndo cana ndo sii ra naquisi ra vico tindaha.”

¹⁰Ta cuahan muzu ra, ta i zatitahan ra sii tandihí ñiyivi i nañihi ra, ñiyivi vaha ta ñiyivi ña vaha, ta i sicoo cuaha xaan ñiyivi vico tindaha cuan.

¹¹Tacuan ta i quihvi rey cuan vatyi cua ndyehe ra sii ñiyivi i saa vico cuan, ta yucuan i ndyehe ra sii minoo ra ña ñoho zahma cuenda vico tindaha.

¹²Ta i catyi ra sihin ra: “Amigo, ¿yozo caa i quihvun ta ña ñohon zahma sa cuenda vico tindaha?” Catyi ra. Zoco ñá nacahan maa ra cuan.

¹³Ta ziqui i catyi rey cuan sihin muzu ra: “Cuhñi ndo saha ra ta ndaha ra ta zavita ndo sii ra nu ñaa, ityi sata nu cua vacu xaan ñiyivi ndya cuhva casi quihñi noho ñu.

¹⁴Vatyi i cane sii cuaha xaan ñiyivi, zoco zuhva ñi ñu i casi ta cuu quihvi ñu.”

Tahan si tyaa yo yahvi sii ra cu tyiño ta sii ra Ndyoo

¹⁵Tacuan ta ziqui i titahan ra fariseo ta i zacasi tahan ra tyiño minoo cuhva cua zavaha ra ta cua nducu ra cuhva sihin ñaa minoo tuhun ña vaha cua cahan ra Jesús, ta cua tyaa ra cuatyí sata ra.

¹⁶Ta i tasi ra fariseo sii zuhva ra ndyico sii ra sihin ra ndyico sii ra rey Herodes, ta i catyi ra sihin ra Jesús: Maestro, sito ndi vatyi ra vaha xaan cuun ta zañohon ityi ra Ndyoo sa ndisa. Ta inuu ndita ñi tyoon yahvi sa cahan ñiyivi cuca ta ñiyivi ndahvi.

¹⁷Yucuan cuenda nacatyun sihin ndi, ¿yozo caa sica iñun? ¿Atu vaha tyiyahvi yo xuhun sii ra ndyaca ñaha César a ña vaha? Catyi ra.

¹⁸Zoco i tuu iñi ra Jesús vatyi ña vaha añima ra cuan. Ta i catyi ra sihin ra: ¿Ñaa cuenda nducu coto ihñi ndo sii? ndoho ra zaha tuhun vatyi vaha xaan ndo zoco ña ndisa ndo.

¹⁹Zañaha ndo minoo xuhun sii. Catyi ra. Ta i quisi ndyaca ra minoo xuhun sii ra.

²⁰Ta i ndaca tuhun ra Jesús sii ra: ¿Yoo sii nuu ndyaa ya? ¿Ta yoo sii zivi ndyaa ya?

²¹Ta i catyi ra cuan. Sii ra gobierno César. Ta ziqui i catyi ra Jesús sihin ra: Cuhva ndo sii ra César sa cuu sii maa ra. Ta cuhva ndo sii ra Ndyoo sa cuu sii ra Ndyoo.

²²Ta sa siñi ra cuan sa cahan ra Jesús, ta iyo xaan i cuñi ra, ta i zandoo ra sii ra ta cuahan ra.

**Ndaca tuhun ra tatu cua
nandoto tucu ñiyivi**

²³Zuun ñi quivi cuan sahan zuhva ra saduceo cua cahan ra sihin ra Jesús. Ra saduceo cuu ra catyi vaty ma nandoto tucu ñiyivi i sihi. Yucuan cuenda i ndaca tuhun ra sii ra Jesús cuhva ya:

²⁴Maestro, i catyi ra Moisés vaty tatu sihi minoo rayi ta ndoo ndahvi ñazihí ra ta yoñi zehe ra, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁵Sicoo usa tahan rayi sihin yañi ra. I tindaha ra nuu. Ta i sihi ra, ta yoñi zehe ra i sicoo. I zandoo ra sii ñazihí ra cuenda yañi ra.

²⁶Ta tacuan tucu i zavaha ra cu uu, ta ra cu uñi ta cuhva ndya ra cu usa.

²⁷Ta nu ndihi tuhun i sihi ndihi tucu maa ñaha cuan.

²⁸Yucuan cuenda cuñi ndi coto ndi, ¿yoo ra cua cuu yi ña quivi cua nandoto ñiyivi? vaty ñazihí tandihí sa usa tahan ra i cuu sii ña. Tacuan i catyi ra cuan sihin ra Jesús.

²⁹Ta i nacahan ra Jesús, ta i catyi ra sihin ra: Ña sito ndo ñaa sa

cahan ndo vaty ña sito ndo ñaa sa catyi Tuhun Ndyoo. Ta ña sito ndo vaty iyo xaan cuhva sii ra Ndyoo.

³⁰Ñiyivi cua nandoto inga ñuu ñiyivi saa, ma tindaha ca ñu indyacuan, ta ma cuhva ca ñiyivi sii zehe ñu sa tindaha ñu. Cua nduu ñu tañi ángel ra Ndyoo sa iyo andivi.

³¹Ta sa cuenda tuhun tatu nandoto ñiyivi a ma nandoto ñu, ¿atu ta cahvi ca ndo sa i cahan ra Ndyoo sihin ndo? nu i catyi ra:

³²“Yuhvi cui Ndyoo sii ra Abraham ta sii ra Isaac ta sii ra Jacob.” Yivi Ndyoo sii ñiyivi ndaha sihi cuu ra. Ndyoo cuu ra sii ñiyivi cua cundito tandihí cui tyiemvu.

³³Tacuan i catyi ra Jesús, ta sa siñi tandihí ñiyivi, iyo xaan i cuñi ñu sihin cuhva i zacuaaha ra.

Mínoo ley ra Ndyoo sa ñiñi ca

³⁴Zoco cuhva i siñi ra fariseo vaty i zacutaxi ra Jesús sii ra saduceo, ta i titahan ra fariseo.

³⁵Ta minoo ra fariseo, ra cu minoo abogado, i ndaca tuhun ra sii ra Jesús vaty cuñi ra nducu coto ihñi ra sii ra. Ihya cuu sa ndaca tuhun ra:

³⁶Maestro, ¿ndya cuu ley ra Ndyoo sa ñiñi ca?

³⁷Ta i catyi ra Jesús sihin ra: Ley sa ñiñi ca sii ra Ndyoo catyi si: “Nihi xaan cuñi ndo sii Ndyoo Zutu ndo sihin añima ndo. ñn ñi sii ra caca iñi ndo; ñn ñi sihin ra cahan ndo; ñn ñi tyiño ra zatyño ndo.”

³⁸Ihya cuu sa xihna ñi ley ra Ndyoo, ta ley sa ñiñi ca cuu si.

³⁹Ta sa cu uu ley, ñn ñi sasi tahan si sihin ley sa xihna ñi cuan. Catyi

si: “Cuñi xaan ndo sii tandihi inga ñiyivi tañi cuñi ndo sii maa ndo.”

⁴⁰Ñahñi inga ca ley ñiñi ca ta ziqui nduu tahan ley ya. Tandihí inga ley ra Ndyoo ta tandihí sa i tyaa tandihí ra profeta, sasi tahan si sihin nduu tahan ley ya, ta tyaa si yahvi sii si.

¿Yoo sii zehe cuu sii ra Jesus?

⁴¹Cuhva sa yucu ra fariseo iin ñi yucuan i ndaca tuhun ra Jesús sii ra:

⁴²¿Yozo caa sica iñi maa ndo sa cuenda ra Cristo? ¿Yoo zehe sii ra? Ta i catyi ra fariseo cuan sihin ra: Zehe ra David.

⁴³Ta ziqui i catyi ra sihin ra: ¿Ñaa cuenda vatyí cuhva i cahan ra David cuhva cuñi Tatyí li ta i catyi ra vatyí ra ndyaca ñaha sii ra cuu ra Cristo? Ihya cuu sa i tyaa ra David:

⁴⁴Cahan ra Ndyoo sihin ra ndyaca ñaha sii mi, ta catyi ra:

“Cundyoon siyo cuehi ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun.”

Tacuan i tyaa ra David catyi ra Jesús.

⁴⁵Tatu zuun ñi ra David catyi vatyí ra ndyaca ñaha sii ra cuu ra Cristo, ¿yozo caa cuu cuu ra Cristo zehe ra David?

⁴⁶Ta sa catyi ra Jesús cuhva cuan, ta yoñi i cuu nacatyí cuhva sa ndaca tuhun ra. Ta ndya quivi cuan, yoñi ca i caña iñi ndaca tuhun ñaa inga tuhun sii ra.

Tyaa ra Jesús cuatyí sata ra fariseo ta ra maestro cuenda ley

23 Tacuan ta ziqui i cahan ra Jesús sihin tandihí ñiyivi ta sihin ra i casi ra, ta i catyi ra:

²Sica iñi ra maestro cuenda ley ta ra fariseo vatyí cuu nacatyí ra tandihí cuii sa cuñi catyi ley ra Moisés.

³Yucuan cuenda tandihí sa catyi ra cuan, tyaa ndo yahvi sii si, ta zavaha ndo sii si, zoco ma zavaha ndo cuhva zavaha maa ra vatyí cahan ra minoo cuhva ta zavaha ra inga si.

⁴Zanducuaha ca ra ley i tasi ra Ndyoo ta sa naha. Yoñi sa cuu zavaha tandihí sii. Ta nu maa ra ta ña zavaha ra tandihí si vatyí sa sito ra vatyí ma cuu.

⁵Ta tandihí sa zavaha ra, zavaha ra sii si vatyí cuñi ra sa cua ndyehe ñiyivi. Cuaha xaan Tuhun Ndyoo tyaa ra nu tutu quehen xaan ta tyaa ra sii si yiqui nuu ra ta zucu ndaha ra, ta nañi xaan yuhva tyaqui yuzahma ra.

⁶Cuñi xaan ra cundyaa ra tyayu vaha nu sasi ñiyivi zavaha vico. Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu.

⁷Ta cuñi ra vatyí tyaa xaan ñiyivi yahvi sii ra ta cuhva ñu nacumi sii ra nuyahvi ta catyi ñu maestro sihin ra.

⁸Zoco maa ndo, ma cuhva ndo sa catyi ñiyivi maestro sii ndo vatyí iyo minoo ñi ra cuu Maestro ndo, ra Cristo. Ta tandihí maa ndo, yañi ndo cuu sihin tahan ndo.

⁹Ta ma catyi ndo zutu ndo sii ra iyo ihya ñuu ñiyivi vatyí iyo minoo ñi ra cu Zutu yo. Ra ndyaa andivi.

¹⁰Ta ma catyi ndo vatyí minoo ndo cuu ra cu nuu, vatyí maa ñi ra Cristo cuu ra cu nuu sii ndo.

¹¹Ra cahnu ca nu yucu maa ndo cuu ra cua nduu muzu sii tandihí ndo.

¹²Ta yoo ra cua zanducahnu sii ra, cua zanduluhlu ra Ndyoo sii ra. Ta ra zanduluhlu sii, cua zanducahnu ra Ndyoo sii ra.

¹³Zoco indahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa vatyi nacazi ndo yuvehe gloria, ta ña cuu quihvi ñiyivi. Ná quihvi maa ndo, ta nu ña saha ndo quihvi inga ñiyivi cuñi quihvi.

¹⁴iNdahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa vatyi quindyaa ndo vehe ñundahvi, ñu sihi yii, ta ziqui zandavi ñaha ndo vatyi vaha xaan ndo, ta naha xaan cahan ndo sihin ra Ndyoo. Sa cuenda sa zavaha ndo cuhva ya, ta ñihi xaan ca cua tasi tuñi ra Ndyoo sii ndo.

¹⁵iNdahvi ndoho ra maestro cuenda ley ta fariseo! Zaha ndo tuhun vatyi vaha xaan ndo, zoco ña ndisa. Nanducu ndo nacahnu ñuu ñiyivi, ta yaha ndo tyañuhu vatyi cuñi ndo nañihi ndo vazú minoo tuhun ñi ñiyivi cua zasino ndo iñi ñu cuhva sino iñi maa ndo. Ta sa nañihi ndo sii ra cuan ta zananduu ndo sii ra uu cuhva quiñi ca ta ziqui maa ndo. Ta ndisa xaan cuu si vatyi cua cuhun tandihi ndo andyaya.

¹⁶iNdahvi ndoho! Ra cuaa cuu ndo, ta cuñi ndo zañaha ndo ityi sii inga ñiyivi. Catyi ndo: “Cuu tyiñaha ñiyivi Ndyoo nuu ñiyivi ta cahan ñu zivi vehe ñuhu cahnu, zoco ma zavaha ñu cuhva catyi ñu. Zoco tatu cahan ñu sa cuenda xuhun cuaan sa iyo sisi vehe ñuhu cuan, tacuan ta ziqui ñiñi xaan cua zavaha ñu cuhva catyi ñu.” Catyi ndo.

¹⁷Ra tondo cuu ndo ta ra laa cuu ndo. ¿Atu cahnu ca cuu xuhun cuaan ta ziqui vehe ñuhu sa zandu-ii sii si? Ña tacuan.

¹⁸Ta catyi ndo: “Yoo ra cua tyiñaha Ndyoo nuu ñiyivi ta cahan ra zivi altar, zoco ma zavaha ra cuhva catyi ra. Zoco tatu cahan ra tuhun sa yozo nuu altar cuhva cuan, tacuan ta ziqui iyo cuatyi ra tatu ma zavaha ra cuhva catyi ra.” Catyi maa ndo.

¹⁹Ra tondo ta ra laa cuu ndo. ¿Atu cahnu ca cuu sa yozo nuu altar cuan ta ziqui altar sa zandu-ii sii si? Ña tacuan.

²⁰Ta yoo ra tyiñaha Ndyoo nuu ñiyivi ta cahan ra zivi altar, zavaha ra sii si sa cuenda altar ta ndya sa cuenda tandihi sa yozo nuu si.

²¹Ta yoo ra tyiñaha Ndyoo nuu ñiyivi ta cahan ra zivi vehe ñuhu, zavaha ra sii si sa cuenda vehe ñuhu ta sa cuenda ra Ndyoo, ndihi ca.

²²Ta ra tyiñaha Ndyoo nuu ñiyivi ta cahan ra zivi andivi, zavaha ra sii si ndya sa cuenda tyayu ra Ndyoo ta ndya sa cuenda ra Ndyoo ra ndyaa nuu si.

²³iNdahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa vatyi cahvi ndo ndaha menta ndo ta siti anís sihin siti comino ta saha ndo minoo minoo sisi sa usi tahan si sii ra Ndyoo, zoco ña tyaa ndo yahvi sa ñiñi ca sa catyi ley tañi sa zavaha ndo sa ndoo ta sa cundahvi iñi ndo sii ñiyivi ta sa cunii xaan iñi ndo sii ra Ndyoo. Cuñi si sa zavaha ndo cuhva ya, ta ma zaña ndo sa cuhva tucu ndo diezmo cuan.

²⁴Ra cuaa cuu ndo, ta cuñi ndo zañaha ndo ityi sii inga ñiyivi. Zacuenda xaan ndo sii ndo ta ña zavaha ndo cuatyí ndiyihi, zoco zavaha ndo cuatyí nahnu xaan sa ña tyaa ndo yahvi ley cuan. Cuu si tañi tava ndo tyiyucu ndiyihi nuu calu ndo ta ziqui coco ndo quití nahnu ca sa nañi camello.

²⁵iNdahvi ndoho ra maestro cuenda ley ta ndoho ra fariseo! Zaha ndo tuhun vatyi vaha xaan ndo, zoco ña ndisa. Nacatya xaan ndo sata coho ta sata vaso, zoco añima ndo situ cuii sa ña vaha sa zavaha ndo tañi sa zuhu ndo ta cuhva ña cuu cundyaca ñaha ndo sii ndo.

²⁶Ndoho ra fariseo cuaa, catyi ra Jesús, xihna ca zandundiun ityi sisi vaso ta coho, ta ziqui cua ndundií tucu ityi sata si.

²⁷iNdahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa. Cuu ndo tañi ñaña sa zandutyacui xaan ñiyivi ityi sata, zoco ityi sisi maa maa yiqui ndiyi ñoho ta tandihi inga nuu sa quiñi caa.

²⁸Ta tacuan iyo maa ndo. Vaha xaan ñiyivi cuu ndo cuhva caa ndo ityi nuu ñiyivi, zoco añima ndo situ cuii si sihin cuhva zandavi ñaha ndo ta tandihi inga nuu sa ña vaha sa zavaha ndo.

²⁹iNdahvi ndoho ra maestro cuenda ley ta ra fariseo! Zaha ndo tuhun vatyi vaha xaan ndo, zoco ña ndisa vatyi tyacui zavaha ndo ñaña ra i cuu profeta ta zandutyacui ndo ñaña ñiyivi vaha.

³⁰Ta catyi ndo: “Tatu sa vatyi i sindito maa ndi quivi i sahñi ñiyivi

sahnu sii ndi sii ra profeta, maa ndi ma ndoo ndi vaha sa cahñi ra sii ra.”

³¹Ta sihin cuhva cahan ndo, zuun ñi maa ndo saha sa ndaa sa cuenda ndo vatyi zutu ndo sii ra i sahñi sii ra profeta.

³²iZavaha ca ndo cuhva ña vaha sa i quisaha zutu ndo!

³³iTañi coo cuu ndo, zehe quití xaan! ¿Yozo caa cuu cacu ndo ta ma cahun ndo andyaya? Ma cuu.

³⁴Yucuan cuenda cua tasi sii ra profeta ta sii ra iyo xaan sa siñi tuñi ra Ndyoo sii, ta sii ra cua zacuaha Tuhun Ndyoo sii ndo. Zoco maa ndo cua cahñi ndo sii zuhva ra ta zuhva ra cua tyaa ndo nuu cruz. Ta inga ra cua cañi ndo sisi vehe ñuhu ndo ta cua zayanga ndo sii ra ta zayuhu ndo sii ra, ta cua cono ra ndya minoo ñuu ta ndya inga ñuu.

³⁵Ta yucuan cuenda sata maa ndo cua ndoo cuatyí sa cuenda tandihi ñiyivi vaha i sahñi ñiyivi ndya ra Abel, ra ndoo xaan, ta ndya cuhva ndya ra Zacarías zehe ra Berequías, ra i sahñi ndo sisi vehe ñuhu mahñu nu ii xaan sihin altar.

³⁶Sa ndisa catyi sihin ndo vatyi cua ndoo cuatyí sa cuenda tandihi ya sata ñiyivi iyo vityi.

**Sacu xaan ra Jesús sa ndyehe
ra ñuu Jerusalén.**

³⁷iNdahvi yoho ñuu Jerusalén! Sahñi ñiyivi sii ra profeta ihya, ta ra tasi ra Ndyoo ihya, cañi ñu sii ra sihin yuu. ¡Cuaha xaan cuaha xaan saha cuñi zandu-iin sii ñiyivi ñuu ya ta zacuende sii ñu tañi zacuenda minoo ndivi sii zehe ti sisi ndisi ti, zoco ña cuñi ñu!

³⁸Ndyehe ndo vityi, ndoho ñiyivi ñuu Jerusalén, vatyí vityi zandoi sii ndo.

³⁹Vatyí catyí sihin ndo vatyí ma ndyehe ca ndo sii, ndya cuhva ndya quivi cua catyí ndo vatyí vaha xaan cuu ra vasi sa cuenda ra ndyaca ñaha sii yo.

**Cuhva i catyí ra Jesús cuhva
cua tani vehe ñuhu cahnu**

24 I quita ra Jesús vehe ñuhu ta sa cuahan ra ityí ta i tuhva ra i casi ra sii ra ta i quisaha zañaha ra sii ra Jesús cuhva caa vehe ñuhu.

²Zoco i nacahan ra Jesús ta catyí ra sihin ra: ¿Atu ndyehe ndo tandíhi ihya? Sa ndisa catyí sihin ndo vatyí numinoo yuu ya ta ma ndoo si ziquí tahan sí. Cua tani tandíhi sí. (Sihin cuhva ya zacoto ra Jesús vatyí cua zatívi ndíhi ñiyivi vehe ñuhu cuan.)

Zeña sa cua naa ñuu ñiyivi

³Tacuan ta ziquí cuahan ra yucu sa nañi Olivos. Ta sa sindyaa ra Jesús yucuan, ta i tuhva ra i casi ra sii ra, ta xehe ñi i cahan ra sihin ra, ta catyí ra: Cuñi ndi sa nacatyun sihin ndi ama cua coo cuhva cuan. ¿Ñaa zeña cua ndyehe ndi, ta cua coto ndi vatyí sa cuñi quisun ta sa cuñi naa ñuu ñiyivi? Catyí ra.

⁴Ta i nacahan ra Jesús, ta catyí ra sihin ra: Zacuenda ndo sii ndo coto zandavi ñaha ñiyivi sii ndo.

⁵Vatyí cuaha xaan ra cua quisi, ta cua catyí ra vatyí vasi ra sa cuenda mi, ta cua catyí ra: “Yuhvi cui Cristo.” Ta cua zandavi ñaha ra sii cuaha xaan ñiyivi.

⁶Cua cuiñi ndo tuhun vatyí cua coo cuatyí ta cahñi tahan xaan ñiyivi, zoco ma yuhu ndo. Xihna ca cua cuu tandíhi cuhva cuan, cumañi ca sa saa quivi naa ñiyivi.

⁷Vatyí cua cahñi tahan minoo ñuu sihin inga ñuu, ta cua coo cuatyí ñuu nahnu sihin inga ñuu nahnu. Ta cua coo tama ta cuehe ta cua coo sa taan nahnu xaan ziiñ ziiñ ityí.

⁸Ta tandíhi cuhva ya, nu nacaa cua quisaha ndyehe ñiyivi tundoho.

⁹Ta ziquí cua cuhva cuenda ñiyivi sii ndo sii ra ndyaca ñaha vatyí cua ndoho ndo. Ta cua cahñi ñiyivi sii zuhva ndo. Ta tandíhi ñiyivi ñuu ñiyivi cua cuxaan xaan ñu ndyehe ñu sii ndo sa cuenda mi.

¹⁰Ta quivi cuan, cuaha xaan ñiyivi sino iñi sii, cua ndoyo ñuhu ñu. Ta cua xico tuhun ra sii tahan ra. Ta ma cuu ca ndyehe ra sii tahan ra.

¹¹Cua coo cuaha xaan ra vatyá. Cua catyí ra vatyí cahan ra sa cuenda ra Ndyoo, ta cua zandavi ñaha ra sii cuaha xaan ñiyivi.

¹²Cuaha xaan sa quiñi cua coo ndya cuhva ndya ma cuñi ca ñiyivi sii tahan ñu.

¹³Zoco ra ma zaña tuhun ndya nu cua ndíhi ñuu ñiyivi, cua cacu ra.

¹⁴Ta Tuhun Vaha sa cuenda cuhva ndyaca ñaha ra Ndyoo, cua zacoto ñiyivi sii si nacahnu ñuu ñiyivi, ta cua cuiñi tandíhi ñiyivi sii si, ta ziquí cua naa ñuu ñiyivi.

¹⁵Tatu ndyehe ndo minoo sa zatívi xaan ta quiñi xaan zacuu si, ta nandyaa si cuan nu ii cuhva i catyí ra profeta Daniel, cutuñi iñi ndo ndoho ra cahvi tuhun ya,

¹⁶tatu ndyehe ndo sii si cuan, nacono ñiyivi ñoho Judea, ta naquihvi xehe ñu ndya yucu.

¹⁷Tatu iyo ra yozo xiñi vehe ra quivi cuan, ma cuatu ra numaa iyo ndaha tyiño cuñi ra tava ra sisi vehe ra.

¹⁸Ta ra ñoho itu ra, ma cunuha ra ndya vehe ra sa cua naquihin ra zahma ra.

¹⁹Ta ndahvi ñu zihhi sa ñoho zehe quivi cuan a tatu iyo zehe ñu sa tyaxi quivi cuan vatyí cahnu xaan tundoho cua ndyehe ñu.

²⁰Ta caca ndo sii ra Ndyoo vatyí ma tahan si cono ndo quivi vico zavi a minoo quivi quitatu ñiyivi

²¹vatyi tatu tacuan tahan si, yaha xaan cuaha tundoho cua coo, minoo cuhva ta coo ca ndya cuhva ndya quivi i sino ñuu ñiyivi ta ma coo ca tundoho cahnu xaan tañi tundoho ya inga saha ndaha ñi.

²²Tatu ma zanduzuhva ra Ndyoo quivi tundoho cuan, yoñi ñiyivi cua cacu. Zoco cua zanduzuhva ca ra sii si sa cuenda ñiyivi i casi ra.

²³Tatu catyi minoo ra sihin ndo: “Ihya ndyaa ra Cristo” a “Yucuan ndyaa ra”, catyi ra, ma sino iñi ndo.

²⁴Vatyí cua nduvita cuaha xaan ra zandavi ñaha, ta cua catyi ra vatyí Cristo cuu ra, ta cua catyi ra vatyí cahan ra tuhun saha ra Ndyoo sii ra. Ta cua zavaha ra zeña nahnu ta sa ndyityi ndya cuhva ndya sii ñiyivi i casi ra Ndyoo cua zandavi ñaha ra tatu sa vatyí cuu cuhva cuan, zoco ma cuu.

²⁵Ndyehe ndo, sa nacatyí tandihi sihin ndo cuee ca sa tahan si.

²⁶Yucuan cuenda tatu catyi ñiyivi sihin ndo: “Ndyehe ndo, ndyaa ra

Jesús sisi cuhu.” Catyi ñu. Zoco ma cuhun ndo cundyehe ndo. A tatu catyi ñu: “Iyo minoo nu ñoho xehe ra.” Ma sino iñi ndo.

²⁷Vatyí quivi cua quisi inga saha, cua ndyehe tandihi ñiyivi sii. Tañi ndyehe tandihi ñiyivi tatu yaha tasa zavi ityi caña ñicandyi ta cuhva ndya ityi cua iñi, tacuan cua cuu si quivi quisi tucu ra i quisi ndya gloria.

²⁸Vatyí nu catuu ndiyi, yucuan cua titahan tyasii.

Cuhva cua quisi tucu ra i quisi ndya gloria

²⁹Tatu sa yaha ndyehe ñiyivi tundoho cuan ta ziqui ña naha ca ta cua nduñaa ñicandyi ta ma ndyehe ca nu yoo. Cua nacoyo tiño, ta ndya cuhva ndya cua canda andivi.

³⁰Tacuan ta ziqui cua ndyehe ñiyivi sii ra i quisi ndya gloria ityi andivi, ta cua nducuihya xaan iñi tandihi tata ñiyivi ñuu ñiyivi. Cua ndyehe ñu vatyí vasi ra nu vico, ta sihin cuaha xaan cuhva. Ta tyaqui xaan caa ra.

³¹Ta cua tasi ra sii ángel ra ndya tandihi sa cumi tahan siqui ñuu ñiyivi, ta cua tiví ra cutu sihin minoo nduzu ñihi xaan. Ta cua zatahan ra sii tandihi ñiyivi i casi ra Ndyoo ndya nacahnu ñuu ñiyivi.

³²Vityi coto ndo minoo cuhva iyo yutu higuera ta tandihi inga yutu. Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyí sa cua nducahñi.

³³Ta tacuan tucu tatu sa ndyehe ndo vatyí sa cuu tandihi tuhun sa

quehin sihin ndo ihya, tacuan ta
cua coto ndo vatyí sa cua cuyatyí sa
cunaa ñuu ñiyívi.

³⁴Sa ndisa catyí sihin ndo vatyí
cua cuu cuhva ya cuee ca sa cuu
ñiyívi sa iyo vityí.

³⁵Yutyí andívi ta ñuhu ñuu ñiyívi
cunaa si. Zoco tuhun quehin, ma
naa si.

³⁶Zoco yoñi ñiyívi sito ñaa quívi
a ñaa cuhva cua cuu si. Nu ángel
andívi ta ña sito ra. Maa tuhun ñi
ra Ndyoo Zuti sito.

³⁷Tañi i cuu si quívi ra Noé,
tacuan cua cuu tucu si quívi cua
quisi tucu ra i quisi ndya gloria.

³⁸Quívi cumañi ca cuu ñiyívi
sihin ndutya, sasi ñu. Sihi ñu.
Tindaha ñu. Ta saha ñu sii zehe ñu
tindaha ñu ndya cuhva ndya quívi i
quihvi ra Noé sisi barco.

³⁹Ta zana ñi iñi ñu, ta i zanaa
ndutya sii tandihí ñu. Zuun ñi
cuhva cuan, cua cuu tucu si quívi
cua quisi tucu ra i quisi ndya gloria.

⁴⁰Quívi cuan, uu tahan ra ñoho
itu ra, cua quihin sii minoo ra. Ta
inga ra cua nandoo.

⁴¹Ta uu tahan ñuzihí ndyico iin ñi
quívi cuan, cua quihin sii minoo ña.
Ta inga ña cua nandoo.

⁴²Yucuan cuenda cuatu listo ndo
vatyí ña sito ndo ñaa quívi cua
quisi ra ndyaca ñaha sii ndo.

⁴³Coto ndo cuhva ya, tatu sa i sito
ra xu vehe ñaa cuhva cua quihvi
ra zuhu, cua cuatu listo ra, ta ma
cuhva ra sa nuña ra zuhu cuan vehe
ra.

⁴⁴Yucuan cuenda cuatu listo tucu
maa ndo vatyí minoo quívi sa ña
sica iñi ndo, cua quisi tucu ra i
quisi ndya gloria.

Muzu vaha ta muzu ña vaha

⁴⁵¿Yoo ra cuu minoo muzu vaha,
muzu sa iyo sa siñi tuñi vaha ta
saha patrón ra sa cundyaca ñaha
ra vehe ra ta cuhva ra sa casi inga
muzu ra cuhva tahan si?

⁴⁶Zii xaan cua cuñi muzu cuan
tatu nasaa patrón ra ta nañihi ra
sii ra zavaha ra cuhva cuan, cuhva
catyí patrón ra.

⁴⁷Sa ndisa catyí sihin ndo vatyí
cua cuhva patrón ra sa cundyaca
ñaha ra tandihí sa sii ra.

⁴⁸Zoco tatu ña vaha muzu cuan
ta sica iñi ra sihin añima ra: “Naha
xaan cuahan patroin.”

⁴⁹Ta yucuan cuenda quisaha cañi
ra sii inga muzu ta sasi cuahyi ra ta
sihi xaan ra ndixi ta siñi ra.

⁵⁰Tacuan ta zana ñi iñi ra ta cua
nasaa patrón ra minoo quívi sa ña
ndatu ra sii ra, minoo cuhva sa ña
sito ra,

⁵¹ta cua tasi tuñi xaan patrón ra
sii ra. Ta cua tahan si sii ra tañi cua
tahan si sii ñiyívi zaha tuhun vatyí
vaha xaan ñu, zoco ña ndisa. Ñihi
xaan cua vacu saa ñu, ndya cuhva
cua casi quihñi noho ñu.

Minoo cuhva sa cuenda usi tahan ñu yoco

25 Cuhva ndyaca ñaha ra
Ndyoo cuu si tañi cuhva i
tahan usi tahan ñu yoco sa cuahan
minoo vico tandaha. I quihin ñu
lámpara ñu sa sahmi azetye, ta
cuahan ñu vatyí cua zatahan ñu sii
ra cua tindaha.

²Ta ohon tahan ñu cuan, listo
xaan ñu. Ta ohon tahan ñu, laa
xaan ñu.

³Ta ñu laa cuan, i quihin ñu lámpara ñu, zoco ñá quihin ñu cuaha ca azetye.

⁴Ta ñu listo cuan, i quihin ñu lámpara ñu, ta i quihin tahan tahan ñu minoo yutyi azetye vatyi cua zacutu tucu ñu sii si.

⁵Ta ñii ñi sa cucuee xaan ra cua tindaha, i quixi tandihi ñu.

⁶Tacuan ta maañuu i siñi ñu cana saa ñiyivi, ta catyi ñu: “iSa vasi ra cua tindaha; cuahan ndo cua zatahan ndo sii ra!”

⁷Ta i nduvita tandihi ñu, ta i zanduvaha ñu lámpara ñu.

⁸Ta i catyi ñu laa cuan sihin ñu listo cuan: “Cuhva ndo zuhva azetye ndo sii ndi vatyi sa cuñi ndahva lámpara ndi.”

⁹Zoco i nacahan ñu listo cuan, ta catyi ñu: “Ma cuu, coto ma ñihi si sa cuenda tandihi yo. Vaha ca tatu cuhun ndo nu cuyahvi si ta zata ndo zuhva sa cuenda maa ndo.” Catyi ñu.

¹⁰Zoco ñii ñi sa cuahan ñu sa cua zata ñu sii si, ta i saa ra cua tindaha cuan, ta ñu sa ndyaa listo i quihvi ñu sihin ra nu iyo vico tindaha, ta i nucundazi yuvehe.

¹¹Cuee ca i nasaa inga ñu yoco cuan, ta i catyi ñu: “iTata, tata, nuña yuvehe!”

¹²Zoco i nacahan ra ta catyi ra: “Sa ndisa catyi sihin ndo vatyi ña site sii ndo.”

¹³Ta ziqui i catyi ra Jesús: Yucuan cuenda cuatu listo ndo vatyi ña sito ndo ñaa quivi a ñaa cuhva cua quisi tucu ra i quisi ndya gloria.

**Cuñi si sa cutyiño yo tandihi
sa saha ra Ndyoo sii yo**

¹⁴Cuhva ndyaca ñaha ra Ndyoo cuu si tañi minoo ra sa cuñi cuhun

minoo ñuu nusica, ta i cana ra sii tandihi muzu ra, ta saha cuenda ra xuhun ra sii ra.

¹⁵Sii minoo ra saha ra tañi ohon mil, sii inga ra tañi uu mil, ta sii inga ra minoo mil ñi. Cuhva cuu sii sa minoo minoo ra sa zatyíño ra sihin si, tacuan saha ra sii si sii ra. Ta i quihin ra ityi cuahan ra.

¹⁶Tacuan ta ra i ñihi sa ohon mil cuan, cuahan ra, ta i zatyíño ra sihin si, ta i ñihi ra inga ohon mil ziqui si.

¹⁷Ta zuun ñi cuhva cuan, ra i ñihi uu mil, i ñihi ra inga uu mil ziqui si.

¹⁸Zoco ra i ñihi minoo mil ñi, i sahan ra, ta i sitya ra minoo yavi, ta i tyixehe ra xuhun patrón ra.

¹⁹Cuee xaan ca, i nasaa patrón, ta i tava ra cuenda sihin muzu cuan.

²⁰Xihna ca i saa ra i ñihi ohon mil cuan, ta i saha cuenda ra inga ohon mil sii patrón ra, ta i catyi ra: “Tata, i sohon ohon mil sii. Ica si ya sihin inga ohon mil i zahacanei ziqui si.”

²¹I catyi patrón ra sihin ra: “Vaha xaan; yoho cuu minoo muzu vaha, ta ndoo xoon. Vaha xaan i zatyíñon sihin sa zuhva ñi xuhun i zandoi suhun. Yucuan cuenda vityi cua cuhve sa cundyaca ñohon cuaha ca. Quihvi ta cuzii xaan iñun iñ ñi sihin mi.”

²²Cuee ca i saa muzu sa ñihi sa uu mil cuan, ta i catyi ra: “Tata, i sohon uu mil sii; ica si ya sihin inga uu mil i zahacanei ziqui si.”

²³I catyi patrón ra sihin ra: “Vaha xaan; yoho cuu minoo muzu vaha, ta ndoo xoon. Vaha i zatyíñon sihin sa zuhva ñi xuhun i zandoi suhun. Yucuan cuenda vityi cua cuhve sa cundyaca ñohon cuaha ca. Quihvi

ta cuzīi xaan iñun iin ñi sihin mi.”
Catyí ra.

²⁴Tacuan ta i saa muzu sa ñihi minoo mil ñi, ta i catyí ra sihin patrón ra: “Tata, site suun vatyí minoo ra xaan cuun, ta tuhvon naquihin sa yiví suun cuu, ta nacahun tyiño zacuu inga ra.

²⁵Ta i yuhi suun, ta sehin ta i tyixehi xuhun sisi ñuhu. Naquihin sa suun vityí.”

²⁶Ta i nacahan patrón ra, ta catyí ra: “Yoho, minoo muzu ña vaha ta ra zusa cuun. Sa siton vatyí tuhve naquihin sa yiví sii, ta naquihin tyiño zacuu inga ra.

²⁷Yucuan cuenda ¿ña cuenda ñá tyuhun xuhin banco, ta sa cua nasei ta cua naquihin sii si, zoco sa zahacanaa si zuhva?” Catyí patrón cuan.

²⁸Ta i catyí ra sihin inga ra yucu yucuan: “Quindyaa ndo xuhun sa sehi sii ra ya, ta cuhva ndo sii si sii ra sa cumi usi mil cuan.

²⁹Vatyí ra zatyíño vaha sihin sa sehi sii ra, cua cuhve cuaha ca sii ra, ta cua coo cuaha xaan ca sii ra. Ta ra ña cuñi zatyíño sihin sa sehi sii ra, cua quindyeyi sii si.

³⁰Ta muzu ña vaha cuan, zavita ndo sii ra ityí sata nu ñaa xaan, nu cua vacu xaan ñiyiví ndya cuhva cua casi quihñi noho ñu.”

**Cuhva cua tyicuhva ra Jesús
sii ñiyiví ñuu ñiyiví**

³¹Quiví cua quisi tucu ra i quisi ndya gloria sihin ángel ra, tyaqui xaan ra. Ta cua cundyaa ra tyayu nu cua cundyaca ñaha ra.

³²Ta tandíhi ñiyiví ñuu ñiyiví cua titahan ñu ityí nuu ra, ta cua zaziin

ra sii ñu tañi zaziin minoo ra cu pastor sii mvee ticatyí zono ra sihin mvee zono ra.

³³Mvee ticatyí zono ra cua tyaa ra siyo cuaha ra. Ta mvee zono ra cua tyaa ra sii ti siyo zatyí ra.

³⁴Ta ziquí cua catyí Rey sihin ñu ndyaa siyo cuaha ra: “Ñaha ndo, Cuñi xaan Zuti sii ndo. Cumañi ca sino ñuu ñiyiví, ta sa ndyaa listo gloria vatyí cua quihví ndo.

³⁵Vatyí yuhvi i sizoque, ta saha ndo sa casi. Ityí xein, ta saha ndo sa cohi. I sica noi ta ñahñi vehi, ta i saha ndo vehe ndo cundyeyi.

³⁶Ñahñi zahme, ta saha ndo zahma sii. I cuhi ta sahan ndo i sindyehe ndo sii. I siñohi vehe caa, ta sahan ndo i sindyehe ndo sii.”
Cua catyí ra.

³⁷Ta ziquí cua catyí ñiyiví vaha cuan sihin ra: “Tata, ¿ama i ndyehe ndi suun sizocon ta saha ndi sa casun, a ityun ta saha ndi sa cohon?

³⁸¿Ta ama i ndyehe ndi suun sica noo ta saha ndi sa cundyoon vehe ndi a ndyehe ndi suun ta ñahñi zahmon, ta saha ndi zahma suun?

³⁹¿Ta ama i ndyehe ndi suun sa cuhun a ñohon vehe caa ta sahan ndi sa ndyehe ndi suun?” Cua catyí ñu.

⁴⁰Ta cua nacahan Rey cuan ta catyí ra sihin ñu: “Sa ndisa catyí sihin ndo, tandíhi sa i zavaha ndo sihin yañi, vazu ra ndyihí ca, zoco sihin mi i zavaha ndo cuhva cuan.”

⁴¹Ta ziquí cua catyí Rey cuan sihin ñiyiví ndyaa siyo zatyí ra: “Cuñi siyo ndo sii, ndoho ñiyiví sa cuxaan ra Ndyoo sihin. Cuquihí ndo nu cayu ñúhu nu i zavaha Ndyoo sa cuenda cuihna ta tatyí cuihna sa ndyico sii ra.

⁴²Vatyi i sizoque, ta ñá saha ndo sa casi. I cu-ityi, ta ñá saha ndo ndutya cohi.

⁴³I sica noi, ta ñahñi vehi, ta ñá saha ndo vehe ndo cundyei. Ñahñi zahme, ta ñá saha ndo zahma sii. I cuhi, ta i siñohi vehe caa, ta ñá sindyehe ndo sii.”

⁴⁴Ta ziqui cua catyi tucu ñiyivi cuan sihin Rey cuan: “Tata, ¿ama i ndyehe ndi suun sizocon a ityun a sica noo ta ñahñi vehun? ¿Ta ama i ndyehe ndi suun sa ñahñi zahmon a cuhun a ñohon vehe caa ta ñá tyindyee ndi suun?”

⁴⁵Ta cua nacahan Rey ta catyi ra: “Sa ndisa catyi sihin ndo vatyi tandihi sa ñá zavaha ndo sihin minoo ñiyivi luhlu ca, ñá zavaha ndo sii si sihin mi.” Cua catyi ra.

⁴⁶Ta ziqui cua cuhun ñu nu cua ndoho ñu tandihi cuii tyiemvu. Zoco ñiyivi vaha, cua cuhun ñu nu cua cundito ñu tandihi cuii tyiemvu.

Sihñi tahan ra tyiño yozo caa cua tiin ra sii ra Jesús

26 Sa yaha cahan ra Jesús tandihi tuhun ya, ta ziqui i catyi ra sihin ra i casi ra:

²Sa sito ndo vatyi uu quivi ñi ca, ta cua cuu si vico zuhun, ta cua xico minoo ra sii ra i quisi ndya gloria, ta cua cahñi ñiyivi sii ra nu cruz. Catyi ra.

³Ta sisi quivi cuan i titahan ra zutu nahnu sihin ra maestro cuenda ley ta ra mandoñi. Tandihí ra cuan cuu ra ra hebreo nahnu, ta i titahan ra nuquehe vehe ra Caífas ra cu zutu ya cahnu.

⁴Ta yucuan i natuhun tahan ra yozo caa cua tiin xehe ra sii ra Jesús, ta cua cahñi ra sii ra.

⁵Zoco i catyi ra sihin ra tahan ra: Zoco ma cuu si quivi vico vatyi cuaha xaan ñiyivi yucu, ta coto cahñi tahan ñu sihin yo.

I tyozo minoo ñaha azetye vixi xiñi ra Jesús

⁶Ñoho ra Jesús ñuu Betania vehe ra Simón, ra i cuhu cuehe tyahyu.

⁷Ta i tuhva minoo ñaha sii ra. Ñaa ña minoo yutyi sino sihin minoo yuu yahvi xaan, ta ñoho azetye vixi. Ta i tyozo ña sii si xiñi ra Jesús cuhva sa sisi ra xita.

⁸Ta sa ndyehe ra i casi ra Jesús cuhva zavaha ña, i cuxaan ra, ta catyi ra: ¿Ñacu zativi ña sii si?

⁹Vaha ca tatu sa i xico ña sii si ta ñihi ña cuaha xuhun ta cuhva ña sii ñiyivi ndahvi.

¹⁰Ta sa sito ra Jesús sa cahan ra cuan, ta ziqui i catyi ra sihin ra: ¿Ñacu cuyuhu xaan ndo sihin ñaha ya? I zavaha ña minoo sa vaha sihin.

¹¹Tandihi tyiemvu cua coo ñiyivi ndahvi sihin ndo, ta cuu tyindyee ndo sii ñu tatu cuñi ndo. Zoco yuhvi ma cundyei sihin ndo tandihi tyiemvu.

¹²Cuhva i zavaha ña ya sa tyozo ña azetye vixi coño ñuhi cuu sa zanduvaha ña sii, sa cuenda sa cuquihí ñaña.

¹³Sa ndisa catyi sihin ndo vatyi vazu ndyacamaa nacatyi ñiyivi Tuhun Ndyoo, zoco cua nacatyi ñu cuhva i zavaha ña ya sihin, ta cua nacohon iñi ñiyivi sii ña. I catyi ra Jesús.

Cuhva i xico ra Judas sii ra Jesús

¹⁴Yaha cuan ta ziqui minoo sa usi uu tahan ra i casi ra Jesús, ra sa

nañi Judas Iscariote, cuahan ra cua cahan ra sihin ra zutu nahnu.

¹⁵Ta i catyi ra sihin ra: ¿Yozo cua cuhva ndo sii, tatu cuhva cuende sii ra sii ndo? Ta i zandaa ra tyiño sa cua cuhva ra oco usi tahan xuhun cui.

¹⁶Ta ndya quivi cuan, i quisaha nducu xaan ra Judas cuhva cua cuhva cuenda ra sii ra Jesús sii ra cuan.

I cuxiñi ra Jesús sihin sa usi uu tahan ra i casi ra

¹⁷Nu quisaha vico nu tuhva ñiyivi hebreo sasi pan ña ndaa, i tuhva ra i casi ra Jesús sii ra, ta i catyi ra sihin ra: ¿Ndyamaa cuñun vatyí cua zanduvaha ndi sa cua cuxiñun sa cuenda vico zuhun ya?

¹⁸Ta i catyi ra Jesús: Cuahan ndo ndya ñuu cahnu vehe ra sa cahan yo tuhun, ta catyi ndo sihin ra: “Cati ra Maestro, cua saa cuhva sa cua cui. Vehe moo cua cuxiñi sa cuenda vico zuhun ya sihin ra i casi.”

¹⁹Ta tacuan i zavaha ra, cuhva i catyi ra Jesús sihin ra, ta i zanduvaha ra sa cuxiñi ra sa cuenda vico cuan.

²⁰Ta cuhva sa sa cuaa cuan, sa ndyaa ra Jesús mesa sihin sa usi uu tahan ra i casi ra.

²¹Ta ñiñi sa sasi ra xita i catyi ra Jesús sihin ra: Sa ndisa catyi sihin ndo vatyí cua xico minoo ndo sii. Cati ra.

²²Ta i nducuihya xaan iñi ra ndiñi sihin ra, ta i quisaha ndaca tuhun minoo minoo ra sii ra Jesús: Tata, ¿atu yuhvi cui?

²³Ta i nacahan ra Jesús, ta catyi ra: Ra sa sasi sihin iñi coho, yucuan ra cuu ra cua xico sii.

²⁴Cuahan ra i quisi ndya gloria cuhva catyi Tuhun Ndyoo; zoco indahvi ñi cuu ra xico sii! Vaha ca tatu sa ñá cacu ra vatyí cua ndyehe xaan ra tundoho.

²⁵Tacuan i catyi ra Jesús, ta ziqui ra Judas ra sa xico sii ra i ndaca tuhun ra sii ra, ta catyi ra: Maestro, ¿atu zuun yuhvi cui? Ta i catyi ra sihin ra: Tacuan cu si, tañi catyi moo.

²⁶Ta cuhva sa cuxiñi ra, i quihin ra Jesús pan, ta i saha ra tyahvi ndyoo sii ra Ndyoo, ta ziqui i sahnu ra sii si ta saha ra sii si sii ra i casi ra, ta i catyi ra: Quihin ndo sii si ta casi ndo. Ihya cuu tañi coño ñuhi.

²⁷Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i saha ra sii si sii ra, ta i catyi ra: Coho tandiñi ndo zuhva zuhva

²⁸vatyí ihya cuu tañi ñiñi sa cuenda tyiño saa sa zandaa ra Ndyoo. Cua cati si, ta sa cuenda maa si, cua ndasi cuatyí cuaha xaan ñiyivi.

²⁹Zoco catyi sihin ndo vatyí ma coho que vino ndya quivi cua cohi sii si sihin maa ndo minoo cuhva saa nu ndyaca ñaha ra Ndyoo.

Cati ra Jesús vatyí cua catyi ra Pedro vatyí ña sito ra sii ra

³⁰I sata tandiñi ra minoo yaa Ndyoo, ta ziqui cuahan ra ndya yucu Olivos.

³¹Tacuan ta i catyi ra Jesús sihin ra: Sa cuaa vityí tandiñi cuii ndo cua zandoo ndo sii. Ta ma cuñi ca ndo cundyico ndo sii, vatyí catyi Tuhun Ndyoo: “Cua cuu ra cu pastor, ta cua quití cuatyí tandiñi cuii mvee ticatyí zono ra.”

³²Zoco sa yaha nandote ta cua cuhin vatyi ca ta ziqui maa ndo ndya Galilea.

³³Ta ziqui i catyi ra Pedro sihin ra: Vazu zandoo tandihi ca ra ya suun, zoco yuhvi cua cundyique suun.

³⁴Ta i catyi ra Jesús sihin ra: Sa ndisa catyi suhun vatyi zuun ñi sa cuaa vityi, cuee ca sa vacu saa ndivi tyahnu, cua catyun uñi tahan saha vatyi ña siton sii.

³⁵Ta i catyi ra Pedro sihin ra: Vazu cui suhun, zoco ma catyi sa ña site suun. Ta tacuan tucu i cahan tandihi ca ra i casi ra Jesús.

Cahan ra Jesús sihin ra Ndyoo minoo nu yucu yutu tyaqui nu nañi si Getsemaní

³⁶Tacuan ta ziqui i saa ra Jesús sihin ra i casi ra ndya minoo nu yucu yutu tyaqui nu nañi si Getsemaní, ta i catyi ra sihin ra: Cundyaa ndo ihya vatyi cuehin cua quehin sihin ra Ndyoo ityi nuu ca.

³⁷Ta i quihin ra Jesús sii ra Pedro ta sii nduu tahan zehe ra Zebedeo cuahan sihin ra, ta i quisaha nducuihya xaan iñi ra, ta ndahvi xaan cuñi ra.

³⁸Tacuan ta i catyi ra: Cuihya xaan cuñi añime cuhva ndya sa cuñi cui. Ndo ndo ihya ñi, ta cundyaa tyacu ndo sihin.

³⁹Ta ziqui cuahan ra Jesús zuhva ca ityi nuu, ta i sicava ndyayu ra nu ñuhu, ta i sica tahvi ra sii ra Ndyoo, ta catyi ra: Ndyoo Zuti, tatu sa vatyi cuu, cuhvon sa ma ndyehi tundoho sa cua ndyehi vityi, zoco ma cuu si cuhva cuñi mi, nacuu si cuhva cuñi moo.

⁴⁰Tacuan i catyi ra Jesús, ta ziqui i sahan ra nu yucu ra ndihi sihin ra, ta i nañihi ra sii ra quixi ra, ta i catyi ra sihin ra Pedro: ¿Yozo caa? ¿Ñacu ña cuu cundyaa tyacu ndo sihin numinoo ora?

⁴¹Cutyacu ndo ta cahan ndo sihin ra Ndyoo coto nducu coto ihñi cuihna sii ndo. Cuñi ndo zavaha ndo sa vaha, zoco ña cuu sii ndo sa maa tuhun ñi ndo.

⁴²Tacuan ta i sahan tucu ra Jesús inga saha sa cua cahan ra sihin ra Ndyoo, ta i catyi ra: Ndyoo Zuti, tatu cuu sa ma ndyehi tundoho ya, vaha xaan, zoco tatu ma cuu, nacuu si cuhva cuñi moo. Catyi ra.

⁴³Ta ziqui i nasaa ra, ta i nañihi ra sii ra ndihi sihin ra quixi tucu ra vatyi sitatu xaan ra.

⁴⁴Ta i zandoo ra sii ra, ta cuahan ra sa cu uñi saha, ta zuun ñi tuhun cuan i cahan ra sihin ra Ndyoo.

⁴⁵Ta ziqui i nasaa tucu ra nu yucu ra i casi ra, ta i catyi ra sihin ra: Cuzu ndo vityi, ta quitatu vaha ndo. Sa saa cuhva sa cua nacuhva ñiyivi sii ra i quisi ndya gloria sii ra iyo cuatyi.

⁴⁶Ta nduvita ndo. Coho yo. Sa vasi ra xico sii.

Tiin ra sii ra Jesús

⁴⁷Nu cahan ca ra Jesús, ta i saa ra Judas; minoo sa usi uu tahan ra i casi ra Jesús cuu ra. Ta i quisi cuaha xaan ñiyivi sihin ra. I tasi ra zutu nahnu ta ra mandoñi sii ra, ta ñaa ra mityi ta yutu.

⁴⁸Ra sa xico sii ra Jesús, i saha ra minoo cuhva sii ra cuan, ta catyi ra: Ra cua cohi xiti cuan, yucuan cuu ra tiin ndo. Tiin vaha ndo sii ra.

⁴⁹Ta i saa ra Judas, ta i tuhva ra sii ra Jesús, ta i catyi ra: Nacumi suun, Maestro. Ta i sihi ra xiti ra.

⁵⁰Ta i catyi ra Jesús sihin ra: Amigo, ¿ña cuenda vasun? Catyi ra. Ta ziqui i tiin ra sii ra Jesús, ta cuahan ra sihin ra.

⁵¹Ta minoo ra ndihi sihin ra Jesús, i tava ra mityi ra, ta i cañi ra sii ra cu muzu ra cu zutu ya cahnu, ta i sahndya ra zoho ra siyo cuaha.

⁵²Ta ziqui i catyi ra Jesús sihin ra: Natyuhun mityun sisi veno si. Ra cahñi tahan sihin mityi, cua cuu ra sihin mityi.

⁵³¿Atu sica iñun vatyi ma cuu caque sii Zuti ta vityi vityi cua tasi ra tañi usi uu ityi ángel cua zacuenda sii?

⁵⁴Zoco tatu tacuan zavehi, ¿yozo caa ta natahan si cuhva catyi Tuhun Ndyoo vatyi cua tahan si sii?

⁵⁵Ta ziqui i catyi ra Jesús sihin ñiyivi: ¿Atu vasi tiin ndo sii minoo ra zuhu vatyi ñaa ndo mityi ta ndaha tyiño xaan? Tahan tahan quivi i sehin vehe ñuhu cahnu ta yucu ndo, zoco ñá tiin ndo sii yucuan.

⁵⁶Zoco tacuan cu si tandihi cuhva ya vatyi cua natahan tandihi cuhva i tyaa ra profeta nuu tutu ra Ndyoo. Tacuan i catyi ra Jesús, ta ziqui i zandoo tandihi ra i casi ra sii ra, ta i sino ra.

I sindyaca ra sii ra Jesús nu titahan ra cu tyiño hebreo

⁵⁷Ra i tiin sii ra Jesús, i sindyaca ra sii ra ityi nuu ra Caifás. Ra Caifás cuu ra cu nuu sii tandihi ra cu zutu. Ta yucuan i titahan ra maestro cuenda ley ta ra mandoñi.

⁵⁸Ta i sindyico ra Pedro sica sica ñi ndya cuhva ndya saa ra nuquehe vehe ra cu zutu ya cahnu, ta yucuan i quihvi ra, ta i sicundyaa ra sihin ra policia vatyi cua ndyehe ra yozo caa cua cundaa tyiño sa cuenda ra Jesús.

⁵⁹Ra cu zutu ya cahnu sihin ra mandoñi ta tandihi ra cu tyiño hebreo, i nanducu xaan ra ñiyivi cua cuhva sa ndaa sa cuenda ra Jesús vazu maa cuendu ñi cuu si vatyi cuñi ra cahñi ra sii ra.

⁶⁰Zoco ñá ñihi ra cuhva sa vatyi vazu cuaha ñiyivi saha sa ndaa, vatyi ñá nacasi tahan sa cahan ra. Ndyo nu ndihi tuhun i ñihi ra sii uu tahan ra.

⁶¹Ta i catyi ra cuan: Ihya ra i catyi: “Cuu cani vehe ñuhu cahnu ra Ndyoo, ta cuu zanandei sii si sisi sa uñi quivi ñi.”

⁶²Ta ziqui i nduvita ra cu zutu ya cahnu, ta i catyi ra sihin ra Jesús: ¿Ñacu ña nacohon ii caña ñi? ¿Ñaa sa cuu sa cahan ñiyivi ya zicun? Catyi ra.

⁶³Zoco ñá nacahan maa ra Jesús. Tacuan ta i catyi ra cu zutu ya cahnu: Sihin zivi ra Ndyoo ndito quehin, ta catyi suhun vatyi cohon sa ndisa ta nacatyun sihin ndi tatu ra Cristo cuun, ra cu Zehe ra Ndyoo.

⁶⁴Ta i catyi ra Jesús sihin ra: Zuun ra cui tañi catyun. Ta catyi tuqui sihin maa ndo vatyi cua ndyehe ndo sii ra i quisi ndya gloria cuhva cundyaa ra siyo cuaha ra Ndyoo ta cuhva cua quisi ra ndya andivi sisi vico.

⁶⁵Tacuan catyi ra Jesús, ta ziqui ra cu zutu ya cahnu, cuxaan ra ta i ndata ra zuun ñi zahma maa ra, ta

i catyi ra: ¿Ñaa ca sa ndaa cuñi si vityi? Sa siñi ndo sa cahan ra ndya vaha ñi sii ra Ndyoo.

⁶⁶¿Ñaa catyi ndo vityi? Ta i nacahan tandihi ra, ta i catyi ra: Nacuu ra vaty iyo cuaty i ra.

⁶⁷Ta ziqui i quisaha tyicu zii ra nuu ra, ta inga ra cati ra nuu ra sihin ndaha ra.

⁶⁸Ta i catyi ra: Tatu ndisa vaty i ra Cristo cuun, nacoton yoo ra cañi suun.

I catyi ra Pedro vaty i ña sito ra sii ra Jesús

⁶⁹Nii ñi sa yaha tandihi cuhva cuan, ndyaa ra Pedro nuquehe, ta i tuhva minoo muzu sii ra, ta i catyi ña sihin ra: Cutahan aan sica noon sihin ra Jesús, ra i quita Galilea.

⁷⁰Zoco i catyi ra Pedro ityi nuu tandihi ñiyivi vaty i yivi ra cuu ra. I catyi ra sihin ña: Ña site ñaa tuhun cohon. Catyi ra.

⁷¹Tacuan ta sa quita ra Pedro ndya yuvehe nuzama, ta i ndyehe inga muzu sii ra, ta i catyi ña sihin ñiyivi yucu yucuan: Ra ihya, ra tahan ra cuu sii ra Jesús, ra ñuu Nazaret.

⁷²Ta i tyiñaha ra Pedro ndyoo nuu ñiyivi yucu yucuan, ta i catyi ra: Ña site sii ra cohon tuhun ña.

⁷³Ta i yaha zuhva cuhva, ta i tuhva ra nandyaa yucuan sii ra Pedro, ta i catyi ra sihin ra: Ndisa cuui vaty i minoo ra tahan ra cuu tucu oo vaty i cohon tañi cahan ñiyivi nu cu si Galilea. Catyi ra.

⁷⁴Tacuan ta i quisaha cahan ra Pedro ndya vaha ñi, ta catyi ra: Ña site sii ra cuan. Catyi ra. Ta zuun ñi caa cuhva cuan, i sacu saa ndivi tyahnu.

⁷⁵Ta ziqui i nacohon iñi ra Pedro cuhva i catyi ra Jesús sihin ra: “Cuee ca sa vacu saa ndivi tyahnu, cua catyun uñi saha vaty i ña siton sii.” Ta sa nacohon iñi ra Pedro cuhva cuan, i quita ra, ta i sacu xaan ra vaty i nducuihya xaan iñi ra.

Nacuhva cuenda ra sii ra Jesús sii ra Pilato

27 Ta sa cundisi i zandoo ra tyiño, tandihi ra zutu nahnu ta ra mandoñi. Sa ndu-ii ra minoo cuhva, cuhva cua cahñi ra sii ra Jesús.

²Ta i sihñi ra sii ra Jesús, ta i sindyaca ra sii ra nu ndyaa ra Poncio Pilato, ra cu gobernador.

Cuhva i sihi ra Judas

³Ra Judas, ra i xico sii ra Jesús, i ndyehe ra vaty i cua cahñi ra sii ra Jesús, ta ziqui i ndu-uu iñi ra cuaty i ra, ta i nacuhva ra sa oco usi tahan xuhun cuisii ra zutu nahnu ta ra mandoñi,

⁴ta i catyi ra sihin ra: Cahnu xaan cuaty i i zavehi vaty i saha cuende sii minoo ra ñahñi cuaty i, ta vity i cua cuu ra. Zoco i nacahan ra cuan, ta catyi ra: ¿Ta ñaa sa cuenda nduhvi? iNdyehe moo yozo caa zacuun vityi!

⁵Tacuan ta i zavita ihno ra Judas xuhun cuan sisi vehe ñuhu cahnu ta cuahan ra, ta i sahñi ra sii ra. Tyihi ra minoo yoho zucu ra.

⁶I nacuaan ra zutu nahnu xuhun cuan, ta catyi ra: Ma cuu tyihi yo xuhun ya sihin xuhun ofrenda vaty i xuhun sa cuenda sa cua cati niñi minoo ra cu si.

⁷Ta ziqui i ndu-ihin ra minoo cuhva, ta sihin xuhun cuan, i zata ra minoo ñuhu nañi si Nu Tava Ñiyivi Ndyahyu sa cua Zavaha Ñu Ndaha Tyiño. Ta tyaa ra cuhva vatyí ñuhu cuan cua cuu nuñaña sa cuenda ñiyivi inga ñuu tatu cua cuu ñu ñuu Jerusalén.

⁸Ta yucuan cuenda ndya cuhva ndya vityi nañi ñuhu cuan, Ñuhu Cuenda Niñi.

⁹Ta cuhva cuan i natahan si cuhva i catyi ra Jeremías, minoo ra cu profeta ta sa naha. Tyehen i tyaa ra: “I naquihin ra sa usi uu tahan xuhun cui. Yucuan cuu yahvi i sicundyaa ra i zacuu ñiyivi hebreo.

¹⁰Ta sihin xuhun cuan i zata ra ñuhu sii ra zavaha quiyi tañi i catyi maa ra Ndyoo sihin.” Tacuan i tyaa ra Jeremías sa cuenda cuhva cua tahan ra Jesús.

Cua cundaa tyiño ra Jesús nuu ra Pilato

¹¹I sindyaca ra sii ra Jesús ityi nuu ra Pilato, ra cu gobernador, ta i ndaca tuhun ra Pilato sii ra Jesús: ¿Atu yoho cuu rey cuenda ñiyivi hebreo? Ta i catyi ra Jesús: Tacuan cu si tañi catyi moo.

¹²Tacuan ta i tyaa ra zutu nahnu ta ra mandoñi cuatyí sata ra Jesús, zoco ñá nacahan ra ndaha ñi.

¹³Ta ziqui i catyi ra Pilato: ¿Atu ña siñun sa cahan ra ya, cuhva tyaa ra cuatyí saton? Catyi ra.

¹⁴Zoco ñá nacahan ra Jesús ndaha ñi, ta iyo xaan i cuñi ra Pilato.

Saha ra Pilato sa cuu ra Jesús

¹⁵Ta vico cuan, tuhva ra gobernador tava sii minoo ra ñoho vehe caa, yoo ra cua catyi ñiyivi.

¹⁶Ta sicoo minoo ra sa sito tandihi ñiyivi. Barrabás nañi ra.

¹⁷Ta cuhva i titahan tandihi ñiyivi, i ndaca tuhun ra Pilato sii ñu: ¿Yoo ra cuñi ndo sa zañe, a sii ra Barrabás a sii ra Jesús sa nañi Cristo?

¹⁸Vatyí sa sito ra Pilato vatyí ña tahan iñi ra cu tyiño hebreo sii ra Jesús, ta yucuan cuenda i saha cuenda ra sii ra sii ra.

¹⁹Ñii ñi sa ndyaa ra Pilato tyayu ra nu zandaa ra tyiño, i tasi ñazihí ra tyiño nu ndyaa ra, ta catyi ña: “Coto ñaha ñaa sa zavohon sihin ra vaha cuan vatyí i ndyehi minoo ñimahna quiñi xaan sa cuenda ra cuñi.” Tacuan catyi tutu i tyaa ña.

²⁰Zoco i zasino ra zutu nahnu cuan ta ra mandoñi iñi ñiyivi vatyí cua caca ñu sii ra Barrabás, ta cua catyi ñu vatyí nacuu ra Jesús.

²¹I cahan ra gobernador inga saha, ta catyi ra: ¿Yoo ra cuñi ndo sa cua zañe? Ta i catyi ñu: Sii ra Barrabás.

²²Ta ziqui i ndaca tuhun ra Pilato: Ta ñaa sa cua zavehi sihin ra Jesús sa nañi Cristo? Ta i nacahan tandihi ñu, ta catyi ñu: ¡Nacuu ra nu cruz!

²³Ta i catyi ra Pilato: ¿Ñaa cuenda? ¿Ñaa sa ña vaha i zavaha ra? Zoco i cana saa ñu ñihi ca, ta catyi ñu: ¡Nacuu ra nu cruz!

²⁴Ta ziqui i ndyehi ra Pilato vatyí ñá cuu zacuu ra. I nduvaa ñi maa ñiyivi. Yucuan cuenda i quihin ra ndutyaa, ta i nacatya ra ndaha ra ityi nuu ñiyivi, ta catyi ra: Yivi cuatyí mi cuu ta cua cati niñi ra vaha ya. Ndyehi maa ndo cua ndoo cuatyí sata maa ndo.

²⁵Ta i nacahan tandihi ñiyivi, ta catyi ñu: Nacuu si cuatyí maa ndi ta cuatyí zehe ndi. Catyi ñu.

²⁶Ta ziqui i zaña ra Pilato sii ra Barrabás, ta i tava ra tyiño vatyí cua cañi zandaru sii ra Jesús, ta ziqui i saha cuenda ra sii ra vatyí cua cuu ra nu cruz.

²⁷I sindyaca zandaru ra Pilato sii ra Jesús sisi vehe tyiño, ta i titahan tandihi inga zandaru sihin ra.

²⁸I tava ra zahma ra Jesús, ta i natyihi ra minoo zahma tixinda sii ra.

²⁹Ta i zavaha ra minoo corona iñu ta tyihi ra xiñi ra Jesús, ta saha ra minoo tuyoo caxtyila cuña ra, ta ziqui i sicuñi siti zandaru ityi nuu ra, ta i sacu ndyaa ra sii ra, ta catyi ra: Nacumi suun, yoho ra cu rey cuenda ñiyivi hebreo.

³⁰I tyicu zii zandaru sii ra Jesús, ta i naquihin ra tuyoo caxtyila cuan, ta i cañi xaan ra xiñi ra.

³¹Ta sa yaha sacu ndyaa ra sii ra, i tava ra zahma tixinda cuan, ta i natyihi ra zahma maa ra sii ra. Ta ziqui i quihin ra sii ra vatyí cua cahñi ra sii ra nu cruz.

Nu i tyaa ra sii ra Jesús nu cruz

³²Ta cuhva sa cuahan ra ityi, i tahan ra sii minoo ra ñuu Cirene. Simón nañi ra. Ta i zacuizo zandaru cuan cruz ra Jesús sii ra.

³³Ta cuahan tandihi ra nu nañi si Gólgota. Tuhun Gólgota cuan cuñi si catyi si Nu Yucu Yiqui Xiñi Ndiyí.

³⁴Ta cuhva sa saa ra yucuan, i saha ra vino zaca si sihin minoo sa uva xaan vatyí cua coho ra Jesús, zoco i sihi ra Jesús siin ñi ta ziqui ñá cuñi ca ra coho sii si.

³⁵Ta sa yaha tyaa zandaru sii ra Jesús nu cruz ta ziqui i siziqui ra vatyí cua ndyehe ra yoo ra cua

zahacanaa minoo minoo zahma ra. Cuhva cuan i natahan si cuhva i tyaa minoo ra profeta sa cuenda ra Jesús nu catyi si tyehen: “I zasa ra zahme sii tahan ra, ta i siziqui ra yoo ra cua ñihi zahma cañi vii.”

³⁶Ta ziqui i sicundyaa zandaru, ta i zacuenda ra sii ra Jesús.

³⁷Ta xiñi cruz i tyaa ra minoo tutu, ta catyi si ñaa cuenda cua cuu ra, ta catyi si: “Ihya ra cuu ra Jesús, rey cuenda ñiyivi hebreo.”

³⁸Ta i sihi tucu uu tahan ra zuhu sihin ra Jesús, minoo ra siyo cuaha ra, ta inga ra siyo zatyí ra.

³⁹Cuhva sa yaha ñiyivi nu ndyaa ra Jesús, i sacu ndyaa ñu sii ra, ta zavico xiñi ñi ca ñu

⁴⁰ta catyi ñu: Yoho, ra catyi vatyí cua canun vehe ñuhu ta uñi quivi ñi ta cua zanduvohon sii si, tatu sa ndisa vatyí zehe ra Ndyoo cuu suun, noon nu cruz.

⁴¹Ta i sacu ndyaa tucu ra zutu nahnu ta ra maestro cuenda ley ta ra mandoñi sii ra, ta catyi ra:

⁴²I zacacu ra sii inga ñiyivi, zoco ña cuu zacacu ra sii ra. Tatu rey cuenda ñiyivi hebreo cuu ra, nanoo ra nu cruz vityí, ta cua sino iñi yo sii maa ra.

⁴³Sino xaan iñi ra sii ra Ndyoo, nazacacu ra Ndyoo sii ra vityí tatu sa ndisa vatyí cuñi ra Ndyoo sii ra vatyí i catyi ra vatyí Zehe ra Ndyoo cuu sii ra. Catyi ra.

⁴⁴Ta ndya cuhva ndya ra zuhu, ra sihi iin ñi sihin ra Jesús, ta i cahan tucu ra ndya vaha ñi sii ra Jesús.

Nu i sihi ra Jesús

⁴⁵Tacuan ta i nduñaa xaan nacahnu ñuu ñiyivi ndya maa ora

ta ndya cuhva ndya caa uñi sa sahiñi.

⁴⁶Ta cuhva caa uñi i cana saa ra Jesús minoo sa ñihi xaan, ta i catyi ra: Elí, Elí ðlama sabactani? Cuñi si catyi si: Zutu mañi yu, Zutu mañi yu, ðña cuenda i zandoon sii? Catyi ra.

⁴⁷Zuhva ñiyivi nandyaa yucuan, i siñi ñu ta catyi ñu: Ra ihya cana saa ra sii ra profeta Elías. Catyi ñu.

⁴⁸Ta zuun ñi caa cuhva cuan, i cacono minoo ra cuan, ta i quihin ra sii minoo sa ñahma, ta i zatyii ra sii si sihin ndutya iya. I tyaa ra sii si numinoo yutu, ta i zandaa ra sii si nu ndyaa ra Jesús vatyí cua coho ra.

⁴⁹Ta i catyi inga ra yucu yucuan: Cuatu noo, nandyehé yo tatu cua quisi zanoo ra Elías sii ra.

⁵⁰I sacú saa ra Jesús inga saha minoo sa ñihi xaan, ta ziqui i sihi ra.

⁵¹Zuun ñi caa cuhva cuan, i ndata zava zama coco sa ndita sisi vehé ñuhu cahnu ndya ziqui ta ndya xuú. I taan minoo sa ñihi xaan, ta i ndata yuu nahnu,

⁵²ta i nuña ñaña, ta i nandoto cuaha xaan ñiyivi i sino iñi sii ra Ndyoo.

⁵³Sa yaha nandoto ra Jesús, ta ziqui i quita maa ñu ñaña, ta saa ñu ñuu Jerusalén, ñuu ra Ndyoo, ta cuaha xaan ñiyivi i ndyehé sii ñu.

⁵⁴Ta minoo ra cu nuu sii minoo ziendu zandaru ta zandaru zacuenda sii ra Jesús iin ñi sihin ra cuan, i ndyehé ra cuhva i taan ta tandihi inga sa i cuu, ta i yuhu xaan ra, ta i catyi ra: Ndisa cuii ra ihya vatyí zehé Ndyoo cu sii ra.

⁵⁵Ndya zava ñi i siyucu cuaha xaan ñu zihí. Ndyehé ñu sii ra Jesús. I sindyico ñu sii ra ndya Galilea, ta i tyindyee ñu sii ra.

⁵⁶Minoo ña cuan, nañi ña María Magdalena, ta inga ña cuu ña María zihí ra Jacobo ta ra José, ta inga ña cuu ñazihí ra Zebedeo.

I tyihí ra sii ra Jesús sisi ñaña

⁵⁷Minoo ra cuca sa nañi José, ra ñuu Arimatea cuu ra, ta ndyico ra sii ra Jesús. Ta sa tyahan cuan

⁵⁸i sahan ra nu ndyaa ra Pilato, ta i sica ra coño ñuhu ra Jesús. I saha ra Pilato tyiño vatyí cuu quihin ra sii si.

⁵⁹Ta i quihin ra José coño ñuhu ra Jesús, ta i cava noo ra minoo zahma vaha sii si,

⁶⁰ta i saqui ra sii si sisi ñaña saa maa ra sa i zavaha ra sisi minoo yuu. I tyazi ra yuhu ñaña cuan sihin minoo yuu cahnu, ta cuahan ra.

⁶¹Ta cuhva cuan i siyucu ña María Magdalena ta inga ña María vatyí ñi yuñaña cuan.

Cuhva i zacuenda ra ñaña ra Jesús

⁶²Inga quivi, quivi sa cua quitatu ñiyivi, sa ndihi zanduvaha ñu sa cuenda vico cuan, ta i sahan ra zutu nahnu ta ra fariseo nu ndyaa ra Pilato.

⁶³Ta i catyi ra sihin ra: Tata, nacohon iñi ndi vatyí ñi ñi sa ndito ra vatyí cuan ta i catyi ra vatyí tatu sa yaha uñi quivi cua nandoto ra sisi sa i sihi ra.

⁶⁴Yucuan cuenda cuñi ndi vatyí tavon tyiño vatyí cundyaa zeyun yuhu ñaña ra ndya cuhva ndya sa

yaha uñi quivi coto quisi ra tahan ra sa sa cuaa ta zuhu ra coño ñuhu ra, ta ziqui cua catyi ra sihin ñiyivi vaty i nandoto ra sisi sa i sihi ra. Tatu tacuan cua cuu, yaha ca cua sino iñi ñiyivi tuhun vatya sa cahan ra ta ziqui sa xihna ñi. Catyi ra.

⁶⁵Ta i catyi ra Pilato sihin ra: Quihin ndo zuhva zandaru. Ta cuhun ndo ta cazi cutu vaha ndo yozo ca cuhva cuu sii ndo. Catyi ra.

⁶⁶Tacuan ta cuahan ra, ta i tyazi cutu vaha ra ñaña cuan, ta i tyaa ra zeyu yuhu si, ta i zandoo ra sii zandaru yucuan vatyi cua zacuenda ra.

Cuhva i nandoto ra Jesús

28 I yaha quivi quitatu ñiyivi hebreo. Ta quivi tuingu cuhva sa vasi cundisi i saa ña María Magdalena sihin inga ña Mariá vatyi cua ndyehe ñu ñaña cuan.

²Ta zuun ñi caa cuhva cuan i taan minoo sa ñihi xaan vatyi i quita minoo ángel ra Ndyoo ndya andivi, ta i noo ra ndya nu ñuhu, ta i saa ra ndya ñaña. I tyaa siyo ra yuu sa ndazi yuñaña cuan, ta i sicundyaa ra nuu si.

³Ndisi xaan ra tañi minoo tasa zavi, ta cuisu xaan zahma ra tañi caa nieve cuisu.

⁴Cuhva sa ndyehe zandaru sii ra, ta ñihi ra sihin sa yuhu ra, ta i cuaña ra.

⁵Ta i catyi ángel cuan sihin ñu zihí cuan: Ma yuhu ndo. Site vatyi nanducu ndo sii ra Jesús, ra i sihi nu cruz.

⁶Yoñi ca ra ihya. Sa i nandoto ra tañi i nacatyí ra. Ñaha ndo, ta ndyehe ndo nu i caa coño ñuhu ra.

⁷Yatyí cui ñi cuhun ndo, ta nacatyí ndo sihin ra i casi ra vatyi sa nandoto ra. Ta catyi ndo: “Xihna ca ra Jesús cuahan ndya Galilea ta ziqui maa ndo. Yucuan cua ndyehe ndo sii ra,” catyi ndo. Ihya cuu sa tahan si nacatyí sihin ndo, catyi ángel cuan sihin ñu zihí cuan.

⁸Ta i yuhu xaan ñu zihí cuan, ta zihí xaan i cuñi ñu, ndihí ca, ta yatyí xaan i naquihin ñu ityi cuahan ñu, ta i cacono ñu vatyi cua nacatyí ñu sihin ra i casi ra Jesús.

⁹Ityi cuahan ñu i quituu ra Jesús ityi nuu ñu, ta i catyi ra: Nacumi sii maa ndo. Ta i tuhva ñu sii ra Jesús, ta i tiin ñu saha ra, ta i zacahnu xaan ñu sii ra.

¹⁰Tacuan ta i catyi ra Jesús sihin ñu: Ma yuhu ndo. Cuahan ndo ta nacatyí ndo sihin ra yañi vatyi nacuhun ra ndya Galilea, ta yucuan cua ndyehe ra sii.

Cuhva i nacatyí zandaru

¹¹Ñi ñi sa cuahan ñu zihí cuan, ta zuhva zandaru, ra zacuenda ñaña cuan, cuanuhu ra ndya ñuu, ta i nacatyí ra sihin ra zutu nahnu tandihí sa i cuu.

¹²Ta i sahan ra zutu nahnu cuan, ta i natuhun ra sihin ra mandoñi yozo caa cua zavaha ra ta i ndu-ñi ra minoo cuhva. Ta ziqui i saha ra cuaha xaan xuhun sii zandaru,

¹³ta i catyi ra sihin ra: Catyi ndo vatyi i quisi ra tahan ra sa sa cuaa, ta i zuhu ra coño ñuhu ra ñi ñi sa quixi ndo.

¹⁴Ta tatu cua coto ra gobernador cuhva ya, cua zasino ndi iñi ra, ta tacuan ta ñahñi cua tahan ndo.

¹⁵Tacuan ta i quihin zandaru xuhun cuan, ta cuahan ra, ta i

cahan ra cuhva i nacatyí ra cuan sihin ra. Ta sino iñi ñiyivi hebreo tuhun cuan ndya cuhva ndya vityi.

**Cuhva i saha ra Jesús
tyiño sii ra i casi ra**

¹⁶Tacuan ta cuahan sa usi iin tahan ra i casi ra Jesús ndya Galilea ndya minoo yucu sa i zacoto ra Jesús sii ra.

¹⁷Ta cuhva sa ndyehe ra sii ra Jesús, i zacahnu ra sii ra, zoco zuhva ra ñá sino vaha iñi sa zuun ra cuu ra.

¹⁸Ta ziqui i tuhva ra Jesús sii ra, ta i catyi ra sihin ra: Saha ra Ndyoo

tandihi cuii cuhva sii sa cundyaca ñehi andivi ta nu ñuhu ñuu ñiyivi.

¹⁹Cuahan ndo nacahnu ñuu ñiyivi, ta zacuaha ndo sii tandihi ñiyivi. Zacoo ndutya ndo sii ñu sihin zivi ra Ndyoo Zutu yo ta sihin zivi Zehe ra ta sihin zivi Tatyí Ii ra Ndyoo.

²⁰Tandihi sa i zacuehi sii ndo, nacatyí ndo sii si sihin ñu cua sino iñi vatyí natyaa ñu yahvi sii si. Ta coto ndo vatyí yuhvi ndyei sihin ndo tandihi cuii quivi ndya cuhva ndya cua ndihi ñuu ñiyivi. Ta nacuu si tacuan, ta nacuu si sa ndisa.

Tuhun Vaha Sa I Tyaa Ra San Marcos

Cuhva i cahan ra Juan, ra i zacoo ndutya sii ñiyivi quivi cuan

1 Ihya cuhva quisaha Tuhun Vaha sa cuenda ra Jesucristo, ra cu zehe Ndyoo.

²Cuhva i zatyaa ra Ndyoo sii ra Isaías tuhun ra ta tyiemvu, ta i tyaa ra Isaías cuhva i cahan ra Ndyoo sihin ra Cristo ta catyi ra:

Cua tasi sii minoo ra sa xihna ñi, ta cua zacoto ra sii ñiyivi vatyi cua cuhun.

Vatyi quivi cua soon ta cua tyizoho ñu sa cohon.

³Cua cana saa ra cuan sisi cuhu ta catyi ra sihin ñiyivi:

“Zama ndo cuhva iyo ndo vatyi sa cua saa ra ndyaca ñaha sii yo.”

⁴Ta i quisi ra i tasi ra Ndyoo, ra cua cana saa sisi cuhu. Sinañi ra Juan. I zacoo ndutya ra sii ñiyivi. Ta i zacuaha ra sii ñu vatyi coo ndutya ñu ta zama ñu cuhva iyo ñu, ta ziqui cua zandasi ra Ndyoo cuatyi ñu.

⁵Ñiyivi ñuu Jerusalén ta tandihi ñuu nu cu si Judea i sahan ñu nu ndyaa ra Juan. Ta sa yaha nahma ñu cuatyi ñu nuu ra Ndyoo, ta ziqui i sicoo ndutya ñu

i zacuu ra Juan yuu sa nañi río Jordán.

⁶Ixi camello i cuu zahma ra Juan, ta i sinuhñi zinda ñhi sisi ra. Ta i sasi ra minoo nuu quiti tañi tica ta sihi ra tyahiñu ñuñu.

⁷I cahan ra sihin ñiyivi ta catyi ra: Ta cua yaha zuhva quivi ta cua quisi inga ra cahnu ca. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii.

⁸Zacoo ndutye sii ndo sihin ndutya, zoco maa ra cua zacoo ndutya sii ndo sihin Tatyí Ii. Tacuan i catyi ra Juan.

Cuhva i sicoo ndutya ra Jesús

⁹Ta i yaha zuhva ñi quivi ta i quita ra Jesús ñuu Nazaret nu cu si Galilea, ta i saa ra yuu Jordán, ta i zacoo ndutya ra Juan sii ra.

¹⁰Zuun ñi caa cuhva sa nduvita ra Jesús nu ndutya cuan ta i nandyehe ndaa ra, ta i ndyehe ra vatyi nuña ityi andivi, ta i noo xica Tatyí Ii sii maa ra tañi noo minoo paloma.

¹¹Ta i siñi ra minoo nduzu sa cahan ityi ziqui, ta catyi si: Yoho cuu zehi. Ta cuñi xein suun. Ziñ xaan cuñi suhun.

**Cuhva i nducu coto ihñi cuihna
sii ra Jesús atu cua tyaa ra
yahvi sii Ndyoo a sii cuihna**

¹²Ta zuun ñi quívi cuan i saca
Tatyí li sii ra Jesús, ta cuahan ra
minoo cuhu cahnu.

¹³Ta yucuan i ñoho ra uu xico
quívi nu sicoo quítí cuhu. Ta i nducu
ra cu nuu sii cuihna cuhva coto
ihñi ra sii ra vatyí cuñi ra sa tyaa
ra Jesús yahvi sii ra. Ta ziquí i quisi
tyindyee ángel Ndyoo sii ra Jesús.

**Cuhva i quisaha zacuaha ra
Jesús nu cu si Galilea**

¹⁴Tacuan ta ziquí i tyíhi ñiyívi sii
ra Juan vehe caa, ta i quisi nuhu ra
Jesús nu cu si Galilea, ta i zacoto
ra sii ñiyívi Tuhun Vaha sa cuenda
cuhva ndyaca ñaha ra Ndyoo.

¹⁵Ta i catyí ra Jesús: Vityí sa cuñi
saa quívi cua cundyaca ñaha ra
Ndyoo ihya ñuu ñiyívi. Zandoo ndo
cuatyí ndo, ta sino iñi ndo Tuhun
Vaha.

**Cuhva i cana ra Jesús sii
cumi tahan ra tiin tyiyaca**

¹⁶I sica noo ra Jesús yumiñi
Galilea, ta i ndyehe ra sii ra Simón
sihin yañi ra, ra Andrés. Cañi ra
traya ra nu ndutyá vatyí yucuan
cuu tyiño zacuu maa ra.

¹⁷Ta i cana ra Jesús sii ra ta
catyí ra: Coho ndo sihin, ta cua
cuhve cuhva nducu ndo sii ñiyívi
tañi cuhva nducu ndo sii tyiyaca.
Tacuan i catyí ra Jesús sihin ra.

¹⁸Ta ta sica ñi i zandoo ihno ra
traya ra, ta cuahan ra sihin ra Jesús.

¹⁹Ta i sica ra Jesús zuhva ca sihin
ra ityí nuu ca, ta i ndyehe ra sii ra

Jacobo sihin ra Juan yañi ra. Ta
zehe ra Zebedeo cuu sii ra. Ñoho ra
barco. Nazuhva ra traya ra.

²⁰I cana ra Jesús sii ra, ta i
zandoo ra sii ra Zebedeo zutu
ra sihin muzu ra sisi barco. Ta i
sindyico ra sii ra Jesús.

**Cuhva i ñoho tatyí
cuihna sii minoo ra**

²¹I saa ra Jesús sihin ra i cana
ra ñuu Capernaum, ta quívi tuhva
ñiyívi quitatu i quíhvi ra Jesús vehe
ñuhu. Ta i zacuaha ra sii ñiyívi.

²²Ta iyo xaan i cuñi ñiyívi
sihin cuhva i zacuaha ra vatyí ñá
zacuaha ra tañi zacuaha ra maestro
cuenda ley, zoco i zacuaha ra tañi
sa saha ra Ndyoo sa siñi tuñi sii ra.

²³Ta sisi vehe ñuhu cuan i ñoho
minoo ra, ra ñoho tatyí cuihna
añima. Ta i quisaha cana saa ra. Ta
catyí ra:

²⁴¿Ñaa sa cuñun sihin ndi? Jesús,
ra ñuu Nazaret. ¿Atu vasun sa vasi
zandyehun tundoho sii ndi? Site
yoo ra cuun. Moo cuu ra cu zehe
Ndyoo, ra ñahñi cuatyí. Tacuan i
cahan ra cuan.

²⁵Tacuan ta xaan xaan i cahan
ra Jesús sihin tatyí cuihna cuan ta
catyí ra: Cazi yuhun ta ma cohon.
Ta quita ndo sii ra ya.

²⁶Ta ñihi xaan i zanihi tatyí
cuihna cuan sii rayíi cuan, ta saa
xaan i sacú saa sí, ta i quita sí
añima ra.

²⁷Ta iyo xaan i cuñi ñiyívi, ta i
nducu tuhun tahan ñu: ¿Yozo caa?
Minoo cuhva saa cuu si vatyí ra
ihya iyo cuhva sii ra vatyí cahan ra
sihin tatyí cuihna, ta tyaa si yahvi
sii ra.

²⁸Ta yatyi xaan i sito ñiyivi nacahnu nu cu si Galilea cuhva i zavaha ra Jesús.

**Cuhva i zanduvaha ra Jesús
sii tyizo ra Pedro**

²⁹Tacuan ta ziqui i quita ra vehe ñuhu ta cuahan ra Jesús sihin ra Jacobo ta ra Juan ndya vehe ra Simón ta ra Andrés.

³⁰I caa tyizo ra Pedro nu sito. Cuhu ña cahñi. Ta i nacatyi ñu sihin ra Jesús vatyi huhu ña.

³¹I tuhva ra nu ndyaa ña, ta i tiin ra ndaha ña, ta i tyindyeer sii ña, ta i nduvita ña. Zuun ñi caa cuhva cuan i ndyico cahñi sii ña, ta i nduvita ña. Ta i zavaha ña sa casi ra.

**Cuhva i zanduvaha ra Jesús
sii cuaha xaan ñiyivi huhu**

³²Sa tyizo ñicandyi ta sa tyahan cuan i quisi ndyaca ñiyivi sii tandihi ñu huhu, ziin ziin nuu cuehe, ta ñu ñoho tatyí cuihna.

³³Ta i quisi tuu xaan ñiyivi yuvehe nu ñoho ra Jesús.

³⁴Ta i zanduvaha ra Jesús sii cuaha xaan ñu huhu cuaha xaan nuu cuehe, ta i tava ra sii cuaha xaan tatyí cuihna sii ñiyivi, zoco ñá saha maa ra sa cahan tatyí cuihna cuan vatyi i nacoto si sii ra.

**Cuhva i zacoto ra Jesús sii ñiyivi
Tuhun Ndyoo nu cu si Galilea**

³⁵Ta inga quivi ñaa ca i nduvita ra Jesús ta sahan ra minoo huhu, ta i quisaha cahan ra sihin ra Ndyoo Zutu ra, ra iyo andivi.

³⁶Ta ra Simón sihin ra tahan ra i sinanducu ra sii ra.

³⁷Ta nu nañihi ra sii ra Jesús i catyi ra sihin ra: Nanducu xaan ñiyivi suun.

³⁸Zoco i catyi ra Jesús: Coho yo tandihi inga ñuu yatyi ñi ihya vatyi indyacuan cua cahan tuqui Tuhun Ndyoo vatyi yucuan cuenda vasi.

³⁹Ta i sica noo ra tandihi nu cu si Galilea. I zacoto ra sii ñiyivi Tuhun Ndyoo tahan tahan vehe ñuhu, ta i tava ra tatyí cuihna sii ñiyivi.

**Cuhva i zanduvaha ra Jesús
sii minoo ra tyahyu**

⁴⁰Minoo saha i tuhva minoo ra nu ndyaa ra Jesús. Cuhu xaan ra sihin cuehe sa tyahyu ra. I sicuñi siti ra, ta i catyi ra: Iyo cuhva suun, tatu cuñun cuu zanduvohon sii.

⁴¹Ta i cundahvi iñi ra Jesús sii ra cuan, ta i tiin ra ndaha ra ta catyi ra: Cuñi. Zanduvehi suun.

⁴²Ta zuun ñi caa cuhva cuan i quita cuehe cuan sii ra, ta ndaha nduvaha ñi ra.

⁴³Ta ziqui i catyi ra Jesús sihin ra vatyi cuu cunuhu ra, zoco ñihi xaan i saha ra tuhun sii ra ta catyi ra:

⁴⁴Ndyehun, vatyi ma nacatyun sihin ñiyivi. Cuhun nu ndyaa ra cu zutu vehe ñuhu hebreo, ta cuhvon sii ra Ndyoo sa i catyi ra Moisés sa cua cuhva ñiyivi tatu nduvaha ñu. Tacuan ta cua coto ñiyivi vatyi i nduvohon.

⁴⁵Tacuan ta cuahan ra i nduvaha, ta i nacatyi ra sihin tandihi ñiyivi cuhva i cuu sii ra. Ta yucuan cuenda ñá cuu ca quihvi ra Jesús inga ñuu. I sica noo ra nu yoñi ñiyivi iyo. Zoco i sahan xaan ñiyivi ziin ziin ñuu ndya nu ndyaa ra.

**Cuhva i zanduvaha ra
Jesús sii minoo ra xii**

2 Ta i yaha zuhva quívi ta ziqui i quisi nuhu ra Jesús ndya ñuu Capernaum, ta yatyí xaan i sito ñiyívi vatyí sa nasaa nuhu ra.

²Ta ta sica cuii ñi i titahan ñiyívi cuhva ndya ñá cuu ca quihvi ñu yuvehe. Ta i zacuaha ra Jesús sii ñu Tuhun Ndyoo.

³Ta i quisi minoo ityi ñiyívi ta ndyizo cumi tahan ra sii minoo ra xii.

⁴Ta ñá cuu yaha ra yuvehe nu ñoho ra Jesús vatyí tuu xaan ñiyívi yucu. Cuu, i ndaa ra xiñi vehe, ta i nuña ra xiñi vehe, ta i zanoo ra sii ra xii sihin minoo tyuhva nu nandyaa ra Jesús.

⁵I ndyehe ra Jesús cuhva sa ñii iñi tandíhi ra, ta i catyi ra Jesús sihin ra xii cuan: Zandasi cuatyun, zehe luhli. Catyi ra.

⁶Ta yucu uu tahan ra maestro cuenda ley yucuan, ta sica iñi ra sihin añima ra:

⁷“¿Ñacu cahan ra ya tacuan? Yoñi ra cuu zandasi cuatyí ñiyívi. Maa ñi ra Ndyoo cuu zandasi cuatyí ñiyívi.”

⁸Ta i sito ra Jesús cuhva sica iñi ra sihin añima ra, ta i quisaha ndaca tuhun ra: ¿Ñacu sica iñi ndo tacuan sihin añima ndo?

⁹Sica iñi ndo vatyí ña vaha quehin vatyí i catyi sihin ra ya: “Zandasi cuatyun.” Ta vityí cua zañehi sii ndo vatyí iyo cuhva sii, ta cua catyi sihin ra: “Nduvítón ta nacuhun yuun, ta cunuhun.”

¹⁰Cua zañehi sii ndo vatyí iyo cuhva sii vii, vatyí ra i quisi ndya gloria cui. Ta cua zandasi cuatyí

ñiyívi ñuu ñiyívi. Ta i cahan ra sihin ra xii cuan, ta catyi ra:

¹¹Quehin suhun vatyí nduvítón, ta nacuhun tyuhvón, ta cunuhun ndya vehun.

¹²Ta vatyí xaan i nduvita ra xii cuan. I naquihin ra tyuhva ra, ta i quita ra. I ndyehe tandíhi ñiyívi, ta iyo xaan i cuñi ñu, ta i catyi ñu vatyí iyo xaan cuhva sii ra Ndyoo. Ta catyi ñu: Tañaha ca ma ndyehe yo sa tyehen yozo vasi si.

**Cuhva i catyi ra Jesús sihin ra
Leví vatyí cuhun ra sihin ra**

¹³Tacuan ta ziqui cuahan tucu ra Jesús ityi yuhu tyañuhu. Ta i tatan cuaha xaan ñiyívi. Ta i zacuaha ra sii ñu.

¹⁴Ta sa cuahan tucu ra Jesús i ndyehe ra sii ra Leví, zehe ra Alfeo. I zatyiyahvi ra sii ñiyívi sa cuenda xuhun ra ndyaca ñaha. Ta i catyi ra Jesús sihin ra: Coho sihin. Ta vatyí xaan i nduvita ra Leví, ta cuahan ra sihin ra.

¹⁵Ta sa i sasi ra Jesús xita vehe ra Leví, iin ñi mesa i siyucu ra sihin ra sica noo sihin ra ta sihin cuaha xaan ra zatyiyahvi sii ñiyívi sa cuenda xuhun ra ndyaca ñaha ta sihin inga ra iyo cuatyí vatyí i sindyico cuaha xaan ra iyo cuatyí sii ra Jesús.

¹⁶Ta i ndyehe ra maestro cuenda ley ta ra fariseo vatyí sasi ra Jesús xita sihin ra cuan, ta i catyi ra sihin ra ndíhi sihin ra Jesús: ¿Ñacu sasi ra xita sihin ra zatyiyahvi sii ñiyívi ta ra iyo cuatyí?

¹⁷Ta sa siñi ra Jesús sa cahan ra ta i catyi ra: Ña cuñi si médico sii ra iyo vaha, zoco sii ra cuhu cuñi

si. Ña vasi sa cuenda ñiyivi sica iñi vatyí vaha xaan ñu. Vasi sa cuenda ñiyivi sito vatyí iyo cuatyí ñu.

Ndaca tuhun ñiyivi sii ra Jesús ñaa cuenda ña cuñi ra sica noo sihin ra cahñi zoco ra sii ra

¹⁸Ñiyivi i sindyico sii ra Juan sihin ñiyivi i sindyico sii ra fariseo ñahñi maa sasi ra tatu sica tahvi ra sii ra Ndyoo. Ta i ndyehe inga ñiyivi. Ta i ndaca tuhun ñu sii ra Jesús ta catyi ñu: ¿Ñacu sasi ñiyivi ndyico suun xita tandihi quivi vazu sica tahvi ñu sii Ndyoo? Ta ñiyivi ndyico sii ra Juan ta ñiyivi ndyico sii ra fariseo ñahñi maa sasi ra tatu sica tahvi ra sii Ndyoo.

¹⁹Ta i cahan ra Jesús minoo cuhva sihin ñu ta catyi ra: ¿Ñacu ma casi ñiyivi xita tatu cuahan ñu minoo vico tindaha? Tatu ndyaa ra tindaha, sasi vaha tandihi ñiyivi vatyí zii cuñi ñu. Ta tacuan tucu ñiyivi ndyico sii. Zii cuñi ñu vatyí ndyei sihin ñu.

²⁰Zoco tatu sa cuahan ra tindaha, tacuan ta ziqui ma casi ca ñu.

²¹Ña vaha cua cutyiño ñiyivi zahma saa sa natyaa ñu minoo zahma sahnu vatyí zahma saa cuan cua ndiyi si, ta ziqui cua tahndya ca zahma sahnu cuan.

²²Ta inga cuhva vatyí ma zavaha ñiyivi ndixi panela sisi quizi sahnu vatyí cua cuizo si ta ndaa si. Ta cua cahndi quizi cuan tatu sahnu si. Tatu cua zavaha ñu ndixi panela, cuñi si quizi saa. Ta tandihi cuhva zacuehi cuu sa saa. Ta ña vaha nacuzaca si sihin sa sahnu. Cuñi si sa zama ndo cuhva iyo ndo.

Cuhva quivi quitatu ñiyivi

²³Minoo saha quivi quitatu ñiyivi, cuahan ra Jesús sihin ra sica noo

sihin ra, ta i yaha ra sisi itu trigo sa zavaha ñiyivi yutyí pan. Ta i quisaha tohon ra ndihi sihin ra Jesús zuhva si.

²⁴Tacuan ta i catyi ra fariseo: Ndyehe, ¿ñacu zatyíño ra ndihi suhun? Ta vityí cuu quivi quitatu ñiyivi vatyí tacuan catyi ley.

²⁵Zoco i catyi ra Jesús sihin ra: ¿Atu ta cahvi ca ndo Tuhun Ndyoo cuhva i zavaha ra rey David minoo saha sihin amigo ra? vatyí i sizoco xaan ra.

²⁶I quihvi ra David vehe ñuhu quivi i cuu ra Abiatar ra cu zutu ya cahnu. Ta i sasi ra pan ii. Ta yucuan pan ii, maa ñi ra cu zutu cuu casi. Zoco i sasi ra David sii si. Ta i saha ra i sasi ra tahan ra.

²⁷Ta inga cuhva catyi tucu ra Jesús: Iyo quivi quitatu ñiyivi sa vatyí cua tyindyee si sii ñu. Ña zavaha ra Ndyoo sii ñiyivi sa cuenda quivi cuan. I zavaha ra quivi cuan vatyí cua tyindyee si sii ñiyivi.

²⁸Ta yuhvi, ra i quisi ndya gloria cui. Ta iyo cuhva sii, sa catyi ñaa sa cua zavaha ñiyivi quivi quitatu ñiyivi.

Cuhva i zanduvaha ra Jesús sii ra na-ityi ndaha

3 I quihvi tucu ra Jesús vehe ñuhu, ta yucuan ndyaa minoo ra na-ityi ndaha.

²Ndyehe ihñi ra fariseo nu ñoho ra Jesús tatu ndisa cuii cua zanduvaha ra sii ra na-ityi ndaha cuan quivi quitatu ñiyivi vatyí cuñi ra tyaa ra cuatyí sata ra.

³Ta i catyi ra Jesús sihin ra na-ityi ndaha cuan: Ñaha mahñu ya.

⁴Ta ziqui i ndaca tuhun ra Jesús sii ra fariseo: ¿Ñaa sa cua zavaha yo quivi quitatu ñiyivi? ¿Atu vaha cua zavaha yo sa vaha a sa ña vaha? ¿Atu cua zanduvaha yo sii ñiyivi a cuhva yo sa cuu ñu? Ta ñá nacahan ra fariseo ndaha cuii ñi.

⁵Tacuan ta i cuxaan ra Jesús sihin ra, ta i nducuihya iñi ra sihin ra vatyí ñihi xaan iñi ra. Ta i catyi ra Jesús sihin ra na-ityi ndaha cuan: Nandica ndohon. Ta i nandica ra ndaha ra, ta zuun ñi caa cuhva cuan i nduvaha si.

⁶Tacuan ta i quita tandihi ra fariseo nu ñoho ra Jesús, ta i natuhun tahan ra sihin minoo ityi amigo ra Herodes. Ta i quisaha nducu ra cuhva cahñi ra sii ra Jesús.

**Cuhva i quisi tuu xaan
ñiyivi yuhu tyañuhu**

⁷Ta ra Jesús cuahan ra sihin ra sica noo sihin ra ndya tyañuhu, ta i sindyico cuahan xaan ñiyivi Galilea sii ra.

⁸Ta sa sito ñu vatyí tyiño vaha zavaha ra Jesús, ta i quita ñu Judea, ta ñuu Jerusalén, ta Idumea ta inga siyo yuu Jordán. Ta tandihi ñuu ndyaa yatyí sii ñuu Tiro ta ñuu Sidón, ta i quisi ndyehe ñu sii ra.

⁹Yucuan cuenda i catyi ra Jesús sihin ra ndihi sihin ra vatyí nazaquisi ra minoo barco vatyí quihí ra Jesús, ta ma catyihí xaan ñiyivi sii ra.

¹⁰Sa zanduvaha ra Jesús sii cuaha xaan ñiyivi cuhu, ta yucuan cuenda i quisi tuu xaan ñiyivi cuhu vatyí cua tiin ñu sii ra.

¹¹Ta sa ndyehe ñiyivi ñoho tatyí cuhna cuan sii ra Jesús sicuñi siti

ñu, ta cana saa cuihna ñoho sii ñu: ¡Yoho, zehe ra Ndyoo cuu suun!

¹²Ta ñihi xaan i cahan ra Jesús sihin tatyí cuihna cuan vatyí ma nacatyí ca si yoo ra cuu ra.

**I casi ra Jesús sii usi uu
tahan ra apóstol**

¹³Tacuan ta ziqui i ndaa ra Jesús minoo yucu, ta i cana ra yoo ra cua cuizo tyiño, ta i sahan ra cuan nu ndyaa ra Jesús.

¹⁴I quihin ra Jesús sii usi uu tahan ra vatyí cua cutahan ra sihin ra, ta cua tasi ra Jesús sii ra, ta cua zacoto ra sii ñiyivi Tuhun Ndyoo.

¹⁵Ta i saha ra Jesús cuhva sii ra vatyí cuu zanduvaha ra sii ñiyivi cuhu, ta cuu tava ra tatyí cuihna sii ñiyivi.

¹⁶Ihya cuu zivi sa usi uu tahan ra i casi ra Jesús: Simón, i zacunañi ra Jesús sii ra Pedro;

¹⁷ra Jacobo sihin yañi ra, ra Juan, zehe ra Zebedeo cuu sii nduu tahan ra, ta i zacunañi ra Jesús sii ra, ra xaan;

¹⁸ra Andrés, ra Felipe, ra Bartolomé, ra Mateo, ra Tomás, ra Jacobo zehe ra Alfeo; ra Tadeo, inga ra Simón, maa ra cuu cuenda minoo ityi ra cuñi zama sii ra ndyaca ñaha,

¹⁹ta ra Judas Iscariote, maa ra cuu ra cua xico sii ra Jesús cuee ca.

**Cuhva i catyi ñiyivi vatyí ñoho
tatyí cuihna sii ra Jesús**

²⁰Tacuan cuu cuhva i cana ra Jesús sii ra i casi ra, ta ziqui i quihvi ra Jesús sisi minoo vehe sihin sa usi uu tahan ra cuan, ta i quisi tucu cuaha xaan ñiyivi cuhva ña cuyatyí ca ra casi ra xita.

²¹Ta sa sito zihí ra ta yañi ra Jesús tuhun cuan, ta cuahan ñu vatyí cua naquihin ñu sii ra vatyí cahan xaan ñiyivi, ta catyí ñu vatyí zana xiñi ra Jesús.

²²Ta ra maestro cuenda ley, ra i quisi ndya ñuu Jerusalén, i catyí ra: Ra ihya, ñoho ra cu nuu sii cuihna sii ra. Ta tava ra vatyí cuihna sihin tundyee iñi iyo sii ra Beelzebú, ra cu nuu sii cuihna.

²³Tacuan ta i cana ra Jesús sii ñiyivi, ta i quisaha zacuaha ra sii ñu sihin minoo cuhva ta catyí ra: ¿Ñaa sa sica iñi ndo? ¿Atu cua tava ra cu nuu sii cuihna sii inga cuihna?

²⁴Tatu iyo minoo ñuu ta sahní tahan xaan ñiyivi sihin inga ñiyivi sa zuun ñi ñuu cuan, yatyí xaan cua tiví ñuu cuan.

²⁵Ta tatu sahní tahan ñiyivi sihin tahan ñu, sihin cuhva ñu, sihin yañi ñu, yatyí xaan cua tiví cuhva yucu ñu.

²⁶Ta ma cahñi tahan ra cu nuu sii cuihna sihin inga cuihna vatyí tatu tacuan zavaha ra, yatyí xaan cua ndíhi cuhva iyo sii ra.

²⁷Ñihi xaan cuu ra cuihna, ta sa sito yo vatyí ma cuu quíhvi ñiyivi vehe minoo ra ñihi xaan ta quihin ñu ndaha tyiño ra tatu ma cuhñi xihna ñu sii ra. Tatu sa nuhñi ra ñihi cuan, tacuan ta ziquí cuu quíhvi yoo ra cuñi ta quihin ra ndaha tyiño ra.

²⁸Ndisa cuii cuu si vatyí cuu zandasi ra Ndyoo tandíhi cuatyí zavaha ñiyivi ta tandíhi sa quiñi cahan ñu.

²⁹Zoco tatu ndyehe ñiyivi cuhva zatyíño Tatyí Ii ra Ndyoo ta catyí

ñu vatyí cuihna zatyíño, ma zandasi ra Ndyoo cuatyí ñu nu yozo cuii ca. Tandíhi cuii tyiemvu cua ndoo cuatyí cuan ziquí ñu.

³⁰Tacuan i catyí ra Jesús vatyí numaa zatyíño ra sihin cuhva sii Tatyí Ii ra Ndyoo, zoco i catyí ñiyivi vatyí zatyíño ra sihin cuhva iyo sii cuihna.

Zihí ra Jesús ta yañi ra

³¹Tacuan ta ziquí i saa zihí ra Jesús sihin yañi ra, ta i tasi ñu tyiño ñu ñoho ra Jesús vatyí naquisi ra nu ndyaa ñu.

³²Ta ñiyivi yucu siconduu sihin ra Jesús i catyí ñu sihin ra: Saa zihun ta yañun. Nanducu ñu suun. Yucu ñu sata vehe.

³³Ta i catyí ra Jesús: ¿Yoo sa cuu zihí? ¿Ta yoo sa cuu yañi?

³⁴Ta ziquí i nandyehé ra nu yucu ñiyivi siconduu sihin ra, ta i catyí ra: Ñu ihya cuu tañi zihí. Ta ra ihya cuu tañi yañi. Ta ñu ihya cuu tañi cuhve.

³⁵Vatyí yoo ñiyivi zavaha tandíhi sa catyí ra Ndyoo, yucuan cuu ñu cuñi tañi ñiyivi sii. Tacuan i catyí ra Jesús.

Cuhva ra tasi

4 Inga saha i quisaha zacuaha ra Jesús sii ñiyivi ityí yuhu tyañuhu. Ta cuaha xaan ñiyivi i titahan nu ndyaa ra, ta i quíhvi ra Jesús sisi minoo barco vatyí tuu xaan ñiyivi. Ta i sicundyaa ra. Ta tandíhi ñiyivi i nandoo nuu ñiyiti cuan.

²Ta i zacuaha ra sii ñiyivi ziquí minoo cuhva ta inga cuhva. Ta ihya cuu minoo cuhva i cahan ra:

³Tyizoho ndo kuhva ya vatyi minoo saha sahan minoo ra cua tasi siti trigo.

⁴Zuhva si i canacava si ityi nu ndava ñuhu. I quisi zaa, ta tandihi cuii si i sasi ti.

⁵Zuhva si i canacava nu yaxi ñoho ñuhu vatyi ñoho xaan yuu. Yatyi xaan i caña si vatyi ña coco caa ñuhu.

⁶Tacuan ta ndyii xaan i nanduu. Ta i xii yava ndyih i cuan vatyi ñá tiin yoho si.

⁷Ta inga si i canacava si sisi iñu. Ta vatyi ca sahn u iñu cuan. Ta i zahvi iñu cuan sii si, ta ñá saha si siti si.

⁸Zoco zuhva si i canacava si nu vaha ñuhu. Yucuan cuu sa sahn u vaha. Ta i saha si siti si. Iyo si saha si ziendo siti si sa minoo ñi si. Iyo si saha si uñi xico usi. Ta iyo si saha si oco usi.

⁹Ta i catyi ra sihin ñu: Tatu siñi ndo, icuiñi ndo!

Cuenda sa tuhva xaan ra Jesús cahan ziqui minoo kuhva

¹⁰Tacuan ta ziqui i nandoo zuhva ca ñiyivi sihin ra Jesús ta sihin ra i casi ra. Ta i ndaca tuhun ñu sii ra Jesús: ¿Ñaa cuñi si catyi si sa cuenda kuhva cuan?

¹¹Ta i catyi ra Jesús sihin ñu: Saha ra Ndyoo sa coto maa ndo yozo caa ndyaca ñaha maa ra. Zoco kuhva cuan maa ñi sihin kuhva quehin sihin inga ñiyivi.

¹²Vatyi maa ñu, cua ndyehe ñu. Zoco ma cuu coto ñu ñaa sa ndyehe ñu. Cua tyizoho ñu. Zoco ma cutuñi iñi ñu. Vatyi tatu cua cuiñi ñu, cua zama ñu kuhva iyo ñu. Ta cua zandasi ra Ndyoo cuaty i ñu.

I nacatyi ra Jesús ñaa cuñi si catyi si kuhva ra tasi trigo cuan

¹³Tacuan ta ziqui i ndaca tuhun ra Jesús sii ñu. Ta i catyi ra: ¿Atu ña siñi ndo kuhva cuan? Tatu ña siñi ndo sii si, ¿yozo caa cua cuiñi ndo inga kuhva?

¹⁴Tañi ra i tasi siti yutu cuan, tacuan iyo ra nacatyi sihin ñiyivi Tuhun Ndyoo.

¹⁵Tañi siti i canacava ityi, tacuan iyo zuhva ñiyivi. Siñi ñu sa cahan ra Ndyoo, zoco vatyi xaan quisi cuihna. Ta quihin ra tuhun sa siñi ñu.

¹⁶Ta iyo inga ñiyivi tañi siti sa canacava nu yaxi ñuhu. Tacuan iyo maa ñu. Siñi ñu Tuhun Ndyoo, ta cuñi xaan ñu sii si.

¹⁷Zoco ña quihvi vaha si aña ñu. Ta ña naha cua sino iñi ñu. Tatu sa quisi minoo tundoho ziqui ñu a cuxaan ñiyivi sihin ñu sa cuenda Tuhun Ndyoo, vatyi xaan cua zaña ñu sii si.

¹⁸Ta inga ñiyivi, tañi siti sa canacava sisi iñu cuu ñu. Siñi ñu Tuhun Ndyoo.

¹⁹Zoco sica iñi ñu tuhun sa iyo ñuu ñiyivi. Ta tuhun cuca, tuhun zandavi ñaha ñi cuu si cuan. Ta cuñi xaan ñu tandihi nuu ndaha tyiño. Ta tandihi kuhva cuan zanaa si iñi ñu Tuhun Ndyoo. Ta ma zatyiño vaha si sihin ñu.

²⁰Zoco iyo inga ñiyivi siñi ñu Tuhun Ndyoo. Ta sino iñu ñu. Yucuan cuu ñiyivi vaha zatyiño, tañi siti sa i canacava nu ñuhu vaha. Iyo ñiyivi vaha xaan zatyiño ñu tyiño ra Ndyoo tañi siti i saha minoo ziendo sa minoo si. Ta inga ñu cuu tañi siti

i saha uñi xico usi ñi. Ta inga ñu cuu tañi siti i saha oco usi ñi.

Cuhva sii minoo lámpara

²¹Ta i catyi tucu ra Jesús sihin ñu: Tatu cayu minoo lámpara vehe ñiyivi, ¿atu cua tyihi ñu sii si sisi tyica a xu sito? Ña tacuan. Zucu tyaa ñu sii si cuñi si vatyí tacuan ta ndundisi sisi vehe.

²²Ta tañi lámpara tatu ñoho xehe si sisi tyica, tacuan iyo cuhva zacuehi sii ndo vityi. Zoco cua coo quivi ta cua cuiñi ñiyivi nacahnu ñuu ñiyivi cuhva zacuehi ihya.

²³Yoo ra tyizoho, natyizoho vaha ra.

²⁴Tyizoho vaha ndo ñaa sa siñi ndo. Tatu zuhva ñi cua tyizoho ndo, zuhva ñi cua coto ndo. Tatu tyizoho vaha ndo cua coto ndo cuaha ca vatyí cua cuhva ra Ndyoo sii ra tyizoho vaha vatyí cua coto ra cuaha ca.

²⁵Sii ra sa iyo cuaha ca, cuaha ca cua cuhva ra. Ta sii ra iyo zuhva ñi, cua naquihin ndihí ra Ndyoo sii si.

Cuhva sahnu siti

²⁶Catyí tucu ra Jesús: Ñiyivi ndyaca ñaha ra Ndyoo, nducuaaha ca ñu tañi nducuaaha siti. Tasi minoo ra ndaha tyiño nu ñuhu.

²⁷Quixi ra sa sa cuaa. Ta nduvita ra ñaha ñi. Ta caña siti cuan, ta cua cuahnu maa tuhun ñi si. Ña sito ra cuan yozo caa sahnu si.

²⁸Ñuhu cuan saha tundyee iñi, ta cua cuahnu siti cuan. Sa xihna ñi cua coo yutu tu. Ta ziqui coo yoco tu.

²⁹Tatu sa sisa siti cuan. Ta ziqui cua cahndya ra sii si ta naquihin ra sii si vatyí sa saa tyiemvu si.

Cuhva siti mostaza

³⁰Ta i catyi tucu ra Jesús: ¿Ñaa sihin cuu zacasi tahan yo cuhva ndyaca ñaha ra Ndyoo? ¿Ñaa cuhva cua nacatyí sihin ndo vatyí cua cuiñi ndo?

³¹Tañi minoo siti mostaza, tacuan iyo si. Ñahñi siti luhlu ca sa nuu mostaza iyo nacahnu ñuu ñiyivi. Quihin minoo ra sii si, ta tasi ra sii si nu ñuhu ra.

³²Ta cuee ca cua cuahnu si. Ta cua nduu si cahnu xaan, cahnu ca ta ziqui cuaha xaan inga nuu siti sa tasi yo. Nahnu xaan zoco tu. Ta ndya cuhva ndya zaa ta cua quisi cozo ti zoco tu.

Tuhva xaan ra Jesús cahan ziqui minoo cuhva

³³Tacuan i cahan ra Jesús sihin ñiyivi. Ta i sityiño ra cuaha xaan cuhva tañi cuhva ya. Tandihí ñaa sa cuu cuiñi ñu, i cahan ra sihin ñu.

³⁴Ta ma cahan maa ra tatu ma cahan ra ziqui minoo cuhva. Ta cuee ca ta i nacatyí casi ra sihin ñiyivi ndyico sii ra.

Zacutaxi ra Jesús tatyí ta ndutyá

³⁵Zuun ñi quivi cuan ta sa tyahan i catyi ra Jesús sihin ra i casi ra: Coho yo inga siyo miñi.

³⁶Ta i zandoo ra sii ñiyivi cuan, ta cuahan ra Jesús sihin ra i casi ra sisi barco sa ñoho ra. Ta cuahan uu a uñi tahan ca barco sihin ra.

³⁷Ta i quisaha minoo tatyí cahnu xaan. Ta i quisaha quihvi ndutyá sisi barco cuan. Ta zuhva zuhva ñi cua cutu tu.

³⁸Ta ra Jesús quixi ra ityi zuhma barco. Ñoho minoo zahma xiñi ra.

Ta i zandoyo ra i casi ra sii ra. Ta catyi ra sihin ra: Maestro, ¿ñacu ña cohon ta sa cuñi cunaa yo?

³⁹Ta i nduvita ra Jesús, ta i cahan ra sihin taty: ¡Taxi ñi! Ta i catyi ra sihin ndutya: ¡Ma ndyayu con! Ta taxi cuii ñi i nduu taty. Ta tacuan tucu ndutya.

⁴⁰Ta ziqui i catyi ra Jesús sihin ra i casi ra: ¿Ñacu yuhu xaan ndo? ¿Ñacu ña nii iñi ndo?

⁴¹Ta iyo xaan i cuñi ra i casi ra. Ta i natuhun tahan ra, ta catyi ra: ¿Ñaa ra cuu ra ya vaty cuhva ndya taty ta cuhva ndya ndutya ta tyaa si yahvi sii ra?

Ra ñoho taty cuihna

5 I saa ra inga siyo miñi nu cu si Gadara,

²ta i quita ra Jesús barco cuan. Ta i quisi minoo ra iyo nu ñaña. Ñoho taty cuihna sii ra.

³Ndyaa maa ra nu ñaña, ta yoñi maa cuu cuhñi sii ra numaa sihin cadena.

⁴Cuaha xaan saha i sihñi ñiyivi saha ra ta ndaha ra sihin cadena, zoco tandihi saha sahnun dyihi ra sii si. Ta ñá cuu zandumazu ñiyivi sii ra.

⁵Ndyiyaca ta ñiyaca ndihvi noo ra yucu ta nu ñaña. Sacu saa ra, ta sahnnya ra sii ra sihin yuu.

⁶I ndyehe ra sii ra Jesús sica ca. Ta i cacono ra. Ta i sicuñi siti ra nu vasi ra Jesús.

⁷Saa xaan i cahan ra, ta catyi ra: ¿Ñaa sa cuñun sihin mi, Jesús? Moo cuu zehe ra Ndyoo, ra cahnu ca. Sa ndyoo ñi ma zandyehun tundoho sii.

⁸Tacuan i catyi ra vaty sa catyi ra Jesús: Yoho taty cuihna, quita sii ra ya.

⁹Ta ziqui i ndaca tuhun ra Jesús sii taty cuihna cuan, ta catyi ra: ¿Ñaa nañi moo? Ta i catyi si: Nañi Legión vaty cuaha xaan ndi iyo.

¹⁰Ta i cahan ndahvi xaan si sihin ra Jesús sa ma tava ra sii si ta cuhun si ndya vaha ñi.

¹¹Ta yaty ñi yucu cuan siyucu cuaha xaan quini. Nanducu ti sa casi ti.

¹²Ta i quisaha cahan ndahvi tandihi taty cuihna cuan. Ta catyi si sihin ra Jesús: Tasun sii ndi nu yucu quini cuan. Ta cua quihvi ndi sisi ti.

¹³I catyi ra Jesús sihin si vaty cuu. Ta ziqui i quita tandihi taty cuihna cuan sii rayii cuan, ta i quihvi si sisi quini cuan. Ta tandihi sa uu mil quini cuan, i sino ti nu iñi noo yuhu miñi. Ta i sihi tandihi ti sisi ndutya.

¹⁴Tacuan ta iyo xaan i cuñi ra zacuenda quini cuan. I sino xaan ra. Sahan ra nacahnu sa nacaty ra sihin ñiyivi. Ta i quisi ndyehe ñiyivi ñaa sa cuu.

¹⁵I saa ñu nu ndyaa ra Jesús, ta i ndyehe ñu sii ra i siñoho taty cuihna cuan. Sa ndyaa ra taxi ñi. Ñoho ra zahma ra, ta sa nduvaha cuñi xiñi ra. Ta i yuhu xaan ñu.

¹⁶Ta ra i ndyehe cuan, i nacaty ra sihin ñiyivi cuhva i tahan ra i ñoho taty cuihna sii cuan ta cuhva i tahan quini cuan.

¹⁷Ta ziqui i catyi ñu sihin ra Jesús sa ndyoo ñi naquita ra ñuu ñu.

¹⁸Tacuan ta i quihvi ra Jesús sisi barco. Ta i quisaha cahan ndyoo ra siñoho taty cuihna sii cuan sihin ra Jesús vaty cuñi ra cuhun ra sihin ra.

¹⁹Zoco ñá saha ra Jesús sa cuhun ra. I catyi ra: Cuahan ndya vehun nu iyo ñiyivi suun. Ta nacatyun sihin ñu tandihi cuhva i tyindyee ra Ndyoo suun. Ta yozo caa i cundahvi iñi ra suun.

²⁰Ta cuahan ra cuan. Ta i nacatyi ra sihin tandihi ñiyivi tandihi ñuu nu cu si Decápolis tandihi sa i zavaha ra Jesús sihin ra. Ta iyo xaan i cuñi ñiyivi.

Nduvaha zehe ra Jairo, ta i tiin minoo ñaha yuzahma ra Jesús

²¹Saa tucu ra Jesús sihin ra i casi ra inga siyo miñi. Ta cuaha xaan ñiyivi i titahan yuhu miñi nu i saa ra.

²²Ta i quisi minoo ra cu tyiño vehe ñuhu. Jairo nañi ra. Ta cuhva sa ndyehe ra sii ra Jesús i sicuñi siti ra.

²³Ta i quisaha sacu ndahvi ra nuu ra Jesús ta catyi ra: Sa cuñi cuu cuii ña luhlu zehi. Coho ta tyizon ndohon sii ña. Ta cua nduvaha ña, ta ma cuu ña.

²⁴Tacuan ta cuahan ra Jesús sihin ra. Ta i sindyico tuu xaan ñiyivi sii ra. Ñihi xaan i catyihí ñu sii ra.

²⁵Ta ticui ñiyivi cuan ñoho minoo ñaha huhu. Sa usi uu cuiya sa huhu ña cuehe sa cuu ña niñi.

²⁶Sa cuaha xaan tundoho ndyehe ña. Cuaha xaan médico i zacuu tata sii ña. I zanaa ña tandihi cuii sa iyo sii ña. Zoco ñá nduvaha ña. Xaan ca i nduu cuehe cuan.

²⁷Ta sa i siñi ña sa cahan ñiyivi tuhun ra Jesús, i quisi ña ityi sata ra zava mahñu ñiyivi cuan, ta i tiin ña yuzahma ra.

²⁸Vatyi i sica iñi ña: “Vazu zahma ñi ra cua tiin, ta nduvehi.”

²⁹Ta zuun ñi caa cuhva cuan i sicuita niñi ña. Ta i sito ña vatyi sa nduvaha ña sihin tundoho sa i tahan ña.

³⁰Ta vatyi xaan i sito ra Jesús sa i quita zuhva tundyee iñi sii ra. I nandyehé ra siconduu nu yucu ñiyivi cuan. Ta i catyi ra: ¿Yoo cuu sa tiin zahme?

³¹Ta i catyi ra i casi ra sihin ra: ¿Atu ña siton vatyi tuu xaan ñiyivi cuahan suhun? ¿Ta yozo caa cuu ndaca tuhun yoo sa tiin zahmon?

³²Ta ra Jesús i nandyehé ra siconduu nu yucu ñiyivi cuan vatyi cua ndyehe ra yoo sa i tiin sii ra.

³³Yuhu xaan ñaha cuan ndya cuhva niñi ñi ca ña vatyi sito ña ñaa sa cuu sa tahan ña. I quisi ña, ta i sicuñi siti ña nuu ra Jesús. Ta i nacatyi ña sihin ra tandihi cuii.

³⁴Ta i catyi ra Jesús sihin ña: Zihí, i nduvohon vatyi i sino iñun sii. Cuahan vityi, ta ma caca ca iñun vatyi sa nduvohon sihin tundoho i tohon.

³⁵Ta zuun ñi caa cuhva sa cahan ra Jesús sihin ñaha cuan, ta i quisi cahan ñiyivi sihin ra cu tyiño vehe ñuhu. Ta vatyi ñu: Sa sihi zehun. Ma zayanga con sii ra Maestro ya.

³⁶Ta i siñi ra Jesús sa cahan ñu. Ta i catyi ra sihin ra cu tyiño: Ma yuhun. Sino iñun.

³⁷Ta ñá saha ca ra Jesús sa cuhun cuaha xaan ñiyivi sihin ra. Ra Pedro ñi sihin ra Jacobo ta ra Juan, yañi ra Jacobo, cuahan sihin ra.

³⁸Ta sa cua saa ra Jesús vehe ra cu tyiño cuan, i siñi ra sa cuvaa

xaan ñiyivi. Sacu ñu. Ta sacu saa ñu.

³⁹I quihvi ra sisi vehe, ta i catyi ra: ¿Ñacu cuvaa xaan ndo ta sacu xaan ndo? Ñá sihi ña luhlu ya. Quixi ña.

⁴⁰Zoco i sacu ndyaa ñiyivi sii ra. Tacuan ta i tava ra Jesús sii tandihi ñu. Ta i quihin ra zutu ña ta zihí ña luhlu cuan, ta ra i quisi sihin ra ndya nu candyaa ña luhlu cuan.

⁴¹I tiin ra ndaha ña, ta i cahan ra sihin zahan maa ra: Talita, cumi. Tuhun cuan cuñi si catyi si: Ñaha luhlu, catyi suhun vatyí nduviton. Nacuíñi ndyaa.

⁴²Zuun ñi caa cuhva cuan i nduvita ña luhlu sa iyo usi uu cuiya cuan. Ta ndaha nacaca ña. Ta iyo xaan i cuñi ñiyivi.

⁴³Ñihi xaan i saha ra Jesús tyiño sii ñu sa ma nacatyí ñu nu sihin minoo ñiyivi. Ta i catyi ra vatyí cuhva ñu sa casi ña luhlu cuan.

Sinuhu ra Jesús ñuu ra, ñuu Nazaret

6 I quita ra Jesús ñuu cuan, ta cuahan ra ndya ñuu ra. Ta cuahan ra i casi ra sihin ra.

²Ta tahan si quivi quitatu ñiyivi. I sahan ra vehe ñuhu, ta i zacuaaha ra sii cuaha xaan ñiyivi. Ta iyo xaan i cuñi ñu, ta catyi ñu: ¿Ndyamaa i cutuhva ra ya tuhun ya? ¿Yozo caa i ñihi ra cuhva sa casi xaan iñi ra? ¿Yozo caa ñihi ra cuhva zavaha ra sa ndyityi?

³¿Atu yivi ra ya cuu ra cu carpintero, zehe ña María, ta yañi ra Jacobo, ra José, ra Judas ta ra Simón? Ta cuhva ra iyo ñu ihya sihin yo, ndihi ca. Tacuan i catyi ñu. Ta yucuan cuenda ñá tyaa ca ñu yahvi sii ra Jesús.

⁴Ta i catyi ra Jesús sihin ñu: Tyaa ñiyivi inga ñuu yahvi sii minoo ra profeta, zoco ndya ñuu ra, ndya vehe ra, nu ndyaa ñiyivi sii ra, ña tyaa ñu yahvi sii ra. Tacuan i catyi ra Jesús.

⁵Ta yucuan cuenda ñá zavaha ra Jesús cuaha xaan sa ndyityi tañi i zavaha ra inga ñuu. I tyizo ra ndaha ra ziqui zuhva ñi ñiyivi cuhu, ta i zanduvaha ra sii ñu. Ta tacuan ñi.

⁶Ta iyo xaan i cuñi ra vatyí ñá sino iñi ñu sii ra. Ta cuahan ra tandihi inga ñuu yucuan. Ta i zacuaaha ra sii ñiyivi yucuan.

I tasi ra Jesús sii sa usi uu tahan ra i casi ra vatyí cua nacatyí ra Tuhun Ndyoo sihin ñiyivi

⁷I cana ra Jesús sii sa usi uu tahan ra i casi ra vatyí cuñi ra sa cua tasi ra uu uu ra. Ta i saha ra cuhva sii ra, cuhva sa tava ra tatyí cuihna sii ñiyivi.

⁸Ta i catyi ra sihin ra vatyí ñahñi maa cua cuizo ra sa casi ra ityi. Minoo tuhun ñi tutatu cuña ra. Ta ñahñi ca sa cuizo ra nu yono ta nu xita ta nu xuhun.

⁹Ndisa ndahvi ñi cundyaa saha ra. Minoo tuhun ñi camisa quihí ra, ta ma cuu sa uu tahan.

¹⁰Ta i catyi ra Jesús sihin ra: Tatu saha ñiyivi minoo vehe cundyaa ndo, yucuan ñi ndoo ndo ndya cua cahun ndo inga ñuu.

¹¹Tatu saa ndo minoo ñuu ta ña cuñi ñiyivi sii ndo ta ña tyizoho ñu sa cahan ndo, quita ndo ñuu cuan. Naquizi ndo saha ndo vatyí ma cahun nu ñiyaca sii ñuu cuan sihin ndo. Tacuan ta cua coto ñiyivi

vaty i zavaha ñu sa ña vaha sihin ndo. Ñihi xaan cua coo tundoho sii ñiyivi ñuu Sodoma ta ñiyivi ñuu Gomorra quivi cua tasi tuñi ra Ndyoo sii ñiyivi, zoco ñihi xaan ca cua coo tundoho sii ñiyivi ña cuñi tiin cuenda sii ndo. Tacuan i catyi ra Jesús.

¹²Ta ziqui cuahan ra, ta i zacoto ra sii ñiyivi vaty nazandoo ñu cuaty ñu.

¹³Ta i tava xaan ra taty cuihna sii ñiyivi. Ta i natyih ra azetye sii cuaha xaan ñiyivi cuhu, ta i zanduvaha ra sii ñu.

Cuhva i sihi ra Juan, ra i zacoo ndutya

¹⁴Ta i sito ra rey Herodes, ra ndyaca ñaha yucuan, cuhva cuan vaty i cahan tandihi ñiyivi tandihi sa i zavaha ra Jesús. Ta i sica iñi ra Herodes: Ra Juan, ra i zacoo ndutya cuan, cuu ra. I nandoto ra, ta yucuan cuenda ndyityi xaan ra.

¹⁵Ta i catyi tucu inga ñiyivi: Ra Elías cuu ra. Ta inga ñiyivi i catyi: Minoo ra profeta cuu ra tañi ra profeta sicoo ta sa naha.

¹⁶Ta sa siñi ra Herodes cuhva cuan, ta i catyi ra: Ra Juan cuu ra, ta i nandoto ra. Ta yuhvi i tave tyiño sii ra sahndya yuu zucu ra.

¹⁷Vaty zuun ñi ra Herodes i tava tyiño sii ñiyivi sa tyihi sii ra Juan vehe caa. Ta i sihñi ra sii ra sihin cadena sa cuenda ña Herodías. Ta ña Herodías cuan i cuu ñazihi ra Felipe yañi ra Herodes. Zoco i quihin ra Herodes sii ña sa cuu ñazihi ra.

¹⁸Ta ra Juan i catyi ra sihin ra Herodes: Ña vaha cua cuhun ñazihi yañun. Catyi ra.

¹⁹Xaan xaan i nduu ña Herodías sihin ra Juan. Ta cuñi ña sa cahñi ña sii ra. Zoco ñá cuu

²⁰vaty yuhu ra Herodes sii ra Juan vaty sito ra vaty ñiyivi vaha cuu ra Juan. Ta ñahñi cuaty i zacuu ra. Ta yucuan cuenda ñá saha ra sa zavaha ña maña sii ra. Ta vazu ñá cutuñi iñi ra Herodes cuaha xaan sa cahan ra Juan, zoco i tahan iñi ra tyizoho ra sa cahan ra.

²¹Ta ña Herodías i ñihi ña minoo cuhva quivi i nandusi cuiya ra Herodes. I saha ra sa cuxiñi tandihi ra ndyizo tyiño ra, sihin ra cu nuu sii zandaru, ta sihin tandihi ra nahnu nu cu si Galilea.

²²Ta i quihvi ña yoco zehe ña Herodías nu siyucu ra. Ta i sata saha maa tuhun ñi ña. Ta tahan xaan iñi ra Herodes sihin tandihi ra yucu sihin ra. Ta i catyi ra Herodes sihin ña: Caca moo ñaa sa cuñun, ta cua cuhve sii si suun.

²³Ta i tyiñaha ra Ndyoo ta catyi ra sa ndisa cuii vaty cua cuhva ra ñaa sa cua caca ña vazu zava cuii ñuu ndyaca ñaha ra.

²⁴I quita ña, ta i catyi ña sihin zihñi ña: ¿Ñaa sa cua caque? Ta i catyi zihñi ña: Cacon xiñi ra Juan, ra zacoo ndutya.

²⁵Ta ta sica cuii ñi i ndihvi ña nu ndyaa ra Herodes, ta i catyi ña: Cuñi vityi vityi ñi xiñi ra Juan, ra i zacoo ndutya sihin minoo nu coho.

²⁶Ta i nducuihya xaan iñi ra Herodes, zoco sa tyiñaha ra Ndyoo, ta sa siñi tandihi ñiyivi. Ta yucuan cuenda ñá cuñi ra catyi ra sa ma cuhva ra sa sica ña.

²⁷Zuun ñi caa cuhva cuan i tasi ra minoo zandaru cua quihin xiñi ra Juan.

²⁸Sahan zandaru cuan vehe caa, ta i sahndya ra zucu ra Juan, ta i quihin ra xiñi ra. Ta i quisi ndyaca ra sii si sihin minoo nu coho, ta i saha ra sii si sii ña yoco cuan. Ta i saha maa ña sii si sii zihí ña.

²⁹Ta sa i sito ñiyivi ndyico sii ra Juan vatyi sa i sihi ra, ta i sinaquihin ñu sii coño ñuhu ra. Ta i tyihi ñu sii si si ñuhu.

**Cuhva i saha ra Jesús sa
casi ohon mil rayii**

³⁰Tacuan ta ziqui i titahan tucu ra i casi ra Jesús. Ta i nacatyi ra sihin ra tandihí sa i zavaha ra ta tandihí sa i zacuaha ra sii ñiyivi.

³¹Ta i catyi ra Jesús sihin ra: Coho yo; cua quitatu yo nu yoñi maa ñiyivi iyo. Tacuan i catyi ra vatyi tuu xaan ñiyivi i quisi. Ta tuu xaan ñu ndyico sii ra. Ta nu sa casi ra xita ta ñá cuyatyi ca ra.

³²Tacuan ta cuahan ra Jesús sihin ra i casi ra sihin minoo barco ndya minoo nu yoñi maa ñiyivi iyo.

³³Zoco i ndyehe ñiyivi sa cuahan ra. Ta i nacoto ñu sii ra Jesús. Tandihí ñuu i quita ñu. Ta i sino ñu. Ta yatyi ca i saa ñu ta ziqui maa ra.

³⁴I quita ra Jesús barco cuan, ta i cundahvi xaan iñi ra sii ñu vatyi tañi mvee ticatyi sa yoñi sitoho i cuu ñu. Ta i quisaha zacuaha ra sii ñu cuaha xaan cuhva.

³⁵Ta cuhva sa cua iñi i quisi ra i casi ra nu ndyaa ra, ta i catyi ra sihin ra: Sahiñi xaan. Ta yoñi ñiyivi iyo ihya.

³⁶Catyun sihin ñiyivi nacuhun ñu tandihí ñuu, tandihí cuadria, cua zata ñu sa casi ñu vatyi ña ndyizo ñu sa casi ñu.

³⁷Ta i nacahan ra Jesús, ta catyi ra: Cuhva maa ndo sa casi ñu. Ta i catyi ra sihin ra Jesús: Ma cuu zata maa ndi oco mil pan ta cuhva ndi casi ñiyivi.

³⁸Tacuan ta i ndaca tuhun ra Jesús sii ra ta catyi ra: ¿Yozo tahan pan ndyizo ñiyivi? Cua ndyehe xihna ndo. Ta sa sito ra i catyi ra: Ohon tahan pan, ta uu tahan tyiyaca.

³⁹Ta ziqui i catyi ra Jesús vatyi nacundyaa ñiyivi iin iin ityi ñu nu itya.

⁴⁰Ta i sicundyaa ñu iin iin ityi ñu. Ziendu ñu a uu xico usi ñu sa minoo minoo ityi ñu.

⁴¹Tacuan ta i quihin ra Jesús sa ohon tahan pan cuan ta uu tahan tyiyaca cuan. Ta i nandyehé ndaa ra ityi andivi, ta i nacuhva ra tyahvi ndyoo sii ra Ndyoo Zutu ra. Ta i sahanu ndyihí ra pan cuan. Ta i saha ra sii si sii ra i casi ra vatyi cua zasa ra sii si sii ñiyivi. Ta tacuan tucu sa uu tahan tyiyaca cuan.

⁴²Tandihí ñiyivi cuan i sasi, ta i ndaha xaan iñi ñu.

⁴³Ta i zacutu ñu usi uu tahan tyica sihin sa nandoo yuhu pan cuan ta tyiyaca cuan.

⁴⁴Ohon mil sa maa rayii ñi ta ziin ñu zihí ta sa ndyihí sasi ñu, ndihí ca.

Cuhva i sica ra Jesús nu ndutya

⁴⁵Tacuan ta ziqui i catyi ra Jesús sihin ra i casi ra vatyi nandihvi ra barco vatyi cua yaha ra inga siyo miñi ndya ñuu Betsaida. Ta ra Jesús cua catyi ra sihin tandihí ñiyivi cuan vatyi cunuhu ñu ndya ñuu ñu.

⁴⁶Ta sa natasi ra Jesús sii ñu ndya ñuu ñu, ta i sahan ra minoo yucu

vatyi cua cahan ra sihin ra Ndyoo Zutu ra, ra iyo andivi.

⁴⁷Ta cuhva sa i cuaa i saa barco ñoho ra i casi ra zava mahñu miñi, ta ra Jesús i nandoo maa tuhun ñi ra.

⁴⁸Ta ziqui i ndyehe ra Jesús vatyi yii xaan i zacaca ra barco vatyi ñihi xaan quiñi ndaha tatyi sii barco cuan. Ta ñaa ca cuan i tuhva ra Jesús nu yucu ra. Sica ra nu ndutyua. Ta i cuñi ra Jesús yaha ra nu yucu ra.

⁴⁹Ta i ndyehe ra vatyi sica ra Jesús nu ndutyua, ta sica iñi ra vatyi minoo aña cuu ra. Ta i sacu saa ra

⁵⁰vatyi tandihi ra i ndyehe sii ra. Ta i yuhu xaan ra. Ta i cahan ra Jesús sihin ra, ta catyi ra: Zandyee ndo iñi ndo. Yuhvi cui. Ma yuhu ndo.

⁵¹Ta i quihvi ra Jesús sisi barco, ta i sicuita tatyi. Ta iyo xaan i cuñi ra i casi ra Jesús

⁵²vatyi tañaha ca cutuñi vaha iñi ra vatyi cahnu xaan cuu cuhva iyo sii ra Jesús vazú sa ndyehe ra sa ndyityi i zavaha ra.

Cuhva i zanduvaha ra Jesús sii ñiyivi nu cu si Genesaret

⁵³I yaha zava ra sihin ra i casi ra nu miñi cuan. Ta i saa ra nu cu si Genesaret. Ta i sihñi ra barco cuan yuhu miñi.

⁵⁴I quita ra barco cuan, ta yatyi xaan i nacoto ñiyivi sii ra Jesús.

⁵⁵Ta i sino xaan ñiyivi nacañu ityi cuan, ta i quisaha quisi ndyaca ñu sii ñiyivi cuhu sihin nu sito ndya nu ndyaa ra Jesús.

⁵⁶Ta tandihi nu cuahan ra vazú ñuu nahnu a ñuu ndyihí a sicuhu,

i saqui ñiyivi sii ñu cuhu ityi. Ta i cahan ndyoo ñu sihin ra Jesús vatyi natiñ ñiyivi cuhu sii ra vazú yuzahma ra. Ta tandihi ñu i tiñ sii ra, i nduvaha ñu.

Sa zativi aña ñiyivi

7 Ra maestro cuenda ley, ra i quisi ityi ñuu Jerusalén sihin ra fariseo, i tuhva ra nu nandyaa ra Jesús.

²Sa i ndyehe ra vatyi ra i casi ra Jesús ña tuhva ra nacatya vaha ndaha ra sa sasi ra xita tañi iyo costumbre ñiyivi hebreo. Ta yucuan cuenda i cahan ra ndya vaha ñi sii ra vatyi ñá zavaha ra costumbre iyo yucuan.

³Ta ra fariseo sihin tandihi ñiyivi hebreo ña zaña ñu costumbre sa ndoo vaha xaan ndaha ñu ta casi ñu xita vatyi tacuan i zacuaha ñiyivi sahnu sii ñu.

⁴Ta sa nasaa ñu sa sahan ñu nuyahvi, ma casi ñu tatu ma nandaha vaha xaan ñu. Ta iyo cuaha xaan ca costumbre sii ñu. Nacatya ñu tasa, ta quizi, ta caa sa tuhva ñu cutyíño ta cuhva ndya sito ñu.

⁵Tacuan ta i ndaca tuhun ra fariseo ta ra maestro cuenda ley ta catyi ra: ¿Ñaa cuenda ña zavaha ñiyivi ndyico suun costumbre sa i zavaha ñiyivi sahnu vatyi ña nacatya vaha ñu ndaha ñu ta casi ñu?

⁶Ta i catyi ra Jesús sihin ra: Vaha xaan i cahan ra Isaías cuhva iyo maa ndo vatyi zaha ndo tuhun vatyi vaha xaan ndo, zoco ña ndisa. Ta tacuan i tyaa ra Isaías ta sa naha. I catyi ra vatyi i catyi maa ra Ndyoo tyehen:

Ihya ñiyivi zacahnu ñu sii, sihin yuhu ñu.

Zoco ña zacahnu ñu sii, sa ndisa.

⁷ Zacuaha ñu sii ñiyivi maa maa costumbre ñiyivi ñi.

Ta ña zavaha ñu cuhva catyi Tuhun Ndyoo sa ndisa.

⁸ Ta i catyi tucu ra Jesús sihin ra: Maa ndo i zandoo ley ra Ndyoo vatyí cua cundyico ndo costumbre ñiyivi, tañi sa nacatya xaan ndo quizi ndo ta tasa ndo ta inga cuhva sa tacuan.

⁹ Tyaa siyo xaan ndo sa catyi Tuhun Ndyoo vatyí cuñi ndo zacahnu ndo costumbre ñiyivi sahanu.

¹⁰ Ihya cuu cuhva i tyaa ra Moisés: “Zacahnu ndo sii zutu ndo ta sii zihí ndo.” Ta “Yoo ra cahan sa quiñi sii zihí ra a sii zutu ra, nacahñi ñiyivi sii ra.”

¹¹ Zoco maa ndo catyi vatyí cuu catyi minoo ñiyivi sihin zutu ra a sihin zihí ra: “Ma cuu tyindyeyi suun vatyí tandihí ndaha tyiñe corbán cuu si.” (Tuhun corbán cuan cuñi si catyi si vatyí sii ra Ndyoo cuu.)

¹² Tatu tacuan cahan minoo ñiyivi, maa ndo catyi ndo vatyí ma cuu tyindyeyee ca ra sii zutu ra a sii zihí ra.

¹³ Tacuan cuu cuhva zanduluhlu ndo tuhun cahan ra Ndyoo vatyí cuñi ndo zanducahnu ndo costumbre ndo. Ta cuaha xaan ca cuhva sa tacuan ndyicuu ndo.

¹⁴ Ta i cana tucu ra Jesús sii ñiyivi ta catyi ra sihin ñu: Tyizoho tandihí ndo, ta tyituñi vaha iñi ndo.

¹⁵ Yivi sa sasi ñiyivi ta yivi sa sihi ñu cuu sa zatívi añima ñu. Zoco

sa quiñi sica iñi ñu cuu sa zatívi añima ñu.

¹⁶ Tatu siñi ndo, cuiñi ndo.

¹⁷ Ta sa zandoo ra Jesús sii ñiyivi cuan, ta i quihvi ra minoo vehe. Ta ra i casi ra, i ndaca tuhun ra sii ra: ¿Ñaa cuñi si catyi si cuhva cuan?

¹⁸ Ta i catyi ra Jesús sihin ra: ¿Atu ña siñi tucu maa ndo vatyí yivi sa sasi ñiyivi ta yivi sa sihi ñu cuu sa zatívi añima ñu?

¹⁹ Vatyí yivi añima ñu quihvi si. Quihvi si sisi siti cahnu ñu ta ziqui quita si. Tacuan i catyi ra vatyí ñahñi sa ica iyo sa ma cuu casi ñiyivi. Cuu casi ñiyivi ñaa sa cuñi maa ñu. Ta yivi cuatyí cuu si.

²⁰ Ta i catyi tucu ra: Sa quiñi sica iñi ñiyivi, yucuan cuu sa zatívi añima ñu. Ta yucuan cuu cuhva cua coo cuatyí ñu.

²¹ Vatyí añima ñiyivi quita tandihí sa sica iñi ñu, sa quiñi zavaha ñu, sa nama minoo rayi ñazihí inga ra, a sa coo cuaha xaan ñaha ra, a sa cahñi ra sii inga ñiyivi,

²² sa zuhu yo, sa cucuihna iñi yo sa cuenda ndaha tyiño inga ñiyivi, tandihí sa quiñi zavaha yo, sa zandavi ñaha yo, sa cuxi xaan iyo yo, sa cuihna iñi yo, sa vatya yo, sa cahnu xaan zaha yo sii yo ta sa ña zavaha yo sa vaha.

²³ Tandihí cuii cuhva quiñi ya, quita si añima ñiyivi, ta zatívi si sii ñu.

Cuhva i sino iñi minoo ñaha inga ñuu sii ra Jesús

²⁴ I quita ra Jesús yucuan, ta cuahan ra ndya ñuu Tiro ta ñuu Sidón. I quihvi ra minoo vehe vatyí

cuñi ra sa ma coto ñiyivi sa i saa ra. Zoco ñá cuu.

²⁵Yatyi xaan i sito zihhi minoo ñaha luhlu sa ñoho tatyí cuihna sii. Ta i quisi ña nu ndyaa ra Jesús. Ta i sicuñiñi siti ña saha ra.

²⁶Ta ñaha cuan i cacu ña ñuu Sirofenicia. Ta yivi ñiyivi hebreo cuu ña. Ta i sica ña tumañi iñi sii ra Jesús sa tava ra tatyí cuihna sa ñoho sii zehe ña.

²⁷Zoco i cahan ra Jesús minoo cuhva sihin ña, ta i catyi ra: Natyindyee xihne sii ñiyivi ñuu vatyi ña vaha quihin mi sa cua casi sa ndyihhi ta cuhve casi ina sii si.

²⁸Ta i catyi maa ña: Ndisa, tata, zoco tañi ina lee cui vatyi cua casi vazu yuxita zanacoyo sa ndyihhi. Yucuan cuenda tyindyeun sii, zuhva.

²⁹Tacuan ta i catyi ra Jesús: Vaha cohon. Sa cuu cuhun. Sa quita tatyí cuihna sii zehun.

³⁰Ta sa nasaa ña vehe ña, ta i ndyehe ña sii zehe ña nu sito, ta sa quita tatyí cuihna sii ña.

Zanduvaha ra Jesús sii ra zoho ta ñehe ra

³¹I quita ra Jesús ñuu Tiro ta cuahan ra ndya Sidón ta ndya tandihhi ñuu ndyihhi nu cu si Decápolis. Ta i saa ra yumiñi Galilea.

³²Ta i quisi ndyaca ñiyivi sii minoo ra zoho ta ñehe ra. Ta i sica ñu tumañi iñi sa cua tyizo ra Jesús ndaha ra sii ra.

³³Ta i quihin ra Jesús sii ra, ta i tuhva ra sihin ra ndya zava. I zanandoo noo ra sii ñiyivi. Ta i tyihhi ra Jesús nu ndaha ra nduu siyo zoho ra zoho cuan. Ta ziqui i

tyaa ra Jesús zii ra nu ndaha ra, ta i tiin ra yaa ra ñehe cuan.

³⁴Ta i nandyehhe ndaa ra Jesús ityi ziqui, ta i sinoo ra, ta i catyi ra sihin tuhun maa ra: ¡Efata! Tuhun cuan, cuñi si catyi si: ¡Nanuña!

³⁵Ta zuun ñi caa cuhva cuan i nuña zoho ra. Ta ndaha nacahan vaha ra.

³⁶Ta i ndisi tucu ra Jesús nu yucu ñiyivi. Ta i catyi ra sihin ñu vatyi ma nacatyí ñu nu sihin minoo ñiyivi. Zoco sa ñihhi ca catyi ra Jesús sihin ñu, cuaha ca nacatyí ñu sihin ñiyivi.

³⁷Ta iyo xaan i cuñi ñiyivi, ta i catyi ñu: Tandihhi cuii sa vaha zavaha ra Jesús cuhva ndya nacuiñi ra zoho, ta nacahan ra ñehe.

Cuhva i saha ra Jesús sa casi cumi mil rayii

8 Ta quivi cuan i tuhva cuaha xaan ñiyivi. Ta ñahñi maa sa casi ñu. Ta i catyi ra Jesús sihin ra i casi ra:

²Cundahvi xaan iñi sii ñiyivi ya vatyi sa iyo uñi quivi sa yucu ñu sihin, ta ñahñi maa sa casi ñu.

³Tatu natasi sii ñu cunuhu ñu vehe ñu ta ma casi ñu, coto cuaña ñu ityi cuhun ñu vatyi sica xaan i quisi ñu.

⁴Ta i catyi ra i casi ra Jesús sihin ra: ¿Ndya ityi cua quihin yo sa casi ñu ya sicuhu ya? Ta yoñi ñiyivi iyo ihya.

⁵Ta i ndaca tuhun ra Jesús sii ra: ¿Yozo tahan pan ndyizo ndo? Ta i catyi ra: Usa tahan.

⁶Tacuan ta i catyi ra Jesús vatyi nacundyaa ñiyivi cuan nu ñuhu. Ta i quihin ra sa usa tahan pan

cuan, ta i saha ra tyahvi ndyoo sii ra Ndyoo. Ta i sahnu ndyihi ra pan cuan. Ta i saha ra sii ra i casi ra. Ta ra yucuan saha sii ñiyivi.

⁷Ta ndyizo ñiyivi cuan zuhva tyiyaca ndyihi. Ta i saha tucu ra Jesús tyahvi ndyoo sii ra Ndyoo sa cuenda ti. Ta i saha ra sii ra i casi ra. Ta i zasa ra sii si sii ñiyivi cuan.

⁸Sasi ñu, ta i ndaha xaan iñi ñu, ta ziqui i zacutu ñu usa tahan tyica sihin sa nandoo cuan.

⁹Ta sa i sasi tañi cumi mil ñiyivi ta ziqui i natasi ra Jesús sii ñu ndya vehe ñu.

¹⁰Ta i ndihvi ra barco sihin ra i casi ra, ta cuahan ra ndya nu cu si Dalmanuta.

Sica ra fariseo minoo sa ndyityi sii ra Jesús

¹¹Tacuan ta ziqui i quisi ra fariseo, ta i quisaha natuhun tahan ra sihin ra Jesús. Cuñi ra ndyehe ra minoo sa ndyityi tañi zavaha ra Ndyoo vatyí cuñi ra coto ra atu ndisa i tasi ra Ndyoo sii ra Jesús.

¹²Ta ra Jesús i sinoo xaan ra. Ta i catyi ra: ¿Ñacu sica xaan ñiyivi sa ndyehe ñu sa ndyityi? Catyi vatyí ma zavehi minoo sa ndyityi sa ndyehe ñi maa ñu.

¹³Ta i zandoo ra Jesús sii ra fariseo. Ta i nandihvi tucu ra barco, ta cuahan ra inga siyo miñi cuan.

Tuhun cahan ra fariseo cuu tañi yusa i siya

¹⁴I naa iñi ra i casi ra Jesús sa casi ra ta sa cuahan ra sihin barco cuan. Minoo ñi pan ndyizo ra.

¹⁵Ta i catyi ra Jesús sihin ra: Ndyehe ndo, zacuenda ndo sii ndo

sihin yusa i siya ra fariseo ta ra Herodes.

¹⁶Ta i natuhun tahan ra i casi ra Jesús, ta i catyi ra: Cahan ra tacuan vatyí ñahñi pan ndyizo yo. Tacuan i sica iñi ra cuan vatyí ñá cutuñi iñi ra tuhun i cahan ra Jesús sa cuenda yusa i siya cuan. Ñá cutuñi iñi ra vatyí cahan ra Jesús minoo cuhva vatyí cua zacuenda ra sii ra sihin cuhva zacuaha ra fariseo ta ra Herodes.

¹⁷I sito ra Jesús sa natuhun tahan ra, ta i catyi ra: ¿Ñacu sica xaan iñi ndo sa ña ndyizo ndo pan? ¿Atu ña cutuñi iñi ndo? ¿Atu tañaha ca ñihi ndo cuhva?

¹⁸¿Atu ña ndyehe ndo sihin siti nuu ndo, ta ña siñi ndo sihin zoho ndo? ¿Atu ña nacohon iñi ndo?

¹⁹Quivi i sehi sa ohon tahan pan i sasi ohon mil rayii, ¿ta yozo tahan tyica si i naquihin ndo? Ta i catyi ra: Usi uu tahan.

²⁰Ta i catyi ra Jesús: Ta sa i sehi sa usa tahan pan i sasi cumi mil ñiyivi, ¿yozo tahan tyica i situ i naquihin ndo? Ta i catyi ra: Usa tahan.

²¹Ta i catyi ra Jesús: ¿Ñacu ña cutuñi iñi ndo?

Zanduvaha ra Jesús sii minoo ra cuaa ñuu Betsaida

²²I saa ra Jesús ñuu Betsaida. Ta i sindyaca ñiyivi sii minoo ra cuaa nu ndyaa ra. Ta i sica xaan ñu tumañi iñi sa tyizo ra ndaha ra sii ra cuaa cuan.

²³Ta i tiin ra Jesús ndaha ra, ta i sahan ra sihin ra ndya yuñuu. Ta i tyaa ra Jesús zii ra nuu ra cuaa cuan, ta i tyizo ra ndaha ra ziqui

ra. Ta i ndaca tuhun ra sii ra tatu sa cuu ndyehe ra zuhva.

²⁴Ta i ndyehe ra cuaa cuan, ta i catyi ra: Ndyehi ñiyivi. Tañi caa yutu caa ñu. Ta sica ñu.

²⁵Ta i tyizo tucu ra Jesús inga saha ndaha ra nuu ra, ta i nduvaha ra. Sa nandyehé vaha ra tandihi.

²⁶Tacuan ta i natasi ra Jesús sii ra ndya vehe ra, ta i catyi ra: Ma quihvun sisi ñuu. Ta ma nacatyun sihin ñiyivi.

**Nacatyí ra Pedro vatyí ra Jesús
cuu ra cua zacacu sii ñiyivi**

²⁷Tacuan ta cuahan ra Jesús sihin ra i casi ra tandihi ñuu ndyihí nu cu si Cesarea de Filipino. Ta ityi cuahan ra i ndaca tuhun ra Jesús sii ra ta catyi ra: ¿Yoo ra cui catyi ñiyivi?

²⁸Ta i catyi ra i casi ra: Iyo ñiyivi catyi vatyí minoo ra i nandoto cuun tañi ra Juan, ra i zacoo ndutyá a minoo ra profeta. Ta catyi inga ñiyivi vatyí ra Elías cuun.

²⁹Ta i ndaca tuhun ra Jesús sii ra: Ta maa ndo, ¿yoo ra cui catyi maa ndo? Ta i catyi ra Pedro: Yoho cuu ra Cristo, ra i tasi ra Ndyoo vatyí cua zacacun sii ndi.

³⁰Ta i catyi ra Jesús sihin ra vatyí ma nacatyí ra sihin ñiyivi.

Zacoto ra Jesús cuhva cua cuu ra

³¹Ta i quisaha zacuaha ra Jesús sii ra i casi ra vatyí cua ndyehe xaan ra i quisi ndya gloria tundoho. Ta ra mandoñi, ta ra zutu nahnu, ta ra maestro cuenda ley cua cuxaan xaan ra sihin ra. Ta cua cahñi ra sii ra. Ta sa cu uñi quivi, cua nandoto tucu ra.

³²Ta tandihi cuhva cuan casi xaan i nacatyí ra Jesús sihin ra. Tacuan ta i tava ra Pedro sii ra ndya zava, ta ñihi xaan i cahan ra Pedro sihin ra Jesús, ta catyi ra: Ña vaha cua tahan si suun cuhva sa cohon ña.

³³Ta i nandyehé ra Jesús nu yucu inga ra i casi ra. Ta xaan xaan i cahan ra sihin ra Pedro, ta catyi ra: Ma cahan con tacuan vatyí cohon tañi cahan cuihna. Ña sica iñun cuhva sica iñi ra Ndyoo. Sica iñun cuhva sica iñi ñiyivi.

³⁴Tacuan ta i cana ra Jesús sii ra i casi ra ta sii inga ñiyivi. Ta i catyi ra: Tatu iyo ra cuñi ra cundyico ra sii, nazama ra cuhva iyo ra. Ta ma zacahnu xaan ra sii ra. Ta nandyehé ra tundoho sa cuenda mi. Ta nazavaha ra cuhva zavehi.

³⁵Tatu ña cuñi ñiyivi sa cuu ñu sa cuenda Tuhun Ndyoo, cua cuu ñu, ta cua cuhun ñu andyaya. Ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo, cua cundito ñu sihin ra Ndyoo.

³⁶¿Ñaa sa ñihi ñiyivi sa zahacanaa ñu tandihi sa iyo ñuu ñiyivi ta quivi cua cuu ñu ndaha cua naa ñi ñu?

³⁷¿Ta yozo caa cuu tyiyahvi ñiyivi ta ñihi tahvi añima ñu?

³⁸Tatu iyo ra cahan nuu sa cuenda mi a sa cuenda Tuhun Ndyoo nuu ñiyivi iyo cuatyí ya, tacuan tucu cua cucahan nuí sii ra. Vatyí yuhvi, ra i quisi ndya gloria cui, ta cua quisi tuqui sihin ángel. Ta cua ndyehe ñiyivi vatyí cahnu xaan cuu Zutí.

9 Ndisa cuii sa quehin sihin ndo vatyí iyo ñu yucu ihya ma

cuu ñu ndya cua ndyehe ñu cuhva cundyaca ñaha ra Ndyoo vatyi iyo xaan cuhva sii ra Ndyoo.

Cuhva i zama ra Ndyoo cuhva caa ra Jesús minoo saha

²Sa yaha iñu quivi ta cuahan ra Jesús sihin ra Pedro, ta ra Jacobo ta ra Juan ndya minoo yucu zucu xaan. Ta yucuan i zama cuhva caa ra Jesús nu yucu ra sihin ra.

³Zahma ra xiño xaan i nduu si ta cui si xaan si tañi nieve. Yoñi numinoo ñiyivi cuu zanducuisi zahma tañi i nducuisi zahma ra Jesús.

⁴Ta i ndyehe ra i casi ra Jesús sii ra Elías ta ra Moisés. Ra zacuaha Tuhun Ndyoo ta sa naha cuu nduu tahan ra cuan. I quisi ra ndya gloria. Ta i natuhun ra sihin ra Jesús yucuan.

⁵Ta i catyi ra Pedro sihin ra Jesús: Maestro, vaha xaan yucu yo ihya. Nazavaha ndi uñi tahan vehe tyiyahva; minoo cuenda moo, ta minoo cuenda ra Moisés, ta inga si cuenda ra Elías.

⁶Yuhu xaan tandihi uñi tahan ra i casi ra Jesús. Ta yucuan cuenda i cahan ra Pedro tacuan vatyi ñá sito ra ñaa sa cahan ra.

⁷Ta ziqui i quisi minoo vico. Ta ndaha tyazi si sii tandihi ra. Ta i cahan minoo sa cahan sisi vico cuan. Ta catyi si: Ra ihya cuu zehi. Cuñi xein sii ra. Tyaa ndo yahvi sa cahan ra.

⁸Ta zuun ñi caa cuhva cuan i nandyeha ra i casi ra Jesús siconduu nu yucu ra. Ta ñá ndyehe ca ra sii ra Moisés ta nu ra Elías. Maa tuhun ñi ca ra Jesús nandyaa sihin ra.

⁹Ta cuhva sa cua noo ra yucu cuan i catyi ra Jesús sihin ra vatyi ma nacatyi ra nu sihin minoo ñiyivi sa ndyehe ra ndya cua saa quivi cua nandoto tucu ra i quisi ndya gloria sisi sa i sihi ra.

¹⁰Ta i sicumi xehe ra tuhun cuan, zoco i nducu tuhun tahan xaan ra: ¿Yozo caa cuu nandoto ñiyivi tatu sa i sihi ñu?

¹¹Ta i ndaca tuhun ra sii ra Jesús ta catyi ra: ¿Ñacu catyi ra maestro cuenda ley vatyi xihna ca ra Elías cua quisi ta ziqui ra Cristo?

¹²Ta i catyi ra Jesús: Ndisa cuii, xihna ca ra Elías i quisi, ta i zanduvaha ra tandihi tyiño vatyi cua quisi ra Cristo. Ta ¿ñaacatyi Tuhun Ndyoo sa cuenda ra i quisi ndya gloria? Catyi si vatyi cua ndyehe xaan ra tundoho ta ma tyaa ñiyivi yahvi sii ra.

¹³Yuhvi catyi sihin ndo vatyi ra Elías sa i quisi ra, ta i zavaha ñu tandihi sa cuñi maa ñu sihin ra. Tañi catyi Tuhun Ndyoo, ta tacuan i cuu si.

I zanduvaha ra Jesús sii minoo ra luhlu sa ñoho vatyi cuihna

¹⁴Ta cuee ca i ndisi tucu ra Jesús nu yucu zuhva ca ra i casi ra. Nandyaa ra cuan zava mahñu. Ta yucu cuaha xaan ñiyivi siconduu cuii ñu sii ra. Ta natuhun tahan ra maestro cuenda ley sihin ra.

¹⁵Ta sa i nandyeha ñiyivi sii ra Jesús, iyo xaan i cuñi ñu. Ta i sino xaan ñu ta i zatahan ñu sii ra.

¹⁶Tacuan ta i ndaca tuhun ra Jesús: ¿Ñaa tuhun natuhun xaan ndo?

¹⁷Ta i nacahan minoo ra nandyaa yucuan. Ta i catyi ra: Maestro, vasi

ndyaque minoo zehi. Ñoho tatyí cuihna sii ra. Ta ña saha si cahan ra.

¹⁸Ta ndya vaha cuii ñi cuhva nduxaan si sii ra. Ta zanduva si sii ra nu ñuhu. Ta saa tiñi yuhu ra. Ta sasi quihñi noho ra. Ta ndaha ndurutu ra. Ta yucuan cuenda cuehe xaan ra. Ta sa catyí vatyí tava ra i casun sii si. Zoco ñá cuu sii ra.

¹⁹Ta i catyí ra Jesús sihin tandihi ñiyívi: Ndoho cuu ñiyívi ña sino iñi. ¿Yozo tahan ca quívi cua ndoi sihin ndo ta ziquí cua sino iñi ndo? Sa naha xaan i cundyee iñi sihin ndo. Ta ndyaca ndo sii ra luhlu ña.

²⁰I sindyaca ra sii ra, ta i ndyehe tatyí cuihna cuan sii ra Jesús. Ta i nduxaan si sii ra luhlu cuan. Ta i nduva ra nu ñuhu. Sicutuu ra. Zañihi ra. Ta saa tiñi yuhu ra.

²¹I ndaca tuhun ra Jesús sii zutu ra luhlu cuan: ¿Sa yozo tahan cuiya sa tahan ra tacuan? Ta i catyí zutu ra: Ndyá ta luhlu ra.

²²Ta cuaha xaan saha cañi ñuhu si sii ra nu ñuhu a si ndutyá vatyí cuñi si cahñi si sii ra. Tatu cuu zanduvohon sii ra cundahvi iñun sii ndi, ta tyindyeun sii ndi.

²³Ta i catyí ra Jesús sihin ra: Cuu zanduvehi sii ra tatu cuu sino iñun vatyí cuu sii vatyí zavaha ra Ndyoo ñaa sa sica ñiyívi sino iñi sii ra.

²⁴Ta i cana saa zutu ra luhlu cuan ta catyí ra: ¡Sino iñi, ta tyindyeun sii, cuhva sino ca iñi!

²⁵I ndyehe ra Jesús vatyí cuaha xaan ñiyívi cua titahan, ta xaan xaan i cahan ra Jesús sihin tatyí cuihna cuan, ta catyí ra: Yoho cuihna zañehe sii ñiyívi, cuihna zazoho sii ñiyívi, yuhvi catyí vatyí

quiton. Zañon sii ra luhlu ya. Ta ma ndihvi con sii ra.

²⁶I sacu saa tatyí cuihna cuan, ta i zacuñaá si sii ra luhlu cuan, ta i quita si. Tañi ra sihi nduu ra. Ta i catyí cuaha xaan ñiyívi vatyí sa sihi ra.

²⁷Zoco i tiñn ra Jesús ndaha ra, ta i cañihi ra sii ra, ta i nduvita ra.

²⁸Ta ziquí i quihvi ra Jesús minoo vehe, ta i ndaca tuhun xehe ra i casi ra sii ra: ¿Ñacu ñá cuu tava nduhvi tatyí cuihna cuan?

²⁹Ta i catyí ra Jesús sihin ra: Cuu zacuu ndo tatu coo ndyitya ndo ta cahan ndo sihin ra Ndyoo.

I zacoto tucu ra Jesús inga saha cuhva cua cuu ra

³⁰Ta i quita ra yucuan, ta i yaha ra nu cu si Galilea. Ta ñá cuñi ra Jesús sa coto numinoo ñiyívi nu cuahan ra.

³¹I zacuaha ra sii ra i casi ra, ta catyí ra sihin ra: Cua xico minoo ra sii ii, ra i quisi ndya gloria. Ta cua tiñn ñiyívi sii. Ta cua cahñi ñu sii. Ta sa cu uñi quívi cua nandoto tuqui.

³²Zoco ñá nacoto ra sa cahan ra Jesús, ta ñá ndaca tuhun ra vatyí cahan nuu ra.

¿Yoo ra cuu ra ñiñi ca?

³³Tacuan ta ziquí i saa ra Jesús ñuu Capernaum. Ta sa ñoho ra minoo vehe, ta i ndaca tuhun ra Jesús sii ra i casi ra ta catyí ra: ¿Ñaa tuhun natuhun xaan ndo ityi i quisi yo?

³⁴Zoco taxi cuii ñi i nduu ra. Ta i cucahan nuu ra vatyí i natuhun tahan ra ityi i quisi ra yoo ra cuu ra ñiñi ca sii ra.

³⁵Ta i sicundyaa ra Jesús, ta i cana ra sii tandihi sa usi uu tahan ra i casi ra, ta i catyi ra: Tatu iyo minoo ra cuñi ra cuu ra ra ñiñi ca, vaha ca ma zacahnu ra sii ra. Natyindyee ra sii inga ñiyivi.

³⁶Ta ziqui i quihin ra Jesús sii minoo ra luhlu, ta i tyihi ra sii ra mahñu ñiyivi, ta i sicunumi ra sii ra, ta catyi ra:

³⁷Tatu zavaha ñiyivi sa vaha sihin minoo ra luhlu sa cuenda mi, tañi sa zavaha ñu sa vaha sihin mi cuu si. Ta tatu zavaha ñiyivi sa vaha sihin mi, zavaha ñu sa vaha sihin Zuti.

Tatu ña cahan ñiyivi ndya vaha ñi sii yo, tyindyee ñu sii yo cuhva cuan

³⁸Ta ziqui i catyi ra Juan: Maestro, i ndyehe ndi minoo ra tava ra taty cuihna sihin zivi moo, zoco yivi ra tahan ndi cuu ra. Ta i catyi maa ndi vatyi ma zavaha ra sa tacuan.

³⁹Ta i catyi ra Jesús: Ña vaha sa ñá saha ndo. Vaha tatu cua cutyiño ra zivi; ma cuu tucu cahan ra sa ndya vaha ñi ziqui.

⁴⁰Vatyi tatu ma cahan ñiyivi ndya vaha ñi ziqui yo, tyindyee ñu sii yo.

⁴¹Tatu cuhva ñiyivi ndutya cohon ndo vatyi i tasi ra Ndyoo sii, ta ra i casi cuu maa ndo, catyi vatyi cua tyiyahvi Ndyoo sii ñu.

⁴²Yoo ra cua zañaha sii minoo ra luhlu tañi ra luhlu ya cuhva zavaha ra sa ña vaha ta ma cundyico ca ra sii, vaha ca tatu sa i sihñi ñiyivi zucu ra cuan sihin minoo yuu yozo vee xaan ta zavita ñu sii ra sisi tyañuhu vatyi ca.

⁴³Tatu cuñun zavohon sa ña vaha sihin ndohon, cahndya ndaxun sii

si vatyi vaha ca cuhun gloria sihin minoo ñi ndohon ta ma cuhun sihin nduu tahan ndohon andyaya sisi ñuhu sa ma ndahva

⁴⁴nu ña sihi tindacu sasi sii ñiyivi ta nu cayu ñuhu tandihi cuii tyiemvu.

⁴⁵Tatu cuñun zavohon sa ña vaha sihin sohon, cahndya ndaxi tucun sii si cuan vatyi vaha ca cuhun gloria sihin ii siyo ñi sohon, ta ma cuhun sihin nduu tahan sohon andyaya sisi ñuhu sa ma ndahva

⁴⁶nu ña sihi tindacu sasi sii ñiyivi, ta nu cayu ñuhu tandihi cuii tyiemvu.

⁴⁷Ta tatu cuñun ndyehun sa ña vaha sihin siti nuun, tavon sii si vatyi vaha ca cua quihvun sihin minoo ñi siti nuun nu ndyaca ñaha ra Ndyoo, ta ma cuhun sihin nduu tahan siti nuun andyaya

⁴⁸nu ña sihi tindacu sasi sii ñiyivi, ta nu cayu ñuhu tandihi tyiemvu.

⁴⁹Zoco ñiyivi ndyico sii, cua nduvaha aña ñu tañi ñiñi vaha vatyi cua tahan ñu tundoho ihya ñuu ñiyivi sa cuenda mi. Ta tundoho cuan, tañi ñuhu cuu si vatyi sito xaan ñu tundoho. (Ta tacuan cua nduvaha aña ñu.)

⁵⁰Vaha xaan cuu ñiñi, zoco ¿yozo caa cutyiño ñiyivi sii si tatu ña uhva ca si? Tañi ñiñi vaha cua cuu maa ndo tatu vaha cua zavaha ndo sihin inga ñiyivi.

Cuhva i zacuaha ra Jesús vatyi ña vaha cua zandoo minoo ra ñazihí ra

10 I quita ra Jesús ñuu Capernaum, ta cuahan ra nu cu si Judea inga siyo yuu Jordán. Yucuan, cuaha xaan ñiyivi i titahan

nu ndyaa ra, ta inga saha i zacuaha ra sii ñu tañi cuhva sa tuhva ra.

²Ta ziqui i quisi ra fariseo nu ndyaa ra Jesús, ta i ndaca tuhun ra sii ra Jesús ta catyi ra: ¿Atu iyo ley sa zandoo minoo rayii sii ñazihí ra? Tacuan cahan ra vatyí cuñi ra fariseo tyaa ra cuatyí sata ra Jesús.

³Ta i ndaca tuhun ra Jesús sii ra: ¿Ñaa sa i catyi ra Moisés?

⁴Ta i catyi ra fariseo: Saha ra Moisés cuhva sa sino minoo tutu, ta ziqui cuu zandoo ra sii ña sihin ley.

⁵Ta i catyi ra Jesús sihin ra: I saha ra Moisés ley cuan sii ndo vatyí ñihi xaan iñi ndo.

⁶Zoco sa xihna ñi i zavaha ra Ndyoo tandihí sa iyo ñuu ñiyivi, ta i zavaha ra minoo rayii ta minoo ñaha.

⁷Ta yucuan cuenda cua zandoo rayii sii zutu ra ta sii zihí ra, ta cua cu-iin ra sihin ñazihí ra.

⁸Sa nduu tahan ñu cua nduu ñu tañi minoo ñi. Cuhva sa ndyehe ra Ndyoo sii ñu, minoo ñi ñiyivi cuu ñu.

⁹Cuu, ña vaha zandoo rayii sii ñazihí ra. Nu maa ña ta ma zandoo ña sii maa ra vatyí ra Ndyoo i zandu-iin ra sii ñu.

¹⁰Ta sisi vehe i ndaca tuhun ra i casi ra Jesús sii ra ñaa tuhun cuu si cuan.

¹¹Ta i catyi ra Jesús sihin ra: Ra zandoo sii ñazihí ra ta quihin ra inga ñaha, yucuan cuu ra iyo cuatyí vatyí ña ndoo zavaha ra sihin ñazihí ra.

¹²Tacuan tucu ñaha zandoo sii yii ña ta cuhun ña sihin inga rayii, iyo cuatyí ña vatyí ña ndoo zavaha ña.

**Cuhva i zoco ñaha ra
Jesús sii sa ndyihí**

¹³Tacuan ta ziqui i quisi ndyaca ñiyivi sii sa ndyihí nu ndyaa ra

Jesús vatyí cua tyizo ra ndaha ra sii si ta cahan ra sihin ra Ndyoo. Ta i catyi ra i casi ra Jesús sihin ñiyivi cuan vatyí ma quisi ñu.

¹⁴Ta i ndyehe ra Jesús, ta i cuxaan ra ta catyi ra: Ma cahan ndo. Naquisi ndyaca maa ñu sii sa ndyihí sii, vatyí tatu cuñi ñiyivi sa cua cundyaca ñaha ra Ndyoo sii ñu, cua sino iñi ñu sii, tañi sino iñi sa ndyihí ya.

¹⁵Ndisa cuii sa quehin vatyí ñiyivi ña sino iñi tañi sino iñi sa ndyihí ya, ña saha ñu sa cundyaca ñaha ra Ndyoo sii ñu.

¹⁶Ta i quihin ra sii sa ndyihí, ta i tyizo ra ndaha ra sii minoo minoo si. Ta i catyi ra: Nacuhva ra Ndyoo sa vaha sii ndo.

**Cuhva i cahan minoo ra
yoco, cuca sihin ra Jesús**

¹⁷Ta sa quita ra Jesús, ta i quisi minoo ra. Sino xaan ra, ta i sicuñiñi siti ra nuu ra Jesús. Ta i ndaca tuhun ra sii ra: Maestro, vaha xaan ra cuun. ¿Ñaa sa cua zavehi, ta ñihi tahvi añime gloria?

¹⁸Ta i catyi ra Jesús sihin ra: ¿Ñacu catyun vatyí vaha xaan ra cui? Minoo tuhun ñi ra vaha iyo, ra Ndyoo.

¹⁹Sa siton tandihí ley ra Ndyoo: Ma cuhun minoo ñaha tatu yivi ñazihun cuu. Ma cahñun ñiyivi. Ma cohon cuendu sata ñiyivi. Ma zandavi ñohon sii ñiyivi. Tyoon yahvi sii zutun ta sii zihun.

²⁰Ta ra cuan i nacahan ra: Tacuan iyo mi ndya ta luhli. Catyi ra.

²¹Ta i cuñi xaan ra Jesús sii ra ta catyi ra: Cumañi minoo ñi ca cuhva suun. Cuahan ta xicon tandihí sa

iyo suun, ta cuhvon xuhun cuan sii ñiyivi ndahvi. Ta ma cumañi si suun nu cua soon gloria. Ta ziqui quisi cundyicon sii.

²²Ta sa siñi ra cuan cuhva cuan ta i nducuihya xaan iñi ra ta cuahan ra vatyí cuca xaan ra (ta ñá cuñi ra sa zanaa ra xuhun ra).

²³Ta i nandyehé ra Jesús siconduu nu yucu ñiyivi ndyico sii ra ta catyi ra: Yii xaan ta cuu quihvi ñiyivi cuca nu ndyaca ñaha ra Ndyoo.

²⁴Ta iyo xaan i cuñi ñu sihin cuhva cahan ra Jesús. Ta i catyi tucu ra Jesús sihin ñu: Zehe luhli, yii xaan cua quihvi minoo ra iyo xaan ndaha tyiño nu ndyaca ñaha ra Ndyoo vatyí sica iñi ra vatyí cua tyindyee ndaha tyiño ra sii ra ta cua cuu quihvi ra.

²⁵Yii ca quihvi minoo ra cuca nu ndyaca ñaha ra Ndyoo ta ziqui ca minoo camello yaha ti xuu minoo yicui ticui.

²⁶Ta sa siñi ñu cuan cuhva cuan ta iyo xaan i cuñi ñu. Ta i natuhun tahan ñu. Ta i ndaca tuhun ñu sii ra Jesús: ¿Yoo ñiyivi cua cacu ta ma cahun ñu andyaya?

²⁷Ta i ndyehé ra Jesús sii ñu ta catyi ra: Ma cuu zavaha ñiyivi cuhva cuan, zoco Ndyoo cuu zavaha ra vatyí Ndyoo ñahñi sa yii nuu ra.

²⁸Ta ziqui i catyi ra Pedro: Tata, nduhvi sa zandoo ndi tandihí ndaha tyiño ndi, ta ndyico ndi suun.

²⁹Ta i catyi ra Jesús sihin ra: Ndisa cuii sa quehin sihin ndo vatyí ra zandoo vehe ra, a yañi ra, a cuhva ra, a zutu ra, a zihí ra, a ñazihí ra, a ñuhu ra sa cuenda mi ta sa cuenda Tuhun Ndyoo

³⁰cua ñihi ra cuaha xaan ca ihya ñuu ñiyivi tañi minoo ziendu ca vehe ra, ta yañi ra, ta cuhva ra, ta zihí ra, ta zehe ra, ta ñuhu ra vazú cua tahan ra tundoho. Zoco inga ñuu ñiyivi cua cundito ra tandihí cuii tyiemvu.

³¹Ta cuaha xaan ñiyivi ñiñi vityi, yivi ñiyivi ñiñi cua cuu ñu. Ta ñiyivi ña ñiñi, cua nduu ñu ñiyivi ñiñi xaan.

Nacatyí ra Jesús inga saha vatyí cua cahñi ñiyivi sii ra

³²Tacuan ta ziqui cuahan ra ityi ñuu Jerusalén. Ityi nuu iñi ra Jesús, ta ityi sata vasi ra i casi ra, ta iyo xaan cuñi ra. Ta ñiyivi ndihí sihin ra, yuhu xaan ñu. Tacuan ta i cana ra Jesús sii sa usi uu tahan ra ndya zava, ta i nacatyí ra sihin ra tandihí cuhva sa cua cuu sii ra.

³³Ta i catyi ra Jesús sihin ra: Ndyehé ndo vatyí sa cuahan yo ityi ñuu Jerusalén nu cua xico tuhun ñiyivi sii ra i quisi ndya gloria. Ta cua tiin ra zutu nahnu ta ra maestro cuenda ley sii ra. Ta cua catyi ra cuan vatyí cua cuu ra. Ta cua cuhva ra sii ra sii ñiyivi sa yivi ñiyivi hebreo cuu.

³⁴Ta cua vacu ndyaa ñu sii ra. Ta cua cañi xaan ñu sii ra. Ta cua tyicu zii ñu sii ra. Ta cua cahñi ñu sii ra. Zoco sa cu uñi quivi ta cua nandoto tucu ra sisi sa i sihi ra.

I sica ra Jacobo ta ra Juan minoo tumañi iñi sii ra Jesús

³⁵Ta ziqui i tuhva ra Jacobo ta ra Juan nu ndyaa ra Jesús. Zehe ra Zebedeo cuu sii nduu tahan ra. Ta i catyi ra: Maestro, cuñi ndi zavohon minoo tumañi iñi sa sica ndi suun.

³⁶Ta i ndaca tuhun ra Jesús sii ra ta catyi ra: ¿Ñaa sa cuñi ndo zavehi?

³⁷Ta i catyi ra: Cuhvon vatyi quivi cua cundyaca ñohon ta cua cundyaa maa ndi suhun. Minoo ndi siyo cuohon ta minoo ndi siyo zatyun.

³⁸Ta i catyi ra Jesús sihin ra: Ña sito ndo ñaa sa sica ndo. ¿Atu cundye ndoho ndyehe ndo tundoho tañi tundoho cua ndyehe mi?

³⁹Ta i catyi ra: Cundye iñi ndi. Ta i catyi ra Jesús sihin ra: Ndisa cuii cua ndyehi tundoho, ta cua ndyehe ndo tundoho sa cuenda mi.

⁴⁰Zoco sa cundyaa ndo siyo cuehi ta siyo zaty, ña tahan si sa yuhvi cuhva. Maa ra Ndyoo cua catyi yoo ra cua ñihi ndatu cuan.

⁴¹Ta sa siñi inga sa usi tahan ra i casi ra Jesús, ta i cuxaan ra sihin ra Jacobo ta ra Juan.

⁴²Ta i cana ra Jesús sii ra ta catyi ra: Sa sito maa ndo cuhva ndyaca ñaha ñiyivi ñuu ñiyivi. Iyo ra cu nuu, ta zacoto ra sii tandiñi ñiyivi vaty ndyaca ñaha ra sii ñu.

⁴³Zoco ña tacuan cuu si sa cuenda ndoho. Zama si cuhva. Tatu cuñi minoo ra cuu ra ra cahnu, natyindyee ra sii ra tahan ra.

⁴⁴Ta yoo ra cuñi sa cuu ra minoo ra cahnu ityi nuu ra Ndyoo, nanduu ra muzu sii tandiñi ndo.

⁴⁵Vaty cuhva ndya ra i quisi ndya gloria, ta ña vasi ra sa vaty tyindyee ñiyivi sii ra. Vasi ra sa tyindyee ra sii ñiyivi. Tacuan iyo ra. Ta yucuan cuenda cua cuu ra sa cuenda ñiyivi, ta ziqui cuu quihvi ñu gloria.

I zanduvaha ra Jesús sii minoo ra cuaa, ra nañi Bartimeo

⁴⁶I saa ra Jesús ñuu Jericó, ta cuhva sa cua quita tucu ra ñuu cuan sihin ra i casi ra ta i sindyico cuaha xaan ñiyivi sii ra. Ta minoo ra cuaa, ra nañi Bartimeo, zehe ra Timeo, ndyaa ra ityi vaty caya ra.

⁴⁷Ta sa sito ra vaty ra Jesús, ra ñuu Nazaret, cua yaha ityi cuan ta i cana saa ra ta catyi ra: ¡Jesús, yoho cuu ñiyivi sii ra rey David, cundahvi iñun sii!

⁴⁸Cuaha xaan ñiyivi catyi sihin ra nacutaxi ra, zoco ñihi ca nduu ra cana saa ra, ta catyi ra: ¡Yoho ñiyivi ra David, cundahvi iñun sii!

⁴⁹Tacuan ta i sicuñi ra Jesús ta i catyi ra: Cana ndo sii ra. Ta i cana ñu sii ra cuaa ta catyi ñu: Zanduzii iñun, ta nduviton vaty cana ra Jesús suun.

⁵⁰Ta ta sica cuii ñi i nduvita ra, ta i zandoo ihno ra zahma ndisi ra. Ta i tuhva ra sii ra Jesús.

⁵¹Ta i ndaca tuhun ra Jesús sii ra: ¿Ñaa sa cuñun zavehi suhun? Ta i catyi ra cuaa cuan: Maestro, cuñi zanduvohon nui.

⁵²I catyi ra Jesús sihin ra: Sa cuu cuhun. Sa nduvohon vaty i sino iñun. Ta zuun ñi caa cuhva cuan ndaha nandyehi ñi ra cuaa cuan. Ta cuahan ra sihin ra Jesús.

Cuhva i quihvi ra Jesús ñuu Jerusalén

11 Ta sa saa ra yaty ñi ñuu Jerusalén nu ndyaa ñuu Betfagé ta ñuu Betania vaty ñi yucu sa nañi Olivos, ta i tasi ra Jesús sii uu tahan ra i casi ra.

²Ta i catyi ra: Cuahan ndo ñuu ndyaa yatyí ñi ya sa ndoo ñi. Tatu saa ndo cua ndyehe ndo minoo burro, nuhñi ti, quití ta yoñi ca maa cozo. Ndasi ndo sii ti, ta quisi ndo sihin ti.

³Tatu iyo ñiyivi ndaca tuhun sii ndo ñaa sa ndyicuu ndo ta catyi ndo: “Cuñi ra cu nuu sii yo sii ti, ta tañi ca cua quisi nuhu ti.”

⁴Ta cuahan ra, ta i nañihi ra burro cuan. Nuhñi ti ityi, yatyí ñi yuvehe. Ta i ndasi ra sii ti.

⁵Ta i catyi ra yucu yucuan sihin ra: ¿Ñaa sa ndyicuu ndo? ¿Ñacu ndasi ndo burro ña?

⁶Tacuan ta i nacatyí ra cuhva sa catyi ra Jesús sihin ra. Ta i saha ñiyivi sa cuhun ra sihin burro cuan.

⁷I sindyaca ra sii ti nu ndyaa ra Jesús, ta i tyizo ra zahma ra sata ti, ta ziqui i sicozo ra Jesús sii ti.

⁸Ta cuaha xaan ñiyivi i saqui ñu zahma ñu ityi. Ta inga ca ñiyivi i sahndya ñu ndaha numa, ta i saqui ñu ityi.

⁹Ta ñu cuahan ityi nuu ra, ta ñu vasi ityi sata ra i cana saa ñu ta catyi ñu: ¡Aleluya! ¡Nazacahnu yo sii ra Ndyoo vatyí vaha xaan cuu ra vasi sa cuenda ra Ndyoo!

¹⁰¡Vaha xaan cua cundyaca ñaha maa ra cuhva i sindyaca ñaha ra rey David, ra i cuu ñiyivi sii yo! ¡Aleluya! ¡Nazacahnu yo sii ra iyo ityi ziqui! Catyi ñu.

¹¹Tacuan i quihvi ra Jesús ñuu Jerusalén. Ta i quihvi ra vehe ñuhu. Ta i ndyehe ra tandihi sa iyo yucuan, ta ziqui cuahan ra ñuu Betania sihin sa usi uu tahan ra i casi ra vatyí sa cua iñi xaan.

Ña zii maa i cuñi ra Jesús sihin minoo yutu ñahñi yucu vixi iñi nuu

¹²Ta inga quivi i quita ra ñuu Betania. Ta i sizoco xaan ra Jesús.

¹³Tacuan ta i ndyehe ra minoo yutu sa nañi higuera sihin ndaha tu. Ta sahan ra i sindyehe ra tatu iñi siti tu, zoco ñá ñihi maa ra ndaha ñi. Maa maa ndaha ñi tu iñi vatyí yivi tyiemvu iyo siti tu cuu si.

¹⁴Ta i catyi ra Jesús sihin yutu cuan: Ma coo ca situn vatyí ma casi ca ñiyivi sii si ndaha cuii ñi. Ta i siñi ra i casi ra sa cahan ra.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

¹⁵I saa tucu ra Jesús ñuu Jerusalén. Ta sa i quihvi ra vehe ñuhu ta i quisaha tava ndyizo ra sii ñiyivi xico ta ñiyivi zata. Ta i zanduva ihno ra mesa nu nazama ñiyivi xuhun sii inga ñiyivi, ta tacuan tucu tyayu nu xico ñiyivi paloma.

¹⁶Ñá saha ca ra sa cuizo ñiyivi ndaha tyiño sisi vehe ñuhu.

¹⁷Ta i quisaha zacuaha ra Jesús sii ñu ta catyi ra: Catyi Tuhun Ndyoo: “Vehe mi cunañi si vehe nu cahan ñiyivi sihin ra Ndyoo. Ta sa cuenda tandihi cuii ñiyivi ñuu ñiyivi cuu si.” Zoco maa ndo zacuu ndo vehe ra zuhu sii si.

¹⁸I siñi ra zutu nahnu ta ra maestro cuenda ley sa cahan ra. Ta i quisaha nducu ra cuhva cahñi ra sii ra. I yuhu xaan ra sii ra Jesús vatyí iyo xaan i cuñi tandihi ñiyivi sihin tandihi cuhva i zacuaha ra.

¹⁹Zoco sa tyahan cuan, i quita ra Jesús ñuu cuan ta cuahan ra.

Ndaha na-ityi yutu higuera

²⁰Ta inga quivi i yaha ra ñaha ñi, ta i ndyehe ra vaty i sa na-ityi yutu i cahan ra Jesús sihin ndya cuhva ndya yoho tu.

²¹Ta i nacohon iñi ra Pedro, ta catyi ra sihin ra Jesús: Ndyehe Maestro, sa i na-ityi yutu i cohon sihin.

²²Ta i catyi ra Jesús: Sino iñi ndo sii ra Ndyoo.

²³Quehin sa ndisa sihin ndo vaty i yoo ra cua catyi sihin yucu ya:

“Cuiñi siyon ihya, ta cua ndihvun sisi tyañuhu.” Tatu sino iñi ra tacuan, tacuan cua cuu si sa ndisa cuii.

²⁴Tyehen catyi vii sihin ndo: Sino iñi ndo sa cua ñihi ndo tandihi sa cua caca ndo sii ra Ndyoo. Ta cua cuhva ra tandihi si sii ndo.

²⁵Tatu sica tahvi ndo sii ra Ndyoo ta iyo cuaty i ndo sihin inga ñiyivi, zanaa ndo iñi ndo cuaty i zacuu ñu sihin ndo. Ta tacuan tucu ra Ndyoo Zutu yo, ra iyo andivi, cua zandasi ra cuaty i maa ndo.

²⁶Zoco tatu ma zanaa ndo iñi ndo cuaty i zavaha ñiyivi sihin ndo, tacuan tucu ra Ndyoo Zutu yo, ra iyo ityi ziqui, vaty i ma zandasi ra cuaty i maa ndo.

Iyo xaan cuhva sii ra Jesús

²⁷Inga saha i quisi tucu ra Jesús ñuu Jerusalén. Ta sa quihvi ra vehe ñuhu ta i quisi ra zutu nahnu sihin ra maestro cuenda ley sihin ra mandoñi nu ndyaa ra Jesús.

²⁸Ta i ndaca tuhun ra sii ra Jesús ta catyi ra: ¿Yoo ra i tasi suun vaty

cua tava ndyizon sii ñiyivi sisi vehe ñuhu ya? ¿Yoo sa saha tuhun suun vaty i cuu zavohon tandihi cuii cuhva ya?

²⁹Ta i catyi ra Jesús sihin ra: Cua ndaca tuhun minoo cuhva sii ndo. Tatu cuu nacaty i ndo, tacuan ta cua nacaty i sihin ndo yoo sa saha cuhva sii mi.

³⁰Ta i catyi ra: ¿Yoo ra i tasi sii ra Juan sa zacoo ndutya ra? ¿Atu i tasi ra Ndyoo sii ra a ñiyivi? Nacaty i ndo.

³¹I quisaha natuhun tahan xehe ra, ta i catyi ra sihin tahan ra: Tatu catyi yo vaty i Ndyoo i tasi sii ra, ta ziqui cua catyi ra Jesús: “¿Ñacu ñá sino iñi ndo?”

³²¿A catyi yo vaty i ñiyivi i tasi sii ra? Catyi ra. Zoco i yuhu ra sii ñiyivi vaty i sa sito ra vaty i tandihi cuii ñiyivi sino iñi ñu vaty i cahan ra Juan sa cuenda ra Ndyoo.

³³Ta yucuan cuenda i catyi ra sihin ra Jesús: Ña sito ndi. Ta i catyi ra Jesús: Tacuan tucu ii, ma nacaty i yoo ra i saha cuhva ya sii.

Taño ra ña cuñi zatyño vaha, tacuan iyo ra cua cahñi sii ra Jesús

12 Tacuan ta ziqui i quisaha cahan ra Jesús sihin minoo cuhva ta catyi ra: Sicoo minoo ra i tasi minoo sacu yoho uva. Ta i zavaha ra nu i tava ra ndutya uva ta minoo vehe tyiyahva vaty i cua zacuenda ra sacu ra, ta i saha noo ra sacu ra sii inga ityi ra zatyño. Ta cuahan ra inga ñuu.

²Ta i saa quivi i sicoo uva cuan. Ta i tasi sito ho si minoo muzu ra vaty i cua caca ra zuhva, cuhva sa tahan si sii patrón ra.

³Ta i tiin ra sii muzu ra cuan, ta i cañi xaan ra sii ra. Ta i natasi ra sii ra. Ta ñá saha ra nu zuhva uva cuan.

⁴Ta i tasi tucu sitoho si sii inga muzu ra. Ta i cañi xaan ra sii ra sihin yuu. I tahvi ra xiñi ra. Ta quiñi xaan i zavaha ra sihin ra.

⁵Ta ziqui i tasi tucu sitoho si sii inga tucu ra. Ta i sañi ra sii ra. Ta i tasi sitoho si cuaha ca muzu minoo minoo ra. Zuhva ra i cañi ra, ta zuhva ra i sañi ra.

⁶Ta iyo minoo tuhun ñi zehe sitoho si, ta cuñi xaan ra sii ra. Ta nu ndihí tuhun i tasi ra sii ra vatyi sica iñi ra: “Cua tyaa ra yahvi sii zehi.”

⁷Ta i catyi ra zatyño cuan sihin tahan ra: “Ihya cuu ra cua nañihi ndaha tyño quivi cua cuu zutu ra. Nacahñi yo sii ra vatyi ndoo maa yo sihin sacu ya.”

⁸I tiin ra sii ra. Ta i sañi ra. Ta i tava ra coño ñuhu ra sata sacu.

⁹Ta i ndaca tuhun ra Jesús ta catyi ra: ¿Yozo caa cua zavaha sitoho ñuhu cuan vityi? Cua cuhun ra, ta cua cahñi ra sii ra zatyño cuan. Ta cua cuhva noo ra ñuhu cuan sii inga ñiyivi.

¹⁰¿Atu tañaha ca cahvi ndo Tuhun Ndyoo? nu catyi si:

I zavita ihno ñiyivi zandaa vehe sii yuu sa cuñi si cuenda siqui vehe.

Ta vityi, yuu cuan cuu sa ñiñi ca ta ziqui tandihí sa cuenda vehe cuan vatyi tacuan catyi ra Ndyoo.

¹¹Ta vaha xaan cuñi yo sihin cuhva ya.

¹²Ta i nducu ra ndyizo tyño cuhva tiin ra sii ra Jesús vatyi i siñi ra

cuhva cahan ra Jesús, cuhva iyo maa ra. Zoco i yuhu ra sii ñiyivi. Ta yucuan cuenda i zandoo ra sii ra ta cuahan ra.

Tahan si tyaa yo yahvi sii ra cu tyiño ta sii ra Ndyoo

¹³I tasi ñiyivi sii zuhva ra fariseo ta ra ñoho cuenda ra Herodes vatyi cua zandavi ñaha ra sii ra Jesús, ta cua nducu ra cuhva sihin ñaa minoo cuhva cua cahan ra Jesús ta ziqui cua cuu tyaa ra cuatyí sata ra.

¹⁴I quisi ra cuan ta i catyi ra: Maestro, sito ndi vatyi cohon sa ndisa, ta inuu ndita ñi tyoon yahvi sa cahan inga ñiyivi a cuca ñu a ndahvi ñu. Ndisa cuii zañohon ityi ra Ndyoo. ¿Atu vaha cua tyiyahvi yo xuhun sa sica ra gobierno César, a ña vaha? ¿Atu cua tyiyahvi ndi a ma tyiyahvi ndi?

¹⁵Ta i sito ra Jesús vatyi ña vaha añaima ra cuan, ta i catyi ra sihin ra: ¿Ñacu saqui xaan ndo xayu sehi? Quisi ndyaca ndo minoo xuhun vatyi ndyehi.

¹⁶Ta i sindyaca ra sii si. Ta sa ndyehi ra Jesús, ta i catyi ra: ¿Yoo sii nuu ndyaa ya? ¿Ta yoo sii zivi ndyaa ya? Ta i catyi ra: Sii ra gobierno César.

¹⁷Tacuan ta i catyi ra Jesús sihin ra: Cuhva ndo sii ra gobierno César sa cuu sii ra. Ta cuhva ndo sii ra Ndyoo sa cuu sii ra Ndyoo. Ta iyo xaan i cuñi ra sihin cuhva i cahan ra Jesús.

Ndaca tuhun ra tatu cua nandoto tucu ñiyivi

¹⁸I sahan tucu minoo ityi ra saduceo nu ndyaa ra Jesús. I sica iñi tandihí ra saduceo vatyi ma nandoto tucu ñiyivi, ta yucuan

cuenda i ndaca tuhun ra sii ra Jesús ta catyi ra:

¹⁹Maestro, i tyaa ra Moisés minoo ley vatyí tatu sihi minoo rayíi ta ndoo ndahvi ñazihí ra, ta yoñi zehe ra, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁰Sicoo usa tahan rayíi sihin yañi ra. I tindaha ra nuu, ta i sihi ra, ta yoñi zehe ra i sicoo.

²¹Ta ziqui i tindaha ra cu uu sihin ñandahvi cuan. Sihi tucu ra cuan. Ta yoñi zehe ra i sicoo. Ta tacuan tucu ra cu uñi.

²²Ta tacuan i tindaha tandihí sa usa tahan ra sihin ñaha cuan. Ta i sihi ra. Ta numinoo ra yoñi zehe ra i sicoo. Ta nu ndihí tuhun, i sihi tucu maa ñaha cuan.

²³¿Yoo ra cua cuu yíi ña quivi cua nandoto tucu ñiyivi vatyí ñazihí tandihí sa usa tahan ra i cuu sii ña? Tacuan i catyi ra sihin ra Jesús.

²⁴Ta i catyi ra Jesús sihin ra: Ña sito ndo ñaa sa cahan ndo vatyí ña sito ndo Tuhun ra Ndyoo. Ta ña sito ndo yozo caa iyo cuhva sii ra.

²⁵Quivi cua nandoto ñiyivi i sihi, ma tindaha ca ñu. Ta ma cuhva ca ñu sii zehe ñu sa tindaha ñu. Tañi ángel sa iyo andivi tacuan cua nduu ñu.

²⁶Ta tatu cuñi ndo coto ndo tatu cua nandoto tucu ñiyivi, cuñi si sa nacohon iñi ndo sa i tyaa ra Moisés nu i saha ra cuenda yozo caa i cayu minoo taca iñu. Ta i cahan ra Ndyoo sihin ra sisi tu ta catyi ra: “Yuhvi cui Ndyoo sii ra Abraham ta sii ra Isaac, ta sii ra Jacob.”

²⁷Tacuan i cahan ra Ndyoo vazu sa sihi tandihí ra cuan ta sa naha

vatyi sito ra Ndyoo vatyí ndito ra cuan ta cua nandoto tucu ra. Yivi Ndyoo sii ra ndaha sihi cuii cuu Ndyoo Zutu yo. Ndyoo sii ñiyivi cua cundito tandihí tyiemvu cuu maa ra. Ta zama xaan yuhu ndo vatyí sica iñi ndo vatyí ma nandoto tucu ñiyivi.

Minoo ley ra Ndyoo sa ñiñi ca

²⁸I saa tucu minoo ra maestro cuenda ley, ta i siñi ra sa ndaca tuhun xaan ñiyivi sii ra Jesús, ta i sito ra vatyí vaha xaan i nacahan ra Jesús sihin ñu, ta yucuan cuenda i ndaca tuhun ra sii ra ta catyi ra: ¿Ndya cuu ley ra Ndyoo sa ñiñi ca?

²⁹Ta i catyi ra Jesús sihin ra: Ley sa ñiñi ca sii ra Ndyoo catyi si: “Ndoho ñiyivi hebreo, cuiñi ndo. Ndyoo, ra ndyaca ñaha sii ndo, minoo tuhun ñi ra iyo.

³⁰Ñihi xaan cuñi ndo sii ra Ndyoo Zutu ndo sihin añima ndo. ñn ñi sii ra caca iñi ndo; ñn ñi sihin ra cahan ndo; ñn ñi tyiño ra zatyíño ndo. Ta tacuan cua coto ra vatyí cuñi xaan ndo sii ra.”

³¹Ta catyi ley ra Ndyoo sa cu uu: “Cuñi xaan ndo sii tandihí inga ñiyivi tañi cuñi ndo sii maa ndo.” Ñahñi ca inga ca ley ñiñi ca ta ziqui nduu tahan ley ya.

³²Ta i catyi ra cu maestro cuenda ley cuan sihin ra Jesús: Vaha xaan cohon, Maestro. Ndisa cuun sa cohon vatyí minoo tuhun ñi ra Ndyoo iyo. Ta yoñi inga ca Ndyoo iyo.

³³Ta tatu cuñi ñiyivi sii ra sihin añima ñu, ta zatyíño ñu tyiño ra ta tandihí cuhva cuan ta tatu cuñi ñu sii inga ñiyivi tañi cuñi ñu sii

maa ñu, vaha xaan ca cuu si tacuan. Vaha ca tacuan ta ziqui cuhva zavaha ndi, cuhva sa sahmi ndi mvee ticatyi a ñaa sa saha ndi sa zacahnu ndi sii ra Ndyoo.

³⁴I sito ra Jesús vatyí vaha xaan i nacahan ra maestro cuenda ley, ta i catyi ra Jesús sihin ra: Zuhva ñi ca cumañi suun, ta cua cuu quihvun nu ndyaca ñaha ra Ndyoo. Catyi ra. Ta i yuhu xaan ñiyivi sa ndaca tuhun ca ñu sii ra Jesús.

¿Yoo sii zehe cuu sii ra Cristo?

³⁵I zacuaha ra Jesús sisi vehe ñuhu ta catyi ra: Catyi ra maestro cuenda ley vatyí ra Cristo cuu ñiyivi sii ra rey David, ta ndisa cuu si cuhva cahan ra cuan.

³⁶Zoco zuun ñi maa ra rey David i cahan ta sa naha i zacuu Tatyí Ii. Ta i tyaa ra cuhva cahan ra Ndyoo sihin ra Cristo. Tyehen i tyaa ra David:

Cahan ra Ndyoo sihin ra ndyaca ñaha sii mi, ta catyi ra:
 “Cundyoon siyo cuehi ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun.”

³⁷¿Ta yozo caa cuu cuu ra Cristo ñiyivi ra David tatu zuun ñi maa ra David catyi vatyí ndyaca ñaha ra Cristo sii ra? Tacuan i catyi ra Jesús, ta zii xaan i cuñi tandihi ñiyivi sa siñi ñu tuhun i cahan ra.

Tyaa ra Jesús cuatyí sata ra maestro cuenda ley

³⁸I zacuaha ra Jesús sii ñiyivi ta catyi ra: Zacuenda vaha ndo sii ndo. Ta ma zacuu ndo cuhva zacuu ra maestro cuenda ley. Tahan xaan iñi

ra quihí ra zahma nañi vatyí cua nacoto ñiyivi sii ra vatyí ra ñiñi cuu ra. Ta cuhun ra nuyahvi vatyí cuñi xaan ra sa tyaa ñiyivi yahvi sii ra.

³⁹Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu. Ta cuñi xaan ra sa cundyaa ra tyayu vaha nu sasi ñiyivi zacahnu vico.

⁴⁰Cuaha ca cua cutuñi ra maestro cuenda ley ta ziqui inga ñiyivi vatyí zuhu ra ndaha tyiño ñu ndahvi. Ta zandavi ñaha ra sii ñiyivi vatyí naha xaan sica tahvi ra sii Ndyoo vatyí cuñi ra sa cua ndyehe ñiyivi, ta cua caca iñi ñu vatyí sito xaan ra sii Ndyoo.

Cuhva i saha minoo ñandahvi xuhun

⁴¹Minoo saha ndyaa ra Jesús sisi vehe ñuhu hebreo yatyí ñi nu ndyaa satu nu quihvi xuhun. Ta i ndyehe ra vatyí cuaha xaan ñiyivi tyihi xuhun. Ta ra cuca, cuaha xaan i tyihi ra.

⁴²Tacuan ta i saa minoo ñaha ndahvi. Ta i tyihi ña uu tahan xuhun ndyihí sa cuu ohon zendavu sisi satu cuan vatyí cuñi xaan ña sii ra Ndyoo, ra iyo andivi.

⁴³Ta ziqui i cana ra Jesús sii ra i casi ra ta catyi ra: Ndisa cuii sa quehin. I tyihí ñandahvi cuan cuaha ca xuhun ta ziqui tandihí ca ra.

⁴⁴Saha maa ra sa ndoo ñi ca sii ra, zoco ñandahvi cuan, ndihí i saha ñi ca ña xuhun cuita casi ña.

Cuhva i catyi ra Jesús cuhva cua tani vehe ñuhu cahnu

13 Ta i quita ra Jesús vehe ñuhu cuan ta i catyi minoo

ra i casi ra sihin ra: iNdyehe, Maestro, tyaqui xaan i sino vehe ñuhu ya! iVaha xaan yuu i sino si!

²Ta i catyi ra Jesús sihin ra: Ndyehun vehe nahnu ya vaty i cua tani si, ta tandihi si cua quit i cuaty i.

Zeña sa cua naa ñuu ñiyivi

³Tacuan ta ziqui cuahan ra yucu sa nañi Olivos, yucu sa ndyehe ñiyivi sa ndyaa ñu yuvehe ñuhu. Ta sa ndyaa ra Jesús yucuan, i ndaca tuhun xehe ra Pedro ta ra Jacobo ta ra Juan ta ra Andrés sii ra ta catyi ra:

⁴Cuhvon cuenda sii ndi. ¿Ñaa quivi cua cuu sa catyun? ¿Ñaa zeña cua ndyehe ndi, ta ziqui cua coto ndi vaty i cua tahan si?

⁵Ta i catyi ra Jesús: Zacuenda ndo sii ndo coto zandavi ñaha ñiyivi sii ndo.

⁶Vaty i cuaha xaan ra cua quisi ta cua catyi ra: “Yuhvi cui Cristo.” Ta tacuan cua zandavi ñaha ra cuaha xaan ñiyivi.

⁷Ta cua cuiñi ndo tuhun vaty i cua coo cuaty i ta cahñi tahan xaan ñiyivi, zoco ma yuhu ndo. Xihna ca cua cuu tandihi cuhva cuan, cumañi ca sa saa quivi naa ñiyivi.

⁸Cua cahñi tahan minoo ñuu sihin inga ñuu, ta cua coo cuaty i ñuu nahnu sihin inga ñuu nahnu. Cua coo cuaha xaan sa taan, ta cua coo tama, ta cua yuhu xaan ñiyivi. Ta tacuan ñi cua quisaha ndyehe ñiyivi tundoho.

⁹Zacuenda ndo sii ndo vaty i cua tiin ñiyivi sii ndo, ta cua cuhun ndo nu yucu ra cu tyiño nahnu. Ta cua cañi ñiyivi sii ndo sisi vehe ñuhu. Ta sa cuenda mi cua tasi ra sii ndo

nu ndyaa ra gobernador ta ra rey. Ta cua ñihi ndo cuhva cahan ndo tuhun mi nuu ra.

¹⁰Ta ma naa ñuu ñiyivi ndya cua cuiñi ñiyivi nacahnu ñuu ñiyivi Tuhun Ndyoo.

¹¹Tatu cundyaca ñiyivi sii ndo nu ndyaa ra cu tyiño nahnu, ma caca iñi ndo sa cua cahan ndo. Ta ma caca xaan iñi ndo. Cahan ndo ñaa sa cahan ra Ndyoo sihin ndo cuhva cuan vaty i yivi maa ndo cua cahan. Taty i li ra Ndyoo cua cahan.

¹²Cua xico tuhun ñiyivi sii tahan ñu, ta ziqui cua cahñi ñiyivi sii ñu cuan. Ta cua xico tuhun zutu ñiyivi sii zehe ra. Cua cahñi tahan ñiyivi sihin zutu ñu ta sihin zih i ñu. Ta cua cuhva ñu sii ñu sii inga ñiyivi vaty i cahñi ñu sii ñu.

¹³Cua cuxaan tandihi ñiyivi sihin maa ndo sa cuenda mi, ta yoo ra ma cuiñi siyo sii ndya nu cua ndihi ñuu ñiyivi, cua cacu ra.

¹⁴Tatu ndyehe ndo minoo sa zativ i xaan ta quiñi xaan zacuu si, ta nandyaa si cuan nu ii, cuhva i catyi ra profeta Daniel, cutuñi iñi ndo ndoho ra cahvi ihya, tatu ndyehe ndo sii si cuan, nacono ñiyivi ñoho Judea, ta naquihvi xehe ñu ndya yucu.

¹⁵Tatu iyo ra yozo xiñi vehe ra quivi cuan, ma cuatu ra numaa iyo ndaha tyiño cuñi ra tava ra sisi vehe ra.

¹⁶Ta ra ñoho itu ra, ma cunuhu ra ndya vehe ra sa cua naquihin ra zahma ra.

¹⁷Ta ndahvi ñu zih i sa ñoho zehe quivi cuan a tatu iyo zehe ñu sa tyaxi quivi cuan vaty i cahnu xaan tundoho cua ndyehe ñu.

¹⁸Ta caca ndo sii ra Ndyoo vatyí ma tahan si cono ndo vico zavi a minoo quívi quitatu ñiyívi

¹⁹vatyí cua coo cuaha xaan tundoho quívi cuan, cuhva ta ndyehe ca ñiyívi ndya i zavaha ra Ndyoo ñuu ñiyívi. Ta ma coo inga ca tundoho sa tacuan ndaha cuii ñi.

²⁰Tatu ma zanduzuhva ra Ndyoo quívi tundoho cuan, yoñi ñiyívi cua cacu. Zoco cua zanduzuhva ca ra sii si sa cuenda ñiyívi i casi ra.

²¹Tatu catyí minoo ra sihin ndo: “Ihya ndyaa ra Cristo a yucuan ndyaa ra”, catyí ra; ma sino iñi ndo.

²²Vatyí cua nduvita cuaha xaan ra zandavi ñaha, ta cua catyí ra vatyí Cristo cuu ra, ta cua catyí ra vatyí cahan ra tuhun saha ra Ndyoo sii ra. Ta cua zavaha ra zeña nahnu ta sa ndyityi ndya cuhva ndya sii ñiyívi i casi ra Ndyoo cua zandavi ñaha ra tatu sa vatyí cuu cuhva cuan, zoco ma cuu.

²³Ndyehe ndo, sa nacatyí tandíhi sihin ndo cuee ca sa tahan si.

Cuhva cua quisi tucu ra i quisi ndya gloria

²⁴Ta i catyí tucu ra Jesús: Tatu sa yaha ndyehe ñiyívi tundoho cuan ta ziquí ña naha ca ta cua nduñaa ñicandyi, ta ma ndyehe ca yoo.

²⁵Cua nacoyo tiño andívi ndya nu ñuhu, ta ndya cuhva ndya cua canda andívi.

²⁶Tacuan ta ziquí cua ndyehe ñiyívi sii ra i quisi ndya gloria ityí andívi. Cua ndyehe ñu vatyí vasi ra nu vico ta sihin cuaha xaan cuhva. Ta tyaquí xaan caa ra.

²⁷Ta cua tasi ra sii ángel ra ndya tandíhi sa cumi tahan siquí ñuu

ñiyívi, ta cua zatahan ra sii tandíhi ñiyívi i casi ra Ndyoo ndya nacahnu ñuu ñiyívi.

²⁸Vityí coto ndo minoo cuhva iyo yutu higuera ta tandíhi inga yutu. Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyí sa cua nducahñi.

²⁹Ta tacuan tucu tatu sa ndyehe ndo vatyí sa cuu tandíhi tuhun sa quehin sihin ndo ihya, tacuan ta cua coto ndo vatyí sa cua cuyatyí sa cunaa ñuu ñiyívi.

³⁰Sa ndisa catyí sihin ndo vatyí cua cuu cuhva ya cuee ca sa cuu ñiyívi sa iyo vityí.

³¹Yutyí andívi ta ñuhu ñuu ñiyívi cunaa si, zoco tuhun quehin, ma naa si.

³²Zoco yoñi ñiyívi sito ñaa quívi a ñaa cuhva cua cuu si. Nu ángel andívi ta ña sito ra ta nu Zehe ra Ndyoo. Maa tuhun ñi ra Ndyoo Zuti sito.

³³Cuiñi vaha ndo sa quehin; cuyucu listo ndo, ta cahan ndo sihin ra Ndyoo vatyí ña sito ndo ñaa quívi cua cuu si.

³⁴Tañi minoo cuhva sii minoo ra cua cahun nu sica, cuee ca sa quita ra vehe ra saha ra cuenda sii muzu ra. Saha cuenda ra iin iin tyiño zacuu ra. Ta saha ra tyiño sii ra zacuenda yuvehe ra vatyí zacuenda vaha ra. Ta tañi ra cahun nu sica cui.

³⁵Yucuan cuenda cundyaa listo ndo vatyí ña sito ndo ñaa cuhva cua quisi, tañi ña sito muzu cuan ñaa cuhva cua quisi patrón ra, a nu cuu tyahan a maa ñuu a cuhva sacu ndívi a ñaha ñi.

³⁶Cuatu vaha ndo, coto yatyí xaan quisi ta ña ndatu listo ndo.

³⁷Quehin cuhva ya sihin maa ndo ta sihin tandihí cuii ñiyívi: Cuyucu listo ndo.

**Sihñi tahan ra tyiño yozo caa
cua tiin ra sii ra Jesús**

14 Cumañi uu ca quívi ta cua tahan si vico sihi mvee ticatyí, quívi sasi ñiyívi pan ña ndaa. Ta ra zutu nahnu sihin ra maestro cuenda ley nducu ra cuhva yozo caa cua tiin xehe ra sii ra Jesús. Ta cua cahñi ra sii ra.

²Zoco i catyi ra: Ña vaha vityi vatyi iyo vico. Ta coto cahñi tahan ñiyívi sihin yoo.

**I tyozo minoo ñaha azetye
vixi xiñi ra Jesús**

³Ñoho ra Jesús ñuu Betania vehe ra Simón, ra i cuhu cuehe tyahyu. Ta cuhva sa ndyaa ra mesa ta i tuhva minoo ñaha sii ra. Ñaa ña minoo yutyi ñoho azetye vixi. Nañi si nardo, ta yahvi xaan ndyaa si. I tahvi ña yutyi, ta i tyozo ña azetye vixi cuan xiñi ra Jesús.

⁴Ta ñiyívi yucu yucuan i cuxaan ñu sihin ña, ta i nducu tuhun tahan ñu. Ta catyi ñu: ¿Ñacu zatívi ña azetye vixi cuan?

⁵Vaha ca tatu sa i xico ña sii si, ta ñihi ña tañi uu mil peso ta tyindyee ña sii ñiyívi ndahvi. Ta xaan xaan i cahan ñu sihin ña.

⁶Ta i catyi ra Jesús: Zandihí ndo tuhun sihin ña. ¿Ñacu cuyuhu xaan ndo sihin ña? Vaha xaan i zavaha ña sihin.

⁷Tandihí tyiemvu cua coo ñiyívi ndahvi sihin ndo. Ta cua cuu

zavaha ndo sa vaha sihin ñu ñaa quívi cuñi ndo, zoco yuhvi, ma cundyei sihin ndo tandihí tyiemvu.

⁸I zavaha ñaha ya minoo sa vaha. Tañaha ca cua quihvi si ñuhu. Zoco i tyozo ña azetye vixi coño ñuhi cuee ca sa cui ta cuhin nuñaña.

⁹Ndisa cuii sa quehin sihin ndo vatyi vazu ndyacamaa nacatyí ñiyívi Tuhun Ndyoo sihin ñiyívi, zoco cua nacatyí ñu cuhva i zavaha ña ya sihin, ta cua nacohon iñi ñiyívi sii ña. Tacuan i catyi ra Jesús.

Cuhva i xico ra Judas sii ra Jesús

¹⁰Yaha cuan ta ziqui minoo sa usi uu tahan ra i casi ra Jesús, ra sa nañi Judas Iscariote, cuahan ra cua cahan ra sihin ra zutu nahnu vatyi cuñi ra xico ra sii ra Jesús.

¹¹Zii xaan i cuñi ra zutu nahnu sihin sa i catyi ra, ta i catyi ra vatyi cua tyiyahvi ra sii ra. Ta ziqui i quisaha nducu ra Judas cuhva cua cuhva cuenda ra sii ra Jesús sii ra.

I cuxiñi ra Jesús sihin ra i casi ra

¹²Quívi i quisaha vico sa sasi ñiyívi pan ña ndaa ta i sahñi ñu mvee ticatyí vatyi tyaa ñu yahvi sii ra Ndyoo. Ta quívi cuan i ndaca tuhun ra i casi ra Jesús sii ra ta catyi ra: ¿Ndyamaa cuñun vatyi cua zanduvaha ndi nu cua cuxiñun sa cuenda vico ya?

¹³Tacuan ta i tasi ra Jesús sii uu tahan ra ta catyi ra sihin ra: Cuahan ndo ndya ñuu cahnú. Ta yucuan cua nañihi ndo sii minoo ra; ndyizo ra minoo quívi ndutya. Cundyico ndo sii maa ra.

¹⁴Ta nu quihvi ra cahan ndo sihin sitohe vehe cuan ta catyi ndo:

“Catyi ra Maestro: ¿Ndyamaa iyo cuarto nu cua casi ra xita sa cuenda vico ya sihin ra i casi ra?”

¹⁵Ta cua zañaha ra minoo cuarto cahnu ndya ziqui. Sa yaha nduvii si. Yucuan zanduvaha ndo sa cuxiñi yo. Tacuan i catyi ra Jesús sihin ra.

¹⁶Ta cuahan ra cuan ta i saa ra ndya ñuu ta i nañihi ra cuarto cuan tañi cuhva i catyi ra Jesús. Ta i zanduvaha ra sa cuxiñi ra vico zuhun cuan.

¹⁷Ta sa sa cuaa cuan i saa ra Jesús yucuan sihin sa usi uu tahan ra i casi ra.

¹⁸Ta nii ñi sa sasi ra xita i catyi ra Jesús sihin ra: Sa ndisa catyi sihin ndo vatyí minoo ndoho sa sasi sihin ihya, cua xico ra sii. Catyi ra.

¹⁹Ta i nducuihya xaan iñi ra ndihi sihin ra, ta i quisaha ndaca tuhun minoo minoo ra sii ra Jesús: ¿Atu yuhvi cui?

²⁰Ta i nacahan ra Jesús ta catyi ra: Minoo sa usi uu tahan ndo sa sasi sihin iin ñi coho ya cuu ra.

²¹Cuahan ra i quisi ndya gloria cuhva catyi Tuhun Ndyoo, zoco indahvi ñi cuu ra xico sii! Vaha ca tatu sa ñá cacu ra vatyí cua ndyehe xaan ra tundoho.

²²Ta cuhva sa cuxiñi ra i quihin ra Jesús pan, ta i saha ra tyahvi ndyoo sii ra Ndyoo, ta ziqui i sahnu ra sii si ta saha ra sii si sii ra i casi ra, ta i catyi ra: Quihin ndo sii si ta casi ndo. Ihya cuu tañi coño ñuhi.

²³Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i saha ra sii si sii ra, ta i sihi tandihi ra zuhva zuhva si.

²⁴Ta i catyi ra Jesús sihin ra: Ihya cuu tañi niñi. Cua cati si sa cuenda

cuaaha xaan ñiyivi. Vityi zandaa ra Ndyoo minoo tyiño saa. Cua zandasi ra cuatyí ñiyivi sihin niñi.

²⁵Sa ndisa catyi sihin ndo vatyí ma coho que vino ndya cua cohi sii si minoo cuhva saa nu ndyaca ñaha ra Ndyoo.

Catyi ra Jesús vatyí cua catyi ra Pedro vatyí ña sito ra sii ra

²⁶I sata tandihi ra minoo yaa Ndyoo, ta ziqui cuahan ra ndya yucu Olivos.

²⁷Tacuan ta i catyi ra Jesús sihin ra: Sa cuaa vityi tandihi cuii ndo cua zandoo ndo sii. Ta ma cuñi ca ndo cundyico ndo sii, vatyí catyi Tuhun Ndyoo: “Cua cuu ra cu pastor, ta cua quiti cuatyí tandihi cuii mvee ticatyí zono ra.”

²⁸Zoco sa yaha nandote ta cua cuhin yatyí ca ta ziqui maa ndo ndya Galilea.

²⁹Ta ziqui i catyi ra Pedro sihin ra: Vazu zandoo tandihi ca ra ya suun, zoco yuhvi cua cundyique suun.

³⁰Ta i catyi ra Jesús sihin ra: Sa ndisa catyi suhun vatyí zuun ñi sa cuaa vityí, cuee ca sa vacu saa ndivi tyahnu uu yuhu ti, cua catyun uñi tahan saha vatyí ña siton sii.

³¹Ta ñihi xaan i cahan ra Pedro ta catyi ra: Vazu cui suhun, zoco ma catyi sa ña site suun. Ta tacuan tucu i cahan tandihi ca ra.

Cahan ra Jesús sihin ra Ndyoo minoo nu yucu yutu tyaquí nu nañi si Getsemaní

³²Tacuan ta ziqui i saa ra Jesús sihin ra i casi ra ndya minoo nu yucu yutu tyaquí nu nañi si Getsemaní, ta i catyi ra sihin ra:

Cundyaa ndo ihya vatyí cuehin cua quehin sihin ra Ndyoo ityi nuu ca.

³³Ta i quihin ra Jesús sii ra Pedro ta ra Jacobo ta ra Juan cuahan sihin ra, ta i quisaha nducuihya xaan ñni ra, ta ndahvi xaan cuñi ra.

³⁴Tacuan ta i catyi ra sihin ra: Cuihya xaan cuñi añime cuhva ndya sa cuñi cui. Ndo ndo ihya ñni ta cundyaa tyacu ndo.

³⁵Ta ziqui cuahan ra Jesús zuhva ca ityi nuu, ta i sicava ndyayu ra nu ñuhu, ta i sica tahvi ra sii ra Ndyoo sa ma ndyehe ra tundoho sa cua cuu sii ra tatu sa vatyí cuu cuhva cuan.

³⁶Ta cuhva sa sica tahvi ra sii ra Ndyoo i catyi ra: Ndyoo Zuti, cuu tandihí suun. Tyindyeyun sii sa ma ndyehi tundoho cuan, zoco ma cuhvon tañi cuñi mi. Nacuu si tañi cuñi moo.

³⁷Tacuan i catyi ra Jesús, ta ziqui i sahan ra nu yucu ra ndihí sihin ra, ta i ndyehe ra sii ra quixi ra, ta i catyi ra sihin ra Pedro: Simón, ¿a quixun? ¿Ñacu ñá cuu cundyaa tyacu ndo sihin numinoo ora?

³⁸Cutyacu ndo ta cahan ndo sihin ra Ndyoo coto nducu coto ihñi cuihna sii ndo. Cuñi ndo zavaha ndo sa vaha, zoco ña cuu sii ndo sa maa tuhun ñni ndo.

³⁹Tacuan ta i sahan tucu ra Jesús inga saha sa cua cahan ra sihin ra Ndyoo, ta zuun ñni tuhun cuan i cahan ra inga saha.

⁴⁰Ta ziqui i nasaa ra, ta i ndyehe ra sii ra ndihí sihin ra quixi tucu ra vatyí situu xaan ra, ta ñá ñihí ra cuhva ñaa sa cua cahan ra sihin ra Jesús.

⁴¹Ta i sahan ra Jesús ta i naquita tucu ra nu yucu ra sa cu uñi saha, ta i catyi ra: ¿Atu quixi ndo? ¿Atu quitatu ndo? Vaha ñni vityi. Sa saa cuhva cua nacuhva ñiyivi sii ra i quisi ndya gloria sii ra iyo cuatyí.

⁴²Ta nduvita ndo. Coho yo. Sa vasi ra xico sii.

Tiin ra sii ra Jesús

⁴³Nu cahan ca ra Jesús, ta i saa ra Judas; minoo sa usi uu tahan ra i casi ra Jesús cuu ra. Ta i quisi cuaha xaan ñiyivi sihin ra. Ñaa ra mityi ta yutu. I tasi ra zutu nahnú ta ra maestro cuenda ley ta ra mandoñi sii ra.

⁴⁴Ra sa xico sii ra Jesús, i saha ra minoo cuhva sii ra cuan, ta catyi ra: Ra cua cohi xiti cuan, yucuan cuu ra tiin ndo. Tiin vaha ndo sii ra, ta quihin ndo sii ra.

⁴⁵Ta i saa ra Judas, ta i tuhva ra sii ra Jesús ta catyi ra: Nacumi suun, Maestro. Ta i sihi ra xiti ra.

⁴⁶Ta ziqui i tiin ñiyivi cuan sii ra Jesús.

⁴⁷Ta minoo ra ndihí sihin ra Jesús, i tava ra mityi ra, ta i cañi ra sii ra cu muzu ra cu zutu ya cahnu, ta i sahnnya ra zoho ra.

⁴⁸Ta ziqui i catyi ra Jesús sihin ñiyivi cuan: ¿Atu vasi tiin ndo sii minoo ra zuhu vatyí ñaa ndo mityi ta ndaha tyiño xaan?

⁴⁹Tahan tahan quivi i sehin vehe ñuhu cahnu ta i zacuehi sii ñiyivi, zoco ñá tiin ndo sii yucuan. Zoco vityi zavaha ndo cuhva ña vaha ya vatyí tacuan ta cua naquita si cuhva catyi Tuhun Ndyoo sa cuende.

⁵⁰Ta sa yaha cahan ra Jesús cuhva cuan ta ziqui i zandoo tandihi ra i casi ra sii ra ta i sino ra.

I sino minoo ra yoco

⁵¹I sindyico minoo ra yoco sii ra Jesús, ta ndisi ra minoo ñi zahma cahnu. Ta i tiin zandaru sii ra.

⁵²Zoco i zandoo ra zahma ra ta cuahan vavihi ra ñii ndii ñi ra.

I sindyaca ra sii ra Jesús nu titahan ra cu tyiño hebreo

⁵³I sindyaca ra sii ra Jesús nu titahan ra cu zutu ya cahnu sihin ra zutu nahnu ta ra mandoñi ta ra maestro cuenda ley.

⁵⁴Ta i sindyico ra Pedro sica sica ñi ndya cuhva ndya saa ra nuquehe vehe ra cu zutu ya cahnu, ta yucuan i quihvi ra ta i sicundyaa ra sihin ra policia yunuhu vatyí visi ra.

⁵⁵Ra zutu nahnu sihin tandihi inga ra cu tyiño hebreo, i oanducu xaan ra ñiyivi cua cuhva sa ndaa sa cuenda ra Jesús vatyí cuñi ra cahñi ra sii ra. Zoco ñá ñihi ra cuhva sa yatyi

⁵⁶vazu cuaha ñiyivi saha sa ndaa ta i cahan ra cuendu ziqui ra Jesús, zoco ñá nacasi tahan sa cahan ra.

⁵⁷Ndya nu ndihi tuhun i ñihi ra sii uu tahan ra, ta i cahan ra cuendu sata ra Jesús ta catyi ra:

⁵⁸I siñi ndi catyi ra: “Cua cani vehe ñuhu cahnu ra Ndyoo sa i zavaha ñiyivi, ta sisi sa uñi quivi ñi ta cua zandei inga si sa yivi ñiyivi zavaha.”

⁵⁹Tacuan i catyi ra cuan, zoco zuun ñi ñá nacasi tahan cuhva i cahan ra sa cuenda ra Jesús.

⁶⁰Ta ziqui i nduvita ra cu zutu ya cahnu nu yucu ra cuan. Ta i ndaca

tuhun ra sii ra Jesús ta catyi ra: ¿Ñacu ña cohon ndaha ñi? ¿Ñaa sa cuu sa cahan ñiyivi ya zicun? Catyi ra.

⁶¹Zoco ñá nacahan maa ra Jesús. Ta i ndaca tuhun tucu ra cu zutu ya cahnu sii ra inga saha ta catyi ra: ¿Atu ra Cristo cuun? ¿Atu zehe ra Ndyoo ra ii xaan cuun?

⁶²Ta i catyi ra Jesús sihin ra: Zuun ra cui, ta cua ndyehe ndo sii ra i quisi ndya gloria cuhva cundyaa ra siyo cuaha ra Ndyoo ta cuhva cua quisi ra ndya andivi sisi vico.

⁶³Tacuan i catyi ra Jesús, ta ziqui ra cu zutu ya cahnu, i cuxaan ra, ta i ndaca ra zuun ñi zahma maa ra, ta i catyi ra: ¿Ñaa ca sa ndaa cuñi si vityi?

⁶⁴Sa siñi ndo sa cahan ra ndya vaha ñi sii ra Ndyoo. ¿Ñaa catyi ndo vityi? Ta i nacahan tandihi ra ta i catyi ra vatyí nacuu ra vatyí iyo cuatyí ra.

⁶⁵Ta ziqui i quisaha tyicu zii ra nuu ra, ta i sihiñi ra nuu ra, ta i cañi ra sii ra ta catyi ra sihin ra: ¡Nacoton yoo ra cañi suun! Ta i cati ra policia nuu ra.

I catyi ra Pedro vatyí ña sito ra sii ra Jesús

⁶⁶Ta ndyaa ra Pedro nuquehe, ta i tuhva minoo muzu ra cu zutu ya cahnu cuan sii ra.

⁶⁷Ta sa ndyehe ña vatyí ndyaa ra Pedro cuan yunuhu cuan nduvixi ra ta i ndyehe vaha ña sii ra ta catyi ña: Cutahan aan sica noon sihin ra Jesús, ra ñuu Nazaret.

⁶⁸Zoco i catyi ra Pedro: Ña site sii ra cuan, ta ña site ñaa tuhun cohon.

Catyi ra. Ta i siñi siyo ra zuhva, ta ziqui i sacu saa minoo ndivi tyahnu.

⁶⁹Ta i nandyehe ña cu muzu cuan sii ra inga saha ta catyi ña sihin ra yucu yucuan: Ra tahan ra Jesús cuu minoo ra ya.

⁷⁰Ta i catyi tucu ra Pedro vatyí ña ndisa. Ta cuee ca i catyi tucu ra yucu cuan inga saha sihin ra Pedro: Ndisa cuii vatyí minoo ra tahan ra cuu tucu oo vatyí cohon tañi cahan ñiyivi nu cu si Galilea. Catyi ra.

⁷¹Tacuan ta i cahan ra Pedro ndya vaha ñi ta i tyiñaha ra ndyoo ta catyi ra: Ña site sii ra cahan ndoho tuhun.

⁷²Ta zuun ñi caa cuhva cuan, i sacu saa ndivi tyahnu sa cu uu yuhu ti. Ta ziqui i nacohon iñi ra Pedro cuhva i catyi ra Jesús sihin ra: “Cuee ca sa vacu saa ndivi tyahnu sa cu uu yuhu ti, yoho cua catyun uñi saha vatyí ña siton sii.” Ta sa nacohon iñi ra Pedro cuhva cuan, i sacu xaan ra vatyí i nducuihya xaan iñi ra.

Nacuhva cuenda ra sii ra Jesús sii ra Pilato

15 Ta sa cundisi i zandoo ra tyiño, tandihi ra zutu nahnu ta ra mandoñi ta ra maestro cuenda ley ta tandihi inga ra cu tyiño hebreo. Ta i sihñi ra sii ra Jesús, ta i sindyaca ra sii ra nu ndyaa ra Pilato (ra cu gobernador).

²Ta i ndaca tuhun ra Pilato sii ra Jesús ta catyi ra: ¿Atu yoho cuu rey cuenda ñiyivi hebreo? Ta i catyi ra Jesús: Tacuan cu si tañi catyi moo.

³Tacuan ta i tyaa ra zutu nahnu cuatyí sata ra Jesús cuaha xaan cuhva.

⁴Ta ziqui i ndaca tuhun ra Pilato sii ra inga saha ta catyi ra: ¿Ñacu ña cohon ndaha cuii ñi? Ta cuaha xaan cuhva tyaa ra ya cuatyí saton.

⁵Zoco ñá cahan ra Jesús ndaha cuii ñi. Ta iyo xaan i cuñi ra Pilato.

Saha ra Pilato sa cuu ra Jesús

⁶Ta vico cuan tuhva ra Pilato tava sii minoo ra ñoho vehe caa, yoo ra cua catyi ñiyivi.

⁷Ta quivi cuan siñoho minoo ityi ra i sahñi tahan sihin ra cu tyiño. Minoo ra cuan nañi ra Barrabás, ta ñoho ra vatyí sahñi ra ñiyivi.

⁸Ta i quisi cuaha xaan ñiyivi ta i sica ñu sii ra Pilato vatyí tava ra sii minoo ra ñoho vehe caa cuhva tuhva ra zavaha tahan cuiya.

⁹Ta i ndaca tuhun ra Pilato sii ñu: ¿Atu cuñi ndo vatyí cua tave sii ra cu rey sii maa ndo ñiyivi hebreo?

¹⁰Tacuan i catyi ra Pilato vatyí sito ra vatyí i nacuhva cuenda ra zutu nahnu sii ra Jesús sii ra vatyí cucuihna xaan iñi ra sii ra.

¹¹Zoco ñihi xaan i tyihi ra zutu nahnu tyiño sihin ñiyivi vatyí nacaca ñu sii ra Barrabás.

¹²Ta ziqui i ndaca tuhun ra Pilato inga saha ta catyi ra: ¿Ta ñaa sa cuñi ndo cua zavehi sihin ra zacunañi ndo rey sii ñiyivi hebreo?

¹³Ta i cana saa ñu ta catyi ñu: ¡Nacuu ra nu cruz!

¹⁴Ta i catyi ra Pilato sihin ñu: ¿Ñaa cuenda? ¿Ñaa sa ña vaha i zavaha ra? Zoco i cana saa ñu ñihi ca ta catyi ñu: ¡Nacuu ra nu cruz!

¹⁵I cuñi ra Pilato coo vaha ra sihin ñiyivi, ta yucuan cuenda i tava ra sii ra Barrabás. Ta i nacuhva cuenda ra sii ra Jesús vatyí cua

ndoho ra sihin cuarta ta ziqui cua cuu ra nu cruz.

¹⁶Ta i quihin zandaru sii ra Jesús, ta i sindyaca ra sii ra sisi vehe tyiño cahnu, ta i cana ra sii tandihi inga zandaru.

¹⁷Ta ziqui i natyihi ra minoo zahma tixinda sii ra Jesús, ta i tyihi ra minoo corona iñu xiñi ra.

¹⁸Ta i quisaha sacu ndyaa ra sii ra. I cana saa ra ta catyi ra: iNacumi suun tata; yoho cuu rey sii ñiyivi hebreo!

¹⁹I cañi xaan zandaru tuyoo caxtyila xiñi ra Jesús, ta i tyicu zii ra sii ra. Ta i sicuñi siti ra nuu ra ta sacu ndyaa ra sii ra.

²⁰Ta sa yaha sacu ndyaa ra sii ra, i tava ra zahma tixinda cuan, ta i natyihi ra zahma maa ra sii ra. Ta ziqui i quihin ra sii ra vatyí cua cahñi ra sii ra nu cruz.

Nu i tyaa ra sii ra Jesús nu cruz

²¹Ta cuhva sa cuahan ra ityi i tahan ra sii minoo ra ñuu Cirene. I quita ra sicuhu ta vasi ra ndya ñuu Jerusalén. Simón nañi ra. Zutu ra Alejandro sihin ra Rufo sii ra. Ta i zacuizo zandaru cuan cruz ra Jesús sii ra.

²²Ta cuahan tandihi ra nu nañi si Gólgota. Tuhun Gólgota cuan cuñi si catyi si Nu Yucu Yiqui Xiñi Ndiyí.

²³Ta i saha ra vino zaca si sihin minoo sa nañi mirra vatyí coho ra Jesús, zoco ñá sihi ra sii si.

²⁴Ta sa yaha tyaa ra zandaru sii ra Jesús nu cruz, ta ziqui i siziqui ra vatyí cua ndyehe ra yoo ra cua zahacanaa minoo minoo zahma ra Jesús.

²⁵Caa iin sa ñaha ñi cuu cuhva i tyaa ra sii ra Jesús nu cruz.

²⁶Ta xiñi cruz cuan ndyaa letra i tyaa ra ta saha cuenda si ñaa sa cuu cuatyí ra. Tyehen catyi si: “Rey cuenda ñiyivi hebreo.”

²⁷I sañi ra cruz sa ndyaa minoo ra zuhu nuu siyo cuaha ra Jesús, ta inga ra siyo zatyí.

²⁸Cuhva cuan i quita si cuhva catyi Tuhun Ndyoo nu catyi si: “Cua catyi ñiyivi vatyí ra iyo cuatyí cuu ra.”

²⁹I yaha ñiyivi nu ndyaa ra Jesús, ta i sacu ndyaa ñu sii ra, ta zavico xiñi ñi ca ñu. Ta catyi ñu: Yoho ra catyi vatyí cua canun vehe ñuhu ta uñi quivi ñi ta cua zanduvohon sii si,

³⁰zacacun suun ta noon nu cruz.

³¹Tacuan tucu ra zutu nahnu sihin ra maestro cuenda ley, i sacu ndyaa ra sii ra. Ta i catyi ra sihin ra tahan ra: I zacacu ra sii inga ñiyivi, zoco ña cuu zacacu ra sii ra.

³²Tatu cua noo ra nu cruz, tacuan ta cua sino iñi yo vatyí ra Cristo cuu ra. Ta rey sii maa yo ñiyivi hebreo cuu ra. Catyi ra cuan. Ta tacuan tucu ndya cuhva ndya ra zuhu, ra sihi iin ñi sihin ra Jesús, ta i cahan tucu ra ndya vaha ñi sii ra Jesús.

Nu i sihi ra Jesús

³³Ta cuhva maa ora i nduñaa xaan nacahnu ñuu ñiyivi ndya cuhva ndya caa uñi sa sahiñi.

³⁴Ta cuhva caa uñi cuan i cana saa ra Jesús minoo sa ñihi xaan, ta i catyi ra: Elí, Elí, ¿lama sabactani? Cuñi si catyi si: Zutu mañi yu, Zutu mañi yu, ¿ña cuenda i zandoon sii?

³⁵Zuhva ñiyivi nandyaa yucuan, i siñi ñu ta catyi ñu: Tyizoho ndo; cana ra sii ra profeta Elías.

³⁶Ta zuun ñi caa cuhva cuan i cacono minoo ra, ta i quihin ra sii minoo sa ñahma, ta i zatyii ra sii sihih ndutya iya. I tyaa ra sii si nu minoo yutu, ta i zandaa ra sii si nu ndyaa ra Jesús vatyí cua coho ra ta catyí ra: Cuatu noo, nandyehé yo tatu cua quisi zanoo ra Elías sii ra.

³⁷I sacú saa ra Jesús inga saha minoo sa ñihi xaan, ta ziquí i sihi ra.

³⁸Zuun ñi caa cuhva cuan, i ndata zava zahma coco sa ndita sisi vehe ñuhu cahnu ndya ziquí ta ndya xuu.

³⁹Ta minoo ra cu nuu sii minoo ziendu zandaru i ñihi ndyaa ra ityí nuu ra Jesús. Ta sa ndyehé ra cuhva i sacú saa ra ta cuhva i sihi ra, i catyí ra: Ndisa cuii ra ihya vatyí zehe Ndyoo cu sii ra.

⁴⁰Ndya zava ñi i siyucu cuaha xaan ñu zihí. Ndyehé ñu sii ra Jesús. Minoo ña nandyaa sihin ñu nañi ña María Magdalena. Inga ña cuu ña María zihí ra Jacobo, ra luhlu ca, ta ra José. Ta inga ña nañi ña Salomé.

⁴¹Yucuan ñu cuu ñu i sindyico sii ra ta i tyindyee ñu sii ra quiví i sica noo ra nu cu si Galilea. Ta sihin inga ñu cuan i quisi ñu ndya ñuu Jerusalén sihin ra.

I tyihí ra sii ra Jesús sisi ñaña

⁴²Ta sahiñi viarni i cuu si, quiví zanduvaha ñiyiví sa cua casi ñu zavuru vatyí zavuru cuu quiví tuhva ñu quitatu.

⁴³Ta i quisi ra José ra ñuu Arimatea. Minoo ra mandoñi cuu ra ta catyí ñiyiví vatyí vaha xaan ñiyiví cuu ra. Ndatu ra quiví cua tasi ra Ndyoo minoo ra cua cundyaca ñaha ñuu ñiyiví. Ñá yuhu ra, ta i sahan ra nu ndyaa ra Pilato, ta i sica ra tumañi ñihi sii ra vatyí cuu quihin ra coño ñuhu ra Jesús.

⁴⁴Iyo xaan i cuñi ra Pilato vatyí yatyí xaan i sihi ra Jesús. Ta i cana ra sii ra ndyaca ñaha sii zandaru, ta i ndaca tuhun ra sii ra tatu sa tañi i sihi ra Jesús.

⁴⁵Ta cuhva sa sito ra Pilato vatyí catyí ra cuan vatyí sa sihi ndisa cuii ra Jesús, ta ziquí i saha ra Pilato sa quihin ra José coño ñuhu ra.

⁴⁶I zata ra José minoo zahma vaha. I zanoo ra coño ñuhu ra Jesús, ta i cava noo ra zahma cuan sii si, ta i saqui ra sii si sisi minoo ñaña sa zavaha ñiyiví sisi yuu. Ta i tyazi ra yuhu ñaña cuan sihin minoo yuu cahnu.

⁴⁷I ndyehé ña María Magdalena sihin ña María zihí ra José nu i tyihí ra sii ra Jesús.

Cuhva i nandoto ra Jesús

16 I yaha quiví quitatu ñiyiví hebreo. Ta ziquí i zata ña María Magdalena ta ña María zihí ra Jacobo ta ña Salomé ndutya vixi xaan sahan vatyí cua natyihí ñu sii coño ñuhu ra Jesús.

²Ta ñaha cuii ñi quiví tumingu i saa ñu ndya ñaña cuan cuhva sa caña ñicandyí ñi.

³Ta i natuhun tahan ñu ta catyí ñu: ¿Yoo ra cua tyaa siyo yuu sa ndazi yuñaña cuan?

⁴Tacuan ta i ndyehé ñu vatyí yuu cahnu sa sindazi yuñaña cuan sa siñi siyo si.

⁵Ta i quihvi ñu sisi ñaña cuan. Ta yucuan i ndyehé ñu minoo ángel. Tañi caa minoo ra yoco caa ra. Nandyee ra nu i cuu si siyo cuaha ra Jesús. Ñoho ra minoo zahma cañi. Cuisi xaan si. Ta iyo xaan i cuñi ñu.

⁶Zoco i catyí ángel cuan sihin ñu: Ma yuhu ndo. Nanducu ndo sii ra Jesús, ra ñuu Nazaret, ra i sihi nu

cruz. Zoco sa i nandoto ra. Yoñi ca ra ihya. Ñaha ndo, ta ndyehe ndo nu i caa coño ñuhu ra.

⁷Ta vityi cuahan ndo ta nacatyí ndo sihin ra i casi ra ta sihin ra Pedro. Tyehen catyí ndo: “Xihna ca ra Jesús cuahan ndya Galilea ta ziqui maa ndo. Yucuan cua ndyehe ndo sii ra, tañi sa nacatyí ra sihin ndo.”

⁸Tacuan ta yatyi cuii ñi i quita ñu zihí cuan ñaña cuan. I cacono ñu. Iyo xaan i cuñi ñu. Nihí tacuan ñi ca ñu. Ta ñá nacatyí maa ñu nu sihin minoo ñiyiví vatyi yuhu xaan ñu.

I quituu ra Jesús nuu ña María Magdalena

⁹Ta sa yaha nandoto ra Jesús, ta ñaa ca quiví tumingu xihna cuii ca i quituu ra nuu ña María Magdalena, ñaha sa i tava ra usa tahan tatyí cuihna.

¹⁰Ta cuahan ña, ta i nacatyí maa ña sihin amigo ra Jesús vatyi i nducuihya xaan iñi ra. Ta sacu xaan ra.

¹¹Ta sa siñi ra sa catyí ña vatyi ndito ra Jesús ta sa ndyehe ña sii ra, ñá sino iñi ra.

¹²Tacuan ta i quituu tucu ra Jesús inga saha nuu uu tahan amigo ra ityi cuahan ra sicuhu.

¹³Ta i sahan ra cuan, ta i nacatyí ra sihin inga ra, zoco ñá sino tucu iñi ra sa cahan ra.

Cuhva i saha ra Jesús tyiño sii ra i casi ra

¹⁴Tacuan ta i quituu tucu ra Jesús nuu sa usi iin tahan ca ra i casi ra zuun ñi cuhva sa yucu ra mesa sasi

ra xita. Ta i ndaca tuhun ra Jesús sii ra ñaa cuenda ña sino iñi ra sa nandoto ra vazu sa ndyehe ra tahan ra sii ra ta nacatyí ra sihin ra. Ta i catyí ra Jesús sihin ra vatyi ñihi xaan iñi ra ta ña ñii maa iñi ra ndaha ñi.

¹⁵Ta i catyí tucu ra Jesús sihin ra: Cuahan ndo nacahnu ñuu ñiyiví, ta zacoto ndo sii tandihí ñiyiví Tuhun Ndyoo.

¹⁶Tatu sino iñi ñu ta coo ndutya ñu cua cacu ñu. Ta ñiyiví ña sino iñi, ma ñihi tahvi añima ñu gloria.

¹⁷Cua coo zeña sihin tandihí ñiyiví sino iñi sii. Tyehen cua zacuu ñu ta cua coto inga ñiyiví vatyi zacuaha ñu sa ndisa. Cua cutyiño ñu zivi ta cua tava ñu tatyí cuihna. Cua cuu cahan ñu zahan sa ña tuhva ñu cahan.

¹⁸Tatu cua tiin minoo coo sii ñu a tatu cua coho ñu minoo sa xaan, ñahñi cua tahan ñu. Ta cua tyizo ñu ndaha ñu sii ñiyiví cuhu, ta cua nduvaha ñu.

I ndaa xica ra Jesús ityi andiví

¹⁹Ta sa ndihí cahan ra Jesús ta i ndaa xica ñi ra ityi andiví, ta i sicundyaa ra siyo cuaha ra Ndyoo Zutu yo.

²⁰Ta i quita ra i casi ra, ta i zacoto ra Tuhun Ndyoo nacahnu ñuu ñiyiví. Ta zuun ñi ra Jesús i tyindyee sii ra vatyi saha ra Jesús sa zavaha ra cuaha xaan sa ndyityi. Ta tacuan ta i sito ñiyiví vatyi sa ndisa cuu sa zacuaha ra. Ndihí si vityi.

Tuhun Vaha Sa I Tyaa Ra San Lucas

**Tasi ra Lucas minoo
tuhun sii ra Teófilo**

1 Sa cuaha xaan ñiyivi nducu ñu
cuhva tyaa ñu cuhva yozo caa
i sicoo sa minoo minoo cuhva sa
sino iñi yo

²tañi i nacatyí ra sica noo sihin
ra Jesús ndya ta xihna ñi, nu i
quisaha zatyíño ra, ta i tyindyee ra
cuan sihin tyiño ra. Ta i ndyehe ra
tandihi sa zavaha ra.

³Ta yuhvi tucu, i nducu cote
tandihi sa nacatyí ra cuan tatu
ndisa cuii. Ta yucuan cuenda cuñi
tyei sii si minoo minoo si vatyí
coton, yoho Teófilo.

⁴Cuñi sa cua coton vatyí sa ndisa
cuii cuu cuhva sa zacoto ñiyivi suun.

**Zacoto minoo ángel vatyí cua cacu ra
Juan, ra cua zacoo ndutyá sii ñiyivi**

⁵Quiví i sindyaca ñaha ra rey
Herodes nu cu si Judea, sicoo minoo
ra cu zutu cuenda vehe ñuhu hebreo,
ta i sinañi ra Zacarías. Siño ho ra
minoo ityi ra cu zutu sa nañi Abías.
Elisabet i sinañi ñazihi ra. Ta ra
Aarón i cuu ñiyivi sahnu sii ña ta sa
naha.

⁶Ndoo xaan i cuu nduu tahan ñu
ityi nuu ra Ndyoo vatyí i tyaa xaan

ñu yahvi ley ra, ta yoñi i cuu tyaa
cuatyí sata ñu.

⁷Zoco yoñi maa zehe ña Elisabet i
sicoo. Ta sahnu xaan nduu tahan ñu.

⁸Ta minoo quívi sa i tahan si sii
ra Zacarías sa cua zatyíño ra ityi
nuu ra Ndyoo

⁹tañi sicoo costumbre cuenda ra
cu zutu, ta i siziquí ra ta i tahan si
sii ra Zacarías sa quíhvi ra sisi vehe
ñuhu cahnu nu ii, cua cahmi ra
cutu ityi nuu ra Ndyoo.

¹⁰Ta ñii ñi sa sahmi ra cutu sisi
vehe ñuhu ta tandihi inga ñiyivi
i siyucu ñu ityi sata ta cahan ñu
sihin ra Ndyoo.

¹¹Ta i quituu minoo ángel ra
Ndyoo ityi nuu ra Zacarías. Nandyaa
ra ityi siyo cuaha nu sahmi ra cutu.

¹²Ta sa ndyehe ra Zacarías sii
ángel cuan, iyo xaan i cuñi ra, ta i
yuhu xaan ra.

¹³Zoco i catyi ángel cuan sihin
ra: Ma yuhun Zacarías vatyí i siñi
ra Ndyoo sa cohon, ta cua ñihi ña
Elisabet ñazihun minoo zehe, ta
cua zacunañi ndo sii ra Juan.

¹⁴Zii xaan cua cuñun, ta cuaha
xaan ñiyivi cua cuzii iñi vatyí cua
cacu ra.

¹⁵Vatyí cahnu xaan cua cuu ra
nuu Ndyoo. Ma coho ra vino ta nu

ndixi. Ta cua cutu cuii Tatyí li sii ra ndya ta ñoho ra sisi zihí ra cuee ca sa cacu ra.

¹⁶Ta sa cuenda maa ra, cuaha xaan ñiyívi hebreo cua sino iñi ñu sii ra Ndyoo, ra ndyaca ñaha sii yo.

¹⁷Cua zatyíño ra tyíño ra Ndyoo vatyí cua coo xaan Tatyí li ra Ndyoo sihin ra, ta cuaha xaan tundyee iñi ra Ndyoo cua coo sii ra. Ta cua cuu ra tañi ra Elías, ra cahan Tuhun Ndyoo ta sa naha. Sa cuenda maa ra ta cua coo sa taxi sii ñiyívi sahnú sihin zehe ñu. Ta sa cuenda maa ra ta ñiyívi quiñi iyo cua zama ñu cuhva iyo ñu, ta cua tyaa ñu yahvi. Cua zandulisto ra sii ñiyívi, ta cua tiin cuenda vaha ñu sii ra ndyaca ñaha sii yo. Tacuan i catyí ángel cuan.

¹⁸Ta i nducu tuhun ra Zacarías sii ángel cuan: ¿Yozo caa cuu cote tatu sa ndisa cuii cuu cuhva ya? Vatyí sa sahnú xein, ta sahnú xaan ñazihí.

¹⁹Ta i catyí ángel cuan sihin ra: Yuhvi nañi Gabriel. Tuhve sica tyíño ra Ndyoo. Ta tasi ra sii, sa quehin suhun, ta zacote tuhun ya suun.

²⁰Ta vityí cua nduñihun, ta ma cuu cohon ndya quívi cua tahan si cuhva sa catyí suhun vatyí ña sino iñun sa quehin. Ta cua cuu tandihí si tañi sa catyí suhun, catyí ángel cuan.

²¹Ta ñiyívi i sindatu sii ra Zacarías sata vehe ñuhu, iyo xaan i cuñi ñu vatyí naha xaan i ñoho ra sisi vehe ñuhu.

²²Ta ziquí i quita ra, ta ñá cuu cahan ra sihin ñu, ta i sito ñu vatyí i ndyehe ra minoo sa ndyehe ra sisi vehe ñuhu. Ta i quisaha cahan ra

sihin ñu sihin zeña ñi vatyí ña cuu cahan ra.

²³Tacuan i cuu si, ta i saa quívi sa ndihí ndyizo tyíño ra Zacarías vehe ñuhu cuan. Ta i sinuhu ra ndya vehe ra.

²⁴Ta sa yaha cuan ta ziquí i ñihi ña Elisabet minoo zehe. Ta ñá quita ña sata vehe ohon tahan yoo, ta i sica iñi ña:

²⁵“Vaha xaan cuu cuhva zavaha maa ra Ndyoo sihin vatyí vityí ma cahan cuehe ca ñiyívi sii.”

**I zacoto minoo ángel sii ña
María vatyí cua cacu ra Jesús**

²⁶Ta sa iñu yoo sa ñoho zehe ña Elisabet, ta ziquí i tasi ra Ndyoo sii ángel Gabriel ndya nu cu si Galilea ndya minoo ñuu sa nañi Nazaret

²⁷vatyí cua cahan ra sihin minoo ñaha yoco sa cuñi tindaha sihin minoo ra sa nañi José. Ra rey David i cuu ñiyívi sahnú sii ra ta sa naha. Ta ñaha cuan, María nañi ña.

²⁸I quituu ángel cuan nu ndyaa ña, ta catyí ra: Nacumi suun. Saha xaan ra Ndyoo sa vaha suun. Maa ra ndyaa suhun.

²⁹Ta cuhva sa siñi ña sa cahan ángel cuan, ta iyo xaan i cuñi ña. Ta i sica iñi ña ñaa cuenda cahan ra cuhva cuan sihin ña.

³⁰Ta i catyí tucu ángel cuan sihin ña: Ma yuhun María vatyí saha xaan ra Ndyoo sa vaha suun.

³¹Cua coo minoo zehun. Ta Jesús cua zacunañun sii ra.

³²Cahnu xaan cua cuu ra, ta cua cunañi ra Zehe ra Ndyoo ra cahnu ca. Ta cua zacuu ra Ndyoo minoo rey sii ra tañi i cuu ra David, ñiyívi sii ra ta sa naha.

³³Ta cua cundyaca ñaha ra sii ñiyivi hebreo tandihi cuii tyiemvu. Ta ma ndihi maa sa ndyaca ñaha ra. Catyi ángel cuan.

³⁴Tacuan ta i ndaca tuhun ña María sii ángel, ta catyi ña: ¿Yozo caa cuu si cuhva ya vatyi tañaha ca coo yii? Catyi ña.

³⁵Ta i catyi ángel cuan sihin ña: Taty i maa ra Ndyoo cua quisi zicun. Ta tundyee iñi sii Zutu mañi yo cua coo suhun. Yucuan cuenda lee sa cua cacu cuan cua cunañi ra Zehe ra Ndyoo.

³⁶Ta tacuan tucu ña Elisabet tyixun. Sahnu xaan ña, zoco sa ñihi tucu ña minoo zehe. Tuhva xaan ñiyivi catyi vatyi ma cuu coo zehe ña, zoco vityi sa iñu yoo sa ñoho zehe ña

³⁷vatyi ñahñi sa ma cuu zavaha maa ra Ndyoo. Catyi ángel sihin ña.

³⁸Ta i catyi ña María: Muzu maa ra Ndyoo cui. Nazacuu maa ra sihin cuhva catyun. Catyi ña. Tacuan ta cuahan ángel cuan.

Cuahan ña María cua ndyehe ña sii ña Elisabet

³⁹Ta quivi cuan numi ñi i quita ña María, ta yatyi xaan cuahan ña minoo ñuu nu maa yucu ñi cuu si, nu cu si Judea.

⁴⁰Ta i quihvi ña vehe ra Zacarías, ta i saha ña minoo nacumi sii ña Elisabet.

⁴¹Ta cuhva sa siñi ña Elisabet sa cahan ña María ta i natyooño lee sa ñoho sisi ña, ta i situ cuii Taty i sii ña.

⁴²Ta saa xaan i cahan ña, ta catyi ña: Cuaha ca sa vaha saha ra Ndyoo suun ta ziqui sii tandihi inga ñuzihi.

Ta saha xaan ra sa vaha sii zehun sa ñoho sisun.

⁴³¿Ta ñaa ña cuu vii? ta vasi zihí ra ndyaca ñaha sii; vasi cahan ña sihin.

⁴⁴Ta zuun ñi cuhva sa siñi tuhun cohon, ta i natyooño lee sisi sihin sa zii xaan cuñi ra.

⁴⁵Zii xaan cua cuñun, vatyi i sino iñun, ta cua cuu tuhun sa cahan ra Ndyoo suhun. Catyi ña Elisabet.

⁴⁶Ta i quisaha catyi ña María: Zacahni sii ra Ndyoo sihin tandihi cuii añime.

⁴⁷Ta zii xaan cuñi vatyi zacacu ra Ndyoo sii.

⁴⁸Cundahvi iñi ra Ndyoo sii mi, ñaha ndahvi. Ta vityi tandihi tyiemvu cua catyi ñiyivi sihin vatyi saha xaan ra Ndyoo sa vaha sii.

⁴⁹Vatyi ra Ndyoo ra cahnu ca cuu ra.

Ta cahnu xaan cuu sa zavaha ra sihin.

Ii xaan cuu zivi ra.

⁵⁰Ta cua cundahvi iñi ra sii tandihi ñiyivi yuhu sii ra.

⁵¹Cahnu xaan cuu tyiño zavaha ra. Cua tyaa siyo ra sii ñiyivi zacahnu sii ñu.

⁵²Cua zanduluhlu ra sii ñu. Ta cua zanducahnu ra sii ñiyivi ndyihí.

⁵³Ñiyivi sa cuñi xaan coto sii ra, saha xaan ra sa vaha sii ñu. Ta ñu sica iñi vatyi sa vaha ñu, ñahñi cua cuhva ra sii ñu.

⁵⁴Tyindyee ra sii ñiyivi hebreo, ñu cuu muzu ra.

Ña naa iñi ra sii ñu, ta cundahvi iñi ra sii ñu

⁵⁵tañi i catyi ra sihin ra Abraham siin yo ta sihin zehe ra.

Catyi ña María.

⁵⁶Ta i ndoo ña María sihin ña Elisabet uñi yoo, ta ziqui i sinuhu ña ndya vehe ña.

**Quivi i cacu ra Juan, ra
cua zacoo ndutya**

⁵⁷I saa quivi sa cua cacu zehe ña Elisabet, ta rayii i cuu zehe ña.

⁵⁸Ta ñiyivi sa yucu yatyi sihin ñu ta ñiyivi sii ña i sito ñu vatyi vaha xaan sa zavaha ra Ndyoo sihin ña. Ta zii xaan i cuñi ñu iin ñi sihin ña.

⁵⁹Ta sa cu uña quivi sa cacu lee cuan, ta i sahan ñu sa tahndya ñii xiñi xuu ra tañi catyi costumbre. Ta i zacunañi ñu sii ra Zacarías cuhva nañi zutu ra.

⁶⁰Zoco i catyi zihí ra: Ña tacuan cuu si. Juan cua cunañi ra. Catyi ña.

⁶¹Ta i catyi inga ñu sihin ña: ¿Ñaa cuenda cua zacunañun Juan sii ra? Yoñi ñiyivi sii ndo sa nañi tacuan. Catyi ñu.

⁶²Ta i quisaha nducu tuhun ñu sihin zeña sii zutu ra vatyi cuñi ñu coto ñu ñaa zivi cuñi ra sa cunañi ra.

⁶³Ta i sica ra minoo vitu vatyi cua tyaa ra. Ta i tyaa ra zivi ra: Juan cuu zivi ra. Tyaa ra. Ta tandihi ñiyivi yucu yucuan, iyo xaan i cuñi ñu.

⁶⁴Ta zuun ñi caa cuhva cuan i cuu nacahan ra Zacarías, ta i quisaha zacahnu ra sii ra Ndyoo.

⁶⁵Ta tandihi ñiyivi sa ndyaa yatyi yucuan i yuhu xaan ñu. Ta i sito tandihi ñiyivi yucu nu cu si Judea.

⁶⁶Ta tandihi ñiyivi sa siñi tuhun cuan, i sica iñi ñu ta catyi ñu sihin tahan ñu: ¿Ñaa ra cua cuu lee

cuan? Catyi ñu. Ta i tyindyee xaan ra Ndyoo sii ra.

Zacahnu ra Zacarías sii ra Ndyoo

⁶⁷Ta i situ cuii Tatyi Ii sii ra Zacarías zutu ra. Ta i quisaha cahan ra tuhun sa saha ra Ndyoo sii ra. Ta catyi ra:

⁶⁸Cahnu xaan cuu ra Ndyoo Zutu mañi yo, ra Ndyoo cuenda maa yo hebreo vatyi i quisi ra nu ndyaa yo, ta i zacacu ra sii yo.

⁶⁹Ta saha ra minoo ra cahnu sii yo; ñiyivi sii ra David muzu ra Ndyoo cua cuu sii ra, ta cua zacacu ra sii yo.

⁷⁰Tacuan i cahan ra Ndyoo sihin ra profeta ta sa naha.

⁷¹I catyi ra vatyi cua zacacu ra sii yo ndaha ra xaan iñi sii yo ta sii ra ña cuu ndyehe sii yo.

⁷²Ta tañi sa catyi ra Ndyoo sihin ñiyivi sahnu sii yo, cua cundahvi xaan iñi ra sii yo. Ta ma naa iñi ra tuhun sa cahan ra.

⁷³Ihya cuu tuhun i catyi ra Ndyoo sihin ra Abraham siin sahnu yo.

⁷⁴I catyi ra vatyi cua zacacu ra sii yo sii ra xaan iñi sii yo, ta ma cuyuhu yo zacahnu yo sii ra Ndyoo.

⁷⁵Vatyi maa ra zanduvaha xaan sii yo ityi nuu ra. Ta zandundoo xaan ra sii yo tandihi quivi cua coo yo ñuu ñiyivi ya.

Catyi ra Zacarías.

⁷⁶Ta i cahan ra Zacarías sa cuenda ra Ndyoo ta catyi ra sihin lee cuan:

Ta yoho zehi, cua catyi ñiyivi vatyi minoo profeta ra Ndyoo cahnu cuun. Vatyi cua cuhun ityi nuu ra ndyaca ñaha sii yo, ta cua catyun sihin ñiyivi vatyi cua quisi ra.

⁷⁷ Ta cua zacoton sii ñiyivi vatyi cua zandasi ra Ndyoo cuatyí ñu, ta cua zacacu ra sii ñu.

⁷⁸ Vatyi cuñi xaan ra Ndyoo sii yo. Ta cundahvi iñi ra sii yo, ta zaquisi ra sii minoo ra cua tyindyee sii yo. Tañi minoo ñúhu ñicandyi cua cuu ra.

⁷⁹ Vatyi sihin sa zañaha ra sii ñiyivi, natava ra sii ñu iyo nu ñaa sa cuenda cuatyí ñu. Yuhu ñu vatyi iyo ñu nu ñaa, ta cua cuu cuii ñu. Zoco cua zañaha ra sii ñu yozo caa cua quihvi ñu ityi vaha.

Catyi ra Zacarías.

⁸⁰ Ta ra luhlu cuan, i sahnu ra, ta i ndundyee ra sihin Tatyí Ii. Ta i sicoo ra minoo nu ityi xaan. Ta ziqui cuee ca zañaha ra sii ra sii ñiyivi hebreo, ta i quisaha cahan ra sihin ñu.

Cuhva i cacu ra Jesús

2 Ta quivi cuan sicoo minoo ra ndyaca ñaha sa nañi Augusto, ta i tasi ra tyiño vatyi cua coo minoo censo sii tandíhi ñiyivi ñuu ñiyivi.

² Ta quivi cuan ndyaca ñaha ra Cirenio nacahnu nu cu si Siria.

³ Ta tahan si cunuhu tandíhi ñiyivi ñuu ñu vatyi cua cuhva ñu zivi ñu yucuan.

⁴ Yucuan cuenda i quita ra José nu cu si Galilea ñuu Nazaret, ta cuahan ra nu cu si Judea ndya ñuu

Belén. Yucuan cuu ñuu nu i cacu ra rey David ta sa naha. Cuahan ra José yucuan vatyi ñiyivi sii ra David cuu sii ra.

⁵ Cuahan ra sa cua cuhva ra zivi ra sihin ña María vatyi sa cuñi tindaha ñu. Ta sa cuñi cacu zehe ña María.

⁶ Ta ñi ñi sa ndyaa ñu yucuan, ta i tahan si quivi cacu zehe ña.

⁷ Ta i zacacu ña sii zehe ña, ra nuu, ta i zucu ña zahma sii ra. Ta i saqui ña sii ra sisi minoo canua nu sisi quiti vatyi ñá ñihi ñu minoo vehe cundyaa ñu vatyi ña nuña ca vehe hotél.

I cahan ángel sihin ra zacuenda mvee

⁸ Vatyi ñuu cuan yucu zuhva ra sisi huhu vatyi zacuenda ra sii quiti zono ra sa sa cuaa.

⁹ Ta zana ñi iñi ra ta i quituu minoo ángel Ndyoo nu yucu ra. Ta sa ndisi sii Zutu mañi yo i zandundisi si nacahnu nu yucu ra, ta i yuhu xaan ra.

¹⁰ Ta i catyi ángel cuan sihin ra: Ma yuhu ndo vatyi vasi nacatyi minoo sa vaha xaan sihin ndo. Zii xaan cua cuñi tandíhi ñiyivi sa cuenda si.

¹¹ Vatyi vityi i cacu minoo ra ñuu ra David. Vasi ra sa cuenda maa ndo vatyi cua zacacu ra sii ñiyivi. Ra Cristo cuu ra, ta ra ndyaca ñaha sii yo.

¹² Ta ihya cuu cuhva cua nacoto ndo sii ra. Cua nañihi ndo sii lee cuan zucu ra zahma, ta catuu ra sisi minoo canua.

¹³ Ta zuun ñi caa cuhva cuan i saa cuaha xaan ca ángel sihin ángel

cuan. Ta zacahnu ángel cuan sii ra Ndyoo, ta catyi ra:

¹⁴Cahnu xaan cuu maa ra Ndyoo ra ndyaa gloria, ta nacoo sa vaha ta sa taxi sii ñiyivi ñuu ñiyivi.

Catyi ángel cuan.

¹⁵Ta ziqui cua nanuhu ángel cuan ndya gloria, ta i catyi ra zacuenda mvee sihin tahan ra: Coho yo Belén. Cua ndyehe yo ñaa sa cuu cuhva i zacoto ra Ndyoo sii yo.

¹⁶Ta numi xaan cuahan ra, ta saa ra ñuu Belén, ta i nañihi ra sii ña María sihin ra José. Ta catuu lee cuan sisi canua.

¹⁷Ta sa yaha i ndyehe ra sii lee cuan, ta i nacatyi ra cuhva i catyi ángel cuan sihin ra sa cuenda lee cuan.

¹⁸Ta tandihi ñiyivi i siñi tuhun cuan iyo xaan i cuñi ñu.

¹⁹Zoco ña María, cuenda nacañi ñi iñi ña sa cuenda tuhun cuan.

²⁰Ta cuanuhu ra zacuenda mvee, ta zacahnu xaan ra sii ra Ndyoo sa cuenda tandihi sa i ndyehe ra ta sa i siñi ra cuhva i catyi ángel cuan sihin ra.

Saha cuenda ñu sii ra Jesús sii ra Ndyoo sisi vehe ñuhu cahnu

²¹Ta sa ndu-uña quivi lee cuan, i sahndya ñu ñii xiñi xuu ra tañi catyi costumbre ñu, ta i zacunañi ñu sii ra Jesús tañi catyi ángel cueca sa ñihi ña María sii ra.

²²Ta sa yaha quivi cuhva catyi ley ra Moisés sa cuenda sa nduvaha ña ityi nuu Ndyoo, ta ziqui sindyaca ñu sii ra Jesús ndya ñuu Jerusalén vatyi cua cuhva cuenda ñu sii ra sii ra Ndyoo.

²³Tacuan i zavaha ñu vatyi catyi ley ra Ndyoo: “Rayii ra cacu sa xihna ñi zacuu minoo ñaha, cua cuhva cuenda ñu sii ra sii ra Ndyoo”, catyi ley.

²⁴Ta i sahan ñu, ta saha cuenda ñu uu tahan quiti tañi catyi ley maa ra Ndyoo nu catyi si tyehen: “Cuhva ndo uu tahan curuu a uu tahan paloma”, catyi ley.

²⁵Ta quivi cuan sicoo minoo ra ñuu Jerusalén sa nañi Simeón. Minoos ra ndoo xaan i cuu ra, ta i zacahnu ra sii ra Ndyoo sa ndisa cuii. Ta ndatu ra sa cua quisi ra cua zacacu sii ñiyivi hebreo. Ta ñoho Tatyí Ii ra Ndyoo sii ra.

²⁶Ta i zacoto Tatyí Ii sii ra vatyi ma cuu ra ndya cuhva ndya ndyehe ra sii ra cua zacacu sii ñiyivi. Cua ndyehe ra sii ra Cristo, ra cua tasi ra Ndyoo.

²⁷Ta i sahan ra Simeón vehe ñuhu cuhva catyi Tatyí Ii ra Ndyoo sihin ra. Ta i saa zutu ra ta zihí ra Jesús sihin maa ra vatyi cua zavaha ñu cuhva catyi ley.

²⁸Ta cuhva sa saa ñu nu ndyaa ra Simeón, ta i quihin ra sii ra Jesús i tyihi zucu ndaha ra. Ta i quisaha zacahnu ra sii ra Ndyoo ta catyi ra:

²⁹Zutu mañi yuu, nacui vityi sihin sa taxi añime.

Vatyi sa zavohon cuhva sa catyun sihin muzun.

³⁰Vatyi sa ndyehi sihin siti nui sii ra cua zacacu sii ñiyivi.

³¹Sa cua zañohon sii ra sii tandihi ñiyivi.

³²Ihya ra cua zanducahnu ca sii ñiyivi hebreo, ñiyivi i casun. Ta cua cuhva ra ya ñúhu sa cua zandundisi ityi sii inga ñiyivi sa yivi ñiyivi hebreo cuu.

Catyi ra Simeón.

³³Ta ra José sihin zihí ra Jesús, iyo xaan i cuñi ñu sihin cuhva cahan ra Simeón cuenda lee cuan.

³⁴Tacuan ta i cahan ra Simeón sihin ra Ndyoo sa cuenda ñu, ta ziqui i catyi ra sihin ña María, zihí ra Jesús: Ndyehun vatyi lee ya cua zanduva a cua zanduvita ra sii cuaha xaan ñiyivi hebreo. Cua cuu ra tañi minoo zeña, ta cuaha xaan ñiyivi cua cuxaan sii ra.

³⁵Ta uhvi xaan cua cuu añimon, María, tañi sa yaha zava minoo tyicaa añimon. Ta cuhva sa sica iñi ñiyivi sisi añima ñu, casi xaan cua quita si. Catyi ra Simeón.

³⁶Ta yucuan ndyaa tucu minoo ñaha sa cahan Tuhun Ndyoo. Nañi ña Ana. Ra Fanuel i cuu zutu ña, ñiyivi sii ra Aser. Sa sahnu xaan ña. Ndyá luhlu ña ta tindaha ña, zoco usa cuiya ñi ta i sihi yii ña.

³⁷Ta quivi cuan ñandahvi i cuu ña, ta cumi xico cumi cuiya ña. Ta ñá quita ña sisi vehe ñuhu vatyi ñiyaca ta ndiyaca i cahan ña sihin ra Ndyoo. Ta iyo saha ñá sasi ña ta cahan ña sihin ra Ndyoo.

³⁸Ta zuun ñi caa cuhva sa cahan ra Simón ta i saa tucu ña Ana nu ndyaa ra José ta ña María sihin lee. Ta i nacuhva ña tyahvi ndyoo sii ra Ndyoo cuenda ra. Ta i quisaha cahan ña cuenda ra Jesús sihin tandihí ñiyivi sa ndatu quivi cua cacu ñiyivi ñuu Jerusalén.

I sinanuhu ñu ndya ñuu Nazaret

³⁹Ta sa ndihí zavaha ñu tandihí sa catyi ley ra Ndyoo ta i sinanuhu ñu ndya nu cu si Galilea ndya ñuu Nazaret nu cuu ñuu ñu.

⁴⁰Ta i sahnu ra Jesús. Ta i ndundyee ca ra sihin sa siñi tuñi ra Ndyoo. Ta i tyindyee xaan ra Ndyoo sii ra.

Cuhva i cahan ra luhlu Jesús sihin ra sito xaan sisi vehe ñuhu cahnu

⁴¹Ta ra José sihin zihí ra Jesús tuhva ñu sahan ñuu Jerusalén tahan tahan cuiya sa cuenda vico zuhun.

⁴²Ta sa ndusi ra Jesús sa usi uu cuiya ra, ta i sahan ñu ñuu Jerusalén tañi tuhva tandihí ñiyivi sahan sa cuenda vico cuan.

⁴³Ta sa ndihí vico cuan ta cua nuhu ñu, zoco i ndoo ra Jesús ñuu Jerusalén, ta ñá sito ra José ta zihí ra.

⁴⁴I sica iñi ñu vatyi ndihí ra sihin ñu vatyi cuaha xaan ñiyivi cuahan sihin ñu. Ta sa minoo quivi sica ityi ñu, ta ziqui i nanducu ñu sii ra ticui amigo ñu ta ñiyivi sii ñu.

⁴⁵Zoco ñá nañihi ñu sii ra. Yucuan cuenda i sinanuhu sata ñu ndya ñuu Jerusalén cua nanducu ñu sii ra.

⁴⁶I yaha uñi quivi ta ziqui i nañihi ñu sii ra sisi vehe ñuhu cahnu. Ndyaa ra mahñu ra maestro. Tyizoho ra Jesús sa cahan ra ta nducu tuhun ra sii ra.

⁴⁷Ta tandihí ra i siñi sa cahan ra Jesús, iyo xaan i cuñi ra sihin sa siñi tuñi sii ra Jesús ta sihin tuhun cahan ra, ndihí ca.

⁴⁸Ta sa ndyehe zutu ra ta zihí ra sii ra, iyo xaan i cuñi ñu. Ta i catyi zihí ra sihin ra: Zehe luhli, çña cuenda i zavohon cuhva ya sihin ndi? Catyi ña. Zutun ta yuhvi i sica xaan iñi ndi sa cuendon, ta i nanducu xaan ndi suun. Catyi ña.

⁴⁹Ta i catyi ra Jesús sihin ñu:
¿Ñaa cuenda nanducu ndo sii? ¿Atu
ña sito ndo vatyi cuñi si sa zatyíne
tyiño Zuti? Catyi ra.

⁵⁰Zoco ñá cutuñi iñi ñu tuhun
cahan ra sihin ñu.

⁵¹Ta cua nuhu ra sihin ñu ndya
ñuu Nazaret, ta i tyaa ra yahvi
sii ñu. Ta i nacañi iñi ña María sa
cuenda cuhva i cahan ra.

⁵²Ta ra Jesús i sahnu ra, ta cahnu
ca nduu ra, ta i nducuaaha ca sa
siñi tuñi sii ra. Ta zii xaan i cuñi ra
Ndyoo sihin ra ta ñiyivi ndihi ca.

**Cuhva i cahan ra Juan, ra i
zacoo ndutya sii ñiyivi**

3 Ta sa sahan cuiya sa ndyaca ñaha
ra Tiberio nacañu, ta ra Poncio
Pilato i cuu ra gobernador nu cu si
Judea. Ta ndyaca ñaha ra Herodes nu
cu si Galilea. Ta yañi ra, ra Felipe cuu
ra ndyaca ñaha nu cu si Iturea sihin
Traconite. Ta ra Lisantias ndyaca ñaha
ra nu cu si Abilinia quivi cuan.

²Ta ra Anás sihin ra Caifas i cuu
ra cu nuu sii tandihi ra cu zutu. Ta
quivi cuan i cahan ra Ndyoo sihin
ra Juan zehe ra Zacarías minoo nu
ityi xaan nu sindyaa ra.

³Ta i sica noo ra Juan tandihi ñuu
sa ndyaa yatyi ñi nu ndyaa yutya
sa nañi Jordán. I nacatyí ra sihin
ñiyivi vatyi nazama ñu cuhva iyo
ñu ta coo ndutya ñu. Ta ziqui cua
zandasi ra Ndyoo cuatyí ñu.

⁴Tañi catyi si nuu libro i tyaa ra
Isaías, minoo ra profeta ta sa naha.
Nu catyi ra tyeheh:

Cua cuiñi ndo nduzu minoo ra
cana saa minoo nu ityi xaan.
Ta catyi ra cuan: “Tañi
zanduvaha ndo minoo ityi,

tacuan zanduvaha ndo ñima
ndo vatyi cua quisi ra ndyaca
ñaha sii yo. Tañi zandundoo
ndo ityi, tacuan nazama ndo
cuhva iyo ndo.

⁵Ta tañi zanandutu ndo tandihi
xahva, ta tañi zandundaa ndo
tandihi yucu ta zandundoo
ndo nu yacua ityi ta
zanduvaha ndo nu quiñi caa,
tacuan cuñi si sa zama ndo
cuhva iyo ndo.

⁶Tacuan ta tandihi ñiyivi cua
ndyehe sii Zehe ra Ndyoo, ra
cua zacacu sii yo.”

Tacuan i tyaa ra Isaías ta sa naha
vatyi cuhva cuan cua cahan ra Juan
sihin ñiyivi.

⁷Tacuan i cahan ra Juan sihin
ñiyivi. Ta cuhva sa siñi ñu sa cahan
ra ta i catyi ñu sihin ra vatyi cuñi
ñu sa zacoo ndutya ra sii ñu. Ta
ziqui i catyi ra sihin ñu: ¡Ñiyivi
quiñi xaan iyo cuu ndo tañi cool!
¿Yoo sa nacatyí sihin ndo vatyi cuu
cacu ndo sihin cuhva sa cua tasi
tuñi xaan ra Ndyoo sii ñiyivi?

⁸Cuñi si sa zama ndisa cuii ndo
cuhva iyo ndo, ta zavaha ndo sa
vaha. Ta ma catyi ndo vatyi maa ra
Abraham cuu zutu ndo, ta ma catyi
ndo vatyi maa ra cua zacacu sii
ndo. Ma zacahnu ndo sii ndo vatyi
vazu sihin yuu ya ta cuu zavaha ra
Ndyoo ñiyivi sii ra Abraham sihin
si.

⁹Tañi minoo yutu sa ña saha
siti cuu ndo. Vatyi ña zavaha ndo
cuhva cuñi ra Ndyoo. Ta yutu sa ña
saha siti, sahndya ñiyivi sii tu. Ta
sahmi ñu sii tu. Ta zuun ñi cuhva
cuan cua cuhun maa ndo nu cayu
ñúhu. Catyi ra Juan.

¹⁰Ta i ndaca tuhun ñiyivi sii ra ta catyi ñu: ¿Ñaa sa cuñi si zavaha ndi? Catyi ñu.

¹¹Ta i nacatyi ra Juan sihin ñu: Ndoho ra iyo uu tahan camisa, nacuhva ndo minoo sii ra ñahñi. Ta ra iyo sa casi, nacuhva tucu ra sii ra ñahñi. Catyi ra.

¹²Ta i saa coyo tucu zuhva ra zatyiyahvi sii ñiyivi xuhun cuenda ra ndyaca ñaha, ta i cuñi ra coo ndutya ra. Ta i ndaca tuhun ra sii ra Juan: Maestro, ¿ña sa cuñi si zavaha ndi? Catyi ra.

¹³Ta i catyi ra Juan sihin ra: Ma zatyiyahvi zana ndo sii ñiyivi minoo cuhva ña catyi ley. Catyi ra Juan.

¹⁴Tacuan ta i ndaca tuhun tucu zuhva ra zandaru sii ra Juan ta catyi ra: Ta nduhvi tucu, ¿ña sa cuñi si zavaha ndi? Catyi ra. Ta i catyi ra Juan sihin ra: Ma quindyaa ndo ndaha tyiño ñiyivi. Ta ma zayuhu xaan ndo sii ñiyivi. Ma tyaa ndo cuatyi sata ñu tatu ña ndisa. Ta ndoo ndo vaha ta yahvi ñi ndo. Catyi ra Juan.

¹⁵Ta i nacañi iñi ñiyivi sa cuenda ra Juan tatu ra Cristo cuu ra a yivi vatyi ndatu ñu sa cua quisi ra Cristo.

¹⁶Ta i catyi ra Juan sihin tandihi ñu: Ndisa zacoo ndutye sii ndo sihin ndutya, zoco vasi inga ra cahnu ca ta ziqui mi. Ña tahan si sii, nu sa cui muzu ra ta cuize ndisa ra, zoco zuun ñi maa ra i saha tyiño sii. Ta maa ra cua zacoo ndutya sii ndo sihin Tatyí li ta sihin ñúhu.

¹⁷Sa ndaha ra pala ra, ta cua zanduvii ra siti trigo ra, ta cua tava ziiin ra zoo si. Cua zandu-iiin

ra sii trigo cuan, ta cua cucumi vaha ra sii si, ta cua cahmi ra zoo si sisi minoo ñúhu sa ma ndahva ca. Tacuan i catyi ra Juan sihin ñiyivi.

¹⁸Ta sihin cuaha xaan ca cuhva i cahan ra Juan sihin ñiyivi, ta i zayuhu ra sii ñu, ta i nacatyi ra vatyi cua quisi minoo ra cua zacacu sii ñiyivi.

¹⁹I nacatyi ra Juan sihin ra rey Herodes tandihi cui sa ña vaha sa i zavaha ra vatyi i quihin ra sii ña Herodías, ñazihí ra Felipe yañi ra.

²⁰Cuñi si sa zanduvaha ra Herodes cuhva iyo ra, zoco i zavaha ra minoo ca sa ña vaha ta i tyihi ra sii ra Juan vehe caa.

Cuhva i sicoo ndutya ra Jesús

²¹Cuaha xaan ñiyivi i zacoo ndutya ra Juan, ta i zacoo ndutya ra sii ra Jesús. Ta cuhva sa sicoo ndutya ra Jesús, i cahan ra sihin ra Ndyoo, ta i nuña andivi.

²²Ta i noo Tatyí li ziqui ra tañi minoo paloma. Ta i siñi ñiyivi minoo nduzu sa quita andivi ta catyi si: Yoho cuu zehi, ra cuñi xein. Zii xaan cuñi suhun. Catyi nduzu cuan.

Ñiyivi sahnú sii ra Jesús

²³Oco usi cuiya ra Jesús ta i quisaha zatyiño ra. Tandihi ñiyivi i sica iñi ñu vatyi zehe ra José cuu sii ra. Ta ra José, zehe ra Elí cuu sii ra.

²⁴Ta ra Elí, zehe ra Matat cuu sii ra. Ta ra Matat, zehe ra Leví cuu sii ra. Ta ra Leví, zehe ra Melqui cuu sii ra. Ta ra Melqui, zehe ra Jana cuu sii ra. Ta ra Jana, zehe ra José cuu sii ra.

²⁵Ta ra José cuan, zehe ra Matatías cuu sii ra. Ta ra Matatías,

zehe ra Amós cuu sii ra. Ta ra Amós, zehe ra Nahum cuu sii ra. Ta ra Nahum, zehe ra Esli cuu sii ra. Ta ra Esli, zehe ra Nagai cuu sii ra.

²⁶Ta ra Nagai, zehe ra Maat cuu sii ra. Ta ra Maat, zehe ra Matatías cuu sii ra. Ta ra Matatías, zehe ra Semei cuu sii ra. Ta ra Semei, zehe ra José cuu sii ra. Ta ra José cuan, zehe ra Judá cuu sii ra.

²⁷Ta ra Judá, zehe ra Joana cuu sii ra. Ta ra Joana, zehe ra Resa cuu sii ra. Ta ra Resa, zehe ra Zorobabel cuu sii ra. Ta ra Zorobabel, zehe ra Salatiel cuu sii ra. Ta ra Salatiel, zehe ra Neri cuu sii ra.

²⁸Ta ra Neri, zehe ra Melqui cuu sii ra. Ta ra Melqui, zehe ra Adi cuu sii ra. Ta ra Adi, zehe ra Cosam cuu sii ra. Ta ra Cosam, zehe ra Elmodam cuu sii ra. Ta ra Elmodam, zehe ra Er cuu sii ra.

²⁹Ta ra Er, zehe ra Josué cuu sii ra. Ta ra Josué, zehe ra Eliezer cuu sii ra. Ta ra Eliezer, zehe ra Jorim cuu sii ra. Ta ra Jorim, zehe ra Matat cuu sii ra.

³⁰Ta ra Matat, zehe ra Leví cuu sii ra. Ta ra Leví, zehe ra Simeón cuu sii ra. Ta ra Simeón, zehe ra Judá cuu sii ra. Ta ra Judá, zehe ra José cuu sii ra. Ta ra José, zehe ra Jonán cuu sii ra. Ta ra Jonán, zehe ra Eliaquim cuu sii ra.

³¹Ta ra Eliaquim, zehe ra Melea cuu sii ra. Ta ra Melea, zehe ra Mainán cuu sii ra. Ta ra Mainán, zehe ra Matata cuu sii ra. Ta ra Matata, zehe ra Natán cuu sii ra.

³²Ta ra Natán, zehe ra David cuu sii ra. Ta ra David, zehe ra Isaí cuu sii ra. Ta ra Isaí, zehe ra Obed cuu sii ra. Ta ra Obed, zehe ra Booz cuu

sii ra. Ta ra Booz, zehe ra Salmón cuu sii ra. Ta ra Salmón, zehe ra Naasón cuu sii ra.

³³Ta ra Naasón, zehe ra Aminadab cuu sii ra. Ta ra Aminadab, zehe ra Aram cuu sii ra. Ta ra Aram, zehe ra Esrom cuu sii ra. Ta ra Esrom, zehe ra Fares cuu sii ra. Ta ra Fares, zehe ra Judá cuu sii ra.

³⁴Ta ra Judá, zehe ra Jacob cuu sii ra. Ta ra Jacob, zehe ra Isaac cuu sii ra. Ta ra Isaac, zehe ra Abraham cuu sii ra. Ta ra Abraham, zehe ra Taré cuu sii ra. Ta ra Taré, zehe ra Nacor cuu sii ra.

³⁵Ta ra Nacor, zehe ra Serug cuu sii ra. Ta ra Serug, zehe ra Ragau cuu sii ra. Ta ra Ragau, zehe ra Peleg cuu sii ra. Ta ra Peleg, zehe ra Heber cuu sii ra. Ta ra Heber, zehe ra Sala cuu sii ra.

³⁶Ta ra Sala, zehe ra Cainán cuu sii ra. Ta ra Cainán, zehe ra Arfaxad cuu sii ra. Ta ra Arfaxad, zehe ra Sem cuu sii ra. Ta ra Sem, zehe ra Noé cuu sii ra. Ta ra Noé, zehe ra Lamec cuu sii ra.

³⁷Ta ra Lamec, zehe ra Matusalén cuu sii ra. Ta ra Matusalén zehe ra Enoc cuu sii ra. Ta ra Enoc, zehe ra Jared cuu sii ra. Ta ra Jared, zehe ra Mahalaleel cuu sii ra. Ta ra Mahalaleel, zehe ra Cainán cuu sii ra.

³⁸Ta ra Cainán, zehe ra Enós cuu sii ra. Ta ra Enós, zehe ra Set cuu sii ra. Ta ra Set, zehe ra Adán cuu sii ra. Ta ra Adán, zehe ra Ndyoo cuu sii ra.

**Cuhva i nducu coto ihñi
cuihna sii ra Jesús**

4 Ta i situ cuui Tatyí Ii Ndyoo sii ra Jesús sa yaha sicoo ndutyá

ra. Ta i quita ra nu cu si yuu Jordán, ta sindyaca Tatyí Ii ra Ndyoo sii ra minoo nu ityi xaan.

²Yucuan i sindyaa ra uu xico quívi, ta i nducu coto ihñi cuihna sii ra. Ta sisi quívi cuan ñahñi maa i sasi ra. Ta yaha cuan, ta i sizoco xaan ra.

³Ta i catyi cuihna sihin ra: Tatu ndisa vatyi Zehe ra Ndyoo cuu suun, catyun sihin yuu sa catuu ihya vatyi nanduu si pan. Catyi cuihna sihin ra Jesús.

⁴Ta i catyi ra Jesús sihin cuihna: Catyi Tuhun Ndyoo vatyi ña maa sihin sa casi ñi yo ta cundito yo. Sihin sa sasi yo ndito coño ñuhu yo, zoco sihin sa tyaa yo yahvi tuhun cahan ra Ndyoo ta ndito añima yo sa ndisa cuii. Catyi ra Jesús sihin cuihna.

⁵Tacuan ta i sindyaca cuihna sii ra Jesús xiñi minoo yucu zucu xaan, ta i zañaha ra tandihí cuii ñuu ñiyívi sii ra.

⁶Ta i catyi cuihna sihin ra Jesús: Ndaha mi ndyaa tandihí ya vatyi saha ra Ndyoo sa cundyaca ñehi tandihí ñuu ñiyívi ya. Ta cuu cuhve sii si sii yoo ra cuñi, ta cua cundyaca ñaha ra.

⁷Ta cua cuhve tandihí si suun tatu cua cuñi situn nui ta zacahnun sii. Catyi cuihna sihin ra Jesús.

⁸Zoco i catyi ra Jesús sihin cuihna: Cuñi siyo suun sii, cuihna, vatyi catyi Tuhun Ndyoo vatyi iin ñi sii maa ra Ndyoo ra ndyaca ñaha sii ndi cua zacahnu ndi. Ta iin ñi tyiño maa ra cua zacuu ndi. Catyi ra Jesús sihin cuihna.

⁹Yaha cuan ta i sindyaca cuihna sii ra Jesús ndya ñuu Jerusalén. Ta

i zandaa ra sii ra xiñi vehe ñuhu cahnu. Ta i catyi ra sihin ra Jesús: Tatu ndisa vatyi Zehe ra Ndyoo cuu suun, ndavon ndya nu ñuhu.

¹⁰Vatyi catyi Tuhun Ndyoo: “Cua cuhva ra Ndyoo tyiño sii ángel ra vatyi zacuenda ra suun.

¹¹Cua naqueen ra suun sihin ndaha ra ta ma ñicuehe sohon sihin minoo yuu.” Catyi cuihna sihin ra Jesús.

¹²Ta i catyi ra Jesús sihin ra: Catyi Tuhun Ndyoo vatyi ma nducu coto ihñi ndi sii ra Ndyoo ra ndyaca ñaha sii ndi. Catyi ra.

¹³Ta ñá cuu zandavi ñaha cuihna sii ra Jesús. Ta cuahan cuihna zuhva ñi quívi.

I quisaha ra Jesús zatyíño ra tyiño ra Ndyoo nu cu si Galilea

¹⁴Ta sa yaha sa nducu coto ihñi cuihna sii ra Jesús, ta ziqui i quisi nanuhu ra Jesús ndyaa Galilea. Situ cuii ra sihin tundyee iñi Tatyí Ii. Ta i cahan ñiyívi tuhun ra nacahnu cuii ityi cuan.

¹⁵Ta i zacuaha ra sii ñiyívi sisi vehe ñuhu tahan tahan ñuu. Ta i zacahnu tandihí ñiyívi sii ra.

Cuhva i zavaha ñiyívi sihin ra Jesús ñuu Nazaret

¹⁶Tacuan ta i nasaa ra Jesús ñuu Nazaret nu i sahnu ra. Ta minoo quívi quitatu ñiyívi i quihvi ra vehe ñuhu tañi sa tuhva maa ra zavaha, ta i sicuñi ndyaa ra vatyi cua cahvi ra Tuhun Ndyoo.

¹⁷Ta i saha ñu minoo libro Tuhun Ndyoo sii ra sa i tyaa ra Isaías, minoo ra profeta ta sa naha. Ta i nuña ra libro, ta i nañihi ra nu catyi si tyehen, ta i cahvi ra tuhun ya:

¹⁸ Ndyaa Tatyí Ii ra Ndyoo sihin, vatyí maa ra i tyaa tyiño sii, vatyí nacatyí tuhun vaha ra sihin ñiyívi ndahvi.

I tasi ra sii, sa zacote sii ñu ndyaa ndaha ra ña vaha vatyí cua quita ñu.

Ta zacote sii ñu cuaa vatyí cua nandyehé ñu.

Ta zacote sii ñu ndyehé tundoho vatyí cua cacu ñu.

¹⁹ Ta zacote sii ñiyívi vatyí sa saa quívi cua cuhva xaan ra Ndyoo sa vaha sii ñu.

Tacuan i cahvi ra Jesús.

²⁰ Ta sa ndíhi cahvi ra, ta i nacazi ra libro, ta nacuhva ra sii minoo ra zatyíño vehe ñuhu cuan. Ta i sicundyaa ra. Ta i ndyehé xaan tandíhi ñiyívi yucu yucuan sii ra.

²¹ Ta i quisaha catyí ra sihin ñu: Zuun ñi vityí natahan si ityí nuu maa ndo cuhva catyí tuhun ya. Catyí ra Jesús.

²² Ta tandíhi ñiyívi yucu yucuan, vaha i cahan ñu sa cuenda ra Jesús. Ta iyo cuñi ñu sihin sa cahan ra vatyí vaha xaan si. Ta i nducu tuhun ñu sii tahan ñu: ¿Atu yívi ra ihya cuu zehe ra José? Catyí ñu.

²³ Ta i catyí ra Jesús sihin ñu: Site cuhva sica iñi ndo. Ta tyehen cua catyí ndo sihin: “Yoho ra cu médico, xihna ca sii moo zanduvohon.” Ta cua catyí tucu ndo: “Sa siñi ndi sa zavohon ñuu Capernaum. Cuhva cuan zavaha tucun ñuu moo.” Tacuan cua catyí ndo sihin. Catyí ra Jesús.

²⁴ Tacuan ta i catyí ra Jesús: Sa ndisa catyí sihin ndo vatyí minoo ra profeta, ña tyaa ñiyívi ñuu ra yahvi sii ra.

²⁵ Ta catyí sa ndisa sihin ndo vatyí cuaha xaan ñundahvi hebreo, ñu sihi yíi, i sicoo quívi i sica noo ra Elías. Ta ñá coon zavi uñi cuiya zazava. Ta sicoo xaan tama nacahnu.

²⁶ Zoco ñá tasi ra Ndyoo sii ra Elías vatyí tyindyee ra sii numinoo ñundahvi hebreo. I tasi ra Ndyoo sii ra nu ndyaa minoo ñandahvi minoo ñuu nañi Sidón nu cu si Sarepta. Catyí ra Jesús.

²⁷ Ta i catyí tucu ra Jesús: Cuaha xaan ra hebreo cuhu sihin cuehe sa tyahyu ra quívi i sica noo ra Eliseo, ra cu profeta. Zoco ñá nduvaha numinoo ra hebreo, zoco i nduvaha ra Naamán, minoo ra ñuu Siria. Catyí ra Jesús.

²⁸ Ta sa siñi ñiyívi ñoho vehe ñuhu tuhun cuan, i cuxaan xaan tandíhi ñu.

²⁹ Ta i nduvita ñu. Ta i tiin ñu sii ra Jesús sindyaca ñu sii ra yuñuu nu iñi noo vatyí cua zavita ñu sii ra yucuan.

³⁰ Zoco i yaha ra Jesús mahñu ñu, ta cuahan ra.

Zanduvaha ra Jesús sii minoo ra ñoho tatyí cuihna

³¹ Ta cuahan ra Jesús ñuu Capernaum nu cu si Galilea. Ta tahan quívi quitatu ñiyívi i zacuahara ra sii ñu.

³² Ta iyo xaan i cuñi ñu sihin cuhva cahan ra vatyí cahan ra tañi minoo ra sito xaan tañi cahan ra ndyaca ñaha vatyí cahan ra sihin sa siñi tuñi ra Ndyoo.

³³ Ta sisi vehe ñuhu sicoo minoo ra ñoho minoo tatyí ña vaha sii, ta saa xaan i cana saa ra ta catyí ra:

³⁴Zañon sii ndi, yoho ra Jesús. ¿Ñaa sa cuñun sihin ndi? Catyi ra. ¿Atu vasi zanoon sii ndi? Site yoo ra cuun. Yoho cuu ra li, ra tasi ra Ndyoo. Tacuan i catyi ra cuan zacuu tatyí cuihna.

³⁵Ta i cahan ra Jesús sihin tatyí ña vaha cuan, ta i catyi ra: Taxi ñi, ta zañon sii ra ya. Catyi ra. Tacuan ta i zanduva tatyí cuihna sii ra cuan mahñu nu yucu ñiyívi, ta i quita si, ta ñá zañicuehe si sii ra.

³⁶Ta i yuhu xaan tandíhi ñiyívi i ndyehe. Ta i catyi ñu sihin tahan ñu: ¿Ñaa tuhun cuu ya? Iyo xaan cuhva ta tundyee iñi sii ra Jesús, ta cuu cahan ra sihin tatyí cuihna ta quita si. Catyi ñu.

³⁷Ta nacahnu cuii yucuan i cahan xaan ñiyívi tuhun ra.

Zanduvaha ra Jesús sii tyizo ra Simón Pedro

³⁸Ta i quita ra Jesús vehe ñuhu cuan, ta i quihvi ra vehe ra Simón. Ta huhu xaan tyizo ra Simón sihin cahñi. Ta i cahan ñu sihin ra Jesús sa cuenda ña.

³⁹Ta i saa ra Jesús nu catuu ña, ta i catyi ra sihin cuehe cuan vatyí naquita si. Ta i quita cahñi cuan sii ña. Ta zuun ñi cuhva cuan i nduvita ña, ta i zavaha ña sa casi ra.

Zanduvaha ra Jesús sii cuaha xaan ñiyívi huhu

⁴⁰Ta cuhva sa cua cuizo ñicandyi i quisi ndyaca ñiyívi sii tandíhi ñiyívi huhu iyo vehe ñu, ñaa ndíhi cuii ca cuehe. Ta i tyizo ra Jesús ndaha ra ziqui minoo minoo ñu, ta i zanduvaha ra sii ñu.

⁴¹Ta i quita tucu tatyí cuihna sii cuaha xaan ñiyívi cuan, ta i cana saa si ta catyi si: Yoho cuu ra cu Zehe Ndyoo. Catyi si. Zoco ñá saha ra Jesús sa cahan ca si vatyí nacoto si sii ra vatyí ra zacacu sii ñiyívi cuu ra.

Nacatyí ra Jesús Tuhun Ndyoo nacahnu Galilea

⁴²Ta sa cundisi inga quívi, ta i quita ra Jesús ñuu cuan. Cuahan ra minoo nu ityi xaan nu yoñi ñiyívi iyo. Zoco i nanducu ñiyívi sii ra, ta i saa ñu nu ñoho ra, ta cuñi ñu sa ndoo ra sihin ñu.

⁴³Zoco i catyi ra Jesús sihin ñu: Cuñi si sa zacote sii ñiyívi inga ñuu cuhva ndyaca ñaha ra Ndyoo vatyí yucuan cuenda i tasi ra Ndyoo sii.

⁴⁴Ta tacuan i sica noo ra Jesús, ta i nacatyí ra Tuhun Ndyoo tandíhi vehe ñuhu nacahnu Galilea.

Cuhva i saha ra Jesús ndatu sii ra tiin tyiyaca, ta i ñihi xaan ra tyiyaca

5 Minoo saha nandyaa ra Jesús yuhu miñi sa nañi Genesaret, ta i saa coyo ñiyívi. Ta tihin xaan i siyucu ñu vatyí cuñi ñu cuiñi ñu Tuhun Ndyoo.

²Ta i ndyehe ra Jesús uu tahan barco vatyí ñi yumiñi. Ta sa quita coyo ra tiin tyiyaca ta nacatya ra taraya ra.

³Tacuan ta i quihvi ra Jesús sisi minoo barco sa cuu sii ra Simón, ta i catyi ra sihin ra vatyí nazatuhva ra zuhva ca sii tu nu cono ca. Ta ziqui i sicundyaa ra Jesús sisi barco, ta i quisaha zacuaha ra sii ñiyívi yucu yumiñi cuan.

⁴Cuhva sa ndihi cahan ra ta i catyi ra sihin ra Simón: Zacuhun barcun ndya nu cono ca ta cañi ndo taraya ndo nu ndutya vatyí cua tiin ndo tyiyaca. Catyi ra Jesús.

⁵Ta i nacahan ra Simón ta catyi ra: Maestro, sa zatyíño xaan ndi ñiyaca cuii, ta ñá ñihi maa ndi. Zoco tatu moo catyi, cua cañi tucu ndi taraya. Catyi ra Simón.

⁶Ta sa zavaha ra cuhva cuan, ta i tiin ra cuaha xaan tyiyaca, ndya cuhva i tahndya taraya ra sihin sa vee tí.

⁷Ta i saha ra zeña sii ra tahan ra sa ñoho inga barco vatyí naquisi tyindyee ra sii ra. Ta i quisi ra, ta i zacutu ra nduu tahan barco cuan sihin tyiyaca cuan, ta ndya cuhva i cuñi ndyee tu.

⁸Ta sa ndyehe ra Simón Pedro cuhva cuan, ta i sicuñi siti ra nuu ra Jesús. Ta i quisaha catyi ra sihin ra: Zandoon sii, tata, vatyí ra iyo xaan cuatyí cui.

⁹Iyo xaan i cuñi ra Simón ta tandihi ra ndihi sihin ra vatyí cuaha xaan tyiyaca i tiin ra.

¹⁰Ta iyo xaan cuñi tucu ra Jacobo sihin ra Juan zehe ra Zebedeo. I zatyíño ra iin ñi sihin ra Simón. Ta i catyi ra Jesús sihin ra Simón: Ma iyo xaan cuñun. Ndyá vityí ma tiin con tyiyaca. Cua tiun sii ñiyivi vatyí cua zacoton Tuhun Ndyoo sii ñu. Catyi ra Jesús sihin ra Simón.

¹¹Ta sa yaha zandaa ra barco ra nu ñuhu ityi, i zandoo tandihi uñi tahan ra sii tandihi ndaha tyiño ra, ta cuahan ra sihin ra Jesús.

Zanduvaha ra Jesús sii minoo ra tyahyu

¹²Ta minoo quivi ndyaa ra Jesús minoo ñuu nu ndyaa minoo ra

tyahyu. Ta sa ndyehe ra sii ra Jesús, sicuñi siti ra nuu ra Jesús, ta i nacañi noo ra xiñi ra ndya nu ñuhu. Ta i sica xaan ra sii ra ta catyi ra: Tata, iyo cuhva suun; ta cuu zanduvohon sii tatu cuñun. Catyi ra.

¹³Ta i tyizo ra Jesús ndaha ra xiñi ra, ta i catyi ra: Cuñi. Sa nduvohon. Ta zuun ñi caa cuhva cuan i quita cuehe tyahyu cuan sii ra.

¹⁴Ta i catyi ra Jesús sihin ra: Ma nacatyun sihin numinoo ñiyivi. Zoco cuhun nu ndyaa ra cu zutu ta cuhvon ñaa ndihi sa tahan si cuhvon tañi i catyi ra Moisés, ta cua cuu si minoo sa ndaa sii ra cu zutu vatyí sa nduvohon. Catyi ra Jesús sihin ra.

¹⁵Zoco vazu i catyi ra Jesús sihin ra vatyí ma nacatyí ra sihin ñiyivi, zoco cuaha xaan ñiyivi i ñihi tuhun cuan. Ta cuaha xaan cuaha xaan ñiyivi i titahan vatyí cuñi ñu tyizoho ñu sa cahan ra Jesús, ta cuñi ñu sa zanduvaha ra sii ñu.

¹⁶Zoco i quita ra Jesús nu yucu ñu ndya minoo nu ityi xaan nu yoñi ñiyivi iyo, ta yucuan i cahan ra sihin ra Ndyoo.

Zanduvaha ra Jesús sii minoo ra xii

¹⁷Minoo quivi zacuaha ra Jesús sii ñiyivi, ta yucu zuhva ra fariseo ta ra maestro cuenda ley hebreo. I quita ra cuan ñuu Jerusalén ta inga ñuu ndyihí nacahnu Galilea ta Judea. Ta sicoo xaan tundyee iñi ra Ndyoo sihin ra Jesús quivi cuan, ta i zanduvaha xaan ra sii ñiyivi cuhu.

¹⁸Tacuan ta i saa coyo ra ndyizo sii minoo ra cuhu sihin minoo tyuhva. I nducu ra cuhva quihvi ra sisi vehe vatyí cuñi ra caqui ra sii ra nu nandyaa ra Jesús.

¹⁹Zoco ñá ñihi ra cuhva quihvi ra vatyí tuu xaan ñiyívi. Tacuan ta i ndaa ra xiñi vehe, ta i tyaa siyo ra zuhva tyiyo, ta i zanoo ra sii ra nu nandyaa ra Jesús mahñu ñiyívi.

²⁰Ta sa ndyehe ra Jesús vatyí sino xaan iñi tandíhi ra, ta i catyí ra sihin ra cuhu: Tata, sa ndasi tandíhi cuatyun. Catyí ra Jesús.

²¹Tacuan ta ra maestro cuenda ley cuan sihin ra fariseo i quisaha sica iñi ra: “¿Yoo ra cuu ra ya? Quiñi xaan cahan ra sii ra Ndyoo. Sica iñi ra vatyí cuu zandasi ra cuatyí yo, zoco minoo tuhun ñi maa ra Ndyoo cuu zandasi cuatyí yo.”

²²Zoco i sito ra Jesús cuhva sica iñi ra, ta i quisaha catyí ra sihin ra: ¿Ñaa cuenda sica iñi ndo tacuan?

²³⁻²⁴¿Ñaa sa ña yí ca catyí yo? ¿Atu yí ca catyí yo? “Sa ndasi cuatyun”, a yí ca catyí yo: “Nduviton ta cacon; sa nduvohon.” Ña yí ca catyí yo: “Sa ndasi cuatyun.” Vatyí yívi sa ndyehe yo cuu cuhva cuan. Ma coto ñiyívi tatu ndisa a ña ndisa. Zoco cua ndyehe ñu tatu zanduvaha yo sii minoo ñiyívi sa ndisa. Ta vityí cua zañehi sii ndo vatyí cuu zacuí tandíhi vatyí ra i quisi ndya gloria cui. Cuu zandasi cuatyí ñiyívi, ta cuu zanduvehi sii ra ya. Catyí ra Jesús. Ta i catyí ra sihin ra cuhu catuu yucuan: Catyí suhun, nduviton. Naquihin tyuhvon ta cunuhun ndya vehun.

²⁵Ta zuun ñi caa cuhva cuan i nduvita ra, ta i naquihin ra tyuhva ra, ta cua nuhu ra ndya vehe ra. Ta ityí cuahan ra zacahnu xaan ra sii ra Ndyoo.

²⁶Ta iyo xaan i cuñi tandíhi ñiyívi, ta i zacahnu ñu sii ra Ndyoo. Ta i

yuhu xaan ñu, ta i catyí ñu: Vityí ndisa i ndyehe yo minoo sa iyo xaan caa.

Cana ra Jesús sii ra Leví

²⁷Ta sa yaha cuan, ta i quita ra Jesús vehe cuan, ta cuahan ra. Ta i ndyehe ra sii minoo ra tava xuhun cuenda ra ndyaca ñaha romano. Leví nañi ra. Ta i catyí ra Jesús sihin ra: Coho sihin.

²⁸Tacuan ta i nduvita ra Leví. I zandoo ra tandíhi sa sii ra, ta cuahan ra sihin ra Jesús.

²⁹Tacuan ta i zavaha ra Leví minoo vico cahnu xaan vehe ra sa cuenda ra Jesús. Ta cuaha xaan ra tava xuhun cuenda ra ndyaca ñaha sindyaa mesa sihin inga ca ñiyívi.

³⁰(I sica iñi ra fariseo ta ra maestro cuenda ley hebreo vatyí ñahñi cuatyí maa ra), ta yucuan cuenda i quisaha cahan cuehe ra sihin ra sica noo sihin ra Jesús, ta catyí ra: ¿Ñaa cuenda sasi ndo ta sihi ndo sihin ra tava xuhun ta ra iyo xaan cuatyí?

³¹Ta i catyí ra Jesús sihin ra: Ra iyo vaha, ña siñi ñuhu minoo médico sii ra. Zoco ra cuhu, siñi ñuhu médico sii ra.

³²Ta maa ndo sica iñi ndo vatyí vaha xaan ndo; ñahñi cuatyí ndo cuñi ndo. Yucuan cuenda ña vasi tyindyeyi sii maa ndo. Vasi tyindyeyi sii ñu sito vatyí iyo cuatyí ñu vatyí cua nazama ñu cuhva iyo ñu. Catyí ra Jesús.

Ndaca tuhun ñiyívi sii ra Jesús ñaa cuenda ña cuñi ra sica noo sihin ra cahñi zoco ra sii ra

³³Tacuan ta i quisaha ndaca tuhun ra cuan sii ra Jesús ta catyí ra: Ra

ndyico sii ra Juan ta sii ra fariseo, tuhva ra sahñi zoco sii ra, ta cahan ra sihin ra Ndyoo. Zoco ra sica noo sihin moo, tandihi quivi sasi ra xita ta sihi ra ndutya. ¿Ñaa cuenda?

³⁴Ta i catyi ra Jesús sihin ra: ¿Atu cuu sa ma kuhva ndo casi ñu yucu minoo vico tindaha tatu ndyaa ra i tindaha sihin ñu? Ma cuu. Cuñi ñu casi ñu vatyi zii xaan cuñi ñu.

³⁵Zoco cua saa quivi cua ndihi vico. Cua cahun ra i tindaha vatyi cua quindyaa ñiyivi sii ra. Tacuan ta ziqui ma casi ra sica noo sihin ra xita.

³⁶Tacuan ta i cahan ra Jesús ziqui minoo kuhva, ta i catyi ra: Yoñi ñiyivi cua cahndya minoo zahma saa ta natyaa ñu zuhva si sii minoo zahma sahnu vatyi cua ndiyi zahma saa cuan, ta ziqui cua tahndya ca zahma sahnu cuan. Ta ña vaha naha si ndihi ca tatu natyaa ñu zahma saa sii zahma sahnu.

³⁷Ta yoñi zavaha ndixi panela sisi quizi sahnu vatyi cua cuizo si ta ndaa si. Ta cua cahndi quizi cuan tatu sahnu si. Ta cua cati ndixi ta cua tivi quizi.

³⁸Cuñi si quizi saa tatu zavaha ñiyivi ndixi panela, ta ma ndoyo ñuhu si.

³⁹Ta tatu sa sihi minoo ra ndixi panela sa ndaa, ma cuñi ra sa ña ndaa vatyi catyi ra: “Vaha ca ndixi sa ndaa.” Ndixi sahnu ca cuu si cuan. (Ta tacuan iyo ñiyivi sihin costumbre ñu. Sa caan xaan ñu sii sa sahnu, ta ma cuu nazaca si sihin minoo kuhva saa.)

Tohon ra sica noo sihin ra Jesús yoco trigo quivi quitatu ñiyivi

6 Minoo quivi quitatu ñiyivi i yaha ra Jesús mahñu itu

trigo ñiyivi. Ta ra sica noo sihin ra i tohon ra zuhva yoco trigo ta i zavii ra sihin ndaha ra, ta sasi ra sii si.

²Tacuan ta i catyi zuhva ra fariseo sihin ra: Ña catyi ley yo sa zatyño yo quivi quitatu ñiyivi. ¿Ñaa cuenda zatyño ndo?

³Ta i catyi ra Jesús sihin ra: ¿Atu tañaha ca cahvi ndo kuhva i zavaha ra David ta ra ndihi sihin ra minoo quivi i sizoco xaan ra?

⁴I quihvi ra sisi vehe ñuhu, ta i quihin ra pan ii. Ta i sasi ra sii si, ta saha ra sii ra ndihi sihin ra. Ta catyi ley vatyi maa ñi ra cu zutu tahan si casi pan cuan. Catyi ra Jesús.

⁵Ta i catyi tucu ra Jesús sihin ra: Ra i quisi ndya gloria cui, ta ndyaca ñaha tuqui quivi quitatu ñiyivi.

Zanduvaha ra Jesús sii minoo ra na-ityi ndaha

⁶Ta inga quivi quitatu ñiyivi i quihvi ra Jesús sisi vehe ñuhu ta zacuaha ra sii ñiyivi. Ta yucuan i ndyehe ra sii minoo ra na-ityi ndaha siyo cuaha.

⁷Ta ra maestro cuenda ley hebreo sihin ra fariseo i ndyehe xaan ra sii ra Jesús tatu cua zanduvaha ra sii ra cuan quivi quitatu ñiyivi. Tacuan ta cua cuu tyaa ra cuatyí sata ra.

⁸Zoco sa sito ra Jesús kuhva sica iñi ra, ta i catyi ra sihin ra na-ityi ndaha: Nduvita. Ta cuiñi ndyoon mahñu. Ta i nduvita ra, ta sicuiñi ndyaa ra mahñu.

⁹Ta ziqui i nducu tuhun ra Jesús sii ra yucu yucuan ta catyi ra: Minoo ñi tuhun cua nducu tuhun sii ndo. ¿Atu catyi ley vatyi zavaha yo sa vaha a sa ña vaha quivi quitatu

ñiyivi? ¿Atu zacacu yo sii ñiyivi a cahñi ndihi yo sii ñu?

¹⁰Ta i ndyehe ra Jesús sii minoo minoo ra yucu yucuan. Ta i catyi ra sihin ra cuhu: Nandica ndohon. Ta i nandica ra ndaha ra, ta i nduvaha ndaha ra.

¹¹Ta zuhva ra yucu yucuan, i cuxaan xaan ra, ta i natuhun tahan ra yozo caa cua zavaha ra sihin ra Jesús.

I casi ra Jesús usi uu tahan ra apóstol

¹²Ta minoo quivi i ndaa ra Jesús minoo yucu vatyi cua caca tahvi ra sii ra Ndyoo. Ta i cahan ra sihin ra Ndyoo ñiyaca cuii.

¹³Ta cuhva sa cundisi i cana ra sii tandihi ra sica noo sihin ra, ta i casi ra usi uu tahan ra vatyi cuu ra apóstol, ta cua tava ra Jesús tyiño sii ra.

¹⁴Ta ihya cuu zivi sa usi uu tahan ra: Ra Simón Pedro, ta yañi ra, ra Andrés. Ra Jacobo, ra Juan, ra Felipe, ta ra Bartolomé.

¹⁵Ta ra Mateo, ta ra Tomás, ta ra Jacobo zehe ra Alfeo ta ra Simón Zelote.

¹⁶Ta ra Judas, yañi ra Jacobo, ta ra Judas Iscariote, ra cua xico sii ra Jesús.

Zacuaha ra Jesús sii cuaha xaan ñiyivi

¹⁷Ta i noo ra Jesús yucu cuan sihin sa usi uu tahan ra cuan. Ta i sicuñi ndyaa ra minoo nu ndaa sihin ra sica noo sihin ra ta sihin cuaha ca ñiyivi, ñu i quita coyo nacahnu Judea ta ñuu Jerusalén ta ñuu Tiro sihin ñuu Sidón sa

ndyaa yuhu tyañuhu. I saa ñu yucuan vatyi cua cuiñi ñu sa cahan ra Jesús. Ta ñu cuhu, cuiñi ñu sa zanduvaha ra sii ñu.

¹⁸Ta ñiyivi ñoho tatyí ña vaha, i nduvaha tucu ñu.

¹⁹Ta tandihi ñu, cuiñi ñu tiin ñu sii ra Jesús vatyi iyo tundyee iñi ra Ndyoo sii ra Jesús, ta i zanduvaha si sii tandihi ñu.

Ñiyivi ñihi tumañi iñi ta ñiyivi ma ñihi tumañi iñi

²⁰Tacuan ta i ndyehe ra Jesús sii ñiyivi sica noo sihin ra. Ta i catyi ra: Tandihi ndoho sa ndahvi, zii xaan cuu sii ndo vatyi tahan si sii ndo sa cundyaca ñaha ra Ndyoo sii ndo.

²¹Ta tandihi ndoho sa sizoco vityi, zii xaan cuu sii ndo vatyi cua coo quivi ta ma ndyehe ca ndo zoco. Ta tandihi ndoho sa sacu xaan vityi, zii xaan cuu sii ndo vatyi cua coo quivi ñahñi ca tucuihya iñi cua coo sii ndo. Ta cua vacu ndo sihin sa zii cuiñi ndo.

²²Zii xaan cuu sii ndo tatu ña cuu ndyehe ñiyivi sii ndo, ta tatu cua tava ñu sii ndo nu yucu ñu, a tatu cahan cuehe ñu sii ndo a tatu catyi ñu vatyi ñiyivi ña vaha cuu ndo vatyi sino iñi ndo sii mi, ra i quisi ndya gloria cui.

²³Zii xaan cuiñi ndo quivi ndyehe ndo tundoho cuan, ta ndava ndo sihin sa zii cuiñi ndo vatyi cahnu xaan sa cua cuhva ra Ndyoo sii ndo gloria. Zuun ñi cuhva ña vaha cuan i zavaha ñiyivi sahnu ta tyiemvu sihin ra profeta.

²⁴Zoco ndahvi ndoho ra cuca vityi vatyi sa iyo sa zii sii ndo ihya ñuu ñiyivi ya.

²⁵Ta ndahvi ndoho ra sica iñi vatyi ñahñi sa cumañi sii ndo vityi vatyi cua coo quivi cua ndyehe xaan ndo zoco. Ta ndahvi ndoho tatu zii xaan cuñi ndo vityi vatyi cua coo quivi cua nducuihya xaan iñi ndo, ta cua vacu xaan ndo.

²⁶Ta ndahvi ndoho tatu catyi tandihi ñiyivi vatyi vaha xaan ndo vityi vatyi zuun ñi cuhva cuan i cahan ñiyivi sahnu sii ñu cuenda ra i catyi vatyi profeta ra Ndyoo cuu ra, ta ña ndisa ra.

**Cuñi xaan ndo sii ñiyivi
xaan iñi sii ndo**

²⁷Tandihi ndoho ra siñi sa quehin, catyi sihin ndo vatyi cuñi xaan ndo sii ñu xaan iñi sii ndo. Zavaha ndo sa vaha sihin ñiyivi ña cuu ndyehe sii ndo.

²⁸Cahan vaha ndo sihin ñiyivi cahan ndya vaha ñi sii ndo, ta cahan ndo sihin ra Ndyoo cuenda ñiyivi zavaha sa ña vaha sihin ndo.

²⁹Tatu iyo ra cati ii siyo xiti ndo, cuhva ndihi ndo inga siyo nacati ra. Tatu iyo ra quindyaa siqueta ndo, cuhva ndihi ndo camisa ndo sii ra.

³⁰Cuhva ndo ñaa ndihi sa sica ñiyivi sii ndo, ta tatu iyo ra quindyaa sa sii ndo, ma nandaca ndo sii si.

³¹Tatu cuñi ndo sa cua zavaha ñiyivi sa vaha sihin maa ndo, tacuan zavaha tucu maa ndo sihin maa ñu.

³²Tatu iin ñi sii ñiyivi cuñi xaan sii ndo cuñi ndo, çña sa vaha zavaha ndo cuhva cuan? vatyi tacuan tucu zavaha ñiyivi quiñi xaan iyo. Cuñi xaan ñu sii ñiyivi sa cuñi sii maa ñu.

³³A tatu zavaha ndo sa vaha sihin ñiyivi zavaha sa vaha sihin ndo, çña sa vaha zavaha ndo cuhva cuan? vatyi tacuan tucu zavaha ñiyivi quiñi xaan iyo.

³⁴A tatu saha noo ndo ndaha tyiño ndo sii ñiyivi vatyi cuñi ndo sa zaha ñu tumañi iñi sii ndo, çña sa vaha zavaha ndo cuhva cuan? vatyi ñiyivi quiñi xaan iyo, saha noo ñu sa sii ñu ta ndatu ñu sa cua nacuhva tucu ñiyivi sii si.

³⁵Zoco maa ndo, cuñi xaan ndo sii ñu xaan iñi sii ndo. Ta zavaha ndo sa vaha. Ta cuhva noo ndo sa sii ndo, zoco ma cuatu ndo ñaa tumañi iñi cua zavaha tucu maa ñu sii ndo. Ta tacuan ta cahnu xaan sa vaha cua ñihi ndo nu ndyaa ra Ndyoo. Ta sa ndisa cuii cua cuu ndo zehe ra Ndyoo, ra cahnu ca. Vatyi ra Ndyoo, vaha ñiyivi cuu ra sihin ñiyivi quiñi xaan iyo ta sihin ñu ña saha tyahvi ndyoo sii ra.

³⁶Yucuan cuenda cundahvi xaan iñi ndo sii ñiyivi tañi maa ra Ndyoo cundahvi xaan iñi ra sii ñu.

Ma cahan cuehe yo sii ñiyivi

³⁷Ma cahan cuehe ndo sii ñiyivi coto catyi ra Ndyoo vatyi ña vaha zavaha tucu maa ndo. Ma catyi ndo vatyi ña vaha ñiyivi, ta ma catyi tucu ra Ndyoo vatyi ña vaha ndo. Zaha ndo tucahnu iñi sii ñiyivi, ta cua zaha ra Ndyoo tucahnu iñi sii maa ndo.

³⁸Cuhva maa ndo sa siñi ñuhu sii ñiyivi, ta cua cuhva tucu maa ra Ndyoo sa siñi ñuhu sii maa ndo. Tañi ñiyivi vaha tatu xico ñu ñaa sa xico ñu sii ndo, situ cuii saha ñu ndya cuhva sitya cuii ñi ca si.

Tacuan tucu cua zavaha ra Ndyoo sihin ndo. Vaha xaan cua tyicuhva ra sa vaha ndya cuhva sitya cuii si, ta cua cuhva ra sii ndo. Vatyí tañi cuhva cua cuhva maa ndo sii ñiyivi, tacuan cuu cuhva cua cuhva ra Ndyoo sii maa ndo. Catyi ra Jesús.

³⁹Ta ziqui i cahan ra Jesús sihin ñu sihin minoo cuhva ta catyi ra: Ma cuu zañaha minoo ra cuaa ityi sii inga ra cuaa. Cua canacava nduu tahan ra sisi xahva.

⁴⁰Ta cahnu ca cuu minoo ra cu maestro ta ziqui ra zacuaha sihin ra, zoco tatu sa ndihi zacuaha ra, cua nduu ra tañi maestro ra.

⁴¹¿Ñaa cuenda ndyehun mihin luhlu cuii ñi sa ñoho siti nuu yañun, ta ña zohon cuenda mihin cahnu sa ñoho siti nuun?

⁴²Ta ñaa cuenda catyun sihin yañun vatyí nacuhva ra sa tavon mihin luhlu sa ñoho siti nuu ra? ta ña tuu iñun vatyí minoo mihin cahnu xaan ñoho siti nuun. Cuhva cuan zohon tuhun vatyí vaha xoon, ta ña ndisa. Tava xihnon mihin cahnu sa ñoho siti nuun, ta cua ndundisi ndyehun, ta cua cuu tavon mihin sa ñoho siti nuu yañun.

Nacoto yo tatu vaha minoo yutu tatu saha tu yucu vixi vaha

⁴³Minoo yutu vaha, ña saha tu siti ña vaha. Ta minoo yutu ña vaha, ña saha tu siti vaha.

⁴⁴Nacoto yo ñaa yutu cuu tahan tahan tu sa cuenda siti saha tu. Vatyí minoo tu mihndya ma cuhva tu mango, ta minoo iñu ma cuhva tu yucu vixi sa nañi uva.

⁴⁵Ta tacuan tucu sihin ñiyivi. Minoo ra vaha, cahan ra tuhun

vaha sa iyo añima ra. Ta ñiyivi ña vaha, ña vaha añima ñu, ta cahan ñu sa quiñi sa iyo añima ñu vatyí ñaa ndihi sa situ añima ñiyivi, yucuan cuu sa cahan ñu.

Cuhva cua cuu si sihin ñiyivi tyaa yahvi sa cahan ra Jesús, ta cuhva cua cuu si sihin ñiyivi ña tyaa yahvi

⁴⁶¿Ñaa cuenda catyi ndo sihin: “Zutu mañi yuu, Zutu mañi yuu”, ta ña zavaha ndo cuhva catyi sihin ndo?

⁴⁷Tatu iyo ra cua quisi nu ndyei, ta siñi ra sa quehin, ta zavaha ra sii si, ihya cuu cuhva iyo ra:

⁴⁸Cuu ra tañi minoo ra i zandaa vehe. Cono xaan sitya ra ndya tahan ra minoo yuu cahnu, ta i zandaa ra vehe ra ziqui yuu cuan. Ta quivi i coon xaan zavi, ñihi xaan i yaha ndutya saha vehe ra, zoco ñá cuu zanduva si vehe ra vatyí ndyaa si ziqui yuu cuan.

⁴⁹Zoco ra ña siñi sa quehin, ta ña zavaha ra sii si, cuu ra tañi minoo ra ñá zavaha cimientu, ta i zandaa ra vehe ra nu ñuhu ñi. Ta ñihi xaan i yaha ndutya saha vehe ra, ta tañi tyehen ñi i nduva vehe ra, ta i ndoyo ñuhu si.

Zanduvaha ra Jesús sii minoo muzu ra ndyaca ñaha sii zandaru

7 Cuhva sa ndihi cahan ra Jesús sihin ñiyivi ta cua nanuhu tucu ra inga saha ndya ñuu Capernaum.

²Ta yucuan ndyaa minoo ra ndyaca ñaha sii minoo ziendu zandaru. Ta minoo muzu ra, ra sa cuñi xaan ra, cuhu xaan ra, ta cuñi cuu ra.

³Quivi sa sito ra cu nuu sii zandaru cuan tuhun ra Jesús, i tasi ra sii zuhva ra sahnun hebreo vatyí caca ra tumañi iñi sii ra Jesús sa quisi zanduvaha ra sii muzu ra.

⁴Ta i saa coyo ra sahnun cuan nu ndyaa ra Jesús, ta i sica xaan ra tumañi iñi sii ra ta catyi ra: Iyo minoo ra romano. Ra cu nuu sii zandaru cuu ra.

⁵Ta vaha xaan ñiyivi cuu ra sihin maa yo ñiyivi hebreo ndya cuhva ndya i tyiyahvi maa ra ta i ndaa minoo vehe ñuhu ndi.

⁶Tacuan ta cuahan ra Jesús sihin ra sahnun cuan, zoco cumañi ca saa ra vehe ra cu nuu cuan, ta i tasi ra cuan zuhva amigo ra, ta i catyi ra sihin ra Jesús: Tata, catyi ra cu nuu cuan vatyí ma zayangon suun sa cuhun ndya vehe ra vatyí cahnu xaan ca cuu moo, ta cahan nuu ra vatyí iyo cuatyí ra. Ta yoho, ra vaha xaan cuun.

⁷Yucuan cuenda ña cuñi ra quisi ra nu ndyoon. Zoco tatu cua catyi moo vatyí nduvaha muzu ra, cua nduvaha ra vazu ma cuhun, catyi ra.

⁸Vatyí maa ra, ra ndyaca ñaha sii zandaru cuu ra. Ta cuu catyi ra sihin minoo ra: “Cuahan”, ta cuhun ra. Ta catyi ra sihin inga ra: “Ñaha”, ta vasi ra. Ta catyi ra sihin muzu ra: “Tyehen zavohon”, ta zavaha ra sii si. Ta tacuan tucu moo, catyi ra, vatyí tatu catyun vatyí nduvaha muzu ra, cua nduvaha ra. Catyi ra cuan sihin ra Jesús.

⁹Ta sa siñi ra Jesús cuhva cahan ra cuan, ta iyo xaan i cuñi ra sa cuenda ra cu nuu cuan. Ta i nasico cava ra, ta i catyi ra sihin

ñiyivi ndyico sii ra: Catyi sihin ndo vatyí tañaha ca nañihi sii minoo ra hebreo ra sino iñi sii ra Ndyoo tañi sino iñi ra cuan. Catyi ra.

¹⁰Ta cuanuhu ra i tasi ra cu nuu cuan, ta sa nasaa ra i ndyehe ra vatyí sa nduvaha muzu cuan.

Zanandoto ra Jesús sii zehe minoo ñandahvi sa sihi yii

¹¹Yaha cuan ta inga quivi cuahan ra Jesús minoo ñuu sa nañi Naín. Ta cuahan tucu ra sica noo sihin ra ta cuaha xaan ca ñiyivi.

¹²Ta cuhva sa cua saa ra vatyí ñi ñuu cuan, ta ndyehe ra vatyí quita cuaha xaan ñiyivi ñuu cuan. Ta ndyizo ñu minoo ndiyi. Minoo tuhun ñi zehe ña iyo cuu ra i sihi cuan. Ta ñandahvi cuu maa ña.

¹³Ta sa ndyehe ra Jesús sii ña, i cundahvi xaan iñi ra sii ña, ta i catyi ra: Ma vacun.

¹⁴Ta i tuhva ra Jesús, ta i tiin ra satu ñoho ndiyi. Ta ra ndyizo satu cuan, i sicuñi ra. Ta i catyi ra Jesús sihin ra ñoho cuan: Ra yoco, catyi suhun vatyí nduviton.

¹⁵Tacuan ta i nduvita ra cuan, ta i quisaha cahan ra. Ta i nacuhva cuenda ra Jesús sii ra sii zihí ra.

¹⁶Ta i yuhu xaan tandihí ñiyivi i ndyehe. Ta i zacahnu xaan ñu sii ra Ndyoo, ta i catyi ñu: Ihya ra cuu minoo profeta cahnu. Ta inga ñu i catyi: Cahnu xaan sa zavaha ra Ndyoo sihin yo vityi.

¹⁷Ta i sito ñiyivi nacahnu Judea ta nacahnu ityi cuan cuhva i zavaha ra Jesús.

Tasi ra Juan sii uu tahan ra sica noo sihin ra ndya nu ndyaa ra Jesús

¹⁸Ta i nacatyí ra sica noo sihin ra Juan sihin ra tandíhi sa zavaha ra Jesús. Ta i cana ra Juan sii uu tahan ra sica noo sihin ra.

¹⁹Ta i tasi ra sii ra nu ndyaa ra Jesús vatyí cua ndaca tuhun ra sii ra tatu ra Cristo cuu ra, ra cua zacacu sii ñiyívi, a tatu cuñi si sa cuatu ra ndya cua quisi inga ra.

²⁰Ta saa ra i tasi ra Juan nu ndyaa ra Jesús, ta i catyí ra sihin ra: ¿Atu yoho cuu Cristo, ra cua zacacu sii ndi a cuatu ca ndi naquisi inga ra?

²¹Ta zuun ñi cuhva sa yucu ra cuan, i zanduvaha ra Jesús sii cuaha xaan ñiyívi cuhu, cuaha nuu cuehe, ta ñu ñoho tatyí cuihna. Ta cuaha xaan ñiyívi cuaa i nandyehé zacuu ra.

²²Tacuan ta i catyí ra Jesús sihin ra i tasi ra Juan: Cuahan ndo ta nacatyí ndo sihin ra Juan tandíhi sa i ndyehé ndo ta sa siñi ndo. Nacatyí ndo cuhva nandyehé ra cuaa, ta cuhva nacaca ra coxo, ta cuhva nduvaha ra tyahyu, ta cuhva nacuíñi ra zoho, ta cuhva nandoto ñiyívi i sihi. Ta nacatyí ndo cuhva siñi ñiyívi ndahvi Tuhun Vaha, cuhva cua cacu ñu.

²³Ta catyí ndo sihin ra vatyí zii xaan cua cuñi ñiyívi tatu ma zaña ñu sa sino iñi ñu sii. Catyí ra Jesús sihin ra.

²⁴Ta sa yaha cuahan ra i tasi ra Juan, ta i quisaha ndaca tuhun ra Jesús sii ñiyívi, ta catyí ra: ¿Ñaa sa sindyehé ndo quívi i sahan ndo nu ityí xaan nu yoñi ñiyívi iyo? ¿Atu

sahan ndo vatyí cua ndyehé ndo minoo tuñii sa canda zacuu tatyí?

²⁵¿A atu sahan ndo vatyí cua ndyehé ndo sii minoo ra ñoho zahma vaha? Zoco ña tacuan vatyí ñiyívi ñoho zahma vaha xaan, iyo ñu vehe rey.

²⁶¿Atu yívi minoo ra cu profeta cuu sa sindyehé ndo? Zuun. Ta cahnu ca ra cuu ra ta ziquí tandíhi inga ra cahan tuhun i saha ra Ndyoo sii ra.

²⁷Zuun ra cuu ra sa cahan si tuhun nuu tutu ra Ndyoo nu i tyaa ra Isaías tyehen: “Yuhvi ra Ndyoo cua tasi sii minoo ra ityí nuu ca, ta cua zanduvaha ra cuhva iyo ñiyívi vatyí cua saa moo cuee ca, ta cua tyizoho ñu sa cohon.”

²⁸Ta catyí sihin ndo vatyí tandíhi rayii ra cacu, yoñi inga ca ra ñiñi ca ta ziquí ra Juan. Zoco ra luhlu ca, ra cahun nu ndyaca ñaha ra Ndyoo, cahnu ca ra ta ziquí ra Juan, ra zacoo ndutya sii ñiyívi. Catyí ra Jesús.

²⁹Ta tandíhi ñiyívi sa siñi sa cahan ra Jesús ta ra tava xuhun cuenda ra ndyaca ñaha, i zacahnu xaan ñu sii ra Ndyoo, ta nacoto ñu vatyí ndoo xaan sa zavaha ra Ndyoo. Sa yaha sicoo ndutya maa ñu i zacuu ra Juan.

³⁰Zoco ra fariseo ta ra maestro cuenda ley hebreo ñá cuñi ra quihin ra sa saha ra Ndyoo sii ra. Yucuan cuenda ñá cuñi ra coo ndutya ra.

³¹Ta i catyí ra Jesús sa cuenda ra: ¿Ñaa ñi cuhva quehin sihin ñiyívi iyo vityí? ¿Tañi yoo ñi sa caa caa ñu?

³²Caa ñu tañi sa ndyihí sa ndyaa nuyahvi, ta cana saa si sii tahan si,

ta catyi si: “Tivi ndi cutu, ta ñá sata saha ndo. Ta sata ndi yaa tucuihya iñi, ta ñá sacu ndo.”

³³Tacuan iyo maa ndo vatyi ra Juan, ra i zacoo ndutya sii ñiyivi, i quisi ra ta ñá sasi vaha ra, ta ñá sihi ra vino. Ta catyi ndo vatyi ñoho minoo tatyí cuihna sii ra.

³⁴Ta ziqui i saa mi, ra i quisi ndya gloria. Ta sasi ta sihi. Ta catyi ndo vatyi tuhva xein coho ta cuahyi xein. Ta cuxaan ndo vatyi vaha ñiyivi cui sihin ra iyo cuatyí ta sihin ra tava xuhun cuenda ra ndyaca ñaha.

³⁵Ta catyi sihin ndo vatyi saha ra Ndyoo sa siñi tuñi maa ra sii ñiyivi sino iñi sii ra. Ta cua zañaha ñu sii maa ndo vatyi vaha sa siñi tuñi ra Ndyoo.

Sasi ra Jesús xita vehe minoo ra fariseo sa nañi Simón

³⁶Ta i cana minoo ra fariseo sii ra Jesús sa cua casi ra xita vehe ra. Ta cuahan ra Jesús vehe ra fariseo cuan, ta sicundyaa ra mesa.

³⁷Tacuan ta minoo ñaha zii iñi ñuu cuan i sito ña vatyi ndyaa ra Jesús vehe ra fariseo cuan, ta i quisi ña sihin minoo yutyí azetye vixi.

³⁸Ta i sicuñi ndyaa ña saha ra Jesús, ta i sacu xaan ña vatyi ndu-uu iñi ña cuatyí ña, ta i quisaha nacatya ña saha ra Jesús sihin ndutya nuu ña. Ta ziqui i zana-ityi ña saha ra sihin ixi xiñi ña. Ta sihi ña saha ra. Ta i saca ña azetye vixi cuan saha ra.

³⁹Ta cuhva sa ndyehe ra Simón tacuan, ta i sica iñi ra: “Tatu ndisa vatyi minoo ra profeta cuu ra ya, cua nacoto ra yozo caa iyo ñaha sa tiin sii ra vatyi iyo xaan cuatyí ña.”

⁴⁰Ta i catyi ra Jesús sihin ra Simón: Simón, iyo minoo tuhun cuñi nacatyi suhun. Ta i catyi ra Simón: Vaha, maestro. Nacatyun sihin.

⁴¹Ta i catyi ra Jesús sihin ra: Sicoo minoo ra, ta uu tahan ra i sitavi sii ra. Minoo ra tavi ra ohon ziendu denario (tañi ohon mil peso cuu si). Ta inga ra tavi ra uu xico usi ñi denario (tañi ohon ziendu peso ñi).

⁴²Ta nduu tahan ra cuan, ñá cuu tyiyahvi ra sa tavi ra. Ta ra sa saha noo xuhun cuan, zaha ra tucahnu iñi sii nduu tahan ra, ta ñá tyiyahvi ca ra sii ra. Ta vityi catyun, Simón, ¿ndya ra cua cuñi ca sii ra sa saha noo cuan? Catyi ra Jesús.

⁴³Ta i nacahan ra Simón ta catyi ra: Ra sa cuaha ca tavi cuan. Catyi ra. Tacuan ta i catyi ra Jesús: Ndisa sa cohon.

⁴⁴Ta ziqui i nandyehe ra Jesús sii ñaha cuan, ta i catyi ra sihin ra Simón: Ndyehun sii ñaha ya. Yuhvi i quihvi vehun, ta ñá sohon ndutya ndoo sehi. Zoco maa ña i nacatya ña sehi sihin ndutya nuu ña, ta zana-ityi ña sihin ixi xiñi ña.

⁴⁵Yoho ñá suhun xiti. Zoco ndya cuhva ndya quihvi ihya ta ñá zaña maa ña sa sihi ña sehi.

⁴⁶Ñá tyuhun azetye xiñi. Zoco ihya ñaha i tyihi azetye vixi sehi.

⁴⁷Yucuan cuenda catyi suhun, Simón, vatyi vazú cuaha xaan cuatyí ña iyo, zoco sa zehi tucahnu iñi sii ña tandihi si. Yucuan cuenda cuñi xaan ña sii. Inga ñiyivi sa zuhva ñi cuatyí ñu iyo, zuhva ñi zehi tucahnu iñi sii ñu, ta zuhva ñi cuñi ñu sii.

⁴⁸Ta i catyi ra Jesús sihin ñaha cuan: Sa ndasi cuatyun. Catyi ra.

⁴⁹Tacuan ta inga ra yucu mesa sihin ra, i quisaha sica iñi ra sihin añima ra: “¿Yoo ra cuu ra ya vatyí zandasi tucu ra cuatyí ñiyivi?”

⁵⁰Ta i catyi ra Jesús sihin ñaha cuan: Cuahan vityi, sa cacun vatyí sino iñun. Cuahan sihin sa vaha.

Ñuzihi sa tyindyee sii ra Jesús

8 Yaha cuan ta cuee ca ta cuahan ra Jesús tahan tahan ñuu nahnu ta ñuu ndyihí. I cahan ra Tuhun Ndyoo nuu ñiyivi. Ta i zacoto ra sii ñu Tuhun Vaha, cuhva cuñi ra Ndyoo cundyaca ñaha ra sii ñu. Ta ndihí sa usi uu tahan ra i casi ra sihin ra.

²Ta cuahan tucu ñu zihí sihin ra. Maa ñu cuu ñu i zanduvaha ra ta cuhu ñu a i ñoho tatyí cuihna sii ñu ta i tava ra. Ta cuahan ña María minoo ñaha ñuu Magdala sihin ñu. I siñoho usa tahan tatyí cuihna sii ña, ta nduvaha ña.

³Ta cuahan tucu ña Juana, ñazihí ra Chuza. Minoo ra cu tyiño sa cuenda ra rey Herodes cuu maa ra. Ta cuahan ña Susana ta cuaha xaan ca ñu cuahan. Ta i tyindyee ñu sii ra Jesús sihin xuhun ñu.

Cahan ra Jesús ziquí minoo cuhva, cuhva ra tasi

⁴Cuaha xaan ñiyivi i quita sa ziin ziin ñuu, ta titahan ñu vatyí cua tyizoho ñu sa cahan ra Jesús. Ta i cahan ra sihin ñu ziquí minoo cuhva ta catyi ra:

⁵Cuahan minoo ra nu iyo tyiño ra vatyí cua quití ra siti trigo nu ñuhu ra. Ta cuhva sa quití ra sii si, zuhva

si canacoyo si ityi. Ta i sañi ñiyivi sii si, ta i sasi zaa sii si.

⁶Ta zuhva siti cuan, i canacoyo si nu yaxi ñoho ñuhu vatyí ñoho xaan yuu. Ta quivi i caña si, i na-ityi si vatyí ña coco caa ñuhu ta i cumañi ndutya sii si.

⁷Ta zuhva siti cuan, i canacoyo si ticui iñu. Ta i caña si sisi iñu, zoco i zahvi iñu sii si. Ta ñá saha si siti si.

⁸Ta zuhva ca siti cuan, i canacoyo si nu vaha ñuhu, ta saha xaan si siti si. Iyo si saha si minoo ziendu siti si. Catyi ra Jesús. Ta sa yaha cahan ra tuhun cuan, i cana saa ra, ta i catyi ra: Tatu siñi ndo, cuiñi ndo sa quehin. Catyi ra.

⁹Tacuan ta i ndaca tuhun ra i casi ra sii ra ñaa cuñi si catyi si cuhva cahan ra sihin ñiyivi.

¹⁰Ta i catyi ra Jesús sihin ra: Saha ra Ndyoo sa coto maa ndo tuhun xehe sa cuenda cuhva ndyaca ñaha maa ra. Zoco sihin inga ñiyivi, maa ñi sihin minoo cuhva quehin vatyí cua ndyehe ñu, zoco ma nacoto ñu ñaa sa ndyehe ñu. Cua cuiñi ñu, zoco ma cutuñi iñi ñu.

¹¹Ihya cuu cuhva cuñi si catyi si: Siti cuan cuu tañi Tuhun Ndyoo.

¹²Ta tañi sa canacoyo siti cuan ityi, tacuan iyo minoo ityi ñiyivi siñi Tuhun Ndyoo. Ta saa cuihna, ta quindyaa ra sii si sisi añima ñu coto cua sino iñi ñu ta cacu ñu.

¹³Ta tañi sa canacoyo siti nu ñoho xaan yuu iyo inga ityi ñiyivi sa siñi Tuhun Ndyoo. Ziñ xaan cuñi ñu sihin si zuhva ñi quivi, zoco ña quihvi vaha si añima ñu. Ta ña naha cua sino iñi ñu. Tatu cua quisi minoo tundoho ziquí ñu a cuxaan ñiyivi sihin ñu sa cuenda Tuhun Ndyoo, yatyí xaan cua zaña ñu sii si.

¹⁴Ta inga ñiyivi cuu tañi sa canacoyo siti nu ndyaa iñu. Siñi ñu Tuhun Ndyoo, zoco sica xaan iñi ñu inga tuhun, tuhun sa iyo ñuu ñiyivi. Sica iñi ñu tuhun sa nducuca ñu ta cuhva cua cuzii iñi ñu ñuu ñiyivi ya. Ta ma zatyño vaha Tuhun Ndyoo sihin ñu.

¹⁵Zoco tañi siti canacoyo nu vaha ñuhu, tacuan iyo inga ñiyivi. Ndoos xaan iyo ñu, ta vaha xaan aña ñu. Siñi ñu Tuhun Ndyoo, ta zavaha ñu sii si. Ta cundyee xaan iñi ñu. Ta cuaha xaan sa vaha zavaha ñu cuhva catyi Tuhun Ndyoo.

Cuhva sii minoo lámpara

¹⁶Tatu tyaa ñiyivi minoo lámpara sisi vehe ñu, ma tyihi ñu sii si xu sito a inga nu xehe. Ña tacuan vaty tyaa ñu sii si nu zucu vaty tacuan ta ndundisi sisi vehe, ta cuu ndyehe ñiyivi quihvi sisi vehe.

¹⁷Ta tañi lámpara tatu ñoho xehe si, tacuan iyo cuhva zacuehi sii ndo vityi. Zoco cua coo quivi ta cua cuiñi ñiyivi nacahnu ñuu ñiyivi cuhva zacuehi ihya.

¹⁸Yucuan cuenda coto vaha ndo sii ndo sihin sa siñi ndo vaty tatu tyaa ndo yahvi sa quehin, cuaha ca cua zacuehi sii ndo. Zoco tatu ma tyizoho ndo cua quindyeyi ndya cuhva ndya sa zuhva ñi sa sica iñi ndo vaty sa cutuñi iñi ndo.

Zihi ra Jesús ta yañi ra

¹⁹Tacuan ta i saa zih ra ta yañi ra Jesús, zoco ñá cuu quihvi ñu nu ndyaa ra vaty tuu xaan ñiyivi.

²⁰Ta i zacoto ñiyivi yucu yucuan sii ra ta catyi ñu: Zihun ta yañun, nandyaa ñu sata vehe, ta cuiñi ñu cahan ñu suhun.

²¹Ta i nacahan ra Jesús, ta catyi ra: Ñiyivi sa cuu zih ta yañi cuu ñu siñi Tuhun Ndyoo ta zavaha ñu sii si.

Zacutaxi ra Jesús taty ta ndutya

²²Minoo quivi i quihvi ra Jesús minoo barco sihin ra i casi ra. Ta i catyi ra sihin ra: Coho yo inga siyo miñi. Ta cuahan ra sihin barco cuan.

²³Ta cuhva sa cuahan ra mahñu miñi cuan, ta quixi ra Jesús. Ta sicava minoo taty cahnu xaan. Ta quihvi ndutya sisi barco. Ta i situ tu, ta i quisaha ndyee tu.

²⁴Ta i zandoyo ra sii ra Jesús ta catyi ra: ¡Maestro! ¡Maestro! ¡Sa cuñi cunaa yo! Catyi ra. Ta i nduvita ra Jesús, ta i cahan ra sihin taty ta sihin ndutya, ta i cutaxi si.

²⁵Ta i catyi ra sihin ra yucu sihin ra: ¿Ñacu ña nii iñi ndo? Catyi ra. Zoco ra cuan, yuhu xaan ra, ta iyo xaan i cuñi ra. Ta i quisaha ndaca tuhun ra sii ra tahan ra: ¿Yoo ra cuu ra ya? vaty cuhva ndya taty ta cuhva ndya ndutya ta tyaa si yahvi sii ra.

Minoo ra ñoho taty cuihna

²⁶Tacuan ta i saa ra Jesús nu cu si Gadara sa ndyaa inga siyo miñi cahnu sa nañi Galilea.

²⁷I quita ra Jesús barco, ta i tuhva minoo ra ñuu cuan sii ra. Sa naha xaan ñoho taty cuihna sii ra, ta ña ñoho ra zahma ra, ta ña ndyaa ra vehe ra. Sica noo ñi maa ra nu ñaña.

²⁸⁻²⁹Ta tuhva taty ña vaha cuan tiin sii ra, ta yucuan cuenda sihñi ñu cadena ndaha ra ta saha ra vaty ma cuu cahun ra. Zoco i sahnua ra cadena

sihin fuerza sa saha tatyí ña vaha cuan sii ra, ta i zacono tatyí cuan sii ra ndya nu yoñi ñiyivi iyo. Ta cuhva sa ndyehe ra sii ra Jesús, i sicuñi siti ra nuu ra, ta i cana saa ra, ta catyi ra: ¿Ñaa sa cuñun sihin mi, Jesús? Moo cuu zehe Ndyoo ra cahnu ca. Sa ndyoo ñi ma zandyehun tundoho sii. Tacuan i catyi ra vatyí sa catyi ra Jesús sihin tatyí cuihna vatyí naquita si sisi añima ra.

³⁰Ta ziqui i ndaca tuhun ra Jesús sii ra: ¿Ñaa nañun? Ta tatyí cuan nacahan si ta catyi si: Nañi Legión. Tacuan catyi tatyí ña vaha cuan vatyí cuaha xaan si ñoho sii ra.

³¹Ta i sica tatyí ña vaha cuan tumañi iñi sii ra Jesús sa ma zacuhun ra sii si sisi minoo xahva cono xaan nu ma cuu quita si.

³²Ta sica tatyí ña vaha cuan sii ra Jesús vatyí nacuhva ra sa quihvi si sisi quini vatyí yucu xaan ti yucuan. Ta i saha ra Jesús sa quihvi si sisi quini cuan.

³³Ta i quita tatyí ña vaha cuan sii ra ndahvi cuan, ta i quihvi si sisi quini cuan. Ta ñihi xaan i cacono quini cuan nu iñi noo yuhu miñi. Ta i sihi tandihi ti sisi ndutya.

³⁴Ta cuhva sa ndyehe ra zacuenda quini cuan sa tahan ti, i sino xaan ra, ta i nacatyí ra sihin ñiyivi sa ndyehe ra sisi cuhu ta sisi ñuu.

³⁵Ta i quita coyo ñiyivi vatyí cua ndyehe ñu ñaa sa cuu, ta i saa ñu nu ndyaa ra Jesús. Ta i ndyehe ñu sii ra sa quita tatyí cuihna cuan. Nandyee ra nuu ra Jesús. Sa ñoho ra zahma ra, ta sa nduvaha cuñi xiñi ra. Ta i yuhu xaan ñu.

³⁶Ta ñiyivi i ndyehe, i nacatyí ñu sihin inga ñu cuhva i quita tatyí ña vaha sii ra ta i nduvaha ra.

³⁷Tacuan ta cuaha xaan ñiyivi nacahnu Gadara i catyi ñu sihin ra Jesús vatyí nacuhun ra vatyí i yuhu xaan ñu sa cuenda cuhva i zavaha ra sihin tatyí cuihna cuan. Ta i nandihvi ra Jesús sisi barco.

³⁸Ta ra sa quita tatyí cuihna cuan, i sica ra sii ra Jesús sa cuhun ra sihin ra, zoco i catyi ra Jesús sihin ra:

³⁹Cuanuhun ndya vehun. Ta nacatyun sihin ñiyivi suun ñaa sa i zavaha ra Ndyoo suhun, cuhva sa cahnu xaan i tyindyee ra suun. Ta cuahan ra cuan, ta i nacatyí ra nacahnu ñuu ra cuhva sa cahnu xaan i zavaha ra Jesús sihin ra.

Nduvaha zehe ra Jairo, ta i tiin minoo ñaha yuzahma ra Jesús

⁴⁰Ta quivi sa nasaa ra Jesús inga siyo miñi, cuaha xaan ñiyivi ndatu sii ra. Ta zii xaan cuñi ñu vatyí nasaa ra.

⁴¹Tacuan ta i saa minoo ra sa nañi Jairo. Minoo ra cu tyiño cuenda vehe ñuhu ñuu cuan cuu ra. Ta i sicuñi siti ra nuu ra Jesús, ta i sica xaan ra tumañi iñi sii ra sa cuhun ra sihin ra ndya vehe ra.

⁴²Vatyí minoo tuhun ñi zehe ra iyo. Usi uu cuiya ña, ta sa cuñi cuu ña sihin cuehe. Ta cuahan ra Jesús vehe ra cuan. Ta i sindyico cuaha xaan ñiyivi sii ra. Ñihi xaan i catyihí ñu sii ra.

⁴³Ta ticui ñiyivi cuan ñoho minoo ñaha cuhu. Sa usi uu cuiya sa cuhu ña cuehe sa cuu ña niñi. Cuaha xaan médico i zacuu tata sii ña. I zanaa ña tandihi cuii sa iyo sii ña. Zoco ñá nduvaha ña sihin cuhva zavaha médico.

⁴⁴Ta i quisi ña ityi sata ra Jesús zava mahñu ñiyivi cuan, ta i tiin ña yuzahma ra. Ta zuun ñi caa cuhva cuan i sicuita niñi ña.

⁴⁵Ta i catyi ra Jesús: ¿Yoo sa tiin sii? Ta tandihi ñiyivi cuahan sihin ra catyi ñu vatyí yivi maa ñu. Ta ra Pedro ta inga ra ndihi sihin ra Jesús i catyi ra: Maestro, tuu xaan ñiyivi cuahan suhun, ta catyíhi ñu suun. ¿Ta ñaa cuenda ndaca tuhun yoo sa tiin suun?

⁴⁶Zoco i catyi ra Jesús: Iyo minoo ñiyivi i tiin sii, vatyí tuu iñi vatyí cuahan zuhva tundyee iñi sii.

⁴⁷Ta sa sito ñaha cuan vatyí ma cuu tyixehe ña, ta i quisaha nihi ña vatyí yuhu xaan ña. Ta i sicuñi siti ña nuu ra Jesús. Ta ityi nuu tandihi ñiyivi i nacatyí ña sihin ra ñaa cuenda i tiin ña sii ra ta yozo caa i nduvaha ña sa zuun ñi caa cuhva cuan.

⁴⁸Ta i catyi ra Jesús sihin ña: Zihi, i nduvohon vatyí i sino iñun sii. Cuahan sihin sa vaha. Catyi ra.

⁴⁹Nii ñi sa cahan ra Jesús tuhun ya, ta i quisi minoo ra iyo vehe ra Jairo cuan. Ta i catyi ra sihin ra Jairo: Sa sihi zehun. Ma zayanga con sii ra maestro ya.

⁵⁰Ta sa siñi ra Jesús tuhun cuan, i catyi ra: Ma yuhun. Sino iñun ta cua nduvaha ña.

⁵¹Ta sa saa ra Jesús vehe ra Jairo, ñá saha ra quihvi ñiyivi, maa ñi ra Pedro ta ra Jacobo ta ra Juan ta ra Jairo, zutu ña, sihin ñazihí ra.

⁵²Ta i sacu xaan tandihi ñiyivi vatyí i sihi ña, zoco i catyi ra Jesús: Ma vacu ndo. Ñá sihi ña. Quixi ña.

⁵³Ta i sacu ndyaa ñu sii ra vatyí sito ñu vatyí sa sihi ña.

⁵⁴Tacuan ta i tiin ra Jesús ndaha ña luhlu cuan, ta i catyi ra sihin ña: Ñaha luhlu, nduviton.

⁵⁵Ta i nandihvi añima ña, ta zuun ñi caa cuhva cuan i nduvita ña. Ta i catyi ra sihin ñu nacuhva ñu sa casi ña.

⁵⁶Iyo xaan i cuñi zutu ña ta zihí ña, zoco nihi xaan i saha ra tyiño sii ñu sa ma nacatyí ñu nu sihin minoo ñiyivi cuhva i cuu.

Tasi ra Jesús sii sa usi uu tahan ra i casi ra vatyí cua nacatyí ra Tuhun Ndyoo sihin ñiyivi

9 I zandu-iin ra Jesús sii sa usi uu tahan ra i casi ra, ta i saha ra tundyee iñi sii ra vatyí cua tava ra tatyí ña vaha, ta cua zanduvaha ra sii ñiyivi cuhu.

²Ta i tasi ra sii ra sa cahan ra Tuhun Ndyoo, ta cua nacatyí ra sihin ñiyivi cuhva ndyaca ñaha ra Ndyoo. Ta cua zanduvaha ra sii ñiyivi cuhu.

³Ta i catyi ra Jesús sihin ra: Ñahñi sa cuizo ndo ityi cuhun ndo. Ma cuñaa ndo numinoo tutatu, ta numinoo yiti, ta nu sa casi ndo. Ma cuizo ndo xuhun. Ndihi ñoho ñi ndo zahma ndo cuhun ndo, ta ma cuizo ndo inga.

⁴Tatu saha ñiyivi minoo vehe cundyaa ndo, yucuan ndoo ndo ndya cua cuhun ndo inga ñuu.

⁵Ta tatu saa ndo minoo ñuu ta ña cuñi ñiyivi tyizoho ñu sa cahan ndo, quita ndo ñuu cuan. Naquizi ndo saha ndo vatyí ma cuhun nu ñiyaca ñuu cuan sihin ndo. Tacuan ta cua coto ñiyivi vatyí i zavaha ñu sa ña vaha sihin ndo. Tacuan i catyi ra Jesús.

⁶Ta i quihin ra ityi cuahan ra tahan tahan ñuu. I nacaty i ra Tuhun Vaha sihin ñiyivi, ta nacahnu i zanduvaha ra sii ñu cuhu.

**Cuñi ra rey Herodes coto
ra yoo ra cuu ra Jesús**

⁷Ra Herodes i cuu ra ndyaca ñaha nacahnu Galilea. Ta i ñihi ra tuhun sa cuenda tandihi sa zavaha ra Jesús. Ta ñá ñihi vaha ra cuhva yoo ra cuu ra Jesús vaty zuhva ñiyivi i catyi ñu vaty ra Juan cuu ra ta i nandoto ra.

⁸Ta inga ñiyivi i catyi ñu vaty ra Elías cuu ra Jesús. Ta inga ñu i catyi ñu vaty i nandoto minoo ra profeta.

⁹Zoco i catyi ra Herodes: Zuun ñi mi i tava tyiño sii ra sahndya yuu zucu ra Juan. ¿Ta yoo ra cuu ra siñi xein tuhun vityi? Ta i cuñi xaan ra Herodes ndyehe ra sii ra Jesús.

**Cuhva i saha ra Jesús sa
casi ohon mil rayii**

¹⁰Ta i nasaa coyo ra apóstol, ta i nacaty ra sihin ra Jesús tandihi sa i zavaha ra. Tacuan ta i quihin ra Jesús sii ra ta cuahan ra sihin maa ñi maa ra ityi ñuu Betsaida.

¹¹Zoco i sito ñiyivi, ta sindyico tuu xaan ñu sii ra, ta i cahan vaha ra sihin ñu sa cuenda cuhva ndyaca ñaha ra Ndyoo. Ta i zanduvaha ra sii ñiyivi cuhu.

¹²Ta sahiñi i tuhva ra i casi ra sii ra, ta i catyi ra sihin ra Jesús: Catyun sihin ñiyivi nacuhun ñu tandihi ñuu, tandihi cuadria sa ndyaa yaty ñi cuzata ñu sa casi ñu ta cuzu ñu vaty ñahñi maa sa iyo ihya.

¹³Zoco i catyi ra Jesús sihin ra: Cuhva maa ndo sa casi ñu. Ta i catyi ra sihin ra Jesús: Ñahñi maa sa cumi ndi ihya, ohon tahan ñi pan ta uu tahan ñi tyiyaca. ¿A tu sica iñun sa cuu zata ndi sa casi tandihi ñu ya? Catyi ra.

¹⁴Vaty tañi ohon mil rayii yucu yucuan. (Ta ziin ñu zih i ta sa ndyih i.) Ta i catyi ra Jesús sihin ra i casi ra: Catyi ndo sihin ñu vaty nacundyaa ñu. Uu xico usi tahan ñu sa minoo minoo ityi ñu.

¹⁵Ta tacuan i sicundyaa ñu i zacuu ra.

¹⁶Ta ziqui i quihin ra Jesús sa ohon tahan pan ta uu tahan tyiyaca, ta i nandyehe ndaa ra ityi andivi, ta i saha ra tyahvi ndyoo sii ra Ndyoo. Ta i sahnu ndyih i ra pan ta tyiyaca cuan. Ta i nducuaha si. Ta i saha ra sii si sii ra i casi ra vaty cua zasa ra sii si sii ñiyivi.

¹⁷Ta i sasi tandihi ñu, ta i ndaha xaan iñi ñu. Ta ziqui i zanacutu ñu usi uu tahan tyica sihin yiqui pan sa nandoo ta tyiyaca cuan.

**Nacaty ra Pedro vaty ra Jesús
cuu ra cua zacacu sii ñiyivi**

¹⁸Minoo quivi i quita ziin ra Jesús sihin ra i casi ra minoo nu taxi ñi, ta i sica tahvi ra Jesús sii ra Ndyoo. Ta yaha cuan ta ziqui i ndaca tuhun ra sii ra ndihi sihin ra ta catyi ra: ¿Yoo ra cui, catyi ñiyivi?

¹⁹Ta i nacahan ra ta catyi ra: Iyo ñu catyi ñu vaty ra Juan, ra i zacoo ndutya quivi cuan cuun. Ta inga ñu catyi vaty ra Elías cuun. Ta inga tucu ñu catyi vaty i nandoto minoo profeta, ta zuun ra cuan cuun. Catyi ñu.

²⁰Tacuan ta i ndaca tuhun ra Jesús sii tandihi ra ta catyi ra: ¿Ta yoo ra cui catyi maa ndo? Ta i nacahan ra Pedro ta catyi ra: Yoho cuu ra Cristo. Zehe ra Ndyoo.

Nacaty i ra Jesús yozo caa cua cuu ra

²¹Ta i nacaty i ra Jesús sihin ra i casi ra vaty i ma nacaty i ra tuhun cuan sihin numinoo ñiyivi.

²²Ta i catyi ra: Cuaha xaan tundoho cua ndyehe ra i quisi ndya gloria. Cua cuxaan ra mandoñi ta ra zutu nahnu ta ra maestro cuenda ley hebreo sihin ra. Ta cua cahni ra cuan sii ra. Ta sa cu uñi quivi cua nandoto ra.

²³Ta i catyi ra Jesús sihin tandihi ra: Tatu iyo ra cuñi ra cundyico ra sii, nazama ra cuhva iyo ra. Ta ma zacahnu ra sii ra. Ta nandyeha ra tundoho sa cuenda mi. Ta nazavaha ra cuhva zavehi.

²⁴Tatu ña cuñi ñiyivi sa cuu ñu sa cuenda Tuhun Ndyoo, cua cuu ñu. Ta cua cuhun ñu andyaya. Ta ma cundito ñu sihin ra Ndyoo. Zoco tatu cua cuu ñiyivi sa cuenda mi a sa cuenda Tuhun Ndyoo, cua cundito ñu sihin ra Ndyoo.

²⁵¿Ñaa sa ñihi ñiyivi sa zahacanaa ñu tandihi sa iyo ñuu ñiyivi ta quivi cua cuu ñu ndaha cua naa ñu?

²⁶Tatu iyo ra cahan nuu sa cuenda mi a sa cuenda Tuhun Ndyoo, tacuan tucu cua cucahan nu i sihin ra. Vaty i ra i quisi ndya gloria cui, ta cua quisi tuqui sihin ángel. Ta cua ndyehe ñiyivi vaty i cahnu xaan cuu Zuti.

²⁷Ta sa ndisa cui catyi sihin ndo vaty i iyo zuhva ra yucu ihya, ma

cuu ra ndya cuhva ndya cua ndyehe ra cuhva cua cundyaca ñaha ra Ndyoo.

Cuhva i zama ra Ndyoo cuhva caa ra Jesús minoo saha

²⁸I yaha tañi uña quivi sa yaha catyi ra Jesús cuhva cuan. Ta ziqui i ndaa ra Jesús xiñi minoo yucu cua cahan ra sihin ra Ndyoo, ta cuahan ra Pedro ta ra Juan ta ra Jacobo sihin ra.

²⁹Ta cuhva sa sica tahvi ra sii ra Ndyoo, ta i zama cuhva caa nuu ra, ta i nducuisi xaan zahma ra ta xiño xaan si.

³⁰Ta i quituu uu tahan ra natuhun sihin ra. Minoo ra cuu ra ra Moisés, ta inga ra cuu ra ra Elías. (Ra i sihi ta sa naha cuu nduu tahan ra cuan.)

³¹Ndisi xaan nu siyucu ra, ta i cahan ra tuhun yozo caa cua cuu ra Jesús ñuu Jerusalén.

³²Ta ra Pedro ta ra tahan ra cuñi xaan ra cuzu ra, zoco ñá quixi ra vaty i ndyehe ra sa ndisi xaan nu nandyaa ra Jesús sihin sa uu tahan ra nandyaa sihin ra.

³³Ta cuhva sa cuahan ra yucu sihin ra Jesús, i catyi ra Pedro sihin ra Jesús: Maestro, vaha xaan yucu yo ihya. Nazavaha ndi uñi tahan vehe tyiyahva, minoo cuenda moo, ta minoo cuenda ra Moisés, ta minoo cuenda ra Elías, catyi ra. Zoco ñá sito ra Pedro ñaa tuhun cahan ra.

³⁴Ta cuhva sa cahan ra Pedro tacuan ta i noo minoo vico ta ndaha tyazi si sii tandihi ra. Ta i yuhu xaan ra sa quihvi ra sisi vico cuan.

³⁵Ta sisi vico cuan i siñi ra minoo nduzu sa catyi: Ra ihya cuu Zehi.

Cuñi xein sii ra. Cuiñi ndo sa cahan ra.

³⁶Ta sa yaha cahan nduzu cuan, tuhun cuan, ta i ndyehe ra ndihi sihin ra Jesús vatyí ña ndyaa ca inga ra cuan sihin ra Jesús. Maa tuhun ñi ca maa ra. Ta i sicumi xehe ra tandihi sa i ndyehe ra, ta sisi quivi cuan ñá nacatyí ra sihin numinoo ñiyivi.

**Zanduvaha ra Jesús sii minoo
ra luhlu sa ñoho tatyí cuihna**

³⁷Ta inga quivi cuhva sa noo ra yucu cuan, cuaha xaan ñiyivi i zatahan sii ra Jesús.

³⁸Ta minoo ra ñoho ticui ñiyivi cuan i cana saa ra ta catyí ra: Maestro, sica xein tumañi ñi suun sa cua ndyehun sii zehi vatyí minoo tuhun ñi zehi iyo.

³⁹Ñoho minoo tatyí cuihna sii ra, ta ndya vaha ñi cuhva nduxaan si sii ra. Ta sacú saa ra, ta zanduva si sii ra nu ñuhu, ta saa tñi yuhu ra. Ña zaña si sii ra, ta zañicuehe si sii ra.

⁴⁰Sa catyí vatyí natava ra i casi moo sii si, zoco ñá cuu sii ra.

⁴¹Ta i nacahan ra Jesús, ta catyí ra (sihin tandihi ñiyivi): Ndoho cuu ñiyivi ña sino ñi. ¿Yozo tahan ca quivi cua ndoi sihin ndo ta ziquí cua sino ñi ndo? Ma cundyee ñi cundyei sihin ndo naha xaan ca. Sa naha xaan cundyee ñi sihin ndo. Ta ndyaca sii zehun ihya.

⁴²Ta cuhva sa vasi ra luhlu cuan, i zanduva tatyí cuihna cuan sii ra ta quiñi xaan i tahan ra. Ta xaan xaan i cahan ra Jesús sihin tatyí ña vaha cuan. Ta i zanduvaha ra sii ra luhlu

cuan, ta ziquí i nacuhva cuenda ra sii ra sii zutu ra.

⁴³Ta iyo xaan i cuñi tandihi ñiyivi vatyí cahnu xaan cuu tundyee ñi maa ra Ndyoo.

**Zacoto tucu ra Jesús inga
saha cuhva cua cuu ra**

Ñi ñi sa iyo xaan cuñi tandihi ñiyivi sihin sa zavaha ra Jesús ta i quisaha catyí ra sihin ra i casi ra:

⁴⁴Tyizoho vaha ndo sa quehin vatyí cua xico minoo ra sii ra i quisi ndya gloria. Ta cua tñi ñiyivi sii. Catyí ra Jesús.

⁴⁵Zoco, ñá cutuñi ñi ra ñaa tuhun cahan ra. Ta ñá nacatyí ra Jesús sihin ra ñaa cuñi si catyí si. Ta yuhu ra ndaca tuhun ra sii ra Jesús ñaa tuhun cahan ra.

¿Yoo ra cuu ra ñiñi ca?

⁴⁶Tacuan ta i quisaha natuhun tahan xaan ra i casi ra Jesús sa cuenda cuhva yoo ra cuu ra ñiñi ca sii ra.

⁴⁷Ta i sito ra Jesús ñaa sa sica ñi ra cuan sihin aña ra. Ta i quihin ra sii minoo ra luhlu, i sañi ndyaa ra sii ra ii siyo xiin ra.

⁴⁸Ta i catyí ra sihin ra ndihi sihin ra: Tatu zavaha ñiyivi sa vaha sihin minoo ra luhlu sa cuenda mi, tañi sihin mi zavaha ñu sa vaha cuu si. Ta tatu zavaha ñiyivi sa vaha sihin mi, zavaha ñu sa vaha sihin Zuti. Ta ra sa luhlu ca zaha maa ndo tuhun, yucuan ra cuu ra cahnu ca ityí nuu ra Ndyoo. Ta ra sa cahnu ca cuñi ndo, yucuan ra cuu ra luhlu ca ityí nuu ra Ndyoo. Catyí ra Jesús.

Tatu ña cahan ñiyivi ndya vaha ñi sii yo, tyindyee ñu sii yo cuhva cuan

⁴⁹Tacuan ta i catyi ra Juan:

Maestro, i ndyehe ndi minoo ra tava tatyí cuihna sihin zivi moo, zoco yivi ra tahan ndi cuu ra. Ta i catyi maa ndi sihin ra vatyí ma zavaha ra tacuan.

⁵⁰Ta i catyi ra Jesús sihin ra: Ña vaha sa ñá saha ndo. Vatyí tatu ña cahan ñiyivi ndya vaha ñi sii yo, tyindyee ñu sii yo.

Catyí ra Jesús vatyí ña vaha cuhva sica iñi ra Jacobo ta ra Juan

⁵¹Ta sa cuñi saa quívi cunanuhu ra Jesús ndya gloriá, ityi i quisi ra. Yucuan cuenda cuñi ra Jesús cahun ra ñuu Jerusalén nu cua cuu ra. Ta i quihin ra ityi cuahan ra.

⁵²Ta i tasi ra tyiño ityi nuu ca nu cuahan ra, ta i quihvi ra i tasi ra minoo ñuu nu cu si Samaria vatyí cua nducu ra minoo nu cua quitatu ra Jesús.

⁵³Ta ñá saha ra samaritano sa cundyaa ra Jesús ñuu ra vatyí cuahan ra Jerusalén. (Ta ña cuu ndyehe ñiyivi samaritano sii ñiyivi ñuu Jerusalén.)

⁵⁴Ta cuhva sa sito ra Jacobo ta ra Juan vatyí ñá saha ra samaritano sa cundyaa ra ñuu ra ta i cuxaan ra ta catyi ra: Tata, ¿atu cuñun vatyí zavaha yo cuhva i zavaha ra Elías ta sa naha? Cuu caca yo sii ra Ndyoo nazaquisi ra ñúhu ziqui ñiyivi Samaria, ta cua cayu tandíhi ñu. Catyi ra.

⁵⁵Zoco xaan xaan i cahan ra Jesús sihin ra ta catyi ra: Taxi ñi ndo. Ña cutuñi iñi ndo ñaa tyiño vasi.

⁵⁶Ra i quisi ndya gloria cui, ta ña vasi zanei sii ñiyivi, vasi zacaqui sii ñu. Catyi ra. Ta ziqui cuahan coyo ra inga ñuu.

Ñu cuñi cundyico sii ra Jesús

⁵⁷Ta cuhva sa cuahan ra ityi, i catyi minoo ra sihin ra Jesús: Tata, cuñi cundyique suun vazú ndya maa cuohon.

⁵⁸Ta i catyi ra Jesús sihin ra: ¿Atu ndison? vatyí yuhvi, ñahñi sa iyo sii. Iyo vehe ñicuii, ta iyo taca zaa. Zoco ra i quisi ndya gloria ñahñi vehe ra iyo.

⁵⁹Tacuan ta i catyi ra Jesús sihin inga ra: Cundyicon sii. Zoco i catyi ra cuan: Tata, cuatro ndya nacuu zuti, ta ziqui cua cundyique suun.

⁶⁰Ta i catyi ra Jesús sihin ra: Ña vaha sa ñoho xaan iñun tuhun ñiyivi suun. Natihi ñiyivi ña sito sii ra Ndyoo sii tahan sihi sihin ñu sisi ñuhu, zoco yoho cuahan ta nacatyun sihin ñiyivi cuhva ndyaca ñaha ra Ndyoo.

⁶¹Tacuan ta ziqui i catyi inga ra sihin ra Jesús: Tata, cua cundyique suun, zoco cuhvon sa cunuhu xihne cua naquehin sihin ñiyivi sii.

⁶²Zoco i catyi ra Jesús sihin ra: Yoo ra quisaha zatyíño ra tyiñe ta ndu-uu iñi ra, ma cuu quihvi ra nu ndyaca ñaha ra Ndyoo.

Tasi ra Jesús sii uñi xico usi tahan ra cua nacatyí Tuhun Ndyoo sihin ñiyivi

10 Sa yaha cuan ta ziqui i casi ra Jesús uñi xico usi tahan ca ra. Ta i tasi ra sii ra ityi nuu ra. Uu uu ra cuahan tandíhi ñuu ta tandíhi ityi nu cua cahun ra Jesús cuee ca.

²Ta i catyi ra sihin ra: Tañi minoo itu cahnu xaan, tacuan iyo tyiño zavehi. Zoco ña cuaha muzu iyo. Yucuan cuenda caca ndo sii ra Ndyoo natasi ca ra muzu vatyi cua tyindyee ra sihin tyiño, ta cua nacatyi tucu ra Tuhun Ndyoo sihin ñiyivi.

³Cuahan ndo ta ma naa iñi ndo vatyi tañi mvee ticatyi lee cuu ndo, ta tasi sii ndo nu yucu xaan ina nduvahu.

⁴Ta ma cuizo ndo xuhun nu sa quihhi xuhun ndo a inga ndisa ndo. Zanumi ndo, ta ma cucuee xaan ndo ityi sa natuhun ndo sihin ñiyivi.

⁵Ta yoo sii vehe saa ndo, sa xihna ñi catyi ndo: “Nacoo sa taxi sa saha ra Ndyoo sii ndo.” Catyi ndo.

⁶Ta tatu ndisa vatyi iyo ñiyivi vaha vehe cuan, cua ndoo sa vaha sihin ñu. Zoco tatu yoñi ñu vaha añima, ma ndoo sa vaha sihin ñu.

⁷Ta minoo ñi vehe nu cua saa ndo, yucuan ndoo ndo. Casi ndo ta coho ndo ñaa sa saha maa ñu sii ndo. Vatyi minoo ra zatyiño, iyo cuhva sii ra sa ñihi ra sa casi ra. Ta ma quita ndo vehe nu ndyaa ndo ta cundyaa ndo ziin ziin vehe.

⁸Ta ñaa ñi maa ñuu saa ndo, tatu vaha cahan ñu sihin ndo, casi ndo ñaa sa cua cuhva ñu sii ndo.

⁹Zanduvaha ndo sii ñiyivi huhu ñuu cuan, ta catyi ndo sihin ñiyivi: “Sa cuñi saa cuhva cundyaca ñaha ra Ndyoo.”

¹⁰Zoco tatu quihvi ndo minoo ñuu ta ña tiin cuenda ñu sii ndo, quita ndo ityi cahnu ta catyi ndo sihin ñu:

¹¹“Ndyaa cuhva ndyaa ñiyaca ñuu ndo sa iñi saha ndi ta cua tava ndi

sii si. Minoo zeña cuu si vatyi cua ndoo cuatyi ndo ziqui ndo. Zoco coto ndo vatyi sa cuñi quisi quivi cundyaca ñaha ra Ndyoo.” Tacuan catyi ndo sihin ñu. Catyi ra Jesús.

¹²Ta catyi tucu ra Jesús sihin ra: Ta catyi ndo vatyi quivi cua tasi tuñi ra Ndyoo sii ñiyivi, ñihi ca cua tasi tuñi ra sii ñiyivi ñuu ña tiin cuenda sii ndo ta ziqui ca ñiyivi ñuu Sodoma.

**Cua ndyehe xaan ñiyivi
tundoho vatyi ña tyaa ñu
yahvi sa cahan ra Jesús**

¹³Tacuan ta i catyi ra Jesús: Ndahvi ndoho ñiyivi ñuu Corazín. Ta ndahvi ndoho ñiyivi ñuu Betsaida vatyi ña zama ndo cuhva iyo ndo vazu ndyehe ndo sa ndyityi nahnu. I zanaa ra Ndyoo sii ñiyivi ñuu Tiro ta ñuu Sidón ta sa naha sa cuenda cuatyi ñu. Zoco tatu sa i ndyehe maa ñu sa ndyityi nahnu tañi sa ndyehe maa ndo, cua zandoo ndisa cuii ñu cuatyi ñu, ta cua zama ñu cuhva iyo ñu, ta cacu ñu.

¹⁴Yucuan cuenda, ndoho ñiyivi ñuu Corazín ta ñiyivi ñuu Betsaida, ñihi ca cua tasi tuñi ra Ndyoo sii ndo ta ziqui sii ñiyivi ñuu Tiro ta ñuu Sidón cuan.

¹⁵Ta ndoho ñiyivi ñuu Capernaum, sica iñi maa ndo vatyi cua ndaa ndo ndyaa andivi, zoco cua noo ndo ndyaa andyaya vatyi ña tyaa ndo yahvi sii Tuhun Ndyoo.

¹⁶Ta i catyi ra Jesús sihin sa uñi xico usi tahan ra cuan: Ñiyivi tyizoho sa cahan maa ndo, tañi tyizoho tucu ñu sa cahan mi cuu si. Ta ñiyivi ña tyaa yahvi sii maa

ndo, ña tyaa tucu ñu yahvi sii mi. Ta tatu ña tyaa ñu yahvi sii mi, ña tyaa ñu yahvi sii ra i tasi sii.

Nasaa coyo sa uñi xico usi tahan ra i tasi ra Jesús

¹⁷Tacuan ta cuee ca i nasaa coyo sa uñi xico usi tahan ra cuan, ta zii xaan cuñi ra, ta catyi ra sihin ra Jesús: Tata, ndya cuhva ndya taty cuihna ta tyaa si yahvi sa cahan ndi tatu cahan ndi zivun. Catyi ra.

¹⁸Tacuan ta i catyi ra Jesús sihin ra: I ndyehi cuhva i canacava cuihna cu nuu sa nañi Satanás ndya andivi. Tañi caa minoo tasa zavi; tacuan caa cuhva canacava ra.

¹⁹Ta sehi tundyee iñi sii maa ndo, ta cuu zahacanaa ndo ziqui tandihi cuhva sa iyo sii cuihna. Ta cuu cuañi ndo ziqui coo ta ziqui tizuhma, ta ñahñi maa sa cuu zañicuehe sii ndo.

²⁰Zoco ma zii xaan cuñi ndo vaty cuu tava ndo taty cuihna cuan. Zii ca cuñi ndo vaty sa ndyaa zivi ndo nu libro ra Ndyoo andivi.

Zacahnu ra Jesús sii ra Ndyoo vaty cuaha xaan sa zañaha ra Ndyoo sii ñiyivi ndahvi

²¹Cuhva cuan ta zii xaan i cuñi ra Jesús zacuu Taty Ii, ta i catyi ra: Zacahnu xein suun Ndyoo Zuti. Yoho ndyaca ñohon andivi ta ñuu ñiyivi. Tyixehun sa siñi tuñi suun sii ñiyivi sica iñi vaty sito xaan ñu, ta zañohon sii si sii ñu cuu tañi sa ndyihii ñuu ñiyivi ya. Tacuan zavohon vaty tacuan cuñi moo. Catyi ra Jesús.

²²Ta i catyi ra Jesús sihin tandihi ra zatyño tyiño ra: Saha maa ra

Ndyoo Zuti tandihi sa iyo sii ra sii mi. Ta yoñi sa sito sii. Maa ñi ra Ndyoo Zuti cuu ra sito sii. Ta maa ñi mi sito sii ra Ndyoo Zuti. Yoñi inga ra sito sii ra sa ndisa cuii. Ta zañehi sii yoo ra cuñi, cuhva iyo Zuti sa ndisa.

²³Ta ziqui i nandyehi ra Jesús sii ra i casi ra, ta i catyi ra iin ñi sihin maa ra: Zii xaan cuu sii maa ndo vaty ndyehi ndo tandihi sa ndyehi ndo.

²⁴Vaty catyi sihin ndo vaty cuaha xaan rey ta ra profeta ta sa naha, i cuñi xaan ra ndyehi ra sa ndyehi maa ndo vaty, zoco ñá ndyehi ra sii si. Ta i cuñi xaan ra cuiñi ra sa siñi maa ndo, ta ñá siñi ra sii si.

Zacuaha ra Jesús vaty tahan si tyindyee yo sii ñiyivi ndya vaha ñi

²⁵Tacuan ta i cahan minoo ra maestro cuenda ley hebreo. I cuñi ra nducu coto ihñi ra sii ra Jesús, ta i ndaca tuhun ra sii ra: Maestro, ¿yozo caa zavehi ta ñihi tahvi añime?

²⁶Ta i catyi ra Jesús sihin ra: ¿Ñaa sa catyi ley? ¿Ñaa sa cahvun yucuan?

²⁷Ta i nacahan ra cuan, ta catyi ra: Catyi si vaty cuñi xaan yo sii ra Ndyoo sihin tandihi cuii añima yo, sihin sa nii iñi yo, sihin tandihi tundyee iñi sii yo, ta sihin tandihi sa siñi tuñi sii yo. Ta catyi tucu ley vaty cuñi si sa cuñi xaan yo sii inga tahan yo tañi cuñi yo sii maa yo. Tacuan catyi si. Catyi ra cuan.

²⁸Ta i catyi ra Jesús sihin ra: Ndisa sa cohon. Tacuan zavohon, ta cua ñihi tahvi añimon. Catyi ra Jesús.

²⁹Zoco ra maestro cuenda ley hebreo cuan, i cuñi ra zañaha ra vaty i vaha cuhva i ndaca tuhun ra. Yucuan cuenda i catyi tucu ra: Zoco ¿yoo ra cuu tehin?

³⁰Ta i nacahan ra Jesús ta catyi ra: I quita minoo ra ñuu Jerusalén ta cuahan ra ndya ñuu Jericó. Ta i tahan ra sii ra zuhu. Ta i zuhu ra tandiñi cuui sa ndyizo ra ndya cuhva ndya zahma ra, ta i cañi xaan ra sii ra ndya cuhva sa vaty i cahñi ra sii ra. Ta ziqui i zandoo ra sii ra.

³¹Tacuan ta i yaha minoo ra cu zutu ityi cuan. Ndyehé ra sii ra catuu ra yucuan, ta i yaha ra ndya zava.

³²Ta ziqui i yaha tucu inga ra cuenda vehe ñuhu. Minoo ra tyindyee sii ra cu zutu cuu ra. Zoco i saa ra, ta i ndyehé ra sii ra catuu ra yucuan, ta ziqui i yaha ra ndya zava.

³³Tacuan ta i yaha minoo ra samaritano sihin burro zono ra ityi cuan. Ta i ndyehé ra sii ra, ta i cundahvi xaan iñi ra sii ra.

³⁴Ta i noo ra burro zono ra, ta i zavaha ra tata sii ra. I tyihi ra azetye ta vino nu cahvi ra, ta i nazucu ra zahma sii ra, ta i tyizo ra sii ra sata burro zono ra. Ta i quihin ra sii ra ta i sinducu ra minoo nu cua cundyaa ra ta zacuu ca ra tata sii ra.

³⁵Ta inga quivi i cuñi ra samaritano cuan cahun ra, ta i tava ra xuhun ta saha ra sii ra xu vehe. Ta i catyi ra sihin ra: “Zacuendon sii ra ya. Ta ñaa ca sa cua zanaa ndo sihin ra, yuhvi cua nacuhve sii ndo naquisi inga saha.” Tacuan

i catyi ra ta cuahan ra. Catyi ra Jesús.

³⁶Tacuan ta ziqui i ndaca tuhun ra Jesús sii ra maestro cuenda ley cuan ta catyi ra: Sisi sa uñi tahan ra cuan, ¿yoo ra cuu ra tahan ra ndahvi cuan?

³⁷Ta i catyi ra maestro cuan: Ra sa cundahvi iñi sii ra. Ta i catyi ra Jesús sihin ra: Cuahan, ta zuun ñi cuhva cuan zavaha tucu moo.

Sahan ra Jesús vehe ña Marta ta ña María

³⁸Ta cuahan ra Jesús minoo ityi, ta saa ra minoo ñuu. Ta yucuan ndyaa minoo ñaha sa nañi Marta. Ta i tiin cuenda ña sii ra vehe ña.

³⁹Ta iyo minoo cuhu ña Marta. Nañi ña María. Ta i sicundyaa ña saha ra Jesús ta tyizoho ña sa cahan ra.

⁴⁰Zoco cuaha xaan tyiño i zavaha ña Marta sa zavaha ña sa casi ra, ta i quisi ña nu ndyaa ra Jesús ta catyi ña sihin ra: Tata ¿atu ña sica iñi oo sa zandoo cuhi sii, ta zatyine maa tuhun ñi? Catyun sihin ña natyindyee ña sii.

⁴¹Zoco i catyi ra Jesús sihin ña: Marta, Marta, sica xaan iñun cuaha xaan cuhva.

⁴²Zoco iyo minoo ñi sa ñiñi xaan, ta sa i cutuñi vaha iñi ña María cuhva vaha cuan. Ta yoñi cua cuu quindyaa cuhva cuan sii ña. Catyi ra Jesús.

Zañaha ra Jesús yozo caa caca tahvi yo sii ra Ndyoo

11 Ta minoo saha sa sica tahvi ra Jesús sii ra Ndyoo ta sa ndiñi sica tahvi ra, ta i catyi minoo

ra i casi ra sihin ra: Tata, zañohon sii ndi yozo caa caca tahvi ndi sii ra Ndyoo tañi i zañaha ra Juan sii ra i sica noo sihin ra.

²Tacuan ta i catyi ra Jesús sihin ra: Cuhva sa cua cahan ndo sihin ra Ndyoo tyehen catyi ndo: “Ndyoo Zutu ndi ra ndyaa andivi, ii xaan cuu zivi moo. Nasaa quivi cua cundyaca ñohon ihya ñuu ñiyivi. Nazavaha ñiyivi cuhva cuñi moo ihya ñuu ñiyivi tañi cuu si ndya gloria.

³Cuhvon sa siñi ñuhu sii ndi minoo minoo quivi.

⁴Ta zohon tucahnu iñi sii ndi sa cuenda cuaty ndi tañi maa ndi zaha ndi tucahnu iñi sii ñiyivi zavaha sa ña vaha sihin ndi. Ma cuhvon sa nducu coto ihñi cuihna sii ndi coto zavaha ndi sa ña vaha.” Tacuan i zacuaha ra Jesús sii ra.

⁵Ta ziqui i catyi tucu ra: Tatu maañuu cua soon vehe amigun ta catyun sihin ra: “Xaa, cuhva noo uñi tahan pan sii.

⁶Vaty nacao saa ra tehin. Sica xaan i quisi ra, ta ñahñi maa sa cuhve casi ra.”

⁷Ta ndya sisi vehe cua cahan amigun, ta cua catyi ra: “Ma zayangon sii. Sa ndazi cutu yuvehi. Ta quixi sa ndyih zehi. Ta coto ndoyo si, ma cuu nduvite ta cuhve suun vityi.” Tacuan cua catyi ra suhun.

⁸Ta catyi suhun vaty vazu amigun sii ra cuan, zoco ma nduvita ra ta cuhva ra sa yaty. Zoco tatu ndoon yucuan ta ndita ñi cacon sii ra, tacuan ta cua nduvita ra ta cuhva ra yozo tahan si cuñun.

⁹Ta tacuan tucu maa ndo. Caca ndo sii ra Ndyoo, ta cua cuhva ra

sa sica ndo. Nanducu ndo, ta cua nañihi ndo. Cati ndo yuvehe, ta cua nuña si.

¹⁰Vaty tandihi ndoho ra sica, cua ñihi ndo. Ta tatu nanducu ndo, cua nañihi ndo. Ta tatu cati ndo yuvehe, cua nuña si.

¹¹Ndoho, ra cuu zutu sa ndyih, tatu cua caca zehun minoo pan ÷atu cua cuhva ndo minoo yuu sii ra? Ña tacuan. A tatu caca ra minoo tyiyaca ÷atu cua cuhva ndo minoo coo?

¹²A tatu cua caca ra minoo ndivi ÷atu cua cuhva ndo minoo tizuhma? Ña tacuan.

¹³Ñiyivi quiñi xaan cuu maa ndo, zoco sito ndo yozo caa cuhva ndo sa vaha sii zehe ndo; vaha xaan ca cua zavaha ra Ndyoo, ta cua cuhva ra Taty li sii ñiyivi sica sii ra.

**Caty ra xaan iñi sii ra
Jesús vaty zatyño ra sihin
tundye iñi sii cuihna**

¹⁴Tava ra Jesús minoo taty cuihna sii minoo ra ñehe. Ta cuhva sa quita taty cuihna cuan ta i cuu nacahan ra ñehe. Ta iyo xaan i cuñi ñiyivi.

¹⁵Zoco zuhva ñu i catyi ñu: Tava ra ya taty cuihna sihin tundye iñi ra Beelzebú, ra cu nuu sii cuihna. Caty ñu.

¹⁶Ta inga ñu nducu coto ihñi ñu sii ra Jesús, ta i sica ñu sa zañaha ra minoo zeña ity andivi.

¹⁷Zoco i sito ra Jesús cuhva sica iñi ñu, ta i catyi ra sihin ñu: Tatu sahñi tahan xaan ñiyivi minoo ñuu, ndaha cua tivi ta naa ñuu cuan. Ta tacuan tucu minoo vehe ñiyivi, tatu sahñi tahan ñu sihin tahan ñu,

yaty xaan cua ndihi cuhva vaha nu yucu ñu.

¹⁸Ta ma cahñi tahan ra cu nuu sii cuhna sihin inga cuhna vatyi tatu tacuan zavaha si, yaty xaan cua ndihi cuhva iyo sii si. Ma tava cuhna sii cuhna. Ta catyi ndo vatyi yuhvi tave sii cuhna sihin tundyee iñi sii ra cu nuu sii cuhna.

¹⁹Zoco tatu yuhvi tave sii cuhna sihin tundyee iñi ra Beelzebú, tacuan tucu zavaha ra ndyico sii maa ndo. Zoco maa ra cuan cua nacaty sihin ndo vatyi ma tava minoo cuhna sii inga cuhna.

²⁰Ta yuhvi tave sii cuhna sihin tundyee iñi maa ra Ndyoo. Ta cuñi si catyi si vatyi ndisa cuii sa saa cuhva ndyaca ñaha ra Ndyoo.

**Zañaha ra Jesús vatyi ñihi
ca tundyee iñi iyo sii ra
Ndyoo ta ziqui sii cuhna**

²¹Tatu minoo ra ñihi xaan zacuenda ra vehe ra sihin mityi ra, yoñi cuu quihin ndaha tyiño ra.

²²Zoco tatu quisi inga ra ñihi ca ta ziqui ra cuan ta quindyaa ra mityi ra, ma cuu ca zacacu ra sii ra. Ta cuu quihin inga ra ndaha tyiño ra ta zasa ra sii ra tahan ra.

²³Tatu ña zatyíño ñiyivi sihin, zativi ñu tyiñe. Ta tatu ma tyindyee ñu sii, sa nacaty Tuhun Ndyoo sihin ñiyivi, cuñi si catyi si vatyi ña saha ñu sa coto ñiyivi tuhin.

**Cuhva nandisi tucu taty
ña vaha inga saha tatu naa
iñi ñiyivi sii ra Ndyoo**

²⁴Tatu quita minoo taty ña vaha sii minoo ra, sica noo taty cuhna cuan nu ityi xaan, ta nanducu si

nu cua quitatu si. Zoco ña nañihi si nu quitatu si, ta catyi si: “Cunuhu tuqui ndya vehi nu i quite”, catyi si.

²⁵Tacuan ta nasaa si añaima ra cuan nu i quita si. Ta ndyehe si vatyi ndii xaan; yoñi ndyaa yucuan.

²⁶Ta ziqui cuahan si, ta quihin si usa tahan ca taty cuhna xaan ca ta ziqui maa si. Ta ndihvi tandihi taty cuhna cuan añaima ra cuan, ta ndoo si. Ta yaha ca cuhva cua nanduu ra cuan ta ziqui sa xihna ñi.

Ñiyivi sa zii xaan cuñi sa ndisa

²⁷Ta ñii ñi sa cahan ra Jesús cuhva cuan, ta i cana saa minoo ñaha sa ñoho ticui ñiyivi, ta catyi ña: Zii xaan cuu sii ñaha i zacacu suun, ñaha i zacaxi suun.

²⁸Zoco i catyi ra Jesús sihin ña: Ndison sa cohon, zoco zii xaan ca cua cuu sii ñu siñi Tuhun Ndyoo ta zavaha ñu sii si.

**Maa maa ñi sa ndyityi cuñi
ñiyivi ña vaha ndyehe ñu**

²⁹I siconduu cuii ñiyivi nu ndyaa ra Jesús, ta i catyi ra sihin ñu: Quiñi xaan iyo ñiyivi iyo vityi. Cuñi xaan ñu ndyehe ñu minoo zeña, zoco ñahñi inga ca zeña cua ndyehe ñu ta ziqui sa i cuu sa cuenda ra Jonás.

³⁰Ra Jonás i cuu ra minoo zeña sii ñiyivi ñuu Nínive, ta tacuan tucu cua cuu ra i quisi ndya gloria sihin ñiyivi sa iyo vityi.

³¹Quivi cua tyicuhva ra Ndyoo sii ñiyivi, cua nandoto minoo ñaha sa sindyaca ñaha sii ñiyivi ndya siyo tyañuhu ta sa naha. Ta maa ña cua tyaa cuatyí sata maa ndo vatyi sa ndisa iyo cuatyí ndo, vatyi

ña tyizoho ndo sa cahan Zehe ra Ndyoo. Ta maa ña, sica xaan i sahan ña i sityizoho ña sa siñi tuñi sa saha ra Ndyoo sii ra rey Salomón. Ta vityi ndyaa inga ra cahnu ca ta ziqui ra Salomón sihin ndo, ta ña tyizoho ndo sa quehin.

³²Ta tacuan tucu ñiyivi ñuu Nínive, cua tyaa ñu cuatyí sata ndo quívi cua zandaa ra Ndyoo tyiño cuenda ñiyivi vatyí i tyizoho ñu sa cahan ra Jonás, ta i ndu-uu iñi ñu cuatyí ñu. Ta cahnu ca mi ta ziqui ra Jonás, ta ña cuñi ndo tyizoho ndo sa quehin.

Nazaha vaha yo cuenda sii yo coto ñahñi sa ndisi ra Ndyoo iyo sii yo

³³Yoñi yo cua tyaa yo minoo tyuma ta tyihi yo sii si minoo nu xehe a sisi minoo caja vatyí ñúhu cuan tahan si cozo si minoo nu zucu vatyí tacuan ta ndisi ndyehe ñiyivi quihvi sisi vehe.

³⁴Siti nuu yo cuu tañi minoo sa zandisi sii yo ta cuu ndyehe yo nu cuahan yo. Tatu vaha siti nuu yo, ndisi ndyehe yo nu cuahan yo. Ta tacuan tucu añaima yo, tatu iyo sa ndisi sa saha ra Ndyoo añaima yo, vaha ñiyivi cuu yo. Tatu ñahñi sa ndisi sa saha ra Ndyoo iyo añaima minoo ñiyivi, yivi ñiyivi vaha cuu ñu. Tañi minoo ra cuua cuu ñu.

³⁵Yucuan cuenda zaha ndo cuenda sii ndo tatu ndyaa sa ndisi ra Ndyoo sihin ndo a sa ñaa.

³⁶Tatu situ cuii sa ndisi ra Ndyoo añaima ndo, nu siin ta ma cuu zavaha ndo sa ña vaha. Ñahñi ca sa quiñi ta sa ña vaha iyo sii ndo. Tatu sino iñi ndo, cuu si tañi minoo ñúhu cahnu zandisi sii ndo.

Tyaa ra Jesús cuatyí sata ra fariseo ta ra maestro cuenda ley hebreo

³⁷Cuhva sa ndihi cahan ra Jesús ta i cana minoo ra fariseo sii ra vatyí cua casi ra xita vehe ra. Ta cuahan ra Jesús vehe ra. Ta i sicundyaa ra mesa.

³⁸Ta i ndyehe ra fariseo cuhva zavaha ra. Ta iyo xaan i cuñi ra vatyí ña zavaha ra Jesús costumbre sa nacatya xaan ra ndaha ra tañi tuhva maa ñu zavaha cuee ca sa casi ñu xita.

³⁹Ta i catyí ra Jesús sihin ra: Ndoho ra fariseo nacatya xaan ndo sata vaso ta sata coho, zoco sisi añaima maa ndo yaha xaan quiñi iyo ndo ta zuhu xaan ndo.

⁴⁰Tondo xaan iyo maa ndo. I zavaha ra Ndyoo sata vaso ta coño ñuhu maa ndo, zoco ¿atu sica iñi ndo vatyí ña zavaha tucu ra añaima ndo?

⁴¹Cuñi si sa cuhva ndo xuhun sii ñiyivi ndahvi ta zavaha ndo sa vaha sihin ñu. Tacuan ta cua ndundii tucu añaima ndo.

⁴²Ndahvi ndoho ra fariseo vatyí saha ndo diezmo sii ra Ndyoo tandihí yucu sa tasi ndo tañi menta ta ruda ta inga sa sasi ndo, zoco ña zavaha ndo sa ñiñi ca vatyí ña zavaha ndo sa ndoo sihin ñiyivi, ta ña cuñi ndo sii ra Ndyoo sa ndisa cuii. Ta yucuan cuu sa ñiñi ca, ta ma naa iñi ndo sa cuhva ndo diezmo, ndihi ca.

⁴³Ndahvi ndoho ra fariseo vatyí cuñi ndo cundyaa ndo tyayu vaha vehe ñuhu. Ta cuñi ndo sa zacahnu ñiyivi sii ndo nuyahvi.

⁴⁴Ndahvi ndoho ra maestro cuenda ley ta ndoho ra fariseo vatyí

zaha ndo tuhun vatyi vaha xaan ndo ta ña ndisa. Cuu ndo tañi ndiyi sa ñoho sisi ñaña, ta yaha ñiyivi ziqui si, zoco ña sito ñu ñaa sa ñoho. Catyi ra Jesús.

⁴⁵Tacuan ta i nacahan minoo ra maestro cuenda ley sihin ra, ta catyi ra: Maestro, tatu cohon cuhva cuan, tyaa tucun cuatyí sata maa ndi.

⁴⁶Ta i catyi tucu ra Jesús sihin ra: Ndahvi tucu ndoho ra maestro cuenda ley vehe ñuhu vatyi zanducuaaha ca ndo ley i tasi ra Ndyoo ta sa naha, ta ña tahan si zavaha ndo tacuan. Yoñi sa cuu zavaha tandihi si. Ta nu maa ndo ta ña zavaha ndo tandihi si vatyi sa sito ndo vatyi ma cuu.

⁴⁷Ndahvi ndoho vatyi zandutyiqui xaan ndo ñaña cuenda ra i cuu profeta ta sa naha, ta zuun ñi ñiyivi sahnu sii ndo ta sa naha i sahñi ñu sii ra cuan.

⁴⁸Sihin cuhva zavaha ndo zañaha ndo vatyi ndoo ndo vaha cuhva i zavaha ñiyivi sahnu sii ndo ta sa naha vatyi maa ra i sahñi sii ra profeta, ta maa ndo zandutyiqui xaan ndo ñaña ra profeta cuan.

⁴⁹Yucuan cuenda i catyi ra Ndyoo ta sa naha: Cua tasi sii ra cua cahan tuhun sa cua cuhve sii ra, ta cua tasi sii ra cua tave tyiño sa zatyiño ra tyiño. Ta cua cahñi ñiyivi sii zuhva ra, ta sii inga ra cua zayanga xaan ñu.

⁵⁰Ta ndisa vatyi tacuan zavaha ndo. Ta cua tasi tuñi ra Ndyoo sii maa ndo sa cuenda tandihi ra profeta i sahñi ñiyivi ta sa naha ta ndya cuhva ndya vityi.

⁵¹Ndya cuhva ndya ñiñi ra Abel, ra i sahñi ra Caín yañi ra, ta ndya cuhva ndya ñiñi ra Zacarías, ra i sahñi ñiyivi sisi vehe ñuhu, ta catyi sihin ndo sa ndisa cuii vatyi cua tasi tuñi ra Ndyoo sii ñiyivi iyo vityi sa cuenda tandihi si cuan.

⁵²Ndahvi ndoho ra maestro cuenda ley vehe ñuhu vatyi i tyixehe ndo ndaha ticui cuenda yuvehe nu quihvi ñiyivi ityi ra Ndyoo. Ñá quihvi maa ndo ityi cuan, ta inga ñiyivi sa cuñi quihvi, ña saha ndo sa quihvi ñu.

⁵³Sa ndihi cahan ra Jesús tuhun cuan, ta ra maestro cuenda ley ta ra fariseo i cuxaan xaan ra sihin ra, ta i quisaha nducu tuhun xaan ra sii ra cuaha xaan cuhva

⁵⁴vatyi nducu ra cuhva sa cahan ra Jesús minoo cuhva ña vaha. Ta ziqui cua tyaa ra cuatyí sata ra.

Nacatyí ra Jesús vatyi ma cuu tyixehe yo cuatyí yo

12 Cuenda mil ñiyivi i titahan ndya cuhva catyihí tahan ñu vatyi cuaha xaan ñu. Ta sa xihna ñi i catyi ra Jesús sihin ra i casi ra: Zacuenda vaha ndo sii ndo sihin cuhva iyo ra fariseo vatyi ra zandavi ñaha cuu ra.

²Vatyi tandihi sa ña vaha sa zavaha ñiyivi ta tyixehe ñu sii si, cuee ca ta cua quita si nu ndisi, ta cua coto inga ñiyivi sii si.

³Yucuan cuenda ñaa ndihi ca sa cahan xehe ndo sisi vehe ndo, cua coo quivi cua cuiñi tandihi ñiyivi sii si. Ta vazu xehe xaan cahan ndo minoo tuhun, zoco cua coto tandihi cuii ñiyivi sii si cuee ca.

**Cuñi si sa yuhu yo sii ra
Ndyoo ta yivi sii ñiyivi**

⁴Ta catyi sihin ndoho ra cuu amigi vatyi ma yuhu ndo sii ra cuu cahñi sii coño ñuhu ñi ndo vatyi yaha cuan ta ñahñi ca sa cuu zacuu ra.

⁵Zoco cua catyi sihin ndo yoo sii tahan si cuyuhu ndo. Cuyuhu ndo sii ra sa cuu cahñi sii ndo sa ndisa cuii ta zacuhun ra sii ndo andyaya.

⁶Ña yahvi ndyaa zaa. Cuu zata yo ohon tahan ti sa uu peso. Ta ña naa iñi ra Ndyoo sii numinoo ti.

⁷Ta sito ra Ndyoo yozo tahan ixi xiñi ndo iyo. Yucuan cuenda ma yuhu ndo sii ra cahñi sii ndo vatyi yahvi xaan ca ndyaa maa ndo ta ziqui ca cuaha xaan zaa.

**Ma yuhu yo cahan yo Tuhun
Ndyoo sihin ñiyivi**

⁸Ta catyi sihin ndo vatyi tandihi ndo sa nacatyí ndo sihin ñiyivi vatyi sito ndo sii, yuhvi cua catyi sihin ángel ra Ndyoo ndya gloria vatyi site sii ndo. Ta ra i quisi ndya gloria cui.

⁹Zoco yoo ra catyi vatyi ña sito ra sii, yuhvi cua catyi ityi nuu ángel vatyi ña site sii ra.

¹⁰Ra i quisi ndya gloria cui, ta vazú cahan ñiyivi ndya vaha ñi sii, zoco cua zaha ra Ndyoo tucahnu iñi sii ñu. Zoco tatu cahan ñiyivi ndya vaha ñi sii Tatyí Ii ra Ndyoo, ma zaha ca ra Ndyoo tucahnu iñi sii ñu.

¹¹Ta cuhva cundyaca ñiyivi sii ndo sisi vehe ñuhu a nuu ra cu juez a ra cu tyiño, ma caca xaan iñi ndo ñaa sa cua cahan ndo.

¹²Vatyi zuun ñi caa cuhva cuan cua cuhva Tatyí Ii tuhun cua cahan ndo.

**Ica xaan tatu caca xaan iñi
yo yozo caa ñihi yo xuhun**

¹³Cuaha xaan ñiyivi i siyucu sihin ra Jesús, ta minoo ra ndihi sihin ñu i catyi ra sihin ra Jesús: Maestro, catyun sihin yañi vatyi natahvi zava ra ndaha tyiño sa zandoo zutu ndi sii ndi.

¹⁴Tacuan ta i catyi ra Jesús sihin ra: Xaa, ¿yoo ra saha tyiño sii sa cui juez a cui minoo ra sa tahvi zava ndaha tyiño?

¹⁵Ta i catyi ra Jesús sihin tandihi ñiyivi: Zaha vaha ndo cuenda ta ma ndyiyo iñi ndo ndaha tyiño vatyi ña siñi ñuhu sa coo cuaha xaan ndaha tyiño yo ta coo vaha yo.

¹⁶Ta i cahan ra Jesús ziqui minoo cuhva sihin ñiyivi, ta i catyi ra: Sicoo minoo ra cuca xaan, ta vaha xaan i cuu ndaha tyiño ra.

¹⁷Ta i sica iñi ra sihin añima ra, ta i catyi ra: “¿Yozo caa cua zavehi? Ñahñi nu quihí tandihi ndaha tyiño.

¹⁸Zoco tyehen cua zavehi. Cua cani yaca ndyihí, ta cua zavaha que sa nahnu ca. Ta yucuan cua quihí tandihi ñiñi.

¹⁹Tacuan ta ma zatyíño que cuaha xaan cuiya. Cua quitati, ta zii xaan cua cuñi. Cua casi vehi ta coho vehi.” Tacuan i sica iñi ra.

²⁰Zoco i catyi ra Ndyoo sihin ra: “Tondo xaan sica iñun vatyi vityi sa cuaa cua cuun. Ta ndaha tyiño sa sicumi vaha xoon, cua ndoo si sihin inga ñiyivi.”

²¹Ta tacuan iyo ñiyivi sa zacaya xaan ndaha tyiño sa cuenda ñi maa ñu, ta ñahñi maa sa iyo sii ñu nu ndyaa ra Ndyoo. Catyi ra Jesús.

**Ma caca xaan iñi yo sa cuenda
ñaa sa siñi ñuhu sii yo**

²²Ta i catyi ra Jesús sihin ra i casi ra: Catyi sihin ndo vatyi ma caca

xaan iñi ndo yozo caa cua ñihi ndo sa casi ndo ñuu ñiyivi ya. Ta ma caca xaan iñi ndo yozo caa cua ñihi ndo zahma quihi ndo.

²³Vatyi iyo inga sa siñi ñuhu ca sii yo ta ziqui sa casi yo ta sa quihi yo.

²⁴Ndyehe ndo cuhva iyo zaa. Ña tasi ti, ta ña naquihin ti tyiño zacuu ti, ta ña tyihi vaha ti ndaha tyiño ti. Zoco sasi ti vatyi maa ra Ndyoo saha sa casi ti. Ta ñiñi xaan ca cuu maa ndo ityi nuu ra Ndyoo ta ziqui zaa cuan.

²⁵¿Ta yoo ndo cuu nduzucu ca ndo siin ca tatu caca xaan iñi ndo sa cuenda si? Ma cuu ca.

²⁶Ta tatu ma cuu zavaha ndo numinoo cuhva luhlu cuan, ¿ña cuenda sica xaan iñi ndo sa cuenda tandihi inga cuhva?

²⁷Zaha ndo cuenda cuhva iyo ita vatyi ña tavi si ta ña cono si iza, zoco catyi sihin ndo vatyi vazú cuca xaan i cuu ra Salomón ta tyaqui xaan zahma ra, zoco ña tyaqui ca si ta ziqui minoo ita cuan.

²⁸Ta tatu zandutyaqui xaan ra Ndyoo sii tu-ita sa iyo vityi ta ityaan cua nduu tu nducu ta cayu tu, tyaqui xaan tucu zahma cua cuhva ra sii maa ndo. Zoco maa ndo ña sino vaha iñi ndo sii ra.

²⁹Ma caca xaan iñi ndo ta nanducu ndo sa casi ndo ta sa coho ndo. Ta ma caca xaan iñi ndo tatu cua cuhva ra Ndyoo sii si a ma cuhva ra.

³⁰Vatyi sica xaan iñi ñiyivi ña sito sii ra Ndyoo sa cuenda sa casi ñu. Zoco ma caca xaan iñi maa ndo tuhun cuan vatyi sito Zutu ndo vatyi siñi ñuhu si sii ndo.

³¹Vaha ca nducu ndo cuhva yozo caa cua cuhva cuenda ndo sii ndo sii ra Ndyoo vatyi cundyaca ñaha ra sii ndo. Ta tacuan ta cua ñihi ñdo tandihi cuii sa siñi ñuhu sii ndo.

Cuhva vaha xaan sa iyo ndya gloria

³²Ma yuhu ndo, mvee ticatyi zone. Vazu ña cuaha ndo zoco zii xaan cuñi Zutu yo, ta cua cuhva ra quihvi ndo nu ndyaca ñaha ra.

³³Xico ndo sa sii ndo ta cuhva ndo sii ñiyivi ndahvi. Tatu tacuan zavaha ndo, zacaya ndo sa vaha nu ndyaa ra Ndyoo. Ta yucuan ma ndihi sa vaha cuan vatyi ma cuu quihvi ra zuhu, ta yoñi tiquixi zativi sii si.

³⁴Nu ndyaa sa cuca ndo, yucuan cuu nu ndyaa ñanima ndo.

Cuñi si sa cundyaa listo yo

³⁵Cundyaa listo ndo, ta cuatu ndo quivi cua quisi inga saha.

³⁶Cuu ndo tañi minoo muzu sa ndatu listo sii patrón ra ñaa quivi cua nasaa ra sa cuahan ra minoo vico tindaha. Ta cayu ñuhu sisi vehe vatyi tatu nasaa patrón ta cati ra yuvehe, vatyi xaan cua nuña muzu yuvehe.

³⁷⁻³⁸Ta cuhva cuan zii xaan cua cuñi patrón ndyehe ra sii muzu ra vatyi ndatu listo ra ñaa ñi cuhva cua nasaa ra vazú sa cuaa a vazú ñaa ca. Ta cua tyaa ra sii muzu ra yumesa ta cuhva ra sa casi ra vatyi i ndatu ra sii ra. Ta zii xaan cua cuñi muzu cuan vatyi tacuan zavaha patrón ra sihin ra.

³⁹Ta coto ndo cuhva ya vatyi tatu cua coto minoo ra xu vehe

ñaa cuhva cua quihvi ra zuhu vehe ra, cua zacuenda xaan ra vehe ra. Ta ma cuzu ra. Ta ma cuhva ra sa nuña ra zuhu vehe ra ta zuhu ra ndaha tyiño ra.

⁴⁰Zuun ñi cuhva cuan cundyaa listo tucu maa ndo vatyí zana ñi iñi ndo ta cuhva cuan cua nasaa ra i quisi ndya gloria.

Muzu vaha ta muzu ña vaha

⁴¹Tacuan ta i ndaca tuhun ra Pedro sii ra Jesús ta catyi ra: Tata, ¿Yoo sii cuenda cohon tuhun ya? ¿Atu sa cuenda sa maa ñi maa ndi a sa cuenda tandihi ñiyivi?

⁴²Tacuan ta i nacahan ra Jesús, ta i catyi ra sihin ra: Muzu sa tyizoho sa cahan patrón ra, yucuan cuu muzu vaha vatyí zacuenda ra vehe patrón ra. Ta saha ra sa casi tandihi inga muzu minoo cuhva vaha.

⁴³Ta zii xaan cua cuñi muzu cuan tatu nasaa patrón ra cuhva sa zatyíño ra ta zavaha ra tandihi sa catyi patrón ra.

⁴⁴Sa ndisa catyi sihin ndo vatyí cua cuhva patrón ra sa cundyaca ñaha ra tandihi sa sii ra vatyí tyaa xaan ra yahvi sii patrón ra.

⁴⁵Zoco tatu sica iñi muzu cuan vatyí naha xaan cuahan patrón ra, ta yucuan cuenda quisaha cañi ra sii inga muzu ta sasi cuahyi ra ta sihi xaan ra ndixi ta siñi ra,

⁴⁶tacuan ta zana ñi iñi ra ta cua nasaa patrón ra minoo quivi sa ña ndatu ra sii ra. Ta cua tasi tuñi xaan patrón ra sii ra. Ta cua tahan si sii ra tañi cua tahan si sii ñiyivi ña sino iñi.

⁴⁷Ta minoo muzu sa sito ñaa sa cuñi patrón ra zavaha ra, zoco

ñā ndyaa listo ra ta ñā zavaha ra cuhva cuñi patrón ra, cuaha xaan tundoho cua zandyehē patrón ra sii ra.

⁴⁸Ta tatu ña sito minoo muzu ñaa sa cuñi patrón ra ta ña zavaha ra sii si, tahan si sa ndoho ra. Zoco zuhva ñi cua ndoho ra vatyí ña sito ra. Ta tatu saha ra Ndyoo cuaha ca sa siñi tuñi sii minoo ra, cuaha ca sa vaha cuñi si zavaha ra. Ta tatu cuaha ca tyiño ndyizo minoo ra, cuñi si vatyí ñihi ca zatyíño ra.

Ña cuu cu-iin ñiyivi sa cuenda ra Jesús

⁴⁹Tañi sa zatehin minoo ñúhu ñuu ñiyivi, yucuan cuu tyiño vasi. Ta ñúhu cuan cua zanduvaha si sii ñu sino iñi sii, ta cua zanaa si sii ñu ña sino iñi. Sa quisaha cayu ñúhu cuan, zoco cumañi zacayu que sii si.

⁵⁰Ta cuaha xaan tundoho cua ndyehi ndya cuhva ndya cua ndihi tyiño zacui.

⁵¹Sica iñi maa ndo vatyí vasi cuhve sa taxi ñuu ñiyivi, zoco ña tacuan. Vasi zacuziin sii ñiyivi.

⁵²Ta ndya vityi ta ityi nuu ca ihya cuu cuhva cua cuu si. Tatu ohon tahan ñiyivi iyo minoo vehe, uñi tahan ñu cua cahñi tahan sihin uu tahan ñu, ta uu tahan ñu cua cahñi tahan sihin uñi tahan.

⁵³Cua cahñi tahan zutu sa ndyihí sihin zehe ra ta zehe ra sihin zutu ra. Ta zihí ña cua cahñi tahan sihin zehe ña, ta zehe ña sihin zihí ña. Ta cua cahñi tahan tyizo ña sihin sono ña ta sono ña sihin tyizo ña.

Nacatyí ra Jesús sihin ñiyivi vatyí ña nacoto ñu vatyí sa ndyaa Zehe ra Ndyoo

⁵⁴Tacuan ta i catyi ra Jesús sihin ñiyivi yucu yucuan: Tatu ndyehē

ndo vatyi iñi ñaa vityi, catyi ndo vatyi cua coon zavi. Ta ndisa ndo sa cahan ndo.

⁵⁵Ta tatu ndyehe ndo vatyi vasi tatyí ityi tyañuhu, catyi ndo vatyi sa cua ndu-cañi. Ta tacuan cuu si.

⁵⁶Ra tondo xaan cuu maa ndo. Nacoto ndo sa iyo andivi ta nu ñuhu. ¿Yozo caa vatyi ña nacoto ndo ñaa tyiemvu cuu si vityi?

Nducu ndo cuhva coo sa taxi sii ndo sihin ra xaan iñi sii ndo

⁵⁷¿Ñaa cuenda ña cutuñi iñi ndo ñaa sa cuu sa ndoo?

⁵⁸Tatu iyo minoo ra cuñi ra cuatyí suhun ta cuhun sihin ra nu ndyaa ra cu tyiño, nducun cuhva nacoo vohon sihin ra cuee ca sa saa ndo nuu ra cu tyiño coto catyi ra cu tyiño vatyi cuhun vehe caa. Ta cua cuhva ra suun sii ra cu policia. Ta cua tyihi ra suun vehe caa.

⁵⁹Tatu tacuan cua cuu si, ma quiton ndya tyiyahvun tandihi sa tahan si tyiyahvun, (ta tacuan cua zavaha ra Ndyoo suhun andyaya tatu ma nduvohon sihin ra).

Cuñi si sa zama yo cuhva iyo yo

13 Cuhva cuan yucu zuhva ra nacatyí sihin ra Jesús cuhva i zavaha ra Pilato sihin zuhva ra Galilea. Catyi ra nacatyí sihin ra Jesús vatyi i tava ra Pilato tyiño sa cahñi zandaru sii ra Galilea cuan nii ñi sa saha ra ofrenda sii ra Ndyoo sisi vehe ñuhu. Ta i nazaca ra niñi ra cuan sihin niñi quití sa cuu ofrenda ra.

²Ta i nacahan ra Jesús, ta catyi ra sihin ra: Sica iñi ndo vatyi cahnu xaan cuatyí ra Galilea cuan. Ta

yucuan cuenda ndyehe ra tundoho ta sihi ra.

³Zoco catyi sihin ndo vatyi ña tacuan. Ta tatu ma zama maa ndo cuhva iyo ndo cunaa tucu maa ndo.

⁴Ta sito ndo vatyi i sihi sahun uñi tahan ra quivi i nduva torre Siloé cuan ziqui ra. ¿Atu sica iñi ndo vatyi cuaha ca cuatyí ra cuan ta ziqui inga ra ñuu Jerusalén?

⁵Ña tacuan. Ta tatu ma zama maa ndo cuhva iyo ndo, cunaa tucu maa ndo.

Ndatu ra Ndyoo sa nazama yo cuhva iyo yo

⁶Tacuan ta i cahan ra Jesús ziqui cuhva ya, ta catyi ra: Sicoo minoo yutu higuera sii minoo ra nu ndyaa yoho uva ra. Ta i sahan ra ta i sinanducu ra yucu vixi nuu tu, ta ñá nañihi ra.

⁷Ta i catyi ra sihin ra zanduvii nu ndyaa ndaha tyiño ra: “Ndyehe, sa uñi cuiya quisi nanduqui yucu vixi nuu tu ya, ta ña nañihi. Cahndyon sii tu vatyi nandyaa ñi tu, ta ñahñi maa saha tu.” Catyi ra.

⁸Zoco i nacahan inga ra, ta catyi ra sihin ra: “Tata, nandoo tu minoo ca cuiya. Cua zanduvite ñuhu saha tu ta tyihi ñuhu tyahyu.

⁹Ta tatu cuhva tu yucu vixi, vaha, ta tatu ma cuhva tu cua cahndye sii tu.”

Quivi quitatu ñiyivi zanduvaha ra Jesús sii minoo ña tehe sata

¹⁰Minoo quivi quitatu ñiyivi zacuaha ra Jesús sii ñiyivi sisi vehe ñuhu.

¹¹Ta yucuan ndyaa minoo ñaha sa ñoho minoo tatyí ña vaha. Sa sahun uñi cuiya, ña cuu ndundoo ña.

¹²Ta i ndyehe ra Jesús sii ña. Ta i cana ra sii ña ndya nu ndyaa ra, ta i catyi ra sihin ña: Maha, sa nduvohon.

¹³Ta i tyizo ra ndaha ra xiñi ña, ta zuun ñi caa cuhva cuan i ndundoo ña. Ta i zacahnu xaan ña sii ra Ndyoo.

¹⁴Zoco i cuxaan xaan ra cu nuu sii vehe ñuhu cuan vaty i zanduvaha ra Jesús sii ña quivi quitatu ñiyivi. Ta i catyi ra sihin ñiyivi yucu yucuan: Iyo iñu tahan quivi tahan si zatyño yo. Yucuan cuenda quisi ndo quivi cuan ta nduvaha ndo ta yivi quivi sa quitatu ñiyivi.

¹⁵Ta i catyi ra Jesús sihin ra: Ra ña vaha cuu ndo. ¿Atu ma ndasi ndo quitu zono ndo sa cuu zacoho ndo ndutya sii ti quivi quitatu ñiyivi?

¹⁶Ta tacuan tucu maha ya. Zehe ra Abraham cuu sii ña, ta sa sahun uñi cuiya nuhñi ña zacuu cuehe ya. ¿Atu ña vaha sa cua ndasi ña quivi quitatu ñiyivi? Catyi ra Jesús.

¹⁷Ta sa yaha catyi ra cuhva ya, i cucahan xaan nuu ra xaan iñi sii ra. Ta zii xaan i cuñi tandihi ñiyivi sihin sa vaha xaan sa zavaha ra Jesús.

Tañi minoo siti mostaza, tacuan caa sa ndyaca ñaha ra Ndyoo

¹⁸Tacuan ta i catyi ra Jesús: ¿Yozo caa iyo sa ndyaca ñaha ra Ndyoo? ¿Ñaa sihin zacasi tehin sa ndyaca ñaha ra Ndyoo?

¹⁹Cuu si tañi minoo siti mostaza sa i tasi minoo ra nu ñuhu ra, ta i sahn tu. I cucahnu xaan tu ndya cuhva cua cozo zaa zoco tu.

Tañi yusa iya cuu sa ndyaca ñaha ra Ndyoo

²⁰Ta i catyi tucu ra Jesús inga saha: ¿Ñaa sihin zacasi tehin sa ndyaca ñaha ra Ndyoo?

²¹Cuu si tañi yusa iya sa quihin minoo ñaha ta nazaca ña sihin uñi tahan arroba yutyi pan. Yusa iya cuan cuu sa cua zanandaa sii tandihi yusa pan cuan. (Ta tacuan tucu cuahan nducahnu ca sa ndyaca ñaha ra Ndyoo.)

Yuvehe tihin ta ityi cuiñi cuu sa cuahan nu ndyaa ra Ndyoo

²²Tacuan ta cuahan ra Jesús tahan tahan ñuu nahnu ta ñuu ndyih, zacuaaha ra sii ñiyivi. Cuahan ra ndya Jerusalén.

²³Ta minoo quivi i ndaca tuhun minoo ra sii ra: Tata, ¿atu zuhva ñi ñiyivi cua cacu? Ta i catyi ra Jesús sihin ra:

²⁴Nducu xoon cuhva quihvun yuvehe tihin vaty yii xaan cua quihvi ñiyivi nu ndyaca ñaha ra Ndyoo. Catyi suhun vaty cuaha xaan ñiyivi cua cuñi ñu quihvi ñu, ta ma cuu.

²⁵Tañi ra xu vehe, tacuan iyo ra Ndyoo. Ta ra xu vehe cuan cua nacazi ra yuvehe ra. Ta cua cuyucu ndo sata vehe, ta cua cati ndo, ta cua catyi ndo: “Tata, tata, nuña yuvehe naquihvi ndi.” Ta cua catyi ra sihin ndo: “Ña site yoo ndoho cuu ndo.”

²⁶Tacuan ta cua catyi maa ndo: “Sasi ndi ta sihi ndi suhun, ta i zacuohon sii ndi ñuu ndi.”

²⁷Ta cua catyi ra Ndyoo sihin ndo: “Ña site yoo ndoho cuu ndo. Cuiñi

siyo ndo sii, vatyí ñá zavaha ndo sa vaha sa i catyí sihin ndo.” Cua catyí ra.

²⁸Ta cua vacu xaan ndo ndya cuhva cua casi quihñi noho ndo vatyí cua ndyehe ndo vatyí ñoho ra Abraham ta ra Isaac ta ra Jacob ta tandihi ra profeta. Ñoho tandihi ra cuan nu ndyaca ñaha ra Ndyoo, ta maa ndo cua ndoo ndo ityí sata.

²⁹Ta cua quisi ñiyivi ityí caña ñicandyí ta ityí cuahiñi ta ityí yucu ta ityí tyañuhu, ta cua cundyaa ñu nu ndyaca ñaha ra Ndyoo.

³⁰Ta iyo ñiyivi ña ñiñi vatyí, ta cua nduu ñu ñiyivi ñiñi xaan yucuan. Ta ñiyivi ñiñi vatyí cua nduu ñu ñiyivi ña ñiñi.

Sacu xaan ra Jesús sa ndyehe ra ñuu Jerusalén

³¹Ta zuun ñi quivi cuan i quisi zuhva ra fariseo, ta i catyí ra sihin ra Jesús: Quiton ihya ta cuhun vatyí cuñi cahñi ra rey Herodes suun.

³²Ta i catyí ra Jesús sihin ra: Cuahan ndo ta nacatyí ndo sihin ra ñicuii cuan vatyí yuhvi catyí vatyí tave tatyí cuihna ta zanduvehi sii ñiyivi vatyí ta ityaan. Ta iza cua sei nu cuehin.

³³Zoco tahan si sa caca ityí vatyí ta ityaan ta iza vatyí ma cuu cuu minoo ra cahan Tuhun Ndyoo tatu ta saa ca ra ñuu Jerusalén.

³⁴¡Ndahvi yoho ñuu Jerusalén! Sahñi ñiyivi sii ra profeta ihya. Ta ra tasi ra Ndyoo ihya, cañi ñu sii ra sihin yuu. ¡Cuaha xaan cuaha xaan saha cuñi zandu-ihin sii ñiyivi ñuu ya ta zacuende sii ñu tañi zacuenda minoo ndivi sii zehe ti sisi ndisi ti, zoco ña cuñi ñu!

³⁵Ndyehe ndo vatyí, ndoho ñiyivi ñuu Jerusalén, vatyí vatyí zandoi sii ndo. Ta sa ndisa cuii catyí sihin ndo vatyí ma ndyehe ca ndo sii, ndya cuhva ndya quivi cua catyí ndo vatyí vaha xaan cuu ra vasi sa cuenda ra ndyaca ñaha sii yo.

Zanduvaha ra Jesús sii minoo ra ndaa

14 Minoo quivi quitatu ñiyivi i sahan ra Jesús vehe minoo ra cu nuu sii ra fariseo cua casi ra xita. Ta ndyehe xaan ra fariseo ñaa sa cua zavaha ra Jesús.

²Ta ñoho minoo ra cuhu yucuan; ndaa xaan ra.

³Ta i catyí ra Jesús sihin ra maestro cuenda ley ta ra fariseo: ¿Atu catyí ley vatyí cuu zanduvaha yo sii ñiyivi quivi quitatu ñiyivi a ma cuu?

⁴Tacuan ta tandihi ra cuan, taxi cuii ñi yucu ra ta ña cahan ra. Ta ziqui i quihin ra Jesús sii ra cuhu cuan, ta i zanduvaha ra sii ra, ta i natasi ra sii ra sa cunuhu ra.

⁵Ta ziqui i catyí ra Jesús sihin ra fariseo: Tatu canacava minoo burro zono ndo a minoo zindiqui zono ndo sisi minoo xahva quivi quitatu ñiyivi ¿atu ma tava ndo sii ti yatyí ñi vazu quivi quitatu ñiyivi cuu si? Catyí ra.

⁶Tacuan ta ña cuu ca nacahan ra cuan.

Ma zacahnu yo sii yo

⁷I ndyehe ra Jesús cuhva i zavaha tandihi ñiyivi yucu vico cuan vatyí saa ra cuan ta i casi ra maa ñi tyayu vaha ca cundyaa ra, ta i cahan ra Jesús sihin minoo cuhva sihin ra, ta i catyí ra:

⁸Tatu cana minoo ra suun sa cahun minoo vico tindaha, ma nanducun tyayu vaha ca cundyoona coto quisi inga ra ñiñi ca.

⁹Ta ra i cana suun sa cuenda vico cuan cua quisi ra ta cua catyi ra suhun: “Cuhvon tyayu ya cundyaa inga ra ya.” Ta cua cucahan xaan nuun, ta cua cahun nu ndyaa tyayu cuenda ñiyivi ña ñiñi.

¹⁰Vaha ca tatu cana ñu suun minoo vico, cahun xihnon nu ndyaa tyayu ña ñiñi cundyoona. Ta ziqui cua quisi ra i cana suun ta cua catyi ra: “Amigo, cahun nu ndyaa tyayu vaha ca.” Cua catyi ra. Ta sihin cuhva cuan cua zacahnu ra suun nuu ñiyivi yucu suhun yumesa.

¹¹Vaty yoo ra zacahnu sii, cua zanduluhlu ñiyivi sii ra. Ta yoo ra zanduluhlu sii, cua zacahnu ñiyivi sii ra.

¹²Ta ziqui i catyi ra Jesús sihin ra i cana sii ra sa cua casi ra: Tatu cua cuhvon minoo sa cuzama a sa cuxiñi sii ñiyivi, ma canon sii amigun a tohon a sii ñiyivi suun a sii ra cuca sa ndyaa yaty yuvehun. Vaty quivi naco tucu minoo vico vehe maa ra ta cua cana tucu ra suun.

¹³Zoco tatu cua zavohon minoo vico, canon sii ñu ndahvi, ñu coxo, ñu xii ta ñu cuaa.

¹⁴Ta zii xaan cua cuñun. Vaty ra yucuan ma cuu nacuhva ra sa casun, zoco cua tyiyahvi ra Ndyoo suun quivi cua nandoton sihin ñiyivi vaha.

Cuhva cua cuu si quivi cua quihvi ñiyivi nu ndyaca ñaha ra Ndyoo

¹⁵Ta siñi minoo ra ndyaa mesa cuan sa cahan ra Jesús, ta catyi ra

sihin ra: Zii xaan cua cuñi ra casi xita nu ndyaca ñaha ra Ndyoo.

¹⁶Ta ziqui i catyi ra Jesús sihin ra: I zavaha minoo ra minoo sa cuxiñi cahnu xaan vehe ra.

¹⁷Ta cuhva sa cua cuhva ra sa cuxiñi ñu, i tasi ra sii muzu ra sa nacana ra sii ñu sa i cana ra vaty sa ndyaa listo si, ta sa cuu quisi casi ñu.

¹⁸Zoco tandihi ñu i catyi ñu vaty ma cuu cahun ñu. Ra sa xihna ñi i catyi ra: “Nacaa zate minoo ñuhu, ta cuñi sa cundyehi sii si. Catyun sihin ra vaty nazaha ra tucahnu iñi sii, vaty ma cuhin.”

¹⁹Ta inga ra i catyi ra: “Nu zate ohon tahan yunta, ta cuehin cua ndyehi tatu vaha ti. Catyun sihin ra vaty nazaha ra tucahnu iñi sii, vaty ma cuhin.”

²⁰Ta inga tucu ra i catyi ra: “Nacaa tindehi, ta yucuan cuenda ma cuhin.” Catyi ra.

²¹Ta cua nuhu muzu cuan, ta i nacaty ra tandihi cuhva ya sihin patrón ra. Ta i cuxaan xaan patrón ra, ta i catyi ra sihin muzu ra: “Cuahan yaty cui ñi tandihi ityi cahnu ta ityi ndyihit ta cahun sii ra ndahvi ta ra coxo ta ra xii ta ra cuaa, ta quisi ndyacon sii ra ihya.” Catyi ra.

²²Ta i zavaha muzu ra cuhva catyi ra, ta ziqui i catyi ra: “Tata, sa zavehi tandihi cuhva catyun, ta nuña ca.” Catyi ra.

²³Ta i catyi patrón ra sihin ra: “Cuahan tandihi cui ityi, ta zañiñun sii ñiyivi vaty naquisi ñu. Cuñi sa cua cutu cui vehi.

²⁴Vaty catyi suhun vaty numinoo ra i cane sa xihna ñi, ma cuhva que sa casi ra sihin.”

Cuaha xaan tundoho cua ndyehe yo tatu cua cundyico yo sii ra Cristo

²⁵Cuaha xaan ñiyivi cuahan sihin ra Jesús. Ta i ndyehe ra sii ñu ta i catyi ra sihin ñu:

²⁶Tandíhi ndoho ra ndyico sii, tatu cuñi ca ndo sii ñiyivi sii ndo ta ziqui sii mi, ma cuu cuu ndo ñiyivi sii mi.

²⁷Vatyí yoñi ra cuu cuu ñiyivi sii mi tatu ma ndyehe ra tundoho sa cuende, ta vazu cuu ra sa cuende.

²⁸Vatyí yoñi minoo ra tatu cua zandaa ra minoo torre ta ma cundyaa xihna ra ta tava ra cuenda tatu ñihi xuhun ra ta cundyee iñi ra zandíhi ra tyiño cuan.

²⁹Coto sa zavaha ra cimienta ta ziqui ma cuu zandíhi ra tyiño. Ta tandíhi ñiyivi cua ndyehe sii si, ta cua vacu ndyaa xaan ñu sii ra.

³⁰Ta cua catyi ñu: “Ihya ra i quisaha zandaa ra minoo torre, ta ñá cuu zandíhi ra sii si.”

³¹A tatu iyo minoo rey sa cuñi cahñi tahan sihin inga rey sa iyo oco mil zandaru. Rey sa xihna ñi cuan cua cundyaa xihna ra ta nacañi iñi ra tatu cuu zahacanaa ra sihin sa usi mil zandaru sa iyo sii maa ra.

³²Ta tatu sa sito ra vatyí ma cuu, cua tasi ra tyiño ñii ñi sa ndyaa inga rey cuan nusica, ta cua caca ra sii ra vatyí nandíhi ñi maa tuhun.

³³Ta tacuan tucu maa ndo, tatu ma cahndya iñi ndo tandíhi sa cuñi xaan ndo ta tandíhi sa cumi ndo, ma cuu cuu ndo ñiyivi sii mi sa ndisa cuii.

Catyí ra Jesús vatyí iyo ñiyivi tañi ñii sa ña uhva ca

³⁴Vaha xaan cuu ñii, zoco tatu ña uhva ca si çyozo caa cuu cutyiño ñiyivi sii si?

³⁵Ñahñi ca sa cuu zacuu ñu sihin si. Nu sa tyindyee si sii ñuhu ta ma cuu. Nu ndíhi tuhun zavita ñu sii si. Tatu ndyaa zoho ndo, cuiñi ndo tuhun ya. Catyi ra Jesús.

Tañi mvee ticatyí sa cua naa cuu ñiyivi iyo cuatyí

15 Ta tandíhi ra tava xuhun cuenda ra ndyaca ñaha ta ra iyo cuatyí, i tuhva ra sii ra Jesús vatyí cuñi ra tyizoho ra sa cahan ra.

²Ta i cahan xehe ra fariseo ta ra maestro cuenda ley sa cuenda ra Jesús, ta i catyi ra: Ra ihya, cahan ra sihin ra iyo cuatyí, ta sasi ra sihin ra.

³Tacuan ta i cahan ra Jesús sihin ra ziqui minoo cuhva ta catyi ra:

⁴Yoo ndoho, ra iyo minoo ziendu mvee ticatyí zono, tatu cua naa minoo ti çatu ma zandoo ndo tandíhi ti sicuhu? Ta cua nanducu ndo sii sa minoo ti cuan ndya nañihi ndo sii ti.

⁵Ta cuhva sa cua nañihi ndo sii ti, cua cozo zoco ndo sii ti, ta zii xaan cua cuñi ndo.

⁶Ta tatu sa nasaa ndo vehe ndo cua cana ndo sii amigo ndo ta sii ñiyivi yucu yatyí, ta cua catyi ndo: “Cuzii xaan iñi ndo sihin, vatyí i nañihi mvee ticatyí zone quití sa cua naa.”

⁷Ta catyi sihin maa ndo vatyí zuun ñi cuhva cuan, zii xaan cua cuñi ángel gloria sa cuenda minoo

ra cua ndu-uu iñi cuatyí. Zii ca cua cuñi ángel sihin sa minoo ra cuan ta ziquí sihin sa cumi xico sahun cumi tahan ñiyivi vaha sa ñahñi cuatyí ta ña zama ñu cuhva iyo ñu.

**Tañi xuhun sa cua naa
cuu ñiyivi iyo cuatyí**

⁸Ta inga tucu cuhva, tatu iyo minoo ñaha sa cumi usi tahan xuhun, ta tatu cua naa minoo xuhun ña. ¿Atu ma tyaa ña minoo candil ta natihvi ña sisi vehe ña ta nanducu ña xuhun cuan ndya cuhva ndya cua nañihi ña sii si?

⁹Ta tatu sa nañihi ña sii si, cua cana ña sii amigo ña ta sii ñiyivi yucu yatyí, ta cua catyí ña: “Cuzii xaan iñi ndo sihin, vatyí i nañihi xuhin sa cua naa.”

¹⁰Ta zuun ñi cuhva cuan catyí sihin maa ndo vatyí zii xaan cua cuñi ángel ra Ndyoo sa cuenda minoo ra cua ndu-uu iñi cuatyí.

**Tañi ra ñá tyaa yahvi sii zutu
cuu ñiyivi sa cua naa**

¹¹Tacuan ta i catyí tucu ra Jesús cuhva ya: Sicoo minoo ra, ta uu tahan zehe yií ra i sicoo.

¹²Ta minoo saha i catyí ra luhlu ca sihin zutu ra: “Tata, cuhvon ndaha tyiño sa tahan si sii.” Ta i natahvi zutu ra ndaha tyiño sa tahan si sii minoo minoo zehe ra.

¹³Ta ña cuaha ñi quivi ta ziquí i xico ra luhlu ca cuan tandihí cuii sa nacuhva zutu ra sii ra. Ta i zatahan ra xuhun ra, ta cuahan ra nusica. Ta yucuan i zanaa ra tandihí cuii xuhun ra sihin sa cuzii iñi ra. Ta zana xaan i sicoo ra.

¹⁴Ta sa yaha zanaa ra tandihí, ta ziquí i sicoo minoo tama ñuu cuan, ta i quisaha sizoco ra.

¹⁵Tacuan ta sahan ra vehe minoo ra ñuu cuan. Ta i tasi ra cuan sii ra nu iyo quini zono ra vatyí cua cuhva ra sa casi tí.

¹⁶Ta i sizoco xaan ra ndya cuhva cuñi ra casi ra sa sasi quini. Ta yoñi maa sa saha sa casi ra.

¹⁷Tacuan ta i quisaha nacañi iñi ra ta i catyí ra: “Tandihí cuii muzu zuti, sasi vaha ra ndya cuhva ndoo ca sa sasi ra. Ta yuhvi, cuñi cahñi zoco sii.

¹⁸Vityí cunanuhi nu ndyaa zuti, ta tyehen cua catyí sihin ra: Tata, sicoo cuatyí nuu Ndyoo ta nuu moo.

¹⁹Zohon tuhun sa yivi ca zehun cuu sii, zoco cuhvon sa cui minoo muzun.” Tacuan i sica iñi ra.

²⁰Ta i nduvita ra, ta i quihin ra ityí cua nanuhu ra ndya vehe zutu ra. Zoco sica ca vasi ra ta sa i ndyehe zutu ra sii ra. Ta i cundahvi iñi ra sii zehe ra, ta i cacono ra cua zatahan ra sii ra. Ta i sicunumi ra sii ra, ta i sihi ra xiti ra.

²¹Ta i catyí zehe ra sihin ra: “Tata, sicoo cuatyí nuu ra Ndyoo ta nuu moo. Zohon tuhun sa yivi ca zehun cuu sii.” Catyí ra.

²²Zoco i catyí zutu ra sihin muzu ra: “Ta ndyaca ndo zahma vaha ca, ta natyihí ndo sii ra. Ta tyihí ndo minoo xehe nundaha ra. Ta natyihí ndo zapato saha ra.

²³Ta cahñi ndo minoo zindiquí luhlu, quití xahan ca, vatyí casi yo, ta nacuzii xaan iñi yo.

²⁴Vatyí zehi, sa i zehi tuhun vatyí sa i sihi ra, ta vityí ndito ra. Cua naa ra ta vityí naquita ra.” Catyí zutu ra. Ta i quisaha zavaha ñu minoo vico. Ta zii xaan i cuñi ñu.

²⁵Ta inga zehe ra cuan, ra nuu, zatyíño ra sisi cuhu. Ta cuhva sa

cua nasaa ra ndya vehe, ta siñi ra yaa ta sa sata saha ñiyivi.

²⁶Ta i cana ra sii minoo muzu, ta i ndaca tuhun ra ñaa sa cuu.

²⁷Ta i catyi muzu sihin ra: “Nasaa yañun, ta i tava zutun tyiño sa cuu minoo zindiqui luhlu, quitì xahan xaan, vatyi vaha ñi i nasaa yañun.” Catyi ra.

²⁸Ta i cuxaan xaan ra nuu cuan, ta ñá cuñi ra quihvi sisi vehe. Yucuan cuenda i quita zutu ra, ta i cana ra sii ra.

²⁹Zoco i catyi ra sihin zutu ra: “Ndyehe, sa cuaha xaan cuiya zatyine suhun, ta ñahñi cuhva sa ñá tyei yahvi sa cohon. Zoco numinoo saha ta ñá sohon minoo mvee luhlu sii, vatyi cua zavehi minoo vico sihin amigi.

³⁰Ta sa nasaa zehun, ra i zanaa xuhun moo sihin ñu zihì zii iñi, ta yatyi xaan sahñun minoo zindiqui cuenda ra.” Catyi ra.

³¹Tacuan ta i nacahan zutu ra, ta i catyi ra sihin ra: “Zehe luhli, ndyoon sihin tandihì cuii tyiemvu. Ta tandihì sa sii, sii tucu moo cuu.

³²Zoco vityi tahan si sa zacahnu yo vico ya ta cuziì xaan iñi yo vatyi i zehi tuhun vatyi sa i sihi yañun, ta vityi ndito ra. Cua naa ra ta naquita ra.”

Cuhva cuñi si tyindyee yo sii ñiyivi sihin sa iyo sii yo

16 Tacuan ta i quisaha catyi ra Jesús sihin ra i casi ra: Sicoo minoo ra cuca, ta sicoo minoo ra zacuenda xuhun ra. Zoco i catyi inga ñiyivi sihin ra cuca cuan vatyi zativi xaan ra zacuenda cuan xuhun ra.

²Ta i cana ra cuca cuan sii ra, ta i catyi ra sihin ra: “Cuaha xaan tuhun ñihi sa cuendon. Nacuhva cuendon tandihì cuii tyiño i zacuun sii, vatyi ma zatyino con sihin.”

³Ta ziqui i sica iñi ra zacuenda xuhun cuan sihin añima ra: “¿Yozo caa zacui vityi? Cuñi quindyaa patroin tyiñe, ta ñahñi tundyeet iñi iyo sii, sa zatyine. Ta cahan xaan nui caque caridad sii ñiyivi.

⁴Zoco site yozo caa cua zavehi vatyi vaha sa coo amigi, ta ziqui tatu ñahñi tyiñe, zoco cuu cuhin vehe ra.”

⁵Tacuan i sica iñi ra cuan, ta ziqui i cana ra sii sa minoo minoo ra tavi sii patrón ra. Ta i catyi ra sihin ra i saa sa xihna ñi: “¿Yozo tavun sii patroin?” Catyi ra.

⁶Ta i catyi ra cuan: “Tavi cumi mil litro azetye.” Catyi ra. Ta i catyi ra sihin ra: “Quihin inga tutu ya, ta tyoon uu mil ñi, ta tyoon zivun, ta zaviton tutu sahnu cuan.” Catyi ra. Ta tacuan i zavaha ra ta cuahan ra.

⁷Ta ziqui i saa inga ra, ta i catyi ra sihin ra: “¿Yozo tavun sii patroin?” Ta i catyi ra cuan: “Tavi minoo mil arroba trigo.” Catyi ra. Ta i catyi ra sihin ra: “Quihin inga tutu ya, ta tyoon uña ziendu arroba ñi, ta tyoon zivun, ta zaviton tutu sahnu cuan.”

⁸Tacuan ta i sito patrón ra sa ña vaha sa zavaha ra, ta iyo xaan i cuñi ra vatyi casi xaan iñi ra zavaha ra sa ña vaha. Catyi ra Jesús. Ta i catyi tucu ra sihin ra i casi ra: Casi ca iñi ñiyivi ña vaha añima ta ziqui ñiyivi vaha añima.

⁹Ta catyi sihin ndo vatyi cutyino ndo ndaha tyiño ndo sa iyo ñuu

ñiyivi ya, ta tyindyee ndo sii ñiyivi. Ta quivi cua ndihi si, cua ñihi ndo minoo nu cundyaa ndo sa ma naa ca nu ndyaa ra Ndyoo.

¹⁰Ra zavaha sa ndoo sihin sa zuhva ñi sa iyo sii ra, tacuan cua zavaha tucu ra vazu sihin cuaha ca. Ta ra ña zavaha sa ndoo sihin sa zuhva ñi, ma zavaha tucu ra sa ndoo sihin sa cuaha ca iyo sii ra.

¹¹Yucuan cuenda tatu ña zavaha ndo sa ndoo sihin sa iyo ñuu ñiyivi ya, ma cuhva ra Ndyoo sa vaha xaan sa iyo andivi sii ndo.

¹²Tandihí sa iyo sii ndo, maa ra Ndyoo saha noo sii si sii ndo. Ta tatu ña zavaha ndo sa ndoo sihin si, ma cuhva maa ra sa cuu sii maa ndo.

¹³Ma cuu zatyíño minoo muzu sa cuenda uu tahan patrón vatyí cua cuñi ca ra sii minoo patrón ra, ta ma cuñi ra sii inga ra. A sii minoo ra cua tyaa ra yahvi, ta sii inga ra ma tyaa ra yahvi. Ma cuu cuñi ndo sii ra Ndyoo ta cuñi ndo sii xuhun. Catyi ra Jesús.

¹⁴Ta i siñi ra fariseo tandihí sa cahan ra Jesús. Ta i sacu ndyaa ra sii ra vatyí cuñi xaan ra fariseo cuan xuhun.

¹⁵Ta i catyi ra Jesús sihin ra: Ityi nuu ñiyivi zaha maa ndo tuhun vatyí vaha xaan ñiyivi cuu ndo, zoco sito maa ra Ndyoo añima ndo. Ta tandihí sa zacahnu xaan ñiyivi, ña cuu ndyehe ra Ndyoo sii si.

Ma naa ley maa ra Ndyoo

¹⁶Ley ra Ndyoo sa i tyaa ra Moisés ta tuhun i tyaa ra profeta ta sa naha, yucuan cuu sa zañaha ityi sii ndo ndya quivi i saa ra Juan. Quivi

i saa ra Juan ta i quisaha nacatyí ra sihin ñiyivi cuhva ndyaca ñaha ra Ndyoo. Ta cuaha xaan ñiyivi cuñi xaan ñu cuhva cuan.

¹⁷Zoco catyi sihin ndo vatyí vazu cunaa ñuu ñiyivi a sa iyo ityi ziqui, zoco ley ra Ndyoo sa i tyaa ra Moisés ma cuu naa si nu siin.

Ña vaha sa zandoo rayii sii ñazihí ra ta tani tutu ñu

¹⁸Tatu iyo minoo rayii ta zandoo ra sii ñazihí ra ta tani tutu sa tindaha ra ta tindaha ra sihin inga ñaha, zavaha ra cuan sa cuu adulterio. A tatu tindaha inga ra sihin ñaha sa zandoo yii sii, zuun ñi cuatyí cuan zavaha ra.

Cuhva i cuu sii minoo ra cuca, ta cuhva i cuu sii ra Lázaro

¹⁹I sicoo minoo ra cuca, ta tyaqui xaan i cuu zahma ra tyacu yuhva tixinda, ta yahvi xaan ndyaa si. Ta sasi vaha xaan ra tandihí quivi.

²⁰Ta sicoo tucu minoo ra ndahvi sa nañi Lázaro. Iñi xaan ra ityi, ta catuu ra yuvehe ra cuca cuan.

²¹Cuñi xaan ra casi ra vazu sa canacava yumesa ra cuca cuan. Ta i saa ina nu catuu ra ndahvi cuan, ta yuyaa ti nu cahvi ra.

²²Ta minoo quivi i sihi ra, ta i sindyaca ángel ra Ndyoo sii ra ndya nu ndyaa ra Abraham gloria. Ta i sihi tucu ra cuca cuan, ta tyihi ñu sii ra sisi ñuhu.

²³Ta cuahan añima ra andyaya, ta ndyehe xaan ra tundoho yucuan. Ta i nandyehé ndaa ra, ta sica xaan i ndyehe ra sii ra Abraham sihin ra Lázaro.

²⁴Ta i cana saa ra ñoho andyaya cuan ta catyi ra: “Tata Abraham,

cundahvi iñun sii, ta tasun sii ra Lázaro nazatyii ra siin nundaha ra ta quisi zatoon ra nu yei vatyí yaha xaan cahnu tundoho ndyehi sisi ñúhu ya.” Catyi ra.

²⁵Zoco i catyi ra Abraham sihin ra: “Nacohon iñun vatyí cuaha xaan sa vaha sicoo suun quívi i sinditon ñuu ñiyívi. Ta ra Lázaro ndahvi xaan i cuu ra ñuu ñiyívi. Ta vityí iyo sa vaha sii ra, ta yoho ndyehun tundoho.

²⁶Ta inga tucu cuhva vatyí iyo minoo xahva cahnu xaan mahñu nu yucu yo. Ta vazu cuñi ra ihya cuhun ra nu ndyoon, zoco ma cuu. Ta ma cuu quisi minoo ra ñoho nu ñohon nu ndyaa ndi.”

²⁷Ta ziquí i catyi ra cuca cuan: “Tata Abraham, zohon tumañi iñi sii, ta tasun sii ra Lázaro ndya vehe zuti.

²⁸Vatyí iyo ohon tahan yañi, ta cuñi vatyí cunacatyí ra sihin ra yozo caa iye ihya nu ndyehi tundoho coto quisi tucu ra ihya.”

²⁹Tacuan ta i catyi ra Abraham sihin ra: “Iyo ley sa i tyaa ra Moisés ta iyo tuhun i tyaa ra profeta ta sa naha. Nazavaha yañun sa catyi si cuan.”

³⁰Tacuan ta i catyi ra cuca cuan: “Tata Abraham, ma tyaa ra yahvi sii si cuan. Zoco tatu cua nandoto minoo ra sa i sihi ta cuhun ra nu ndyaa ra, yucuan ndisa cua tyaa ra yahvi, ta cua zama ra cuhva iyo ra.”

³¹Ta i catyi ra Abraham sihin ra: “Tatu ma tyaa ra yahvi sii ley i tyaa ra Moisés ta sii tuhun i tyaa ra profeta, ma sino iñi ra vazu cua nandoto minoo ñiyívi ta cahan ra sihin ra.”

Ica xaan tatu zavaha yo cuatyí

17 Tacuan ta i catyi ra Jesús sihin ra i casi ra: Tandíhi cuii tyiemvu cua coo sa quiñi caa sa zatívi sii ñiyívi, zoco ndahvi ñi cuu ra tyiyuhu sii ñiyívi ta zavaha ñu cuatyí ta tívi ñu.

²Vaha ca tatu cuhñi yo minoo yuu vee xaan zucu ra ta zavita yo sii ra sisi tyañuhu coto zatívi ra sii ñu sino iñi sii Ndyoo.

³Zaha ndo cuenda sii ndo. Tatu zavaha minoo ra tahan ndo minoo sa ña vaha suhun, catyun sihin ra ñaa sa ña vaha i zavaha ra. Ta tatu zama ra cuhva iyo ra, zohon tucahnu iñi sii ra.

⁴Ta tatu usa tahan saha sa minoo quívi zavaha ra sa ña vaha suhun ta tandíhi usa tahan saha catyi ra suhun: “Zohon tucahnu iñi sii.” Zohon tucahnu iñi sii ra.

Tatu sino iñi yo sii ra Jesús cuu zavaha yo cuaha sa vaha

⁵Tacuan ta i catyi ra apóstol sihin ra Jesús: Cuhvon cuhva sii ndi ta cua sino xaan ca iñi ndi suun.

⁶Ta i catyi ra Jesús sihin ra: Tatu sino iñi ndo sii mi siin ñi vazu tañi caa minoo sití mostaza luhlu ñi cuu cuhva sino iñi ndo, ta cua cuu catyi ndo sihin yutu sicómoro sa nandyaa ihya vatyí cuñi siyo tu nu ndyaa tu ta cuhun tu sisi tyañuhu, ta cua tyaa tu yahvi sa cahan ndo.

Cuhva tahan si tyaa yo yahvi sii ra Ndyoo

⁷Ta ziquí i catyi ra Jesús: Yoo ndoho tatu tahvi muzu ndo ñuhu a saha ra sa casi zindiquí zono ndo ta

ziqui nasaa ra vehe, ¿atu cua catyi ndo sihin ra: “Cundyaa ta casun xita”?

⁸Tyehen cua catyi ndo sihin ra: “Zavohon sa cuxiñi, ta tyizon coho nu mesa. Ta tatu sa sasi ta ziqui casi tucu moo.” Cua catyi ndo.

⁹¿Atu nacuhvon tyahvi ndyoo sii ra vatyí zavaha ra tyiño tavon sii ra? Ña tacuan vatyí tahan si zavaha ra tyiñon.

¹⁰Ta tacuan tucu maa ndo. Tatu sa zavaha ndo tandihi cuii tyiño sa tava ra Ndyoo sii ndo. Catyi ndo: “Ñahñi maa sa vaha zavaha ndi. Maa ñi cuhva tahan si zavaha ndi i zavaha ndi.” Tacuan tahan si catyi ndo.

Zanduvaha ra Jesús sii usi tahan ra tyahyu

¹¹Ta cuhva sa cuahan ra Jesús ndya ñuu Jerusalén, i yaha ra nu cu si Galilea ta nu cu si Samaria.

¹²Ta sa i saa ra minoo ñuu ta i quita usi tahan ra tyahyu ta yucu ra ndya zava.

¹³Ta i cana saa tandihi ra, ta catyi ra: Maestro Jesús, cundahvi iñun sii ndi.

¹⁴Ta sa ndyehe ra Jesús sii ra, ta i catyi ra sihin ra: Cuahan ndo cua zañaha ndo sii ndo sii ra cu zutu. Tacuan i catyi ra Jesús sihin ra cuan, ta ityi cuahan ra i nduvaha ra.

¹⁵Ta minoo ra, cuhva sa ndyehe ra vatyí sa nduvaha ra, i sinanuhu sata ra. Ta ñihi xaan i cana saa ra ta i zacahnu ra sii ra Ndyoo.

¹⁶Ta i sicuiñi siti ra, ta i sicava ndyayu ra nu ñuhu nu ndyaa saha ra Jesús, ta i saha xaan ra

tyahvi ndyoo sii ra. Ta minoo ra samaritano cuu ra nduvaha cuan.

¹⁷Tacuan ta i catyi ra Jesús: ¿Atu ña usi tahan ra i nduvaha? ¿Ndyamaa cuahan iin tahan ca ra?

¹⁸¿Atu minoo tuhun ñi ra inga ñuu ya cuu ra i ndisi nanuhu sata sa nacuhva ra tyahvi ndyoo sii ra Ndyoo?

¹⁹Ta i catyi ra Jesús sihin ra i nduvaha: Nduvita ta cahun. I nduvohon vatyí sino iñun.

Cuhva cua cuu si quivi cua quisaha cundyaca ñaha ra Ndyoo ñuu ñiyivi

²⁰I ndaca tuhun ra fariseo sii ra Jesús: ¿Ama cua quisaha cundyaca ñaha ra Ndyoo ñuu ñiyivi? Ta i catyi ra Jesús sihin ra: Ma coto ndo ama cua quisaha cundyaca ñaha ra Ndyoo vatyí yivi sa cuu ndyehe yo cuu si.

²¹Ma cuu catyi ñiyivi: “Ihya ndyaa ra”, a “Ityi cuan ndyaa ra” vatyí zñin cuu cuhva ndyaca ñaha ra. Sisi añima ñiyivi cuu nu ndyaca ñaha ra, añima ñiyivi sa tyaa yahvi sii ra.

²²Tacuan ta i catyi ra Jesús sihin ra i casi ra: Cua coo quivi ta cua cuñi ndo ndyehe ndo sii ra i quisi ndya gloria, zoco ma ndyehe ca ndo sii ra.

²³Ta cua catyi ñiyivi sihin ndo: “Ihya ndyaa ra”, a “Yucuan ndyaa ra.” Zoco ma cahun ndo cundyeco ndo. Ta ma cundyeco ndo sii ra cuan vatyí yivi yuhvi cuu ra.

²⁴Vatyí quivi cua quisi inga saha, cua ndyehe tandihi ñiyivi sii. Tañi ndyehe tandihi ñiyivi tatu yaha tasa zavi nacahnu andivi, tacuan cua cuu si quivi cua quisi tucu ra i quisi ndya gloria.

²⁵Zoco xihna ca tahan si ndyehi tundoho cuaha xaan cuhva. Ta ñiyivi sa iyo vityi ma cuñi ñu sii.

²⁶Tañi i cuu si quivi ra Noé, tacuan cua cuu tucu si quivi cua quisi tucu ra i quisi ndya gloria.

²⁷Quivi ra Noé, sasi ñu. Sihi ñu. Tindaha ñu. Ta saha ñu sii zehe ñu sa tindaha ñu ndya cuhva ndya quivi i quihvi ra Noé sisi barco ta i coon zavi xaan. Ta i naa tandihi ñiyivi.

²⁸Tacuan i cuu tucu si quivi ra Lot. Sasi ñu. Sihi ñu. Zata ñu. Naxico ñu. Tasi ra itu. Ta zavaha ra vehe ra.

²⁹Ta zuun ñi quivi i quita ra Lot ñuu Sodoma cuan, i coon xaan ñúhu sihin azufre ndya andivi, ta i naa tandihi cuui ñiyivi ñuu cuan.

³⁰Ta zuun ñi tacuan cua cuu si quivi cua quisi tucu ra i quisi ndya gloria.

³¹Quivi cuan tatu ñoho minoo ndo xiñi vehe, ma noo ndo ta tava ndo ndaha tyiño ndo. A tatu ñoho ndo itu ndo ma cunuhu ndo ndya vehe ndo.

³²Nacohon iñi ndo cuhva i tahan si sii ñazihí ra Lot.

³³Yoo ra cua nducu cuhva zacacu ra sii ra, cunaa ra. Ta yoo ra cua cuhva sa cuu ra sa cuenda mi, cua cacu ndisa cuui ra.

³⁴Ta catyi sihin ndo vatyí sa cuaa cuan, uu tahan ñiyivi quixi iñi ñi nu sito. Cua naquihin sii minoo ñi ta minoo cua nandoo.

³⁵Ta uu tahan ñuzihí ndyico iñi ñi quivi cuan, cua naquihin sii minoo ñi ña. Ta inga ña cua nandoo.

³⁶Ta uu tahan ra ñoho itu ra, cua quihin sii minoo ra. Ta inga ra cua nandoo.

³⁷Tacuan catyi ra Jesús. Ta cuhva sa siñi ñiyivi tuhun ya, i ndaca tuhun ñu sii ra: ¿Ndyamaa cua cuhun ñiyivi cuan? Ta i catyi ra Jesús sihin ñu: Nu catuu ndiyi, yucuan cua titahan tyasii.

Cuhva cuñi ra Ndyoo sa caca yo sii ra

18 Tacuan ta i cahan ra Jesús ziqui minoo cuhva ya vatyí cuñi ra sa cua coto ñu vatyí tahan si sa caca ñiyivi tumañi iñi sii ra Ndyoo tandihi saha, ta ma zandihí yo tuhun sa caca yo sii ra.

²Ihya cuu cuhva i catyi ra Jesús: Minoo ñuu sicoo minoo ra juez. Ta ña yuhu ra sii ra Ndyoo. Ta ña tyaa ra yahvi sii ñiyivi.

³Ta zuun ñi ñuu cuan sicoo minoo ñandahvi. Ta i sahan ña nu ndyaa ra juez cuan, ta catyi ña sihin ra vatyí sica ña cuatyí saha minoo ra xaan iñi sii ña.

⁴Ta ña tyizoho ra juez cuan sa cahan ña. Ña cuñi ra zandaa ra tyiño ña. Ta sa naha xaan sica ña. Ta ziqui i sica iñi ra juez: “Vazu ña yuhi sii ra Ndyoo ta ña tyei yahvi sii ñiyivi,

⁵zoco zayanga xaan maha ya sii. Yucuan cuenda cua zandei tyiño ña coto quisi ca ña ta zayanga ca ña sii.”

⁶Ta i catyi ra Jesús: Sa siñi ndo cuhva catyi ra juez, ra ña vaha cuan.

⁷Ta maa ra Ndyoo ¿atu ma zacacu ra sii ñiyivi i casi ra vatyí sica ñu tumañi iñi sii ra ora ta sa cuaa? ¿Atu cuatu xaan ra ta ziqui tyindyee ra sii ñu?

⁸Catyí sihin ndo vatyí yatyí xaan cua zacacu ra sii ñu. Zoco quivi cua

quisi tucu ra i quisi ndya gloria, sito Ndyoo tatu nañihi que sii ñu sino iñi sii, sa ndisa cuii.

Minoo cuhva cuenda ra tava xuhun cuenda ra ndyaca ñaha ta ra fariseo

⁹Tacuan ta i cahan ra Jesús ziqui minoo cuhva cuenda ñiyivi zaha tuhun vatyí vaha xaan ñu ta ña cuu ndyehe ñu sii inga ñiyivi. Ta ihya cuu cuhva i catyi ra:

¹⁰I quihvi uu tahan ra vehe ñuhu vatyí cua cahan ra sihin ra Ndyoo. Minoo ra cuu ra minoo ra fariseo, ta inga ra cuu minoo ra tava xuhun cuenda ra ndyaca ñaha.

¹¹Iñi ndyaa ra fariseo, ta ihya cuhva i sica iñi ra sisi añima ra: “Zutu mañi yuu, nacuhve tyahvi ndyoo suun vatyí ña iye tañi iyo inga ñiyivi. Ña zuhi. Ña quiñi iye. Yoñi tyañi. Ta ña iye tañi ra tava xuhun ya.

¹²Vaha xaan tyei yahvi tuhun cohon vatyí uu saha sa minoo vitya sahñi zoque sii, ta sehi diezmo suun sihin tandihi cuii sa iyo sii.” Catyi ra.

¹³Ta ndya zava, iñi ndyaa ra tava xuhun cuenda ra ndyaca ñaha. Ta nu ña nandyehenda ra andivi. Ta cati ra yiqui ndyica ra vatyí ndu-uu iñi ra cuatyí ra. Ta tyeheh cahan ra sihin ra Ndyoo: “Zutu mañi yuu, cundahvi iñun sii, vatyí iyo xaan cuatyí.” Tacuan i catyi ra.

¹⁴Ta catyi sihin ndo vatyí sii maa ra cuan i zaha ra Ndyoo tucahnu iñi ta yivi sii inga ra. Zanaa ra Ndyoo cuatyí ra tava xuhun cuan, ta cuanuhu ra ndya vehe ra. Zoco ra fariseo cuan, ñahñi tucahnu iñi ñihi ra vatyí ña vaha cuhva sica ra.

Ta zihin sa zacahnu xaan ra sii ra. Yucuan cuenda luhlu ñi ndyehe ra Ndyoo sii ra. Zoco tatu zanduluhlu yo sii yo, cua nducahnu yo nuu ra Ndyoo.

Zoco ñaha ra Jesús sii sa ndyihi

¹⁵Ta i quisi ndyaca tucu ñiyivi sii sa ndyihi vatyí cua tyizo ra Jesús ndaha ra xiñi si. Ta sa ndyehe ra i casi ra Jesús cuhva zavaha ñu, ñá saha ca ra.

¹⁶Zoco i cana ra Jesús sii ra, ta i catyi ra sihin ra: Cuhva ndo sa quisi sa ndyihi nu ndyei, ta ma catyi ndo vatyí ma cuu vatyí tañi iyo sa ndyihi tacuan iyo ñiyivi saha sa cundyaca ñaha ra Ndyoo sii ñu.

¹⁷Ta catyi sihin ndo vatyí tatu ma cuhva ndo sii ndo sii ra Ndyoo ta sino iñi ndo sii ra tañi sino iñi sa ndyihi sii zutu si, ma cuu quihvi ndo nu ndyaca ñaha ra Ndyoo.

Catyí ra Jesús vatyí yii xaan cua cuhva cuenda minoo ra cuca sii ra sii ra Ndyoo

¹⁸Tacuan ta i ndaca tuhun minoo ra ndyaca ñaha cuenda vehe ñuhu sii ra Jesús ta catyi ra: Yoho maestro vaha xoon, ¿yozo caa zacui ta ñihi tahvi añime?

¹⁹Ta i catyi ra Jesús sihin ra: ¿Ñaa cuenda catyun vatyí vaha xein? Minoo tuhun ñi ra vaha iyo, maa ra Ndyoo.

²⁰Sa siton tandihi cuii ley maa ra Ndyoo cuhva catyi si: “Ma cuzun sihin inga ñaha sa yivi ñazihun cuu. Ma cahñun sii ñiyivi. Ma zuhun. Ma cohon cuendu ziqui ñiyivi. Ta tyoon yahvi sii zutun ta sii zihun.” Catyi ra Jesús sihin ra.

²¹Ta i catyi ra cuan: Tyei yahvi sii tandihi tuhun cuan cuhva ndya luhli.

²²Ta sa siñi ra Jesús cuhva catyi ra, ta i catyi ra sihin ra: Minoo ñi ca cuhva cumañi suun. Xicon tandihi sa iyo suun, ta cuhvon xuhun cuan sii ñiyivi ndahvi, ta cua coo sa cuca suun ndya gloria, ta quisun ta cundyicon sii. Catyi ra.

²³Ta sa siñi ra cuan cuhva catyi ra Jesús, ta i nducuihya xaan iñi ra vatyí cuca xaan ra.

²⁴Ta sa ndyehe ra Jesús vatyí cuihya xaan cuñi ra, ta i catyi ra sihin ra: Yii xaan cua quihvi ñiyivi cuca nu ndyaca ñaha ra Ndyoo.

²⁵Yii ca quihvi minoo ra cuca nu ndyaca ñaha ra Ndyoo ta ziqui ca minoo camello yaha ti xuu minoo yicui ticui. Catyi ra.

²⁶Ta ñiyivi sa siñi cuhva catyi ra Jesús i ndaca tuhun ñu: Tatu tacuan cuu si ¿yoo ra cuu cacu?

²⁷Ta i catyi ra Jesús sihin ñu: Tandihí sa ña cuu zavaha ñiyivi, cuu zavaha ra Ndyoo sii si. Catyi ra.

²⁸Tacuan ta i catyi ra Pedro sihin ra: Sa zandoo ndi tandihí sa sii ndi, ta ndyico ndi suun.

²⁹Ta i catyi ra Jesús sihin tandihí ra: Sa ndisa catyi sihin ndo vatyí tandihí ndo sa zandoo vehe ndo a ñazihí ndo a tahan ndo a zutu ndo a zihí ndo a zehe ndo ta nducu ndo sa vaha sa cuenda nu ndyaca ñaha ra Ndyoo,

³⁰cuaha xaan sa vaha cua ñihi ndo ihya ñuu ñiyivi ya, ta inga ñuu ñiyivi saa cua cundito ndo tandihí cuii tyiemvu.

Nacatyí ra Jesús inga saha vatyí cua cahñi ñiyivi sii ra

³¹I cana ra Jesús sii sa usi uu tahan ra i casi ra, ta i catyi ra

sihin ra: Vityi cua cuhun yo ñuu Jerusalén. Ta yucuan cua cuu tandihí sa i tyaa ra profeta ta sa naha sa cuenda ra i quisi ndya gloria.

³²Vatyí cua cuhva cuenda ñiyivi sii ra sii ñiyivi sa yivi ñiyivi hebreo cuu, ta cua vacu ndyaa ñiyivi sii ra. Quiñi xaan cua zavaha ñu sihin ra, ta cua tyicu zii ñu sii ra.

³³Ta cua cañi xaan ñu sii ra, ta cua cahñi ñu sii ra. Ta sa cu uñi quivi cua nandoto tucu ra. Catyi ra Jesús.

³⁴Ta ra apóstol cuan ñá cutuñi iñi ra nusiin sa cahan ra Jesús vatyí tañaha ca cuhva ra Ndyoo sa cutuñi iñi ra sii si.

Zanduvaha ra Jesús sii minoo ra cuaa vatyí ñi ñuu Jericó

³⁵Tacuan ta sa cuñi saa ra Jesús ñuu Jericó, ta yu-ityi ndyaa minoo ra cuaa, sica ra caridad.

³⁶Ta siñi ra cuaa vatyí yaha cuaha xaan ñiyivi, ta i ndaca tuhun ra ñaa cuenda.

³⁷Ta i catyi ñiyivi sihin ra vatyí cua yaha ra Jesús, ra ñuu Nazaret.

³⁸Ta i cana saa ra, ta catyi ra: ¡Yoho Jesús, zehe ra David, cundahvi iñun sii! Catyi ra.

³⁹Ta ra sa cuahan coyo ityi nuu i catyi ra sihin ra vatyí nacutaxi ra. Zoco ñihi ca i cana saa ra ta catyi ra: ¡Zehe ra David, cundahvi iñun sii!

⁴⁰Ta i sicuñi ra Jesús yucuan, ta i catyi ra sihin ñiyivi naquisi ndyaca ñu sii ra. Ta cuhva sa saa ra cuaa nu ndyaa ra Jesús, i ndaca tuhun ra Jesús sii ra ta catyi ra:

⁴¹¿Ñaa sa cuñun zavehi suhun? Ta i catyi ra cuaa cuan: Cuñi xein sa nandyehi.

⁴²Ta i catyi ra Jesús sihin ra: Nandyehé. Sa nduvaha siti nuun vatyi sino inun sii.

⁴³Ta zuun ñi caa cuhva cuan i cuu nandyehé ra, ta i sindyico ra sii ra Jesús. Zacahnu xaan ra sii ra Ndyoo. Ta tandihi ñiyivi sa ndyehé cuhva cuan, i zacahnu xaan ñu sii ra Ndyoo.

Ra Jesús sihin ra Zaqueo

19 I quihvi ra Jesús ñuu Jericó, ta cua yaha ra mahñu ñuu cuan.

²Ta ñuu cuan ndyaa minoo ra sa nañi Zaqueo. Cuca xaan ra. Ta ra cu nuu cuu ra sa cuenda ra tava xuhun cuenda ra ndyaca ñaha.

³Cuñi xaan ra ndyehé ra sii ra Jesús yoo ra cuu ra. Zoco ñá cuu ndyehé ra vatyi tyaha xaan ra.

⁴Yucuan cuenda i cacono ra ityi nuu nu cuahan ra Jesús, ta i ndaa ra minoo nu yutu sicómoro sa nandyaa yu-ityi nu cua yaha ra Jesús.

⁵Ta sa saa ra Jesús yucuan i ndyehé ndaa ra, ta i ndyehé ra sii ra. Ta i catyi ra sihin ra: Zaqueo, zanumi ta noon vatyi vityi cua ndoi vehun.

⁶Ta i zanumi ra Zaqueo ta i noo ra. Ta zii xaan i cuñi ra, ta cuahan ra sihin ra ndya vehe ra.

⁷Ta sa ndyehé ñiyivi cuhva cuan i quisaha cahan ñu ndya vaha ñi sii ra Jesús ta catyi ñu vatyi cuahan ra Jesús vehe minoo ra iyo cuatyí.

⁸Ta sa ñoho ra vehe ra, i sicuñi ndyaa ra Zaqueo, ta i catyi ra sihin ra Jesús: Zava ndaha tyiñe cua cuhve sii ñiyivi ndahvi. Ta tatu i

zandavi ñehi ta zuhi xuhun ñiyivi, cua nacuhve cumi saha sii ñu.

⁹Ta i catyi ra Jesús sihin ra: Vityi sa cacun, ta ñiyivi ra Abraham cuu suun vatyi sino inun sii ra Ndyoo tañi i sino iñi ra Abraham.

¹⁰Ta yuhvi, ra i quisi ndya gloria cui, ta vasi ñuu ñiyivi vatyi cua nanduqui ta zacaqui sii ñiyivi sa cua naa.

Cuñi si sa cutyiño yo tandihi sa saha ra Ndyoo sii yo

¹¹Ta nii ñi sa siñi ñiyivi sa cahan ra Jesús, ta i quisaha cahan tucu ra inga cuhva ya vatyi sa cuñi saa ra ñuu Jerusalén, ta sica iñi ñiyivi vatyi cua quisaha cundyaca ñaha ra yucuan.

¹²Yucuan cuenda i catyi ra Jesús: Sicoo minoo ra vaha, ta cuñi ra cahun ra minoo ñuu nusica vatyi yucuan cua nduu ra rey ta ziqui cua ndisi ra ñuu ra zoco sa cuu ra minoo rey.

¹³Ta cumañi ca cahun ra, i cana ra sii sa usi tahan muzu ra, ta saha ra minoo ziendu peso sii sa minoo minoo ra. Ta i catyi ra sihin ra: “Zatyíño ndo sihin xuhun ya ndya quivi cua quisi.”

¹⁴Zoco ñiyivi ñuu ra, ñá cuñi ñu sa cuu ra rey sii ñu. Ta sa cuahan ra ityi, i tasi ñu tyiño sihin zuhva ra ta catyi ñu: “Ma cuhva ndi sa cundyaca ñaha ra ya sii ndi.”

¹⁵Zoco ra cuan i nduu ra rey, ta ziqui i nasaa ra ndya ñuu ra. Ta sa nasaa ra i cana ra sii muzu ra, ra i zandoo ra xuhun cuan sihin vatyi cuñi ra coto ra yozo i zahacanaa xuhun ra nii ñi sa sahan ra.

¹⁶Ta saa minoo muzu cuan ta catyi ra: “Tata, i zahacanei minoo mil sihin sa minoo ziendu i zandoon sii.”

¹⁷Ta i catyi rey cuan sihin ra: “Vaha xaan. Minoo muzu vaha cuun. Vaha i zatyĩñon sihin sa zuhva ñi xuhun i zandoi suhun. Yucuan cuenda vityi sehi sa cundyaca ñohon usi tahan ñuu.”

¹⁸Tacuan ta i saa tucu inga ra sa i saha ra xuhun sii. Ta i catyi ra: “Tata, i zahacanei ohon ziendu sihin sa minoo ziendu i zandoon sii.”

¹⁹Ta i catyi tucu rey cuan sihin ra: “Cuu cundyaca ñaha tucu moo; ohon tahan ñuu cua cundyaca ñohon.”

²⁰Tacuan ta i quisi inga ra, ta i catyi ra: “Tata, ica xuhun ya sa minoo ziendu cuan. I sicumi vehi sii si nuu minoo pañitu

²¹vatyí yuhi suun vatyí minoo ra xaan cuun, ta tuhvon naquihin sa yívi suun cuu, ta nacuhun tyiño zacuu inga ra.”

²²Tacuan ta i catyi rey cuan sihin ra: “Yoho minoo muzu ña vaha cuun. Vityi sihin cuhva cohon ta cua catyi tuqui suhun vatyí siton vatyí xein ta tuhve naquihin sa yívi sii cuu, ta naquihin tyiño zacuu inga ra.

²³Yucuan cuenda ÷ñaa cuenda ñá tyuhun xuhin banco, ta sa cua nasei ta cua naquihin sii si, zoco sa zahacanaa si zuhva?” Catyi rey cuan.

²⁴Ta i catyi ra sihin inga ra yucu yucuan: “Quindyaa ndo xuhun sa sehi sii ra ya, ta cuhva ndo sii si sii ra sa cumi cuaha ca.”

²⁵Ta i catyi ra cuan sihin ra: “Zoco sa cumi minoo mil.”

²⁶Ta i catyi rey cuan: “Ta catyi sihin ndo vatyí ra zatyíño vaha sihin sa sehi sii ra, cua cuhve cuaha ca sii ra. Ta ra ña cuñi zatyíño sihin sa sehi sii ra, cua quindyeyi sii si.

²⁷Ta ñu xaan iñi sii, ñu ña cuñi sa cundyaca ñehi sii ñu, quisi ndyaca ndo sii ñu ihya, ta cahñi ndo sii ñu nui.” Catyi rey cuan i catyi ra Jesús.

Cuhva i quihvi ra Jesús ñuu Jerusalén

²⁸Ta sa yaha cahan ra Jesús cuhva cuan ta cuahan ra ityi nuu ca ndya ñuu Jerusalén.

²⁹Ta cuhva sa cuñi saa ra ñuu Betfagé ta ñuu Betania vatyí ñi minoo yucu sa nañi yucu Olivos, ta i tasi ra sii uu tahan ra apóstol.

³⁰I catyi ra sihin ra: Cuahan ndo minoo ñuu sa ndyaa vatyí ñi yucuan, ta cuhva sa quihvi ndo ñuu cuan cua nañihi ndo sii minoo burro nuhñi ti. Quiti ta yoñi ca cozo. Ndasi ndo sii ti, ta quisi ndo sihin ti.

³¹Ta tatu iyo ñiyívi ndaca tuhun sii ndo ñaa cuenda ndasi ndo sii ti, catyi ndo: “Vatyí siñi ñuhu ti sii ra ndyaca ñaha sii yo.”

³²Ta ra apóstol cuan, cuahan ra, ta i nañihi ra sii ti tañi cuhva i catyi ra Jesús sihin ra.

³³Ta cuhva sa cua ndasi ra sii ti i catyi sito ho ti sihin ra: ÷Ñaa cuenda ndasi ndo burro ña?

³⁴Ta i catyi ra cuan: Siñi ñuhu ti sii ra ndyaca ñaha sii yo. Catyi ra.

³⁵Ta sindyaca ra sii ti sii ra Jesús. Ta i tyizo ra zahma ra sata ti, ta i tyizo ra sii ra Jesús sata ti.

³⁶Tacuan ta cuahan ra Jesús. Ta i saqui ñiyívi zahma ñu ityi nu cua yaha ra.

³⁷Ta cuhva sa cua cuyatyí ñu ñuu Jerusalén, saa ñu nu iñi noo yucu Olivos cuan. Ta tandihí cuii ñiyivi ndyico sii ra Jesús i quisaha cuzii xaan iñi ñu. Ta saa xaan cana saa ñu, ta zacahnu ñu sii ra Ndyoo sa cuenda sa ndyityi nahnu xaan i ndyehe ñu.

³⁸Ta i catyi ñu: iNazacahnu yo sii ra cuu rey, ra vasi sa cuenda ra Ndyoo! iNazacahnu xaan yo sii maa ra Ndyoo! iVaha xaan, vaha xaan cuu maa ra Ndyoo! Catyi ñu.

³⁹Tacuan ta zuhva ra fariseo sa cuahan coyo sihin ñiyivi cuan i quisaha catyi ra: Maestro, zacutaxun sii ñu sica noo suhun.

⁴⁰Zoco i catyi ra Jesús sihin ra: Catyi sihin ndo vatyí tatu cua cutaxi ñiyivi ya, cua cana saa yuu.

⁴¹Tacuan ta sa cuñi saa ra Jesús ñuu Jerusalén, ta cuhva sa ndyehe ra ñuu cuan i sacu xaan ra.

⁴²Ta i catyi ra: Tatu sa i sito ndo ta cutuñi iñi ndo yozo caa cuu coo sa taxi sii ndo sihin ra Ndyoo, cuu nduvaha ndo. Zoco vityi sa yaha cuhva. Ta sa siñi tuñi cuan, ñoho xehe si sii ndo, ta ma cuu coto ndo sii si.

⁴³Ta cua quisi quivi, ta ra xaan iñi sii ndo cua zavaha ra minoo sacu viconduu nu yucu ndo, ta ma cuu quita ndo.

⁴⁴Ta ndaha cua zativi ra ñuu ndo. Cua cuu tandihí cuii ndo. Ta ma zandoo ra numinoo yuu ziqui inga si vatyí ña cuñi ndo nacoto ndo sa quisi ra Ndyoo nu ndyaa ndo.

Tava ndyizo ra Jesús sii ñiyivi zavaha ndya vaha ñi yuvehe ñuhu cahnu

⁴⁵Tacuan ta i quihvi ra Jesús nu cuu nuquehe vehe ñuhu cahnu, ta

i quisaha tava ndyizo ra sii ñu xico ta ñu zata yucuan.

⁴⁶Ta i catyi ra sihin ñu: Catyi tutu Tuhun Ndyoo: “Vehe mi cuu vehe nu cahan ñiyivi sihin ra Ndyoo.” Zoco maa ndo zacuu ndo vehe ra zuhu sii si. Catyi ra.

⁴⁷Ta tahan tahan quivi i zacuahaha ra Jesús sii ñiyivi sisi vehe ñuhu. Ta ra zutu nahnu, ta ra maestro cuenda ley ta ra cu tyiño ñuu cuan i nducu ra cuhva yozo caa cuu cahñi ra sii ra.

⁴⁸Zoco ñá ñihi ra cuhva yozo caa cua zacuu ra vatyí i tyizoho tandihí ñiyivi tandihí sa cahan ra Jesús.

Ndaca tuhun ra fariseo sii ra Jesús yoo ra i saha tyiño sii ra ta zavaha ra cuhva zavaha ra

20 Minoo quivi sa quivi cuan zacuahaha ra Jesús sisi vehe ñuhu cahnu, ta nacatyí ra tuhun vaha sihin ñiyivi. Ta saa coyo ra zutu nahnu ta ra maestro cuenda ley ta ra sahnú ñuu cuan.

²Ta i catyi ra sihin ra Jesús: Nacatyun sihin ndi ¿yoo sa saha tyiño suun vatyí zavohon tandihí cuhva ya?

³Ta i nacahan ra Jesús, ta catyi ra sihin ra: Cuñi tuqui nducu tuhun minoo tuhun sii maa ndo, ta nacatyí ndo sihin.

⁴¿Yoo ra i tasi sii ra Juan sa zacoo ndutya ra? ¿Atu i tasi ra Ndyoo sii ra a ñiyivi? Catyi ndo.

⁵Ta i natuhun tahan ra cuan sihin tahan ra ta catyi ra: Tatu catyi yo vatyí i tasi ra Ndyoo sii ra Juan cua catyi ra ya: “¿Ñaa cuenda ñá sino iñi ndo sa cahan ra?”

⁶Zoco tatu catyi yo vatyí ñiyivi i tasi sii ra Juan, cua cahñi ñiyivi sii

yo sihin yuu vatyi sica iñi tandihi maa ñu vatyi maa ra Ndyoo i tasi sii ra Juan ta minoo profeta i cuu ra. Catyi ra cuan sihin tahan ra.

⁷Yucuan cuenda i catyi ra sihin ra Jesús vatyi ña sito ra yoo ra i tasi sii ra Juan.

⁸Ta i catyi ra Jesús sihin ra: Ta ma nacatyi tucu vii yoo ra i saha cuhva ya sii.

Tañi ra ña cuñi zatyño vaha tacuan iyo ra cua cahñi sii ra Jesús

⁹Tacuan ta i quisaha cahan ra Jesús sihin ñiyivi ziqui cuhva ya ta catyi ra: I tasi minoo ra yoho uva minoo sacu. Ta i saha noo ra sii si sii inga ra cua zatyño ra yucuan, ta cuahan ra nusica naha xaan.

¹⁰Ta saa quivi sa iyo yucu vixi cuan, ta i tasi ra sii minoo muzu nu ndyaa ra zatyño yucuan vatyi cua quihin ra zuhva yucu vixi cuhva tahan si sii patrón ra. Zoco i cañi xaan ra sii muzu cuan. Ta ñahñi sa saha ra sii ra. Ta i natasi ra sii ra.

¹¹Ta i tasi sitoho yoho uva cuan sii inga muzu ra, ta i cañi xaan tucu ra sii ra. Ta quiñi xaan i zavaha ra sihin ra. Ta ñahñi maa i saha ra sii ra, ta i natasi ra sii ra.

¹²Ta i tasi tucu patrón cuan inga muzu ra, sa cu uñi saha i cuu si. Ta zuun ñi cuhva cuan i zavaha ra sihin ra. I zañicuehe ra sii ra, ta tava ndyizo ra sii ra.

¹³Yaha cuan, ta i catyi sitoho sacu cuan: “¿Yozo caa zacui vityi? Cua tasi sii zehi. Cuñi xein sii ra, vazú tyaa ra yahvi sii maa ra vatyi zehi cuu sii ra.”

¹⁴Zoco cuhva sa ndyehe ra zatyño yucuan sii ra, i natuhun

tahan ra sihin tahan ra ta catyi ra: “Ihya ra cuu ra cua nañihi ndaha tyiño quivi cua cuu zutu ra. Nacahñi yo sii ra vatyi ndoo maa yo sihin sacu ya.” Catyi ra.

¹⁵Ta i tava ndyizo ra sii ra sata sacu, ta i sahñi ra sii ra. Catyi ra Jesús. Ta ziqui i ndaca tuhun ra sii ñiyivi tyizoho: ¿Yozo caa cua zavaha sitoho sacu cuan sihin ra sahñi sii zehe ra?

¹⁶Cua quisi ra, ta cua zanaa ra sii ra, ta cua cuhva noo ra sacu cuan sii inga ra. Catyi ra Jesús. Ta sa siñi ñiyivi tuhun cuan ta catyi ñu: Zoco ma zavaha ra Ndyoo cuhva cuan.

¹⁷Ta i nandyehé ra Jesús sii ñu, ta catyi ra: Tatu tacuan sica iñi ndo ¿ña cuñi si catyi si cuñi maa ndo nu catyi si tyehen? “I zavita ihno ñiyivi zandaa vehe sii yuu sa cuñi si sa cuenda siqui vehe. Ta vityi yuu cuan cuu sa ñiñi ca ta ziqui tandihi sa cuenda vehe cuan vatyi tacuan catyi ra Ndyoo.

¹⁸Ta yoo ra cua nduva ziqui yuu cuan cua tahnu cuatyi ra, zoco yoo ra cua canacava yuu cuan ziqui, cua caxi cuatyi si sii ra ndyihí ndyihí.”

Tahan si tyaa yo yahvi sii ra cu tyiño ta sii ra Ndyoo

¹⁹Ta ra zutu nahnu ta ra maestro cuenda ley i nducu ra cuhva zuun ñi cuhva cuan sa tiin ra sii ra Jesús vatyi tuu iñi ra vatyi i cahan ra Jesús cuhva iyo maa ra. Zoco i yuhu ra sii ñiyivi.

²⁰Yucuan cuenda i tasi ra sii zuhva ra cua nducu coto ihñi sii ra Jesús. Cua zaha ra cuan tuhun vatyi ra vaha cuu ra, zoco cua nducu ra

cuhva ñaa minoo tuhun ña vaha cua cahan ra Jesús, ta cua ñihi ra cuhva tyaa ra cuatyí sata ra nuu ra cu gobernador.

²¹Yucuan cuenda i catyí ra tyehen sihin ra Jesús: Maestro, sito ndi vatyí ndoo xaan cohon, ta ndoo xaan cuhva zacuothon. Ña tyaa con yahvi sii minoo ñiyívi ta ziquí sii inga ñu zoco zacuothon ityí ra Ndyoo sa ndisa cuii.

²²Yucuan cuenda cuñi ndi coto ndi: ¿Atu vaha tyiyahvi yo xuhun sii ra ndyaca ñaha a ña vaha? Catyí ra.

²³Zoco i tuu iñi ra Jesús vatyí ña vaha añima ra cuan, ta i catyí ra sihin ra: ¿Ñaa cuenda nducu coto ihñi ndo sii?

²⁴Zañaha ndo minoo xuhun sii. ¿Yoo sii nuu ndyaa ya? ¿Ta yoo sii ziví ndyaa ya? Ta i nacahan ra cuan ta catyí ra: Sii ra gobierno César.

²⁵Ta i catyí ra Jesús sihin ra: Cuhva ndo sii ra gobierno César sa cuu sii maa ra. Ta cuhva ndo sii ra Ndyoo sa cuu sii maa ra Ndyoo. I catyí ra Jesús.

²⁶Ta ña cuu maa zandavi ñaha ra cuan sii ra Jesús sihin tuhun cahan ra nuu ñiyívi. Ta iyo xaan i cuñi ra cuhva i cahan ra Jesús, ta i cutaxi ra.

Ndaca tuhun ra tatu cua nandoto tucu ñiyívi

²⁷Yaha cuan ta ziquí i saa coyo zuhva ra saduceo nu ndyaa ra Jesús. Catyí ra saduceo cuan vatyí ma nandoto ñiyívi tatu sa sihi ñu. Ta i ndaca tuhun ra cuan sii ra Jesús cuhva ya:

²⁸Maestro, i tyaa ra Moisés minoo ley vatyí tatu sihi minoo rayii ta

ndoo ndahvi ñazihi ra ta yoñi zehe ra i sicoo, natindaha yañi ra sihin ñaha cuan. Ta cua coo zehe ra sihin ña sa cuenda yañi ra, ra i sihi cuan.

²⁹Sicoo usa tahan rayii sihin yañi ra. I tindaha ra nuu. Ta i sihi ra, ta yoñi zehe ra i sicoo.

³⁰Ta ziquí i tindaha ra cu uu sihin ñandahvi cuan. Sihi tucu ra cuan. Ta yoñi zehe ra i sicoo.

³¹I tindaha tucu ra cu uñi sihin ña. Ta tacuan tucu cuahan tyiño ndya i tindaha tandihi sa usa tahan ra sihin ña. Ta i sihi tandihi sa usa tahan ra, ta yoñi zehe ra i sicoo.

³²Ta nu ndihi tuhun i sihi ndihi tucu maa ñaha cuan.

³³Yucuan cuenda cuñi ndi coto ndi ¿yoo ra cua cuu yii ña quívi cua nandoto ñiyívi? vatyí ñazihi tandihi sa usa tahan ra i cuu sii ña. Tacuan i catyí ra cuan sihin ra Jesús.

³⁴Ta i catyí ra Jesús sihin ra: Ihya ñuu ñiyívi tindaha rayii ta ñu zihí.

³⁵Zoco ñiyívi cua nandoto inga ñuu ñiyívi saa nu ndyaca ñaha ra Ndyoo, ma tindaha ca ñu indyacuán.

³⁶Ta ma cuu ca ñu vatyí sa nduu ñu tañi ángel. Ta zehe ra Ndyoo cuu sii ñu sa ndisa cuii vatyí cua nandoto ñu.

³⁷Sa ndisa cuu si vatyí nandoto ñiyívi vatyí i zandoo ra Moisés tuhun cuan nu tutu i tyaa ra. Vatyí quívi i cahan ra Ndyoo sihin ra nu cayu taca iñu cuan zoco ña ndihi si, i cahan ra Moisés cuhva ya sihin ra Ndyoo ta catyí ra: “Zutu mañi yuu, Ndyoo cuun sii ra Abraham ta sii ra Isaac ta sii ra Jacob.” (Tacuan i catyí ra Moisés vatyí sito ra vatyí ndito ra Abraham sihin tandihi zehe ra vazu sa sihi coño ñuhu ra.)

³⁸Vatyi yivi Ndyoo sii ñiyivi ndaha sihi cuii cuu ra Ndyoo. Ndyoo cuu ra sii ñiyivi cua cundito tandihi cuii tyiemvu. Ta ndito añima ñiyivi sa cuenda maa ra Ndyoo. Ña sihi ñu.

³⁹Tacuan ta i cahan zuhva ra maestro cuenda ley ta catyi ra: Vaha xaan tuhun cohon, Maestro.

⁴⁰Ta yaha cuan ta ñá caña ca iñi ra ndaca tuhun ra numinoo ca tuhun sii ra Jesús.

¿Yoo sii zehe cuu sii ra Cristo?

⁴¹Tacuan ta i catyi ra Jesús: Catyi ra maestro cuenda ley vatyi ra Cristo cuu ñiyivi sii ra rey David, ta ndisa cuu si cuhva cahan ra cuan.

⁴²Zoco zuun ñi maa ra rey David i cahan ta sa naha tuhun i saha ra Ndyoo sii ra, ta i tyaa ra cuhva cahan ra Ndyoo sihin ra Cristo. Tyehen i tyaa ra David:

Cahan ra Ndyoo sihin ra ndyaca ñaha sii mi ta catyi ra:

“Cundyoon siyo cuehi

⁴³ndya cuhva ndya cua saa quivi cua cuhve cuhva cua zahacanoon sii ñiyivi xaan iñi suun.”

Tacuan i tyaa ra David.

⁴⁴¿Ta yozo caa vatyi catyi ra maestro cuenda ley vatyi ñiyivi ra David cuu sii ra Cristo ta zuun ñi maa ra David catyi vatyi ndyaca ñaha ra Cristo sii ra? Catyi ra Jesús.

**Tyaa ra Jesús cuatyi sata
ra maestro cuenda ley**

⁴⁵Ta cuhva i tyizoho tandihi ñiyivi i catyi ra Jesús sihin ñiyivi sica noo sihin ra:

⁴⁶Zacuenda vaha ndo sii ndo, ta ma zacuu ndo cuhva zacuu ra maestro cuenda ley. Tahan xaan iñi ra quihí ra zahma ñaño vatyi cua nacoto ñiyivi sii ra vatyi ra ñiñi cuu ra. Ta cahun ra nuyahvi vatyi cuñi xaan ra sa tyaa ñiyivi yahvi sii ra. Ta cuñi xaan ra sa cundyaa ra nu ndyaa ñiyivi ñiñi sisi vehe ñuhu. Ta cuñi xaan ra sa cundyaa ra tyayu vaha nu sasi ñiyivi zacahnu vico.

⁴⁷Cuaha ca cua cutuñi ra maestro cuenda ley ta ziqui inga ñiyivi vatyi zuhu ra ndaha tyiño ñundahvi. Ta zandavi ñaha ra sii ñiyivi vatyi naha xaan sica tahvi ra sii Ndyoo vatyi cuñi ra sa cua ndyehe ñiyivi ta cua catyi ñu vatyi sito xaan ra sii Ndyoo. Catyi ra Jesús.

Cuhva i saha minoo ñandahvi xuhun

21 I ndyehe ra Jesús vatyi tyihi ra cuca xuhun sisi minoo satu sisi vehe ñuhu cahnu.

²Ta i ndyehe tucu ra sii minoo ñaha ndahvi. Tyihi ña uu tahan xuhun ndyihí sa cu ohon zendavu sisi satu cuan.

³Ta i catyi ra Jesús: Ndisa cuii catyi sihin ndo vatyi i tyihí ñandahvi cuan cuaha ca xuhun ta ziqui tandihi ca ra cuca.

⁴Saha maa ra sa nandoo ñi ca sii ra. Zoco ñandahvi cuan, ndihí i saha ñi ca ña xuhun cuita casi ña.

**Cuhva i catyi ra Jesús cuhva
cua tani vehe ñuhu cahnu**

⁵Tacuan ta zuhva ñu i natuhun ñu tuhun vehe ñuhu cahnu cuan. Catyi ñu vatyi tyaqui xaan yuu i sino si. Ta tyaqui xaan sa taca sa saha

maa ñiyivi, ndihi ca. Tacuan ta i catyi ra Jesús:

⁶Cua coo quivi ta tandihi sa ndyehe ndo ihya cua tani si. Numinoo yuu ya ta ma ndoo si ziqui tahan si. Cua nacoyo tandihi si.

⁷Ta i ndaca tuhun ra sii ra Jesús ta catyi ra: Maestro, ¿ama cua coo cuhva cuan? ¿Ñaa zeña cua ndyehe ndi, ta ziqui cua coto ndi vatyí sa cua tahan si?

⁸Ta i catyi ra Jesús: Zacuenda ndo sii ndo coto zandavi ñaha ñiyivi sii ndo. Vatyí cuaha xaan ra cua quisi ta cua catyi ra: “Yuhvi cui Cristo, ta sa cuñi naa ñiyivi.” Cua catyi ra. Zoco ma sino iñi ndo sii ra, ta ma cundyico ndo sii ra.

⁹Ta cua cuiñi ndo tuhun vatyí cua coo cuatyí ta cahñi tahan xaan ñiyivi, zoco ma yuhu ndo. Xihna ca cua cuu tandihi cuhva cuan, cumañi ca sa saa quivi naa ñiyivi. Catyi ra.

¹⁰Ta catyi tucu ra: Cua cahñi tahan minoo ñuu sihin inga ñuu, ta cua coo cuatyí ñuu nahnu sihin inga ñuu nahnu.

¹¹Ta cua coo sa taan ñihi xaan ziin ziin ityi. Ta cua coo cuehe tandihi ityi. Ta cua coo tama. Ta cua coo sa zayuhu xaan sii ñiyivi. Ta cua coo cuaha xaan zeña andivi.

¹²Zoco cumañi ca sa cuu tandihi cuhva cuan, cua cuxaan xaan ñiyivi ndyehe ñu sii ndo. Cua zayanga xaan ñu sii ndo, ta cua tiin ñu sii ndo vatyí caca ñu cuatyí saha ndo sisi vehe ñuhu. Ta cua tyihi ñu sii ndo vehe caa. Ta cua cuhva maa ndo sa ndaa sa cuenda mi ityi nuu ra cu rey ta ra cu tyiño.

¹³Ta cua cuu cahan ndo sa cuenda mi.

¹⁴Zoco zaha ndo cuenda, ta ma caca iñi ndo ñaa sa cua cahan ndo nuu ra cu tyiño cuan.

¹⁵Vatyí yuhvi cua cuhve tuhun cahan ndo, ta cua cuhve sa siñi tuñi xiñi ndo. Ta numinoo ra xaan iñi sii ndo ta ma cuu zahacanaa ra sii ndo sihin tuhun cahan ra.

¹⁶Zoco zuun ñi ñiyivi sii ndo cua xico tuhun sii ndo, zutu ndo ta zihí ndo, ta tahan ndo ta ra tahan ndo, ta amigo ndo. Cua cuhva ñu sii ndo sii ñu xaan iñi sii ndo. Ta cua cahñi ñu sii zuhva ndo.

¹⁷Tandihi ñiyivi cua cuxaan xaan ñu ndyehe ñu sii ndo sa cuenda mi.

¹⁸Zoco ma cunaa numinoo ixi xiñi ndo.

¹⁹Ta tatu ma ndu-uu iñi ndo, cua cundito ndo tandihi cui tyiemvu.

²⁰Ta quivi cua ndyehe ndo vatyí yucu zandaru siconduu ñuu Jerusalén ya, cua coto ndo vatyí sa cuñi saa quivi cunaa ñuu ya.

²¹Tacuan ta ñiyivi ndyaa nacahnu Judea, nacono ñu ta naquihvi xehe ñu ndya yucu. Ta ñu yucu sisi cuhu, ma cunuhu ñu ndya ñuu ñu.

²²Vatyí quivi cuan cua tasi tuñi ra Ndyoo sii ñiyivi ñuu ya. Ta tacuan ta cua cuu si tandihi cuhva catyi tutu ra Ndyoo.

²³Zoco cuaha xaan tundoho cua ndyehe ñu zihí, ñu ñoho zehe, quivi cuan a tatu iyo zehe ñu sa tyaxi quivi cuan vatyí cahnu xaan tundoho cua coo quivi cuan vatyí cua cuxaan xaan ra Ndyoo sihin ñiyivi ñuu Jerusalén.

²⁴Cua cahñi zandaru sii ñiyivi sihin mityi ra, ta inga ñiyivi cua

tiin ra ta cundyaca ra sii ñu ziiin ziiin ñuu. Ta ñiyivi sa yivi ñiyivi hebreo cuu, cua cuyucu ñu ñuu Jerusalén ndya quivi cua catyi maa ra Ndyoo.

Cuhva cua quisi tucu ra i quisi ndya gloria

²⁵Ta cuaha sa iyo cua ndyehe ñiyivi nu ñicandyi ta nu yoo ta cuhva iyo tiño. Ta cua yuhu xaan ñiyivi ñuu ñiyivi ya cuhva cua ndaa noo xaan tyañuhu.

²⁶Yaha xaan yaha xaan cua yuhu ñiyivi sihin sa sica xaan iñi ñu sa cuenda sa iyo sa cua cuu ñuu ñiyivi. Ta tandihi sa iyo andivi cua canda si.

²⁷Tacuan ta ziqui cua ndyehe ñiyivi sii ra i quisi ndya gloria. Cua quisi tucu ra sihin vico ta sihin cuaha xaan cuhva. Ta tyaqui xaan caa ra.

²⁸Ta tatu sa quisaha cuu tandihi cuhva ya, zii xaan cuñi ndo vatyi sa yatyi cuii cua cacu ndo.

²⁹Tacuan i catyi ra Jesús, ta ziqui i cahan ra ziqui minoo cuhva ya ta catyi ra: Ndyehe ndo cuhva iyo yutu higuera ta tandihi inga yutu.

³⁰Tatu cua ndyehe ndo sa cua nacoyo ndaha tu ta cua nduyutya tu, tacuan ta sa sito ndo vatyi sa cua nducahñi.

³¹Ta tacuan tucu tatu sa ndyehe ndo vatyi sa cuu tandihi tuhun sa quehin sihin ndo ihya, tacuan ta cua coto ndo vatyi sa cua cuyatyi cundyaca ñaha ra Ndyoo ñuu ñiyivi ya.

³²Sa ndisa catyi sihin ndo vatyi cua cuu cuhva ya cuee ca sa cuu ñiyivi sa iyo vityi.

³³Yutyi andivi ta ñuhu ñuu ñiyivi cunaa si. Zoco tuhun quehin ma naa si.

³⁴Coto vaha ndo sii ndo coto ñaha zandava ndo iñi ndo sa cuenda cuatyi zavaha ndo tañi sa zavaha xaan ndo vico ta sihi xaan ndo ndixi ta sica xaan iñi ndo tuhun sa iyo ñuu ñiyivi. Tatu tacuan iyo ndo ta ña ndatu listo ndo, zana ñi iñi ndo ta cua quisi tundoho ziqui ndo.

³⁵Vatyi tacuan cua cuu si sihin tandihi ñiyivi ñuu ñiyivi. Zana ñi iñi ñu, ta cua cuu si tañi minoo sa nacazi ra Ndyoo nu ñoho ñu, ta ma cuu ca quita ñu.

³⁶Yucuan cuenda cuatu listo ndo, ta caca xaan ndo sii ra Ndyoo tandihi quivi vatyi cua cuhva ra sa ma ndyehe ndo tundoho cahnu xaan sa cua coo. Ta caca ndo sii ra vaty cuhva ra sa cua saa vaha ndo ityi nuu ra i quisi ndya gloria. Tacuan i catyi ra Jesús.

³⁷Ora i zacuaha ra Jesús sii ñiyivi sisi vehe ñuhu cahnu ta sa sa cuaa tuhva ra sahan ndya yucu sa nañi Olivos.

³⁸Ta tahan ñaha ñi saa coyo ñiyivi vehe ñuhu vaty cuñi ñu tyizoho ñu sa cahan ra.

Xico ra Judas Iscariote sii ra Jesús

22 Sa cuñi tahan si vico sihi mvee ticatyi. Quivi sasi ñiyivi pan ña ndaa. Pascua nañi vico cuan. Ta catyi maa yo vico zuhun.

²Ta ra zutu nahnu sihin ra maestro cuenda ley, sa nducu ra cuhva yozo caa cuu cahñi ra sii ra Jesús, zoco yuhu ra sii ñiyivi.

³Tacuan ta i quihvi cuihna sii ra Judas Iscariote. Ta minoo sa usi uu tahan ra i casi ra Jesús cuu ra.

⁴Ta cuahan ra cua cahan ra sihin ra zutu nahnu ta ra cu nuu sii ra zacuenda vehe ñuhu cahnu. Natuhun tahan ra yozo caa cua xico ra Judas sii ra Jesús.

⁵Ta zii xaan i cuñi ra cuan ta i zandaa ra tyiño vatyí cua cuhva ra xuhun sii ra Judas.

⁶Ta i ndoo ra Judas vaha, ta i quisaha nducu ra cuhva yozo caa cua cuhva cuenda ra sii ra Jesús sii ra cuan cuhva sa yoñi ñiyivi yucu sihin ra.

I cuxiñi ra Jesús sihin ra i casi ra

⁷Ta sa saa quivi tuhva ñu hebreo sasi pan ña ndaa, quivi sa tahan si cahñi ñu sii minoo mvee ticatyí.

⁸Ta i tasi ra Jesús sii ra Pedro ta ra Juan sihin minoo tyiño, ta catyi ra sihin ra: Cuahan ndo cua zanduvaha ndo minoo mvee ticatyí vatyí cua cuxiñi yo.

⁹Ta i ndaca tuhun ra sii ra Jesús ta catyi ra: ¿Ndyamaa cuñun sa zanduvaha ndi sa cuxiñi yo? Catyi ra.

¹⁰Ta i catyi ra Jesús sihin ra: Cuahan ndo sisi ñuu. Ta yucuan cua ndyehe ndo sii minoo ra ndyizo ra minoo quiyi ndutya. Cundyico ndo sii ra, ta quihvi ndo vehe nu cua quihvi maa ra.

¹¹Ta catyi ndo sihin sitoho vehe cuan: “Catyí ra Maestro: ¿ndyamaa ndyaa cuarto nu cua cuxiñi sa cuenda vico ya sihin ra i casi?” Tacuan catyi ndo sihin ra catyi ra Jesús.

¹²Ta cua zañaha ra minoo cuarto cahnu ndya ziquí. Sa yaha nduvii si. Yucuan zanduvaha ndo sa cuxiñi yo.

¹³Tacuan catyi ra Jesús sihin ra. Ta cuahan ra, ta i nañihi ra cuarto

cuan tañi cuhva i catyi ra Jesús. Ta i zanduvaha ra sa cuxiñi ra sa cuenda vico zuhun cuan.

¹⁴Ta sa saa cuhva ta i sicundyaa ra Jesús yumesa sihin sa usi uu tahan ra i casi ra.

¹⁵Tacuan ta i catyi ra Jesús sihin ra: Cuñi xein cuxiñi sihin ndo sisi vico zuhun ya cuee ca sa ndyehi tundoho.

¹⁶Ta catyi sihin ndo vatyí ma casi que inga saha sihin ndo sa cuenda vico ya ndya cua cuu si inga saha nu ndyaca ñaha ra Ndyoo.

¹⁷Tacuan ta i quihin ra minoo vaso ñoho vino, ta i saha ra tyahvi ndyoo sii ra Ndyoo, ta i catyi ra: Quihin ndo vaso ya, ta coho minoo minoo ndo zuhva zuhva.

¹⁸Vatyí catyi sihin ndo vatyí ma coho que vino ndya cua cundyaca ñaha ra Ndyoo sii ñiyivi.

¹⁹Tacuan ta i quihin ra pan. Ta i saha ra tyahvi ndyoo sii ra Ndyoo, ta i sahnu ra sii si, ta i saha ra sii si sii ra. Ta i catyi ra: Ihya cuu tañi coño ñuhi sa cua cuhve sa cuenda maa ndo. Zavaha ndo cuhva ya vatyí nacohon iñi ndo sii. Catyi ra.

²⁰Ta sa yaha cuxiñi ra i quihin ra minoo vaso vino, ta i catyi ra: Ihya cuu tañi niñi. Cua cati si sa cuenda maa ndo. Vityi zandaa ra Ndyoo minoo tyiño saa. Cua zandasi ra cuatyí ñiyivi sihin niñi.

²¹Zoco vityi ra sa xico sii, iin ñi ndyaa ra mesa ya sihin.

²²Ta ndisa vatyí ra i quisi ndya gloria cua cuu tandihí sii ra tañi sa ndyaa cuu sii ra, zoco indahvi ñi cuu ra xico sii! Catyi ra Jesús.

²³Tacuan ta i quisaha nducu tuhun tahan ra i casi ra sii ra tahan

ra, ndya ra cuu ra zakuu kuhva cahan ra Jesús tuhun.

Natuhun tahan ra i casi ra Jesús ndya ra cuu ra ñiñi ca

²⁴Yaha cuan ta i quisaha natuhun tahan xaan ra i casi ra Jesús sa cuenda ndya ra cuu ra ñiñi ca nu yucu ra.

²⁵Ta i catyi ra Jesús sihin ra: Ra cu rey sii ñiyivi ñuu ñiyivi ya cuñi ra vatyí zacahnu ñiyivi sii ra. Ta cuñi ra vatyí catyi ñiyivi vatyí tyindyee ra sii ñu.

²⁶Zoco ña tacuan cua cuu si sa cuenda maa ndo. Tatu cuñi ndo cuu ndo ra cu nuu, zanduluhlu ndo sii ndo. Ta ra cuñi cundyaca ñaha sii inga ndo, cuñi si sa cuu ra muzu sii tandihí ndo.

²⁷Ihya ñuu ñiyivi, ra ñiñi ca cuu ra ña zatyíño. Ndyaa ra yumesa ra, ta tyizo muzu ra coho nu mesa. Zoco ña tacuan zavaha mi vatyí zatyíñe tañi muzu cui sii ndo.

²⁸Ta maa ndo cuu ra i sindyaa sihin sisi quivi ña vaha ya nu ndyehe xein tundoho.

²⁹Yucuan cuenda cua kuhve minoo nu cua cundyaca ñaha ndo tañi cua kuhva Zuti minoo nu cua cundyaca ñehi.

³⁰Ta cua kuhve sa cua casi ndo ta cua coho ndo numesa sihin mi nu cua cundyaca ñehi. Ta cua tyicuhva ndo sii sa usi uu tahan ityi ñiyivi hebreo.

Catyí ra Jesús vatyí cua catyi ra Pedro vatyí ña sito ra sii ra

³¹Tacuan ta i catyi ra Jesús sihin ra Pedro: Ndyehe vohon yoho Simón vatyí cuñi ra cu nuu sii

cuihna suun vatyí cuñi ra nducu coto ihñi ra suun.

³²Zoco i cahan xein sihin ra Ndyoo sa cuendon vatyí ma naa sa sino iñun sii ra Ndyoo. Ta quivi cua ndu-uu iñun cuatyun, zandundyee con iñi ra tohon.

³³Ta i catyi ra Simón sihin ra: Tata, sa ndyaa listi sa cuhin suhun vazu ndya vehe caa ta vazu cui suhun. Catyi ra.

³⁴Ta i catyi ra Jesús sihin ra: Catyi suhun yoho Pedro vatyí cumañi ca sa vacu saa ndivi tyahnu sa cuaa vityí ta cua catyun uñi tahan saha vatyí ña siton sii.

Sa cuñi saa kuhva cua kuhva cuenda ra Judas sii ra Jesús

³⁵Tacuan ta i ndaca tuhun ra Jesús sii ra i casi ra ta catyi ra: Nacohon iñi ndo quivi i tasi sii ndo sa nacatyí ndo tuhun sihin ñiyivi ta ñahñi sindyizo ndo, nu xuhun ta nu sa casi ndo ta nu inga zahma ndo. ¿Atu i cumañi si sii ndo quivi cuan? Ta i nacahan ra cuan ta catyi ra: Ñahñi i cumañi sii ndi.

³⁶Ta ziquí i catyi ra Jesús sihin ra: Zoco vityí tatu iyo xuhun ndo a sa casi ndo a zahma ndo, cuizo ndo sii si. Ta tatu ñahñi mityí ndo, xico ndo minoo zahma ndo ta zata ndo minoo si.

³⁷Vatyí catyi sihin ndo vatyí kuhva ndyaa si nu tutu ra Ndyoo sa cuenda mi, sa cuñi tahan si kuhva catyi si: “Cua tasi tuñi ñiyivi sii ra tañi ra iyo cuatyí.” Tacuan catyi si, ta cua cuu tandihí kuhva ndyaa si.

³⁸Ta i catyi ra cuan sihin ra Jesús: Tata, cumi yo uu tahan mityí. Ta i catyi ra Jesús sihin ra: Maa vatu ñi.

**Cahan ra Jesús sihin ra Ndyoo
minoo nu yucu yutu tyaqui
nu nañi si Getsemaní**

³⁹I quita ra Jesús vehe cuan ta cuahan ra ndya yucu Olivos tañi tuhva maa ra sahan. Ta cuahan tucu ra i casi ra sihin ra.

⁴⁰Ta cuhva sa saa ra yucuan i catyi ra sihin ra i casi ra: Caca tahvi ndo sii maa ra Ndyoo vatyí ma cuhva ra sa nducu coto ihñi cuihna sii ndo.

⁴¹Tacuan ta cuahan ra Jesús zuhva ca maa ñi maa ra. Tañi cuhva zavita yo minoo yuu, tacuan ñi cuu cuhva cuahan ra. Ta yucuan i sicuñiñi siti ra, ta i cahan ra sihin ra Ndyoo.

⁴²Ta i catyi ra sihin ra Ndyoo: Ndyoo Zuti, tatu cuhva cuñi moo cuu, cuhvon sa ma ndyehi tundoho ya. Zoco ma cuhvon tañi cuhva cuñi mi. Nacuu si tañi cuhva cuñi moo.

⁴³Tacuan ta i quituu minoo ángel nu ndyaa ra, ta saha ca si tundyee iñi sii ra.

⁴⁴Cuaha xaan tundoho ndyehi ra Jesús vatyí cuihya xaan cuñi ra, ta ñihi ca sica tahvi ra sii ra Ndyoo. Ta cuaha xaan tyeen ra i quita tañi toon niñi nu ñuhu.

⁴⁵Ta sa nduvita ra sa ndihi cahan ra sihin ra Ndyoo ta sahan ra nu yucu ra ndihi sihin ra, ta nañihi ra sii ra quixi ra vatyí cuihya xaan cuñi ra.

⁴⁶Ta i catyi ra sihin ra: ¿Ñacu quixi xaan ndo? Nduvita ndo ta cahan ndo sihin ra Ndyoo coto nducu coto ihñi cuihna sii ndo.

Tiin ra sii ra Jesús

⁴⁷Nu cahan ca ra Jesús ta i saa ra Judas, minoo sa usi uu tahan ra i casi ra Jesús cuu ra. Ta i saa cuaha xaan ñiyivi sihin ra. I tuhva ra Judas sii ra Jesús vatyí cua coho ra xiti ra.

⁴⁸Ta i catyi ra Jesús sihin ra: Judas, ¿atu sihin sa cohon xiti cua nacuhva cuendon sii ra i quisi ndya gloria? Catyi ra.

⁴⁹Ndyehi ra yucu sihin ra Jesús cuhva sa cuu, ta ndaca tuhun ra sii ra: Tata, ¿atu cañi ndi sii ra sihin mityi? Catyi ra.

⁵⁰Ta minoo ra cuan i sahdya ra zoho minoo ra cu muzu ra cu zutu ya cahnu, siyo cuaha.

⁵¹Zoco i catyi ra Jesús sihin ra: Zaña ndo. Vaha ñi. Catyi ra. Ta i naquihin ra Jesús zoho ra cuan ta natyaa ra. Ta i zanduvaha ra zoho ra.

⁵²Tacuan ta i catyi ra Jesús sihin ra zutu nahnu, ta ra cu policía cuenda vehe ñuhu ta ra mandoñi: ¿Atu vasi tiin ndo sii minoo ra zuhu vatyí ñaa ndo mityi ta ndaha tyiño xaan?

⁵³Tahan tahan quivi i sehin vehe ñuhu cahnu ta yucu ndo, zoco ñá tiin ndo sii yucuan. Vityi cuu cuhva ndyaca ñaha ra ña vaha, ta yucuan cuenda vityi cua tiin ndo sii.

**I catyi ra Pedro vatyí ña
sito ra sii ra Jesús**

⁵⁴Tacuan i tiin ra sii ra Jesús, ta i sindyaca ra sii ra ndya vehe ra cu nuu sii ra cu zutu. Ta i sindyico ra Pedro sii ra sica sica ñi.

⁵⁵Ta cuhva sa saa coyo ra yucuan i zatahan ra ñuhu nuquehe ta sicundyaa ra, ta i sicundyaa ra Pedro mahñu.

⁵⁶Ta cuhva sa ndyaa ra Pedro yunuhu ta i ndyehe minoo ña cu muzu sii ra, ta nacoto ña sii ra, ta catyi ña: Ra ihya, ra tahan ra cuu sii ra.

⁵⁷Zoco i catyi ra Pedro: Maha, ña site sii ra.

⁵⁸Ta i yaha zuhva cuhva, ta i ndyehe tucu inga ra sii ra Pedro, ta catyi ra: Yoho tucu, ra tahan oo cuu sii ra. Ta i catyi ra Pedro sihin ra: Yivi yuhvi, tata.

⁵⁹Ta i yaha tañi minoo ora, ta i catyi tucu inga ra: Ndisa cuii vatyi ra ihya cuu tucu minoo ra tahan ra vatyi zuun ñi ra Galilea cuu tucu ra.

⁶⁰Ta i catyi ra Pedro sihin ra: Tata, ña site ñaa tuhun cohon. Catyi ra. Ta zuun ñi caa cuhva sa cahan ra Pedro, ta i sacu saa minoo ndivi tyahnu.

⁶¹Tacuan ta i nasico cava ra Jesús, ta i nandyehe ra sii ra Pedro. Ta i nacohon iñi ra Pedro cuhva sa i catyi ra Jesús sihin ra: “Cumañi ca vacu saa ndivi tyahnu, cua catyun uñi tahan saha vatyi ña siton sii.”

⁶²Ta cuhva cuan i quita ra Pedro, ta i sacu xaan ra vatyi i nducuihya xaan iñi ra.

Sacu ndyaa ñiyivi sii ra Jesús

⁶³Tacuan ta ra i sicumi sii ra Jesús i quisaha sacu ndyaa ra sii ra, ta i cañi ra sii ra.

⁶⁴I sihñi ra minoo zahma nuu ra, ta ziqui i cati ra nuu ra ta catyi ra: Nacoton yoo ra i cañi suun. Catyi ra.

⁶⁵Ta cuaha xaan inga sa quiñi i cahan ra sihin ra.

I sindyaca ra sii ra Jesús nu titahan ra cu tyiño hebreo

⁶⁶Ta cuhva sa cundisi i titahan ra mandoñi sihin ra zutu nahnu sihin ra maestro cuenda ley. Ta i quihin ra sii ra Jesús, ta sindyaca ra sii ra nu cuu junta cahnu cuenda tandihi ra ñiñi hebreo. Ta i catyi ra sihin ra:

⁶⁷Nacatyun sihin ndi ¿atu ra Cristo cuun, ra cua zacacu sii ndi? Ta i catyi ra Jesús sihin ra: Tatu catyi sihin ndo vatyi zuun ra cui, ma sino iñi ndo.

⁶⁸A tatu ndaca tuhin ñaa minoo cuhva sii maa ndo, ma nacahan ndo. Ta zuun ñi sa ma zaña ndo sii.

⁶⁹Zoco ndya vityi cua cundyaa ra i quisi ndya gloria siyo cuaha ra Ndyoo. Catyi ra.

⁷⁰Tacuan ta i ndaca tuhun tandihi ra sii ra Jesús ta catyi ra: ¿Ziqui zehe ra Ndyoo cuu suun? Ta i catyi ra Jesús sihin ra: Zuun cui tañi catyi maa ndo.

⁷¹Tacuan ta i catyi ra cuan sihin tahan ra: Xihna sa cahan ra. Ñahñi ca sa ndaa cuñi si vityi. Zuun ñi maa yo i siñi sa cahan ra sihin yuhu ra.

Nacuhva cuenda ra sii ra Jesús sii ra Pilato

23 I nduvita tandihi ra xaan iñi sii ra Jesús, ta i sindyaca ra sii ra nu ndyaa ra Pilato, ra cu gobernador.

²Ta i quisaha tyaa ra cuatyi sata ra Jesús nuu ra Pilato ta catyi ra: Ra ihya, zativi xaan ra sii ñiyivi sihin tuhun cahan ra nuu ñu. Ta

catyi ra vatyí ña vaha sa tyiyahvi ndi xuhun sii ra ndyaca ñaha. Ta catyi ra vatyí Cristo cuu ra, minoo ra cu rey. Tacuan i nacatyí tandíhi ra cuan sihin ra Pilato.

³Ta ziquí i ndaca tuhun ra Pilato sii ra Jesús: ¿Atu yoho cuu rey cuenda ñiyívi hebreo? Ta i catyi ra Jesús: Tacuan cu si tañi catyi moo.

⁴Tacuan ta i catyi ra Pilato sihin ra zutu nahnu ta sihin inga ñiyívi: Ñahñi cuatyí ra ya iyo. Catyi ra.

⁵Zoco i nduxaan ca ñiyívi ta i catyi ñu: Cahnu xaan cuatyí ra ya. Cuaha xaan tizíhi saha ra vatyí zacuahá ra sii ñiyívi ta zanandiquí ra sii ñu ndya Galilea ta ndya ihya.

Tasi ra Pilato sii ra Jesús nuu ra Herodes

⁶Cuhva sa siñi ra Pilato tuhun cuan ta i ndaca tuhun ra tatu ra Galilea cuu ra Jesús.

⁷Ta sa sito ra vatyí zuun ra cuu ra, ta ziquí i zacuhun ra sii ra nu ndyaa ra Herodes vatyí ra Herodes i cuu gobernador nacahnu Galilea. Ta quívi cuan ñoho ra Herodes ñuu Jerusalén.

⁸Ta zii xaan i cuñi ra Herodes sa ndyehe ra sii ra Jesús vatyí sa naha xaan cuñi ra ndyehe ra sii ra. Sa siñi xaan ra Herodes tuhun ra Jesús, ta cuñi ra ndyehe ra sa zavaha ra Jesús minoo sa ndyityí.

⁹Cuaha xaan cuhva i ndaca tuhun ra sii ra Jesús, zoco ñá nacahan maa ra Jesús sa cahan ra.

¹⁰Ta yucu tucu ra zutu nahnu ta ra maestro cuenda ley cuhva cuan, ta i tyaa xaan ra cuatyí sata ra Jesús.

¹¹Ta ra Herodes sihin zandaru ra, i sacu ndyaa ra sii ra Jesús. Ta i natyíhi ra minoo zahma yahvi xaan sii ra, ta tyaqui xaan si tañi sa sityiño minoo rey, ta i natasi ra Herodes sii ra nu ndyaa ra Pilato.

¹²Ta quívi cuan i nduu amigo ra Pilato sii ra Herodes vatyí nu quisi quívi ñá cuu ndyehe ra sii tahan ra.

Saha ra Pilato sa cuu ra Jesús

¹³I zandu-ín ra Pilato sii ra zutu nahnu ta ra cu tyiño ta tandíhi ñiyívi.

¹⁴Ta i catyi ra sihin ñu: I quisi ndyaca ndo sii ra ya sii, ta catyi ndo vatyí zatívi xaan ra sii ñiyívi. Zoco sa tyicuhve sii ra nuu ndo. Ta ñahñi cuatyí ra iyo cuhva catyi maa ndo.

¹⁵Ta ra Herodes tucu ñá nañihi ra numinoo cuatyí ra, ta i natasi tucu ra sii ra ihya. Sa ndyehe ndo vatyí ñahñi sa zavaha ra ta cua cuu ra.

¹⁶Yucuan cuenda cua cañi sii ra, ta cua zañe sii ra.

¹⁷Tacuan i catyi ra Pilato vatyí cuñi si sa zaña ra sii minoo ra ñoho vehe caa tañi iyo costumbre sa cuenda vico cuan.

¹⁸Zoco ín ñi i cana saa tandíhi ñiyívi ta catyi ñu: Cahñun sii ra ya, ta zañon sii ra Barrabás. Catyi ñu.

¹⁹Ta ra Barrabás cuan ñoho ra vehe caa vatyí iyo cuatyí ra sa cuñi ra nduvita ra ziquí ra cu tyiño. Ta i sahñi ra ñiyívi.

²⁰Ta ra Pilato cuñi ra zaña ra sii ra Jesús, ta i cahan ra sihin ñiyívi inga saha vatyí cua zaña ra sii ra.

²¹Zoco i cana saa ñu ta catyi ñu: Nacuu ra nu cruz. Nacuu ra nu cruz.

²²Ta i catyi tucu ra Pilato sihin ñu sa cu uñi saha: ¿Ñaa cuenda? ¿Ñaa sa ña vaha i zavaha ra? Ñahñi cuaty ra i nañihi ta cua cuu ra. Yucuan cuenda cua cañi sii ra, ta cua zañe sii ra. Catyi ra Pilato.

²³Zoco i cana saa xaan ñiyivi, ta i zañiñi ñu vaty nacuu ra nu cruz. Yaha xaan i cana saa ñiyivi, ta ra zutu nahnu ndya cuhva ndya sa cuu cuhva cuñi ñu.

²⁴Ta i zandaa ra Pilato tyiño cuhva cuñi maa ñu.

²⁵Ta tañi cuhva cuñi ñiyivi, i zaña ra sii ra Barrabás, ra ñoho vehe caa sa cuenda sa sañi ra ñiyivi ta nduvita ra ziqui ra cu tyiño. Ta i zavaha ra sihin ra Jesús cuhva catyi ñiyivi.

Nu i tyaa ra sii ra Jesús nu cruz

²⁶Tacuan ta i quihin zandaru sii ra Jesús ta cuahan ra sihin ra. Ta i tiin zandaru sii minoo ra ñuu Cirene. Simón nañi ra. I quita ra sicuhu, ta vasi ra ñuu Jerusalén. Ta i zacuizo zandaru cruz ra Jesús sii ra, ta cuahan ra sata ra Jesús.

²⁷Ta i sindyico tucu cuaha xaan inga ñiyivi sii ra Jesús. Ta cuaha xaan ñu zihí i sacu xaan ñu vaty cuihya xaan cuñi ñu sa cuenda ra.

²⁸Ta i ndyehe ra Jesús sii ñu, ta i catyi ra sihin ñu: Tandíhi ndoho ñu zihí ñuu Jerusalén, ma vacu ndo sa cuenda mi. Vacu ndo sa cuenda maa ndo ta sa cuenda zehe ndo.

²⁹Vaty cua quisi quivi cua ndyehe xaan ndo tundoho. Ta cua cahan ñiyivi sa cuenda ñu sa yoñi zehe, ta cua catyi ñu: “Zihí xaan cuñi ñu yoñi zehe iyo vaty ma yaha xaan ndyehe ñu tundoho tañi ñiyivi iyo zehe.”

³⁰Vaty quivi cuan, cua cuñi ñu sa nduva yucu xiñi ñu ta zahvi si sii ñu.

³¹Vaty tatu tyehen zavaha ñu sihin mi ta ñahñi cuaty, yaha ca cua zavaha ñu sihin maa ndo ra iyo cuaty. Catyi ra Jesús.

³²Ta i quihin tucu zandaru sii uu tahan ra quiñi xaan iyo vaty cua cahñi ra sii ra iin ñi sihin ra Jesús.

³³Ta sa saa coyo ra minoo nu nañi si Yiqui Xiñi Ndiyí, yucuan i tyaa ra sii ra Jesús nuu cruz. Ta i tyaa ra sii minoo ra ña vaha cuan nuu inga cruz ta sañi ndyaa ra siyo cuaha ra Jesús. Ta inga ra siyo zaty ra.

³⁴Ta cuhva sa ndyaa ra Jesús nu cruz ta i catyi ra: Ndyoo Zuti, zohon tucachu iñi sii ra ya vaty ña sito ra ñaa sa ndyicuu ra sihin. Tacuan i cahan ra Jesús sihin ra Ndyoo. Ta i siziqui zandaru cuan vaty cua ndyehe ra yoo ra cua zahacanaa minoo minoo zahma ra Jesús.

³⁵Ta yucu ñiyivi, ta ndyehe ñu. Ta ra cu tyiño sa yucu sihin ñu i sacu ndyaa ra sii ra Jesús ta catyi ra: I zacacu ra sii inga ñiyivi. Nazacacu ra sii maa ra tatu ndisa vaty ra Cristo cuu ra, ra i casi ra Ndyoo.

³⁶Ta i sacu ndyaa tucu zandaru sii ra. I tuhva ra sii ra, ta saha ra vinagre coho ra.

³⁷Ta i catyi ra: Tatu rey cuenda ñiyivi hebreo cuun, zacacun suun. Catyi ra.

³⁸Ta i tyaa ra letra xiñi cruz ra sihin zahan griego, ta zahan latín ta zahan hebreo ta catyi si: “Rey ñiyivi hebreo cuu ra.”

³⁹Ta minoo ra quiñi, ra ndyaa nu cruz ii siyo ra Jesús, quiñi xaan i

cahan ra sihin ra ta i catyi ra: Tatu ndisa vatyi ra Cristo cuun, zacacun sii moo ta sii maa ndi. Catyi ra.

⁴⁰Zoco inga ra cuan i catyi ra sihin ra tahan ra: ¿Atu ña yuhun sii ra Ndyoo? Ta zuun ñi tundoho sa ndyehe maa ra, ndyehun vityi.

⁴¹Ta maa yo tahan si ndyehe yo tundoho ya vatyi iyo cuaty i yo, zoco maa ra ya ñahñi cuaty i iyo. Catyi ra.

⁴²Ta i catyi ra sihin ra Jesús: Jesús, nacohon iñun sii, quivi cua cundyaca ñohon.

⁴³Ta i catyi ra Jesús sihin ra: Sa ndisa catyi suhun vaty i vityi cua cundyoon sihin mi nu cuahan añima ñu sino iñi sii ra Ndyoo.

Nu i sihi ra Jesús

⁴⁴Tacuan i catyi ra Jesús. Ta i cuu si maa ora, ta i quisaha nduñaa. Ta ñaa xaan i nduu nacahnu ñuu ñiyivi ndya caa uñi sa sahiñi.

⁴⁵I nduñaa ñicandyi. Ta zahma coco sa ndita sisi vehe ñuhu cahnu i ndata zava si.

⁴⁶Ta i cana saa ra Jesús minoo sa ñihi xaan ta i catyi ra: Ndyoo Zuti, ndaha moo tyei añime. Ta sa yaha cahan ra Jesús cuhva cuan ta ndaha i sihi ñi ra.

⁴⁷Ta sa ndyehe minoo ra cu nuu sii zandaru tandihi sa cuu, ta i zacahnu ra sii ra Ndyoo, ta catyi ra: Ndisa cuii vaty i ñahñi cuaty i ra i sicoo.

⁴⁸Ta tandihi ñiyivi sa i titahan yucuan vaty i cua ndyehe ñu ñaa sa cua cuu, i quita ñu ta cuahan ñu. Yaha xaan cuihya i cuñi ñu.

⁴⁹Ta tandihi amigo ra Jesús ta ñu zih i sa sindyico sii ra ndya Galilea

i si-iñi ndyaa ñu ndya zava. Ta i ndyehe ñu tandihi sa i cuu.

I tyihi ra sii ra Jesús sisi ñaña

⁵⁰Sicoo minoo ra nañi José. Vaha xaan ra, ta ndoo xaan ra. Ta i cuu ra minoo ra cu nuu cuenda ra hebreo.

⁵¹Ra ñuu Arimatea cuu ra José, ta ndatu ra quivi cua cundyaca ñaha ra Ndyoo. Ta ñá ndoo ra vaha sihin sa zavaha ra hebreo ra tahan ra.

⁵²Ta i sahan ra José nu ndyaa ra Pilato, ta i sica ra coño ñuhu ra Jesús.

⁵³Ta i zanoo ra sii si nuu cruz. Ta i cava noo ra zahma sii si. Ta i saqui ra sii si sisi minoo ñaña nu cuu minoo yavi yuu. Minoo ñaña saa cuu si ta yoñi ca cutyiño sii si.

⁵⁴Ta i cuu si viarni, quivi i zanduvaha ñiyivi sa cua casi ñu zavuru vaty i zavuru cuu quivi tuhva ñu quitatu.

⁵⁵Ta ñu zih i sa i quisi sihin ra Jesús ndya Galilea i sindyico ñu sii ra, ta i ndyehe ñu ñaña ta cuhva catuu coño ñuhu ra Jesús sisi si.

⁵⁶Ta ziqui cuahan ñu ta zanduvaha ñu xahan vixi (sa cua vaca ñu sii coño ñuhu ra Jesús cueca), ta i quitatu ñu zavuru tañi catyi ley hebreo.

Cuhva i nandoto ra Jesús

24 Ta quivi tumbingu ñaha cuii ñi i sinanuhu ñu zih i ndya ñaña ra. Ndaha ñu xahan vixi sa zanduvaha ñu. Ta i sahan tucu inga ñu zih i sihin ñu.

²Ta cuhva sa saa ñu i ndyehe ñu vaty i yuu cahnu sa sindazi yuñaña cuan sa siñi siyo si.

³I quihvi ñu sisi ñaña cuan, zoco ña ñañihi ñu coño ñuhu ra Jesús, ra ndyaca ñaha sii yo.

⁴Ta ñá ñihi ñu cuhva ñaa sa cuu. Ta cuhva cuan i quisi uu tahan ra nu nandyaa ñu; ñoho ra zahma xiño xaan si.

⁵Ta i yuhu xaan ñu. Ta i sicava ndyayu ñu nu ñuhu. Ta i catyi ra cuan sihin ñu: ¿Ñacu nanducu ndo sii minoo ra ndito ihya nu iyo ñiyivi i sihi?

⁶Yoñi ca ra ihya; sa i nandoto ra. Nacohon iñi ndo cuhva i cahan ra sihin ndo quivi sa sica noo ra Galilea.

⁷Vaty i catyi ra: “Tahan si sa cuhva cuenda ñu sii ra i quisi ndya gloria ndaha ra iyo cuaty. Ta ca cahñi ra sii ra nuu cruz. Ta sa cu uñi quivi cua nandoto tucu ra.”

⁸(Tacuan i catyi ángel cuan sihin ñu.) Ta i nacohon iñi ñu tuhun i cahan ra Jesús quivi cuan.

⁹Ta i quita ñu nuñaña, ta i sinuhu ñu. Ta i nacaty ñu tandihi cuhva cuan sihin sa usi iñi tahan ca ra i casi ra Jesús ta sihin tandihi inga ñu sino iñi.

¹⁰Ta ñu nacaty tuhun cuan sihin ra cuan cuu ña María Magdalena, ta ña Juana, ta ña María zih i ra Jacobo ta inga zuhva ca ñu.

¹¹Zoco ñá sino iñi ra cuan sa cahan ñu vaty i sica iñi ra vaty i cahan ñi maa ñu.

¹²Zoco i nduvita ra Pedro, ta i cacono ra ta cuahan ra ndya ñaña. Ta i ndyehe ra sisi yavi yuu cuan. Ta i ndyehe ra vaty i zahma ñi ca ra catuu ndya zava. Ta i sinuhu ra. Ta iyo xaan i cuñi ra vaty i ñá catuu ca coño ñuhu ra Jesús sisi ñaña cuan.

I quituu ra Jesús nuu uu tahan ra i sica noo sihin ra

¹³Ta zuun ñi quivi cuan cuahan uu tahan ra i sica noo sihin ra Jesús ndya minoo ñuu luhlu sa ñañi Emaús. Ñuu cuan ndyaa si tañi usi iñi kilómetro sata ñuu Jerusalén.

¹⁴Ta cuhva sa cuahan ra, natuhun tahan ra sa cuenda tandihi sa i cuu.

¹⁵Ta cuhva sa natuhun tahan ra sihin ra tahan ra, i natahan ra Jesús sii ra ta cuahan ra sihin ra.

¹⁶Zoco vazu i ndyehe ra sii ra Jesús, ñá nacoto ra yoo ra cuu ra Jesús.

¹⁷Tacuan ta i catyi ra Jesús sihin ra: ¿Ñaa sa natuhun xaan ndo ityi cuahan ndo? Ta ¿ñacu nducuihya xaan iñi ndo?

¹⁸Tacuan ta i nacahan minoo ra sa ñañi Cleofas, ta catyi ra: ¿Yozo caa cuu si vaty i sohon ñuu Jerusalén, ta ña siton cuhva sa i cuu ñuu cuan?

¹⁹Ta i catyi ra Jesús sihin ra: ¿Ñaa sa i cuu? Catyi ra. Ta i catyi ra cuan sihin ra: Sa cuenda ra Jesús, ra ñuu Nazaret vaty i cuu ra minoo ra profeta. Ta sihin tundyee iñi ra Ndyoo i zavaha xaan ra sa ndyityi. Vaha xaan i cuu ra nuu ra Ndyoo, ta vaha xaan i cahan ra nuu ñiyivi ndihi ca.

²⁰Zoco ra zutu nahnu ta ra cu nuu vehe ñuhu i saha cuenda ra sii ra sii zandaru romano vaty i cahñi ra sii ra. Ta i sihi ra nuu cruz.

²¹Ta vityi sa cuu si uñi quivi sa i cuu cuhva cuan. Ta i sica iñi maa ndi vaty i maa ra cuu ra cua zacacu sii ñiyivi hebreo.

²²Ta inga tucu cuhva vaty i iyo xaan cuñi ndi sihin cuhva catyi

zuhva ñu zihí vatyi ñaha cuii ñi i sahan ñu nu ndyaa ñaña ra.

²³Ta ñá nañihi ñu coño ñuhu ra yucuan. Ta i quisi nacatyí ñu sihin ndi vatyi i ndyehe ñu sii uu tahan ángel. Ta catyi ángel cuan vatyi ndito ra Jesús.

²⁴Ta sahan zuhva ra tahan ndi nu ndyaa ñaña ra. Ta i ndyehe ra vatyi sa ndisa cuu cuhva catyi ñu zihí cuan. Ta ñahñi ca coño ñuhu ra Jesús ñoho.

²⁵Tacuan i catyi ra cuan. Ta i catyi ra Jesús sihin ra: Zuhva cuii ñi cutuñi iñi ndo. Ta cuee xaan sino iñi ndo tuhun i tyaa ra profeta ta sa naha.

²⁶¿Atu ña sito ndo vatyi tahan si sa ndyehe xihna ra Cristo tundoho? ta ziquí cua ñihi ra tyiño sa cundyaca ñaha ra. Catyi ra Jesús sihin ra.

²⁷Ta ziquí i quisaha nacatyí ra yozo caa cuahan tuhun nu tutu ra Ndyoo. I quisaha ra sihin tuhun i tyaa ra Moisés ta ziquí sa i tyaa tandíhi ra profeta. Ta i zañaha ra Jesús cuhva i cahan Tuhun Ndyoo sa cuenda maa ra.

²⁸Ta cuhva sa saa ra ñuu nu cuahan ra, i zaha ra Jesús tuhun vatyi cua cuhun ra ityi nuu ca.

²⁹Zoco i zañiñi inga ra cuan sii ra ta catyi ra: Ndoon sihin ndi vatyi sa cua iñi xaan. Ta i quihvi ra Jesús vatyi cua ndoo ra sihin ra.

³⁰Ta cuhva sa sacundyaa ra sihin ra mesa, i quihin ra pan. Ta saha ra tyahvi ndyoo sii ra Ndyoo. Ta i sahnu ra sii si, ta saha ra sii si sii ra.

³¹Ta cuhva cuan i nacoto ra sii ra Jesús, zoco i naa ñi ra Jesús, ta ñá ndyehe ca ra sii ra.

³²Ta i catyi ra sihin ra tahan ra: ¿Ñacu ñá nacoto yo sii ra cuhva sa vasi yo sihin ra? Vatyi zii xaan i cuñi yo cuhva sa natuhun ra sihin yo ta cuhva zacuahá ra sii yo yozo caa cuahan Tuhun Ndyoo.

³³Tacuan i catyi ra cuan, ta zuun ñi caa cuhva cuan i nduvita ra ta i sananuhu ra ndya ñuu Jerusalén. Yucuan i nañihi ra sii sa usi iin tahan ca ra i casi ra Jesús. Iin ñi yucu ra sihin inga ra.

³⁴Ta i catyi ra sihin ra: Ndisa vatyi i nandoto ra ndyaca ñaha sii yo, ta sa ndyehe ra Pedro sii ra.

³⁵Tacuan i catyi ra, ta i nacatyí tucu ra i saa cuan cuhva i natuhun ra Jesús sihin ra ityi cuahan ra ta cuhva i nacoto ra sii ra nu i sahnu ra pan.

Quituu ra Jesús nuu sa usi iin tahan ra i casi ra

³⁶Ta cuhva sa natuhun tahan ra tuhun cuan, ta i quituu ra Jesús mahñu nu yucu ra, ta i catyi ra sihin ra: Nacoo xaan sa taxi añima ndo. Catyi ra.

³⁷Zoco i yuhu xaan ra cuan vatyi sica iñi ra vatyi ndyehe ra sii minoo añima.

³⁸Ta i catyi ra Jesús sihin ra: ¿Ñacu yuhu xaan ndo? Ta ¿ñacu sica xaan iñi ndo? ta yuhvi cui.

³⁹Ndyehe ndo ndehi ta sehi vatyi zuun yuhvi cui. Tiin ndo sii, ta cua coto ndo vatyi yivi minoo añima cui. Ñahñi yiquí ta coño ñuhu iyo sii minoo añima tañi iyo sii mi.

⁴⁰Ta cuhva sa ndíhi cahan ra Jesús tuhun ya, i zañaha ra ndaha ra ta saha ra sii ra.

⁴¹Zoco maa ra cuan, iyo xaan cuñi ra ta zii xaan cuñi ra ndya

cuhva ndya ña cuu ca sino iñi ra sa ndeyehe ra. Ta i catyi ra Jesús sihin ra: ¿Atu iyo sa casi?

⁴²Ta i saha ra zuhva tyiyaca sa tyihyo ta zuhva xita tyahiñu sii ra.

⁴³Ta i quihin ra sii si, ta i sasi ra nuu tandihi ra.

⁴⁴Ta i catyi ra sihin ra: Tandihi sa i cuu sii, cuu sa nacatyí sihin ndo ta ndyei sihin ndo. I catyi vatyí cua cuu tandihi cuhva ndyaa nuu Tutu ra Ndyoo sa cuenda mi, tandihi sa catyi tuhun i tyaa ra Moisés, ta tuhun i tyaa ra profeta ta sa ndyaa nu libro salmos ndihi ca.

⁴⁵Tacuan i catyi ra Jesús sihin ra, ta i saha ra sa cutuñi iñi ra cuhva catyi si nuu tutu ra Ndyoo.

⁴⁶Ta i catyi tucu ra Jesús sihin ra: Tacuan ndyaa si vatyí tahan si sa cui. Ta sa cu uñi quivi cua nandoto tuqui, catyi si. Vatyí ra Cristo cui, ra zacacu sii ndo.

⁴⁷Ta vityi tahan si sa cuhun ndo tandihi ñuu nacañu ñuu ñiyivi ta nacatyí ndo sihin ñiyivi vatyí cuñi ra Ndyoo sa ndu-uu iñi ñu cuatyí ñu

ta cua zandasi ra Ndyoo cuatyí ñu. Quisaha ndo cahan ndo tuhun ya ñuu Jerusalén ya.

⁴⁸Ta maa ndo cuu sa ndaa tandihi tuhun ya.

⁴⁹Ta cua zaquisi Tatyí Ii ra Ndyoo ziqui ndo tañi catyi Zuti vatyí cua cuhva ra sii ndo. Zoco ndoo ndo ñuu Jerusalén ya ndya cua quisi Tatyí Ii, ta cua ñihi ndo tundyee iñi sa cua quisi ndya andivi.

I ndaa xica ra Jesús ityi andivi

⁵⁰Tacuan i cahan ra Jesús sihin ra i casi ra, ta i sindyaca ra sii ra ndya ñuu Betania. Ta i zandaa ra ndaha ra, ta i nazoco ra sii ra.

⁵¹Ta cuhva sa nazoco ra sii ra ta i ndaa xica ñi ra ityi andivi.

⁵²Ta i zacahnu xaan ra yucu yucuan sii ra Jesús. Ta i sinanuhu ra ndya ñuu Jerusalén. Ta zii xaan zii xaan i cuñi ra.

⁵³Ta ñiyaca ta ndiyiyaca yucu ra vehe ñuhu cahnu yucuan. Ta zacahnu xaan ra sii ra Ndyoo. Ndihi si vityi.

Tuhun Vaha Sa I Tyaa Ra San Juan

Tuhun Ndyoo i nduu si minoo rayii

1 Quivi i sino ñuu ñiyivi ta sa iyo Tuhun Ndyoo; maa ra, ra cu Tuhun Ndyoo, sa ndyaa ra sihin ra Ndyoo quivi cuan vatyí Ndyoo cuu tucu maa ra.

²Ndya sa xihna cuii ñi ta sa iyo ra sihin ra Ndyoo Zutu yo.

³Sihin ra cuan i zavaha ra Ndyoo Zutu yo tandihi cuii sa iyo, ta ñahñi sa zavaha ra Ndyoo sa maa tuhun ñi ra.

⁴Tandihí sa ndito ta ndito si sa cuenda ra cuan. Ta zañaha ra sii ñiyivi ñaa sa cuu sa ndisa. Tañi minoo ñúhu cuu ra.

⁵Ñúhu cuan zandisi si nu ñaa. Ta ña cuu ndahva sa ñaa ya sii si.

⁶Sicoo minoo ra i tasi ra Ndyoo. Sinañi ra Juan.

⁷I quisi ra vatyí cuu ra minoo sa ndaa ta cahan ra tuhun sa cuenda ra cu ñúhu cuan vatyí tacuan ta cua sino iñi ñiyivi.

⁸Maa ra Juan cuan, yivi ñúhu cuan cuu ra. Sa ndaa ñi i cuu ra. I tava ra Ndyoo tyiño sii ra vatyí cahan ra sa cuenda ra cu ñúhu cuan.

⁹Vatyí ra cu ñúhu sa ndisa cuan, sa cua saa ra, ta cua cuhva ra sa siñi tuñi vaha sii tandihí ñiyivi.

¹⁰I zavaha ra ñuu ñiyivi sihin ra Ndyoo Zutu yo, zoco quivi i quisi ra ñuu ñiyivi ya, ta ñá nacoto ñiyivi sii ra.

¹¹I quisi ra zuun ñi ñuu ñiyivi sa i zavaha ra, ta zuun ñi ñiyivi ra ñá naquihin vaha ñu sii ra.

¹²Zoco ñiyivi i naquihin vaha sii ra sa ndisa, i saha ra cuhva sii ñu sa nduu ñu zehe ra Ndyoo. Maa ñu cuu ñu sino iñi sa ndisa cuii sii ra.

¹³Ña caa ca ñu tañi caa zehe ñiyivi cuhva iyo si ñuu ñiyivi ya vatyí sa i nacacu saa ñu cuhva cuñi ra Ndyoo.

¹⁴Ta ra cu Tuhun Ndyoo i nduu ra minoo ñiyivi, ta sindyaa ra sihin yo zuhva quivi. Saha xaan ra tumañi iñi sii ñiyivi, ta cahan ra maa ñi sa ndisa. Sa ndyehe yo vatyí cahnu xaan cuu maa ra tañi Ndyoo zutu ra. Minoo tuhun ñi ra cuu zehe Ndyoo sa ndisa, ta yucuan cuenda cuaha xaan cuhva iyo sii ra.

¹⁵I cahan ra Juan sa cuenda ra, ta catyí ra: Ihya ra cuu ra i catyí vatyí vasi minoo ra cuee ca, zoco ñiñi ca ra ta ziqui mi vatyí sa iyo ra ta ziqui i caqui. Catyí ra Juan.

¹⁶Sii tandihí cuii yo tyindyee xaan ra cuaha xaan cuaha xaan saha.

¹⁷Sa cuenda ra Moisés ta sito yo ley ra Ndyoo, zoco sa cuenda ra Jesucristo, ta cuu ñihi yo tumañi iñi sihin ra Ndyoo, ta cuu coto yo ñaa sa cuu sa ndisa cuii.

¹⁸Ta yoñi ca ndyehe sii ra Ndyoo numinoo saha. Zoco sa minoo tuhun ñi ra cuu zehe ra, cuñi xaan ra Ndyoo sii ra, ta maa ra ndyehe sii ra Ndyoo. Ta i nacatyí ra tandihí sihin yo yozo caa iyo ra Ndyoo Zutu yo.

**Ra Juan ra i zacoo ndutyá sii ñiyivi,
cahan ra sa cuenda ra Jesucristo**

¹⁹Ra hebreo ra ñiñi ñuu Jerusalén i tasi ra sii ra cu zutu ta sii ra tyindyee sii ra cu zutu vatyí cua nducu tuhun ra sii ra Juan yoo ra cuu ra.

²⁰Ta i catyí casi ra Juan: Yivi ra Cristo cuu yuhvi.

²¹Ta ziquí i nducu tuhun tucu ra ta catyí ra: ¿Yoo ra cuu oo? ¿Atu ra Elías cuun? Ta i catyí ra Juan: Yivi yuhvi. Ta ziquí i nducu tuhun ra inga saha sii ra Juan ta catyí ra: ¿Atu yoho cuu ra cua quisi, ra cua cahan Tuhun Ndyoo? Ta i catyí tucu ra Juan: Yivi.

²²Ta ziquí i catyí tucu ra cuan sihin ra: ¿Yoo ra cuu oo? Cuñi si vatyí nacatyí ndi sihin ra tasi sii ndi. ¿Ñaa sa cua catyun? ¿Yoo ra cuun?

²³I nacahan ra Juan ta catyí ra: Yuhvi cui minoo ra cana saa sisi huhu ta catyí: “Vasi ra ndyaca ñaha sii yo. Yucuan cuenda zandundo ndo ityí tañi i catyí ra cahan Tuhun Ndyoo”, ra Isaías. Tacuan i catyí ra Juan.

²⁴Ta ra i quisi cuenda ra fariseo

²⁵i nducu tuhun ra sii ra Juan ta catyí ra: Tatu yivi ra Cristo cuun ta yivi ra Elías ta yivi inga ra cahan Tuhun Ndyoo cuun ¿ña cuenda zacoo ndutyon sii ñiyivi?

²⁶Ta i catyí ra Juan: Zacoo ndutyé sihin ndutyá. Nu yucu maa ndo nandyaa minoo ra sa ña sito ndo yoo ra cuu ra.

²⁷I sei sa xihna ñi ñuu ñiyivi ya ta ziquí i saa maa ra, zoco ñiñi xaan ca ra ta ziquí mi. Ta yucuan cuenda ma cuu cui nu muzu ra ta ndasi tyiendu ndisa ra. Catyí ra Juan.

²⁸Ta tandihí ihya, i cuu si nu nañi si Betábara. Ndyaa si cuan ityí caña ñicandyí ndya nu ndyaa yuu Jordán nu tuhva ra Juan zacoo ndutyá sii ñiyivi.

**Ra Jesús cuu tañi mvee
ticatyí ra Ndyoo**

²⁹Ta inga quivi i ndyehe ra Juan vatyí tuhva ra Jesús sii ra, ta i catyí ra: Ndyehe ndo, ihya vasi ra cuu mvee ticatyí ra Ndyoo. Zandasi ra cuatyí sii tandihí ñiyivi ñuu ñiyivi.

³⁰Ihya ra cuu ra quehin tuhun quivi i catyí: “Cue ca cua quisi inga ra, zoco ñiñi xaan ca ra ta ziquí mi vatyí sa iyo ra ta ziquí i caqui.”

³¹Ta ñá site yoo ra cuu ra quivi cuan, zoco cuñi sa cua coto ñiyivi hebreo sii ra, ta yucuan cuenda vasi zacoo ndutyé sii ñiyivi sihin ndutyá. Catyí ra Juan.

³²Ta i saha ra Juan minoo sa ndaa ta catyí ra: I ndyehi quivi i noo Tatyí li ndya ityí ziquí tañi noo minoo paloma, ta i ndoo si sihin ra.

³³Ta ñá nacote sa xihna ñi yoo ra cuu ra Jesús, zoco ra Ndyoo

Zutu yo i tava ra tyiño sii, sa zacoo ndutye sihin ndutya, ta i catyi ra: “Tatu cua ndyehun vatyi noo Tatyi Ii ta ndoo si sihin minoo ra, yucuan ra cuu ra cua zacoo ndutya sihin Tatyi Ii.” Catyi ra.

³⁴Ta sa i ndyehi cuhva cuan, catyi ra Juan, ta sehi sa ndaa vatyi ihya cuu ra cuu zehe ra Ndyoo.

Ra i casi ra Jesús sa xihna ñi

³⁵Ta i yaha minoo quivi. Ta inga quivi ndyaa ra Juan yucuan inga saha sihin uu tahan ra cutahan sihin ra.

³⁶Ta sa i ndyehe ra vatyi cua yaha ra Jesús ta i catyi ra: Ica ra cu mvee ticatyi ra Ndyoo. Catyi ra.

³⁷Ta sa siñi sa uu tahan ra cutahan sihin ra sa cahan ra Juan, ta i sindyico ra cuan sii ra Jesús.

³⁸Ta ziqui i nandyehi ra Jesús ityi sata ra, ta i ndyehe ra vatyi ndyico ra cuan sii ra, ta i catyi ra Jesús: ¿Ñaa sa nanducu ndo? Ta i catyi ra cuan: Maestro, ¿ndyamaa iyo vehun?

³⁹Ta i catyi ra Jesús: Coho ndo ta cua ndyehe ndo. Ta cuahan ra cuan sihin ra, ta i ndyehe ra nu ndyaa ra Jesús, ta i ndoo ra minoo quivi cuan sihin ra vatyi sa i cuu si tañi caa cumi sa sahiñi cuhva sa i saa ra yucuan.

⁴⁰Ta minoo sa uu tahan ra cuan sa i siñi ra sa catyi ra Juan ta sindyico ra sii ra Jesús, cuu ra Andrés yañi maa ra Simón Pedro.

⁴¹Ta ra Andrés, ñahñi inga ca sa i zavaha ra. Sa xihna cuii ñi i sahan ra ta nanducu ra sii yañi ra, ra Simón, ta i catyi ra: Sa nañihi ndi sii ra Mesías. Catyi ra. (Tuhun

Mesías cuan cuñi si catyi si Cristo a minoo ra sa cua zacacu sii ñiyivi.)

⁴²Ta ziqui i sahan ra Andrés sihin ra Simón ndya nu ndyaa ra Jesús. Ta sa ndyehe ra Jesús sii ra Simón, i catyi ra: Yoho cuu ra Simón zehe ra Jonás, zoco cua cunañun Cefas. (Cuñi si catyi si Pedro a minoo yuu.)

Cana ra Jesús sii ra Felipe ta ra Natanael

⁴³Ta inga quivi cua cuhun ra Jesús ndya nu cu si Galilea, ta i nañihi ra sii ra Felipe ta catyi ra: Cundyicon sii.

⁴⁴Ta ra Felipe cuan cuu ra minoo ra ñuu Betsaida. Hin ñi ñuu maa ra sihin ñuu ra Andrés ta ra Pedro.

⁴⁵Ta i sahan ra Felipe ta nanducu ra sii ra sa nañi Natanael, ta i catyi ra: Sa i ndyehe ndi sii ra i cahan ra Moisés tuhun nu i tyaa ra nu tutu. Ta i tyaa tucu ra profeta sa cuenda ra cuan. Ra Jesús cuu ra sa cahan ra cuan tuhun, ta zehe ra José cuu ra, ra ñuu Nazaret.

⁴⁶Ta i catyi ra Natanael: Ma cuu quita minoo sa vaha ñuu Nazaret cuan. Ta i nacahan ra Felipe ta catyi ra: Coho ta cua ndyehun.

⁴⁷Ta sa i ndyehe ra Jesús sii ra Natanael vasi ra, ta i catyi ra Jesús: Ica minoo ra sa cuu ñiyivi hebreo sa ndisa cuii. Ña tuhva maa ra zandavi ñaha.

⁴⁸Ta ziqui i nducu tuhun ra Natanael ta catyi ra: ¿Yozo caa siton sii? Ta i catyi ra Jesús: I ndyehi suun cuee ca sa cana ra Felipe suun, cuhva sa ndyoon saha yutu higuera cuan.

⁴⁹Ta i catyi ra Natanael: Maestro, yoho cuu zehe ra Ndyoo Zutu yo.

Ra ndyaca ñaha cahnu sii ñiyivi hebreo cuun.

⁵⁰I nacahan ra Jesús ta catyi ra: ¿Atu sihin sa yucuan ñi sino iñun sii vatyi catyi suhun vatyi ndyehi suun saha yutu higuera cuan? Cahnu xaan ca inga sa cua ndyehun ta ziqui ca sa ihya.

⁵¹Sa ndisa catyi suhun vatyi cua ndyehun vatyi cua nuña ityi ziqui ityi andivi ta ángel Ndyoo cua ndaa cua noo ziqui ra i quisi ndya gloria.

Minoo vico tindaha ñuu

Caná nu cu si Galilea

2 Ta i yaha uñi quivi ta ziqui sicoo minoo vico tindaha ñuu Caná nu cu si Galilea. Ta ñoho zihí ra Jesús yucuan.

²Ta i cana ñiyivi sii ra Jesús sihin ra i casi ra vatyi cuhun tucu ra vico tindaha cuan.

³Ta cuahan ra, ta nu yucu ñiyivi yucuan i ndihi vino sihi ñu, ta catyi zihí ra Jesús sihin ra: Ndihi vino.

⁴Ta i nacahan ra Jesús ta catyi ra: Maha, ¿ña cuenda cohon tuhun ña sihin? Tañaha ca tahan si quivi zatyíne.

⁵Zoco i catyi maa ña sihin ñu cu muzu: Zavaha ndo tandihi sa catyi maa ra.

⁶Ta yucuan siyucu iñu tahan quizi yuu nahnu, tahan sa sityiño ñiyivi hebreo sa cuenda costumbre sa nacatya xaan ñu ndaha ñu a ñaa ca. Ta sa minoo minoo quizi cuan cuu cutahan cumi xico a minoo ziendu litro ndutya.

⁷Ta i catyi ra Jesús sihin ñiyivi zatyíno: Zacutu ndo quizi ya sihin ndutya. Ta i zacutu cuii ñu.

⁸Ta ziqui i catyi ra Jesús: Vityi tava ndo zuhva si ta cundyaca ndo

sii ra cu nuu sii vico ya. Ta tacuan i zavaha ñu.

⁹Ta i sihi ra cu nuu sii vico cuan sii ndutya cuan ta sa i nduu si vino, ta ñá sito ra yozo caa sino si. Zoco i sito maa ñu cu muzu cuan vatyi maa ñu i tyihi ndutya sisi quizi cuan vatyi maa ra Jesús catyi, ta i nduu si vino. Ta ra cu nuu sii vico cuan i cana ra sii ra tindaha cuan.

¹⁰Ta i catyi ra sihin ra: Tandihi ñiyivi tuhva ñu saha sa xihna ñi vino vaha, ta tatu sa i sihi ñiyivi cuaha vino ta ziqui cua cuhva tucu ñu vino ndahvi ca coho ñiyivi. Zoco yoho i sicumi vohon vino vaha, ta vityi sohon sii si. (Tacuan i catyi ra vatyi ña sito ra vatyi maa ra Jesús zavaha vino cuan sihin ndutya.)

¹¹Ihya cuu sa xihna ñi sa ndyityi i zavaha ra Jesús ñuu Caná nu cu si Galilea, ta sihin cuhva ya zañaha ra vatyi iyo xaan cuhva sii ra, ta i sino iñi ra i casi ra sii ra.

¹²Ta sa ndihi vico cuan, ta cuahan ra Jesús ñuu Capernaum. Ta cuahan zihí ra ta yañi ra ta ra i casi ra sihin ra. Ta yucuan i ndoo ñu zuhva quivi.

Tava ra Jesús sii ñiyivi zavaha sa ña vaha yuvehe ñuhu cahnu

¹³Sa cuñi tahan si quivi coo vico zuhun cuenda ñiyivi hebreo, ta cuahan ra Jesús ndya ñuu Jerusalén.

¹⁴Ta yucuan nuquehe vehe ñuhu i ndyehe ra vatyi xico ñiyivi zindiqui, mvee ticatyi ta paloma, ta inga ñiyivi ndyaa ñu sa nazama ñu xuhun ñiyivi.

¹⁵Ta sa ndyehe ra Jesús tacuan, i zavaha ra minoo cuarta, ta i tava

ndyizo ra sii ñu sata vehe ñuhu cuan sihin mvee ticaty i ta zindiqui. Ta sii ñiyivi nazama xuhun, i quiti cuaty ra xuhun ñu nu ñuhu ta i zanduva ra mesa ñu.

¹⁶Ta sihin ñiyivi xico paloma i catyi ra: Tava ndo sii ti ihya. Ma zavaha ndo minoo vehe nuyahvi sii vehe Zuti.

¹⁷Ta sa i ndyehe ra i casi ra cuhva i zavaha ra, ta i nacohon iñi ra vaty i catyi ra David quivi i tyaa ra Tuhun Ndyoo: “Cuñi zativi si sii, vaty zavaha ñiyivi sa ña vaha sisi vehun.”

¹⁸Ta ziqui i nducu tuhun ra hebreo sii ra Jesús ta catyi ra: ¿Ñaa zeña cua zañohon sii ndi ta ziqui cua coto ndi vaty ra cahnu cuun ta cuu zavohon sa tyehen?

¹⁹I nacahan ra Jesús ta catyi ra: Cani ndo vehe ñuhu ya, ta sa cu uñi quivi ta cua zanduvehi sii si inga saha.

²⁰Tacuan ta ziqui i catyi ra hebreo: Uu xico iñu cuiya i zatyño ra zandaa vehe ñuhu ya. ¿Ta ñacu catyun vaty cua zandoon sii si sisi sa uñi quivi ñi?

²¹Zoco vehe ñuhu sa cahan ra Jesús tuhun, zuun ñi coño ñuhu maa ra cuu.

²²Yucuan cuenda, quivi i nandoto ra Jesús ta i nacohon iñi ra i casi ra vaty sa i catyi ra cuhva ya. Ta ziqui i sino iñi ra cuhva catyi tutu Ndyoo ta tuhun cahan ra Jesús sihin ra.

Sito ra Jesús tandihi sa iyo aña ñiyivi

²³Ta quivi sa sindyaa ra Jesús ñuu Jerusalén vico zuhun cuan ta cuaha xaan ñiyivi sino iñi sii ra vaty

ndyehe ñu cuaha xaan sa ndyityi i zavaha ra.

²⁴Zoco ña nii iñi ra Jesús sihin ñiyivi cuan vaty sa sito vaha ra cuhva iyo tandihi ñiyivi.

²⁵Ta ña siñi ñuhu minoo, yoo sa cua cuhva sa ndaa sii ra vaty zuun ñi maa ra ta sa sito ra yozo caa iyo aña ñiyivi.

Ra Jesús sihin ra Nicodemo

3 Sicoo minoo ra fariseo nañi ra Nicodemo. Minoo ra ndyizo tyiño sihin ra hebreo cuu ra.

²Ta i sahan ra minoo sa cuaa sa cua cahan ra sihin ra Jesús, ta catyi ra: Maestro, sito ndi vaty maa ra Ndyoo i tava tyiño suun vaty zacuohon sii ndi vaty yoñi ra cuu zavaha sa ndyityi tañi zavaha moo tatu yivi ra Ndyoo tyindyee sii ra.

³Ta i nacaty ra Jesús sihin ra: Sa ndisa ta sa ndisa catyi suhun vaty tatu ma nacacu saa ñiyivi, ma cuu cundyaca ñaha ra Ndyoo sii ñu.

⁴Ta i nducu tuhun ra Nicodemo ta catyi ra: ¿Zoco yozo caa cuu nacacu saa minoo ñiyivi tatu sa sahnu ra? Ma cuu nandihvi ra sisi zihhi ra inga saha ta nacacu ra.

⁵Ta i nacahan ra Jesús ta catyi ra: Sa ndisa ta sa ndisa catyi suhun, ra ma coo ndutya ta ra ma ñihi Taty Ii ra Ndyoo, ma cuu quihvi ra nu ndyaca ñaha ra Ndyoo.

⁶Ra cacu ñiyivi, ñiyivi cuu ra. Zoco ra nacacu saa sa cuenda Taty Ii, sa ndito aña ra.

⁷Ma iyo xaan cuñun vaty catyi suhun vaty cuñi si sa nacacu soon. Ñahñi ca cuhva.

⁸Caá taty tandihi ñi maa ityi. Siñun nduzu si, zoco ña cuu catyun

ndyamaa i quisi si a ndyamaa cuahan si. Ta tacuan tucu iyo ñiyivi sa nacacu cuenda Tatyí Ii.

⁹Tacuan i catyi ra Jesús, ta ziqui i quisaha nducu tuhun tucu ra Nicodemo sii ra ta catyi ra: ¿Ta yozo caa cuu cuhva ya?

¹⁰Ta i nacatyí ra Jesús sihin ra: Ta yoho minoo ra ñiñi cuun, minoo ra zacuaha sii ñiyivi hebreo, ta ña cutuñi iñun tuhun ya.

¹¹Sa ndisa ta sa ndisa catyi suhun vatyí quehin cuhva site ta cui sa ndaa cuhva sa ndyehi, zoco ña sino iñi ndo sa catyi.

¹²Tatu quehin sihin ndo cuhva iyo ñuu ñiyivi ya ta ña sino iñi ndo, ¿yozo caa cua sino iñi ndo tatu quehin sa cuenda sa iyo ndya gloria?

¹³Yoñi ra sa i ndaa xica ndya gloria, maa ñi maa ra sa i noo ndya gloria, ra i quisi ndya gloria, zehe ra ndyaa ndya gloria.

¹⁴Ta tañi i cañihi ra Moisés coo caa cuan sisi cuhu, tacuan tucu cua cañihi ñiyivi sii ra i quisi ndya gloria.

¹⁵Vatyí tacuan ta tandíhi ñiyivi sino iñi sii ra, ma cunaa ñu. Cua cundito ñu tandíhi cuii tyiemvu.

Cuñi xaan ra Ndyoo sii ñiyivi ñuu ñiyivi

¹⁶(Cahan ca ra Jesús, ta catyi ra:) Cuñi xaan ra Ndyoo sii ñiyivi, ta i saha ra sii sa minoo tuhun ñi zehe ra vatyí tandíhi ñiyivi, ñu sino iñi sii ra, ma cunaa ñu. Cua cundito ñu tandíhi tyiemvu sihin ra.

¹⁷Ñá zaquisi ra Ndyoo sii zehe ra ñuu ñiyivi ya sa cuenda sa cua tasi tuñi ra sii ñiyivi. I zaquisi ra sii ra

vatyi cua zandasi ra cuatyí ñiyivi ta cua zacacu ra sii ñu.

¹⁸Ñiyivi sa sino iñi sii zehe ra Ndyoo, ma tasi tuñi ra Ndyoo sii ñu, zoco ñiyivi sa ña sino iñi cua tasi tuñi ra Ndyoo sii ñu vatyí ña sino iñi ñu sii sa minoo tuhun ñi ra cu zehe Ndyoo.

¹⁹Ta ihya cuu cuenda cua tasi tuñi ra Ndyoo sii ñu vatyí i quisi ñúhu ñuu ñiyivi, zoco cuñi xaan ca ñiyivi sa ñaa, ta ña cuñi ñu sii ñúhu vatyí yaha xaan ña vaha cuu cuhva zavaha ñu.

²⁰Tandíhi ñiyivi sa zavaha sa ña vaha, cuxaan xaan ñu ndyehe ñu ñúhu cuan, ta ña tuhva ñu sii si coto ndundisi cuhva ña vaha sa ndyicuu ñu ta cua ndoho ñu.

²¹Zoco ñiyivi zavaha cuhva sasi tahan sihin sa ndisa, tuhva ñu sii ñúhu, vatyí tacuan ta cua coto inga ñiyivi vatyí ra Ndyoo tyindyee sii ñu sihin cuhva vaha zavaha ñu.

Cahan tucu ra Juan sa cuenda ra Jesús

²²Ta sa i yaha cahan ra Jesús ta ziqui cuahan ra sihin ra i casi ra ndya nu cu si Judea, ta i ndoo ra zuhva quivi yucuan, ta i zacoo ndutya ra sii ñiyivi.

²³Ta zuun ñi zacoo ndutya tucu ra Juan ñuu Enón yatyí ñi ñuu Salim vatyí cuaha xaan ndutya iyo yucuan. Ta cuaha xaan ñiyivi i quisi, ta sicoo ndutya ñu.

²⁴Tacuan i cuu si vatyí tañaha ca cua tyihi ñiyivi sii ra Juan vehe caa.

²⁵Tacuan ta ziqui i quisaha natuhun tahan xaan ra cu tahan sihin ra Juan sihin minoo ra hebreo sa cuenda yozo caa nduvaha cuhva iyo ñiyivi.

²⁶Ta i sahan ñiyivi nu ndyaa ra Juan ta catyi ñu sihin ra: Maestro, ra sa sindyaa suhun inga siyo yutya Jordán, ra sa cahan xoon tuhun, vityi zacoo ndutya ra, ta tandihi ñiyivi ndyico sii maa ra.

²⁷Ta i nacahan ra Juan ta catyi ra: Yoñi minoo yo ta cuu coo sa sii yo tatu yivi maa ra Ndyoo saha.

²⁸Zuun ñi maa ndo cuu sa ndaa vatyi sa i catyi sihin ndo vatyi yivi ra Cristo cui. Minoo ra i tasi ra Ndyoo ityi nuu cui.

²⁹Vityi cua quehin minoo cuhva, cuhva iyo minoo vico tindaha. Ra cua tindaha cuan cuu ra sa cua quihin minoo ñaha. Ta amigo ra tindaha cuan, ndyaa ra yucuan. Tyizoho ra, ta cuzii xaan cuñi ra sihin cuhva cahan ra cua tindaha. Tacuan tucu mi vityi. Zii xaan cuñi.

³⁰Ra sa cahan ndo tuhun, cuñi si nducahnu ca ra, ta yuhvi cua nduluhlu que.

Ra i quisi ndya gloria

³¹Ra i quisi ndya gloria, ra cahnu ca cuu ra ta ziqui tandihi inga ñiyivi. Ta ñiyivi ihya, cuenda ñuu ñiyivi ya cuu yo. Cahan yo cuhva iyo ñuu ñiyivi. Zoco ra i quisi ndya gloria ñiñi ca cuu maa ra ta ziqui tandihi ca yo.

³²Ta saha ra sa ndaa sa cuenda sa i ndyehe ra ta sa i siñi ra, zoco yoñi sino iñi sa catyi ra.

³³Zoco tatu iyo minoo ra sa sino iñi sa ndaa sa saha ra cuan, saha tucu maa ra sa ndaa vatyi cahan ra Ndyoo sa ndisa.

³⁴Vatyi ra i tasi ra Ndyoo, cahan ra Tuhun Ndyoo. Vatyi saha maa ra Ndyoo Taty i sii ra cuaha xaan.

³⁵Cuñi xaan ra Ndyoo Zutu yo sii Zehe ra, ta tandihi cuii ñaa sa iyo, saha maa ra Ndyoo sii si sii Zehe ra.

³⁶Ñiyivi sino iñi sii Zehe ra Ndyoo, cua cundito ñu tandihi cuii tyiemvu. Zoco ñiyivi ña sino iñi, ma cundito ñu sihin ra Ndyoo. Yaha xaan cua ndoho ñu cua zacuu ra Ndyoo.

Natuhun ra Jesús sihin minoo ñaha samaritana

4 ¹⁻³I sito ra fariseo vatyi cuaha ca ñiyivi ndyico sii ra Jesús ta cuaha ca ñiyivi zacoo ndutya ra ta ziqui ra Juan. Vazu yivi ra Jesús zacoo ndutya sii ñu. Maa ra i casi ra zacoo ndutya sii ñu. Ta sa sito ra Jesús vatyi sa sito ra fariseo cuhva cuan, ta ziqui i quita ra Judea ta cua nuhu ra ndya Galilea.

⁴Ta ityi cuhun ra, cua yaha ra nu cu si Samaria.

⁵Yucuan cuenda saa ra minoo ñuu sa nañi Sicar. Cuenda Samaria cuu ñuu cuan, ta ndyaa si yatyi minoo ñuhu i saha ra Jacob sii ra José zehe ra ta tyiemvu.

⁶Yucuan iyo zoco sa nañi zoco ra Jacob. Sitatu xaan ra Jesús vatyi sica ityi ra, ta yucuan cuenda sicundyaa ra yatyi ñi yuhu zoco cuan. Ta i cuu si maa ora.

⁷⁻⁸Ta ra i casi ra Jesús, cuahan ra ndya ñuu vatyi cua zata ra zuhva sa casi ra. Tacuan ta ziqui i saa minoo ñaha nu ndyaa ra Jesús. Minoo ñaha samaritana cuu ña. Vasi quihin ña ndutya. Ta catyi ra Jesús sihin ña: Cuhva siin ndutya cohi.

⁹Ta i nacahan ñaha samaritana cuan ta catyi ña: Ra hebreo cuun, ta yozo caa vatyi sicon ndutya sii,

ta ñaha samaritana cui. Tacuan i catyi ña vatyí iyo tizihí ñiyivi hebreo sihin ñiyivi samaritana.

¹⁰Tacuan ta ziquí i nacahan ra Jesús ta catyi ra: Tatu sa vatyí siton ñaa sa saha maa ra Ndyoo ta yoo ra sica ndutyá suun, cua cacon sii, ta cua cuhve ndutyá sa cunditon.

¹¹Ta ziquí i catyi ña sihin ra: Tata, ñahní sa ndohon sa cua tavon ndutyá ya, ta cono xaan ñoho ndutyá ya. ¿Ta ndyamaa cua cuhun ndutyá sa saha sa cundito ñiyivi ta cuhvon sii?

¹²¿Atu cahnu ca moo ta ziquí ra Jacob ra cu ñiyivi sahnu sii ndí? Ihya ndutyá i sihi maa ra ta zehe ra ta quiti zono ra, ta i zandoo ra ndutyá ya sii ndí. Catyi ña.

¹³Ta i catyi ra Jesús sihin ña: Tandíhi ñiyivi sa cua coho ndutyá ya, cua cu-ityi ñu inga saha.

¹⁴Zoco ñiyivi sa cua coho ndutyá sa cua cuhve, ma cu-ityi ca ñu numinoo saha. Vatyí ndutyá sa cua cuhve, cua caña si sisi añima ñu, ta cua cuhva si sa cundito añima ñu sihin ra Ndyoo.

¹⁵Tacuan ta ziquí i catyi ñaha cuan sihin ra: Tata, cuhvon ndutyá cuan sii vatyí ma cu-ityi que, ta ma quisi quihin que ndutyá zoco ya.

¹⁶Ta i catyi ra Jesús sihin ña: Cuahan cua canon sii yíun ta quisi ndo.

¹⁷Ta i nacahan ña ta catyi ña: Yoñi yíi iyo. Ta i catyi ra Jesús sihin ña: Ndison sa cohon vatyí yoñi yíun iyo.

¹⁸Vatyí sa sicoo ohon tahan yíun. Ta ra sa ndyaa suhun vityí, yívi yíun cuu sii ra cuan sa ndisa. Ndisa sa cohon vatyí yoñi yíun iyo.

¹⁹Tacuan ta i catyi ñaha cuan sihin ra: Tata, tuu iñi vatyí minoo ra cahan Tuhun Ndyoo cuun.

²⁰I zacahnu ñiyivi sahnu sii nduhvi samaritana sii ra Ndyoo ihya yucu ya, zoco ndoho ñiyivi hebreo catyi ndo vatyí Jerusalén cuu nu cuñi si zacahnu ñiyivi sii ra Ndyoo, catyi ña.

²¹Ta i catyi ra Jesús sihin ña: Sino iñun sa quehin, maha, vatyí sa cua saa quivi ta cua zacahnu ndo sii ra Ndyoo Zutu yo, zoco yívi yucu ya ta yívi ndya Jerusalén.

²²Ndoho samaritana ña sito ndo ñaa sa zacahnu ndo, zoco nduhvi sito ndi yoo ra zacahnu ndi. Vatyí cuhva cacu yo vasi si sa cuenda ñiyivi hebreo.

²³Zoco sa cua saa cuhva, ta vityí cuu si, ta ñiyivi sa zacahnu sii ra Ndyoo sa ndisa, cua zacahnu ñu sii ra sihin tandíhi añima ñu ta sihin sa ndisa. Vatyí nanducu ra Ndyoo Zutu yo sii ñiyivi sa cua zacahnu sii ra cuhva cuan.

²⁴Ndyoo cuu ra tatyí, ta ñiyivi zacahnu sii ra, cuñi si vatyí zacahnu ñu sii ra sihin cuhva saha Tatyí li ra ta minoo sa ndisa. Tacuan catyi ra Jesús sihin ña.

²⁵Ta ziquí i catyi ñaha cuan: Site vatyí cua quisi minoo ra sa cua zacacu sii yo, ta Cristo cua cunañi ra. Ta quivi cua quisi ra, cua nacatyí ra tandíhi sihin yo, catyi ña.

²⁶Ta i catyi ra Jesús sihin ña: Zuun yuhvi cui ra cahan suhun ya.

²⁷Ta cuhva sa cahan ra Jesús ta i nasaa ra i casi ra, ta iyo xaan i cuñi ra ñaa cuenda natuhun xaan ra Jesús sihin minoo ñaha. Zoco numinoo ra, ta ñá cuñi ra nducu

tuhun ñaa sa cuñi ña a ñaa tuhun cahan ra sihin ña.

²⁸Ta ziqui i zandoo ñaha cuan quiyi ña, ta cuahan ña ndya ñuu, ta i nacaty i ña sihin ñiyivi:

²⁹Coho ndo cua ndyehe yo sii minoo ra nacaty sihin tandihi cuii sa zavehi. ¿Atu yivi ra Cristo cuu ra? Caty ña.

³⁰Tacuan ta ziqui i quita ñu ñuu cuan ta cuahan ñu ndya nu ndyaa ra Jesús.

³¹Cuee ca sa saa ñiyivi yucuan ta i zañiñi ra i casi ra Jesús sii ra ta caty ra: Maestro, casi zuhva.

³²Zoco i caty i ra Jesús sihin ra: Iyo sa sa sasi, zoco ña sito ndo.

³³Tacuan ta ziqui i quisaha nducu tuhun tahan ra i casi ra sii tahan ra, ta caty ra: ¿Atu iyo minoo ñiyivi sa quisi ndyaca sa sasi ra ya? Caty ra.

³⁴Zoco i caty i ra Jesús sihin ra: Sa saha tundyee iñi sii, cuu sa zavehi cuhva cuñi ra tasi sii, ta sa zandih i tyiño ra.

³⁵Ma caty i ndo: “Cumañi cumi ca yoo, ta cua naquihin ñiyivi tyiño i zacuu ñu.” Vaty yuhvi caty: Ndyehe vaha ndo itu vaty sa sisa si. Sa cuu zaquee ñiyivi sii si.

³⁶Ta ra sa cua naquihin, cua coo yahvi ra. Ta sa cua naquihin ra, cuu cuenda tandih i cuii tyiemvu. Ma cunaa si. Vaty ra tasi ta ra cua naquihin cua cuzii xaan iñi nduu tahan ra.

³⁷Ta ihya cuu minoo sa ndisa cuhva cahan ñiyivi: “Minoo ra tasi ta inga ra naquihin.”

³⁸Tave tyiño sii ndo vaty naquihin ndo nu ñá ndyehe ndo tundoho. Inga ra zatyño ta vity nañihi maa ndo sa vaha nu zatyño

ra cuan. (Tacuan i caty i ra Jesús sihin ra i casi ra.)

³⁹Ta cuaha xaan ñiyivi ñuu Samaria i sino iñi ñu sii ra Jesús sa cuenda sa i nacaty ñaha cuan vaty i caty ña: “I nacaty ra sihin tandih i cuii sa i zavehi.”

⁴⁰Yucuan cuenda zañiñi ñu sii ra Jesús vaty ndoo ra sihin ñu. Ta i ndoo ra Jesús uu quivi yucuan.

⁴¹Ta cuaha xaan ca ñu i sino iñi ñu sii ra Jesús sa cuenda tuhun i cahan ra sihin ñu.

⁴²Ta ziqui i caty ñu sihin ñaha cuan: Vity sino iñi ndi sii ra ta ña iñi ñi sa cuenda tuhun i nacaty moo, zoco vity zuun ñi maa ndi siñi ndi sa cahan ra, ta sito ndi vaty ndisa ra Cristo cuu ra, ra cua zacacu sii ñiyivi ñuu ñiyivi.

Zanduvaha ra Jesús sii zehe minoo ra ndyaca ñaha

⁴³I yaha uu quivi, ta i quita ra Jesús yucuan ta cuahan ra ndya nu cu si Galilea.

⁴⁴Vaty sa caty maa ra vaty minoo ra cahan Tuhun Ndyoo, ña tyaa ñiyivi yahvi sii ra ñuu ra.

⁴⁵Ta sa i saa ra Jesús ndya Galilea, ta yucuan zii xaan i cuñi ñiyivi sihin ra vaty sa i sahan ñu vico zuhun ñuu Jerusalén ta i ndyehe ñu tandih i sa i zavaha ra Jesús yucuan.

⁴⁶Tacuan ta ziqui i naquita tucu ra Jesús ndya ñuu Caná sa ndyaca ñaha Galilea nu i zanduu ra vino sii ndutya quivi cuan. Ta yucuan iyo minoo ra ñuu Capernaum. Cahnua xaan tyiño ndyizo ra cuenda ra cu rey. Ta cuhu xaan zehe ra ndya ñuu ra.

⁴⁷Ta sa sito ra cuan vaty sa i quita ra Jesús Judea ta nasaa ra

Galilea, i sahan ra nu ndyaa ra sa cua cahan ra sihin ra vatyi cuhun ra ndya vehe ra ta zanduvaha ra sii zehe ra vatyi sa cuñi cuu ra.

⁴⁸Tacuan ta i catyi ra Jesús sihin ra: Tatu ma ndyehe ndo zeña ta sa ndyityi, ma sino iñi ndo sii.

⁴⁹Zoco i catyi ra ndyizo tyiño cuan sihin ra: Tata, coho vityi vityi ñi cuee ca sa cuu zehi.

⁵⁰Ta i catyi ra Jesús sihin ra: Cuahan ndya vehun. Sa nduvaha zehun. Tacuan ta i sino iñi ra sa catyi ra Jesús, ta i quihin ra ityi cuahan ra.

⁵¹Ta ityi cuahan ra ta i ñihi tahan muzu ra sihin ra ta catyi ra: Ñá sihi zehun.

⁵²Tacuan ta ziqui i nducu tuhun ra: ¿Ñaa cuhva i quisaha nduvaha zehi? Ta i catyi muzu cuan: Icu, cuhva caa iin sa yaha ora i quita cahñi cuan.

⁵³Tacuan ta i sito ra vatyi i cuu si zuun ñi cuhva sa i catyi ra Jesús sihin ra: “Sa nduvaha zehun.” Ta i sino iñi ra cuan sii ra Jesús sihin tandihi ñiyivi sii ra.

⁵⁴Ta ihya cuu sa cu uu sa ndyityi i zavaha ra Jesús sa quita ra Judea ta nasaa ra Galilea.

Zanduvaha ra Jesús sii minoo ra xii nu iyo minoo pila sa nañi Betesda

5 Ta sa yaha cuan ta ziqui i cuu si minoo quivi sa zacahnu ñiyivi hebreo minoo vico, ta cuahan ra Jesús ndya ñuu Jerusalén.

²Ta ñuu Jerusalén iyo minoo pila sa nañi Betesda sihin zahan hebreo. Iyo ohon tahan yuvehe nu cuu quihvi ñiyivi ndya nu ndyaa

si. Ndyaa yuñuu iyo pila cuan vatyi minoo yuhu nuzama sa nañi: Nu Quihvi Mvee Ticatyi.

³Ta vatyi ñi yu pila cuan candyaa cuaha xaan ñiyivi cuhu, tañi: ñu cuaa, ta ñu coxo, ta ñu xii. Ndatu ñu sa cua canda ndutya sisi pila cuan.

⁴Vatyi iyo saha, noo minoo ángel ndya pila cuan ta zacanda si ndutya, ta ziqui yoo ra cua quihvi si ndutya cuan sa xihna ñi, yucuan cuu ra cua nduvaha, ñaa ndihi cuii ca cuehe cuhu ra.

⁵Ta yucuan ndyaa minoo ra sa oco sahun uñi cuiya sa cuhu ra.

⁶Ta i ndyehe ra Jesús sii ra candyaa ra yucuan, ta i nacoto ra vatyi sa naha xaan tahan ra tacuan, ta i nducu tuhun ra sii ra: ¿Atu cuñun nduvohon? catyi ra.

⁷I nacahan ra cuhu cuan ta catyi ra: Tata, yoñi sa cua tyihi sii sisi ndutya ya cuhva sa canda si. Tandihi saha cuñi quihvi, zoco quihvi inga ra sa xihna ñi.

⁸Tacuan ta i catyi ra Jesús sihin ra: Nduvito; natuun yuun ta cacon.

⁹Ta zuun ñi caa cuhva cuan ndaha nduvaha ñi ra, ta i natuu ra yuu ra ta quisaha sica ra. Ta quivi cuan, minoo quivi quitatu ñiyivi cuu si.

¹⁰Yucuan cuenda i catyi ñiyivi hebreo sihin ra nduvaha cuan: Vityi cuu quivi quitatu yo. Ña tahan si cuizon yuun.

¹¹Ta i nacahan ra sa nduvaha cuan ta catyi ra: Ra zanduvaha sii, i catyi ra: “Nacuhun yuun ta cacon.”

¹²Tacuan ta ziqui i nducu tuhun ñiyivi sii ra sa nduvaha cuan ta catyi ñu: ¿Ta yoo ra cuu ra sa i

catyi suhun vatyí nacuhun yuun ta cacon?

¹³Zoco ña sito ra sa nduvaha cuan yoo ra zanduvaha sii ra vatyí sa quihvi ra Jesús ticui ñiyívi, ta cuaha xaan ñiyívi yucu yucuan.

¹⁴Ta cuee ca i nañihi ra Jesús sii ra sisi vehe ñuhu, ta i catyi ra sihin ra: Ndyehe vityí vatyí sa nduvohon. Ma zavaha con cuatyí, coto quisi inga tundoho cahnu ca zicun.

¹⁵Tacuan ta ziquí cuahan ra cuan, ta i nacatyí ra sihin ñiyívi hebreo vatyí ra Jesús cuu ra i zanduvaha sii ra.

¹⁶Ta yucuan cuenda i cuxaan xaan ñiyívi hebreo sihin ra Jesús ta i cuñi cahñi ñu sii ra vatyí i zavaha ra cuhva cuan quívi quitatu ñiyívi.

¹⁷Zoco i catyi ra Jesús sihin ñu: Tandihí tyiemvu zatyíño ra Ndyoo Zuti, ta yuhvi zatyíño tuqui. Catyi ra.

¹⁸Ta yucuan cuenda cuñi xaan ca ñiyívi hebreo sa cahñi ñu sii ra Jesús vatyí ña tyaa ra yahvi ley sa cuenda quívi quitatu ñiyívi, ta catyi tucu ra vatyí ra Ndyoo cuu Zutu ra ta zacuu ra sa iin ñi ra cuu ra sihin ra Ndyoo.

Iyo xaan cuhva sii Zehe ra Ndyoo

¹⁹Tacuan ta ziquí i catyi ra Jesús: Sa ndisa catyi sihin ndo vatyí ñahñi sa cuu zavaha ra cu Zehe ra Ndyoo sa maa ñi maa ra. Zavaha ra cuhva sa ndyehe ra vatyí zavaha Zutu ra, vatyí tandihí cuhva zavaha ra Ndyoo Zutu ra, ta tacuan tucu zavaha Zehe ra.

²⁰Cuñi xaan ra Ndyoo Zutu yo sii Zehe ra, ta zañaha ra sii ra tandihí cuii sa zavaha maa ra. Ta cua

zañaha tucu ra inga cuhva cahnu ca sii Zehe ra, tacuan ta iyo xaan cua cuñi ndo.

²¹Vatyí tañi tuhva ra Ndyoo Zutu yo zanandoto sii ñiyívi i sihi ta saha ra sa cundito ñu, ta tacuan tucu Zehe ra, saha ra sa cundito yoo ñiyívi cuñi ra.

²²Ta Ndyoo Zutu yo, ña tyicuhva ra sii ñiyívi. Saha ra tandihí cuhva cuan sii Zehe ra sa tyicuhva ra sii ñiyívi.

²³Tacuan i zavaha ra Ndyoo vatyí cuñi ra sa cua zacahnu ñiyívi sii Zehe ra tañi zacahnu ñu sii ra Ndyoo Zutu ra. Ñiyívi ña zacahnu sii Zehe ra Ndyoo, ña zacahnu tucu ñu sii Zutu ra vatyí maa ra i tasi sii ra.

²⁴Sa ndisa catyi sihin ndo: Ra sa siñi sa quehin ta sino iñi ra sii ra i tasi sii, cua cundito ra tandihí cuii tyiemvu. Ma tasi tuñi ca ra Ndyoo sii ra. Ma cuu cuii añima ra, cua cundito ra tandihí cuii tyiemvu.

²⁵Sa ndisa catyi sihin ndo vatyí sa cua saa cuhva, ta vityí cuu si, ta iyo ñiyívi tañi sa sihi ñu sa cuenda cuatyí ñu zoco cua cuiñi ñu sa cahan Zehe ra Ndyoo. Ta ñiyívi tyaa yahvi, cua cundito ñu tandihí cuii tyiemvu sihin ra Ndyoo.

²⁶Vatyí iyo cuhva sii Ndyoo Zuti sa cuhva ra sa cundito ñiyívi tandihí cuii tyiemvu. Ta tacuan tucu i saha ra sii Zehe ra sa cuhva ra sa cundito ñiyívi.

²⁷Ta i saha tucu ra Ndyoo cuhva sii Zehe ra vatyí zandaa ra tyiño cuenda ñiyívi vatyí ra i quisi ndya gloria cuu ra.

²⁸Ma iyo xaan cuñi ndo vatyí quehin tuhun ya vatyí cua saa

cuhva ta tandihi ñiyivi i sihi cua cuiñi ñu sa cahan Zehe ra Ndyoo.

²⁹Ta cua quita ñu sisi ñaña. Ñiyivi i zavaha sa vaha, cua nandoto ñu ta cua cundito ñu. Zoco ñiyivi i zavaha sa ña vaha, cua nandoto ñu ta cua ndoho ñu.

Cuhva cuu coto yo vatyí cuu zacuu ra Jesús tandihi

³⁰(Cahan ca ra Jesús ta catyi ra:) Ñahñi sa cuu zavehi sa maa ñi mi. Cuhva catyi maa ra Ndyoo sihin, ta tacuan zandei tyiño cuenda ñiyivi. Ta ndoo xaan cuu cuhva zandei tyiño vatyí ña nduqui cuhva zavehi cuhva cuñi mi, zoco zavehi cuhva cuñi ra i tasi sii.

³¹Tatu zuun ñi mi saha sa ndaa sa cuende, ña sito ñiyivi tatu quehin sa ndisa.

³²Zoco iyo inga ra saha sa ndaa sa cuende, ta site vatyí ndisa cuu sa ndaa sa saha ra sa cuende.

³³I tasi ndo tyiño, ta i nducu tuhun ndo sii ra Juan. Ta cuhva i catyi maa ra, sa ndisa cuu si.

³⁴Zoco ña siñi ñuhu sa cuhva ñiyivi sa ndaa sa cuende. Zoco catyi cuhva ya vatyí cuñi sa cua cacu ndo.

³⁵I cuu ra Juan tañi minoo lámpara. Cayu si ta zandisi si. Ta zii xaan i cuñi ndo zuhva quivi sihin ñúhu i saha maa ra.

³⁶Zoco iyo minoo sa ndaa sii. Ñiñi ca si ta ziqui sa ndaa sa saha ra Juan. Zuun ñi cuhva zavehi cuu sa ndaa. Ta zañaha si vatyí i tasi ra Ndyoo Zuti sii, sa ndisa. Ta maa ra cuu ra i catyi vatyí zavehi cuhva ya ta zandehi sii si.

³⁷Ta ra Ndyoo Zuti, ra i tasi sii, cahan tucu ra sa cuenda mi. Tañaha ca cuiñi ndo sa cahan ra a ndyehe ndo sii ra.

³⁸Ta ñahñi tuhun ra iyo añima ndo vatyí ña sino iñi ndo sii ra i zaquisi ra.

³⁹Nanducu xaan ndo sisi tutu Tuhun Ndyoo vatyí sica iñi ndo vatyí yucuan cua nañihi ndo cuhva cacu añima ndo ta ma cuu cuii ndo. Ta zuun ñi yucuan cuu nu saha si sa ndaa sa cuende.

⁴⁰Zoco ña cuñi ndo sino iñi ndo sii ta ñihi ndo sa cundito ndo.

⁴¹Ña sica xaan iñi tatu tahan iñi ñiyivi sii a ña tahan iñi ñu.

⁴²Zoco sa site sii ndo, ta site vatyí ña cuñi ndo sii ra Ndyoo.

⁴³Vasi sa cuenda ra Ndyoo Zuti, ta ña sino iñi ndo sii. Zoco tatu cua quisi inga ra sa cuenda sa zuun ñi maa ra, sii maa ra cuan cua sino iñi ndo.

⁴⁴¿Yozo caa cuu sino iñi ndo? Ma cuu vatyí saha ndo sa zacahnu ñiyivi sii ndo ta zacahnu ndo sii ñu. Ta sii sa minoo ñi ra cuu Ndyoo, ña nanducu ndo cuhva cuzii iñi maa ra sihin ndo.

⁴⁵Ma caca iñi ndo vatyí yuhvi cua tyei cuatyí sata ndo nuu ra Ndyoo Zuti. Iyo minoo ra sa tyaa cuatyí sata ndo. Zuun ñi maa ra Moisés cuu ra. Ta nii xaan iñi ndo vatyí maa ra cua zacacu sii ndo.

⁴⁶Zoco tatu sa i sino iñi ndo sa ndisa cuhva cahan ra Moisés, ta vityí cua sino iñi ndo sii, vatyí i tyaa ra Moisés sa cuende.

⁴⁷Zoco tatu ña sino iñi ndo sa i tyaa ra, zuun ñi cuhva cuan ma cuu

sino iñi ndo sa quehin. (Catyi ra Jesús sihin ñiyivi hebreo cuan.)

**Saha maa ra Jesús sa
casi ohon mil rayii**

6 Ta sa ndihi cahan ra Jesús tuhun cuan, ta ziqui cuahan ra ndya inga siyo miñi cahnu sa nañi Galilea. Ta inga zivi si cuu Tiberias.

²Ta cuaha xaan ñiyivi ndyico sii ra vaty i ndyehe ñu sa ndyityi i zavaha ra sihin ñiyivi cuhu nu i zanduvaha ra sii ñu.

³Ta i ndaa ra Jesús minoo yucu, ta yucuan i sicundyaa ra sihin ra i casi ra.

⁴Ta sa cuñi tahan si quivi coo minoo vico cuenda ñiyivi hebreo.

⁵Ta nandyehé ra Jesús vaty cuaha xaan ñiyivi ndyico sii ra, ta i catyi ra sihin ra Felipe: ¿Ndyamaa cua zata yo sa casi ñiyivi ya?

⁶Tacuan i catyi ra vaty cuñi ra ndyehe ra ñaa sa cua catyi ra Felipe vaty sa sito ra Jesús ñaa sa cua zavaha ra.

⁷Tacuan ta i catyi ra Felipe sihin ra: Vazu uñi mil peso pan, zoco ma ñihi si casi ñiyivi zuhva zuhva ñi.

⁸Ta ra Andrés, minoo ra i casi ra Jesús cuu ra ta yañi ra Simón Pedro, ta maa ra Andrés cuan i catyi:

⁹Iyo minoo ra luhlu ihya; ndyizo ra ohon tahan pan ta uu tahan tyiyaca. Zoco ñahñi ñi cuu si cuan nuu sa cuaha xaan ñiyivi ya.

¹⁰Tacuan ta ziqui i catyi ra Jesús: Catyi ndo sihin ñiyivi vaty nacundyaa ñu. Catyi ra. Ta iyo cuaha cuhu yucuan, ta i sicundyaa ñiyivi tañi ohon mil sa maa ñi rayii (ta ziqui ca ñu zihhi ta sa ndyihhi).

¹¹Tacuan ta i quihin ra Jesús pan cuan, ta sa yaha saha ra tyahvi ndyoo sii ra Ndyoo ta ziqui i saha ra sii si sii ra i casi ra. Ta i zasa ra cuan sii si sii ñiyivi yucu yucuan. Ta tacuan tucu i zavaha ra sihin tyiyaca cuan. I saha ra ndya cuhva ndya sa ndaha iñi ñu.

¹²Ta sa ndaha iñi ñu ta catyi ra Jesús sihin ra i casi ra: Naquihin ndo sa nandoo, ta tacuan ta ñahñi si cua tivi.

¹³Tacuan ta i naquihin ra sii si, ta i zacutu ra usi uu tahan tyica sihin yiqui pan cuan sa nandoo ta sa ndihi sasi ñiyivi.

¹⁴Ta sa ndyehe ñiyivi cuan sa ndyityi i zavaha ra Jesús, i catyi ñu: Ndisa cuii vaty ihya ra cuu ra sa ndyaa tyiño sa quisi ra ñuu ñiyivi ta cahan ra Tuhun Ndyoo. Catyi ñu.

¹⁵Ta i tuu iñi ra Jesús vaty cuñi ñu quisi tñn ñu sii ra ta zañiñi ñu sii ra vaty cuu ra minoo rey, ta sa sito ra cuhva cuan i quita ra yucuan ta cuahan ra minoo yucu maa ñi maa ra.

Sica ra Jesús nu ndutya

¹⁶Ta sa cuaa cuan cuahan ra i casi ra Jesús ndya yuhu miñi cuan.

¹⁷Ta i quihvi ra minoo barco, ta i quisaha yaha zava ra miñi cuan vaty cuñi ra cuhun ra ñuu Capernaum. Ta sa cuaa cuu si cuhva cuan, ta tañaha ca nasaa ra Jesús.

¹⁸Ta ñihi xaan i quisaha canda ndutya vaty ñihi xaan ñoho taty.

¹⁹Ta cuhva sa i yaha ra tañi minoo ohon a iñu kilómetro, tacuan ta ziqui i ndyehe ra sii ra Jesús. Sica ra nu ndutya, ta tuhva ra sii

barco cuan. Ta i yuhu xaan ra i casi ra.

²⁰Zoco i catyi ra Jesús: Zuun yuhvi cui. Ma yuhu ndo.

²¹Tacuan ta ziqui i cuñi xaan ra i casi ra vatyí naquihvi ra Jesús sisi barco. Ta sa i quihvi ra, ta yatyí cuii ñi i saa tu nu cuahan ra.

Nanducu ñiyivi sii ra Jesús

²²Cundisi inga quivi ta i sito ñiyivi sa nandoo inga siyo miñi cuan vatyí sa cuahan ra i casi ra Jesús sihin sa minoo barco sa sindyaa yucuan, ta ña cuahan ra Jesús sihin ra.

²³Zoco cuhva cuan ta i saa inga ca barco, yutu i quita ñuu cahnu Tiberias. I saa tu yatyí ñi nu i sasi ñiyivi pan sa yaha saha ra Jesús tyahvi ndyoo sii ra Ndyoo.

²⁴Tacuan ta sa ndyehe ñiyivi vatyí yoñi ra Jesús yucuan ta nu ra i casi ra, tacuan ta ziqui i quihvi ñu sisi barco sa i saa cuan, ta cuahan ñu ndya ñuu Capernaum cua nanducu ñu sii ra Jesús.

Ra Jesús cuu pan sa saha sa cundito ñiyivi

²⁵Ta sa i saa ñiyivi inga siyo miñi cuan, i nañihi ñu sii ra Jesús ta nducu tuhun ñu: Maestro, ¿ama i soon ihya? Catyi ñu.

²⁶Ta i catyi ra Jesús sihin ñu: Sa ndisa catyi sihin ndo, nanducu ndo sii vatyí i sasi ndo, ta ndaha iñi ndo. Yivi sa cuenda vatyí i cutuñi iñi ndo sa ndyityi i zavehi.

²⁷Ma zatyíño ndo maa ñi sa cuenda ndyayu sa cua casi ndo vatyí cunaa si cuan. Vaha ca zatyíño ndo sa cuenda ndyayu sa

cua coo tandihi tyiemvu, ndyayu sa cua cuhva sa cundito ndo tandihi tyiemvu. Ihya ndyayu cua cuhva ra i quisi ndya gloria vatyí maa ra Ndyoo Zutu yo saha cuhva cuan sii ra sa cuhva ra. (Tacuan i catyi ra Jesús.)

²⁸Tacuan ta i nducu tuhun ñiyivi sii ra: ¿Ñaa sa cuñi si zavaha ndi ta cua zavaha ndi tandihi cuii cuhva cuñi ra Ndyoo? Catyi ñu.

²⁹Ta i nacahan ra Jesús ta catyi ra sihin ñu: Ihya cuu sa cuñi ra Ndyoo zavaha ndo. Sino iñi ndo sii ra i tasi ra.

³⁰Tacuan ta ziqui i nducu tuhun ñu sii ra: ¿Ñaa zeña cua zañohon sii ndi ta ndyehe ndi ta sino iñi ndi suun? ¿Ñaa sa cua zavohon?

³¹Ñiyivi saha sii ndi ta sa naha, i sasi ñu maná sisi cuhu tañi catyi tutu ra Ndyoo: “Saha maa ra Ndyoo pan sa quisi ndya ityi ziqui vatyí casi ñu.”

³²Tacuan ta i catyi ra Jesús sihin ñu: Sa ndisa catyi sihin ndo vatyí yivi ra Moisés saha pan sa quisi ndya ityi ziqui. Ra Ndyoo Zuti cuu ra saha pan sa cuu pan sa quita ityi ziqui sa ndisa cuii.

³³Vatyí pan sa saha maa ra Ndyoo cuu ra i quita ndya andivi ta saha ra sa cundito ñiyivi ñuu ñiyivi.

³⁴Tacuan ta i catyi ñiyivi sihin ra: Tata, cuhva pan cuan sii ndi tandihi cuii tyiemvu.

³⁵Ta i catyi ra Jesús sihin ñu: Yuhvi cui pan sa saha sa cundito ñiyivi. Ñiyivi cua sino iñi sii, ma cuzoco ca ñu ndaha ñi. Ta ma cu-ityi ca ñu numinoo saha.

³⁶Zoco tañi sa catyi sihin ndo vatyí vazú sa ndyehe ndo sii, zoco ña sino iñi ndo sii.

³⁷Tandihî ñiyivi sa saha ra Ndyoo Zuti sii, cua sino iñi ñu sii. Ta ñu sino iñi sii, ma tave sii ñu ityi sata.

³⁸Vatyî ña quite ndya gloria sa zavehi cuhva cuñi mi, zoco vasi vatyî cua zavehi cuhva cuñi ra i tasi sii.

³⁹Ta ihya cuu sa cuñi ra i tasi sii vatyî ma zacunei numinoo ñiyivi sa i saha ra sii. Zoco cua zanandote sii tandihî ñu quivi cua tyicuhva ra Ndyoo sii ñiyivi.

⁴⁰Cuhva cuñi ra Ndyoo Zuti cuu, tandihî ñiyivi sa ndyehe sii Zehe ra ta sino iñi ñu sii ra, cua cundito ñu tandihî tyiemvu. Ta cua zanandote sii ñu quivi cua tyicuhva ra Ndyoo sii ñiyivi. Tacuan i catyi ra Jesús.

⁴¹Ta sa ndihî cahan ra tacuan, ta ziqui i quisaha natuhun xaan ra hebreo vatyî catyi ra Jesús: “Yuhvi cui pan sa i quita ndya andivi.”

⁴²Ta i catyi ñu: ¿Atu yivi ra Jesús cuu ra ya, zehe ra José? Sito yo sii zutu ra ta sii zihî ra. ¿Ñacu catyi ra vatyî ra i quita ndya andivi cuu ra?

⁴³Tacuan ta i catyi ra Jesús: Ma natuhun tahan xaan ndo.

⁴⁴Yoñi sa cuu sino iñi sii tatu ma tyindyee ra Ndyoo Zutu yo sii ra cuan. Ra Ndyoo i tasi sii. Ta cua zanandote sii ñiyivi cuan quivi cua tyicuhva ra Ndyoo sii ñiyivi.

⁴⁵Sisi libro i tyaa ra profeta catyi si tyehen: “Cua zacuaha ra Ndyoo sii tandihî ñu.” Catyi si. Tacuan cu si, ta tandihî ñiyivi sa siñi ta cutuhva ñu sa zacuaha ra Ndyoo Zutu yo, cua sino iñi ñu sii.

⁴⁶Yoñi numinoo ñiyivi sa ndyehe sii ra Ndyoo Zutu yo. Minoo tuhun ñi ra i ndyehe cuu ra i quita ndya nu ndyaa ra Ndyoo.

⁴⁷Sa ndisa catyi sihin ndo vatyî ra sa sino iñi sii, sa ñihî ra sa cundito ra tandihî tyiemvu.

⁴⁸Yuhvi cui pan sa saha sa cundito ñiyivi.

⁴⁹I sasi ñiyivi sahnû sii ndo maná sisi cuhu, zoco sihi ñu.

⁵⁰Ta quehin tuhun pan sa quisi ndya andivi vatyî cua casi ñiyivi sii si, ta ma cuu ñu.

⁵¹Ta yuhvi cui pan ndito sa i quita ndya andivi. Ta ñiyivi sa cua casi pan ya, cua cundito ñu tandihî cuu tyiemvu. Ta pan sa cua cuhve cuu coño ñuhi. Cua cuhve sii si vatyî tacuan ta cua cundito ñiyivi sihin ra Ndyoo.

⁵²Tacuan i catyi ra Jesús, ta ziqui i quisaha natuhun tahan xaan ra hebreo sihin tahan ra ta catyi ra: ¿Yozo caa cuu cuhva ra ya coño ñuhu ra casi yo?

⁵³Tacuan ta i catyi ra Jesús sihin ra: Sa ndisa catyi sihin ndo vatyî tatu ma casi ndo coño ñuhu ra i quisi ndya gloria ta coho ndo ñiñi ra, ma cundito añima ndo.

⁵⁴Ñiyivi sa cua casi coño ñuhi ta coho ñu ñiñi, cua cundito añima ñu, ta cua zanandote sii ñu quivi cua tyicuhva ra Ndyoo sii ñiyivi.

⁵⁵Vatyî coño ñuhi cuu sa ndisa ndyayu, ta ñiñi cuu sa ndisa sa coho ñiyivi.

⁵⁶Ñiyivi sa cua casi coño ñuhi ta coho ñu ñiñi, iin ñi cua cuu ñu sihin, ta iin ñi cua cui sihin ñu.

⁵⁷Tañi sa tasi ra Ndyoo ndito sii ta ndite sa cuenda ra, ta zuun ñi cuhva, ñiyivi sa cua casi coño ñuhi, cua cundito añima ñu sa cuenda mi.

⁵⁸Ta ihya cuu pan sa i quita andivi. Ña iyo si tañi maná sa sasi

ñiyivi sahnu sii ndo ta sihi ñu; vatyi ñiyivi cua casi pan sa quehin tuhun, cua cundito ñu tandihi cuii tyiemvu sihin ra Ndyoo.

⁵⁹I zacuaha ra Jesús cuhva ya nu titahan ñiyivi sisi vehe ñuhu ñuu Capernaum.

**Ihya tuhun saha si cuhva
coto yo yozo caa cundito yo
tandihi cuii tyiemvu**

⁶⁰Ta sa i siñi ñiyivi ndyico sii ra Jesús cuhva cahan ra ta cuaha xaan ñu catyi ñu: Yi xaan cuhva cahan ra. Yoñi sa cuu cutuñi iñi sa cahan ra. Catyi ñu.

⁶¹Zoco i tuu iñi ra Jesús cuhva natuhun tahan xaan ñu ndyico sii ra sa cuenda cuhva i cahan ra, ta i catyi ra sihin ñu: ¿Atu ña tahan iñi ndo tuhun cuan?

⁶²¿Ta yozo caa tatu ndyehe ndo sii ra i quita ndya gloria nandaa tucu ra ndya nu i quita ra? ¿Ñaa sa cua caca iñi ndo?

⁶³Tatyi li cuu sa saha sa cundito aña ñiyivi. Ñahñi tyindyee coño ñuhu ñu. Tuhun quehin sihin ndo cuu sa cuenda aña ndo, ta saha si sa cundito aña ndo.

⁶⁴Zoco iyo zuhva ndo sa ña sino iñi ndo. Tacuan catyi ra Jesús vatyi sa sito ra ndya sa xihna ñi yoo ñu cuu ñu sa ña sino iñi ta yoo ra cua xico tuhun sii ra.

⁶⁵Ta i catyi ra: Yucuan cuenda catyi vatyi yoñi numinoo ndo ta cuu sino iñi ndo sii tatu ma cuhva ra Ndyoo Zuti cuhva cuan sii ndo.

⁶⁶Ta sa ndihi cahan ra Jesús cuhva cuan, ta cuaha ñiyivi ndyico sii ra, i zandoo ñu sii ra ta ña sindyico ca ñu sii ra.

⁶⁷Tacuan ta ziqui i catyi ra Jesús sihin sa usi uu tahan ra i casi ra: ¿Atu cua cahun ndihi tucu ndoho?

⁶⁸Ta i nacahan ra Simón Pedro ta catyi ra: Tata, ¿Yoo sihin cahun ndi? Moo cuu ra nacatyi sihin ndi yozo caa cua ñihi ndi sa cundito ndi tandihi tyiemvu.

⁶⁹Ta sa sino iñi maa ndi ta nacoto vaha ndi vatyi yoho cuu ra Cristo, zehe ra Ndyoo ndito.

⁷⁰Ta i nacahan ra Jesús ta catyi ra: I casi sii ndo sa usi uu tahan ndo, ta minoo ndo cuu minoo cuihna. Catyi ra.

⁷¹I cahan ra Jesús cuhva ya sa cuenda ra Judas Iscariote zehe ra Simón vatyi maa ra cuu ra cua xico tuhun sii ra. Ta minoo sa usi uu tahan ra i casi ra cuu ra.

Ñá sino iñi yañi ra Jesús sii ra

7 Ta sa yaha cuhva cuan ta i sica noo ra Jesús nu cu si Galilea. Ña cuñi ca ra caca noo nu cu si Judea vatyi cuñi cahñi ra hebreo sii ra.

²Ta sa cuñi tahan si quivi zacahnu ñiyivi hebreo minoo vico nu zavaha ñu vehe tyiyahva.

³Ta i catyi yañi ra Jesús sihin ra: Quiton ihya ta cahun ndya Judea vatyi tacuan ta cua ndyehe ñiyivi sino iñi suun ityi cuan tyiñon zavohon.

⁴Vatyi tatu cuñi minoo ra sa cua coto ñiyivi sii ra, ñahñi sa xehe zavaha ra. Tatu zavohon cuhva ya, zavohon sii si nuu tandihi ñiyivi.

⁵Tacuan catyi yañi ra vatyi nu yañi ra ta ñá sino iñi ra sii ra.

⁶Tacuan ta ziqui i catyi ra Jesús sihin ra: Ta saa ca quivi, zoco sa

cuenda maa ndo ta cuu ndya vaha ñi maa quivi.

⁷Ma cuu cuxaan ñiyivi sihin maa ndo, zoco cuxaan xaan ñu sihin mi vatyi nacatyi sa ña vaha sa zavaha ñu.

⁸Cuahan maa ndo vico. Ma cuhin vityi vatyi ta saa ca cuhva cuhin.

⁹Tacuan i cahan ra Jesús sihin ra, ta i ndoo ra Galilea.

**Cuahan ra Jesús vico nu
sino vehe tyiyahva**

¹⁰Ta sa cuahan yañi ra, ta ziqui cuahan tucu ra Jesús, zoco ña cuahan ndisi ra. Cuahan xehe ñi ra.

¹¹Ta i nanducu ra ndyaca ñaha sii ñiyivi hebreo sii ra vico cuan, ta catyi ra: ¿Ndyamaa iyo ra cuan?

¹²Ta natuhun tahan xaan tandihi ñiyivi sa cuenda ra. Iyo ñu catyi ñu: “Vaha ñiyivi cuu ra.” Ta inga ñu catyi: “Ña vaha ra. Zandavi ñaha xaan ra sii ñiyivi.” Catyi ñu.

¹³Zoco xehe ñi cahan ñiyivi sa cuenda ra vatyi yuhu ñu sii ra ndyaca ñaha hebreo.

¹⁴Ta sa yaha zava vico cuan, ta ziqui i quihvi ra Jesús vehe ñuhu cahnu cuenda ñu hebreo ta quisaha zacuaha ra.

¹⁵Ta iyo xaan i cuñi ra hebreo ta catyi ra: ¿Yozo caa sito xaan ra ya ta ñá sahan ra zicuela?

¹⁶I nacahan ra Jesús ta catyi ra: Cuhva zacuehi, yivi sa cuenda ñi mi cuu. Cuenda ra i tasi sii cuu si.

¹⁷Tatu cuñi minoo ndo zavaha ndo cuhva cuñi ra Ndyoo, cua coto ndo tatu cuhva zacuehi cuu sii ra Ndyoo a sa cuenda ñi mi.

¹⁸Tatu cahan minoo ñiyivi cuhva sa sica ñi iñi maa ra, cuñi ra cuan

vatyi zacahnu ñiyivi sii ra. Zoco ra cuñi vatyi zacahnu ñiyivi sii ra i zaquisi sii ra, cahan ra cuan sa ndisa ta ñahñi cuatyi ra.

¹⁹I saha ra Moisés ley sii ndo, zoco numinoo ndo ta ña cuñi ndo tyaa ndo yahvi sii si. ¿Ta ñaa cuenda cuñi ndo cahñi ndo sii?

²⁰Ta i nacahan ñiyivi ta catyi ñu: Iyo minoo tatyi ña vaha suun. Yoñi sa cuñi cahñi suun.

²¹I nacahan ra Jesús ta catyi ra sihin ñu: I zavehi minoo sa ndyityi quivi quitatu yo, ta iyo xaan cuñi tandihi ndo.

²²I saha ra Moisés minoo ley sa tahndya ñii xiñi xuu lee. Zoco yivi ra Moisés i quisaha sihin si. Zutu sahnu yo i quisaha sihin si ndya tyiemvu. Yucuan cuenda sahndya ndo ñii xiñi xuu lee vazu quivi quitatu yo cuu.

²³Ta tatu sa cuenda sa ma cumañi ley ra Moisés ta tahndya ñii xiñi xuu lee vazu quivi quitatu yo cuu, ¿ña cuenda cuxaan ndo sii vatyi ndaha zanduvehi sii minoo ra quivi quitatu yo?

²⁴Ma tyaa ndo cuatyi sata ñiyivi tatu ña sito vaha ndo ñaa sa zavaha ñu. Cuatu ndo ndya ndyehe vaha ndo ta ziqui cahan ndo.

**Cuñi ñiyivi coto ñu yoo
ra cuu ra Jesús**

²⁵Tacuan ta ziqui i quisaha nducu tuhun zuhva ñiyivi ñuu Jerusalén ta catyi ñu: ¿Atu yivi ra ihya cuu ra sa cuñi cahñi ñiyivi?

²⁶Zoco ndyehe ndo yucuan, cahan ra nuu ñiyivi, ta ñahñi catyi ñu. ¿Atu sa sino iñi ra cu tyiño vatyi ra Cristo cuu ra?

²⁷Zoco sito yo sii ra ya, ta sito yo ndyamaa i quisi ra. Ta quivi cua quisi ra Cristo, yoñi cua coto ndyamaa cua quisi ra.

²⁸Ta sito ra Jesús sa cahan ñu cuhva zacuaha ra sisi vehe ñuhu cahnu, ta saa xaan cahan ra ta catyi ra: Sito ndo sii, catyi ndo ta sito ndo ndya ityi i quisi, zoco ña vasi sa cuenda ñi mi. Iyo minoo ra tasi sii. Ra vaha xaan cuu ra, ta ña sito ndo sii ra.

²⁹Yuhvi site sii ra vatyí sa cuenda maa ra vasi, ta maa ra i tasi sii.

³⁰Tacuan ta i cuñi ra tiin ra sii ra Jesús, zoco yoñi tyihi ndaha sii ra vatyí ta saa ca cuhva cua tahan si sii ra.

³¹Zoco cuaha ñiyivi sa yucuan sino iñi ñu sii ra vatyí ra Cristo cuu ra, ta catyi ñu: Ma cuu zavaha inga ra cuaha ca sa ndyityi ta ziqui ra ya.

Zacuhun ra fariseo zandaru vatyí cua tiin ra sii ra Jesús

³²I siñi ra fariseo cuhva natuhun ñiyivi sa cuenda ra Jesús. Ta ra fariseo ta ra zutu nahnu i zacuhun ra zandaru cuenda vehe ñuhu hebreo vatyí cua tiin ra sii ra Jesús ta cuhun ra vehe caa.

³³Tacuan ta i catyi ra Jesús: Cua cundyei zuhva cuii ñi ca quivi sihin ndo, ta ziqui cunanuhin ndya nu ndyaa ra i tasi sii.

³⁴Cua nanducu ndo sii, zoco ma nañihi ndo sii. Ta nu cuhin, ma cuu cuhun ndo.

³⁵Tacuan ta i catyi ra hebreo zuun ñi sihin ra tahan ra: ¿Ndyamaa cua cuhun ra ya ta ma nañihi yo sii ra? ¿Atu cua cuhun ra

nu iyo ñiyivi sii yo ñuu griego, ta yucuan cua zacuaha ra?

³⁶¿Ta ñaa cuñi si catyi si sa catyi ra tyehen: “Cua nanducu ndo sii, ta ma nañihi ndo sii. Ta nu cua cundyei ma cuu cuhun ndo”?

Cua cuhva ra Ndyoo Tatyí Ii sii ñiyivi sino iñi sii ra Jesús

³⁷Quivi sa nducahnu xaan vico cuan, nandyaa ra Jesús, ta ñihi xaan cahan ra, ta catyi ra: Tatu iyo ndo ityi ndo, quisi ndo nu ndyei ta coho ndo.

³⁸Ñiyivi sa sino iñi sii, ndya aña ñu cua caña ndutya sa saha sa cundito ñiyivi tañi sa catyi Tuhun Ndyoo. Ta tañi yuu cahnu cua cuu ndutya cuan.

³⁹Cahan ra Jesús cuhva ya sa cuenda Tatyí Ii. Vatyí sii ñiyivi sa sino iñi sii ra Jesús cua cuhva ra Ndyoo Tatyí Ii vatyí tañaha ca cuhva ra Ndyoo Tatyí Ii quivi cuan vatyí tañaha ca cunanuhu ra Jesús ndya gloria.

Ñá cuu ndu-iin ñiyivi

⁴⁰Ta sa siñi ñiyivi cuhva cahan ra Jesús, iyo ñu catyi ñu: Ndisa cuii vatyí ra ihya cuu ra profeta, ra sa cua quisi cumañi ca sa quisi inga ra sa cua zacacu sii yo.

⁴¹Ta inga ñu catyi ñu: Ihya cuu ra Cristo. Zoco inga tucu ñu catyi ñu: Yivi ra Galilea cua cuu ra Cristo.

⁴²Catyí Tuhun Ndyoo vatyí ñiyivi ra rey David cua cuu sii ra Cristo. Belén cua cuu ñuu ra nu i cuu ñuu ra rey David. Catyi ñu.

⁴³Ta yucuan cuenda ñá cuu ndu-iin ñiyivi sa cuenda ra Jesús.

⁴⁴Ta zuhva ñiyivi cuñi ñu quihin ñu sii ra cuhun ra vehe caa, zoco yoñi i tiin sii ra.

**Yoñi inga ra cahan tañi
cahan ra Jesús**

⁴⁵Tacuan ta ziqui i nasaa ra zandaru cuenda vehe ñuhu nu yucu ra fariseo ta ra zutu nahnu, ta i nducu tuhun ra sii ra: ¿Ñacu ñá tiin ndo sii ra?

⁴⁶Ta i nacahan ra zandaru ta catyi ra: Ta yoñi ca maa cahan tañi cahan ra cuan. Catyi ra.

⁴⁷Tacuan ta i catyi ra fariseo: Ndyaa sii maa ndo ta zandavi ñaha ra.

⁴⁸¿Atu sica iñi ndo vatyi sino iñi minoo ra ndyaca ñaha a minoo ra fariseo? Numinoo ndi ta ña sino iñi ndi sii ra cuan.

⁴⁹Zoco ñiyivi sa ñahñi maa sito ta nu ley ta ña sito ñu, cua cuxaan xaan ra Ndyoo sihin ñu.

⁵⁰Tacuan ta i cahan minoo ra sa nañi Nicodemo. Zuun ñi ra cuu ra sa i sahan nu ndyaa ra Jesús minoo sa cuaa. Ta minoo ra ndyaca ñaha cuu tucu ra sihin inga ra, ta i catyi ra sihin ra tahan ra:

⁵¹Catyi ley yo vatyi ma cuu catyi yo atu vaha a ña vaha sa zavaha minoo ra tatu ma tyizoho xihna yo sa cahan ra ta coto yo ñaa sa zavaha ra. Catyi ra.

⁵²Ta i nacahan minoo ra tahan ra ta catyi ra: Vaziqui ra Galilea cuu tucu yoho vatyi cahan xoon tuhun ra. Nanducun sisi Tuhun Ndyoo, ta cua ndyehun vatyi yoñi minoo ra Galilea cua cuu ra minoo profeta. (Yucuan cuenda yivi ra cahan Tuhun Ndyoo cuu ra Jesús cuñi ra fariseo vatyi ra Galilea cuu ra Jesús.)

⁵³Tacuan ta cuanuhu minoo minoo ra ndya vehe ra.

Minoo ñaha zana iyo

8 Sahan ra Jesús ndya yucu sa nañi Olivos.

²Ta inga quivi ñaha ñi i nasaa tucu ra ndya vehe ñuhu cahnu, ta quisi tandihi ñiyivi nu ndyaa ra, ta i sicundyaa ra ta zacuaaha ra sii ñu.

³Tacuan ta ra cu maestro cuenda ley sihin ra fariseo i sindyaca ra sii minoo ñaha i nañihi ra sihin minoo ra ndya vaha ñi. Ta i tyaa ra sii ña mahñu ñiyivi.

⁴Tacuan ta i catyi ra sihin ra Jesús: Maestro, i nañihi ndi sii ñaha ya sihin minoo ra ndya vaha ñi.

⁵Nu ley ra Moisés catyi si vatyi cañi ñiyivi sii ña sihin yuu ndyaa cua cuu ña. ¿Ta yoho, yozo caa catyuan?

⁶Catyi ra cuhva ya vatyi cuñi ra coto ra sii ra Jesús vatyi cuñi ra sa cua tyaa ra cuatyí sata ra. Zoco i nacañi noo ra Jesús xiñi ra ta quisaha tyaa ra nu ñuhu sihin nu ndaha ra.

⁷Ta ñá zaña ra cuan sa nducu tuhun ra sii ra, ta ziqui i nandyehe ra Jesús sii ra ta catyi ra: Yoo ra ñahñi cuatyí iyo, nacañi xihna ca maa ra sii ña sihin yuu. Catyi ra.

⁸Ta i nacañi noo tucu ra xiñi ra ta quisaha tyaa tucu ra nu ñuhu.

⁹Ta sa siñi ra cuhva cuan, i quisaha quita minoo minoo ñi ra vatyi tuu iñi ra vatyi iyo tucu cuatyí maa ra. Xihna ca ra sahanu ca cuahan minoo minoo ra ta cuhva ndya ra ndyihí, ta i ndoo minoo tuhun ñi ra Jesús sihin ñaha cuan.

¹⁰Ta sa nduvita ra Jesús ta yoñi ca ndyehe ra, minoo tuhun ñi ca ñaha cuan, ta i catyi ra: Maha, ñaha ra tyaa cuatyí saton. ¿Atu yoñi ca ra catyi vatyí iyo cuatyun?

¹¹Ta i catyi maa ña: Yoñi ca ra, tata. Ta i catyi ra Jesús: Ta nu mi ta ña tyei cuatyí saton. Cuahan, ta ma zavaha con cuatyí. Catyi ra.

**Tañi minoo ñúhu ñuu
ñiyivi cuu ra Jesús**

¹²Ta inga tucu saha i cahan ra Jesús sihin ñiyivi, ta catyi ra: Yuhvi cui ñúhu sii ñuu ñiyivi. Ñiyivi ndyico sii, ma caca noo ca ñu nu ñaa vatyí ndyaa ñúhu sihin ñu.

¹³Tacuan ta i catyi ra fariseo sihin ra: Zuun ñi moo saha sa ndaa sa cuendon, ta ña ndisa sa cohon.

¹⁴Ta i nacahan ra Jesús, ta catyi ra sihin ra: Vazu sehi sa ndaa sa cuenda mi, zoco sa ndisa cuu si vatyí site ndya ityi i quisi ta ndya ityi cuhin. Zoco maa ndo ña sito ndo ndya ityi i quisi a ndya ityi cuhin.

¹⁵Maa ndo tyicuhva ndo cuhva iyo si ñuu ñiyivi ya. Zoco mi ña tyicuhve.

¹⁶Zoco tatu cua tyicuhve, minoo cuhva vaha xaan cua cuu si vatyí ña minoo tuhun ñi mi. Ra Ndyoo Zuti, ra i tasi sii, ndyaa ra sihin.

¹⁷Sisi ley maa ndo, catyi tucu si vatyí sa ndaa sa saha uu tahan ñiyivi, ndisa cuu si.

¹⁸Yuhvi cuu minoo ra saha sa ndaa sa cuende, ta ra Ndyoo Zuto yo, ra i tasi sii, saha ra sa ndaa sa cuende.

¹⁹Tacuan ta i catyi ra fariseo sihin ra: ¿Ndyamaa iyo zutun? catyi ra. I

nacahan ra Jesús ta catyi ra: Nu sii mi ta ña nacoto ndo ta nu sii Zuti. Tatu sa vatyí nacoto ndo sii, cua nacoto tucu ndo sii Zuti.

²⁰Ihya tuhun i cahan ra Jesús nu ndyaa satu nu tyihi ñiyivi xuhun sisi vehe ñuhu cahnú, zoco yoñi i tiñ sii ra sa cuhun ra vehe caa vatyí ta saa ca cuhva cua tahan si sii ra.

Nu cuhin ma cuu cuhun ndo

²¹Tacuan ta ziqui i catyi tucu ra Jesús sihin ñu: Cua cuhin ta cua nanducu ndo sii. Zoco cua cuu ndo sa cuenda cuatyí ndo, ta ma cuu cuhun ndo nu cuhin. Catyi ra.

²²Tacuan ta i catyi ra hebreo: Vaziqui zuun ñi maa ra cua cahñi sii ra vatyí catyi ra vatyí ma cuu cuhun yo nu cuhun ra.

²³Ta i catyi ra Jesús sihin ra: Maa ndo cuu cuenda ihya. Yuhvi i quisi ndya andivi. Ra ñuu ñiyivi ya cuu maa ndo. Ta yuhvi, yivi ra ñuu ñiyivi ya cui.

²⁴Yucuan cuenda catyi sihin ndo vatyí cua cuu ndo sa cuenda cuatyí ndo. Tatu ña sino iñi ndo sii vatyí yuhvi cuu ra zacacu sii ndo, cua ndoo cuatyí ndo ziqui ndo, ta cua cuu ndo.

²⁵Tacuan ta i catyi ñiyivi sihin ra: ¿Yoo ra cuun? Ta i catyi ra Jesús sihin ñu: Zuun ñi ra cui tañi sa nacatyí sihin ndo ndya quivi i quisaha quehin sihin ndo.

²⁶Iyo cuaha xaan sa cuñi catyi cuhva iyo ndo, ta cua catyi ñaa sa cuu cuatyí ndo. Ta ra i tasi sii, ñahñi sa vatyá iyo sii ra. Ta ihya ñuu ñiyivi nacatyí tuhun cuhva i siñi cuhva catyi maa ra. Tacuan i catyi ra Jesús sihin ñu.

²⁷Zoco ñá cutuñi iñi ñiyivi vatyí cahan ra sa cuenda Ndyoo Zutu ra.

²⁸Tacuan ta ziqui i catyi ra Jesús sihin ñu: Quiyi cua cañihi ndo sii ra i quisi ndya gloria, ta ziqui cua coto ndo vatyí yuhvi cuu ra. Ta ñahñi sa zavehi sa cuñi ñi mi, zoco tañi sa zacuahá Zuti sii ta tacuan quehin.

²⁹Ta ra i tasi sii, ndyaa ra sihin. Ña zandoo maa tuhun ra sii vatyí tandihi saha zavehi cuhva cuñi ra.

³⁰Ta sa ndihi cahan ra Jesús tuhun ya, ta cuaha xaan ñiyivi i sino iñi sii ra.

Tuhun sa ndisa cuan, cua zacacu si sii yo

³¹Tacuan ta ziqui i catyi ra Jesús sihin ñiyivi hebreo, ñu sino iñi sii ra: Tatu ma zaña ndo tuhun zacuehi sii ndo, cua cuu ndo ñiyivi sino iñi sii mi sa ndisa.

³²Ta cua coto ndo ñaa sa cuu sa ndisa, ta sa ndisa cuan cua ndasi si sii ndo.

³³Ta i nacahan ñiyivi ta catyi ñu: Ñiyivi sahnú sii ndi cuu sii ra Abraham. Tañaha ca cuu ndi muzu sii numinoo ñiyivi. ¿Ta ñaa cuenda catyun vatyí cua ndasi ndi?

³⁴Ta i nacatyí ra Jesús sihin ñu: Sa ndisa ta sa ndisa catyi sihin ndo. Tandihi ñiyivi zavaha cuatyí, muzu cuu ñu sii cuatyí cuan.

³⁵Ta ra cu muzu, ma ndoo ra vehe sito ho ra tandihi tyiemvu. Zoco zehe ra cuu sito ho cuan, ndoo ra yucuan tandihi tyiemvu.

³⁶Tatu zehe ra cuu sito ho vehe cuan saha sa cacu ndo, cua cacu ndisa cuii ndo, ta ma cuu ca ndo muzu sii sa ña vaha.

³⁷Site vatyí ñiyivi ra Abraham cuu sii ndo. Zoco cuñi ndo cahñi

ndo sii vatyí ña cuñi ndo sino iñi ndo tuhun quehin sihin ndo.

³⁸Quehin cuhva sa ndyehi nu ndyaa Zuti. Ta maa ndo ndyicuu ndo cuhva catyi zutu maa ndo.

Cuihna cuu zutu ndo

³⁹Ta i nacahan ñiyivi, ta catyi ñu sihin ra: Zutu ndi cuu sii ra Abraham. Ta i catyi ra Jesús sihin ñu: Tatu sa ndisa vatyí zutu ndo cuu sii ra Abraham, cua zavaha ndo cuhva i zavaha ra Abraham.

⁴⁰Zoco vityí cuñi ndo cahñi ndo sii vatyí minoo ra cahan sa ndisa sihin ndo cui. Ta tuhun quehin sihin ndo, cuhva i siñi cuhva catyi ra Ndyoo cuu si. Ta cuhva cuñi maa ndo zavaha ndo, ña tacuan i zavaha ra Abraham.

⁴¹Zavaha ndo cuhva zavaha zutu ndo. Catyi ra Jesús. Tacuan ta i nacahan ñiyivi cuan ta catyi ñu: Ñá cacu maa ndi tacuan ñi. Iyo minoo ñi ra cuu zutu ndi, ra Ndyoo.

⁴²Ta i nacatyí ra Jesús sihin ñu: Tatu sa vatyí ra Ndyoo cuu Zutu ndo sa ndisa, cua cuñi xaan ndo sii, vatyí ndya nu ndyaa ra Ndyoo i quite ta vasi. Ña vasi cuhva cuñi mi. Maa ra i tasi sii.

⁴³Ña cutuñi iñi ndo tuhun quehin sihin ndo vatyí ña cuñi ndo tyizoho ndo tuhun quehin sihin ndo.

⁴⁴Zutu ndo cuu sii ra cu cuihna. Ta cuñi xaan ndo zavaha ndo sa ña vaha cuhva cuñi zutu ndo. Sahñi ra sii ñiyivi ndya ta xihna ñi ta ñahñi maa sa ndisa iyo sii ra. Cuhva cahan ra sa vatyá, tacuan cahan ra vatyí tacuan cuhva iyo ra, vatyí ra vatyá cuu ra ta zutu sa vatyá cuu sii ra.

⁴⁵Ta sa cuenda sa vatyí quehin sa ndisa, ta yucuan cuenda ña sino ñiñi ndo sii.

⁴⁶Yoñi ndo cuu catyí ndo sa ndisa vatyí iyo cuatyí. Ta tatu quehin sa ndisa, ¿ñacu ña sino ñiñi ndo sii?

⁴⁷Ra cuu cuenda ra Ndyoo, tyizoho ra sa cahan ra Ndyoo. Ta yucuan cuenda ña tyizoho ndo sa catyí ra Ndyoo vatyí yivi zehe ra cuu sii ndo.

Sa xihna ñi sa iyo ra Jesús ta ziqui i sicoo ra Abraham

⁴⁸Ta i nacahan ra hebreo ta catyí ra: Sa ndisa cuii catyí ndi vatyí minoo ra samaritano cuun ta ñoho minoo cuihna suun.

⁴⁹Ta i catyí ra Jesús: Ñahñi cuihna ñoho sii. Tyei yahvi sii Zuti, zoco ña tyaa ndo yahvi sii.

⁵⁰Ta ña nducu xein sa zacahnu ñiyivi sii, zoco iyo minoo ra cuñi sa zacahnu ñiyivi sii. Ta cua tyicuhva ra sii ndo.

⁵¹Sa ndisa ta sa ndisa catyí sihin ndo vatyí ñiyivi zavaha cuhva catyí, ma cuu ñu.

⁵²Ta i catyí ñiyivi hebreo: Vityi nacoto vaha ndi suun vatyí ñoho minoo cuihna suun. I sihi ra Abraham ta tandihi ra profeta ta sa naha. Ta catyun vatyí ma cuu ñiyivi tatu zavaha ñu cuhva catyun.

⁵³¿Atu ñiñi ca cuu moo ta ziqui ñiyivi sahnu sii ndi, ra Abraham? Zoco i sihi ra Abraham ta tandihi inga ra i cuu profeta ta tyiemvu. Ta yoho, ¿yoo ra cuun vatyí catyun vatyí ma cuu ndi tatu sino ñiñi ndi suun?

⁵⁴Ta i catyí ra Jesús: Tatu maa ñi mi catyí vatyí ra ñiñi cui, ña vale

si. Zoco maa Zuti cuu ra catyí vatyí ra ñiñi cui. Ta zuun ñi ra cuan cuu ra catyí ndo vatyí Ndyoo ndo cuu sii ra.

⁵⁵Ta tañaha ca coto ndo sii ra, zoco yuhvi site sii ra. Ta tatu catyí vatyí ña site sii ra, cua cui minoo ra vatya tañi maa ndo. Zoco site sii ra, ta zavehi cuhva catyí ra.

⁵⁶Ñiyivi sahnu sii ndo, ra Abraham, zii xaan i cuñi ra vatyí cua tahan si quivi caqui. Ta i ndyehe ra sii si, ta zii xaan i cuñi ra.

⁵⁷Tacuan ta i catyí ra hebreo cuan sihin ra Jesús: Ta quita ca uu xico usi cuiyon, ta ¿yozo caa catyun vatyí sa ndyehun sii ra Abraham?

⁵⁸Ta i nacatyí ra Jesús sihin ra: Sa ndisa ta sa ndisa catyí sihin ndo vatyí cumañi ca cacu ra Abraham ta sa iye. Catyí ra.

⁵⁹(Ta i cuxaan xaan ra hebreo), ta i quihin ra yuu sa cua cañi ra sii ra Jesús. Zoco i quihvi xehe ra Jesús ticui ñiyivi, ta i quita ra sisi vehe ñuhu cahnu cuan, ta cuahan ra.

Zanduvaha ra Jesús sii minoo ra cuaa

9 Ta sa cua yaha ra Jesús, ta i ndyehe ra sii minoo ra cuaa. Cuaa ra i cacu ra.

²Ta i nducu tuhun ra i casi ra Jesús sii ra ta catyí ra: Maestro, ¿yoo sa zavaha cuatyí, zutu ra a zihí ra ya a zuun ñi maa ra? Vatyí ndyehe, cuaa ra i cacu ra.

³Ta i catyí ra Jesús sihin ra: Yivi cuatyí ra, ta yivi cuenda ñiyivi sii ra. I tahan ra ya cuhva ya vatyí tacuan ta cua coto ñiyivi vatyí cuu sii ra Ndyoo zanduvaha ra sii ra.

⁴Ñiñi xaan cuñi si zavehi cuhva cuñi ra i tasi sii, ñiñi ñi sa ndisi vatyí cua cuaa ta yoñi cua cuu zatyíño.

⁵Nii ñi sa ndyei ñuu ñiyivi ya, tañi minoo ñuhu cui ñuu ñiyivi. Tacuan i catyi ra Jesús.

⁶Ta sa ndihi cahan ra cuhva cuan ta ziqui i tyicu zii ra nu ñuhu. Ta i zavaha ra ndyahu sihin zii ra, ta i tyaa ra sii si nuu ra cuaa cuan.

⁷Ta i catyi ra Jesús sihin ra: Cuahan ta nacatyon siti nuun nu ndyaa tanque Siloé. Zivi Siloé cuan cuñi si catyi si: I tasi suun. Ta i sahan ra cuan, ta i nacatya ra, ta sa nasaa ra ta sa cuu ndyehe ra.

⁸Ta ñiyivi sa ndyaa yatyi yuvehe ra ta ñiyivi sa tuhva ndyehe sii ra vatyi cuaa ra i catyi ñu: ¿Atu yivi ra ihya cuu ra sica xaan caridad?

⁹Zuhva ñu catyi ñu: Zuun ra cuu ra. Ta inga ñu catyi: Tañi caa ra caa. Zoco maa ra i catyi: Zuun yuhvi cui.

¹⁰Yucuan cuenda catyi ñiyivi sihin ra: ¿Yozo caa i cuu vatyi i ndundisi ndyehun?

¹¹Ta i nacahan ra ta catyi ra: Minoo ra sa nañi Jesús i zavaha ra ndyahu, ta i tyaa ra sii si siti nui, ta i catyi ra sihin: “Cuahan cua nacatyon nuun nu ndyaa tanque Siloé.” Ta i sehin ta nacatye siti nui, ta ndundisi ndyehi vityi. Catyi ra.

¹²Tacuan ta i catyi ñiyivi sihin ra: ¿Ndyamaa iyo ra cuan? Ta i catyi maa ra: Ña site.

Nducu tuhun xaan ra fariseo sii ra sa nduvaha siti nuu cuan

¹³I quihin ñiyivi sii ra sa ndundisi ndyehe, ta sindyaca ñu sii ra nu yucu ra fariseo.

¹⁴Ta quivi quitatu ñiyivi i cuu quivi i zavaha ra Jesús ndyahu ta zanduvaha ra siti nuu ra cuaa cuan.

¹⁵Ta i nducu tuhun tucu ra fariseo sii ra nduvaha cuan ta catyi ra: ¿Yozo caa nduvaha siti nuun? Ta i catyi ra: Ndyahu i tyaa ra siti nui, ta i nacatye, ta vityi ndundisi ndyehi. Catyi ra.

¹⁶Tacuan ta ziqui i catyi zuhva ra fariseo: Ra cuan, yivi cuenda ra Ndyoo cuu ra vatyi ña tyaa ra yahvi sii quivi quitatu yo. Ta inga ra fariseo catyi: Tatu ra iyo cuatyi cuu ra, ma cuu zavaha ra sa ndyityi tañi ya. Ta sa cuenda cuan, ta ñá cuu ndu-iiin ra fariseo.

¹⁷Ta i catyi tucu ra sihin ra i nduvaha nuu inga saha: ¿Ñaa catyi moo cuenda ra i zanduvaha siti nuun? Ta i catyi ra: Minoo ra profeta cuu ra. Catyi ra.

¹⁸Zoco ra ndyaca ñaha sii ñiyivi hebreo, ñá sino iñi ra sii ra vatyi cuaa ra ta ziqui i ndundisi ndyehe ra ndya sa cana ra sii zutu ra ta sii zihhi ra.

¹⁹Ta i nducu tuhun ra sii ñu ta catyi ra: ¿Atu zehe maa ndo cuu sii ra ya? ¿Atu cuaa ra i cacu ra? ¿Ta yozo caa cuu vatyi ndundisi ndyehe ra vityi?

²⁰Ta i nacahan zutu ra ta catyi ra: Sito ndi vatyi zehe ndi cuu sii ra ta cuaa ra i cacu ra.

²¹Zoco ña sito ndi yozo caa vatyi ndyehe ra vityi a yoo sa zanduvaha siti nuu ra. Sa iyo cuiya ra. Nducu tuhun ndo sii maa ra. Cuu cahan ra sa cuenda maa ra.

²²I cahan zutu ra ta zihhi ra cuhva cuan vatyi yuhu ñu sii ra ndyaca ñaha sii ñiyivi hebreo vatyi sa i yaha ndu-iiin ra cuan minoo cuhva ta catyi ra vatyi yoo ra catyi vatyi i

quisi ra Jesús cuenda ra Ndyoo ma cuu ca cuhun ra vehe ñuhu.

²³Yucuan cuenda i catyi zutu ra ta zihhi ra: “Sa iyo cuiya ra. Nducu tuhun ndo sii maa ra.”

²⁴Ta inga saha i cana ra hebreo sii ra i nduvaha, ta catyi ra: Zacahnun sii ra Ndyoo vatyi sito maa ndi vatyí ra iyo cuatyí cuu ra zanduvaha suun.

²⁵Ta i nacahan ra i nduvaha ta catyi ra: Ña site tatu ra iyo cuatyí cuu ra a yiví, zoco minoo ñi cuhva site vatyí ra cuaa i cui, ta vityí ndundisi ndyehi. Catyi ra.

²⁶Tacuan ta ziquí i catyi ra sihin ra inga saha: ¿Ñaa sa zavaha ra suhun? ¿Yozo caa i zanduvaha ra siti nuun?

²⁷Ta i catyi ra sihin ra: Sa nacatyí sihin ndo, ta ñá tyizoho ndo. ¿Ñaa cuenda cuñi ndo coto ndo inga saha? ¿Atu cuñi tucu maa ndo vatyí cundyico ndo sii ra?

²⁸Tacuan ta i cuxaan ra hebreo, ta catyi ra: Minoo ra ndyico sii ra cuun. Zoco maa ndi ndyico ndi sii ra Moisés.

²⁹Sito ndi vatyí i cahan ra Ndyoo sihin ra Moisés. Zoco inga ra cuan, ña sito ndi ndyamaa i quisi ra cuan. Catyi ra.

³⁰Tacuan ta i nacahan ra nduvaha cuan ta catyi ra: Ihya cuu minoo sa vaha xaan vatyí vazú ña sito maa ndo sii ra, zoco i zandundisi ra ndyehi.

³¹Ta sito yo vatyí ña tyizoho ra Ndyoo sa cahan ñiyiví iyo cuatyí. Zoco tatu iyo minoo ra zacahnu sii ra Ndyoo ta zavaha ra cuhva cuñi ra, tyizoho ra Ndyoo sa cahan maa ra cuan.

³²Ta ndya ta sino ñuu ñiyiví, ta tañaha ca coto yo tatu iyo minoo ra sa cuu zandundisi nuu minoo ra cuaa ndya quiví i cacu ra.

³³Tatu sa yiví ra Ndyoo tasi sii ra cuan, ma cuu zacuu ra cuhva ya. Catyi ra.

³⁴Ta i nacahan ra hebreo ta catyi ra: Yoho sa cacun sisi tandihí nuu cuatyí, ta vityí cuñun zacuoohon sii maa ndi. Ta i quihin ra sii ra, ta i tava ndyizo ra sii ra ityí sata.

Cuaa ñiyiví cuenda sa ndisa

³⁵Ta i sito ra Jesús vatyí i tava ndyizo ñiyiví sii ra i nduvaha. Ta i nañihi ra Jesús sii ra, ta catyi ra: ¿Atu sino iñun sii Zehe ra Ndyoo?

³⁶Ta i nacahan ra cuan ta catyi ra: ¿Yoo ra cuu ra cuan, tata? vatyí cuu sino iñi sii ra.

³⁷Ta i catyi ra Jesús sihin ra: Sa i ndyehun sii ra, ta zuun ra cuu sa natuhun suhun. Catyi ra.

³⁸Ta i catyi ra cuan: Sino iñi suun; yoho ra ndyaca ñaha cuun. Ta i zacahnu ra sii ra Jesús.

³⁹Ta i catyi ra Jesús: Vasi ñuu ñiyiví ya vatyí cua tyicuhve sii ñiyiví. Ta ñiyiví sa ña cuu ndyehe cua ndyehe ñu. Ta ñiyiví sa ndyehe vityí, cua nducuaa ñu. Catyi ra.

⁴⁰Ta tayucu zuhva ra fariseo yatyí ñi yucuan, ta siñi ra sa cahan ra Jesús ta catyi ra sihin ra: ¿Atu cuaa tucu nduhvi?

⁴¹Ta i catyi ra Jesús sihin ra: Tatu sa vatyí cuaa ndo sa ndisa, ma coo cuatyí ndo. Zoco sa cuenda sa vatyí catyi ndo vatyí ndisi ndyehe ndo ta yucuan cuenda ndoo cuatyí ndo ziquí ndo.

**Cahan ra Jesús sihin minoo
cuhva, cuhva iyo minoo sacu**

10 Sa ndisa ta sa ndisa catyi sihin ndo: Ra sa ma quihvi yu sacu, ndaa ra xiñi sacu ta quihvi ra; ra zuhu cuu ra.

²Vatyí ra quihvi yu sacu cuan, sito ho mvee ticatyí cuan cuu sii ra.

³Ta ra zacuenda yuvehe cuan, nuña ra ta quihvi sito ho mvee. Sito mvee ticatyí zono ra nduzu ra, ta cana ra sii tí sihin zivi tí, ta quita ra, ta ndyico tí sii ra.

⁴Ta sa ndíhi tava ra sii mvee ticatyí zono ra, maa ra cuahan ityi nuu tí. Ta ndyico tí sii ra vatyí nacoto tí nduzu ra.

⁵Zoco sii inga ra sa ña sito tí, ma cundyico tí. Cua cono tí sii ra vatyí ña nacoto tí nduzu ra.

⁶I cahan ra Jesús sihin ñiyivi sihin minoo cuhva, zoco ñá cutuñi ñiñi ñu tuhun cahan ra sihin ñu.

Ra zacuenda vaha cuu ra Jesús

⁷Tacuan ta ziquí i cahan ra Jesús inga saha, ta catyi ra: Sa ndisa ta sa ndisa catyi sihin ndo vatyí yuhvi cui tañi yu sacu nu quihvi coyo mvee ticatyí.

⁸Tandíhi cui ra i quisi cuee ca sa quisi mi, ra zuhu cuu ra cuan. Zoco ña tyizoho mvee ticatyí zone sa cahan ra.

⁹Yuhvi cui yuvehe. Tandíhi ñiyivi sa cua quihvi coyo, cua cacu ñu. Ta cua quita ñu, ta cua nandíhvi ñu, ta cua nañihi ñu sa vaha.

¹⁰Ra zuhu cuan, vasi ra vatyí zuhu ra ta cahñi ra. Vasi zatívi ra. Yuhvi vasi vatyí cuhve sa cundito

ñiyivi tandíhi tyiemvu ta coo vaha xaan ñu.

¹¹Yuhvi cuu ra zacuenda vaha sii ndo. Ta sehi sa cui sa cuenda mvee ticatyí zone.

¹²Zoco minoo ra sa cuu muzu, zatyíño ra ta iyo yahvi ra. Ndyehe ra vatyí vasi ina nduvahu, ta zandoo ra sii mvee ticatyí cuan vatyí yivi zono ra cuu sii tí. Ta tiin ina nduvahu sii tí ta quiti cuatyí tí sii tí.

¹³Ta sino ra cu muzu cuan vatyí muzu ñi cuu ra, ta ñahñi sa cuu cuñi maa ra sa cuenda mvee ticatyí cuan.

¹⁴Zoco yuhvi cuu ra zacuenda vaha. Nacote sii mvee ticatyí zone, ta nacoto tí sii.

¹⁵Tañi nacoto Zuti sii ta nacoto tuqui sii ra. Ta sehi sa cui sa cuenda mvee ticatyí zone.

¹⁶Ta iyo inga mvee ticatyí zone. Yoñi tí ihya. Cuñi si sa naquihin sii tí. Cua cuiñi tí nduzi, ta cua ndu-ñi tí sihin inga tí, ta minoo ñi ra cua zacuenda sii tí.

¹⁷Yucuan cuenda cuiñi xaan Zuti sii, vatyí sehi sa cui, ta cuee ca ta cua nandoto tuqui.

¹⁸Yoñi sa cuu cahñi sii tatu ma cuhve sa cui, zoco cua cuhve sa cui. Cuu cui, ta cuu nandoto tuqui. Ihya tyiño i saha ra Ndyoo Zuti sii.

¹⁹Ta sa ndíhi cahan ra Jesús tuhun ya, ta ziquí ña cuu ca ndu-ñi ra hebreo sa cuenda sa i catyi ra Jesús.

²⁰Ta i catyi cuaha xaan ra: Ñoho minoo cuihna sii ra cuan, ta zana xiñi ra. ¿Ñacu tyizoho ndo sa cahan ra?

²¹Zoco inga ra catyi: Cuhva cahan ra, yivi cuhva cahan minoo ra sa ñoho cuihna. ¿Atu cuu zandundisi cuihna nuu ñiyivi cuaa?

Ña tyaa ra hebreo yahvi sii ra Jesús

²²Vico cahñi i cuu si, ta nducahnu minoo vico ñuu Jerusalén. Vico cuenda nu ndihi ndaa vehe ñuhu cahnu ta tyiemvu, ta nducahnu vico tahan cuiya cuenda si.

²³Ta i sica noo ra Jesús sisi vehe ñuhu cahnu cuan nu nañi si corredor ra Salomón.

²⁴Tacuan ta tyihi mahñu ra hebreo sii ra Jesús, ta i catyi ra: ¿Ndyaa ama ta cahan casun sihin ndi? Tatu ra Cristo cuun, catyi casun.

²⁵Ta i nacahan ra Jesús ta catyi ra: Sa i nacatyí sihin ndo, ta ña sino iñi ndo. Tyiño zavehi sa cuenda Zuti, yucuan saha sa ndaa cuende.

²⁶Zoco ña sino iñi maa ndo vatyí yivi mvee ticatyí zone cuu sii ndo. Tañi sa nacatyí sihin ndo.

²⁷Mvee ticatyí zone, siñi ti nduzi. Ta nacote sii ti, ta ndyico ti sii.

²⁸Ta sehi sa cundito ti tandihi cuii tyiemvu. Ta ma cuu ca ti. Ta yoñi ra cua tava sii ti sisi ndehi.

²⁹Ñiñi ca cuu Zuti ta ziqui tandihi ca, ta i saha maa ra sii ti sii. Ta yoñi ra cuu tava sii ti sisi ndaha Zuti.

³⁰Yuhvi sihin Zuti iin ñi cuu ndi.

³¹Tacuan ta i quihin ra hebreo yuu inga saha sa cua cañi ra sii ra Jesús.

³²Ta i cahan ra Jesús inga saha, ta catyi ra: Sa cuaha xaan tyiño vaha zañehi sii ndo sa cuenda Zuti. ¿Ndyaa sa ña tahan iñi ndo ta cuñi ndo cañi ndo yuu sii?

³³Ta i nacahan ra hebreo ta catyi ra: Yivi sa cuenda minoo tyiño vaha i zavohon, zoco sa cuenda vatyí ña vaha cohon vatyí minoo ñiyivi ñi cuun, ta catyun vatyí ra Ndyoo cuun.

³⁴Ta i catyi ra Jesús sihin ra: Nuú tutu Tuhun Ndyoo ndyaa si nu i catyi ra Ndyoo vatyí ndyoo cuu tucu maa ndo.

³⁵I catyi ra Ndyoo vatyí ñiyivi sa tyizoho Tuhun ra cuu tañi Ndyoo. Ta ma cuu catyi Tuhun Ndyoo minoo sa ña ndisa.

³⁶I zandu-ii ra Ndyoo Zuti sii ra i tasi ra ñuu ñiyivi. Ta maa ndo catyi ndo vatyí quehin ndyaa vaha ñi sii ra Ndyoo vatyí catyi vatyí Zehe ra Ndyoo cuu sii.

³⁷Tatu ña zavehi cuhva cuñi Zuti, ma sino iñi ndo sii.

³⁸Zoco zavehi cuhva cuan, ta vazu ma sino iñi ndo sii, zoco sino iñi ndo sa cuenda sa vaha i zavehi. Tacuan ta cua cuu nacoto ndo. Ta cua nacoto vaha ca ndo vatyí ndyaa ra Ndyoo Zutu yo sihin, ta iin ñi cui sihin ra. Tacuan i catyi ra Jesús.

³⁹Yucuan cuenda i cuñi tucu ra tiin ra sii ra sa cuhun ra vehe caa. Zoco i quita ra ta cuahan ra, ta ñá cuu.

⁴⁰Ta cuahan tucu ra inga saha ndyaa inga siyo yuu Jordán ndyaa nu i zacoo ndutyaa ra Juan sii ñiyivi sa xihna ñi. Ta i ndoo ra yucuan.

⁴¹Ta cuaha xaan ñiyivi cuahan coyo ndyaa nu ndyaa ra. Ta i catyi ñu: Ñahñi sa ndyityi i zavaha ra Juan, zoco tandihi cuii sa catyi ra cuenda ra ya, ta ndisa cuu si.

⁴²Ta cuaha xaan ñiyivi i sino iñi sii ra Jesús yucuan.

I sihi ra Lázaro

11 I cuhu minoo ra sa nañi Lázaro, cuhva ña María ta ña Marta. Betania cuu ñuu ñu.

²Ta ña María cuhva ra Lázaro, zuun ñi ña cuu ña sa tyozo azetye vixi saha ra Jesús ta zana-ityi ña sihin ixi xiñi ña minoo saha.

³Tacuan ta ziqui i zacuhun cuhva ra Lázaro tyiño nu ndyaa ra Jesús ta catyi ñu: Tata, cuhu ra sa cuñi xoon.

⁴Ta sa i siñi ra Jesús tuhun cuan i catyi ra: Ma cahñi cuehe cuan sii ra. Zoco cua ndyehe ñiyivi vatyí cuu xaan zacuu ra Ndyoo, ta cua zacahnu xaan ñiyivi sii Zehe ra. Catyi ra Jesús.

⁵Ta cuñi xaan ra Jesús sii ña Marta ta sii cuhu ña ta sii ra Lázaro.

⁶Ta sa i sito ra vatyí cuhu ra ta i ndoo ra uu ca quivi nu ndyaa ra.

⁷Tacuan ta ziqui i catyi ra sihin ra i casi ra: Cohon yo Judea inga saha.

⁸Ta i catyi ra sihin ra: Maestro, nacao cuñi ñiyivi hebreo yucuan cañi ñu yuu suun. ¿Atu cuhun yucuan inga saha?

⁹Ta i catyi ra Jesús: Iyo usi uu ora sa minoo ndiyiaca. Ra sa sica noo ora, ma catyihí saha ra vatyí ndisi ndyehe ra ta zavaha ra sa vaha.

¹⁰Zoco tatu cua caca noo minoo ra sa sa cuaa ta zavaha ra sa ña vaha, cua catyihí saha ra vatyí cumañi ñúhu nu cuahan ra.

¹¹Tacuan i catyi ra Jesús ta ziqui i catyi ra: Quixi xaan ra Lázaro amigo yo, zoco cuhin cua zandoye sii ra.

¹²Tacuan ta catyi ra i casi ra: Tata, tatu quixi ra, cua nduvaha ra.

¹³Zoco i cahan ra Jesús tuhun sa sihi ra, zoco i sica iñi ra i casi ra vatyí cahan ra tuhun sa quixi ndisa cuii ra ta quitatu ra.

¹⁴Ta tacuan ta i catyi casi ra Jesús sihin ra: Sa sihi ra Lázaro.

¹⁵Ta zii cuñi vatyí yoñi ndyaa yucuan. Vaha ca tacuan sa cuenda maa ndo vatyí cua sino ca iñi ndo. Coho yo nu catuu ra.

¹⁶Tacuan ta i cahan ra Tomás sa nañi Dídimó sihin inga ra i casi ra Jesús, ta i catyi ra: Coho tucu maa yo vatyí cuu yo iin ñi sihin ra Jesús.

Zanandoto ra Jesús sii ra Lázaro

¹⁷Ta sa i saa ra Jesús yucuan, i sito ra vatyí sa ñoho ra Lázaro cumi quivi sisi ñaña.

¹⁸Ñuu Betania cuan yatyi ñi ndyaa si sihin ñuu Jerusalén tañi uñi kilómetro zazava.

¹⁹Ta i saa cuaha xaan ra hebreo; cua cuhva ra tundyee iñi sii ña Marta ta ña María vatyí sihi cuhva ñu.

²⁰Ta sa sito ña Marta vatyí vasi ra Jesús, cuahan ña cua zatahan ña sii ra. Zoco i ndoo ña María sisi vehe.

²¹Tacuan ta i catyi ña Marta sihin ra Jesús: Tata, tatu sa vatyí ndyoon ihya, ma cuu cuhve.

²²Zoco site vatyí tandihí cuii ñi sa cua cacon sii ra Ndyoo, maa ra Ndyoo cua cuhva sii si suun.

²³Ta i catyi ra Jesús sihin ña: Cua nandoto cuhvon.

²⁴Ta i catyi ña Marta sihin ra: Site vatyí cua nandoto ra quivi cua tyicuhva ra Ndyoo sii ñiyivi.

²⁵Ta i catyi ra Jesús sihin ña: Yuhvi cuu ra zanandoto, ta sehi sa cundito ñiyivi. Ra sa sino iñi sii, vazú sa sihi ra, zoco cua nandoto ra.

²⁶Ta ñiyivi ndito ta sino iñi ñu sii, ma cuu ca ñu. ¿Atu sino iñun cuhva ya?

²⁷Ta i catyi ña sihin ra: Ndisa tata. Sino iñi vatyi ra Cristo cuun, ta Zehe ra Ndyoo cuu suun. Ra sa cua quisi ñuu ñiyivi cuun. Catyi ña.

Sacu ra Jesús nu ndyaa ñaña ra Lázaro

²⁸Ta sa sa ndihi cahan ña tacuan, ta ziqui cuahan ña ta cana xehe ña sii ña María cuhu ña, ta catyi ña: Sa saa ra Maestro ta cana ra suun.

²⁹Ta sa i siñi ña María tuhun cuan, ta yatyi xaan i nduvita ña ta cuahan ña nu ndyaa ra Jesús.

³⁰Ta tañaha ca cua quihvi ra Jesús sisi ñuu cuan. Ta cuhva ndyaa ñi ra nu tahan ña Marta sii ra.

³¹Ta ra hebreo, ra ndyaa sihin ña María vehe cuan, i ndyehe ra vatyi yatyi xaan i nduvita ña ta i cacono ña cuahan ña. Ta i sindyico ra sii ña vatyi catyi ra: Cuahan ña cua vacu ña nu ndyaa ñaña ra Lázaro.

³²Tacuan ta i saa ña María nu ndyaa ra Jesús, ta i sicuñi siti ña nuu ra ta catyi ña: Tata, tatu sa vatyi ndyoon ihya sihin ndi ndya icuñuu ca, ma cuu cuhve.

³³Ta sa ndyehe ra Jesús vatyi sacu ña ta sacu tucu ra hebreo, ra ndihi sihin ña, ta i nducuihya xaan cuñi añaima ra Jesús.

³⁴Ta i catyi ra: ¿Ndyamaa i tyihi ndo sii ra? Ta i catyi maa ñu sihin ra: Coho, tata, vatyi cua ndyehun.

³⁵Ta i sacu ra Jesús.

³⁶Tacuan ta ziqui i catyi ra hebreo: Ndyehe ndo cuhva cuñi xaan ra sii ra sihi cuan.

³⁷Zoco i catyi inga ra: Ihya ra i zandundisi ndyehe ra cuaa cuan. ¿Ñacu ñá zavaha ra minoo cuhva ta ma cuu ra ya?

Nandoto ra Lázaro

³⁸I quisi minoo sa ndahvi xaan cuñi ra Jesús inga saha sa ndyehe ra ñaña nu ñoho ra Lázaro. Minoo yavi yuu, i cuu si, ta ndazi minoo yuu yuhu si.

³⁹I catyi ra Jesús: Tyaa siyo ndo yuu ña. Ta i catyi ña Marta, cuhva ra i sihi cuan: Tata, sa iñi sahan ra vatyi sa cumi quivi sa sihi ra.

⁴⁰Ta i catyi ra Jesús sihin ña: Sa catyi suhun vatyi tatu cua sino iñun, cua ndyehun vatyi cahnu xaan cuu cuhva iyo sii ra Ndyoo, ta cuu zacuu ra tandihi.

⁴¹Tacuan ta ziqui i tyaa siyo ñu yuu nu ñoho ndiyi cuan. Ta i nandyehe ndaa ra Jesús ityi ziqui, ta catyi ra: Tyahvi ndyoo suun Ndyoo Zuti vatyi siñun sa quehin.

⁴²Ta site vatyi siñun sa quehin tandihi saha, zoco catyi tacuan sa cuenda ñiyivi sa yucu ihya vatyi tacuan ta cua sino iñi ñu vatyi moo i tasi sii.

⁴³Ta sa ndihi cahan ra tacuan, ta ziqui i cana saa ra ta catyi ra: Lázaro quita xiña.

⁴⁴Ta ra i sihi cuan, i quita ra. Zucu ra zahma. Ta nuhñi minoo zahma nuu ra. Ta i catyi ra Jesús sihin ñiyivi: Ndasi ndo sii ra, naquita ra.

Nducu cahñi ñiyivi sii ra Jesús

⁴⁵Tacuan ta ziqui i sino iñi cuaha xaan ra hebreo, ra ndihi sihin ña

María ta ndyehe ra cuhva i zavaha ra Jesús.

⁴⁶Zoco sahan zuhva ra nu yucu ra fariseo ta nacatyi ra cuhva i zavaha ra Jesús.

⁴⁷Yucuan cuenda i titahan ra zutu nahnu sihin ra fariseo, ta catyi ra: ¿Yozo caa zacuu yo vatyí cuaha xaan sa ndyityi zavaha ra cuan?

⁴⁸Tatu cuhva yo sa zavaha ca ra tacuan, cua sino xaan iñi tandihi cuii ñiyivi sii ra. Ta cua quisi zandarú ñuu Roma ta cahñi ra sii yo ta zativi ra ñuu yo. Catyi ra.

⁴⁹Ta minoo ra nañi Caifás, maa ra cuu ra cu nuu sii tandihi cuii ra cu zutu cuiya cuan. Ta i catyi ra sihin ra: Ñahñi maa sa sito ndo.

⁵⁰Ña cutuñi iñi ndo vatyí vaha ca sa nacuu minoo tuhun ñi ra sa cuenda ñiyivi, ta yivi ca sa cuu tandihi cuii yo. Catyi ra.

⁵¹Ñá cahan ra cuan sihin sa siñi tuñi xiñi ñi maa ra. Ra cu nuu sii tandihi cuii ra cu zutu i cuu ra cuiya cuan. Ta vazu ña sito ra, zoco i cahan ra profecía vatyí cua cuu ra Jesús sa cuenda tandihi ñiyivi hebreo.

⁵²Ta yivi sa cuenda sa maa ñi maa ñu, zoco cua zandu-iin ra sii tandihi zehe ra Ndyoo, ñu indyacuán ta indyehe.

⁵³Ta ndya quivi cuan i zacasi tahan ra hebreo, ra ndyizo tyiño cuan, tyiño vatyí cua cahñi ra sii ra Jesús.

⁵⁴Yucuan cuenda ñá sica noo ndisi ca ra Jesús nu yucu ra hebreo. I quita ra yucuan ta saa ra ñuu Efraín yatyí nu ndyaa minoo nu ndahvi xaan caa, sa catyi yo

desierto. Ta yucuan i ndoo ra sihin ra i casi ra.

⁵⁵Ta sa cua tahan si quivi coo vico zuhun cuenda ñu hebreo. Ta i quita cuaha xaan ñu ñuu ñu, ta cuahan ñu ñuu Jerusalén cuee ca sa tahan si quivi coo vico vatyí cuñi ñu nduvaha ñu cuhva iyo costumbre maa ñu.

⁵⁶Ta yucuan i nanducu ñu sii ra Jesús, ta catyi ñu sihin tahan ñu nu ñoho ñu vehe ñuhu cahnu: ¿Ñaa sa sica iñi ndo? ¿Atu ma quisi ra vico ya? Catyi ñu.

⁵⁷Ra zutu nahnu sihin ra fariseo, sa i saha ra tyiño vatyí tatu yoo sa cua coto ndyamaa ndyaa ra Jesús cua zacoto ra sii ra cuan vatyí cua tiin ra sii ra.

I tyozo minoo ñaha azetye
vixi saha ra Jesús

12 Iñu quivi ca cuee ca sa tahan si vico zuhun cuan, i saa ra Jesús ñuu Betania nu iyo ra Lázaro, ra sa i sihi ta i zanandoto ra Jesús sii ra.

²Ta yucuan i zavaha ñu sa cuxiñi ra Jesús. I tyizo ña Marta coho nu mesa, ta ndyaa ra Lázaro sihin ra Jesús mesa.

³Tacuan ta ziqui i quihin ña María zava litro azetye vixi sa yahvi xaan ndyaa, ta i tyozo ña sii si saha ra Jesús, ta i zana-ityi ña saha ra sihin ixi xiñi ña. Ta i situ cuii vehe cuan sihin xico vixi.

⁴Ta i catyi minoo ra i casi ra Jesús, ra sa nañi Judas Iscariote zehe ra Simón, zuun ra cuu ra sa cua xico tuhun sii ra Jesús. Maa ra cuan i catyi:

⁵¿Ñacu ñá xico ñu azetye ya? ta cua ñihi ñu tañi cumi mil zazava ta tyindyee ñu sii ñiyivi ndahvi sihin si. Catyi ra.

⁶Zoco ñá catyi ra tacuan vatyi cuñi xaan ra sii ñiyivi ndahvi. I catyi ra tacuan vatyi minoo ra zuhu cuu ra, ta ndyizo ra yiti sa ñoho xuhun ra Jesús, ta quihin xehe ra xuhun cuan.

⁷Tacuan ta i catyi ra Jesús: Ma cahan ca ndo sihin ña. Zavaha ña sii si cuee ca sa cui ta cuhin nuñaña.

⁸Ñiyivi ndahvi cuan, cua coo ñu sihin ndo tandihi cui tyiemvu. Zoco yuhvi ma cundyei sihin ndo tandihi tyiemvu.

Cuñi cahñi ñiyivi sii ra Lázaro

⁹Ta sa ñihi ñiyivi hebreo tuhun vatyi ndyaa ra Jesús ñuu Betania, cuaha xaan ra saa coyo. Ña iin ñi sa cuenda ra Jesús i quisi ra, quisi ra vatyi cuñi ra ndyehe ra sii ra Lázaro, ra i zanandoto ra Jesús.

¹⁰Zoco ra zutu nahnu i natuhun tahan ra yozo caa ta cuu cahñi ra sii ra Lázaro.

¹¹Vatyi sa cuenda ra Lázaro, ta cuaha xaan ra hebreo zaña ra tuhun zacuaha ra cu zutu ta sino iñi ra sii ra Jesús.

I quihvi ra Jesús ñuu Jerusalén

¹²Ta inga quivi i saa cuaha xaan ñiyivi ñuu Jerusalén sa cuenda vico zuhun, ta sa i sito ñu vatyi vasi ra Jesús

¹³i sahndya ñu ndaha tuticaha ta i quita coyo ñu ta cua zatahan ñu sii ra, ta cana saa ñu ta catyi ñu: iCahnu xaan cuu ra vasi sa cuenda

ra Ndyoo! iRey, ra ndyaca ñaha sii yo cuu ra! Catyi ñu.

¹⁴Ta i ñihi ra Jesús minoo burro luhlu, ta yozo ra sii ti tañi catyi si sisi Tuhun Ndyoo:

¹⁵Ma yuhu ndo ñiyivi ñuu Sión;
Ica rey ndo vasi ya;
Yozo ra minoo burro luhlu.

Tacuan catyi si.

¹⁶Ña cutuñi iñi ra i casi ra Jesús cuhva ya sa xihna ñi, zoco ta sa cua nanuhu ra Jesús ndya gloria ta ziqui i nacohon iñi ra i casi ra vatyi tacuan ndyaa si sa cuenda ra Jesús, ta i nacohon iñi ra vatyi tacuan i zavaha ñiyivi sihin ra.

¹⁷Ta i saha ñiyivi sa ndaa, ñiyivi sa yucu sihin ra Jesús nu i cana ra sii ra Lázaro sisi ñaña ta i zanandoto ra sii ra.

¹⁸Ta yucuan cuenda cuaha xaan ñiyivi i zatahan sii ra Jesús vatyi sa sito ñu vatyi i zavaha ra sa ndyityi cuan.

¹⁹Zoco i catyi ra fariseo sihin tahan ra: Ndyehe ndo vatyi ma cuu ca zavaha yo ñaa sa cuñi yo sihin ra vatyi sa tandihi cui ñiyivi sino iñi sii ra.

Nanducu ra griego sii ra Jesús

²⁰Ta yucu tucu zuhva ra griego, ra i saa sihin ñiyivi vico cuan sa cua zacahnu ra sii ra Ndyoo.

²¹Ta i tuhva ra sii ra Felipe ra ñuu Betsaida nu cu si Galilea, ta i catyi ra sihin ra: Tata, cuñi xaan ndi natuhun ndi sihin ra Jesús.

²²Ta i sahan ra Felipe, ta nacatyi ra sihin ra Andrés. Ta ziqui i sahan ra Andrés sihin ra Felipe cua nacatyi ra sihin ra Jesús.

²³Ta i catyi ra Jesús sihin ra: Sa saa cuhva cua cui, ta ra i quisi ndya gloria cua cunanuhu ra ndya gloria.

²⁴Sa ndisa ta sa ndisa catyi sihin ndo vatyí minoo siti trigo tatu ma canacava si nu ñuhu ma cuu si, zoco minoo tuhun ñi si cua coo sa tacuan. Ta tatu cua cuu si, cuaha xaan siti si cua nanduu.

²⁵Ra sa cuñi coo vaha, cunaa ra sihin si. Ta inga ra tatu ndoo ra vaha vazu cahan ñiyivi sii ra sa cuenda Tuhun Ndyoo, cua coo vaha ra cuan ndya gloria, ta ma cuu añima ra.

²⁶Tatu iyo ndo cuñi ndo zatyíño ndo tyiñe, cundyico ndo sii. Ta nu cua cundyei, yucuan cua cundyaa tucu maa ndo. Ta tatu iyo ndo sa cua zatyíño ndo tyiñe, cua zacahnu Zuti sii ndo.

Nacatyí ra Jesús vatyí cua cuu ra

²⁷Ta vityí ndahvi xaan cuñi añime. ¿Ta ñaa sa cua catyi? ¿Atu cua catyi: “Zuti zacacun sii, sihin tundoho sa cua ndyehi vityí”? Ma catyi tacuan vatyí vasi ñuu ñiyivi sa cuenda sa cua ndyehi tundoho ya.

²⁸Vaha ca nacatyí: “Zuti zanducahnu zivun.” Tacuan i catyi ra Jesús. Ta ziqui i quisi minoo nduzu ndya andivi ta catyi si: Sa i zanducahnu mi zivi, ta cua zanducahni sii si inga saha.

²⁹Ta i siñi ñiyivi sa yucu yucuan nduzu cuan, ta i catyi ñu vatyí cahan zavi. Ta inga ñu i catyi ñu vatyí cahan minoo ángel ra Ndyoo sihin ra Jesús.

³⁰Ta i nacahan ra Jesús ta catyi ra: Ña vasi nduzu ya sa cuenda mi. Vasi si sa cuenda maa ndo.

³¹Ta vityí cua tasi tuñi ra Ndyoo sii ñuu ñiyivi ya. Ta ra ndyaca ñaha sii ñuu ñiyivi ya, vityí cua tava ra Ndyoo sii ra ityi sata.

³²Ta yuhvi tatu cua tyaa ñiyivi sii nu cruz, cuaha xaan ñiyivi cua sino iñi sii.

³³Ta sa i cahan ra Jesús tuhun ya, saha ra sa cua coto ñiyivi cuhva cua cuu ra.

³⁴Ta i nacahan ñiyivi ta catyi ñu: Sa siñi ndi vatyí catyi si nuu ley ra Ndyoo vatyí ra Cristo, tacuan ñi cua coo ra tandihi cui tyiemvu. ¿Ta ñacu catyun vatyí cuñi si sa tyaa ñiyivi sii ra i quisi ndya gloria nu cruz? ¿Yoo ra cuu ra i quisi ndya gloria?

³⁵Tacuan ta ziqui i nacatyí ra Jesús sihin ñu: Zuhva ñi ca cuhva cua coo ñúhu nu yucu ndo. Caca ndo ñii ñi sa ndyaa ñúhu ya, coto quisi sa ñaa ta ma cuu ca caca ndo. Vatyí ra sica noo nu ñaa, ña sito ra ndya ityi cuahan ra.

³⁶Ñii ñi sa ndyaa ñúhu sihin ndo, sino iñi ndo sii ra. Vatyí tacuan ta cua cuu ndo zehe ñúhu. (Cua cuu ndo ñiyivi sa zama cuhva iyo.)

Ña sino iñi ra hebreo sii ra Jesús

Tacuan i catyi ra Jesús, ta cuahan ra ta i quihvi xehe ra sii ñu.

³⁷Vazu sa cuaha xaan sa ndyityi i zavaha ra nuu ñiyivi cuan, zoco ñá sino iñi ñu sii ra

³⁸vatyi tacuan ta cua quita si tañi i catyi ra Isaías, minoo ra cu profeta, quivi i catyi ra tyehen:

Tata çyoo ra sino iñi sa quehin?

Ta çyoo sii i zañaha ra ndyaca ñaha sii yo cuhva cuu zacuu ra?

³⁹Yucuan cuenda ña cuu sino iñi ñu vatyí zuun ñi i catyi tucu ra Isaías:

⁴⁰I zanducuaa ra siti nuu ñiyivi cuan, ta i zanduñihi ra iñi ñu.

Ta tacuan ta ma ndyehe ñu
sihin siti nuu ñu, ta ma
cutuñi iñi ñu sihin añima ñu
ta nazama ñu cuhva iyo ñu, ta
ma zanduvehi sii ñu.

Catyi ra Ndyoo.

⁴¹I catyi ra Isafás tuhun ya quivi
i ndyehe ra vatyí cahnu xaan cuu
maa ra Ndyoo ta tyaqui xaan ra. Ta
i cahan ra cuenda ra.

⁴²Zoco cuaha xaan ra cu tyiño
ñuu cuan, i sino iñi ra sii ra Jesús.
Zoco ñá saha ra sa ndaa vatyí yuhu
ra sii ra fariseo coto tava ndyizo ra
sii ra sisi vehe ñuhu.

⁴³Vatyí cuñi xaan ca ra cuan sa
tyaa ñiyivi yahvi sii ra, ta ña sica
iñi ra tatu cua cuzii iñi ra Ndyoo
sihin ra a ma cuzii iñi ra.

Tuhun cahan ra Jesús cua tyicuhva si sii ñiyivi

⁴⁴I cana saa ra Jesús ta catyi ra:
Ra sa sino iñi sii, ña iñi ñi sii mi
sino iñi ra. Zoco sino tucu iñi ra sii
ra i tasi sii.

⁴⁵Ta ra sa ndyehe sii, ndyehe tucu
ra sii ra i tasi sii.

⁴⁶Vasi ñuu ñiyivi ya tañi minoo
ñúhu vatyí yoo ra sino iñi sii, ma
ndoo ca ra nu ñaa.

⁴⁷Ta tatu sa siñi ñiyivi sa quehin
ta ma tyaa ñu yahvi, ma tyicuhve
sii ñu vatyí ña vasi tyicuhve. Vasi
zacaqui sii ñiyivi ñuu ñiyivi.

⁴⁸Ra sa ña cuñi sii mi caña ñi, ta ña
tyaa ra yahvi tuhun quehin, sa iyo sa
cua tyicuhva sii ra. Tuhun sa i quehin,
yucuan cuu sa cua tyicuhva sii ra
quivi cua tyicuhva ra Ndyoo sii ñiyivi.

⁴⁹Vatyí ña quehin sa cuenda ñi
mi. Zuti, ra i tasi sii, i saha ra tyiño
sii, tandihi cuii sa cuu nacatyí.

⁵⁰Ta site vatyí tyiño i saha ra sii,
cuu cuhva cundito ñiyivi tandihi
tyiemvu sihin ra. Yucuan cuenda
tandihi cuii sa catyi sihin ndo,
quehin cuhva saha Zuti tyiño sii.

I nacatya ra Jesús saha ra i casi ra

13 Ta sa vatyí vico zuhun, ta sa
sito ra Jesús vatyí sa cua tahan
si cuhva quita ra ñuu ñiyivi ya ta cuhun
ra nu ndyaa Zutu ra. I cuñi xaan ra sii
ñiyivi sino iñi sii ra ihya ñuu ñiyivi ta
cuhva cuñi ra sii ñu, ma ndihi maa si.

²Ta cuhva sa cuxiñi ra, ta i quihvi
cuihna añima ra Judas Iscariote
zehe ra Simón, vatyí cua xico tuhun
ra sii ra Jesús.

³Ta sa sito ra Jesús vatyí sa i saha
Zutu ra tandihi cuii tyiño sii maa ra.
Ta sa sito ra vatyí ndya nu ndyaa ra
Ndyoo i quita ra, ta ndya indyacuan
cua cunanuhu ra.

⁴Ta cuhva sa cuxiñi ra i nduvita
ra, ta i tava ra zahma sa ndisi ra, ta
sihñi ra minoo toalla sisi ra.

⁵Ta ziqui i tyihi ra ndutya sisi
minoo caa, ta quisaha nacatya ra
saha ra i casi ra. Ta zana-ityi ra
saha ra sihin toalla sa nuhñi sisi ra.

⁶Ta sa saa ra nu ndyaa ra Simón
Pedro, i catyi ra Pedro sihin ra:
Tata, ¿tatu cua nacatyon sehi?

⁷Ta i nacahan ra Jesús ta catyi ra:
Ña cutuñi iñun sa zavehi vityi, zoco
cuae ca cua cutuñi iñun. Catyi ra.

⁸Ta i catyi ra Pedro sihin ra:
Numinoo saha ta ma nacatyon sehi
caña ñi. Ta i catyi ra Jesús sihin ra:
Tatu ma nacatye sohon, yivi ñiyivi
sii cuu suun.

⁹Ta i catyi ra Simón Pedro sihin
ra: Tata, ña maa ñi sehi nacatyon,
nacatya tucun ndehi ta xiñi.

¹⁰Ta ziqui i catyi ra Jesús sihin ra: Ra sa sityi, maa ñi saha ra cuñi si ndoo vatyí sa ndii maa ra. Ta sa ndii maa ndo, zoco ña tandihi ndo.

¹¹Tacuan i catyi ra Jesús vatyí sa sito ra yoo ra cua xico tuhun sii ra. Yucuan cuenda i catyi ra: “Ña ndii tandihi ndo.”

¹²Tacuan ta sa ndihi nacatya ra saha ra, ta i naquihin ra zahma ra, ta sicundyaa ra mesa. Ta ziqui i nacatyi ra sihin ra: ¿Atu cutuñi iñi ndo cuhva i zavehi sihin ndo?

¹³Catyi maa ndo maestro cui, ta catyi ndo ra ndyaca ñaha cui, ta vaha cahan ndo vatyí zuun ra cui.

¹⁴Tatu yuhvi cuu maestro ta ra ndyaca ñaha ta i nacatye saha ndo. Tacuan tucu maa ndo, tahan si nacatya ndo saha tahan ndo.

¹⁵Vatyí sa i sehi minoo cuhva sii ndo, ta cuñi si sa cua zavaha tucu ndo cuhva i zavehi sihin ndo.

¹⁶Sa ndisa ta sa ndisa catyi sihin ndo vatyí ña cahnu ca ra cu muzu ta ziqui patrón ra. Ta cahnu ca cuu ra tava tyiño sii ñiyivi ta ziqui ca ra cuahan sihin tyiño.

¹⁷Tatu sito ndo tuhun ya, zii xaan cua cuñi ndo tatu zavaha ndo sii si.

¹⁸Ña quehin sa cuenda tandihi ndo. Sa site yoo ndo i casi. Zoco cua cuu si cuhva catyi tutu Tuhun Ndyoo: “Ra sa sasi pan sihin, cua nduvita ra ziqui.”

¹⁹Ta vityi sa nacatyi sihin ndo cuee ca sa tahan si vatyí quivi cua tahan si ta cua sino iñi ndo vatyí yuhvi cuu ra sa nacatyi sihin ndo.

²⁰Sa ndisa ta sa ndisa catyi sihin ndo vatyí ra naquihin vaha sii ra tasi, naquihin vaha ra sii. Ta ra naquihin vaha sii, naquihin vaha ra sii ra sa tasi sii.

Zacoto ra Jesús sii ra i casi ra vatyí cua xico tuhun ra Judas sii ra

²¹Ta sa ndihi cahan ra Jesús tuhun cuan, ta i quisi minoo sa cuihya xaan cuñi añima ra, ta i catyi ra: Sa ndisa ta sa ndisa catyi sihin ndo vatyí iyo minoo ndo cua xico tuhun ndo sii.

²²Ta cuhva cuan i nandyehé ra i casi ra Jesús sii tahan ra vatyí ña sito ra yoo ra cuu ra cahan ra Jesús tuhun.

²³Ta minoo ra i casi ra Jesús, ra sa cuñi xaan ra, nañaa ra sii ra Jesús.

²⁴Ta i saha ra Simón Pedro minoo zeña sii ra cuan sihin ndaha ra vatyí nanducu tuhun ra sii ra Jesús yoo ra cuu ra sa cahan ra tuhun.

²⁵Ta ra yucuan, i tuhva ca ra sii ra Jesús ta nducu tuhun ra: Tata, ¿yoo ra cuu ra sa cohon tuhun?

²⁶Ta i nacahan ra Jesús ta catyi ra: Cua zatyí pan, ta cua cuhve sii si sii minoo ra. Yucuan ra cuu ra. Ta sa zatyí ra Jesús pan cuan, ta i saha ra sii si sii ra Judas Iscariote, zehe ra Simón.

²⁷Ta sa ndihi sasi ra Judas pan cuan, i quihvi cuihna añima ra. Ta ziqui i catyi ra Jesús sihin ra: Cuhva sa cua zavohon, zavohon sii si yatyí ca.

²⁸Zoco ña sito numinoo ra ndyaa mesa sihin ra Jesús ñaa cuenda i cahan ra tacuan sihin ra Judas.

²⁹Iyo ra i sica iñi ra vaziqui i catyi ra Jesús: “Cuahan cua zaton ñaa sa cua cuñi si sii yo cuenda vico zuhun ya.” A catyi ra: “Cuhvon xuhun sii ñiyivi ndahvi.” Vatyí cumi ra Judas yiti sa ñoho xuhun ra Jesús.

³⁰Ta sa ndihi sasi ra Judas pan cuan, ta zuun ñi caa cuhva cuan i nduvita ra ta cuahan ra. Ta sa cuaa ñi cuu si.

**Minoo tyiño saa saha ra
Jesús, ta ñiñi xaan si**

³¹Ta sa yaha cuahan ra Judas ta ziqui i catyi ra Jesús: Vityi sa tahan si cuhva vatyi cua coto ñiyivi vatyi iyo xaan cuhva sii ra i quisi ndya gloria ta cua zacahnu ñu sii ra, ta cua zacahnu xaan ñu sii ra Ndyoo sa cuenda ra.

³²Vatyi tatu ra i quisi ndya gloria zañaha ra vatyi cahnu xaan cuu maa ra Ndyoo. Zuun ñi cuhva cuan cua zañaha ra Ndyoo vatyi cahnu xaan cuu maa ra cuan. Ta numi xaan cua nacoto vaha ndo sii si.

³³Ndoho zehe luhli, zuhva ñi ca cuhva cua cundyei sihin ndo. Cueue ca cua nanducu ndo sii, ta tañi sa i catyi sihin ra hebreo nacatyí sihin maa ndo vityi vatyí nu cuhin ma cuu cuhun ndo.

³⁴Sehi minoo tyiño saa sii ndo vatyí cuñi ndo sii tahan ndo tañi cuñi mi sii ndo.

³⁵Ihya cuhva cua coto tandihi ñiyivi vatyí ndyico ndo sii, tatu cuñi ndo sii tahan ndo.

**Zacoto ra Jesús sii ra i casi
ra vatyí cua catyi ra Pedro
vatyi ña sito ra sii ra**

³⁶Ta i catyi ra Simón Pedro sihin ra: Tata, ¿ndyamaa cua cuhun? Ta i catyi ra Jesús sihin ra: Nu cuhin ma cuu cuhun sihin vityi, zoco cueue ca ta cua cuhun. Catyi ra.

³⁷Ta i catyi tucu ra Pedro sihin ra: Tata, ¿ña cuenda ma cuu cuhin

suhun vityi? Cuhin vazú cui sa cuendon.

³⁸Ta i nacahan ra Jesús ta catyi ra: ¿Atu cuu cuun sa cuende? Sa ndisa ta sa ndisa catyi suhun vatyí cueue ca sa vacu saa ndivi tyahnu ta cua catyún uñi tahan saha vatyí ña siton sii.

**Tañi minoo ityi cuu ra Jesús, ta
cúu cuhun yo nu ndyaa Zutu ra**

14 I catyi ra Jesús: Ma caca xaan iñi ndo. Sa sino iñi ndo sii ra Ndyoo. Sino tucu iñi ndo sii mi.

²Vehe Zuti, iyo cuaha xaan nu cuu cundyaa ndo. Tatu sa ña ndisa, ma nacatyí sihin ndo. Cuhin cua zanduvehi nu cua cundyaa ndo.

³Ta tatu cuhin ta zanduvehi nu cua cundyaa ndo, cua quisi inga saha ta naquihin sii ndo vatyí cuhun ndo ta cundyaa ndo nu cua cundyei.

⁴Sito ndo ndyamaa cuehin, ta sito ndo ityi.

⁵Ta i catyi ra Tomás sihin ra: Tata, ña sito ndi ndyamaa cuohon ¿ta yozo caa cuu coto ndi ityi? Catyi ra.

⁶Ta i catyi ra Jesús sihin ra: Yuhvi cui ityi. Ta maa ñi sa ndisa cuii quehin, ta sehi cuhva cundito ñiyivi. Yoñi cuu saa nu ndyaa Zuti tatu ma sino iñi ñu sii.

⁷Tatu sa vatyí nacoto ndo sii, nacoto tucu ndo sii Zuti. Ta ndya vityi sa nacoto ndo sii ra, ta sa ndyehe ndo sii ra.

⁸Ta i catyi ra Felipe sihin ra: Tata, zañohon sii ra Ndyoo Zutun sii ndi. Ta sihin sa yucuan ñi ta sa vaha ñi.

⁹Ta i catyi ra Jesús: Felipe, sa cuaha xaan quivi ndyei sihin

ndo. ¿Atu ta nacoto con sii? Ra sa ndyehe sii, sa ndyehe ra sii ra Ndyoo Zuti. ¿Ta ñaa cuenda catyun vatyí zañehi sii ra Ndyoo Zuti sii ndo?

¹⁰¿Atu ña sino iñun vatyí ndyaa ra Ndyoo Zuti sihin ta iin ñi cui sihin ra? Ta tuhun quehin, ña quehin sa cuenda ñi mi. Quehin tuhun ra Ndyoo Zuti, ra ndyaa sihin. Ta tyiño zavehi, maa ra zavaha sii si.

¹¹Sino iñi ndo vatyí iin ñi cui sihin ra Ndyoo Zuti ta ndyaa ra sihin. Zoco tatu ña sino iñi ndo cuhva cuan, zoco sino iñi ndo sa cuenda tyiño zavehi.

¹²Sa ndisa ta sa ndisa catyí sihin ndo, ra sa sino iñi sii, cua zavaha ra tyiño tañi tyiño zavehi. Ta tyiño cahnu ca cua zavaha tucu ra vatyí cuehin nu ndyaa ra Ndyoo Zuti.

¹³Ta tandíhi sa cua caca ndo sii, sihin ziví mi, cua cuhve sii si. Ta tacuan ta cua zacahnu ca ñiyiví sii ra Ndyoo Zuti sa cuenda sa cua zavaha Zehe ra.

¹⁴Tandíhi sa cua caca ndo sii, sihin ziví mi, cua cuhve sii si sii ndo.

I catyí ra Jesús vatyí cua zaquisi ra sii Tatyí Ii

¹⁵Tatu cuñi ndo sii, zavaha ndo cuhva catyí sihin ndo.

¹⁶Ta cua caca tahvi sii ra Ndyoo Zuti ta cua zaquisi ra sii inga ra cua tyindyee sii ndo. Ta cua ndoo ra cuan sihin ndo tandíhi cuii tyiemvu.

¹⁷Tatyí Ii cuu ra, ta maa ñi sa ndisa cahan ra. Ña cuu ñihi ñiyiví ndya vaha ñi sii ra vatyí ña ndyehe ñu sii ra, ta ña nacoto ñu sii ra.

Zoco sa sito maa ndo sii ra vatyí ndyaa ra sihin ndo, ta cua coo ra sisi añima ndo.

¹⁸Ta ma zandai sii ndo tacuan ñi. Cua quisi tuqui nu ndyaa ndo.

¹⁹Zuhva ñi ca cuhva, ta ma ndyehe ca ñiyiví ndya vaha ñi sii. Zoco maa ndo cua ndyehe ndo sii. Cua cundite, ta yucuan cuenda cua cundito tucu maa ndo sihin.

²⁰Ta quiví cuan, cua coto ndo vatyí iin ñi cui sihin Zuti, ta iin ñi cua cuu ndo sihin ta mi sihin maa ndo.

²¹Ta ra sa cumi vaha tandíhi cuii tuhun i nacatyí sihin ndo ta zavaha ra sii si, yucuan ra cuu ra sa cuñi xaan sii. Ta ra sa cuñi sii, cuñi xaan Zuti sii ra. Ta cua cuñi xein sii ra, ta cua quisi nu ndyaa ra. Tacuan i catyí ra Jesús.

²²Ta i catyí ra Judas, zoco yiví ra Judas Iscariote cuu ra, ta i catyí ra sihin ra: Tata, ¿ñaa cuenda cua quisun nu ndyaa maa ndi, ta ma cahun nu ndyaa inga ñiyiví ndya vaha ñi?

²³Ta i nacahan ra Jesús ta catyí ra sihin ra: Tatu cuñi minoo ra sii mi sa ndisa, cua tyaa ra yahvi tuhun quehin. Ta cua cuñi xaan Zuti sii ra. Ta cua cahun ndi nu ndyaa ra, ta cua ndoo ndi sihin ra.

²⁴Zoco ra ña cuñi sii, ña tyaa ra yahvi tuhun quehin. Ta tuhun quehin ta sa siñi ndo, yiví tuhun ñi mi cuu si. Sa cuenda ra Ndyoo Zuti cuu si, ra i tasi sii.

²⁵Ta sa nacatyí cuhva ya sihin ndo ñi ñi sa ndyei sihin ndo vityí.

²⁶Ta ra sa cua tyindyee sii ndo, ra cu Tatyí Ii, cua tasi ra Ndyoo Zuti sii ra sa cuenda mi. Cua zacuaha ra

sii ndo tandihi. Ta cua zanacohon ra iñi ndo tandihi sa i catyi sihin ndo.

²⁷Ta sa coo vaha ndo sehi sii ndo. Ta sa coo vaha ndo zandoi sihin ndo. Ña sehi sii si cuhva saha ñiyivi ñuu ñiyivi ya. Ma cuhva ndo sa caca xaan iñi ndo, ta ma yuhu ndo.

²⁸Ta vityi sa siñi ndo sa catyi vatyí cuhin, ta cua quisi tuqui nu ndyaa ndo. Tatu ndisa vatyí cuñi xaan ndo sii, zii xaan cua cuñi ndo vatyí cuhin nu ndyaa ra Ndyoo Zuti vatyí cahnu ca cuu maa ra ta ziqui ca mi.

²⁹Ta vityi sa nacatyí sihin ndo cuae ca sa tahan si vatyí quivi cua tahan si ta cua sino iñi ndo.

³⁰Ña cuaha ca tuhun cua quehin sihin ndo vatyí sa vasi ra ndyaca ñaha ñuu ñiyivi ya, ta ña ndyaca ñaha ra sii.

³¹Zoco sa cua nacoto ñiyivi ñuu ñiyivi vatyí cuñi xein sii ra Ndyoo Zuti, yucuan cuenda cua zavehi tyiño i tava ra sii. Ta vityi nanduvita yo ta cuhun yo.

**Ra Jesús cuu ra tañi minoo
yoho uva sihin zoco tu**

15 Yuhvi cui tañi minoo yoho uva, ta Zuti cuu tañi ra zatyiño nu ndyaa tu.

²Ta tandihi zoco yoho uva cuan sa ñahñi yucu vixi vaha saha cua cahndya ra sii si. Ta tandihi zoco yoho sa ndyizo yucu vixi vaha, zanduvii ra sii si, ta tacuan ta cua cuhva si cuaha ca.

³Ta maa ndo sa nduvii ndo sihin tuhun quehin sihin ndo.

⁴Iñi ñi cuu ndo sihin. Tañi mi iñi ñi cui sihin ndo. Tañi minoo zoco

yoho, ma cuu cuhva si yucu vixi sa maa ñi maa si, tatu ña iñi ñi cuu si sihin yoho sa cuu saha si. Ta tacuan tucu maa ndo; ma cuu zavaha ndo cuhva catyi sihin ndo tatu ña iñi ñi cua cuu ndo sihin.

⁵Yuhvi cui tañi yoho uva cuan, ta maa ndo cuu tañi zoco tu. Ra sa nañaa sii, nañei sii ra. Ta cuaha xaan sa vaha zavaha ra. Vatyí tatu ma tyindyei sii ndo ñahñi maa sa cuu zavaha ndo.

⁶Ta ra sa ña nañaa sii, cua zavite sii ra tañi minoo zoco yoho. Ta cua na-ityi zoco yoho cuan, ta cua quisi naquihin ñiyivi sii si, ta cua tyihi ra sii si nu cayu ñuhu vatyí cua cayu si.

⁷Tatu nañaa ndo sii, ta tuhun quehin iyo vaha si sihin ndo, cua caca ndo ñaa sa cuñi ndo ta cua ñihi ndo sii si.

⁸Cuhva cuan zacahnu xaan sii sii Zuti tatu cuaha xaan sa vaha zavaha ndo. Ta tacuan ta cua cuu ndo ñiyivi ndyico sii mi sa ndisa.

⁹Cuhva cuñi xaan Zuti sii, ta tacuan cuñi sii maa ndo. Ma naa iñi ndo cuhva cuñi xein sii ndo.

¹⁰Tatu zavaha ndo tandihi sa catyi sihin ndo, cua cuñi xein sii ndo. Tañi sa i tyaa xein yahvi tandihi sa i catyi Zuti sihin, ta cuñi xaan ra sii.

¹¹Quehin cuhva ya sihin ndo vatyí cuzii cuñi ndo tañi sa zii cuñi mi. Ta sa zii cuñi maa ndo, ma ndihi si.

¹²Ihya cuu tyiño sehi sii ndo vatyí cuñi xaan ndo sii minoo ndo ta sii inga ndo tañi cuñi xein sii ndo.

¹³Tatu cuñi ndisa cuii yo sii inga ñiyivi, cuhva yo sa cuu yo sa

cuenda ñu. Ñahñi inga ca cuhva ñihi ca cuñi yo sii ñu.

¹⁴Maa ndo cuu ñiyivi sa cuñi xein tatu zavaha ndo tandihi cuhva sa i catyi sihin ndo.

¹⁵Ndya vityi ma cahan que muzu sihin ndo vaty minoo muzu ña sito ra ñaa sa zavaha patrón ra. Zoco catyi vaty ñiyivi sa cuñi xein cuu sii maa ndo vaty sa i nacaty sihin ndo tandihi cui sa i nacaty Zuti sihin.

¹⁶Ñá casi ndo sii. Yuhvi cuu ra i casi sii ndo. Ta i sehi tyiño sii ndo vaty cuhun ndo ta zatyiño ndo tyiñe. Ta cua quita vaha tyiño ndo, ta ma cunaa si. Ta tandihi sa cua caca ndo sii Zuti sihin zivi mi cua cuhva ra sii si sii ndo.

¹⁷Ta ihya cuu tyiño sehi sii ndo vaty cuñi xaan ndo sii minoo ndo ta sii inga ndo.

**Cua cuxaan ñiyivi ndya
vaha ñi sihin ndo**

¹⁸Tatu ña cuu ndyehe ñiyivi ña sino iñi sii ndo, sa sito ndo vaty sa xihna ñi sii mi ña cuu ndyehe ñu ta ziqui sii maa ndo.

¹⁹Tatu ñiyivi cuenda ñuu ñiyivi ya cuu ndo, cua cuñi xaan ñiyivi ñuu ñiyivi ya sii ndo. Zoco yivi ca ñiyivi ñuu ñiyivi ya cuu ndo vaty sa i casi sii ndo sisi ñuu ñiyivi ya. Yucuan cuenda, ña cuu ndyehe ñiyivi ndya vaha ñi sii ndo.

²⁰Nacohon iñi ndo vaty sa i nacaty sihin ndo vaty ña cahnu ca cuu ra cu muzu ta ziqui ca patrón ra. Tatu sa cuxaan ñiyivi sihin mi, cua cuxaan tucu ñu sihin maa ndo. Tatu zavaha ñu cuhva catyi, cua

zavaha tucu ñu cuhva catyi maa ndo.

²¹Zoco tandihi cui nuu sa ña vaha cua zavaha ñu sihin maa ndo sa cuenda mi vaty ña sito ñu sii ra i tasi sii.

²²Tatu sa ñá quisi quehin sihin ñu, ñahñi cuaty ñu. Zoco vityi ñahñi cuhva cuu tyixehe ñu cuaty ñu.

²³Ra sa ña cuu ndyehe sii, ña cuu ndyehe tucu ra sii Zuti.

²⁴Tatu sa ñahñi sa ndyityi i zavehi nu yucu ñu tañi sa yoñi zavaha, ñahñi cuaty ñu. Zoco vityi sa i ndyehe ñu sii, ta i cuxaan ñu sihin mi ta sihin Zuti.

²⁵Tacuan cua cuu si vaty cua tahan si cuhva catyi si sisi zuun ñi ley maa ñu nu catyi si: “Vazu ñahñi cuaty, zoco ma cuu ndyehe ñu sii.” Catyi si.

²⁶Zoco quivi naquisi Taty Ii, ra cua tasi ndya nu ndyaa ra Ndyoo Zuti, cua tyindyee ra sii ndo, ta maa ñi sa ndisa cua cahan ra. Ra cuan cua cuhva sa ndaa sa cuenda mi.

²⁷Ta maa tucu ndo cua cuhva ndo sa ndaa vaty i sindihi ndo sihin ndya quivi i quisaha zatyñe.

16 Ihya tuhun i quehin sihin ndo vaty ma catyih saha ndo.

²Cua tava ndyizo ñiyivi sii ndo sata vehe ñuhu. Ta cua saa cuhva vaty yoo ra sa cua cahñi sii ndo ta cua caca iñi ra vaty tyiño ra Ndyoo zatyñe ra.

³Ta cua zavaha ñu cuhva ya vaty ña sito ñu sii ra Ndyoo Zutu yo a sii mi.

⁴Zoco vityi sa i nacaty cuhva ya sihin ndo vaty quivi cua tahan si

ta cua nacohon iñi ndo vatyí sa i catyí sihin ndo.

Cuhva cua zavaha Tatyí li ra Ndyoo

Ñá catyí tuhun ya sihin ndo sa xihna ñi vatyí ndeyé sihin ndo.

⁵Zoco vatyí cua cuhin ndya nu ndyaa ra i tasi sii. Ta yoñi ndo cua nducu tuhun ndo sii, ndyamaa cuhin.

⁶Ta vatyí sa nducuihya cuñi añima ndo vatyí sa i catyí tuhun ya sihin ndo.

⁷Ta catyí sa ndisa sihin ndo vatyí ñiñi xaan cuu si sa cuhin vatyí tatu ma cuhin ma quisi Tatyí li ziquí ndo. Cua cuhin ta cua zaquisi sii ra ziquí ndo.

⁸Ta quiví cua quisi ra, cua zacoto ra sii ñiyiví vatyí iyo cuatyí ñu. Ta cua zañaha ra vatyí iyo minoo ityí ndoo. Ta cua tasi tuñi ra Ndyoo sii ñiyiví sa ma ndu-uu iñi cuatyí.

⁹Cua catyí ra sihin ñiyiví vatyí iyo cuatyí ñu vatyí ña sino iñi ñu sii.

¹⁰Cua zañaha ra sii ñu vatyí iyo minoo ityí ndoo vatyí cuhin nu ndyaa Zuti, ta ma ndyehe ca ndo sii.

¹¹Ta cua zañaha ra cuhva cua tasi tuñi ra Ndyoo vatyí cua tasi tuñi ra Ndyoo sii ra ndyaca ñaha ñuu ñiyiví ya.

¹²Iyo cuaha xaan ca sa cuñi catyí sihin ndo, zoco ma cutuñi iñi ndo sii si vatyí.

¹³Zoco quiví cua quisi Tatyí li, cua cahan ra sa ndisa vatyí ra cahan sa ndisa cuu ra. Maa ra cuan, cua zañaha ityí sii ndo sii tandíhi cuii sa ndisa. Ma cahan ra sa cuenda ñi maa ra. Tandíhi sa siñi ra nu ndyaa ra Ndyoo Zutu yo, cua zacoto ra sii ndo. Ta cua zacoto ra sii ndo ñaa sa cua coo ityí nuu ca.

¹⁴Cua zacahnu ra sii mi vatyí cua quihin ra tuhun quehin sihin ra, ta cua zacoto ra sii ndo.

¹⁵Tandíhi cuii sa iyo sii Zuti ta sii mi cuu tucu si. Yucuan cuenda catyí vatyí cua quihin ra tuhun quehin sihin ra, ta cua zacoto ra sii ndo.

Cuihya cuñi ra i casi ra Jesús, zoco cuee ca ta cua nduzii cuñi ra

¹⁶Zuhva cuii ñi ca quiví, ta ma ndyehe ca ndo sii. Ta inga zuhva ca quiví ta cua nandyehe ndo sii, vatyí cuhin nu ndyaa Zuti. Catyí ra.

¹⁷Tacuan ta i quisaha natuhun tahan ra i casi ra Jesús sihin tahan ra: ¿Ñaa tuhun cuu si sa catyí ra sihin yo? vatyí catyí ra: “Zuhva cuii ñi ca quiví ta ma ndyehe ca ndo sii, ta inga zuhva ca quiví ta cua nandyehe ndo sii vatyí cuhin nu ndyaa Zuti”. Catyí ra.

¹⁸¿Ñaa cuñi si catyí si sa catyí ra zuhva cuii ñi ca quiví? Ña cutuñi iñi yo ñaa tuhun cahan ra. Catyí ra i casi ra Jesús.

¹⁹Ta i tuu iñi ra Jesús vatyí cuñi nducu tuhun ra sii ra, ta i catyí ra sihin ra: ¿Atu nducu tuhun ndo sii tahan ndo sa cuenda tuhun i catyí vatyí zuhva ñi ca quiví ta ma ndyehe ca ndo sii ta inga zuhva ca quiví ta cua nandyehe ndo sii?

²⁰Sa ndisa ta sa ndisa catyí sihin ndo vatyí cua vacu xaan ndo ta cua coo xaan tucuihya iñi sii ndo, zoco ñiyiví ñuu ñiyiví ya, cua cuzii xaan cuñi ñu. Ta cua nducuihya xaan iñi maa ndo, zoco cuee ca ta cua nduzii xaan cuñi ndo.

²¹Quiví sa cua cacu zehe minoo ñaha, ndyaa xaan ña tundoho vatyí

sa saa cuhva cacu si. Zoco tatu sa yaha cacu zehe ña, ña nacohon ca iñi ña tundoho. Sa nduzii cuñi ña vatyi i cacu minoo rayii ñuu ñiyivi.

²²Ta maa ndo vityi, cuihya xaan cuñi ndo. Zoco cua ndyehi sii ndo inga saha, ta cua nduzii xaan cuñi ndo. Ta yoñi cua cuu tyaa siyo sa zii cuñi ndo.

²³Ta quivi cuan, ma nducu tuhun ca ndo sii. Sa ndisa ta sa ndisa catyi sihin ndo, tandihi sa cua caca ndo sii ra Ndyoo Zuti sihin zivi mi, cua cuhva ra sii si sii ndo.

²⁴Nu vityi ta tañaha ca caca ndo sihin zivi mi. Caca ndo ta cua ñihi ndo, ta tacuan ta zii xaan cua cuñi ndo.

I zahacanaa ra Jesús ziqui ñuu ñiyivi ya

²⁵I quehin tuhun ya sihin ndo sihin minoo cuhva. Zoco cua saa cuhva ta ma cahan que sihin ndo sihin minoo cuhva. Cua catyi casi vehi sihin ndo cuhva iyo ra Ndyoo Zuti.

²⁶Ta quivi cuan cua caca ndo sii ra Ndyoo sihin zivi. Ta ña catyi vatyi cua caca tahvi sii ra Ndyoo Zuti sa cuenda ndo

²⁷vatyi zuun ñi maa ra Ndyoo Zuti cuñi xaan ra sii ndo vatyi cuñi xaan ndo sii, ta sino iñi ndo vatyi i quisi ndya nu ndyaa ra Ndyoo.

²⁸Ndya nu ndyaa ra Ndyoo Zuti i quite ta vasi ñuu ñiyivi. Ta cua zandoo tuqui ñuu ñiyivi ya ta cunanuhi nu ndyaa ra Ndyoo Zuti inga saha.

²⁹Tacuan ta i catyi ra i casi ra sihin ra: Vityi casi vaha cohon, ta ña cahan con sihin minoo cuhva.

³⁰Vityi sito ndi vatyi siton tandihi, ta ña cuñi si sa nducu tuhun numinoo ra suun (vatyi sa siton tandihi sa sica iñi ndi). Yucuan cuenda sino iñi ndi vatyi ndya nu ndyaa ra Ndyoo i quisun.

³¹Ta i catyi ra Jesús sihin ra: ¿Atu sino iñi ndo vityi?

³²Sa cua saa cuhva, ta zuun ñi vityi cuu si, ta cua quitì cuatyì ndo minoo minoo ndo ndya vehe ndo, ta cua zandoo ndo sii, maa tuhun ñi. Zoco ña maa tuhun ñi cua ndoo. Ndyaa ra Ndyoo Zuti sihin.

³³I quehin tuhun ya sihin ndo vatyi tacuan ta cua coo sa taxi añima ndo sa cuenda mi. Ñuu ñiyivi ya cua ndyehi ndo tundoho, zoco ma yuhu ndo vatyi sa i zahacanei ziqui ñuu ñiyivi ya.

Sica tahvi ra Jesús sii ra Ndyoo cuenda ra i casi ra

17 I cahan ra Jesús tuhun ya, ta ziqui i nandyehi ndaa ra ityi andivi ta catyi ra: Ndyoo Zuti, sa saa cuhva. Zacahnun sii zehun ta cuhva cua cuu zacahnu zehun suun.

²I sohon sa cundyaca ñehi ziqui tandihi ñiyivi sa iyo ñuu ñiyivi, ta i sohon sa vatyi cuu cuhve sa cundito ñu tandihi cuii tyiemvu, tandihi ñu sa i sohon sii.

³Ta ihya cuu cuhva cua cuu cundito ñu sihin, tatu nacoto ñu suun vatyi minoo tuhun ñi ra cuu Ndyoo sa ndisa cuii cuun. Ta sa nacoto ñu sii yuhvi ra Jesucristo, ra i tasun.

⁴I zacahni suun ñuu ñiyivi ya. I zandihì tyiño sa i sohon sii.

⁵Ta vityi, Ndyoo Zuti, zacahnun sii nu ndyoon sihin cuhva sa sicoo

sii, quívi i sindyei suhun indyacuan cumañi ca sino ñuu ñiyívi.

⁶I zañehi sii ra i sohon sii, cuhva iyo moo. Sii moo cuu sii ra, ta i sohon sii ra sii, sisi ñuu ñiyívi ya. Ta i tyaa ra yahvi tuhun cahan moo.

⁷Ta vityi sa sito ra vatyí tandíhi cuii sa i sohon sii, cuenda moo cuu si.

⁸Vatyí tuhun sa i sohon sii, i zañehi sii ra ya, ta i naquihin vaha ra sii si. Ta sito ra sa ndisa cuii vatyí ndya nu ndyaa moo i quite. Ta sino iñi ra ya vatyí moo i tasi sii.

⁹Sica tahvi suun sa cuenda ra ya. Ña sica tahvi cuenda tandíhi ñiyívi ñuu ñiyívi zoco cuenda ñiyívi sa i sohon sii, vatyí cuenda moo cuu sii ñu.

¹⁰Ta tandíhi ñu cuu sii, sii moo cuu sii ñu. Ta ñu cuu suun cuu tucu sii mi, ndíhi ca. Ta zacahnu ñu sii.

¹¹Ta vityi ma cundyaa que ñuu ñiyívi ya vatyí quisi nanuhin nu ndyaa moo. Zoco ra ya cua ndoo ra ñuu ñiyívi ya. Zuti, ra ii, zacuendon sii ñu sihin zivi moo, ñu i sohon sii, ta tacuan ta cua ndu-íin ñu tañi maa yo.

¹²Ñiñi ñi sa ndyei sihin ra ya, i zacuende sii ra sihin zivi moo. I sicumi vehi sii ra ya, ta yoñi ra cua naa zoco minoo tuhun ñi ra cua naa tañi catyí Tuhun moo.

¹³Zoco vityi cua quisi nu ndyoon. Ta ñiñi ñi sa ndyei ñuu ñiyívi ya nacatyí tuhun ya, ta tacuan ta cua coo sa zii sii mi sihin ra ya, ta cua cuzii xaan iñi ra.

¹⁴Sa i nacatyí Tuhun moo sihin ra, ta ña cuu ca ndyehe ñiyívi ñuu ñiyívi ya sii ra vatyí yivi ca cuenda ñuu ñiyívi ya cuu ra. Tañi mi yivi ra cuenda ñuu ñiyívi ya cui.

¹⁵Ña sique suun sa tavon sii ra ñuu ñiyívi ya. Zoco sique suun sa vatyí cua zacuendon sii ra sisi sa ña vaha iyo ñuu ñiyívi ya coto ndoyo ñuhu ra.

¹⁶Yivi ca cuenda ñuu ñiyívi ya cuu sii ra. Tañi mi yivi cuenda ñuu ñiyívi ya cui.

¹⁷Zanduvaha con cuhva iyo ra sihin tuhun ndisa sii moo. Tuhun cahan moo, tuhun ndisa cuii cuu si.

¹⁸Tañi i tasun sii mi ñuu ñiyívi ya, zuun ñi tacuan tasi sii ra ya ñuu ñiyívi.

¹⁹Tyaa siye sii, sii sa ña vaha sa cuenda ra ya vatyí tacuan ta cua tyaa siyo tucu maa ra sii ra sii sa ña vaha ta cundyico ra sii, sa ndisa.

²⁰Ña íin ñi sa cuenda ra ya sica tahvi, zoco ndya sa cuenda ñiyívi cua sino iñi sii sihin tuhun sa cua cahan ra ya.

²¹Ta tacuan ta cua ndu-íin tandíhi ñu tañi maa yo vatyí íin ñi iyon sihin, ta íin ñi iye suhun, Ndyoo Zuti. Ta tacuan ta cua ndu-íin tucu maa ñu sihin yo. Ta tacuan ta cua sino iñi ñiyívi ñuu ñiyívi vatyí i zaquisun sii.

²²Ta sa vaha xaan sa sohon sii, i sehi sii ra ya vatyí ndu-íin ra tañi maa yo íin ñi cuu yo.

²³Yuhvi ta ra ya íin ñi cuu ndi tañi yoho sihin mi íin ñi cuu yo, ta nandu-íin maa ra minoo sa ndisa cuii vatyí tacuan ta cua coto ñiyívi ñuu ñiyívi vatyí moo i tasi sii ta cuñi xoon sii ra ya tañi cuñun sii.

²⁴Ndyoo Zuti, cuñi sa vatyí ñiyívi sa i sohon sii, cua cundyaa ñu íin ñi sihin mi nu cua cundyé, ta tacuan ta cua ndyehe ñu sa vaha xaan sa i sohon sii. Vatyí i cuñi xoon sii, cumañi ca sino ñuu ñiyívi.

²⁵Ndyoo Zuti, ra ndoo xaan, ña nacoto ñiyivi ñuu ñiyivi ya suun, zoco yuhvi site suun, ta sito ra ya vatyi moo i tasi sii.

²⁶Sa i zacote sii ra ya cuhva iyo moo, ta cua zacote cuaha ca sii ra. Tacuan ta cuhva cuñi xoon sii, cua coo si sisi añima ra, ta cua coo tucu yuhvi sisi añima ra.

Cuahan ra Jesús vehe caa

18 Ta sa ndihi cahan ra Jesús tuhun ya, i quita ra sihin ra i casi ra ta cuahan ra inga siyo yuu sa nañi Cedrón ndya minoo nu iyo cuaha xaan yutu ta ita. Ta yucuan i quihvi ra sihin ra i casi ra.

²Ta ra Judas, ra sa xico tuhun sii ra Jesús, sa sito tucu maa ra nu cuahan ra vatyi tuhva xaan ra Jesús sahan yucuan sihin ra i casi ra.

³Tacuan ta sa quihin ra Judas minoo ityi zandaru ta cuaha xaan policia cuenda ra zutu nahnu ta ra fariseo, ta cuahan ra sihin lámpara ta yiti ta sihin ndaha tyiño xaan.

⁴Ta sa sito ra Jesús tandihi tundoho sa cua tahan ra. Ta xihna ca maa ra i quita, ta i nducu tuhun ra sii ra sa vasi cuan: ¿Yoo sii nanducu ndo?

⁵Ta i nacahan ra ta catyi ra: Sii ra Jesús, ra ñuu Nazaret. Tacuan ta i catyi ra Jesús: Zuun yuhvi cui. Catyi ra. Ta ndihi ra Judas sihin ra cuan. Maa ra cuu ra i xico sii ra Jesús.

⁶Ta zuun ñi caa cuhva sa i catyi ra Jesús sihin ra: “Zuun yuhvi cui”, ta i sica sata tandihi ra cuan, ta i nduva tandihi cuii ra nu ñuhu.

⁷Tacuan ta i nducu tuhun ra Jesús sii ra inga saha: ¿Yoo sii nanducu

ndo? Ta i catyi ra cuan: Sii ra Jesús, ra ñuu Nazaret.

⁸Ta i nacahan ra Jesús ta catyi ra: Sa catyi sihin ndo vatyi zuun yuhvi cui. Tatu sii mi nanducu ndo, cuatu ndo nacuhun xihna ra ndihi sihin ya. Catyi ra.

⁹Tacuan cua cuu si, vatyi cua quita si tañi cuhva catyi Tuhun Ndyoo vatyi catyi si: “Ra sa i sohon sii, ñá zacunei numinoo ra.”

¹⁰Tacuan ta ziqui i tava ra Simón Pedro mityi sa ndyizo ra. Ta i cañi ra sii ra cu muzu sii ra cu nuu sii tandihi ra cu zutu, ta i sahndya ra zoho ra siyo cuaha ra. Malco nañi ra cu muzu cuan.

¹¹Tacuan ta i catyi ra Jesús sihin ra Pedro: Natyuhun mityun sisi veno si. ¿Atu ña cuñun sa ndyehi tundoho sa saha Zuti sii?

Cuahan ra Jesús nu ndyaa ra cu nuu sii tandihi ra cu zutu

¹²Tacuan ta ziqui minoo ityi zandaru cuan, sihin ra cu nuu sii ra ta ra cu policia cuenda ra hebreo, i tiin ra sii ra Jesús, ta i sihni ra sii ra.

¹³Ta sa xihna ñi i sindyaca ra sii ra ndya vehe ra Anás vatyi tyizo ra Caifás cuu sii ra. Ta ra Caifás cuu ra cu nuu sii tandihi ra cu zutu cuiya cuan.

¹⁴Ta ra Caifás, zuun ñi ra cuu ra sa catyi sihin ra hebreo quivi cuan vatyi vaha ca naccu minoo ñi ra sa cuenda tandihi, ta ma cuu tandihi ñiyivi.

I catyi ra Pedro vatyi ña sito ra sii ra Jesús

¹⁵Ta i sindyico ra Simón Pedro sii ra Jesús, ta tacuan tucu inga ra. Sito ra mandoñi sahnu Anás sii inga ra cuan, ta yucuan cuenda i

cuu quihvi ra sihin ra Jesús ndya yuvehe ra cu nuu sii tandihi ra cu zutu.

¹⁶Zoco i ndoo ra Pedro sata nuzama. Tacuan ta ziqui i quita inga ra. Sa sito ra cu nuu sii tandihi ra cu zutu sii ra cuan. I cahan ra cuan sihin ñaha zacuenda yuvehe, ta i cuu quihvi ra Pedro.

¹⁷Ta ñaha sa zacuenda yuvehe cuan, i catyi ña sihin ra Pedro: ¿Atu yivi minoo ra ndyico sii ra cuan cuun? Ta i catyi ra Pedro: Yivi ra cui.

¹⁸Ta yucuan yucu muzu ta tandihi ra policia. Sa zatahan ra ñúhu vatyí visi xaan, ta yucuan ndyaa ra yunuhu. Tuhva ra Pedro ta nandyaa ra sihin ra.

**I nducu tuhun xaan ra
Anás sii ra Jesús**

¹⁹Tacuan ta ziqui i nducu tuhun xaan ra mandoñi sahnu, ra Anás, sii ra Jesús yoo ra ndyico sii ra, ta ñaa sa zacuaa ra.

²⁰Ta i nacahan ra Jesús, ta catyi ra sihin ra: I quehin ityi nuu tandihi ñiyivi. I zacuehi sisi vehe ñuhu tahan ñuu ta sisi vehe ñuhu cahnu ihya nu titahan tandihi ñiyivi hebreo. Ta ñahñi maa sa nacatyí xehi.

²¹¿Ñaa cuenda nducu tuhun sii? Nducu tuhun sii ñiyivi i siñi ñaa sa nacatyí sihin ñu. Sito maa ñu ñaa sa nacatyí sihin ñu.

²²Ta sa ndihi cahan ra Jesús tacuan, ta minoo ra cu policia sa ndyaa yatyí ñi i cati ra sii ra Jesús sihin ndaha ra ta catyi ra: Ña tacuan tahan si cohon sihin ra mandoñi sahnu.

²³Ta i nacahan ra Jesús ta catyi ra: Tatu i quehin ndya vaha ñi, catyun ñaa sa ña vaha quehin. Zoco tatu vaha quehin ¿ñaa cuenda catun sii? Catyi ra.

²⁴Tacuan ta i tasi ra Anás sii ra Jesús zoco nuhñi ra ndya nu ndyaa ra Caifás, ra cu nuu sii tandihi ra cu zutu.

**I catyi ra Pedro inga saha
vatyi ña sito ra sii ra Jesús**

²⁵Ta nandyaa ra Simón Pedro yunuhu. Tacuan ta ziqui i catyi ñiyivi sihin ra: ¿Atu yivi minoo ra ndyico sii ra cuan cuun? Ta i catyi ra Pedro: Yivi ra cui. Catyi ra.

²⁶Minoo muzu ra cu zutu ya cahnu cuu ñiyivi sii ra i sahdya ra Pedro zoho, ta i catyi ra cuan sihin ra Pedro: ¿Atu yivun i ndyehi sihin ra cuan yucuan nu iyo cuaha xaan yutu?

²⁷Ta i catyi ra Pedro inga saha vatyí yivi. Ta zuun ñi caa cuhva cuan i sacú saa ndivi tyahnu.

Cuahan ra Jesús nuu ra Pilato

²⁸Tacuan ta i sindyaca ra sii ra Jesús nu ñoho ra vehe ra Caifás ndya vehe tyiño cuenda ra gobernador. Ta nu ñaha ñi cuu si. Ta ñá quihvi ra hebreo sisi vehe tyiño vatyí yivi vehe hebreo cuu si, ta catyi ley hebreo vatyí tatu cua quihvi ra, cua nducuxi caa ra, ta ma cuu ca cuxiñi ra sisi vico zuhun.

²⁹Yucuan cuenda i quita ra Pilato ityi sata nu yucu ra cuan, ta catyi ra: ¿Ñaa cuatyí tyaa ndo sata ra ya? Catyi ra.

³⁰Ta i nacahan ra ta catyi ra: Tatu yivi ra iyo cuatyí cuu ra, ma nacuhva ndi sii ra suun.

³¹Tacuan ta i catyi ra Pilato sihin ra: Quihin maa ndo sii ra ta tyicuhva ndo sii ra cuhva catyi ley maa ndo. Ta i catyi ra hebreo sihin ra: Ña catyi ley ndi sa cahñi ndi numinoo ñiyivi. Catyi ra.

³²Tacuan cua cuu si ta cuhva cua quita si cuhva catyi ra Jesús yozo caa cua cuu ra.

³³Tacuan ta ziqui i nandihvi ra Pilato sisi vehe tyiño, ta i cana ra sii ra Jesús naquisi ra nu ndyaa ra, ta i catyi ra sihin ra: ¿Atu rey cuenda ñiyivi hebreo cuun?

³⁴Ta i nacahan ra Jesús ta catyi ra: ¿Atu cohon cuhva sa sica ñi iñi moo a sa iyo ñiyivi nacatyi suhun?

³⁵Ta i nacahan ra Pilato ta catyi ra: Yivi ra hebreo cui. Zuun ñi ñiyivi ñuu moo sihin ra zutu nahnu i quisi ndyaca suun sii. ¿Ñaa sa zacuun?

³⁶Ta i nacahan ra Jesús ta catyi ra: Nu ndyaca ñehi, yivi ñuu ñiyivi ya cuu si. Vatyi tatu cuñi cundyaca ñehi ihya, cua cahñi tahan ra ndyico sii, ta ma cuhva ra sii, sii ñiyivi hebreo. Zoco nu ndyaca ñehi, yivi ñuu ñiyivi ya cuu si.

³⁷Tacuan ta i catyi ra Pilato sihin ra: Vaziqui minoo rey cuun. Ta i catyi ra Jesús: Zuun cui cuhva catyun. Yucuan cuenda i caqui ta vasi ñuu ñiyivi ya vatyi cua cuu cuhve sa ndaa sa cuenda sa ndisa. Ta tandihñi ñiyivi zavaha sa vaha, tyaa ñu yahvi sa quehin.

³⁸Ta i catyi ra Pilato sihin ra Jesús: ¿Ñaa sa cuu sa ndisa? Ta sa catyi ra tacuan ta i quita tucu ra ndya ityi sata nu yucu ñu hebreo, ta i catyi ra sihin ñu: Ñahñi maa cuatyi ra iyo caña ñi.

³⁹Ta iyo minoo costumbre sii maa ndo sisi vico zuhun vatyi cua zañe sii minoo ra ñoho vehe caa. ¿Atu cuñi ndo vatyi zañe sii ra cu rey cuenda ñiyivi hebreo?

⁴⁰Ta i cana saa ñiyivi ta catyi ñu: Yivi ra ihya zañon. Zañon sii ra Barrabás. Catyi ñu. Ta ra Barrabás cuan, ra zuhu cuu ra cuan.

19 Ta yucuan cuenda i quihin ra Pilato sii ra Jesús, ta i saha ra sa cañi xaan zandaru sii ra.

²Ta i quihin zandaru iñu, ta zavaha ra minoo corona, ta i tyihi ra sii si xiñi ra Jesús. Ta i tyihi ra minoo zahma cañi tyacu zahma tixinda sii ra.

³Ta i catyi zandaru: iNacumi suun yoho rey, ra ndyaca ñaha cahnu sii ñiyivi hebreo! Ta i cati ra sii ra Jesús sihin ndaha ra. Ta i sacu ndyaa ra sii ra.

⁴Tacuan ta ziqui i quita tucu ra Pilato inga saha ityi sata, ta i catyi ra sihin ñiyivi hebreo: Ndyehe ndo, vasi ndyaque sii ra sii ndo vatyi coto ndo vatyi ñahñi maa cuatyi ra iyo sa cuenda mi.

⁵Ta i quita ra Jesús. Ñoho corona iñu xiñi ra ta ñoho ra zahma tyacu tixinda cuan. Ta i catyi ra Pilato sihin ñu: Ica ra ya.

⁶Ta sa ndyehé ra zutu nahnu ta ra ndihñi sihin ra sii ra Jesús, ta i cana saa ra ta catyi ra: Tyoon sii ra nu cruz. Tyoon sii ra nu cruz. Zoco i catyi ra Pilato sihin ra cuan: Quihin maa ndo sii ra ta tyaa ndo sii ra nu cruz tatu cuñi ndo, zoco sa cuenda mi ñahñi maa cuatyi ra iyo caña ñi.

⁷Ta i nacahan ra hebreo ta catyi ra: Iyo minoo ley sii maa ndi, ta catyi si vatyi tahan si sa cuu ra

vatyí catyí ra vatyí Zehe ra Ndyoo cuu sii ra.

⁸Ta sa siñi ra Pilato cuhva catyí ñu, ta i yuhu ca ra.

⁹Ta i nandihvi ra sisi vehe tyiño, ta i catyí ra sihin ra Jesús: ¿Ta ndyamaa i quisun? Zoco ñá cahan ra Jesús sa cahan ra.

¹⁰Tacuan ta ziquí i catyí ra Pilato sihin ra: ¿Ñacu ña cohon sa quehin? ¿Atu ña siton vatyí iyo cuhva sii, ta cuu catyí vatyí cahñi ñiyivi suun nu cruz, ta cuu zañe suun?

¹¹Ta i nacahan ra Jesús, ta catyí ra: Ñahñi maa sa cuu zavohon sihin tatu sa yivi ra Ndyoo i saha cuhva suun. Yucuan cuenda cahnu ca cuatyí ra saha cuenda sii suun.

¹²Ta sa ndihi cahan ra Jesús tacuan, ta i nducu ra Pilato cuhva zaña ra sii ra. Zoco i quisaha cana saa ra hebreo ta catyí ra: Tatu zañon sii ra ña, yivi amigo ra César cuun. Yoo ra catyí vatyí minoo rey cuu ra, cuñi ra quindyaa ra tyiño ra César.

¹³Ta sa siñi ra Pilato cuhva cuan, ta ziquí i sindyaca ra sii ra Jesús ityí sata, ta i sicundyaa ra tyayu ra nu tuhva ra zandaa tyiño, nu nañi si Gabata sihin zahan hebreo. Ta cuñi si catyí si Nu Ndava.

¹⁴Ta quívi sa zanduvaha ñiyivi cuenda vico zuhun i cuu si tañi maa ora, ta i catyí ra Pilato sihin ñiyivi hebreo: Ica rey ndo ya.

¹⁵Tacuan ta ziquí i cana saa ñiyivi inga saha, ta catyí ñu: ¡Quihin ndo sii ra! ¡Quihin ndo sii ra! Tyaa ndo sii ra nu cruz. Ta i catyí ra Pilato sihin ñu: ¿Atu cuñi ndo sa cahñi sii rey ndo? Ta i nacahan ra zutu nahnu, ta catyí ra: Yoñi ca inga rey ndi. Maa ñi ra César.

¹⁶Ta yucuan cuenda i saha cuenda ra Pilato sii ra vatyí cahñi ra sii ra nu cruz. Ta i quihin zandaru sii ra Jesús, ta cuahan ra sihin ra.

Nu i tyaa ra sii ra Jesús nu cruz

¹⁷Ta ndyizo ra Jesús cruz ra cuahan ra sihin ra ndya nu nañi si Yiquí Xiñi Ndiyí. Ta sihin zahan hebreo nañi si Gólgota.

¹⁸Ta yucuan i tyaa ra sii ra nuu cruz sihin clavo. Ta inga uu tahan ra, minoo ra siyo cuaha ta minoo ra siyo zatyí ra Jesús, ta ra Jesús mahñu.

¹⁹Ta i tyaa ra Pilato minoo zivi, ta i catyí ra vatyí cundyaa si xiñi cruz cuan ta catyí si: “Ra Jesús ñuu Nazaret, rey cuenda ñiyivi hebreo cuu ra.”

²⁰Cuaha xaan ra hebreo i cahvi tuhun sa ndyaa xiñi cruz cuan. Vatyí nu sihi ra Jesús, yatyí ndyaa si yuhu ñuu. Ta tuhun sa ndyaa xiñi cruz cuan, ndyaa si sihin zahan hebreo, zahan griego ta zahan latín.

²¹Ta ra zutu nahnu i catyí ra sihin ra Pilato: Ma tyoon: “Rey cuenda ñiyivi hebreo.” Tyoon vatyí maa ra catyí vatyí rey cuenda ñiyivi hebreo cuu ra.

²²Zoco i nacahan ra Pilato: Cuhva i tyei, sa ndyaa si.

²³Ta sa yaha i tyaa zandaru sii ra Jesús nu cruz, ta i quihin ra zahma ra. Sa cumi tahan ra i quihin ra minoo minoo si. Ta minoo zahma cañi sa ndisi ra, i cacu si ñin ñi; ñahñi nu i ndicui ñu sii si.

²⁴Yucuan cuenda i catyí zandaru sihin tahan ra: Ma ndata yo sii si. Nacuziquí yo, ta cua ndyehe yo yoo ra cua zahacanaa. Catyí ra. Ta

cuhva ya i quita si cuhva catyi Tutu ra Ndyoo:

I zasa ra zahme sii tahan ra,
Ta i siziqui ra yoo ra cua ñihi
zahma cañi vii.

Ta tacuan i zavaha zandaru.

²⁵Ta nandyaa zihhi ra Jesús yatyí ñi saha cruz nu ndyaa ra Jesús nu cruz. Ta nandyaa tucu cuhu ña ta ña María ñazihhi ra Cleofas ta ña María Magdalena tucu.

²⁶Ta sa ndyehe ra Jesús vatyí yatyí nandyaa zihhi ra ta minoo ra i casi ra, ra sa cuñi xaan ra, ta i catyi ra Jesús sihin zihhi ra: Ndyá vityí, ra ihya cua cuu zehun. Catyi ra.

²⁷Ta ziqui i catyi ra sihin ra i casi ra: Ta maa ña cua cuu zihun. Ta ndya cuhva cuan i quihin ra sii ña, ta cuahan ña vehe ra.

²⁸Ta sa yaha cuan, ta ziqui i sito ra Jesús vatyí sa i zavaha ra tandihhi ta sa i cuu tandihhi cuhva catyi si nuu Tutu ra Ndyoo. Ta ziqui i catyi ra: Ityi xein.

²⁹Ta yatyí ñi yucuan nandyaa minoo quizi situ cuui ndutya iya. Ta i zatyí zandaru minoo sa ñahma, ta i tyaa ra sii si minoo nuu zoco yutu sa nañi hisopo, ta i tyiña ra sii si yuhu ra Jesús.

³⁰Ta sa i sihi ra Jesús ndutya iya cuan, ta ziqui i catyi ra: Sa ndihhi tyiño. Ta i nacañi noo ra xiñi ra, ta i nacuhva cuenda ra aña ra.

**I tusi minoo zandaru minoo
caa xaan xiin ra Jesús**

³¹Cumañi minoo ñi ca quivi ta cua cuu si quivi cahnu sisi vico zuhun cuenda ñiyivi hebreo. Ñá cuñi ra hebreo sa ndoo coño ñuhu cuan nu cruz quivi quitatu ñiyivi

vatyí cahnu xaan quivi zacuu ñiyivi quivi cuan sa cuenda vico zuhun. Yucuan cuenda i sica ra tumañi iñi sii ra Pilato vatyí cuhva ra sa cahnu zandaru yiqui ndoo ra sa ndyaa nu cruz. (Ta sa ndihhi sahnu ra yiqui ndoo ra cuan ta yatyí ca cua cuu ra.) Ta cua cuu tyaa siyo ra sii ra.

³²Tacuan ta i saa zandaru, ta i sahnu ra yiqui ndoo minoo ra ta inga tucu ra sa ndyaa inga nu cruz.

³³Zoco sa saa ra nu ndyaa ra Jesús ta i ndyehe ra vatyí sa sihi ra, ta ñá sahnu ca ra saha ra.

³⁴Zoco i tusi minoo zandaru minoo caa xaan xiin ra Jesús, ta i quita ñiñi ta ndutya.

³⁵Ta minoo ra i ndyehe, saha ra sa ndaa, ta sa ndisa cahan ra. Sito maa ra vatyí sa ndisa cuu sa cahan ra. Ta nacatyí ra sii si vatyí cua cuu sino tucu iñi maa ndo.

³⁶Ta cuhva cuan i cuu tandihhi si vatyí cua quita si tañi catyi Tutu ra Ndyoo nu catyi si: “Ma cahnu ñiyivi numinoo yiqui ra.”

³⁷Ta inga tucu nu tutu ra Ndyoo catyi si: “Cua ndyehe ñiyivi sii ra cuhva cua quihvi minoo caa xaan xiin ra.”

I tyihhi ra sii ra Jesús sisi ñaña

³⁸Ta sa yaha cuan, ta ziqui i quisi ra José ra ñuu Arimatea. Sino iñi ra sii ra Jesús, zoco xehe ñi vatyí yuhu ra sii ra hebreo. Ta i sica ra tumañi iñi sii ra Pilato vatyí cuu quihin ra coño ñuhu ra Jesús. Ta i saha ra Pilato. Ta ziqui i sahan ra, ta i quihin ra coño ñuhu ra Jesús.

³⁹Ta i quisi tucu ra Nicodemo, ra sa sahan sa xihna ñi nu ndyaa ra Jesús minoo sa cuaa. Ndaha ra

cuaha xaan azetye vixi. Nazaca si sihin mirra ta áloe. Tañi minoo oco usi kilo si.

⁴⁰Tacuan ta ziqui i quihin ra José ta ra Nicodemo coño ñuhu ra Jesús, ta i cava noo ra zahma sa cahyu ra azetye vixi cuan cuhva iyo costumbre ñiyivi hebreo tatu cua tyihi ñu sii minoo ñiyivi sisi ñaña.

⁴¹Ta vatyi nu i sihi ra Jesús nu cruz sicoo cuaha xaan yutu tyaqui, ta yucuan sicoo minoo ñaña sa ta yoñi ca cutyiño.

⁴²Ta yucuan i tyihi ra sii ra Jesús vatyi vatyi ñi ndyaa si. Ta sa cua cuu si quivi quitatu ñiyivi hebreo.

I nandoto ra Jesús

20 Ta quivi tumingu ñaa ca i saa ña María Magdalena ndya ñaña, ta i ndyehe ña vatyi sa siñi siyo yuu sa sindazi yuñaña cuan.

²Tacuan ta ziqui i sino xaan ña ndya nu ndyaa ra Simón Pedro ta inga ra sa cuñi xaan ra Jesús, ta i catyi ña sihin ra: Sa sitava ñiyivi coño ñuhu ra Jesús sisi ñaña cuan, ta ña sito yo ndyamaa i natyihii ñu sii si.

³Yucuan cuenda i quita ra Pedro ta inga ra ta cuahan ra ndya ñaña.

⁴Nduu tahan ra i cacono ra, zoco ñihi xaan ca sino inga ra ta ziqui ra Pedro, ta xihna ca ra cuan i saa ñaña.

⁵Ta i ndyehe noo ra sisi ñaña, ta i ndyehe ra zahma sa i cava noo sii ra Jesús; catuu si nu ñuhu, zoco ñá quihvi ra.

⁶Ta ziqui i saa ra Simón Pedro, ta i quihvi ra sisi ñaña, ta i ndyehe ra zahma sa i cava noo sii ra Jesús; catuu si.

⁷Ta zahma luhlu sa ñoho xiñi ra Jesús, ña iin ñi catuu si sihin inga zahma cuan. Nacuiñi tahnu vaha si, ta catuu zihin si.

⁸Tacuan ta ziqui i quihvi tucu inga ra sa saa sa xihna ñi. Ta i ndyehe ra. Ta i sino iñi ra.

⁹Zoco tañaha ca coto ra vatyi catyi Tuhun Ndyoo vatyi ndyaa si sa cua nandoto tucu ra Jesús sa sa i sihi ra.

¹⁰Tacuan ta i quita ra i casi ra Jesús, ta cua nuhu ra ndya vehe ra.

I quituu ra Jesús nuu ña María Magdalena

¹¹Ta i nasaa ña María ndya ñaña, ta sa nandyaa ña yuhu ñaña, ta cuihya xaan i cuñi ña, ta i sacu xaan ña. Ta cuhva sa sacu ña, ta i nandyehhe noo ña sisi ñaña.

¹²Ta i ndyehe ña uu tahan ángel sa ñoho zahma cuisii. Minoo ra ndyaa ityi nu sicaa xiñi ra Jesús, ta inga ra ityi nu i sicaa saha ra nu sicaa coño ñuhu ra.

¹³Ta i catyi ángel sihin ña: Maha, ¿ñacu sacu xoon? Ta i catyi ña: Vatyi i quihin ñiyivi coño ñuhu ra Jesús, ta ña site ndyamaa i tyihii ñu sii si.

¹⁴Ta sa ndihii cahan ña tacuan, ta i nasico cava ña, ta ndyehe ña sii ra Jesús nandyaa ra. Zoco ñá nacoto ña tatu zuun ra cuu ra.

¹⁵Ta i catyi ra Jesús sihin ña: Maha, ¿ñacu sacu xoon? ¿Yoo sii nanducun? Ta ña María sica iñi ña vatyi ra zacuenda yucuan cuu ra cahan, ta i catyi ña sihin ra: Tata, tatu yoho i quihin coño ñuhu ra ya, nacyun sihin ndyamaa i tyuhun sii si vatyi cua naquihin sii si.

¹⁶Tacuan ta ziqui i catyi ra Jesús sihin ña: María. Ta i nandyehe vaha ña sii ra, ta i catyi ña sihin ra: ¡Rabboni! Zahan hebreo cuu si cuan, ta cuñi si catyi si Maestro.

¹⁷Ta i catyi ra Jesús sihin ña: Ma tiun sii vatyi tañaha ca nandaa xique ndya nu ndyaa Zuti. Zoco cuahan nu ndyaa tandihi ra sa cuñi xein, ta nacatyun sihin ra vatyi cuehin nu ndyaa Zuti, ta Zutu tucu maa ndo cuu sii ra. Ta nu ndyaa Ndyoo mi, ta Ndyoo tucu maa ndo.

¹⁸Ta ziqui cuahan ña María Magdalena nu yucu ra i casi ra Jesús, ta i nacatyi ña sihin ra vatyi sa i ndyehe ña sii ra Jesús ta i cahan ra tuhun cuan sihin ña.

Cahan ra Jesús sihin ra i casi ra

¹⁹Tacuan ta ziqui zuun ñi quivi tumingu cuan sa sahiñi i siyucu ra i casi ra Jesús iin ñi, ta ndazi cutu yuvehe vatyi yuhu ra sii ra hebreo, ta i quisi ra Jesús ta i sicuiñi ndyaa ra mahñu, ta catyi ra sihin ra: Nacoo sa vaha sii ndo.

²⁰Ta sa yaha catyi ra tacuan, ta ziqui i zañaha ra ndaha ra ta xiin ra. Ta zii xaan i cuñi ra i casi ra sa i ndyehe ra sii ra Jesús.

²¹Tacuan ta i catyi ra Jesús sihin ra inga saha: Nacoo sa vaha sii ndo. Tañi sa tasi Ndyoo Zuti sii, sihin tyiño ra, zuun ñi cuhva cuan cua tasi sii maa ndo.

²²Ta sa ndihi catyi ra tacuan, ta i tivi ra taty ra sii ra, ta catyi ra sihin ra: Naquihin ndo Taty i.

²³Yoo sii cuatyi cua zandasi ndo, cua ndasi si sa ndisa. Ta yoo sii cuatyi ma zandasi ndo, ma ndasi cuatyi ñu. Catyi ra.

Ñihi xaan iñi ra Tomás

²⁴Ta ra Tomás minoo sa usi uu tahan ra i casi ra Jesús cuu ra. Nañi tucu ra Dídimo. Ta yoñi ra ndyaa cuhva sa quisi ra Jesús.

²⁵Ta i nacatyi inga ra i casi ra Jesús sihin ra: I ndyehe ndi sii ra Jesús. Zoco i catyi ra Tomás sihin ra: Tatu ma ndyehi nu cahvi ndaha ra nu i quihvi clavo ta tyihi nu ndehi yucuan, ta tatu ma ndyehi xiin ra nu quihvi caa xaan ta tyihi ndehi yucuan, ma sino iñi. Catyi ra.

²⁶Ta yaha uña quivi, ta ziqui ñoho ndazi tucu ra i casi ra Jesús, ta ndyaa ra Tomás sihin ra. Ta ndazi cutu yuvehe, zoco i quihvi ra Jesús ta i sicuiñi ndyaa ra mahñu, ta i catyi ra: Nacoo sa vaha xaan sii ndo.

²⁷Ta ziqui i catyi ra sihin ra Tomás: Zatuhvon ndohon ta tyuhun nu ndohon ndehi, ta zatuhvon ndohon ta tyuhun sisi xiin. Ta ma cuu con minoo ra ña sino iñi, zoco sino iñun. Catyi ra.

²⁸Tacuan ta i catyi ra Tomás sihin ra: Moo cuu ra ndyaca ñaha sii. Ta moo cuu Ndyoo sii.

²⁹Ta i catyi ra Jesús sihin ra: Tomás, sa i ndyehun sii, ta yucuan cuenda sino iñun. Vaha xaan ca ñiyivi ma ndyehe sii, ta sino iñi ñu.

Iyo cuenda sa vatyi iyo libro ya

³⁰Ta iyo cuaha xaan inga sa ndyityi i zavaha ra Jesús nuu ra i casi ra, ta ña ndyaa si nuu libro ya.

³¹Zoco i tyei zuhva si ihya vatyi cua cuu sino iñi ndo vatyi ra Jesús cuu ra Cristo, zehe ra Ndyoo. Ta sihin sa sino iñi ndo, cua ñihi ndo

sa cacu añima ndo tandihí cuii tyiemvu sa cuenda maa ra.

**Cahan ra Jesús sihin usa
tahan ra i casi ra**

21 Ta sa yaha tandihí cuhva cuan, ta ziqui ihya cuu cuhva i cahan tucu ra Jesús inga saha sihin ra i casi ra yumiñi sa nañi Tiberias.

² ñin ñi tayucu ra Simón Pedro sihin ra Tomás, ra nañi Dídimó, ta ra Natanael, ra ñuu Caná nu cu si Galilea, ta zehe ra Zebedeo ta inga uu tahan ra i casi ra Jesús.

³ Ta i catyi ra Simón Pedro sihin inga ra: Cuehin cua tiin tyiyaca. Ta i catyi inga ra sihin ra: Cua cuhun tucu maa ndi suhun. Ta cuahan ra, ta i quihvi ra minoo barco. Zoco ñahñi maa tyiyaca i ñihi ra sa cuaa cuan.

⁴ Ta cuhva sa vasi cundisi, sicuñi ndyaa ra Jesús nu ñiyiti, zoco ñá nacoto ra vatyí ra Jesús cuu ra.

⁵ Ta ziqui i catyi ra Jesús sihin ra: Zehe luhli, ¿atu ñahñi tyiyaca i ñihi ndo? Ta i catyi ra: Yoñi ti.

⁶ Ta i catyi ra Jesús sihin ra: Cañi ndo taraya ndo siyo cuaha, ta cua ñihi ndo. Ta i cañi ra sii si, ta ziqui ñá cuu ca tava ra taraya ra vatyí cuaha xaan tyiyaca ñoho.

⁷ Ta ra sa cuñi xaan ra Jesús i catyi ra sihin ra Pedro: Ra Jesús cuu ra. Ta sa siñi ra Simón Pedro vatyí ra Jesús cuu ra, ta i nazucu ra zahma ra sii ra vatyí sa i tava ra sii si sa cua tiin ra tyiyaca. Ta i quihvi ra nu miñi.

⁸ Ta i quisi inga ra sihin barco luhlu. Xita ra taraya sa ñoho tyiyaca vatyí ña sica ndyaa yuhu miñi tañi minoo ziendu metro ñi.

⁹ Ta sa i quita tandihí ra nu ñuhu, i ndyehe ra tuñuhu, ta yucuan catuu minoo tyiyaca ta pan tucu.

¹⁰ Ta i catyi ra Jesús: Quisi ndyaca ndo zuhva ca tyiyaca sa naca tiin ndo.

¹¹ Ta i sahan ra Simón Pedro ndya nu ndyaa barco, ta xita ra taraya tyiyaca nahnu cuan ndya nu ñiyiti. Ziendu uu xico usi uñi tahan ti ñoho, ta ñá tahndya taraya vazú cuaha xaan ti.

¹² Ta i catyi ra Jesús sihin ra: Ñaha ndo vatyí curumuza ndo. Ta yoñi ra cuñi nducu tuhun sii ra Jesús yoo ra cuu ra vatyí sa sito ra vatyí ra Jesús cuu ra.

¹³ Ta i sahan ra Jesús, ta i quihin ra pan, ta i saha ra sii si sii ra. Ta tacuan tucu tyiyaca.

¹⁴ Ta ihya cuu sa cu uñi tahan saha i cahan ra Jesús sihin ra i casi ra ta sa yaha sa nandoto ra sisi sa i sihi ra.

Zacuendon mvee ticatyí zone

¹⁵ Ta sa yaha i curumuza ra, ta i catyi ra Jesús sihin ra Simón Pedro: Simón, zehe ra Jonás, ¿atu cuñi xaan con sii ta ziqui ca inga ra ya? Ta i catyi ra Pedro sihin ra: Avi, tata, sa siton vatyí cuñi suun. Ta i catyi ra Jesús: Cuhvon sa casi mvee ticatyí lee zone.

¹⁶ Ta ziqui i catyi ra Jesús sihin ra inga saha: Simón, zehe ra Jonás, ¿atu cuñi xoon sii? Ta i catyi ra Pedro: Avi, tata, sa siton vatyí cuñi suun. Ta i catyi ra Jesús sihin ra: Zacuenda vohon sii mvee ticatyí zone.

¹⁷ Ta ziqui i catyi ra Jesús sihin ra sa cu uñi saha: Simón, zehe ra

Jonás, ¿atu cuñun sii? Ta cuihya xaan i cuñi ra Pedro vatyi sa i nducu tuhun ra Jesús sii ra sa cu uñi tahan saha: ¿Atu cuñun sii? Ta i catyi ra sihin ra: Tata, sa sito moo tandihi cuii. Siton vatyi cuñi suun. Ta i catyi ra Jesús sihin ra: Cuhvon sa casi mvee ticatyi zone.

¹⁸Sa ndisa ta sa ndisa catyi suhun vatyi quivi i culuhlun ta i cuu ndihvun zahmon maa tuhun ñun, ta sohon ndyamaa cuñun cuhun. Zoco quivi cua cusahnun cua zandundoon ndohon, ta inga ra cua natyihi ra zahmon suun. Ta cua cundyaca ra suun nu ña cuñun cuhun. Tacuan i catyi ra Jesús sihin ra Pedro.

¹⁹Ta sa i catyi ra Jesús tuhun cuan, i saha ra cuhva cutuñi iñi ra yozo caa cua tahan si sii ra Pedro sa cua cuu ra, ta cua zacahnu ra sii ra Ndyoo cuhva cuan. Ta sa ndihi cahan ra Jesús tacuan, ta i catyi ra sihin ra: Cundyicon sii.

**Minoo ra i casi ra Jesús,
ra sa cuñi xaan ra**

²⁰Tacuan ta ziqui i nandyeha sata ra Pedro, ta i ndyeha ra vatyi

ndyico inga ra i casi ra Jesús, ra sa cuñi xaan ra Jesús. Zuun ra cuu ra sa nañaa sii ra Jesús minoo sa cuaa nu cua cuxiñi ra nu i nducu tuhun ra sii ra Jesús: ¿Yoo ra cua xico tuhun suun?

²¹Ta sa ndyeha ra Pedro sii ra cuan, ta i nducu tuhun ra sii ra Jesús: Tata, ¿ta ñaa sa cua cuu sii ra ya?

²²Ta i catyi ra Jesús sihin ra: Tatu cuñi vatyi ndoo ra ñuu ñiyivi ndya quivi cua quisi ¿ta ñaa sa cuenda oo? Yoho cundyicon sii. Catyi ra.

²³Yucuan cuenda i quita tuhun ya, ta i sica iñi tandihi ñiyivi sino iñi vatyi i catyi ra Jesús vatyi ma cuu ra cuan, zoco ñá catyi ra Jesús sa ma cuu ra. I catyi ra: “Tatu cuñi vatyi ndoo ra ndya quivi cua quisi ¿ta ñaa sa cuenda oo?”

²⁴Ta zuun ñi maa ra cuu ra saha sa ndaa sa cuenda tuhun ya. Ta sito ndi vatyi ndisa cuii sa ndaa sa saha ra.

²⁵Ta iyo cuaha xaan ca sa i zavaha ra Jesús. Ta sica iñi vatyi tatu cua tyaa ñiyivi sii si minoo minoo si, ma cutahan tandihi libro nu sisi ñuu ñiyivi. Ndihi si vityi.

Hechos

I catyi ra Jesús vatyí cua tasi ra Tatyí Ii ra Ndyoo

1 Ta quívi cuan i tyei minoo carta suun Teófilo. Ta yucuan carta saha cuenda tandíhi sa i zavaha ra Jesús ta tandíhi sa zacuaha ra ndya casaha zatyíño ra cuhva

²ndya quívi i ndaa xica ñi ra ta cuahan ra gloria. Zoco cuee ca sa cuhun ra gloria ta sihin cuhva iyo sii Tatyí Ii ra Ndyoo i tahvi ra Jesús tyíño nuu sa usi iin tahan ca ra apóstol vatyí nacatyí ra tuhun ra Jesús.

³Ta ziquí i sihi ra Jesús ta sa yaha i sihi ra ta zuun ñi maa ra Jesús i quituu nuu ra apóstol. Uu xico quívi i quituu ra tacuan, ta cuhva cuan i sito ñiyívi vatyí ndisa cuii i nandoto tucu ra. Ta i zacuaha ra sii ra yozo caa ndyaca ñaha ra Ndyoo.

⁴Ta sa ndyaa ra Jesús sihin ra i catyi ra sihin ra vatyí ma quita ra ñuu Jerusalén. Cua cuatu ra sii sa i cahan ra Ndyoo Zutu yo tuhun vatyí catyi ra Jesús sihin ra:

⁵Sa catyi sihin ndo vatyí ndisa cuii i zacoo ndutyá ra Juan sihin ndutyá, zoco ña cuaha ca quívi ta cua coo ndutyá ndo sihin Tatyí Ndyoo.

Cuahan ra Jesús ityi ziquí

⁶Tacuan ta quívi i titahan tucu ra Jesús sihin ra apóstol i ndaca tuhun ra cuan sii ra Jesús ta catyi ra: Tata, ¿atu sa cua cuhva tucun sa cundyaca ñaha ñiyívi hebreo tata maa ndi?

⁷Ta i catyi ra Jesús sihin ra: Ma coto maa ndo ñaa quívi a ñaa yoo cua cundyaca ñaha tucu ñiyívi hebreo. Maa ñi maa ra Ndyoo Zutu yo tahan si coto cuhva cuan.

⁸Zoco cua ñihi ndo tundyee iñi sii ra Ndyoo vatyí cua noo xica Tatyí Ii sii ndo, ta cua cahan ndo sa cuenda mi ñuu Jerusalén, nacahnu Judea ta nacahnu Samaria ta nacahnu ñuu ñiyívi.

⁹Ta sa ndíhi cahan ra Jesús tacuan ta zuun ñi cuhva cuan i ndyehe ra apóstol vatyí i ndaa xica ñi ra Jesús ityi andívi, ta i tyazi minoo vico nu cuahan ra. Ta ñá ndyehe ca ra apóstol cuan sii ra.

¹⁰Ta zuun ñi cuhva sa ndyehe ra sa i ndaa ra ityi andívi ta nu yucu ra i quituu uu tahan ra yoco ñoho ra zahma cuisí.

¹¹Ta i catyi ra yoco cuan sihin ra: Ndoho ra ñuu Galilea, ¿ñacu ndyehe xaan ndo ityi ziquí? Cuahan

ra Jesús gloria, ta zuun ñi cuhva cuahan ra cua quisi tucu ra.

**Naquihin ra Matías tyiño
i sindyizo ra Judas**

¹²Tacuan ta ziqui i quita ra apóstol yucu Olivos cuan. Cuahan ra ñuu Jerusalén. Yaty ñi ndyaa yucu cuan sihin ñuu Jerusalén, tañi zava ora.

¹³Ta sa saa ra yucuan, i quihvi ra minoo vehe toto ndya ziqui vaty yucuan ndyaa ra. Ra Pedro ta ra Juan, sihin ra Jacobo ta ra Andrés ta ra Felipe. Ra Tomás ta ra Bartolomé ta ra Mateo sihin ra Jacobo, zehe ra Alfeo. Ta ra Simón Zelote ta ra Judas yañi ra Jacobo.

¹⁴Tandíhi quivi i sica tahvi ra sii Ndyoo yucuan iin ñi sihin ña María zihí ra Jesús sihin inga ñu zihí ta sihin yañi ra.

¹⁵Ta minoo quivi i titahan cuaha xaan ñiyivi tañi zientu oco ñu, ta i nduvita ra Pedro (mahñu ñiyivi cuan) ta i catyi ra:

¹⁶Ndoho yañi xaa, i cuñi si sa natahan si cuhva sa i catyi Tuhun Ndyoo nu i cahan ra David i zacuu Taty Ii ta saha cuenda ra sa cuenda ra Judas, ra i zañaha sii ra Jesús sii ra cua tiin sii ra.

¹⁷Ta ra tahan yo i cuu sii ra Judas, ta zuun ñi tyiño zavaha yo i zavaha tucu ra.

¹⁸I zata ra Judas cuan minoo ñuhu sihin xuhun i ñihi ra sihin cuaty ra. Ta zuun ñi maa ra i cuñi cahñi sii ra. I tyihi ra minoo yoho zucu ra, zoco i canacava ra sihin nuu ra ta i ndata sisi ra ta i quita tandíhi siti ra. Ta i sihi ra.

¹⁹Sito tandíhi ñiyivi ñuu Jerusalén cuhva i tahan ra Judas. Yucuan cuenda i zacunañi ñu ñuhu cuan Acéldama sihin tuhun maa ñu. Cuñi si catyi si: Ñuhu nu i sati niñi ra.

²⁰Sisi libro Salmos catyi ra Ndyoo sa cuenda ra Judas:

Cua ndoo ihno vehe ra.

Yoñi ñiyivi cua cundyaa yucuan.

Ta tyiño i sindyizo maa ra cua naquihin inga ra.

Caty si.

²¹⁻²²Ta ziqui i catyi tucu ra Pedro:

Yucuan cuenda cua naquihin inga ra tyiño i sindyizo ra Judas ta cua nacaty tucu ra sihin ñiyivi vaty ndisa sa i nandoto tucu ra Jesús. Cuñi si sii minoo ndoho ra i casaha sica sihin ra Jesús quivi i zacoo ndutya ra Juan sii ra ta cutahan ra sihin ra ndya quivi i ndaa xica ñi ra Jesús ityi andivi. ¿Yoo ndoho cuu ndo? Catyi ra Pedro.

²³Tacuan ta i ñihi ra uu tahan ra. Minoo ra nañi ra José ta nañi tucu ra Barsabás. Justo xiñi zivi ra. Ta inga ra nañi ra Matías.

²⁴Tacuan ta i sica tahvi tandíhi ñu sii ra Ndyoo ta i catyi ñu: Zutu mañi yuu, siton añaima tandíhi ñiyivi. Zañohon sii ndi yoo ra cuñi moo

²⁵sa naquihin ra tyiño i sindyizo ra Judas vaty i ndoyo ñuhu ra ta cuahan ra nu tahan si sii maa ra sa cuhun ra, nu xaan. Catyi ñiyivi.

²⁶Ta i siziqui ra zuhva cua ndyehe ra yoo ra cua zahacanaa, ta i tahan si sii ra Matías. Tacuan ta i nduu tucu ra cuan minoo apóstol sihin inga sa usi iin tahan ra.

I quisi Tatyí Ii ra Ndyoo

2 I saa quívi sa zacahnu ñiyivi hebreo minoo vico sa ñañi Pentecostés, ta i titahan tandíhi ñiyivi ndyico sii ra Jesús.

²Yatyí xaan i quisaha quisi minoo nduzu ndya yutyí andívi. Tañi minoo tatyí cahnu, tacuan i cuu nduzu cuan, ta i situ cuii nduzu vehe nu yucu ñu.

³Ta i ndyehe ñu minoo tañi caa yaa ñuhu. I quití cuatyí si ta i sicozo si xiñi ñin ñin ñu.

⁴I situ Tatyí Ii ra Ndyoo sii tandíhi ñu, ta i quisaha cahan ñu tuhun sa ña tuhva ñu cahan. I cahan ñu sihin cuhva saha Tatyí Ii sii ñu.

⁵Ta quívi cuan i siyucu cuaha xaan ñiyivi hebreo ñuu Jerusalén. Ziin ziin ñuu i quisi ra ta saa ra ñuu Jerusalén. Ndyico vaha ra sii costumbre maa ra.

⁶Ta i siñi tucu maa ra cuan nduzu sa quita andívi. Yucuan cuenda i tuhva tandíhi ra. Ñá cutuñi ñi ra ñaa cuenda siñi ra sa cahan ñiyivi. Vatyí tandíhi cuhva cahan ñu, siñi ra hebreo cuan vatyí cahan ñu cuhva cahan ñiyivi ziin ziin ñuu, nu i quita ra hebreo.

⁷Iyo xaan i cuñi ra hebreo cuan, ta i quisaha catyí ra sihin tahan ra: Tandíhi ñiyivi ya, ñiyivi Galilea cuu ñu, zoco cahan ñu cuhva cahan maa yo.

⁸Siñi yo sa cahan ñu. Cahan ñu cuhva cahan ñiyivi ñuu nu quita maa yo, ta ziin ziin ñuu yo.

⁹Ñiyivi ñuu Partia, Media, ta Elam cuu yo sihin ñiyivi ñuu

Mesopotamia, Judea, Capadocia, Ponto ta Asia.

¹⁰Iyo yo cuu yo ra ñuu Frigia, Panfilia, Egipto ta Libia yatyí ñi Cirene, ta iyo yo cuu yo ra ñuu Roma

¹¹tata hebreo, ta inga yo ra ñuu Roma, zacuaha yo costumbre ñiyivi hebreo. Iyo yo quita ñuu Creta ta ñuu Arabia ta siñi yo sa cahan ñu tandíhi cuhva cahnu xaan zavaha ra Ndyoo. Catyí ra cuan.

¹²Ta iyo xaan i cuñi ra ta ñá sito ra ñaa sa cuu. Ta i natuhun tahan ra ta catyí ra: ¿Ñaa sa cuu? Catyí ra.

¹³Zoco inga ra i sacu ndyaa ta catyí ra: Sihi xaan ñu ya ndixi (ta siñi ñu).

Cuhva i cahan ra Pedro sihin ñiyivi

¹⁴Tacuan ta i nacuiñi ndyaa ra Pedro sihin sa usi ñin tahan ca ra apóstol ta saa xaan i cahan ra Pedro sihin ñiyivi cuan ta catyí ra: Ndoho sa ndyaa ihya nu cu si Judea ta tandíhi inga ndo sa vasi ñuu Jerusalén ya, tyizoho vaha ndo ta cuiñi ndo sa quehin.

¹⁵Ña siñi ndi tañi sica ñi maa ndo vatyí nacao cuu si caa ñin sa ñaha ñi.

¹⁶Sicoo minoo ra sinañi Joel ta tyiemvu. I cahan ra sa cuenda ra Ndyoo ta i catyí ra vatyí cua tahan si cuhva sa ndyehe ndo vityí vatyí i catyí ra:

¹⁷Nu cua ndíhi tyiemvu cua tasi Tatyí Ii, catyí ra Ndyoo, ta cua noo ra ziqui tandíhi ñiyivi.

Zehe ndo cua cahan ñu tuhun. Cua ndyehe ra yoco sa cua

zañehi sii ra. Ta cua cahan ñimahna xiñi ra sahnu.

¹⁸ Ndisa, vatyí cua noo Tatyí Ii sii tandíhi ñiyívi ndyico sii mi sa ndisa, ta cua cahan ñu cuhva cua quehin sihin ñu.

¹⁹ Ta cua zavehi sa ndyityi ityi andívi ta nu ñuhu ñuu ñiyívi. Niñi ta ñuhu ta ñuhma.

²⁰ Cua nduñaa ñicandyi ta cua nducuaaha yoo tañi niñi. Tacuan cua cuu si ta cua coo minoo quívi cahnu xaan, quívi cua tasi tuñi sii ñiyívi.

²¹ Ta tandíhi ra cua cahan ndahvi sihin mi, cua cacu ra.

Tacuan i catyi ra Ndyoo, i catyi ra Joel.

²² Ta sa yaha nacatyí ra Pedro cuhva cuan ta i catyi tucu ra: Ndoho, ñiyívi hebreo tyizoho ndo tuhun ya: Ra Jesús ñuu Nazaret i sindyizo ra tyiño saha ra Ndyoo sii ra. Ta tañi sa sito ndo i saha ra Ndyoo sa zavaha ra cuaha xaan sa ndyityi ta cuaha xaan zeña nuu ndo.

²³ Ta i sito ra Ndyoo vatyí cua cuhva ra sa tyaa ñiyívi cuatyí sata ra Jesús. Ta maa ndo i saha ndo sa cahñi ñiyívi ña sito sii ra Ndyoo sii ra nu cruz.

²⁴ Zoco i zanandoto ra Ndyoo sii ra Jesús, ta i tava ra sii ra nu iyo ñiyívi i sihi vatyí ma cuu ndoo ra yucuan.

²⁵ I cahan ra David ta tyiemvu sa cahan ra Jesús ta catyi ra:

Site vatyí ndyaa ra sahnu sihin. Tandíhi cuii tyiemvu iyo ra sihin. Yucuan cuenda ma cuyuhi.

²⁶ Yucuan cuenda zii xaan cuñi, ta cua nacatyí sihin ndo vatyí zii

cuñi. Site vatyí cua nandote sisi sa i sihi.

²⁷ Ma caca xaan iñi vatyí ma zandoon sii, nu caa ndiyi Ndyoo Zuti. Ta ma cuhvon sa tyahyu coño ñuhi vatyí zehe iun sii.

²⁸ Sa zañohon sii yozo caa cua cundite suhun. Zii xaan cua cuñi vatyí cua cundyei suhun.

Tacuan i cahan ra David cuhva i cahan ra Jesús sihin ra Ndyoo Zutu ra ta tyiemvu.

²⁹ Ta i cahan ca ra Pedro ta catyi ra: Ndoho amigos, ndoo xaan cua nacatyí sihin ndo ñaa sa i tahan ra sahnu David, ñiyívi sii yo ta tyiemvu. I sihi ra, ta i quihvi ra ñuhu. Ta ihya iyo ñaña ra ndya cuhva ndya vityi. Ta tacuan cuu cuhva sito yo vatyí yívi tuhun sa zuun ñi maa ra cahan ra.

³⁰ I cahan ra David cuhva i cahan Tatyí Ii ra Ndyoo sihin ra, ta i sito ra vatyí cua zavaha ra Ndyoo tuhun i cahan ra sihin ra vatyí i catyi ra Ndyoo sihin ra: “Ityi nuu ca cua cundyaca ñaha minoo ñiyívi suun. Tañi ndyaca ñaha moo tacuan cua cundyaca ñaha maa ra.”

³¹ I sito ra David tyiño cuan ta tyiemvu, ta i catyi ra vatyí cua nandoto tucu ra Jesús. Yucuan cuenda i catyi ra David sa cuenda ra Cristo vatyí ma ndoo ra nu caa ndiyi. Ta ma tyahyu coño ñuhu ra. Catyi ra.

³² I zanandoto ra Ndyoo sii ra Jesús ta i ndyehe tandíhi ndi sii ra.

³³ Ta cuahan ra Jesús gloria, ta saha ra Ndyoo cuaha xaan cuhva sii ra. Ndyaa ra ityi siyo cuaha ra Ndyoo. Ndyaa ta sa naha xaan ca

i catyi ra Ndyoo: “Cua saa quivi cua cuhun Tatyí Ii vii ñuu ñiyivi.” Ta yucuan cuenda i tasi ra Jesús sii Tatyí Ii ihya. Tatyí Ii ra Ndyoo zavaha tandíhi sa ndyehe ndo ta sa siñi ndo vityi vatyí sa i saa ra. Catyi ra Pedro.

³⁴Ta ziqui i catyi tucu ra Pedro: I saha ra David cuenda yozo caa cua tahan si sii ra Jesús ityi ziqui vatyí yivi ra David i sahan gloria. Zoco i cahan ra tuhun cuhva cua tahan si sii ra Jesús ta i catyi ra:

Moo cuu ra ndyaca ñaha sii mi.

Ta catyi ra Ndyoo Zutu yo suhun:

“Cundyoón ihya siyo cuehi.

³⁵Iyo cuaha xaan ra cuxaan suun, zoco cua zahacanoon sii ra vatyí sehi cuhva suun.”

Tacuan i catyi ra Ndyoo sihin ra Jesús, catyi ra David.

³⁶Tacuan i cahan ra Pedro sihin ñiyivi hebreo tandíhi cuhva cuan, ta i catyi tucu ra: I tyaa maa ndo sii ra Jesús nu cruz, zoco i zanducahnu xaan ra Ndyoo sii ra, ta vityi ndyaca ñaha maa ra, ta zacacu ra sii ñiyivi. Yucuan cuenda tyizoho ndo ta coto ndo sa quehin. Catyi ra.

³⁷Ta sa siñi ñiyivi sa cahan ra Pedro ta i sica xaan iñi ñu, ta i catyi ñu sihin ra Pedro ta sihin tandíhi inga ra apóstol: ¿Amigo, ñaa sa cuñi si zavaha ndi? Catyi ñu.

³⁸Ta i catyi ra Pedro sihin ñu: Tahan tahan ndo ndu-uu iñi ndo cuatyí ndo ta coo ndutya ndo cuenda ra Jesucristo, ta cua zandasi ra Ndyoo cuatyí ndo. Ta cua cuhva ra Ndyoo sa noo Tatyí Ii sii ndo vatyí yucuan cuu sa cua cuhva ra Ndyoo sii ndo.

³⁹Vatyí ta tyiemvu i saha ra Ndyoo tuhun ra sii ndo ta sii zehe ndo ta sii tandíhi cuii ñiyivi, tandíhi ñu sa cua nacana ra Ndyoo. Cua sino iñi ñu sii ra. Ta maa ra cua cundyaca ñaha sii yo.

⁴⁰Cuaha xaan tuhun i cahan ra Pedro ta i saha ra sa siñi tuñi sii ñiyivi. I catyi ra sihin ñu: Zavaha ndo sa vaha nuu ra Ndyoo coto zanaa ra sii ndo sihin ñiyivi ña vaha. Catyi ra.

⁴¹Ta cuaha xaan ñiyivi i sino iñi tuhun cahan ra Pedro ta i sicoo ndutya ñu. Yucuan quivi i sino iñi tañi uñi mil ñiyivi sii Tuhun Ndyoo.

⁴²Tandíhi quivi i titahan ñu cuan. I zacuaha xaan ñu sihin ra apóstol. Sasi ñu pan ta sihi ñu ndutya uva vatyí nacohon iñi ñu vatyí sihi ra Jesús, sa cuenda maa ñu, ta iñi ñi i sica tahvi ñu sii Ndyoo tandíhi quivi.

Cuhva i sicoo ñiyivi sino iñi Tuhun Ndyoo ta quivi cuan

⁴³Cuaha xaan sa ndyityi i zavaha ra apóstol, ta iyo xaan i cuñi ñiyivi vatyí i ndyehe ñu sa zavaha ra cuan ta yuhu ñu vatyí i ndyehe ñu yozo caa iyo ra Ndyoo.

⁴⁴Tandíhi ñiyivi sa sino iñi, iñi ñi i siyucu ñu, ta i tyindyee tahan ñu sii tahan ñu.

⁴⁵Ta tatu cumañi xuhun i naxico ñu ñaa sa iyo sii ñu. I naxico ñu ñuhu ñu sihin ndaha tyiño ñu ta i saha ñu xuhun ñihi ñu sii inga ñiyivi sino iñi tatu cumañi si sii ñu.

⁴⁶Tandíhi quivi i titahan ñu vehe ñuhu hebreo ta vehe ñiyivi ta i sasi ñu pan ta sihi ñu ndutya uva sa cuenda ra Jesús ta iñi ñi i sasi ñu

xita tandihi quivi. Zii xaan i cuñi ñu ta ña cuihna iñi ñu sii ñiyivi.

⁴⁷I zacahnu xaan ñu sii ra Ndyoo, ta vaha xaan cahan tandihi ñiyivi sa cuenda ñu. Ta tandihi quivi i saha ra Ndyoo sa sino iñi inga ca ñiyivi Tuhun ra.

Nduvaha minoo ra xii

3 Minoo quivi cuahan ra Pedro ta ra Juan vehe ñuhu hebreo cuhva caa uñi sa sahiñi. Yucuan cuhva tuhva ñiyivi hebreo cahan sihin ra Ndyoo.

²Ta sa cua saa ra yucuan ta i quisi ndyaca ñiyivi sii minoo ra xii. Tacuan sindyaca ñu sii ra tandihi quivi ta caa ra yuvehe nañi yuvehe tyaqui vatyí caca ra caridad.

³Ta sa ndyehe ra sii ra Pedro ta ra Juan sa cua quihvi ra vehe ñuhu ta i sica ra caridad sii ra.

⁴I ndyehe xaan ra Pedro ta ra Juan sii ra, ta ziqui i catyi ra Pedro: Ndyehun sii ndi.

⁵Ta i ndyehe ra xii cuan vatyí sica iñi ra sa cua cuhva ra xuhun sii ra.

⁶Zoco i catyi ra Pedro: Ñahñi xuhun ndyize sa cuhve suun zoco iyo cuhva sii sa tyindyeyi suun vatyí iyo cuhva sii maa ra Jesucristo, ra ñuu Nazaret, sa tyindyee ra suun. Sa cuenda maa ra cuan catyi suhun: Nduviton ta cacon. Catyi ra Pedro.

⁷I tiin ra Pedro ndaha siyo cuaha ra, ta i zanduvita ra sii ra. Ta zuun ñi caa cuhva cuan ndaha i nduvaha ñi saha ra.

⁸I ndava ra xii cuan ta i quisaha ra sica ra. I quihvi ra si vehe ñuhu sihin ra Pedro ta ra Juan. Sica ra. Ndava ndava ñi ra, ta zacahnu xaan ra sii Ndyoo.

⁹I ndyehe tandihi ñiyivi sa sica ra, ta i zacahnu xaan ñu sii Ndyoo.

¹⁰Ta i nacoto ñu sii ra vatyí ra sica caridad yuvehe ñuhu cuu ra, ra sa tuhva sindyaa yuvehe sa nañi yuvehe tyaqui. Ta iyo xaan i cuñi ñu sihin cuhva sa tahan ra.

Cahan ra Pedro sihin ñiyivi nu cu corredor ra Salomón

¹¹Ta ñá zaña ra cuan sii ra Pedro sihin ra Juan. Iyo xaan i cuñi ñiyivi, ta vatyí xaan i titahan ñu nu ndyaa ra corredor cuan. Nañi si corredor sii ra Salomón.

¹²I ndyehe ra Pedro sa titahan ñiyivi ta i quisaha catyi ra: Iyo xaan cuñi ndo amigo vatyí ndyehe ndo sa nduvaha saha ra ya. Ndyehe xaan ndo sii ndi vatyí sica iñi ndo vatyí iyo xaan cuhva sii maa ndi a sica iñi ndo vatyí vaha xaan ñiyivi cuu ndi ta yucuan cuenda i zanacaca ndi sii ra ya. Zoco ña tacuan amigo.

¹³Ñiyivi sahnu sii yo, ra Abraham, ra Isaac, ta ra Jacob i zacahnu ra sii Ndyoo. Ta zuun ñi maa ra Ndyoo i zacahnu sii ra Jesús, zehe ra. (I saha maa ndo sii ra Jesús sii ra ndyaca ñaha) ta i catyi maa ndo nuu ra Pilato vatyí ña vaha ra. Sa sica iñi ra Pilato sa cua zaña ra sii ra Jesús, zoco ñá saha maa ndo.

¹⁴Ñá saha ndo sa zaña ra Pilato sii ra ta ra ii xaan cuu ra Jesús. Ra vaha xaan cuu maa ra. I sica ndo tumañi iñi sii ra Pilato sa zaña ra sii inga ra cuhva iyo costumbre sa cua zaña ra sii minoo ñiyivi quivi vico cuan. Ta yucuan cuenda i zaña ra sii inga ra cuan, ra sañi sii ñiyivi.

¹⁵Cuhva cuan i sahñi maa ndo sii ra Jesús vazu maa ra saha cuhva cundito ñiyivi sihin Ndyoo. Zoco i zanandoto tucu ra Ndyoo sii ra. Ñá ndoo ra nu iyo ndiyi. Ta i ndyehe maa ndi sa yaha nandoto ra.

¹⁶Sa ndyehe ndo sii ra xii ya, nacoto ndo sii ra. Sino iñi ndi vatyí iyo cuhva sii ra Jesús ta yucuan cuenda i zanduvaha ra Ndyoo saha ra. Sino iñi ndi sii ra Jesús. Yucuan cuenda i nduvaha ra ya, ta i ndyehe tandíhi ndo.

¹⁷Amigo. Site vatyí ña sito ndo sa zavaha ndo sa ña vaha (sa sahñi ndo sii ra Jesús) ta tacuan tucu ra ndyaca ñaha sii ndo.

¹⁸Ta tyiemvu i nacatyí ra Ndyoo sihin yo vatyí cua tahan ra Cristo tundoho. Maa ra cuu ra i casi ra Ndyoo vatyí cua zacacu ra sii yo, ta cua cuu ra vatyí tacuan i catyí ra Ndyoo sihin tandíhi ra profeta. Ta tacuan i tahan si sii ra Jesús, zuun ñi cuhva i catyí ra Ndyoo.

¹⁹Ta vityí zandoo ndo cuatyí ndo ta nanducu ndo sii Ndyoo ta cua zandasi ra cuatyí ndo ta cua nduvaha añima ndo ta zii cua cuñi ndo.

²⁰Ta cua tasi tucu ra Ndyoo sii ra Jesús inga saha vatyí maa ra cuu ra ndyizo tyiño i zacuu ra Ndyoo. Nu ndyaa ndo cua tasi tucu ra Ndyoo sii ra.

²¹Zoco vityí ndyaa ra gloria ndya quívi cua ndusaa ñuhu ñuu ñiyivi inga saha tañi i catyí ra Ndyoo. Vatyí tacuan i catyí ra Ndyoo sihin ra profeta ta sa naha.

²²Ta sa naha i catyí ra Moisés: “Cua tasi ra Ndyoo minoo ra cuu ñiyivi sii yo tañi i tasi ra sii mi, ta

cua cahan ra Tuhun Ndyoo. Tyizoho ndo tandíhi ñaa sa cua cahan ra sihin ndo.

²³Tatu ma tyizoho ñiyivi sa cahan ra cuan, cua cuu ñu, ta ma cuu quíhvi ñu sihin ñiyivi i casi ra Ndyoo.” Tacuan i catyí ra Moisés i catyí ra Pedro. Ta ziqui i catyí tucu ra:

²⁴Ndisa vatyí tandíhi ra profeta ta tyiemvu ndya quívi i quisaha cahan ra Samuel i catyí ra yozo caa cua quisi ra Jesús nu cua quisi quívi. Ta sa i tahan si cuhva catyí ra cuan.

²⁵Ta maa yo ñiyivi hebreo cuu ñiyivi sii ra profeta cuan, ta i saha ra Ndyoo tuhun ra sii ñiyivi sii maa yo vatyí i catyí ra Ndyoo sihin ra Abraham: “Cua cuhve ndatu sii tandíhi ñiyivi ñuu ñiyivi sa cuenda minoo ñiyivi suun.” Catyí ra.

²⁶Ta yucuan cuenda i saha ra Ndyoo tyiño sii ra Jesús, zehe ra. I tasi ra Ndyoo sii ra nu iyo maa ndo sa xihna ñi vatyí cuñi ra zavaha ra tumañi iñi sii tandíhi ndo. Cuñi ra sa zandoo tandíhi ndo cuatyí ndo. Tacuan i catyí ra Pedro sihin ñu.

Tiin ra cu tyiño sii ra Pedro sihin ra Juan

4 Ta cahan ca ra Pedro ta ra Juan sihin ñiyivi ta i quisi ra cu zutu ta ra cu nuu sii policía sa cuenda vehe ñuhu ta ra saduceo. (Ña sino iñi maa ra saduceo cuan vatyí cua nandoto ñiyivi tatu sa sihi ñu.)

²Cuxaan ra cuan vatyí zacuaha ra apóstol sii ñiyivi cuhva i nandoto tucu ra Jesús sisi sa i sihi ra.

³I tiin ra sii ra Pedro ta ra Juan, ta i tyihi ra sii ra vehe caa sa iyo

cuenda vehe ñuhu cuan. Ndyá inga quívi cua cutuñi ra vatyí sa cua cuaa cuhva i tiin ra sii ra.

⁴Cuaha xaan ñiyívi i siñi ñu tuhun zacuahá ra Pedro ta ra Juan ta i quisaha sino iñi ñu sii ra Jesús. I sino iñi sa yatyí ñi ohon mil rayii quívi cuan ta ziiñ ñu zihí.

⁵Ta inga quívi i titahan tandihí ra cu zutu nahnu sihin ra mandoñi ta ra maestro cuenda ley. I titahan ra cuan ñuu Jerusalén.

⁶I quisi ra Anás, ra cu nuu sii zutu nahnu sihin ra Caifás ta sihin ra Juan ta ra Alejandro ta tandihí ñiyívi sii ra cu nuu sii zutu nahnu cuan, ndihí ca.

⁷I cana ra sii ra Pedro ta ra Juan ta i quihvi ra nu yucu ra cu tyiño cuan ta i quisaha ndaca tuhun ra cuan sii ra ta catyi ra: ¿Yozo caa i zanduvaha ndo sii ra xii cuan? ¿Yoo ra i saha cuhva cuan sii ndo? Catyi ra.

⁸I tyindyee Tatyí Ii ra Ndyoo sii ra Pedro, ta i quisaha catyi ra Pedro: Ndoho ra ndyaca ñaha ta ra nahnu,

⁹ndaca tuhun xaan ndo sii ndi vityi sa cuenda minoo sa vaha i zavaha ndi sihin ra xii ndahvi ya. Cuñi ndo coto ndo yozo caa i nduvaha ra.

¹⁰Tatu yucuan cuñi ndo coto ndo, cua nacatyí sihin ndo ta cua coto ndo sihin tandihí ñiyívi hebreo vatyí i nduvaha ra vatyí iyo xaan cuhva sii ra Jesús, ra ñuu Nazaret. I tyaa ndo sii ra nu cruz, zoco i zanandoto ra Ndyoo sii ra.

¹¹Tañi minoo ra zandaa vehe sihin yuu cuu ndo ta zavita ndo yuu vaha. Tañi minoo yuu vaha xaan

cuu ra Jesús, ta i tava ndo sii ra, ta ra ñiñi xaan cuu ra.

¹²Zacacu ra Jesús sii ñiyívi, ta yoñi inga ca ra nacahnu ñuu ñiyívi sa cuu zacacu sii yo ta ma cuhun yo andyaya. Tacuan i catyi ra Pedro.

¹³Ta i ndyehe ra cu tyiño vatyí ña yuhu ra Pedro ta ra Juan ta sito ra vatyí ñahñi zicuela siñoho ra (ta yivi ra tuhva cuu ra). Ta yucuan cuenda iyo xaan i cuñi ra zoco i nacoto ra vatyí ra i sica noo sihin ra Jesús cuu ra.

¹⁴Ta i ndyehe ra cu tyiño vatyí ndyaa ra xii cuan sihin ra. Sa nduvaha ra. Ta yucuan cuenda ñá ñihi ca ra cuhva cahan ra.

¹⁵Tacuan ta i tava ra sii tandihí uñi tahan ra sata vehe vatyí cuñi ra sa natuhun tahan xihna ra.

¹⁶I catyi ra: ¿Ñaa sa cuu zacuu yo sihin ra ya? Ma cuu catyi yo vatyí zavaha ra sa ña vaha vatyí i zavaha ra minoo sa ndyityi cahnu xaan ta sito vaha tandihí ñiyívi ñuu ya.

¹⁷Cua zayuhu yo sii ra ta cua catyi yo: “Ma cahan ca ndo tuhun ra Jesús.” Tacuan cua catyi yo ta ma coto cuaha ca ñiyívi cuhva i nduvaha ra xii. Catyi ra.

¹⁸Tacuan ta ziquí i cana ra sii ra ta i catyi ra: Ma cahan ca ndo tuhun ra Jesús, ta ma zacuahá ca ndo sii ñiyívi. Catyi ra.

¹⁹Zoco i catyi ra Pedro ta ra Juan: Nacañi xihna iñi ndo ta ziquí catyi ndo ñaa sa cuu sa vaha sa cuenda ra Ndyoo. ¿Atu vaha cua tyaa ndi yahvi sa cahan maa ndo a vaha tyaa ndi yahvi sa cahan ra Ndyoo?

²⁰Catyí ndi vatyí ma cuu sa cutaxi ndi vatyí ñiñi xaan cua nacatyí ndi sa ndyehe ndi. Cua nacatyí ndi sa siñi ndi. Tacuan i catyi ra Pedro.

²¹Tacuan i cuu si, ta i zayuhu ra cu tyiño sii ra inga saha, ta ziqui i zaña ra sii ra vatyí ñá ñihi ra cuhva tyaa ra cuatyí sata ra coto cuxaan ñiyivi ñuu. Zacahnu xaan ñiyivi cuan sii ra Ndyoo vatyí sito ñu cuhva i nduvaha ra xii cuan.

²²Vatyí sa uu xico cuiya sa ndyaa ra cuan tundoho ta i nduvaha ra. I ndyehe ñiyivi cuhva iyo ra Ndyoo vatyí i zanduvaha ra sii ra xii cuan.

Sica tahvi ñiyivi sino iñi sii ra Jesús sii ra Ndyoo vatyí ma yuhu ñu

²³I quita ra Pedro ta ra Juan ta cuahan ra ndya nu yucu inga ñiyivi sino iñi sii ra Jesús. I nacatyí ra sihin ñu tandihi sa i catyí ra zutu nahnu ta ra sahnu cuan sihin ra.

²⁴I tyizoho ñu sa cahan ra, ta ziqui ñi ñi cuhva i sica tahvi ñu sii ra Ndyoo ta catyí ñu: Zutu mañi yo, i zavohon yutyí andivi ta ñuhu ñuu ñiyivi sihin tyañuhu. Yoho i zavaha tandihi cuí sa iyo.

²⁵Ta tyiemvu i cohon sihin ra David ra i cuu muzun ta ñiyivi sahnu sii ndi. Ta i tyaa ra cuhva i cohon:

Ndisa cuxaan xaan ñiyivi inga ñuu. Ta ndisa vatyí cuaha xaan cuhva sica iñi ñiyivi hebreo ta sa caha ñi cuu cuhva sica iñi ñu.

²⁶Cua titahan ra cu tyiño sii ñu sihin ra cu tyiño hebreo. Cua cuñi ra cahñi tahan ra sihin ra Ndyoo ta sihin ra Cristo, ra ndyizo tyiño ra Ndyoo.

Tacuan i tyaa ra David ta tyiemvu.

²⁷Ta i cahan ca ñiyivi cuan sihin ra Ndyoo ta catyí ñu: Ihya ñuu ra ndisa cuí vatyí i titahan ra

Herodes ta ra Poncio Pilato ta ra i quisi inga ñuu ta ra tata hebreo, ta i sahñi ra sii ra Jesús, ra cuu muzu iun. Ta ra Jesús cuu ra i tasun vatyí cua cuizo ra tyiñon.

²⁸Zoco tacuan i zavaha ra cuan vatyí ta tyiemvu i tyoon cuhva yozo caa cua tahan si.

²⁹Ta vityí Zutu mañi yo, cuñi ra zayuhu ra sii ndi. Cuhvon tundyee iñi sii ndi vatyí muzun cuu sii ndi. Ma cuhvon sa cua yuhu ndi nu zuhva. Ta cuhvon sa cua zacoto maa ndi sii ñiyivi Tuhun moo.

³⁰Zanduvohon sii ñiyivi cuhu ta zavohon sa ndyityí sa cuenda ra Jesús, ra cuu muzu iun. Catyí ñu.

³¹Ta sa ndihi sica tahvi ñu sii Ndyoo, ta i taan nu yucu ñu, ta i situ Tatyí Ii ra Ndyoo sii tandihi ñu, ta ñá yuhu ca ñu, ta i nacatyí ñu Tuhun Ndyoo sihin ñiyivi.

Ñahñi sa i cumañi sii ñiyivi sino iñi sii ra Jesús

³²Inuu ndita ñi i sicoo tandihi ñu sino iñi. Numinoo ra ta ñá catyí ra vatyí iyo ndaha tyiño ra vatyí inuu ndita ñi i sicoo tandihi ñu.

³³Sihin cuaha xaan cuhva i nacatyí ra apóstol sihin ñiyivi cuhva i nandoto tucu ra Jesús. Ta i saha xaan ra Ndyoo tumañi iñi sii tandihi ñu sino iñi.

³⁴Ñahñi i cumañi sii tandihi ñu vatyí tatu iyo ñuhu a vehe ñu i xico ñu sii si tatu cumañi xuhun. Ta i quisi ndyaca ñu xuhun sa cuyahvi si.

³⁵Ta i saha ñu sii si sii ra apóstol, ta i saha maa ra sii ñu nu cumañi si.

³⁶Tacuan i zavaha minoo ra nañi José. I zama ra apóstol zivi

ra. Bernabé i zacunañi ra sii ra vatyi i saha xaan ra tundyee iñi sii tandihi ñiyivi. Ra ñuu Chipre i cuu ra ta ñiyivi sii ra Leví, ra i sihi ta tyiemvu.

³⁷I xico ra ñuhu ra, ta i quisi ndyaca ra xuhun yahvi si, ta i saha ra sii si sii ra apóstol.

Cuatyi i zavaha ra Ananías ta ña Safira

5 Ta sicoo minoo ra nañi Ananías. Ta Safira nañi ñazihi ra. I xico tucu maa ñu minoo ñuhu ñu.

²I tava ra Ananías zuhva xuhun sa cuu yahvi si, ta sito tucu ñazihi ra. Ta i sindyaca ra tandihi ca si, sii ra apóstol ta catyi ra: Vasi ndyaque tandihi xuhun sa cuu yahvi ñuhu i xique.

³Ta i quisaha catyi ra Pedro sihin ra: Yoho Ananías, sohon sa zativi cuihna suun vatyi zandavi ñohon sii Tatyí Ii. I tavon zuhva xuhun sa cuu yahvi ñuhu cuan.

⁴Ndisa, ñuhu moo i cuu si, ta yoñi sa catyi suhun vatyi xicon sii si. Ta ndisa vatyi yahvi ñuhu cuan cuu sii moo sa i xicon sii si. Ta éñaa cuenda sica iñun cuhva ña vaha ya? Yivi sii ñiyivi zandavi ñohon. Sii ra Ndyoo zandavi ñohon.

⁵Ta sa siñi ra Ananías tuhun cahan ra Pedro ta i nduva ra, ta i sihi ra. Ta tandihi ñiyivi i sito tuhun cuan, i yuhu xaan ñu.

⁶I quihvi ra yoco ta i nazucu ra zahma sii coño ñuhu ra, ta i quihin ra sii ra, ta tyihi ra si ñuhu.

⁷Ta i yaha tañi uñi ora ta i saa ñazihi ra. Ta coto ca ña ñaa sa tahan yii ña.

⁸I quisaha ndaca tuhun ra Pedro sii ña ta catyi ra: ¿Atu ihya ñi yahvi i xico ndo ñuhu ndo? Ta i catyi tucu maa ña: Avi. Tacuan ñi i cuu yahvi si.

⁹I catyi tucu ra Pedro sihin ña: Ña vaha sa zacasi tahan ndo tuhun ta zandavi ñaha ndo sii Tatyí Ii. Ndyehe, vatyi sa vasi tucu ra yoco. Ndyasehe ca i tyihi ra sii yuun si ñuhu. Ta vityi vasi quihin tucu ra suun.

¹⁰Ta ta sica cuii ñi i nduva ña saha ra Pedro ta i sihi ña. I quihvi ra yoco ta i ndyehe ra vatyi sa i sihi ña, ta i cañihi ra sii ña ta tyihi ra sii ña si ñuhu yatyí ñi nu i quihvi yii ña.

¹¹I sito tandihi ñiyivi sa tahan ñu ta yuhu xaan ñu, ta yuhu xaan ñiyivi sino iñi sii Ndyoo.

Zavaha ra apóstol cuaha xaan sa ndyityi

¹²Zavaha ra apóstol cuaha xaan sa ndyityi nu yucu ñiyivi. Tandihí ñiyivi sino iñi sii ra Jesús i titahan ñu sisi vehe ñuhu hebreo minoo corredor nañi si Corredor sii ra Salomón.

¹³Yoñi inga ñiyivi i cahan ndya vaha ñi sii ñu vatyi i sito tandihi ñiyivi vatyi vaha xaan ñiyivi cuu ñu sino iñi.

¹⁴Ta vazu i yuhu ñiyivi, zoco cuaha xaan ca ñu i sino iñi sii ra Jesús. I sino iñi rayii ta tacuan tucu ñu zihí.

¹⁵Ta sa cuenda tyiño ra apóstol i saqui ñiyivi sii ñiyivi cuhu ityi, nu sito a nu yuu vatyi tatu cua yaha ra Pedro vazu xiñahñu ñi ra cua nañi sii ñu ta cua nduvaha ñu.

¹⁶Ta ñiyivi inga ñuu yatyi ñi Jerusalén i quisi ndyaca tucu ñu sii ñiyivi cuhu ta ñiyivi iyo tatyí cuihna añima, ta i nduvaha tandihí ñu.

Tahan ra Pedro ta ra Juan tundoho

¹⁷Tacuan ta i cucuihna xaan iñi ra cu nuu sii ra cu zutu ta cuaha xaan ra saduceo sii ra apóstol.

¹⁸Yucuan cuenda i tiin ra sii ra, ta i tyihi ra sii ra vehe caa.

¹⁹Zoco sa cuaa cuan i quisi minoo ángel ra Ndyoo, ta i nuña ra yuvehe caa cuan ta i tava ra sii ra apóstol. Ta i catyi ra sihin ra:

²⁰Cuahan ndo vehe ñuhu hebreo ta nacatyí ndo sihin ñiyivi yozo caa cuu nduvaha añima ñu. Catyi ángel cuan.

²¹I tyaa ra apóstol yahvi sa cahan ra. Ta sa vasi cundisi i quihvi ra vehe ñuhu ta zacuaha ra sii ñiyivi. Tacuan ta i cana ra cu nuu sii ra cu zutu ta ra zutu nahnu sii tandihí ra mandoñi vatyí cua titahan ra. Ta i tasi ra tyiño ndya vehe caa vatyí cua tava ra sii ra apóstol vatyí cua quisi ra nu yucu ra.

²²Zoco sa saa ra policía ndya vehe caa cuan, ta ñá nañihi ca ra sii ra apóstol ta cua nanuhu tucu ra ndya nu yucu ra cu tyiño, ta i catyi ra:

²³I sahan maa ndi vehe caa ta ndyehe ndi vatyí ndazi cutu yuvehe ta yucu tandihí ra zacuenda yuvehe. Zoco sa nuña ndi yuvehe cuan ta ñá nañihi ndi numinoo ñiyivi sisi si.

²⁴Ta sa siñi ra cu nuu sii policía sihin ra zutu nahnu ta ra cu nuu sii ra cuhva i nacatyí ra ta iyo xaan i cuñi ra ta sica iñi ra yozo ca caa cua cuu ra cuhva cuan.

²⁵Tacuan ta i quihvi minoo ra ta catyi ra: Ra i tyihi ndo si vehe caa cuan, vityí nandyaa ra sisi vehe ñuhu ta zacuaha ra sii ñiyivi.

²⁶Tacuan ta cuahan ra cu nuu sihin policía ra, ta i tava ra sii ra apóstol. Vii ñi i tava ra sii ra coto cuxaan ñiyivi ta cañi ñu sii ra policía sihin yuu.

²⁷I sindyaca ra sii ra apóstol ndya nu yucu ra cu tyiño, ta i cahan ra cu nuu sii ra cu zutu sihin ra ta catyi ra:

²⁸Sa saha maa ndi cuenda sii ndo vatyí i catyi ndi vatyí ma zacuaha ca ndo sa cuenda ra Jesús. Ta vityí ñihi ca zacuaha ndo. Nacahnu Jerusalén sito ñiyivi tuhun ya, ta tyaa ndo cuatyí sata maa ndi vatyí i sihi ra Jesús.

²⁹Ta ziquí i catyi ra Pedro ta inga ra apóstol: Ñiñi xaan ca sa tyaa ndi yahvi sii Ndyoo ta yivi sii ñiyivi.

³⁰I tyaa xaan ñiyivi sahanu sii yo yahvi sii Ndyoo. Ta zuun ñi ra Ndyoo cuan i zanandoto ra sii ra Jesús. Ta maa ndo cuu ra i sañi sii ra vatyí i tyaa ndo sii ra nu cruz.

³¹Ta vityí zanducahnu xaan ca ra Ndyoo sii ra Jesús. Yucuan cuenda ndyaca ñaha ra tandihí, ta cuu cacu ñiyivi maa ñi sa cuenda maa ra ta zanduvaha ra añima yo, maa yo ñiyivi hebreo. Ta zandasi ra cuatyí yo.

³²Zacuaha maa ndi tuhun ya vatyí sito ndi vatyí tuhun ndisa cuu si. Ta tacuan tucu zacuaha Tatyí Ii, ra saha ra Ndyoo sii ñiyivi tyaa yahvi sii ra.

³³Ta sa siñi ra cu tyiño sa catyi ra, ta i cuxaan xaan ra, ta i cuñi ra sa cahñi ra sii ra apóstol.

³⁴Zoco minoo ra fariseo nañi ra Gamaliel ta i nduvita ra zava mahñu. Minoo maestro cuu ra cuenda ley ra Moisés, ta i tyaa xaan ñiyivi yahvi sii ra. I catyi ra vatyí natava ra cu tyiño sii ra apóstol.

³⁵Ta ziqui i catyi ra sihin inga ra cu tyiño: Amigo, tandihi inga ndoho ra ndyizo tyiño, cuñi si zacuenda xaan yo ñaa sa zavaha yo sihin rayii ya.

³⁶Nacohon iñi ndo vatyí quívi cuan i sicoo minoo ra nañi Teudas. I sica iñi ra vatyí ñiñi xaan ra, ta cuaha xaan ra i cutahan sihin ra, tañi cumi ziendu ra. Zoco i sahñi ñiyivi sii ra Teudas ta i quití cuatyí tandihi ra sindyico sii ra, ta i naa cuhva sa zacuu ra sihin ñiyivi.

³⁷Ta ziqui zuun ñi quívi sa i cahvi ñiyivi sii ñiyivi iin iin vehe ñu ta i sicoo minoo ra nañi Judas, ra ñuu Galilea. I zatitahan ra sii cuaha xaan ñiyivi. Zoco zuun ñi i sihi tucu ra cuan, ta i quití cuatyí ra sindyico sii ra.

³⁸Ta vityi catyi sihin ndo vatyí nazaña yo sii rayii ya ta cuhva yo sa zavaha ra cuhva cuñi ra. Tatu zavaha ra cuhva cuñi ñiyivi ñi, cunaa tyiño ra.

³⁹Zoco tatu zavaha ra cuhva cuñi ra Ndyoo, ma cuu zanaa yo sa zavaha ra. Nazaña yo sii ra coto cuxaan ra Ndyoo sihin yo.

⁴⁰Tacuan i catyi ra Gamaliel, ta i tyaa ra cu tyiño yahvi sa cahan ra. Tacuan ta i cana ra cu tyiño sii ra apóstol. I cañi ra sii ra, ta ñihi xaan i catyi ra sihin ra vatyí ma cahan ca ra tuhun ra Jesús, ta ziqui i zaña ra sii ra.

⁴¹I quita ra apóstol nu yucu ra cu tyiño cuan. Zii xaan i cuñi ra vatyí

saha ra Ndyoo sa ndyehe ra ticahan nuu sa cuenda ra Jesús.

⁴²Ta tandihi quívi i zacuaha ra sii ñiyivi vehe ñiyivi ta vehe ñuhu hebreo. I zacuaha ra sii ñu vatyí sa i quisi ra Jesús ta i sihi ra sa cuenda cuatyí maa ñu.

Tyaa tyiño ra sii usa tahan ra cua tyindyee sii ra apóstol

6 Ta quívi cuan i nducuaha ca ñiyivi sino iñi sii ra Jesús. Tandihi ñu i cuu ñu ñu hebreo, zoco i cuu ñu ñiyivi cahan zahan griego ta ñiyivi cahan zahan hebreo. I quisaha cuxaan ñiyivi cahan griego ta catyi ñu vatyí ña ñihi ñundahvi ñu tahan ñu, ñu sihi yii, xuhun i zasa ra apóstol.

²Tacuan ta i cana sa usi uu tahan ra apóstol sii tandihi ñiyivi sino iñi sii ra Jesús vatyí cua titahan ñu ta i catyi ra sihin ñu: Ña vaha sa zaña maa ndi tyiño sa zacuaha ndi sii ñiyivi Tuhun Ndyoo ta zasa ndi xuhun.

³Yucuan cuenda, ndoho amigo, nducu ndo usa tahan ra tahan ndo. Ra iyo xaan Tatyí Ii ra Ndyoo añaima ta ra iyo sa siñi tuñi vaha xiñi. Ta cua cuizo maa ra tyiño ya sa zasa ra xuhun.

⁴Ta maa ndi, tandihi tyiemvu cua caca tahvi ndi sii ra Ndyoo ta cua zacuaha ndi sii ñiyivi.

⁵Tacuan, ta vaha nduu cuñi tandihi ñu sihin cuhva i cahan ra apóstol, ta i casi ñu sii ra Esteban vatyí vaha xaan sino iñi ra sii ra Jesús ta iyo xaan Tatyí Ii ra Ndyoo sihin ra. Ta i casi tucu ñu sii ra Felipe, ra Prócoro, ra Nicanor, ra Timón, ra Parmenas, ta ra Nicolás.

Ra ñuu Antioquía cuu ra Nicolás. Ta quívi ta coto ca ra sii ra Jesús i tyaa xaan ra yahvi sii costumbre ñiyivi hebreo. Zoco yivi ra hebreo cuu ra.

⁶I yaha sa usa tahan ra cuan ityi nuu ra apóstol, ta i sica tahvi ra sii ra Ndyoo, ta i tyizo ra ndaha ra sii ra vatyí cua cuizo tyiño ra cuan.

⁷I nducahnu ca tyiño ra Ndyoo. I ndutuu xaan ñiyivi sino iñi sii ra Jesús ñuu Jerusalén ta sino iñi tucu cuaha ra cu zutu.

Tiin ra cu tyiño cuenda vehe ñuhu sii ra Esteban

⁸I tyindyee xaan ra Ndyoo sii ra Esteban ta i zavaha xaan ra sa ndyityi. Ta vaha xaan ñiyivi i cuu ra. Ta cuaha xaan sa ndyityi ta zeña i zavaha ra nu yucu ñiyivi.

⁹Zoco zuhva ra i cuxaan ra sihin ra. Minoo ityi ra nañi ra ra libre. Ñiyivi hebreo ñuu Cirene ta ñuu Alexandría cuu ra. Maa ra sihin inga ra hebreo nu cu si Cilicia ta nu cu si Asia i quisaha cahan ra sihin ra Esteban.

¹⁰Zoco i saha Tatyí Ii cuaha xaan sa siñi tuñi sii ra Esteban, ta tatu sa cahan ra Esteban ña ñihi ca inga ra cuhva cahan ra.

¹¹Yucuan cuenda i tyiyahvi inga ra cuan sii ra cua catyi: “Siñi ndi sa cahan ra Esteban ndya vaha ñi sii ra Moisés ta sii ra Ndyoo.” Ta tacuan i catyi inga ra cuan.

¹²Ta yucuan cuenda i nduxaan ñiyivi. I cuxaan ra mandoñi ta ra maestro cuenda ley ra Moisés. I sahan ra nu ndyaa ra Esteban, ta i tiin ra sii ra ta i sindyaca ra sii ra nu yucu ra cu tyiño.

¹³Ta ziquí i ñihi ra sii ra cu sa ndaa sii ra vatyí cua cahan ra

cuendu ziquí ra Esteban. I catyi ra cuan: Ihya rayii, cahan xaan ra ndya vaha ñi sii vehe ñuhu maa yo ta sii ley ra Moisés.

¹⁴Sa siñi ndi vatyí catyi maa ra vatyí cua zanduva ra Jesús, ra ñuu Nazaret, vehe ñuhu ya ta cua zanaa ra costumbre i zacuaha ra Moisés. Tacuan i catyi ra cu sa ndaa cuan, ra cahan cuendu cuan.

¹⁵I ndyehe xaan tandihí ra cu tyiño sii ra Esteban ta i ndyehe ra vatyí ndisi xaan i nduu nuu ra tañi cuhva caa nuu ángel.

Cuhva i cahan ra Esteban

7 Ta i ndaca tuhun ra cu nuu sii zutu sii ra Esteban ta catyi ra: ¿Atu ndisa ra cuan sa cahan ra?

²Tacuan ta i catyi ra Esteban sihin ra cu tyiño cuan: Amigos. Tyizoho ndo sa quehin. Ñiyivi sahnú sii yo i cuu maa ra Abraham. Ta tyiemvu i ndyehe ra sii ra Ndyoo ra cahnu. Ndyaa ra Abraham ñuu Mesopotamia quívi cuan, ta cuhun ca ra ñuu Harán ta i ndyehe ra sii ra Ndyoo.

³I cahan ra Ndyoo sihin ra Abraham ta catyi ra: “Quiton ñuun ta ñiyivi suun ta cua cuhun inga ñuu sa cua zañehi suun.”

⁴Tacuan ta i quita ra Abraham ñuu Caldea ta cuahan ra cua cundyaa ra ñuu Harán. Ta sa sihi zutu ra Abraham ta i zaquisi ra Ndyoo sii ra Abraham ihya ñuu nu ndyaa ndo vityi.

⁵Ñá saha ra Ndyoo ñuhu cuan nu zuhva si sii ra Abraham, zoco saha ra Ndyoo tuhun ra vatyí cua cuhva ra sii si sii ra, ta sii maa ra cua cuu si ta sii ñiyivi sii ra sa i sihi

ra. Ta quivi cuan ta coo ca zehe ra Abraham.

⁶Ihya cuu cuhva i cahan ra Ndyoo sihin ra: “Cua cundito ñiyivi suun inga ñuu nu iyo inga ñiyivi. Cumi ziendu cuiya cua zatyño ñu tyiño ñiyivi ñuu cuan sihin tundoho vaty cu cañi ñiyivi ñuu cuan sii ñu.

⁷Zoco cua tasi tuñi sii ñiyivi ñuu cuan, ta sa yaha cuhva cuan ta cua quita ñiyivi suun ñuu cuan, ta cua zacahnu ñu sii mi ihya.”

⁸Tacuan i catyi ra Ndyoo, ta ziqui i saha ra sii ra Abraham minoo costumbre sa cua tahndya ñhi xiñi xuu lee. Tacuan ta cua coo minoo cuhva sii ñiyivi cuan ta cua nacohon iñi ñu vaty saha ra Ndyoo tuhun ra sii ñu. Ta sa yaha cacu ra Isaac zehe ra Abraham ta i zavaha Abraham costumbre cuan sihin ra Isaac sa quita uña quivi ra. Ta tacuan tucu i zavaha ra Isaac sihin ra Jacob zehe ra, ta i zavaha tucu ra Jacob sii si sihin tandihi sa usi uu tahan zehe ra. Maa ra cuu ñiyivi sahnii sii yo.

⁹Ta zuun ñi ra Esteban cuan cahan sihin ra cu tyiño cuan ta catyi ra: Ta minoo zehe ra Jacob, nañi ra José. Ta i cucuihna iñi tandihi yañi ra sii ra. Yucuan cuenda i xico ra sii ra sii ra inga ñuu. Cuahan ra ñuu Egipto, zoco ñá zandoo ra Ndyoo sii ra José.

¹⁰I tyindyee xaan ra Ndyoo sii ra José vazu i ndyehe ra tundoho. Quivi i saa ra José nu ndyaa ra Faraón, ra cu rey ñuu Egipto, i saha ra Ndyoo sa siñi tuñi sii ra José ta i tahan iñi ra Faraón sii ra ta i saha ra Faraón tyiño sii ra José sa cuu ra gobernador sii tandihi ñuu cuan ta cuhva ndya vehe ra Faraón.

¹¹Tacuan ta i quisi minoo tama nacahnu nu cu si Egipto sihin nu cu si Caanán, ta i ndyehe xaan ñiyivi tundoho. Ñá ñihi ñiyivi sahnii sii yo sa casi ñu.

¹²I sito ra Jacob vaty iyo trigo ñuu Egipto, ta i tasi ra sii zehe ra, zuun ñi ra cu ñiyivi sahnii sii yo. Yucuan cuu sa xihna ñi saha i sahan ra.

¹³Ta sa cu uu saha i sahan ra, i zacoto ra José sii ra vaty yañi ra cuu sii ra. Ta yucuan quivi i quisaha sito ra Faraón sii ñiyivi sii ra José.

¹⁴Ta ziqui i tasi ra José tyiño sii ra Jacob zutu ra vaty quisi ra sihin tandihi ñiyivi sii ra. Ta sa tandihi ñiyivi sii ra, uñi xico sahnii tahan ñu.

¹⁵Ta cuahan ra Jacob ñuu Egipto. Ta yucuan i ndoo ra cuhva ndya i sihi ra, ta tacuan tucu tandihi zehe ra i sihi ra yucuan. Ñá sananuhu ca ra ñuu ra.

¹⁶Ta i saa quivi sa sindyaca ñiyivi yiqui ra Jacob ta yiqui zehe ra ndya ñuu Siquem. Yucuan i quihvi ra ñuhu vaty sa i nazata ra Abraham ñuhu cuan sii zehe ra Hamor.

¹⁷Ta ñiyivi sii ra Abraham i nducuaha xaan ñu ñuu Egipto, ta sa cua saa quivi cua cuhva ra Ndyoo ñuhu sii ñu tañi sa i catyi ra sihin ra Abraham.

¹⁸Ta i quisaha sindyaca ñaha inga rey ñuu Egipto cuan, rey ra ñá sito sii ra José.

¹⁹I zandyee xaan ra tundoho sii ñiyivi sahnii sii yo. Quiñi xaan cuu cuhva i zavaha ra sihin ñu vaty i catyi ra vaty tatu cua cacu zehe ñu cua zavita ñu sii si. Tacuan i catyi ra vaty cuñi ra sa cuu si.

²⁰Ta zuun ñi tyiemvu cuan i cacu ra Moisés ta ndasa xaan ra nuu ra Ndyoo. I tyixehe zihí ra sii ra sisi vehe uñi yoo.

²¹Ta minoo quivi ñá cuu ca tyixehe ña sii ra ta i tyihi ña sii ra sisi minoo tyica ta saqui ña sii ra sisi tuyoo caxtyila yuyuu. Ta yucuan nañihi zehe ra Faraón sii ra. I nduu zehe ra sii ña. Maa ña i zacuahnu sii ra.

²²Yucuan cuenda i cahvi ra Moisés tandíhi cuhva i sito ñiyivi Egipto. I nducahnu xaan ra. Vaha xaan i cuu cahan ra ta cuaha sa vaha i zavaha ra.

²³Zuun ñi ra Esteban cuan cahan sihin ra cu tyiño cuan ta catyi ra: Ta sa i ndusi ra Moisés uu xico cuiya ra ta i cuñi ra sa cua ndyehe ra sii ñiyivi sii ra, ñiyivi hebreo.

²⁴Tacuan ta minoo quivi i ndyehe ra vatyí i cañi minoo ra Egipto sii minoo ra hebreo, ta cuahan ra Moisés cua tyindyee ra sii ra hebreo cuan, ta i sahñi ra sii ra Egipto.

²⁵Sica iñi ra vatyí cua coto ñiyivi sii ra vatyí i tasi ra Ndyoo sii ra sa zacacu ra sii ñu sii ñiyivi Egipto. Zoco ñá cutuñi iñi ñu.

²⁶Ta inga quivi i ndyehe ra Moisés vatyí sahñi tahan uu tahan ra hebreo, ta i nducu ra Moisés cuhva sa coo vaha ra cuan ta ma cahñi tahan ca ra ta catyi ra: “Tyizoho ndo, amigo. Ña vaha cahñi tahan ndo.”

²⁷Zoco minoo ra sahñi tahan cuan i quiñi ndaha ra sii ra Moisés ta catyi ra: “¿Yoo ra catyi suhun vatyí cundyaca ñohon sii ndi?”

²⁸Cuñun cahñun sii, tañi i sahñun sii ra Egipto icu.”

²⁹Ta sa siñi ra Moisés cuhva cuan, ta i sino ra ta cuahan ra ndya inga ñuu vatyí yuhu xaan ra. I quita ra Egipto ta cuahan ra ndya Madián. Yucuan i sicoo ñazihí ra, ta i cacu uu tahan zehe ra.

³⁰I yaha uu xico cuiya. Tacuan ta minoo quivi ñoho ra Moisés sisi cuhu, ta i ndyehe ra minoo taca iñu vatyí ñi yucu Sinaí. Cayu tu zoco ñá ndihí tu. Tacuan ta i quituu minoo ángel mahñu tu.

³¹Iyo xaan i cuñi ra Moisés sa ndyehe ra, ta i tuhva ra nu ndyaa taca iñu cuan vatyí cua ndyehe vaha ra. Ta i siñi ra vatyí cahan ra Ndyoo sihin ra ta catyi ra Ndyoo:

³²“Yuhvi cui Ndyoo. I zacahnu ñiyivi sahnun sii. Ra Abraham, ra Isaac, ta ra Jacob i zacahnu tandíhi ra sii.” Nihí tacuan ñi ca ra Moisés, ta i yuhu xaan ra sa ndyehe ca ra.

³³Ta ziquí i catyi ra Ndyoo sihin ra: “Tavon ndison vatyí ihya nu nandyoon ñuhu ii cuu si vatyí ihya ndyei.”

³⁴Ta ziquí catyi tucu ra Ndyoo: “Sa ndyehi ta site vatyí tahan xaan ñiyivi i casi tundoho nu iyo ñu ñuu Egipto cuan. Siñi sa cahan ñu ta site vatyí ña cundyee ca iñi ñu tundoho. Ta vityí noo xique vatyí cua zacaqui sii ñu. Ñaha. Coho yo ñuu Egipto.” I catyi ra Ndyoo.

³⁵Ta zuun ñi ra Moisés cuan cuu ra sa cahan ñiyivi sihin ta catyi ñu: “¿Yoo ra catyi suhun vatyí cuun juez sii ndi ta cundyaca ñohon sii ndi?” Catyi ñu. Ta vityí zuun ñi maa ra cuu ra i tasi ra Ndyoo vatyí cua zacacu ra sii ñiyivi cuan ta cua cundyaca ñaha ra sii ñu. Vatyí tacuan i catyi ángel sa cahan si sihin ra sisi taca iñu cuan.

³⁶I tava ra Moisés sii ñiyivi ñuu Egipto. I zavaha ra cuaha xaan sa ndyityi ñuu Egipto ta Tyañuhu Cuaha. Ta i zavaha tucu ra sa ndyityi nu i sica noo ñiyivi cuan minoo nu yoñi ñiyivi iyo sisi sa uu xico cuiya.

³⁷Zuun ñi maa ra Moisés cuan i catyi sihin ñiyivi hebreo: “Cua tasi ra Ndyoo sii minoo ra cua cahan Tuhun Ndyoo. Tañi i tasi ra sii mi, tacuan tucu cua quisi ra. Minoo ra hebreo cua cuu ra.” Catyi ra Moisés.

³⁸Ta maa ra Moisés cuan cuu ra i sica sihin ñiyivi sa sica noo ñu nu yoñi ñiyivi iyo. Sihin maa ra i cahan ángel cuan yucu Sinaí cuan. Yucuan i siyucu ra sihin ñiyivi sahnu sii yo, ta i ñihi ra Ley ra Ndyoo sa saha ra sii yo.

³⁹Maa ra Esteban cuu ra cahan tandihi cuhva ya sihin ra cu tyiño ta catyi ra: Zoco ñá tyaa ñiyivi sahnu sii yo yahvi sii ra Moisés. Ñá cuñi ñu tyizoho ñu sa cahan ra. I cuñi ñu sa cunanuhu tucu ñu ndya ñuu Egipto.

⁴⁰Ta quivi sa ñoho ra Moisés xiñi yucu Sinaí i catyi ñu sihin ra Aarón: “Zavohon inga ndyoo sii ndi vatyi cua zañaha si sii ndi ityi. Ña sito ndi ndya ma cua naa ra Moisés, ra i tava sii ndi ñuu Egipto.”

⁴¹Yucuan cuu nu i zavaha ñu minoo ndyoo. Tañi caa minoo zindiqui luhlu caa si, ta i zacahnu ñu minoo vico cuenda si, ta sañi ñu quitì vatyi cua zacahnu ñu vico ndyoo ñu. Ta i sica tahvi ñu sii si. Ta zii xaan i cuñi ñu sihin cuhva i zavaha ñu.

⁴²Yucuan cuenda i saha ra Ndyoo sa zavaha ñu cuhva cuñi maa ñu.

Saha ra sa zacahnu ñu ñicandyi ta luna ta tiño. I zavaha ñu cuhva catyi minoo profeta ta tyiemvu. I catyi ra cuan vatyi catyi ra Ndyoo: Ndoho ñiyivi hebreo.

Yivi sii mi i zacahnu ndo sa sica noo ndo sa uu xico cuiya cuan.

⁴³I cuñi ca ndo sii ndyoo sa yivi Ndyoo cuu sa ndisa. Nacahnu nu i sica noo ndo i sica noo tucu minoo vehe ñii sa cuenda ra Moloc.

Ta inga ndyoo sindyizo ndo caa si cuhva caa tiño. Nañi si Renfán.

Maa ndo i zavaha sii ndyoo cuan, ta maa ndo i zacahnu sii si. Ta yucuan cuenda cua tasi sii ndo sica xaan.

Cua yaha ndo ñuu Babilonia.

Tacuan i catyi ra Ndyoo sihin ñiyivi cuan.

⁴⁴Ta i cahan ca ra Esteban sihin ñiyivi ta catyi ra: Ñiyivi sahnu sii yo, i sica noo minoo vehe ñii sihin ñu nu i sica noo ñu nu yoñi ñiyivi iyo. Ta sisi si i zacahnu ñu sii ra Ndyoo. I zañaha ra Ndyoo sii ra Moisés cuhva cua sino si, ta zuun cuhva i catyi ra Ndyoo, tacuan i sino si.

⁴⁵Ta quivi i sindyaca ñaha ra Josué i quisi ndyaca ñiyivi vehe cuan ihya ñuu Jerusalén, ta sañi tahan ñu sihin ñiyivi ihya ta i tava ra Ndyoo sii ñu. Tacuan i ñihi ñiyivi sahnu sii yo ñuhu nu ndyaa yo vityi vatyi saha ra Ndyoo sa zahacanaa ñu. Ta sisi vehe ñii cuan i zacahnu ñu sii Ndyoo ndya ta quivi ra rey David.

⁴⁶I saha xaan ra Ndyoo ndatu sii ra David. Tacuan ta i sica ra David

minoo tumañi iñi sii Ndyoo sa
cua zandaa ra minoo vehe vaha sa
cuenda Ndyoo. Zuun ñi Ndyoo ra i
zacahnu ra Jacob ta tyiemvu cuu ra.

⁴⁷Ta ñá saha ra sa zandaa ra
David vehe ra. Maa ra rey Salomón
cuu ra i zandaa vehe ra Ndyoo.

⁴⁸Zoco ña ndyaa ra Ndyoo sisi
vehe zavaha ñiyivi. I catyi minoo
profeta:

⁴⁹Catyi ra Ndyoo: Yuhvi ndyaca
ñehi andivi ta ñuu ñiyivi.

Ma cuu zavaha ndo minoo vehe
vaha xaan ta cua cundyei
sisi si vatyí ña cuñi si nu cua
cundyei ta nu cua quitati.

⁵⁰Yuhvi cuu ra i zavaha tandihi.
Catyi ra Ndyoo.

⁵¹Ta ziqui i catyi tucu ra Esteban
sihin ñiyivi cuan: Ñihi xaan iñi
ndo. Inuu cuii ñi caa ndo tañi i cuu
ñiyivi sahnu sii yo. Ña saha ndo
sa cundyaca ñaha ra Ndyoo añima
ndo. Ña tyisaha ndo sa ndisa. Sahñi
tahan ndo sihin Tatyí Ii ra Ndyoo.

⁵²I cañi ñiyivi sahnu sii ndo sii
tandihi cuii ra i cuu profeta. I sahñi
ñu sii tandihi ra i nacatyi vatyí nu
cua quisi quivi ta cua quisi minoo
ra vaha xaan. Ta sa quisi ra vaha
xaan cuan, ra Jesús cuu ra. Ta maa
ndo i tyaa ndo cuatyi sata ra, ta i
sahñi ndo sii ra.

⁵³Maa ndo cuu ra ñihi ley Ndyoo
i saha ángel sii ndo, ta ña tyaa ndo
yahvi sii si. Catyi ra Esteban.

Sihi ra Esteban

⁵⁴I siñi ra cu tyiño sa cahan ra
Esteban, ta i cuxaan xaan ra sihin
ra ndya cuhva sasi quihñi noho ra.

⁵⁵Zoco i situ cuii Tatyí Ii sii
ra Esteban. I nandyehé ndaa ra

Esteban ityi ziqui, ta i ndyehé ra sii
ra Ndyoo cahnu, ta i ndyehé ra sii
ra Jesús nandyaa ra ityi siyo cuaha
ra Ndyoo.

⁵⁶Ndyehé ndo, catyi ra. Ndyehi sa
nuña gloria ta ndyehi sii ra i quisi
ndya gloria. Nandyaa ra ityi siyo
cuaha ra Ndyoo.

⁵⁷Tacuan ta i tyazi ndaha ra cu
tyiño cuan zoho ra. I cana saa xaan
ra vatyí cuxaan ra. Yatyí cuii ñi i
tuhva ra nu iñi ndyaa ra Esteban
vatyi cuñi ra queen ra sii ra.

⁵⁸I tava ra sii ra Esteban ndya yu
ñuu vatyí cua cañi ra sii ra sihin
yuu ta cua cahñi ra sii ra. I zandoo
ra cu tyiño cuan zahma cahnu ndisi
ra sihin minoo ra yoco nañi Saulo
vatyi cua cucumi ra sii si.

⁵⁹Ta i cañi ra sii ra Esteban
sihin yuu, ta maa ra Esteban i sica
tahvi xaan ra sii ra Ndyoo ta catyi
ra: Jesús yoho ndyaca ñohon sii.
Nacuhun añime suhun.

⁶⁰Ta yucuan i sicuñi siti ra
Esteban, ta i cana saa ra: Jesús, ma
tyoon cuatyi ndyicuu ra ya ziqui ra.
Tacuan i cahan ra Esteban ta i sihi
ra.

Sahñi tahan ra Saulo sihin ñiyivi sino iñi sii ra Jesús

8 ¹⁻²Tahan xaan iñi ra Saulo sa
i sahñi ñiyivi sii ra Esteban.
Tacuan ta i quisi zuhva ra ndyico
sii ra Jesús, ta i tyihi ra sii ra
Esteban si ñuhu. Sacu ra vatyí i
sihi ra Esteban. Ta zuun ñi quivi
cuan i sahñi tahan ñiyivi ña sino
iñi sihin ñiyivi sino iñi sii ra Jesús
ñuu Jerusalén cuan. Ta i sino ñiyivi
sino iñi. Zuhva ñu i sino ndya nu cu
si Judea, ta inga ñu i sino ñu ndya

Samaria. Zoco sa usi uu tahan ra apóstol ñá sino ra cuan.

³Ta ra Saulo cuan i zayanga xaan ra sii ñiyivi ndyico sii ra Jesús. Cuaha xaan nu i quihvi ra vehe ñiyivi ta cañoho ra sii rayii a sii ñu zihí, ta tyihi ra sii ñu vehe caa.

**Cuhva i sito ñiyivi nu cu si
Samaria Tuhun Ndyoo**

⁴Ta sa i quita ñiyivi ñuu Jerusalén cuan sa i sino ñu ta i zacoto ñu sii ñiyivi tandíhi ñuu nu i yaha ñu Tuhun Ndyoo.

⁵Ta minoo ra sa nañi Felipe i saa ra nu cu si Samaria, ta i quisaha ra nacatyí ra sihin ñiyivi tuhun ra Jesús.

⁶I titahan ñiyivi, ta vaha xaan i tyizoho tandíhi ñu sa cahan ra Felipe, ta i ndyehe ñu sa ndyityi i zavaha ra.

⁷Vatyí i tava ra cuaha xaan tatyí cuihna sii ñiyivi. I cana saa xaan tatyí cuihna sa quita si sii ñiyivi, ta ziquí i nduvaha ñu. Cuaha xaan ra xii i nduvaha ta ra coxo.

⁸Yucuan cuenda i tahan xaan iñi tandíhi ñiyivi ñuu cuan.

⁹Zoco minoo ra sinañi Simón, i cuu ra ra tazi ñuu cuan, ta i zandavi ñaha ra sii cuaha xaan ñiyivi ityí Samaria vatyí catyí ra vatyí ra ñiñi xaan cuu ra. Iyo xaan i cuñi tandíhi ñiyivi sa cuenda maa ra quiví cuan.

¹⁰Ta tandíhi ñiyivi cuca cuhva ndya ñiyivi ndahvi i tyizoho ñu sa cahan ra ta catyí ñu: Cahnu xaan cuu cuhva ra ya vatyí maa ra Ndyoo cuu ra saha cuhva cuan sii ra.

¹¹Ta i tyizoho ñu sa cahan ra vatyí sa naha xaan i zandavi ñaha ra sii ñu sihin cuhva i zavaha ra.

¹²Tacuan ta i saa ra Felipe, ta i zacuaha ra sii ñiyivi cuhva ndyaca ñaha ra Ndyoo ta cuhva cahnu xaan iyo cuhva sii ra Jesucristo. Tacuan ta i sino iñi ñu sa cahan ra Felipe. Ta i sicoo ndutyá cuaha rayii ta ñu zihí.

¹³Ta i sino tucu iñi ra Simón, ra tazi cuan, ta i sicoo ndutyá ra ta ndutahan ra sihin ra Felipe. Iyo xaan i cuñi ra sihin sa ndyityi nahnu i zavaha ra Felipe.

¹⁴Ta ra apóstol i ndoo ra ñuu Jerusalén ta sa siñi ra vatyí sino iñi ñiyivi ñuu Samaria sii ra Jesús ta ziquí i tasi ra sii ra Pedro ta ra Juan ndya indyacuan.

¹⁵I saa ra Pedro ta ra Juan ta i sica tahvi ra sii Ndyoo sa natasi ra Tatyí Ii ra añañi ñiyivi sino iñi sii ra Jesús indyacuan.

¹⁶Vatyí i sicoo ndutyá ñiyivi cuan maa ñi sa cuenda ra Jesús ta tañaha ca noo xica Tatyí Ii sii ñu.

¹⁷Tacuan ta i tyizo ra Pedro ta ra Juan ndaha ra sii ñu ta i quihvi Tatyí Ii añañi ñu.

¹⁸I ndyehe ra Simón cuhva i tyizo ra apóstol ndaha ra sii ñiyivi cuan ta i quisi Tatyí Ii sii ñu ta i catyí ra Simón:

¹⁹Cua tyiyahvi sii ndo tatu cuhva ndo cuhva cuan sii, vatyí yoo ra cua tyize ndehi ta cua quihvi Tatyí Ii añañi ra.

²⁰Tacuan i catyí ra. Ta catyí ra Pedro sihin ra: Nacunaa moo sihin xuhun vatyí sica iñun vatyí cuu zaton sa saha maa ra Ndyoo.

²¹Ma cuu zatyíño moo tyíño ya vatyi ña vaha añimon sihin ra Ndyoo.

²²Zañon cuhva sa quiñi xaan sica iñun ta caca tahvun sii Ndyoo sa cua zandasi ra cuatyun.

²³Vatyi site yozo caa iyon. Vatyi cucuihna xaan iñun. Tañaha ca zandoon cuatyí zacuun. Ta cua zatívi si suun.

²⁴Tacuan i catyi ra Pedro, ta i catyi ra Simón sihin ra: Caca tahvi ndo sii ra Ndyoo sa cuenda mi vatyi ma tahan si sii cuhva sa catyi ndo. Catyi ra.

²⁵Tacuan i cuu. Ta sa yaha zacuaha ra Pedro ta ra Juan Tuhun Ndyoo, ta i saha ra cuenda yozo caa zavaha ra Ndyoo, ta nacatyí ra sihin ñiyívi yozo caa cuu cacu ñu ta ma cuhun ñu andyaya. Nacahnu Samaria i sahan ra, ta ziqui i sinanuhu ra ndya ñuu Jerusalén.

Natuhun ra Felipe sihin minoo ra ñuu Etiopía

²⁶Ta sa yaha cuhva cuan ta ziqui i cahan minoo ángel ra Ndyoo sihin ra Felipe ta catyi si: Nduvítan ta cuahan ityi tyañuhu ityi quita ñuu Jerusalén ya ta cuhun ndya nu cu si Gaza. Ityi cuan cuu nu yoñi maa ñiyívi iyo.

²⁷I nduvita ra Felipe ta cuahan ra. Ta ityi cuahan ra i ñihi tahan ra sihin minoo ra ñuu Etiopía. Ra yucuan, ica iyo ra. Ta ndyizo ra minoo tyíño cahnu sa sicumi ra tandíhi xuhun ña Candace, ñaha ndyaca ñaha sii ñiyívi ñuu Etiopía cuan. Sahan ra cuan ñuu Jerusalén vatyi tuhva maa ra zacahnu sii ra Ndyoo tañi zavaha ñiyívi hebreo.

²⁸Ñoho ra cuan sisi carreta ra sa cua nuhu ra. Ta cahvi ra tuhun i tyaa ra Isaías, minoo profeta ta tyiemvu.

²⁹Tacuan ta i catyi Tatyí Ii sihin ra Felipe: Cuahan cua zatohon sii ra vasi sihin carreta cuan.

³⁰Ta sa tuhva ra Felipe nu vasi ra ta i siñi ra sa cahvi ra nuu libro ra Isaías, ta i ndaca tuhun ra Felipe sii ra ta catyi ra: ¿Atu cutuñi iñun sa cahvun?

³¹Ta i catyi ra cuan sihin ra: Ña cutuñi iñi vatyi yoñi ra cuu nacatyí sihin ñaa cuñi si catyi si. Ta i cahan ra sihin ra Felipe sa ndaa ra ta cundyaa ra sihin ra.

³²Ihya cuu tuhun i cahvi ra cuan:

Quihin ñiyívi sii mvee ticatyí ta yoco ñu ixi tí ta ñahñi sa cahan tí.

Ta quihin ñu sii tí, ta cua cahñi ñu sii tí ta ñahñi sa cahan tí.

Ta tacuan tucu maa ra, cua ndyehe ra tundoho ta ñahñi cua catyi ra.

³³Cua vacu ndyaa xaan ñu sii ra ta ña ndoo cua zandaa ñu tyíño cuenda ra.

Cua caca iñi ñiyívi zavaha ndya vaha ñi sihin ra vatyi yoñi zehe ra cua coo vatyi sahñi ñu sii ra.

Yucuan cuu tuhun cahvi ra cuan.

³⁴Tacuan ta i catyi ra Etiopía sihin ra Felipe: Nacatyun sihin sa ndyoo ñi. ¿Yoo sii cuenda cahan ra Isaías? ¿Atu zuun ñi tuhun maa ra cahan ra? a ¿atu cahan ra sii inga ra?

³⁵Yucuan ta zuun ñi sihin tuhun cuan i quisaha ra Felipe nacatyí ra, ta i sityíño tucu ra inga Tuhun

Ndyoo, nu cahan si sa cuenda ra Jesús. Ta i zacuahá ra sii ra vatyi ra Jesús cuu ra cua zacacu sii ñiyivi. Ra sa ndatu xaan ñu.

³⁶Ta sa cua yaha ra nu iyo ndutya ta i catyi ra Etiopía: Ndyehe, ihya iyo ndutya. ¿Atu cuu coo ndutye?

³⁷Ta catyi ra Felipe sihin ra: Cuu tatu sino iñun sii ra Jesús sihin tandihí cuii añimon. Ta i catyi ra cuan: Sino iñi vatyi ra Jesús, zehe ra Ndyoo Zutu yo cuu sii ra.

³⁸Tacuan ta i catyi ra Etiopía vatyi nanacuíñi carreta, ta i noo nduu tahan ra. Ta i sicoo ndutya ra i zacuu ra Felipe sisi ndutya cuan.

³⁹Ta sa cua quita ra sisi ndutya, ta i quihin Tatyí li sii ra Felipe. Ñá ndyehe ca ra Etiopía cuan sii ra Felipe, ta zii xaan i cuñi ra Etiopía sa ñihi ra cuhva cuenda ra Jesús.

⁴⁰Ta i sindyaca Tatyí li sii ra Felipe ndya ñuu Azoto. Yucuan sahan ra minoo minoo ñuu sa zacuahá ra sii ñiyivi sa cuenda ra Jesús ta cuhva cua cacu ñiyivi ta ma cuhun ñu andyaya. Ta cuhva cuan cuahan ra ndya cuhva ndya i saa ra Cesarea.

Cuhva i nazama ra Saulo cuhva iyo ra

9 Ta ra Saulo tañaha ca cua zaña ra cuhva sa sahñi tahan ra sihin ñiyivi ndyico sii ra Jesús, ta ñá zaña ra sa nducu cahñi ra sii ñu. Ta yucuan cuenda sahan ra nu ndyaa ra cu nuu sii ra cu zutu.

²Ta i sica ra Saulo sa tyaa ra cu nuu carta sa cuhun sihin ra ñuu Damasco ndya vehe ñuhu hebreo. Ta tacuan cua ñihi ra Saulo cuhva vatyi tatu nañihi ra sii ñiyivi

ndyico sii ra Jesús ta cua cuu tiin ra sii ñu cundyaca ra sii ñu vehe caa ñuu Jerusalén, tandihí ñu, ñu zihí ta rayii.

³Ta i quihin ra Saulo ityi cuahan ra. Ta sa cua saa ra ñuu Damasco ta zuun ñi caa cuhva cuan i ndyehe ra minoo ñúhu cahnu xaan. I zandisi si nacahnu nu cuahan ra.

⁴Ta i nduva ra nu ñuhu ta i siñi ra nduzu ra Jesús sa cahan ra sihin ra ityi ziquí ta catyi ra sihin ra: Saulo, Saulo. Sahñi tohon sihin mi.

⁵Ta i catyi ra Saulo: ¿Yoo sa cahan, tata? Ta i catyi ra Jesús sihin ra: Yuhvi cui Jesús. Sahñi tohon sihin mi, zoco zuun ñi sii moo zañicuehun.

⁶Tacuan ta i yuhu xaan ra Saulo ta catyi ra: ¿Ñaa sa cuñun zavehi? Ta i catyi ra Jesús sihin ra: Nduviton ta cuhun ndya ñuu ya, ta cua nacatyi ñiyivi suhun ñaa sa cua zavohon.

⁷Ta ra ndihí sihin ra Saulo iyo xaan i cuñi ra ndya cuhva ñá cuu ca cahan ra vatyi i siñi ra nduzu sa cahan, zoco yoñi ñiyivi i ndyehe ra.

⁸I nduvita ra Saulo, ta i nuña ra nuu ra, zoco ñá cuu ca ndyehe ra. Yucuan cuenda i tiin amigo ra ndaha ra, ta i sindyaca ra sii ra ndya ñuu Damasco cuan.

⁹Yaha uñi quivi sa ñá cuu ndyehe ra Saulo. Ñá sasi maa ra, ta nu ñá sihi ra ndutya.

¹⁰Ta zuun ñi ñuu Damasco cuan iyo minoo ra nañi Ananías. I sindyico ra sii ra Jesús. Minoo saha i cahan ra Ndyoo sihin ra sisi ñimahna ta catyi ra: ¡Yoho Ananías! Ta i catyi ra Ananías: ¿Ñaa sa cuñun sihin, tata?

¹¹Ta i catyi ra Ndyoo Zutu yo sihin ra: Nduvita ta cuhun calle sa nañi iin ndoo ndita ñi. Ta sisi vehe ra Judas cua nanducun sii minoo ra ñuu Tarso. Nañi ra Saulo ta sica tahvi ra sii mi vityi.

¹²Sa tahan tucu maa ra Saulo ñimahna ta sisi ñimahna i ndyehe ra vaty vasun. I ndyehe ra vaty quihvun ta tyizon ndohon sii ra vaty cua nandyehhe tucu ra. Tacuan i catyi ra Ndyoo sihin ra Ananías.

¹³Ta sa siñi ra Ananías cuhva cuan ta i catyi ra: Ndyoo Zuti, sa cuaha xaan ñiyivi i nacaty ñu sihin mi vaty cuaha xaan sa ña vaha i zavaha ra cuan sihin ñiyivi sino iñi suun ñuu Jerusalén.

¹⁴Ta vityi vasi ra ihya ta iyo cuhva sii ra sihin ra cu nuu sii zutu nahnu vaty cua tñin ra sii tandihi ñiyivi sica tahvi suun ta tyihi ra sii ndi vehe caa.

¹⁵Zoco i catyi ra Ndyoo sihin ra Ananías: Cuahan vaty i casi mi sii ra Saulo cuan vaty cua cahan ra sa cuenda mi sihin ñiyivi sa yivi ñiyivi hebreo cuu, ta sihin rey ñiyivi cuan ta cua zacuaha ra sii ñiyivi hebreo, ñiyivi sii ndo, ndihi ca.

¹⁶Ta cua zañehi sii ra cuhva cua tahan ra tundoho sa cuenda mi.

¹⁷Tacuan ta ziqui cuahan ra Ananías ndya vehe nu iyo ra Saulo. I quihvi ra ta i tyizo ra ndaha ra sii ra ta i catyi ra: Amigo Saulo, ra Jesús cuu ra ndyaca ñaha sii yo. Ta i quituu ra nuu moo ityi vasun. Ta vityi i tasi ra sii mi ihya vaty cua nandyehun inga saha ta cua quihvi Taty li añimon.

¹⁸Ta zuun ñi caa cuhva cuan i quita minoo sa quita tañi caa zoo

tyiyaca siti nuu ra Saulo. Ta ziqui i cuu nandyehhe ra. Tacuan ta cuahan ra Saulo ta i sicoo ndutya ra (vatyi cua cundyico ra sii ra Jesús).

¹⁹Ta ziqui i sasi ra xita, ta i nacoo tundyehe iñi sii ra. Ta i ndoo ra zuhva quivi sihin ñiyivi sino iñi sii ra Jesús ñuu Damasco.

Zacuaha ra Saulo Tuhun Ndyoo sii ñiyivi ñuu Damasco

²⁰Tacuan i cuu ta ziqui i quisaha ra Saulo zacuaha ra sii ñiyivi tandihi vehe ñuhu hebreo ñuu Damasco. I nacaty ra sihin ñu vaty ra Jesús, zehe Ndyoo cuu sii ra.

²¹Ta sa siñi ñiyivi sa cahan ra, ta iyo xaan i cuñi tandihi ñu. Ta i quisaha catyi ñu sihin tahan ñu: Zuun ñi ra ihya cuu ra sañi tahan xaan sihin ñiyivi sino iñi sii ra Jesús ñuu Jerusalén. Ta i saa ra ihya vaty cua tñin ra sii ñiyivi sino iñi sii ra Jesús ñuu ya ta cundyaca ra sii ñu ndya nu ndyaa ra cu nuu sii zutu nahnu. Catyi ñu.

²²Zoco ña zaña ra Saulo sa zacuaha ra sii ñiyivi. I zacuaha ra sii ñu vaty ra Jesús cuu ra cu Cristo sa ndisa. Ta ña ñihi ca ñiyivi hebreo ñuu Damasco cuhva cahan ñu inga cuhva.

I sino xehe ra Saulo

²³Naha zuhva ta ziqui i zacasi tahan ra hebreo, ra ña sino iñi Tuhun Ndyoo, tyiño sa cua cahñi ra sii ra Saulo.

²⁴Zoco i sito ra Saulo cuhva sa sica iñi ra cuan. Ta ñuu cuan sicoo minoo nuzama siconduu. Ñiyaca ta ndiyiyaca i sicumi xaan ra hebreo cuan tandihi yuvehe si vaty cua

tiin ra sii ra Saulo tatu cua yaha ra ta cua cahñi ra sii ra.

²⁵Zoco i zacacu amigo ra Saulo sii ra minoo sa cuaa vaty i zanoo ra sii ra nuzama cuan sisi minoo tyica cahnu, ta i sino ra Saulo.

Cuahan ra Saulo ñuu Jerusalén

²⁶Cuahan ra Saulo ñuu Jerusalén. I cuñi ra sa cua ndutahan ra sihin ñiyivi sino iñi sii ra Jesús yucuan, zoco yuhu xaan ñu sii ra. Ná sino iñi ñu sa cua cundyico ra sii ra Jesús sa ndisa cuii.

²⁷Tacuan ta i quihin ra Bernabé sii ra Saulo ta sindyaca ra sii ra ndya nu ndyaa ra apóstol ta catyi ra sihin ra: Ica ra Saulo ya i ndyehe ra sii ra Jesús ityi, ta i cahan ra Jesús sihin ra. Ta ziqui vaha xaan i zacuaha ra Saulo sii ñiyivi ñuu Damasco sa cuenda ra Jesús ta ñá yuhu ra. Catyi ra Bernabé.

²⁸Tacuan ta i ndoo ra Saulo sihin ñiyivi sino iñi sii ra Jesús.

²⁹Ta nacahnu ñuu Jerusalén i zacuaha ra sii ñiyivi tuhun ra Jesús. Ta i natuhun xaan ra Saulo sihin ñiyivi hebreo, ra cahan zahan griego. Ta i cuñi ra cuan sa cahñi ra sii ra Saulo (vatyi ñá sino iñi ra sa cahan ra).

³⁰Ta sa sito ra sino iñi sii ra Jesús cuhva cuan ta i sindyaca ra sii ra Saulo ndya ñuu Cesarea. Ta yucuan i tyihi ra sii ra Saulo sisi minoo barco ta natasi ra sii ra ityi ñuu ra, ñuu Tarso.

³¹Tacuan ta i ndutaxi nu yucu ñiyivi sino iñi sii ra Jesús nacahnu nu cu si Judea ta Galilea ta Samaria. Ta ñá cuxaan inga ñiyivi sihin ñu. Ta cuaha xaan ca ñiyivi i quisaha

sino iñi ñu Tuhun Ndyoo, ta i tyindyee xaan Taty i sii tandihi ñu. Ta i yuhu ñu sa ma tyaa ñu yahvi sii Ndyoo.

Nduvaha ra Eneas

³²Cuahan ra Pedro nacahnu ñuu nu iyo ñiyivi sino iñi sii ra Jesús. Ta i saa ra ñuu Lida.

³³Yucuan i ndyehe ra sii minoo ra xii. Nañi ra Eneas. Sa uña cuiya caa ra vaty ñá cuu caca ra.

³⁴Tacuan ta i catyi ra Pedro sihin ra: Eneas, zanduvaha ra Jesucristo suun. Nduviton ta natuun yuun. Tacuan ta i nduvita ra Eneas vaty sa i nduvaha ra.

³⁵Tandihí ñiyivi ñuu Lida cuan sihin ñu ñuu Sarón i ndyehe ñu sa nduvaha ra Eneas. Ta i sino iñi ñu sii ra Jesús. Ta i zandoo ñu costumbre sahnu sii ñu.

Nandoto tucu ña Dorcas

³⁶Ta ñuu Jope cuan sicoo minoo ñaha nañi ña Tabita. Ta sihin zahan griego nañi ña Dorcas. Sino iñi ña sii ra Jesús, ta tandihí quivi i zavaha ña sa vaha, ta i tyindyee ña sii ñiyivi ndahvi.

³⁷Ta quivi cuan i quihin cuehe sii ña Dorcas, ta i sihi ña, ta i zacutyi ñiyivi sii coño ñuhu ña, ta i saqui ñu sii ña si vehe ña, sa cu uu vehe toto ndya ziqui.

³⁸Ta sa ñihi ñiyivi tuhun vaty ndyaa ra Pedro inga ñuu nañi Lida yaty ñi ñuu Jope cuan. Ta i tasi ñu sino iñi sii uu tahan ra cua zañiñi ra sii ra sa quisi ra.

³⁹Tacuan, ta cuahan ra Pedro sihin ra cuan. Ta sa saa ra yucuan ta i sindyaca ñu sii ra ndya nu caa

ndiyi sisi vehe toto cuan ndya ziqui. Yucu tandihi ñu ndahvi, ñu sihi yii, sisi vehe cuan. Sacu xaan ñu. Zañaha ñu tandihi vestido, tandihi coto i zavaha ña Dorcas ta ndito ña.

⁴⁰Tacuan ta i tava ra Pedro sii tandihi ñu, ta i sicuiñi siti ra, ta i sica tahvi ra sii Ndyoo. Ta ziqui i catyi ra sihin ñaha cuan: Nduviton maha Tabita. Tacuan ta nandyehhe ña. I ndyehe ña sii ra Pedro ta nacundyaa ña.

⁴¹I tiin ra Pedro ndaha ña ta i zanacuiñi ndyaa ra sii ña. Tacuan ta i cana ra sii ñu sino iñi ta sii ñu ndahvi, ñu sihi yii cuan, vaty i sa nandoto ña.

⁴²Ta i sito tandihi ñiyivi ñuu Jope. Ta cuaha xaan ñu i sino iñi sii ra Jesús.

⁴³Ta i ndoo ra Pedro zuhva ca quivi ñuu cuan vehe ra ña Simón. Ta ra Simón zatyahyu ra ñii vaty i yucuan cuu tyiño ra.

Ra Pedro sihin ra Cornelio

10 Ñuu Cesarea i sicoo minoo ra ña Cornelio. Ra cu nuu i cuu ra sii minoo ziendu zandaru. Ra Italia i cuu zandaru sa ndyaca ñaha ra.

²Vaha xaan ra i cuu ra Cornelio sihin tandihi ñiyivi sii ra. I zacahnu ra sii Ndyoo, ta yuhu ra sa ma tyaa ra yahvi sii ra. I tyindyee xaan ra sii ñiyivi hebreo sihin xuhun ra. Ta i cahan ra sihin ra Ndyoo tandihi cuhva.

³Minoo saha tañi caa uñi sa sahiñi i ndyehe ra minoo ángel. I quihvi si nu ndyaa ra ta catyi si: ¡Cornelio!

⁴Yuhu xaan ra Cornelio ta i ndyehe xaan ra sii ángel cuan ta

catyi ra: ¿Ñaa sa cuñun sihin, tata? Tacuan ta i catyi ángel cuan sihin ra: Sa siñi ra Ndyoo tandihi cuhva i cohon sihin ra. Ta zii cuñi ra vaty i tyindyee xoon sii ñiyivi ndahvi.

⁵Ta vityi cuñi si sa tasun uu a uñi tahan muzun ndya ñuu Jope. Indyacuan iyo minoo ra ña Simón. Ta zuun ñi ña tucu ra Pedro. Cua canon sii ra vaty i quisi ra ihya.

⁶Ndyaa ra vehe inga ra ña Simón. Ra zatyahyu ñii cuu ra. Yuhu tyañuhu iyo vehe ra. Cua catyi maa ra Pedro cuan ñaa sa cua zavohon. Tacuan i catyi ángel cuan.

⁷Ta sa cuahan ángel cuan ta i cana ra Cornelio sii uu tahan muzu ra sihin minoo zandaru ra cumi sii ra. Sino iñi zandaru cuan sii Ndyoo.

⁸I nacaty i ra Cornelio sihin ra tandihi sa ndyehe ra ta ziqui i tasi ra sii ra ndya ñuu Jope.

⁹Ta inga quivi i quihin ra ityi cuahan ra. Ta sa cua saa ra ñuu Jope tañi maa ora ta zuun ñi caa cuhva cuan i ndaa ra Pedro xiñi vehe ra vaty i cua cahan ra sihin Ndyoo.

¹⁰Sizoco ra ta cuñi ra sa cuzama ra zoco ñii ñi sa zavaha ñu sa casi ra i ndaa ra xiñi vehe. Tacuan ta i quisaha zandyehhe ra Ndyoo sii ra minoo sa ndyehe ra.

¹¹I ndyehe ra vaty i nuña yutyi andivi ta i noo xica minoo tañi minoo zahma yuu cahnu. I noo si sihin cumi tahan siqui si.

¹²Sisi zahma yuu cuan ñoho tandihi cuu nuu quiti sa iyo cumi tahan saha sihin coo nahnu ta sihin zaa.

¹³Tacuan ta i siñi ra Pedro sa cahan ra Ndyoo ta catyi ra:

Nduviton Pedro ta cahñun sii ti ta casun.

¹⁴Zoco i catyi ra Pedro: Ma cuu tata vatyí ña tuhve casi tandíhi ñaa sa ica cuenda costumbre maa ndi.

¹⁵Inga saha i catyi tucu ra Ndyoo sihin ra: Ña vaha catyi moo vatyí ica sa sehi suun.

¹⁶Ta tacuan i cahan tucu ra Ndyoo sihin ra. Ta sa cu uñi saha i cahan ra tacuan ta ziqui i nandaa tucu zahma cuan ityi ziqui.

¹⁷Ta i sica iñi ra Pedro ñaa cuhva cuu si cuan, ta zuun ñi caa cuhva cuan i saa sa uñi tahan ra i tasi ra Cornelio yuvehe. Vatyí i ndaca tuhun ra sii ñiyivi ta tacuan i nañihi ra vehe ra Simón.

¹⁸Ta sa saa ra yuvehe cuan, i cana saa ra ta catyi ra: ¿Atu iyo minoo ra nañi Simón Pedro ihya?

¹⁹Ta zuun ñi cuhva cuan, sica iñi ra Pedro ñaa sa ndyehe ra ta i catyi Tatyí li sihin ra: Nanducu uñi tahan ra suun.

²⁰Cua noon ta cua cuhun sihin ra. Ma caca iñun vazu yivi ñiyivi hebreo cuu ra vatyí yuhvi cuu ra i tasi sii ra nu ndyoon.

²¹Tacuan ta i noo ra Pedro nu yucu ra i tasi ra Cornelio ta catyi ra: Zuun yuhvi cui ra nanducu ndo. ¿Ñaa cuenda vasi ndo?

²²Ta i catyi inga ra cuan: Vasi maa ndi cuenda ra Cornelio. Minoo ra vaha xaan cuu ra. Ta cuñi xaan ra sii Ndyoo ra zacahnu ndoho ñiyivi hebreo. Sa catyi minoo ángel Ndyoo sihin ra vatyí vaha cua cana ra suun sa cuhun ndya vehe ra. Ta cua tyizoho ra ñaa sa cua nacatyun sihin ra.

²³Tacuan ta i quihvi ra cuan sisi vehe. Ta i ndoo ra sihin ra Pedro minoo ñuu. Ta inga quivi cuahan ra Pedro sihin ra ta cuahan tucu zuhva ra sino iñi sii ra Jesús, ra ñuu Joje cuan.

²⁴Ta sa cu uu quivi i saa ra ñuu Cesarea nu i ndatu ra Cornelio sii ra sihin cuaha xaan ñiyivi sii ra sihin amigo ra vatyí i cana ra Cornelio sii tandíhi ra.

²⁵Ta sa saa ra Pedro vehe ra ta i quita ra Cornelio si vehe ra ta i sicuñi siti ra nuu ra vatyí cua zacahnu ra sii ra.

²⁶Zoco i zanduvita ra Pedro sii ra ta catyi ra: Nduviton vatyí ñiyivi cuu mi tañi moo.

²⁷Ta ziqui i quisaha natuhun ra ta i quihvi ra sisi vehe ra Cornelio. I ndyehe ra Pedro vatyí tuu xaan ñiyivi yucu.

²⁸Ta i catyi ra Pedro: Sito maa ndo vatyí ña saha costumbre maa ndi ñiyivi hebreo sa titahan ndi sihin ra sa yivi ñiyivi hebreo cuu, nu sa quihvi ndi vehe ra. Zoco i zañaha ra Ndyoo sii vatyí ña vaha cua catyi vatyí cuxi caa iyo ndo ta ña vaha cua catyi vatyí ma cuu titehin sihin ndo.

²⁹Yucuan cuenda yatyi xaan vasi sa i cana ndo sii. Ta ñá catyi sa ma cuu quisi. Ta vityí cuñi cote ¿ñaa cuenda i cana ndo sii?

³⁰Tacuan i cahan ra Pedro ta ziqui i catyi ra Cornelio: Sa yaha cumi quivi ta zuun ñi tyehen cuhva i sica tahvi sii ra Ndyoo sisi vehi vatyí tacuan tuhve zacuu sa sahiñi, ta i quituu minoo ra nui. Cuisi xaan zahma ra.

³¹Ta i catyi ra cuan sihin:
 “Cornelio, i siñi ra Ndyoo sa cohon
 sihin ra ta nacohon iñi ra tandihi
 sa zavohon ta cuhva tyindyeeun sii
 ñiyivi ndahvi.

³²Vityi cua tasun tyiño ndya ñuu
 Jope vatyí cua canon sii minoo
 ra sa nañi Simón Pedro. Ndyaa ra
 vehe minoo ra zatyahyu ñii. Nañi
 tucu ra cuan Simón. Yuhu tyañuhu
 iyo vehe ra. Naquisi maa ra ta cua
 zacuaha ra suun.”

³³Tacuan i cuu si, ta yatyí i tasi
 tyiño sa nanducu ñiyivi suun. Ta
 vaha vatyí i quisun. Ta vityí yucu
 yo ihya nuu ra Ndyoo, ta cuñi ndi
 tyizoho ndi tandihi cuíi cuhva tasi
 ra Ndyoo suun sa zacoton sii ndi.

Cuhva i cahan ra Pedro vehe ra Cornelio

³⁴Tacuan ta i quisaha cahan ra
 Pedro ta catyi ra: Vityí cutuñi iñi
 vatyí inuu ñi cuñi ra Ndyoo sii
 tandihi cuíi ñiyivi. Ñahñi sa ziin
 iyo yo cuhva cuñi ra sii yo.

³⁵Ta tandihi ñuu cuñi ra Ndyoo
 sii yoo ra zavaha sa vaha, sii yoo
 ra yuhu ta tyaa ra yahvi sii ley ra
 Ndyoo.

³⁶I cahan ra Ndyoo sihin nduhvi
 ñiyivi hebreo, ta nacatyí ra sihin
 ndi vatyí cua coo sa taxi ñi añima
 yo sa cuenda ra Jesucristo. Ta maa
 ra cuu ra ndyaca ñaha sii tandihi
 sa iyo.

³⁷Sito vaha maa ndo ñaa sa sicoo
 ñuu ra hebreo. I quisaha si ñuu
 sa nañi Galilea. Xihna ca i zacoo
 ndutya ra Juan sii ñiyivi, ta i
 zacuaha ra sii ñu.

³⁸Ta ziquí i quita ra Jesús, ra ñuu
 Nazaret, ta saha ra Ndyoo cuhva

sii ra sa cuenda Tatyí Ii. Ta i sica
 noo ra Jesús, ta i zavaha ra sa vaha,
 ta i zanduvaha ra sii ñu ndyehe
 tundoho cuenda cuihna. Tacuan i
 zavaha ra vatyí i tyindyee ra Ndyoo
 sii ra.

³⁹Ta maa ndi cuu ra cu sa ndaa
 sa cuenda tandihi sa i zavaha ra
 Jesús nu cu si Judea ta ñuu cahnu
 Jerusalén. Ta i tyaa ñu sii ra nu
 cruz, ta i sahñi ñu sii ra.

⁴⁰Zoco sa yaha uñi quivi ta i
 zanandoto ra Ndyoo sii ra. Ta i saha
 ra sa ndyehe maa ndi sii ra Jesús.

⁴¹Ñá quituu ra nuu tandihi ñiyivi.
 Maa ñi nuu maa ndi, ra i casi ra
 Ndyoo vatyí cua cuu ndi sa ndaa.
 Sasi ndi sihin ra ta sihi ndi ndutya
 sihin ra ta sa yaha nandoto ra sa
 sihi ra.

⁴²Ta i tasi ra sii ndi sa nacatyí
 ndi sihin ñiyivi. Ta sa ndaa cuu ndi
 vatyí vityí i saha ra Ndyoo tyiño
 sii ra Jesús sa cuu ra juez sii ñiyivi
 ndito ta sii ñiyivi i sihi.

⁴³Sa cuenda ra Jesús i cahan
 tandihi ra profeta ta tyiemvu ta
 catyi ra vatyí tandihi ñiyivi sino iñi
 sii ra Jesús cua zandasi ra cuatyí ñu.

Cuhva i quihvi Tatyí Ii añima ñiyivi sa yivi ñiyivi hebreo cuu

⁴⁴Ta zuun ñi cuhva sa cahan ra
 Pedro ta i noo Tatyí Ii sii tandihi ñu
 tyizoho.

⁴⁵Ta ra hebreo sa sino iñi Tuhun
 Ndyoo, ra i quisi sihin ra Pedro, iyo
 xaan i cuñi ra vatyí saha ra Ndyoo
 Tatyí Ii ra sii inga ñiyivi sa yivi
 ñiyivi hebreo cuu.

⁴⁶Vatyí siñi ra sa cahan ñu inga
 tuhun sa ña tuhva ñu cahan ta
 zacahnu ñu sii Ndyoo.

⁴⁷Tacuan ta i catyi ra Pedro: Sa i saa Tatyí li sii ñiyivi ya cuhva i saa ra sii maa yo. Ta vityi yoñi ra cua catyi vatyí ma cuu coo ndutya ñu.

⁴⁸Tacuan, ta i catyi ra Pedro vatyí cua coo ndutya ñu sa cuenda ra Jesucristo. Ta sa yaha sicoo ndutya ñu ta i sica ca ñu sa ndoo ra Pedro zuhva ca quivi ñuu ñu.

**Saha ra Pedro cuenda sii ra
ndyizo tyiño nu iyo ñiyivi
sino iñi ñuu Jerusalén**

11 Ra apóstol ta inga ra sino iñi Tuhun Ndyoo nu cu si Judea i ñihi ra tuhun vatyí sino iñi ñiyivi Tuhun Ndyoo. Ta yivi ñiyivi hebreo cuu ñu.

²Ta sa naquita ra Pedro ñuu Jerusalén ta ra hebreo ra sino iñi sii ra Jesús i cahan ra sii ra Pedro vatyí ra hebreo cuan ñihi xaan ndyico ra costumbre ñiyivi hebreo ta sica iñi ra vatyí ñiñi xaan sa tahndya ñii xiñi xuu rayi ndihi ca, ta tacuan ta cua cacu añima ra, sica iñi ra cuan.

³Ta i catyi ra: ¿Ñaa cuenda sohon vehe ñiyivi cuan ta yivi ñiyivi hebreo cuu ñu? ¿Ta ñaa cuenda sasun sihin ñu ta ña ndyico ñu costumbre maa yo?

⁴Tacuan ta i nacatyí ra Pedro tandihi sihin ra ndya cuhva quisaha tyiño cuan ta catyi ra:

⁵Ta sindyaa mi ñuu Jope ta zuun ñi cuhva sa sica tahvi sii ra Ndyoo ta i ndyehi minoo sa ndyehi. I noo minoo tañi minoo zahma yuu cahnu. I noo si sihin cumi tahan siqui si ndya nu ndyei.

⁶Ta i ndyehe vehi vatyí cua ndyehi ñaa sa ñoho sisi si, ta i

ndyehi vatyí ñoho tandihi nuu quiti iyo cumi tahan saha ta ñoho coo ta ñoho zaa.

⁷Ta i siñi sa cahan ra Ndyoo ta catyi ra: “Nduviton Pedro. Cahñun sii ti ta casun.”

⁸Zoco i catyi: “Ma cuu tata vatyí tañaha ca casi sa cuxi caa.” (Ta ica casi quiti cuan sa cuenda costumbre maa yo.)

⁹Tacuan ta ziqui i cahan tucu ra Ndyoo ta catyi ra: “Ma catyun vatyí ica sa sehi suun.”

¹⁰Tacuan i cuu si uñi tahan saha, ta ziqui i nandaa tucu si ityi ziqui.

¹¹Ta zuun ñi caa cuhva cuan i saa uñi tahan ra vehe nu ndyei. I tasi ñiyivi sii ra ndya ñuu Cesarea vatyí cua nanducu ra sii.

¹²Ta i tasi Tatyí li sii sa cuhin sihin ra ta i catyi si sihin vatyí ma caca xaan iñi. Ta i sahan tucu maa ra ihya sa iñu tahan ca ra sino iñi Tuhun Ndyoo. Tandihí ndi i quihvi ndi vehe ra sa i cana sii ndi.

¹³Ta i nacatyí maa ra sihin ndi cuhva i ndyehe ra minoo ángel sisi vehe ra. Nandyaa si ta catyi si: “Tasun sii ra cua cana sii ra Simón Pedro ndya ñuu Jope.

¹⁴Ta cua nacatyí ra Pedro cuan suhun yozo caa cua cacun sihin ñiyivi suun.” Tacuan i catyi ángel cuan sihin ra.

¹⁵Ta sa quisehi quehin sihin ñu ta i noo Tatyí li sii ñu tañi i noo ra sii maa yo sa xihna ñi.

¹⁶Tacuan ta i nachohon iñi cuhva i catyi ra Jesús: “Ndisa i zacoo ndutya ra Juan sii ñiyivi sihin ndutya, zoco sihin Tatyí li cua coo ndutya maa ndo.”

¹⁷Ta vityí tatu iñi ñi cuhva saha tucu ra Ndyoo sii ñu inuu ñi tañi

saha ra sii maa yo ra sino iñi sii ra Jesucristo, ¿ñāa cuenda ma tahan iñi yo cuhva zavaha ra Ndyoo? I catyi ra Pedro.

¹⁸Tacuan i cuu ta sa siñi ra sino iñi Tuhun Ndyoo ñuu Jerusalén cuhva cuan, ta ñá cahan ca ra, ta i zacahnu ra sii ra Ndyoo. Ta i catyi ra: Saha ra Ndyoo sa sino tucu iñi inga ñiyivi vazu yivi ñiyivi hebreo cuu ñu. Ta vityi cua zama ñu cuhva iyo ñu, ta tacuan ta cua ñihi ñu sa cundito ñu tandihi cuii tyiemvu.

**Ñiyivi sino iñi Tuhun
Ndyoo ñuu Antioquía**

¹⁹Ta sa i sahñi ñiyivi sii ra Esteban ta ziqui i quisaha sicoo tundoho sii inga ñiyivi sino iñi Tuhun Ndyoo. Ta tandihi ñu i sitya cuatyí. Zuhva ñu i saa nu cu si Fenicia ta ñuu Antioquía ta inga ñu i saa minoo ñuhu sa nañi Chipre sa ndyaa mahñu tyañuhu. Ta i nacatyí maa ñu Tuhun Ndyoo maa ñi sihin ñiyivi hebreo.

²⁰Zoco zuhva ñu sino iñi, ñiyivi ñuu Chipre ta ñuu Cirene, cuahan ñu ndya ñuu Antioquía ta i nacatyí maa ñu Tuhun Ndyoo sihin ñiyivi sa yivi ñiyivi hebreo cuu. I nacatyí ñu sihin ñu tuhun ra Cristo Jesús.

²¹I saha xaan ra Ndyoo cuhva sii ñu, ta cuaha xaan ñiyivi i sino iñi ta i zandoo ñu costumbre sahnu sii ñu. Ta i sindyico ñu sii ra Jesús.

²²I saa tyiño ya ndya nu yucu ñu sino iñi ñuu Jerusalén, ta i tasi ñu sii ra Bernabé ndya ñuu Antioquía.

²³Ta sa saa ra, ta i ndyehe ra vatyí ndisa i tyindyee xaan ra Ndyoo sii ñiyivi cuan. Ziñ xaan i cuñi ra, ta i saha ra tyiño sii ñu sa

tyaa xaan ñu yahvi sii ra Jesús ta cundyico ñu sii ra sihin tandihi cuii añima ñu.

²⁴Vaha xaan ra cuu ra Bernabé, iyo xaan Tatyí Ii sii ra, ta ñiñ xaan iñi ra. Ta cuaha xaan ñiyivi i sino iñi sii ra Jesús sa cuenda maa ra.

²⁵Tacuan ta ziqui cuahan ra Bernabé ndya ñuu Tarso vatyí cua nanducu ra sii ra Saulo.

²⁶Ta sa nañihi ra sii ra, i sindyaca ra sii ra ndya ñuu Antioquía. Ta minoo maa cuiya i sindyaa nduu tahan ra sihin ñiyivi sino iñi yucuan, ta i zacuaha ra sii cuaha xaan ñiyivi. Ta ñuu Antioquía cuan cuu ñuu sa xihna ñi nu i zacunañi ñiyivi cristiano sii ñu ndyico sii ra Cristo.

²⁷Ta quivi cuan i quita zuhva ra profeta ñuu Jerusalén ta cuahan ra ndya ñuu Antioquía.

²⁸Minoo ra nañi ra Agabo. I nduvita ra nu yucu ra sino iñi Tuhun Ndyoo ta i cahan ra cuhva catyi Tatyí Ii sihin ra. I catyi ra vatyí cua quisi minoo tama cahnu xaan nacahnu ñuu ñiyivi. Ta tacuan i tahan si cuhva i catyi ra zuun ñi sisi quivi i sindyaca ñaha ra emperador Claudio.

²⁹Tacuan ta ñu sino iñi ñuu Antioquía i sica iñi ñu vatyí cua tasi ñu xuhun ta tyindyee ñu sii ñu sino iñi nu cu si Judea. Cua tasi tahan tahan ñu yozo cuhva sa cundyee iñi ñu.

³⁰Ta tacuan i zavaha ñu. I tasi ñu xuhun i zacasi tahan ñu sihin ra Bernabé ta ra Saulo ndya nu ndyaa ra ndyizo tyiño nu yucu ñu sino iñi Tuhun Ndyoo ñuu cuan.

**Sihi ra Jacobo ta quihvi
ra Pedro vehe caa**

12 Ta zuun ñi tyiemvu cuan i quisaha ra rey Herodes

zavaha ra sa ña vaha sihin ñiyivi sino iñi Tuhun Ndyoo.

²Sahñi ñiyivi sii ra Jacobo yañi ra Juan sihin minoo mityi i zacuu ra Herodes.

³Ta sa ndyehe ra Herodes vatyi tahan iñi ñiyivi hebreo sa tacuan ta ziqui i tiin ra sii ra Pedro. Ta i cuu si quivi vico zavaha ñiyivi hebreo sa nacohon iñi ñu quivi i quita ñu ñuu Egipto. Ta vico cuan tuhva ñu casi pan ña ndaa.

⁴Ta i tiin ra Herodes sii ra Pedro ta i tyihi ra sii ra vehe caa. Cumi ityi zandaru i sicumi sii ra. Ta cumi tahan zandaru i cuu tahan tahan ityi ra. Sa cumi tahan zandaru i sicumi sii ra tahan tahan ora. Sica iñi ra Herodes vatyi ndya sa yaha vico tacuan ta ziqui cua cutuñi ra Pedro ta cua cuu ra nuu ñiyivi hebreo vatyi tacuan ta zii cua cuñi ñu.

⁵Ñoho ra Pedro vehe caa ta sicumi xaan zandaru sii ra, zoco ñiyivi sino iñi Tuhun Ndyoo sica tahvi xaan ñu sii ra Ndyoo sa cuenda ra.

**Zacacu ra Ndyoo sii ra
Pedro sisi vehe caa**

⁶Tacuan ta zuun ñi sa cuaa cuan sica iñi ra Herodes vatyi inga quivi cua tasi ra sii ra Pedro cunahma ra nu yucu ñiyivi. Ta sa cuaa cuan i quixi ra Pedro ticui uu tahan zandaru. Nuhñi ra sihin uu tahan cadena. Ta cumi inga zandaru yuvehe caa cuan.

⁷Ta ta sica ñi i quihvi minoo ángel Ndyoo sisi vehe caa ta i ndundisi. I tiin ángel cuan zoco ra Pedro vatyi cua zandoyo ra sii

ra. Ta i catyi ra sihin ra: Zanumi. Nduviton. Ta ta sica ñi i ndasi cadena ndaha ra Pedro.

⁸Ta i catyi ángel sihin ra: Nacuhñi vaha sisun ta natyuhun zapato sohon. Ta tacuan i zavaha ra. Ta i catyi ángel sihin ra: Nazucun zahmon suun. Ta quisi ndyicon sii.

⁹I sindyico ra Pedro sii ángel cuan sisi vehe caa cuan. Ña sito ra a sa ndisa zacuu ángel a ñimahna tahan ra.

¹⁰I yaha nduu tahan ra sa xihna ñi nu cumi minoo zandaru, ta ziqui i yaha ra sa cu uu nu cumi inga ra ta i saa ra minoo yuvehe cahnu. Vee xaan si. Maa caa cuu si. Ta yucuan yuvehe quita si ndya calle. I nuña ñi maa yuvehe cuan ta i quita ra. I sica ra zuhva ca ta i zandoo ángel sii ra Pedro.

¹¹Tacuan ta ziqui i sito ra Pedro sa ndisa ta i catyi ra: Vityi site vatyi ndisa cuu si. I tasi ra Ndyoo minoo ángel ta i zacacu ra sii mi si ndaha ra Herodes ta cuhva sa ña vaha sa cuñi ñiyivi hebreo zavaha ñu sihin.

¹²Tacuan i sica iñi ra Pedro ta cuahan ra ndya vehe ña María zihhi ra Juan Marcos. Yucuan siyucu cuaha xaan ñiyivi. Sica tahvi ñu sii Ndyoo.

¹³I cati ra Pedro yuvehe nuzama. Ta i quisi minoo ña cu muzu. Nañi ña Rode.

¹⁴I nacoto ña nduzu ra Pedro sa cahan ra, ta zii xaan i cuñi ña ta nu yuvehe ñá nuña ña. Sino ña i sinacaty i ña sihin ñiyivi vatyi ndyaa ra Pedro yuvehe cuan.

¹⁵Zoco ñiyivi cuan i catyi ñu sihin ña: Zana tahan xiñun. Ta i catyi maa ña vatyi ndisa cuui vatyi maa

ra cuu ra. Ta ziqui i catyi ñiyivi: Ángel sa zacuenda sii ra cuu si.

¹⁶Ta ra Pedro ndita ñi i cati ra yuvehe cuan. Tacuan ta i nuña ñu yuvehe ta iyo xaan i cuñi ñu sa nandyeha ñu sii ra Pedro.

¹⁷Ta saha ra Pedro zeña sii ñu sihin ndaha ra nacutaxi ñu, ta i nacaty i ra sihin ñu yozo caa i tava ra Ndyoo sii ra vehe caa. Ta catyi ra sihin ñu: Tacuan nacaty i ndo sihin ra Jacobo ta sihin inga ra sino iñi Tuhun Ndyoo, i catyi ra. Tacuan i cahan ra ta ziqui cuahan ra.

¹⁸Ta sa vasi cundisi ta sica xaan iñi tandihi zandaru vaty i ña sito ra ndyamaa cuahan ra Pedro.

¹⁹I tasi ra Herodes tyiño sa cua nanducu ra sii ra Pedro, zoco ña nañihi ra sii ra. Tacuan ta ziqui i zanahma xaan ra Herodes sii zandaru cuan. Ñá ñihi zandaru cuhva nacaty i ra. Tacuan i cuu, ta i catyi ra Herodes vaty i cua cuu tandihi zandaru cuan. Tacuan ta cuahan ra Herodes inga ñuu sa nañi Cesarea cua cundyaa ra.

Sihi ra Herodes

²⁰Xaan xaan cuñi ra Herodes sihin ñiyivi ñuu Tiro ta ñiyivi ñuu Sidón ta ñá cuñi ra tyindyee ra sii ñu. Ta ziqui i saa ñiyivi ñuu cuan nu iyo ra ta i cahan ñu sihin ra Blasto. Mínoo ra ndyizo tyiño nuu ra Herodes cuu ra. I tyiyahvi ñiyivi sii ra sa cuu ra yuhu ñu nuu ra Herodes. I sica ñiyivi cuan sa coo sa taxi ñi sihin ra Herodes ta sihin ñuu ñu vaty i tandihi sa sasi ñu quita si ñuhu nu ndyaca ñaha ra Herodes.

²¹Ta i sata ra Herodes quivi sihin ñu. Ta sa saa quivi i ndihvi ra zahma vaha ra ta i sindyaa ra tyayu cahnú ra ta i cahan ra sihin ñu.

²²Ta sa ndihi cahan ra ta tandihi cuii ñiyivi i catyi: Yivi ñiyivi cuu ra cahan ya. Ndyoo cuu ra.

²³Zuun ñi caa cuhva cuan i quihin cuehe sii ra Herodes i zacuu minoo ángel Ndyoo vaty i tahan iñi ra Herodes sa catyi ñiyivi vaty i Ndyoo cuu maa ra. Cahnú xaan tundoho i ndyeha ra vaty i sasi tindacu sii ra ta sihi ra.

²⁴Tacuan i cuu ta Tuhun Ndyoo cuahan ca nducahnú ca si. Nacaty i xaan ca ñiyivi Tuhun Ndyoo sihin inga ñiyivi.

²⁵Sa ndihi tyiño ra Bernabé ta ra Saulo ñuu Jerusalén, ta i ndisi nanuhu ra ndya ñuu Antioquía. I quihin ra sii ra Juan Marcos ta vasi ra sihin ra.

Zatyño tucu ra Bernabé ta ra Saulo tyiño Ndyoo

13 Ihya cuu zivi ra profeta ta ra zacuaha Tuhun Ndyoo sii ñiyivi ñuu Antioquía. Mínoo ra nañi ra Bernabé, inga ra nañi ra Simón, ra nengu cuu inga zivi ra. Inga ra nañi ra Lucio ra ñuu Cirene sihin ra Saulo ta ra Manaén. Hín ñi i sahnú ra Manaén sihin ra Herodes ra ndyaca ñaha nu cu si Galilea.

²Mínoo quivi i siyucu tandihi ra cuan. Ta ñá sasi ra xita vaty i zacahnú ra sii ra Ndyoo ta ziqui i catyi Taty i li sihin ra: Cua tasi ndo sii ra Bernabé sihin ra Saulo nu cua zatyño ra sa cuenda mi vaty i cua cuhve tyiño sii ra.

³Tacuan ta i sica tahvi ca ra cuan sii Ndyoo ta ñá sasi ra xita, ta ziqui i tyizo ra ndaha ra sii ra vatyí cua cuizo tyiño ra ta i tasi ra sii ra.

**Nacatyí ra Pablo Tuhun
Ndyoo nu cu si Chipre**

⁴Tacuan i tava Tatyí Ii tyiño sii ra Bernabé sihin ra Saulo ta cuahan ra ndya Seleucia, ta indyacuan i quihin ra barco vatyí cua cahun ra ndya minoo ñuhu sa ndyaa mahñu tyañuhu, nañi si Chipre.

⁵Ta yucuan i saa ra, minoo yuhu tyañuhu nu nañi si Salamina ta i quisaha zacuaha ra Tuhun Ndyoo sii ñiyivi vehe ñuhu ñiyivi hebreo. Ta cuahan tucu ra Juan sihin ra cua tyindyee ra sii ra.

⁶I sica noo ra nacahnu ñuhu Chipre ta i saa ra ñuu Pafos. Indyacuan i tahan ra sii minoo ra nañi Barjesús. Minoo ra tazi cuu ra. Vatyá xaan ra ta catyí ra vatyí cahan ra sa cuenda ra Ndyoo.

⁷Ndyaa ra cuan sihin ra Sergio Paulo, ra cu gobernador. Casi xaan iñi ra Sergio cuan. I cana ra sii ra Bernabé ta ra Saulo vatyí cuñi ra tyizoho ra Tuhun Ndyoo.

⁸Zoco ra tazi cuan, Elimas cuu inga zivi ra. Ñá saha ra sa tyizoho ra gobernador sa cahan ra Saulo vatyí ñá cuñi ra sa cua sino iñi ra sii ra Jesús.

⁹Ta ra Saulo, ta nañi tucu ra Pablo, situ xaan Tatyí Ii sii ra ta ñihi xaan i ndyehe ra sii ra ta catyí ra:

¹⁰Ra zandavi ñaha cuun. Tandihí cuii sa ña vaha zavohon. Zehe cuihna cuu suun ta numinoo sa vaha ña zavohon. Ta zamon

cuhva cahan ra Ndyoo sa ndisa ta nacatyun sa vatyá.

¹¹Ta vityí cua tasi tuñi ra Ndyoo suun. Cua cuoon zuhva quivi, ta ma ndyehun ñuhu ñicandyi. Ta ta sica ñi i cuaa ra. Ta i nducu ra yoo ra tiin ndaha ra ta cundyaca ra sii ra vatyí ña cuu ndyehe ra.

¹²Ta sa ndyehe ra gobernador sa tahan ra tazi cuan ta i sino iñi ra sii ra Jesús vatyí iyo xaan i cuñi ra sa ndyehe ra yozo caa iyo tuhun sa cuenda ra Jesús.

**Cuahan ra Pablo ta ra Bernabé ndya
ñuu Antioquía sa cuu cuenda Pisidia**

¹³I quita ra Pablo sihin ra tahan ra ñuu Pafos sihin barco ta cuahan ra ndya ñuu Perge sa iyo cuenda Panfilia. Yucuan i zandoo ra Juan sii ra ta cua nanuhu ra ndya ñuu Jerusalén.

¹⁴Ta ziqui i quita ra Pablo ñuu Perge ta cuahan ra minoo ñuu cahnu sa nañi Antioquía sa cuu cuenda Pisidia. Ta yucuan sahan ra vehe ñuhu ñiyivi hebreo quivi quitatu ñiyivi, ta i sicundyaa ra.

¹⁵Sa xihna ñi i cahvi ñiyivi zuhva sa i tyaa ra Moisés ta ziqui i cahvi ñu sa tyaa inga ra profeta ta tyiemvu. Tacuan i cuu ta ziqui i tasi ra cu nuu sii vehe ñuhu cuan tyiño sii ra Pablo ta catyí ra: Yañi xaa, tatu iyo minoo tuhun sa cuñi ndo zacoto ndo sii ñiyivi. Cuu nacatyí ndo sihin ndi vityí.

¹⁶Tacuan ta i nduvita ra Pablo ta saha ra minoo zeña sihin ndaha ra sa cua cutaxi ñiyivi ta catyí ra: Tyizoho ndo yañi xaa, ndoho ra hebreo, ta tandihí inga ndoho, ra yuhu sii ra Ndyoo.

¹⁷Ra cu Ndyoo sii maa yo ñiyivi hebreo i casi ra sii ñiyivi sahnu sii yo. Ta i tyindyee ra sii ñu, ta i nduu ñu minoo ityi ñiyivi cahnu xaan vazu i sica noo ndahvi ñu ñuu Egipto. Ta ziqui sihin cuhva iyo sii maa ra i tava ra sii ñu ñuu cuan.

¹⁸I cundyee xaan iñi ra Ndyoo sihin ñu tañi uu xico cuiya sa sica noo ñu nu yoñi maa ñiyivi iyo ta i zavaha ñu cuhva cuñi maa ñu.

¹⁹Ta i zanaa ra usa tahan ityi ñiyivi nu cu si Canaán vaty i cua cuhva ra ñuhu cuan sii ñiyivi sahnu sii yo.

²⁰Ta ziqui cumi ziendu uu xico usi cuiya saha ra Ndyoo sa cundyaca ñaha juez sii ñiyivi ndya quivi i naquihin ra Samuel tyiño cuan. Ta ra Samuel i cuu tucu ra minoo ra cu profeta.

²¹Ta ziqui i sica ñiyivi minoo rey, ra cua cundyaca ñaha sii ñu. Ta i saha ra Ndyoo sii ra Saúl zehe ra Cis sii ñu. Niyivi sii ra Benjamín i cuu sii ra. I sindyaca ñaha ra Saúl sii ñu uu xico cuiya.

²²Ta i tava ra Ndyoo sii ra. Ta ziqui i saha ra sii ra David sa cuu ra rey, ta sa cuenda maa ra i catyi ra Ndyoo: “Site sii ra David zehe ra Isaí. Zi xaan cuñi sihin ra vaty i cua zavaha ra tandihi cuii sa cuñi.”

²³Ta ñiyivi sahnu sii ra Jesús i cuu sii ra David. Ta i tasi ra Ndyoo sii ra Jesús vaty i cua zacacu ra sii ñiyivi hebreo tañi sa i catyi ra Ndyoo ta tyiemvu.

²⁴Cumañi ca saa ra Jesús ta i nacaty i xaan ra Juan sihin tandihi ñiyivi hebreo vaty i ndu-uu iñi ñu cuaty i ñu ta coo ndutya ñu.

²⁵Ta sa cuñi ndihi tyiño ra Juan ta i catyi ra: “Ndatu ndo sii minoo

ra cahnu xaan. Ta sica iñi ndo vaty i zuun ra cui. Zoco yivi ra cui. Ra i tasi ra ityi nuu cui. Ra vaha xaan ca cuu maa ra, ta ñiñi xaan ra, ta yucuan cuenda ma cuu tyindyeyi sii ra nu zuhva tañi sa ndasi tyiendu ndisa ra.” Tacuan i catyi ra Juan.

²⁶Ta cahan ca ra Pablo ta catyi ra: Yañi xaa, ndoho ñiyivi ra Abraham ta tandihi inga ndo, ra yuhu sii ra Ndyoo. Saha ra Ndyoo cuhva cacu ndo.

²⁷Ñiyivi ñuu Jerusalén sihin ra ndyaca ñaha sii ñu, ñá sito ñu yoo ra cuu ra Jesús vaty i zehe Ndyoo cuu sii ra, ta ñá ñihi ñu cuhva sihin tuhun i tyaa ra profeta ta tyiemvu vazu cahvi ñu sii si vehe ñuhu ñu tahan xiñi vitya. Ta zuun ñi ñiyivi cuan i tyaa cuaty i sata ra Jesús. Ta tacuan i natahan si tañi sa catyi ra profeta.

²⁸Ta vazu ñá ñihi ñiyivi cuhva sa tyaa ñu cuaty i sata ra Jesús sa ndisa cuii, zoco i sica ñu sii ra Pilato sa cuu ra.

²⁹Ta sa yaha zavaha ñu tandihi cuhva catyi Tuhun Ndyoo sa cuenda ra Jesús ta ziqui i zanoo ñu sii ra nuu cruz ta tyihi ñu sii ra ñaña sisi minoo yavi yuu.

³⁰Zoco i zanandoto ra Ndyoo sii ra sisi sa i sihi ra.

³¹Ta cuaha xaan quivi i quituu ra Jesús nuu ñiyivi i quisi sihin ra ndya Galilea ta ñoho ñu ñuu Jerusalén. Ta vityi maa ñu cu ñu nacaty i sihin ñiyivi vaty i ndyehe ñu sii ra.

³²Ta vityi nacaty i maa ndi minoo cuhva vaha sihin ndo vaty i tañi sa sito ndo vaty i ta tyiemvu saha ra Ndyoo cuenda sii ñiyivi sahnu

sii yo yozo caa cua zavaha ra nu cuahan quivi.

³³Ta vityi sito yo vatyi sa zavaha ra Ndyoo cuhva catyi ra vatyi saha ra tundyee iñi sii ra Jesús, ta i nandoto tucu ra. I tyaa ra David salmo número uu. I tyaa ra David cuhva i cahan ra Ndyoo sa cuenda ra Jesús ta catyi ra: “Zehe mi cuu suun, ta vityi cua ndyehe ñiyivi vatyi sehi sa cua nandoton.”

³⁴Iyo inga nu catyi tucu ra Ndyoo sa cuenda ra Jesús: “Cua tyindyeyi suun sa ndisa, cuhva i catyi sihin ra David.” Tacuan i catyi ra Ndyoo vatyi cua zanandoto ra sii ra Jesús sisi sa i sihi ra. Ma cuhva ra Ndyoo sa tyahyu coño ñuhu ra Jesús.

³⁵Yucuan cuenda catyi tucu inga salmo: “Ma cuhvon sa tyahyu coño ñuhu ra tyaa xaan yahvi suun.”

³⁶Sa ndisa cuu si vatyi i zavaha ra David cuhva cuñi ra Ndyoo sa sindito ra ñuu ñiyivi, ta ziqui i sihi ra ta i tyihi ñiyivi sii ra sisi ñaña ta i tyahyu coño ñuhu ra.

³⁷Zoco coño ñuhu ra i zanandoto ra Ndyoo, ña tyahyu si.

³⁸Yañi xaa, cuñi si sa coto ndo vatyi sa cuenda ra Jesús ta cua zandasi ra Ndyoo cuatyí ndo.

³⁹Ma nduvaha aña ndo vazú cumi vaha xaan ndo ley i saha ra Ndyoo sii ra Moisés. Vatyi ma nduvaha aña ndo sa tacuan ñi. Ra Jesús cua zanduvaha aña ndo tatu cua sino iñi ndo sii ra.

⁴⁰Zacuenda vaha ndo sii ndo coto cua tahan ndo cuhva i tyaa ra profeta ta tyiemvu. I catyi ra:

⁴¹Ndyehe ndoho, ra ña sino iñi.

Cu-iyó xaan ndo ta cua cunaan do.

Vatyi cua zavehi minoo cuhva.

Ta iyo xaan cua cuñi ndo.

Ta ma sino iñi ndo

Numaa nacatyí xaan ñiyivi sito sihin ndo.

Ta ihya i ndihi sa cahan ra Pablo sihin ñiyivi.

⁴²Ta sa quita ra Pablo sihin ra tahan ra sisi vehe ñuhu hebreo cuan. Ta i sica ñiyivi sa yivi ñiyivi hebreo cuu sii ra Pablo vatyi cua zacuaha tucu ra sii ñu inga quivi quitatu ñiyivi.

⁴³Ta sa quita tandihi ñiyivi vehe ñuhu ta cuaha xaan ñiyivi hebreo ta ñiyivi tyaa xaan yahvi ley ñiyivi hebreo, i sindyico ñu sii ra Pablo ta ra Bernabé. Ta i nacatyí xaan ra Pablo ta ra Bernabé sihin ñu vatyi ma naa iñi ñu sa nacatyí ra sihin ñu ta nacañi vaha iñi ñu yozo caa zavaha xaan ra Ndyoo tumañi iñi sii ñu.

⁴⁴Ta inga vitya quivi quitatu ñiyivi i titahan sa yatyi tandihi ñiyivi ñuu cuan vatyi cua tyizoho ñu Tuhun Ndyoo.

⁴⁵Zoco sa ndyehe ñiyivi hebreo, ra ña sino iñi, vatyi i titahan cuaha xaan ñiyivi ta i cucuihna iñi ra. Ta i quisaha catyi ra vatyi ña vaha sa cahan ra Pablo ta i cahan ra ndya vaha ñi sii ra.

⁴⁶Zoco ñá yuhu ra Pablo ta ra Bernabé ta i quisaha catyi ra sihin ñu: Cuñi si sa nacatyí ndi Tuhun Ndyoo xihna ca sihin maa ndo vatyi ñiyivi hebreo cuu ndo, zoco ña cuñi ndo tyizoho ndo. Ta cuhva zavaha ndo zañaha ndo vatyi ña cuñi ndo sa cuhun ndo gloria. Ta yucuan cuenda cua cuhun ndi nu iyo inga ñiyivi sa yivi ñiyivi hebreo cuu.

⁴⁷Tacuan cua zavaha ndi vatyí ndya ta tyiemvu i catyí maa ra Ndyoo: “Tañi minoo ñúhu cua cuu maa ndo sii tandíhi ñiyívi ñuu ñiyívi vatyí cua nacatyí ndo sihin tandíhi cuii ñiyívi yozo caa cua nduvaha añima ñu.” Ta i cahan ra Ndyoo cuhva cuan sa cuenda maa ndi.

⁴⁸Ta sa siñi ñiyívi, ñu sa yívi ñiyívi hebreo cuu, ta zii xaan i cuñi ñu, ta i quisaha catyí ñu vatyí vaha xaan cuu Tuhun Ndyoo. Ta tandíhi ñu i casi ra Ndyoo vatyí cuhun ñu gloria, i sino iñi ñu.

⁴⁹Tacuan i cuu ta i sitya Tuhun Ndyoo tandíhi ñuu yucuan.

⁵⁰Zoco i cahan ra hebreo, ra ña sino iñi, sihin minoo ityi ñu zihí, ñu zacahnu sii ra Ndyoo cuhva iyo costumbre maa ñu, ta i cahan tucu ra hebreo sihin ra ñiñi ñuu cuan ta i quisaha ra cuatyí cuhva ndya i tava ra sii ra Pablo ta ra Bernabé ñuu cuan.

⁵¹Tacuan ta ziquí i quízi ra Pablo ta ra Bernabé saha ra ta i tava ra ñiyaca ñuu cuan vatyí ma ndoo ca ra sihin ñiyívi ñuu cuan ta cuahan ra ndya minoo ñuu cahnu sa nañi Iconio.

⁵²Zoco zii xaan i cuñi ñu sino iñi ñuu Antioquía cuan, ta i sicoo xaan Tatyí Ii sihin ñu.

Ñoho ra Pablo ta ra Bernabé ñuu Iconio

14 Ñoho ra Pablo ta ra Bernabé ñuu Iconio ta i quihvi ra vehe ñuhu ñiyívi hebreo. Vaha xaan i cahan ra yucuan ndya cuhva ndya i sino iñi cuaha xaan ñiyívi, ñu hebreo ta inga ñiyívi.

²Zoco ra hebreo, ra ña sino iñi, i cahan ra ndya vaha ñi sii ra sino iñi Tuhun Ndyoo ta i zasino ra iñi ñiyívi sa yívi ñiyívi hebreo cuu minoo cuhva ña vaha.

³Yucuan cuenda i ndoo ra Pablo ta ra Bernabé naha xaan indyacuan. Ñá yuhu ra ta cahan ra Tuhun Ndyoo vatyí ñii cuu iñi ra sii Ndyoo. Ta i saha ra Ndyoo cuhva sii ra sa zavaha ra sa ndyityí vatyí tacuan ta cua coto ñiyívi vatyí cahan ra sa ndisa sa catyí ra vatyí cuñi xaan ra Ndyoo sii ñu.

⁴Ñá ndu-ñin ñiyívi ñuu Iconio cuan. Iyo ñu sino iñi ñu sa cahan ra hebreo, ra ña sino iñi, ta iyo ñu sino iñi ñu sa cahan ra apóstol.

⁵Tacuan ta ziquí ra hebreo ta inga ra sa yívi ra hebreo cuu i ndu-ñin ra sihin ra cu tyiño vatyí cua zavaha ra ndya vaha ñi sihin ra Pablo ta ra Bernabé. Ta cua cañi ra sii ra sihin yuu ndya cua cuu ra.

⁶Zoco i ñihi ra Pablo ta ra Bernabé tuhun cuan, ta sa sito ra sii si i sino ra ta cuahan ra ndya ñuu Listra ta ndya ñuu Derbe nu cu si Licaonia ta tandíhi inga ñuu iyo yucuan.

⁷Ta i nacatyí ra sihin ñiyívi yozo caa cua zacacu ra Ndyoo sii ñu.

Cañi xaan ñiyívi sii ra Pablo sihin yuu ñuu Listra

⁸Ñuu Listra sicoo minoo ra coxo. Ñá cuu caca ra. Maa sa ndyaa ñi ra vatyí coxo ra cacu ra.

⁹I tyizoho ra coxo sa cahan ra Pablo ta ndyehe ra Pablo sii ra ta nacoto ra vatyí ñii cuu iñi ra ta cua nduvaha ra.

¹⁰Tacuan ta ñihi xaan i cahan ra Pablo ta catyí ra: Nacuiñi ndyaa

vohon. Tacuan ta i nduvita ra ta i quisaha sica ra.

¹¹Ta sa ndyehe ñiyivi sa zavaha ra Pablo ta i quisaha cana saa ñu sihin zahan maa ñu, zahan ñuu Licaonia ta catyi ñu: Sa vasi uu tahan ndyoo ihya nu iyo yo. Caa ra cuhva caa maa yo. Catyi ñu.

¹²Ta tyiemvu sica iñi ñiyivi vatyi ra Júpiter ta ra Mercurio cuu ra cuu Ndyoo. Yucuan cuenda i catyi ñu vatyi minoo ndyoo nañi Mercurio cuu ra Pablo vatyi maa ra cuu ra cahan. Ta ra Bernabé cuu ra ndyoo sa nañi Júpiter.

¹³Ta i sicoo minoo zutu cuenda ra Júpiter. Ta i sicumi ra vehe ñuhu yu ñuu cuan. I sindyaca ra uu tahan zindiqui. Ta i sindyaca ra corona ita. I cuñi maa ra ta i cuñi ñiyivi sa zacahnu ñu vico nu saa ra Pablo ta ra Bernabé vatyi sica iñi ñu vatyi Ndyoo cuu ra. Ta yucuan cuenda cua cahñi ñu sii zindiqui cuan.

¹⁴Zoco sa sito ra Pablo ta ra Bernabé tuhun cuan ta i ndata ra zahma ndisi ra vatyi ñá tahan iñi ra sa zacuu ñiyivi Ndyoo sii ra. Ta cacono ra quihvi ra ndya mahñu ñiyivi ta i cana saa ra Pablo ta catyi ra:

¹⁵Ndoho tata, ¿ña cuenda zavaha ndo tacuan ta ñiyivi cuu ndi tañi maa ndo? ta vasi nacatyi ndi sihin ndo vatyi zandoo ndo sa zavaha ndo cuhva ya vatyi ñahñi tyindyee si. Sino iñi ndo sii ra Ndyoo sa ndisa cuui vatyi maa ra i zavaha andivi, ñuu ñiyivi ta tyañuhu ta tandihi sa iyo.

¹⁶Ndya ta tyiemvu ta ndya vityi saha ra Ndyoo sa zavaha tandihi ñiyivi cuhva cuñi maa ñu

¹⁷vazu zañaha ra sii ñu yoo ra cuu ra vatyi zavaha ra cuaha xaan sa vaha. Saha ra sa coon zavi ta sa coo vaha itu tandihi cuiya. Saha ra sa casi yo ta sa cuzii iñi yo. Catyi ra Pablo.

¹⁸Zoco vazu i nacatyi ra Pablo tuhun cuan, yii xaan ta i ñihi ra cuhva zandumazu ra iñi ñiyivi ta ma cahñi ñu zindiqui cuan ta ma zacahnu ñu vico sa cuenda ra.

¹⁹Tacuan ta i saa minoo ityi ñiyivi hebreo, ra ña sino iñi. Ra ñuu Antioquía ta ra ñuu Iconio cuu ra. I sino iñi ñiyivi sa cahan ra ndya vaha ñi sii ra Pablo. Ta i cañi xaan ñu sii ra Pablo sihin yuu cuhva ndya sica iñi ñu vatyi sa sihi ra, ta i xita cañoho ñu sii ra i sindyaca ñu sii ra ndya zava yu ñuu.

²⁰Ta i titahan ra sino iñi Tuhun Ndyoo siconduu nu caa ra Pablo, ta i nduvita ra ta nandihvi tucu ra ñuu cuan. Ta inga quivi i quita ra yucuan sihin ra Bernabé, cua cuhun ra ñuu Derbe.

²¹Ta sa yaha nacatyi ra Tuhun Ndyoo ñuu Derbe ta i sino iñi cuaha xaan ñiyivi, ta ziqui cua nanuhu tucu ra ndya ñuu Listra, ñuu Iconio ta ñuu Antioquía.

²²Indyacuan saha tucu ra tundyee iñi sii tandihi ñiyivi sino iñi Tuhun Ndyoo. Ta i catyi ra sihin ñu: Sino vaha iñi ndo sii ra Jesús, ta ma zaña ndo sii ra. Cua coo tundoho sii yo, zoco tacuan ta cua quihvi yo nu ndyaca ñaha ra Ndyoo, catyi ra.

²³Tacuan i cuu ta i tyaa tyiño ra sii uu a uñi tahan ra tahan tahan ñuu nu sino iñi ñiyivi Tuhun Ndyoo vatyi cua zacuenda ra sii ñu. Ta ñá sasi ra Pablo ta ra Bernabé xita ta i

sica tahvi ra sii Ndyoo sa cuenda ra cuan. Ta ziqui i catyi ra: Sa sino iñi ndo sii ra Ndyoo. Maa ra cuu ra cua cucumi vaha sii ndo. Catyi ra.

**Cua nanuhu tucu ra
Pablo ta ra Bernabé ñuu
Antioquía, nu cu si Siria**

²⁴Tacuan ta ziqui i yaha tucu ra nu cu si Pisidia, ta saa ra nu cu si Panfilia.

²⁵I nacatyí ra sihin ñiyivi Tuhun Ndyoo ñuu cahnu sa nañi Perge, ta ziqui cuahan ra ndya Atalia.

²⁶Yucuan i quihvi ra minoo barco ta cua nanuhu ra ndya ñuu Antioquía nu i quita ra sa xihna ñi. Yucuan cuu ñuu nu i sica ñiyivi tumañi iñi sii ra Ndyoo sa xihna ñi sa cua tyindyee ra sii ra Pablo ityi cuahan ra. Ta vityi ndihí tyiño ra.

²⁷Ta sa saa ra ñuu Antioquía i zatitahan ra sii ñiyivi sino iñi Tuhun Ndyoo ta i nacatyí ra sihin ñu tandihí sa i zavaha ra Ndyoo ta cuhva i tyindyee ra Ndyoo sii ra. Ta cuhva i saha ra Ndyoo sa sino iñi inga ñiyivi vazu yivi ñiyivi hebreo cuu ñu.

²⁸Tacuan cuu ta i ndoo ra Pablo ta ra Bernabé naha ca sihin ñiyivi sino iñi ñuu cuan.

**Cuhva i titahan ra apóstol
ñuu Jerusalén**

15 Ta sa ndyaa ra Pablo ta ra Bernabé ñuu Antioquía sihin ñu sino iñi Tuhun Ndyoo, ta i saa minoo ityi ñiyivi, ra i quita nu cu si Judea. Ta i quisaha zacuaha ra sii ñiyivi vatyí tatu cuñi rayii sa cacu añaíma ra cuñi si vatyí yivi sa sino ñi iñi ra sii ra Jesús zoco cua

cuhva ra sa tahndya ñii xiñi xuu ra vatyí tacuan i catyi ley ra Ndyoo ta tyiemvu cuhva i tyaa ra Moisés.

²Ñihi xaan i natuhun ra Pablo ta ra Bernabé sihin ra vatyí ñá ndu-iiñ ra sihin ra, cuhva cuan. Tacuan ta ziqui i saha ñiyivi tyiño sii ra Pablo ta ra Bernabé ta sii zuhva ca ra cua cuhun ra ñuu Jerusalén vatyí cua natuhun ra sihin ra apóstol ta sihin ra ndyizo tyiño nu iyo ra sino iñi indyacuan. Vatyí tacuan ta cua nacoto ra yozo caa cua ndundoo tyiño cuan.

³Ñiyivi sino iñi Tuhun Ndyoo ñuu Antioquía cuu ñu i tasi sii ra. Ta sa cuahan ra i yaha ra nu cu si Fenicia, ta nu cu si Samaria. Ta i nacatyí ra sihin ñiyivi yozo caa i zandoo ñiyivi sa yivi ñiyivi hebreo cuu costumbre sahnu ñu. Ta vityí tyaa ñu yahvi sii Ndyoo. Ta zii xaan i cuñi tandihí ñu, sa siñi ñu tuhun cuan.

⁴Ta sa saa ra Pablo ta ra Bernabé ñuu Jerusalén ta i ndyehe vaha ra apóstol ta ra ndyizo tyiño nu iyo ra sino iñi nu saa ra. Ta tacuan tucu i zavaha tandihí ñiyivi sino iñi Tuhun Ndyoo yucuan. Tacuan ta ziqui i quisaha nacatyí ra Pablo tandihí sa zavaha ra Ndyoo tandihí ñuu nu sahan ra.

⁵Tacuan i zavaha ra ta i nduvita uu, a uñi tahan ra. Ra fariseo cuu ra, ta sa sino iñi ra sii ra Jesús. Maa ra cuan i catyi: Cuñi si sa tahndya ñii xiñi xuu tandihí ra quihvi cuenda ra Jesús ta nacatyí yo sihin ra vatyí tyaa tucu ra yahvi sii ley i saha ra Moisés.

⁶Tacuan ta i titahan tandihí ra apóstol sihin ra ndyizo tyiño nu iyo

ñiyivi sino iñi vatyi cua nacañi iñi ra ñaa sa cuñi si sa ndisa.

⁷Sa naha xaan natuhun ra ta i nduvita ra Pedro ta catyi ra: Yañi xaa, sito ndo vatyi sa iyo quivi i casi ra Ndyoo sii, sihin maa ndo vatyi cua nacaty i Tuhun Ndyoo sihin ñiyivi sa yivi ñiyivi hebreo cuu vatyi cua coto ñu ta cua sino iñi ñu.

⁸Ta maa ra Ndyoo, sito ra añaima tandihi ñiyivi, ta zañaha ra sii yo vatyi cua quihin ra sii ñu vatyi saha ra Taty i sii ñu inuu ñi tañi saha ra sii maa yo.

⁹Ta ña catyi ra Ndyoo sihin yo vatyi ña vaha maa ñu ta vaha xaan maa yo. Zanduvaha ra añaima ñu vatyi sino iñi ñu sii ra.

¹⁰Vityi caca iñi yo cuhva cuñi ra Ndyoo. Ña vaha sa cua cuhva yo tundoho sii ñiyivi sino iñi sii ra ta cua catyi yo vatyi cua zavaha ñu costumbre i saha ra Moisés. Sito yo vatyi ñá cuu cundye e iñi ñiyivi sahn u sii yo sa zavaha ñu tandihi sa catyi ra Moisés, ta sito yo vatyi ñá cundye e tucu iñi maa yo zavaha yo sii si.

¹¹Ña tacuan ta nduvaha añaima yo. Sito yo vatyi nduvaha añaima yo vatyi iyo xaan tumañi iñi sii ra Jesús. Ta ñahñi ca cuhva nduvaha añaima ñiyivi.

¹²Taxi ñi i nduu tandihi ñiyivi sa siñi ñu cuhva nacaty i ra Pablo ta ra Bernabé tandihi sa i cuu ta tandihi sa ndyityi i zavaha ra Ndyoo nu sahan ra nu iyo ñiyivi sa yivi ñiyivi hebreo cuu.

¹³Ta sa ndihi cahan ra ta i cahan ra Jacobo ta catyi ra: Tyizoho ndo, yañi xaa.

¹⁴Sa saha ra Simón Pedro cuenda yozo caa i quisaha ra Ndyoo zasino ra iñi inga ñiyivi vatyi sii maa ra Ndyoo cua cuu ñu vazu yivi ñiyivi hebreo cuu ñu.

¹⁵Ta zuun ñi cuhva ya cuu cuhva i cahan Tuhun Ndyoo ta tyiemvu vatyi i tyaa minoo ra profeta cuhva cahan ra Ndyoo:

¹⁶Nu vasi quivi cua quisi ra Cristo vatyi cua cuhve tyiño sii ra.

Quivi i sicoo ra rey David i zacahnu ñiyivi sii sa ndisa cuii.

Zoco zuhva ñi quivi ta i zaña tucu ñu sii.

Cuhva i zacahnu ñu sii, ta quivi ra David cua zacahnu tucu ñiyivi hebreo sii nu vasi quivi.

¹⁷Ta sa cuenda maa ñu hebreo ta tacuan tucu cua zavaha inga ñiyivi, ñu yivi ñiyivi hebreo cuu, ta cua sino iñi ñu sii.

¹⁸Tacuan i catyi ra Ndyoo vatyi sa sito ra vatyi cua zavaha ra cuhva cuan cumañi ca sino ñuu ñiyivi. Ta yucuan cuenda i catyi ra tacuan.

¹⁹Tacuan ta ziqui i catyi tucu ra Jacobo sihin ñiyivi: Sica iñi vatyi vaha ca ma cuhva yo tundoho sii ñiyivi, ñu yivi ñiyivi hebreo cuu tatu sa i zandoo ñu costumbre sahn u ñu ta ndyico ñu sii Ndyoo sa ndisa cuii.

²⁰Vaha ca tatu cua tyaa yo minoo carta sii ñu ta catyi yo sihin ñu vatyi ma casi ñu sa saha ñiyivi sii zandu ta naquihin tucu ñu. Ta cua coo minoo rayii sihin minoo ñi ñaha ta minoo ñi ñaha sihin minoo ñi rayii. Ta inga cuhva cua cahan yo sihin ñu sa ma casi ñu coño quiti

tatu ña sati vaha niñi ti ta ma casi ca ñu niñi quitì.

²¹Vatyi ndya ta tyiemvu xaan iyo ra tandihì ñuu, ra cahvi ley saha ra Moisés sisi vehe ñuhu hebreo. Tahan tahan vitya cahvi ra sii si quivi quitatu ñiyivi. Tacuan i catyi ra Jacobo.

²²Tacuan i cuu si, ta i catyi ra apóstol ta ra ndyizo tyiño nu iyo ñiyivi sino iñi ta tandihì inga ñiyivi sino iñi Tuhun Ndyoo yucuan vatyi cua tasi ra sii a uu, a uñi tahan ra tahan ra, cua cuhun ra ndya ñuu Antioquía sihin ra Pablo ta ra Bernabé. Ta i saha ra tyiño cuan sii ra Judas. Nañi tucu ra Barsabás ta sii ra Silas. Nduu tahan ra cuu ra ndyizo tyiño cahnu nu iyo ñiyivi sino iñi.

²³Ihya cuu sa catyi carta i tasi ra sihin ra ndya nu iyo ñiyivi sa yivi ñiyivi hebreo cuu ñuu Antioquía ta nu cu si Siria ta Cilicia. Catyi si: “Maa ndi cuu ra apóstol ta ra ndyizo tyiño nu iyo ñiyivi sino iñi ta sihin tandihì ñu sino iñi Tuhun Ndyoo ityi ya. Saha ndi minoo ndyoo nacucumi sii maa ndo.

²⁴Ñihi ndi tuhun vatyi sahan ñiyivi ñuu ya ndya ñuu ndo, ta yivi maa ndi saha tyiño sii ñu ta i zayanga ñu sii ndo vatyi catyi ñu sihin ndo vatyi cuñi si sa cahndya ndo ñii xiñi xuu tandihì rayii ta tyaa ndo yahvi ley ra Moisés.

²⁵Yucuan cuenda sica iñi tandihì ndi vatyi cua tasi ndi sii zuhva ra iyo ihya vatyi cua cuhun ra nu ndyaa ndo sihin ra tahan yo, ra Bernabé ta ra Pablo, ra sa cuñi xaan ndi.

²⁶Sa cuaha xaan saha cuñi cahñi ñiyivi sii ra sa cuenda tyiño ra Jesucristo.

²⁷Tacuan cuu. Ta yucuan cuenda i tava ndi tyiño sii ra Judas ta ra Silas vatyi cuhun ra ta nacatyi ra sihin ndo tandihì sa i tyaa ndi nuu carta ya.

²⁸Vatyi sa ndu-iin ndi sihin Tatyì Ii ta sica iñi ndi vatyi ma zavaha ndo cuaha xaan cuhva. Ihya ñi cuu cuhva ñiñi cua zavaha ndo:

²⁹Ma casi ndo sa saha ñiyivi sii zandu ta naquihin tucu ñu. Ma casi ndo niñi quitì, ta ma casi ndo coño quitì tatu ñá sati vaha niñi ti. Ta minoo ñi ñaha cua coo sii minoo rayii ta minoo ñi rayii sihin minoo ñaha. Tatu cua cucumi vaha ndo cuhva ya, vaha tacuan ñi.”

³⁰Tacuan i tyaa ra cuan nuu carta ta ra ndyizo tyiño cuan i quihin ra ityi cuahan ra ndya ñuu Antioquía. Ta yucuan i zatitahan ra sii tandihì ñiyivi sino iñi Tuhun Ndyoo. Ta i saha ra carta cuan sii ñu.

³¹Ta sa cahvi ñu sii si, zii xaan i cuñi ñu vatyi vaha xaan cuu cuhva cahan si cuñi ñu.

³²Ta ra Judas ta ra Silas i cuu cahan ra profecía, ta i quisaha cahan ra, ta i tyindyee xaan ra sii ñiyivi ta zii xaan i cuñi ñu.

³³Ta sa yaha zuhva quivi ta cua nanuhu tucu ra. Ta i catyi ñiyivi sino iñi Tuhun Ndyoo sihin ra: Ndyoo cua tyindyee sii ndo ityi cuahan ndo.

³⁴Zoco i cuñi ra Silas sa ndoo ra.

³⁵Tacuan tucu ra Pablo ta ra Bernabé i ndoo ra ñuu Antioquía. Maa ra cuan sihin cuaha ca ñiyivi sito Tuhun Ndyoo, i zacuaha ra sii ñiyivi ta i nacatyi ra Tuhun Ndyoo sihin ñu.

Quihin tucu ra Pablo ityi cuahan ra vatyi cua nacatyi ra Tuhun Ndyoo

³⁶I yaha zuhva ca quivi ta ziqui catyi ra Pablo sihin ra Bernabé:

Coho tucu yo tandihi ñuu nu i sahan yo. Cua ndyehe yo sii ra tahan yo, tandihi ñiyivi i sino iñi Tuhun Ndyoo nu i nacaty i yo sihin ñu. Cua ndyehe yo yozo caa iyo ñu.

³⁷I cuñi ra Bernabé sa cuhun tucu ra Juan, ra sa nañi tucu Marcos sihin ra.

³⁸Zoco i sica iñi ra Pablo vaty i vaha ca ma quihin ra sii ra vaty i ñá ndoo ra sa sahan ra sihin ra sa xihna ñi. Quivi cuan i zandoo ra Juan Marcos sii ra Pablo ta ra Bernabé nu cu si Panfilia ta i sinuhu ra.

³⁹Ña nacasi tahan sa cahan ra Bernabé sihin ra Pablo sa cuenda tyiño cuan. I cuxaan ra zuhva. Tacuan ta ziqui i cuziin tahan ra. I quihin ra Bernabé sii ra Marcos ta i quihvi ra minoo barco ta cuahan ra nu cu si Chipre.

⁴⁰Ta i quihin ra Pablo sii ra Silas. Ta i sica ñiyivi tumañi iñi sii Ndyoo sa tyindyee ra sii ra Pablo inga saha. Ta ziqui cuahan ra.

⁴¹I yaha ra nu cu si Siria. I yaha ra Cilicia. Ta i saha ra tundyee iñi sii ñiyivi sino iñi Tuhun Ndyoo yucuan.

Cuahan ra Timoteo sihin ra Pablo ta ra Silas

16 I saa ra Pablo ta ra Silas ndya ñuu Derbe ta ñuu Lистра. Yucuan i nañihi ra sii minoo ra sino iñi. Nañi ra Timoteo. Ñiyivi hebreo cuu zih i ra ta sino iñi ña sii ra Jesús. Ta zutu ra, ra cahan zahan griego cuu ra.

²Vaha ñiyivi cuu ra Timoteo catyi ñiyivi sino iñi Tuhun Ndyoo ñuu Lистра ta ñuu Iconio.

³I cuñi ra Pablo sa cuhun ra Timoteo sihin ra. Zoco i quihin xihna ra sii ra ta i sahdya ra ñii xiñi xuu ra coto cahan xaan ñiyivi hebreo ñuu cuan vaty i sito ñu vaty i ra griego cuu zutu ra ta ña tuhva ra zavaha costumbre maa ñu.

⁴Tacuan ta sahan ra tahan tahan ñuu. I nacaty i ra sihin ñiyivi tuhun i nacaty i ra apóstol ta ra ndyizo tyiño nu iyo ñiyivi sino iñi ñuu Jerusalén vaty i tacuan ta cua zacuenda ñu sii ñu cuhva i tyaa ra nuu carta cuan.

⁵Tacuan ta sicoo ca tundyee iñi sii ñiyivi sino iñi Tuhun Ndyoo, ta vaha xaan ca sino iñi ñu sii ra Ndyoo ta tandihi qui vi i ndutuu ca ñu.

Tahan ra Pablo ñimahna ta ndyehe ra sii minoo ra nu cu si Macedonia

⁶Ñá saha Taty i Ii sa nacaty i ra Pablo Tuhun Ndyoo sihin ñiyivi nu cu si Asia. Yucuan cuenda i yaha ñi ra ndya nu cu si Frigia ta Galacia.

⁷Ta i saa ra nu cu si Misia. Ndy a indyacuan cua cuhun ra ndya nu cu si Bitinia sica iñi ra, zoco ñá saha tucu Taty i Ii sa cuhun ra yucuan.

⁸Tacuan ta i yaha ra nu cu si Misia, ta i quihvi ra ñuu Troas sa cuu cuenda Misia. Ta Troas cuan ndyaa si yuhu tyañuhu.

⁹Yucuan i tahan ra Pablo ñimahna ta sisi ñimahna i ndyehe ra sii minoo ra nu cu si Macedonia. Ta i sica ra cuan tumañi iñi sii ra Pablo ta catyi ra: “Quisun ndya Macedonia ta tyindyeyun sii ndi.”

¹⁰Ta sa yaha ndyehe ra Pablo ñimahna cuan ta yuhvi ra Lucas sihin ra Pablo ta inga ra i zanumi

ndi sa cuhun ndi ndya Macedonia vatyi sito ndi vatyi sa tasi ra Ndyoo sii ndi sa cua nacatyi ndi tuhun ra indyacuán.

**Ndyaa ra Pablo ta ra
Silas ñuu Filipos**

¹¹I quihvi ndi barco ñuu Troas ta sa ndoo ñi cuahan ndi ndya cuhva ndya saa ndi minoo ñuhu mahñu tyañuhu. Nañi si Samotracia ta inga quivi i saa ndi ñuu Neápolis.

¹²Ndyaa indyacuán i quisaha sica ndi sihin saha ndi ndya ñuu Filipos. Cahnú xaan ñuu cuán. Ñahñi inga ca ñuu ñiñi ca iyo yucuan. Ndyaca ñaha ñiyivi romana sii si. Yucuan i ndoo ndi zuhva quivi.

¹³Minoo quivi quitatu ñiyivi i quita ndi sata ñuu ndya nu iyo minoo yuu vatyi yucuan tuhva ñiyivi sahan ta sica tahvi ñu sii Ndyoo. Yucuan i sindyaa ndi ta i nacatyi ndi Tuhun Ndyoo sihin ñu zihí, ñu i titahan yucuan.

¹⁴Minoo ña nañi ña Lidia. Ñuu Tiatira cuu ñuu ña. Xico ña zahma vaha, zahma yuhva tixinda, vatyi yucuan cuu tyiño ña. Zacahnu ña sii ra Ndyoo cuhva zacahnu ñiyivi hebreo sii ra. I tyizoho ña sa cahan ra Pablo, ta i nuña ra Ndyoo sa siñi tuñi sii ña, ta i sino iñi ña sa catyi ra Pablo.

¹⁵Sicoo ndutya ña sihin ñiyivi sii ña, ta ziqui i catyi ña: Sa sito ndo vatyi ndisa cuii sino iñi sii ra Jesús, yucuan cuenda cuhun ndo ta cua ndoo ndo zuhva quivi vehi. Catyi ña ta i zañiñi ña sii ndi ta cuahan ndi vehe ña.

¹⁶Minoo quivi sahan ndi nu sica tahvi ñiyivi sii Ndyoo ta tahan

ndi sii minoo ña yoco. Ñoho tatyí cuihna sii ña, ta cuu nacatyi ña ñaa sa cua tahan ñiyivi nu cuahan quivi. Cuhva cuán i zahacanaa ña xuhun ta ñihi sitoño ña xuhun cuán.

¹⁷I quisaha ndyico ña sii ra Pablo ta sii maa ndi ta i cana saa ña ta catyi ña: Ra ihya zavaha ra cuhva cuñi ra Ndyoo cahnú. Ta vasi nacatyi ra sihin ndo yozo caa cua cacu añima ndo ta ma cuhun ndo andyaya. Catyi ña.

¹⁸Tacuan i zavaha ña cuaha xaan quivi cuhva ndya ña cundyee ca iñi ra Pablo, ta ziqui i nandyeehe sata ra ta i catyi ra sihin tatyí cuihna cuán: Yuhvi catyi vatyi quiton añima ña ya vatyi iyo tundyee iñi sii ra Jesús. Catyi ra. Ta zuun ñi caa cuhva cuán i quita tatyí cuihna añima ña.

¹⁹Ta sa sito sitoño ña vatyi ma ñihi ca ra xuhun sihin ña vatyi sa i quita tatyí cuihna añima ña ta i tiñ ra sii ra Pablo ta ra Silas ta sindyaca ra sii ra ndya vehe tyiño.

²⁰I sindyaca sitoño ña sii ra nuu ra juez ta catyi ra sihin ra juez: Ra ihya zativi tyiño ñuu yo ta ñiyivi hebreo cuu ra.

²¹Zacuaha ra costumbre sa ma cuu sino iñi yo ta ma cuu zavaha yo vatyi ñiyivi romano cuu yo. Tacuan i catyi ra cuán.

²²Tacuan ta i tyaa tandihí ñiyivi cuatyi sata ra Pablo ta ra Silas. Ta i tava ra cu tyiño tyiño sa quita zahma ra Pablo ta ra Silas. Ta i catyi ra sihin ra policía: Cañi vaha vaha ndo sii ra sihin yutu.

²³Ta sa yaha cañi xaan ra sii ra ta i tyihí ra sii ra vehe caa ta catyi ra sihin ra cumi vehe caa vatyi nacucumi vaha xaan ra sii ra.

²⁴Ta sa ñihi ra cumi vehe caa cuan tuhun cuan ta i tyihi ra sii ra vehe nu cutu ca, ta i tyihi ra saha ra sisi vitu.

²⁵Tañi cuhva maa ñuu sata ra Pablo ta ra Silas yaa Ndyoo ta sica tahvi ra sii Ndyoo ta i tyizoho inga ra ñoho si vehe caa cuan.

²⁶Ta ta sica cuii ñi i taan minoo sa ñihi xaan. Ñihi xaan i quizi si vehe caa cuan. Ta zuun ñi caa cuhva cuan i nuña tandihi yuvehe ta i ndasi cadena sa nuhñi ra ñoho vehe caa cuan.

²⁷I natahvi iñi ra cumi vehe caa cuan. Ta ndyehe ra vatyí nuña tandihi yuvehe, ta sica iñi ra vatyí sa sino tandihi ra ñoho si vehe cuan. Yucuan cuenda i tava ra mityi ra ta cua cahñi ra zuun ñi sii maa ra.

²⁸Zoco i catyi ra Pablo: Ma cahñun suun. Ñoho tandihi ndi ihya.

²⁹I sica ra cumi vehe caa cuan ñúhu ta i cacono ra sisi vehe cuan. Ñihi tacuan ñi ca ra vatyí yuhu xaan ra. I sicuñi siti ra nuu ra Pablo ta ra Silas.

³⁰Ta ziqui i tava ra sii ra ta i ndaca tuhun ra sii ra: ¿Ñaa sa cuñi si zavehi, tata, ta cua cacu añime?

³¹Ta i catyi ra Pablo sihin ra: Sino iñun sii ra Jesús, ta cua cacun, yoho ta tandihi ñiyivi suun.

³²Tacuan ta ziqui i nacatyí ra Pablo Tuhun Ndyoo sihin ra ta sihin tandihi ñiyivi vehe ra.

³³Ta zuun ñi sa cuaa cuan i nacatya ra cumi vehe caa cuan nu ñicuehe nduu tahan ra. Ta i sicoo ndutya ra cumi vehe caa cuan sihin tandihi ñiyivi sii ra.

³⁴Tacuan ta i quihin ra sii ra Pablo ta cuahan ra sihin ra ndya vehe ra, ta saha ra sa casi ra. Ta zii xaan i cuñi ra ta ñiyivi sii ra vatyí sa sino iñi ñu sii ra Jesús. (Tacuan ta ziqui i nandihvi tucu ra Pablo ta ra Silas vehe caa cuan coto cuxaan ra cu tyiño sihin ra cumi vehe caa.)

³⁵Ta inga quivi sa ñaha ñi i tasi ra juez sii ra policia ta catyi ra sihin ra cumi vehe caa: Zaña ndo sii ra cuan.

³⁶Ta tacuan i catyi ra cumi vehe caa cuan sihin ra Pablo vatyí sa cuu quita ra sihin ra Silas.

³⁷Zoco i catyi ra Pablo: Ra ñuu Roma cuu nduhvi. Ta ñahñi cuhva iyo sii ra ihya sa cañi ra sii ndi nuu ñiyivi ta tyihi ra sii ndi vehe caa. Ta ñá saha ra sa cahan ndi ta nu sa ñá cutuñi ndi. Ta vityi cuñi ra sa cua zaña xehe ra sii ndi. Ña tacuan cuu si. Nacatyí ndo sihin ra juez vatyí naquisi tava maa ra sii ndi ta cua cuhun ndi. Tacuan i catyi ra Pablo.

³⁸Ta tacuan i nacatyí ra policia sihin ra juez. Ta i yuhu ra juez sa ñihi ra tuhun vatyí ra ñuu Roma cuu ra Pablo ta ra Silas.

³⁹Yucuan cuenda sahan ra nu ñoho ra Pablo sihin ra Silas ta i sica ra tumañi iñi sii ra sa ma cuxaan ra, ta ziqui i tava ra sii ra, ta i catyi ra sihin ra vatyí sa ndyoo ñi naquita ra ñuu cuan.

⁴⁰Ta sa quita ra Pablo ta ra Silas vehe caa ta cuahan ra vehe ña Lidia. Ta i ndyehe ra sii inga ñiyivi sino iñi Tuhun Ndyoo ta saha ra tundyee iñi sii ñu ta ziqui i quita ra ñuu cuan.

Sii ñiyivi ñuu Tesalónica Tuhun Ndyoo

17 I yaha ra Pablo ta ra Silas ñuu Anfipolis ta ñuu

Apolonia ta cuahan ra minoo ñuu cahnu. Nañi si Tesalónica. Yucuan iyo minoo vehe ñuhu hebreo.

²Ta tañi sa tuhva ra Pablo sahan, tacuan i sahan ra yucuan. Uñi quivi, quivi quitatu ñiyivi, i zacuaha ra sii ñiyivi cuhva catyi Tuhun Ndyoo.

³Tyehen i catyi ra: I catyi Tuhun Ndyoo vaty i cua ndyehe ra Cristo tundoho. Cua cuu ra, ta ziqui cua nandoto tucu ra. Yuhvi catyi vaty ra Jesús cuu ra cu Cristo vaty tacuan i tahan si sii ra. Ta cua zacacu ra sii ñiyivi nu iyo ñu ndyehe tundoho. Tacuan i catyi ra Pablo.

⁴Ta ñiyivi i tyizoho, cuaha ñu i sino iñi. Ta cuaha ca ra, ra griego cuu ra. Ta sa sino iñi ra cuhva zacuaha ñiyivi hebreo. Ta inga ñu cuu ñu ñazihí ra cuca ñuu cuan.

⁵Tacuan ta sa ndyehe ra hebreo, ra ña sino iñi, vaty sino xaan iñi ñiyivi ta i cucuihna iñi ra sa cuenda si. I quihin ra sii minoo ityi ra sica noo ñi, ra ña zatyño, ta ra yucuan i zatitahan sii ñiyivi, ta i zanduvaa ra sii ñu. Sahan ra vehe ra Jasón sa nanducu ra sii ra Pablo vaty cua cundyaca ra sii ra nu yucu tandihí ñiyivi.

⁶Zoco ña nañihi ra sii ra. Tacuan ta ziqui i xita cañoho ra sii ra Jasón ta sii zuhva ca ra sino iñi nuu ra cu tyiño. Ta i cana saa ra ta catyi ra: Ra ihya zayanga sii ñiyivi nacahnu ñuu ñiyivi ta vityi vasi zayanga ra sii ñiyivi ñuu yo.

⁷I saha ra Jasón ya sa cundyaa ra cuan vehe ra. Catyi ra ya vaty ra Jesús cuu ra cu rey ta yivi ra César. Cuaty i cuu si sa tacuan vaty ra César cuu rey sii maa yo.

⁸Tacuan i cahan ra cuñi cuaty i cuan cuhva ndya zanduvaa xaan ra sii ñiyivi sihin ra cu tyiño.

⁹Zoco i saha ra Jasón ta inga ra zuhva xuhun, ta i quita ica ra.

Cuahan ra Pablo ta ra Silas ñuu Berea

¹⁰Zuun ñi sa cuaa cuan i zanumi ra sino iñi Tuhun Ndyoo sii ra Pablo ta ra Silas ta cuahan ra ndya ñuu Berea. Ta cuhva sa saa ra yucuan, i sahan ra vehe ñuhu hebreo.

¹¹Ñiyivi hebreo ñuu cuan vaha ca ñiyivi cuu ñu. Ñá zavaha ñu cuhva i zavaha ñiyivi hebreo ñuu Tesalónica. Cuñi xaan ñiyivi ñuu Berea sa tyizoho ñu Tuhun Ndyoo. Ta tandihí quivi i cahvi ñu Tuhun Ndyoo vaty cuñi ñu coto ñu tatu ndisa sa cahan ra Pablo.

¹²Yucuan cuenda i sino iñi cuaha xaan ra hebreo, ta cuaha ñuzihí griego, ñu ñiñi.

¹³Zoco sa ñihi ñiyivi hebreo ñuu Tesalónica tuhun vaty zacuaha ra Pablo Tuhun Ndyoo ñuu Berea ta ziqui sahan ra cua zanduvaa ra sii ñiyivi ñuu Berea ta cua cahñi ñu sii ra Pablo.

¹⁴Yaty xaan i tasi ñiyivi sino iñi Tuhun Ndyoo sii ra Pablo ndya yuhu tyañuhu. Ta i ndoo ra Silas ta ra Timoteo ñuu Berea.

¹⁵Cuahan uu tahan ñiyivi sihin ra Pablo. Sindyaca ra sii ra ndya ñuu Atenas. Ta ziqui i tasi ra Pablo tyiño sihin ra sa nacaty i ra sihin ra Silas ta ra Timoteo vaty zanumi ra ta cahun ra nu iyo ra Pablo.

Ndyaa ra Pablo ñuu Atenas

¹⁶I ndatu ra Pablo ñuu Atenas ndya cua quisi ra Silas ta ra

Timoteo. Ta sica xaan iñi ra Pablo vatyi ndyehe ra vatyi cuaha xaan zandu yutu iyo ñuu cuan.

¹⁷Yucuan cuenda sahan ra vehe ñuhu vatyi cua natuhun ra sihin ñiyivi hebreo ta sihin inga ñiyivi sino iñi sii Ndyoo. Ta tandihi quivi i nacatyi ra sihin ñiyivi i ndyehe ra nuyahvi.

¹⁸Ta ziqui i natuhun tahan ñiyivi cuhva i cahan ra Pablo. Iyo ñu zacuaha ñu tuhun ra Epicúreo ta iyo ñu zacuaha ñu tuhun ñiyivi estoico. Ta zuhva ñu i catyi: ¿Ñaa tuhun cuu si sa nacatyi xaan ra ya vatyi cahan xaan ra tuhun inga ndyoo, ra ña sito yo? Tacuan i catyi ra cuan vatyi cahan ra Pablo tuhun ra Jesús ta cuhva i nandoto ra Jesús.

¹⁹Tacuan ta ziqui i sindyaca ñu sii ra Pablo ndya xiñi yucu Areópago nu titahan ra ndyizo tyiño ñuu cuan ta i catyi ra sihin ra Pablo: Cuñi ndi coto ndi ñaa tuhun cuu si sa zacuohon sii ñiyivi.

²⁰Tucu xaan cuu tuhun nacatyun, ta cuñi ndi coto ndi ñaa sa cuu si. Tacuan i catyi ñu.

²¹Vatyi tandihi ñiyivi ñuu Atenas sihin ñiyivi inga ñuu, ñu iyo ñuu Atenas cuan, ñahñi tyiño zavaha ñu. Maa ñi sa tyizoho ñu ta sa nacatyi ñu ñaa cuhva saa iyo.

²²Tacuan i cuu ta ziqui i nduvita ra Pablo mahñu nu yucu ra cuan xiñi yucu Areópago ta i catyi ra sihin ra ñuu Atenas cuan: Ndoho ra ñuu Atenas, ndyehi vatyi zacahnu xaan ndo ndyoo sii maa ndo sihin tandihi cuii añima ndo.

²³Vatyi sehin sa ndyehi nu zacahnu ndo sii ndyoo ndo ta i

ndyehi minoo altar ta ndyaa letra. Tyehen catyi si: “Cuenda ndyoo sa ña sito yo.” Zacahnu ndo sii ra vazu ña sito ndo sii ra. Ta vityi cua nacatyi sihin ndo yoo ra cuu ra.

²⁴Ndyoo, ra zavaha ñuu ñiyivi cuu ra. I zavaha ra tandihi sa iyo. Sitoho yutyi andivi ta ñuhu ñuu ñiyivi cuu sii ra. Ña iyo maa ra sisi vehe ñuhu zavaha ñiyivi.

²⁵Ña cuñi si sa cua tyindyee ñiyivi sii ra vatyi ñahñi sa cumañi sii ra vatyi zuun ñi maa ra saha tandihi sa iyo. Saha ra sa cundito yo. Saha ra sa coo tatyi yo.

²⁶Minoo tuhun ñi ñiyivi i zavaha ra Ndyoo sa xihna ñi. Tacuan i cuu ta ziqui i ndutuu ca ñiyivi ta i catyi ra Ndyoo vatyi cua coo ñiyivi nacahnu ñuu ñiyivi. I catyi maa ra ndyamaa cua coo sa ziin ziin tata ñiyivi ñuu ñiyivi, ta i saha ra ñaa ñuhu cua cuu sii ñu. Ta i catyi ra ñaa ñiyivi cua cundyaca ñaha sa ziin ziin ñuhu ta ama cua cundyaca ñaha ñu.

²⁷Tacuan i zavaha ra Ndyoo vatyi cua nanducu ñiyivi sii ra. Sica iñi ra vatyi ña yii ta cua nañihi ñu sii ra. Vatyi ña sica iyo ra sihin yo.

²⁸Vatyi sa cuenda maa ra ta ndito yo, cuu caca yo ta cuu coo yo cuhva iyo yo. Tañi sa i tyaa minoo ra ñuu ndo ta tyiemvu vatyi catyi ra: “Maa ra Ndyoo i zavaha sii yo.” Catyi ra.

²⁹Ta ndisa vatyi i zavaha ra sii yo, ta yucuan cuenda ña vaha caca iñi yo vatyi caa ra tañi caa minoo ndyoo xuhun cuaan a xuhun cui, a yuu a ñaa sa zavaha ñiyivi cuhva caa ra.

³⁰Ta tyiemvu ñá sito maa ñiyivi ñaa sa zavaha ñu. Ta ñá cuxaan ra

Ndyoo sihin ñiyivi quivi cuan vatyi ñá sito ñu. Zoco vityi catyi ra vatyi nazandoo ñiyivi nacahnu ñuu ñiyivi cuatyí zavaha ñu.

³¹Vatyi sa sata ra quivi sa cua tasi tuñi ra sii ñiyivi ñuu ñiyivi sihin sa ndoo. Ta saha ra tyiño sii minoo ra sa cua ndyehe ra a sa vaha zavaha ñiyivi a sa ña vaha. I zañaha ra Ndyoo sii yo vatyi iyo kuhva sii ra cuan vatyi i zanandoto ra sii ra.

³²Ta sa siñi ñiyivi vatyi catyi ra Pablo vatyi i nandoto minoo ñiyivi ta zuhva ñu tyizoho cuan, i sacu ndyaa ñu sii ra Pablo. Zoco inga ñu i catyi ñu: Cuñi ndi sa tyizoho ndi sa cohon inga saha.

³³Tacuan ta i quita ra Pablo nu titahan ñiyivi.

³⁴Ta zuhva ra cuan i sino iñi ra ta i titahan ra sihin ra Pablo. Minoo ra nañi ra Dionisio. Ra ndyizo tyiño ñuu cuan cuu ra. Ta minoo ñaha sino iñi, nañi ña Dámaris. Ta iyo ca ñu sino iñi ndihí ca.

Cuahan ra Pablo ñuu Corinto

18 Tacuan ta ziqui i zandoo ra Pablo ñuu Atenas ta cuahan ra ñuu cahnu Corinto.

²Yucuan i nañihi ra sii minoo ra hebreo tañi maa ra. Aquila nañi ra. Ñuu Ponto i cacu ra. Ta cunaha ca sa quita ra nu cu si Italia sihin ñazihí ra. Nañi ña Priscila. I quita ñu ñuu cuan vatyi i tava ra ndyaca ñaha Claudio sii tandihí ñiyivi hebreo ñuu Roma nu sindyaa ñu. Sahan ra Pablo vehe ñu nu ndyaa ñu ñuu Corinto.

³Yucuan i ndoo ra Pablo ta i zatyíño ra sihin ñu vatyi sa tuhva ra zatyíño tañi zatyíño maa ñu. I

zavaha ñu vehe zahma. Ta tacuan i zahacanaa ñu xuhun.

⁴Ta i natuhun ra Pablo sihin ñiyivi vehe ñuhu hebreo tandihí quivi sa cu quivi quitatu ñiyivi. I natuhun tahan ra sihin ñiyivi hebreo ta i natuhun tahan ra sihin ñiyivi griego vatyi cuñi ra sa cua sino iñi ñu sii ra Jesús.

⁵Ta sa quita ra Silas ta ra Timoteo ñuu Macedonia ta i saa ra nu ndyaa ra Pablo, ta ziqui i zaña ra Pablo inga tyiño ra ta tandihí tyiemvu i zacuahá ra Tuhun Ndyoo. I nacatyí ra sihin ñiyivi hebreo vatyi ra Jesús cuu ra sa ndatu ñu, ra cua tasi ra Ndyoo. Ta cua zacacu ra sii ñiyivi nu iyo ñu ndyehe tundoho.

⁶Tacuan ta ziqui i quisaha nduxaan ñiyivi hebreo cuan sihin ra Pablo ta i cahan ñu ndya vaha ñi sii ra Jesús. Tacuan i cuu si ta i naquizi ra Pablo zahma ra vatyi ña cundyee ca iñi ra sa cahan ñu. I catyi ra sihin ñu: Cuatyí maa ndo cuu ta ma cahun ndo gloria. Yivi cuatyí mi. Ta vityi cuhin cua nacatyí Tuhun Ndyoo maa ñi sihin ñiyivi, sa yivi ñiyivi hebreo cuu.

⁷I quita ra vehe ñuhu hebreo ta cuahan ra vehe minoo ra nañi Justo vatyi zacahnu maa ra Justo sii Ndyoo. Ta iyo vehe ra yatyí ñi xiin vehe ñuhu.

⁸Sino iñi minoo ra nañi Crispo Tuhun Ndyoo. Ra cu nuu sii vehe ñuhu hebreo cuu ra. Sino iñi tandihí ñiyivi vehe ra. Ta i sino tucu iñi cuaha xaan inga ñiyivi ñuu Corinto sa siñi ñu Tuhun Ndyoo. Ta i sicoo ndutyá ñu.

⁹Tacuan ta minoo sa cuaa i ndyehe ra Pablo sii ra Jesús sisi

ñimahna ta i catyi ra Jesús sihin ra: Ma yuhun Pablo, ta ma cutaxun. Zacuohon Tuhun Ndyoo.

¹⁰Vatyi zacuenda mi suun. Yoñi ñiyivi cuu tiin suun sa zaha ñu maña suun vatyi iyo cuaha xaan ñiyivi ñuu ya sa cua sino iñi sii.

¹¹Yucuan cuenda i ndoo ra Pablo minoo cuiya zazava ñuu Corinto sa zacuahra ra sii ñiyivi Tuhun Ndyoo.

¹²Zoco tyiemvu sa cuu ra Galión gobernador nu cu si Acaya, i ndu-iin ñiyivi hebreo sa ña sino iñi, ta i tiin ñu sii ra Pablo. I sindyaca ñu sii ra nuu ra ndyaca ñaha.

¹³Ta i catyi ñu sihin ra Galión: Ra ihya, nacatyi xaan ra sihin ñiyivi cuhva zacahnu ñu sii Ndyoo, zoco yivi cuhva catyi ley ndi cuu si cuan.

¹⁴Sa cua cahan ra Pablo ta i catyi ra Galión sihin ñiyivi hebreo: Tyizoho ndo. Ñahñi sa i zavaha ra ya. Tatu zavaha ra sa ña vaha a cuatyi cua zayange sii ta cua tyizohi sa cahan ndo. Zoco ña tacuan cuu si vatyi ñahñi sa zavaha ra. Ta ma tyizohi sa cahan ndoho ñiyivi hebreo.

¹⁵Cuñi ndo cuatyi sihin ra vatyi zacuahra ra inga tuhun. Inga tuhun nacatyi ra ta tucu iyo ley maa ndo. Ma ndyehi tyiño cahan ndo. Catyi ra.

¹⁶Tacuan ta i tava ra sii ra hebreo sata vehe.

¹⁷Tandihi ñiyivi griego, i tiin ñu sii ra Sóstenes. Ra cu nuu sii vehe ñuhu hebreo cuu ra. I cañi xaan ñu sii ra zuun ñi yuvehe tyiño vatyi cuñi ñu cuatyi sihin ñiyivi hebreo. Ta ñá cahan maa ra gobernador Galión.

Sa nanuhu tucu ra Pablo ndya ñuu Antioquía ta ziqui i quihin tucu ra ityi cuahan ra sa cu uñi saha

¹⁸Cuaha ca quivi i ndoo ra Pablo yucuan. Tacuan ta ziqui i cuziin tahan ra sihin ñiyivi yucuan. Ta cuahan ra ñuu Cencrea. I zatya tyehe ra Pablo xiñi ra vatyi cua zavaha ra minoo cuhva sa catyi ra sihin ra Ndyoo. Ta ziqui i quihvi ra barco vatyi cua cuhun ra ityi Siria sihin ña Priscila ta ra Aquila. Yii maa ña Priscila sii ra Aquila.

¹⁹Ta sa saa ñu ñuu Efeso i zandoo ra sii ra Aquila ta sii ña Priscila ta cuahan ra vehe ñuhu hebreo ta cahan ra sihin ñu hebreo ñu titahan yucuan.

²⁰I sica ñu sii ra sa ndoo ra naha ca, zoco ñá cuñi ra.

²¹Tacuan ta ziqui cua cuziin tahan ra sihin ñiyivi ta catyi ra: Cuñi si sa cuhin ñuu Jerusalén sa cuenda vico. Zoco tatu cuhva ra Ndyoo cua quisi tuqui nu ndyaa ndo. Ta i quihin ra ityi cuahan ra. I quita ra ñuu Efeso sihin barco.

²²Ta sa saa ra Pablo ñuu Cesarea i quihin ra ityi cuahan ra ñuu Jerusalén, ta i saa ra nu iyo ra ndyizo tyiño cuenda ñiyivi sino iñi Tuhun Ndyoo yucuan. Ta i nacatyi ra Pablo sihin ra tandihi sa i zavaha ra nu sahan ra. Ta ziqui cuahan ra ñuu Antioquía.

²³I ndoo ra zuhva quivi ñuu Antioquía cuan ta ziqui i quihin tucu ra ityi cuahan ra nu cu si Galacia ta nu cu si Frigia. Tahan tahan ñuu sahan ra ta saha ra tundyee iñi sii ñiyivi sino iñi Tuhun Ndyoo.

**Zacuaha ra Apolos sii ñiyivi
Tuhun Ndyoo ñuu Efeso**

²⁴I quisi minoo ra hebreo ñuu Efeso. Nañi ra Apolos. Ra ñuu Alejandría cuu ra. Casi xaan zacuaha ra Tuhun Ndyoo. Sito xaan ra Tuhun Ndyoo, tutu sahnú.

²⁵Zacuaha ra yozo caa iyo ra Ndyoo. Zacuaha ra sihin tandihi cuui añima ra. Vaha xaan zacuaha ra cuhva sito ra sa cuenda ra Jesús, zoco ta coto ca ra tandihi sa cuenda ra Jesús. Sito ra maa ñi cuhva i zacuaha ra Juan sa zacoo ndutya ra sii ñiyivi.

²⁶Ñá yuhu ra Apolos ta i quisaha zacuaha xaan ra sii ñiyivi sisi vehe ñuhu hebreo. I siñi ña Priscila ta ra Aquila sa cahan ra. Ta ziqui i quihin ñu sii ra ta sahan ñu ndya zava ta i nacatyi ñu sihin ra tandihi sa cumañi ca coto ra, tandihi sa i zavaha ra Ndyoo ta cuhva zacacu ra sii ñiyivi sa cuenda ra Jesús, i nacatyi ñu sihin ra.

²⁷Tacuan ta i cuñi ra Apolos sa cahun ra ndya nu cu si Acaya, ta i tyindyee ñiyivi sino iñi Tuhun Ndyoo sii ra vatyi saha ñu xuhun ta i tyaa ñu minoo carta sii inga ñiyivi sino iñi Tuhun Ndyoo ityi cuan vatyi cua nacoto ñu sii ra. Ta sa saa ra Apolos nu cu si Acaya i tyindyee xaan ra sii ñiyivi yucuan. Sa sino iñi ñu sii ra Jesús vatyi iyo xaan tumañi iñi sii ra Ndyoo.

²⁸I ndyehe tandihi ñiyivi yucuan vatyi vaha xaan cahan ra Apolos sihin ñiyivi hebreo sa ña sino iñi vatyi saha xaan ra Ndyoo cuhva sii ra. Ta i zañaha ra cuhva catyi Tuhun Ndyoo. I catyi ra sihin ñu:

Ndatu ndo sii ra Cristo. Yuhvi catyi vatyi ra Jesús cuu ra vatyi i tava ra Ndyoo tyiño sii ra sa cua zacacu ra sii ñiyivi nu iyo ñu ndyehe tundoho. Catyi ra Apolos.

Sahan tucu ra Pablo ñuu Efeso

19 Ta sa ndyaa ra Apolos ñuu Corinto ta i yaha ra Pablo ityi yucu nu cu si Asia cuan ta cuahan ra ñuu Efeso. Yucuan nañihi ra sii zuhva ra sino iñi Tuhun Ndyoo.

²Ta i ndaca tuhun ra Pablo sii ra ta catyi ra: ¿Atu i naquihin ndo Taty i quivi i sino iñi ndo Tuhun Ndyoo? Ta i catyi ra cuan sihin ra Pablo: Tañaha ca ma coto ndi tuhun sa cuenda Taty i.

³Ta i catyi ra Pablo: ¿Ta yozo caa i sicoo ndutya ndo? Ta i catyi ra sihin ra Pablo: I sicoo ndutya ndi cuhva catyi ra Juan.

⁴Ta ziqui i catyi ra Pablo sihin ra: I zacoo ndutya ra Juan sii ñiyivi sa yaha ndu-uu iñi ñu cuatyi ñu. I nacatyi ra sihin ñu vatyi cua quisi inga ra cuee ca ta sii maa ra cuan cua sino iñi ñu. Ra yucuan cuu Jesús. Tacuan i zacuaha ra Juan, catyi ra Pablo.

⁵Ta sa siñi ra cuan tuhun cuan ta i sicoo ndutya ra sa cuenda ra Jesús.

⁶Ta ziqui i tyizo ra Pablo ndaha ra ziqui ra, ta i noo xica Taty i sii ra, ta i quisaha cahan ra inga zahan sa ña tuhva ra cahan ta i zaha ra profetizar, ndihi ca.

⁷Tañi usi uu tahan ra cahan tacuan.

⁸I sahan ra Pablo vehe ñuhu ñiyivi hebreo. Uñi yoo i zacuaha ra sii ñiyivi yucuan. Ñá yuhu ra ta i

natuhun tahan xaan ra sihin ñiyivi hebreo sa ña sino iñi. Ta i nacaty ra sihin ñu cuhva ndyaca ñaha ra Ndyoo. Ta i zañiñi ra sii ñu vaty ndu-uu iñi ñu cuaty ñu.

⁹Zoco zuhva ñiyivi yucuan ñihi xaan iñi ñu. Ná cuñi ñu sa sino iñi ñu. Ta quiñi xaan i cahan ñu sii tuhun ra Jesús nuu ñiyivi yucuan. Tacuan ta i zandoo ra Pablo sii ñu. I quihin ra sii ñu sino iñi, ta tandihi quivi i natuhun tahan xaan ra sihin ñu sa cuenda Tuhun Ndyoo nu iyo zicuela ra maestro nañi Tiranno.

¹⁰Ta tacuan i sicoo tyiño uu cuiya cuhva ndya tandihi ñiyivi hebreo ta tandihi inga ñiyivi nacahnu Asia i siñi ñu tuhun ra Jesús.

¹¹Cuaha xaan sa ndyityi i zavaha ra Pablo i zacuu ra Ndyoo.

¹²Cuhva ndya pañitu a ñaa zahma cua tiin ra Pablo ta cuhun si sihin ñiyivi ndya nu caa ñu cuhu ta i quita cuehe a ñaa taty cuihna ñoho aña ñu.

¹³Tacuan ta sicoo minoo ityi ñiyivi hebreo. Ndiñvi noo ñu ta catyi ñu vaty cuu tava ñu taty cuihna sii ñiyivi, ta i cuñi ñu sa cua cutyiño ñu zivi ra Jesús. I cahan ñu cuan sihin taty cuihna ta catyi ñu: Catyi xaan ra Pablo yozo caa iyo ra Jesús. Cuenda ra Jesús cuan catyi ndi vaty cua quiton. Catyi ñu.

¹⁴Tacuan i zavaha usa tahan ñiyivi, zehe ra Esceva, minoo ra cu zutu cahnu sii ñiyivi hebreo. Usa tahan ñu i zavaha tacuan.

¹⁵Zivi ra Jesús i cahan ñu sihin taty cuihna ta catyi si sihin ñu: Nacote sii ra Jesús. Ta nacote sii ra Pablo, zoco ña nacote yoo ndoho

cuu ndo vaty ñahñi cuhva iyo sii ndo. Catyi si.

¹⁶Tacuan ta i ndava ra ñoho taty cuihna ziqui ñu ñihi xaan. I tiin ra sii ñu ta cañi xaan ra. Zañicuehe ra sii ñu. I sañdyra ra zahma ñu ta i sino ñu vehe ra.

¹⁷Tacuan i cuu si ta i sito tandihi ñiyivi ñuu Efeso cuhva i tahan ñu. I sito ñu hebreo ta tandihi inga ñiyivi. Ta yuhu xaan ñu. Ta i quisaha catyi ñu vaty cahnu xaan cuu ra Jesús.

¹⁸Cuaha xaan ñiyivi sa sino iñi Tuhun Ndyoo i quisi nahma ñu nuu ra Pablo tandihi sa ña vaha i zavaha ñu vaty i zatyño ñu sihin tuhun tazi.

¹⁹I sahmi ñu libro sa sityiño ñu sa zatazi ñu sii ñiyivi. Ta i sahmi ñu tandihi sa sityiño ñu sa cuenda tyiño cuan. Ta sa yaha sahmi ñu tandihi libro ñu ta i zaha ñu cuenda yozo xuhun i siquih si ta catyi ñu vaty siquih si uu xico usi mil xuhun cuis.

²⁰Tacuan i nducahnu ca Tuhun Ndyoo, ta cuaha ca ñiyivi sino iñi ñu, ta saha xaan ca Ndyoo tundyee iñi sii ñu (sa cundyico ñu sii ra).

²¹Tacuan ta i sica iñi ra Pablo sihin aña ra vaty cua yaha tucu ra nu cu si Macedonia. Cua yaha tucu ra nu cu si Acaya, ta cua cuhun tucu ra ñuu Jerusalén vaty catyi ra: Cua cuhun xihne ñuu Jerusalén. Ta ziqui cuñi xaan si sa cuhun tuqui ñuu Roma. Catyi ra.

²²I tasi ra Pablo sii ra Timoteo sihin ra Erasto, uu tahan ra zatyño sihin ra, ityi nu cu si Macedonia. Ta i ndoo ca ra Pablo nu cu si Asia.

Cuhva i cuvaa xaan ñiyivi ñuu Efeso

²³Ta tyiemvu cuan sicoo sa sahñi tahan ñiyivi ñuu Efeso sa cuenda Tuhun Ndyoo.

²⁴Minoo ra nañi Demetrio quisaha sihin si vatyi cuaha xaan ñiyivi sino iñi Tuhun Ndyoo. Maa ra Demetrio cuan tuhva zavaha inga ndyoo xuhun cuis, nañi si Diana. Ta sihin tyiño zavaha ra cuaha xaan zahacanaa ra sihin ra zatyiño sihin ra.

²⁵Yucuan cuenda i cana ra sii tandihi ra sihin inga ra zatyiño tañi zatyiño maa ra ta i catyi ra sihin ra: Yañi xaa, sito ndo vatyi vaha xaan zahacanaa yo sihin tyiño ya.

²⁶Ta vityi sa ndyehe yo ta sa siñi yo cuhva cahan ra Pablo. Catyi ra vatyi ndyoo zavaha ñiyivi yivi ndyoo cuu si. Ta cuaha xaan ñiyivi sa sino iñi sa cahan ra ihya ñuu Efeso ta nacahnu Asia.

²⁷Tatu tacuan cua cuu si, ta ma zata ca ñiyivi sa zavaha yo. Ta tatu cua zaña ñiyivi sa zacahnu ñu sii vehe ñuhu ña Diana, ña vaha sa tacuan vatyi cahnu xaan ndyoo cuu ña. Vityi zacahnu tandihi ñiyivi nu cu si Asia ta tandihi ñiyivi ñuu ñiyivi sii ña. Ta nu cuahan quivi ma zacahnu ca ñu sii ña tatu sino iñi ñu sa cahan ra Pablo. Catyi ra Demetrio.

²⁸Ta sa siñi inga ra sa nacatyi ra ta i cuxaan xaan ra ta i cana saa ra ta catyi ra: Cahnu xaan ndyoo cuu ña Diana ña cu sitocho yo ñuu Efeso ya.

²⁹Tacuan i cuu ta i cuvaa ñiyivi nacahnu ñuu cuan. I tiin ñu sii ra Gayo ta ra Aristarco. Uu tahan

ra tahan ra Pablo cuu ra, ra ñuu Macedonia, ta sica noo ra sihin ra Pablo. Ta i xita cañoho ñiyivi sii ra ndya nu cua cundaa tyiño.

³⁰I cuñi ra Pablo cuhun ra nu cuvaa ñiyivi ta cahan ra sihin ñu, zoco ñá saha inga ra sino iñi Tuhun Ndyoo.

³¹Ta zuhva ra cu tyiño cuenda Asia, amigo ra Pablo cuu sii ra. Ta i tasi tucu ra cu tyiño cuan tyiño ta catyi ra vatyi ma cuhun ra Pablo.

³²Ta nu titahan ñiyivi iyo ñu cana saa minoo cuhva ta inga ñu cana saa inga cuhva vatyi cuaha xaan ñu cuvaa. Ta cuaha xaan ñu ñá sito ñu ñaa cuenda titahan ñu.

³³Tacuan ta i tyaa ñiyivi hebreo sii minoo ra nañi Alejandro ityi nuu, ta i nacatyi ñu sihin ra ñaa sa cua cahan ra. Vatyi ñá sito tucu maa ra cuan ñaa sa cuu. Tacuan ta i saha ra Alejandro minoo zeña sihin ndaha ra vatyi cua cutaxi ñiyivi vatyi cuñi ra catyi ra vatyi ñahñi cuatyi ndycuu ñiyivi hebreo. Zoco inga ñiyivi i cuvaa xaan ca ñu.

³⁴Ta sa sito ñu vatyi ra hebreo cuu ra ta quisaha cana saa tandihi ñu vatyi ñá tahan iñi ñu. Tañi uu ora i cana saa ñu ta catyi ñu: ¡Cahnu xaan ndyoo cuu ña Diana ña cu sitocho yo ñuu Efeso ya! Tacuan ñi i cana saa ñu.

³⁵Tacuan ta cuee ca i zacutaxi ra cu secretario sii ñiyivi ta i catyi ra: Ndoho ra ñuu Efeso, sito tandihi ñiyivi ñuu ñiyivi vatyi cumi vaha yo vehe ñuhu ña Diana vatyi cahnu xaan ndyoo cuu ña. Ta cumi yo sii ña vatyi i quisi ña ndya ityi ziqui ta i canacava ña.

³⁶Yoñi ñiyivi cua catyi vatyi ña ndisa. Cutaxi ndo. Ta ñahñi ca sa

zavaha ndo tatu ma nacañi vaha iñi ndo sa xihna ñi.

³⁷Vatyi nduu tahan ra sindyaca ndo ihya, ñahñi cuatyi i zavaha ra, ta ñahñi ndya vaha ñi i cahan ra sii ndyoo yo.

³⁸Yucuan cuenda catyi tatu cuatyi cuñi ra Demetrio ta inga ra zatyño sihin ra. Cuu cutyihí ra cuatyi saha ra nuu ra cu tyiño. Yucuan cuenda iyo ra juez ta iyo ra cu tyiño. Cuu zandaa ra sihin ra.

³⁹Ta tatu inga tyiño cuñi ndo. Titahan tucu ndo cuhva catyi ley.

⁴⁰Ta sa cuenda sa ndyicuu ndo vityi cuu tyaa ñiyivi cuatyi sata ndo nuu ra cu tyiño. Cuu catyi ñiyivi vatyi cuñi ndo cahñi tahan ndo sihin ra cu tyiño vatyi i titahan maa ndo tacuan ñi. Tatu cuñi ra cu tyiño coto ra ñaa cuenda cuvaa xaan ndo, ma ñihi yo cuhva cahan yo sihin ra. Tacuan i catyi ra secretario cuan.

⁴¹Tacuan i catyi ra ta natasi ra sii ñu nacunuhu ñu ndya vehe ñu.

Yaha ra Pablo nu cu si Macedonia ta cuahan ra nu cu si Grecia

20 Ta sa cutaxi ñiyivi ta ziqui i cana ra Pablo sii tandihí ñiyivi sino iñi Tuhun Ndyoo. I tahvi ra tyiño nuu ñu, ta saha ra tundyee iñi sii ñu. Ta ziqui i catyi ra vatyi cahun ra. Ta i quita ra ta cuahan ra ndya nu cu si Macedonia.

²I saa ra nu cu si Macedonia, ta saha ra tundyee iñi sii ñiyivi sino iñi Tuhun Ndyoo. Ta ziqui cuahan ra Grecia.

³Yucuan i ndoo ra uñi yoo, ta ziqui sa cuñi quihvi ra barco ta cahun ra nu cu si Siria, zoco i ñihi

ra tuhun vatyi cuñi ñu hebreo, sa ña sino iñi, cahñi ñu sii ra. Yucuan cuenda i sica iñi ra vatyi vaha ca cua cunuhu ra ityi nu ñuhu ndya nu cu si Macedonia.

⁴Ihya cuu ra cutahan sihin ra. Ra Sópater, ra ñuu Berea cuu ra, ra Aristarco ta ra Segundo. Ra ñuu Tesalónica cuu nduu tahan ra. Ra Gayo, ra ñuu Derbe cuu ra ta ra Timoteo. Ra Tíquico ta ra Trófimo. Nduu tahan ra cuan i cacu nu cu si Asia.

⁵Xihna ca tandihí maa ra cuahan ityi nuu ta ndatu ra sii ra Pablo ta sii mi ñuu Troas. (Ra Lucas cuu ra tyaa tutu ya.)

⁶Maa ndi, i ñoho ndi zuhva ca quivi ñuu Filipos ndya sa yaha vico sa sasi ñiyivi pan ña ndaa, ta ziqui i quita ndi ñuu cuan sihin barco. Ta sa yaha ohon quivi ta ziqui i ñihi tahan ndi sihin inga ra ñuu Troas. Yucuan i ndoo ndi usa quivi.

Sindyehé ra Pablo nu yucu ñiyivi sino iñi ñuu Troas

⁷Quivi tumingu i tatahan tandihí ñu sino iñi Tuhun Ndyoo. Sasi ñu pan ta sihi ñu ndutya uva vatyi cua nacohon iñi ñu cuhva sihi ra Jesús sa cuenda ñu. Ta i zacuahá ra Pablo sii ñu cuhva ndya maañuu vatyi cua cahun ra inga quivi.

⁸I titahan ndi minoo vehe toto ndya ziqui nu cayu cuaha xaan lámpara (cuhva cuu ndyehé ndi).

⁹Ta ndyaa minoo ra yoco, nañi ra Eutico, ventana vehe sa cu uñi toto cuan. Ta naha xaan i cahan ra Pablo ta cuñi xaan ra Eutico cuzu ra. Ta i quixi ra ta i canacava ra ndya nu ñuhu. Ta ndaha sihi ra, ta i naquihin ñu sii ra.

¹⁰Tacuan ta i noo ra Pablo ndya nu candyaa ra. Ta sa cunumi ra sii ra ta i catyi ra sihin ñu sino iñi Tuhun Ndyoo: Ma yuhu ndo. Sa nandoto ra.

¹¹Tacuan ta i nandaa tucu ra Pablo ndya ziqui cuan. Sasi ra sihin ñu, ta naha ca i zacuaha ra sii ñu cuhva ndya sa vasi cundisi. Ta ziqui cuahan ra.

¹²Ta ra yoco cuan, i nduvaha ra, ta cuanuhu ra ndya vehe ra. Ta zii xaan i cuñi tandihi ñiyivi.

**Quita ra ñuu Troas ta
cuahan ra ñuu Mileto**

¹³Ta maa ndi yatyi ca cuu ndi nuu. Cuahan ndi sihin barco ndya ñuu Asón. Yucuan cua ñihi tahan ndi sihin ra Pablo, ta cua cuhun ra sihin ndi. Vaty i maa ra cuñi ra cuhun ra ityi nu ñuhu ndya ñuu Asón.

¹⁴Ta sa ñihi tahan ndi sihin ra ñuu Asón, i quihvi ra sisi barco ta cuahan ra sihin ndi ndya minoo ñuhu mahñu tyañuhu. Nañi si Mitilene.

¹⁵I quita tucu ndi yucuan, ta inga quivi i yaha ndi Quío, sa cuu inga ñuhu mahñu tyañuhu. Ta inga tucu quivi i saa ndi Samos minoo ñuhu mahñu tyañuhu. I quitatu ndi ñuu Trogilio nu cu si Asia ta inga quivi i saa ndi Mileto.

¹⁶I yaha ñi ndi ñuu Efeso vaty i ñá cuñi ra Pablo ndoo ra naha Asia cuan. Tacuan i zavaha ra vaty i numi ra. Tatu cua cuu, cuñi ra zacahnu ra vico Pentecostés ndya ñuu Jerusalén.

**Natuhun ra Pablo sihin ra
ndyizo tyiño cuenda ñiyivi
sino iñi ñuu Efeso**

¹⁷I cana ra Pablo sii ra ndyizo tyiño cuenda ñiyivi sino iñi ñuu Efeso ndya ñuu Mileto nu ndyaa ra.

¹⁸Ta sa saa ra cuan i catyi ra Pablo sihin ra: Sa sito ndo yozo caa i cui ta sindyei sihin ndo quivi i sei sa xihna ñi Asia ya.

¹⁹I zatyiño xein tyiño ra Ndyoo. Ñá zacahni sii. Cuihya xaan i cuñi añime sa ndyehi cuhva zavaha ñiyivi. I ndyehi xein tundoho ta cuaha xaan sa cuñi zavaha ñiyivi hebreo, ñu ña sino iñi cuan, sihin.

²⁰Sito ndo vaty i ñá yuhi ta nacaty i sihin ndo tandihi cuhva ñaa sa cua tyindyee sii ndo. I zacuehi sii ndo nu titahan ndo. Ta i zacuehi sii ndo ndya vehe ndo.

²¹I nacaty i sihin ñiyivi hebreo ta sihin inga ñiyivi vaty i cuñi si sa zama ñu cuhva iyo ñu. Nazandoo ñu cuaty i ñu ta nasino iñi ñu sii ra Jesucristo.

²²Ta vity i cuehin ñuu Jerusalén vaty i tacuan catyi Taty i li sihin. Ña site ñaa sa cua cuu sii yucuan.

²³Zoco tandihi ñuu yehi catyi Taty i li sihin vaty i cuaha xaan tundoho cua ndyehi ta cua quih i vehe caa.

²⁴Zoco nu ña sica iñi sa cuenda cuan ta vazú cui ñahñi sa cuu. Cuñi xein zavehi tyiño saha ra Jesús sii. Tacuan ta nduzi cuñi. Cuñi xein zacote cuhva saha xaan ra Ndyoo tumañi iñi sii ñiyivi.

²⁵Ta sa i nacaty i xein sihin ndo cuhva ndyaca ñaha ra Ndyoo, ta site vaty i ma ndyehi ca ndo sii.

²⁶Yucuan cuenda cuñi nacaty i sihin ndo vaty i yivi ca cuaty i mi cuu tatu ña cuñi ndo sino iñi ndo sii ra Jesús.

²⁷Vaty i nacaty i tandihi cuii sa cuñi ra Ndyoo zavaha ndo. Ñahñi sa i tyixehi.

²⁸Yucuan cuenda zacuenda ndo sii ndo ta zacuenda ndo sii tandihi ñiyivi sino iñi Tuhun Ndyoo vatyí maa Tatyí li saha tyiño cuan sii ndo vatyí i zata ra Jesús sii ñiyivi sino iñi sii ra sihin niñi ra.

²⁹Site vatyí tatu sa cuehin cua quisi inga ñiyivi, ta ma tahan iñi ñu sa sino iñi ndo Tuhun Ndyoo. Ta tañi zavaha ina nduvahu maña sii mvee ticatyí tacuan cua zavaha ñu maña sii ndo.

³⁰Ta cuhva ndya nu yucu maa ndo ta cua coo ñu zacuaha sa ña ndisa vatyí cuñi ñu sa cundyico ndo sii ñu.

³¹Zacuenda xaan ndo sii ndo sihin ñu. Ta nacohon iñi ndo vatyí uñi cuiya i sindyei sihin ndo, ta i zacuehi sii ndo ñiyaca ta ndiyaca ndya cuhva sacu ñi que vatyí cuñi xein sa zavaha ndo sa vaha.

³²Ta vityí, yañi xaa, zandoi sii ndo sihin ra Ndyoo ta zandoi Tuhun ra sihin ndo vatyí cuñi xaan ra sii ndo, ta cuu cuhva ra tundyee iñi sii ndo. Ta cua cuhva ra tandihi sa cuñi ra cuhva ra sii ndo vatyí zehe ra sii ndo sihin tandihi ñiyivi sa zanduvaha ra añima.

³³Ñá quihin xuhun ndo, ta nu zahma ta ñá sique sii ndo.

³⁴Sito vaha ndo vatyí i zatyíne sihin ndehi ta ñihi tandihi sa siñi ñuhu sa cuenda mi ta sa cuenda ra ndihi sihin.

³⁵Tandihí tyiemvu i zacuehi sii ndo vatyí cuñi si sa zatyíno ndo ta tyindyee ndo sii ñiyivi ndahvi ca. Nacohon iñi ndo vatyí zuun ñi maa ra Jesús i catyí: “Zii cua cuñi ndo tatu tyindyee ñiyivi sii ndo, zoco zii xaan ca cua cuñi ndo tatu tyindyee ndo sii ñiyivi.”

³⁶Ta sa ndihi cahan ra Pablo ta i sicuiñi siti tandihí ñiyivi ta i sica tahvi ra Pablo sii Ndyoo sa cuenda tandihí ñu.

³⁷Ta tandihí ñu i sacu xaan ñu ta i sicunumi ñu sii ra Pablo ta sihi ñu xiti ra.

³⁸Cuihya xaan cuñi ñu vatyí sa catyí ra vatyí ma ndyehe ca ñu sii ra. Ta ziqui i sindyaca ñu sii ra ndya nu ndyaa barco.

Cuahan tucu ra Pablo ñuu Jerusalén

21 Ta zandoo ndi sii ñiyivi ñuu Efeso ta cuahan ndi sihin barco. Ta sa ndoo ñi cuahan ndi ta saa ndi minoo ñuhu mahñu tyañuhu nañi si Cos. Ta inga quivi cuahan ndi inga ñuhu mahñu tyañuhu sa nañi Rodas. Ta yucuan i quita ndi ta cuahan ndi ñuu Pátara.

²Ta ñuu Pátara cuan i quihvi ndi inga barco, yutu cuahan nu cu si Fenicia. I quihvi ndi sii tu ta cuahan ndi.

³Ta sa yaha ndi, ndyehe ndi minoo ñuhu luhlu nañi si Chipre. I yaha ndi sii si ityi siyo zatyí ndi ta cuahan ndi ndya nu cu si Siria. Ta ziqui cuahan barco ñuu Tiro vatyí cua zandoo tu carga. Ta yucuan cuenda i ndoo ndi ñuu Tiro cuan.

⁴I nanducu ndi sii ñiyivi sino iñi Tuhun Ndyoo, ta i ndoo ndi sihin ñu usa tahan quivi. Ta maa ñu i nacatyí ñu sihin ra Pablo vatyí ña vaha cuhun ra ñuu Jerusalén vatyí tacuan catyí Tatyí li sihin ñu.

⁵Zoco sa ndihí sa usa quivi cuan ta i quita ndi. Tandihí ñiyivi sino iñi Tuhun Ndyoo ta ñu zihí ta sa ndyihí i cutahan ñu sihin ndi i sindyaca ñu sii ndi ndya yuñuu

cuan. Ta i sicuiñi siti ndi yuhu tyañuhu ta sica tahvi ndi sii Ndyoo.

⁶Tacuan ta i nacahan ndi sihin ñu. I quihvi ndi barco ta cuanuhu tandihî ñu ndya vehe ñu.

⁷I quita ndi ñuu Tiro ta cuahan ndi ñuu Tolemaida. Ta yucuan i zandoo ndi barco ta i sahan ndi nu ndyaa ñiyivi sino iñi Tuhun Ndyoo yucuan. Minoo ñi quivi i ndoo ndi sihin ñu.

⁸Ta inga quivi i quita ra Pablo ta tandihî ndi, ra ndihî sihin ra, ta cuahan ndi ñuu Cesarea. Yucuan i saa ndi vehe minoo ra sa nacatyî xaan Tuhun Ndyoo sihin ñiyivi. Nañi ra Felipe. Maa ra cuu minoo sa usa tahan ra i casi ñiyivi vatyî cua tyindyee ra sii ra apóstol.

⁹Ta iyo cumi tahan zehe zihî ra Felipe. Ñu yoco cuu ñu. Ta i zaha ñu profetizar.

¹⁰Ta sa yucu ndi ñuu cuan zuhva quivi ta i saa minoo ra ndya nu cu si Judea. Nañi ra Agabo. Ta i zaha tucu maa ra profetizar.

¹¹I quisi ndyehe ra sii ndi. Ta sa i saa ra i quihin ra ñii ñoho sisi ra Pablo ta i sihñi ra saha ra ta i sihñi ra ndaha ra ta i catyi ra: Catyi Tatyî li vatyî ñuu Jerusalén cua cunuhñi sitofo ñii ya tañi nuhñi mi, ta cua cuhva ñu sii ra sii ñiyivi sa yivi ñiyivi hebreo cuu.

¹²Ta sa siñi ñiyivi sa cahan ra cuan ta maa ndi ra ndihî sihin ra Pablo ta ñiyivi ñuu Cesarea i catyi xaan ndi sihin ra Pablo vatyî sa ndyoo ñi ma cuhun ra ñuu Jerusalén.

¹³Zoco i catyi ra Pablo: ¿Ñacu sacu xaan ndo? ¿Ñaa cuenda saha ndo tucuihya iñi sii? Vatyî yuhvi

sa ndyaa listi yivi sa cunuhñi ñi sehi ta vazu cui ñuu Jerusalén sa cuenda ra Jesús vatyî maa ra ndyaca ñaha sii.

¹⁴Tacuan i catyi ra, ta ñá cuu zama ndi cuhva sica iñi ra. Yucuan cuenda i zandoo ndi tyiño cuan ta catyi ndi: Nazavaha maa ra Ndyoo cuhva cuñi ra.

¹⁵Ta ziqui i tyihi vaha ndi ndaha tyiño ndi ta cuahan ndi ñuu Jerusalén.

¹⁶Cuahan zuhva ra ñuu Cesarea sihin ndi, ra sino iñi Tuhun Ndyoo. Ta cuahan minoo ra ñuu Chipre. Mnasón nañi ra. Sa iyo cuiya sino iñi ra sii ra Jesús. Vehe ra Mnasón sindyaca ra cuan sii ndi vatyî cua cundyaa noo ndi sihin ra nu iyo vehe ra ñuu Jerusalén.

Natuhun ra Pablo sihin ra Jacobo

¹⁷Ta sa saa ndi ñuu Jerusalén zii xaan i cuñi tandihî ñu sino iñi Tuhun Ndyoo sa ndyehe ñu sii ndi.

¹⁸Ta inga quivi sahan ndi sihin ra Pablo vatyî cua natuhun ra sihin ra Jacobo. Ta i titahan tandihî ra ndyizo tyiño sa cuenda ñiyivi sino iñi.

¹⁹Ta i catyi ra Pablo: Nacumi sii maa ndo. Ta ziqui i nacatyî ra tandihî cuîi cuhva i zavaha ra Ndyoo. Ta i saha ra cuenda yozo caa i tyizoho ñiyivi sa yivi ñiyivi hebreo cuu Tuhun Ndyoo tandihî ñuu nu sahan ra.

²⁰Ta sa siñi ñu cuhva cuan i zacahnu xaan ñu sii Ndyoo. Ta i catyi ñu sihin ra Pablo: Vaha yañi xaa, zoco sa siton vatyî iyo cuaha xaan ñiyivi hebreo sa sino iñi sii ra Jesús vityî. Tandihî ñu catyi vatyî

ñiñi xaan cua cundyico yo tandihi ley saha ra Moisés.

²¹Ta catyi xaan ñiyivi sihin ñu vatyí moo zacuaha sii tandihi ñiyivi hebreo, ñu iyo ñuu nu iyo inga ñiyivi, vatyí nazaña ñu tandihi costumbre i saha ra Moisés. Catyi ñu vatyí moo catyi sihin ñu vatyí ma tahndya ca ñiñi xiñi xuu lee ta ma zavaha ca ñu costumbre sahnu ñu.

²²Yucuan cuenda ña ñihi ndi cuhva ñaa sa cua zavaha yo vatyí cua titahan ñiyivi tatu sa ñihi ñu tuhun vatyí saa ndo.

²³Yucuan cuenda vaha tatu cua zavohon cuhva catyi ndi. Iyo cumi tahan ra tahan yo ihya. Cua zavaha ra minoo cuhva sa catyi ra sihin Ndyoo.

²⁴Ta catyi maa ndi vatyí vaha xaan tatu cua cuhun sihin ra vehe ñuhu hebreo. Ta cua coo ica moo sihin ra sa cuenda ra Ndyoo. Cua tyiyahvun yahvi cuenda mvee ticatyí sa cua cahmi ra sa cua cuhva ra sii Ndyoo. Ta cua zatya tyehe xiñi ra cuhva iyo costumbre. Tacuan ta cua coto ñiyivi sii yo vatyí yivi sa ndisa cuu sa cahan ñiyivi sa cuendon. Cua ndyehe ñu vatyí cumi vaha moo costumbre maa yo.

²⁵Ta sa cuenda ñiyivi sa yivi ñiyivi hebreo cuu ta sino iñi ñu Tuhun Ndyoo. Sa tyaa ndi carta sii ñu ta catyi ndi vatyí ma caca iñi ñu cuenda costumbre hebreo. I catyi ndi maa ñi sa ma casi ñu coño sa saha ñiyivi sii inga ndyoo. Ma casi ñu ñiñi quití ta ma casi ñu coño quití tatu ñá sati vaha ñiñi ti. Ta ña vaha cua coo minoo ñaha sihin

ndya vaha ñi rayii tatu yivi yii ñu cuu. Ta tacuan tucu rayii. Tacuan i catyi ra cuan sihin ra Pablo.

Tiin ñiyivi sii ra Pablo vehe ñuhu hebreo

²⁶Tacuan cuu ta i quihin ra Pablo sii sa cumi tahan ra cuan. Ta inga quivi cuahan ra vehe ñuhu hebreo vatyí cua coo ica ra sa cuenda ra Ndyoo. Cuahan ra vehe ñuhu hebreo vatyí cua zacoto ra sii ra cu zutu hebreo ñaa quivi cua ndihi sa coo ica ra ta ñaa quivi cua cuhva ra ofrenda sii ra Ndyoo (vatyi tacuan i cuu costumbre sii ñiyivi hebreo).

²⁷Zoco sa cuñi ndihi ra sihin sa usa quivi sa iyo ica ra ta i quisi minoo ityi ñiyivi hebreo, ñu ña sino iñi, ñu Asia ta i ndyehe ñu sii ra Pablo sisi vehe ñuhu hebreo, ta i zacuvaa ñu sii ñiyivi. Ta i tiin ñu sii ra Pablo.

²⁸I cana saa ñu ta catyi ñu: Ñiyivi ñuu Israel, tyindyee ndo sii ndi. Ra ihya cuu ra zacuaha sii tandihi ñiyivi ñuu ñiyivi ta catyi ra vatyí ña vaha ley saha ra Moisés ta ñahñi tyindyee vehe ñuhu ya. Ta vityí i tyihi ra sii ra griego vehe ñuhu ya ta zativi ra ihya ta ii xaan cuu ihya. Ta ña zacahnu ra sii ra Ndyoo sa ndisa cuii.

²⁹Tacuan i cahan ñu vatyí sa ndyehe ñu vatyí ndihi ra Trófimo ra ñuu Efeso sihin ra Pablo si ñuu ta sica iñi ñu vatyí sindyaca ra Pablo sii ra sisi vehe ñuhu hebreo, zoco ña tacuan.

³⁰Tacuan ta i quisaha cuvaa tandihi ñiyivi, ta i cacono ñiyivi ndya vehe ñuhu cua ndyehe ñu ñaa sa cuu. Ta yucuan i tiin ñu sii

ra Pablo ta i xita cañoho ñu sii ra cuhva ndya sata vehe ñuhu ta ta sica ñi i nacazi ñu yuvehe.

³¹I cuñi ñu cahñi ñu sii ra ta i saa tuhun cuan ndya nu ndyaa ra cu nuu sii minoo mil zandaru vaty i cuvaa nacahnu ñuu Jerusalén.

³²Ta ta sica cuii ñi i quihin ra cu nuu sii zandaru sii inga ra ñiñi cuenda zandaru sihin zandaru ra. Ta i cacono tandihi ra ndya nu yucu tuu ñiyivi. Ta sa ndyehe ñiyivi vaty vasi zandaru ta i zaña ñu sa cañi ñu sii ra Pablo.

³³I tuhva ra cu nuu cuan nu ndyaa ra Pablo, ta i tava ra tyiño vaty cua tiin zandaru sii ra ta cua cuhñi ra sii ra sihin uu tahan cadena. Ta ziqui i ndaca tuhun ra cu nuu sii ra Pablo yoo ra cuu ra. Ta i ndaca tuhun ra ñaa cuaty i zavaha ra.

³⁴Zoco i cana saa xaan ñiyivi. Ziin ziin cuhva cahan ñu ta ñá siñi ra cu nuu sa cahan ñu vaty cuvaa xaan ñu. Ta ziqui i tava ra tyiño sii zandaru vaty cundyaca ra sii ra Pablo ndya vehe nu ndyaa zandaru.

³⁵Ta sa saa zandaru nu iyo cuayu yuvehe ra ta i cañihi ra sii ra Pablo ndyizo ra vaty i nduxaan xaan ñiyivi.

³⁶Ndyico tandihi ñu sii ra ta cana saa ñu: iNacuu ra cuan! Catyi ñu.

Nacaty i Pablo cuhva i zavaha ra

³⁷Sa cua quihvi ra sisi vehe ra zandaru ta i quisaha cahan ra Pablo sihin ra cu nuu sii zandaru ta catyi ra: Cuñi quehin minoo tuhun suhun. Ta iyo xaan i cuñi ra cu nuu ta catyi ra: Aan, ziqui cuu cahan moo zahan griego.

³⁸Vaziqui yivi yoho cuu ra i quisi ndya Egipto, ra cuñi cahñi tahan sihin ra ndyaca ñaha quivi cuan, ra i zandu-iin sisi cuhu cumi mil ra cahñi sii ñiyivi.

³⁹Tacuan i cahan ra ta i catyi ra Pablo: Yivi yuhvi. Ra hebreo cui. Ra ñuu Tarso sa iyo cuenda Cilicia cui. Cahnu xaan ñui. Sa ndyoo ñi cuhvon minoo tumañi iñi sii, naquehin sihin ñiyivi yucu ihya.

⁴⁰I saha ra cu nuu cuan permiso vaty cahan ra Pablo. Ta i sicuñi ndyaa ra Pablo nu iyo cuayu ta saha ra zeña sihin ndaha ra vaty cua cutaxi ñiyivi. Ta sa cutaxi ñu ta ziqui i cahan ra sihin ñu sihin zahan hebreo. Zahan cahan maa ñu cuu si cuan. Ta catyi ra:

22 Ndoho tata sahnu ta ndoho yañi xaa, tyizoho ndo tuhun cua quehin sihin ndo vaty vaty ñahñi cuaty i zavehi. Catyi ra.

²Ta sa siñi ñiyivi vaty cahan ra zahan hebreo ta i cutaxi ca ñu. Ta i catyi ra Pablo.

³Ra hebreo cui tañi maa ndo. I caqui ñuu Tarso, ñuu iyo cuenda Cilicia, zoco ñuu ya i sahnu mi vaty i zacuehi sihin ra sahnu Gamaliel. Vaha xaan i zacuahra ra sii, cuhva iyo ley sa cuenda ñiyivi sahnu sii yo. Tandihí quivi sica iñi cuhva cua tyei yahvi sii Ndyoo sihin tandihí cuii añime tañi sica iñi tucu maa ndo.

⁴Ta quivi cuan i sahñi tahan xein sihin ñiyivi sino iñi sii ra Jesús, ta iyo ñu i sahñi. Ta i quihin sii rayi ta sii ñu zihí, ta i tyihi sii ñu vehe caa.

⁵Sa ndaa cuu ra cu nuu sii zutu sihin tandihí ra sahnu vaty maa ra

cuu ra i saha tutu sii, sa sindyize ta sehin nu ndyaa ra hebreo yañi yo ñuu Damasco. Sehin sa nanduqui sii ñu sino iñi sii ra Jesús cua quisi ndyaque sii ñu ihya ñuu Jerusalén vatyi cua ndoho ñu.

**Nacatyí ra Pablo yozo caa
i zama cuhva iyo ra**

⁶Ta cuehin ta maa ora sa cuñi sei ñuu Damasco. Ta ta sica ñi i quituu minoo ñuhu ndisi xaan. Siconduu si sii.

⁷I nduve nu ñuhu. Ta ziqui i siñi sa cahan minoo ra cahan ta catyi ra: “Saulo, Saulo. Ña vaha sa cahñi tohon sihin mi,” catyi ra.

⁸Ta i ndaca tuhin ta catyi: “¿Yoo ra cuun, tata?” Ta i catyi ra: “Yuhvi cui ra Jesús, ra ñuu Nazaret. Sihin mi sahñi tohon.” Catyi ra Jesús.

⁹I yuhu xaan ra ndihi sihin vatyi ndyehe ra ñuhu cuan, zoco ña siñi ra sa cahan ra cahan sihin.

¹⁰Tacuan ta i catyi: “¿Ñaa sa cuñun zavehi tata?” Ta i catyi ra Jesús: “Nduvítan ta cuhun ñuu Damasco. Indyacuan cua nacatyí ñiyivi suhun tandihi sa cua zavohon.”

¹¹Zoco ñá cuu ndyehi. Ndaha i cuei zacuu ñuhu cuan. Yucuan cuenda i tiin ra ndihi sihin ndehi, ta i sindyaca ra sii ndya ñuu Damasco.

¹²Yucuan iyo minoo ra nañi Ananías. Zacahnu ra sii Ndyoo tañi catyi ley saha ra Moisés. Tandihi ñiyivi hebreo iyo yucuan catyi ñu vatyi ra vaha xaan cuu ra.

¹³Saa ra Ananías nu ndyei ta i quisaha catyi ra: “Yoho yañi Saulo, cua ndundisi tucu ndyehun vatyi.”

Catyí ra. Ta zuun ñi caa cuhva cuan i ndundisi tucu ndyehi. Ta i cuu ndyehi sii ra Ananías.

¹⁴Ta i catyi ra sihin: “Ndyá ta sa naha ta cuhva ndya vityi i zacahnu ñiyivi sahnú sii yo sii ra Ndyoo, ta zuun ñi maa ra i casi suun ta tyiemvu vatyi cua coton ñaa sa cuñi ra zavohon ta cua ndyehun sii ra Jesús, ra ñahñi cuatyí iyo. Ta i saha ra Ndyoo sa cuñi moo tuhun cahan ra suhun.

¹⁵Ta vityi cua nacatyun sihin ñiyivi nacahnu ñuu ñiyivi cuhva iyo ra. Cua nacatyun tandihi sa i ndyehun ta tandihi sa i tyizohon.

¹⁶Ta vityi ma cuatu con. Nduvítan ta coo ndutyon cuenda ra Jesús. Ta cua zandasi ra cuatyun.”

**Nacatyí ra Pablo cuhva i sahan
ra inga ñuu nu iyo ñiyivi sa
yivi ñiyivi hebreo cuu**

¹⁷Tacuan i tahan si sii tañi sa nacatyí sihin ndo ta ziqui i quisi nanuhi ndya ñuu Jerusalén ya. Sehin vehe ñuhu hebreo cua caca tahvi sii Ndyoo, ta i ndyehi sii ra Jesús.

¹⁸Ta i cahan ra sihin ta catyi ra: “Zanumon, ta quítan vatyi ñi ñuu Jerusalén. Vatyi ma sino iñi ñiyivi ya sa nacatyun sihin ñu sa cuenda mi.”

¹⁹Tacuan ta i catyi sihin ra: “Tata, sito ñiyivi vatyi i sehin tandihi vehe ñuhu hebreo. Ta i tiin sii ñiyivi sino iñi suun, ta i tyihi sii ñu vehe caa. Ta i cañi sii ñu.

²⁰Ta sito ñiyivi cuhva i sihi ra Esteban, ra i cahan xaan sa cuenda moo. Ta sito ñu vatyi tahan xaan iñi sa sahñi ñiyivi sii ra. Ta yuhvi

cuu ra i sicumi zahma ndisi ra sahñi sii ra.”

²¹Zoco i catyi tucu ra Jesús sihin: “Cuahan vityi vatyi mi tava tyiño suun sa cohon sa cuenda mi, ta cua cuhun nu sica ca nu iyo inga ñiyivi, ñu yivi ñiyivi hebreo cuu.” Tacuan i nacatyi ra Pablo sa cahan ra sihin ñiyivi yuvehe nu ndyaa zandaru.

Cuhva i zavaha ra cu nuu sii zandaru sihin ra Pablo

²²I tyizoho ñiyivi sa cahan ra Pablo sa xihna ñi, zoco ñá tyizoho ca ñu sa quisaha cahan ra sa cuenda inga ñiyivi, ñu yivi ñiyivi hebreo cuu. I quisaha cana saa ñu ta catyi ñu: iNacuu ra ya vatyi yivi sa vaha zavaha ra!

²³I cana saa ñu, ta i zavico ñu zahma ñu, ta i cañi ihno ñu ñiyiti ityi ziqui.

²⁴Tacuan ta i catyi ra cu nuu sii zandaru vatyi nacundyaca zandaru sii ra Pablo sisi vehe. I catyi ra cu nuu sihin inga zandaru vatyi cua cañi ra sii ra sihin cuarta ndya cua nacatyi ra ñaa cuenda cana saa xaan ñiyivi. Cuñi ra cu nu coto ra ñaa cuatyí cuñi ñu sihin ra Pablo.

²⁵I sihñi zandaru sii ra Pablo sihin minoo yutu sihin ñii. Ta ziqui i quisaha catyi ra Pablo sihin minoo ra cu capitán: Ña saha ley ndo sa cañi ndo sii minoo ra ñuu Roma. Ta tañaha ca cuhin nuu ra juez, ndihi ca.

²⁶Ta sa siñi ra capitán sa cahan ra Pablo ta cuahan ra nu iyo ra cu nuu sii zandaru ta catyi ra: Zacuendon cuhva zavohon vatyí ra yucuan, ra ñuu Roma cuu ra.

²⁷Tacuan ta cuahan ra cu nuu sii zandaru nu ndyaa ra Pablo ta

i ndaca tuhun ra sii ra ta catyi ra: ¿Atu ndisa cuii vatyí ra ñuu Roma cuun? Ta i catyi ra Pablo: Zuun.

²⁸Ta ziqui i catyi ra cu nuu sii zandaru: Cuaha xaan xuhun i tyiyahvi ta i ndui ra ñuu Roma. Ta i catyi ra Pablo: Yuhvi, ra cuenda ñuu Roma cui vatyí i caqui minoo ñuu nu ndyaca ñaha ñuu Roma.

²⁹Tacuan i catyi ra Pablo, ta yatyí xaan i zandihí zandaru tuhun sa cua cañi ra sii ra. Ta i yuhu xaan ra cu nuu sii zandaru sa sito ra vatyí ra ñuu Roma cuu ra Pablo. Ta sa saha ra sa cuhñi zandaru sii ra.

Sahan ra Pablo nuu tandihí ra ñiñi hebreo

³⁰Cuñi ra cu nuu sii zandaru coto ra ñaa cuatyí cuñi ñiyivi hebreo sihin ra Pablo. Yucuan cuenda inga quivi i zatitahan ra sii ra zutu nahnu sihin tandihí inga ra ñiñi. Tacuan ta i ndasi zandaru sii ra Pablo ta sindyaca ra sii ra nu titahan ra cuan.

23 Ta sa saa ra Pablo nu yucu ra cuan, ta i ndyehe ra sii tandihí ra hebreo, ra ñiñi ñuu cuan, ta i catyi ra sihin ra: Tandihí ndoho tata sahnu, yuhvi catyi vatyí iyo vehi sa cuenda ra Ndyoo ndya cuhva ndya vityí vatyí ñahñi cuatyí i zavehi. Tacuan i catyi ra Pablo.

²Tacuan ta i catyi ra Ananías, ra cu nuu sii ra cu zutu, sihin ra ndyaa yatyí ñi nu nandyaa ra Pablo vatyí cua cati ra yuhu ra Pablo.

³Tacuan i cuu ta i catyi ra Pablo sihin ra cu nuu sii ra cu zutu: Yoho, zaha xoon tuhun vatyí vaha xoon, zoco ña ndisa. Cua zandyehé ra Ndyoo tundoho suun. Ihya ndyoon

ta catyun vatyí cua tasi tuñun sii, cuhva catyí ley. Ta ñña cuenda catyun vatyí cua cati ra cuan yuhi? Ñahñi cuhva sa tacuan catyí ley.

⁴Tacuan i cahan ra Pablo ta i catyí inga ra yucu yucuan: Ña vaha cohon ndya vaha ñi sihin ra cu nuu sii ra cu zutu vatyí ra zatyíño tyiño Ndyoo cuu ra.

⁵Ta ziquí i catyí tucu ra Pablo sihin tandíhi ra: Yañi xaa, ñá site vatyí ra cu nuu sii ra cu zutu cuu ra. Tatu sa site ma quehin tacuan vatyí catyí Tuhun Ndyoo vatyí ma cahan yo ndya vaha ñi sihin ra ndyaca ñaha sii yo.

⁶Tacuan i cuu ta ziquí i nacoto ra Pablo vatyí ziiñ ziiñ iyo cuhva sii ra cu tyiño cuan. Zuhva ra iyo cuenda ley saduceo ta inga ra cuu cuenda ley fariseo. Ña inuu ñi sino iñi ra. Yucuan cuenda i cana saa ra Pablo nu yucu ra ta catyí ra: Ndoho tata sahnu ta ndoho yañi xaa, yuhvi ra fariseo cui. Ta ra fariseo i cuu zuti. Cua tasi tuñi ndo sii, ihya saha sa vatyí sino iñi vatyí cua nandoto tucu ñiyivi i sihi.

⁷Ta sa catyí ra Pablo tacuan ta ta sica ñi i quisaha natuhun tahan ra fariseo sihin ra saduceo, ta ñá ndu-iiñ ra.

⁸Catyí ra saduceo vatyí ma nandoto tucu ñiyivi tatu sa i sihi ñu ta yoñi ángel Ndyoo iyo ta ñahñi tatyí cuihna iyo catyí ra cuan. Ra fariseo cuu ra catyí vatyí cua nandoto tucu ñiyivi i sihi. Ta iyo ángel Ndyoo ta iyo tatyí cuihna cuñi ra. Tacuan cuu ta ñá ndu-iiñ ra sihin ra tahan ra.

⁹Tacuan ta ziquí saa xaan i nduu cahan tandíhi ra, ta zuhva ra

fariseo, ra cu maestro cuenda ley, i nduvita ra ta ñihi xaan cahan ra ta catyí ra: Ñahñi cuatyí i zavaha ra ya. Vaziquí cahan minoo ángel sihin ra. Tatu tyaa yo cuatyí sata ra sahñi tahan yo sihin Ndyoo. Catyí ra.

¹⁰Ñihi ca i nduu sahñi tahan ñiyivi. Nama tahan ra sii ra Pablo, ta i yuhu xaan ra cu nuu sii zandaru coto cahñi ra sii ra Pablo. Yucuan cuenda i tasi ra sii zandaru cua tava sii ra Pablo ticui ñiyivi cuan ta cundyaca ra sii ra ndya vehe zandaru.

¹¹Tacuan i cuu si. Ta zuun ñi quivi cuan ta sa cuaa i quituu ra Jesús nuu ra Pablo. I quisi ra nu ndyaa ra Pablo ta catyí ra sihin ra: Zandyeyun iñun. I cohon sa cuenda mi ihya ñuu Jerusalén, ta cua cahan tucun cuenda mi ñuu Roma.

Ndu-iiñ ra hebreo vatyí cua cahñi ra sii ra Pablo

¹²Inga quivi i ndu-iiñ ra hebreo vatyí cua cahñi ra sii ra Pablo. I sihñi tahan ra tuhun sihin ra tahan ra ta catyí ra: Ma casi maa yo ta ma coho yo ndya cuhva ndya cahñi yo sii ra Pablo. Cua cahñi yo sii ra vazu cuxaan ra Ndyoo sii yo.

¹³Yaha uu xico tahan ra ndu-iiñ sa tacuan.

¹⁴Tacuan ta cuahan ra nu iyo ra zutu nahnu ta catyí ra sihin ra: Sa sihñi tahan ndi tuhun vatyí ñahñi maa cua casi ndi cuhva ndya cahñi ndi sii ra Pablo. Cua cahñi ndi sii ra vazu cuxaan ra Ndyoo sii ndi.

¹⁵Ta maa ndo ta ra mandoñi cuñi si sa tasi ndo tyiño nu ndyaa ra cu nuu sii zandaru vatyí cua quisi

ndyaca ra sii ra Pablo nuu ndo ihya. Catyi ndo vatyi cua nducu tuhun vaha ndo sii ra. Cua cundyaa listo maa ndi ityi vasi ra ta cua cahñi ndi sii ra cuee ca sa saa ra ihya. Tacuan i catyi ra cuan.

¹⁶Tacuan i cuu si, ta i siñi minoo zasi ra Pablo, zehe cuhva ra, cuhva cahan ra cuan yozo caa cua cahñi ra sii ra Pablo. Ta cuahan ra ndya vehe zandaru cua nacaty i ra sihin ra Pablo.

¹⁷Tacuan ta i cana ra Pablo sii minoo ra cu capitán ta catyi ra sihin ra: Zavohon minoo tumañi iñi sii sa ndyoo ñi. Cundayacon sii ra luhlu ya nuu ra cu nuu vatyi iyo sa cua nacaty i ra sihin ra.

¹⁸I quihin ra capitán sii ra sindyaca ra sii ra nu iyo ra cu nuu sii zandaru ta i catyi ra capitán sihin ra cu nuu: Ra Pablo, ra ñoho vehe caa, i cana sii, ta catyi ra vatyi quisi ndyaque sii ra luhlu ya vatyi iyo sa cua nacaty i ra suhun.

¹⁹Ta ziqui i tiin ra cu nuu sii zandaru ndaha ra luhlu cuan ta sahan ra ndya zava. Ta i ndaca tuhun ra sii ra: ¿Ñaa sa cuñun nacatyun sihin?

²⁰Ta i quisaha nacaty i ra luhlu cuan sihin ra ta catyi ra: Sa ndyaa tuhun sa cua caca ra hebreo tumañi iñi suun. Cuñi ra sa cuhun ra Pablo ityaan nu cua titahan ra cu tyiño. Cua catyi ra vatyi cuñi ra sa cua ndaca tuhun vaha ca ra sii ra Pablo.

²¹Ma tyoon yahvi sa cahan ra vatyi yaha uu xico tahan ra cua quihí xehe ta cua cuatu ra sii ra Pablo ityi cuhun ra. Sa sihñi tahan tandihí ra tuhun sa ma casi ra ta ma coho ra ndya cuhva ndya cahñi

ra sii ra Pablo. Sa ndyaa listo ra vatyi sica iñi ra vatyi cua cuhva moo sa cuhun ra Pablo nu titahan ra cu tyiño. Tacuan i nacaty i ra luhlu cuan sihin ra cu nuu.

²²Ta ziqui i catyi ra cu nuu sihin ra: Ma nacatyun nu sihin minoo ñiyivi tuhun sa zacoton sii vityi. Ta ziqui i natasi ra sii ra luhlu cuan.

Tasi zandaru sii ra Pablo nu iyo ra gobernador Félix

²³Tacuan ta i cana ra cu nuu sii zandaru sii uu tahan ra cu capitán ta catyi ra sihin ra: Cua tyihi vaha ndo ndaha tyiño ndo vatyi cua cuhun ndo ñuu Cesarea. Caa iin sa sa cuaa cua quita ndo ihya. Uu ziendu zandaru cua cuhun sihin saha ra, inga uñi xico usi tahan ra cua cozo ra caballo, ta inga uu ziendu ra cua cuñaa ra lanza iñu ta cuhun ra.

²⁴Cuhva ndo uu a uñi tahan caballo cozo ra Pablo vatyi sica xaan nu cuhun ra ta cucumi vaha ndo sii ra ndya cua saa ra nuu ra gobernador Félix. Tacuan i catyi ra sihin ra.

²⁵Ta ziqui i tyaa ra cu nuu sii zandaru minoo carta cua tasi ra sii ra Félix. Ihya cuu sa catyi ra nuu carta cuan:

²⁶“Nacumi suun tata gobernador Félix catyi yuhvi ra Claudio Lisias.

²⁷Ihya cuu minoo cuhva cuñi quehin suhun. I tiin ñiyivi hebreo sii ra ya ta cuñi ñu cahñi ñu sii ra. Zoco i ñihi tuhun vatyi ra ñuu Roma cuu ra, ta yucuan cuenda i tasi zandaru ta i zacaqui sii ra.

²⁸Cuñi cote ñaa cuu cuaty i tyaa ñiyivi hebreo sata ra. Yucuan

cuenda i sindyaque sii ra nu titahan ra ndyaca ñaha sii ñiyivi hebreo.

²⁹Ta yucuan i site vatyi tyaa ra cuatyí sata ra cuenda ley hebreo ñi. Ñahñi cuatyí zavaha ra ta cahñi yo sii ra sa cuenda ley maa yo. Ta nu ñahñi sa zavaha ra ta tyihi yo sii ra vehe caa.

³⁰Zoco i ñihi tuhun vatyi sa sica iñi ra hebreo cuhva cahñi ra sii ra. Yucuan cuenda tasi sii ra nu ndyoon, ta i catyi sihin ñiyivi hebreo vatyi cua quisi nacatyí ra sihin moo ñaa cuu cuatyí cuñi ra sihin ra. Tacuan ñi tyei vityi.” Ta tacuan i ndihí carta i tyaa ra Claudio.

³¹Tacuan ta i quihin zandaru ityi cuahan ra cuhva sa catyi ra Claudio sihin ra. I quihin ra sii ra Pablo sa sa cuaa ta i sindyaca ra sii ra ndya ñuu Antípatris.

³²Ta inga quiví cua nanuhu zandaru, ra sahan sihin saha ra, ta maa ñi ca ra yozo caballo cuahan sihin ra Pablo.

³³Ta sa saa ra ñuu Cesarea i saha ra carta i tasi ra Claudio sii ra gobernador Félix, ta i nacuhva cuenda ra sii ra Pablo sii ra.

³⁴I cahvi ra gobernador cuan carta cuan. Ta ziquí i ndaca tuhun ra ndya cuu ñuu ra Pablo. Ta sa sito ra vatyi ra cuenda Cilicia cuu ra.

³⁵Ta ziquí i catyi ra sihin ra Pablo: Ndyá quisi xihna ra tyaa cuatyí saton ta ziquí cua tyizohi ñaa sa cua catyun sihin. Tacuan i cahan ra ta ziquí i catyi ra vatyi cua cucumi zandaru sii ra sisi vehe tyiño i zandaa ra Herodes ta sa naha.

Cuhva i nacatyí ra Pablo nuu ra Félix

24 I yaha ohon quiví ta ziquí i saa ra Ananías, ra cu

nuu sii ra cu zutu. I saa ra ñuu Cesarea sihin inga uu, a uñi tahan ra sahan ca ta sihin minoo ra nañi Tértulo. Ra Tértulo cutahan sihin ñiyivi hebreo ta tyaa ra cuatyí sata ra Pablo vatyi sito xaan ra Tértulo ley romana. Ta cua cuu ra yuhu ra hebreo cuan tañi minoo abogado. Ta cua tyiyahvi ra hebreo sii ra. Cuahan tandihí ra nuu ra gobernador Félix vatyi cua tyaa ra cuatyí sata ra Pablo.

²Ta ziquí i tasi ra Félix tyiño vatyi cua quisi ndyaca zandaru sii ra Pablo. Ta sa i saa ra i quisaha tyaa ra Tértulo cuatyí sata ra. I catyi ra Tértulo sihin ra Félix: Tata Félix, nacuhva ndi tyahvi ndyoo suun vatyi vaha xaan iyo ndi. Sito xaan moo ta yucuan cuenda iyo sa taxi ñi vityi tandihí ñuu nu iyo ndi. Vaha xaan ndyaca ñohon.

³Tandihí nduhvi ra hebreo nacuhva ndi uu xico tyahvi ndyoo suun. Ta zacahnu xaan ndi suun tata Félix.

⁴Ta vityi zandyeun iñun zuhva ta tyizohon minoo tuhun cua cahan ndi vatyi ña naha xaan cua cahan ndi.

⁵Sa ñihi ndi cuhva vatyi yivi ra vaha cuu ra Pablo ya. Zayanga xaan ra vatyi zacuvaa ra sii ñiyivi hebreo nacahnu ñuu ñiyivi. Ta maa ra cuu ra ñiñi sa cuenda minoo ityi ñiyivi ndyico sii ra Jesús, ra ñuu Nazaret.

⁶Ta i cuñi ra zavaha ra ndya vaha ñi sisi vehe ñuhu cahnu ndi. Zoco i tiin ndi sii ra. Cuñi ndi tasi tuñi ndi sii ra cuhva catyi ley maa ndi.

⁷Zoco i quisi ra Lisias, ra cu nuu sii zandaru. Ñihi xaan i tyaa siyo ra sii ndi, ta i quihin ra sii ra Pablo.

⁸Ta i catyi ra vatyí tatu cua tyaa ndi cuatyí sata ra cuñi si sa quisi ndi nuu moo. Tatu cua zanahma moo sii ra cua coton vatyí sa ndisa cuu cuhva tyaa ndi cuatyí sata ra. Tacuan cuu cuhva cahan ra Tértulo.

⁹Ta tandíhi ra hebreo i catyi ra vatyí sa ndisa cuu tandíhi sa nacatyí ra.

¹⁰Tacuan ta i catyi ra gobernador vatyí nacahan ra Pablo. Ta i quisaha cahan ra Pablo sihin ra ta catyi ra: Ziñ cuñi vatyí moo cuu ra cua tyizoho cuhva cua quehin. Site vatyí sa cuaha cuiya ndyaca ñaha moo sii ñiyívi hebreo.

¹¹Tatu cua ndaca tuhun cua coton vatyí iyo usi uu quívi ñi sa sei ñuu Jerusalén. Sehin yucuan vatyí cua zacahni sii ra Ndyoo.

¹²Ñá natuhun tahan xein nu sihin minoo ñiyívi. Ta ñá zacuvei sii ñiyívi vehe ñuhu cahnu. Ñá zacuvei sii ñiyívi vehe ñuhu ndyíhi. Ta ñahñi zacuvei sii ñiyívi sisi ñuu cuan.

¹³Ñahñi cuhva cuu tyaa ra ya cuatyí sate vatyí yívi sa ndisa cahan ra.

¹⁴Zoco ndisa cua catyi suhun vatyí zacahni sii ra Ndyoo. Zuun ñi Ndyoo ra i zacahnu ñiyívi sahnu sii ndi ta sa naha cuu ra. Sino iñi tandíhi tuhun i tyaa ra Moisés sa cuu ley ndi. Ta sino iñi tandíhi tuhun i tyaa tandíhi ra profeta. Ndisa vatyí zacahni sii ra Ndyoo cuhva catyi ra Jesús. Ta cuhva cuan ña vaha catyi ñiyívi hebreo.

¹⁵Sino iñi vatyí cua zanandoto ra Ndyoo sii tandíhi ñiyívi nu cuahan quívi. Ta yucuan cuhva sino iñi ñiyívi hebreo, ndíhi ca.

Cua nandoto ñiyívi vaha, ta cua nandoto ñiyívi ña vaha.

¹⁶Yucuan cuenda nducu xein cuhva coo vaha mi sihin ra Ndyoo ta sihin ñiyívi tandíhi cuhva.

¹⁷Cuaha cuiya i ñohi inga ñuu ta ziquí i nasei ñui vatyí cua tyindyeyi sii ñiyívi ndahvi ta cua cuhve ofrenda sii ra Ndyoo.

¹⁸Tacuan ñi zacui, vatyí sa sicoo ique sa cuenda ra Ndyoo, ta i nduvaha tuqui cuenda ra cuhva catyi costumbre maa ndi. Ta i nañihi ñiyívi hebreo sii sisi vehe ñuhu cuan. Ñiyívi ñuu Asia cuu ñu i tiin sii. Zoco ñá ñohi sihin cuaha xaan ñiyívi sisi vehe ñuhu ta ñá cuvaa ndi.

¹⁹Cuñi si sa quisi ñu Asia cuan ta tyaa ñu cuatyí sate tatu iyo cuatyí sa ndisa cuii. Zoco ñá quisi ñu cuan.

²⁰Vaha, vityí cuñi si sa nacatyí ra ihya ñaa cuatyí i zavehi. Sa ndaca tuhun ra sii, quívi i sehin nu titahan ra.

²¹Ñahñi cuatyí i zavehi, zoco iyo minoo tuhun i quehin sihin ra quívi cuan. Tyehen i catyi sihin ra: “Vityí cua tasi tuñi ndo sii vatyí catyi vatyí cua nandoto tucu ñiyívi.” Tacuan i catyi sihin ra cuan, catyi ra Pablo sihin ra Félix.

²²Sito vaha ra Félix yozo caa iyo cuhva sii ñiyívi sino iñi sii ra Jesús. Yucuan cuenda i catyi ra sihin ra Pablo ta sihin tandíhi inga ra cuan: Vaha ñi vityí. Sa cuu cuhun ndo. Naquisi xihna ra Lisias, ra cu nuu sii zandaru, ta ziquí cua catyi yozo caa cundoo tyiño ya. Catyi ra.

²³Tacuan ta i catyi ra Félix sihin ra cu capitán vatyí cucumi ra sii ra Pablo vehe caa, zoco catyi tucu

ra: Cuu tava ndo zuhva sii ra Pablo. Cuhva ndo sa quisi ñiyivi nu ñoho ra vatyí quisi ndyaca ñu ñaa sa siñi ñuhu sii ra.

²⁴I yaha zuhva quivi ta i sahan tucu ra Félix sihin ñazihí ra ndya vehe tyiño. Nañi ñazihí ra Drusila. Ñaha hebreo cuu ña. I cana ra Félix sii ra Pablo. Ta i tyizoho ra sa cahan ra Pablo cuhva sino iñi ñiyivi sii ra Jesucristo.

²⁵Ta i cahan tucu ra Pablo sa cuenda cuhva cua zavaha ñiyivi sa vaha ta cuhva cua zacuenda vaha ñu sii ñu ta ma zavaha ca ñu sa ndya vaha ñi, cuhva cuñi maa ñu. I nacatyí ra Pablo vatyí ña cuaha ca quivi ta cua tasi tuñi ra Ndyoo sii ñiyivi. Tacuan ta i quisaha yuhu ra Félix ta i catyí ra sihin ra: Sa cuu cahun vityí. Nacuyatyí inga saha ta cua cana tuqui suun.

²⁶Cuñi ra Félix sa tyiyahvi ra Pablo sii ra ta cua zaña ra sii ra. Yucuan cuenda i cana ra Félix sii ra cuaha saha. Ta i natuhun ra sihin ra.

²⁷Tacuan ta i yaha uu cuiya ta ziqui i quita ra Félix tyiño gobernador cuan. Cuñi ra sa coo vaha ra sihin ñiyivi hebreo. Yucuan cuenda i zanandoo ra sii ra Pablo vehe caa. Ta i quihvi inga ra nañi Porcio Festo tyiño gobernador.

Cuahan ra Pablo nuu ra Festo

25 Tacuan ta i saa ra Festo ta i quihin ra tyiño gobernador. I yaha uñi quivi ta i quita ra ñuu Cesarea ta cuahan ra ñuu Jerusalén.

²Yucuan i cahan ra zutu nahnu ta inga ra ñiñi hebreo sihin ra. I catyí

ra ñaa cuu cuatyí i tyaa ra sata ra Pablo.

³Sica xaan ra hebreo tumañi iñi sii ra Festo sa natasi ra sii ra Pablo ñuu Jerusalén. Sica iñi ra hebreo vatyí cua quihvi xehe ra ta cua cahñi ra sii ra Pablo ityí vasi ra.

⁴Zoco i catyí ra Festo: Cua ndoo ra Pablo ñuu Cesarea vatyí ña naha ca ta cunanuhi yucuan.

⁵Yucuan cuenda catyí vatyí nacuhun ra ndyizo tyiño sii ndo indyacuan. Natyaa ra cuatyí sata ra Pablo indyacuan tatu ndisa vatyí iyo cuatyí ra. Tacuan i catyí ra Festo.

⁶Ta sindyaa ra Festo uña, a usi tahan quivi ñuu Jerusalén ta ziqui i sinanuhu ra ndya ñuu Cesarea. Ta inga quivi cuahan ra vehe tyiño ta i tava ra tyiño sa cua quisi ndyaca zandaru sii ra Pablo.

⁷Tacuan ta i quihvi ra Pablo nu ndyaa ra, ta sa yucu ra hebreo. Sa quisi ra ndya ñuu Jerusalén. I tuhva ra hebreo ta i tyaa xaan ra cuatyí sata ra Pablo. Zoco ñá cuu cuhva cuñi ra vatyí ña ndisa ra.

⁸Tacuan ta i catyí ra Pablo sihin ra Festo: Ñahñi numinoo cuatyí i zavehi. Ñá zavehi cuatyí cuenda ley ñiyivi hebreo. Ñá zavehi cuatyí cuenda vehe ñuhu cahnu ndi. Ta ñahñi cuatyí i zavehi cuenda ra César, ra cu tyiño cahnu ñuu Roma. Tacuan i catyí ra Pablo.

⁹Cuñi ra Festo sa coo vaha ra sihin ñiyivi hebreo ta yucuan cuenda i ndaca tuhun ra sii ra Pablo: ¿Atu cuñun sa cahun tucun ñuu Jerusalén? Ta yucuan cua catyí yozo caa cua cundoo tyiño ya. Catyí ra.

¹⁰Ta i catyi ra Pablo sihin ra: Sa ndyei nuu moo ta moo cuu ra ndyaca ñaha cuenda ra César, ra cu tyiño cahnu. Ihya cuu nu cuñi si sa cundoo tyiño ya vaty ra ñuu Roma cui. Sito vohon vaty ñahñi cuaty i zavehi sihin ñiyivi hebreo.

¹¹Zoco tatu minoo cuaty cahnu i zavehi ta saha si cuhva cahñi ñiyivi sii, ma nduqui cuhva caqui. Zoco tatu ña ndisa cuhva cahan ra hebreo, ma cuu cuhvon sii, sii ra. Yuhvi catyi vaty nacaty maa ra César yozo caa cua cundoo tyiño ya. Catyi ra.

¹²Tacuan ta ziqui i natuhun tahan ra Festo sihin ra ndyizo tyiño sihin ra ta ziqui i catyi ra: Sa catyun vaty cuñun sa cua catyi ra César yozo caa cua cundoo tyiño ya. Vaha, cua cuhun nuu ra.

Cuahan ra Pablo nuu ra rey Agripa

¹³I yaha zuhva quivi ta ziqui i quisi ra Agripa, ra cu rey cuenda ñiyivi hebreo. I saa ra sihin ña Berenice ñuu Cesarea cuan. Vasi zaha ñu saludar sii ra Festo.

¹⁴Cuaha quivi i ndoo ñu yucuan ta ziqui i nacaty ra Festo sihin ra rey cuan ñaa sa cuu sa cuenda ra Pablo. Tyehen i catyi ra: Iyo minoo ra zandoo ra Félix vehe caa quivi i quita ra sa cuu ra ra cu tyiño.

¹⁵Ta sa sehin ñuu Jerusalén i quisi ra zutu nahnu ta ra ñiñi sii ñiyivi hebreo nu ndyei ta i nacaty xaan ra sihin sa cuenda ra Pablo ta cuñi xaan ra sa cua cahñi sii ra.

¹⁶Zoco i nacaty sihin ra yozo caa iyo cuhva sii maa ndi. Vaty ra cu tyiño cuenda ñuu Roma cui. I catyi sihin ra vaty ña tuhva ndi cahñi

sii ñiyivi tatu ñá cundaa vaha tyiño. Ta saha ndi sa zacacu ñiyivi sii ñu yozo caa tyaa ñiyivi cuaty sata ñu.

¹⁷Tacuan ta i quisi tucu ra hebreo cuan ihya. Yucuan cuenda ñá ndatu que. Inga quivi i sehin vehe tyiño. Ta i tasi tyiño vaty cua quisi ndyaca zandaru sii ra Pablo.

¹⁸Sica iñi vaty cahnu xaan cuu cuaty i zavaha ra, zoco ña tacuan cuu cuaty ra cuhva catyi ra hebreo.

¹⁹Cuñi ra hebreo cuaty sihin ra vaty ña sino iñi ra cuhva iyo costumbre maa ndo hebreo. Cahan ra hebreo cuenda minoo ra nañi Jesús. Catyi ra vaty ña ndito ca ra Jesús, zoco catyi ra Pablo vaty ndito ra.

²⁰Tacuan ta ñá ñihi cuhva ñaa sa cua zavehi vaty ziiñ ziiñ cahan ra. Yucuan cuenda i nducu tuhin sii ra Pablo tatu ña cuñi ra sa cuhun ra ndya ñuu Jerusalén vaty yucuan cua cutuñi ra sa cuenda tyiño ya.

²¹Zoco i sica ra sa ndoo ra vehe caa ndya cua cuu cuhun ra ta cutuñi ra nuu ra César ñuu Roma. Yucuan cuenda ñoho ca ra vehe caa ndya cua tasi sii ra ñuu Roma. Tacuan i catyi ra Festo.

²²Ta ziqui i catyi ra Agripa sihin ra: Cuñi tucu mi tyizohi ñaa sa cua catyi ra Pablo. Ta i catyi ra Festo sihin ra: Zuun ñi ityaan cua tyizohon sa cahan ra.

²³Inga quivi i quisi ndyaca ñiyivi sii ra Agripa sihin ña Berenice. Tyaqui xaan zahma ndisi ñu. I quihvi ñu vehe nu cua tyizoho ñu sa cahan ra Pablo. I quihvi tucu zandaru ra ndyizo tyiño nahnu ta tandihi ra mandoñi ñuu cuan. Tacuan ta i tasi ra Festo tyiño vaty

cua quisi ndyaca zandaru sii ra Pablo. Ta sa saa ra yucuan

²⁴ta ziqui i cahan ra Festo sihin tandihi ñiyivi yucu yucuan ta catyi ra: Yoho rey Agripa ta tandihi ndoho ra yucu ihya, ica ndo sii ra ya. Cuaha xaan ra hebreo cuñi cuaty sihin ra ityi ñuu Jerusalén. Ta tacuan tucu ñu ihya. Ña zaña ñu cuhva sa catyi ñu sihin, vaty nacuu ra.

²⁵Sica iñi vaty ñahñi cuaty ra sa cua cuu ra, zoco maa ra Pablo i catyi vaty nacaty maa ra César yozo caa cua cundoo tyiño ya. Yucuan cuenda sica iñi vaty cua tasi sii ra nu iyo ra César.

²⁶Cua tasi minoo carta sii ra César. Zoco ña ñihi cuhva ñaa sa cua catyi sihin ra. Yucuan cuenda catyi vaty cua quisi ra Pablo nuu moo tata Agripa ta nuu inga ndoho, ndihi ca. Cua tyizoho ndo ñaa sa cua catyi ra, ta cua nacaty ndo sihin yozo caa sica iñi ndo. Tacuan ta cua cote ñaa tuhun cua tasi sii ra César.

²⁷Sica iñi vaty ña vaha cua tasi sii minoo ra nuhñi, nuu ra cu tyiño cuan tatu ma nacaty sihin ra cu tyiño ñaa cuaty ra iyo. Tacuan i catyi ra Festo.

Cuhva i cahan ra Pablo nuu rey Agripa

26 Tacuan ta i catyi ra Agripa sihin ra Pablo: Sa cuu cahan moo vityi. Ta ziqui i zaha ra Pablo saludar sii ra rey Agripa sihin ndaha ra ta i quisaha catyi ra sihin ra Agripa:

²Yoho rey Agripa, zii xaan cuñi vaty vaty saha moo sa nacaty

suhun. Cuaha xaan cuaty cuñi ñiyivi hebreo ra tahan yo sihin.

³Zoco zii cuñi vaty sito moo tandihi costumbre iyo sii maa yo ñiyivi hebreo. Ta sa sica iñun sa cuenda tandihi sa sino iñi maa yo hebreo. Yucuan cuenda sique tumañi iñi suun sa naco tundyee iñi suun ta tyizohon tandihi cui sa cua quehin suhun.

Nacaty maa ra Pablo yozo caa i cuu ra ta ta coto ca ra sii ra Cristo

⁴Ta cahan ca ra Pablo sihin ra Agripa ta catyi ra: Tandihi ñiyivi hebreo sito vaha ñu vaty i sahnu mi cuhva iyo costumbre maa yo. Sito ñu yozo caa i cui ndya ta luhli ndya ñui. Ta sito ñu yozo caa i cui ndya ñuu Jerusalén.

⁵Cuaha xaan cuiya sa sito ñu sii. Tatu cua cuhva ñu cuenda cua catyi ñu vaty ra fariseo cui ndya ta luhli. Ta ra fariseo, ñihi ca zatyño ra sa tyaa ra yahvi sii tandihi ley hebreo ta ziqui tandihi inga ra hebreo.

⁶Ta vityi cuñi ñiyivi hebreo cuaty sihin vaty sino iñi vaty sa quisi minoo ra cua zacacu sii yo tañi sa catyi ra Ndyoo sihin ñiyivi sahnu sii yo ta tyiemvu.

⁷Zoco ña sino iñi tandihi sa uu tahan ityi ñiyivi hebreo vaty sa i quisi ra ta ndatu ca ñu sii ra. Yucuan cuenda zacahnu ñu sii Ndyoo ta zavaha ñu tyiño ra ñiyaca ta ndiyaca. Ta zuun ñi cuenda cuan tyaa ñu cuaty sate vaty catyi vaty sa yaha quisi ra zacacu sii yo.

⁸¿Ñacu ña cuu sino iñi ndo vaty i zanandoto ra Ndyoo sii ra sisi sa i sihi ra?

**Nacaty ra Pablo yozo caa i
sahñi tahan ra sihin ñiyivi
ndyico sii ra Jesús ta quivi ca**

⁹Ta cahan ca ra Pablo sihin ra Agripa ta catyi ra: Ta quivi ca zuun ñi mi sica iñi vaty vaha cua zavehi ndya vaha ñi sihin ñiyivi sino iñi sii ra Jesús, ra ñuu Nazaret.

¹⁰Tacuan i zavehi ñuu Jerusalén. Saha ra zutu nahnu tundyee iñi sii sa cua tyihi cuaha xaan ñiyivi ndyico sii ra Jesús vehe caa. Ta i tahan iñi sa sahñi ñiyivi sii ñu.

¹¹Cuaha xaan saha i cañi sii ñiyivi tatu ma zaña ñu tuhun ra Jesús. Sehin vehe ñuhu hebreo nu zacahnu ñu sii Ndyoo ta i cañi sii ñu. I cuxaan xein sihin ñu ndya cuhva i sehin inga ñuu nu cuahan ñu ta i cañi sii ñu indyacuan.

**Nacaty ra Pablo yozo caa
zama cuhva iyo ra**

¹²Cahan ca ra Pablo sihin ra Agripa ta catyi ra: Tacuan ta ziqui i ñihi cuhva sihin ra zutu nahnu. Saha ra tundyee iñi sii sa cua tyihi sii ñiyivi vehe caa, ta yucuan cuenda i quihin ityi cua cuhin ñuu Damasco.

¹³Yoho rey, yuhvi catyi vaty zuun ñi ityi cuehin ta maa ora i ndyehi minoo ñuhu ityi andivi. Ñihi ca si ta ziqui ñuhu ñicandyi. Nacahnu ndundisi ityi cuehin sihin inga ra ndihi sihin.

¹⁴Tacuan ta i nduva tandihi ndi nu ñuhu ta siñi sa cahan ra cahan. Cahan ra zahan hebreo ta catyi ra sihin: “Saulo, Saulo. Ña vaha cahñi tohon sihin mi. Zuun ñi sii moo zañicuehun. Tañi minoo burro sañi ndyaa tatu cañi sito ho ti sii ti.”

¹⁵Tacuan ta ziqui i catyi: “¿Yoo sa cahan, tata?” Ta i catyi ra: “Ra Jesús cui. Sahñi tahan xoon sihin.

¹⁶Vityi nduviton. Nacuiñi ndyoon. I quitui nuun vaty cua zatyñon tyiñe, ta cua nacatyun sihin ñiyivi cuhva sa ndyehun sii vityi ta cuhva cua ndyehun sii cuee ca.

¹⁷Cua zacuenda mi suun sii ñiyivi hebreo ta sii inga ñiyivi. Ta vityi cua tasi suun nu iyo ñiyivi sa yivi ñiyivi hebreo cuu.

¹⁸Cua zañohon sii ñu minoo sa ndisa cui ta cua zaña ñu sa zavaha ñu ndya vaha ñi ta cua sino iñi ñu sii. Ma zavaha ca ñu cuhva cuñi cuihna, ta cua zavaha ñu cuhva cuñi mi. Tacuan ta cua ndasi cuaty ñu ta cua coo vaha ñu sihin mi tañi iyo ñiyivi sino iñi sii.” Tacuan i catyi ra Jesús sihin. Catyi ra Pablo.

**Nacaty ra Pablo vaty tyaa ra
yahvi sa catyi ra Ndyoo sihin ra**

¹⁹Cahan ca ra Pablo sihin rey Agripa ta catyi ra: I tyei yahvi sa cahan ra Jesús sihin, yoho rey Agripa, vaty i ndyehi sii ra.

²⁰I nacaty sihin ñiyivi vaty cuñi si sa ndu-uu iñi ñu cuaty ñu ta tyaa ñu yahvi sii Ndyoo. Nazavaha ñu sa vaha cuhva zavaha ñiyivi sino iñi sii ra Jesús. Tacuan i quehin sa xihna ñi ñuu Damasco. Ta tacuan i cahan tuqui ñuu Jerusalén. Zuun ñi tuhun cuan i quehin nu cu si Judea ta inga ñuu nu iyo inga ñiyivi, ñu yivi ñiyivi hebreo cuu.

²¹Yucuan cuenda i tiin ra hebreo sii, vehe ñuhu cahnu ta nducu ra cuhva cahñi ra sii.

²²Zoco ndya quivi cuan ta cuhva ndya vityi tyindyee ra Ndyoo sii.

Nacatyí sihin ñiyivi ñiñi ta nacatyí sihin ñiyivi ndahvi Tuhun Ndyoo. Ñin ñi cuhva quehin tañi i cahan ra profeta ta tyiemvu ta tañi i cahan ra Moisés, ndihí ca. Ña zama mi sii si.

²³Vatyí i catyí ra cuan vatyí cua tahan ra Cristo tundoho ta cua cuu ra. Ta maa ra cuu ra cua nandoto sa xihna ñi sisi sa i sihi ra. Ta cua nacatyí ra sihin ñiyivi hebreo ta sihin inga ñiyivi yozo caa cua cacu añima ñu. Tacuan i catyí ra Pablo cuhva i nacatyí ra Tuhun Ndyoo.

**Catyí ra Pablo vatyí nasino
iñi ra Agripa sii ra Jesús**

²⁴Tacuan i cahan ra Pablo ta ziquí ñihí xaan i cana saa ra Festo ta catyí ra: Yoho Pablo, zana xiñun. Cuaha xaan i cahvun ndya cuhva ndya sa nduzana xiñun.

²⁵Ta i catyí ra Pablo: Tata sahnú Festo, ña zana xiñi. Ta tuhun quehin, maa ñi sa ndisa, maa ñi sa vaha cuu si.

²⁶Sito vaha rey Agripa ya tuhun quehin. Ña sica iñi ta quehin tuhun ya sihin maa ra vatyí site vatyí sa sito ra tandihí tuhun nacatyí sihin ndo. Sito ra vatyí sito tandihí ñiyivi cuhva i cuu ra Jesús. Ñahñi sa xehe i sicoo.

²⁷Tacuan i catyí ra Pablo sihin ra Festo ta ziquí i cahan tucu ra sihin rey Agripa: Yoho rey Agripa, site vatyí sino iñun sa i tyaa ra profeta ta tyiemvu.

²⁸Ta i catyí rey Agripa sihin ra Pablo: ¿Atu sica iñun vatyí ta sica ñi cua sino iñi sii ra Jesús?

²⁹Ta i catyí ra Pablo: Nacuhva ra Ndyoo vatyí cua sino iñun sii ra

Jesús a vityí a cuee ca. Cuñi xein sa cua sino iñi tandihí ndo. Cuñi xein sa cua coo ndo cuhva iyo mi, zoco ña cuñi sa cua quihí ndo vehe caa cuhva ñohi. Catyí ra.

³⁰Ta sa yaha cahan ra Pablo ta ziquí i sicuiñi ndyaa ra rey sihin ra gobernador cuan sihin maha Berenice ta tandihí inga ra yucu yucuan.

³¹I quita ñu vatyí cua natuhun tahan ñu tuhun sa siñi ñu. Ta i catyí ñu: Ñahñi sa i zavaha ra cuan ta cua cuu ra. Ta ñahñi sa i zavaha ra ta cua ndoo ra vehe caa. Catyí ñu.

³²Ta i catyí ra Agripa sihin ra Festo: Sa xihna ñi cuu zaña moo sii ra Pablo, zoco vityí ma cuu ca vatyí sa sica ra sa cua cutuñi ra nuu ra César.

**Tasi ra cu tyiño sii ra
Pablo ñuu Roma**

27 Tacuan ta ziquí i nacasi tahan tyiño vatyí cua cahun ra Pablo nu cu si Italia nuu ra César. Ta i quihin minoo ra cu capitán sii ra Pablo sihin zuhva ca ra ñoho vehe caa tañi cuhva i catyí ra cu tyiño. Julio nañi capitán cuan ta iyo ra cuenda zandaru ra Augusto. Yuhvi ra Lucas cuehin sihin ra Pablo.

²Cuahan tucu ra Aristarco, ra ñuu Tesalónica. Cuenda Macedonia cuu ñuu Tesalónica cuan. I quihvi ndi minoo barco sa i quita ñuu Adramitio minoo ñuu sa ndyaa yuhu tyañuhu. Cua nanuhu tu, ta yaha tu ñuu sa iyo yuhu tyañuhu nu cu si Asia. Tacuan i quita ndi sihin maa tu.

³Inga quívi i saa ndi ñuu Sidón. Vaha zavaha ra Julio sihin ra Pablo vatyí saha ra sa cua cuhun ra nu iyo amigo ra ñuu cuan. Ta i saha ñu ñaa sa siñi ñuhu sii ra.

⁴Tacuan ta ziqui i nandihvi tucu ndi barco cuan ta i zandaa ra zahma sa zacuhun sii barco cuan sihin tatyí ta cuahan ndi. I yaha tu minoo ñuhu sa ndyaa mahñu tyañuhu sa nañi Chipre. I yaha ndi ticui Chipre ta ñuhu cahnu vatyí ñihi xaan quiñi ndaha tatyí inga siyo cuan ta ñá cuu yaha ndi yucuan.

⁵I yaha ndi ityi yuhu tyañuhu nu cu si Cilicia. Ta i yaha ndi ityi yuhu tyañuhu ñuu Panfilia. Ta ziqui i saa ndi ñuu Mira sa iyo cuenda Licia.

⁶Ta ñuu Mira cuan i nañihi capitán cuan inga barco, yutu sa quita ñuu Alejandría. Cua cuhun tu ndya nu cu si Italia. Ta i catyí ra capitán vatyí cuhun ndi sihin tu cuan.

⁷Tacuan ta i quita tucu ndi cuahan ndi. Cuaha quívi cuahan barco cuee cuee ñi, ta sihin tundoho i saa tu yatyí inga ñuhu mahñu tyañuhu sa nañi Gnido. Ñá cuu ca cuhun barco ityi nuu vatyí ñihi xaan caa tatyí. Yucuan cuenda i yaha ndi ticui minoo ñuhu mahñu tyañuhu sa nañi Creta ta inga sa nañi Salmón. Ña ñihi xaan ñoho tatyí yucuan.

⁸Cuahan barco yuhu yuhu tyañuhu ñi yuhu ñuhu Creta cuan. Tacuan ta i quihvi barco yatyí ñi ñuu Lasea nu nañi si Nu Vaha Cua Nacuiñi Barco.

⁹Sa yaha xaan quívi, ta sa yaha minoo vico sii ñiyivi hebreo nu

ñahñi maa sasi ñu, ta ziqui ñá cuu ca cuhun barco vatyí sa cua saa quívi cua nduñihi xaan tatyí vatyí sa cuñi noo zavi. Ta ña vaha cuhun barco coto ndyee tu. Yucuan cuenda i catyí ra Pablo sihin ra zacaca barco cuan:

¹⁰Tata, cutuñi iñi vatyí tatu cua cuhun yo cua coo xaan tundoho sii yo. Cua ndyee barco sihin ndaha tyiño ta cua cuu ñiyivi.

¹¹Ñá tyaa ra capitán cuan yahvi sa cahan ra Pablo, zoco i tyaa ra yahvi sa cahan ra zacaca barco ta sa cahan ra cu sitocho tu.

¹²Ña vaha cua ndoo barco nu sicuiñi tu vatyí cua coon xaan zavi ta ñihi xaan cua quihi tatyí quívi cuan. Yucuan cuenda tandihi ra i catyí: Naquita yo ihya ta nducu yo cuhva cuhun yo ñuu Fenice sa iyo zuun ñi cuenda Creta ya. Tatu cuu saa yo yucuan, vaha cua ndoo barco. Ña ñihi xaan caa tatyí yucuan ta ndyaa ñuu cuan siyo caña ñicandyi. Ta cua yaha yo vico zavi yucuan. Tacuan i catyí ra.

Ñihi xaan caa tatyí nu tyañuhu

¹³Tacuan ta ziqui i quisaha caa tatyí ityi tyañuhu zoco ña ñihi xaan. Yucuan cuenda i sica iñi ra vatyí cua cuu cuhun ra cuhva cuñi ra. Tacuan ta i tava ra minoo caa vee xaan sa ñoho sisi ndutya sa ña saha caca barco ta ziqui cuahan ndi. Yatyí ñi yuhu tyañuhu cuan cuahan ndi nu iyo ñuhu Creta.

¹⁴Zuhva ñi cuahan ndi ta ziqui ñihi xaan quisaha caa tatyí. Ityi caña ñicandyi ta ityi yucu quisi tatyí cuan.

¹⁵Ñá cuu ca caca barco ityi nuu vatyí ñihi xaan caa tatyí. Yucuan

cuenda i saha ra cuhun tu sihin taty i nu yiv i ity i cuhun ra.

¹⁶Tacuan i cuu ta i yaha ndi minoo ñuhu luhlu mahñu tyañuhu nañi si Claudia. Siyo zaty i yaha ndi sihin barco vaty i ñihi ca caa taty i inga siyo. Ña ñihi xaan caa taty i nu yaha ndi yucuan. Cuu, i naty ihi ra lancha luhlu sisi barco vaty i cuñi ndyee xaan lancha.

¹⁷I ty ihi ra sii tu sisi barco coto cunaa tu. Tacuan ta i cava ra yoho nahnu sii barco cahnu cuan. I sihiñi ra sii tu coto tahvi cuaty i tu. Tacuan ta i quisaha yuhu ra coto cañi ndutya sii barco nu ñiyiti yuhu tyañuhu nu cu si Sirte. Yucuan cuenda i zanoo ra zahma sa iyo sii barco sa quiñi ndaha taty i ta saha ra sa cuhun tu ndya vaha ñi.

¹⁸Inga quiv i zuun ñi ñihi xaan coon zavi ta ñihi xaan quiñi ndaha taty i sii barco. Yucuan cuenda i casaha zavita ra carga tu sisi tyañuhu.

¹⁹Ta quiv i cu uñi cuan i zavita ndi ndaha tyiño barco cuan.

²⁰Cuaha xaan quiv i ñá ndyehe ndi ñicandy i ta ñá ndyehe ndi tiño. Tacuan ta i sica iñi ndi vaty i ma cacu ca ndi vaty i ñihi xaan caa taty i ta coon xaan zavi.

²¹Cuaha xaan quiv i ñá sasi ndi. Tacuan ta i caty i ra Pablo sihin tandihi ra: Ndoho amigo, vaha xaan ca tatu sa i tyizoho ndo sa quehin quiv i cuan ta ñá quita yo nu cu si Creta. Vaty i ndyehe, cahnu xaan tundoho ndyehe yo vity i, ta cuaha xaan ndaha tyiño cua naa.

²²Zoco vity i caty i vaty i zanduzii ndo iñi ndo. Yoñi maa cua naa. Barco ñi cua naa.

²³Sito ndo vaty i ndyaca ñaha ra Ndyoo sii ta zaty iñe tyiño ra. Cuñi i quisi minoo ángel Ndyoo nu ndyei.

²⁴Ta caty i ra: “Ma yuhun Pablo. Cuñi ra Ndyoo sa cua nacaty i moo tuhun ra nu ndyaa ra César. Caty i ra Ndyoo vaty i cua zavaha ra tumañi iñi suun. Cua zacacu ra suun ta sa cuenda moo cua cacu tandihi inga ra ñoho sisi barco ya.” Tacuan i caty i ángel cuan.

²⁵Yucuan cuenda caty i vaty i zanduzii ndo iñi ndo, xaa. Sino iñi mi sii ra Ndyoo. Site vaty i cua zavaha ra cuhva caty i ángel cuan sihin.

²⁶Iyo minoo ñuhu nu cua caty ihi barco ya, ñuhu sa iyo mahñu tyañuhu ya. Caty i ra Pablo.

²⁷Sa yaha uu vity a sa sica ndi tacuan. Ity i cuan ity i ya cuahan barco zacuu taty i. Ta minoo sa cuaa cuahan barco tyañuhu sa nañi Adria. Ta maañuu i nacoto ra zacaca barco vaty i yaty i ñi ndya ñuhu yucuan.

²⁸Tacuan ta ziqui i tyicuhva ra yozo cuhva sa cono ñoho ndutya nu yaha ndi. Ta ndyehe ra vaty i oco sahun iin metro. Cuahan ndi zuhva ca ity i nuu, ta i tyicuhva tucu ra ta ndyehe ra vaty i oco usa metro ñoho ndutya.

²⁹Yuhu xaan ra zacaca barco coto tahvi cuaty i tu tatu nañi tu nu yuu. Yucuan cuenda i zanoo ra cumi tahan caa vee xaan sisi ndutya ity i zuhma tu vaty i zanacuñi si sii barco. Tacuan ta i ndatu ra ta cuñi xaan ra sa cundisi.

³⁰Nducu xaan zuhva ra zaty iño sisi barco cuhva cono xehe ra. Yucuan cuenda i quisaha zanoo ra

lancha. I catyi ra vatyi cua zanoo ra caa nahnu ityi xiñi barco zoco zandavi ñaha ra.

³¹Tacuan ta i catyi ra Pablo sihin ra capitán ta sihin inga ra cu zandaru: Tatu ma ndoo ra ya sisi barco sihin maa yo ma cacu ndo. Catyi ra.

³²Tacuan ta i sahdya zandaru yoho nuhñi lancha cuan. Cuahan ñi tu.

³³Sa vasi cundisi ta catyi ra Pablo sihin tandihí ra: Casi ndo. Vityi sa iyo uu vitya sa ñá sasi ndo ta ñá quixi ndo.

³⁴Catyi sihin ndo vatyi sa ndyoo ñi casi ndo vatyi tacuan ta cua coo tundyee iñi sii ndo. Ta yoñi maa cua tahan tundoho ndaha ñi. Catyi ra.

³⁵Ta sa yaha cahan ra Pablo tacuan ta i quihin ra minoo pan. Saha ra tyahvi ndyoo sii Ndyoo nuu tandihí ra yucu yucuan. Ta ziqui i sahnú ra sii si ta quisaha sasi ra.

³⁶Tacuan ta i nduzii ca iñi inga ra ta sasi ra.

³⁷Uu ziendu uñi xico sahnú iin tahan nduhvi ra ñoho sisi barco cuan.

³⁸Sasi ndi ndya sa ndaha iñi ndi ta ziqui i zavita ra siti trigo sisi tyañuhu vatyi cua nduñahma ca barco.

Cuhva i ndyee barco

³⁹Tacuan ta ziqui i cundisi, ta i ndyehe ra zacaca barco vatyi yatyi ñi iyo ñuhu, zoco ñá sito ra ñaa ñuhu cuu si. I ndyehe ra minoo ityi nu cuu quihvi barco, ta vaha xaan nu yuhu tyañuhu yucuan. Yucuan

cuenda cuñi ra tyihi ra barco yucuan.

⁴⁰Tacuan ta i sahdya ra yoho nuhñi caa sa zacuiñi sii barco cuan. Ta ziqui i ndasi ra yoho sa sinuhñi vitu sa zavico cava barco. Ta i zandaa tucu ra zahma tu vatyi cua zacuhun tatyí sii tu. Tacuan ta ziqui i quisaha cuahan barco ndya ñuhu cuan.

⁴¹Zoco i sicuiñi barco nu ñiyiti, ta i ndoo tu. Ñá cuu ca natava ra barco vatyi sa ndyee ityi xiñi tu sisi ñiyiti, ta ityi yii tu i quisaha tahvi cuatyi tyañuhu vatyi ñihi xaan quiñi ndaha si sii barco.

⁴²I cuñi zandaru cahñi ra sii ra ñoho vehe caa, ra cuahan sihin ra, coto cua zutya ra ta quita ra nu ñuhu ityi ta cono ra.

⁴³Zoco ñá saha ra capitán sa cahñi zandaru sii ra ñoho vehe caa vatyi ñá cuñi ra sa cuu ra Pablo. I catyi ra vatyi naquihvi xihna ra cuu zutya tyañuhu, ta cua saa ra ndya ñuhu ityi sa xihna ñi.

⁴⁴Ta ziqui cua cuhun inga ra ityi sata ra nu vitu vaha a nu vitu barco sa tahvi cuatyi. Ta tacuan cuu cuhva i cacu tandihí ndi ta i quita ndi nu ñuhu ityi.

Iyo ra Pablo minoo ñuhu mahñu tyañuhu sa nañi Malta

28 Tacuan cuu cuhva i cacu ndi. I catyi ñiyivi yucuan vatyi Malta nañi ñuhu cuan sa iyo mahñu tyañuhu.

²I cundahvi iñi ñiyivi sii ndi ta zatahan ñu ñuhu vatyi coon xaan zavi ta visi xaan ndi. Tacuan i tyindyee ñu sii ndi.

³I naquihin ra Pablo zuhva nducu ndyihí cua tyihí ra nu ñúhu. Ta ziquí i quita minoo coo xaan sihin sa ihñi. Ta i tiin tí ndaha ra ta ñá zaña tí.

⁴I ndyehe ñiyívi yucu yucuan vatyi ñá zaña tí ndaha ra Pablo, ta i quisaha catyi ñu sihin tahan ñu: Ra sahní sii ñiyívi cuu ra ya. Sa cacu ra sisi tyañuhu, zoco ña saha ra Ndyoo sa cundito ra ñuu ñiyívi ya. Catyi ñu.

⁵Tacuan ta ziquí i naquizi ra Pablo ndaha ra ta i canacava coo cuan sisi ñúhu, ta ñahñi sa tahan ra Pablo.

⁶I ndatu ñiyívi ta sica iñi ñu tatu zandaa si sii ra Pablo a ta sica ñi cua cuu ra. Naha xaan i ndatu ñu, ta i ndyehe ñu vatyi ñahñi i tahan ra. Tacuan ta i sica iñi ñu inga cuhva ta catyi ñu: Minoo ndyoo cuu ra.

⁷Yatyí ñi nu i siyucu ndi ndyaa terreno minoo ra nañi Publio. Ra ndyaca ñaha yucuan cuu ra. I saha ra sa cundyaa ndi vehe ra. Ta vaha xaan i siyucu ndi uñi quívi i zacuu ra.

⁸Ñihi xaan caa zutu ra Publio vatyi cuhu ra. Zaa ra ta siyo ra ñiñi. Cuahan ra Pablo nu caa ra. Sica tahvi ra sii Ndyoo ta tyizo ra ndaha ra sii ra ta zanduvaha ra sii ra.

⁹I ndyehe ñiyívi vatyi tacuan i cuu si, ta ziquí i quisi tandihí ñiyívi cuhu iyo ñuu cuan. Ta i nduvaha ñu.

¹⁰Ta ziquí cuaha xaan sa saha maa ñu sii ndi. Ta quívi i quita tucu ndi sihin barco i saha maa ñu tandihí sa siñi ñuhu sii ndi sa cuenda ityi.

Saa ra Pablo ñuu Roma

¹¹Uñi yoo i sindyaa ndi Malta cuan, ta ziquí i quihvi ndi minoo barco sa iyo yucuan. Yucuan i ndoo tu vico zavi. Yutu sa quita ñuu Alejandría cuu tu, ta ndyaa uu tahan ndyoo, ra nañi Cástor ta ra nañi Pólux sa zanandacu ñiyívi xiñi barco.

¹²I quihvi ndi sisi tu ta cuahan ndi ñuu Siracusa. Ta yucuan i ndoo ndi uñi quívi.

¹³Ta ziquí i quita ndi yucuan ta cuahan ndi ñuu Regio. Inga quívi i quisi minoo tatyí ityi yuhu tyañuhu ta i sica barco uu quívi ca ta i saa ndi ñuu Puteoli.

¹⁴Ñuu cuan i nañihi ndi zuhva ñiyívi sino iñi sii ra Jesús. I sica ñu sa cua ndoo ndi sihin ñu minoo vitya. Tacuan ta ziquí i quita ndi ta cuahan ndi ñuu Roma sihin saha ndi.

¹⁵Ta sa ñihi ñiyívi sino iñi sii ra Jesús tuhun vatyi vasi ndi ta i quita ñu ñuu Roma ta i quisi zatahan ñu sii ndi ityi vasi ndi. Zuhva ñu i quisi, ñihi tahan ñu sihin ndi minoo nuyahvi nu nañi si Foro Apio. Ta inga ñu quisi, ñihi tahan ñu sihin ndi nu nañi si Uñi Tahan Vehe Posada. Sa ndyehe ra Pablo sii ñu ta saha ra tyahvi ndyoo sii Ndyoo ta sicoo ca tundyee iñi sii ra ta zii ca cuñi ra.

¹⁶Tacuan ta i saa ndi ñuu Roma. Saha cuenda ra capitán sii ra Pablo ta sii inga ra sindyaca ra sii ra cumi vehe caa. I tyaa ica ra cuan sii ra Pablo. Ndyaa ziiñ ra minoo vehe, ta minoo ñi zandaru cumi sii ra.

**Zacuaaha ra Pablo Tuhun
Ndyoo ñuu Roma**

¹⁷I yaha uñi quivi ta ziqui i cana ra Pablo sii tandihi ra ñiñi hebreo. Ta sa titahan ra i catyi ra sihin ra: Yañi xaa, ñahñi cuaty i zavehi sihin ñiyivi hebreo ñu tahan yo. Ñahñi sa ña vaha i zavehi sa cuenda costumbre sahnu sa zavaha ñiyivi sahnu sii yo ta sa naha. Zoco i tiin ñiyivi sii, ñuu Jerusalén ta saha ñu sii, sii ra ndyaca ñaha cuenda ñuu Roma.

¹⁸I tasi tuñi ra cuan sii, ta ziqui i cuñi zaña ra sii, vaty ñahñi cuaty i zavehi ta cui.

¹⁹Zoco ñá saha ra hebreo sa zaña ra ndyaca ñaha ñuu Roma sii. Yucuan cuenda i catyi vaty cua cuhin nuu ra César ta cua cundaa tyiño ya. Tacuan i catyi vazu ña cuñi cuaty sihin ñiyivi hebreo.

²⁰Yucuan cuenda i sique sa ndyehi sii ndo ta sa quehin sihin ndo. Cuñi zandei sihin ndo vaty sino iñi vaty sa yaha quisi ra cua zacacu sii tandihi yo. Maa ra cuu ra sa ndatu xaan tandihi maa yo ñiyivi hebreo. Ta yucuan cuenda nuhñi sihin cadena ya. Tacuan cuu cuhva i catyi ra Pablo.

²¹Tacuan ta ziqui i nacaty ra hebreo cuan sihin ra Pablo: Ñahñi carta i tasi ra hebreo sii ndi sa cuenda moo. Ta ñiyivi hebreo ñu tahan yo, ñu i quita ñuu Jerusalén ta saa ñu ihya, ñahñi ndya vaha ñi i cahan ñu suun.

²²Cuñi ndi tyizoho ndi sa cohon. Cuñi ndi coto ndi yozo caa sica iñi moo vaty sito ndi vaty catyi ñiyivi nacahnu ñuu ñiyivi vaty ña vaha

ñiyivi cuu ñiyivi ndyico sii ra Jesús. Tacuan i catyi ra hebreo cuan.

²³Tacuan i cahan ra, ta ziqui i sata ra hebreo cuan minoo quivi cua titahan tucu ra sihin ra Pablo. Ta quivi cuan tuu xaan ñiyivi i quisi vehe nu ndyaa ra Pablo. Ndyiyaca cui i nacaty tucu ra Pablo sihin ñu yozo caa cuñi ra Ndyoo cundyaca ñaha ra sii yo. I catyi ra vaty nacaty ra Moisés ndya ta tyiemvu yozo caa cua cuu ra Jesús. Ta zuun ñi cuhva cuan i cahan ra profeta ta tyiemvu, catyi ra Pablo. Tacuan i nacaty xaan ra Pablo sihin ñu vaty cuñi xaan ra sa cua sino iñi ñu sii ra Jesús.

²⁴Ta sicoo zuhva ñu sino iñi sa cahan ra Pablo, ta inga ñu ñá sino iñi ñu.

²⁵Ñá ndu-iin ñu. Ta sa numi ñu cunuhu ñu ndya vehe ñu ta ziqui i catyi ra Pablo minoo ca cuhva sihin ñu. Catyi ra: Ndisa cuii cuu si cuhva i cahan ra Isaías sa cahan ra cuenda Ndyoo i zacuu Taty Ii ta tyiemvu sihin ñiyivi sahnu sii yo.

²⁶Vaty i catyi ra:

Cua cuhun nu iyo ñiyivi ya ta cua catoryn sihin ñu:

“Tyizoho xaan ndo Tuhun Ndyoo, zoco ña cutuñi iñi ndo sa tyizoho ndo.

Ndisa, ndyehe ndo yozo caa iyo ra Ndyoo, zoco ña sito ndo ñaa sa cuu sa ndyehe ndo.”

²⁷Ta cahan ca Taty Ii sihin ra Isaías ta tyiemvu ta catyi ra:

Ndisa cuii zanduñihi xaan ñiyivi iñi ñu coto cua nduvaha añima ñu.

Ña cuñi ñu tyizoho ñu coto cua cutuñi iñi ñu.

Ña cuñi ñu sa nducu ñu cuhva,
coto cua quisi ñu sii ta
cua zame cuhva iyo ñu ta
zanduvehi sii ñu.

Tacuan i catyi Taty Ii sihin ra
Isaías.

²⁸Ta ziqui i catyi tucu ra Pablo
sihin ñiyivi yucu yucuan: Nacoto
vaha ndo vaty ndya vityi cua
nacaty ndi Tuhun Ndyoo sihin
ñiyivi, ñu sa yivi ñiyivi hebreo
cua. Cua tyizoho ñu cuhva
zanduvaha ra Ndyoo aña ñiyivi,
ta cua sino iñi ñu. Tacuan i catyi
ra Pablo.

²⁹Ta sa yaha cahan ra Pablo
tacuan ta i quita tandihi ñu hebreo.
Sahñi tahan ñu zuhva vaty ñá
ndu-iiñ ñu sihin tahan ñu sa cuenda
cuhva cahan ra Pablo.

³⁰Uu cuiya i ndoo ra Pablo ñuu
cuan. I sica noo ra minoo vehe ta
tyiyahvi ra yahvi si. Ta vaha xaan
i cahan ra sihin tandihi ñiyivi i saa
vehe ra.

³¹I nacaty ra sihin ñu yozo caa
cuñi ra Ndyoo cundyaca ñaha ra sii
yo. Ta i zacuaha ra sii ñu yozo caa
iyo ra Jesús. Ñá yuhu ra ta nacaty
ra, ta yoñi i zayanga sii ra.

Carta Sa I Tyaa Ra San Pablo Sii Ñiyivi Sino Iñi Sii Ra Ndyoo Ñuu Roma

I tyaa ra Pablo carta ya sii ñiyivi sino iñi sii ra Ndyoo ñuu Roma

1 Yuhvi ra Pablo tasi carta ya sii ndo. Minoo muzu ra Jesucristo cui. I casi ra Jesucristo sii, ta i saha ra tyiño sii vatyi cui minoo ra sa cua zacoto Tuhun Vaha ra sii ñiyivi, cuhva cacu ñu.

²Ta ihya Tuhun Vaha cuu zuun ñi tuhun sa i catyi ra Ndyoo ta sa naha vatyi cua quisi si. I cahan ra Ndyoo sa cuenda si quivi i cahan ra profeta ta sa naha.

³Cuenda zehe ra Ndyoo cuu tuhun ya. I zacacu minoo ñaha sii ra cuhva cacu maa yo. Ta ñiyivi ra rey David i cuu sii ra.

⁴Ta i sihi ra Jesús, ta i zanandoto ra Ndyoo sii ra. Ta cuhva cuan i zavaha ra Ndyoo minoo sa cahnun xaan, ta i zañaha ra vatyi zehe ra cuu sii ra Jesús. Ta ii xaan cuu ra Jesús, ra ndyaca ñaha sii yo, tañi ii maa ra Ndyoo.

⁵Sa cuenda ra Jesús i cundahvi iñi ra Ndyoo sii, ta i saha ra tyiño sii sa zacote Tuhun ra. Ta tacuan ta cua sino iñi ñiyivi sa yivi ñiyivi hebreo cuu, ta cua tyaa ñu yahvi. Ta cua zacahnu ñu sii ra Jesucristo.

⁶Ta zuun ñi ñiyivi cuan cuu tucu maa ndo. I casi ra Ndyoo sii ndo vatyi cuu ndo ñiyivi sii ra Jesucristo.

⁷Tyei carta ya sii maa ndo, ra sino iñi ñuu Roma. Cuñi xaan ra Ndyoo sii ndo, ta i casi ra sii ndo vatyi cuu ndo ñiyivi ra. Cuñi vatyi nacundahvi xaan ca iñi ra Ndyoo ta ra Jesucristo sii ndo, ta nacuhva ra sa coo sa taxi añima ndo. Ta ra Jesucristo, cuu ra ndyaca ñaha sii yo.

Cuñi ra Pablo cuhun ra ñuu Roma

⁸Sa xihna ñi sehi tyahvi ndyoo sii ra Ndyoo, ra zacahni. Sehi tyahvi ndyoo sii ra sa cuenda sa i zavaha ra Jesucristo ta vityi sino iñi tandihi ndo. Ta cuhva sa sino xaan iñi maa ndo, sa sito ñiyivi nacahnu cuhva sino iñi ndo.

⁹Muzu maa ra Ndyoo cui. Tyaa xein yahvi sii ra sihin tandihi cuii añime, ta zacote Tuhun ra sa cuenda Zehe ra. Ta sito vaha ra vatyi ña zañe sa quehin sihin ra cuenda ndo.

¹⁰Ta sique sii ra vatyi tatu cuñi maa ra, nacuhva ra vatyi cuhin cundyehi sii ndo. Sa naha xaan cuñi ndyehi sii ndo, ta ñá cuu.

¹¹Cuñi xein cuhin nu yucu ndo, ta cua nacatyí que Tuhun Ndyoo sihin ndo, ta cua sino ca iñi ndo.

¹²Cuñi cuhve tundyee iñi sii ndo, ta cua cuhva tucu maa ndo tundyee iñi sii. Cua tyindyee tahan yo sii yo sihin cuhva sino iñi yo sii maa ra Ndyoo.

¹³Cuñi sa coto ndo yañi xaa vatyí sa cuaha xaan saha cuñi cuhin nu yucu ndo, zoco ndya vityí ta ña cuu cuhin. Cuñi cuhin vatyí cuñi zacote Tuhun Ndyoo nu yucu ndo, ta cua sino ca iñi ndo, ta cua nducuaha ca ndoho ra sino iñi sa yívi ñiyívi hebreo cuu.

¹⁴Ñiñi xaan cuñi si zacote sii ñiyívi cahan zahan griego ta ñiyívi ña cahan zahan griego ta sihin ñiyívi sito ta ñiyívi ña cuaha sito.

¹⁵Cuñi si sa zacote sii tandíhi ñiyívi, ta yucuan cuenda cuñi xein zacote sii maa ndo, ra ndyaa ñuu Roma.

**Iyo xaan tundyee iñi sihin
Tuhun Vaha ra Ndyoo**

¹⁶Ña cahan nui sa cuenda Tuhun Vaha ra Ndyoo vatyí cuhva cuu si sii maa ra Ndyoo, ta cua zacacu si sii yoo ra sino iñi. Sa xihna ñi i saa si nu iyo ñiyívi hebreo, ta cuee ca i saa si nu iyo inga ñiyívi.

¹⁷Vatyí cuhva zacacu ra Ndyoo sii ñiyívi zañaha si vatyí zandasi ra cuatyí ñu ta zanduvaha ra añima ñu sihin sa sino iñi ñu sii ra. Tañi cuhva catyí Tuhun Ndyoo: “Minoo ra sa zanduvaha ra Ndyoo añima, cua cundito ra tandíhi cuii tyiemvu vatyí i sino iñi ra.”

Iyo xaan cuatyí ñiyívi ñuu ñiyívi

¹⁸Zoco cuxaan xaan ra Ndyoo sa cuenda cuatyí ñiyívi, ta cua tasi

tuñi ra sii ñu sa cuenda tandíhi sa ña vaha zavaha ñu. Cuaha xaan cuatyí ñiyívi iyo, ta cuatyí ñu cuan cuu ta ña cuu sino iñi inga ñiyívi.

¹⁹Ta cuhva cuu coto ñiyívi cuhva iyo ra Ndyoo, casi xaan iyo si vatyí i zañaha maa ra sii yo, ta sa sito ñiyívi.

²⁰Ndya ta sino ñuu ñiyívi ta casi xaan cuu ndyehe ñiyívi cuhva iyo ra Ndyoo. Tandíhi sa i zavaha ra zañaha si vatyí iyo xaan cuhva sii ra, ta cuaha xaan ca sa siñi tuñi iyo sii maa ra ta ziquí sii maa yo. Ndyoo cuu ra sa ndisa. Ta sito ñiyívi vatyí iyo ra Ndyoo vazu ña cuu ndyehe yo sii ra. Zoco cuu sino iñi yo sii ra. Yucuan cuenda ma cuu catyí ñiyívi sa ndisa vatyí ña sito ñu ñaa sa cuu sa vaha.

²¹Sa i sito ñiyívi vatyí iyo ra Ndyoo, zoco ñá cuñi ñu zacahnu ñu sii ra tañi tahan si zacahnu yo sii ra. Ta ñá saha ñu tyahvi ndyoo sii ra. I quisaha sica iñi ñu tuhun sa ña ñiñi, ta i naa sa siñi tuñi vaha sii ñu.

²²Catyí ñu vatyí sa cuaha xaan i cutuhva ñu ta siñi tuñi xaan ñu, catyí ñu, zoco i nduu ñu ñiyívi ñá sito yozo caa iyo ra Ndyoo.

²³Ñá zacahnu ca ñu sii sa minoo ñi Ndyoo, ra ndito tandíhi cuii tyiemvu, ra Ndyoo ra ndisi xaan ta tyaquí xaan. Zoco i zavaha ñu ndyoo sa cua zacahnu ñu, ta caa si cuhva caa ñiyívi a cuhva caa zaa a quití a cuhva caa coo.

²⁴Yucuan cuenda i zaña ra Ndyoo sii ñu, ta i zavaha ñu tandíhi cuii sa ña vaha sa cuñi añima ñu. I zavaha ñu cuatyí zuun ñi sihin tahan ñu.

²⁵I zaña ñu sii sa ndisa sa cuenda ra Ndyoo, ta cuñi ca ñu sii inga

ndyoo sa yivi Ndyoo sa ndisa cuii. Ta inga tucu cuhva vaty i zacahnu ñu ta i tyaa ca ñu yahvi sii sa zavaha ra Ndyoo ta ziqui sii maa ra vazu maa ra i zavaha tandihi cuii. Ta tahan si zacahnu yo sii ra tandihi cuii cuhva. Ta nacuu si tacuan, ta nacuu si sa ndisa.

²⁶Yucuan cuenda i zaña ra Ndyoo sii ñu, ta i zavaha ñu tandihi cuii cuhva ña vaha. I zandoo ñu cuhva vaha sa coo minoo rayii sihin minoo ñi ñaha. Ta i zama ñu inga cuhva, minoo cuhva ña vaha. I zavaha ñu zihhi sa ña vaha sihin inga ñu zihhi,

²⁷ta tacuan tucu i zavaha rayii sihin inga rayii. I zandoo ra cuhva tahan si coo ra sihin ñu zihhi, ta i zavaha ra sii si sihin inga rayii. Ta sihin coño ñuhu ra tasi tuñi ra Ndyoo sii ra vaty cahnu xaan cuaty ra.

²⁸Ñá cuñi ca ñiyivi nacohon iñi ñu sii ra Ndyoo a tyaa ñu yahvi sii ra. Ta yucuan cuenda i zaña ra Ndyoo sii ñu ta saha ra sa coo minoo sa siñi tuñi ña vaha sii ñu, ta ziqui i zavaha ñu tandihi cuii sa ña vaha.

²⁹Ta i situ cuii sa quiñi caa sii ñu sa cuenda tandihi cuii cuhva ña vaha i zavaha ñu. Quihin rayii sii ñu zihhi ta ña tandaha ra sihin ñu. Tandihi cuii cuhva ña vaha zavaha ñu. Ndyiyo iñi ñu ndaha tyiño inga ñiyivi. Ñahñi sa ndoo iyo sii ñu. Cuxaan ñu tatu iyo sa vaha sii inga ñiyivi. Sahñi ñu ñiyivi. Nducu ñu tizihhi. Zandavi ñaha ñu. Quiñi xaan iyo ñu. Cahan ñu ndya vaha ñi sii inga ñiyivi zoco xehe ñi.

³⁰Quiñi cahan ñu sii ñiyivi vazu ña ndisa. Cuxaan xaan ñu sihin

ra Ndyoo. Cahan ñu ndya vaha ñi sihin ñiyivi. Zacahnu xaan ñu sii ñu, ta catyi ñu vaty vaha xaan ñu. Cuaha xaan cuhva ña vaha tava ñu. Ña tyaa ñu yahvi sii zutu ñu ta sii zihhi ñu.

³¹Ñahñi sa siñi tuñi vaha iyo xiñi ñu vaty ña cutuñi iñi ñu ñaa sa cuu sa vaha. Saha ñu tuhun ta ña tyaa ñu yahvi sii si. Ña cuñi ñu nu sii ñiyivi sii ñu. Cuxaan ñu sihin ñiyivi, ta ma zaha ñu tucahnu iñi sii ñu. Ta ña cundahvi iñi ñu sii ñiyivi.

³²Sito vaha ñu cuhva i catyi maa ra Ndyoo vaty tahan si sa cuu cuii ñiyivi zavaha cuhva ña vaha cuan. Zoco zavaha ñu sii si. Ta ña tacuan ñi, ndya cuhva cuzii xaan iñi ñu tatu zavaha tucu inga ñiyivi sii si.

Cua tasi tuñi ra Ndyoo sii ñiyivi cuhva iyo ñu

2 Yucuan cuenda yoho, yoo ra cuun, tatu ndyehe xoon tatu zavaha inga ñiyivi sa vaha a sa ña vaha, zuun ñi ziqui moo cua ndoo cuaty, ta ma zandasi ra Ndyoo cuatyun. Vaty tyicuhvon sii inga ñiyivi, ta zuun ñi cuaty zavaha ñu, zavohon.

²Ta sito yo vaty tasi tuñi ra Ndyoo sihin minoo cuhva ndoo sii ñiyivi zavaha cuhva cuan.

³¿Atu sica iñun vaty cuu tyicuhvon sii ñiyivi? Ta zuun ñi cuhva ña vaha zavaha ñu zavaha tucu moo. ¿Atu sica iñun vaty ma tasi tuñi ra Ndyoo suun?

⁴Ndyee xaan iñi ra Ndyoo sihin ñiyivi, ta cundahvi xaan iñi ra sii ñu. ¿Atu sica iñun vaty yucuan cuenda ma tasi tuñi ra suun? Tatu tacuan sica iñun, ña cutuñi iñun vaty cuñi

ra Ndyoo sa cua zandoon cuatyun, ta yucuan cuenda cundahvi iñi ra suun.

⁵Ta cuenda sa ndava xaan iñun ta ña cuñun zandoon cuatyun, ta yucuan cuenda zanducahnu con cuatyun, ta cua cuxaan xaan ra Ndyoo suhun quivi cua tasi tuñi ra sii ñiyivi sihin minoo cuhva ndoo ta cua cuhva ra tundoho ndyehe ñu.

⁶Quivi cuan cua cuhva maa ra Ndyoo sii sa minoo minoo ñiyivi cuhva tahan si sii ñu sa cuenda tyiño i zavaha ñu.

⁷Ñiyivi ña zaña sa zavaha sa vaha, cuñi ñu vatyí cua cuzi iñi ra Ndyoo sihin ñu. Ta cuñi ñu vatyí catyi ra vatyí vaha zavaha ñu. Ta nducu ñu cuhva ñihi ñu sa cundito ñu tandihi cuii tyiemvu. Sii maa ñu cuan cua cuhva ra sa cundito ñu.

⁸Zoco ñihi xaan cua tasi tuñi ra Ndyoo sii ñiyivi ña tyaa yahvi sii maa ra ta sii sa ndisa. Zavaha ñu sa ña vaha. Yucuan cuenda ñihi xaan cua tasi tuñi ra sii ñu cuhva tahan si sii ñu.

⁹Cua coo xaan tucuihya iñi ta tundoho sii ñiyivi zavaha sa ña vaha, xihna ca sii ñiyivi hebreo ta ziqui sii tandihi inga ñiyivi.

¹⁰Ta cua cuzi xaan iñi ra sihin ñiyivi zavaha sa vaha, ta cua catyi ra vatyí vaha zavaha ñu. Ta cua coo sa taxi ñi sii ñu sihin ra, ta ma caca xaan ca iñi ñu. Sa xihna ñi cua cuhva ra cuhva ya sii ñiyivi hebreo ta ziqui sii tandihi inga ñiyivi.

¹¹Tacuan cua zavaha ra vatyí minoo cuhva ndoo zavaha ra Ndyoo, ta cua cuhva ra cuhva tahan si sii sa minoo minoo yo.

¹²Tandihi ñiyivi zavaha cuatyí ta ña sito ñu tuhun i saha ra Ndyoo sii

ra Moisés, cua cuu ñu zoco yivi sa cuenda tuhun i saha ra Ndyoo sii ra Moisés. Ta ñiyivi sa sito tuhun i saha ra Ndyoo sii ra Moisés ta zavaha ñu sa ña vaha, cua tasi tuñi ra Ndyoo sii ñu cuhva catyi tuhun i saha ra sii ra Moisés.

¹³Vatyí yivi ñiyivi sa siñi ñi Tuhun Ndyoo cuu ñu cua quita vaha ityi nuu maa ra. Ñiyivi zavaha cuhva catyi Tuhun ra cuu ñu cua catyi ra vatyí ñahñi cuatyí ñu.

¹⁴Iyo ñiyivi sa ña sito tuhun i saha ra Ndyoo sii ra Moisés, zoco zuun ñi zavaha ñu cuhva catyi si vazu ña sito ñu vatyí iyo si. Sa siñi tuñi vaha sii ñu cuu sa catyi sihin ñu ñaa sa cuu sa vaha vazu ña sito ñu tuhun i saha ra Ndyoo.

¹⁵Zoco zañaha ñu vatyí iyo si aña ñu. Inuu ñi cahan sa siñi tuñi vaha sii ñu sihin ñu tañi cuhva catyi Tuhun i saha ra Ndyoo. Ta tyaa sa siñi tuñi vaha sii ñu cuatyí sata ñu a catyi si sihin ñu vatyí vaha cuu cuhva zavaha ñu.

¹⁶Ta tacuan cua cuu si quivi cua cuhva ra Ndyoo tyiño sii ra Jesucristo sa cua tyicuhva ra sii ñu, ta cua ndyehe ra tatu zavaha ñu sa vaha a sa ña vaha. Sa i zacote cuhva ya sii ndo quivi i nacatyí Tuhun Vaha ra sihin ndo. Vazu xehe xaan zavaha ñiyivi sa ña vaha a cuenda sa sica ñi iñi ñu, zoco sito ra Ndyoo, ta cua tyicuhva ra Jesucristo sii ñu.

**Tyaa ñiyivi hebreo yahvi tuhun
i saha ra Ndyoo sii ra Moisés**

¹⁷Catyí ndo vatyí ñiyivi hebreo cuu ndo. Ta ndisa. Ta catyi ndo vatyí tyaa xaan ndo yahvi tandihi tuhun i saha ra Ndyoo sii ra Moisés

vatyi tacuan ta cua cacu ndo cuñi ndo. Ta zacahnu ndo sii ndo vatyi maa ñi maa ndo zacahnu sii ra Ndyoo sa ndisa, catyi ndo.

¹⁸Ta catyi ndo vatyi sito ndo cuhva cuñi maa ra. Ta sito ndo ñaa sa cuu sa vaha xaan vatyi sito ndo tuhun i saha ra. Catyi ndo.

¹⁹Sica iñi ndo vatyi cuu zaquihin ityi vaha ndo sii ñiyivi ña sito. Ta sica iñi ndo vatyi cuu ndo tañi minoo ñuhu ndisi zandisi sii ñiyivi sica noo nu ñaa.

²⁰Cuu zacuaha ndo sii ñiyivi ña sito sa vaha, cuñi ndo, ta zaquihin ityi vaha ndo sii ñu tañi sa ndiyi cuu ñu vatyi sihin tuhun i saha ra Ndyoo sii ra Moisés ta sa sito ndo tandihi cuui sa vaha ta sa ndisa, catyi ndo.

²¹Zacuaha ndo sii inga ñiyivi, zoco ta cutuhva ca maa ndo. Zacuaha xaan ndo sii ñiyivi vatyi ma zuhu ñu, zoco zuun ñi maa ndo zuhu ndo. ¿Atu ña ndisa?

²²Caty i ndo vaty i ña vaha cua cuzu minoo rayi sihin minoo ñaha tatu yivi ñazihi ra cuu, zoco zavaha ndo cuhva cuan. ¿Atu ña tacuan? Cuxaan ndo tatu zacahnu ñiyivi zandu yutu, zoco zuhu ndo ndaha tyiño nu iyo vehe ñuhu si.

²³Vaha xaan ñiyivi cuu maa ndo vaty i tyaa ndo yahvi tuhun i saha ra Ndyoo sii ra Moisés, catyi ndo. Zoco ña tyaa ndo yahvi sii si sa ndisa cuui, ta sihin cuhva cuan ña zacahnu ndo sii ra Ndyoo.

²⁴Tañi catyi Tuhun Ndyoo: “Ñiyivi sa yivi ñiyivi hebreo cuu, cahan ñu ndya vaha ñi sii ra Ndyoo sa cuenda sa ña vaha sa zavaha maa ndo.”

²⁵Tatu ndisa cuui vaty i zavaha ndo cuhva catyi tuhun i saha ra Ndyoo sii ra Moisés, tyindyee si sa tyaa ndo yahvi costumbre sa tahndya ñi xiñi xuu lee. Zoco tatu ña tyaa ndo yahvi tandihi tuhun i saha ra Ndyoo, yivi ñiyivi ra cuu sii ndo. Ñahñi tyindyee si sa tyaa ndo yahvi sii costumbre cuan. Tañi minoo zeña ñi cuu si vaty i ñiyivi cuenda ra Ndyoo cuu sii ndo, zoco yivi.

²⁶Ta ñiyivi tyaa yahvi sa ndisa tuhun i saha ra Ndyoo sii ra Moisés, vaz u ña tyaa ñu yahvi costumbre cuan, zoco zuun ñi cua tiin cuenda ra Ndyoo sii ñu tañi tatu zavaha ñu sii si.

²⁷Vazu ña zavaha ñu costumbre cuan, zoco tyaa ñu yahvi sii tuhun i saha ra Ndyoo. Maa ñu cuu ñu cua zañaha sii maa ndo vaty i iyo cuaty i ndo. Vaty i maa ndo i ñihi ndo tuhun i saha ra Ndyoo sii ra Moisés ta zavaha ndo costumbre cuan, zoco ña tyaa ndo yahvi cuhva catyi tuhun i saha ra Ndyoo sa ndisa.

²⁸Vazu ñiyivi hebreo cuu ndo zoco ña cuñi si catyi si vaty i ñiyivi cuenda ra Ndyoo cuu sii ndo sa ndisa. Ta costumbre sa tahndya ñi xiñi xuu lee, ña zaty iño si maa ñi sa cuenda coño ñuhu ñiyivi.

²⁹Zoco ñiyivi sa cuu ñiyivi hebreo sa ndisa cuui cuu ñu sa zama cuhva iyo ñu ndya aña ñu. Tyaa ñu yahvi tuhun i saha ra Ndyoo, ta zavaha tucu ñu costumbre cuan vaty i cuñi ñu zañaha ñu vaty i zehe ra Ndyoo cuu sii ñu sa ndisa. Ta vaz u ma zacahnu ñiyivi sii ñu cuhva cuan, zoco cua catyi ra Ndyoo vaty i vaha ñu.

3 ¿Atu vaha ca sa cuu yo ñiyivi hebreo? ¿Atu tyindyee costumbre circuncisión cuan sii yo?

²Iyo cuaha xaan cuhva tyindyee si sa cuu yo ñiyivi hebreo, ta sa ñiñi ca cuu sa saha maa ra Ndyoo tandihi tuhun ra sii ñiyivi sahanu sii yo.

³⁻⁴Vazu cuaha xaan ra hebreo ña sino iñi cuhva catyi ra Ndyoo, zoco zuun ñi cua zavaha maa ra Ndyoo cuhva catyi ra. Vazu catyi tandihi cuii ñiyivi vaty ma zavaha ra cuhva catyi ra, zoco cua zavaha ra sii si. Tañi catyi si nuu tutu ra Ndyoo: “Cua ndyehe ñiyivi vaty tuhun cohon cuu sa ndisa, ta cua coto ñu vaty ra cahan sa ndisa cuun.”

⁵Ta vityi cua quehin cuhva cahan ñiyivi. Catyi ñu vaty vaha xaan ca sa zavaha yo sa ña vaha, ta sihin cuhva cuan zañaha si vaty vaha xaan ca cuu ra Ndyoo. Ta catyi ñu vaty ña vaha sa tasi tuñi ra Ndyoo sii yo vaty tyindyee si sii ra sa zavaha yo sa ña vaha vaty zañaha si vaty vaha xaan maa ra, catyi ñu.

⁶Zoco ña ndisa sa tacuan vaty tatu tacuan cuu si, ma tyicuhva ra Ndyoo sii ñiyivi ñuu ñiyivi.

⁷Tatu sica iñi yo vaty vaha ca sa cuvaty yo ta ziqui cua coto ñiyivi vaty ndisa xaan cuu tuhun cahan maa ra Ndyoo ta cua zacahnu ca ñu sii ra. Zoco ña tacuan cuñi si vaty tatu tacuan sica iñi yo, ma cutuñi iñi yo ñaa cuenda cua tyicuhva ra Ndyoo sii yo tañi ñiyivi iyo cuaty.

⁸Iyo ñiyivi catyi ñu: “Nazavaha ca yo sa ña vaha ta cua zañaha si vaty vaha xaan ca ra Ndyoo vaty cuaha xaan cuaty yo cua zandasi ra.” Ta

catyi ñiyivi cahan ndya vaha ñi sii maa yo vaty zuun ñi cuhva cuan zacuaha yo, catyi ñu. Ñihi xaan cua zandyehe ra Ndyoo tundoho sii ñiyivi cahan cuhva cuan vaty tacuan tahan si sii ñu.

Iyo cuaty si tandihi cuii yo

⁹Ta yozo caa ¿atu vaha ca cuu maa yo ñiyivi hebreo ta ziqui inga ñiyivi? Ña ndisa. Sa nacaty ndi sihin ndo vaty iyo cuaty sii tandihi cuii ñiyivi. Iyo cuaty sii ñiyivi hebreo ta sii ñiyivi sa yivi ñiyivi hebreo cuu.

¹⁰Tañi catyi Tuhun ra Ndyoo:

Yoñi minoo ñiyivi vaha sa ndisa cuii, numinoo.

¹¹Yoñi minoo ñu sa cutuñi iñi.

Yoñi maa nanducu sii ra Ndyoo.

¹²Tandihi cuii ñu i naa iñi ñu sii ra Ndyoo.

I zandoo ñu ityi ra, ta ñahñi minoo cuhva vaha zavaha ñu sa cuenda ra Ndyoo.

Numinoo ñu ña zavaha sa vaha, yoñi maa.

¹³Quiñi xaan cahan ñu, ta vatya xaan ñu sihin yuhu ñu.

Cuu si minoo xico iñi xaan sahan sa quita sisi ñaña sa tacoho yuhu.

¹⁴Cahan ñu ndya vaha ñi sihin ñiyivi.

Ta quiñi xaan cahan ñu sii ñu.

¹⁵Yaty xaan cua cahñi ñu ñiyivi.

¹⁶Nu yucu ñu saha ñu tundoho, ta saha xaan ñu sa cuihya iñi sii inga ñiyivi.

¹⁷Ña sito ñu yozo caa zacuu ñu ta coo sa taxi sii ñu sihin ra Ndyoo ta sihin inga ñiyivi.

¹⁸Ta ña yuhu maa ñu sii ra Ndyoo.

Catyi Tuhun ra Ndyoo.

¹⁹Sito yo vatyí tandíhi tuhun i saha ra Ndyoo sii ra Moisés, cahan si sa cuenda ñiyivi hebreo. Ta cua coto tandíhi ñu vatyí iyo cuatyí ñu nuu ra Ndyoo, ta ma cuu catyi ñu vatyí ñahñi cuatyí ñu. Ta tacuan tucu tandíhi ñiyivi ñuu ñiyivi.

²⁰Yoñi numinoo ñiyivi cua nduvaha añima ityi nuu maa ra Ndyoo sihin sa tyaa xaan ñu yahvi tuhun i saha ra Ndyoo sii ra Moisés vatyí tuhun cuan cuenda zacoto ñi si sii ñu ñaa sa cuu cuatyí ñu.

Ñihi yo sa cacu añima yo sihin sa sino ñi iñi yo sii ra Ndyoo

²¹Vityi sito yo vatyí yivi sihin tuhun i saha ra Ndyoo sii ra Moisés ta nduvaha añima yo ityi nuu maa ra. Zuun ñi Testamento Sahnu catyi si cuhva cuan.

²²Vityi zanduvaha ra Ndyoo cuhva iyo ñiyivi sihin sa sino ñi iñi ñu sii ra Jesucristo. Ta inuu cuii ñi tiin cuenda ra sii ñu sino iñi tacuan vazú ñu hebreo a inga ñu vatyí ña ziin ndyehe ra sii yo.

²³Ta iyo cuatyí sii tandíhi cuii ñiyivi. Sica xaan ndyaa tandíhi yo nuu ra Ndyoo ta sihin cuhva cuñi ra.

²⁴Zoco i zavaha maa ra Ndyoo minoo tumañi iñi cahnu xaan sii yo sa tyiyahvi ra Jesucristo sa cuenda cuatyí yo. Ta vityi catyi ra Ndyoo vatyí ñahñi ca cuatyí maa yo sa sino iñi sii ra Cristo vatyí i zavaha ra cuhva cuan.

²⁵I zaquisi ra Ndyoo sii ra Cristo. Ta i ndoho ra. Ta i sihi ra sa cuenda cuatyí maa yo. Ta ma cuxaan ca ra Ndyoo sihin yo tatu sino iñi yo

vatyi sati niñi ra Cristo sa cuenda maa yo. Ta i zandyee xaan ra Ndyoo iñi ra ndyehe ra sii yo, ta ña cañi ra sii yo cuenda cuatyí i zavaha yo quivi cumañi ca coto yo Tuhun ra.

²⁶Ta i zañaha ra vatyí vaha xaan ra sihin yo vatyí i ndoho ra Cristo sa cuenda cuatyí maa yo. Ta yucuan cuenda catyi ra Ndyoo vatyí ñahñi cuatyí iyo sii ñiyivi sino iñi sii ra Jesús.

²⁷Ihya cuu cuenda sa ma cuu catyi yo vatyí vaha xaan maa yo. Ma cuu cahan yo tacuan vatyí ma nduvaha añima yo ityi nuu ra Ndyoo sihin sa zavaha yo sa vaha. Maa ñi sihin sa sino iñi yo sii ra Jesucristo ta nduvaha añima yo nuu ra Ndyoo.

²⁸Sito ndi vatyí catyi ra Ndyoo vatyí ñahñi cuatyí iyo sii minoo ra tatu sino iñi ra sii ra Cristo vazú ña tyaa ra yahvi sii tuhun i saha ra Ndyoo sii ra Moisés.

²⁹Ndisa vatyí zacahnu ñiyivi hebreo sii ra Ndyoo, zoco zacahnu tucu inga ñiyivi sii ra. Zandasi ra Ndyoo cuatyí ñiyivi hebreo, ta tacuan tucu sihin inga ñiyivi vatyí yivi Ndyoo cuenda ñiyivi hebreo ñi cuu ra. Ndyoo cuu ra sa cuenda tandíhi ñiyivi.

³⁰Minoo tuhun ñi ra Ndyoo iyo, ta catyi ra vatyí ñahñi ca cuatyí iyo sii ñiyivi sino iñi sii ra Cristo vazú zavaha ñu costumbre circuncisión cuan a vazú ma zavaha ñu sii si.

³¹¿Atu sa cuenda sa sino iñi yo ta catyi yo vatyí ña ñiñi ca tuhun i saha ra Ndyoo sii ra Moisés? Ma catyi yo tacuan. Vityi iyo cuhva sii yo ta cuu tyaa yo yahvi sii si sa

ndisa cuii vatyí tyindyee ra Cristo sii yo.

**Cuhva i zañaha ra Abraham
cuhva i sicoo ra**

4 ¿Ta yozo caa cuu si sa cuenda ra Abraham, ra cu ñiyivi sahnú sii maa yo ñiyivi hebreo? ¿Ñaa cuenda catyi ra Ndyoo vatyí vaha ra Abraham?

²Tatu catyi ra Ndyoo vatyí ñahñi cuatyí ra Abraham vatyí i zavaha ra sa vaha, cuu catyi maa ra Abraham vatyí vaha xaan ra. Zoco ñá cuu catyi ra Abraham tacuan ityi nuu ra Ndyoo.

³I catyi ra Ndyoo vatyí vaha ra Abraham cuhva catyi Tuhun Ndyoo: “I sino iñi ra Abraham sa catyi ra Ndyoo, ta yucuan cuenda catyi ra Ndyoo vatyí ñahñi cuatyí ra.” Catyi si.

⁴Minoo ra zatyíño, ña ñihi ra xuhun sa caha ñi. Tyiyahvi ñu sii ra vatyí zatyíño ra.

⁵Zoco minoo ra ña zatyíño sa cuenda cuhva cacu añima ra zoco sino iñi ra sii ra zandasi cuatyí ñiyivi, sihin sa sino ñi iñi ra cuan ta ñihi ra cuhva catyi ra Ndyoo sihin ra vatyí ñahñi cuatyí ra.

⁶I catyi tucu ra David vatyí zii xaan cuñi minoo ra tatu catyi ra Ndyoo sihin ra vatyí ñahñi cuatyí ra. Ñahñi sa zavaha ra ta ñihi ra sa tacuan. Tumañi iñi ñi cuu si sa saha maa ra Ndyoo sii ra.

⁷Ihya cuu cuhva i catyi ra David: Zii xaan cuñi ñiyivi, ñu i zandasi ra Ndyoo cuatyí.

⁸Zanaa ra sii si.

Zii xaan cuñi ñiyivi, ñu ña tyaa ca ra Ndyoo cuatyí ziquí.

⁹Ma cuu catyi yo vatyí maa ñi ñiyivi tyaa yahvi costumbre circuncisión cuu ñu ñihi tumañi iñi cuan sii ra Ndyoo. Zuun ñi cuhva cua ñihi ñiyivi ña tyaa yahvi costumbre cuan. Sihin sa sino ñi iñi ra Abraham ta catyi ra Ndyoo sihin ra vatyí ñahñi ca cuatyí ra.

¹⁰¿Ta ama i catyi ra Ndyoo vatyí ñahñi cuatyí ra Abraham? ¿Atu sa yaha zavaha ra costumbre circuncisión a cumañi ca? Cumañi ca zavaha ra sii si ta sa i catyi ra Ndyoo sihin ra vatyí sa i nduvaha añima ra.

¹¹Ta ziquí i zavaha ra costumbre cuan tañi minoo zeña vatyí sa yaha nduvaha añima ra sihin sa sino iñi ra, cuee ca sa zavaha ra cuhva cuan. Ta ziquí i nduu ra minoo ñiyivi sahnú sii tandihi ñiyivi sino iñi sii ra Ndyoo ta ña zavaha ñu costumbre cuan. Sa cuenda sa sino ñi iñi ñu ta catyi ra Ndyoo vatyí ñahñi ca cuatyí ñu.

¹²Ta nduu tucu ra Abraham minoo ñiyivi sahnú sii ñiyivi zavaha costumbre cuan, zoco tatu maa ñi costumbre cuan zavaha ñu, yivi ñiyivi ra Abraham cuu sii ñu. Nduu ra ñiyivi sii ñu ndyico sii ra sa ndisa sihin cuhva sino xaan iñi ra. Ta sino ndisa cuii iñi ñu cuan sii ra Ndyoo cuee ca sa zavaha ñu costumbre cuan.

**Sihin sa sino ñi iñi yo ta ñihi
yo tumañi iñi sii ra Ndyoo**

¹³Ndya ta sa naha i catyi ra Ndyoo sihin ra Abraham vatyí maa ra sihin ñiyivi sii ra cua ñihi ñu tandihi ñuu ñiyivi. Ñá ñihi ñu cuhva cuan sihin sa tyaa ñu yahvi

sii tuhun i saha ra Ndyoo sii ra Moisés. I ñihi ñu sii si sihin sa sino ñi iñi ñu sii ra Ndyoo vatyí zavaha ra cuhva catyí ra. Ta i catyí ra Ndyoo vatyí ñahñi cuatyí ñu.

¹⁴Vatyí tatu maa ñi ñiyívi tyaa xaan yahvi ley sa saha ra Ndyoo sii ra Moisés cuu ñu cua ñihi ndatu sii ra Ndyoo, tacuan ta ñahñi cua tyindyee si sa sino iñi yo sii ra Jesucristo, zoco ña tacuan cuu si, vatyí tatu tacuan cuu si, ña zavaha ra Ndyoo cuhva catyí ra sa ndisa.

¹⁵Sa cuenda tuhun i saha ra Ndyoo sii ra Moisés ta catyí ra Ndyoo vatyí iyo cuatyí ñiyívi. Tatu ñahñi sa catyí ñaa sa cuu sa ña vaha, ma cuu tyaa ñiyívi yahvi sii si, ta ma cuu sa ma tyaa ñu yahvi sii si.

¹⁶Yucuan cuenda sihin sa sino ñi iñi yo ta ñihi yo sa vaha vatyí tacuan ta cuu cuu si minoo tumañi iñi saha maa ra Ndyoo sii yo. I catyí ra Ndyoo sihin ra Abraham vatyí cua ñihi ra minoo sa vaha. Ta i catyí tucu ra Ndyoo vatyí tandíhi ñiyívi sino iñi sii ra cua ñihi ñu sa vaha vatyí sino iñi ñu cuhva i sino iñi ra Abraham. Cua cuhva ra Ndyoo sii si sii ñiyívi tyaa xaan yahvi tuhun i saha ra sii ra Moisés tatu sino iñi ñu sii ra Jesucristo. Ta cua cuhva ra sii si sii ñiyívi sino ñi iñi tañi maa ra Abraham. Ta maa ra cuu minoo ñiyívi sahnu sii tandíhi cuii yo sa sino iñi.

¹⁷Catyí tutu ra Ndyoo sa cuenda ra Abraham: “Cuaha xaan zehun cua coo nacahnu ñuu ñiyívi.” Zutu yo cuu sii ra Abraham nuu ra Ndyoo. Sino xaan iñi ra Abraham sii ra Ndyoo. Cuu zanandoto ra

Ndyoo sii ñiyívi i sihi. Ta tandíhi sa cua cuu ityí nuu ca, cua cuu si vatyí maa ra Ndyoo cua zavaha sii si.

¹⁸I sino iñi ra Abraham sa cahan ra Ndyoo vazu ma cuu si cuñi ra, zoco i cuu si. Ta i nduu ra zutu sahnu sii cuaha xaan ñiyívi. Tañi i catyí ra Ndyoo sihin ra: “Tyehen cua nducuaaha ñiyívi suun.”

¹⁹I sito ra Abraham vatyí sa sahnu xaan ra. Sa yatyí minoo ziendu cuiya ra. Sahnu xaan tucu maa ña Sara, ta ma cuu ca coo zehe ña. Zoco ña siin sino iñi ra Abraham vazu sa sahnu xaan nduu tahan ñu.

²⁰Ñá sica iñi ra Abraham vatyí ma cuu ca coo zehe ñu, zoco i sino iñi ra tuhun i catyí ra Ndyoo sihin ra. Ñá ndu-uu iñi ra. I zacahnu ra sii ra Ndyoo.

²¹I sito vaha xaan ra vatyí cuu zacuu ra Ndyoo tandíhi sa i catyí ra sihin ra.

²²Yucuan cuenda i catyí ra Ndyoo vatyí ñahñi cuatyí ra Abraham vatyí i sino iñi ra.

²³⁻²⁴Tacuan i catyí ra Ndyoo sa cuenda ra Abraham. Ta i cahan tucu ra tuhun cuan ndya sa cuenda maa yo. Cua catyí tucu ra vatyí ñahñi cuatyí iyo sii maa yo vatyí sino iñi yo sii ra Ndyoo, ra i zanandoto sii ra Jesús sa i sihi ra. Ta ra Jesús cuu ra ndyaca ñaha sii yo.

²⁵I sihi ra Jesús sa cuenda cuatyí maa yo. Ta i nandoto ra vatyí tacuan ta cua cuu catyí maa ra Ndyoo vatyí ñahñi ca cuatyí yo iyo.

Ñahñi cuatyí cua tyaa ra Ndyoo sata yo

5 Yucuan cuenda catyí ra Ndyoo vatyí ñahñi ca cuatyí yo vatyí

sino iñi yo. Sa iyo sa taxi sii yo sihin ra Ndyoo vityi sa cuenda maa ra Jesucristo.

²Sa cuenda maa ra ñihi yo tumañi iñi sii ra Ndyoo vatyi sino iñi yo. Ñihi xaan yo tumañi iñi sii ra Ndyoo, ta zii xaan cuñi yo. Ta nii cuu iñi yo vatyi cua cuhun yo nu ndyaa ra Ndyoo ta cua nduu yo tañi maa ra.

³Ta ña tacuan ñi, zoco zii cuñi tucu yo vazu ndyehe yo tundoho vatyi sito yo vaty tyindyee si sii yo ta cua coo ca tundyee iñi sii yo tatu cuaha tundoho ndyehe yo.

⁴Ta tatu iyo tundyee iñi sii yo vaha xaan cuu yo ityi nuu ra Ndyoo. Ta tatu vaha xaan yo nuu ra, nii xaan cua cuu iñi yo vatyi cua ñihi yo tandihi sa vaha sa saha maa ra.

⁵Ta tatu sa cunii vaha iñi yo, sito yo vaty ma zandavi ñaha ra Ndyoo sii yo. Tacuan sito yo vatyi sito yo vaty cuñi xaan ra Ndyoo sii yo. Ta Tatyi li sa saha maa ra sii yo, iyo si añaima yo ta zacoto si sii yo vaty cuñi xaan maa ra Ndyoo sii yo sihin minoo cuhva vaha xaan.

⁶Ñá cuu zacacu yo sii yo, zoco sa tahan si quivi sa i catyi ra Ndyoo ta ziqui i quisi ra Cristo. Ta i sihi ra sa cuenda ñiyivi ña vaha tañi maa yo.

⁷Sito yo vaty ma cuu cuu yo sa cuenda ñiyivi ña vaha. Zoco iyo saha cua cuu minoo ñiyivi sa cuenda inga ñiyivi vaha xaan ca.

⁸Ta maa ra Ndyoo zañaha ra vaty cuñi xaan ra sii yo vaty vazu ñiyivi iyo xaan cuaty cuu maa yo, zoco i sihi ra Cristo sa cuenda yo.

⁹Ta vityi sa cuenda niñi ra Cristo ta catyi ra Ndyoo vaty ñahñi ca cuaty yo. Sa cuenda ra Cristo i

tiin cuenda ra Ndyoo sii yo, ta ma zandyeha ra tundoho sii yo quivi cua cuxaan ra ta cua zandyeha ra tundoho sii ñiyivi iyo cuaty, quivi cua ndihi nuu ñiyivi.

¹⁰Ta maa yo i cuu ñiyivi xaan iñi sii ra Ndyoo, zoco i zanduvaha ra sii yo sihin ra quivi i sihi Zehe ra sa cuenda yo. Ta vityi ndito ra tandihi cuu tyiemvu, ta sito yo vaty iyo xaan ca cuhva sa cua zacacu ra sii yo vaty iyo ra sisi añaima yo.

¹¹Ta ña tacuan ñi. Zii xaan cuñi yo vityi vaty iyo sa taxi sii yo sihin ra Ndyoo sa cuenda cuhva i zavaha ra Jesucristo, ra ndyaca ñaha sii yo.

Cuhva i zavaha ra Adán ta cuhva i zavaha ra Cristo

¹²Sa cuenda minoo ra ta i quihvi cuaty ñuu ñiyivi. Ta cuenda cuaty i zavaha ñiyivi, ta i quisaha cuhva sa sihi tandihi ñu vaty iyo cuaty sii tandihi yo.

¹³Ta sa iyo cuaty ñuu ñiyivi cumañi ca cuhva ra Ndyoo tuhun ra sii ra Moisés. Ta quivi cumañi ca cuhva ra Ndyoo tuhun ra, ñá tyaa ra cuaty sata ñiyivi sa minoo minoo cuaty zavaha ñu vaty ta coto ca ñu tuhun i saha ra sii ra Moisés.

¹⁴Zoco i sihi ñu ndya quivi i zavaha ra Adán cuaty cuan ndya cuhva ndya quivi i sicoo ra Moisés vazu ñá zavaha ñu sa zuun ñi cuaty i zavaha ra Adán. Ta i cuu ra Adán tañi minoo ra sa cua quisi ityi nuu ca.

¹⁵Saha maa ra Ndyoo tumañi iñi sii ñiyivi, ta tucu xaan cuu cuhva i zavaha ra Ndyoo ta ziqui cuhva i zavaha ra Adán. Vaty sihin sa

minoo tuhun ñi cuaty i zavaha ra Adán ta cuaha xaan ñiyivi i sihi, zoco sihin tumañi iñi sa saha xaan ra Ndyoo ta i zavaha ra Jesucristo minoo cuhva vaha xaan sa cua zanaa ra cuaty sii cuaha xaan ñiyivi.

¹⁶Tucu ca cuu tumañi iñi sa saha maa ra Ndyoo ta ziqui cuhva i zavaha ra Adán. Minoo ñi cuaty i zavaha ra cuan, ta yucuan cuenda cua tasi tuñi ra Ndyoo sii tandihi ñiyivi. Zoco vityi sihin tumañi iñi sa saha maa ra Ndyoo ta ña tyaa ca ra cuaty ziqui ñiyivi vazu cuaha xaan cuaty ñu.

¹⁷Ndisa vaty i sihi cuaha xaan ñiyivi sa cuenda sa i zavaha sa minoo tuhun ñi ra Adán. Zoco vityi cuaha xaan ñiyivi cua ñihi tumañi iñi sa saha maa ra Ndyoo, ta cua cundito ñu tandihi cui tyiemvu. Cua nduvaha aña ñu sa cuenda sa zavaha minoo ñi ra, ra Jesucristo.

¹⁸Sa cuenda cuaty sa i zavaha minoo ñi ra, ta i catyi ra Ndyoo vaty iyo cuaty sii tandihi ñiyivi, ta tahan si sa cuu ñu. Ta zuun ñi cuhva sa cuenda minoo sa vaha sa i zavaha minoo ñi ra ta i catyi ra Ndyoo vaty ñahñi cuaty iyo sii tandihi ñiyivi, ta cua cundito ñu tandihi cui tyiemvu.

¹⁹Sa cuenda sa ñá tyaa minoo ra yahvi, ta i nduu tandihi ñiyivi ñiyivi cuaty. Zoco sa cuenda sa i tyaa inga ra yahvi, ta cua tiin cuenda ra Ndyoo sii ñiyivi tañi sa ñahñi ca cuaty ñu.

²⁰I saa quivi i saha ra Ndyoo tuhun ra sii ra Moisés, ta i nacoto ñiyivi vaty cuaha xaan cuaty ñu. Zoco vazu cuaha xaan cuaty

ñu, zoco vaha xaan aña maa ra Ndyoo, ta i saha xaan ca ra tumañi iñi.

²¹Sa cuenda cuaty ñiyivi ta i quisaha sihi ñu. Ndyaca ñaha tuhun sihi sii ñu. Ta vityi sa cuenda sa i zavaha ra Jesucristo, ra ndyaca ñaha sii yo, ta saha ra Ndyoo tumañi iñi sii ñiyivi. Catyi ra vaty ñahñi ca cuaty ñu. Yucuan cuenda cua cundito ñu tandihi cui tyiemvu. Vityi sihin sa saha maa ra Ndyoo tumañi iñi sii yo, ta ña ndyaca ñaha ca tuhun sihi sii yo.

Ma zavaha ca yo cuaty

6 ¿Atu vaha catyi yo nazavaha ca yo cuaty vaty tacuan ta cua cundahvi ca iñi ra Ndyoo sii yo?

²Ña tacuan. Tatu sa i zaña yo cuaty yo sa ndisa, ma cuu ca zavaha ca yo sii si.

³I sicoo ndutya yo sa cuenda ra Cristo Jesús, ta sa sicoo ndutya yo cuu tañi sa sihi yo sihin ra Cristo.

⁴Cuu si tañi sa i sihi yo ta i quihvi coño ñuhu yo sisi ñaña iin ñi sihin ra nu i sicoo ndutya yo cuenda ra, ta i nandoto yo sihin ra vaty iin ñi cuu yo sihin ra. Ta iyo xaan cuhva sii Zutu ra, ta i zanandoto ra sii ra Jesús vaty tacuan ta nduu maa yo ñiyivi saa ta coo yo minoo cuhva saa.

⁵Tatu sa ndu-iin yo sihin ra nu i sihi ra, cua ndu-iin tucu yo sihin ra inga cuhva, ta cua coo yo minoo cuhva saa sihin ra.

⁶Sito yo vaty i ndihi cuhva sa sicoo ityi sata. Ña iyo ca yo cuhva i tyaa yo yahvi sii coño ñuhu yo ta zavaha yo cuhva ña vaha sa cuñi si. Ña tacuan.

⁷Vatyi maa yo sa i sihi sihin ra Cristo, ñahñi ca cuhva cuu zacuu cuatyí sihin yo. Ma cuu ca cundyaca ñaha si sii yo.

⁸Ta tatu sa i sihi yo sihin ra Cristo, sino ñi yo vatyi cua cundito tucu yo sihin ra.

⁹Vatyi sito yo vatyi i nandoto ra Cristo sisi sa i sihi ra, ta ma cuu ca ra. Ma cundyaca ñaha ca tuhun sihi sii maa ra.

¹⁰Minoo saha ñi i sihi ra sa cuenda cuatyí ñiyivi. Ta vityi ndito ra. Ta iyo ra ñin ñi sihin ra Ndyoo tandihi cuii tyiemvu.

¹¹Yucuan cuenda maa ndo, zaha ndo tuhun sa i sihi ndo ityi nuu cuatyí cuan vatyi ma cuu ca cundyaca ñaha si sii ndo. Zoco ndito ndo sa cuenda ra Ndyoo vatyi sa ndu-ñin ndo sihin ra Cristo Jesús, ra ndyaca ñaha sii yo.

¹²Yucuan cuenda ma cuhva ca ndo sa cundyaca ñaha cuatyí cuan sii ndo. Ma tyaa ca ndo yahvi cuhva ña vaha sa cuñi coño ñuhu ndo zavaha si.

¹³Ma cuhva cuenda ndo coño ñuhu ndo sii cuatyí cuan, ta ma zavaha ndo sa ña vaha. Cuhva ndo sii ndo sii ra Ndyoo vatyi ñiyivi sa i nandoto cuu ndo. Ta zatyíño ndo sa cuenda ra Ndyoo, ta zavaha ndo sa vaha.

¹⁴Vatyi cuatyí cuan, ñahñi ca sa cuu zacuu si sihin ndo vatyi ña ndyaca ñaha ca tuhun i saha ra Ndyoo sii ra Moisés sii ndo. Ña tacuan ñihi ndo cuhva cacu añima ndo. Vityi ndito ndo sa cuenda tumañi ñi sa saha maa ra Ndyoo sii ndo.

Nacuhva ndo sii ndo sii ra Ndyoo ta zavaha ndo maa ñi sa vaha

¹⁵Ta yozo caa vityi ¿atu zavaha ca yo cuatyí vatyi ña ndyaca ñaha ca

tuhun i saha ra Ndyoo sii ra Moisés sii yo ta vityi saha xaan maa ra Ndyoo tumañi ñi sii yo? Ña tacuan cuñi si.

¹⁶Sito ndo vatyi tatu nduu ndo muzu sii minoo ñiyivi, tyaa ndo yahvi sa catyi ra. Ta muzu cuu ndo sii ra sa tyaa ndo yahvi. Tatu tyaa ndo yahvi sii cuatyí, cua cuu cuii ndo. A tatu tyaa ndo yahvi sii ra Ndyoo cua catyi ra vatyi sa nduvaha ndo sihin cuhva iyo ndo.

¹⁷Ityi sata maa ñi cuatyí i zavaha ndo, zoco vityi sehi tyahvi ndyoo sii ra Ndyoo vatyi vityi sihin tandihi cuii añima ndo tyaa ndo yahvi Tuhun Vaha sa i sino ñi ndo.

¹⁸Sa ndasi cuatyí ndo. Ña cuu ca ndo muzu sii cuatyí cuan. Sa i nduu ndo muzu sii sa vaha tañi cuñi ra Ndyoo.

¹⁹Quehin ziqui minoo cuhva vatyi ta coto ca ndo tandihi yozo caa iyo maa ra Ndyoo. Ityi sata i zavaha ndo cuatyí. Maa ñi sa ña vaha i zavaha ndo. Ta quiñi xaan ca nanduu cuhva zavaha ndo. Zoco vityi nacuhva ndo sii ndo sii ra ta zavaha ndo maa ñi sa vaha sa ndisa cuii vatyi cua nduu ndo ñiyivi vaha xaan cuhva cuñi ra Ndyoo.

²⁰Quivi sa i cuu ndo muzu sii cuatyí cuan, ña cuu zavaha ndo sa vaha.

²¹¿Ta ñaa sa vaha ñihi ndo sihin cuhva i zavaha ndo? Ñahñi maa. Ta vityi cucahan nuu ndo sa cuenda sa i zavaha ndo vatyi sa cuenda cuhva ña vaha cuan ta cua ndoho ñiyivi zavaha sii si tandihi cuii tyiemvu.

²²Zoco vityi sa zandasi ra Ndyoo cuatyí ndo, ta ña ndyaca ñaha ca si sii ndo. Ta sa i nduu ndo muzu

maa ra Ndyoo. Ta sa ñihi ndo sihin cuhva ya cuu sa nduu ndo ñiyivi vaha. Ta quivi cua ndihi sa ndito ndo ihya ñuu ñiyivi ya, cua cundito ndo tandihi cuii tyiemvu sihin ra Ndyoo.

²³Tatu zavaha yo sa ña vaha, sa cua ñihi yo sihin cuhva cuan cuu sa cua cuu cuii yo. Zoco tatu tiin cuenda yo sa vaha xaan sa saha maa ra Ndyoo sii yo, cua cundito yo tandihi cuii tyiemvu sihin ra Jesucristo, ra ndyaca ñaha sii yo.

Ziqui minoo cuhva, cuhva iyo ñiyivi tatu sa tindaha ñu

7 Ndoho yañi xaa, sa sito maa ndo tuhun i saha maa ra Ndyoo sii ra Moisés. Ta sito ndo vatyi tatu sa i sihi minoo ñiyivi, ña cuñi ca si sa tyaa ñu yahvi sii si.

²⁻³Cua quehin ziqui minoo cuhva. Tatu tindaha minoo ñaha sihin minoo rayii, catyi tuhun i saha ra Ndyoo sii ra Moisés vatyi ñazihi ra cuu sii ña ndya quivi cua cuu ra. Ñii ñi sa ndito ra ta cua cuu ña minoo ñaha zana tatu cua coo ña sihin inga ra ta ndito ca ra tindaha sihin ña. Zoco tatu sa sihi ra, ña ndyaca ñaha ca tuhun sa tindaha sii ña. Cuu tindaha ña inga saha, ta ma cuu catyi ñiyivi vatyí ñaha zana cuu ña.

⁴Ta zuun ñi cuhva cuan iyo sihin ndoho yañi xaa. Cuu catyi yo vatyí ñi ñi cuu ndo sihin ra Cristo. Quivi i sihi ra ta cuu si tañi sa sihi tucu maa yo. Ta yucuan cuenda ña iyo ca ndo cuenda tuhun i saha ra Ndyoo sii ra Moisés. Vityi ñiyivi ra Cristo cuu sii ndo. Maa ra cuu ra i nandoto sisi sa i sihi ra, ta sihin

cuhva cuan ta cuu zatyíño vaha ndo tyiño maa ra Ndyoo.

⁵Quivi sa tañaha ca sino ñi yo sii ra Cristo, cuaha xaan sa ña vaha i zavaha yo. I sito yo cuhva catyi tuhun i saha ra Ndyoo sii ra Moisés vatyí ma zavaha ca yo sa ña vaha, ta yucuan cuenda cuñi ca yo zavaha yo sa ña vaha cuan. Ta sihin cuhva cuan ta cua cuu cuii yo.

⁶Zoco vityi ña ndyaca ñaha ca tuhun i saha ra Ndyoo sii ra Moisés sii yo vatyí sa i sihi yo sihin ra Cristo, ta i ndihi cuhva cuan sa cuenda maa yo. Ta yucuan cuenda ña iyo ca yo cuhva catyi si nuu tutu, tuhun sahnú. Iyo yo minoo cuhva saa vatyí tyindyee Tatyí li maa ra Ndyoo sii yo.

Iyo ca cuatyí yo vazú sa sino ñi yo

⁷¿Ta yozo caa vityí? ¿Atu catyi tuhun sahnú vatyí zavaha ca yo cuatyí? ¡Ña catyi si numinoo saha! Zoco vityí site ñaa sa cuu cuatyí sa cuenda tuhun cuan. Catyi si: “Ma ndyíyo ñun ndaha tyiño inga ñiyivi.” Ta yucuan cuenda site vatyí ña vaha zavehi cuhva cuan.

⁸Tatu sa vatyí ñahñi tuhun cuan, ma cote ñaa sa cuu cuatyí, ta ma cuñi zavehi sii si. Zoco quivi sa site vatyí ña vaha sa ndyíyo ñi yo, ta i cuñi zavehi sii si vatyí iyo cuatyí añime.

⁹Ta quivi ña site ñaa sa catyi tuhun i saha ra Ndyoo sii ra Moisés, i sica ñi vatyí vaha ñiyivi cui. Zoco i saa quivi ta i cutuñi ñi cuhva catyi tuhun cuan, ta ziqui i site vatyí iyo cuatyí añime, ta i site vatyí minoo ñiyivi ña vaha cui.

¹⁰Catyí tuhun cuan vatyí tatu tyaa ñiyivi yahvi sii si cua cundito

ñu tandihi cui tyiemvu. Zoco zuun ñi tuhun cuan cuu sa i zativi sii, vaty ñá tyei yahvi sii si. Vaty catyi si vaty ra ña tyaa yahvi sii si, tahan si sa cua cuu cuii ra.

¹¹Ta kuhva sa ña vaha i cuñi zavehi, i zandavi ñaha si sii. Ta kuhva catyi tuhun i saha ra Ndyoo sii ra Moisés vaty ma cuu zavehi, i zavehi sii si. Ta yucuan cuenda tahan si sa cui.

¹²Tuhun i saha ra Ndyoo sii ra Moisés, vaha xaan si vaty tuhun i saha maa ra Ndyoo cuu si cuan. Ta tandihi tyiño sa catyi ra Ndyoo vaty zavaha yo, vaha xaan ta ndoo xaan si.

¹³Ta tuhun vaha xaan cuan çatu sa yucuan cuu sa i zativi sii? Yivi. Sa ña vaha sa i cuñi zavehi cuu sa i zativi sii. Sa cuenda sa zavehi sii si ta tahan si sa cui. Tuhun i saha ra Ndyoo sii ra Moisés cuu sa i zañaha sii, vaty cuaty cuu kuhva cuñi zavehi, zoco zuun ñi i zavehi sii si. Ta sihin kuhva cuan ta i zañaha tuhun cuan sii, vaty quiñi xaan cuu kuhva cuñi zavehi.

¹⁴Sito yo vaty tuhun cuan nacaty si sihin yo kuhva cuñi ra Ndyoo sa zavaha yo. Ta yuhvi cui minoo ñiyivi iyo cuaty vaty zavehi kuhva ña vaha sa cuñi zavehi, ta ndyaca ñaha cuaty cuan sii.

¹⁵Ña cutuñi iñi ñaa sa tehin vaty ña zavehi kuhva cuñi zavehi sa ndisa. Ta sa ña tahan maa iñi, yucuan cuu sa zavehi.

¹⁶Ta tatu zavehi minoo kuhva ña vaha, sa siñi tuñi vaha sa iyo sii, catyi si sihin vaty ña vaha cuu kuhva zavehi, ta catyi si vaty vaha tuhun i saha ra Ndyoo sii ra Moisés.

¹⁷Ta vity ña cuñi zavehi sa ña vaha, zoco iyo ca cuaty. Ta yucuan cuenda zavehi sii si.

¹⁸Nacote vaty minoo ñiyivi iyo cuaty cui. Ñahñi numinoo kuhva vaha iyo sii. Cuñi zavehi sa vaha, zoco ña ñihi kuhva yozo caa zavehi sii si vaty minoo ñiyivi cuaty cui.

¹⁹Vaty ña zavehi sa vaha sa cuñi zavehi, zoco zavehi sa ña vaha vazu ña cuñi zavehi sii si.

²⁰Ta sa zavehi sa ña vaha, zañaha si sii, vaty iyo ca cuaty. Ta cuaty cuan cuu sa ndyaca ñaha sii.

²¹Tacuan cuu si. Iyo minoo kuhva sii. Vazu cuñi zavehi sa vaha, zoco maa ñi sa ña vaha zavehi tandihi saha.

²²Vaty sihin sa siñi tuñi vehi tahan xaan iñi tandihi tuhun i saha maa ra Ndyoo.

²³Zoco iyo inga kuhva sii, ta ña tahan iñi si kuhva cuñi sa siñi tuñi vehi. Ta kuhva sa iyo sii, ña cuñi maa si zavaha si sa vaha. Maa maa ñi sa ña vaha cuñi si zavaha si. Ta ndyaca ñaha si sii.

²⁴iNdahvi yuhvi ra ndahvi! ¿Yoo sa cua zacacu sii, sihin kuhva sa zavehi sa ña vaha cuan?

²⁵Sehi tyahvi ndyoo sii ra Ndyoo sa cuenda ra Jesucristo ra ndyaca ñaha sii yo vaty maa ra cua zacacu sii. Sihin sa siñi tuñi vehi cuñi xein cundyique tandihi tuhun i saha maa ra Ndyoo, zoco sihin inga kuhva sa iyo sii, ta zativi si sii, ta zavaha que sa ña vaha.

Tyindyee xaan Taty Ii ra Ndyoo sii yo ta cuu coo yo minoo kuhva saa

8 ¹⁻²Vity ma zandoho ca ra Ndyoo sii ñiyivi sa ndu-iin

sihin ra Cristo Jesús vatyi ña zavaha ca ñu kuhva cuñi coño ñuhu ñu, zoco zavaha ñu kuhva cuñi Tatyí Ii. Vatyi Tatyí Ii cuan saha xaan si sa vaha sii yo sa cuenda ra Cristo Jesús. Ta i ndasi si sii, kuhva i sindyaca ñaha cuatyí sii, ta tuhun sihi.

³I zaquisi ra Ndyoo sii Zehe ra kuhva caa maa yo ñiyivi cuatyí. I quisi ra vatyi cua tyiyahvi ra sa cuenda cuatyí ñiyivi, ta i zandíhi ra kuhva ndyaca ñaha sa ña vaha sii yo. Vatyi tuhun i saha ra Ndyoo sii ra Moisés ñá cuu zavaha si kuhva cuan vatyi ñahñi tundyee iñi iyo sii si sa cuenda cuatyí sa ndyaca ñaha sii ñiyivi.

⁴Zoco i quisi ra Cristo vatyi cua kuhva ra kuhva sii yo, ta cua cuu tyaa yo yahvi sii kuhva vaha sa catyi tuhun sahnu cuan. Maa yo cuu ñiyivi zavaha kuhva cuñi Tatyí Ii ta yivi ca kuhva ña vaha sa cuñi maa yo.

⁵Ñiyivi zavaha kuhva cuñi maa ñu, ndyico ñu ta zacuu ñu kuhva ña vaha sa cuñi ñu. Zoco ñiyivi cuu cuenda Tatyí Ii, ndyico ñu kuhva cuñi ra Ndyoo.

⁶Tatu ndyico ñiyivi minoo kuhva ña vaha, kuhva cuñi maa ñu, cua cuu ñu. Zoco tatu ndyico ñu ta zavaha ñu kuhva cuñi Tatyí Ii cua coo sa taxi sii ñu sihin ra Ndyoo, ta cua cundito ñu sihin ra.

⁷Vatyi tatu ndyico ñu minoo kuhva ña vaha, kuhva cuñi maa ñu, ñahñi sa taxi iyo sii ñu sihin ra Ndyoo vatyi ña tyaa ñu yahvi tuhun i saha ra Ndyoo sii ra Moisés, ta nu ña cuu zacuu ñu sihin si.

⁸Ta ñiyivi zavaha sa ña vaha kuhva cuñi maa ñu, ña cuu zavaha ñu kuhva tahan iñi ra Ndyoo.

⁹Zoco maa ndo, ña zavaha ca ndo sa ña vaha kuhva cuñi ndo, zavaha ndo kuhva cuñi Tatyí Ii tatu ndisa vatyi iyo Tatyí Ii ra Ndyoo sihin ndo. Vatyi tatu ñahñi Tatyí Ii sa saha ra Cristo iyo sihin minoo ñiyivi, yivi ñiyivi ra Cristo cuu ñu cuan.

¹⁰Ta tatu iyo ra Cristo sisi añima ndo, tañi sa sihi coño ñuhu ndo cuu si sa cuenda cuatyí, zoco ndito añima ndo vatyi catyi ra Ndyoo vatyi ñahñi ca cuatyí ndo.

¹¹I zanandoto ra Ndyoo sii ra Jesús sisi sa i sihi ra. Ta tacuan tucu maa ndo tatu iyo Tatyí Ii ra Ndyoo sihin ndo cua zanandoto tucu ra sii ndo sihin coño ñuhu ndo.

¹²Ta vityi ndoho yañi xaa, sa cuenda sa vatyi iyo Tatyí Ii ra Ndyoo sii yo ta ña tahan ca si sa tyaa yo yahvi sii kuhva ña vaha sa iyo sii yo ta kuhva ña vaha sa cuñi yo.

¹³Vatyi tatu iyo ndo kuhva ña vaha, kuhva cuñi coño ñuhu ndo, cua cuu cuii ndo. Zoco tatu sihin tundyee iñi sa saha Tatyí Ii ra Ndyoo sii ndo ta zaña ndo sa ña vaha cuan, cua cundito ndo sa ndisa cuii.

¹⁴Vatyi ñiyivi ndyico kuhva zañaha Tatyí Ii maa ra Ndyoo, yucuan ñu cuu zehe ra Ndyoo.

¹⁵Ndyá quivi i tiin cuenda ndo Tatyí Ii maa ra Ndyoo ta ña yuhu ca ndo sii ra. Yuhu minoo muzu sii ra ndyaca ñaha sii ra tatu xaan ra, zoco ña yuhu ca maa ndo vatyi i tiin cuenda ndo Tatyí Ii ra, ta i nduu ndo zehe ra. Ta yucuan cuenda cuu catyi ndo sihin ra: “iNdyoo Zuti!”

¹⁶Ta zuun ñi Tatyí li maa ra Ndyoo cuu sa zacoto sii yo vatyí zehe ra Ndyoo cuu sii yo.

¹⁷Ta vityí cua ñihi yo sa vaha sa saha maa ra Ndyoo sii zehe ra. ñin ñi cua ñihi yo sii si sihin ra Cristo tatu ndyehe yo tundoho ñin ñi sihin ra. Ta ziquí cua catyí ra Ndyoo vatyí vaha xaan ñiyivi cuu yo ñin ñi sihin ra Cristo.

¹⁸Sito vehi vatyí tundoho sa ndyehe yo vityí ma cuu caca ñini yo vatyí cahnu xaan si. Vatyí ityí nuu ca cua zañaha maa ra Ndyoo sii yo cuhva caa ra ta zii xaan cua cuñi yo quivi cuan.

¹⁹Tandíhi cuii sa i zavaha ra Ndyoo ndatu si ta ñihi xaan cuñi si sa cua tahan si quivi ta cua zañaha maa ra Ndyoo yoo sa cuu tandíhi zehe ra.

²⁰Vatyí tandíhi sa i zavaha ra Ndyoo i tiví si. Vazu ñahñi cuatyí i zavaha si, zoco i saha ra Ndyoo vatyí tandíhi sa i zavaha ra cua tahan si tundoho ta cua tiví si (sa cuenda cuatyí sa zavaha ñiyivi). Ndyá quivi cua catyí ra Ndyoo, ta cua ndusaa tucu si inga saha.

²¹Tandíhi cuii sa i zavaha ra Ndyoo ta cua ndusaa tucu si inga saha quivi cua zama ra Ndyoo cuhva iyo si vityí, ta ma tiví ca si. Ta ñahñi ca tundoho cua ndyehe si. Ta tacuan tucu tandíhi cuii zehe ra Ndyoo.

²²Sito yo vatyí tandíhi sa i zavaha ra Ndyoo ta ndyehe xaan si tundoho. Cahnu xaan cuu tundoho ndyehe si.

²³Ta ña maa ñi ñuu ñiyivi sa zavaha ra Ndyoo cua ndyehe si tundoho, ndya maa yo ñiyivi sa i

tiin cuenda Tatyí li ra Ndyoo sa saha ra Ndyoo sii yo sa xihna ñi, ta ndyehe xaan tucu yo tundoho. Cahnu xaan tundoho ndyehe yo, ta ndahvi xaan cuñi yo vatyí cuñi xaan yo sa cua tahan si quivi cua zama ra Ndyoo cuhva iyo yo. Ta quivi cuan cua zandíhi ra tandíhi tundoho sa ndyehe yo ta tandíhi cuatyí yo. Cua zama ra cuhva iyo coño ñuhu yo. Ta cua nduu yo minoo cuhva saa.

²⁴Vazu tañaha ca ndyehe yo cuhva cuan, zoco sino ñini yo vatyí cua tahan si quivi cua nduu yo cuhva caa maa ra Ndyoo. Tatu ndatu yo quivi cuan ña cuñi si catyí si vatyí sa ñihi yo sa ndatu yo. Tatu sa yaha ñihi yo sii si, ma cuatu ca yo.

²⁵Zoco tatu sino ndisa cuii ñini yo vatyí cua saa quivi ityí nuu ca ta cua zavaha ra Ndyoo cuhva cuan ta vazu ña ndyehe yo sii si vityí zoco zandyee yo ñini yo ta cuatu yo sii si. (Sino ñini yo vatyí cua ñihi yo sii si, ta yucuan cuenda ndatu yo sii si.)

²⁶Ta zuun ñi cuhva cuan tyindyee Tatyí li ra Ndyoo sii yo sihin sa ña cuu sii yo vatyí ña sito yo yozo caa cua caca yo sii ra Ndyoo cuhva cuñi si. Ta Tatyí li cuan sica si sii ra Ndyoo sa cuenda maa yo nu ña ñihi ca yo cuhva cahan yo sihin ra.

²⁷Sito maa ra Ndyoo ñaa sa sica ñini yo sihin aña yo, ta sito ra ñaa sa cuñi Tatyí li cuan caca si vatyí sica si cuhva cuñi maa ra Ndyoo sa cuenda ñiyivi sino ñini sii ra Ndyoo sa ndisa cuii.

Ñahñi sa cuu tyaa siyo sii yo sihin cuhva cuñi xaan maa ra Ndyoo sii yo

²⁸Sito yo vatyí ñiyivi cuñi sii ra Ndyoo, tandíhi cuii sa tahan ñu

zoco tyindyee si sii ñu. Maa ñu cuu ñu i casi ra Ndyoo vatyí ñiyivi ra cua cuu sii ñu.

²⁹Ndya sa xihna cuii ñi ta sa sito ra Ndyoo yoo cuu ñiyivi cua cundyico sii ra, ta i catyi ra vatyí cua nduu ñu tañi cuhva caa Zehe ra. Ta ra Jesucristo cuu Zehe ra Ndyoo. Maa ra cuu Zehe Ndyoo sa ndisa sa xihna ñi, ta ziqui i nacacu saa cuaha xaan ca yo vatyí cuu yo yañi ra.

³⁰Ta i cana ra Ndyoo sii ñiyivi sa sito ra vatyí cua cundyico ñu sii ra. Ta sii ñiyivi sa i cana ra i catyi ra vatyí ñahñi ca cuatyí ñu. Ta vaha xaan cua zanduu ra sii ñu tañi cuhva caa Zehe ra.

³¹¿Ta ñaa ca sa cuu catyi yo vityi? Ndyaa maa ra Ndyoo sihin yo. Ta yoñi sa cuu tyaa siyo sii yo sii maa ra Ndyoo.

³²Vatyí i zaquisi maa ra Ndyoo sii sa zuun ñi maa Zehe ra, ta i saha ra Ndyoo sa cuu ra Jesús sa cuenda tandihi cuii yo. Yucuan cuenda sito yo vatyí tañi cuhva i saha ra Ndyoo sa cuu Zehe ra cuenda yo, ta tacuan tucu cua cuhva tucu maa ra tandihi cuii ca sa vaha sii yo.

³³Ta ityi nuu maa ra Ndyoo ¿yoo sa cuu tyaa cuatyí sata ñiyivi i casi ra? Yoñi. Vatyí maa ra cuu ra catyi vatyí ñahñi ca cuatyí ñu.

³⁴Yoñi cua catyi ityi nuu ra Ndyoo vatyí iyo cuatyí yo vatyí ra Cristo cuu ra i sihi sa cuenda cuatyí yo, ta ziqui i nandoto ra. Ta vityí ndyaa ra siyo cuaha ra Ndyoo. Ta cahan ra sihin ra Ndyoo sa cuenda maa yo.

³⁵¿Yoo sa cuu tyaa siyo sii yo sihin cuhva cuñi xaan ra Cristo

sii yo? Yoñi. Vazu ndyehe xaan yo tucuihya iñi a tundoho a saññi tahan ñiyivi sihin yo sa cuenda Tuhun Ndyoo a vazu iyo tama a ñahñi zahma yo iyo a cuaha xaan sa zayuhu sii yo a cuñi cahñi ñiyivi sii yo, zoco ma zaña ra Cristo sa cuñi ra sii yo.

³⁶Ndisa cua tahan yo tundoho tañi catyi si nuu tutu ra Ndyoo:
Sa cuenda moo ta cuñi cahñi ñiyivi sii ndi tandihi quivi.
Ta zacuu ñiyivi sii ndi tañi minoo mvee ticatyí sa cua cahñi ñu.

Tacuan catyi Tuhun ra Ndyoo.

³⁷Zoco vazu tahan yo tandihi cuii cuhva ya, zoco vaha xaan cua zahacanaa yo ziqui si sa cuenda ra sa cuñi xaan sii yo.

³⁸⁻³⁹Sito vehi vatyí ñahñi maa sa cuu tyaa siyo sii yo sihin cuhva cuñi xaan maa ra Ndyoo sii yo. Ta zañaha ra sii yo vatyí cuñi xaan ra sii yo sihin cuhva i sicoo ra Cristo ta cuhva i zavaha ra. Vazu ndito ca yo a vazu sa sihi yo zoco cua cuñi ca ra Ndyoo sii yo. A vazu ángel a tatyí cuihna cuñi tyaa siyo sii yo, zoco ma cuu. A ñaa sa tahan yo vityi a sa cua ndyehe yo ityi nuu ca a sa iyo ityi ziqui a nu ñuhu. A ñaa cuii ca maa sa iyo, zoco ma cuu tyaa siyo si sii yo sihin cuhva cuñi xaan maa ra Ndyoo sii yo sa cuenda ra Cristo Jesús, ra ndyaca ñaha sii yo.

I casi ra Ndyoo sii ñiyivi hebreo

9 Ñiyivi ra Cristo cui, ta quehin sa ndisa. Ña vatyé. Ta tyindyee Tatyí Ii ra Ndyoo sii sa siñi tuñi sii, ta site vatyí (tandihi sa tyei ihya ta) sa ndisa cuu si.

²Cuihya xaan cuñi añime. Ta yaha xaan ndahvi cuñi si. (Sa cuenda ñu hebreo, ñiyivi sii.)

³Ta ndya cuhva cuñi sa cua tyaa siyo ra Ndyoo sii, sii ra Cristo ta zacuhun ra sii nu xaan tatu zacacu zuhva ra sii ñu hebreo, ñiyivi sii. Tatu sa vatyi cuu tacuan, zoco ma cuu sa tacuan.

⁴Quehin sa cuenda ñiyivi hebreo vatyi i casi ra Ndyoo sii ñu vatyi cuñi ra zañaha ra vatyi cuñi xaan ra sii ñu. Zuun ñi sii maa ñu i zañaha ra Ndyoo cuhva caa ra sa ndisi xaan ra. Ta sihin maa ñu i catyi ra Ndyoo cuhva cua zavaha ra sa vaha xaan sihin ñu. Ta i saha ra tuhun sa i saha ra sii ra Moisés sii ñu, ta i catyi ra sihin ñu yozo caa cua zavaha ra sa vaha sihin ñu ityi nuu ca. Ta i zañaha ra sii ñu cuhva cuñi ra sa cua zacahnu ñu sii ra.

⁵Ra hebreo i cuu tandihi ñiyivi sahnun sii yo, ta i sino xaan iñi ra sii ra Ndyoo (tañi maa ra Abraham, ra Isaac, ta ra Jacob). Ta zuun ñi ñiyivi hebreo cuu ra Cristo. Ndyaca ñaha ra ziqui tandihi cuii sa iyo. Nazacahnu yo sii maa ra Ndyoo tandihi cuii tyiemvu. Ta nacuu si tacuan.

⁶Ña catyi sa ñá zavaha ra Ndyoo cuhva i catyi ra ta sa naha, cuhva cua zavaha ra sihin ñiyivi hebreo vatyi ña tandihi ñiyivi hebreo ta cuu ñu ñiyivi ra Ndyoo sa ndisa.

⁷Ña tandihi ñiyivi ra Abraham ta cuu ñu ñiyivi sii ra Ndyoo vatyi catyi Tuhun ra Ndyoo nu cahan ra sihin ra Abraham ta catyi ra: “Maa ñi sa cuenda ra Isaac ta cua coo ñiyivi suun.” (Tacuan i catyi ra Ndyoo sihin ra Abraham yoo cuu sa cua cuu ñiyivi sii ra sa ndisa cuii.)

⁸Cuñi si catyi si vatyi tandihi cuii ñiyivi i zacacu zihhi sii cuhva iyo ñuu ñiyivi ya, yivi ñiyivi ra Ndyoo cuu sii ñu. Zoco tandihi cuii ñiyivi sa cua càcù cuhva cuñi ra Ndyoo, yucuan ñu cuu zehe ra sa ndisa cuii.

⁹Ta ihya cuu cuhva i saha ra Ndyoo tuhun ra sii ra Abraham: “Cua quisi nu ndyaa ndo cuhva i catyi, ta cua coo zehe ña Sara”, catyi ra. (Ihya cuu cuhva i cacu ra Isaac, cuhva i catyi maa ra Ndyoo.)

¹⁰Ta ña tacuan ñi, vatyi ña Rebeca tindaha ña sihin ra Isaac yii ña, zehe ña Sara. Maa ra cuu minoo ñiyivi sahnun sii yo. Ta sicoo zehe ñu. (Tinihi ra i cacu ra.)

¹¹⁻¹²Zoco cuee ca sa cacu ra, ñá zavaha ra sa vaha a sa ña vaha, ta sa i catyi ra Ndyoo sihin ña Rebeca: “Ra cua cacu sa xihna ñi cua cuu ra muzu sii ra luhlu ca.” Tacuan i zañaha ra Ndyoo vatyi casi ra sii ñiyivi sa cuñi maa ra ta yivi sa cuenda cuhva zavaha ñu (vatyi i cuñi ca ra Ndyoo sii ra luhlu ca cuee ca sa cacu ra).

¹³Tañi i catyi ra Ndyoo: “I cuñi que sii ra Jacob, zoco ñá cuñi sii ra Esaú.”

¹⁴Tacuan i zavaha ra Ndyoo, zoco ma cuu catyi yo vatyi ña vaha cuhva zavaha ra.

¹⁵I catyi ra Ndyoo sihin ra Moisés: “Cua cundahvi iñi sii ñiyivi, zoco zuun ñi mi cua catyi yoo sii cua cundahvi iñi.” Catyi ra.

¹⁶Ta tacuan cuu cuhva sito yo vatyi ma cundahvi iñi ra Ndyoo sii ñiyivi sa cuhva cuñi ñi maa ñu ta nducu xaan ñu cuhva. Zoco cua cuu si cuhva cuñi maa ra Ndyoo vatyi maa ra cuu ra cundahvi iñi yoo sii cuñi maa ra.

¹⁷ Catyi Tuhun Ndyoo cuhva i cahan ra sihin ra Faraón rey ñuu Egipto ta sa naha. (Vatyí ñihi xaan iñi rey cuan), ta i catyi ra Ndyoo sihin ra: “I sehi sa cundyaca ñohon ta cua zañehi vatyí iyo xaan cuhva sii. Ta nacahnu ñuu ñiyivi cua zacahnu ñiyivi sii.” Catyi ra.

¹⁸ Tacuan iyo maa ra Ndyoo. Cundahvi iñi ra sii yoo ra cuñi ra cundahvi iñi ra. Ta saha ra sa nduñihi iñi inga ñiyivi cuhva cuñi maa ra.

¹⁹ Ta yucuan cuenda cua catyi ndo sihin: “¿Ta ñaa cuenda tyaa ra Ndyoo cuatyí sata ñiyivi? ¿Ta yoo cuu sa ña zavaha cuhva cuñi ra?”

²⁰ Zoco ña vaha cuhva sica iñun vatyí ¿yoo ra cuun ta cohon nu cahan ra Ndyoo? Vatyí minoo quiyi cuan, ña catyi si sihin ñiyivi i zavaha sii si: “Ña vaha cuhva i zavohon sii. ¿Ñaa cuenda i zavohon sii tyehen?”

²¹ Tucunun minoo ñiyivi zatyíño sihin ndyahu ta zavaha ñu ndaha tyíño sa cua cutyíño ñu sisi vehe, ta cuu zavaha ñu ñaa sa cuñi maa ñu sihin zuun ñi maa ndyahu cuan tu cuu si minoo ndaha tyíño vaha ca a cuu si minoo sa ndahvi ñi caa.

²² I cuñi ra Ndyoo zañaha ra sii ñiyivi cuhva tahan si zandoho ra sii ñu tatu zavaha ñu sa ña vaha. Ta cuñi tucu ra zañaha ra vatyí cuaha xaan cuhva iyo sii ra. Yucuan cuenda zandyee xaan ra iñi ra sihin ñiyivi ña vaha. Maa ñu cuu ñiyivi tahan si ndoho. Ta cuéé ca ta cua zanaa ra sii ñu.

²³ Ta inga tucu cuhva. I cuñi ra zañaha ra cuhva vaha xaan sa zavaha ra sihin inga ñiyivi, ñu i

saha maa ra tumañi iñi sii. Maa ñu cuu ñu i casi ra vatyí cua ñihi ñu tandíhi cuii sa vaha xaan ta cua cundito ñu sihin ra.

²⁴ Ta zuun ñi maa yoo cuu ñiyivi cuan. Iyo yoo cuu yoo ñiyivi hebreo. Ta iyo yoo yivi. Zoco i casi ra Ndyoo sii tandíhi yo.

²⁵ Tañi i catyi maa ra Ndyoo nuu tutu i tyaa ra Oseas ta sa naha: Iyo ñiyivi sa yivi ñiyivi mi, zoco cua zandui ñiyivi sii sii ñu. Ñá cuñi sii ñu, zoco vityí cua cuñi sii ñu.

²⁶ Ta zuun ñi nu i catyi sihin ñu: “Yivi ñiyivi sii mi cuu sii ndo”, zuun ñi yucuan cua nduu ñu ñiyivi sii mi, ra Ndyoo ndito.

²⁷ Ta i catyi ra Isaías sa cuenda ñiyivi hebreo: “Vazu cuaha xaan ñiyivi hebreo tañi ñiyiti yuhu tyañuhu, zoco zuhva cuii ñi ñu cua cacu.

²⁸ Vatyí vatyí xaan ta cua zavaha ra Ndyoo tandíhi cuii cuhva catyi ra ihya ñuu ñiyivi.”

²⁹ Tañi i catyi tucu maa ra Isaías: Tatu ma zacacu ra Ndyoo sii uu a uñi tahan yo, cunaa tandíhi yo Tañi i naa ñiyivi ñuu Sodoma ta ñuu Gomorra ta sa naha.

Sica iñi ñiyivi hebreo vatyí cua càcù ñu vatyí zavaha ñu sa vaha

³⁰ ¿Ta ñaa cua catyi yo vityí? Ñiyivi sa yivi ñiyivi hebreo cuu ña nanducu maa ñu cuhva coo vaha ñu ityi nuu ra Ndyoo. Zoco vityí nañihi ñu cuhva cuan sihin sa sino ñi iñi ñu.

³¹ Ta ñiyivi hebreo i zavaha xaan ñu cuhva sa sica iñi maa ñu vatyí

cua nduvaha ñu ityi nuu ra Ndyoo. Zoco ñá cuu. Ñá cuu zavaha ñu tandihi cuii cuhva vaha tañi catyi tuhun i saha ra Ndyoo sii ra Moisés.

³²¿Ta ñaa cuenda ñá ñihi ñu cuhva catyi ra Ndyoo sihin ñu vatyí ñahñi ca cuatyí ñu? Ñá ñihi ñu cuhva cuan vatyí ñá sino iñi ñu vatyí cua càcù ñu maa ñi sihin tumañi iñi sa saha maa ra Ndyoo. Sica iñi ñu vatyí cua càcù ñu sa cuenda sa vaha i zavaha ñu. Ta i cuu si tañi minoo cuhva tatu catyihí saha ñiyívi sihin minoo yuu.

³³Tañi catyi si nuu tutu ra Ndyoo: Cua caqui sii minoo ra tañi minoo yuu nu iyo ñiyívi hebreo.

Ta cua catyihí saha ñu sii ra. Zoco tatu sino iñi ñu sii ra, cua quita vaha ñu.

10 Ndoho yañi xaa, cahan xein sihin ra Ndyoo sa cuenda ñiyívi hebreo, ta sihin tandihi cuii añime cuñi xein sa cua cacu ñu.

²Sehi sa ndaa cuenda ñu vatyí cuñi xaan ñu zacahnu ñu sii ra Ndyoo, zoco ña ñihi ñu cuhva yozo caa zavaha ñu sii si sa ndisa.

³Vatyí ña sito ñu cuhva zanduvaha ra Ndyoo sii ñu cuhva cuñi maa ra, ta i nducu ñu inga cuhva sa cuñi maa ñu, ta ña tyaa ñu yahvi cuhva i saha maa ra Ndyoo.

⁴Ta sa naha cuñi ñu nduvaha ñu ityi nuu ra Ndyoo sihin sa tyaa ñu yahvi tuhun i saha ra sii ra Moisés. Zoco vityí sa i quisi ra Cristo ta zandihi ra cuhva cuan. Vityí sa sino ñi iñi yo sii ra ta nduvaha yo ityi nuu maa ra Ndyoo ta natiin cuenda ra sii yo.

⁵Ta nu i tyaa ra Moisés i catyi ra vatyí tatu zavaha minoo ra tandihi cuii sa vaha cuhva catyi tuhun i saha ra Ndyoo sii ra, tacuan ta cua coo ra minoo cuhva vaha xaan ta cua cundito ra tandihi cuii tyiemvu.

⁶Zoco cuhva nduvaha yo sihin sa sino iñi yo, yívi minoo cuhva sa ñihi xaan nanducu yo cuu si vatyí catyi si: “Ma catyi ndo sihin añima ndo: ¿Yoo cua cuhun ndya gloria ta cua zanoo ra sii ra Cristo?”

⁷Ta ma catyi ndo: ¿Yoo cua noo sisi ñuhu vatyí cua zanandoto ra sii ra Cristo sisi sa i sihi ra?”

⁸Vatyí ihya cuu cuhva catyi si: “Vatyí xaan iyo tuhun vaha ra Ndyoo sii ndo. Yuhu ndo ta sisi añima ndo iyo si.” Ta zuun ñi tuhun cuan cuu tuhun sa zacoto maa ndi. Tuhun sa cuenda sa sino iñi yo sii ra Cristo cuu si.

⁹Ta tatu catyun sihin ñiyívi vatyí ra Jesús cuu ra ndyaca ñaha suun ta sino ndisa iñun sihin añimon vatyí i zanandoto ra Ndyoo sii ra sisi sa i sihi ra, cua cacun.

¹⁰Vatyí sihin añima yo sino iñi yo (sa i sihi ra Jesús ta i nandoto ra vatyí cua zacacu ra sii yo), ta tacuan ta nduvaha añima yo. Ta sihin yuhu yo saha yo sa ndaa cuhva sino iñi yo. Tacuan ta cua cacu yo.

¹¹Vatyí catyi Tuhun ra Ndyoo: “Tandihi ñiyívi sa sino iñi sii ra, cua ñihi ñu sa vaha xaan sa cua cuhva ra.”

¹²Vatyí ra Ndyoo ña ziin ndyehe ra sii minoo ñiyívi ta sii inga ñu vazu tata hebreo cuu yo a griego a ñaa ñi maa tata cuu yo vatyí minoo tuhun ñi maa ra ndyaca ñaha sii

tandihí cuii yo. Ta saha xaan maa ra tumañi iñi sii tandihí cuii yo sa sica sii ra.

¹³Tañi catyi Tuhun ra Ndyoo vatyí tandihí ñiyivi sa cua caca sii ra Jesús, ra ndyaca ñaha sii yo, cua cacu ñu.

¹⁴¿Ta yozo caa cuu caca ñu sii ra tatu ña sino iñi ñu sii ra? ¿Ta yozo caa cuu sino iñi ñu sii ra tatu tañaha ca coto ñu vatyí i quisi zacacu ra sii yo? Ta ma cuu coto ñu tatu yoñi sa nacatyí sihin ñu.

¹⁵Ta ma cuu nacatyí ñiyivi Tuhun ra Ndyoo tatu yivi maa ra tasi sii ñu. Ta catyi Tuhun ra Ndyoo: “Vaha xaan tatu quisi ñiyivi nacatyí tuhun vaha cuhva cacu yo”, catyi si.

¹⁶Zoco ña tandihí ñiyivi sa siñi tuhun cuan ta tyaa ñu yahvi sii si vatyí iyo ñu tañi cuhva catyi ra Isaías: “Tata, yoñi sa sino iñi tuhun i zacoto ndi”, catyi ra.

¹⁷Xihna ca siñi yo tuhun vaha sa cuenda ra Cristo, ta ziqui sino iñi yo sii si.

¹⁸Ta catyi vatyí sa ndisa sa siñi ñiyivi hebreo tuhun vaha vatyí catyi Tuhun ra Ndyoo:

Sa i zacoto ñiyivi Tuhun moo nacahnu cuii ñuu ñiyivi, catyi Tuhun ra Ndyoo.

¹⁹Ta cua catyi tuqui inga cuhva: ¿Atu ñá sito ñiyivi hebreo vatyí cua zacacu tucu ra Ndyoo sii inga ca ñiyivi? Sa i sito ñu vatyí i cahan ra Moisés sa cuenda ra Ndyoo ta sa naha, ta i catyi ra:

Cua zacuxein sii ndo sihin ñiyivi sa ñahñi sa siñi tuñi sa cuaha, Vatyí ñu cuan cua nanduu ñu ñiyivi mi.

Ta maa ndo cua cuxaan ndo.

²⁰Ta ñá yuhu ra Isaías, ta i cahan ra sa cuenda ra Ndyoo ta catyi ra:

Ñiyivi sa ñá nanducu sii, yucuan ñu i nañihi sii.

I zañehi cuhva iye sii ñu vazu ñá nducu tuhun ñu.

²¹Zoco sa cuenda ñiyivi hebreo catyi ra Ndyoo: “Ndyiyaca cuii i cane sii ñiyivi sii, vatyí quisi ñu, zoco ñá tyaa ñu yahvi. Ñihi xaan iñi ñu.”

Iyo zuhva ñiyivi hebreo sa nañihi ñu cuhva cacu ñu

11 Ña catyi vatyí ndaha i tyaa siyo ra Ndyoo sii ñiyivi hebreo. Ña tacuan, yañi xaa. Yuhvi tucu ra hebreo cui, ñiyivi ra Abraham ta ñiyivi ra Benjamín.

²I casi ra Ndyoo sii ñiyivi ra ta sa naha, ta ñá tyaa siyo ra sii ñu ndaha ñi. ¿Atu ña sito ndo nu cahan Tuhun ra Ndyoo sa cuenda ra Elías? nu i cuxaan ra ta cahan xaan ra sii ñiyivi hebreo ta i catyi ra:

³“Tata, i sañi ñiyivi sii ñu cahan tuhun moo, ta i sani ñu altar nu i zacahnu ñu suun. Yuhvi ñi ca zacahnu suun, ta cuñi cahñi ndihi ñu sii”, catyi ra.

⁴Ta i nacahan ra Ndyoo ta catyi ra: “Iyo usa mil ca ñiyivi sa i naquihin vehi. Tañaha ca cua cuiñi siti ñu nuu ndyoo sa nañi Baal, ta ña zacahnu ñu sii ndyoo cuan”, catyi ra Ndyoo.

⁵Ta zuun ñi cuhva cuan cuu si ndya cuhva ndya vityí vatyí iyo zuhva ca ñiyivi hebreo sa zacahnu sii ra Ndyoo sa ndisa cuii. I casi ra sii ñu, ta saha maa ra tumañi iñi sii ñu.

⁶Saha maa ra Ndyoo tumañi iñi ta yivi sa cuenda sa vaha sa zavaha

ñu vatyí tatu saha ra sa vaha sa cuenda sa zavaha ñu, yiví ca tumañi iñi cuu si.

⁷Ihya cuu cuhva iyo si. Nanducu xaan ñiyiví hebreo cuhva nduvaha ñu sihin ra Ndyoo, ta ña nañihi ñu cuhva cuan. Zoco ñiyiví i casi ra Ndyoo, yucuan cuu ñu sa i nañihi cuhva cuan. Ta tandíhi inga ñiyiví cuan, i zanduñihi ra Ndyoo iñi ñu.

⁸Tañi catyí si nuu tutu ra Ndyoo: “Saha ra Ndyoo minoo sa siñi tuñi sii ñu sa ma cutuñi iñi ñu. Ndyehe ñu, zoco ña cutuñi iñi ñu sa ndyehe ñu. Siñi ñu, zoco ndya vatyí ta ña cutuñi iñi ñu sa siñi ñu.”

⁹Ta i cahan tucu ra David ziqui cuhva cuan, ta catyí ra:

Cua cuzi iñi ñu sihin sa vaha sa sasi ñu ta tandíhi ndaha tyiño vaha ñu.

Zoco yucuan cuu sa cua zandoyo ñuhu sii ñu.

Ta sa cuenda cuhva cuan ta cua ndoho ñu.

¹⁰Tañi cua nducuaa ñu ta ma ndyehe ñu vatyí ma coto ñu sa ndisa.

Ta tandíhi cuii quiví cua ndyehe ñu tundoho.

Cuhva cacu ñiyiví sa yiví ñiyiví hebreo cuu

¹¹¿Atu i catyíhi saha ñiyiví vatyí ndaha nduva cuii ñu? Yiví. Zoco i zavaha ñu sa ña vaha (sa ñá sino iñi ñu sii ra i zaquisi ra Ndyoo), ta tacuan ta i saha maa ra Ndyoo sa cacu aña inga ñiyiví sa yiví ñiyiví hebreo cuu. Ta tacuan ta cua cuxaan ñiyiví hebreo vatyí cua sino iñi inga ñiyiví. Ta sihin cuhva cuan ta cua cuñi tucu ñiyiví hebreo sa cacu ñu.

¹²Ñá tiin cuenda ñiyiví hebreo cuhva i saha maa ra Ndyoo, zoco cuhva cuan i quita vaha si sa cuenda inga ñiyiví vatyí cuu sino iñi ñu. Ta ndya vatyí zuhva cuii ñi ñiyiví hebreo cua cacu vatyí i tyaa siyo ñu cuhva i saha maa ra Ndyoo, ta i saha ra sii si sii inga ñiyiví.

Ta cuaha xaan ñu i sino iñi. Zoco quiví cua quihvi tucu ñiyiví hebreo cuenda ra Ndyoo sa ndisa, yucuan quiví vaha xaan ta tyaqui xaan cua cuu.

¹³Ta ndoho sa yiví ñiyiví hebreo cuu, sihin maa ndo quehin. Yuhvi cui minoo ra i tava ra Jesús tyiño sa cuhin nu iyo ñiyiví sa yiví ñiyiví hebreo cuu. Ta site vatyí ñiñi xaan cuu tyiño i saha maa ra Ndyoo sii.

¹⁴Ta zacote Tuhun Ndyoo sii ndo vatyí cuñi vatyí cua ndyehe ñiyiví hebreo cuhva sino iñi maa ndo ta cua cuñi tucu maa ñu zavaha ñu cuhva cuan. Ta tacuan ta cua cacu ñu.

¹⁵Sa cuenda sa i tyaa siyo ra Ndyoo sii ñiyiví hebreo ta i tiin cuenda ra sii inga ñiyiví ndya vaha ñi. Ta quiví cua natiin cuenda tucu ra sii ñiyiví hebreo ta cua cuu si tañi cua nandoto tucu ñu sisi sa i sihi ñu.

¹⁶Tatu siin yusa sa quita nuu sa cuaha cuan ta cuenda ra Ndyoo cuu si, cuenda ra Ndyoo cua cuu tandíhi ca si sa cuaha ca cuan. A tatu minoo yoho yutu cuan cuu cuenda ra Ndyoo, cuenda ra cua cuu tucu tandíhi yutu cuan.

¹⁷Zoco tatu i tahnu zuhva zoco yutu olivos, ta maa ndo i ndíhvi yucuan, vazu zoco yutu olivos ndya vaha ñi cuu ndo sa iyo sisi cuhu,

zoco cua ñihi tucu ndo tundyee iñi sihin sa vaha sa iyo sii yoho yutu olivos vaha cuan.

¹⁸Ma zacahnu ndo sii ndo ta catyi ndo vatyí vaha xaan ca maa ndo ta ziquí zoco tu sa i quita. Nacohon iñi ndo vatyí yoho yutu cuan cuu sa tyindyee sii tu ta ma nduva tu, ta yívi ndoho sa cuu zoco tu.

¹⁹Cua catyi ndo: “I tahnú zuhva zoco tu vatyí tacuan ta cuu ndíhvi nduhvi”, catyi ndo.

²⁰Ndisa vatyí i tahnú zuhva zoco tu cuan vatyí ña sino iñi ñiyívi cuan tuhun sa cuenda maa ra Jesús. Ta maa ndo i ndíhvi ndo vatyí i sino iñi ndo. Ma zacahnu ndo sii ndo. Vaha ca zacuenda ndo sii ndo coto tava ra Ndyoo sii ndo.

²¹Vatyí ñá cundahvi iñi maa ra Ndyoo sii zoco yutu sa i sindyaa nu yutu cuan. Tacuan tucu maa ndo, zacuenda ndo sii ndo coto ma cundahvi tucu iñi ra sii ndo.

²²Coto ndo vatyí vaha xaan añima maa ra Ndyoo ta xaan xaan tucu ra, nduu cuhva. Sii ñiyívi ña tyaa yahvi sii ra, cuxaan ra. Zoco sihin ndoho, vaha xaan ra tatu ndoo ndo sihin ra. Zoco tatu ma ndoo ndo cua tyaa siyo tucu ra sii ndo.

²³Ta ñiyívi hebreo tatu nasino iñi ñu, cua nanduu tucu ñu zoco yutu vaha cuan vatyí iyo cuhva sii maa ra Ndyoo, ta cuu zananduu tucu ra sii ñu.

²⁴Vatyí tatu i sahndya ra Ndyoo sii ndo sii minoo yutu olivos ndya vaha ñi sa iyo sisi huhu ta tyíhi ra sii ndo nuu minoo yutu olivos vaha, ñiñi xaan ca cuñi si sa nandíhvi zuun ñi zoco vaha maa tu.

Nu ndíhi tuhun cua cacu ñiyívi hebreo

²⁵Ta ndoho yañi xaa, ña cuñi sa ma cutuñi iñi ndo tuhun xehe ya coto caca iñi ndo vatyí ñiñi xaan ca maa ndo. Cuñi sa coto ndo vatyí i nduñihi iñi ñiyívi hebreo zuhva quívi vatyí tacuan ta cuu sino iñi tandíhi inga ñiyívi sa cuñi maa ra Ndyoo.

²⁶Ta ziquí cua cacu tandíhi ñiyívi hebreo tañi catyi si nuu tutu ra Ndyoo:

Minoo ra sa cua zacacu cua quisi sa cuenda ñiyívi hebreo, ta minoo ra hebreo cua cuu tucu ra.

Cua tyaa siyo ra cuatyí sa iyo añima ñiyívi ra Jacob.

²⁷Ta ihya cuu tuhun sa sehi sii ñu vatyí ndisa cua tyaa siye cuatyí sa iyo añima ñu, catyi si.

²⁸Cuxaan ñiyívi hebreo sihin ra Ndyoo sa cuenda tuhun vaha cuenda ra Cristo. Ta tacuan ta cuu sino iñi maa ndo. Zoco maa ñu cuan cuu ñu i casi ra Ndyoo ndya ta sa naha, ta cuñi xaan ra sii ñu vatyí i sino iñi ñiyívi sahnu sii ñu sii ra.

²⁹Ta ma cuu zama ra Ndyoo cuhva tatu sa i casi ra sii ñiyívi ta cuhva saha maa ra sa vaha sii ñu.

³⁰Ñá tyaa maa ndo yahvi sii ra Ndyoo ta sa naha, zoco vityí cundahvi iñi ra sii ndo vatyí ñá i tyaa ñiyívi hebreo yahvi sii ra.

³¹Ta tacuan tucu, ña tyaa ñiyívi hebreo yahvi sii ra ndya vityí. Ta sa cuenda sa vatyí cundahvi iñi ra Ndyoo sii maa ndo ta cua cundahvi tucu iñi ra sii ñu ityi nuu ca.

³²Vatyi saha maa ra Ndyoo sa ma tyaa tandihi cuii ñiyivi yahvi sii ra vatyi tacuan ta cuu cundahvi iñi ra sii tandihi cuii yo.

³³Cuaha xaan cuaha xaan sa siñi tuñi maa ra Ndyoo, ta sito ra tandihi cuii. Ma cuu cutuñi iñi maa yo cuhva sica iñi ra ta cuhva zavaha ra. Maa ra cuu ra zacuu tandihi.

³⁴Catyi Tuhun ra Ndyoo: “Yoñi sa sito cuhva sica iñi maa ra ndyaca ñaha sii yo, ta yoñi sa cuu cuhva sa siñi tuñi vaha sii maa ra.

³⁵Yoñi sa cuu cuhva sa vaha sii ra Ndyoo ta ziqui tyiyahvi ra Ndyoo sii ra.”

³⁶Vatyi ndya nu ndyaa maa ra i quita tandihi sa iyo. Maa ra i zavaha sii si. Ta zavaha ra vatyi cua cacu tandihi cuii tyiño sihin minoo cuhva sa cua zacahnu si sii maa ra. Nazacahnu yo sii ra tandihi cuii tyiemvu. Ta nacuu si tacuan.

**Cuhva vaha cua coo yo
vityi sa sino iñi yo**

12 Yucuan cuenda zañiñi sii ndo, ndoho yañi xaa, vatyi nacuhva ndo sii ndo sii ra Ndyoo vatyi cundahvi iñi ra sii ndo. Nacuhva ndo sii ndo sii ra ta nduvaha ndo cuhva cuñi ra vatyi yucuan cuu cuhva cuñi si sa zacahnu ndo sii ra.

²Ta ma coo ca ndo cuhva iyo ñiyivi ñuu ñiyivi ya. Zama ndo cuhva sica iñi ndo. Ta tacuan ta cua coto ndo cuhva cuñi maa ra Ndyoo sihin ndo. Cua coto tucu ndo vatyi cuhva tahan iñi maa ra Ndyoo, maa ñi maa sa vaha cuu, ta ndoo xaan si, ta ñahñi cumañi si.

³I casi ra Ndyoo sii, ta i saha ra tyiño sii. Yucuan cuenda catyi sihin tandihi ndo vatyi ma caca iñi ndo vatyi sito xaan ndo. Zoco caca iñi ndo minoo cuhva vaha sihin minoo sa siñi tuñi vaha cuhva saha ra Ndyoo sa zatyiño ndo tyiño ra. Sii sa minoo minoo ndo saha ra sa ziin ziin cuhva zatyiño ndo tyiño ra. Iyo ndo cuu zavaha ndo tyiño ra minoo cuhva. Ta iyo ndo zavaha ndo sii si inga cuhva.

⁴Tañi minoo coño ñuhu yo, cuaha xaan nu ndyaa tahan si, zoco ziin ziin cuhva zatyiño si. Ta ña inuu ñi tyiño zavaha sa minoo minoo si vazu minoo ñi coño ñuhu cuu si.

⁵Ta tacuan tucu maa yo, cuaha ñiyivi cuu yo, zoco sa tandihi yo ta iin ñi cuu yo sihin ra Cristo. Ta sa ndu-iin yo sihin minoo ta inga.

⁶Saha maa ra Ndyoo ndatu sii sa minoo minoo yo sa zatyiño yo tyiño ra ziin ziin cuhva. Yucuan cuenda nazatyiño yo sihin cuhva sa saha maa ra sii yo. Tatu saha maa ra Ndyoo cuhva sii minoo yo ta cuu cahan yo tuhun saha ra Ndyoo sii yo, nacahan yo sihin sa ñi iñi yo. Yucuan cuu sa cuu profecía.

⁷Ta tatu inga yo cuu tyindyee yo sii inga hermano, natyindyee vaha yo. A ra zacuahá, nazacuahá vaha ra.

⁸A ra cuu cuhva minoo tuhun vaha sii inga ñiyivi, nacuhva vaha ra tuhun sii ñu. A ra saha xuhun, nacuhva ra cuaha. A ra ndyaca ñaha sii inga hermano, nacundyaca ñaha vaha ra. Ta ra cundahvi iñi sii inga ñiyivi, natyindyee ra sii ñu sihin sa zii cuñi ra.

**Cuhva cuñi si zavaha yo tatu
cuenda ra Cristo cuu yo**

⁹Cuhva cuñi ndo sii inga ñiyivi, nacuu si minoo sa ndisa cuii, ta ma

zandavi ñaha ndo. Cuñi si vatyi zaña ndo tandihi cuii sa ña vaha, ta zavaha xaan ndo sa vaha.

¹⁰Cuñi ndo sii minoo ndo ta sii inga ndo tañi yañi ndo. Ta tyaa ndo yahvi tandihi tuhun sa cahan tandihi hermano.

¹¹Ma cuzusa ndo. Zatyño xaan ndo tyiño ra Ndyoo.

¹²Cuzii iñi ndo vatyi sito ndo vatyi cua cundyaa ndo sihin ra Ndyoo ityi nuu ca. Cundyeer iñi ndo tatu ndyehe ndo tundoho, ta cahan ndo sihin ra Ndyoo tandihi cuii cuhva.

¹³Tyindyee ndo sii inga ra yañi yo ñaa sa cumañi sii ra, ta tiin cuenda vaha ndo sii ñiyivi saa vehe ndo.

¹⁴Caca tahvi ndo sii Ndyoo sa cuenda ñiyivi sañi tahan sihin ndo. Cahan vaha ndo sihin ñu, ta ma cahan ndo ndya vaha ñi sii ñu.

¹⁵Cuzii iñi ndo sihin ñiyivi zii cuñi, ta vacu ndo sihin ñiyivi cuihya iñi vatyi tacuan ta cua ndu-ñin ndo.

¹⁶Ta naco sa taxi ñi sihin minoo ndo ta sihin inga ndo. Ma zacahnu ndo sii ndo, ta ma caca iñi ndo vatyi ñiñi xaan ndo. Co vaha ndo sihin ñiyivi ndahvi vazu ñahñi sa iyo sii ra. Ta ma caca iñi ndo vatyi sito xaan ndo.

¹⁷Tatu zavaha ñiyivi sa ña vaha sihin ndo, ma zavaha tucu maa ndo sa ña vaha sihin ñu. Zavaha ndo tandihi sa cuu sa vaha sa ndisa, ta cuhva cuan yoñi cuu tyaa cuatyí sata ndo.

¹⁸Nducu ndo cuhva coo sa taxi ñi sii ndo sihin tandihi cuii ñiyivi tatu cuu.

¹⁹Cuñi xein sii ndo, ndoho yañi xaa. Tatu zavaha ñiyivi sa ña vaha sihin ndo ma zavaha tucu ndo sa ña vaha sihin ñu. Nacuxaan maa ra Ndyoo sihin ñu tañi catyi si nuu tutu ra: “Yuhvi cui ra cua tasi tuñi sii ñu. Yuhvi cua tyiyahvi”, catyi ra Ndyoo.

²⁰Zoco tatu sizoco minoo ra cuxaan sii ndo, cuhva ndo sa casi ra. Tatu ityi ra, cuhva ndo ndutya coho ra vatyi tacuan ta cua cucahan nuu ra ta cua ndundahvi cuñi ra vatyi zavaha ra sa ña vaha sihin ndo.

²¹Ma zavaha tucu maa ndo sa ña vaha vatyi zavaha ñiyivi sa ña vaha sihin ndo coto cundyaca ñaha sa ña vaha cuan sii ndo. Maa ndo zavaha ndo sa vaha, ta cua zahacanaa ndo sii sa ña vaha cuan.

13 Natyaa tandihi ñiyivi yahvi sii ra cu tyiño vatyi maa ra Ndyoo cuu ra saha tyiño sii ra, ta yucuan cuenda ndyizo ra tyiño.

²Tatu ma tyaa minoo ñiyivi yahvi sii ra cu tyiño, ña tyaa ra yahvi sii Ndyoo. Ta cua tasi tuñi ra Ndyoo ta ra cu tyiño sii ra cuan.

³Ña zayuhu ra cu tyiño sii ñiyivi zavaha sa vaha. Zayuhu ra sii ñiyivi zavaha sa ña vaha. Tatu yuhu ndo sii ra cu tyiño, cuñi si sa zavaha ndo sa vaha. Ta cua catyi ra vatyi vaha ñiyivi cuu ndo.

⁴Zatyño ra cu tyiño sa cuenda ra Ndyoo, ta tacuan ta cuu coo vaha ndo. Zoco tatu cua zavaha ndo sa ña vaha cua yuhu ndo vatyi ndisa cuii cua tasi tuñi ra sii ndo. Zatyño ra sa cuenda ra Ndyoo, ta yucuan cuenda cua tasi tuñi ra sii ñiyivi zavaha sa ña vaha.

⁵Yucuan cuenda cuñi si sa tyaa ndo yahvi sii ra sa xihna ñi vatyi yuhu ndo sii ra Ndyoo ta sa cu uu vatyi cuhva cuan catyi sa siñi tuñi vaha sii ndo.

⁶Tiyahvi tucu ndo xuhun tatu catyi ra, vatyi zatyño ra cu tyiño sa cuenda ra Ndyoo. Yucuan cuu tyiño ra.

⁷Tiyahvi ndo sii tandihi ra, tandihi sa tahan si sii ra. Tiyahvi ndo xuhun sa cuenda zicuela. Tiyahvi ndo xuhun ñuhu sii ra zatyahvi sii ndo. Tyaa ndo yahvi sii ra tahan si tyaa ndo yahvi. Ta zacahnu ndo sii ra sa tahan si zacahnu ndo.

⁸Ma cutavi ndo sii numinoo ñiyivi, zoco cuñi ndo sii minoo ndo ta sii inga ndo. Yoo ra cuñi sii inga ñiyivi sa ndisa cuii, sa zavaha ra tandihi sa catyi tuhun i saha ra Ndyoo sii ra Moisés.

⁹Vatyi ihya cuu cuhva catyi Tuhun Ndyoo: “Ma cuzu ndo sihin minoo ñaha tatu yivi ñazihí ndo cuu. Ma cahñi ndo ñiyivi. Ma zuhu ndo. Ma ndyiyó iñi ndo sa sii inga ñiyivi.” Tatu tyaa ndo yahvi sa ndisa cuii sii tuhun sa catyi vatyi cuñi ndo sii inga ñiyivi inuu ñi tañi cuñi ndo sii maa ndo, tatu ndisa cuii tyaa ndo yahvi sii si cuan, sa tyaa ndo yahvi sii tandihi cuii tuhun i saha ra Ndyoo.

¹⁰Tatu cuñun sii inga ñiyivi ñahñi sa ndya vaha ñi cua zavohon sihin ñu. Sihin sa cuñi yo sii ñu sa ndisa cuii ta sa zavaha yo tandihi sa catyi tuhun i saha ra Ndyoo.

¹¹Ta inga tucu tuhun catyi sihin ndo vatyi ma naa iñi ndo ñaa cuhva cuu si vityi. Sa tahan si cuhva

ndoyo ndo vatyi sa cuyatyi xaan ca quivi cua cacu yo vityi ta ziqui quivi i quisaha sino iñi yo.

¹²Sa cuñi ndihi quivi zavaha ñiyivi sa ña vaha, ta sa cua saa quivi cuzi iñi yo sihin ra Ndyoo. Nazaña yo sa ña vaha sa zavaha yo, ta nazavaha yo tandihi sa vaha tañi zavaha ñiyivi nu ndisi.

¹³Nazavaha yo sa vaha sa ndisa tañi zavaha ñiyivi ora. Ma zacahnu xaan yo vico ta coho yo ndixi. Ma zavaha yo sa quiñi sihin yoo ñi maa ñaha. Ta ma nducu yo tizihí, ta ma ndyiyó iñi yo sa sii inga ñiyivi.

¹⁴Zavaha ndo cuhva i zavaha ra Jesucristo, ra ndyaca ñaha sii yo. Ta ma nducu ndo cuhva zavaha ndo ñaa ñi sa ndisi xiñi maa ndo, tandihi sa ña vaha.

Ma cahan cuehe ndo sii minoo hermano

14 Tiin cuenda vaha ndo sii tandihi hermano vazu iyo ra ta sino vaha ca iñi ra. Zoco ma natuhun xaan ndo sihin ra sa cuenda cuhva sica iñi ra tatu yivi sa ñiñi xaan cuu si.

²Vatyi iyo ra ñi xaan iñi ra, ta catyi ra vatyi cuu casi ra tandihi. Zoco inga ra, tañaha ca sino vaha iñi ra, ta sasi ra maa maa yucu ñi.

³Ra sasi tandihi, ña vaha cua catyi ra vatyi ñahñi maa sa sito inga ra sa ma casi cuan. Ta ra sa ma casi cuan, ña vaha cua catyi maa ra vatyi ña vaha ra sa tuhva sasi tandihi vatyi zuun ñi maa ra Ndyoo i tiin cuenda sii ra cuan.

⁴Ñahñi cuhva iyo suun sa catyun vatyi ña vaha cuhva zavaha inga ra. Maa ra Ndyoo cuu ra ndyaca ñaha

sii ra cuan, ta cua catyi maa ra tatu vaha a ña vaha sa zavaha muzu ra. Ta cua tyindyee ra Ndyoo sii ra, ta cua cuu zavaha ra sa vaha.

⁵Iyo yo sica iñi yo vatyí ñiñi ca minoo quivi ta ziqui inga. Ta inga yo sica iñi yo vatyí inuu ñi cuu tandihi quivi. Nacaca iñi minoo minoo yo cuhva cuñi yo, ta ma ndu-uu iñi yo.

⁶Ra zacahnu minoo quivi, zacahnu ra sii si sa cuenda ra Ndyoo. Ta ra tuhva sasi tandihi, zavaha ra tacuan sa cuenda ra Ndyoo vatyí saha ra tyahvi ndyoo sii ra. Ta ra sa ma casi tandihi, sa cuenda ra Ndyoo ta ma casi ra vatyí sica iñi ra vatyí ña vaha, ta saha ra tyahvi ndyoo sii ra Ndyoo.

⁷Yoñi yo ta ndito yo vatyí cuñi yo. Ta yoñi yo cuu quivi cuñi maa yo.

⁸Tatu ndito yo, ndito yo sa cuenda maa ra Jesús. A tatu cuu yo, cua cuu yo vatyí maa ra catyi, vatyí maa ra ndyaca ñaha sii yo. Vazu ndito yo a vazu cuu yo, zoco cuenda ra Jesús iyo yo

⁹vatyí yucuan cuenda i sihi ra Cristo, ta i nandoto tucu ra vatyí cua cuu ra ra ndyaca ñaha sii ñiyivi sa sihi ta sii ñiyivi ndito.

¹⁰Ta yoho ñaa cuenda catyun vatyí ña vaha cuhva zavaha inga hermano? Ña vaha cua catyi ndo vatyí ña vaha ra vatyí maa ra Ndyoo cuu ra cua tasi tuñi sii sa minoo minoo yo.

¹¹Vatyí catyi Tuhun ra Ndyoo:
Sa ndisa cuii cuu si vatyí ndite.
Ta zuun ñi sa ndisa cuu si vatyí
cua cuiñi siti tandihi cuii
ñiyivi nui.
Ta cua zacahnu tandihi ñu sii
sihin yuhu ñu.

¹²Tacuan ta tandihi yo cua catyi yo sihin ra tandihi sa i zavaha yo.

Ma zandoyo ñuhu ndo sii inga hermano

¹³Yucuan cuenda ma catyi ca yo vatyí ña vaha sa zavaha inga hermano ñaa ñi maa cuhva sa ndyico ra. Zoco nananducu yo cuhva ta ñahñi cua zavaha maa yo sa cua zandoyo ñuhu si sii minoo yañi yo.

¹⁴Iyo minoo cuhva i zañaha ra Jesús sii, ta yucuan cuenda site vatyí ñahñi sa ma cuu casi yo. Zoco tatu iyo minoo hermano ta sica iñi ra vatyí iyo minoo sa ma cuu casi yo tatu tyaa yo yahvi sii ra Ndyoo, sa cuenda maa ra cuan ta ña vaha tatu casi ra.

¹⁵Vatyí tatu sa cuenda sa tuhva yo sasi ta zativi yo sii minoo hermano, ña iyo ca yo cuhva cuñi ra Ndyoo cuhva cuan. Ta ña cuñi yo sii yañi yo tatu zavaha yo minoo cuhva ta sica iñi ra vatyí ña vaha si ta cuu zativi si sii ra.

¹⁶Vazu yivi cuatyí cuu minoo cuhva sa zavaha yo, zoco tatu cahan ñiyivi sa cuenda si, vaha ca ma zavaha yo sii si.

¹⁷Vatyí tatu ndyaca ñaha ra Ndyoo sii yo, ña ñiñi xaan ñaa sa casi yo a ma casi yo a sa coho yo a sa ma coho yo. Zoco ñiñi xaan cuu yo ñiyivi vaha xaan ta coo sa taxi sii yo sihin ra Ndyoo ta sihin ñiyivi ta coo sa zii sii yo sa cuenda Tatyí li sa iyo sihin yo.

¹⁸Tatu tacuan iyo yo ta zatyíño yo sa cuenda ra Cristo, zii cua cuñi ra Ndyoo ndyehe ra sii yo ta zii cua cuñi tucu ñiyivi.

¹⁹Yucuan cuenda nanducu yo cuhva coo sa taxi sii yo sihin ñiyivi tandihi saha, ta natyindyee yo sii tahan yo, ta ziqui cua cuu ca zacuu tandihi yo cuhva cuñi ra Ndyoo.

²⁰Ma zativi ndo tyiño ra Ndyoo sa cuenda sa sasi ndo. Ndisa vatyí ñahñi sa ica, ta cuu casi yo tandihi, zoco ña vaha tatu casi yo tatu cua zandoyo ñuhu si sii minoo hermano.

²¹Vaha ca sa ma casi yo coño ta ma coho yo ndixi ta ma zavaha yo ñaa ca sa cuu si tatu zandoyo ñuhu si sii minoo yañi yo ta ma sino vaha ca iñi ra.

²²Tatu sica iñun vatyí cuu casun tandihi, vaha. Zoco ma cohon tuhun cuan sihin inga hermano sa sica iñi inga cuhva. Cohon maa ñi sihin ra Ndyoo sa cuenda si. Ziñi xaan cua cuñi yo tatu sito yo vatyí ñahñi sa ña vaha zavaha yo.

²³Zoco tatu ndu-uu iñi yo ta ña sito yo tatu vaha a ña vaha tatu casi yo, zativi si sii yo sa tacuan vatyí ña ñi iñi yo ta sasi yo. Ta ñaa ñi maa sa zavaha yo ta ña sito yo tatu vaha a ña vaha si, cuatyí cuu si.

Nazavaha yo ñaa sa cua tahan iñi inga hermano

15 Maa yo sa sino vaha iñi, cuñi si sa cundyee iñi yo sihin inga hermano tatu tañaha ca sino vaha iñi ra. Ta ma zavaha yo maa ñi cuhva cuñi maa yo.

²Nanducu yo cuhva zavaha yo sa cua tahan iñi inga hermano, ñaa sa cua tyindyee sii ra ta cuu ra ñiyivi vaha ta sino vaha iñi ra sii ra Ndyoo.

³Vatyí ndya ra Cristo, ta ñá zavaha ra sa cuñi maa ra. I zavaha ra cuhva cuñi ra Ndyoo. Ta i ndyehe xaan ra tundoho tañi catyí si nuu tutu ra Ndyoo: “Cahan ñiyivi ndya vaha ñi suun, ta tañi sii mi cahan ñu cuu si”, catyí si.

⁴Ta tandihi sa i tyaa ra tyaa Tuhun Ndyoo ta sa naha, i sicundyaa si vatyí cua zacuahá si sii yo ta cua sino xaan iñi yo ta coo tundyee iñi sii yo. Ta ziñi cua cuñi yo vatyí cua cahvi yo sii si ta coto yo vatyí cua cuhva ra Ndyoo sa vaha sii yo sa ndisa.

⁵Saha maa ra Ndyoo tundyee iñi sii yo ta minoo cuhva sa ma nducuihya xaan iñi yo. Sino iñi tandihi ndo vatyí ra Jesús cuu ra ndyaca ñaha sii ndo, yucuan cuenda nacuhva maa ra Ndyoo cuhva sii ndo sa coo sa taxi sihin minoo ndo ta inga ndo, ta cua ndu-iin ndo sa ndisa cuii.

⁶Vatyí tacuan ta iin ñi cuhva cua caca iñi ndo, ta iin ñi tañi minoo ñi nduzu cua zacahnu ndo sii ra Ndyoo Zutu ra Cristo Jesús, ra ndyaca ñaha sii yo.

Cua cuiñi ñiyivi sa yivi ñiyivi hebreo cuu Tuhun Ndyoo

⁷Tiñ cuenda vaha ndo sii minoo ndo ta sii inga ndo tañi i tiñ cuenda ra Cristo sii ndo vatyí cuhva cuan zacahnu si sii ra Ndyoo.

⁸Ta catyí sihin ndo vatyí ra Cristo cuu ra tyindyee sii ñiyivi hebreo, ta cuhva cuan zañaha ra vatyí ndisa cuii maa ra Ndyoo vatyí ra Cristo cuu ra i catyí ra Ndyoo sihin ñiyivi sahnu sii yo vatyí cua quisi ra.

⁹(Ta i quisi tyindyee tucu ra Cristo sii ñiyivi sa yivi ñiyivi hebreo cuu), ta tacuan ta cuu zacahnu tucu ñu cuan sii ra Ndyoo vaty i cundahvi iñi ra sii ñu tañi catyi si nuu tutu ra:

Yucuan cuenda cua zacahni suun nu iyo inga ñiyivi.

Cua cate yaa, ta zacahni zivun.

Catyi si.

¹⁰Ta inga tucu saha catyi ra:

Cuzii iñi ndo, ndoho sa yivi ñiyivi hebreo cuu.

Cuzii iñi ndo iin ñi sihin ñiyivi ra Ndyoo.

¹¹Ta iyo inga nu catyi si tyehen: Zacahnu ndo sii ra ndyaca ñaha sii yo, ndoho sa yivi ñiyivi hebreo cuu.

Ta nazacahnu tandihi ñiyivi sii ra.

¹²Ta iyo tucu nu cahan ra Isaías ta catyi ra:

Cua cacu minoo ñiyivi ra Isaí.

Cua quisi ra vaty cua cundyaca ñaha ra sii ñiyivi sa yivi ñiyivi hebreo cuu.

Ta sa cuenda maa ra ta cua coo cuhva cacu ñu.

¹³Tyindyee maa ra Ndyoo sii yo, ta sito yo vaty sa ndisa cua cuhva ra sa vaha sii yo. Sihin cuhva saha maa Taty Ii sii ndo ta cua sino xaan iñi ndo sii ra. Ta vityi sa cuenda sa sino iñi ndo sii ra ta zii xaan cua cuñi ndo, ta cua coo sa taxi sii ndo sihin ra.

¹⁴Ta sito vehi sa cuenda maa ndo hermanos vaty vaha xaan ndo, ta sito ndo cuaha xaan, ta cuu cuhva ndo minoo sa siñi tuñi vaha sii minoo ndo ta sii inga ndo.

¹⁵Zoco vazu sa site cuhva cuan zoco zuun ñi i tyei zuhva tuhun ya,

ta ñihi xaan i quehin sihin ndo, ta zanacohin iñi ndo inga saha zuun ñi cuhva sa i nacaty sihin ndo. Vaty maa ra Ndyoo i saha tyiño sii, sa zatyine tyiño maa ra.

¹⁶Ta i ndui minoo ra zatyino sa cuenda ra Jesucristo nu iyo ñiyivi sa yivi ñiyivi hebreo cuu. Nacaty xein Tuhun ra Ndyoo vaty zacahnu si sii ra cuhva cuan. Ta cua sino iñi ñu cuan, ta cua cuu cuhve sii ñu sii ra Ndyoo. Ta cua tiin cuenda ra sii ñu vaty sa zanduvaha Taty Ii sii ñu.

¹⁷Tyindyee xaan ra Cristo Jesús sii, ta yucuan cuenda cuu catyi vaty vaha xaan cuu tyiño i zavehi sa cuenda ra Ndyoo.

¹⁸Ma cuu catyi inga cuhva vaty maa ra Cristo i sityiño sii, ta sa cuenda maa ra ta ñihi cuhva ta i sino iñi ñiyivi sa yivi ñiyivi hebreo cuu. I siñi ñu tuhun quehin, ta i ndyehe ñu cuhva zavehi

¹⁹vatyi i zavehi sa ndyityi ta cuaha xaan cuhva sihin tundyee iñi sa saha maa Taty Ii maa ra. Ta ndya cuhva ndya ñuu Jerusalén ta ndya ñuu Ilírico i zacoto vehi tandihi Tuhun Vaha sa cuenda ra Cristo.

²⁰Ta i nducu xein cuhva zacote Tuhun Vaha nu ña sito ñiyivi sii ra Cristo vaty ña cuñi zatyine nu i quisaha inga ra sa xihna ñi.

²¹Vaty catyi si nuu tutu ra Ndyoo: Cua coto ñiyivi, ñu tañaha ca coto, sa cuenda ra. Ta ñiyivi tañaha ca cuiñi, cua cutuñi iñi ñu, catyi si.

Cuñi ra Pablo cuhun ra ñuu Roma

²²Yucuan cuenda ña cuu quisi nu yucu ndo.

²³Zoco vityi sa ndihi zatyĩne ityi ya, ta cuñi xein quisi ndyehi sii ndo. Sa cuaha cuiya cuñi quisi nu yucu ndo.

²⁴Yucuan cuenda sica iñi vatyí cua ndyehi sii ndo quiví cua cuhin ñuu España. Cua ndoi sihin ndo zuhva quiví, ta ziquí cua cuu tyindyee ndo sii zuhva, ta cua cuu cuhin ityi nuu ca.

²⁵Zoco vityi cuahan xihne ñuu Jerusalén vatyí cua tyindyeyi sii ñiyiví sino iñi Tuhun Ndyoo yucuan.

²⁶Vatyí i saha maa ñiyiví ñuu Macedonia ta ñuu Acaya xuhun sa tyindyee sii ñu ndahvi sino iñi sii ra Jesús ñuu Jerusalén.

²⁷Vaha xaan sa cuñi ñu tyindyee ñu, ta cuhva cuan cuñi si, vatyí sa xihna ñi i tyindyee ñiyiví hebreo sii ñu cuan sihin sa zacoto maa ra Ndyoo sii ñu, ta i sito ñu yozo caa iyo ra Ndyoo.

²⁸Yucuan cuenda xihna ca cundyaque xuhun sa tyindyee ñiyiví sii ñu ñuu Jerusalén. Ta ziquí cua yehi nu yucu ndo ityi cuhin ñuu España.

²⁹Ta sa site vatyí cua cuhva xaan ra Cristo sa vaha sii ta sii maa ndo quiví cua sei nu yucu ndo.

³⁰Cuñi xaan ndo sii ra Jesucristo, ndoho yañi xaa. Ta saha xaan Tatyí Ií cuhva sii ndo sa cuñi ndo sii inga ñiyiví sino iñi. Yucuan cuenda vityí zañiñi sii ndo vatyí cahan xaan ndo sihin ra Ndyoo sa cuenda mi.

³¹Caca ndo sii ra vatyí cua zacacu ra sii, sii ñiyiví ña tyaa yahvi sii ra ityi Judea. Ta caca ndo sii ra vatyí cua cuzi iñi ñiyiví ñuu Jerusalén sihin sa cua cuhve sii ñu.

³²Ta caca ndo sii ra Ndyoo vatyí cua cuu quisi sihin sa zii cuñi nu

ndyaa ndo tatu tacuan cuñi maa ra Ndyoo. Ta caca ndo sii ra vatyí cua cuu quitati zuhva nu ndyaa ndo ta cua coo ca tundyee iñi sii sa cuenda Tuhun Ndyoo ta sa cuenda coño ñuhi.

³³Ta vityí, Ndyoo cua ndoo xaan sihin ndo. Ta nacuhva xaan ra sa coo sa taxi sii ndo sihin ra ta sa coo vaha ndo tandihí cuhva. Ta nacuu si tacuan.

Zacuhun ra Pablo minoo nacumi sii amigo ra

16 Zacote sii ndo sa cuenda ña hermana Febe ya. Tyindyee xaan ña sii ñiyiví sino iñi Tuhun Ndyoo ñuu Cencrea.

²Ta catyí sihin ndo vatyí tiin cuenda vaha ndo sii ña vatyí iin ñi cuu ña sihin ndo sa cuenda ra Cristo, ra ndyaca ñaha sii yo. Tiin cuenda vaha ndo sii ña minoo cuhva vaha tañi tahan si zavaha ñiyiví ra Ndyoo. Ta tyindyee ndo sii ña ñaa sa cumañi sii ña vatyí i tyindyee maa ña sii cuaha xaan ñiyiví. Ta sii tucu mi i tyindyee ña, ndihí ca.

³Cuhva ndo minoo nacumi sii ña Priscila ta ra Aquila. Iin ñi zatyíño ñu tyíño ra Cristo sihin.

⁴Sa vatyí cuu ñu minoo saha nu i zacacu ñu sii. Saha xein tyahvi ndyoo sii ñu, ta tacuan tucu zavaha tandihí ñiyiví sino iñi. Ñiyiví sa yiví ñiyiví hebreo cuu, saha xaan ñu tyahvi ndyoo sii ñu.

⁵Sa cuenda mi cuhva tucu ndo minoo nacumi sii ñiyiví sino iñi tuhun vaha, ñu titahan vehe ña Priscila. Ta sii ra sa nañi Epeneto. Ñoho xaan iñi sii ra. Maa ra cuu ra

sino iñi sii ra Cristo sa xihna ñi ityi Asia.

⁶Cuhva ndo minoo nacumi sii ña María. I zatyíño xaan ña sa cuenda ndo.

⁷Cuhva ndo minoo nacumi sii ra Andrónico ta ra Junias. ñin ñi ñuu ra sihin ñuu mi. Ta i siño ho tucu ra vehe caa sihin. Ta xihna ca nduu tahan maa ra i sino iñi ta ziqui mi. I zacuhun ra Jesucristo sii nduu tahan ra sihin tyiño ra. Ta tyaa xaan ñiyivi yahvi sii ra.

⁸Cuhva ndo minoo nacumi sii ra Amplias. Ñoho xaan iñi sii ra sa cuenda ra Cristo.

⁹Cuhva ndo minoo nacumi sii ra Estaquis. Ñoho xaan iñi sii ra. Ta tacuan tucu ra Urbano. I zatyíño xaan ra sihin ndi sa cuenda ra Cristo.

¹⁰Cuhva ndo minoo nacumi sii ra Apeles. Sino xaan iñi ra sii ra Cristo vazu ndyehe ra tundoho. Cuhva ndo minoo nacumi sii ñiyivi ra Aristóbulo.

¹¹Cuhva ndo minoo nacumi sii ra Herodión. ñin ñi ñuu ndi. Cuhva ndo minoo nacumi sii ñiyivi sino iñi vehe ra Narciso.

¹²Cuhva ndo minoo nacumi sii ña Trifena ta ña Trifosa. Zatyíño ñu tyiño ra Cristo, ra ndyaca ñaha sii yo. Ta cuhva ndo minoo nacumi sii ña Pérsida, ña cuhva yo. Ñihi xaan i zatyíño ña tyiño ra Ndyoo.

¹³Cuhva ndo minoo nacumi sii ra Rufo ta sii zihí ra. Vaha xaan sino iñi ra sii ra Jesús. Ta zihí ra cuu tañi zihí mi.

¹⁴Cuhva ndo minoo nacumi sii ra Asíncrito, ra Flegonte, ra Hermas, ra Patrobas, ra Hermes, ta inga ra yañi yo sa yucu sihin ra.

¹⁵Cuhva ndo minoo nacumi sii ra Filólogo ta sii ña Julia ta sii ra Nereo sihin cuhva ra ta sii ra Olimpas ta sii tandihí inga ñiyivi sino iñi sa yucu sihin ñu.

¹⁶Cuhva xaan ndo ndyoo nacucumi sii minoo ndo ta sii inga ndo. Tandihí ñiyivi cuenda ra Cristo zaquisi ñu minoo nacumi sii ndo.

¹⁷Vityi zañiñi sii ndo yañi xaa vatyi zaha vaha ndo cuenda yoo cuu ñiyivi zacahñi tahan sii ñiyivi sino iñi. Zatyí ñu cuhva sino iñi ñiyivi sihin minoo cuhva ña tuhva maa ndo zavaha. Ma cutahan ndo sihin ñu zavaha tacuan, ta ma zavaha ndo cuhva catyi ñu

¹⁸vatyí ñu zavaha tacuan, ña zatyíño ñu tyiño ra Cristo ra ndyaca ñaha sii yo. Zatyíño ñu cuhva cuñi maa ñu. Vaha xaan ta vii xaan cahan ñu, ta zandavi ñaha ñu sii ñiyivi ña sito vaha.

¹⁹Sito tandihí ñiyivi vatyi tyaa xaan ndo yahvi Tuhun Ndyoo. Yucuan cuenda zii xaan cuñi sihin ndo, zoco cuñi sa cua zacuenda vaha ndo sii ndo ta zavaha ndo maa ñi sa vaha. Ta ma cutuhva ndo zavaha ndo sa ña vaha.

²⁰Ra Ndyoo cuu ra saha sa coo sa taxi sii ndo, ta ña naha ca ta cua zandihí ra sa ña vaha nu yucu ndo. Cua cuhva ra sa cuañi ndo ziqui cuihna. Ta vityi nacoo xaan sa vaha sa saha maa ra Jesucristo sii ndo. Maa ra ndyaca ñaha sii yo.

²¹Zaquisi ra Timoteo minoo nacumi sii ndo. Zatyíño ra sihin. Ta ra Lucio ta ra Jasón ta ra Sosípater zaquisi tucu ra minoo nacumi sii ndo. ñin ñi ñuu tandihí ra sihin ñuu mi.

²²Yuhvi ra Tercio tyei carta ya, ta zaquisi minoo nacumi sii ndo sa cuenda ra ndyaca ñaha sii yo.

²³Zaquisi maa ra Gayo minoo nacumi sii ndo. Saha noo ra vehe ra sii, ta ndu-iiñ tucu tandihi ñu sino iñi ihya. Zaquisi ra Erasto minoo nacumi sii ndo sihin ra Cuarto yañi yo. Ra Erasto cuu ra cumi xuhun ñuu ya.

²⁴Cuñi vatyí cua kuhva xaan ra Jesucristo, ra ndyaca ñaha sii yo, sa vaha sii tandihi ndo. Ta nacuu si tacuan.

**Zacahnu ra sii ra Ndyoo nu
ndihi tyaa ra carta ya**

²⁵Zacahnu ndo sii ra Ndyoo vatyí maa ra cuu ra cua kuhva tundyee iñi sii ndo, ta ma ndoyo ñuhu ndo sihin tuhun vaha sa

i zacote sii ndo sa cuenda ra Jesucristo. Ta i zacoto ra Ndyoo sii ndo tuhun vaha kuhva iyo ra. Ta sa naha ñá sito ñiyivi tuhun sa cuenda ra Cristo, zoco vityi sito ñu.

²⁶Vityi sito ñu tuhun sa cuenda ra Cristo. Saha ra Ndyoo tyiño sa cua coto tandihi ñiyivi ñuu ñiyivi, ta cua cutuñi iñi ñu sa i tyaa ra profeta ta sa naha. Maa ra Ndyoo tava tyiño ya, ta ndito ra tandihi cuii tyiemvu. Ta vityi sa cuenda sa sito ñiyivi, ta cuu sino iñi tandihi ñu, ta cuu tyaa ñu yahvi sii ra.

²⁷Maa ñi maa ra cuu Ndyoo. Maa ñi maa ra cuu ra iyo sa siñi tuñi sa ndisa. Nazacahnu yo sii ra sa cuenda sa i zavaha ra Jesucristo. Nazacahnu yo sii ra tandihi cuii tyiemvu. Ta nacuu si tacuan.

Sa Xihna Ñi Carta I Tyaa Ra San Pablo Sii Ñiyivi Sino Iñi Sii ra Ndyoo Ñuu Corinto

Tyaa ra Pablo minoo carta sii ñiyivi sino iñi sii ra Ndyoo ñuu Corinto

1 Yuhvi ra Pablo i casi ra Ndyoo sii vatyí cui minoo ra cua zatyíño tyíño ra Jesucristo. Ta vityi tyei carta ya sihin ra Sóstenes hermano yo.

²Ta zacuhun ndi sii si sii maa ndo ra cuu vehe ñuhu ra Ndyoo ñuu Corinto. Ñiyivi ra Ndyoo cuu sii ndo vityi vatyí sa ndu-íin ndo sihin ra Cristo Jesús. I casi ra Ndyoo sii ndo vatyí cuu ndo ñiyivi vaha xaan tañi tandíhi ñiyivi sa zacahnu sii ra Jesucristo nacahnu ñuu ñiyivi. Ndyaca ñaha ra sii tandíhi yo sa cuu cuenda ra.

³Sique sii ra Ndyoo Zutu yo ta sii ra Jesucristo ra ndyaca ñaha sii yo vatyí nacuhva xaan ra tumañi iñi sii ndo ta sa coo sa taxi añima ndo.

Cuhva i saha xaan ra Ndyoo sa vaha sii ñiyivi ra ñuu Corinto

⁴Tandíhi cuhva saha xein tyahvi ndyoo sii ra Ndyoo sa cuenda tandíhi ndo vatyí i saha xaan maa ra tumañi iñi sii ndo sa cuenda ra Cristo Jesús.

⁵Ta vityi i saha xaan ra cuhva sii ndo, ta cuu cahan ndo Tuhun ra, ta iyo xaan sa siñi tuñi sii ndo.

⁶Tandíhi sa i catyí ndi sihin ndo sa cuenda ra Cristo, ta i cuu si cuhva cuan sa cuenda maa ndo.

⁷Ta yucuan cuenda ñahñi sa cumañi sii ndo. Saha xaan maa ra Ndyoo tandíhi cuii ndatu sii ndo ñi ñi sa ndatu ndo quivi cua quisi tucu ra Jesucristo, ra ndyaca ñaha sii yo.

⁸Ta cua tyindyee ra sii ndo sihin tandíhi cuii cuhva, ta ma ndoyo ñuhu ndo, ta yoñi cua cuu tyaa cuatyí sata ndo quivi cua quisi ra Jesucristo.

⁹Zavaha ra Ndyoo cuhva catyí ra tandíhi saha. Ta maa ra cuu ra i casi sii ndo vatyí cu-íin ndo sihin ra Jesucristo zehe ra. Maa ra cuu ra ndyaca ñaha sii yo.

Ña vaha sa coo ziin ziin ityi yo

¹⁰Ta vityi sihin zivi ra Jesucristo, ra ndyaca ñaha sii yo, sica xein sii ndo hermano vatyí iin ñi cuu ndo, ta ma coo ziin ndo. Iin ñi cuhva caca iñi ndo. Iin ñi cuhva nacoo sa siñi tuñi sii ndo.

¹¹Tacuan catyi sihin ndo hermano vatyi sa i nacatyi ñiyivi ra Cloé sihin vatyi iyo tizihí nu yucu ndo

¹²vatyí ziiñ ziiñ cahan ndo. Iyo ndo catyi ndo: “Yuhvi ndyique sii ra Pablo”, catyi ndo. Ta inga ndo catyi ndo: “Ta yuhvi ndyique sii ra Apolos.” Ta iyo ndo catyi ndo: “Ndyique sii ra Pedro.” Ta inga tucu ndo catyi ndo vatyi ndyico ndisa cuii ndo sii ra Cristo.

¹³Ña vaha sa cahan ndo tacuan vatyi ma cuu sa coo ziiñ yo vatyi iin ñi coño ñuhu ra Cristo cuu yo tatu sino iñi yo sii ra. ¿Atu yuhvi ra Pablo i sihi nu cruz sa cuenda ndo? ¿Atu i sicoo ndutya ndo sihin zivi mi? Yivi.

¹⁴Sehi tyahvi ndyoo sii ra Ndyoo vatyi ñá zacoo ndutye sii numinoo ndo, maa ñi ra Crispo sihin ra Gayo ta yoñi inga ra

¹⁵coto catyi ndo vatyi i zacoo ndutye sii ndo sihin zivi mi ta cundyico ndo sii.

¹⁶Aan, ndisa i zacoo ndutye sii ñiyivi ra Estéfanos, zoco sica iñi vatyi yoñi ca inga ra i zacoo ndutye.

¹⁷Vatyí ñá zaquisi ra Cristo sii mi sa zacoo ndutye sii ñiyivi. I tava ra tyiño sii, vatyi nacatyi tuhun ra, cuhva zacacu ra sii yo. Zoco ña quehin sihin sa siñi tuñi sa iyo ñuu ñiyivi ya coto caca iñi ñiyivi vatyi tyaqui xaan cuhva quehin, ta ma nacañi vaha iñi ñu cuhva catyi si sa cuenda cuhva i sihi ra Cristo nu cruz sa cuenda cuatyí yo.

Sito yo vatyi vaha ca sa siñi tuñi sa iyo sii maa ra Ndyoo ta ziqui sa siñi tuñi sa iyo sii ñiyivi ñuu ñiyivi

¹⁸Ñiyivi cua cunaa, sica iñi ñu vatyi sa tondo ñi cuu cuhva i sihi

ra Jesús nu cruz sa cuenda cuatyí yo. Zoco sa cuenda maa yo, ra i zacacu ra Ndyoo, ta tundyee iñi cuu si vatyi sihin sa sino iñi yo sii si ta cacu yo.

¹⁹Vatyí catyi Tuhun Ndyoo:

Sica iñi ñiyivi sa sito xaan, vatyi cuu ñihi ñu cuhva ta cacu ñu.

Zoco cua zanei tandihí cuhva cuan, ta ma ñihi ñu cuhva cacu ñu sihin sa siñi tuñi maa ñu.

Tacuan catyi Tuhun Ndyoo.

²⁰Ñahñi maa tyindyee si sa cuu yo ra sito xaan a ra maestro a ra sito natuhun ziqui tyiño sa iyo ñuu ñiyivi. Tandihí sa sito xaan ñiyivi ñuu ñiyivi ya, ñahñi cuu si ityi nuu ra Ndyoo.

²¹Casi xaan iñi ra Ndyoo, ta ña saha ra sa coto ñiyivi sii ra sihin sa siñi tuñi ñu. Zoco i zavaha ra inga cuhva, ta cuu coto ñiyivi sii ra ta cacu ñu tatu cuiñi ñu Tuhun ra ta sino iñi ñu sii si. Ta iyo ñiyivi sica iñi ñu vatyi sa tondo ñi cuu Tuhun Ndyoo.

²²Vatyí cuñi ñiyivi hebreo ndyehe ñu sa ndyityi. Ta ñu griego nanducu xaan ñu sa siñi tuñi, cuhva sica iñi ñu.

²³Zoco maa yo nacatyi yo sihin ñiyivi cuhva i sihi ra Cristo nuu cruz. Cuxaan ñiyivi hebreo sihin cuhva cuan, ta sica iñi inga ñiyivi vatyi minoo sa tondo ñi cuu si.

²⁴Zoco sa cuenda ñiyivi i casi ra Ndyoo, vazú ñiyivi hebreo a ñiyivi griego cuu ñu, zoco sito tandihí ñu vatyi sa cuenda ra Cristo ta cuu zacacu ra Ndyoo sii yo. Ta yucuan cuu cuhva zañaha maa ra Ndyoo vatyi casi xaan ca iñi maa ra.

²⁵Sica iñi ñiyivi vatyi i zavaha maa ra Ndyoo minoo sa tondo, zoco vaha xaan ca cuhva i zavaha maa ra Ndyoo ta ziqui sa zavaha ñiyivi. Ta iyo xaan ca tundyee iñi sii maa ra Ndyoo ta ziqui sii ñiyivi.

²⁶Ndoho hermanos, zaha vaha ndo cuenda cuhva i casi maa ra Ndyoo sii yo vatyi ña cuaha yo cuu ra casi xaan iñi sihin sa siñi tuñi sa iyo ñuu ñiyivi ya. Ña cuaha yo cuu ra ñiñi ta ra cuca ñuu ñiyivi ya.

²⁷Zoco i casi ra Ndyoo sii yo ta cua catyi inga ñiyivi vatyi tondo xaan iyo yo. Vatyi cua cuu si ticahan nuu sii ñiyivi sa sica iñi vatyi casi xaan iñi ñu. Ta i casi ra sii yo, ra ña ñiñi ta ña cuca, vatyi cua zaha yo ticahan nuu sii ñiyivi iyo xaan cuhva sii ihya ñuu ñiyivi.

²⁸Ta i casi ra sii ñiyivi ndyihí, ñiyivi sa ñahñi maa sa sito, ñiyivi sa ña cuu ndyehe ñiyivi sii. Tacuan i zavaha ra vatyi cua cutyiño ra sii yo, ta cua quindyaa ra sa tuhva inga ñiyivi, ñu cuu ñiyivi ñiñi vityi.

²⁹Tacuan i zavaha ra Ndyoo, ta yofi cua catyi vatyi ra cahnu xaan cuu ra ityi nuu ra Ndyoo.

³⁰Zoco zuun ñi maa ra Ndyoo cuu ra sa zandu-ñin sii maa ndo sihin ra Cristo Jesús. I saha maa ra Ndyoo vatyi cuu ra Jesús sa siñi tuñi vaha sii yo. Sihi ra Jesús, ta tyiyahvi ra sa cuenda tandihi cuatyí yo. Sa cuenda ra Cristo, ta ñahñi ca cuatyí yo ityi nuu ra Ndyoo. I zanduvaha ra cuhva iyo yo.

³¹Tacuan i zavaha ra Ndyoo, ta i cuu si cuhva catyi Tuhun Ndyoo: “Tatu iyo minoo ra cuñi ra catyi ra vatyi vaha xaan ra, ma cuu. ñin ñi

sii maa ra Ndyoo zacahnu yo vatyi i zavaha maa ra tandihi.”

Cuhva nacatyí ra Pablo cuhva i sihi ra Jesús nuu cruz

2 Hermanos, quivi sa sehin nu yucu ndo ta nacatyí Tuhun Ndyoo sihin ndo. Ñá cahan xein tuhun nahnu, ta ñá quehin sihin cuhva iyo sa siñi tuñi ihya ñuu ñiyivi.

²Ñá quehin inga cuhva nu yucu ndo, maa ñi cuhva i sihi ra Cristo nuu cruz sa cuenda cuatyí maa yo vatyi maa ñi cuhva cuan cuu sa cuñi quehin sihin ndo.

³Ta quivi i sei nu yucu ndo, i yuhu xein quehin sihin ndo ndya cuhva nehi.

⁴Ta ndoo xaan i nacatyí Tuhun Ndyoo sihin ndo. Ñá nazaque cuaha tuhun nahnu a tuhun tañi sa sito ra tuhva xaan cahan. Ñahñi. Zoco i ndyehe ndo vatyi i quehin sihin tundyee iñi sa iyo sii Tatyí Ii maa ra Ndyoo, ta sicoo xaan cuhva sihin tuhun quehin.

⁵Tacuan i quehin vatyi cuñi sa cua sino iñi ndo sa cuenda cuhva sa iyo sii maa ra Ndyoo ta yivi sa vatyi tyaqui xaan quehin a vatyi i quehin sihin sa siñi tuñi sa iyo ñuu ñiyivi ya.

Sihin Tatyí Ii maa ra Ndyoo ta zañaha ra Ndyoo sii ra sii yo

⁶Zoco cahan ndi sihin minoo cuhva vaha xaan sihin ñiyivi sa naha sino iñi. Zoco sa siñi tuñi sa cuenda maa ra Ndyoo cuu si ta yivi sa siñi tuñi sa iyo cuenda ñuu ñiyivi ya a sa cuenda sa iyo sii ra ndyaca

ñaha ñuu ñiyivi ya vatyí cuee ca ta cua naa tyiño sii tandihí ra.

⁷Zoco cahan ndi sihin sa siñi tuñi sa saha maa ra Ndyoo. Nacatyí ndi cuhva i tyaa ra Ndyoo cuhva cumañi ca sino ñuu ñiyivi vatyí cua zanduu ra sii yo tañi maa ra. Xehe xaan i cuu tuhun ya ta sa naha, zoco vityí cuu coto yo sii si.

⁸Yoñi numinoo ra ndyaca ñaha ñuu ñiyivi ya ta i cutuñi iñi ra tuhun ya vatyí tatu cutuñi iñi ra, ma cahñi ra sii ra ndyaca ñaha sii yo nuu cruz. Ta ra cahnu ca cuu ra ndyaca ñaha sii yo.

⁹Catyí Tuhun Ndyoo:

Yoñi maa sa ndyehe a sa siñi a sa cutuñi iñi tandihí sa vaha xaan sa zanduvaha ra Ndyoo sa cuenda ñiyivi cuñi xaan sii ra. Catyí si.

¹⁰Zoco vityí sa cuenda Tatyí Ii maa ra Ndyoo ta saha ra Ndyoo sa coto yo vatyí zañaha Tatyí Ii maa ra tandihí cuii sii yo ndya cuhva ndya sa xehe xaan ca ta tuhun sa tuhva xaan maa ra Ndyoo tyixehe.

¹¹Ma cuu coto numinoo yo ñaa sa sica iñi inga yo. Zoco sito maa yo ñaa sa sica iñi yo. Ta zuun ñi cuhva cuan, sito Tatyí Ii maa ra Ndyoo tandihí sa sica iñi maa ra Ndyoo.

¹²Ta saha maa ra Ndyoo Tatyí Ii ra sii yo vatyí cua zacoto ra sii yo tandihí sa vaha xaan sa saha maa ra Ndyoo sii yo.

¹³Ta nacatyí ndi cuhva zacuaha Tatyí Ii sii ndi ta yivi sihin sa siñi tuñi sa iyo ñuu ñiyivi ya. Nacatyí ndi tuhun sa saha maa ra Ndyoo sihin maa ndo sa iyo Tatyí Ndyoo sii.

¹⁴Zoco ñiyivi ta ñihi ca Tatyí Ii ra Ndyoo, ña cuñi ñu cuiñi ñu cuhva

nacatyí Tatyí Ndyoo. Tañi sa tondo cuu si cuñi ñu vatyí ña cutuñi iñi ñu sii si. Maa ñi ñiyivi sa iyo Tatyí Ndyoo sii, ta cuu cutuñi iñi ñu.

¹⁵Zoco ra sa iyo Tatyí Ii ra Ndyoo, cutuñi iñi ra tandihí. Zoco ñiyivi ndya vaha ñi ña cutuñi iñi ñu cuhva iyo maa ra cuan.

¹⁶Catyí Tuhun Ndyoo: “Yoñi cuu cutuñi iñi ñaa sa sica iñi ra Ndyoo. Yoñi cuu zacuaha sii maa ra”, catyí si. Zoco sica iñi maa yo cuhva sica iñi ra Cristo.

Cuhva cuñi si sa zatyíño yo tyiño ra Ndyoo

3 Zoco hermanos i quehin sihin ndo quívi cuan tañi sa lee cuu ndo vatyí tañi sa nacaacacu cuu ndo cuhva saa ya cuu si, ta tacuan iyo ndo ndya vityí. Vatyí cumañi nduvaha cuhva iyo ndo sa ndisa cuii. Ta ñá cuu quehin sihin ndo quívi cuan tañi ñiyivi sa zatyíño Tatyí Ii maa ra Ndyoo añima.

²Tañi sa tuhva yo cuhva zicui sii sa ndyíhi tatu ta cuu ca casi si. Tacuan i quehin sihin maa ndo sihin tuhun ña yíi ñi. Tañi sa lee cuu ndo cuu si vatyí ta cuu ca casi vaha ndo. Siin xaan cuhva sino iñi ndo, ta tacuu ca cutuñi iñi ndo sa siñi tuñi sii maa ra Ndyoo.

³Maa ñi ñiyivi ta sino vaha ca iñi cuu ndo ndya vityí, ta cuñi ndo cuu sii ndo tañi cuu sii inga ñiyivi, ta sahñi tahan ndo sihin minoo ndo ta sihin inga ndo. Zavaha ndo cuhva zavaha ñiyivi sa cuu cuenda ñuu ñiyivi ya, ta ña zavaha ndo tañi ñiyivi cuenda ra Ndyoo.

⁴Yucuan cuenda iyo ndo catyí ndo: “Yuhvi ndyíque sii ra Pablo.”

Ta inga ndo catyi ndo: “Yuhvi ndyique sii ra Apolos.” Catyi ndo. Ta sihin cuhva cuan zañaha ndo vatyí ta cuahnu ca ndo sihin Tuhun Ndyoo.

⁵Zoco ¿yoo ra cuu yuhvi? ta ¿yoo ra cuu ra Apolos ta sahñi tahan ndo sa cuenda ndi? Maa ñi ra zacoto Tuhun Ndyoo sii ndo cuu nduhvi, ta i sino iñi ndo. Tahan tahan ndi i zavaha ndi cuhva i catyi maa ra Ndyoo sihin ndi.

⁶Yuhvi i tasi siti sa cuu Tuhun Ndyoo. Ta ra Apolos i quisi cozo. Ta i zacuahnu maa ra Ndyoo tyiño cuan.

⁷Yucuan cuenda ñahñi cuu ra tasi ta ra tyozo, zoco maa ra Ndyoo cuu ra ñiñi ca vatyí maa ra zacuahnu tyiño cuan.

⁸Ïn ñi cuu si tatu tasi yo a tyozo yo, ta tahan tahan yo cua cuhva maa ra Ndyoo sa vaha sii yo cuhva tahan si sa cuenda tyiño yo.

⁹Ïn ñi i zatyíño maa ndi sihin ra Ndyoo. Ta maa ndo cuu tañi minoo ñuhu nu zatyíño maa ra Ndyoo. A tañi minoo vehe zandaa ra cuu ndo.

¹⁰I catyi maa ra Ndyoo vatyí yuhvi cua cui tañi minoo ra sa sito xaan zandaa vehe. Sa i saqui cimientó si, ta inga ra zandaa vehe nuu cimientó cuan, cuñi si sa zacuenda ra cuhva zatyíño ra.

¹¹Ta yoñi ra cuu caqui inga cimientó ta ziqui cimientó sa sa ndyaa vatyí ra Jesucristo cuu cimientó vehe cuan.

¹²Zoco cuu zandaa maa yo minoo vehe nuu cimientó cuan. Cuu cutyíño yo xuhun cuan a xuhun cuisí a yuu tyaqui. A cuu cutyíño yo yutu a itya a mihin.

¹³Ta quivi quisi ra Cristo cua ndyehe ra tyiño zacuu minoo minoo yo. Cua zaquisi ra ñúhu, ta cua ndyehe ra tatu vaha tyiño yo a ña vaha si.

¹⁴Tatu ma cayu tyiño yo sa zandaa yo nuu cimientó cuan, cua cuhva ra Ndyoo sa vaha sii yo.

¹⁵Zoco tatu cayu tyiño i zacuu minoo yo, cua ndoyo ñuhu si, ta cunaa si, zoco ra cuan, cacu ra. Sa yatyí cuii ca sa ma cacu ra tañi minoo ra quita si vehe sa cayu.

¹⁶¿Atu ña sito ndo vatyí sa tandihi maa ndo cuu vehe ñuhu ra Ndyoo ta ndyaa Tatyí Ii ra Ndyoo sihin ndo?

¹⁷Tatu zatívi minoo ra vehe ñuhu ra Ndyoo, cua zanaa ra Ndyoo sii ra cuan vatyí ii xaan vehe ñuhu ra Ndyoo, ta maa ndo cuu vehe ñuhu ra.

¹⁸Numinoo ndo ta ma zandavi ñaha ndo sii ndo. Tatu caca iñi ndo vatyí sito xaan ndo sihin sa siñi tuñi sa iyo ñuu ñiyívi ya, vaha ca zanduu ndo sii ndo tañi minoo ra sa ñahñi maa sito, ta cua cuhva ca maa ra Ndyoo sa siñi tuñi maa ra sii ndo.

¹⁹Vatyí sa siñi tuñi sa iyo ñuu ñiyívi ya, ñahñi maa cuu si ityí nuu ra Ndyoo. Sa tondo ñi cuu si sa cuenda maa ra. Vatyí catyi Tuhun Ndyoo: “Sihin sa siñi tuñi sa iyo sii ñiyívi, ta cua zanduva ra Ndyoo sii ñu.”

²⁰Ta inga tucu cuhva catyi Tuhun Ndyoo: “Sito ra Ndyoo cuhva sica iñi minoo ra casi xaan iñi vatyí ñahñi vale si.”

²¹Yucuan cuenda yoñi ndo tyaa xaan ndo yahvi sii numinoo ñiyívi

vatyi sa saha maa ra Ndyoo tandihi cuii sa cuñi si sii ndo.

²²Saha maa ra Ndyoo sii yuhvi ra Pablo sii ndo, ta saha ra sii ra Apolos ta ra Pedro tucu vatyi tyindyee ndi sii ndo. Ta tandihi cuii sa iyo ñuu ñiyivi saha ra sii ndo. Ta vazu ndito ndo a sa sihi ndo, zoco ndyaa ra sihin ndo. Ta tandihi sa iyo vityi ta sa cua coo ityi nuu ca, tandihi cuii ñaa sa cuu si, ta cuu si cuenda maa ndo vatyi tyindyee si sii ndo.

²³Ta maa ndo cuu sii ra Cristo, ta ra Cristo cuu sii ra Ndyoo.

Tyiño i zavaha ra apóstol

4 Cuñi si sa nacoto ndo sii ndi tañi ra zatyño sa cuenda ra Cristo. Tyiño maa ndi cuu sa zacuahaa ndi sii ñiyivi tuhun xehe ca sii maa ra Ndyoo.

²Ta sa cuenda maa ndi, ra cuu muzu ra Ndyoo, cuñi si vatyi tandihi saha tyaa ndi yahvi tandihi sa nacatyi ra Ndyoo sihin ndi.

³Ta ña sica iñi atu catyi ndo vatyi vehi a ña vehi a tatu catyi inga ñiyivi. Ñahñi sa cuu. Ta nu mi ta ma cuu catyi tatu zavehi sa vaha a sa ña vaha.

⁴Caty i sa siñi tuñi vehi sihin, vaty i ñahñi ca cuaty i. Zoco numaa tacuan ta ña cuñi si catyi si vaty i ñahñi maa cuaty i caña ñi. Maa ra Ndyoo cuu ra cua tyicuhva sii.

⁵Yucuan cuenda ma catyi ndo tatu vaha a ña vaha sa zavaha ñiyivi vaty i ta saa ca quivi. Quivi cua quisi ra Cristo ta cua zandundisi ra nu ñaa. Ta cua zatuu ra sa xehe sa iyo añima yo. Ta ziqui cua tyiyahvi ra Ndyoo sii minoo minoo yo cuhva tahan si sii yo.

⁶Ndoho hermanos quehin cuhva ya vaty i cua tyindyee si sii maa ndo. Naticuhva maa ra Ndyoo sii mi ta sii ra Apolos, ta ma zacahnu maa ndo cuaha ca sii minoo ndi a sii inga ndi. Ña tacuan catyi Tuhun Ndyoo.

⁷Yoñi minoo ndo sa ñiñi ca ta ziqui inga ndo. Tandihi sa cuu sii ndo, maa ra Ndyoo i saha. Yucuan cuenda ma zacahnu ndo sii ndo.

⁸Zoco sica iñi maa ndo vaty i sito ndo tandihi cuii sa iyo sa cuenda maa ra Ndyoo ta ñahñi sa cumañi sii ndo. Sa ndyaca ñaha ndo tañi sa rey cuu ndo, ta cuu tyaa siyo ndo sii maa ndi. Vaha xaan tatu sa ndisa vaty i rey cuu ndo, ta tacuan ta cua cuu cundyaca ñaha ndi sihin ndo.

⁹Ta sica iñi vaty i maa ndi, ra apóstol, i zanduluhlu xaan ca ra Ndyoo sii ndi. Ndyeh e xaan ndi tundoho tañi minoo ra sa ñoho vehe caa, ta cuñi cuu ra. Tañi sa sindyaca zandaru sii ndi ityi cahnu ta ndyeh e ñiyivi ta ángel sii ndi. Ta saha xaan si ticahan nuu sii ndi cuu si.

¹⁰Sa cuenda ra Cristo ta sica iñi ñiyivi vaty i tondo xaan maa ndi, zoco maa ndo sito xaan ndo cuñi ndo sa cuenda ra Cristo. Tañi sa ñahñi sa cuu zacuu maa ndi, zoco maa ndo cuu xaan sii ndo, cuñi ndo. Sacu ndyaa ñiyivi sii maa ndi, zoco sii ndoho zacahnu ñu.

¹¹Ndya cuhva ndya vity i ta ndyeh e xaan ndi tundoho. Sizoco ndi. Ityi ndi. Ñahñi ca zahma ndi. Ñahñi vehe ndi. Ta tuhva ñiyivi cañi sii ndi.

¹²Sitatu xaan ndi vaty i ñihi xaan zatyño ndi. Quiñi cahan ñiyivi

sihin ndi, zoco vaha cahan ndi sihin ñu. Zavaha ñu sa ña vaha sihin ndi, zoco zandyee ndi iñi ndi.

¹³Cahan ñu sii ndi. Zoco vii ñi cahan ndi sihin ñu. Zaha ñu tuhun tañi mihin cuu ndi tañi sa ñahñi yahvi ndyaa ndi ndya cuhva ndya vityi.

¹⁴Ña tyei cuhva ya sii ndo sa cua cucahan nuu ndo. Zoco tañi sa sehi tyiño sii zehe ndyih, ra cuñi xein.

¹⁵Vazu usi mil maestro zacuaha sii ndo sa cuenda ra Cristo, zoco ña cuaha zutu ndo. Mi cuu tañi zutu ndo sa cuenda ra Jesucristo vatyi xihna ca mi i nacatyí sihin ndo yozo caa cuu cacu añima ndo.

¹⁶Yucuan cuenda zañiñi sii ndo vatyí zavaha ndo tandihí cuhva zavehi.

¹⁷Ta yucuan cuenda tasi sii ra Timoteo nu yucu ndo. Cuñi xein sii ra tañi minoo zehi. Vaha xaan ndyico ra sii ra ndyaca ñaha sii yo. Cua zanacohon ra iñi ndo cuhva iye sa cuenda ra Cristo ta cuhva zacuehi tahan tahan vehe ñuhu.

¹⁸Iyo ndo zacahnu xaan ndo sii ndo. Sica iñi ndo vatyí ma cuhun que nu yucu ndo.

¹⁹Zoco tatu cuhva cuñi maa ra Ndyoo cuu, ña naha ca ta cua cuhin nu yucu ndo. Ta cua ndyehi sii ndoho sa zacahnu sii ndo tatu ndyizo ndo tundyee iñi maa ra Ndyoo a tuhun cahan ñi ndo.

²⁰Vatyí tatu ndisa vatyí ndyaca ñaha ra Ndyoo sii ndo, yivi sa cahan ñi maa ndo cuu sí, zoco cua cuu zatyíño ndo sihin tundyee iñi maa ra Ndyoo.

²¹¿Yozo caa cuñi maa ndo? ¿Atu cuñi ndo sa quisi quehin sii ndo?

¿A cuñi ndo sa quisi zañehi sii ndo cuhva cuñi xein sii ndo ta vii ñi cua quehin sihin ndo?

Tatu ña cuñi minoo hermano zandoo ra cuatyí ra, cuñi sí sa tava yo sii ra

5 Catyí ñiyivi sihin vatyí iyo minoo ra nu yucu ndo ndyaa ra sihin zihí ndahvi ra. Cahnu xaan cahnu xaan cuatyí cuan. Ndyá cuhva ndya ñiyivi ta coto ca Tuhun Ndyoo ta ña tuhva ñu zavaha sii sí.

²Sica iñi ndo vatyí vaha xaan ndo, ta ña nducuihya iñi ndo sa cuenda cuatyí cuan tañi tahan sí. Ta ña tava ndo sii ra zavaha cuhva quiñi xaan cuan.

³Ndisa yoñi ndyaa sihin ndo sihin coño ñuhi, zoco tañi sa ndyeyi sihin ndo cuu sí vatyí ñoho xaan iñi sii ndo. Ta sihin zivi ra Jesús, ra ndyaca ñaha sii yo, sa cundaa iñi cuhva cuñi sí zavaha ndo sihin ra zavaha cuatyí cuan.

⁴Cuñi sí sa titahan ndo. Ta zaha ndo tuhun vatyí ndyeyi sihin ndo. Ta cua coo xaan tundyee iñi ra Jesús sihin ndo.

⁵Ta ziqui cuhva cuenda ndo sii ra cuan sii cuihna vatyí cua cuu zativi ra sii coño ñuhu ra, ta cua cuu cacu añima ra quivi cua tasi tuñi ra Ndyoo sii ñiyivi.

⁶Ña vaha sa catyí ndo vatyí vaha xaan ndo vatyí saha ndo sa coo cuatyí cuan nu yucu ndo. ¿Atu ña sito ndo tuhun sa catyí sí vatyí cua ndaa pan tatu tyihí yo zuhva ñi yusa iya? (Ta tañi yusa iya cuu ra cuan. Ta coto cua nduu tandihí ndo tañi maa ra.)

⁷Tava ndo yusa iya ña vaha cuan coto zativi sí sii tandihí ndo.

Tacuan ta cua cuu ndo tañi pan ña ndaa vatyí ñahñi yusa iya ña vaha cuan cua quihvi ticui ndo. Ta zuun ñi maa ra Cristo cuu ra i sihi nu cruz sa cuenda yo. Ta sa naha i sahñi ñiyivi mvee ticatyí ta ndasi cuatyí ñu sihin niñi ti. Ta zuun ñi cuhva cuan i sati niñi ra Cristo nu sihi ra, ta sihin niñi cuan zandasi ra Ndyoo cuatyí yo ta zacacu ra sii yo.

⁸Yucuan cuenda nacuu yo ñiyivi vaha sa ndisa. Ma zavaha ca yo sa quiñi ta sa ña vaha. Zoco nazavaha yo sa vaha sa ndisa cuii ta sa ndoo.

⁹Nu inga carta i tasi sii ndo i catyí sihin ndo vatyí ma coo ndo sihin ñiyivi iyo cuatyí.

¹⁰Zoco ñá quehin tuhun cuan sa cuenda ñiyivi ta sino ca iñi Tuhun Ndyoo. Iyo ra zavaha ra sa quiñi sihin sa ziin ziin ñaha. Iyo ra cuñi xaan ra sa coo xaan sa sii ra. Iyo ra zuhu ra ta zandavi ñaha ra. Zoco ma cuu cuiñi siyo ndo sii tandihi ñiyivi sa iyo tacuan vatyí ndyaa ndo ñuu ñiyivi sihin ñu.

¹¹Zoco quehin tuhun cuenda ra cuu hermano. Ma cutahan ndo sihin ra tatu zavaha ra sa quiñi sihin sa ziin ziin ñaha, a tatu cuñi xaan ra sa coo xaan sa sii ra, a tatu zacahnu ra sii inga ndyoo, a tatu quiñi cahan ra ta sahñi tahan ra sihin ñiyivi a tatu ra siñi cuu ra a ra zuhu. Ta ma casi ndo xita sihin numinoo ra zavaha minoo cuhva cuan tatu catyí ra vatyí hermano cuu ra.

¹²⁻¹³Vatyí maa yo ña tahan si tyaa yo cuatyí sata ñiyivi ityí sata. Cua tasi tuñi maa ra Ndyoo sii maa ñu. Zoco cuñi si sa coto vaha ndo sii

ñiyivi ndyico sii ra Ndyoo nu yucu ndo. Yucuan cuenda tava ndo sii ra iyo cuatyí cuan nu yucu ndo, ra sa quehin tuhun.

Ma tyaa yo cuatyí sata ra hermano nuu ra cu tyiño

6 ¿Ñaa cuenda tuhva maa ndo tyaa cuatyí sata inga hermano nuu ra cu tyiño, ra ña sino iñi Tuhun Ndyoo? ¿Ñaa cuenda ma zandaa ndo tyiño cuan nuu tandihi hermano?

²¿Atu ña sito ndo vatyí ityí nuu ca cua tyicuhva maa yo sii ñiyivi ñuu ñiyivi? Tatu cua cuu tyicuhva ndo ñuu ñiyivi, ¿ña cuenda sica iñi ndo vatyí ma cuu tyicuhva ndo tyiño ndyíhi vityí?

³Ityí nuu ca cua tyicuhva maa yo sii ángel. Yucuan cuenda cuu tucu tyicuhva ndo tyiño ña niñi xaan tañi sa iyo vityí.

⁴Tatu iyo cuatyí nu yucu ndo ¿ña cuenda saha ndo sa zandaa inga ñiyivi tyiño? Ñahñi ra cuu ra cuan sa cuenda maa ndo.

⁵Quehin cuhva ya sihin ndo vatyí cuñi sa cua cucahan nuu ndo. Zaha ndo tuhun vatyí yoñi sa iyo sa siñi tuñi vaha nu yucu ndo vatyí ña saha ndo sa zandaa ra cuan tyiño.

⁶Zoco sahan ndo nuu ra cu tyiño ta tyaa ndo cuatyí sata hermano ndo nuu ra ña sino iñi.

⁷Iyo cuatyí nu yucu ndo vatyí sahan ndo nuu ra cu tyiño sihin hermano ndo. Vaha ca zandye ndo iñi ndo sihin ñaa sa zavaha ñiyivi sihin ndo vazu zuhu ñu ndaha tyiño ndo.

⁸Zoco maa ndo cuu ra zavaha sa ña vaha. Ndyaa sa sii hermano ndo ta zuhu ndo.

⁹¿Atu ña sito ndo vatyi ma cuu quihvi ñiyivi ña vaha nu ndyaca ñaha ra Ndyoo? Ma zandavi ñaha ndo sii ndo. Ma cuu quihvi ra sa ndyaa sihin minoo ñaha ta ña tindaha ra, a ñiyivi zacahnu sii inga ndyoo, a ra ndyaa sihin inga ñaha sa yivi ñazihí ra a ra ndyaa sihin inga ra.

¹⁰Ta ma cuu quihvi ra zuhu a ñiyivi cuñi xaan sa coo sa sii ñu, a ra siñi, a ñiyivi quiñi cahan sihin inga ñiyivi. Ma cuu cuhun tandihí ñiyivi sa tacuan caa nu ndyaca ñaha ra Ndyoo.

¹¹Ta tacuan i cuu zuhva maa ndo. Zoco i nacatya ra Ndyoo añima ndo. Sihin Tatyí Ii maa ra Ndyoo i zanduvaha ra cuhva iyo ndo. Sa cuenda sa i zavaha ra Jesucristo, ra ndyaca ñaha sii yo, ta ñahñi ca cuatyí ndo ityi nuu maa ra Ndyoo.

**Coño ñuhu maa yo cuu
vehe ñuhu ra Ndyoo**

¹²Cuu zacuí ñaa sa cuñi, zoco ma tyindyee tandihí si sii. Saha ra Ndyoo sa zacuí sii si, zoco ma cuhve sa cundyaca ñaha si sii.

¹³Iyo sa casi yo sa cuenda sisi yo, ta sisi yo iyo sa cuenda sa casi yo. Zoco ityi nuu ca cua naa tandihí cuhva cuan cua zacuu ra Ndyoo. Zoco ña iyo coño ñuhu yo sa vatyi zavaha yo sa quiñi sihin sa ziin ziin ñaha. Coño ñuhu yo cuu sii maa ra Ndyoo. Ta cuñi maa ra cundyaca ñaha ra coño ñuhu yo sihin Tatyí Ii ra.

¹⁴I zanandoto ra Ndyoo sii ra Jesús, ta zuun ñi cuhva cuan cua zanandoto ra sii coño ñuhu yo sihin tundyee iñi maa ra.

¹⁵¿Atu ña sito ndo vatyi cuu ndo zuhva coño ñuhu ra Cristo? ¿Atu vaha tatu zandu-iin ndo coño ñuhu ra Cristo sihin minoo ñaha zana? iNuminoo saha!

¹⁶¿Atu ña sito ndo vatyi tatu zandu-iin minoo ra sii coño ñuhu ra sihin minoo ñaha zana sa nduu ñu tañi minoo ñi ñiyivi? Catyi maa ra Ndyoo sisi Tuhun ra vatyi ndyehe ra sii ñu tañi minoo ñi ñiyivi.

¹⁷Zoco ra sa ndu-iin sihin ra Cristo, sa ndu-iin añima ra sihin ra Cristo vatyi zuun ñi Tatyí Ii iyo sii nduu tahan ra.

¹⁸Zandoo ndo sii cuatyí sa cuñi ndo sii minoo ñaha sa yivi ñazihí ndo cuu. Iyo inga cuatyí sa ma zatívi xaan sii ndo. Zoco ñiyivi zavaha cuatyí ya, zuun ñi sii maa ñu zatívi ñu.

¹⁹¿Atu ña sito ndo vatyi coño ñuhu maa yo cuu vehe Tatyí Ii? Saha maa ra Ndyoo sii ra sii yo, ta iyo ra sisi añima yo. Ta yivi ca cuenda maa yo cuu yo.

²⁰Yahvi xaan i zata maa ra Ndyoo sii yo. Yucuan cuenda zacahnu xaan ndo sii ra Ndyoo sihin coño ñuhu ndo.

**Cuhva cuñi si coo ñiyivi
sa yaha tindaha**

7 Ta vityi cua nacatyi sihin ndo sa cuenda cuhva i nducú tuhun ndo sii, nuu carta i zaquisi ndo. Sa xihna ñi, sa ndisa cuu si vatyi vaha ca tatu ma tindaha ñiyivi.

²Zoco coto coo cuatyí ndo natindaha tahan tahan ndo sihin minoo ñaha ta tahan tahan ñaha sihin minoo rayii.

³Nazavaha rayii cuhva tahan si sihin ñazihî ra. Ta tacuan tucu ñaha, nazavaha ña cuhva tahan si sihin yii ña.

⁴Ma cuu zavaha ñaha cuan ñaa sa cuñi maa ña sihin coño ñuhu ña vatyî tahan tucu si sii yii ña catyi ra yozo caa cua zavaha ña. Ta tacuan tucu rayii, sii ñaha ra cuu tucu coño ñuhu ra.

⁵Ma catyi ndo vatyî ma cuu cuzu ndo sihin ñaha ndo a sihin yii ndo. Zoco tatu cuñi ndo, cuu zaña ndo sii si zuhva quivi tatu nduu tahan ndo cuñi cuhva cuan. Ta cuu coo ndyitya ndo ta cahan ndo sihin ra Ndyoo. Ta ziqui ndu-iiñ tucu ndo coto zandavi ñaha cuihna sii ndo ta coo cuatyî ndo vatyî ma cuu cundyaca ñaha ndo sii ndo.

⁶Quehin cuhva ya vatyî sehi sa tindaha ndo, zoco yivi sa zañiñi sii ndo.

⁷Vatyî vaha xaan tatu cuu coo tandihî ndo tañi mi. Zoco ziiñ ziiñ cuhva saha ra Ndyoo sii sa minoo minoo yo.

⁸Catyî sihin ñu yoco ta sihin ñundahvi vatyî vaha tatu ndoo ñu tacuan ñi tañi mi.

⁹Zoco tatu ma cuu cundyee iñi ñu sa ma tindaha ñu, vaha ca natindaha ñu.

¹⁰Ta sihin ñiyivi sa yaha tindaha, catyi minoo cuhva sa cuenda ra ndyaca ñaha sii yo vatyî ma zandoo ñuzihî sii yii ñu.

¹¹Ta tatu zandoo minoo ña sii yii ña, ma cuu tindaha tucu ña sihin inga ra. Zoco cuu nacoo vaha ña sihin yii ña. Ta ma cuu sa sino tutu ta zandoo minoo ra sii ñazihî ra.

¹²Ta vityi cua quehin ziqui inga zuhva ca cuhva, ta ña site tatu catyi maa ra Ndyoo cuhva ya a maa ñi mi, zoco tyehen catyi. Tatu iyo minoo hermano ta ña sino iñi ñazihî ra, zoco cuñi ña cundyaa ña sihin ra, ma cuu sa sino tutu ta zandoo ra sii ña.

¹³A tatu iyo minoo hermana ta ña sino iñi yii ña, zoco cuñi ra cundyaa ra sihin ña. Ma cuu natani tutu ñu ta zandoo ña sii ra.

¹⁴Vatyî sa cuenda sa sino iñi ñazihî ra ta tyindyee tucu ra Ndyoo sii maa ra. Ta zuun ñi cuhva tyindyee ra Ndyoo sii minoo ñaha ña sino iñi tatu sino iñi yii ña. Ta sihin cuhva cuan ta nduu zehe ñu tañi zehe ñiyivi sino iñi ta yivi tañi zehe ñiyivi ña sino iñi.

¹⁵Zoco tatu zandoo, ra ña sino iñi sii ñaha ra a ñaha ña sino iñi sii yii ña, nacuhun ñu. Ta sihin cuhva cuan sa i ndasi ra hermano a ña hermana. Cuñi maa ra Ndyoo sa coo sa taxi.

¹⁶Vatyî ña siton hermana tatu cua cuu zasinon iñi yiun. Ta ña siton hermano tatu cua cuu zasinon iñi ñazihun.

¹⁷Ta tyehen catyi sihin ndo: Coo ndo cuhva catyi ra Ndyoo sihin ndo. Ta ndoo ndo vaha sihin cuhva iyo ndo quivi i cana ra Ndyoo sii ndo. Ta tacuan catyi sihin tandihî ñiyivi sino iñi ziiñ ziiñ vehe ñuhu.

¹⁸Tatu i casi ra Ndyoo sii minoo ndo ta sa yaha tahndya ñiñi xiñi xuu ndo. Ma caca xaan iñi ndo sa cuenda si. A tatu iyo ndo tañaha ca coo costumbre cuan sii ndo, ña cuñi si sa coo si vityi.

¹⁹Ñã ñiñi tatu zavaha yo costumbre cuan a ma zavaha yo sii si. Sa ñiñi cuu sa tyaa yo yahvi tuhun cahan maa ra Ndyoo.

²⁰Ndoo ndo vaha tañi iyo ndo quivi i cana ra Ndyoo sii ndo.

²¹Tatu iyo patrón quivi i cana ra Ndyoo suun, ma caca iñun. Zoco tatu cuu ndasun, nducun cuhva.

²²Vaty i quivi i cana ra Ndyoo sii minoo ra iyo patrón, ndisa iyo patrón ra, zoco ñã ndyaca ñaha ca cuaty i ra sii ra. Zoco ra sa yoñi patrón quivi i cana ra Ndyoo sii ra, nduu ra tañi ra iyo patrón vaty i nduu ra muzu ra Ndyoo.

²³Yahvi xaan i zata ra Ndyoo sii ndo. Ma cuhva ndo sa cundyaca ñaha sa ñã vaha sii ndo. (Cuhva ndo sii ndo sii ra Ndyoo nacundyaca ñaha ra sii ndo, ta zatyño ndo tyiño ra.)

²⁴Caty i sihin ndo hermano vaty i ndoo ndo vaha cuhva iyo ndo quivi i cana ra Ndyoo sii ndo, ñaa ñi maa tyiño.

²⁵Ta caty i sihin ñu yoco, ñahñi tuhun i saha ra Ndyoo sii sa cuenda ndo, zoco caty i sihin ndo cuhva sica iñi, ta cuu tiin cuenda ndo tuhun vaty i sito ndo vaty i saha maa ra Ndyoo tumañi iñi sii, ta tuhve cahan maa ñi sa vaha sa saha maa ra sii.

²⁶Ta sica iñi vaty i vaha ca ma tindaha ñu yoco sa vity i vaty i ndyehe xaan maa yo, ra sino iñi, tundoho sisi quivi ya.

²⁷Zoco tatu sa iyo ñazihun, ma nducu ndo cuhva natani tutu ndo. Zoco tatu ta coo ca ñazihun, ma cuñun sa coo.

²⁸Zoco tatu tindohon, yivi cuaty i cuu si. Ta tatu tindaha ñu yoco, yivi

cuaty i cuu si. Zoco tatu tindaha ndo cua coo xaan tizih i ta tundoho sii ndo ihya ñuu ñiyivi. Ta yucuan cuenda caty i sihin ndo vaty i vaha ca sa ma tindaha ndo vaty i ñã cuñi sa ndyehe xaan ndo tundoho ta tizih i cuan.

²⁹Ta tyehen caty i sihin ndo hermanos vaty i ñã cuaha ca quivi ndyaa. Cuñi si vaty i ra iyo ñazih i ma quih i xaan iñi ra sii ñã vaty i cuñi si sa caca iñi ra sa cuenda tyiño ra Ndyoo tandih i saha.

³⁰Ta tatu cuihya xaan cuñi ndo zoco ma tyaa xaan ndo yahvi sii si. Ta tatu zih i cuñi ndo ma tyaa xaan ndo yahvi sii si. A tatu cuca ndo ma tyaa xaan ndo yahvi sii si, zatyño xaan ndo tyiño ra Ndyoo.

³¹Ta ra sa iyo ndaha tyiño vity i, nacutyiño ra sii si sa cuenda tyiño ra Ndyoo vaty i ñuu ñiyivi sa ndyehe yo vity i sa cuñi naa si.

³²Cuñi sa ma caca xaan iñi ndo sa cuenda sa iyo ñuu ñiyivi ya. Caca iñi ndo maa ñi sa cuenda tyiño ra Ndyoo. Minoo ra sa ta coo ca ñazih i, sica iñi ra sa cuenda tyiño ra Ndyoo, ta cuu zatyño ra tyiño ra Ndyoo.

³³Zoco ra sa iyo ñazih i, sica iñi ra cuhva coo vaha ra ihya ñuu ñiyivi ta cuhva cua cuzih i iñi ñazih i ra.

³⁴Ta zih i zih i cuhva iyo sii ñuzih i sa iyo yih i ta ñu yoñi. Ñaha sa tañaha ca coo yih i, sica iñi ñã sa cuenda tyiño maa ra Ndyoo. Sii ra Ndyoo cuu coño ñuhu ñã ta sa siñi tuñi sii ñã. Zoco ñaha sa iyo yih i, sica iñi ñã cuhva coo sa vaha sii ñã ihya ñuu ñiyivi ta cuhva cua cuzih i iñi yih i ñã.

³⁵Nacaty i cuhva ya sihin ndo vaty i cuñi tyindyeh i sii ndo. Ñã

cuñi catyi vaty ma cuu tindaha ndo. Zoco cuñi sa cua coo ndo minoo cuhva vaha ta minoo cuhva ma zayanga si sii ndo ta cua cuu zacahnu ndisa cuii ndo sii maa ra Ndyoo.

³⁶Zoco tatu iyo ndo sica iñi ndo vaty vaha natindaha zehe ndo vaty cua yaha quivi ñu, vaha cuhva cuan. Natindaha ñu tatu cuñi ndo. Yivi cuaty cuu si.

³⁷Zoco tatu iyo inga ndo sa nacañi vaha iñi ndo ta cuñi ndo sa ma tindaha zehe ndo. Vaha sa ma tindaha ñu.

³⁸Vaha zavaha ra saha tindaha zehe, zoco vaha ca zavaha ra sa ña saha.

³⁹Caty ley maa ra Ndyoo vaty nii ñi sa ndito minoo ra, iin ñi cuu ra sihin ñazihí ra. Zoco tatu sa sihi ra, cuu tindaha ña sihin yoo ra cuñi ña tatu sino iñi ra sii ra Cristo.

⁴⁰Zoco sica iñi vaty zii ca cua cuñi ña tatu ma tindaha tucu ña. Ta sica iñi vaty sehi tuhun ya sa cuenda Taty Ii ra Ndyoo.

Ma zanduva yo sii hermano yo

8 Ta vityi cua quehin sa cuenda ndyayu sa saha maa ñiyivi sii inga ndyoo. Sica iñi tahan tahan yo vaty sito yo ñaa sa cuu sa ndoo sa cuenda cuhva ya. Zacahnu yo sii yo vaty iyo xaan sa siñi tuñi sii yo cuñi yo. Zoco minoo cuhva vaha ca cuu sa cuñi yo sii tahan yo.

²Ta tatu iyo yo sica iñi yo vaty sito xaan yo, cuñi si catyi si vaty tañaha ca coto yo cuhva cuñi si coto yo.

³Zoco yoo ra cuñi xaan sii ra Ndyoo, sito ra Ndyoo sii ra cuan.

⁴Ta vityi sa cuenda sa casi yo ndyayu sa saha maa ñiyivi sii inga ndyoo, sito maa yo vaty inga ndyoo cuan ña vale si vaty minoo tuhun ñi ra Ndyoo iyo sa ndisa.

⁵Ityi ziqui ta nu ñuhu iyo cuaha sa catyi ñiyivi vaty ndyoo cuu si.

⁶Zoco sa cuenda maa yo, iyo minoo tuhun ñi ra cuu Ndyoo Zutu yo. Ta i zavaha maa ra tandihí sa iyo. Ta sa cuenda maa ra iyo yo. Ta iyo minoo tuhun ñi ra ndyaca ñaha sii yo, ra Jesucristo. Ta sa cuenda maa ra ta iyo tandihí sa iyo; ndya maa yo ta sa cuenda maa ra i sino yo.

⁷Zoco ña sito tandihí ñiyivi cuhva ya vaty iyo ñiyivi i zacahnu inga ndyoo cumañi ca coto ñu sii ra cuu Ndyoo sa ndisa, ta ndya cuhva ndya vityi sica iñi ñu vaty ndito inga ndyoo cuan. Ta tatu cua casi ñu ndyayu cuan, sica iñi ñu vaty cuaty cuu si nuu ra Ndyoo.

⁸Zoco Ndyoo ñahñi cuenda ra tatu casi yo sii si a ma casi yo. Yivi cuaty cuu tatu casi yo, ta yivi cuaty cuu tatu ma casi yo.

⁹Zoco zacuenda ndo sii ndo coto zativi ndo sii minoo hermano, ra tañaha ca sino vaha iñi, sihin minoo cuhva sa cua zavaha ndo.

¹⁰Tatu ndyehe minoo ra sii yoho vaty sasun ndyayu sa saha maa ñiyivi sii inga ndyoo. Cua casi tucu ra cuan vazu sica iñi ra vaty ña vaha.

¹¹Ta sa cuenda sa sito xoon ta sasun ta cua zativun sii minoo hermano. Ta sa cuenda tucu ra cuan i sihi ra Cristo vaty ma cunaa ra.

¹²Tatu tacuan zavaha yo ta zativi yo sii minoo hermano ta sino vaha

ca iñi, cuatyi cuu si ityi nuu ra Cristo.

¹³Yucuan cuenda catyi, tatu sa cuenda sa casi mi coño cuan ta zativi si sii minoo hermano. Ma casi que sii si caña ñi coto zativi sii ra ta coo cuatyi ra.

**Tyiño tahan si zavaha
minoo ra apóstol**

9 Yuhvi cui minoo ra apóstol. Ta ndisa vatyi yoñi ñiyivi ndyaca ñaha sii. I ndyehi sii ra Jesucristo, ra ndyaca ñaha sii yo. Ta maa ndo cuu tyiño mi vatyi sa cuenda mi i sino iñi ndo sii ra ndyaca ñaha sii yo.

²Vazu sica iñi inga ñiyivi vatyi yivi minoo apóstol cui, zoco sito vaha maa ndo vatyi zuun ra cui. I sino iñi ndo Tuhun Ndyoo vatyi maa ra Jesús i tava tyiño sii, sa zacote sii ndo.

³Vityi cua nacatyi minoo cuhva sihin ñiyivi sa cuñi tyaa cuatyi sate.

⁴Iyo cuhva sii, ta cuu quihin tandihi sa saha maa ñiyivi sa casi ta sa cohi.

⁵Ta tatu coo ñazihhi, ñaha sino iñi, cuu caca noo ña sihin, tyiño ra Ndyoo. Tacuan zavaha inga ra apóstol, ta yañi ra Jesús, ta ra Pedro tucu.

⁶Yuhvi ta ra Bernabé i zandoo ndi tyiño ndi vatyi cua cahan ndi Tuhun Ndyoo. Ta ña cuñi ndo tyindyee ndo sii ndi. ¿Ñaa cuenda sa ña cuñi ndo tyindyee ndo sii maa ndi, ta tyindyee ndo sii tandihi inga ra cahan Tuhun Ndyoo?

⁷Tyiyahvi ra ndyaca ñaha sii ra cu zandaru. Ta ra tasi yoho uva, sasi

ra yucu vixi si. Ta ra zacuenda quitu, cuu coho ra zicui ti.

⁸⁻⁹Ta ma caca iñi ndo vatyi maa ñi cuhva sa sica ñi iñi mi cuu sa nacatyi ihya. Ña tacuan vatyi nu ley ra Ndyoo i tyaa ra Moisés catyi si tyehen: “Ma cuhñi ndo yuhu zindiqui nu zatyiño ti nu sañi ti siti yutu ta quita zoo si. Nacasi ti zuhva.” Ña iin ñi sa cuenda quitu cahan ra Ndyoo tuhun cuan.

¹⁰Cahan ra sii si sa cuenda maa yo vatyi ra tahvi ñuhu ta ra naquihin ndaha tyiño, nduu tahan ra cuñi ra quihin ra zuhva zuhva sa vaha sa cuenda tyiño ra.

¹¹I tasi maa ndi Tuhun Ndyoo nu yucu ndo. Ta yivi sa cuaha cuu si tatu quihin ndi zuhva zuhva sa vaha sii ndo (tatu tyindyee ndo sii ndi zuhva sihin ndaha tyiño).

¹²Tatu tyindyee ndo sii inga ra nacatyi Tuhun Ndyoo sihin ndo, ñihi ca cua tyindyee ndo sii nduhvi. Zoco ña cahan ndi. Zandyee ndi iñi ndi sihin tandihi cuii cuhva coto ma cuñi ndo Tuhun Ndyoo.

¹³Sito tandihi ndo vatyi ra zatyiño vehe ñuhu hebreo sasi ra sa iyo yucuan. Zatyño ra nu saha maa ñiyivi quitu sii ra Ndyoo, ta cuu quihin ra coño ti.

¹⁴Ta zuun ñi cuhva cuan cuñi ra Ndyoo vatyi ñiyivi nacatyi Tuhun Vaha ra, cuñi si sa tyindyee ñiyivi sino iñi cuan sii ra.

¹⁵Zoco yuhvi tañaha ca cua caque tundyee iñi sii maa ndo. Ta ña tyei cuhva ya vityi vatyi cuñi sa cua tyindyee ndo sii. Na tahan iñi sa tyiyahvi ñiyivi sii ta nacatyi Tuhun Ndyoo. Vaha ca nacui zoco.

¹⁶Ta vazu nacatyi xein Tuhun Vaha ra, zoco ma cuu catyi vatyi vaha xein vatyi maa ra Ndyoo zañiñi sii. Ta ndahvi vii ra ndahvi tatu ma zavehi cuhva catyi ra.

¹⁷Tatu zatyĩne tyiño ya vatyi cuñi, cua tyiyahvi ra Ndyoo sii. Zoco vazu ña cuñi zatyĩne sii si, zoco tyiño sa i saha maa ra Ndyoo sii cuu si.

¹⁸Ta yahvi sa ñihi cuu sa zii xaan cuñi vatyi cuu nacatyi Tuhun Ndyoo ta ma zatyiyahvi sii ñiyivi. Ña sique sa tahan si sii sa cuenda tyiñe.

¹⁹Ta yivi minoo muzu cui, zoco minoo muzu zandui sii, sii tandihi cuii ñiyivi vatyi tacuan ta cuu zasine iñi ñu tuhun ra Cristo.

²⁰Tatu cuhin nu ndyaa ñiyivi hebreo, ndui tañi maa ñu vatyi cuñi sa cua sino iñi ñu sii ra Cristo. A tatu ndyei sihin ñiyivi tyaa xaan yahvi tandihi ley sahnu, tyei yahvi sii si vatyi cuñi sa cua sino iñi ñu sii ra Cristo. Zoco ña ndyaca ñaha ley cuan sii, sa ndisa cuii.

²¹Ta tatu cuñi tyindyeyi sii ñiyivi tañaha ca sino iñi, ndui tañi maa ñu, zoco ña zavehi sa ña vaha tañi maa ñu vatyi tyei yahvi sii ra Cristo.

²²Tatu ndyei sihin ñiyivi tañaha ca sino vaha iñi, ndui tañi maa ñu vatyi tacuan ta cuu cahan que Tuhun Ndyoo sihin ñu, ta cua sino ca iñi ñu. Ndui tañi cuhva iyo sa ziin ziin ñiyivi vatyi tacuan ta cua tyizoho ñu sa quehin, ta iyo ñu cua cacu ñu.

²³Tacuan zavehi sa cuenda Tuhun Vaha ra Ndyoo vatyi cuñi sa cua tyindyee si sii tandihi ñiyivi, ta cua zacacu si sii yo.

²⁴Sito ndo vatyi nu iyo minoo carrera, sino tandihi ra sino, zoco minoo tuhun ñi ra zahacanaa. Yaty cono ndo tacuhva cuu zahacanaa ndo.

²⁵Ta yoo ra cuñi zahacanaa, zandoo ra tandihi sa cuu zativi sii ra. Cumi vaha xaan ra sii ra. Tacuan zavaha ra vatyi cuñi ra zahacanaa ra minoo corona ndaha yutu ñi sa cua tivi. Zoco maa yo nducu yo cuhva zahacanaa yo minoo sa ma ndihi.

²⁶Yucuan cuenda sino mi, zoco yivi tañi sa ña site ndyamaa cuehin. Ta sañi tehin tañi minoo ra cuñi zahacanaa.

²⁷Ta zandyehi tundoho sii coño ñuhi ta cundyaca ñehi sii si coto sa yaha zacuehi sii inga ñiyivi ta ziqui zuun ñi mi cua nandoi ityi sata.

Ma zacahnu yo sii inga ndyoo

10 Cuñi sa cua coto ndo, hermanos, tandihi sa i tahan zutu sahnu yo ityi cuahan ra nu cu si desierto ta sa naha. I tasi ra Ndyoo minoo vico sa cuahan ityi nuu tandihi ra, ta zañaha si ityi sii ra. Ta i yaha tandihi ñu sisi tyañuhu.

²Ta tacuan i sicoo ndutya tandihi ñu sisi vico cuan ta sisi tyañuhu vatyi cua cundyico ñu sii ra Moisés.

³Ta i sasi tandihi ñu ndyayu i saha maa ra Ndyoo sii ñu.

⁴Ta i sihi tandihi ñu ndutya i saha maa ra Ndyoo sii ñu. Ta ndutya i sihi ñu i tava ra Ndyoo sisi minoo yuu vatyi coho ñu. Ta yuu cuan cuu tañi maa ra Cristo.

⁵Zoco vazu i ndyehe tandihi ñu sa ndyityi i zavaha maa ra Ndyoo ityi,

zoco cuaha xaan ñu ñá zavaha ñu cuhva cuñi ra Ndyoo, ta ñá tahan iñi ra, ta i zanaa ra sii ñu.

⁶Ta tandihi cuhva cuan zañaha si minoo cuhva sii maa yo vatyi ma cuñi yo sii sa ña vaha tañi i cuñi maa ñu.

⁷Ta ma zacahnu yo sii inga ndyoo tañi i zavaha zuhva maa ñu. Catyi Tuhun Ndyoo: “I sasi ñiyivi, ta i sihi ñu, ta ziqui i nduvita ñu vatyi cua cata saha ñu” (vatyi zacahnu ñu sii zindiqui xuhun cuaan).

⁸Ta ma cuzu yo sihin numinoo ñaha tatu ma tindaha xihna yo. Minoo quivi i sihi oco uñi mil ñu vatyi i zavaha ñu cuaty i cuan.

⁹Ta ma coto ihñi yo sii ra ndyaca ñaha sii yo tañi i zavaha zuhva maa ñu, ta i sahñi coo sii ñu.

¹⁰Ta ma cahan ndo sii ra Ndyoo tañi i zavaha zuhva maa ñu, ta i tasi ra Ndyoo sii minoo ángel sa cua cahñi sii ñu, ta i sihi ñu.

¹¹Tandihi cuhva ya i tahan zutu sahnu yo ta sa naha, ta i sicundyaa si nuu tutu Ndyoo vatyi coto yo. Ta zañaha si sii yo vatyi ma zavaha yo cuhva cuan. Ta maa yo cuu yo ndito nu sa cuñi ndihi tyiemvu.

¹²Yucuan cuenda tatu sica iñun vatyi ñi xaan iñun sii ra Ndyoo, zoco coto vohon suun coto zavohon cuaty i.

¹³Tandihi cuii cuaty i sa cuñun zavohon ta iyo tucu inga ñiyivi cuñi zavaha cuhva cuan. Zoco cuu cunii iñi yo sii ra Ndyoo vatyi ma cuhva maa ra sa cuñi xaan con zavohon sa ña vaha. Cua zañaha ra minoo ityi suun, ta cua cuu conon sii sa cuñi zativi suun. Ta cua cundyee iñun ta ma zavohon sii si.

¹⁴Yucuan cuenda, ndoho hermanos, zandoo ndo sa zacahnu ndo sii inga ndyoo.

¹⁵Quehin sihin ndo tañi sa ñiyivi siñi tuñi xaan cuu ndo. Tyizoho vaha ndo sa catyi tatu ndisa a ña ndisa cuu si.

¹⁶Quivi sa nacohon iñi yo vatyi i sihi ra Cristo nuu cruz sa cuenda maa yo, sihi yo vino ta sasi yo pan. Sa sihi yo vino cuan iin ñi, cuñi si catyi si vatyi tyindyee niñi ra Cristo sii tandihi yo. Ta pan cuan cuñi si catyi si vatyi tyindyee coño ñuhu ra Cristo sii tandihi yo.

¹⁷Vazu cuaha yo cuu yo, zoco minoo ñi pan sasi yo, ta yucuan cuenda minoo ñi coño ñuhu cuu yo.

¹⁸Ndyehe ndo cuhva iyo ñiyivi hebreo, saha ñu sa saha maa ñu sii ra Ndyoo, ta sasi ñu zuhva si. Ta sihin cuhva cuan ndu-iin ñu.

¹⁹Ña catyi sihin ndo vatyi ndisa iyo cuhva sii inga ndyoo. Ñahñi. Ta ñahñi tucu cuhva iyo sii coño sa saha maa ñiyivi sii inga ndyoo.

²⁰Zoco tyehen catyi vatyi ñiyivi sa ña sito sii ra Ndyoo, saha ñu sa saha maa ñu sii cuihna ta yivi sii ra Ndyoo. Ta ña cuñi sa ndu-iin ndo sihin cuihna.

²¹Ma cuu coho ndo vino cuenda ra Cristo ta vino cuenda cuihna. Ta ma cuu casi ndo nu ndyaa mesa ra Ndyoo ta nu ndyaa mesa sii cuihna.

²²¿Atu cuñi yo sa cuxaan ra Ndyoo sihin yo? ¿Atu iyo ca tundyee iñi sii maa yo ta ziqui ca ra Ndyoo?

Cuu zavaha yo ñaa sa cuñi yo tatu ma zativi si sii inga hermano

²³Cuu zacuu yo ñaa sa cuñi maa yo, zoco ma tyindyee tandihi si

sii yo. Ndisa, saha maa ra Ndyoo sa zavaha yo ñaa sa cuñi yo, zoco ma tyindyee tandihi si sii yo ta ndundyee ca yo sihin Tuhun Ndyoo.

²⁴Cuñi si sa nducu yo cuhva coo sa vaha sii inga ñiyivi ta yivi sii sa maa ñi maa yo.

²⁵Casun ñaa ñi maa sa xico ñiyivi nuyahvi, ta ma nducu tuhun tatu sa saha maa ñiyivi sii si sii inga ndyoo coto caca iñi ndo tatu vaha a ña vaha tatu casi ndo.

²⁶Vatyí tandihi sa iyo ñuu ñiyivi cuu cuenda ra ndyaca ñaha sii yo.

²⁷Ta tatu cua cana minoo ñiyivi ña sino iñi sii ndo vatyí casi ndo vehe ñu ta cuñi ndo cuhun ndo, cuu cuhun ndo ta casi ndo ñaa sa saha maa ñu sii ndo. Ta ma nducu tuhun ndo tatu sa cuenda inga ndyoo cuu si.

²⁸Zoco tatu catyi ñu sihin ndo: “Coño sa saha maa ñiyivi sii inga ndyoo cuu ya”, catyi ñu. Ma casi ndo sii si coto zativi ndo sii ñu nacatyí sihin ndo ta caca iñi ñu vatyí zavaha ndo cuatyí.

²⁹Zativi si sii inga ñiyivi ta yivi sii maa ndo. Ta iyo ndo cua catyi ndo: “¿Ñaa cuenda cua zaña ndi sa vaha, tatu sa sica iñi ñiyivi ñi cuu si?”

³⁰Saha ndi tyahvi ndyoo sii Ndyoo sa cuenda sa cua casi ndi, ta ñaa cuenda cua cahan ñiyivi sii ndi tatu casi ndi sii si?” cua catyi ndo.

³¹Ta cua catyi sihin ndo vatyí ñaa ñi maa sa casi ndo a ñaa ñi maa sa coho ndo, zavaha ndo sii si minoo cuhva sa cua tahan iñi ra Ndyoo ta cua zacahnu si sii ra.

³²Ma zativi ndo sii ñiyivi hebreo a sii inga ñiyivi a sii ñiyivi sino iñi Tuhun Ndyoo.

³³Zavaha ndo cuhva zavehi vatyí zavehi cuhva tahan iñi ñiyivi, ta ma caca iñi ñu vatyí iyo cuatyí. Ta ña nduqui sa vaha sa cuenda ñi mi. Nduqui sa vaha sa cuenda cuaha xaan ñiyivi vatyí tacuan ta cua sino iñi ñu ta cua cacu ñu.

11 Cundyico ndo sii mi tañi ndyique sii ra Cristo.

Cuhva cuñi si zavaha ñuzihi nu iyo culto

²Ta vityí, zii xaan cuñi, hermanos, vatyí nacohon iñi ndo sii mi tandihi cuhva ta tyaa ndo yahvi cuhva sa zacuehi sii ndo.

³Zoco cuñi sa cua coto ndo vatyí ra Cristo cuu xiñi sii tandihi rayii vatyí ndyaca ñaha ra sii ra. Ta rayii cuu xiñi sii ñazihi ra. Ta ra Ndyoo cuu xiñi ra Cristo.

⁴Tatu zahvi minoo ra zahma xiñi ra ta cahan ra sihin ra Ndyoo sisi vehe ñuhu a cuhva sa cahan ra tuhun saha ra Ndyoo sii ra, saha ra ticahan nuu sii ra Cristo cuhva cuan.

⁵Zoco tatu ma zahvi ñuzihi zahma xiñi ñu cuhva cahan ñu sihin ra Ndyoo a cuhva cahan ñu tuhun i saha ra Ndyoo sii ñu, cuu si tañi sa zatya xiñi ñu. Ta saha ñu ticahan nuu sii yii ñu vatyí tatu ma zahvi ñu zahma xiñi ñu cuñi si catyi si vatyí ña ndyaca ñaha yii ñu sii ñu.

⁶Tatu ña cuñi ñuzihi sa cuzahvi xiñi ñu, nazatya xiñi ñu. Zoco tatu saha si ticahan nuu sii ñuzihi sa zatya xiñi ñu, nazahvi ñu zahma xiñi ñu.

⁷Ña vaha sa zahvi rayii zahma xiñi ra vatyí tañi caa maa ra Ndyoo

caa ra. Ta ndyaca ñaha ra sii ñazihí ra tañi ndyaca ñaha ra Ndyoo sii maa ra.

⁸Quiví i zavaha ra Ndyoo sii rayii, ñá zavaha ra sii ra sihin yiquí naha ñaha. Zoco i zavaha ra sii ñaha sihin yiquí naha rayii.

⁹Xihna ca i zavaha ra Ndyoo sii rayii. Ta sa cuenda rayii i zavaha ra sii ñaha.

¹⁰Yucuan cuenda cuñi si sa zahvi ñuzihí zahma xiñi ñu. Zañaha si vatyí ndyaca ñaha yíi ñu sii ñu. Ta tacuan ta zii cua cuñi ángel sa ndyehe si cuhva cuan.

¹¹Zoco sa cuenda maa yo, ra sino iñi, ta siñi ñuhu rayii sii ñu zihí, ta siñi ñuhu ñu zihí sii rayii. Ta cuñi si nduu tahan ñu sa cuenda tyiño ra Ndyoo.

¹²Yiquí naha rayii i sino minoo ñu zihí sa xihna ñi, ta vityí zacacu ñu zihí sii tandihí rayii. Ta maa ra Ndyoo zavaha tandihí sa iyo.

¹³Ta vityí catyí maa ndo tatu vaha a ña vaha tatu ma zahvi ñuzihí zahma xiñi ñu ta cahan ñu sihin ra Ndyoo.

¹⁴Sito ndo vatyí saha si ticahan nuu sii rayii tatu nañi xaan xiñi ra.

¹⁵Zoco tatu nañi xaan xiñi ñu zihí, zii xaan cuñi ñu sihin si vatyí saha ra Ndyoo sa cunañi ixi xiñi ñu vatyí zahvi si xiñi ñu.

¹⁶Ta tatu iyo minoo ra cuñi cahñi tahan saha tuhun ya, cuñi si sa coto ndo vatyí ñahñi inga ca costumbre iyo sii maa ndi a sii vehe ñuhu ra Ndyoo.

Nacatyí ra Pablo vatyí ña vaha cuhva zavaha ñu Santa Cena

¹⁷Ta vityí iyo inga cuhva cuñi nacatyí sihin ndo. Ta ña zii cuñi

sihin ndo cuhva ya vatyí titahan ndo, zoco ña tyindyee si sii ndo. Zatívi si sii ndo.

¹⁸Nacatyí ñiyívi sihin, vatyí cuhva titahan ndo sa zavaha ndo culto ta ña iin ñi cuhva sica iñi ndo. Ta sino iñi zuhva sa cahan ñiyívi sii ndo.

¹⁹Cuñi ndo sa coo ziiin ndo, ta tacuan ta cua coto ñiyívi yoo ndo sino iñi sa ndisa cuii, cuñi ndo.

²⁰Ta cuhva sa titahan ndo, yívi Santa Cena cuu sa sasi ndo sa ndisa

²¹vatyí minoo minoo ndo cuxiñi ndo cuhva cuñi maa ndo. Iyo ndo numi ndo ta sasi ndo cuaha, ta inga ra ña ñihi ra ta sizoco ra. Ta iyo tucu ndo siñi ndo.

²²¿Atu ñahñi vehe ndo nu cuu casi ndo ta coho ndo? Zanduquiñi caa ndo sii vehe ñuhu ra Ndyoo, ta saha ndo ticahan nuu sii ra hermano ndahvi, ra ñahñi sa cuaha casi. ¿Yozo caa cua catyí sihin ndo vityí sa cuenda cuhva ya? ¿Atu catyí vatyí vaha zavaha ndo? Ma catyí.

Cuenda sa vatyí iyo Santa Cena

²³Saha maa ra Jesús cuhva ya sii mi tañi sa nacatyí sihin ndo vatyí zuun ñi sa cuaa sa saha cuenda ra Judas sii ra Jesús, sa xihna ñi i quihin ra Jesús pan.

²⁴Ta sa yaha saha ra tyahvi ndyoo sii ra Ndyoo, ta i tahvi ra sii si, ta zasa ra sii ra apóstol, ta catyí ra: “Casi ndo. Ihya cuu tañi coño ñuhi. Cua tahvi si sa cuenda maa ndo. Zavaha ndo cuhva ya vatyí cua nacohon iñi ndo sii.” Catyí ra.

²⁵Ta sa yaha sasi tandihí ra pan, ta i tiin ra Jesús tasa ta catyí ra:

“Sihin ihya zandaa ra Ndyoo minoo tyiño saa sihin ndo. Ihya ñoho vino ta cuu si tañi niñi. Tandihí saha sa cua coho ndo sii si, coho ndo sii si vatyi nacohon iñi ndo sii.” I catyi ra Jesús quívi cuan.

²⁶Ta tandihí saha titahan ndo ta casi ndo pan ta coho ndo vino cuhva ya, zañaha ndo sii ñiyívi cuhva i sihi ra Jesús ndya quívi cua quisi tucu ra.

Cuhva cuñi si zavaha yo Santa Cena

²⁷Tatu casi yo pan ya ta coho yo vino ra Cristo sihin minoo cuhva ña tahan iñi ra Ndyoo, cua coo cuatyí yo vatyi ña tyaa yo yahvi sii coño ñuhu ta niñi ra ndyaca ñaha sii yo.

²⁸Cuñi si sa ndyehe vaha yo sii yo tatu iyo vaha yo sihin ra Ndyoo, ta ziquí casi yo pan cuan ta coho yo vino cuan.

²⁹Vatyi tatu casi yo ta coho yo ta ña zaha yo cuenda vatyi coño ñuhu ra Cristo cuu si, zavaha yo minoo cuhva sa cua tasi tuñi ra Ndyoo sii yo.

³⁰Ta zuun ñi yucuan cuenda cuaha xaan ndo cuhu ndo ta vita iyo ndo, ta iyo ñu tahan ndo sa yaha sihi ñu.

³¹Zoco tatu ndyehe vaha yo sii yo, ma tahan yo tacuan.

³²Zoco tatu tacuan zavaha ra Ndyoo sihin maa yo, cañi ra sii yo vityi sa vatyi ma cunaa yo sihin inga ñiyívi ñuu ñiyívi.

³³Ta yucuan cuenda, ndoho hermanos, tatu titahan ndo sa cuenda Santa Cena, cuatu noo ndo sii inga ndo ta iñi ñi casi ndo ta coho ndo.

³⁴Zoco tatu iyo ndo sizoco ndo, casi xihna ndo ndya vehe ndo coto

zavaha ndo minoo cuhva sa ma tahan iñi ra Ndyoo ta cua tasi tuñi ra sii ndo. Ta inga tucu tyiño sa cumañi ndundoo cua zandundoi quívi cua cuhin nu yucu ndo.

Ndatu sa saha Tatyí Ii sii minoo minoo yo

12 Hermanos, cuñi sa cua coto ndo tandihí sa vaha sa saha maa Tatyí Ii ra Ndyoo sii sa minoo minoo yo.

²Sito ndo vatyi quívi sa ña sito ndo sii ra Ndyoo, i saha ndo sii ndo sa cundyaca ñaha inga ndyoo sa ña cuu cahan.

³Yucuan cuenda cuñi sa coto maa ndo vatyi tatu cahan minoo ra sihin cuhva saha Tatyí Ii sii ra, ma cuu cahan ra ndya vaha ñi sii ra Jesús. Ta ma cuu catyi ra vatyi ndyaca ñaha ra Jesús sii ra tatu ña tyindyee Tatyí Ii sii ra.

⁴Ziñ ziñ ndatu saha maa ra Ndyoo sii minoo minoo yo. Zoco zuun ñi maa Tatyí Ii cuu ra saha sii si.

⁵Ta ziñ ziñ cuhva zatyíño yo tyiño ra Ndyoo, zoco minoo ñi ra ndyaca ñaha sii yo.

⁶Ziñ tyiño saha ra sii sa minoo minoo yo, zoco minoo ñi ra Ndyoo cuu ra sityiño sii tandihí yo.

⁷Saha maa ra Tatyí Ii ra sii minoo minoo yo sihin minoo cuhva sa cuu tyindyee si sii tandihí yo.

⁸Vatyi sii minoo yo saha xaan ra sa siñi tuñi sa cuenda Tatyí Ii. Ta sii inga ra saha Tatyí Ii ndatu sa cuu nacoto ra minoo sa zacoto ra Ndyoo sii ra.

⁹Ta sii inga ra saha ra sa cunii xaan iñi ra. Ta inga ra cuu

zanduvaha ra sii ñiyivi cuhu sihin Tatyí li.

¹⁰Inga ra cuu zavaha ra sa ndyityi. Ta inga ra cuu xaan nacatyí ra Tuhun Ndyoo. Inga ra cuu nacoto ra tatu cahan Tatyí li a tatyí ña vaha; inga ra cuu cahan ra zahan sa ña tuhva ra cahan; ta inga ra cuu nacatyí ra ñaa sa cahan ra cahan cuhva cuan.

¹¹Ta tandíhi cuhva ya zavaha sa minoo tuhun ñi Tatyí li; ziiin ziiin cuhva saha maa ra sii sa minoo minoo yo cuhva cuñi maa ra.

**Tandíhi yo cuu yo minoo
ñi coño ñuhu ra Cristo**

¹²Ra Cristo cuu tañi minoo coño ñuhu. Ta minoo coño ñuhu iyo sa ziiin ziiin cuhva sii si. Iyo xiñi si, iyo saha si, iyo ndaha si. Zoco sa tandíhi si cuan minoo ñi coño ñuhu cuu si.

¹³Ta tacuan cuu maa yo vatyí minoo ñi Tatyí li i zacoo ndutyá sii tandíhi yo, ta minoo ñi coño ñuhu cuu tandíhi yo sa sino iñi vazu cuu yo ñiyivi hebreo a griego a vazu iyo patrón yo a vazu yoñi. I ñihi tandíhi yo sa minoo ñi Tatyí li

¹⁴vatyí sa minoo coño ñuhu, iyo cuaha cuhva sii si, yivi sa minoo ñi.

¹⁵Tatu catyí saha cuan: “Yivi ndaha cui, ta yucuan cuenda yivi sa cuenda coño ñuhu cui.” ¿Atu ndisa sa cahan si?

¹⁶A tatu catyí zoho cuan: “Yivi siti nuu cui, ta yucuan cuenda yivi sa cuenda coño ñuhu cui.” ¿Atu ndisa?

¹⁷Tatu tandíhi coño ñuhu cuan cuu siti nuu, ¿yozo caa cua cuiñi si? A tatu tandíhi coño ñuhu cuu zoho, ¿yozo caa cua ñihi si xico?

¹⁸Zoco i zavaha ra Ndyoo ziiin ziiin cuhva sihin minoo coño ñuhu cuhva cuñi maa ra.

¹⁹Tatu iin ñi cuhva caa tandíhi si, yivi minoo coño ñuhu cuu si, ta ña tyaqui cua cuu si.

²⁰Zoco sa cuenda sa cuaha cuhva iyo sii si, ta minoo ñi coño ñuhu cuu si.

²¹Ma cuu catyí siti nuu cuan sihin ndaha cuan: “Ña siñi ñuhun sii, cuahan.” Ta ma cuu catyí xiñi cuan sihin saha cuan: “Ña siñi ñuhun sii.”

²²Ña tacuan, vatyí zuhva coño ñuhu caa si tañi sa ña ñiñi si, yucuan cuu sa ñiñi xaan ca.

²³Ta zuhva coño ñuhu sa sica iñi yo vatyí ma tyaa yo yahvi sii si, yucuan cuu sa ñihi ca zacuenda yo. Ta sii sa quiñi ca caa, zandutyáqui ca yo sii si.

²⁴Ta sihin sa tyaqui ca caa, ñahñi zavaha yo. Ta i zandu-iin ra Ndyoo sii coño ñuhu ra sihin minoo cuhva zacahnu ca si sii ra hermano ña tuhva ñiyivi tyaa yahvi. Ta maa yo cuu coño ñuhu ra.

²⁵Ta tacuan i zavaha ra vatyí ma cuziin ziiin coño ñuhu ra, zoco cua zacuenda tahan si sii tahan si.

²⁶Tatu zuhva coño ñuhu ra Cristo ndyehe si tundoho, ndyehe tandíhi si tundoho. Ta tatu iyo zuhva si zacahnu ñiyivi, tandíhi si cua cuziñi iñi.

²⁷Ta maa yo cuu coño ñuhu ra Cristo. Minoo minoo yo cuu yo zuhva zuhva coño ñuhu ra.

²⁸Ta i tyihi ra Ndyoo sii minoo minoo yo sisi vehe ñuhu ra vatyí cuu tyindyee yo sii inga yo. Ra ñiñi ca cuu ra tava ra Jesús tyiño sa cuu ra apóstol. Sa cu uu cuu ra cahan

tuhun saha ra Ndyoo sii ra; profeta cuu ra. Sa cu uñi cuu ra zacuaha. Ta ziqui iyo ra zavaha sa ndyityi, ta ra zanduvaha sii ñiyivi cuhu, ta ra cuu tyindyee sii inga hermano, ta ra cuu cundyaca ñaha sii inga hermano, ta ra cuu cahan inga zahan sa ña tuhva ra cahan.

²⁹Ña tandihi yo cuu yo apóstol a ra cahan tuhun saha ra Ndyoo sii ra, a ra zacuaha, a ra zavaha sa ndyityi.

³⁰Ña tandihi yo cuu zanduvaha yo sii ñiyivi cuhu a cahan yo lengua a nacatyí yo ñaa sa cahan ñiyivi cahan lengua.

³¹Zoco nacuñi yo sa vaha ca. Ta cua zañehi sii ndo minoo ityi vaha xaan ca.

**Cuhva cuñi si sa cuñi
xaan yo sii ñiyivi**

13 Vazu cuu quehin zahan sa cahan ñiyivi ta sa cahan ángel, zoco tatu ña cuñi sii ñiyivi, minoo nduzu ñi cui tañi nañi minoo tamvu a nañi minoo caa.

²Ta vazu cuu xaan quehin tuhun saha ra Ndyoo sii, ta cutuñi iñi tandihi sa xehe ta tandihi sa siñi tuñi sii maa ra Ndyoo, ta tatu ñi xaan cuu iñi ndya cuhva ndya cuu zacuñi siye yucu zoco ña cuñi sii ñiyivi, ñahñi maa ra cui.

³A tatu sehi tandihi cuii ndaha tyiñe sii ñiyivi ndahvi ta cuhve sa cayu coño ñuhi zoco ña cuñi sii ñiyivi, ñahñi maa cua tyindyee si sii.

⁴Tatu cuñi xaan yo sii ñiyivi, zandyee xaan yo iñi yo sihin ñu ta zavaha xaan yo sa vaha sihin ñu. Ma cuxaan yo tatu iyo sa vaha sii ñu. Ma zacahnu yo sii yo ta catyi yo vatyí vaha xaan maa yo.

⁵Tatu cuñi xaan yo sii ñiyivi, ma cuhva yo ticahan nuu sii ñu. Cua nanducu yo sa vaha sii ñu ta yivi sa cuenda ñi maa yo. Ma yatyi xaan cuxaan yo. Ta ma ndoo sa cuxaan yo añaima yo.

⁶Tatu cuñi xaan yo sii ñiyivi, ma cuzii iñi yo tatu zavaha ñu sa ña vaha, zoco cua cuzii iñi yo sihin sa vaha ta sa ndoo.

⁷Tatu cuñi xaan yo sii ñiyivi, zandyee yo iñi yo sihin tundoho sa saha ñu sii yo; sino iñi yo vatyí cua zavaha ñu sa vaha; ñi cuu iñi yo sii ñu. Ta cua zandyee yo iñi yo ñaa ndihi cuii ca tundoho.

⁸Cuhva sa cuñi xaan yo sii ñiyivi ma naa si. Cua coo quivi ma cahan ca yo tuhun saha ra Ndyoo sii yo. Ma cahan ca yo lengua. Ma nacoto ca yo minoo sa zacoto ra Ndyoo sii yo.

⁹Vatyí vityí zuhva ñi sito yo, ta zuhva ñi cuu nacatyí yo Tuhun Ndyoo.

¹⁰Zoco quivi cua quisi ra Cristo ta cua naa tandihi inga cuhva cuan vatyí cua coto yo vatyí zuhva cuii ñi cuu sa sito yo vityí.

¹¹Quivi i culuhli i quehin tañi cahan minoo ra luhlu, ta tacuan i cuu sa siñi tuñi, ta tacuan ñi i cutuñi iñi. Zoco quivi i sahani, i zandoi cuhva zacuu sa ndyihí.

¹²Ta zuun ñi cuhva cuan vityí, cuu yo tañi sa ndyihí sa cuenda ra Ndyoo. Cuu si tañi ndyehe yo zuhva ñi sihin minoo ino ta ña casi xaan ndyehe yo. Zoco quivi cua quisi ra Cristo, ta cua ndyehe vaha yo sii ra ityi nuu ra. Zuhva ñi sito yo vityí, zoco quivi cuan cua coto yo tandihi tañi sito ra Ndyoo sii maa yo vityí.

¹³Ta vityi ñi iñi yo sii ra Ndyoo. Ta iyo minoo sa ndatu yo. Quivi cua quisi ra Cristo cuu sa ndatu yo. Ta cuñi xaan yo sii ñiyivi. Ta sa ñiñi ca sisi sa uñi tahan ya cuu sa cuñi xaan yo sii ñiyivi.

**Cuhva cahan yo inga zahan
sa ña tuhva yo cahan**

14 Nducu ndo cuhva cuñi xaan ndo sii ñiyivi. Ta cuñi xaan ndo sa cua cuhva ra Ndyoo sa ziin ziin ndatu sa saha maa Tatyí li sii ndo. Ta sa ñiñi ca cuu sa cahan yo tuhun saha ra Ndyoo sii yo. Sa zaha yo profetizar cuu cuhva cuan.

²Vatyí tatu cahan ndo lengua, cahan ndo sihin ra Ndyoo, ña cahan ndo sihin ñiyivi vatyí yoñi cutuñi iñi sa cahan ndo. Cahan ndo sa xehe sihin maa ra Ndyoo.

³Zoco tatu cahan yo tuhun saha ra Ndyoo sii yo, cua cutuñi iñi ñiyivi. Cua zandundyee ca ra Ndyoo iñi ñu, ta cua cuhva ca ra tundyee iñi sii ñu tatu cuihya cuñi ñu.

⁴Tatu cahan yo lengua ndundyee iñi maa yo, zoco tatu cahan yo tuhun saha ra Ndyoo sii yo zandundyee yo iñi tandihi ñiyivi tyizoho.

⁵Cuñi vatyí cahan tandihi ndo lengua, zoco sa ñiñi ca cuñi sa zaha ndo profetizar vatyí tyindyee ca ra cahan cuhva cuan ta ziquí ra cahan lengua. Zoco tatu cuu nacatyí ra cahan lengua ñaa tuhun i cahan ra a tatu cuu nacatyí inga ndo, cua tyindyee si sii tandihi ndo.

⁶Ta quivi sei nu yucu ndo, hermanos, tatu maa lengua ñi quehin ma tyindyee si sii ndo

vatyí ma cutuñi iñi ndo. Zoco tatu quehin sihin tuhun sa cutuñi iñi ndo ta nacatyí tuhun sa saha ra Ndyoo sii a ñaa minoo cuhva sa catyí Tuhun ra ta zanducasi sii si, tyindyee si sii tandihi ndo.

⁷Taño ra zavacu guitarra a ra tiví cutu, tatu ma ñiñi ra cuhva tiví ra a ma ñiñi ra cuhva zavacu ra, ma nacoto yo ñaa yaa cuu si.

⁸Ta nu iyo cuatyí tatu ma tiví vaha ra tiví trompeta, ma coto zandaru yozo caa nu cundyaa listo ra.

⁹Ta tacuan tucu maa yo, tatu ma cahan yo tuhun sa cuu cutuñi iñi ñiyivi, ma coto ñu ñaa sa catyí yo. Taño sa ndyayu ñi yuhu yo cuu si.

¹⁰Iyo cuaha xaan nuu zahan ñuu ñiyivi ya, ta tandihi cui si iyo cuhva cuñi si catyí si.

¹¹Zoco tatu ña cutuñi iñi yo zahan sa cahan minoo ñiyivi, ma cuu natuhun yo sihin ra, ta ma cuu natuhun ra sihin yo.

¹²Site vatyí cuñi tandihi ndo ñiñi ndo ndatu sa saha Tatyí li sii ndo; yucuan cuenda catyí sihin ndo vatyí ñiñi xaan cuñi ndo cuhva vaha ca vatyí tacuan ta cua cuu tyindyee ndo sii tandihi hermano.

¹³Ta ndoho sa cahan lengua, caca ndo sii ra Ndyoo vatyí cuhva ra cuhva sa cuu nacatyí ndo ñaa sa cahan ndo.

¹⁴Vatyí tatu cahan yo lengua, cahan aña yo, zoco ña tyindyee sa siñi tuñi sii yo.

¹⁵Cuñi si sa cahan yo sihin ra Ndyoo sihin aña yo ta sihin sa siñi tuñi tucu yo. Cua cata yo sihin aña yo (sihin lengua) ta sihin sa siñi tuñi tucu yo (sihin tuhun sa cutuñi iñi yo).

¹⁶Vatyi tatu maa ñi sihin lengua zacahnun sii ra Ndyoo ta ndyaa inga ra ña sito ñaa sa cuu si, ma cuu zacahnu ra Ndyoo suhun vatyi ña cutuñi iñi ra sa cohon.

¹⁷Vazu vaha xaan nacuhvon tyahvi ndyoo sii ra Ndyoo, zoco ñahñi maa tyindyee si sii inga ra cuan.

¹⁸Sehi tyahvi ndyoo sii ra Ndyoo vatyi cuaha ca quehin lengua ta ziqui tandihi ndo.

¹⁹Zoco nu iyo culto vaha ca cuñi vazu ohon tahan ñi tuhun sa cuu cutuñi iñi ñiyivi quehin ta zacuehi sii ñu ta ziqui ca sa quehin usi mil tuhun sihin lengua sa ma cutuñi iñi ñu.

²⁰Hermanos, ma cuu ndo tañi sa ndyih sihin cuhva iyo sa siñi tuñi sii ndo. Caca iñi ndo cuhva sica iñi ra sahnun, zoco tañi sa ña tuhva ra ndyih zavaha sa quiñi, cuhva cuan cuu tucu maa ndo.

²¹Catyi ra Ndyoo nuu libro sa cuu ley maa ra: “Cua quehin sihin ñiyivi ya sihin inga zahan, ta cua cutyiñe ñiyivi inga ñuu, zoco numaa tacuan ta ma tyaa ñu yahvi sa quehin.”
Catyi ra.

²²Yucuan cuenda, sa cahan yo lengua cuu minoo zeña zañaha ra Ndyoo sii ñiyivi sa ña sino iñi sii ra. Zoco sa cahan yo tuhun i saha ra Ndyoo sii yo cuu sa cuenda ñiyivi sa sino iñi ta yivi sa cuenda ñiyivi ña sino iñi.

²³Tatu titahan tandihi ndo ta cahan tandihi ndo lengua, ta tatu quisi ñiyivi ña sito ñaa sa cuu si a ñiyivi ña sino iñi sii ra Ndyoo, cua vatyi ñu vatyi zana xiñi ndo.

²⁴Zoco tatu tandihi ndo cahan ndo tuhun i saha ra Ndyoo sii ndo ta quihvi ñiyivi ña sino iñi a ña sito, cua nacoto ñu vatyi iyo cuatyi ñu vatyi cutuñi iñi ñu sa cahan ndo.

²⁵Cua coto ñu vatyi sito ra Ndyoo sa xehe sa iyo aña ñu. Ta cua cuiñi siti ñu, ta cua zacahnun ñu sii ra Ndyoo ta vatyi ñu vatyi ndisa cui ndyaa xaan ra Ndyoo sihin ndo.

Cuhva zavaha yo culto sihin minoo cuhva tyaqui ta vaha

²⁶Ihya cuu cuhva cuñi si, hermanos; tatu cua titahan ndo, tahan tahan ndo quisi ndo sihin minoo coro sa cuñi ndo cata ndo a minoo cuhva sa cua zacuaha ndo a minoo cuhva sa zacuaha ra Ndyoo sii ndo, ta nacatyi ndo sii si. A cuu cahan ndo lengua a cuu nacatyi ndo ñaa sa vatyi ra cahan lengua. Tahan tahan ndo zavaha ndo cuhva sa cua tyindyee sii tandihi ndo.

²⁷Tatu iyo ndo cuñi ndo cahan ndo lengua, nacahan a uu a uñi tahan ñi ndo minoo minoo ndo. Ta nacatyi minoo ra ñaa sa vatyi ndo.

²⁸Zoco tatu yoñi nacoto, vaha ca ma cahan ndo lengua nu iyo culto. Cuae ñi cahan ndo maa ñi maa ndo sihin ra Ndyoo.

²⁹Ta tatu iyo ndo cuñi ndo cahan ndo tuhun i saha ra Ndyoo sii ndo, cuu cahan a uu a uñi tahan ndo minoo minoo ndo. Tyizoho inga ndo ta ndyehe ndo tatu vaha a ña vaha sa cahan ra cahan.

³⁰Ta tatu zacoto ra Ndyoo ñaa minoo cuhva sii minoo ra tyizoho, cuiñi si vatyi nacutaxi ra cahan cuan ta nacahan inga ra.

³¹Ta tacuan tandihi ndo sa ñihi ndo tuhun i saha ra Ndyoo sii ndo, cuu cahan ndo sii si minoo minoo ndo, ta cua cutuhva tandihi ndo cuaha ca, ta cua ñihi ca ndo tundyee iñi sihin Tuhun Ndyoo.

³²Tatu saha maa ra Ndyoo minoo tuhun sii ndo sa cua cahan ndo, cuu cuatu noo ndo.

³³Vatyi ña cuñi ra Ndyoo sa coo tizihí ta sa cuvaa. Cuñi ra sa coo sa vii tañi iyo tandihi inga vehe ñuhu nu titahan ra hermano.

³⁴Nacutaxi ñu zihí nu iyo culto. Ma cuu cahan ñu vatyi catyi ley maa ra Ndyoo vatyi nacundyaca ñaha rayii.

³⁵Ta tatu iyo sa cuñi ñu coto ñu, nandaca tuhun ñu sii yí ñu ndya vehe ñu vatyi ña tyaqui cuu si tatu cahan ñu nu iyo culto.

³⁶Tatu sica iñi ndo inga cuhva, cuñi si sa nacohon iñi ndo vatyi ñá quisaha Tuhun Ndyoo sihin maa ndo. Ta ña vasi si sa cuenda sa maa ñi maa ndo.

³⁷Tatu iyo ndo sica iñi ndo vatyi cuu cahan ndo tuhun saha ra Ndyoo sii ndo a tatu iyo ndo sica iñi ndo vatyi saha ra Ndyoo Tatyí li ra sii ndo, cua nacoto ndo vatyi cuhva tyei ihya cuu tyiño i tava ra ndyaca ñaha sii yo.

³⁸Zoco tatu iyo ndo ña cuñi ndo coto ndo ñaa sa cuu sa ndisa, nandoo ndo tacuan ñi.

³⁹Tacuan catyi sihin ndo hermanos, cuñi xaan ndo sa cahan ndo tuhun saha ra Ndyoo sii ndo, ta ma catyi ndo vatyi ma cuu cahan ñiyivi lengua.

⁴⁰Vii ñi zavaha ndo tandihi ta ña vaa xaan.

Cuhva i nandoto ra Cristo

15 Vityi, yañi xaa, cuñi sa cua nacohon iñi ndo tuhun sa cuenda cuhva cacu yo, tuhun sa i zacote sii ndo. Sa i tiin cuenda ndo sii si, ta sino iñi ndo sii si ndya vityi.

²Ta zuun ñi si cuu sa zacacu sii ndo tatu ma naa iñi ndo tuhun sa zacote sii ndo, ta tatu ndisa cuii i sino iñi ndo sii si.

³Sa xihna ñi sa i zacote sii ndo cuu cuhva i sihi ra Cristo sa cuenda cuatyi maa yo tañi catyi Tuhun Ndyoo. Ihya cuu sa i cutuhva mi sa xihna ñi.

⁴Ta i tyihi ñiyivi sii ra sisi ñaña, ta sa cu uñi quivi i nandoto ra tañi catyi si nu tutu ra Ndyoo cuhva cua tahan ra.

⁵Ta i ndyehe ra Pedro sii ra ta ziqui ca tandihi usi uu tahan ra i tava ra tyiño.

⁶Yaha cuan ta i ndyehe ohon ziendu ra hermano sii ra iin ñi cuhva. Ta cuaha xaan ra cuan ndito ra ndya vityi, zoco iyo ra sa sihi ra.

⁷Cuee ca i ndyehe ra Jacobo sii ra, ta ziqui ca tandihi ra i tava ra Jesús tyiño.

⁸Ta sa yaha tandihi cuan ta ziqui i ndyehe tucu mi sii ra. Tañi minoo ra cuee xaan i cacu cui.

⁹Vatyi ñiñi ca tandihi inga ra i tava ra tyiño ta ziqui ca mi. Yivi ra vaha cui tañi inga ra i tava ra tyiño vatyi i zavaha xein sa ña vaha sihin ñiyivi ñoho cuenda ra Ndyoo quivi ta sino ca iñi.

¹⁰Zoco cahnú xaan cuu cuhva cundahvi iñi ra Ndyoo sii. Zaha xaan ra tumañi iñi sii, ta i tava ra

tyiño sii. Ta yivi sa caha ñi i tava ra tyiño sii vaty i zatyine ñihi ca ta ziqui tandihi inga ra i tava ra tyiño. Zoco yivi mi zatyino sa ndisa vaty maa ra Ndyoo ndyaa sihin, ta maa ra zacuu tyiño cuan.

¹¹Ta zuun ñi si cuu si a mi a inga ra vaty sa ñiñi ca cuu sa i zacoto ndi Tuhun Ndyoo sii ndo, ta i sino iñi ndo sii si.

Ndisa vaty cua nandoto ñiyivi i sihi

¹²Nacaty ndi sihin ndo vaty i nandoto ra Cristo sa yaha i sihi ra. ¿Ta ñaa cuenda iyo ndo caty ndo vaty ma nandoto ñiyivi tatu sa yaha i sihi ñu?

¹³Zoco tatu sica iñi ndo vaty ma nandoto ñiyivi, vaziqui ndya ra Cristo ta ñá nandoto ra.

¹⁴Ta tatu ñá nandoto ra Cristo, sa caha ñi cuu sa nacaty ndi Tuhun Ndyoo, ta sa caha ñi sino iñi ndo.

¹⁵Tatu ña ndisa vaty i zanandoto ra Ndyoo sii ra Cristo, ra vaty cuu maa ndi vaty caty ndi vaty i zanandoto ra Ndyoo sii ra. Ta ñá zanandoto ra sii ra tatu ma nandoto ñiyivi i sihi, (tañi caty maa ndo).

¹⁶Vaty tatu ma nandoto ñiyivi i sihi, ñá nandoto ra Cristo.

¹⁷Ta tatu ñá nandoto ra Cristo, sa caha ñi sino iñi ndo sa i zandasi ra cuaty ndo. Ndo ca cuaty ndo sata ndo tatu ñá nandoto ra.

¹⁸Ta tatu tacuan cuu si, ndya cuhva ndya ra sino iñi sii ra Cristo, ra sa sihi, cunaa ra.

¹⁹Tatu cuhva sino iñi yo sii ra Cristo tyindyee si sii yo maa ñi ihya ñuu ñiyivi, ndahvi ñi cuu yo. Yoñi ca inga ñiyivi ndyehe ca tundoho ta ziqui maa yo.

²⁰Zoco sa ndisa cuu si vaty i nandoto ra Cristo. Sa xihna ñi maa ra i nandoto nu yucu ñiyivi i sihi, ta yucuan cuenda cua nandoto tucu maa yo.

²¹Sa cuenda minoo rayii, ta i quisaha cuhva sihi ñiyivi. Ta sa cuenda inga rayii, ta i quisaha coo cuhva sa nandoto ñiyivi.

²²Sa cuenda ra Adán ta sihi tandihi ñiyivi. Ta sa cuenda ra Cristo ta cua nandoto tandihi yo sa cuu cuenda ra.

²³Zoco cua nandoto yo quivi tahan si sii yo. Xihna ca ra Cristo i sihi ta i nandoto ra, ta cuee ca, quivi quisi tucu ra, cua nandoto ñiyivi sa cuu cuenda ra.

²⁴Yucuan cuu nu cua ndihi tuhun. Xihna ca cua zanaa ra Cristo cuhva sii tandihi ra ndyaca ñaha ta ra cu tyiño ta tandihi ra xaan iñi sii ra. Ta cua nacuhva cuenda ra tandihi si, ta cua cundyaca ñaha ra Ndyoo Zutu yo sii si.

²⁵Vaty tahan si sii ra Cristo cundyaca ñaha ra ndya cua zandih ra cuhva sii tandihi ra xaan iñi sii ra.

²⁶Ta minoo sa xaan iñi sii ra Cristo cuu cuhva sa sihi ñiyivi. Ta nu ndihi tuhun, cua zanaa ndihi ra cuhva cuan

²⁷vaty i saha ra Ndyoo sa cundyaca ñaha ra Cristo tandihi. Zoco nu caty Tuhun Ndyoo vaty cua cundyaca ñaha ra tandihi, ña cuñi si caty si vaty cua cundyaca ñaha ra sii ra Ndyoo vaty maa ra Ndyoo cuu ra saha sa cundyaca ñaha ra Cristo tandihi.

²⁸Zoco tatu sa ndyaca ñaha ra Cristo, zehe ra Ndyoo, tandihi ta

ziqui cua cuhva cuenda ra tandihi si sii Zutu ra sa cundyaca ñaha maa ra, ta zuun ñi maa ra cua cuhva ra sii ra cundyaca ñaha Zutu ra. Ta ra Ndyoo cua cuu ra Ndyoo sii tandihi sa iyo.

²⁹Ta inga tucu cuhva; iyo ndo sicoo ndutyua ndo sa cuenda ñiyivi i sihi. Zoco sica iñi ndo vatyí ma nandoto ñiyivi i sihi, ta sa caha ñi sa coo ndutyua ndo sa cuenda ñu tatu ma nandoto ñu.

³⁰Ta tatu ma nandoto yo cuñi ndo, ¿ña cuenda sino iñi yo Tuhun Ndyoo? Ta tatu ma nandoto yo cuñi ndo, sa caha ñi cuu sa sino iñi yo Tuhun Ndyoo ta saha yo cuhva sii ñiyivi sa cahñi ñu sii yo ndya vaha ñi cuhva.

³¹Ndisa vatyí tandihi quivi cuñi cahñi ñiyivi sii. Ndisa xaan cuhva cuan tañi sa ndisa tucu vatyí zii xaan cuñi sihin maa ndo sihin cuhva sino xaan iñi ndo sii ra Cristo Jesús, ra ndyaca ñaha sii yo.

³²Ta quivi sahñi tehin sihin ñiyivi tañi quití xaan cuu ñu ñuu Efeso ¿yozo caa cua tyindyee si cuan sii, tatu ma nandoto ñiyivi i sihi? Ta tatu sa ndisa vatyí ma nandoto ñiyivi, nacasi yo ta nacoho yo ta nacuzii iñi yo ñuu ñiyivi ya vatyí ityaan a iza cua cuu yo, ta cua ndihi si yucuan ñi.

³³Ma cuhva ndo sa zandavi ñaha ñiyivi sii ndo. Ndisa minoo cuhva catyi si: “Tatu cu-iiñi ndo sihin ñiyivi ña vaha, cua zativi ñu sii ndo.”

³⁴Zaha cuenda ndo ñaa sa cuu sa vaha, ta ma zavaha ca ndo cuatyí vatyí ndya vityí iyo ndo tañaha ca

coto ndo sii ra Ndyoo. Catyi cuhva ya vatyí cuñi sa cucahan nuu ndo.

Cuhva cua nandoto ñiyivi i sihi

³⁵Ta iyo ndo cua catyi ndo: ¿Yozo caa cua nandoto tucu ñiyivi i sihi? ¿Yozo caa cua nduu coño ñuhu ñu?

³⁶Ma tondo xaan cuu ndo. Ñaa ñi maa sa tasi yo, ma caña si tatu ma tyahyu xihna coño si.

³⁷Vatyí ña tuhva yo tasi tuñama, tasi yo nuñi. Ta tatu cuñi yo sa caña yoho ndutyí, cua tasi yo ndutyí. Maa siti ñi cuu sa tasi yo.

³⁸Ta cua caña si cuhva cuñi ra Ndyoo vatyí ziiñ ziiñ cuhva caña sa ziiñ ziiñ siti.

³⁹Ña inuu ñi caa tandihi coño ñuhu. Ziiñ caa coño ñuhu ñiyivi, ta ziiñ caa coño quití. Ta tucu caa coño zaa ta coño tyiyaca.

⁴⁰Ta tucu caa sa iyo ityi ziqui sihin sa iyo nu ñuhu. Tyaqui xaan sa iyo ityi ziqui, ta tyaqui tucu sa iyo nu ñuhu, zoco tucu caa si.

⁴¹Ziiñ caa sa ndisi ñicandyí ta sa ndisi yoo, ta ziiñ tucu caa tiño. Ta ña inuu ñi caa tandihi tiño.

⁴²Ta zuun ñi cuhva cuan cua cuu quivi nandoto yo vatyí cua ndu-ziiñ yo. Sa tyihi ñiyivi sisi ñuhu cuu coño ñuhu yo sa cua tyahyu, zoco sa cua nandoto cuu minoo sa ma tyahyu ta ma tiví.

⁴³Coño ñuhu yo sa iyo vityí, yivi sa vaha xaan cuu si vatyí cua tyahyu si tatu quihvi si sisi ñuhu, zoco cuhva sa cua nandoto yo, yaha xaan tyaqui cua nduu yo. Ñahñi ca sa cuu zacuu coño ñuhu yo quivi quihvi si ñaña, zoco cua nandoto si sihin cuaha xaan cuhva.

⁴⁴Coño ñuhu yo sa cuu cuenda ñuu ñiyivi ya, cua quihvi si sisi ñaña, zoco quivi cua nandoto si, yivi ca cuenda ñuu ñiyivi ya cua cuu si. Iyo coño ñuhu yo sa cuu cuenda ñuu ñiyivi ya, ta cua coo tucu inga si sa yivi cuenda ñuu ñiyivi ya zoco sa cuenda andivi. Ta yucuan cuu sa ma tivi.

⁴⁵Catyi Tuhun Ndyoo: “Rayii sa sicoo sa xihna ñi, ra Adán, i sicoo coño ñuhu ra ta ndito añima ra”, zoco vaha ca ra Cristo vaty saha maa ra cuhva sii ñiyivi sa nandoto ñu.

⁴⁶Sa xihna ñi iyo coño ñuhu yo. Sa cuenda ñuu ñiyivi ya cuu si. Cuae ca cua cuhva ra Ndyoo inga coño ñuhu sii yo sa cuu cuenda andivi.

⁴⁷Tacuan cuu si vaty sa xihna ñi rayii i zavaha ra Ndyoo, ñuhu i cuu ra. Zoco sa cuu uu i quisi inga ra ndya andivi. Ta maa ra cuu ra ndyaca ñaha sii yo.

⁴⁸Coño ñuhu maa yo cuu sa sino sihin ndyahyu tañi coño ñuhu ra Adán, ta tatu sino iñi yo sii ra Cristo cuee ca cua cuhva maa ra minoo coño ñuhu saa sii yo sa cua cundito andivi, ta cua cuu yo tañi maa ra.

⁴⁹Vityi caa yo tañi caa rayii i sino sihin ndyahyu, ta cuee ca cua nduu yo tañi caa ra Cristo.

⁵⁰Cuñi catyi sihin ndo hermanos, vaty ma cuu quihvi coño ñuhu yo nu ndyaca ñaha ra Ndyoo. Ma cuu quihvi minoo sa cua tivi nu ñahñi sa tivi iyo.

⁵¹Vityi cua nacatyi minoo tuhun xehe sihin ndo. Ña tandihi cuii yo

cua cuu, zoco cua nazama ra Ndyoo sii tandihi yo.

⁵²Natahan si quivi, yaty xaan cua nacasi tahan tyiño; tañi tyehen ñi, tañi minoo tuhun zatahan nuu ñi cua cuu si. Sa xihna ñi cua coo nduzu cutu, ta ziqui cua nandoto ñiyivi i sihi. Cua zama ra Ndyoo cuhva iyo ñu, ta ma cuu ca ñu. Ta maa yo tatu ndito ca yo, cua zama tucu ra Ndyoo cuhva iyo yo.

⁵³Vityi cuu tivi coño ñuhu yo, zoco cua zama ra Ndyoo sii yo minoo cuhva sa ma tivi ca yo.

⁵⁴Vityi iyo coño ñuhu yo minoo cuhva sa cuu cuu si, zoco quivi cua nazama ra Ndyoo sii si, ta ma cuu ca si. Tacuan ta cua tahan si cuhva catyi si sisi Tuhun Ndyoo nu catyi si: “Zahacanaa ra Ndyoo sii tuhun sihi ñiyivi.”

⁵⁵Ta catyi tucu Tuhun Ndyoo: “Cua zacaqui sii ndo sisi sa i sihi ndo, ta ma cuu cuii ndo. Ta ma zahacanaa ca tuhun sihi sii ñiyivi.”

⁵⁶Sa saha cuhva sii tuhun sihi cuu cuaty yo. Ta catyi ley sahnu ñaa sa cuu cuaty yo.

⁵⁷Zoco tyahvi ndyoo sii ra Ndyoo vaty saha ra cuhva sii maa yo, ta cuu zahacanaa yo sa cuenda ra Jesucristo, ra ndyaca ñaha sii yo.

⁵⁸Yucuan cuenda, ndoho hermanos, ra sa ñoho xaan iñi, iin xaan cuu ndo sihin Tuhun Ndyoo. Coto ñaha cuiñi siyo ndo. Ñihi xaan zatyño ndo tyiño ra ndyaca ñaha sii yo vaty sa sito ndo vaty yivi sa caha ñi zatyño ndo tyiño ra. (Vaty cua coo quivi cua nandoto yo, ta cua cundyaa yo minoo nu tyaqui xaan sihin ra.)

**Cuhva cuñi si tyindyee yo sii
inga hermano sihin xuhun**

16 Vityi cua nacatyí sihin ndo cuhva cuñi si tyindyee ndo sii ñiyivi cuenda ra Ndyoo sihin xuhun. Zavaha ndo cuhva i nacatyí sihin sa ziin ziin ityi ra hermano nu cu si Galacia.

²Ma cuatu ndo ndya sa sei yucuan ta ziqui zatahan ndo xuhun. Tahan tahan tumingu tava ziin ndo sa minoo minoo ndo ñaa sa cua cuhva ndo. Tatu cuaha ca zahacanaa ndo, cuaha ca cuhva ndo.

³Ta tatu sa sei yucuan, cua tasi yoo ra cuñi ndo ndya ñuu Jerusalén vatyí cundyaca ra xuhun cua cuhva ndo sihin carta ndo ndya nu yucu ra hermano yucuan.

⁴Ta tatu iyo tyiño sa cuhin yucuan, cua cuhun ra sihin.

**Nacatyí ra Pablo ndyamaa cua
cahan ra Tuhun Ndyoo**

⁵Sa cuñi quisi nu yucu ndo, zoco xihna ca cua cuhin nu cu si Macedonia, ta yaha cuan ta cua sei nu yucu ndo.

⁶Ta tatu cuu, cua ndoi sihin maa ndo ndya yaha tyiemvu sa visi xaan. Ta cua tyindyee ndo sii, ta cua cuu ca cuhin ityi nuu ca ndya inga ñuu.

⁷Ña cuñi sa iin yaha ñi nu yucu ndo. Cuñi ndoi naha tatu cuhva maa ra Ndyoo.

⁸Zoco cua ndoi ihya ñuu Efeso ndya sa yaha vico Pentecostés.

⁹Cua ndoi vazú sahñi tahan xaan ñiyivi sihin, saha Tuhun Ndyoo ñuu ya vatyí iyo xaan cuhva sa cuu nacatyí Tuhun Ndyoo ihya.

¹⁰Tatu saa ra Timoteo nu yucu ndo, cuu ndo ñiyivi vaha sihin ra ta

tyindyee ndo sii ra ñaa sa cumañi sii ra vatyí zatyíño tucu maa ra tyiño ra Ndyoo tañi mi.

¹¹Tyaa tandihí ndo yahvi sii ra, ta tasi ndo sii ra ihya sihin sa vaha quivi cua quisi ra nu ndyei vatyí ndati sii ra sihin inga ra hermano.

¹²Ta ra hermano Apolos, i zañiñi sii ra sa cuhun ra nu yucu ndo iin ñi sihin inga ra hermano, zoco ñá cuñi maa ra cuhun vityí. Zoco cua cuhun ra quivi nacuyatyí ra.

**Saha maa ra Pablo minoo nacumi
sii tandihí ñu sino iñi ñuu Corinto**

¹³Coto ñáha cuzu ndo; coto ñáha zaña ndo cuhva sino iñi ndo. Zandyee xaan ndo iñi ndo, ta ma cuu ndo tañi sa ndyihí.

¹⁴Ñaa ñi maa sa zavaha ndo, zavaha ndo sii si sihin minoo cuhva zañaha si vatyí cuñi ndisa cuii ndo sii inga ñiyivi.

¹⁵Sito ndo sii ñiyivi ra Estéfanos vatyí xihna ca maa ñu i sino iñi Tuhun Ndyoo nu cu si Acaya, ta vityí zatyíño xaan ñu sa tyindyee ñu sii inga ñiyivi sino iñi.

¹⁶Ta zañiñi sii ndo, hermanos, vatyí tyaa ndo yahvi sii ñiyivi tañi maa ñu ta sii tandihí inga ñiyivi tyindyee sihin tyiño ra Ndyoo.

¹⁷Ziñ xaan cuñi vatyí i quisi ra Estéfanos, ra Fortunato ta ra Acaico vatyí cuu tyindyee ra sii ndi sa cuenda maa ndo vatyí ñá cuu quisi ndo.

¹⁸Saha xaan ra tundyee iñi sii, tañi saha ra sii maa ndo. Cuñi si sa tyaa xaan ndo yahvi sii ñiyivi tañi maa ra.

¹⁹Tasi tandihí ra hermano ityi Asia minoo nacumi sii ndo. Tacuan

tucu ra Aquila ta ña Priscila sihin tandihi ñu sino iñi, ñu titahan vehe ñu, zaquisi ñu minoo nacumi sii maa ndo sa cuenda ra Jesús.

²⁰Tandihi cuii ra hermano tasi ra minoo nacumi sii maa ndo. Cuhva ndo minoo nacumi sii minoo ndo ta sii inga ndo.

²¹Ta ihya tyei yuhvi ra Pablo minoo nacumi sii ndo. Sihin ndaha mi tyei ihya.

²²Tatu iyo ra ña cuñi sii ra Jesucristo, ra ndyaca ñaha sii yo, nacuhun ra cuan andyaya. Ta catyi mi: ¡Quisi tucun Jesús, quisi tucun!

²³Ta cuñi sa cua kuhva xaan ra Jesucristo sa vaha sii ndo.

²⁴Ta catyi sihin ndo vatyi cuñi xein sii ndo sa cuenda ra Cristo Jesús. Ta nacuu si tacuan.

Sa Cu Uu Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Corinto

Sa cu uu carta i tasi ra
Pablo ndya ñuu Corinto

1 Yuhvi ra Pablo i casi ra Ndyoo sii vatyí cui minoo apóstol ra Jesucristo. Ta tyei carta ya sihin ra Timoteo yañi yo, ta cua tasi ndi sii si sii maa ndo, ra cu vehe ñuhu ra Ndyoo ñuu Corinto, ta sii tandihí ñiyivi sa cuu cuenda ra Ndyoo nacahnu Acaya.

²Nacuhva xaan ra Ndyoo tumañi iñi sii tandihí ndo, ta nacuhva ra sa coo sa taxi añima ndo, ta tacuan tucu nazavaha ra Jesucristo, ra ndyaca ñaha sii yo.

**Cuhva i ndyehe xaan
ra Pablo tundoho**

³Zacahnu xaan ndi sii ra Ndyoo, Zutu ra ndyaca ñaha sii yo, ra Jesucristo. Cundahvi xaan iñi ra Ndyoo sii ndi tañi minoo zutu sa ndyihí, ta saha xaan ra tundyee iñi sii ndi nu ndyehe ndi tundoho.

⁴Nu ndyehe ndi tundoho saha xaan ra tundyee iñi sii ndi vatyí sihin cuhva cuan ta cuu cuhva maa ndi tundyee iñi sii inga ñiyivi

ndyehe tundoho zuun ñi cuhva sa saha maa ra tundyee iñi sii maa ndi.

⁵Ndyehe xaan ndi tundoho sa cuenda ra Cristo. Ta zuun ñi sa cuenda ra Cristo ta saha xaan ra Ndyoo tundyee iñi sii ndi.

⁶Ndyehe xaan ndi tundoho vatyí i zacoto ndi sii maa ndo cuhva saha ra Ndyoo tundyee iñi sii yo ta cuhva zacacu ra sii yo. Ta sisi tundoho sa ndyehe ndi, ta saha ra Ndyoo tundyee iñi sii ndi, ta tyindyee tucu si sii maa ndo vatyí saha tucu si tundyee iñi sii maa ndo vatyí ndyehe ndo cuhva saha xaan ra Ndyoo tundyee iñi sii ndi. Ta zuun ñi tundoho sa ndyehe ndi ta ndyehe tucu maa ndo, ta cuu cundyee iñi ndo sii si.

⁷Ñi xaan iñi ndi sa cuenda ndo vatyí sito ndi vatyí tañi ndyehe ndo tundoho ta tacuan tucu cua cuhva ra Ndyoo tundyee iñi sii ndo.

⁸Ta ndoho hermanos, cuñi ndi sa cua coto ndo vatyí i ndyehe xaan maa ndi tundoho nu cu si Asia. Yaha xaan cahnu tundoho i cuu sii ndi ndya cuhva i sica iñi ndi vatyí ma cundyee ca iñi ndi. Ta i yuhu

ndi coto cuu ndi sihin tundoho cuan.

⁹I sica iñi ndi vatyi cua cahñi ñiyivi sii ndi ta ma cuu zacacu ndi sii ndi. Ta sihin cuhva cuan ta i sino ca iñi ndi sii ra Ndyoo vatyi cuu zacacu maa ra sii ndi ta cuu tucu zanandoto ra sii ñiyivi i sihi.

¹⁰Ta ndisa i zacacu ra sii ndi, ta ñá sihi ndi sihin minoo cuhva sa quiñi xaan nu cuñi cahñi ñiyivi sii ndi. Ta ñii xaan iñi ndi sii ra Ndyoo vatyi cua zacacu tucu ra sii ndi inga saha

¹¹tatu tyindyee maa ndo sii ndi sihin sa cahan ndo sihin ra sa cuenda ndi. Ta tatu cua caca tandihi ndo sii ra, cuee ca ta tandihi ndo cua nacuhva xaan ndo tyahvi ndyoo sii ra sa cuenda sa vaha cua zavaha ra sihin ndi.

Nacaty i ra Pablo ñaa cuenda ñá saa ra vatyi ca ñuu Corinto

¹²Zii xaan cuñi ndi vatyi catyi sa siñi tuñi vaha sii ndi vatyi vaha xaan cuu cuhva i zavaha ndi ta ndoo xaan, ta yoñi sii zandavi ñaha ndi ihya ñuu ñiyivi. Ta sihin maa ndo cuaha ca sa vaha i zavaha ndi ndihi ca. I tyindyee ra Ndyoo sii ndi sihin cuhva ya, ta ñá zavaha ndi sii si sihin sa siñi tuñi ñi maa ndi.

¹³Ta sa tyaa ndi carta sii ndo, ñahñi sa xehe cahan si. Maa ñi sa casi cahan si, cuhva cuu cutuñi iñi ndo. Ta cuñi sa cua cutuñi vaha iñi ndo tandihi si

¹⁴tañi sa cutuñi iñi ndo zuhva. Ta quivi cua quisi ra Jesús ra ndyaca ñaha sii yo ta zii xaan cua cuñi ndo sihin maa ndi, ta zii xaan cua cuñi tucu ndi sihin ndo.

¹⁵Ta sa cuenda cuhva cuan, cuñi cuhin inga saha nu yucu ndo vatyi cuñi tyindyee sii ndo uu saha.

¹⁶I sica iñi vatyi cua yehi nu yucu ndo ityi cuhin ñuu Macedonia. Ta sa yaha cuhin Macedonia ta cua cuhin inga saha nu yucu ndo sica iñi, ta cua tyindyee ndo sii, ta cua cuhin nu cu si Judea.

¹⁷¿Atu sica iñi ndo vatyi ñá ndise sa cua cuhin nu yucu ndo? ¿Atu sica iñi ndo vatyi ñá nacañi vaha iñi ta quehin? Ña tacuan iye vatyi ña caa que tañi caa ñiyivi ñuu ñiyivi ya. Catyi ñu vatyi cua zavaha ñu minoo cuhva, ta ña zavaha ñu sii si.

¹⁸Zoco sito vaha ra Ndyoo vatyi quehin sa ndisa, ta ña zandavi ñehi.

¹⁹Vatyi ña tacuan iyo ra Jesús Zehe ra Ndyoo. Ña zandavi ñaha ra. Tatu catyi ra minoo cuhva, sa ndisa cuui cuu si. Ta mi sihin ra Silvano ta ra Timoteo i zacoto ndi tuhun ra Jesús sii ndo.

²⁰Sa cuenda ra Cristo ta ñihi yo tandihi sa catyi ra Ndyoo ta sa naha vatyi cua cuhva ra sii yo. Ta cuhva zacahnu yo sii ra Ndyoo ta cahan yo sihin ra, catyi yo: “Nacuu si tacuan” vatyi sito yo vatyi cua cuhva ra sa vaha sii yo sa cuenda ra Cristo.

²¹Maa ra Ndyoo tyindyee sii yo, ta ma ndoyo ñuhu yo. Ta zandu-iiin ra sii yo sihin ra Cristo. Ta saha ra Taty i ra sii yo.

²²Cuu si tañi i tyaa ra tuñi ra sii yo vatyi saha ra Taty i ra sii yo vatyi coo si añima yo vatyi cuee ca cua cuhva ra cuaha xaan ca sa vaha sii yo.

²³Ta sito vaha ra Ndyoo vatyi ñá sehín ñuu ndo quivi sa i sica iñi

cuhin vatyí cundahví ñĩ sii maa ndo coto cuxein síhin ndo. Ta sito maa ra Ndyoo tandíhi sa iyo añime.

²⁴Ta ña ñĩĩ nacítyí que síhin ndo yozo caa cundýico ndo sii ra Ndyoo vatyí sa sino vaha ñĩ ndo. Zoco cuñi tyindyeyi sii ndo ta cua coo ca sa zii sa saha ra Ndyoo añima ndo.

2 Yucuan cuenda ñá cuñi cuhin inga saha nu yucu ndo síhin tucuihya ñĩ.

²Vatyí tatu síhin cuhva cua quehin síhin ndo ta zanducuihye ñĩ ndo, yoiñi cua zanduzii ñĩ mi vatyí ma cuu zanduzii ndo ñĩ tatu sa zanducuihye ñĩ ndo.

³Yucuan cuenda i tasi carta cuan sii ndo vatyí cua zandundoo ndo tyiño cuee ca sa quisi nu yucu ndo coto nducuihya ñĩ zacuu ndo síhin cuhva iyo ndo. Tahan si sii ndo sa zanduzii ndo ñĩ. Ta ñii cuu ñĩ vatyí tatu zii cuñi mi, zii cua cuñi tucu maa ndo.

⁴Yucuan cuenda i tyei carta cuan vazú yaha xaan cuihya i cuñi quivi i tyei sii si ndya cuhva saqui. Zoco ñá cuñi zanducuihye ñĩ ndo síhin carta cuan. I cuñi sa cua coto ndo vatyí cuñi xein sii ndo.

**Cuñi si sa zanaa yo ñĩ
yo cuatyí ñiyivi**

⁵Sa cuihya ñĩ saha minoo ra cuan, yivi sii maa ñi mi saha ra sii si. Sii tucu maa ndo saha ra zuhva. Zuhva catyí vatyí ña cuñi cañi ñihi sii ra.

⁶Ta cuhva sa tasi tuñi tandíhi ndo sii ra, sa vaha ñi vatyí.

⁷Ta vityí cuñi si vatyí zanaa ndo ñĩ ndo cuatyí i zavaha ra quivi

cuan ta cuhva ndo tundyee ñĩ sii ra coto yaha xaan nducuihya ñĩ ra.

⁸Yucuan cuenda zañiñi sii ndo vatyí zacoto ndo sii ra vatyí cuñi ca ndo sii ra.

⁹I tyei carta cuan sii ndo quivi cuan vatyí cuñi cote tatu cua tyaa ndo yahví tandíhi sa catyí síhin ndo.

¹⁰Ta vityí yoo ra zaha ndo tucahnu ñĩ, zaha tucu mi tucahnu ñĩ sii ra. Ta yoo ra zehi tucahnu ñĩ, zavehi sii si ndya nuu ra Cristo sa cuenda maa ndo.

¹¹Ta sito yo vatyí tatu ma zaha yo tucahnu ñĩ sii ñiyivi, cua tyihi cuihna minoo cuhva ña vaha añima yo vatyí sa sito yo cuhva tuhva maa ra zavaha.

Ñá ndoo ra Pablo ñuu Troas

¹²Quivi i sei ñuu Troas cua zacote Tuhun Vaha sa cuenda ra Cristo, ta i nuña xaan ra ndyaca ñaha sii yo ityi, ta i cuu zacoto xein Tuhun ra.

¹³Zoco ña zii i cuñi vatyí ñá nañihi sii ra Tito, yañi yo. Yucuan cuenda i zandoi sii ñu ñuu cuan, ta sehin ndya Macedonia.

**Zacoto ra Pablo Tuhun Ndyoo
síhin tandíhi cuii añima ra**

¹⁴Ta vityí sehi tyahví ndyoo sii ra Ndyoo vatyí zahacanaa yo tandíhi saha sa cuenda ra Cristo, ta síhin tyiño maa ndi zacoto ra Ndyoo tuhun ra nacahnu cuii. Ta tañi minoo sa vixi xaan sahan cuu tuhun ra.

¹⁵Vatyí tuhun sa nacítyí ndi cuu tañi minoo sa vixi xaan sahan sa saha maa ra Cristo sii ra Ndyoo. Ta

ñihi tandihi ñiyivi xico cuan, ñu
cua cacu ta ñu cunaa.

¹⁶Ñiyivi sa ma cacu, sica iñi ñu
vatyi minoo xico quiñi xaan sahan
cuu si tañi minoo xico sa cua cahñi
sii ñu vatyi nacatyi tuhun cuan
cuhva cunaa ñu. Zoco ñiyivi cua
cacu, minoo xico tyaqui xaan sahan
cuu si cuñi ñu cuhva cahan ndi. Ta
ma cuu zavaha ndya vaha ñi ñiyivi
tyiño ya.

¹⁷Ta maa ndi ña iyo ndi tañi iyo
cuaha xaan ra. Vatyi nazaca ra
tuhun ña ñiñi sihin Tuhun Ndyoo
vatyi iyo sa cuñi ra ñihi ra sihin
cuhva cuan. Zoco ndoo xaan
zacuaha maa ndi cuhva i tava ra
Ndyoo tyiño sii ndi. ñn ñi cuu ndi
sihin ra Cristo, ta sito ndi vatyi
ndyehe ra Ndyoo tandihi sa zavaha
ndi.

Cuhva saa iyo sa cuenda ra Cristo

3 Ta sa cahan ndi tuhun
cuan ¿atu sica iñi ndo vatyi
zacahnu ndi sii ndi? Ña zacahnu
ndi sii ndi. ¿A atu sica iñi ndo vatyi
cuize carta tañi ndyizo inga ra ta
catyi si sihin ndo vatyi vaha ñiyivi
cui a cuize carta sa tyaa maa ndo ta
catyi si sihin inga ñiyivi vatyi vaha
ñiyivi cui?

²Zoco maa ndo cuu carta ndi. (Sa
cuenda tyiño i zavaha ndi nu yucu
ndo.) Ta carta ya iyo si aña ndi.
Ta cuu coto tandihi ñiyivi sii si ta
cahvi ñu sii si.

³Ta maa ndo cuu tañi minoo
carta i zaquisi ra Cristo, ta i tyaa
maa ndi sii si. Ta carta ya yoñi
tyaa sii si sihin minoo lapicero a
nu minoo yuu, zoco Tatyí Ii maa ra
Ndyoo ndito i tyaa si sisi aña ndo.

⁴Ta tyehen cuhva quehin vatyi
site vatyi cua cuhva ra Ndyoo sa
quita vaha tyiño zavehi. Vatyi
tyindye ra Cristo sii.

⁵Ta ña quehin cuhva ya vatyi
cuu zacuu sa maa ñi mi. Ña tacuan,
vatyi tandihi sa zavehi, ra Ndyoo
saha cuhva cuan sii.

⁶I saha ra cuhva sii, ta cuu
nacatyi sihin ñiyivi sa cuenda
tuhun saa i saha ra Ndyoo. Zacacu
tuhun saa ya sii yo, ta saha si
minoo cuhva saa, cundito yo vatyi
iyo Tatyí Ii maa ra Ndyoo sihin yo.
Ta ley sahnu sa saha ra Ndyoo sii
ra Moisés, ma cuu zacacu si sii yo.
Zañaha si ñaa sa cuu cuatyi yo. Ta
sa cuenda cuatyi yo, ta cuu si tañi
sa sihi aña yo vatyi ma cuu tyaa
yo yahvi sii tandihi cui ley sahnu
cuan.

⁷Ta ley sahnu sa i tyaa ra Ndyoo
sata minoo yuu, vaha xaan i cuu
si ndya cuhva ndya ñá cuu ndyehe
ñiyivi nuu ra Moisés quivi i ñihi ra
sii si vatyi ndisi xaan i nduu nuu ra.
Ta i naa sa ndisi cuan cuee cuee ñi.

⁸Ta vityi iyo tuhun saa sa saha ra
Ndyoo, ta vaha xaan ca si ta ziqui
tuhun sahnu cuan.

⁹Vatyi tatu vaha xaan cuu tuhun
sahnu cuan ta saha si sa cuu yo ¿ta
ñacu ma cuvaha xaan ca tuhun saa
ya vatyi zanduvaha si sii yo ityi nuu
ra Ndyoo?

¹⁰Ta ley sahnu sa vaha xaan cuan,
ña vale ca si ityi nuu tuhun saa ya
vatyi vaha xaan ca cuu tuhun saa
ya.

¹¹Ta tatu tuhun sahnu sa cua naa
ta vaha xaan i cuu si ta tyaqui xaan
i cuu si, vaha xaan ca cuu tuhun
saa ya vatyi ma naa si ndaha ñi.

¹²Ta sito ndi vatyi ma naa tuhun saa ya, ta yucuan cuenda nii xaan cuñi ndi ta nacatyí ndi Tuhun Ndyoo.

¹³Ña zavaha ndi cuhva i zavaha ra Moisés. I tyazi ra zahma nuu ra vatyi ma ndyehe ñiyivi hebreo cuhva cua naa sa ndisi xaan nuu ra cuee cuee ñi. Vatyi ñá cuu ndoo sa ndisi cuan nuu ra.

¹⁴Ta ña iin ñi nuu ra Moisés i tyazi sa tyazi, zoco ndya sa siñi tuñi sii ñiyivi cuan ta i tyazi tucu si. Ta ndya cuhva ndya vityi ta ña cutuñi vaha iñi ñu tatu cahvi ñu tuhun sahnu cuan vatyi maa ñi sa sino iñi yo sii ra Cristo cuu sa tyaa siyo sa tyazi sa siñi tuñi yo.

¹⁵Ta ndya cuhva ndya vityi tatu cahvi ñiyivi hebreo tuhun i tyaa ra Moisés, ña cutuñi ndisa cuii iñi ñu sa cahvi ñu.

¹⁶Zoco tatu sino ndisa iñi ñu sii ra ndyaca ñaha sii yo, cua tyaa siyo ra sa tyazi sa siñi tuñi sii ñu.

¹⁷Ta maa ra ndyaca ñaha sii yo cuu ra Tatyí Ii. Ta tatu iyo Tatyí Ii ra ndyaca ñaha sii yo añaima yo, ña ndyaca ñaha ca ley sahnu cuan a cuatyí yo sii yo.

¹⁸Nahñi sa tyazi nuu yo. Ndyehe yo cuhva vaha xaan iyo ra ndyaca ñaha sii yo tañi sa ndyehe yo minoo nu ino. Ta cuhva sa ndyehe yo iyo maa ra, tacuan nduu tucu maa yo cuee cuee ñi. Tatyí Ii ra Ndyoo zama si cuhva iyo yo ta nduvaha ca yo ta nduvaha ca yo, ta cuahan nduu yo tañi iyo ra Cristo.

4 Saha ra Ndyoo tyiño ya sii ndi, ta cundahvi iñi ra sii ndi, ta tyindyee ra sii ndi. Ta yucuan cuenda ña nducuihya iñi ndi ta ña zandihi ndi tuhun.

²Ta ña zavaha ndi sa xehe, sa saha ticahan nuu. Ña zandavi ñaha ndi. Maa ñi Tuhun Ndyoo zacuaaha ndi, ta ña nazaca ndi inga tuhun sihin si. Maa ñi sa ndisa cahan ndi. Ta sihin cuhva cuan ta sito ñiyivi sihin sa siñi tuñi vaha ñu vatyi vaha ñiyivi cuu ndi, ta ndyehe ra Ndyoo cuhva zavaha ndi.

³Ña tyixehe ndi Tuhun Ndyoo. Zoco xehe xaan si sa cuenda ñiyivi cua cunaa.

⁴Ra ndyaca ñaha ñuu ñiyivi ya zatívi ra sa siñi tuñi sii ñiyivi ña sino iñi coto cutuñi iñi ñu tuhun vaha xaan sa cuenda ra Cristo, cuhva zacacu ra sii yo. Ta ra Cristo cuu ra Ndyoo, ta iin ñi caa maa ra tañi ra Ndyoo Zutu ra.

⁵Ta cuhva nacatyí ndi Tuhun Ndyoo sihin ñiyivi, ña cahan ndi tuhun maa ndi, cahan ndi tuhun ra Jesucristo, ra ndyaca ñaha sii yo. Ta catyí ndi vatyi maa ndi cuu muzu ndo vatyi cuñi ndi sii ra Cristo.

⁶Maa ra Ndyoo cuu ra catyí vatyi cua coo sa ndisi quívi zavaha ra sa ndisi, ta zuun ñi maa ra zandundisi añaima yo. Ta tacuan ta sihin sa sito yo sii ra Cristo ta sa sito yo cuhva sa vaha xaan ta tyaqui xaan iyo maa ra Ndyoo.

Sihin sa sino ñi iñi yo sii ra Ndyoo ta cuu coo yo minoo cuhva saa

⁷Coño ñuhu yo cuu tañi quívi ñi vatyi ñahñi ra cuu maa yo. Ta tacuan ta cuu ndyehe ñiyivi vatyi tandíhi cuhva sa vaha xaan sa cuu sii ndi, cuenda ra Ndyoo cuu si ta yívi sa cuenda maa ndi.

⁸Yucuan cuenda vazú iyo tizíhi nacahnu nu cuahan ndi, zoco ña

zandihî ndi tuhun. Ta vazu ña cutuñi iñi ndi tandihî sa tahan ndi, zoco sito ndi vatyi cua quita vaha ndi.

⁹Cuñi cahñi ñiyivi sii ndi, zoco ña maa tuhun ñi ndi vatyi ndyaa ra Ndyoo sihin ndi. Cañi ñu sii ndi, zoco ñá sihi ndi.

¹⁰Tandihî nu cuahan ndi ndatu ndi sa cua cuu ndi sa cuenda ra Jesús vatyi tacuan ta cua ndyehe ñiyivi vatyi ndito ndi minoo cuhva saa, cuhva saha ra Jesús sii ndi.

¹¹Tandihî quivi sa vatyi cuii cuu ndi sa cuenda ra Cristo vatyi cuhva cuan ta cua ndyehe ñiyivi vatyi iyo ra Cristo añima ndi ta saha ra minoo cuhva saa coo ndi.

¹²Ndatu ndi sa cua cahñi ñiyivi sii ndi vatyi nacatyî ndi Tuhun Ndyoo. Ndyehe xaan ndi tundoho sa cuenda si, zoco sa cuenda sa nacatyî ndi Tuhun Ndyoo sihin ndo ta ñihi ndo cuhva coo ndo minoo cuhva saa.

¹³Sino iñi ndi tañi i sino iñi ra rey David quivi i catyi ra: “Sino iñi, ta yucuan cuenda nacatyî sihin ñiyivi.” Catyi ra. Ta tacuan tucu maa ndi, sino tucu iñi ndi, ta yucuan cuenda nacatyî ndi.

¹⁴Vatyi sito ndi vatyi cuhva i zanandoto ra Ndyoo sii ra Jesús sisi sa i sihi ra ta cua zanandoto tucu ra sii maa ndi vatyi sa ndu-iiñi ndi sihin ra Jesús, ta cua cundyaca ra sii ndi sihin maa ndo ityi nuu maa ra.

¹⁵Tandihî tundoho sa ndyehe ndi cuu cuenda maa ndo vatyi tyindyee si sii ndo. Ta tatu cuaha ndo cua ñihi ndo sa vaha sa saha maa ra Ndyoo sii ndo, cuaha ndo cua

nacuhva xaan ndo tyahvi ndyoo sii ra, ta cua zacahnu ndo sii ra.

¹⁶Yucuan cuenda ña ndu-uu iñi ndi tyiño ya. Ta vazu sa cuñi cuu coño ñuhu ndi, zoco ndundyee ca iñi ndi tahan tahan quivi.

¹⁷Ta sito ndi vatyi tundoho sa ndyehe yo ñuu ñiyivi ya yivi sa ñiñi xaan cuu si, ta vatyi cua yaha si. Zoco sa cuenda maa si ta cua ñihi ndi cuaha xaan sa vaha tandihî cuii tyiemvu nu ndyaa ra Ndyoo.

¹⁸Yucuan cuenda ña tyaa ndi yahvi sa ndyehe yo vityi. Tyaa ca ndi yahvi sii sa ña cuu ndyehe yo vatyi yucuan cuu sa cua coo tandihî cuii tyiemvu. Ta sa cuu ndyehe yo vityi, cunaa tandihî si.

5 Sito ndi vatyi tatu cua cuu ndi cua tyahyu coño ñuhu ndi vatyi tañi minoo vehe sa cuu cuenda ñuu ñiyivi ñi cuu coño ñuhu yo. Zoco iyo vehe ndi ityi ziqui sa yivi ñiyivi i zavaha. Maa ra Ndyoo i zavaha sii si, ta cua coo si tandihî cuii tyiemvu.

²Ndisa vatyi ñi ñi sa ndyaa ndi ñuu ñiyivi ya nducuihya xaan iñi ndi vatyi cuñi xaan ndi coo ndi sisi sa cua cuhva ra Ndyoo andivi.

³Sisi sa cua cuhva ra Ndyoo cua coo añima ndi, ta ma coo si tacuan ñi.

⁴Ñi ñi sa iyo ndi sisi coño ñuhu ndi sa cuu cuenda ñuu ñiyivi ya, nducuihya iñi ndi vatyi zayanga si sii ndi. Ña cuñi ndi sa ma coo coño ñuhu ndi, zoco cuñi ndi coo ndi cuhva saa sa cua cuhva ra Ndyoo sii ndi. Cuñi ndi sa cunaa coño ñuhu sa cuu cuenda ñuu ñiyivi ya ta cua coo ndi minoo cuhva saa sa ma ndihî.

⁵Ta maa ra Ndyoo cuu ra catyi vatyí tacuan cua cuu si, ta i saha ra Tatyí Ii ra sii yo. Ta cuhva cuan zañaha si vatyí cua ñihi yo tandíhi cuii sa cua cuhva ra.

⁶Ta yucuan cuenda ña yuhu ndi sa cuu ndi. Ta sito ndi vatyí ñii ñi sa iyo ndi ihya ñuu ñiyívi ya sisi coño ñuhu ndi, ña iyo ndi gloria síhin ra Ndyoo.

⁷Sito ndi vatyí ndisa cuu cuhva ya vatyí sino íñi ndi sii ra Ndyoo ta yívi sa cuenda minoo sa ndyehe ndi.

⁸Ta ñii xaan íñi ndi, ta sica íñi ndi vatyí vaha ca tatu zandoo ndi coño ñuhu ya ta cuhun ndi nu ndyaa ra ndyaca ñaha sii yo.

⁹Yucuan cuenda ñihi xaan nducu ndi cuhva zavaha ndi cuhva tahan íñi ra a cuu si sa ñoho ca ndi sisi coño ñuhu ndi ihya ñuu ñiyívi a cuu si sa cuahan ndi nu ndyaa ra.

¹⁰Vatyí sa minoo minoo yo cua yaha yo ityi nuu ra Cristo, ta cua zandaa ra tyiño cuenda yo, ta cua ñihi yo sa tahan si sii yo sa cuenda cuhva i zavaha yo sa vaha a sa ña vaha quívi i sicoo yo sisi coño ñuhu yo ñuu ñiyívi ya.

**Zacoto ra Pablo cuhva nduvaha
yo ityi nuu ra Ndyoo**

¹¹Sito ndi vatyí cua tasi tuñi ra Ndyoo sii ndi tatu ma zavaha ndi cuhva catyi ra. Yucuan cuenda nducu xaan ndi cuhva cahan ndi síhin ñiyívi vatyí nacuhva cuenda ñu sii ñu sii ra Ndyoo. Sito vaha ra Ndyoo cuhva iyo ndi, ta sito tucu maa ndo síhin añima ndo, cuñi.

¹²Ña cuñi ndi zacahnu ndi sii ndi síhin sa cahan ndi ihya, zoco cuñi ndi sa nacohon íñi ndo vatyí tuhun

ndisa i zacoto ndi sii ndo. Tacuan ta cua tahan ca íñi ndo sii ndi. Ta cua ñihi ndo cuhva cahan ndo síhin ra zacahnu sii. Catyi ra cuan vatyí vaha ra, zoco ñahñi sa vaha iyo añima ra.

¹³Tatu ra loco cuu ndi (vatyi cahan ndi sa vaha sa cuenda maa ndi), zoco zavaha ndi cuhva ya vatyí cuñi ndi zacahnu ndi sii ra Ndyoo. Ta tatu iyo sa vaha sii sa siñi tuñi ndi, tacuan iyo ndi vatyí cuñi ndi tyindyee ndi sii maa ndo.

¹⁴Zañiñi ndi ta zacoto ndi Tuhun Ndyoo sii ñiyívi vatyí sito ndi cuhva cuñi xaan ra Cristo sii tandíhi ñiyívi. Síhi ra Cristo sa cuenda cuatyí tandíhi ñiyívi, ta yucuan cuenda sito yo vatyí cuu si tañi sa síhi yo síhin ra Cristo, ta cuu zaña yo sa zavaha yo sa ña vaha.

¹⁵I síhi ra sa cuenda tandíhi yo, ta yucuan cuenda ma cuu ca coo yo cuhva cuñi maa yo. Cua zavaha yo cuhva cuñi maa ra i síhi ta nandoto ra sa cuenda yo.

¹⁶Ta vityi ma cuu catyi yo tatu vaha a ña vaha sa zavaha ñiyívi cuhva caa ñu ihya ñuu ñiyívi. Ndyaa sii ra Cristo ta i quehin cuhva cuan vatyí sica íñi vatyí cuu ra minoo ñiyívi tañi maa yo, zoco vityi ma cuu ca caca íñi cuhva cuan.

¹⁷Vatyí quívi saha cuenda yo sii yo sii ra Cristo, i zama ra tandíhi cuhva iyo yo. Tandíhi cuhva i sica íñi yo ityi sata sa i nazama si vatyí i saha ra inga sa siñi tuñi saa sii yo.

¹⁸Ta tandíhi cuhva ya, maa ñi ra Ndyoo i zavaha sii si vatyí cuñi ra sa cua zanduvaha ra sii yo síhin ra síhin cuhva i zavaha ra Cristo. Ta i saha ra tyiño sii maa ndi vatyí

nacatyí ndi síhin ñiyívi cuhva cuu nduvaha ñu síhin ra.

¹⁹Síhin cuhva i zavaha ra Cristo, ta i zanduvaha ra Ndyoo síi tandíhi ñiyívi ñuu ñiyívi síhin ra. Ña tyaa ca ra cuatyí i zavaha ñu sata ñu. Ta saha ra tyíño síi maa ndi sa zacoto ndi síi ñiyívi vatyí cuñi ra sa nduvaha ñu síhin ra.

²⁰Maa ndi cuu ra sica síhin tyíño ra Cristo. Cuu si tañi sa maa ra Ndyoo zañiñi síi ndo síhin tuhun cahan ndi vatyí síhin tyíño maa ra sica ndi. Yucuan cuenda zañiñi ndi síi ndo vatyí nanduvaha ndo síhin ra Ndyoo vatyí yucuan cuu sa cuñi ra Cristo.

²¹Ñahñi numinoo cuatyí i zavaha ra Cristo, zoco sa cuenda maa yo i ndyehe ra Ndyoo síi ra tañi minoo ra iyo cuatyí. Ta cuhva vaha xaan iyo ra Cristo, i saha ra Ndyoo síi maa yo, ta nduu yo ñiyívi vaha ityí nuu ra Ndyoo.

6 Zatyíño ndi ñin ñi síhin ra Cristo, ta yucuan cuenda zañiñi ndi síi ndo vatyí ma coo ndo tañi ra ña sito síi ra Ndyoo. Cutyíño ndo tandíhi sa vaha sa saha ra Ndyoo síi minoo minoo ndo.

²Vatyí tyehen catyí ra Ndyoo nuu tutu ra: “Síni sa cahan ndo quívi i zacaqui síi ñiyívi, ta i tyindyeyi síi ndo”, catyí ra. Ta vityí cuu tyiemvu vaha, tyiemvu zacacu ra Ndyoo síi ñiyívi.

³Nducu xaan ndi cuhva cuu ndi ñiyívi vaha xaan coto ma tahan íni ñiyívi cuhva zavaha ndi ta catyí ñu vatyí ña vaha Tuhun Ndyoo ta ma sino íni ñu.

⁴Cuñi ndi sa cua ndyehe ñu vatyí muzu maa ra Ndyoo cuu síi ndi sa

ndisa cuii síhin cuhva zandyee xaan ndi íni ndi ndyehe ndi tundoho, ta tandíhi sa yíi xaan. Ta síhin cuhva cundyee xaan íni ndi.

⁵Vazu cañi ñiyívi síi ndi ta tyíhi ñu síi ndi vehe caa ta cuvaa xaan ñu, zoco zandyee ndi íni ndi. Ñihi xaan zatyíño ndi. Iyo saha ndya cuhva ña quixi ndi, ta ña ñihi ndi sa casi ndi.

⁶Zandyee ndi íni ndi síhin tandíhi cuhva ya vatyí muzu maa ra Ndyoo cuu síi ndi sa ndisa cuii. Yucuan cuenda zavaha ndi sa vaha xaan. Sito xaan ndi Tuhun Vaha ra Ndyoo, ta cundyee xaan íni ndi síhin ñiyívi. Zavaha xaan ndi sa vaha síhin ñu. Situ cuii Tatyí Ii añima ndi, ta cuñi ndi síi ñiyívi sa ndisa cuii.

⁷Maa ñi sa ndisa cahan ndi. Iyo xaan tundyee íni maa ra Ndyoo síhin ndi, ta sityíño ndi tandíhi sa vaha sa saha maa ra síi ndi, ta síhin cuhva cuan zatívi ndi tyíño cuihna.

⁸Iyo quívi tahan íni ñiyívi síi ndi, ta iyo quívi ña cuu ndyehe ñu síi ndi. Iyo quívi cahan ñu sa vaha síi ndi, ta iyo quívi cahan ñu ndya vaha ñi. Catyí ñu vatyí zandavi ñaha ndi síi ñiyívi, zoco maa ñi sa ndisa cahan ndi.

⁹Iyo ñiyívi ña tyaa ñu yahvi síi ndi, ta iyo ñiyívi tyaa xaan ñu yahvi síi ndi. Iyo saha sa vatyí cuu ndi, zoco ñá síhi ndi. Iyo saha saha ra Ndyoo sa ndoho ndi, zoco ñá síhi ndi.

¹⁰Iyo quívi cuihya xaan cuñi ndi, zoco zii xaan cuñi ndi síhin cuhva zavaha ra Ndyoo. Ndahvi xaan ndi, zoco saha xaan ndi sa vaha ra Ndyoo síi ñiyívi. Vazu ñahñi maa sa iyo síi ndi, zoco iyo tandíhi sa vaha ra Ndyoo síi ndi.

¹¹Ndoho hermanos ñuu Corinto, casi xaan cahan ndi sihin ndo ta ña tyixehe ndi. Cuñi xaan ndi sii ndo.

¹²Ñahñi cuhva sa ña cuñi ndi sii ndo, zoco maa ndo ña cuñi ndo sii ndi sa ndisa.

¹³Ta vityi quehin sihin ndo tañi sa zehi sii ndo sa ndisa cuii. Zanduvita ndo añima ndo. Cuñi ndo sii ndi.

**Maa yo cuu vehe ñuhu
ra Ndyoo ndito**

¹⁴Ma cuu ndo ra cu tahan sihin ñiyivi ña sino iñi vatyí ma cuu cu-ñin añima ndo sihin añima maa ñu. Ma cuu cu-ñin sa vaha sihin sa ña vaha. Sa iyo ñuhu sihin maa ndo, ta maa ñu sica noo ca ñu nu ñaa.

¹⁵Ma cuu cu-ñin ra Cristo sihin cuihna a ñiyivi sino iñi sihin ñiyivi ña sino iñi.

¹⁶Ma cuu zacahnu yo sii ra Ndyoo ta sii zandu. Maa yo cuu vehe ñuhu ra Ndyoo ndito tañi i catyi maa ra:

Cua cundyei sihin ñu ta caca noi sihin ñu;

ra Ndyoo sii maa ñu cua cui, ta maa ñu cua cuu ñiyivi sii.

¹⁷Yucuan cuenda i catyi tucu ra:

Quita ndo ticui ñiyivi ña sino iñi, ta ma cutahan ca ndo sihin ñu;

ma zavaha ca ndo sa ña vaha; tacuan ta cua tiin cuende sii ndo.

¹⁸Zutu ndo cua cuu sii, ta zehi cua cuu sii ndo, catyi ra Ndyoo ra iyo tandihi cuii cuhva sii.

7 Ihya cuu cuhva saha ra Ndyoo tuhun ra sii yo, hermanos. Yucuan cuenda cuñi si sa nducu yo cuhva cuu yo ñiyivi vaha xaan

ityi nuu ra Ndyoo. Ma zavaha yo sa quiñi, ta ma caca iñi yo sa ña vaha coto cañi ra sii yo.

**Sa i zama ra hermano ñuu
Corinto cuhva iyo ra**

²Sica ndi sii ndo vatyí tiin cuenda vaha ndo sii ndi vatyí ñahñi sa ña vaha i zavaha ndi sihin numinoo ndo. Yoñi ndo zativi ndi sa siñi tuñi, ta yoñi sii zandavi ñaha ndi.

³Ña quehin cuhva ya sihin ndo sa cuñi tyei cuatyí sata ndo. Zoco catyi sihin ndo inga saha zuun ñi cuhva sa i catyi sihin ndo vatyí cuñi xein sii ndo. Ñoho xaan iñi sii ndo. ñin ñi ra cuu yo a ndito yo a sa sihi yo.

⁴Ñii xaan iñi sihin ndo, ta zii xaan cuñi sihin cuhva iyo ndo. Yucuan cuenda vazú ndyehe xaan ndi tundoho ihya, zoco cuhva iyo ndo tyindyee si sii, ta zii xaan cuñi.

⁵Ndya quivi i saa ndi Macedonia ya ta ñá quitatu ndi. Ndyehe xaan ndi tundoho, ta iyo xaan tizihí. Sahñi tahan xaan ñiyivi sihin ndi, ta yuhu xaan añima ndi.

⁶Zoco saha ra Ndyoo tundyee iñi sii yo tatu nducuihya xaan iñi yo, ta i zandundyee ra añima ndi quivi i saa ra Tito.

⁷Ta ña maa ñi sa cuenda sa saa maa ra, sa cuenda sa i saha xaan maa ndo tundyee iñi sii ra ta tyindyee tucu si sii maa ndi. I catyi ra sihin ndi cuhva cuñi xaan ndo ndyehe ndo sii ndi, cuhva nducuihya xaan iñi ndo sa cuenda sa ña vaha i zavaha ndo ta cuhva i tyaa xaan ndo yahvi tuhun sa tasi sii ndo. Ta sihin tandihi cuhva ya i nduzii xaan ca cuñi.

⁸Ta vityi ña cuihya ca cuñi sa cuenda carta sa i tasi sii ndo. Ndisa i nducuihya iñi ndo i zacuu carta cuan, zoco zuhva ñi quivi.

⁹Ta vityi zii xaan cuñi, zoco yivi sa cuenda sa nducuihya iñi ndo, sa cuenda sa i zama ndo cuhva iyo ndo. I nducuihya iñi ndo minoo cuhva tahan iñi ra Ndyoo. I zavaha ndi minoo sa vaha sihin ndo sa zanducuihya ndi iñi ndo.

¹⁰Vatyí tatu nducuihya iñi yo cuhva tahan iñi ra Ndyoo, zama yo cuhva iyo yo, ta cua cacu yo. Ta ña tahan si sa ma cuñi yo nducuihya iñi yo cuhva cuan. Zoco tucuihya iñi sa iyo sii ñiyivi ña sito sii ra Ndyoo, ma tyindyee si sii ñu sa ma cuhun ñu andyaya.

¹¹Zaha ndo cuenda cuhva i tyindyee si sii ndo vatyí i nducuihya iñi ndo cuhva tahan iñi ra Ndyoo. I quisaha cuñi xaan ndo zavaha ndo sa vaha. I zavaha ndo cuhva cuñi si sihin ra sicoo cuatyí cuan. I tasi tuñi ndo sii ra, ta cuñi xaan ndo sa ma coo ca cuatyí nu yucu ndo. I cuxaan ndo sa cuenda sa sicoo cuatyí nu yucu ndo, ta i yuhu ndo sii ra Ndyoo. Ta sa yaha cuan ta ziqui i cuñi xaan ndo ndyehe ndo sii. Zañaha ndo vatyí ñahñi ca cuatyí ndo iyo sa cuenda tuhun cuan.

¹²I tyei carta cuan vatyí cuñi sa cua nacoto maa ndo cuhva cuñi xaan ndo sii ndi sa ndisa cuii ta yivi sa sica xaan iñi sa cuenda ra zavaha cuatyí cuan ta nu sa cuenda zutu ra, vazu i zavaha ra sa ña vaha cuan sihin ra.

¹³Ta yucuan cuenda i saha xaan ndo tundyee iñi sii, sihin cuhva i

zavaha ndo sa vaha, ta zii xaan ca cuñi sa cuenda cuhva i zavaha ndo sihin ra Tito. I tiin cuenda vaha ndo sii ra, ta zanduzii ndo iñi ra.

¹⁴I catyí sihin ra Tito cuee ca sa cuhun ra nu yucu ndo vatyí sino xaan iñi ndo, ta ñá zaha ndo ticahan nuu sii, cuhva cuan. Tandihí sa i quehin sihin maa ndo, maa ñi sa ndisa cuu si. Ta sa vaha i nacatyí sihin ra sa cuenda ndo, i quita si cuhva cuan, maa ñi sa ndisa cuii, ta ñá zacuu ndo sii, tañi minoo ra vatyá.

¹⁵Ta cuñi xaan ca ra Tito sii ndo vityí vatyí nacohon iñi ra cuhva i tiin cuenda vaha xaan ndo sii ra ta i tyaa xaan ndo yahvi sii ra. Ta i yuhu xaan ndo coto ma zavaha ndo tandihí sa cuñi si.

¹⁶Ñii xaan iñi sihin ndo tandihí cuii cuhva, ta yucuan cuenda zii xaan cuñi vityí.

Natyindyee vaha yo sii ñiyivi sihin xuhun

8 Ta vityí cuñi ndi nacatyí ndi sihin ndo hermanos cuhva i saha xaan ra Ndyoo tundyee iñi sii ñiyivi sino iñi ñuu Macedonia.

²Vazu ndyehe xaan ñu tundoho, zoco zii xaan cuñi ñu sihin ra Ndyoo. Ta vazu ndahvi xaan ñu, zoco i saha xaan maa ñu sa sii ñu sii ñiyivi tañi ñiyivi cuca.

³Sehi sa ndaa cuenda ñu vatyí saha maa ñu sa sii ñu vatyí cuñi ñu. Ta iyo saha yaha ca saha ñu.

⁴I zañiñi ñu sii ndi cuaha xaan saha vatyí quihin ndi sa saha maa ñu ta cuhva ndi sii si sii inga hermano.

⁵I zavaha ñu cuaha ca ta ziqui cuhva sica iñi ndi vatyí sa xihna ñi

i saha maa ñu sii ñu sii ra ndyaca ñaha sii yo ta ziqui i cuñi ñu sa cua cutyiño ra Ndyoo sii maa ndi sa zacuaha ndi sii ñu.

⁶I ndyehe ndi cuhva zavaha ñu ñuu Macedonia, ta ziqui i catyi sihin ra Tito vatyí maa ra cuu ra i quisaha sihin tyiño ya sihin maa ndo, ta yucuan cuenda i catyi sihin ra nacuhva ca ra cuhva sii ndo sa cuhva ca ndo xuhun.

⁷Sito xaan maa ndo cuaha xaan cuhva. Ñii xaan iñi ndo. Vaha xaan zacuaha ndo Tuhun Ndyoo. Sito xaan ndo sihin sa siñi tuñi sa saha ra Ndyoo. Ta vaha xaan ndyico ndo sii ra. Cuñi xaan ndo sii ndi. Ta vityi cuñi tucu si sa tyindyee vaha ndo sii ra hermano ndahvi.

⁸Zoco ña zañiñi sii ndo. Zoco cuñi inga ñiyivi sa tyindyee ndo sii ñu. Ta sihin cuhva ya cua zañaha ndo vatyí cuñi ndo sii ñiyivi sa ndisa cuii.

⁹Sa sito ndo cuhva cuñi xaan ra Jesucristo sii yo. Cuca xaan maa ra, zoco sa cuenda maa yo i zandundahvi xaan ra sii ra sa quisi ra ihya ñuu ñiyivi. Ta vityi zanducua ra sii yo vatyí sa cuenda sa i sihi ra nuu cruz, ta cua ñihi maa yo sa vaha sa saha ra Ndyoo sii yo.

¹⁰Vityí sehi minoo sa siñi tuñi vaha sii ndo vatyí tañi sa quisaha saha xaan ndo xuhun cuyava,

¹¹vityí zavaha ca ndo sii si tañi zavaha ndo quivi cuan. Cuhva ndo ñaa sa cuu cuhva ndo.

¹²Tatu ndisa cuii cuñi ndo cuhva ndo, ña ñiñi xaan yozo cuhva ndo. Cua quihin ra Ndyoo ñaa sa cuu cuhva ndo. Ta ña cuñi ra sa cuhva yo minoo cuhva sa ña cuu sii yo.

¹³Ña cuñi sa ndyehe xaan maa ndo tundoho vatyí saha xaan ndo xuhun ndo sii inga ñiyivi ta ñahñi tundoho cua ndyehe maa ñu. Ña tacuan cuñi si.

¹⁴Zoco vityí iyo cuaha xuhun ndo, ta cuu tyindyee ndo sii ñiyivi ndahvi ca. Ta cuee ca inga saha cua cuu tyindyee maa ñu sii ndo tatu siñi ñuhu si sii ndo. Tacuan ta cua cuu ndo inuu ñi.

¹⁵Tañi catyi si nuu tutu ra Ndyoo: “Ra i ñihi cuaha ca, ñá ndoo si sii ra. Ta ra i ñihi zuhva ñi, ñá cumañi si sii ra.” Catyi si.

Cua cahun ra Tito sihin ra hermano ndya ñuu Corinto

¹⁶Tyahvi ndyoo sii ra Ndyoo vatyí inuu ñi cuñi ra Tito sii maa ndo tañi cuñi mi sii ndo.

¹⁷I quihin ra tyiño sehi sii ra sa cahun ra cundyehe ra sii ndo vatyí sa sica iñi ra zavaha ra cuhva cuan. Ta yucuan cuenda cua quisi ndyehe ra sii ndo vatyí cuñi ra.

¹⁸Tasi ndi inga ra hermano sihin ra. Tandihí ñiyivi sino iñi, cahan xaan nu sa vaha sa cuenda ra ya. Ta cuu xaan nacatyí ra Tuhun Vaha ra Ndyoo.

¹⁹Ta ña tacuan ñi vatyí i casi tandihí ra hermano sii ra sa caca noo ra sihin ta tyindyee ra sii, sa naquihin xuhun sa cuenda ñiyivi ndahvi. Zavaha ndi cuhva ya vatyí zacahnu si sii ra ndyaca ñaha sii yo ta zañaha si vatyí cuñi ndisa cuii ndi sii ñiyivi.

²⁰Tyehen zavaha ndi tyiño ya coto tyaa ñiyivi cuatyí sata ndi sa cuenda cuhva zacasi tahan ndi sa cuaha xaan xuhun ya.

²¹Cuñi ndi zavaha ndi sii si minoo cuhva ndoo xaan ityi nuu ra Ndyoo ta cuhva cuñi ñiyivi.

²²Ta sihin ra Tito tasi tucu ndi minoo ca ra hermano yo vatyí ndyehe ndi vatyí cuñi xaan ra zatyíño ra tyíño ra Ndyoo. Sa nacatyí sihin ra cuhva cuñi xaan ndo tyindyee ndo sihin xuhun, ta vityí cuñi xaan ra cuhun ra nu yucu ndo.

²³Sa sito ndo vatyí ra Tito cuu ra tehin ta ra tyindyee sii, sihin tyíño ra Ndyoo nu yucu ndo. Tacuan nacatyí ndo tatu yoo ra ndaca tuhun sii ndo. A tatu ndaca tuhun ñiyivi sa cuenda inga ra hermano sa vasi sihin ra, catyí ndo vatyí ra hermano ityi ya tasi sii ra, ta sino xaan iñi nduu tahan ra sii ra Cristo.

²⁴Yucuan cuenda ityi nuu tandihi hermano tyindyee ndo sii ra ya, ta zañaha ndo vatyí cuñi xaan ndo sii ra sa cuenda mi. Tacuan ta cua coto ra ñaa cuenda cahan xaan ndi tuhun ndo ta catyí ndi vatyí vaha xaan ñiyivi cuu ndo.

Cuhva cua tyindyee ra hermano sii ñiyivi ndahvi sihin xuhun

9 Sa cuenda tuhun sa cuhva ndo xuhun sii ra hermano ndahvi, ña cuñi si sa tyei ihya

²vatyí sa site ñaa sa iyo ańima ndo. Yucuan cuenda zii xaan cuñi, ta nacatyí xein sa cuenda ndo sihin ra hermano ihya nu cu si Macedonia. Nacatyí vatyí ndoho nu cu si Acaya sa ndyaa listo ndo ndya cuyava sihin xuhun sa cua cuhva ndo. Ta cuhva iyo maa ndo zañaha si minoo cuhva vaha, ta yucuan

cuenda iyo cuaha xaan ca inga ra cuñi tyindyee.

³Zoco nu ndihi tuhun, tasi sii ra hermano nu yucu ndo vatyí cua zanumi ndo ta zatitahan ndo xuhun cuan tañi sa catyí cua zavaha ndo vatyí coto catyí ra hermano ñuu Macedonia vatyí ña ndisa cuu tuhun quehin sa cuenda ndo.

⁴Tatu ndyehe ra hermano Macedonia vatyí ña ndyaa listo ndo quivi cuhun ra sihin mi nu yucu ndo, cua cucahan nui tatu ña sa ndyaa listo xuhun ndo vatyí sa cahan xein sa vaha sa cuenda ndo. Ta cua cucahan tucu nuu maa ndo.

⁵Yucuan cuenda sica iñi vatyí vaha ca tatu cuhun xihna ra hermano ya nu yucu ndo, ta tyindyee ra sii ndo sa zatitahan ndo xuhun cuan, yozo cuñi maa ndo cuhva ndo. Ta ziqui cua cundyaa listo si tañi minoo sa cundaa iñi ndo ta cuhva ndo ta yivi tañi minoo sa zañiñi ndi sii ndo ta cuhva ndo.

⁶Zoco nacohon iñi ndo minoo tuhun ya; ra sa zuhva ñi tasi, zuhva ñi cua naquihin ra. Ta ra tasi cuaha, cuaha ca cua naquihin ra.

⁷Cuhva minoo minoo ndo yozo sa cundaa iñi ndo, yivi sa zañiñi minoo ñiyivi sii ndo ta yivi sihin sa cuihya iñi. Vatyí cuñi xaan ra Ndyoo sii ñiyivi, ñu saha maa xuhun ta cuzii iñi ñu.

⁸Ta cuu cuhva ra Ndyoo cuaha ca sii ndo. Cua cuhva ra tandihi nuu sa vaha sii ndo. Ta tacuan ta cua coo tandihi sa siñi ñuhu sii ndo, ta cua cuu tyindyee ndo cuaha xaan cuhva sii inga ñiyivi.

⁹Tyehen catyí Tuhun ra Ndyoo:

Minoo ra vaha, saha maa ra sa sii ra sii ñiyivi ndahvi.

Ma naa iñi ra Ndyoo cuhva vaha zavaha ra.

¹⁰Maa ra Ndyoo cuu ra saha siti sa cua tasi yo. Ta cua cuhva tucu maa ra sa cua casi yo. Cua zanducuaha ca ra siti sa tasi maa ndo, ta cua cuhva ca ra cuhva sii ndo sa zavaha ndo sa vaha sihin sa saha maa ra.

¹¹Cua coo tandihi nuu sa vaha sii ndo, sa cua cuu cuhva maa ndo ta tyindyee ndo sii inga ñiyivi. Ta quivi cua cundyaca ndi xuhun ndo nu yucu ra hermano ndahvi, cua nacuhva xaan ra tyahvi ndyoo sii ra Ndyoo.

¹²Iyo uu nuu sa vaha sa cua coo sa cuenda xuhun sa cua cuhva maa ndo. Sa xihna ñi tyindyee si sii ñiyivi sa siñi ñuhu. Ta sa cu uu cuu sa cua nacuhva xaan ñu tyahvi ndyoo sii ra Ndyoo.

¹³Cua zacahnu xaan ñu sii ra Ndyoo vatyí tyindyee ndo sii ñu ta ndyehe ñu vatyí sa ndisa tyaa ndo yahvi tuhun ra Cristo. Ta cua zacahnu ñu sii ra vatyí tyindyee xaan ndo sii ñu ta sii tandihi ñiyivi.

¹⁴Ta cua caca ñu tumañi iñi sii ra Ndyoo sa cuenda maa ndo, ta cua cuñi xaan ñu sii ndo sa cuenda cuhva vaha xaan sityiño ra Ndyoo sii ndo.

¹⁵Tyahvi ndyoo sii ra Ndyoo sa cuenda sa saha maa ra. Saha ra sii zehe ra. Vaha xaan sa saha maa ra ndya cuhva ña ñihi ca ndi tuhun cahan ndi sa cuenda si.

Iyo cuhva sii ra Pablo sa cahan ra sihin ra hermano vatyí minoo ra cuu apóstol cuu ra

10 ¹⁻²Yuhvi ra Pablo sique minoo tumañi iñi sii ndo

sihin sa vii, tañi sa vii sa iyo sii ra Cristo. Vatyí iyo ndo catyí ndo vatyí tatu zacote ñaa tyiño sii ndo sihin carta, xaan xaan quehin, catyí ndo. Ta tatu ndyei sihin ndo vii xaan quehin, catyí ndo. Zoco sique tumañi iñi sii ndo vityí vatyí ña cuñi cuxein sihin ndo tatu cuhin nu yucu ndo. Zoco site vatyí cua cuxein sihin zuhva ndo quivi cuhin nu yucu ndo vatyí iyo ndo catyí ndo vatyí zavehi cuhva zavaha ñiyivi ña sito sii ra Ndyoo.

³Ndisa vatyí ñiyivi cuu ndi, zoco ña sahñi tahan ndi tañi sahñi tahan ñiyivi ñuu ñiyivi. Sahñi tahan ndi sihin sa ña vaha sihin tundyee iñi sa saha ra Ndyoo.

⁴Ta ndaha tyiño sa sityiño ndi nu sahñi tahan ndi, ndaha tyiño sa saha maa ra Ndyoo cuu si. Ta iyo xaan tundyee iñi sii si, ta cuu zativi si tyiño cuihna.

⁵Cuu zahacanaa ndi ziqui tandihi sa ña vaha sa cahan ñiyivi sii ra Ndyoo ta ziqui tandihi inga sa ña vaha sa ña saha tyaa ñiyivi yahvi sii Tuhun Ndyoo. Ta tandihi cuhva sica iñi ñiyivi ñuu ñiyivi ya, saha cuenda ndi sii ra Cristo sa cundyaca ñaha ra sii si, ta tandihi si cua tyaa si yahvi sii ra.

⁶Cua ndyehe ndi tatu sa tyaa vaha tandihi ndo yahvi sii ra Cristo, ta ziqui cua tasi tuñi ndi sii yoo ra ña tyaa yahvi.

⁷Zoco maa ndo zaha xaan ndo cuenda cuhva caa ñiyivi tatu vaha ñu a ña vaha ñu, ta ña sito ndo ñaa sa iyo añima ñu. Tatu iyo ndo sito ndo vatyí cuenda ra Cristo cuu ndo, cua coto tucu ndo vatyí cuenda ra Cristo cuu tucu maa ndi.

⁸Ta ña cahan nui vazu cuaha quehin sa cuenda cuhva saha ra Ndyoo sii, vatyí ndisa i saha ra tyiño sii, sa tyindyeyi sii ndo ta yivi sa zatívi sii ndo.

⁹Ña cuñi sa caca iñi ndo vatyí cuñi zayuhi sii ndo sihin carta ñi.

¹⁰Vatyí catyí ndo: Xaan xaan cahan carta ra. Ñihi xaan cahan si. Zoco mazu xaan ra tatu sa ndyaa ra, ta ña cuu vaha cahan ra, ndíhi ca. Catyí ndo.

¹¹Zoco tatu tacuan catyí ndo, cuñi si sa coto ndo vatyí tañi cuhva tyei nuu carta ta zuun ñi cuhva cuan cua quehin quívi cua sei nu yucu ndo.

¹²Ña zaha maa ndi tuhun sa vaha xaan ndi tañi iyo inga ra nacatyí sihin ndo vatyí vaha xaan ra. Ndyehe ra cuhva iyo ra tahan ra, ta ndyehe ra sii maa ra, ta sica iñi ra vatyí vaha xaan ra. Zoco ñahñi sa siñi tuñi vaha iyo sii ra cuhva cuan.

¹³Zoco ma zacahnu maa ndi sii ndi minoo cuhva ña tahan si. Maa ra Ndyoo cuu ra i catyí ndyamaa cua zatyíno ndi, ta i saa ndi nu ndyaa maa ndo.

¹⁴Tatu yívi maa ndi zacoto Tuhun Ndyoo sii ndo sa xihna ñi, ma tahan si sii ndi vityí sa zaha ndi cuenda sii ndo. Zoco tahan si sii ndi vatyí xihna ca maa ndi i saa nu ndyaa ndo sihin tuhun ra Cristo.

¹⁵Ña catyí ndi vatyí tyiño inga ra cuu tyiño maa ndi. Zoco cuñi ndi vatyí nduvaha ca cuhva sino iñi ndo, ta ziquí cua nducahnu ca tyiño maa ndi nu tahan si zatyíno ndi.

¹⁶Ta ziquí cua zacoto ca ndi tuhun ra Cristo ñuu sica ca ityí nuu ca nu yucu ndo, nu ta coto ca ñu

Tuhun Ndyoo. Ña cuñi ndi zatyíno ndi nu sa quisaha inga ra sa xihna ñi. Ña cuñi ndi zacahnu ndi sii ndi ta catyí ndi vatyí tyiño inga ra cuu tyiño maa ndi.

¹⁷Tatu iyo ra cuñi ra zacahnu ra sii ra, vaha ca nacatyí ra cuhva i zavaha ra Ndyoo ta zacahnu ra sii ra Ndyoo.

¹⁸Vatyí ña quita vaha minoo ra catyí vatyí vaha xaan ra. Quita vaha ra sa ndisa tatu catyí ra Ndyoo vatyí vaha ra.

Zacuenda ndo sii ndo sihin ra zandavi ñaha

11 Zandyee ndo iñi ndo zuhva ca vatyí cua quehin zuhva ca sa tondo. Zandyee ndo iñi ndo nanacatyí ñaa sa iyo añime.

²Vatyí ñoho xaan iñi sii maa ndo sihin minoo cuhva i saha ra Ndyoo sii, vatyí mi i tyíhi sii ndo ityí ra Cristo, ta cuñi vatyí iñi ñi sii maa ra cuan cua cuñi xaan ndo tañi cuñi xaan minoo ñaha yoco sii ra cua tandaha sihin ña.

³Zoco sica xaan iñi sa cuenda ndo coto tahan si sii ndo tañi i tahan si sii cu Eva vatyí i zandavi ñaha cuihna sii ña. Ta yucuan cuenda sica xaan iñi sa cuenda ndo coto caca iñi ndo inga cuhva sa cuenda ra Cristo ta coto zandoo ndo cuhva sa zacahnu ndo iñi ñi sii maa ra.

⁴Vatyí maa ndo tuhva ndo tyizoho sa cahan inga ra, tuhun inga Jesús, ra ña tuhva ndi cahan tuhun. Ta ra yucuan cahan sa cuenda inga tatyí, sa yívi Tatyí Ii sa ñihi maa ndo. A tatu catyí ra cuan, inga cuhva cua cacu ndo, vaha xaan tyizoho ndo sa cahan ra.

⁵Ta ña sica iñi vatyí vaha ca numínoo ca ra zatyíño tyíño ra Ndyoo ta ziquí mi vazu sica iñi ra cuan vatyí vaha xaan ca ra.

⁶Vazu ña cuu vaha quehin, zoco sito xein Tuhun Ndyoo. Ta sa cuaha xaan saha zañaha ndi sii ndo cuhva sa cuu zavaha ndi.

⁷¿Atu sica iñi ndo vatyí i zavehi sa ña vaha vatyí ñá quihin xuhun ndo quívi i zacote tuhun ra Cristo sii ndo? I zanduluhli sii, vatyí cuñi sa cua sino iñi ndo.

⁸I tyindyee ra hermano inga ñuu sii, sihin xuhun. I quihin xuhun ra sita sasi ñi ñi sa tyindyeyi sii maa ndo sihin Tuhun Ndyoo.

⁹Ta quívi sa siñi ñuhu xuhun sii, zoco ñá síque xuhun sii maa ndo vatyí i quisi ra hermano ndya Macedonia ta saha maa ra sa siñi ñuhu sii. Ta nu ñá yozo ziquí numínoo ndo sii. Ta nu ma cozo ziquí ndo sii ityi nuu ca.

¹⁰Vatyí tañi sa site vatyí maa ñi tuhun ndisa ra Cristo quehin, ta tacuan tucu site vatyí ma cuhve sa quindyaa ndoho, ra nu cu si Acaya, sa zii cuñi vatyí ñá síque xuhun sii ndo ta ma caque xuhun sii ndo ityi nuu ca.

¹¹¿Ta ñaa cuenda zavehi cuhva ya? ¿Atu zavehi sii si vatyí ña cuñi sii ndo? Sito vaha ra Ndyoo vatyí cuñi xein sii ndo.

¹²Ta cua zavaha que cuhva ya vatyí cuñi zañehi vatyí ña ndisa inga ra sa catyi vatyí inuu ñi zatyíño ra tañi mi. Zoco ña ndisa ra cuan vatyí sica ra xuhun.

¹³Catyí ra cuan vatyí apóstol cuu ra, zoco ña ndisa. Zandavi ñaha ra.

¹⁴Ta ña iyo cuñi sihin cuhva cuan vatyí ndya cuihna ta cuu zanduu ra

sii ra tañi cuhva caa minoo ángel sa ndisi xaan sihin sa ndisi maa ra Ndyoo.

¹⁵Ta ñiyívi cuu tucu zandavi ñaha ñu tatu cuñi ñu. Yucuan cuenda ra ndyico sii ra ña vaha, zaha ra tuhun vatyí ra zavaha sa vaha cuu ra. Zoco cua coo quívi cua tasi tuñi ra Ndyoo sii ra sihin cuhva tahan si sii ra.

Cuhva i ndyehe ra Pablo tundoho vatyí minoo apóstol cuu ra

¹⁶Catyí inga saha vatyí ma caca iñi ndo vatyí minoo ra loco cui vatyí quehin cuhva ya. Zoco tatu tacuan sica iñi ndo, naquehin sihin ndo tañi sa ra loco cui. Ta cua zacahni sii zuhva.

¹⁷Yívi ra ndyaca ñaha sii yo cuu ra catyi sihin vatyí quehin cuhva ya, zoco quehin tañi minoo ra loco vatyí zacahni sii.

¹⁸Iyo cuaha xaan ra zacahnu sii ra vatyí vaha xaan ra cuñi maa ra ityi nuu ñiyívi ñi. Ta yucuan cuenda cua zacahnu tucu mi sii.

¹⁹Vatyí zii xaan cuñi ndo tyizoho ndo sa cahan inga ra loco cuan, ta sito xaan maa ndo cuñi ndo.

²⁰Cundyee iñi ndo tatu catyi inga ra cuan sihin ndo vatyí cua zatyíño ndo tyíño ra. Zuhu ra sa sii ndo, ta ña tuu iñi ndo. Cuñi ra cundyaca ñaha ra sii ndo. Ña cuu ndyehe ra sii ndo, ndya cuhva cati ra nuu ndo, ta cundyee iñi ndo sihin tandihí sa zavaha ra sihin ndo.

²¹¿Atu sicoo cuatyí mi vatyí ñá caña iñi zavehi cuhva cuan sihin ndo, cuñi ndo? Ña yuhu maa ra cuan zacahnu ra sii ra, ta vityí ña yuhu tucu mi. Ta cua quehin tañi minoo ra loco.

²²Catyi ra cuan vaty ra hebreo cuu ra. Ra hebreo cuu tucu yuhvi. Ta ra ñuu Israel cuu ra cuan. Ta zuun tucu ra cuu ii. Ñiyivi sii ra Abraham cuu ra, ta zuun tucu cuu ii.

²³Catyi ra cuan vaty muzu ra Cristo cuu ra. Ta vityi cua quehin tañi minoo ra loco vaty cuñi catyi sihin ndo vaty ñihi ca cui muzu ra Cristo vaty cuaha xaan ca zatyñe tyiño ra Cristo ta ziqui inga ra cuan. Cuaha ca saha i tyihi ñiyivi sii, vehe caa. Cuaha xaan saha i cañi ñu sii. Ta cuaha xaan saha i cuñi cahñi ñu sii.

²⁴Ohon tahan saha i cañi ñiyivi hebreo sii sihin cuarta. Oco sahun cumi saha tahan tahan saha.

²⁵Uñi saha i cañi ñiyivi sii sihin yutu, ta minoo saha i cañi ñu sii sihin yuu. Uñi tahan saha i ndyee barco sa ñohi, ta minoo ñiyaca ta minoo ndiyaca i ndoi sisi tyañuhu.

²⁶Cuaha xaan, cuaha xaan sica noi. Iyo saha sa vaty tyañi yuu. Zayuhu ra zuhu sii. Quiñi xaan zavaha ra hebreo ra tehin sihin. Quiñi xaan zavaha ñiyivi inga tata sihin. Cuaha xaan sa ica i cuu sii, ñuu nahnu, sisi huhu, nu tyañuhu ta nu iyo ñiyivi catyi vaty sino iñi ñu, zoco ña ndisa ñu.

²⁷Ñihi xaan zatyñe ta ndyehi tundoho ta cundihi xaan iñi. Cuaha saha ñá quixi. I sizoque, ta ityi ndutya. Cuaha saha ñá ñihi sa casi. Visi xaan i cui, ta ña cuaha zahme.

²⁸I ndyehi tandihi huhva cuan ta inga tucu huhva vaty tandihi quivi sica xaan iñi tatu iyo vaha tandihi ñiyivi sino iñi.

²⁹Tatu iyo minoo ndo nduvita huhva sino iñi ndo, cuñi xein tyindyei sii ra tañi sa iin ñi cui sihin ra. Tatu iyo minoo ra zandoyo ñuhu sii hermano ta ña sino vaha ca iñi ra, cuxein.

³⁰Tatu cuñi si vaty zacahni sii sa zuun ñi mi (ta tacuan ta cua coto ndo vaty muzu maa ra Ndyoo cui sa ndisa cui; cua zavehi sii si) zoco cua nacaty maa ñi huhva zañaha si vaty ñahñi tundyee iñi iyo sii mi sa maa tuhun ñi.

³¹Maa ra Ndyoo, Zutu ra Jesucristo ra ndyaca ñaha sii yo, cuu ra cuñi si zacahnu yo tandihi cui tyiemvu. Ta sito maa ra vaty quehin sa ndisa ta ña vaty.

³²Quivi sa sehin ñuu Damasco, ra cu gobierno cuenda ra rey Aretas i sicumi ra yuvehe cahnu ñuu cuan sihin zandaru vaty cuñi ra tñin ra sii.

³³Zoco i zanoo ñiyivi sii sisi minoo tyica cahnu nu ndyaa minoo ventana nuzama cuan, ta huhva cuan i quite ta i sino xehi sii ra cuan.

Sa zañaha ra Ndyoo sii ra Pablo

12 Site vaty ñahñi cua ñihi sihin huhva sa zacahni sii, zoco cua nacaty huhva i zañaha ra ndyaca ñaha sii yo sii.

²Site minoo ra sino iñi sii ra Cristo. (Ihya cahan ra Pablo zuun ñi sa cuenda maa ra.) Sa yaha usi cumi cuiya vity ndya quivi i sindyaca ra Ndyoo sii ra ndya sa cu uñi yuty andivi. Ña site tatu sahan coño ñuhu ra a ña sahan. Yuhvi ña site. Maa ñi ra Ndyoo sito.

³⁻⁴Zoco site vatyi sahan ra cuan nu ñoho ñiyivi vaha, ñu sa sihi. Ña site tatu sahan coño ñuhu ra sa quehin tuhun ya a ña sahan si. Maa ñi ra Ndyoo sito. Ta i sahan ra cuan nu i siñi ra tuhun xehe. Xehe xaan tuhun cuan, ta yoñi rayii cuu nacatyí sii si.

⁵Tahan si sii, sa zacahni sii, sa cuenda cuhva i zañaha ra Ndyoo sii minoo ra cuan (vatyi zuun ñi ra cuan cui), zoco ma catyi vatyi ra vaha xaan cui sa cuenda cuhva cuan. Cua catyi vatyi ra vaha cui maa ñi sa cuenda sa ñahñi tundyee iñi iyo sii sa maa ñi mi.

⁶Zoco tatu cuñi zacahni sii, yivi ra loco cui vatyi maa ñi sa ndisa cuu sa quehin. Zoco ma catyi vatyi ra vaha cui coto yaha xaan zacahnu ñiyivi sii, minoo cuhva ña tahan si. Cuñi sa ndyehe ndo cuhva iye ta cuhva zacuehi ta ziqui cua coto ndo tatu vehi a ña vehi.

⁷Ta coto caca iñi vatyi vaha xein sa cuenda sa cuaha xaan cuhva i zañaha ra Ndyoo sii, i saha tucu ra sa cañi cuihna sii coño ñuhi. Cahnu xaan tundoho i tasi cuihna sii, coto caca iñi vatyi vaha xein.

⁸Uñi tahan saha i sique sii ra ndyaca ñaha sii yo natyaa siyo ra tundoho ya sii.

⁹Ta tyehen i catyi maa ra Ndyoo sihin: “Cuaha xaan sa vaha sehi suun, ta ñahñi ca sa siñi ñuhu suun. Ta ma nduvohon. Ta tatu ñahñi tundyee iñi iyo suun, zoco ndyehe ca ñiyivi tundyee iñi mi sa iyo suhun”, catyi ra. Ta yucuan cuenda zii xaan cuñi vatyi ñahñi tundyee iñi iyo sii. Ta tacuan ta cua coo xaan tundyee iñi ra Cristo sihin.

¹⁰Yucuan cuenda zii xaan cuñi tatu vita xein, tatu cuxaan ñiyivi sihin, tatu iyo sa siñi ñuhu sii, tatu cuñi cahñi ñiyivi sii, ta tatu ndyehe xein tundoho sa cuenda ra Cristo vatyi tatu ñahñi tundyee iñi iyo sii sa maa ñi mi, ñihi que tundyee iñi ra Ndyoo.

Sica xaan iñi ra Pablo sa cuenda ñiyivi sino iñi sii ra Ndyoo ñuu Corinto

¹¹Tañi minoo ra loco cui tatu zacahni sii, zoco maa ndo zañiñi sii, sa zavehi sii si vatyi ña tyaa ndo yahvi sii. Maa ndo tahan si sa cahan vaha sa cuenda mi, zoco ña cuñi ndo. Ndyico ndo sii ra catyi vatyi vaha xaan zatyíño ra tyiño ra Jesús, ta ñahñi cuhva sa luhlu que ta ziqui maa ra vazú ñahñi ra cui.

¹²I ndyehe ndo cuhva i zatyíne tyiño ra Ndyoo nu yucu ndo. I zandyee xein iñi cuhva ndyehi tundoho, ta i zavaha xein zeña ta sa ndyityi ta tyiño sihin tundyee iñi ra Ndyoo.

¹³¿Atu vaha ca ñiyivi i cui sihin ra hermano inga ñuu ta ziqui sihin maa ndo? Ña tacuan. Inuu ñi cui sihin tandihi ndo. Minoo ñi cuhva sa ñá zavehi sihin maa ndo cuu sa ñá yozo ziqui ndo sii. Zaha ndo tucahnu iñi sii, tatu zavehi sa ña vaha cuhva cuan.

¹⁴Ta vityi sa ndyaa listi sa cu uñi saha sa cua quisi ndyehi sii ndo. Ta ma cozo ziqui ndo sii, vatyi ña cuñi ndaha tyiño ndo. Cuñi sii maa ndo. Minoo ra cu zutu sa ndyihí, tyindyee ra sii zehe ra ta yivi zehe ra tyindyee sii ra.

¹⁵Ta yuhvi zii xaan cua cuñi cuhve sa sii, sa cuenda maa ndo.

Ta cuhva ndya mi, ta cua zandihi tundyee iñi sii, sa cuenda maa ndo. Zoco zehi cuenda vatyí tatu cuaha ca cuñi sii ndo, siin xaan cuñi ndo sii.

¹⁶Ta vazu sito vaha ndo vatyí ñá yozo ziquí ndo sii, zoco iyo ndo catyí ndo vatyí i zandavi ñehi sii ndo minoo cuhva ñá tuu iñi ndo ta i quihin sa sii ndo. Catyí ndo.

¹⁷¿Atu i zandavi ñehi sii ndo sihin minoo ra i tasi nu yucu ndo quívi cuan?

¹⁸Quívi i tasi sii ra Tito sihin inga ra hermano cuan, ¿atu i zandavi ñaha ra Tito cuan sii ndo ta quihin ra sa sii ndo? Ña tuhva ndi zandavi ñaha sii ndo. Ñin ñi cuhva zavaha nduu tahan ndi.

¹⁹¿Atu sica iñi ndo vatyí nduqui cuhva zacaqui sii, ityi nuu ndo sihin tuhun ya? Zoco ña tacuan. Sito ra Ndyoo cuhva cahan ndi. Ta cahan ndi sa cuenda ra Cristo. Ta tandihi sa zavaha ndi, zavaha ndi sii si vatyí cuñi ndi tyindyee ndi sii ndo. Cuñi xaan ndi sii ndo, ta cuñi ndi sa cua coto vaha ca ndo sii ra Ndyoo.

²⁰Yuhi coto cua sei yucuan ta nañihi sii ndo minoo cuhva sa ma tahan iñi. Ta ziquí ma tahan iñi maa ndo cuhva cua zavehi tatu nañihi sii ndo sañhi tahan ndo, tatu ndyiyi iñi ndo sa sii tahan ndo, a tatu tuhva ndo cuxaan, a tatu ña sica maa iñi ndo sa cuenda ra tahan ndo, a tatu cahan ndo ndya vaha ñi sii ra tahan ndo, a tatu tyaa xaan ndo cuatyí sata ra tahan ndo, a tatu zacahnu ndo sii ndo a tatu iyo tizihí nu yucu ndo. Tatu zavaha ndo cuhva cuan, ma tahan iñi ndo cuhva cua zavehi sihin ndo.

²¹Ta yuhi coto cuhva ra Ndyoo sa coo sa cahan nuu sii, sa cuenda ndo quívi sei nu yucu ndo. Ta cua nducuihya xaan iñi vatyí ndoho sa zavaha cuatyí, tañaha ca ndu-uu iñi ndo cuatyí ndo. Zavaha ca ndo sa quiñi. Quixi ndo sihin ñaha sa yívi ñazihí ndo cuu, ta zavaha ndo tandihi inga nuu sa ña vaha.

Zaha ndo cuenda tatu ndyico vaha ndo sii ra Cristo a ña ndyico ndo

13 Sa cuñi cuu si sa cu uñi saha quisi ndyehi sii ndo. Tatu iyo uu a uñi tahan sa ndaa, cua cundaa tyiño sa cuenda minoo minoo ndoho ra zavaha sa ña vaha. ²Quívi i sindyei sihin ndo sa cu uu saha cuan, i catyí sihin ndoho ra zavaha cuatyí vatyí nazandoo ndo cuatyí ndo. Ta vityí nacatyí tuqui zuun ñi cuhva cuan sihin ndoho ra ñá zaña cuatyí ndya quívi cuan. Ta sihin tandihi inga ndo nacatyí tuqui inga saha vatyí ma cundahvi iñi sii ndo quívi cua sei nu yucu ndo.

³Ta ziquí cua coto ndo cuhva sa cuñi xaan ndo coto ndo: tatu quehin tuhun ra Cristo a yívi. Ta ña vita iyo ra Cristo sihin maa ndo, zoco iyo xaan tundyee iñi maa ra sisi añima ndo.

⁴Ndisa, i cuu si tañi vita xaan ra quívi i sihi ra nu cruz, zoco vityí ndito ra sihin tundyee iñi maa ra Ndyoo. Ta tacuan tucu maa ndi, vita iyo ndi sihin ra sa catyí coño ñuhu ndi; zoco iyo tundyee iñi ra Ndyoo sii ndi sa cuenda cuhva cua zavaha ndi sihin maa ndo vatyí ñin ñi cuu ndi sihin ra.

⁵Ndyehe vaha ndo sii ndo tatu sino iñi ndo sa ndisa cuii. Nacoto

ndo vatyí iyo ra Cristo añima ndo tatu sino ndisa cuii ñni ndo sii ra. Zoco tatu ña sino ñni ndo sa ndisa, yoñi ra ndyaa sihin ndo.

⁶Ta cuñi sa cua nacoto ndo sa ndisa cuii vatyí iyo ra Cristo sihin mi.

⁷Ta vityí sique sii ra Ndyoo vatyí ma zavaha ndo cuatyí. Ña cuñi sa cua cahan vaha ñiyivi sa cuenda maa ndi cuhva cuan. Cuñi sa cua zavaha ndo sa ndoo vazu cahan vaha ñiyivi sa cuenda ndi a vazu cahan ñu ndya vaha ñi sii ndi.

⁸Vatyí ma cuu tyixehe maa ndi sii sa ndisa, sino ca cuñi si sa zañaha ndi sii ñiyivi ñaa sa cuu sa ndisa.

⁹Yucuan cuenda zii xaan cuñi ndi tatu ñahñi tundyee ñni sa zuun ñi sii maa ndi iyo sii ndi ta tatu ndyee ñni maa ndo sihin tundyee ñni maa ra Ndyoo. Ta ihya cuu minoo cuhva sa ñihi xaan cuñi ndi vatyí nanduu ndo ñiyivi vaha xaan sa ndisa cuii.

¹⁰Tasi carta ya sii ndo cuee ca sa cuhin nu yucu ndo vatyí cua zanduvaha ndo sii ndo. Ta ña cuñi

ca si sa cuxein sihin ndo quivi cua sei yucuan. Cuñi cutyiñe tundyee ñni sa saha ra Ndyoo sii, ta zandundyee que ñni ndo, ta yivi sa zativi ndihi sii ndo.

¹¹Ta vityí sa cuñi ndihi carte hermanos. Ihya ñi ca tuhun quehin: cuzii ñni ndo, zanduvaha ndo cuhva iyo ndo, tyaa ndo yahvi sa quehin, ñin ñi cuhva caca ñni ndo, ta nacoo sa taxi sii ndo sihin minoo ndo ta sihin inga ndo. Ta cua coo ra Ndyoo sihin ndo. Maa ra saha sa coo sa taxi sii yo sihin ra ta cuñi xaan ra sii yo.

¹²Cuhva ndo minoo ndyoo nacucumi sii minoo ndo ta sii inga ndo.

¹³Tandihí cuii ñiyivi sino ñni ihya tasi ñu minoo nacumi sii maa ndo.

¹⁴Nacoo xaan tumañi ñni sa saha ra Jesucristo sihin ndo, ta nandoo vaha xaan ndo sihin cuhva cuñi xaan ra Ndyoo sii ndo. Ta nandu-ñin tandihí ndo sihin Tatyí Ii. Nacuu si tacuan, ta nacuu si sa ndisa.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Galacia

**Tyaa ra Pablo minoo carta sii ñiyivi
sino iñi sii ra Ndyoo ñuu Galacia**

1 Yuhvi ra Pablo, minoo ra apóstol ra i casi ra Jesucristo cui. Yivi ñiyivi i saha tyiño ya sii, ta yivi ñiyivi i tasi sii, sino ca ra Jesucristo ta ra Ndyoo Zutu yo, ra i zanandoto sii ra Jesús sisi sa i sihi ra.

²Yuhvi ta tandihi ra hermano ndyaa ihya sihin, tyaa ndi carta ya sii ñiyivi sino iñi ñuu Galacia.

³Nacuhva xaan ra Ndyoo Zutu yo tumañi iñi sii ndo ta sa coo sa taxi añima ndo, ta tacuan tucu nacuhva ra Jesucristo, ra ndyaca ñaha sii yo.

⁴I saha maa ra Jesús sa cuu ra sa cuenda cuatyí maa yo vatyí tacuan ta cua zacacu ra sii yo sii sa quiñi iyo ñuu ñiyivi ya vatyí yucuan cuu sa cuñi ra Ndyoo Zutu yo.

⁵Yucuan cuenda inazacahnu yo sii ra Ndyoo tandihi cuii tyiemvu! Amén.

**Ñahñi inga ca cuhva
cuu cacu añima yo**

⁶Iyo xaan cuñi vatyí yatyí xaan cuñi zanandoo ndo sii ra Ndyoo. I

cana ra sii ndo sihin cuhva cuñi xaan ra Cristo sii ndo, zoco vityi tyaa ndo yahvi sii inga tuhun ta ndyico ndo inga cuhva cua cacu ndo cuñi ndo.

⁷Zoco ñahñi inga ca cuhva cua cacu yo sa ndisa. Iyo zuhva ra cuñi nazaca ra sa siñi tuñi sii ndo, ta cuñi ra zativi ra Tuhun Vaha sa cuenda ra Cristo.

⁸Zoco vazú maa ndi a minoo ángel quisi ndya andivi ta zacuahá ndi inga Tuhun Vaha sii ndo sa cuenda ra Cristo ta ziqui tuhun sa yaha zacoto ndi sii ndo, tatu yoo ra zacuahá inga cuhva cuan, nacuxaan xaan maa ra Ndyoo sihin ra.

⁹Ta tañi sa catyí, cua catyí tuqui inga saha. Tatu yoo ra zacuahá inga Tuhun Vaha sii ndo ta ziqui tuhun sa yaha tiin cuenda ndo, nacuxaan xaan maa ra Ndyoo sihin ra cuan.

¹⁰Ta sihin cuhva ya, cuu ndyehe ndo vatyí ña nduqui cuhva caca iñi ñiyivi vatyí vaha xein. Nduqui cuhva cui minoo ñiyivi vaha ityi nuu ra Ndyoo vatyí tatu nducu que cuhva cuzii iñi ñiyivi sihin, yivi muzu vaha ra Cristo cui.

Cuhva i nduu ra Pablo minoo apóstol

¹¹Ta zacote sii ndo hermanos vatyí tuhun vaha sa i zacote sii ndo, yívi tuhun sa quisi xiñi ñiyívi ñi cuu sí.

¹²Yívi tuhun ñiyívi i tiin cuende, ta yívi ñiyívi i zacuaha sii. Maa ra Jesucristo i zacoto sii.

¹³Sa sito ndo cuhva i cui quívi tañaha ca sino iñi ta sindyique cuhva sino iñi ñiyívi hebreo. Sito ndo cuhva i zayanga xein sii ñiyívi i casi ra Ndyoo ta cuhva i cuñi sa ndaha zacunei cuhva yucu ñu.

¹⁴Quívi i sindyique ley hebreo ta minoo ra cu nuu i cui sii inga ra sa iin ñi cuiya ndi vatyí i cuñi xein zavehi tandíhi costumbre sa i zavaha ñiyívi sahnu sii ndi.

¹⁵Zoco cumañi ca càquì, ta sa cundaa iñi ra Ndyoo vatyí cua casi ra sii. Ta sa saa si quívi i catyí ra ta ziquí i cana ra sii, vatyí cuñi xaan ra sii. Ta catyí ra vatyí cua zatyíne tyiño ra.

¹⁶Ta i zacoto ra sii, sa cuenda Zehe ra vatyí cua quehin tuhun ra nu ndyaa ñiyívi sa yívi ñiyívi hebreo cuu. Ta quívi i tehin cuhva cuan yoñi sii i nducu tuhun tatu vaha.

¹⁷Ta ñá sehin ñuu Jerusalén nu ndyaa inga ra apóstol i casi ra Jesús cuee ca ta ziquí mi. Zoco i sehin nu cu si Arabia, ta ziquí i sinanuhin ndya ñuu Damasco.

¹⁸I yaha uñi cuiya ta ziquí i sehin ñuu Jerusalén vatyí cuñi quehin sihin ra Pedro. Ta i ndoi sahun quívi sihin ra.

¹⁹Zoco yoñi inga ra apóstol i ndyehi, maa ñi ca ra Jacobo yañi ra Jesús.

²⁰Sito vaha ra Ndyoo vatyí cuhva tyei ihya maa ñi sa ndisa cuu si.

²¹Ta sa yaha sehin ñuu Jerusalén ta ziquí i sehin nu cu si Siria ta nu cu si Cilicia.

²²Ta ñiyívi sino iñi sii ra Cristo nu cu si Judea, ta coto ca ñu sii, quívi cuan.

²³Zoco i siñi ñu sa cahan ñiyívi sa cuende ta catyí ñu: “Ra i zayanga xaan sii yo quívi cuan, vityí sino iñi ra ta nacatyí ra tuhun ra Cristo. Ta quívi cuan i cuñi ra zanaa ra sii si.” Catyí ñu.

²⁴Ta i zacahnu xaan ñu sii ra Ndyoo sa cuenda mi.

Inga ra apóstol, ndoo ra vaha sihin cuhva zacuaha ra Pablo

2 I yaha usi cumi cuiya, ta ziquí i sehin ñuu Jerusalén inga saha sihin ra Bernabé. Ta i sahan tucu ra Tito sihin ndi.

²I sehin vatyí maa ra Ndyoo i zañaha sii, vatyí cuñi si sa cuhin. Ta i nacatyí sihin ra yucuan, cuhva zacuehi tuhun sa cuenda ra Cristo sii ñiyívi sa yívi ñiyívi hebreo cuu. Maa ñi sihin ra cu nuu sii ra hermano yucuan i quehin vatyí cuñi cote yozo caa sica iñi ra coto ma tahan iñi ra cuhva zacuehi ta catyí ra vatyí sa caha ñi cuu tyiño zacui.

³Ta i ndoo ra vaha sihin cuhva zacuehi. Ta ñá zañiñi ra sii ra Tito sa zavaha ra costumbre circuncisión cuan, ta yívi ñiyívi hebreo cuu ra Tito.

⁴Ndisa vatyí i quíhvi xehe zuhva ra catyí vatyí hermano cuu ra, zoco ña ndisa ra. I cuñi maa ra cahan cuehe ra sa cuenda cuhva iyo yo.

Sa cuenda ra Cristo, ta ñahñi ca sa ndyaca ñaha sii yo, zoco cuñi ra cuan vatyí tyaa yo yahvi sii tandihi costumbre sahnu.

⁵Zoco ñá saha maa ndi sa cundyaca ñaha ra cuan sii ndi nu siin vatyí ña cuñi ndi sa zandoo maa ndo tuhun ndisa sa cuenda ra Cristo. (Vatyí yívi ñiyívi hebreo cuu ndo, ta ña cuñi ndi sa caca iñi ndo vatyí cuñi ca si sa tyaa yo yahvi sii ley sahnu ta cacu yo.)

⁶Ta ra hermano, ra ndyaca ñaha sii ñiyívi sino iñi ñuu Jerusalén, ñahñi inga sa siñi tuñi vaha i saha ra sii, quívi cuan. Catyí ra ñiñi ca sii ra, zoco ña ñiñi ra sa cuenda mi vatyí ña ndyehe ra Ndyoo tatu sica iñi ñiyívi vatyí ra ñiñi cuu yo. Ndyehe maa ra ñaa sa iyo añima yo.

⁷Ñahñi inga ca tuhun i saha ra cuan sii. I nacoto ra vatyí maa ra Ndyoo i tasi sii, sa quehin tuhun ra Cristo sihin ñiyívi sa yívi ñiyívi hebreo cuu tañi i tasi ra sii ra Pedro sa cahan ra sihin ñiyívi hebreo.

⁸Vatyí zuun ñi ra Ndyoo cuu ra i tasi sii ra Pedro sa cuu ra minoo apóstol nu ndyaa ñiyívi hebreo tañi yuhvi cui sa cuenda ñiyívi sa yívi ñiyívi hebreo cuu.

⁹Yucuan cuenda i nacoto ra Jacobo, ta ra Pedro, ta ra Juan, ra cu nuu cuu tandihi ra yucuan, ta i nacoto ra vatyí maa ra Ndyoo cuu ra i saha sa vaha sii, sa quehin tuhun ra Cristo sihin ñiyívi. Ta ziquí i natiin ndaha tahan ra sihin mi ta sihin ra Bernabé vatyí ndoo ra vaha vatyí cua zatyíño ndi sihin ñiyívi sa yívi ñiyívi hebreo cuu, ta cua zatyíño maa ra sihin ñiyívi hebreo.

¹⁰Minoo ñi cuhva i catyí ra sihin ndi sa nacohon iñi ndi ta tyindyee ndi sii ñiyívi ndahvi, ta yucuan cuu sa tuhva xein zavaha.

Cuxaan ra Pablo zuhva sihin ra Pedro

¹¹Ta quívi i saa ra Pedro ñuu Antioquía i catyí sihin ra vatyí ña vaha cuhva zavaha ra.

¹²Vatyí sa xihna ñi i zavaha ra sa vaha ta sasi ra sihin ñiyívi sa yívi ñiyívi hebreo cuu. Tacuan i zavaha ra ndya i saa zuhva ra hebreo, ra i tasi ra Jacobo, ta ziquí ñá cuñi ca ra Pedro casi sihin ñiyívi sa yívi ñiyívi hebreo cuu vatyí yuhu ra sii ra i saa cuan vatyí sica iñi ra cuan vatyí ñiñi xaan costumbre circuncisión.

¹³Ta i cu-ïin inga ra hebreo sihin ra Pedro ta nduu tucu ra ra vatyá, ta ndya cuhva i ndu-ïin tucu ra Bernabé sihin ra.

¹⁴Ta i ndyehi vatyí ña vaha cuhva zavaha ra. Ña sasi tahan si sihin cuhva catyí tuhun ra Cristo. Yucuan cuenda i catyí sihin ra Pedro ityí nuu tandihi ra yucu yucuan: “Yoho, minoo ra hebreo cuun, zoco zavohon cuhva zavaha ñiyívi sa yívi ñiyívi hebreo cuu. Ta ña zavaha con tandihi costumbre hebreo. ¿Ta ñaa cuenda cuñun zañiñun sii ñiyívi sa yívi ñiyívi hebreo cuu sa cua zavaha ñu costumbre maa yo ra hebreo?” I catyí.

**Inuu ñi cuhva cua cacu ñiyívi
hebreo ta ñiyívi sa yívi ñiyívi
hebreo cuu, sihin sa sino ñi iñi yo**

¹⁵Maa yo sa cuu yo ñiyívi hebreo, ña yaha xaan zavaha yo cuatyí

sa nuu inga ñiyivi sa yivi ñiyivi hebreo cuu.

¹⁶Zoco sito yo vatyí ma catyí ra Ndyoo sihin numinoo ra vatyí ñahñi cuatyí ra sa cuenda sa tyaa ra yahví sii ley i saha ra Ndyoo sii ra Moisés. Nduvaha yo ityí nuu ra Ndyoo sihin sa sino ñi yo sii ra Cristo Jesús. Yucuan cuenda sino ñi yo sii ra. Ta tacuan ta catyí ra Ndyoo vatyí ñahñi ca cuatyí yo ta yivi sa cuenda sa tyaa yo yahví sii ley sahnú vatyí yoñi sihin cua catyí ra Ndyoo vatyí ñahñi ca cuatyí ra sa tyaa ra yahví sii ley sahnú cuan, ta sii ra Cristo ña sino ñi ra.

¹⁷Vityí sino ñi yo sii ra Cristo ta sica ñi yo vatyí sihin sa yucuan ñi ta cua catyí ra Ndyoo vatyí ñahñi ca cuatyí yo. Zoco tatu cuee ca ta cua nacoto yo vatyí ña ndisa cuu tuhun ra Cristo ta ma cacu yo tatu ma zavaha yo tandihí sa catyí ley sahnú. ¿Atu cuñi si sa catyí yo vatyí sa sino ñi yo sii ra Cristo cuu sa i zatívi sii yo vatyí i zandoo yo ley sahnú sa cuenda sa sino ñi yo sii ra? ¡Númino saha ma catyí yo tacuan vatyí ña ndisa!

¹⁸Zoco cua coo cuatyí yo tatu nanducu tucu yo cuhva sa natyaa tucu yo yahví sii ley sahnú sa i zanandoo yo.

¹⁹I nducu yo cuhva tyaa yo yahví sii si quívi cuan. Ta ziquí i nacoto yo vatyí ma cuu cacu yo cuhva cuan, ta i zandoo yo sii si vatyí cuñi yo nduvaha yo ityí nuu ra Ndyoo sihin cuhva saha maa ra.

²⁰Tañi sa sihi yo nu cruz sihin ra Cristo cuu si, zoco ndito yo. Zoco yivi ca maa yo ndito, ra Cristo cuu ra iyo añima yo. Ta cuhva iyo yo

vityí ñuu ñiyivi ya, iyo yo tacuan vatyí sino ñi yo sii Zehe ra Ndyoo. Maa ra cuñi xaan sii yo, ta saha ra sa cuu ra sa cuenda yo.

²¹Yuhví ña cuñi tyaa siye cuhva cuñi xaan ra Ndyoo sii yo vatyí tatu cuu nduu yo ñiyivi vaha ityí nuu ra Ndyoo sihin sa tyaa yo yahví sii ley sahnú, sa caha ñi cuu sa i sihi ra Cristo.

Sihin sa sino ñi yo sii ra Cristo ta ñihi yo Tatyí Ii

3 Tondo xaan iyo ndo ndoho hermanos ñuu Galacia. ¿Yoo ra i zatívi sii ndo ta vityí ña cuñi ca ndo tyaa ndo yahví sii sa ndisa? Casi xaan i nacatyí ndi sihin ndo sa cuenda ra Jesucristo. Ta i cutuñi vaha ñi ndo ñaa cuenda i sihi ra nu cruz.

²Iyo minoo ñi tuhun cuñi nducu tuhín sii ndo: ¿Atu i ñihi ndo Tatyí Ii ra Ndyoo vatyí i tyaa ndo yahví sa catyí ley ra Moisés a sa sino ñi ndo tuhun sa cuenda ra Cristo?

³¿Ñaa cuenda i ndutondo xaan ndo? Quívi i quisaha sino ñi ndo, vaha xaan i tyaa ndo yahví sii ra Ndyoo sihin cuhva i tyindyee Tatyí Ii sii ndo. Zoco vityí cuñi ndo zatyiño ndo tyiño ra Ndyoo sihin tundyee ñi maa ndo.

⁴¿Atu sa caha ñi i ndyehe ndo cuhva i zacuu Tatyí Ii sihin ndo? Yivi sa caha ñi cuu si cuñi.

⁵Saha ra Ndyoo Tatyí Ii ra sii ndo, ta zavaha ra sa ndyityi nu yucu ndo. Ta zavaha ra sii si vatyí sino ñi ndo sii ra Cristo, ta yivi sa cuenda sa zavaha ndo cuhva catyí ley ra Moisés.

⁶Ta ra Abraham tucu, i sino ñi ra sii ra Ndyoo. Yucuan cuenda i catyí

ra Ndyoo vatyí ñahñi ca cuatyí ra iyo.

⁷Yucuan cuenda cuñi si sa coto ndo vatyí ñiyivi sino iñi sa ndisa cuii cuu ñiyivi sii ra Abraham.

⁸Ta sa naha i sicundyaa Tuhun Ndyoo nuu tutu. Ta catyi si vatyí ityi nuu ca cua zanduvaha ra Ndyoo sii ñiyivi sa yivi ñiyivi hebreo cuu sihin ra vatyí cua sino iñi ñu. Ta yucuan cuenda i catyi ra Ndyoo sihin ra Abraham ta sa naha: “Sa cuenda moo ta cua cuhve sa vaha sii tandihi ñiyivi ñuu ñiyivi.”

⁹Yucuan cuenda, ñiyivi sino iñi tañi sino iñi ra Abraham, saha ra Ndyoo sa vaha sii ñu tañi i saha ra sa vaha sii ra Abraham vatyí i sino iñi ra.

¹⁰Ta ñiyivi sica iñi vatyí cua cacu ñu tatu zavaha ñu zuhva sa catyi ley sahnu, cua tasi tuñi ra Ndyoo sii ñu vatyí catyi Tuhun Ndyoo vatyí cua tasi tuñi ra Ndyoo sii tandihi ñiyivi sa ma zavaha tandihi cuii sa catyi ley cuan.

¹¹Ma catyi ra Ndyoo sihin numinoo ñiyivi vatyí ñahñi cuatyí ñu ityi nuu ra vatyí tyaa ñu yahvi sii ley sahnu vatyí catyi Tuhun Ndyoo: “Nduvaha ñiyivi ityi nuu ra Ndyoo sihin sa sino iñi ñu sii ra. Ta cua cundito ñu tandihi cuii tyiemvu.”

¹²Ta ley ra Moisés, ña iin ñi cuu si sihin sa sino iñi yo vatyí catyi si: “Ra zavaha tandihi cuii tuhun ya, cua cundito ra tandihi cuii tyiemvu.” (Zoco ma cuu zavaha yo sii tandihi cuii si.)

¹³I tava ra Cristo sii yo sisi cuhva i zativi ley cuan sii yo vatyí sa i tiví maa ra sa cuenda yo tañi catyi

Tuhun Ndyoo: “Yoo ra cua cuu nu cruz, yivi ra vaha cuu ra ityi nuu ra Ndyoo.” Ta yivi ra vaha i cuu ra Jesús ityi nuu ra Ndyoo cuhva sa sindyaa ra nuu cruz vatyí ndyizo ra cuatyí maa yo.

¹⁴Sa cuenda ra Cristo ta saha ra Ndyoo sa vaha sii ñiyivi sa yivi ñiyivi hebreo cuu tañi i saha ra sa vaha sii ra Abraham. Vatyí sihin sa sino iñi yo sii ra Ndyoo ta ñihi yo Tatyí Ii sa catyi ra Ndyoo sa cua cuhva ra sii yo.

Zañaha ley sahnu sii yo vatyí iyo cuatyí yo, zoco ma zacacu si sii yo

¹⁵Vityí, hermanos, cua quehin zuhva ziquí cuhva iyo si ihya ñuu ñiyivi. Tatu catyi minoo ra vatyí cua cuhva ra minoo sa cua cuhva ra sii inga ra ta tatu sa tyaa ra zivi ra, yoñi cuu zama sii si ta yoñi cuu tyizo zuhva ca ziquí si.

¹⁶Ta i catyi maa ra Ndyoo vatyí cua cuhva ra sa cua cuhva ra sii ra Abraham ta sii minoo zehe ra. Ña catyi si nu tutu ra Ndyoo vatyí cua cuhva ra sii si sii cuaha ñiyivi zoco sii minoo ñi ra. Ta ra yucuan cuu ra Cristo.

¹⁷Ta ihya cuu sa catyi: I cahan ra Ndyoo cuhva i cahan ra sihin ra Abraham, ta casi xaan i catyi ra sii si. I yaha cumi ziendu oco usi cuiya ta ziquí i saa ley ra Moisés. Zoco ma cuu zanaa ley cuan cuhva i catyi ra Ndyoo sihin ra Abraham. Ma cuu zandihí si sii si.

¹⁸Tatu cuu ñihi yo sa tahan si sii yo sihin sa tyaa yo yahvi sii ley sahnu, sa caha ñi cuu cuhva i catyi ra Ndyoo vatyí cua cuhva ra sii yo. Zoco sito yo vatyí i ñihi ra Abraham

sa tahan si sii ra sa cuenda cuhva i cahan ra Ndyoo sihin ra.

¹⁹¿Ta yozo caa tyindyee ley ra Moisés? I saha ra Ndyoo ley cuan vatyí cua zacuaha si sii yo vatyí iyo cuatyí yo. Ta i ndoo si ndya cuhva ndya quívi i quisi ra Cristo, ra cu ñiyívi sii ra Abraham, vatyí i catyí ra Ndyoo sihin Abraham vatyí cua cuhva ra sa vaha sii ra cua quisi. Ta i saha ángel ley sii ra Moisés, ta ra Moisés saha sii si sii ñiyívi.

²⁰Zoco ra Ndyoo cuu ra i cahan sihin ra Abraham quívi cuan, ta ñá nanducu ra Ndyoo yoo ca ra cua cahan sihin ra Abraham.

Cuenda sa iyo ley ra Ndyoo

²¹¿Atu cuñi si catyí si vatyí cuxaan ley ra Moisés sii tuhun sa saha ra Ndyoo sii yo? Ña tacuan. Zoco ma cuu nduvaha yo ityí nuu ra Ndyoo sihin sa tyaa yo yahvi sii ley sahnú cuan. Tatu sa vatyí cuu coo yo cuhva saa sihin sa tyaa yo yahvi sii zuhva ley cuan, vaha maa tacuan ñi. Zoco ña tacuan cuu si.

²²Catyí tutu ra Ndyoo vatyí iyo cuatyí sii tandíhi cuií ñiyívi. Ta tacuan ta cuu ñihi yo sa catyí ra Ndyoo sa cua cuhva ra vatyí cua cacu yo sa cuenda ra Jesucristo. Ta cua ñihi yo sii si sihin sa sino ñi yo.

²³Quívi cumañi ca coo tuhun sa sino ñi yo sii ra Cristo, i tyazi ley cuan sii yo tañi sa ñoho yo vehe caa vatyí i ndatu yo quívi cua zañaha ra Ndyoo sii yo cuhva cua sino ñi yo sii ra, ta cua zacacu ra sii yo.

²⁴Ley cuan i cuu si tañi minoo sa zacuenda sii yo ndya sa quisi ra Cristo, ta ziquí cuu nduvaha yo ityí nuu ra Ndyoo sihin sa sino ñi yo.

²⁵Ta vityí sa saa quívi sino ñi yo sii ra Cristo ta ña siñi ñuhu ca ley cuan sa zacuenda si sii yo.

²⁶Vatyí tandíhi yo cuu zehe ra Ndyoo vatyí sino ñi yo sii ra Cristo Jesús.

²⁷Tandíhi yo, yo sa sicoo ndutyá, sa cuenda ra Cristo cuu yo. Ta sa ndu-íin yo sihin ra, ta nduu yo tañi maa ra.

²⁸Vityí ña ñiñi ca tatu cuu yo ñiyívi hebreo a ñiyívi inga tata a tatu cuu yo muzu ñiyívi a yívi a tatu cuu yo rayíi a ñuzihí. Vatyí tandíhi yo sa ndu-íin yo sa cuenda ra Cristo Jesús.

²⁹Ta tatu ñiyívi ra Cristo cuu yo, ñiyívi sii ra Abraham cuu yo sa ndisa cuií. Ta cua ñihi yo sa catyí ra Ndyoo sihin ra Abraham vatyí cua cuhva ra sii yo.

4 Vityí cua quehin ziquí minoo cuhva. Minoo ra luhlu tatu sihi zutu ra ta zandoo ra tandíhi ndaha tyiño ra sa cuenda zehe ra, ma cuu cutyiño ñaha ra luhlu cuan sii si ndya cuahnu ra. Ñi ñi sa luhlu ra, ta cuu ra tañi minoo muzu vehe zutu ra vazú tandíhi ndaha tyiño zutu ra cuu sii maa ra.

²Cuñi si coo minoo ra zacuenda sii ra ta ra cundyaca ñaha sa sii ra ndya cuhva ndya cua tahan si cuiya i catyí zutu ra, ta ziquí cuu naquihin ra ndaha tyiño zutu ra.

³Ta zuun ñi cuhva cuan iyo tucu si sa cuenda maa yo. Quívi cumañi ca sino ñi yo sii ra Cristo, i sindyaca ñaha ley sahnú sii yo; i tyaa yo yahvi sii costumbre sahnú i zacuu si.

⁴Ta tahan si quívi i tasi ra Ndyoo sii Zehe ra. I zacacu minoo ñaha sii

ra, ta minoo ñiyivi hebreo i cuu ra, ta i tyaa ra yahvi sii ley sahnu.

⁵I tasi ra Ndyoo sii ra vatyí cua zacacu ra sii ñiyivi tyaa yahvi sii ley sahnu vatyí tacuan ta cuu nduu ñu zehe ra Ndyoo.

⁶Ta sa cuenda sa nduu yo zehe ra Ndyoo ta tasi ra Ndyoo Tatyí Ii ra Cristo sisi añima yo. Ta yucuan cuenda catyí yo: “Ndyoo Zuti.”

⁷Yucuan cuenda zehe ra Ndyoo cuu sii yo, ta yivi ca muzu cuu yo sii ley. Ta sa cuenda sa cuu yo zehe ra Ndyoo ta cua cuhva ra tandíhi sii yo sa cuenda ra Cristo.

Sica xaan iñi ra Pablo sa cuenda ñiyivi sino iñi

⁸Quiví cumañi ca coto ndo sii ra Ndyoo, muzu i cuu ndo sii inga ndyoo sa yivi ndyoo cuu sa ndisa.

⁹Zoco vityí sito ndo sii ra Ndyoo, a catyí vatyí maa ra sito sii ndo. ¿Ta ñaa cuenda cuñi ndo nduu ndo muzu inga saha ta nandyico ndo sii cuhva sahnu cuan (sii costumbre sahnu cuan)?

¹⁰Zacahnu ca ndo vico, quiví nduyutya yoo ta vico tahan cuiya.

¹¹Sica xaan iñi vazu sa caha ñi i zatyíne sihin ndo.

¹²Ndoho hermanos, sica xein tumañi iñi sii ndo vatyí nduu ndo tañi mi vatyí ña ndyaca ñaha ca ley cuan sii. Sa ndui tañi i cuu maa ndo vatyí ñá tyaa ndo yahvi ley ra Moisés quiví ta cumañi ca sino iñi ndo. Zoco ña tyei cuatyí sata ndo vatyí i zavaha ndo sa ña vaha sihin mi vatyí ñahñi.

¹³Sito ndo vatyí quiví i zacote Tuhun Ndyoo sii ndo sa xihna ñi, i cuhu xein.

¹⁴Ta cuehe cuan tañi minoo prueba i cuu si sii, zoco ñá catyí ndo sa ma tyizoho ndo sa quehin, ta ñá sino sihin ndo sii. I tiin cuenda ndo sii, tañi minoo ángel ra Ndyoo cui a tañi ra Cristo Jesús.

¹⁵¿Ndyamaa cuahan sa zii xaan cuñi ndo quiví cuan? vatyí sehi sa ndaa sa cuenda ndo vatyí tatu cuu, cua tava ndo siti nuu ndo ta cuhva ndo sii si sii, quiví cuan.

¹⁶Ta vityí ¿atu sica iñi ndo vatyí ndui ra xaan iñi sii ndo vatyí quehin sa ndisa sihin ndo?

¹⁷Ta ñiyivi zacuaha inga cuhva cuan, vaha xaan zavaha ñu sihin ndo cuñi ndo, zoco yivi sa vaha cuu si sa ndisa. Cuñi ñu zacuziin ñu sii ndo vatyí tacuan ta cua cundyico ndo sii maa ñu.

¹⁸Ndisa vatyí vaha tatu zavaha ñu sa vaha sihin ndo. Tatu sa vaha cuu sa nanducu ñu sa ndisa, nazavaha ñu sii si tañi quiví sa ndyei sihin ndo.

¹⁹Zehe ndyíhi, ndyehi tundoho inga saha sa cuenda ndo tañi tundoho ndyehe minoo ñaha tatu sa cuñi cacu zehe ña. Ta cua ndyehi tundoho ndya cua ndundyee iñi ndo sa ndisa sihin tundyee iñi ra Cristo.

²⁰Vaha xaan tatu cuu quisi nu yucu ndo vityí; cuñi quehin sihin maa ndo. Ña ñihi que cuhva zacui sihin ndo.

Minoo cuhva cuenda ña Agar ta ña Sara

²¹Ndoho, ra cuñi sa cundyaca ñaha ley ra Moisés sii ndo, nacatyí ndo sihin: ¿Atu cutuñi iñi ndo cuhva catyí ley cuan?

²²Catyí Tuhun Ndyoo vatyí i sicoo uu tahan zehe ra Abraham.

Minoo ra i cuu zehe ra sihin ñaha i cuu muzu ñazihí ra. Ta inga ra i cuu zehe ra sihin ñazihí ra. Ta yivi muzu i cuu ñazihí ra Abraham.

²³Agar i sinañi muzu cuan, ta i cacu zehe ña tañi cacu zehe tandihi ñiyivi. Zoco zehe maha Sara, ñazihí ra Abraham, i cacu ra vaty i catyi ra Ndyoo sihin ra Abraham vaty i cua coo minoo zehe ñazihí ra.

²⁴Ta sa nduu tahan ñaha cuan cuu tañi uu tahan tyiño zandaa ra Ndyoo. Minoo si i saha ra nu yucu Sinaí. Yucuan i saha ra ley sii ra Moisés. Ta ñiyivi sa cuu cuenda ley cuan cuu tañi ña Agar vaty minoo muzu ñi i cuu ña sihin zehe ña.

²⁵Tañi ña Agar ta tañi yucu Sinaí ta tacuan iyo ñuu Jerusalén vityi vaty ndyaca ñaha ley sahnú sii ñiyivi ñuu cuan. Cuu ñu tañi muzu sii ley cuan.

²⁶Zoco andivi iyo inga ñuu Jerusalén. Minoo ñuu sa ñahñi sa ndyaca ñaha sii cuu si. Ta ñahñi tucu sa ndyaca ñaha sii maa yo vaty cuenda ñuu sa iyo andivi cuu yo.

²⁷Ta catyi Tuhun Ndyoo:

Cuzihí xaan iñun ñaha sa ñá sicoo zehe; yoñi zehun, ta i zandoo yiun suun.

Zihí xaan cuñun ndya cuhva cua vacu soon sihin sa zihí cuñun, yoho ñaha sa yoñi zehe.

Vaty cuaha ca zehe ñaha sa zandoo yihí sii cua coo ta ziqui ñaha sa iyo yihí.

²⁸Ta maa yo hermanos, cuu yo tañi ra Isaac zehe ra Abraham vaty i cacu ra cuhva i catyi maa ra Ndyoo.

²⁹Zoco ra i cacu cuenda ñaha sa cuu muzu cuan i cuu ra ra xaan iñi

sii ra i cacu cuhva catyi ra Ndyoo, ta tacuan cuu si ndya cuhva ndya vityi. Ñiyivi sa cuñi zavaha cuhva catyi ley, xaan iñi ñu sii maa yo ñiyivi zacacu ra Ndyoo sa cuenda Taty i ra.

³⁰Ta ñnaa catyi Tuhun Ndyoo? Catyi si: “Tava ndyizo ndo sii ñaha sa cuu muzu sihin zehe ña. Vaty zehe muzu cuan ma cuu ñihí ra sa sii zutu ra tañi cua ñihí zehe ñaha sa cuu ñazihí ra sa ndisa.”

³¹Yucuan cuenda, hermanos, yivi zehe ñaha cu muzu cuu maa yo. Maa yo cuu tañi zehe ñazihí ra Abraham vaty yivi muzu cuu yo. (Tiin cuenda ra Ndyoo sii yo vaty sino iñi yo ta yivi sa cuenda sa tyaa yo yahvi sii ley sahnú.)

I ndasi ra Cristo sii ndo; coo ndo cuhva cuan

5 I ndasi ra Cristo sii yo vaty i cua coo yo libre. Coo ndo cuhva cuan, ta ma nduu ndo muzu sii ley sahnú cuan inga saha a sii costumbre sa zavaha ñiyivi.

²Ndyehe ndo, yuhvi ra Pablo catyi sihin ndo vaty tatu zavaha ndo costumbre circuncisión cuan ta sica iñi ndo vaty cua zacacu si sii ndo, ma cuu tyindyee ra Cristo sii ndo.

³Cuñi catyi inga saha sihin tandihi ra cuñi cacu sihin costumbre circuncisión cuan vaty tatu tacuan cuñi ra, cuñi si sa zavaha ra tandihi cuii sa catyi ley ra Moisés.

⁴Tandihí ndoho ra sica iñi vaty i cua catyi ra Ndyoo vaty ñahñi cuaty ndo vaty zavaha ndo cuhva catyi ley sahnú cuan, cuu si tañi i zandoo ndo sii ra Cristo. Sa zaña

ndo sa vaha sa saha ra Ndyoo sii ndo.

⁵Vatyi maa yo sa iyo tundyee iñi sa saha Tatyí Ii sii yo, ndatu yo sa cua zanduvaha ra Ndyoo sii yo ityi nuu maa ra sa cuenda sa sino iñi yo.

⁶Vatyi tatu sa ndu-iin yo sihin ra Cristo Jesús, ña tyindyee si tatu zavaha yo costumbre circuncisión cuan a tatu ma zavaha yo sii si. Sa tyindyee cuu sa sino iñi yo sii ra Cristo, ta zañaha yo tatu sino iñi yo tatu zavaha yo sa vaha sihin tandihi ñiyivi.

⁷Vaha xaan i zavaha ndo quivi cuan. ¿Yoo sa zatívi sii ndo? ta vityi ña tyaa ca ndo yahvi sii sa ndisa.

⁸Yivi cuenda ra Ndyoo, ra i cana sii ndo, cuu cuhva cuan.

⁹Taño cua ndaa pan sihin zuhva ñi yusa iya, tacuan cuu cuhva cuu zatívi minoo ñi ñiyivi sii cuaha xaan ñiyivi.

¹⁰Cua tasi tuño ra Ndyoo sii ra zatívi sii ndo vazu yoo ca ra cuu ra. Zoco sito vehi vatyi cua tyindyee ra ndyaca ñaha sii yo sii ndo ta ma caca iñi ndo inga cuhva ta ziqui cuhva i zacuehi sii ndo.

¹¹Ta sa cuenda mi, hermanos, tatu cua catyi vatyi vaha zavaha ca yo costumbre circuncisión cuan, ma cuxaan xaan ñiyivi hebreo sihin. Zoco cuxaan ñu vatyi catyi vatyi sihi ra Cristo nuu cruz sa cuenda cuatyi yo.

¹²Ta sa cuenda ra zatívi sii maa ndo ivaha xaan tatu ndaha zaña ra sii ndo ta cuhun ra!

¹³Vatyi i casi ra Ndyoo sii maa ndo, hermanos, vatyi ñahñi ca sa cua cundyaca ñaha sii ndo, zoco yivi sa cuenda sa cua zavaha ndo

ña sa cuñi maa ndo. Cuñi si sa tyindyee ndo sii ñiyivi vatyi cuñi ndo sii ñu.

¹⁴Iyo minoo tuhun sisi Tuhun ra Ndyoo ta catyi si: “Cuñi ndo sii ñiyivi taño cuñi ndo sii maa ndo.” Ta tatu cuñi ndisa cuii yo sii ñiyivi, sihin minoo ñi cuhva cuan ta zavaha yo tandihi sa catyi ley ra Ndyoo.

¹⁵Zoco tatu xaan cuñi ndo ndyehe ndo sii minoo tahan ndo, ta tatu cahan cuehe ndo sii tahan ndo, coto vaha ndo sii ndo coto ndaha zatívi ndo sii minoo ndo ta sii inga ndo.

Cuhva ña vaha sa cuñi yo zavaha yo, ta cuhva zavaha yo tatu zavaha yo cuhva cuñi Tatyí Ii

¹⁶Ihya cuu sa cuñi catyi sihin ndo: Zavaha ndo cuhva cuñi Tatyí Ii ra Ndyoo, ta tacuan ta ma zavaha ndo sa ña vaha sa cuñi maa ndo zavaha ndo.

¹⁷Vatyi iyo minoo cuhva sa cuñi Tatyí Ii zavaha yo, ta maa yo cuñi yo zavaha yo inga cuhva. Ta ña cuñi yo zavaha yo cuhva cuñi Tatyí Ii. Cuhva cuñi Tatyí Ii, ña sasi tahan si sihin cuhva cuñi maa yo. Ta yucuan cuenda ma cuu zavaha yo cuhva cuñi maa yo.

¹⁸Zoco tatu zavaha yo cuhva cuñi Tatyí Ii, ña ndyaca ñaha ca ley cuan sii yo.

¹⁹Ña yii ndyehe yo ñaa sa zavaha ñiyivi tatu zavaha ñu cuhva cuñi maa ñu. Quixi rayii sihin inga ñaha sa yivi ñazihí ra cuu a ña tindaha ñu. Ta tacuan tucu zavaha ñuzihí sihin rayii, ta cuaha xaan sa quiñi zavaha ñiyivi sihin coño ñuhu ñu.

²⁰Zacahnu ñu sii zandu. Zatazi ñu. Cuxaan ñu ndyehe ñu sii inga ñiyivi.

Sahñi tahan ñu. Cuñi xaan ñu sa sii inga ñiyivi. Yaty xaan cuxaan ñu. Maa ñi sa cuenda maa ñu sica iñi ñu. Sahñi tahan ñu ta ziqui zavaha ñu ziin ziin ityi.

²¹Cuñi xaan ñu ndaha tyiño inga ñiyivi. Sahñi ñu ñiyivi. Siñi ñu. Zacahnu xaan ñu vico. Ta inga cuhva tañi cuhva ya zavaha ñu. Ta nacaty sihin ndo tañi sa catyi sihin ndo quivi cuan vaty ñiyivi zavaha cuhva ya ma cuu cuhun ñu nu ndyaca ñaha ra Ndyoo.

²²Zoco tatu zatyño xaan Taty Ii sihin yo, ihya cuu cuhva cua coo yo. Cua cuñi xaan yo sii inga ñiyivi; cua cuzii xaan iñi yo; cua coo sa taxi añima yo. Cua coo xaan tundyee iñi sii yo sihin ñiyivi. Vii xaan cua coo yo, ta cuu yo ñiyivi vaha xaan. Ta cua zavaha yo sa vaha sihin ñiyivi, ta ma zaña yo sa zavaha yo sa vaha.

²³Ta inga cuhva saha Taty Ii sii yo cuu sa mazu xaan iñi yo ta sa cuu cundyaca ñaha yo sii yo. Tatu zavaha yo tandihi cuhva ya ma cuu catyi ley sahnu vaty iyo cuaty yo.

²⁴Ta maa yo sa cuu cuenda ra Cristo Jesús, sa zaña yo sa zavaha yo sa ña vaha, ta ña zavaha ca yo cuhva cuñi maa yo.

²⁵Ta tañi sa nduu yo ñiyivi saa sa cuenda Taty Ii ra Ndyoo, tacuan cuñi si sa tyaa yo yahvi sa zacuaha ra sii yo cuhva cua zavaha yo.

²⁶Ta ma nducu yo cuhva sa zacahnu ñiyivi sii yo. Ta ma zacahni tahan yo sii ñiyivi, ta ma cuñi yo sa sii inga ñiyivi.

**Tahan si sii yo sa tyindyee
yo sii ra tahan yo**

6 Hermanos, tatu ndyehe ndo vaty zavaha minoo ra

tahan ndo minoo cuaty, cuñi si sa tyindyee ndo sii ra ta nazandoo ra sii si, ndoho ra tyaa xaan yahvi sii ra Ndyoo. Zoco vii ñi cahan ndo sihin ra ta coto vaha ndo sii ndo coto nducu coto ihñi tucu cuihna sii maa ndo.

²Ta tahan si sa cuizo yo zuhva sa vee sa ndyizo inga ra. Tatu tacuan zavaha yo, cuñi si catyi si vaty tyaa vaha yo yahvi sii ra Cristo.

³Ta tatu iyo yo sica iñi yo vaty ra ñiñi xaan cuu yo ta ña ndisa, zuun ñi sii maa yo zandavi ñaha yo cuhva cuan.

⁴Nandyehe xihna yo sii tyiño maa yo, ta cua coto yo tatu zavaha yo sa vaha, ta zii cua cuñi yo. Ta ma ndyehe xaan yo ñaa sa zavaha inga ra.

⁵Vaty tahan si sii minoo minoo yo cundyee iñi yo ñaa sa tahan yo ñuu ñiyivi ya.

⁶Ta cuñi si sa tyindyee ndo sii ra zacuaha Tuhun Ndyoo sii ndo, ñaa sa siñi ñuhu sii ra.

⁷Ta ma zandavi ñaha ndo sii ndo. Yoñi sa cuu zandavi ñaha sii ra Ndyoo. Tandihi sa cua tasi minoo ra, yucuan cuu sa cua naquihin ra. (Tatu zavaha ndo sa vaha cua nañihi ndo sa vaha, ta tatu zavaha ndo sa ña vaha cua nañihi ndo sa ña vaha.)

⁸Tatu zavaha ndo sa ña vaha cuhva cuñi maa ndo, cua zativi si cuan sii ndo. Zoco tatu zavaha ndo cuhva cuñi Taty Ii, cua cuhva Taty Ii sa cundito ndo tandihi cui tyiemvu.

⁹Ma cuhva yo sa cundihi iñi yo ta zaña yo sa zavaha yo sa vaha vaty tatu ma zaña yo sa zavaha yo sa

vaha, cua coo quivi cua ñihi yo sa vaha sa cuenda si.

¹⁰Yucuan cuenda tandihi saha tatu saha si cuhva, nazavaha yo sa vaha sihin tandihi ñiyivi, ta ñihi ca nazavaha yo sii si sihin ñiyivi sino iñi.

Nu sa cuñi ndihi carta ra Pablo

¹¹Ndyehe ndo vatyi nahnu xaan letra tyei ihya sihin ndaha mi.

¹²Ra sa cuñi zañiñi sii ndo sa zavaha ndo costumbre circuncisión cuan, zavaha ra cuhva cuan vatyi cuñi ra sa coo vaha ra sihin ñiyivi. Ña cuñi ra ndyehe ra tundoho sa cuenda sa sino iñi ra vatyi sa sihi ra Cristo sa cuenda maa yo ta yucuan cuu cuhva cua cacu yo. Ñahñi ca inga cuhva.

¹³Zoco nu maa ra sa zavaha costumbre cuan ta ña tyaa ra yahvi sii tandihi ley sahnú. Zoco cuñi ra sa zavaha maa ndo costumbre cuan vatyi tacuan ta cua caca iñi ra vatyi ra ñiñi xaan cuu ra vatyi ndyico ndo cuhva catyi ra.

¹⁴Ta mi, ña cuñi zacahni sii, nu siin. Zoco zii xaan cuñi vatyi i sihi ra Jesucristo nu cruz sa cuenda mi. Maa ra ndyaca ñaha sii yo. Sa cuenda sa sihi maa ra, ta ña cuñi que sa iyo ñuu ñiyivi ya, ta ña ndyaca ñaha ca si sii.

¹⁵Vatyi tatu ndyico yo sii ra Cristo Jesús, ña ñiñi ca sa zavaha yo costumbre circuncisión a sa ma zavaha yo sii si. Sa ñiñi ca cuu sa nduu yo ñiyivi saa.

¹⁶Ta nacuhva ra Ndyoo sa coo sa taxi añima tandihi ndoho sa iyo cuhva ya. Ta nacundahvi iñi ra sii tandihi ndo sa cuu ñiyivi ra sa ndisa cuii.

¹⁷Ityi nuu ca ña cuñi sa cuhva ca ndo tizihí sii, saha tuhun ya vatyi tandihi pehla sa iyo coño ñuhi zañaha si vatyi minoo muzu ra Jesús cui sa ndisa.

¹⁸Hermanos, nanazoco xaan ra Jesucristo, ra ndyaca ñaha sii yo, sii ndo. Ta nacuu si sa ndisa.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Efeso

Tyaa ra Pablo minoo carta sii ñiyivi sino iñi sii ra Ndyoo ñuu Efeso

1 Yuhvi ra Pablo, minoo apóstol cui, cuhva cuñi ra Ndyoo. Tyei carta ya sii maa ndo sa sino iñi ñuu Efeso vatyí sino xaan iñi ndo sii ra Cristo Jesús.

²Nacuhva xaan ra Ndyoo Zutu yo ta ra Jesucristo ra ndyaca ñaha sii yo tumañi iñi sii ndo ta nacuhva ra sa coo sa taxi añima ndo.

Saha xaan ra Ndyoo sa vaha sii yo

³Nazacahnu yo sii ra Ndyoo, Zutu ra Jesucristo, ra ndyaca ñaha sii yo. Tyindyee xaan ra sii yo, ta saha xaan ra sa vaha sii yo vatyí iin ñi cuu yo sihin ra Cristo. Saha xaan ra sa vaha sa iyo andivi sii yo.

⁴I casi ra sii yo sa cu-iin yo sihin ra Cristo ndya quivi cumañi ca zavaha ra ñuu ñiyivi vatyí cuñi ra sa cuu yo ñiyivi vaha xaan ta ñiyivi ñahñi cuatyí ityi nuu ra vatyí cuñi xaan ra sii yo.

⁵Ta sa naha i tyaa ra cuhva sa zanduu ra zehe ra sii yo sa cuenda ra Jesucristo vatyí yucuan cuu sa cuñi ra zavaha ra.

⁶Ta yucuan cuenda zacahnu yo sii ra vatyí vaha xaan sa zavaha ra.

Saha xaan ra tumañi iñi sii yo vatyí zandu-iin ra sii yo sihin Zehe ra, ta cuñi xaan ra sii Zehe ra.

⁷Cuñi xaan ra Ndyoo sii yo, ta yucuan cuenda i tyiyahvi ra sa cuenda cuatyí yo sihin ñiñi ra Cristo ta i zandasi ra cuatyí yo.

⁸Saha xaan ra tumañi iñi sii yo vatyí i saha ra sa siñi tuñi maa ra sii yo.

⁹Ta i zacoto ra sii yo minoo cuhva xehe sa cuñi maa ra, minoo cuhva sa i sica iñi ra sa cua zavaha ra.

¹⁰Vatyí natahan si quivi ta cua zandu-iin ra tandihi, ta cua cundyaca ñaha ra Cristo tandihi, sa iyo ityi ziqui ta sa iyo nu ñuhu.

¹¹Sa cuenda sa i zavaha ra Cristo, ta i casi ra Ndyoo sii yo vatyí cua cuhva ra sa vaha sii yo. I cuñi maa ra Ndyoo zavaha ra tandihi cuhva ya. Zavaha maa ra ñaa sa cuñi maa ra.

¹²Ta tacuan i zavaha ra vatyí maa ndi sa sino iñi sii ra Cristo sa xihna ñi, cua zacahnu xaan ndi sii ra Ndyoo vatyí vaha xaan ra.

¹³Ta i sino tucu iñi maa ndo sii ra Cristo sa i siñi ndo tuhun ndisa, cuhva cacu yo. Ta sa yaha sino iñi ndo sii ra, ta ziqui cuu si tañi i tyaa

ra Ndyoo tuñi ra sii ndo vatyí i saha ra Tatyí Ii ra sa coo ra añima ndo tañi sa i catyí ra, ta sii maa ra cuu sii ndo.

¹⁴Tatyí Ii cuan cuu sa saha ra Ndyoo sii yo sa xihna ca. Ta cuhva cuan zañaha si vatyí cua ñihi yo tandihí sa cua cuhva ra Ndyoo sii yo quívi cua ndihí zacacu ra sii yo. Ta zavaha ra tandihí cuhva ya vatyí cua zacahnu yo sii ra vatyí vaha xaan ra.

**Sica ra Pablo sii ra Ndyoo vatyí
cua cuhva ra cuaha xaan sa
siñi tuñi sii ñiyívi sino iñi**

¹⁵Yucuan cuenda ndya quívi i site cuhva sino xaan iñi ndo sii ra Jesús, ra ndyaca ñaha sii yo, ta cuhva cuñi xaan ndo sii tandihí ñiyívi sino iñi.

¹⁶Ndya quívi i site cuhva cuan ta ñá zañe sa quehin sihin ra Ndyoo sa cuenda ndo. Ta nacuhva xein tyahvi ndyoo sii ra Ndyoo sa cuenda ndo.

¹⁷Sique sii ra Ndyoo ra Jesucristo, ra ndyaca ñaha sii yo. Ta zuun ñi maa ra Ndyoo cuu Zutu maa yo. Nazacahnu xaan yo sii ra. Sii maa ra sique vatyí nacuhva ra sa siñi tuñi sa saha Tatyí Ii sii ndo vatyí tacuan ta cua cutuñi ca iñi ndo, ta cua coto vaha ca ndo sii ra.

¹⁸Tacuan ta ziquí cua cutuñi ca iñi ndo, ta cua coto ca ndo ñaa sa cua ñihi ndo vatyí maa ndo cuu ñiyívi i casi ra Ndyoo. Ta cua coto ndo vatyí vaha xaan ta tyaqui xaan cuu sa cua cuhva ra Ndyoo sii ñiyívi sii ra.

¹⁹⁻²⁰Ta sique sii ra Ndyoo vatyí cua cuhva ra sa coto ndo cuhva tyindyee ra sii maa yo sa sino iñi sii ra vatyí cahnu xaan ca cuu tundyee

iñi sii maa ra. Tundyee iñi maa ra sa tyindyee sii yo cuu sa zuun ñi tundyee iñi sa zanandoto sii ra Cristo sisi sa i sihi ra, ta i saha ra Ndyoo sa cundyaa ra Cristo siyo cuaha ra andívi.

²¹Ta yucuan cuu nu i zanducahnu xaan ra Ndyoo sii ra Cristo. Cahnu ca ra ta ziquí tandihí inga ra ndyaca ñaha ñuu ñiyívi a andívi. Vazu rey cuu ra cuan a ra ndyaca ñaha cahnu xaan a vazu ángel andívi, zoco cahnu ca ra Cristo vityí ta ityí nuu ca.

²²Ta saha ra Ndyoo sa cundyaca ñaha ra Cristo sii tandihí. Ra cu nuu cuu ra sii ñiyívi sa cuu cuenda ra. Cuu ra tañi xiñi ñu.

²³Ta ñiyívi sa cuu cuenda ra cuu tañi coño ñuhu ra. Zacutu cuii ra añima yo, ta zacutu cuii ra tandihí cuii sa iyo.

**Zacacu ra Ndyoo sii yo vatyí
cuñi xaan ra sii yo**

2 Quívi ta sino ca iñi ndo Tuhun Ndyoo cuu si tañi sa sihi añima ndo vatyí i zavaha ndo cuatyí ta tandihí cuhva sa ña tahan iñi ra Ndyoo. Zoco i saha ra Ndyoo minoo cuhva saa coo ndo vatyí i ndu-ñin ndo sihin ra Cristo.

²Ityí sata i zavaha ndo cuatyí tañi zavaha inga ñiyívi ñuu ñiyívi. I zavaha ndo cuhva cuñi ra ndyaca ñaha sii cuihna. Maa ra cuu ra ndyaca ñaha sii ñiyívi ña tyaa yahvi sii ra Ndyoo.

³Ta tacuan i cuu tandihí yo quívi sa ñá sito yo sii ra Ndyoo. I zavaha yo cuhva ña vaha sa cuñi coño ñuhu yo ta sa cuñi sa siñi tuñi yo tañi zavaha tandihí inga ñiyívi.

Inuu ñi i cuu yo tañi inga ñiyivi, ta yucuan cuenda i tahan si sii yo sa cuxaan xaan ra Ndyoo sihin yo.

⁴Zoco i cundahvi xaan iñi ra Ndyoo sii yo vatyí cuñi xaan ra sii yo.

⁵Ta vazu i sicoo yo tañi sa i sihi yo quivi cuan sa cuenda cuatyí yo, zoco i zanandoto ra sii maa yo iin ñi sihin ra Cristo. Zacacu ra Ndyoo sii yo maa ñi sa cuenda tumañi iñi sa zavaha ra sii yo.

⁶Tañi sa zanandoto ra Ndyoo sii yo sihin ra Cristo cuu si, ta saha ra sa cundyaa yo andivi sihin ra. (Tañaha ca cua saa yo yucuan, zoco tañi sa saa yo yucuan cuu si vatyí ma cuu ca cundyaca ñaha cuatyí sii yo.)

⁷Tacuan zavaha ra Ndyoo vatyí ityi nuu ca cua zañaha ra sii tandihi ñiyivi vatyí cahnu xaan cuu tumañi iñi i zavaha ra sii yo sa cuenda ra Cristo Jesús. Ta i zavaha xaan ra sa vaha sihin yo.

⁸Vatyí sa cuenda tumañi iñi sa zavaha ra Ndyoo ta cacu yo sihin sa sino ñi iñi yo sii ra. Ta sa zacacu ra Ndyoo sii yo, yivi minoo sa zavaha maa yo cuu si. Minoo sa saha maa ra Ndyoo sii yo cuu si.

⁹Ma cuu zavaha yo sa vaha ta ñihi yo sii si coto caca iñi yo vatyí vaha xaan maa yo.

¹⁰Vatyí maa ra Ndyoo i zanduvaha sii yo. Zandu-iin ra sii yo sihin ra Cristo Jesús vatyí tacuan ta cua zavaha xaan yo sa vaha cuhva i tyaa ra Ndyoo ta sa naha.

Vazu ñiyivi hebreo cuu yo a vazu ñiyivi inga tata, zoco tandihi yo cuu yo ñiyivi ra Ndyoo sa cuenda ra Cristo

¹¹Yucuan cuenda nacohon iñi ndo cuhva i sicoo ndo ityi sata.

Yivi ñiyivi hebreo cuu maa ndo. Ta catyi ñiyivi hebreo vatyí ña vale ndo vatyí ña zavaha ndo costumbre circuncisión tañi zavaha maa ñu. Ta sica iñi ñu vatyí vaha ca maa ñu ityi nuu ra Ndyoo vatyí zavaha ñu costumbre cuan.

¹²Ityi sata ñá sicoo ra Cristo añima ndo. Ña iin ñi i cuu ndo sihin ñiyivi hebreo. Ta ñá sito ndo tyiño i zandaa ra Ndyoo sihin ra Abraham, cuhva i catyi ra vatyí cua zanduvaha ra sii yo sihin ra. Ñá sito ndo sii ra Ndyoo quivi cuan, ta ñahñi sa vaha cua ñihi ndo.

¹³Quivi cuan sica xaan i sindyaa ndo nuu ra Ndyoo. Zoco vityí sa ndu-iin ndo sihin ra Cristo Jesús. I sati niñi ra sa cuenda maa ndo, ta yucuan cuenda nañaa ndo sii ra Ndyoo.

¹⁴Zanduvaha ra Cristo sii yo sihin ra Ndyoo. Zandu-iin ra sii nduu tahan yo. Zandu-iin ra sii nduhvi ra hebreo sihin maa ndo sa yivi ñiyivi hebreo cuu. Zanduvaha ra cuhva iyo yo sihin minoo yo ta sihin inga yo. I cuu si tañi sa zanduva ra minoo nuzama sa sindyaa mahñu nu yucu yo.

¹⁵Maa ra Cristo i zandihí cuhva sicoo sihin ley sahnu quivi i saha ra coño ñuhu ra ta sihi ra nu cruz. Ley sahnu cuan i zanduziin si sii yo vatyí i zavaha maa ndi costumbre sa catyi ley cuan, ta ñá zavaha maa ndo sii si. Zoco i zandu-iin ra Cristo sii yo quivi i saha ra minoo cuhva saa coo yo, ta zanduvaha ra sii minoo yo sihin inga yo.

¹⁶I sihi ra nuu cruz sa cuenda cuatyí yo, ta i zanduvaha ra sii tandihi yo sihin ra Ndyoo. Ta i zandu-iin ra sii yo sa ndisa.

¹⁷I quisi ra Cristo, ta i nacatyí ra sihin yo cuhva cua coo vaha yo sihin ra Ndyoo ta sihin minoo yo ta sihin inga yo. I nacatyí ra cuhva cuan sihin maa ndo, ra sica xaan i sindyaa nuu ra Ndyoo ta sihin maa ndi ra hebreo, ra sa sito zuhva Tuhun Ndyoo.

¹⁸I sihi ra Cristo sa cuenda yo, ta yucuan cuenda cuu tuhva tandihí yo sii ra Ndyoo Zuto yo vatyí ñin ñi Tatyí li cuu sa iyo añima yo vazu ñiyívi hebreo cuu yo a vazu yívi ñiyívi hebreo cuu yo.

¹⁹Yucuan cuenda yívi ca ñiyívi inga tata cuu ndo a ñiyívi inga ñuu. Sa nduu ndo ñiyívi sa cuenda ñuu ra Ndyoo ñin ñi sihin tandihí ñiyívi sa cuu cuenda ra. Sa nduu ndo ñiyívi ra.

²⁰Ta tañi minoo vehe cuu tucu ndo. Ra apóstol sihin ra profeta, tañi cimientó si cuu ra. Ta zuun ñi ra Cristo Jesús cuu minoo yuu sa ñiñi ca nu cuu siquí vehe.

²¹Ta ziquí ra Cristo cuahan ndaa vehe minoo cuhva vaha xaan, ta cua cuu si minoo vehe ñuhu sa cuenda ra ndyaca ñaha sii yo.

²²Ta maa ndo cuu tucu zuhva vehe ñuhu cuan. ñin ñi cuu ndo sihin ra Ndyoo ta sihin minoo ndo ta sihin inga ndo, ta tacuan nduu yo minoo vehe nu iyo ra Ndyoo vatyí iyo Tatyí li ra añima sa minoo minoo yo.

Saha ra Ndyoo tyiño sii ra Pablo sa nacatyí ra Tuhun ra sihin ñiyívi sa yívi ñiyívi hebreo cuu

3 Yuhvi ra Pablo ñohi vehe caa sa cuenda maa ndo vatyí

zacote tuhun ra Cristo sii ndoho sa yívi ñiyívi hebreo cuu.

²Sica ñiñi vatyí sa sito ndo vatyí cahnu xaan cuu tumañi ñiñi i saha ra Ndyoo sii, vatyí cuu tyindyeyi sii maa ndo.

³Sa nacatyí sihin ndo zuhva sa cuenda cuhva i zañaha ra Ndyoo minoo sa xehe sii, sa cuenda maa ndo.

⁴Ta tatu cua cahvi ndo carta i tasi sii ndo cua coto ndo cuhva i saha ra Ndyoo sa cutuñi ñiñi tuhun ra Cristo sa ña sito ñiyívi.

⁵Ta sa naha ñá zacoto ra Ndyoo tuhun cuan sii ñiyívi tañi zacoto ra vityí sii ra apóstol ta sii ra profeta. Vityí zacoto ra Ndyoo sii ndi sihin Tatyí li ra.

⁶Ta tuhun xehe cuan cuu sa catyí vatyí maa ndo sa yívi ñiyívi hebreo cuu, cua ñiñi ndo sa vaha sa saha ra Ndyoo ñin ñi sihin nduhvi ra hebreo vatyí ñin ñi coño ñuhu ra Cristo cuu tandihí yo. Ta cua ñiñi yo sa sa catyí ra Ndyoo, vatyí cua cuhva ra sii si sii yo sa cuenda ra Cristo Jesús.

⁷Tumañi ñiñi sa i saha ra Ndyoo sii, cuu sa i saha ra tundyeyi ñiñi sii, sa zacote tuhun vaha ya sii ñiyívi.

⁸Sica ñiñi vatyí luhlu que ta ziquí tandihí inga ñiyívi sa cuu cuenda ra Ndyoo. Zoco i saha ra Ndyoo tumañi ñiñi ya sii, sa zacote tuhun ra Cristo sii ñiyívi sa yívi ñiyívi hebreo cuu, cuhva vaha xaan sa cua ñiñi ñu sa cuenda ra Cristo.

⁹Ta saha ra Ndyoo tyiño sii, sa zacote sii tandihí ñiyívi minoo cuhva sa sa sito ra Ndyoo cua zavaha ra cumañi ca sino ñuu

ñiyivi. Ta sa naha ñá saha ra Ndyoo sa coto ñiyivi tuhun ya.

¹⁰Vatyí tacuan ta tandíhi sa ndyaca ñaha andívi cua ndyehe si cuhva vaha xaan sa zavaha ra Ndyoo sihin maa yo, ñiyivi sa cuu cuenda ra. Ta cua coto si vatyí cuaha xaan sa siñi tuñi iyo sii maa ra Ndyoo.

¹¹Ta sa cuenda maa yo zavaha ra Cristo Jesús, ra ndyaca ñaha sii yo, cuhva sa cuñi ra Ndyoo ta sa naha.

¹²Ta sa cuenda ra Cristo iyo cuhva sii yo sa tuhva yo sii ra Ndyoo. Sino iñi yo sii ra Cristo, ta yucuan cuenda ña yuhu yo sii ra Ndyoo.

¹³Yucuan cuenda sique sii ndo vatyí ma nducuihya iñi ndo sa cuenda tundoho sa ndyehi vityí sa cuenda maa ndo vatyí cua tyindyee si sii ndo.

Sica ra Pablo sii ra Ndyoo vatyí nanacoto ca ñu sii ra Cristo

¹⁴Nacohon iñi sa vaha xaan sa saha ra Ndyoo Zutu yo sii yo, ta yucuan cuenda iñi siti nuu ra.

¹⁵Maa ra cuu Zutu tandíhi ñiyivi, ñu sa cuahan andívi ta ñu yucu nu ñuhu.

¹⁶Ta sique sii ra vatyí nazandundyee xaan ra añima ndo sihin Tatyí Ii ra sa iyo añima ndo. Vatyí vaha xaan cuu sa saha maa ra.

¹⁷Ta nacoo ra Cristo añima ndo vatyí sino iñi ndo sii ra. Ta tacuan ta cua cuñi xaan ndo sii tandíhi ñiyivi vatyí naña ndo sii ra Ndyoo.

¹⁸Ta ziquí cua coo cuhva sii ndo, ta cua cutuñi vaha iñi ndo sihin tandíhi inga ñiyivi sino iñi vatyí cuñi xaan ra Cristo sii yo. Cuñi xaan ra sii yo ndya cuhva ña ñihi

ca yo cuhva nacatyí yo cuhva cuñi xaan ra sii yo.

¹⁹Ta sique sii ra Ndyoo vatyí cua coto ndo cuhva cuñi xaan ra sii yo vatyí yaha xaan cuñi ra sii yo, ndya cuhva ndya ma cuu coto yo cuhva sa cahnu xaan cuñi ra sii yo. Ta tacuan ta ñahñi sa cua cumañi sii ndo vatyí ndyaa ra Ndyoo sihin ndo. Ta yucuan cuenda ñahñi sa cua cumañi sii ndo.

²⁰Ta vityí nazacahnu yo sii ra Ndyoo vatyí cahnu xaan ca cuu tundyee iñi maa ra, ta cuu zavaha ra cuaha xaan ca ta ziquí sa sica yo sii ra ta cuaha ca ta ziquí sa sica iñi yo vatyí zavaha ra sii si zuun ñi sihin tundyee iñi maa ra sa saha ra sii yo.

²¹Nazacahnu maa yo, ra sino iñi, sii ra tandíhi cuii tyiemvu sa cuenda sa zavaha ra Cristo Jesús. Nazacahnu yo sii ra vityí ta tandíhi cuii tyiemvu. Ta nacuu si tacuan, ta nacuu si sa ndisa.

Cuhva ndu-iin yo sa cuenda Tatyí Ii

4 Yucuan cuenda yuhvi ra ñoho vehe caa ya zañiñi sii ndo vatyí zavaha ndo sa vaha xaan cuhva tahan si zavaha ñiyivi i casi ra Ndyoo vatyí i casi ra sii ndo sa cuu ndo ñiyivi ra.

²Tahan si sii yo sa zanduluhlu yo sii yo ta vii xaan coo yo sihin ñiyivi, ta nacoo xaan tundyee iñi sii yo sihin ñu. Nacuñi xaan yo sii ra tahan yo, ta nacundyee iñi yo ñaa sa zavaha ra.

³Nanducu yo cuhva cu-iin yo sa ndisa cuii sihin ra tahan yo vatyí cua tyindyee Tatyí Ii ra Ndyoo sii yo sa coo sa taxi sii yo sihin ra tahan yo.

⁴Vatyi iyo minoo ñi coño ñuhu ra Cristo sa cuu maa yo ra sino iñi sii ra, ta iyo minoo ñi Tatyí li ta minoo ñi sa vaha cua ñihi tandíhi yo ityi nuu ca vatyi i casi ra sii yo.

⁵Iyo minoo ñi ra ndyaca ñaha sii yo. ñin ñi sii maa ra sino iñi yo. Ta ñin ñi cuenda maa ra coo ndutyá yo.

⁶Iyo minoo ñi ra cuu Ndyoo, ta maa ra cuu Zutu tandíhi yo. Ndyaca ñaha ra sii tandíhi sa iyo. Iyo ra sisi añima tandíhi yo, ta sityiño ra sii tandíhi yo ñaa cuhva cuñi maa ra.

⁷Ta sii sa minoo minoo yo saha ra Cristo ndatu cuhva cuñi maa ra.

⁸Yucuan cuenda catyi Tuhun Ndyoo:

I zahacanaa ra sii ra xaan iñi sii ra, ta ziqui i nandaa ra ndya andívi,
ta i saha ra ndatu sii ñiyívi.

⁹¿Ta ñaa cuñi si catyi si sa catyi si vatyi i nandaa ra? Cuñi si catyi si vatyi i noo xihna ra ndya ñuu ñiyívi.

¹⁰Ta ra i noo cuan, zuun ñi ra cuu ra i ndaa ndya andívi nu zucu ca. Ta tacuan zavaha ra ta zacutu ra ñuu ñiyívi ya sa maa ñi maa ra vatyi vazu ndyaca maa, iyo ra.

¹¹Ta i saha ra ndatu sii sa minoo minoo yo. Iyo yo cuu yo apóstol. Iyo yo cuu yo ra nacatyí tuhun saha ra Ndyoo sii yo. Iyo yo cuu xaan nacatyí yo cuhva zacacu ra Ndyoo sii ñiyívi. Iyo yo cuu yo ra zacuenda sii ñiyívi sino iñi, ta inga yo zacuaha yo Tuhun Ndyoo sii ñu.

¹²Saha ra Ndyoo cuhva cuan sii ñiyívi vatyi tacuan ta ñahñi cua cumañi sii yo, ra cuu ñiyívi ra. Tacuan ta cuu zatyiño yo tyiño ra, ta cuu ndundyee yo sihin Tuhun Ndyoo

¹³ndya cua ndu-iin yo sa ndisa cuii cuhva sino iñi yo ta cuhva coto vaha yo sii Zehe ra Ndyoo. Ta tacuan ta cua nduu yo ñiyívi vaha xaan, ta cua ñihi yo tandíhi sa saha ra Cristo sii yo, ta cua nduu yo tañi maa ra.

¹⁴Ta ziqui ma cuu ca yo tañi sa ndyíhi. Vatyi sa ndyíhi, yatyi xaan sino iñi si sii sa ziin ziin tuhun. Zoco ma cuu yo cuhva cuan coto ñihi ñiyívi cuhva zandavi ñaha ñu sii yo.

¹⁵Zoco ihya cuu sa cua zavaha yo; cua cuñi xaan yo sii ñiyívi, ta cua cahan yo sa ndisa sihin ñu, ta cua cuahnu yo sa ndisa cuii ta nduu yo tañi ra Cristo, ra ndyaca ñaha sii yo.

¹⁶Ta tañi ñin ñi cuu coño ñuhu yo, tacuan tucu tandíhi maa yo. Sa cuenda ra Cristo ta ñin ñi cuu yo sihin ra tahan yo. Ta tañi ndyaca ñaha xiñi yo sii tandíhi coño ñuhu yo, tacuan ndyaca ñaha ra Cristo sii yo, ta ñihi yo tundyee iñi sii ra. Ta tacuan tyindyee yo sii ra tahan yo vatyi cuñi xaan yo sii ra, ta cua ndundyee ca tandíhi yo.

Saha ra Cristo minoo cuhva saa coo yo

¹⁷Cuhva sa cua nacatyí sihin ndo vityi cuu si minoo cuhva nacatyí ra ndyaca ñaha sii yo vatyi ma cuu ca ndo tañi ñiyívi ña sito sii ra Ndyoo vatyi zavaha ñu ñaa sa tondo ñi sica iñi ñu.

¹⁸Ña vaha ca sa siñi tuñi sii ñu. Ña ñihi ñu cuhva vaha, cuhva saha ra Ndyoo coo yo. Ta tondo xaan iyo ñu vatyi ña zavaha ñu cuhva cuñi maa ra, ta ñihi xaan iñi ñu.

¹⁹Ña cucahan ca nuu ñu tatu zavaha ñu sa ña vaha. Saha ñu sii

ñu sa zavaha ñu tandihi nuu sa ña vaha. Cuñi xaan ñu zavaha ñu tandihi nuu sa quiñi.

²⁰Zoco ña tacuan i cutuhva maa yo. Ña tacuan iyo ra Cristo.

²¹Tatu sa ndisa vaty i siñi ndo sa cahan ra ta cutuhva ndo sa zacuahara sa cuenda maa ra,

²²sa zandoo ndo cuhva i zavaha ndo ityi sata. Minoo cuhva quiñi xaan i sicoo yo vaty cuhva ña vaha sa cuñi yo zavaha yo i zandavi ñaha xaan si sii yo.

²³Cuhva ndo sii ndo sii ra Ndyoo, ta nazama ra cuhva sica iñi ndo.

²⁴Ta cuu ndo ñiyivi saa, vaty tacuan i zanduvaha ra Ndyoo sii yo sa cuu yo ñiyivi ndoo xaan ta vaha xaan sa ndisa cuii.

²⁵Yucuan cuenda ma cuvarya yo. Nacahan tandihi yo sa ndisa sihin ra tahan yo vaty iñi ñi cuu yo.

²⁶Tatu cuxaan ndo zoco ma zavaha ndo sa ña vaha, ta ma cuxaan ndo ndiyiaca.

²⁷Ta ma cuhva ndo cuhva sii cuihna.

²⁸Ra sa tuhva zuhu, ma zuhu ca ra. Nazatyño ra sihin ndaha ra minoo cuhva vaha, ta cua cuu tyindyee ra sii ñiyivi cumañi si.

²⁹Ma cahan ndo sa quiñi sihin yuhu ndo. Cahan ndo sa vaha sa cua tyindyee ta sa cua zandundyee ca sii ñiyivi tyizoho.

³⁰Ta ma zanducuihya ndo iñi Taty Ii ra Ndyoo vaty i saha ra Ndyoo Taty Ii ra sii yo tañi sa tyaa ra tuñi ra sii yo ndya quivi cua zandihi ra cuhva zacacu ra sii yo.

³¹Ma cuu ndo ñiyivi tixi iñi, ta ma cuxaan ndo, ta ma xaan xaan cuñi ndo, ta ma cahan ndo sa quiñi,

ta ma cahan cuehe ndo sii ñiyivi. Ta ma cuñi ndo zavaha ndo sa ña vaha sihin ñu.

³²Zoco vii xaan coo ndo sihin minoo ndo ta sihin inga ndo. Cundahvi iñi ndo ta zaha ndo tucahnu iñi sii minoo ndo ta sii inga ndo tañi i zaha ra Ndyoo tucahnu iñi sii maa yo sa cuenda ra Cristo.

Cuhva cuñi si coo zehe ra Ndyoo

5 Yucuan cuenda nanducu yo cuhva cuu yo tañi maa ra Ndyoo. Zehe ra cuu sii yo, ta cuñi xaan ra sii yo.

²Ta cuñi xaan ndo sii ñiyivi tañi cuñi xaan ra Cristo sii yo ta saha ra sa cuu ra sa cuenda maa yo. Tañi sañi ñiyivi mvee ticaty ta saha ñu sii ti sii ra Ndyoo ta sa naha, tacuan i saha ra Cristo sii ra sa cuenda maa yo. Ta zii xaan i cuñi ra Ndyoo sihin cuhva i zavaha ra.

³Ta vityi sa nduu ndo ñiyivi sa cuenda ra Ndyoo, ña tahan si sa cuzu ndo sihin minoo ñaha tatu ma tindaha xihna ndo, ta ñaa inga sa quiñi sa zavaha ñiyivi sihin coño ñuhu ñu.

⁴Ta ma cahan ndo sa quiñi ta nu sa tondo, cuhva ña tahan si cahan ndo. Zoco cuhva ndo tyahvi ndyoo sii ra Ndyoo.

⁵Vaty sito ndo vaty tandihi ñiyivi zavaha sa quiñi, ma cuu quihvi ñu nu ndyaca ñaha ra Ndyoo. Ra quixi sihin inga ñaha sa yivi ñazihra cuu a ñaha sa zavaha tacuan sihin rayi a ra cuñi xaan sa coo ndaha tyiño, ma cuu cahun ra nu ndyaca ñaha ra Ndyoo vaty tatu cuñi xaan ñiyivi sa coo ndaha tyiño

ñu, ña zacahnu ñu sii ra Ndyoo cuhva cuan.

⁶Ma cuhva ndo sa zandavi ñaha ñiyivi sii ndo sihin tuhun ña ñiñi vatyi sa cuenda tandihi cuhva ña vaha ya cua cuxaan ra Ndyoo, ta cua tasi tuñi ra sii ñiyivi ña tyaa yahvi sii ra.

⁷Yucuan cuenda ma cutahan ndo sihin ñiyivi zavaha tacuan

⁸vatyi i sicoo maa ndo nu ñaa quivi cuan. Zoco vityi sa ndu-iin ndo sihin ra ndyaca ñaha sii yo, ta iyo ndo nu ndisi. Zavaha ndo cuhva zavaha ñiyivi sa cuu cuenda ñúhu.

⁹Vatyi cuhva vaha sa saha Tatyí Ii sii yo cuu sa cua zavaha yo sa vaha ta sa ndoo ta sa ndisa.

¹⁰Nducu ndo cuhva coto ndo ñaa sa tahan iñi ra ndyaca ñaha sii yo.

¹¹Ta ma cu-iin ndo sihin ñiyivi zavaha sa ña vaha tañi zavaha ñiyivi nu ñaa. Ta zacoto ndo sii ñu vatyi zavaha ñu sa ña vaha.

¹²Vatyi saha si ticahan nuu vazu tuhun cahan ñi yo, sa cuenda cuhva zavaha ñu nu xehe.

¹³Zoco quivi cua naquita sa xehe cuan nu ndisi ta casi xaan cua cunaha si vatyi zandundisi ñúhu maa ra Ndyoo sii tandihi si.

¹⁴Yucuan cuenda iyo nu catyi si tyehen:

Ndoyo ndoho ra quixi xaan.

Nduvita ndo nu yucu ñiyivi i sihi vatyi cua cuhva ra Cristo ñúhu ityi cahun ndo.

Catyi si.

¹⁵Yucuan cuenda zacuenda ndo cuhva zavaha ndo. Ma zavaha ndo cuhva zavaha ñiyivi ña sito. Zavaha ndo cuhva zavaha ñiyivi sito.

¹⁶Cutyiño vaha ndo minoo minoo quivi yozo caa zatyíño ndo tyiño

ra Ndyoo vatyi quiñi xaan cuu tyiemvu ya vityi.

¹⁷Yucuan cuenda ma cuu ndo ñiyivi tondo; tyituñi iñi ndo ñaa sa cuñi ra ndyaca ñaha sii yo sihin ndo.

¹⁸Ma coho ndo ndixi, ta ma cuu ndo ra siñi vatyi yucuan cua zatívi sii ndo. Zoco cuhva ndo sa cutu cuii Tatyí Ii añaima ndo.

¹⁹Cahan ndo maa ñi sa vaha sihin minoo ndo ta sihin inga ndo. Cata ndo salmos, ta coro ta yaa sa saha Tatyí Ii sii ndo. Cata ndo ta zacahnu ndo sii ra Ndyoo sihin tandihi cuii añaima ndo.

²⁰Ta tandihi saha vazu ñaa sa tahan ndo, zoco nacuhva ndo tyahvi ndyoo sii ra Ndyoo Zutu yo sihin zivi ra Jesucristo, ra ndyaca ñaha sii yo.

Cuhva cuñi si coo yo sihin ñiyivi sii yo

²¹Tyaa ndo yahvi sii minoo ndo ta sii inga ndo vatyi cuhva cuan tyaa ndo yahvi sii ra Ndyoo.

²²Ndoho ñuzihi, tyaa ndo yahvi sii yíi ndo tañi tyaa ndo yahvi sii ra ndyaca ñaha sii yo, ra Cristo.

²³Vatyi ndyaca ñaha rayii sii ñazihí ra tañi ndyaca ñaha ra Cristo sii ñiyivi sino iñi sii ra. Ta zacacu ra sii maa yo sa cuu coño ñúhu ra.

²⁴Yucuan cuenda tañi maa yo sa sino iñi sii ra Cristo tyaa yo yahvi sii ra, zuun ñi cuhva cuan natyaa ñuzihi yahvi sii yíi ñu tandihi cuii cuhva.

²⁵Ta ndoho rayii, cuñi xaan ndo sii ñazihí ndo tañi cuñi xaan ra Cristo sii ñiyivi sino iñi ta saha ra sa cuu ra sa cuenda maa yo.

²⁶Tacuan i zavaha ra vatyi cua zanduu ra ñiyivi vaha sii yo. Ta zandundi ra sii yo sihin sa sicoo ndutya yo ta sihin sa cuiñi yo Tuhun Ndyoo.

²⁷Cuñi ra Cristo cuhva ra sii yo sii ra Ndyoo tañi minoo sa vaha xaan ta ndii xaan, ñahñi sa quiñi caa a sa ña vaha zoco minoo sa vaha xaan sa ndisa cuii ta sa ndoo xaan.

²⁸Tacuan i zavaha ra Cristo vatyi cuñi xaan ra sii yo; yucuan cuenda cuñi si sa cuñi xaan rayii sii ñazihi ra tañi cuñi ra sii coño ñuhu maa ra. Tatu cuñi xaan rayii sii ñazihi ra, cuñi xaan ra sii maa ra cuhva cuan.

²⁹Vatyi yoñi numinoo ra sa ña cuñi sii coño ñuhu maa ra, zoco zacuenda xaan ra sii si tañi zacuenda ra Cristo sii ñiyivi sino iñi sii ra.

³⁰Ta maa yo cuu zuhva coño ñuhu ra Cristo, coño ra ta yiqui ra.

³¹Catyi Tuhun Ndyoo: “Nazandoo rayii sii zutu ra ta sii zihhi ra, ta nandu-iiin ra sihin ñazihi ra. Ta sa nduu tahan ñu cua nduu ñu minoo ñi coño ñuhu.”

³²Ihya cuu minoo tuhun xehe sa cahnu xaan. Ta catyi mi vatyi cuñi si catyi si vatyi ndu-iiin ra Cristo sihin ñiyivi ra.

³³Ta inga tucu cuhva catyi si vatyi cuñi si sa cuñi xaan ndo sii ñazihi ndo tañi cuñi ndo sii maa ndo, ta natyaa xaan ñuzihhi yahvi sii yii ñu.

6 Ndoho sa ndyihhi tyaa ndo yahvi sii zutu ndo ta sii zihhi ndo. Tahan si sa tyaa ndo yahvi sii ñu vatyi sino iñi ndo sii ra Cristo.

²⁻³Iyo minoo ley maa ra Ndyoo catyi si: “Tyaa ndo yahvi sii zutu ndo ta sii

zihhi ndo.” Catyi si. Ihya cuu sa xihna ñi ley i catyi si ñaa sa cua cuhva ra Ndyoo sii yo tatu zavaha yo sii si vatyi catyi si vatyi zii xaan cua cuñi yo tatu zavaha yo sii si, ta cuaha cuiya cua cundito yo ñuu ñiyivi ya.

⁴Ta ndoho ra cu zutu sa ndyihhi, ma zacuxaan ndo sii zehe ndo. Zacuaha ndo sii si tañi cuñi ra Ndyoo, ta cañi ndo sii si tatu cuñi si, zoco ña yaha xaan.

⁵Ndoho ra cu muzu, tyaa ndo yahvi sii patrón ndo ihya ñuu ñiyivi. Nducu xaan ndo cuhva zavaha ndo cuhva cuñi ra, tañi cuhva tyaa ndo yahvi sii ra Cristo. Ta ma zandavi ñaha ndo sii ra.

⁶Zatyiño vaha ndo, yivi cuhva sa ndyehe ñi patrón ndo, zoco vazú ña ndyehe ra, zatyiño ndo. Ta yivi sa vatyi catyi ra vatyi ñiyivi vaha cuu ndo, zoco zatyiño vaha ndo tandihhi tyiemvu tañi zatyiño ndo tyiño ra Cristo, ta zatyiño ndo sihin tandihhi cuii añaima ndo.

⁷Zatyiño ndo minoo sa ndisa tañi zatyiño ndo cuenda ra Cristo ta yivi sa cuenda ñiyivi.

⁸Vatyi sito yo vatyi ñaa sa vaha zavaha yo vazú muzu cuu yo a vazú yivi zoco cua tyiyahvi ra Cristo sii yo sa cuenda sa vaha zavaha yo.

⁹Ta ndoho ra cu ra ndyaca ñaha sii muzun, cuu ndo ñiyivi vaha sihin muzu ndo. Ta ma zayuhu xaan ndo sii ra vatyi sito ndo vatyi iyo ra ndyaca ñaha sii ndo andivi, ta ñi ñi ndyehe ra sii tandihhi yo.

Tundyee iñi sa saha ra Ndyoo sii ñiyivi sino iñi

¹⁰Ta inga tucu tuhun, naco xaan tundyee iñi sii ndo vatyi iin ñi cuu ndo sihin ra ndyaca ñaha sii yo, ta cuaha xaan cuaha xaan tundyee iñi iyo sii maa ra.

¹¹Ta tañi zacuenda minoo zandaru sii ra sihin ndaha tyiño ra, tacuan zacuenda ndo sii ndo sihin tandihi sa saha ra Ndyoo sii ndo vatyí tacuan ta cuu zahacanaa ndo sii cuihna vatyí cuñi xaan ra zandavi ñaha ra sii yo.

¹²Ta yivi sihin ñiyivi sa iyo coño ñuhu sahñi tahan yo, sihin tatyí cuihna sa ña cuu ndyehe yo. Iyo ra ndyaca ñaha nahnu sii sa ña vaha ñuu ñiyivi ya ta cuaha xaan inga tatyí ña vaha.

¹³Yucuan cuenda tiin cuenda vaha ndo sii tandihi sa saha ra Ndyoo vatyí tacuan ta cuu zahacanaa ndo sii cuihna quivi sahñi tahan ra sihin ndo, ta ma ndoyo ñuhu ndo.

¹⁴Tañi nandyaa minoo zandaru sihin minoo sinchu sisi ra, tacuan cuiñi ndyaa ndo sihin sa ndisa. Ta maa ñi sa vaha zavaha ndo. Ta tacuan ta cua zacacu ra Ndyoo sii ndo tañi zacacu minoo zandaru sii ra sihin minoo caa ñoho yiqui ndyica ra.

¹⁵Ta tañi ñoho zapato saha ra zandaru ta ndyaa listo ra sa cuhun ra nu iyo cuatyí, tacuan cundyaa listo ndo sihin Tuhun Ndyoo ta zacoto ndo sii ñiyivi vatyí cuu nduvaha ñu sihin ra Ndyoo, ta ma cuxaan ca ra sihin ñu.

¹⁶Ta tañi zacuenda zandaru sii ra sihin minoo caa ta ma nañi nduva sii ra, tacuan cuñi si sa cunii xaan iñi yo sii ra Ndyoo. Ta cuhva cuan cuu ndahva yo nduva sa cayu sihin ñuhu sa cañi cuihna sii yo.

¹⁷Ta tañi zacuenda zandaru sii xiñi ra sihin minoo caa sa ñoho xiñi ra, tacuan nacuhva ndo sii ndo sii

ra Ndyoo nazacacu ra sii ndo. Ta cutyiño ndo Tuhun Ndyoo vatyí mityi sa sityiño Tatyí li cuu si.

¹⁸Ta cahan ndo sihin ra Ndyoo tandihi cuii cuhva sihin cuhva saha Tatyí li sii ndo. Ta caca ndo sa tyindyee ra sii ndo. Listo vaha cuu ndo, ta ma zandoo ndo sa cahan ndo sihin ra Ndyoo sa cuenda tandihi ñiyivi sino iñi.

¹⁹Ta cahan ndo sihin ra Ndyoo sa cuenda mi vatyí tacuan ta cua ñihi que cuhva quehin ta ma yuhi zacote Tuhun Vaha sa cuenda ra Cristo sii ñiyivi. Xehe xaan i cuu tuhun ya, zoco vityí sito yo sii si.

²⁰Ta sa cuenda sa zacote tuhun ra Cristo, ta ñohi vehe caa, zoco caca ndo sii ra Ndyoo vatyí ma yuhi ta zacoto que tuhun ra tañi tahan si zacote.

Tasi ra Pablo sii ra Tíquico nu yucu ra hermano ñuu Efeso

²¹Ta cua nacatyí ra hermano Tíquico sihin ndo tandihi sa tehin ta ñaa sa zavehi. Ña zaña ra sa zatyíño xaan ra tyiño ra ndyaca ñaha sii yo, ta cuñi xaan ndi sii ra.

²²Tasi sii ra nu yucu ndo vatyí cua zacoto ra sii ndo yozo caa iyo maa ndi, ta cuhva cuan cua cuhva ra tundyee iñi sii ndo.

²³Ta nacuhva ra Ndyoo Zutu yo sihin ra Jesucristo ra ndyaca ñaha sii yo sa coo sa taxi añima tandihi ndoho sa cuu yañi yo. Ta nacuhva ra sa cunii xaan iñi ndo. Ta tacuan ta cua cuñi xaan ndo sii maa ra ta sii ñiyivi.

²⁴Ta nanazoco xaan ra sii tandihi ñiyivi cuñi xaan sa ndisa cuii sii ra Jesucristo, ra ndyaca ñaha sii yo.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Filipos

Ñoho ra Pablo vehe caa ta tyaa ra minoo carta sii ñiyivi sino iñi sii ra Ndyoo ñuu Filipos

1 Yuhvi ra Pablo sihin ra Timoteo, muzu maa ra Jesucristo cuu sii ndi. Ta tyaa ndi carta ya sii tandihi ndoho ra sino iñi sii ra Cristo Jesús ñuu Filipos sihin ra ndyaca ñaha sii ndo ta ra tyindyee sihin tyiño ra Ndyoo nu yucu ndo.

²Nacuhva xaan ra Ndyoo Zutu yo tumañi iñi sii ndo ta sa coo sa taxi aña ndo. Ta tacuan nazavaha tucu ra Jesucristo ra ndyaca ñaha sii yo.

Cahan ra Pablo sihin ra Ndyoo sa cuenda ñiyivi sino iñi

³Tahan tahan saha nacohon iñi sii ndo ta nacuhve tyahvi ndyoo sii ra Ndyoo sa cuenda ndo.

⁴Ta tandihi saha sa quehin sihin ra Ndyoo sa cuenda ndo, zii xaan cuñi

⁵vatyí ndya quivi xihna ñi sa i siñi ndo tuhun sa cuenda ra Cristo ta ndya vityi ña zaña ndo sa tyindyee ndo sii, ta zacoto yo Tuhun Vaha ra Ndyoo.

⁶Sito vehi vatyí tañi i quisaha ra Ndyoo zavaha ra minoo tyiño vaha xaan aña ndo, tacuan cua zavaha ca ra sii si ndya quivi cua quisi tucu ra Cristo Jesús.

⁷Tahan si sa caca iñi cuhva ya sa cuenda maa ndo vatyí ñoho xaan iñi sii ndo. Ta iin ñi cuhva tyindyee ra Ndyoo sii yo sihin tundyee iñi sii maa ra. Vazu ñohi vehe caa a vazú cuhin nuu ra cu tyiño, zoco saha ra Ndyoo tundyee iñi sii, ta quehin tuhun ra sihin ra ñoho vehe caa ta sihin ra cu tyiño. Ta sito ra vatyí sa ndisa cuu Tuhun Ndyoo.

⁸Sito vaha ra Ndyoo vatyí cuñi xein sii tandihi ndo tañi cuñi xaan ra Cristo Jesús sii ndo.

⁹Ta sique sii ra Ndyoo vatyí cua cuñi xaan ca ndo sii tandihi ñiyivi, ta cua coo ca sa siñi tuñi ra Ndyoo sihin ndo, ta cua cutuñi ca iñi ndo ñaa sa cuu sa ndisa.

¹⁰Vatyí tacuan ta cua cuu casi ndo sa vaha xaan cuhva cuñi ra Ndyoo, ta vaha xaan cua cuu cuhva iyo ndo, ta ñahñi cuatyí ndo cua coo ndya cuhva ndya quivi cua quisi ra Cristo.

¹¹Ta tandihi saha cua zavaha ndo sa vaha ta sa ndoo, cuhva zavaha ra

Cristo. Ta cua zacahnu ñiyivi sii ra Ndyoo, ta cua catyi ñu vatyí vaha xaan ra sa cuenda cuhva zavaha ra sihin maa ndo.

Maa ñi tyiño ra Ndyoo zavaha ra Pablo vatyí iyo ra Cristo añaíma ra

¹²Ta cuñi sa cua coto ndo hermanos vatyí tandíhi sa tehin, tyindyee si sii, ta ñihi cuhva quehin Tuhun Ndyoo sihin ñiyivi.

¹³Vatyí tandíhi ra zandaru ta inga ñiyivi ihya, sito ñu vatyí ñohi vehe caa vatyí sino iñi sii ra Cristo.

¹⁴Ta tyindyee si sii cuaha xaan hermano yo sa ñohi vehe caa. Ta vityí ña yuhu ca ra vatyí sito ra vatyí tyindyee ra Ndyoo sii, ta nduñihi ca cuhva nacatyí ra Tuhun Ndyoo sihin ñiyivi.

¹⁵Ndisa iyo ra nacatyí tuhun sa cuenda ra Cristo vatyí cuñi ra nducahnu ca ra ta cuñi ra sa zacahnu ñiyivi sii ra. Zoco iyo ra nacatyí Tuhun Ndyoo sihin tandíhi cuii añaíma ra vatyí cuñi ra tyindyee ra sii.

¹⁶⁻¹⁷Nacatyí ra Tuhun Ndyoo vatyí cuñi xaan ra sii, vatyí sito ra vatyí i quisi ndyaca ra ndyaca ñaha sii yo sii, ihya vatyí cuñi ra cutyiño ra sii, sa zacote sii ñiyivi vatyí sa ndisa cuu Tuhun Vaha ra. Zoco inga ra cuan, nacatyí ra tuhun ra Cristo vatyí iyo minoo sa cuñi ra ñihi ra sihin si. Ta ña vaha añaíma ra cuhva zavaha ra sii si vatyí cuñi ra cuhva ra tizíhi sii, nii ñi sa ñohi vehe caa ya.

¹⁸Zoco ñahñi sa cuu sa cuenda mi vazú zavaha ra sii si sihin minoo añaíma vaha a sihin minoo añaíma ña vaha vatyí tuhun maa ra Cristo

cuu sa zacoto ra, ta yucuan cuenda zii xaan cuñi.

¹⁹Ta zii xaan ca cua cuñi vatyí site vatyí tandíhi sa cuu sii, ta cua tyindyee si sii, vatyí cahan ndo sihin ra Ndyoo sa cuende ta tyindyee Tatyí Ii ra Jesucristo sii.

²⁰Ta sito vehi vatyí cua tyindyee ra Ndyoo sii, ta ma cucahan nui, ta ma cuyuhi. Ta tacuan ta cua quehin tuhun ra Cristo sihin tandíhi cuii añaíme. Ta tacuan ta cua coto ñiyivi vatyí cahnu xaan cuu ra Cristo. Ta ña sica xaan iñi a cundito que a cui, zoco cuñi sa cua ndyehe ñiyivi cuhva iye ta coto ñu vatyí cahnu xaan cuu ra Cristo.

²¹Vatyí tatu cundito que ñuu ñiyivi ya cua zatyíne maa ñi tyiño ra Cristo, ta tatu cui cuaha xaan sa vaha cua ñihi.

²²Ta tatu cundito que, vaha, vatyí cua zatyíño que sa cuenda ra Cristo. Ta yucuan cuenda ña site tatu vaha ca cundite a cui

²³vatyí iyo uu cuhva, ta ña site ndya sa cuu sa vaha ca vatyí vaha xaan tatu cuu cuhin nu ndyaa ra Cristo.

²⁴Zoco sa cuenda maa ndo ta cuñi si sa ndoi ñuu ñiyivi vatyí cuu tyindyeyi sii ndo.

²⁵Ta yucuan cuenda site vatyí cua ndoi ñuu ñiyivi vatyí cuñi si sa tyindyee que sii ndo, ta cua sino ca iñi ndo, ta zii ca cua cuñi ndo.

²⁶Ta cua coo quivi cua quisi ndyehi sii ndo, ta zii xaan ca cua cuñi yo sa cuenda ra Cristo Jesús.

²⁷Cuñi si sa coo ndo tañi iyo ñiyivi sino iñi Tuhun Vaha sa cuenda ra Cristo. Ta ziqui tatu quisi ndyehe que sii ndo a ma quisi que zoco

cua saa tyiño nu ndyei vatyi sino xaan iñi ndo ta iin xaan cuu ndo ta nacatyí xaan ndo Tuhun Ndyoo.

²⁸Ta ma yuhu ndo vazu ñaa sa cua zavaha ra xaan iñi sii ndo sihin ndo vatyí tatu ma yuhu ndo sii ra, zañaha casi si sii ra vatyí cua naa ra, ta zañaha si vatyí cua zacacu ndisa cuii ra Ndyoo sii maa ndo.

²⁹Vatyí sa cuenda ra Cristo ta ñihi maa ndo sa vaha, zoco ña iin ñi sa sino iñi ndo sii ra cuu si, zoco cua ndyehe tucu ndo tundoho sa cuenda ra.

³⁰Iin ñi cuhva sahñi tahan yo sa cuenda ra Cristo. Sa tuhva ndo ndyehe cuhva sahñi tehin, ta vityí siñi tucu ndo vatyí ña zañe sa zatyíño xein tyiño ra Ndyoo.

Cua xaan ra Cristo, zoco i quisi ra ñuu ñiyivi, ta i sihi ra tañi minoo ra ndahvi

2 Ndisa zanduzii ra Cristo iñi yo. Ta ndisa vatyí cuñi xaan yo sii tahan yo ta tyindyee yo sii tahan yo. Ta ndisa tucu vatyí iin ñi cuu yo vatyí iyo Tatyí Ii sihin yo. Ta ndisa vatyí cundahvi iñi yo sii tahan yo.

²Tatu sa ndisa cuii cuu tandihi cuhva cuan, iin ñi cuu ndo sa ndisa. Ta sihin cuhva cuan zanduzii ndo iñi. Cuñi xaan ndo sii ra tahan ndo, tañi cuñi xaan ra Cristo sii ndo. Iin ñi cuhva caca iñi ndo, ta iin ñi cuhva zavaha ndo.

³Ma zavaha ndo maa ñi sa cua tyindyee sii maa ndo. Zavaha ndo sa cua tyindyee tucu sii inga ñiyivi. Ma nducu ndo cuhva nduu ndo tañi ra ñiñi. Ma caca iñun vatyí vaha xoon. Zanduluhlun suun, ta caca iñun vatyí vaha ca inga ra.

⁴Tahan tahan ndo caca iñi ndo sa cuenda sa cua tyindyee sii inga ñiyivi ta yivi sii sa maa ñi maa ndo.

⁵Caca iñi ndo cuhva i sica iñi ra Cristo Jesús

⁶vatyí vazu Ndyoo cuu ra, zoco ñá zacahnu ra sii ra. Ta ñá cuñi ra sa zacahnu ñiyivi sii ra tañi zacahnu ñu sii ra Ndyoo Zutu ra.

⁷I zandoo ra tandihi cuii sa iyo sii ra andivi ta sa cuca ra, ta i nduu ra minoo ñiyivi. Ta i cuu ra tañi minoo muzu.

⁸I nduu ra minoo ñiyivi ndahvi ñi, ta i zanduluhlu xaan ra sii ra ndya cuhva ndya i tyaa ra yahvi sii ra Ndyoo ta saha ra sa cahñi ñiyivi sii ra. I sihi ra nu cruz tañi minoo ra iyo cuatyí.

⁹Yucuan cuenda zanducahnu xaan ra Ndyoo sii ra, ta saha ra minoo zivi sii ra sa cahnu ca ta ziqui tandihi inga zivi.

¹⁰Tacuan i zavaha ra Ndyoo vatyí cuñi ra vatyí cua cuiñi siti tandihi yo ta zacahnu yo sii ra Jesús tatu cuiñi yo zivi ra. Cuñi ra Ndyoo vatyí cua cuiñi siti tandihi sa iyo andivi, ta nu ñuhu ta xu ñuhu ta zacahnu tandihi cuii si sii ra Jesús.

¹¹Ta cuñi ra Ndyoo vatyí cua catyí tandihi cuii sa iyo vatyí ra Jesucristo cuu ra ndyaca ñaha. Cuhva cuan cua zacahnu xaan si sii ra Ndyoo Zutu yo.

Ñiyivi sa sino iñi sii ra Ndyoo cuu ñu tañi ñuhu ñuu ñiyivi ya

¹²Cuñi xein sii ndo hermanos. I tyaa xaan ndo yahvi sii mi quivi i sindyei sihin ndo. Yucuan cuenda tyaa tucu ndo yahvi sii, vityí sa yoñi ndyaa sihin ndo. Ñihi xaan

nducu ndo kuhva zavaha ndo maa ñi sa cuñi ra Ndyoo vatyi maa ra zacacu sii ndo, ta yuhu ndo coto zavaha ndo minoo kuhva sa ma tahan iñi ra

¹³vatyi maa ra Ndyoo cuu ra iyo añima ndo. Ta tyindyee ra sii ndo vatyi cua cuñi ndo zavaha ndo sa cuñi maa ra, ta cua zavaha ndo sii si.

¹⁴Ta vazu ñaa sa cua zavaha ndo, zavaha ndo sii si sihin minoo kuhva sa ma coo tizihì ta ma cahñi tahan ndo,

¹⁵ta yoñi cuu tyaa cuatyì sata ndo. Coò ndo minoo kuhva vaha xaan tañi sa zehe ra Ndyoo cuu sii ndo nu yucu ñiyivì iyo xaan cuatyì ñuu ñiyivì ya. Cuu ndo tañi ñuhu sa zandundisi sa ñaa ñuu ñiyivì ya.

¹⁶Nacatyì xaan ndo Tuhun Ndyoo sihin ñiyivì, kuhva cuu cacu ñu. Ta zii xaan cua cuñi quivì quisi ra Cristo sa cuenda maa ndo vatyi cua cote vatyi yivì sa caha ñi i zatyinë nu yucu ndo.

¹⁷Ta vazu cahñi ñiyivì sii, sa cuenda Tuhun Ndyoo, zoco cua cuu si minoo sa cua kuhve sii ra Ndyoo sihin sa sino iñi maa ndo sii ra. Ta zii xaan cua cuñi iin ñi sihin maa ndo.

¹⁸Ta cuzii xaan tucu iñi maa ndo sihin mi.

Tasi ra Pablo sii ra Timoteo ta ra Epafrodito ndya ñuu Filipos

¹⁹Tatu cuñi ra ndyaca ñaha sii yo, ra Jesús, sa yatyi cua tasi sii ra Timoteo nu yucu ndo. Cuñi sa cua ndyehe ra yozo caa iyo ndo ta quisi nacatyì ra sihin. Tacuan ta zii xaan cua cuñi.

²⁰Vatyì maa ñi maa ra Timoteo sica iñi tañi sica iñi mi, yoñi inga ra. Sica iñi ra sa ndisa cuii yozo caa iyo maa ndo.

²¹Tandihì inga ra, sica iñi ra sa cuenda tyiño maa ra. Ña nducu ra kuhva zavaha ra kuhva cuñi ra Cristo Jesús.

²²Ta sito ndo vatyi vaha xaan ra Timoteo. Cuu ra tañi minoo zehi sa cuenda kuhva tyindyee ra ta nacatyì ndi Tuhun Ndyoo.

²³Sa cuñi tasi sii ra nu yucu ndo, zoco cua ndyehe xihne yozo caa cundaa tyiñe ihya.

²⁴Zoco nii xaan iñi sii ra ndyaca ñaha sii yo vatyi ña naha xaan ca ta cua cuu cuhin nu yucu ndo.

²⁵Ta sica iñi vatyi cuñi tucu si sa natasi sii ra hermano Epafrodito nu yucu ndo. Maa ndo i tasi sii ra ihya sa tyindyee ra sii, sihin tyiño ya. Ta iin ñi i sahñi tahan ndi sihin cuihna sa cuenda Tuhun Ndyoo.

²⁶Cuñi xaan ra Epafrodito cunuhu ra nu yucu ndo. Ta sica xaan iñi ra vatyi sa sito maa ndo vatyi i huhu xaan ra ihya.

²⁷Ta ndisa i huhu xaan ra ndya kuhva sa yatyi cuii cuu ra, zoco i cundahvi xaan iñi ra Ndyoo sii ra. Ta ña iin ñi sii maa ra, i cundahvi tucu iñi ra Ndyoo sii, ta ñá saha ra sa cuu ra coto nducuihya xaan ca iñi ta ziqui vityi.

²⁸Yucuan cuenda cuñi sa cunanuhu ra vatyi cua ndyehe ndo sii ra inga saha, ta zii cua cuñi ndo. Ta tacuan ta ma caca ca iñi vatyi cua ndyehe ndo vatyi iyo vaha ra.

²⁹Tiin cuenda vaha ndo sii ra sa cuenda ra ndyaca ñaha sii yo ta sihin sa zii cuñi ndo. Tyaa xaan ndo

yahvi sii ra ta sii inga ñiyivi tañi
maa ra

³⁰vatyí sa yatyi cuii cuu ra sa
cuenda tyiño ra Cristo. Ñá sica iñi
ra vazu cua cuu ra. Ta i tyindyee ra
sii, sa cuenda maa ndo vatyí ñá cuu
quisi tyindyee maa ndo sii.

**Cuhva ndundoo yo ityi
nuu ra Ndyoo sa ndisa**

3 Ta vityi ndoho hermanos
cuzii xaan iñi ndo sa cuenda
ra ndyaca ñaha sii yo. Ña yii cuu
si cuenda mi vazu cuaha saha tyei
sa zuun ñi cuhva sa sa tyei sii ndo
vatyi tyindyee si sii maa ndo.

²Zacuenda vaha xaan ndo sii ndo
sihin ra quiñi iyo. Zavaha ra cuhva
cuñi cuihna. Catyi ra vatyí cua
cacu añima ñiyivi tatu zavaha ñu
costumbre circuncisión.

³Zoco sito yo vatyí ña tacuan cua
cacu yo. Quivi i saha cuenda yo sii
yo sii ra Ndyoo cuu si tañi i tyaa
maa ra tuñi ra sii yo vatyí i zandasi
ra cuatyí yo. Ta zacahnu maa yo sii
ra sihin cuhva saha Tatyí Ii ra sii
yo. Ta zii xaan cuñi yo vatyí cuenda
ra Jesucristo cuu sii yo. Ta ña sica
iñi yo vatyí cua cacu yo sa cuenda
costumbre sa zavaha yo.

⁴Yoñi yo cua cacu sihin cuhva
zavaha ñi maa yo. Tatu ndisa
vatyi cuu cacu yo sihin sa zavaha
yo, yatyi ca cua cacu mi ta ziqui
tandihí inga ra

⁵vatyí uña quivi ñi mi, ta i
zavaha ñu costumbre circuncisión
cuan sihin. Ra hebreo cui, tata ra
Benjamín. Yivi inga tata cui, maa
ñi tata hebreo. Ta minoo ra fariseo
i cui, ta i site ta i tyei yahvi sii
tandihí cuii ley sahnú.

⁶I tyaa xein yahvi sii ley sahnú
cuan, ta yucuan cuenda i zayanga
xein sii ñiyivi sa cuu cuenda ra
Cristo. Ta i zavehi tandihí cuii sa
catyi ley sahnú cuan, ta yucuan
cuenda yoñi cuu tyaa cuatyí sate sa
cuenda si.

⁷Zoco tandihí sa i sica iñi quivi
cuan vatyí ñiñi si, ña vale ca si
vatyi maa ra Cristo cuu ra zacacu
sii.

⁸Ta site vatyí tandihí sa i zavehi,
ñá vale si, ta ña tyaa que yahvi sii
si vatyí ñiñi xaan ca sa coto yo sii
ra Cristo Jesús, ra ndyaca ñaha
sii yo. Yucuan cuu sa vale xaan
ca. Ta tyaa siye tandihí inga cuhva
sa i zavehi, ta cuu si tañi mihin sa
cuenda mi vatyí cuñi xaan que sa
cote sii ra Cristo.

⁹Cuñi xaan que ndu-iin sihin ra.
Ñá ndundoi ityi nuu ra Ndyoo sihin
sa tyei yahvi sii ley sahnú, zoco sa
cuenda sa sino iñi sii ra Cristo ta
catyi ra Ndyoo vatyí vehi.

¹⁰Ta vityí cuñi xein cote sii ra
Cristo. Cuñi cote yozo caa iyo
tundyee iñi sii maa ra vatyí i
nandoto ra sisi sa i sihi ra. Ta cuñi
ndyehi tundoho iin ñi sihin maa
ra ta sa cuenda ra. Ta cuñi sa cuu
tandihí cuii cuhva ña vaha sa cuñi
zavehi

¹¹vatyí cuñi cui minoo ra cua
nandoto sa cuenda ra Cristo quivi
cua cui.

**Cua cuhun yo ityi nuu
ca sihin ra Ndyoo**

¹²Ña catyi sihin ndo vatyí ñahñi
ca sa cumañi sii, ta sa ndui minoo
ra vaha xaan vityí. Ña tacuan.
Zoco cuahan que ityi nuu ca. Cuñi

sa ñihi sa saha ra Cristo Jesús sii, vatyi maa ra cuu ra i casi sii, ta i ndui ñiyivi ra.

¹³Hermanos, ña sica iñi vatyi sa ndui minoo ra vaha xaan tañi ra Cristo. Zoco ihya cuu sa zavehi, zanei iñi sii tandihi sa i yaha, ta zañihi ta cuehin ityi nuu ca.

¹⁴Cuñi ñihi tandihi sa cua cuhva ra Ndyoo sii, andivi sa cuenda ra Cristo Jesús. Yucuan cuenda zañihi ta cuehin ityi nuu ca. Cuahan ca sino iñi tahan tahan quivi.

¹⁵Yucuan cuenda tandihi yo sa sino xaan iñi, nacaca iñi yo cuhva ya. Ta tatu iyo minoo ndo ña sica iñi ndo cuhva ya, cua cuhva ra Ndyoo sa cutuñi iñi ndo.

¹⁶Zoco ihya cuu sa cuñi si; cuñi si sa caca iñi yo ta zavaha yo tandihi sa vaha sa i cutuhva yo.

¹⁷Hermanos, cundyico ndo sii. Ta zaha ndo cuenda yoo inga ra zavaha cuhva zavehi.

¹⁸Sa cuaha xaan saha catyi sihin ndo, ta vityi cuihya xaan cuñi ta saqui ta nacaty sihin ndo inga saha vatyi iyo cuaha xaan ra zacuaha ra vatyi ña ñiñi cuu sa i sihi ra Cristo.

¹⁹Ta quivi cua quisi ra Cristo cua cuhun ra cuan andyaya. Ña zacahnu ra sii ra Ndyoo. Zacahnu ra sii ñaa ndihi cuii ca sa cuñi maa ra zavaha ra. Zavaha ra sa quiñi, ta ña cahan nuu ra sihin si. Sino ca zacahnu ra sii ra sa cuenda sa quiñi zavaha ra. Ta sica iñi ra iin ñi sa cuenda sa iyo ñuu ñiyivi ya.

²⁰Zoco andivi cuu ñuu maa yo, ta ndatu yo quivi cua quisi tucu ra Jesucristo, ra ndyaca ñaha sii yo. Maa ra cua zacacu sii yo.

²¹Ta cua zama ra coño ñuhu sa iyo sii yo ihya ñuu ñiyivi. Ta cua zanduvaha ra inga coño ñuhu yo tañi coño ñuhu maa ra. Sihin tundyee iñi maa ra cua zama ra sii yo. Ta sihin sa zuun ñi tundyee iñi cuan ndyaca ñaha ra sii tandihi cuii sa iyo.

Tandihí tyiemvu nacuzii iñi yo sihin ra Ndyoo

4 Cuñi xein sii ndo, hermanos. Ñoho xaan iñi sii ndo. Zii xaan cuñi sihin ndo vatyi yivi sa caha ñi i nacaty Tuhun Ndyoo sihin ndo. Coto ñaha ndoyo ñuhu ndo sihin Tuhun Ndyoo.

²Ta vityi sica xein tumañi iñi sii ña Evodia ta sii ña Síntique vatyi nacoo sa vaha sihin minoo ña ta sihin inga ña vatyi yucuan cuu sa cuñi ra ndyaca ñaha sii yo.

³Ta yoho ra tehin, ra vaha xaan, sique suun vatyi tyindyeyun sii ñu sa nacoo sa vaha sihin ñu vatyi i tyindyee nduu tahan ñu sii, sa zacote Tuhun Ndyoo sihin ra Clemente ta inga zuhva ca ra. Ta ndyaa zivi ñu nu libro ra Ndyoo andivi.

⁴Cuzii iñi ndo sihin ra ndyaca ñaha sii yo tandihi cuii tyiemvu. Ta catyi sihin ndo inga saha, cuzii iñi ndo sihin ra ndyaca ñaha sii yo.

⁵Ta nandyeehe tandihi ñiyivi vatyi ñiyivi vaha cuu ndo sa ndisa. Ta nacohon iñi ndo vatyi sa cuñi quisi ra Cristo.

⁶Ma caca xaan iñi ndo, zoco tandihi tyiemvu cahan ndo sihin ra Ndyoo, ta caca ndo tandihi sa siñi ñuhu sii ndo sii ra. Ta ziqui

nacuhva ndo tyahvi ndyoo sii ra sa cuenda sa cua cuhva ra.

⁷Ta cua cuhva ra Ndyoo sa coo sa taxi añima ndo. Cahnu xaan cuu sa taxi sa saha maa ra. Yoñi cuu cutuñi iñi cuhva sa cahnu xaan si. Cua coo sa taxi añima ndo ta sihin sa siñi tuñi sii ndo vatyí iñi ñi cuu ndo sihin ra Cristo Jesús.

Nacaca iñi yo maa ñi sa vaha

⁸Hermanos, caca iñi ndo maa ñi sa ndisa ta sa ndoo ta sa ndii. Caca iñi ndo sii sa ña quiñi, sii sa tyaqui ta sa vaha. Caca iñi ndo sii sa tahan iñi ra Ndyoo ta sa cuenda cuhva vaha zavaha ñiyivi.

⁹Zavaha ndo cuhva i zacuehi sii ndo, tandihi sa i nacatyí sihin ndo ta cuhva i ndyehe ndo i zavehi. Ta cua ndoo xaan ra Ndyoo sihin ndo. Ta cua cuhva xaan ra sa coo sa taxi añima ndo.

I tyindyee ñiyivi ñuu Filipos sii ra Pablo

¹⁰Ziñi xaan cuñi, ta zacahni sii ra Ndyoo vatyí i tyindyee ndo sii, inga saha sihin xuhun. Ta site vatyí cuñi ndo tyindyee ndo sii, tandihi saha, zoco ña cuu.

¹¹Ña catyí cuhva ya vatyí iyo sa siñi ñuhu sii, vatyí sa cutuhve ndoi vaha sihin sa iyo sii, vazu iyo cuaha a vazu ñahñi.

¹²Ndoi vaha tatu iyo cuaha xaan sa sii, a vazu ñahñi. Cundyee iñi vazu sizoque, ta vaha tucu cuñi tatu iyo sa casi. Site cuzoque, ta site casi vehi.

¹³Tundyee iñi maa ra Cristo zandundyee xaan si iñi, ta cuu zavehi ñaa sa cuñi maa ra.

¹⁴Zoco vaha cuhva zacuu ndo vatyí i tyindyee xaan ndo sii, sihin tundoho sa ndyehi vityí.

¹⁵Sito ndo vatyí quivi i quisaha nacatyí Tuhun Ndyoo i quite nu cu si Macedonia, ta yoñi inga ñiyivi i tyindyee sii. Maa ñi maa ndoho ra ñuu Filipos i saha xuhun sii, vatyí i tyindyee sii ndo sihin Tuhun Ndyoo.

¹⁶Ta quivi i sindyee ñuu Tesalónica, i tyindyee ndo sii, sihin xuhun uu saha a uñi saha.

¹⁷Ta ña catyí cuhva ya vatyí cuñi xuhun ndo, zoco cuñi sa cua coo ca sa vaha sii maa ndo ityí nuu ra Ndyoo.

¹⁸Ta vityí ñahñi sa siñi ñuhu sii. Ndyaa cuaha ca sa i zaquisi ndo sihin ra Epafrodito. Ta sa tasi ndo cuan cuu tañi minoo xico azi, saa nu ndyaa ra Ndyoo. Tahan xaan iñi ra cuhva cuan.

¹⁹Ta cua cuhva ra Ndyoo tandihi sa siñi ñuhu sii maa ndo. Iyo xaan sa cuca ra ndya gloria, ta cua cuhva ra sa siñi ñuhu sii ndo sa cuenda ra Cristo Jesús.

²⁰Nazacahnu yo sii ra Ndyoo Zutu yo tandihi cuii tyiemvu. Ta nacuu si sa ndisa.

Nu ndihi cahan ra Pablo

²¹Tasi minoo nacumi sii tahan tahan ndo, ra sino iñi sii ra Cristo Jesús. Ra ndyaa sihin mi tasi tucu ra minoo nacumi sii ndo.

²²Ta tandihi ñu sino iñi ihya tasi ñu minoo nacumi sii maa ndo, ta cuaha ca ñu yucu vehe ra ndyaca ñaha, ra César.

²³Ta tumañi iñi sa saha ra Jesucristo, naco xaan si sihin tandihi ndo. Ta nacuu si tacuan.

Minoo Carta I Tasi Ra San Pablo Sii Ñiyivi Sino Iñi Sii Ra Ndyoo Ñuu Colosas

Tyaa ra Pablo minoo carta sii ñiyivi sino iñi sii ra Ndyoo ñuu Colosas

1 Yuhvi ra Pablo, minoo ra apóstol cui cuenda ra Jesucristo, cuhva cuñi ra Ndyoo. Sihin ra Timoteo yañi yo

²tyaa ndi carta ya sii ndoho ra sino vaha iñi sii ra Cristo ñuu Colosas. Nacuhva xaan ra Ndyoo Zutu yo tumañi iñi sii ndo, ta nacuhva ra sa coo sa taxi añima ndo.

Cahan ra Pablo sihin ra Ndyoo sa cuenda ñu sino iñi

³Tandihí saha sa cahan ndi sihin ra Ndyoo Zutu ra Jesucristo sa cuenda ndo, nacuhva ndi tyahvi ndyoo sii ra

⁴vatyí ñihi ndi tuhun vatyí sino xaan iñi ndo sii ra Cristo Jesús, ta cuñi xaan ndo sii tandihí ñiyivi sino iñi.

⁵Tacuan iyo ndo vatyí sito vaha ndo vatyí cua coo ndo sihin ra Ndyoo andivi. Ta i ñihi ndo tuhun cuan quivi i siñi ndo tuhun ndisa, cuhva cua cacu añima yo.

⁶⁻⁷Ra Epafra yañi yo i zacoto tuhun cuan sii ndo. Iñ ñi zatyíño ra tyíño ra Ndyoo sihin mi. Cuu ra minoo muzu vaha ra Jesucristo sa cuenda maa ndo. Ta tacuan ta i saa tuhun cuan nu ndyaa ndo. Ta nacahnu ñuu ñiyivi sitya si. Ta cuaha ñiyivi saha ñu sii ñu sii ra Ndyoo tañi i zavaha maa ndo quivi i sito ndo sa ndisa cuii vatyí cuñi xaan ra Ndyoo sii yo.

⁸I zacoto ra Epafra sii ndi sa cuenda maa ndo vatyí cuñi xaan ndo sii ñiyivi sino iñi vatyí iyo Tatyí Ii ra Ndyoo añima ndo.

⁹Yucuan cuenda ndya quivi i sito ndi tuhun cuan, ta ñá zaña ndi sa cahan ndi sihin ra Ndyoo sa cuenda ndo. Cuñi xaan ndi sa cua coto ndo tandihí cuii sa cuñi ra Ndyoo sa zavaha ndo. Ta cuñi ndi sa cua cuhva maa ra sa siñi tuñi maa ra sii ndo, ta cua cutuñi vaha iñi ndo sihin cuhva saha Tatyí Ii ra sii ndo.

¹⁰Vatyí tacuan ta cua cuu zavaha ndo tandihí sa tahan iñi ra Ndyoo cuhva tahan si zavaha ndo. Ta cua zavaha xaan ndo tandihí nuu sa vaha. Ta cua coto ndo sii ra Ndyoo vaha ca tahan tahan quivi.

¹¹Ta sica ndi sii ra Ndyoo vatyi cua zandundyee xaan ra sii ndo sihin tundyee iñi sii maa ra. Ta tacuan ta cua cundyee xaan iñi ndo ndyehe ndo tundoho, ta zii xaan cua cuñi ndo.

¹²Ta cua nacuhva ndo tyahvi ndyoo sii ra Ndyoo Zutu yo. Maa ra i zanduu ñiyivi vaha sii yo, ta cua ñihi yo sa vaha sa cua cuhva ra nu ndisi xaan sii ñiyivi sino iñi sii ra.

¹³I zacacu ra Ndyoo sii yo cuhva ndyaca ñaha sa ñaa sii yo. Ta saha ra sii yo sii zehe ra sa cundyaca ñaha ra, ta cuñi xaan ra sii Zehe ra.

¹⁴I zata ra Ndyoo sii yo sihin niñi ra Cristo, ta i zandasi ra cuatyí yo.

**Vityi iyo sa vaha sii yo sihin
ra Ndyoo vatyi i sihi ra
Cristo sa cuenda maa yo**

¹⁵Ña ndyehe yo sii ra Ndyoo. Zoco i nduu ra minoo ñiyivi, ta cuhva cuan cuu coto yo sii ra. Ta yucuan ra cuu ra Cristo, Zehe ra Ndyoo. Cumañi ca sino ñuu ñiyivi ta sa iyo ra Cristo.

¹⁶Ta i saha ra Ndyoo sa zavaha ra Cristo tandihi sa iyo andivi ta nu ñuhu. Sa cuu ndyehe yo ta sa ña cuu ndyehe yo i zavaha ra. I zavaha ra ángel andivi. Ta i zavaha ra cuihna ta tatyí cuihna. Ta tandihi sa ndyaca ñaha nu ñuhu i zavaha ra, ta sa cuenda maa ra i sino si. Ta sityiño ra sii si yozo cuhva cuñi maa ra.

¹⁷Cumañi ca coo tandihi si, ta sa iyo maa ra. Ta sa cuenda maa ra ta tañaha ca naa sa zavaha ra.

¹⁸Ta maa ra cuu xiñi sii tandihi yo sa sino iñi sii ra, ta cuu yo tañi coño ñuhu ra. Xihna ca maa ra i

nandoto sisi sa i sihi ra. Ta yucuan cuenda ra cu nuu cuu ra sii tandihi cuii sa iyo.

¹⁹Vatyi cuñi maa ra Ndyoo vatyi coo tandihi tundyee iñi maa ra sihin ra Cristo ta cundyaca ñaha ra sii tandihi.

²⁰Ta i cuñi ra Ndyoo vatyi tandihi sa iyo, coo vaha si sihin ra. Yucuan cuenda i sihi ra Cristo, ta sihin niñi ra i zanduvaha ra Ndyoo sii tandihi sa iyo ta ndya cuhva ndya maa yo sihin maa ra. Sa iyo nu ñuhu ta sa iyo andivi i zanduvaha ra Ndyoo sii si sihin ra.

²¹Ta i zanduvaha ra sii maa ndo sihin ra vazú ñiyivi xaan iñi sii ra Ndyoo i cuu ndo sa cuenda sa ña vaha i zavaha ndo.

²²Zoco i cundahvi iñi ra Ndyoo sii ndo, ta yucuan cuenda i tasi ra sii Zehe ra sa cuu ra nuu cruz. Ta i ndyehe ra tundoho sihin coño ñuhu ra, ta i sihi ra vatyi tacuan ta cua cuhva ra sii ndo sii ra Ndyoo. Ta sa nduu ndo ñiyivi vaha ta ñahñi ca cuatyí ndo

²³tatu ma ndoyo ñuhu ndo sihin cuhva sino iñi ndo, ta tatu ma zandoo ndo cuhva sa nii iñi ndo sii Tuhun Vaha sa i siñi ndo. Sa sito tandihi ñiyivi ñuu ñiyivi tuhun cuan. Ta zuun ñi yuhvi ra Pablo cuu minoo ra zacoto sii si.

**Ndyizo ra Pablo tyiño sa zacoto ra
tuhun sa cuenda ra Cristo tahan
tahan ñuu nu iyo ñiyivi sino iñi**

²⁴Ta vityi zii xaan cuñi vatyi ndyehi tundoho sa cuenda maa ndo. Tañi sa ndyehe ca ra Cristo tundoho cuu si vatyi ndyehi tundoho sihin coño ñuhi sa cuenda maa ra. Ta

zandihi tyiño i zavaha ra sa cuenda maa yo sa cuu coño ñuhu ra.

²⁵Ta yuhvi cui minoo ra zacoto tuhun ra Cristo vatyí yucuan cuu tyiño i saha ra Ndyoo sii, sa cuenda maa ndo. Cuñi ra sa cua zacote tandihi tuhun ra nacahnu cuii.

²⁶Zacote tuhun sa sicoo xehe ndya ta tyiemvu, zoco vityi zañaha ra Ndyoo sii si sii ñiyivi sino iñi sii ra.

²⁷Ta tañi maa ndo sa yivi ñiyivi hebreo cuu, cuñi ra Ndyoo sa coto ndo tuhun sa sicoo xehe cuan vatyí yaha xaan vaha si. Ta tuhun xehe sa sito ndo vityi cuu sa iyo ra Cristo añima yo. Ta sa cuenda maa ra cua cuhun yo andivi nu ndyaa ra Ndyoo.

²⁸Ta tuhun sa cuenda ra Cristo cuu sa zacoto ndi sii tandihi ñiyivi. Zayuhu ndi sii ñu, ta zacuaha ndi sii ñu vatyí cua cutuñi vaha iñi ñu ta cua cuahnu vaha tandihi ñu sihin cuhva sino iñi ñu vatyí iin ñi cuu ñu sihin ra Cristo.

²⁹Yucuan cuenda zatyiño xein sihin tundyee iñi ra Cristo sa saha xaan ra sii.

2 Cuñi sa cua coto ndo vatyí sica xaan iñi sa cuenda ndo, ta cahan xein sihin ra Ndyoo sa cuenda maa ndo, ta ñiyivi ñuu Laodicea, ta tandihi inga ñiyivi ta ndyehe ca sii.

²Sique sii ra Ndyoo vatyí nandundyee ca iñi tandihi ndo, ta iin xaan cuu ndo, ta cuñi xaan ndo sii tahan ndo vatyí sihin cuhva cuan ta cua cutuñi vaha ca iñi ndo yozo caa coto vaha ca ndo sii ra Cristo vatyí maa ra cuu tuhun xehe sa zacoto ra Ndyoo sii yo vityí.

³Maa ra Cristo saha tandihi sa cuu sa vaha. Ta tandihi sa siñi tuñi

vaha sii yo, maa ra saha. Tatu sito yo sii ra Cristo, sito yo sii ra Ndyoo.

⁴Ta nacatyí cuhva ya sihin ndo coto zandavi ñaha ñiyivi sii ndo sihin tuhun tyaqui

⁵vatyí vazu yoñi ndyaa sihin ndo zoco ñoho xaan iñi sii ndo. Zii xaan cuñi sa cuenda ndo vatyí vaha xaan cuhva yucu ndo. Ta vaha xaan ndyico ndo sii ra Cristo.

⁶Yucuan cuenda tañi cuhva i sino iñi ndo sii ra Cristo Jesús quivi cuan, zuun ñi cuhva cuan cuhun ndo ityi nuu sihin ra.

⁷Quihi ñaa ndo sii ra ñihi ca. Nacohon iñi ndo vatyí maa ra saha cuhva saa coo ndo. Nacuni ca iñi ndo sii ra tañi i cutuhva ndo. Ta ndita cuii ñi nacuhva ndo tyahvi ndyoo sii ra Ndyoo.

Cuhva saa sa saha ra Cristo coo yo

⁸Zacuenda vaha ndo sii ndo, ta ma cuhva ndo sa zandavi ñaha ñiyivi sii ndo sihin tuhun ña ndisa, cuhva sa sica ñi iñi maa ñu. Ña sino iñi ñu sii ra Cristo. Maa costumbre ñi ndyico ñu.

⁹Yivi sa ndisa cuu cuhva zacuaha ñu vatyí tandihi sa ndisa ta tandihi tundyee iñi ra Ndyoo iyo si sihin ra Cristo vatyí Ndyoo cuu ra.

¹⁰Ta sa ndu-iin ndo sihin ra Cristo, ta yucuan cuenda sa situ cuii añima ndo sihin Tuhun Ndyoo. Ndyaca ñaha ra Cristo sii tandihi inga ra ndyaca ñaha, tandihi ángel, ta sii cuihna ndihi ca.

¹¹Quivi i nañihi ndo sii ra Cristo, i quihvi ra añima ndo, ta i tyaa siyo maa ra sii tandihi sa ña vaha sa tuhva ndo zavaha. Ñá zavaha ndo costumbre circuncisión tañi ñiyivi

hebreo. Sica iñi ñu vatyi sihin sa yucuan ñi ta nduu ñu ñiyivi ra Ndyoo. Zoco i nduu maa ndo ñiyivi ra Ndyoo vatyi i zanduvaha ra añima ndo.

¹²I sihi ra Cristo, ta i tyihi ñu sii ra sisi ñaña, ta ziqui i zanandoto ra Ndyoo sii ra. Ta quivi i sicoo ndutya maa ndo sihin ndutya, cuu si tañi sa sihi ndo sihin ra Cristo. Ta ziqui i zanandoto ra Ndyoo sii ndo. Ta vatyi iyo ndo minoo cuhva saa.

¹³Quivi tañaha ca coto ndo sii ra Ndyoo i cuu ndo tañi ñiyivi i sihi, sa cuenda cuaty i ndo, ta sa cuenda sa ñá sito ndo ley ra Ndyoo. Zoco i zandasi ra Ndyoo cuaty i ndo quivi i sino iñi ndo sii ra Cristo, ta i saha ra minoo cuhva saa coo ndo iin ñi sihin ra Cristo.

¹⁴I zañaha ley sahnu cuan cuaty iyo. I catyi si vatyi tahan si cuhun yo andyaya vatyi ñá tyaa yo yahvi sii si. Zoco i zanaa ra Ndyoo cuhva iyo sii ley cuan quivi i sihi ra Cristo nu cruz.

¹⁵Ta quivi i sihi ra nu cruz i zahacanaa ra sii cuihna ta sii tandihi taty i cuihna sa ndyaca ñaha ñuu ñiyivi ya. Ta ityi nuu tandihi ángel i zañaha ra vatyi cahnu ca maa ra ta ziqui cuihna.

**Nacuñi xaan yo sa vaha
sa saha ra Ndyoo**

¹⁶Ña tahan si sa tyaa ñiyivi cuaty i sata ndo sa cuenda sa casi ndo a sa coho ndo a sa cuenda sa ña zavaha ca ndo vico zandu a vico luna saa a tatu ña tyaa xaan ndo yahvi sii quivi quitatu ñiyivi. (Quivi cumañi ca quisi ra Cristo i zavaha ñiyivi cuhva cuan vatyi tacuan cua cacu ñu cuñi ñu.)

¹⁷Zoco vityi sito yo vatyi ma cacu yo sihin cuhva cuan vatyi yivi sa ñiñi cuu si sa ndisa vatyi ra Cristo cuu ra cua zacacu sa ndisa cuii sii yo.

¹⁸Ma cuhva ndo sa catyi ñiyivi sihin ndo vatyi ma cacu ndo vatyi ña zacahnu ndo sii ángel ta ña tuhva ndo cahñi zoco sii ndo. Catyi ñiyivi cuan vatyi sito xaan ñu, zoco ña cahan ñu sa ndisa. Sica iñi ñu vatyi ñiñi xaan ca maa ñu vatyi i zañaha ra Ndyoo cuaha xaan ñimahna sii ñu.

¹⁹Zoco ña ndyico ñu sii ra Cristo, ta yucuan cuenda zavaha ñu cuhva cuan. Zoco maa yo ndyico yo sii ra Cristo. Coño ñuhu ra cuu yo, ta maa ra cuu xiñi yo. Ta zacuahnu ra sii coño ñuhu ra sihin sa vaha sa saha ra sii yo. Ta zandu-iin ra sii yo. Ta zandundyee ra sii yo sihin tundyee iñi maa ra cuhva cuñi ra Ndyoo.

²⁰Tañi sa sihi ndo sihin ra Cristo cuu si, ta ña iyo ca ndo sa cuenda cuhva iyo si ñuu ñiyivi ya. ¿Ta ñaa cuenda iyo ca ndo tañi ñiyivi ña sito sii ra Ndyoo? ¿Ta ñaa cuenda tyaa ndo yahvi sa catyi ñiyivi zavaha cuhva cuan?

²¹Vatyi tyehen catyi ñu: “Ma cutyiño ndo sa ihya, ta ma casi ndo sa yucuan, coto ma cacu ndo.” Catyi ñu.

²²Zoco ña ndisa sa cahan ñu vatyi maa ñi cuhva sa sica iñi maa ñu cuu si. Sa casi yo cuu sa cuenda zuhva ñi quivi, ta ma zativi si sii yo ityi nuu ra Ndyoo.

²³Ndisa vatyi cuhva zacuaha ñiyivi cuan, vaha xaan caa si tañi minoo sa siñi tuñi vaha xaan vatyi zandyyee xaan yo iñi yo ta zavaha

yo sii si, ta zanduluhlu yo sii yo zacuu si, ta ña tyaa ca yo yahvi sii cuhva cuñi coño ñuhu yo zacuu si. Zoco nusiin ta ma tyindyee si sa ndisa cuii sii yo ta cuu zama yo cuhva ña vaha sa iyo sii yo.

3 Saha ra Ndyoo minoo cuhva saa coo yo vatyí i nandoto ra Cristo. Ta vityí ndyaa ra siyo cuaha ra Ndyoo andívi. Yucuan cuenda nducu ndo sa vaha sa saha ra Ndyoo sii ndo ndya andívi.

²Nducu xihna ndo sa vaha sa saha ra Ndyoo sii yo andívi. Ta ma caca xaan iñi ndo sa cuenda sa iyo ñuu ñiyívi ya.

³Vatyí tañi sa i sihi ndo cuu si sa cuenda sa ña vaha i sicoo ndo ityi sata. Ta vityí iyo ndo iin ñi sihin ra Ndyoo minoo cuhva saa sa saha ra Cristo sii ndo.

⁴Maa ra Cristo cuu ra saha cuhva saa ya coo yo. Ta quívi cua quisi ra, cua ndyehe ñiyívi vatyí maa ra cuu ra cahnu ca. Ta cua cundyaca ñaha tucu maa yo sihin ra.

Cuhva i sicoo yo ityi sata, ta cuhva cuñi si coo yo vityí

⁵Yucuan cuenda cuñi si sa zandíhi yo tuhun sa zavaha yo sa ña vaha sihin coño ñuhu yo tañi zavaha ñiyívi ñuu ñiyívi ya. Ma cuzu ndo sihin minoo ñaha tatu ma tindaha xihna ndo. Ma caca iñi ndo tuhun quiñi, ta ma cuñi ndo zavaha ndo sii si. Ma cuñi xaan ndo zavaha ndo sa ña vaha a sa quiñi cuhva ña tahan si zavaha ndo, ta ma cuñi xaan ndo xuhun vatyí yucuan cuu tañi sa zacahnu ndo sii inga ndyoo.

⁶Sa cuenda tandíhi cuhva ya, cua cuxaan xaan ra Ndyoo sihin ñiyívi

ña tyaa yahvi sii ra, ta cua tasi tuñi ra sii ñu.

⁷Ta quívi cumañi ca coto yo sii ra Ndyoo, i zavaha yo cuhva ña vaha cuan.

⁸Zoco vityí ma zavaha ca yo sii si. Ma cuxaan xaan yo. Ma quiñi xaan cahan yo sihin ñiyívi. Ma cahan cuehe yo sii ñiyívi a cahan yo ndya vaha ñi.

⁹Ma cahan ndo cuendu sihin ra tahan ndo vatyí vityí sa nduu yo ñiyívi saa, ta ña zavaha ca yo sa i zavaha yo ityi sata.

¹⁰Vityí iyo yo minoo cuhva saa. Yucuan cuenda cuñi si nducu yo cuhva coo yo cuhva cuñi ra Cristo. Ta sihin cuhva cuan cua coto vaha ca yo sii ra, ra i saha cuhva saa ya coo yo.

¹¹Ta vityí ña ñiñi ca tatu ñiyívi hebreo cuu yo a yívi a tatu zavaha yo costumbre circuncisión a ña zavaha yo. Ña ñiñi vazu ñiyívi inga ñuu cuu yo a vazu ña casi xaan iñi yo a vazu muzu cuu yo a vazu patrón cuu yo. Ña ñiñi tandíhi si cuan. Sa ñiñi ca cuu sa iin ñi cuu yo sihin ra Cristo vatyí maa ra cuu ra saha cuhva saa coo yo, ta ma ndíhi si.

¹²Cuñi xaan ra Ndyoo sii ndo. I casi ra sii ndo ta zanduu ra ñiyívi vaha xaan sii ndo ityi nuu ra. Yucuan cuenda cundahvi iñi ndo sii inga ñiyívi, ta cuu ndo ñiyívi vaha sihin ñu. Zanduluhlu ndo sii ndo. Vii xaan coo ndo, ta ndyee xaan cuu iñi ndo sihin ñiyívi.

¹³Ndyee xaan cuu iñi ndo sihin minoo ndo ta sihin inga ndo, ta zaha ndo tucahnu iñi sii inga ndo tatu iyo tizíhi. I zaha ra Cristo

tucahnu iñi sii maa ndo. Tacuan tucu zavaha ndo sihin tahan ndo.

¹⁴Ta sa ñiñi xaan ca cuu sa cuñi xaan ndo sii ñiyivi. Yucuan cuu sa zandu-iin sii yo.

¹⁵Ta sa taxi sa saha ra Cristo, nacundyaca ñaha si sii añaima ndo vaty yucuan cuenda i cana ra Ndyoo sii ndo ta zandu-iin ra sii ndo. Ta nacuhva xaan ndo tyahvi ndyoo sii ra Ndyoo tandihi tyiemvu.

¹⁶Ta nacutu cuii tuhun ra Cristo añaima ndo. Zacuaha ndo ta cuhva ndo sa siñi tuñi vaha sii ra tahan ndo sihin sa siñi tuñi sa saha maa ra Ndyoo. Ta zacahnu ndo sii ra Ndyoo sihin sa cata ndo salmo a yaa Ndyoo a yaa sa saha Tatyí Ii sii ndo. Cata ndo sihin tandihi añaima ndo. Ta nacuhva xaan ndo tyahvi ndyoo sii ra.

¹⁷Ta ñaa sa zavaha ndo, ta ñaa sa cahan ndo, zoco zavaha ndo sii si tañi minoo tyiño ra Jesús, ra ndyaca ñaha sii yo. Ta nacuhva xaan ndo tyahvi ndyoo sii ra Ndyoo Zutu yo sa cuenda cuhva tyindyee ra Jesús sii ndo.

Cuhva tahan si zavaha yo vatyí sino iñi yo sii ra Cristo

¹⁸Ndoho sa iyo yíi, tyaa ndo yahvi sii yíi ndo vatyí yucuan cuu sa tahan si zavaha ñiyivi sino iñi sii ra ndyaca ñaha sii yo.

¹⁹Ta ndoho rayíi, cuñi xaan ndo sii ñazihí ndo. Ta ma cuxaan ndo sihin ñu.

²⁰Ndoho sa ndyihí, tyaa ndo yahvi sii zutu ndo ta sii zihí ndo tandihi cuii cuhva vatyí yucuan cuu sa tahan xaan iñi ra ndyaca ñaha sii yo.

²¹Ndoho ra cuu zutu sa ndyihí, ma xaan xaan cahan ndo sihin zehe ndo coto nducuihya iñi si.

²²Ta ndoho ra cu muzú, tyaa ndo yahvi sii patrón ndo tandihi sa catyí ra. Ma zavaha ndo sii ndo cuhva sa ndyehe ñi ra vatyí cuñi ndo sa cua cuzii iñi ra sihin ndo, zoco zavaha ndo sii si sihin tandihi añaima ndo vazú ña ndyehe patrón ndo. Tacuan zavaha ndo vatyí yuhu ndo sii ra Ndyoo.

²³Ta ñaa sa zavaha ndo, zavaha ndo sii si sihin tandihi cuii añaima ndo vatyí zavaha ndo sii si sa cuenda ra Ndyoo ta ña iin ñi sa cuenda ñiyivi.

²⁴Vatyí sito ndo vatyí cua cuhva maa ra ndyaca ñaha sii yo sa vaha sa tahan si sii ndo vatyí zatyíño ndo tyiño ra.

²⁵Zoco tatu zavaha yo sa ña vaha, cua ñihí yo minoo sa ma tahan iñi yo vatyí Ndyoo ña ziiin ziiin ndyehe ra sii yo. Minoo cuhva ndoo xaan cua zandaa ra tyiño cuenda yo sa cuenda cuhva i zavaha yo, a sa vaha a sa ña vaha.

4 Ndoho ra ndyaca ñaha sii muzu ndo, ndoo xaan coo ndo ta minoo cuhva vaha sihin ñu. Nacohon iñi ndo vatyí iyo tucu ra ndyaca ñaha sii maa ndo andivi.

²Cahan ndo sihin ra Ndyoo tandihi cuii cuhva, ta ma cuzu ndo. Ta nacuhva ndo tyahvi ndyoo sii ra Ndyoo.

³Cahan ndo sihin ra Ndyoo sa cuenda maa ndi vatyí cua cuhva ra Ndyoo cuhva sii ndi sa cahan ndi sihin ñiyivi tuhun xehe sa cuenda ra Cristo. Yucuan cuenda ñohi vehe caa.

⁴Caca ndo sii ra Ndyoo vatyi casi xaan cua zacote Tuhun ra sii ñu tañi tahan si.

⁵Casi coo ndo sihin ñiyivi ña sito sii ra Ndyoo, vatyi tacuan ta cuu cahan ndo Tuhun Ndyoo sihin ñu.

⁶Ta maa ñi tuhun vaha cahan ndo ta sihin sa siñi tuñi vaha vatyi tacuan ta cua ñihi ndo minoo cuhva vaha cahan ndo sihin minoo minoo ñiyivi tatu ndaca tuhun ñu sii ndo sa cuenda Tuhun Ndyoo.

Nu sa cuñi ndihi cahan ra Pablo

⁷Ra Tíquico, ra hermano yo, cua nacatyi sihin ndo yozo caa iye. Ñihi xaan zatyño ra tyño ra Jesús sihin.

⁸Tasi sii ra nu yucu ndo vatyi cua zacoto ra sii ndo tandihi yozo caa iyo ndi, ta cua cuhva ra tundyee iñi sii ndo.

⁹Cuahan tucu ra Onésimo hermano yo sihin ra. Ñin ñi ñuu ra sihin ñuu maa ndo. Vaha xaan ñiyivi cuu ra, ta cuñi xaan yo sii ra. Cua zacoto ra sii ndo tandihi sa tehin nu ndeyi ihya.

¹⁰Tasi ra Aristarco minoo nacumi sii ndo. Ñoho ra vehe caa sihin ihya. Ta ra Marcos tucu, yañi tahan ra Bernabé, tasi ra minoo nacumi sii ndo. Sa tasi tyño nu yucu ndo sa cuenda ra Marcos vatyi tatu saa ra nu yucu ndo tiin cuenda vaha ndo sii ra.

¹¹Ta tasi tucu ra Jesús minoo nacumi sii ndo. Justo nañi tucu

ra. Maa ñi ra Aristarco sihin ra Marcos ta ra Justo cuu ra ra hebreo ra zatyño sihin mi sa cuenda tyño maa ra Ndyoo, ta saha xaan ra tundyee iñi sii.

¹²Tasi tucu ra Epafras, ra ñuu ndo, minoo nacumi sii ndo. Muzu maa ra Jesús cuu sii ra. Cahan xaan ra sihin ra Ndyoo sa cuenda ndo vatyi cuñi ra sa cua ndundyee xaan ca iñi ndo sihin Tuhun Ndyoo ta cua coto ndo, ta cua zavaha ndo tandihi cuii sa cuñi ra Ndyoo.

¹³Ta sehi sa ndaa sa cuenda ra vatyi cahan xaan ra sihin ra Ndyoo cuenda maa ndo ta cuenda ñiyivi ñuu Laodicea ta ñiyivi ñuu Hierápolis.

¹⁴Ra Demas ta ra Lucas tasi ra minoo nacumi sii ndo. Ra Lucas cuu ra médico, ra sa cuñi xaan ndi.

¹⁵Cuhva ndo minoo nacumi sii ra hermano yo ñuu Laodicea ta sii ña Ninfas ta sii ra hermano titahan vehe ña.

¹⁶Tatu sa yaha cahvi ndo carta ya tasi ndo sii si nu yucu ra hermano ñuu Laodicea, ta cahvi tucu maa ndo carta sa cua tasi sii maa ra.

¹⁷Ta catyi ndo sihin ra Arquipo nazatyño vaha ra tyño i saha ra ndyaca ñaha sii yo sii ra.

¹⁸Yuhvi ra Pablo sihin ndehi tyei minoo nacumi sii ndo. Ma naa iñi ndo vatyi ñohi vehe caa. Ta ra Ndyoo nanazoco xaan ra sii ndo. Amén.

Carta Sa Xihna Ñi I Tyaa Ra San Pablo Sii Ñiyivi Ñuu Tesalónica

Ra Pablo ta ra tahan ra tyaa ra minoo carta sii ñiyivi sino iñi sii ra Jesús ñuu Tesalónica

1 Yuhvi ra Pablo sihin ra Silvano ta ra Timoteo tyaa ndi minoo carta ya sii ñiyivi sino iñi sii ra Jesús ñuu Tesalónica. Sa i ndu-iin ndo sihin ra Ndyoo Zutu yo ta sihin maa ra Jesús, ra ndyaca ñaha sii yo. Naquihin vaha ndo tandihi sa vaha sa saha ra Ndyoo Zutu yo sii ndo ta tacuan tucu saha ra Jesús, ra ndyaca ñaha sii yo. Ta nacoo sa taxi añima ndo sa cuenda maa ra cuan.

Cuhva sino xaan iñi ñiyivi ñuu Tesalónica

²Saha xaan ndi tyahvi ndyoo sii ra Ndyoo sa cuenda tandihi ndo, ta cahan xaan ndi sihin ra sa cuenda ndo.

³Ta cuhva cahan ndi sihin ra Ndyoo Zutu yo, ta ña naa iñi ndi cuhva iyo ndo vatyi vaha xaan sino iñi ndo ta zatyño ndo tyño ra. Cuñi xaan ndo sii ra Ndyoo, ta yucuan cuenda zatyño ndo tyño ra. Ta sino xaan iñi ndo vatyi cua quisi ra Jesús inga saha.

⁴Ndoho yañi xaa, ra Ndyoo cuñi xaan ra sii ndo, ta sito ndi vatyi maa ra i casi sii ndo.

⁵Quivi i nacaty i xaan ndi Tuhun Ndyoo sihin ndo cuhva cacu yo, yivi tuhun cahan ñi maa ndi cuu si, zoco i tyindyee xaan Taty i sihin cuaha xaan cuhva. Ta i sito vaha maa ndi cuhva cahan ndi vatyi zatyño xaan ra Taty i. Ta sito tucu maa ndo yozo caa i cuu maa ndi quivi i sindyaa ndi sihin ndo vatyi cuñi xaan ndi tyindyee ndi sii ndo.

⁶Ta i quisaha zavaha ndo cuhva zañaha ndi ta cuhva zañaha ra Jesús, ra ndyaca ñaha sii yo, vatyi i tiin cuenda ndo Tuhun Ndyoo vazuu ndyehe xaan ndo tundoho sa cuenda si. Ta zii xaan i cuñi ndo vatyi saha xaan Taty i sa zii sii ndo.

⁷Ta sihin cuhva ya ta i zañaha ndo minoo cuhva vaha sii tandihi ñiyivi sino iñi nu cu si Macedonia ta nu cu si Acaya.

⁸I zacoto ndo Tuhun Ndyoo sii ñiyivi nu cu si Macedonia ta Acaya, zoco yivi yucuan ñi, nacahnu cuui ta sa sito ñiyivi vityi vatyi sino xaan iñi ndo sii ra Ndyoo. Ta ña cuñi ca si sa nacaty i ndi sihin ñu.

⁹Zuun ñi maa ñu ta nacaty i ñu yozo caa i cuu quivi sa ndyaa ndi

sihin ndo. Nacatyí ñu vatyí vaha xaan i sino iñi ndo sa cahan ndi, ta i zaña ndo sa zacahnu ndo sii ndyoo yutu ta ndyoo caa ta sino iñi ndo sii ra Ndyoo ndito, ra cu Ndyoo sa ndisa. Ta vityí tyaa ndo yahví sii ra ta zatyíño ndo tyíño ra.

¹⁰Ta nacatyí ñu vatyí ndatu ndo quívi sa cua quisi ra Jesús zehe Ndyoo inga saha ndya gloria. Maa ra cuu ra i zanandoto ra Ndyoo. Maa ra Jesús cua zacacu sii yo, ta ma tasi tuñi ra Ndyoo sii yo quívi cua tasi tuñi ra sii ñiyívi.

Tyíño i zavaha ra Pablo ñuu Tesalónica

2 Ta zuun ñi maa ndo sito ndo, ndoho yañi xaa, vatyí quívi i sindyaa ndi sihin ndo, vaha xaan i cuu.

²Vatyí vazu i ndyehe xaan ndi tundoho ta i cañi xaan ñiyívi sii ndi ñuu Filipos, tañi sa sa sito maa ndo, zoco i tyindyee xaan ra Ndyoo sii ndi, ta ñá yuhu ndi, ta i nacatyí ndi Tuhun Ndyoo sihin ndo vazu i sahñi tahan xaan ñiyívi sihin ndi ñuu ndo.

³Ta tuhun i nacatyí ndi sihin ndo, ñahñi tuhun ña vaha i nazaca ndi sihin si ta ñahñi tuhun ña ndoo. Ta ñá zandavi ñaha ndi sii ndo.

⁴Ña tacuan, zoco cuhva i saha maa ra Ndyoo tyíño sii ndi sa nacatyí ndi Tuhun ra cuhva cacu ñiyívi, ta tacuan nacatyí ndi. Ña nducu xaan ndi cuhva sa cua cuzii iñi ñiyívi sihin ndi. Cuñi ndi sa cua cuzii iñi maa ra Ndyoo sihin cuhva zavaha ndi vatyí maa ra ndyehe ñaa sa iyo añaima yo.

⁵Ta tañi sa sito maa ndo vatyí numinoo saha ta ña cahan ndi

tuhun tyaqui vatyí cuñi ndi zandavi ñaha ndi a vatyí cuñi ndi ñihi ndi xuhun. Ta sito vaha maa ra Ndyoo vatyí sa ndisa quehin.

⁶Ta ña nducu ndi sa zacahnu ñiyívi sii ndi, a maa ndo a inga ñiyívi. Cuu cundyaca ñaha ndi sii ndo tatu cuñi ndi vatyí maa ra Cristo i tava tyíño sii ndi sa zatyíño ndi tyíño ra. Zoco ña cuñi ndi sa cundyaca ñaha ndi sii ndo.

⁷Vii xaan i cahan ndi sihin ndo, ta vaha xaan i zavaha ndi tañi zavaha minoo ñuzihí sihin zehe ndyihí ñu vatyí cuñi xaan ñu sii si.

⁸Ta maa ndi cuñi xaan ndi sii ndo ta yívi Tuhun Ndyoo ñi saha ndi sii ndo. Vazu cuu ndi sa catyí ndo tatu sa vatyí cuu sa tacuan vatyí cuñi xaan ndi sii ndo.

⁹Vatyí nacohon iñi ndo, ndoho yañi xaa, cuhva i zatyíño xaan ndi. Ñihi xaan i zatyíño ndi tandihí quívi ta sa cuaa vatyí ñá cuñi ndi sa cozo ziqui ndo sii ndi ñi ñi sa i nacatyí ndi Tuhun Vaha ra Ndyoo sihin ndo.

¹⁰Maa ndo cuu sa ndaa ta maa ra Ndyoo vatyí quívi i sicoo ndi sihin ndoho sa sino iñi ta minoo cuhva vaha xaan i sicoo ndi sihin ndo. Ndo xaan i zavaha ndi, maa maa ñi cuhva cuñi ra Ndyoo. Ta ñá saha ndi cuhva sii ñiyívi ta cuu tyaa ñu cuatyí sata ndi.

¹¹Ta sito ndo cuhva i saha xaan ndi tuhun vaha sii ndo ta tundyee iñi ta i cahan ndi sihin ndo tañi cahan minoo zutu sa ndyihí sihin si.

¹²Ta i catyí ndi sihin ndo vatyí coo ndo minoo cuhva vaha xaan tañi ñiyívi sito sii ra Ndyoo. Maa ra i casi sii ndo vatyí coo ndo sihin ra

nu ndyaca ñaha ra, nu iyo tandihi cuii cuhva sii ra.

¹³Ta yucuan cuenda ña zaña ndi sa saha xaan ndi tyahvi ndyoo sii ra Ndyoo vatyí quívi i siñi ndo Tuhun Ndyoo sa nacatyí ndi sihin ndo ta i sino iñi ndo sii si tañi sa Tuhun Ndyoo cuu si ta yívi tañi tuhun cahan ñiyívi. Ta ndisa vatyí zatyíño xaan si sihin maa ndo sa sino iñi ta zama si cuhva iyo ndo.

¹⁴Ta vityí tahan si sii ndo, yañi xaa, cuhva tahan si sa xihna ñi sii ñiyívi sino iñi sii ra Ndyoo nu cu si Judea. Vatyí tañi zandyehé xaan ñiyívi hebreo tundoho sii ñu, ta tacuan tucu tahan ndo zacuu ñiyívi ñuu ndo.

¹⁵Ta ñiyívi hebreo cuan cuu ñu i sañi sii ra Jesús, ra ndyaca ñaha sii yo. Ta zuun ñi ñiyívi ñuu ñu, ñu i nacatyí cuhva catyí ra Ndyoo sihin ñu, ta i sañi ñu sii ñu. Zandyehé xaan ñu tundoho sii maa ndi. Na zavaha ñu cuhva cuñi ra Ndyoo ta sañi tahan xaan ñu sihin tandihi ñiyívi.

¹⁶Na saha ñu sa cahan ndi Tuhun Ndyoo sihin ñiyívi sa yívi ñiyívi hebreo cuu ta cacu ñu. Ta sa catyí sa zavaha ñu hebreo cuhva ya, ta cuaha xaan nduu cuatyí ñu. Zoco vityí cahnu xaan tundoho cua zaquisi ra Ndyoo ziqui ñu tandihi cuii tyiemvu.

Cuñi ra Pablo cahun ra inga saha ndya Tesalónica

¹⁷Yañi xaa, sa naha xaan sa ña ndyehe ca ndi sii ndo. Ta ña naa iñi ndi sii ndo. Ñoho xaan iñi ndi sii ndo. Ta i nducu xaan ndi cuhva cahun ndi cua ndyehe ndi sii ndo.

¹⁸Yucuan cuenda zuun ñi yuhvi ra Pablo i cuñi quisi minoo saha ta inga saha tucu, zoco ñá saha cuihna sa quisi.

¹⁹¿Ta ñaa cuenda sica iñi ndi vatyí cua ñihi ndi sa vaha nuu ra Ndyoo? ¿Ta ñaa cuenda zii xaan cuñi ndi ta vaha xaan cuñi ndi? Catyí vatyí sa cuenda maa ndo vatyí quívi cua quisi tucu ra Jesús ta vaha xaan cua cuu si sihin maa ndi sa cuenda maa ndo.

²⁰Vatyí sa cuenda maa ndo ta ndyehe ñiyívi vatyí vaha cuu tyíño ndi, ta zii xaan cuñi ndi sa cuenda ndo.

3 Ta yucuan cuenda quívi ñá cuu ca cundyeé iñi ndi (sa ma coto ndi yozo caa iyo ndo) i sica iñi ndi vatyí cua ndoo maa ñi mi ñuu Atenas.

²Ta i zacuhun ndi sii ra yañi yo, ra Timoteo, vatyí cua ndyehe ra sii ndo. Minoo muzu ra Ndyoo cuu sii ra. Zatyíño xaan ra sihin ndi sa nacatyí xaan ndi tuhun sa cuenda ra Cristo cuhva cacu ñiyívi. Ta cuu tyindyee ra sii ndo sihin Tuhun Ndyoo ta cua sino ca iñi ndo, ta cua zandundyee ca ra iñi ndo.

³Vatyí tacuan ta yoñi numinoo ndo ta cua yuhu xaan ndo sa catyí tundoho sa ndyehe ndo vityí. Zuun ñi maa ndo ta sa sito ndo vatyí tahan si ndyehe yo tundoho.

⁴Vatyí quívi i sindyaa ndi sihin ndo ta i nacatyí ndi sihin ndo vatyí cua ndyehe yo tundoho. Ta cuhva cuan i cuu si, tañi sa sito ndo.

⁵Ta yucuan cuenda, quívi ñá cundyeé ca iñi vatyí cuñi xein cote tatu sino ca iñi ndo, ta i zacuhin sii ra Timoteo vatyí cua ndyehe

ra yozo caa iyo ndo sihin cuhva sino iñi ndo. Vazu sa zandavi ñaha cuihna sii ndo ta tyiño i zavaha ndi nu yucu ndo cua naa tandihi si.

⁶Zoco vityi sa nasaa ra Timoteo sa i sahan ra nu yucu ndo, ta nacatyi ra sihin ndi vatyi vaha xaan sino iñi ndo ta cuñi ndo sii minoo ndo ta sii inga ndo. Ta catyi ra vatyi nacohon xaan iñi ndo sii ndi ta cuñi xaan ndo ndyehe ndo sii ndi tañi maa ndi cuñi xaan ndi ndyehe ndi sii ndo.

⁷Yucuan cuenda, yañi xaa, vaha xaan cuñi ndi sa ñihi ndi tuhun cuan. Vazu cahnu xaan tundoho ndyehe ndi vityi zoco zii xaan cuñi ndi vatyi sino vaha iñi ndo.

⁸Ta iyo vaha maa ndi vityi sa ndisa vatyi ñá ndoyo ñuhu maa ndo.

⁹Saha ndi uu xico tyahvi ndyoo sii ra Ndyoo sa cuenda ndo, ta zii xaan cuñi ndi nuu maa ra sa cuenda ndo.

¹⁰Ora ta sa cuaa sica xaan ndi sii ra vatyi cuhva ra sa ndyehe ndi sii ndo, ta cua cuu tyindyee ca ndi sii ndo cuhva sino ca iñi ndo, ta ma cumañi sa sino iñi ndo.

¹¹Ta vityi natyindyee zuun ñi maa ra Ndyoo Zutu yo ta ra Jesucristo ra ndyaca ñaha sii yo ta cua cuu cahun ndi nu yucu ndo.

¹²Ta natyindyee ra Jesús sii ndo, ta cua cuñi ca ndo sii minoo ndo ta sii inga ndo, ta tacuan cua cuñi ndo sii tandihi ñiyivi tañi cuñi maa ndi sii ndo.

¹³Ta tacuan ta cua zanduvaha ra añima ndo, ta ñahñi ca cuatyí ndo cua coo nuu ra Ndyoo Zutu yo quivi cua quisi tucu ra Jesús sihin tandihi ñiyivi sino iñi sii ra. Maa ra cuu ra ndyaca ñaha sii yo.

Cuhva cuñi ra Ndyoo sa zavaha yo

4 Ta vityi, yañi xaa, zañiñi xaan ndi sii ndo ta saha xaan ndi tuhun vaha sii ndo sihin cuhva sa saha ra ndyaca ñaha, ra Jesús, sii ndi. Vatyí tañi sa zacuaha ndi sii ndo cuhva coo ndo cuhva cuñi ra Ndyoo, ta tacuan cua zavaha xaan ndo sii si; zoco zavaha ndo sii si cuaha ca.

²Vatyí sito ndo cuhva sa saha ndi tyiño sii ndo tañi sa saha ra Jesús, ra ndyaca ñaha sii yo, tyiño sii maa ndi.

³Vatyí cuñi ra Ndyoo vatyí cuhva ndo sii ndo sii maa ra sa ndisa. Ta numinoo ndo ta ma coo ndo sihin minoo ñaha tatu ma tindaha xihna ndo sihin ña.

⁴Nacoo minoo ñi ñuzihi sii sa minoo minoo ndo. Ta ñin ñi sii maa ñu cuñi ndo.

⁵Ta ma coo ndo tañi ñiyivi sa ña sito sii ra Ndyoo vatyí maa maa ñi sa ña vaha zavaha ñu sihin cuhva cuan.

⁶Ta numinoo ndo ta ma zandavi ñaha ndo sii inga yañi yo ta coo xehe ndo sihin ñazihí ra vatyí ñihi xaan cua tasi tuñi ra Ndyoo sii ndo tatu zavaha ndo cuhva cuan tañi sa nacatyí ndi sihin ndo.

⁷Vatyí ñá casi ra Ndyoo sii yo sa cua zavaha yo sa ña vaha. I casi ra sii yo vatyí zavaha yo sa vaha cuhva cuñi ra.

⁸Yucuan cuenda yoo ra sa ña tyaa yahvi tuhun quehin ihya, sii maa ra Ndyoo ña tyaa ra yahvi ta yivi sii minoo ñiyivi. Vatyí saha maa ra Ndyoo Tatyí Ii ra sii yo vatyí cua zavaha yo cuhva cuñi ra.

⁹Zoco sa cuenda tuhun sa cuñi yo sii minoo yo ta sii inga yo, ña cuñi si sa tyei vatyí zuun ñi maa ra Ndyoo zacuahá ra sii ndo cuhva cuñi ndo sii tandíhi inga yañi yo.

¹⁰Ta ndisa vatyí sa cuñi ndo sii tandíhi yañi yo nacahnu Macedonia, zoco zañiñi ndi sii ndo, yañi xaa, vatyí cuñi ca ndo sii ra ñihi ca.

¹¹Ta nducu ndo cuhva coo taxi ndo, ta caca iñi ndo iin ñi tyiño maa ndo. Ta ma cuñi xaan ndo coto ndo tyiño inga ñiyivi. Ta zatyíño ndo sihin ndaha ndo tañi sa saha ndi tyiño sii ndo.

¹²Vatyí tacuan ta cua tyaa ñiyivi ña sito Tuhun Ndyoo yahvi sii ndo, ta ñahñi cua cumañi sii ndo ta cuhva cundito ndo.

Quivi cua quisi tucu ra Jesús

¹³Yañi xaa, ña cuñi sa ma coto ndo ñaa sa cua tahan ñiyivi sa sihi, coto nducuihya xaan iñi ndo tañi inga ñiyivi sa ña sino iñi.

¹⁴Sino iñi yo vatyí i sihi ra Jesús ta i nandoto tucu ra. Ta zuun ñi cuhva cuan cua tahan ñiyivi sa sino iñi sii ra Jesús ta sihi ñu vatyí cua zanandoto ra Ndyoo sii ñu.

¹⁵Yucuan cuenda catyí ndi sihin ndo tañi minoo sa zañaha ra Ndyoo vatyí maa yo tatu ndito yo ndya quivi cua quisi ra Jesús, yivi maa yo cuhun sa xihna ñi. Xihna ca ñiyivi i sihi.

¹⁶Vatyí zuun ñi maa ra Jesús cua quisi ra ndya gloria, ta ñihi xaan cua cana saa ra, ta cua cana saa ra arcángel, ta cua tiví ra cutu ra Ndyoo. Ta ziqui sa xihna ñi cua nandoto ñiyivi sa i sihi, ñu i sino iñi sii ra Cristo.

¹⁷Ta ziqui maa yo sa nandoo ta ndito yo, cua cuhun yo iin ñi sihin ñiyivi cuan sisi vico. Ta ityi ziqui cua ñihi tahan yo sihin ra Jesús, ra ndyaca ñaha sii yo. Tacuan ta cua coo yo sihin ra Jesús tandíhi cuii tyiemvu.

¹⁸Yucuan cuenda tyindyee ndo sii minoo ndo ta sii inga ndo sihin tuhun ya.

5 Zoco quivi cua tahan si cuan, a cuiya, ña cuñi si sa tyei ihya, yañi xaa.

²Vatyí zuun ñi maa ndo sa sito vaha xaan ndo vatyí quivi cua quisi tucu ra Jesús, cua cuu si minoo quivi zana ñi iñi yo. Tañi nu cua quisi minoo ra zuhu sa sa cuaa.

³Cua catyí ñiyivi: “Vaha xaan vityi. Iyo taxi, ta ñahñi cuatyí iyo”, cua catyí ñu. Ta ziqui yatyi xaan cua quisi minoo tundoho cahnu xaan ziqui ñiyivi tañi tundoho sa cacu zehe ñiyivi ta uhu xaan si. Tacuan tucu ma cuu ca quita ñiyivi sisi tundoho vatyí sa saa cuhva tahan si.

⁴Zoco ndoho, yañi xaa, ña yucu ca ndo nu ñaa sa vatyí cua saa quivi sa cua quisi tucu ra Jesús ta cua yuhu xaan ndo tañi zayuhu minoo ra zuhu sii ñiyivi vehe ñu.

⁵Tandíhi cuii ndo ta cuu ndo cuenda nu ndisi ta cuenda ora. Ña iyo ca yo cuenda sa cuaa ta cuenda nu ñaa.

⁶Yucuan cuenda ma cuzu yo tañi zavaha inga ñiyivi. Cutyacu yo ta coo vaha sa siñi tuñi sii yo.

⁷Vatyí ñiyivi quixi, quixi ñu sa cuaa. Ta ñu siñi, siñi ñu sa cuaa.

⁸Zoco maa yo cuu yo cuenda ora, ta cuñi si vatyí coo vaha sa siñi tuñi

xiñi yo. Cuñi si vatyi zacuenda yo sii yo sihin sa ñii iñi yo ta sihin cuhva cuñi yo sii inga ñiyivi tañi minoo zandaru zacacu ra sii ra sihin minoo caa sa cundyaa yiqui ndyica ra. Ta cuñi si vatyi sino iñi yo vatyi cua cacu yo tañi zacacu zandaru sii ra sihin minoo caa sa ñoho xiñi ra.

⁹Vatyi ñá casi ra Ndyoo sii yo vatyi cañi ra sii yo. I casi ra sii yo vatyi cacu yo sa cuenda ra Jesucristo, ra ndyaca ñaha sii yo.

¹⁰I sihi ra Jesús sa cuenda maa yo vatyi cundito yo iin ñi sihin ra a cuu si sa ndito ca yo a cuu si sa yaha sihi yo.

¹¹Yucuan cuenda tyindyee ndo sii tahan ndo sihin tuhun ya ta sihin cuhva sa sino iñi ndo tañi sa zavaha ndo vityi.

**Saha ra Pablo minoo
tuhun vaha sii yañi yo**

¹²Yañi xaa, zañiñi ndi sii ndo vatyi tyaa ndo yahvi sii ra zatyño cuenda Tuhun Ndyoo nu iyo ndo vatyi ndyizo ra tyiño ta saha ra tuhun vaha sii ndo sa cuenda ra Jesús.

¹³Cuñi si sa tyaa ndo yahvi sii ra ñihi xaan, ta cuñi ndo sii ra sa cuenda tyiño sa zavaha ra sihin ndo. Ta coo vaha ndo sihin tandihi inga yañi ndo nu iyo ndo. Ñahñi tizihí coo ndo.

¹⁴Ta vityi saha ndi tyiño sii ndo, yañi xaa, vatyi cuhva ndo tyiño sii ra yañi yo tatu ña cuñi ra zatyño. Tyindyee ndo sii ñu tatu yuhu xaan ñu, a tatu nducuihya xaan iñi ñu. Tyindyee ndo sii yañi yo sa cumañi ca sino vaha iñi. Ta vita cuu iñi ndo sihin tandihi ñiyivi.

¹⁵Zacuenda ndo sii ndo, ta ma zavaha ndo sa ña vaha sihin ñiyivi zavaha sa ña vaha sihin ndo. Tandihí

cuii tyiemvu zavaha ndo sa vaha sihin yañi yo ta sihin tandihi ñiyivi.

¹⁶Nacoo sa zii iñi ndo tandihi cuii cuhva.

¹⁷Cahan ndo sihin ra Ndyoo tañi tañi.

¹⁸Tandihi ñaa sa tahan ndo, zoco cuhva ndo tyahvi ndyoo sii ra Ndyoo vatyi tacuan cuñi ra Ndyoo sihin ndo sa sino iñi sii ra Cristo Jesús.

¹⁹Ñáha ndahva ndo Tatyí li ra Ndyoo.

²⁰Ñáha ma tyaa ndo yahvi sa cahan minoo ra cahan tuhun sa saha ra Ndyoo sii ra.

²¹Ndyeehe vaha xihna ndo tandihi tatu vaha si ta ziqui tiin cuenda vaha ndo sii si.

²²Ma zavaha ndo ñaa ndihi ca sa ña vaha.

²³Ta maa ra Ndyoo cuu ra saha sa coo taxi añima yo, ta sique sii ra nazanduvaha ra añima ndo vatyi iin ñi sii maa ra cua tyaa ndo yahvi. Ta nazacuenda ra añima ndo ta coño ñuhu ndo ta ma coo ca cuatyí ndo ndya quivi cua quisi tucu ra ndyaca ñaha sii yo, ra Jesucristo.

²⁴Maa ra i casi sii ndo, ta cuu cunii iñi yo sii ra vatyi cua zavaha ra tandihi cuii cuhva ya.

**Saha ra Pablo minoo sa nacumi
sii yañi yo nu ndihi i cahan ra**

²⁵Yañi xaa, caca tahvi ndo sii ra Ndyoo sa cuenda ndi.

²⁶Cuhva ndo minoo nacumi sii tandihi cuii yañi yo.

²⁷Sehi tyiño sii ndo sihin cuhva saha ra ndyaca ñaha sii yo sii, vatyi cahvi ndo tutu ya nuu tandihi cuii ñiyivi sino iñi.

²⁸Maa ra ndyaca ñaha sii yo, ra Jesucristo, cua cuhva xaan ra tumañi iñi sii ndo. Ta nacuu si tacuan.

Sa Cu Uu Carta I Tyaa Ra San Pablo Sii Ñiyivi Ñuu Tesalónica

Tyaa ra Pablo ta ra tahan ra minoo carta sii ñiyivi sino iñi Tuhun Ndyoo ñuu Tesalónica

1 Yuhvi ra Pablo ta ra Silvano ta ra Timoteo tyaa ndi carta ya sii ñiyivi sino iñi Tuhun Ndyoo ñuu Tesalónica. Sa ndu-iiñi ndo sihin ra Ndyoo Zutu yo ta sihin ra Jesucristo, ra ndyaca ñaha sii yo.

²Quihin cuenda ndo tandihi sa vaha saha ra Ndyoo sii ndo, ta natyindyee ra sii ndo vatyí coo sa taxi añima ndo. Ta tacuan tucu nazavaha ra Jesucristo, ra ndyaca ñaha sii yo, sihin ndo.

Cua tasi tuñi ra Ndyoo sii ñiyivi iyo cuatyí quivi cua quisi tucu ra Cristo

³Ndoho yañi xaa, cuñi si sa cuhva xaan ndi tyahvi ndyoo sii ra Ndyoo sa cuenda ndo vatyí sino xaan iñi ndo ta cuahan nduvaha ca cuhva sa sino iñi ndo ta cuhva cuñi xaan ndo sii minoo ndo ta inga ndo.

⁴Ndya cuhva cahan ndi tuhun ndo nuu inga ñiyivi sino iñi sii ra Ndyoo inga ñuu vatyí sino xaan iñi ndo ta cundyee xaan iñi ndo ndyehe ndo sa quiñi zavaha ñiyivi sihin ndo ta tundoho cahnu xaan sa cuenda Tuhun Ndyoo.

⁵Ta ihya cuhva zañaha si vatyí ndoo xaan cuu cuhva ndyaca ñaha ra Ndyoo vatyí sa cuenda tundoho sa tahan ndo ta cua zanduvaha ra cuhva iyo ndo, ta cua cuu quihvi ndo nu ndyaca ñaha ra.

⁶Ta ndoo xaan cuu cuhva zavaha maa ra Ndyoo vatyí cua zandyehé ra tundoho sii ñiyivi zandyehé tundoho sii maa ndo.

⁷Ta maa ndo, ra ndyehe tundoho vityí, cuee ca ta cua cuhva ra minoo nu cua quitatu ndo sihin maa ndi. Ta tacuan cua cuu si quivi cua quisi tucu ra Jesús, ra ndyaca ñaha, ndya gloria sihin ángel ra.

⁸Cua cayu ñúhu nu vasi ra, ta cua tasi tuñi ra sii ñiyivi sa ña sito sii ra Ndyoo ta ña tyaa ñu yahvi Tuhun Vaha sa cuenda ra ndyaca ñaha, ra Jesucristo, cuhva cacu yo.

⁹Ñiyivi cuan cua ndoho tandihi cuii tyiemvu, ta sica xaan cua nandoo ñu, ta ma cuu cundyaa ñu sihin ra Ndyoo. Ta ma ndyehe ñu cuhva iyo ra Ndyoo vatyí tyaqui xaan ra, ta ma ndyehe ñu cuhva ndyaca ñaha ra.

¹⁰Quivi cuan cua quisi ra ta cua zacahnu ñiyivi ra sii ra, ta iyo xaan cua cuñi ñiyivi sino iñi sii ra sihin

cuhva iyo ra. Tañi maa ndo, vatyí vityi sino iñi ndo sa ndaa sa saha maa ndi sii ndo.

¹¹Yucuan cuenda cahan xaan ndi sihin ra Ndyoo sa cuenda ndo, ta sica ndi sii ra vatyí nazanduvaha ra añima ndo ta cua cuu ndo cuhva cuñi maa ra. Ta sica ndi sii ra vatyí tyindyee ra sii ndo sihin tundyee iñi sii maa ra ta cua cacu vaha ñaa tyiño cuñi ndo zavaha ndo sa cuenda ra sihin sa nii iñi ndo.

¹²Tacuan ta cua nducahnu ca zivi ra ndyaca ñaha sii yo, ra Jesucristo, sa catyi sa vaha iyo ndo. Ta zuun ñi maa ra cua zacahnu sii ndo vatyí vaha xaan añima ra sihin ra Ndyoo Zutu yo.

Ra ña vaha

2 Ta vityi, yañi xaa, sa catyi vatyí quivi cua quisi tucu ra ndyaca ñaha sii yo, ra Jesucristo, ta cua ndu-iin yo sihin ra, sa cuenda cuan zañiñi ndi sii ndo

²vatyí ma zama ndo cuhva sica iñi ndo. Ta ma cuhva ndo sa zayuhu ñiyivi sii ndo tatu catyi ñu vatyí sa yaha quisi ra Cristo, vazu catyi ñu vatyí cahan ñu cuenda ra Ndyoo a tatu cahan xaan ñu ziqui tuhun cuan, a tatu catyi ñu vatyí maa ndi tasi carta vatyí sa i quisi tucu ra Jesús, zoco ña ndisa.

³Ma cuhva ndo sa zandavi ñaha ñiyivi sii ndo nu zuhva. Vatyí ma saa quivi sa cua quisi tucu ra Jesús tatu tañaha ca cua coo minoo tyiemvu sa cua cuxaan xaan ñiyivi sihin ra Ndyoo. Ta ziqui cua quisi ra iyo xaan cuatyí, ra sa cua naa cuee ca.

⁴Maa ra cuan cua nduvita, ta cua zativi ra tandihi ñaa sa cuu si

sa cuenda ra Ndyoo. Cua zativi ra tandihi ñaa sa zacahnu ñiyivi. Ta cua quihvi ra sisi vehe ñuhu ra Ndyoo, ta cua cundyaa ra ta catyi ra vatyí zuun ñi maa ra cuu Ndyoo.

⁵¿Atu ña nacohon iñi ndo vatyí quivi i sindyei sihin ndo, ta i nacatyí sihin ndo tandihi cuii tuhun ya?

⁶Ta vityi sa sito ndo ñaa sa cuu sa ña saha sa quisi ra cumañi ca tahan si quivi ra.

⁷Vityi xehe ñi cuahan tyiño ña vaha cuan, zoco iyo minoo ra sa ña saha sa cucahnu si ndya cua cuiñi siyo xihna ra.

⁸Ta tatu sa siñi siyo ra, tacuan ta ziqui cua coto ñiyivi yoo ra cuu ra ña vaha cuan. Ta maa ra Jesús, ra ndyaca ñaha sii yo, cua cahñi sii ra. Cua tiví ra Jesús tatyí ra sihin yuhu ra, ta cua cahñi ra sii ra. Cua zanaa ra sii ra sihin sa ndisi xaan ra quivi cua quisi ra.

⁹Ra ña vaha cuan cua quisi sa cuenda cuihna, ta tandihi cuhva iyo sii cuihna cua coo tucu sii maa ra. Cuaha xaan zeña cua zavaha ra, ta sihin sa ndyityi cua zandavi ñaha ra sii ñiyivi.

¹⁰Cua cutyiño ra tandihi cuii cuhva ña vaha. Ta sihin si cua zandavi ñaha ra sii ñiyivi, ñu cua cahun nu xaan. Maa ñu cuu ñu ña cuñi sino iñi sii sa ndisa ta cacu ñu.

¹¹Ta yucuan cuenda cua cuhva ra Ndyoo vatyí zandavi ñaha sa ña vaha sii ñu, ta cua sino iñi ñu sii sa ña ndisa

¹²vatyí tacuan ta cua ndoho xaan tandihi ñiyivi sa ña sino iñi sii sa ndisa, ñiyivi tahan xaan iñi zavaha ñu sa ña vaha.

**Sa cuenda ñiyivi i casi ra
Ndyoo vatyí cacu ñu**

¹³Zoco cuñi si sa cuhva xaan ndi tyahvi ndyoo sii ra Ndyoo tandihi cuii tyiemvu sa cuenda maa ndo, yañi xaa, vatyí cuñi xaan ra sii ndo, ta i casi ra sii ndo ndya quivi xihna ñi vatyí cua cacu ndo. Cua cacu ndo cuenda Tatyí Ii, ra zanduvaha cuhva iyo ndo, ta cuenda sa ndisa sa sino ñi ndo.

¹⁴Sihin tuhun cahan maa ndi sihin ndo ta i zacoto ra Ndyoo sii ndo vatyí sa i casi ra sii ndo ta saha ra cuhva cua cacu ndo ta cuhun ndo gloria ta ñihi ndo sa vaha nu ndyaa ra Jesucristo, ra ndyaca ñaha sii yo.

¹⁵Yucuan cuenda, yañi xaa, ma zama ndo cuhva sino ñi ndo. Ma naa ñi ndo cuhva zacuaha ndi sii ndo quivi i sindyaa ndi sihin ndo a cuhva i tyaa ndi nuu carta sa tasi ndi sii ndo nu yucu ndo.

¹⁶Ta zuun ñi maa ra ndyaca ñaha sii yo, ra Jesucristo, sihin maa ra Ndyoo Zutu yo cuñi xaan ra sii yo, ta tyindyee ra sii yo tandihi cuii tyiemvu, ta saha maa ra sa coo xaan sa vaha sii yo.

¹⁷Ta vityí nacuhva ra sa zii añaima ndo, ta natyindyee ra sii ndo, ta cua cuu cahan ndo ta zavaha ndo tandihi tyiño vaha cuhva cuñi maa ra.

**Cahan ndo sihin ra Ndyoo
sa cuenda ndi**

3 Ta minoo ñi ca tuhun catyí sihin ndo, yañi xaa, cahan ndo sihin ra Ndyoo sa cuenda ndi vatyí tacuan ta vatyí xaan cua saa

Tuhun Ndyoo nacahnu cuii ñi, ta cua tiin cuenda ñiyivi sii si minoo cuhva vaha tañi i tiin cuenda maa ndo sii si.

²Ta caca ndo sii ra Ndyoo vatyí zacacu ra sii ndi sihin ñiyivi ña vaha ta ñiyivi quiñi iyo vatyí ña tandihi ñiyivi sino ñi sii ra.

³Zoco maa ra ndyaca ñaha sii yo, ndoo xaan ra. Maa ra cua zaquihin ityí vaha ra sii ndo, ta cua zacuenda ra sii ndo sii ra ña vaha.

⁴Ta sino ñi sii ra ndyaca ñaha sii yo vatyí maa ndo sa zacuu ndo tandihi, ta ma zandoo ndo cuhva catyí ndi sihin ndo.

⁵Ta cuñi sa cua tyindyee ra ndyaca ñaha sii yo sii ndo, ta cua cutuñi ca ñi ndo cuhva cuñi ra Ndyoo sihin ndo, ta cua cuñi ca ndo sii ra. Ta cua tyindyee ra sii ndo, ta cua zandyee ndo ñi ndo cuhva ndyehe ndo tundoho tañi zandyee maa ra Cristo ñi ra nu i ndyehe ra tundoho.

Cuñi si sa zatyíño yo

⁶Ta vityí, yañi xaa, tava ndi tyiño sii ndo sihin zivi maa ra ndyaca ñaha, ra Jesucristo, vatyí tava ndo yoo ñi maa yañi yo ra ña cuñi zatyíño, ra ña cuñi zavaha cuhva i zañaha ndi sii ndo.

⁷Vatyí maa ndo sa sito ndo cuhva cuñi si coo ndo ta cua cundyico ndo cuhva i zañaha ndi sii ndo. Vatyí quivi sa sindyaa ndi sihin ndo, ñahñi cuhva sa ña zatyíño ndi.

⁸Ta ñá sasi caha ñi ndi vehe ñiyivi. Ña tacuan vatyí i zatyíño ndi. Ña cuñi ndi sa cozo ziqui numinoo ndo sii ndi, ta yucuan cuenda i zatyíño ndi ora ta sa cuaa.

⁹Vazu iyo kuhva sii ndi sa caca ndi sii ndo ñaa sa cuñi ndi, zoco i zatyño ndi vatyi cuñi ndi zañaha ndi minoo kuhva vaha cundyico ndo.

¹⁰Vatyi quivi sindyaa ndi sihin ndo i saha ndi tyiño ya sii ndo vatyi tatu iyo ra ña cuñi zatyño, ma casi ra.

¹¹Vatyi ñihi ndi tuhun vatyi iyo zuhva ndo ña cuñi ndo zatyño. Yucu ñi maa ndo, ta ñahñi maa tyiño zavaha ndo caña ñi.

¹²Ta sii ñiyivi zavaha kuhva cuan, saha ndi tyiño ta zañiñi ndi sii ñu sihin kuhva saha ra Jesucristo, ra ndyaca ñaha sii yo, vatyi nazatyño vaha ñu cuan ta ñihi ñu sa casi ñu.

¹³Ta maa ndo, yañi xaa, ma zaña ndo sa zavaha ndo sa vaha.

¹⁴Ta tatu iyo minoo ñiyivi sa ma tyaa yahvi tuhun cahan ndi nu carta ya, ndyehe vaha ndo ñaa ra

cuu ra ta ma tyisaha ca ndo sii ra. Tacuan ta cua cucahan nuu ra.

¹⁵Zoco ma cuxaan ndo sihin ra. Zacoto vaha ndo sii ra ñaa sa cuu cuatyi ra vatyi zuun ñi yañi yo sii ra.

Sica ra Pablo sii ra Ndyoo vatyi tyindyee ra sii ñiyivi cuan

¹⁶Ta natyindyee sa zuun ñi maa ra ndyaca ñaha sii yo sii ndo tandihi tyiemvu ta tandihi kuhva vatyi coo sa taxi añima ndo tañi sa iyo añima maa ra. Ta nacundyaa ra sihin tandihi cuii ndo.

¹⁷Yuhvi ra Pablo tyei minoo nacumi sii maa ndo. Sihin zuun ñi ndehi tyei tuhun ya. Tyehen caa firme. Ihya cuu kuhva tyei.

¹⁸Ta natyindyee xaan ra ndyaca ñaha, ra Jesucristo, sii tandihi cuii ndo. Ndihi si vityi.

Sa Xihna Ñi Carta I Tyaa Ra San Pablo Sii Ra Timoteo

Tyaa ra Pablo minoo carta sii ra Timoteo

1 Yuhvi ra Pablo minoo apóstol ra Jesucristo cui, cuhva i saha maa ra Ndyoo tyiño sii. Maa ra Ndyoo cuu ra zacacu sii yo. Ta maa ra Jesucristo cuu ra ndyaca ñaha sii yo. Sii maa ra ndatu yo.

²Tyei tutu ya suun Timoteo. Ndisa cuii vatyí zehe mi cuu suun sa catyí Tuhun Ndyoo. Nacuhva ra Ndyoo Zutu yo sihin ra ndyaca ñaha, ra Jesucristo, cuaha xaan sa vaha suun; nacundahvi iñi ra suun, ta nacuhva ra sa coo sa taxi añimon.

Zacuenda ndo sii ndo sihin ñiyivi zacuaha sa ña ndisa

³Zuun ñi cuhva catyí suhun vityí tañi sa catyí quivi i quite ñuu cuan sa cua cuhín ndya nu cu si Macedonia, ndoon ñuu Efeso vatyí cua nacatyun sihin ñiyivi vatyí ma zacuaha ñu sa ña ndisa.

⁴Ta ma tyizoho ñu tuhun cahan ñiyivi sahnu a cuhva tyaa xaan ñiyivi yahvi tatu cuñi ñu coto ñu yoo cuu tandihi ñiyivi sahnu sii ñu. Ihya tuhun zacahñi tahan si sii ñiyivi, ta ñahñi tyindyee si sa

zacuu yo tyiño sa saha ra Ndyoo sii yo vatyí sihin sa sino ñi iñi yo ta cacu añima yo.

⁵Ta sisi tandihi tuhun i saha ra Ndyoo sii yo sa ñiñi ca cuu sa cuñi yo sii ñiyivi sihin sa ndii vaha añima yo ta sihin minoo sa siñi tuñi vaha. Ta cuñi si vatyí sino vaha iñi yo Tuhun Ndyoo, ta tacuan ta cua cuñi vaha yo sii ñu.

⁶Iyo zuhva ñiyivi sa i zaña ñu tuhun ya. Nazaca ñu inga tuhun sihin si, ta natuhun xaan ñu tuhun ña ñiñi.

⁷Cuñi ñu cuu ñu maestro cuenda ley sahnu, zoco nu maa ñu ta ña cutuñi iñi ñu sa nacatyí ñu. Ta zuun ñi maa ñu ta ña cutuñi iñi ñu sa zacuaha ñu.

⁸Sito yo vatyí vaha xaan cuu ley maa ra Ndyoo, zoco cuñi si sa cutyíño yo sii si minoo cuhva vaha, cuhva catyí si.

⁹Cuñi si coto yo vatyí ñahñi ley Ndyoo sa cua cuxaan sii yo tatu zavaha yo sa vaha. Iyo si vatyí tasi tuñi si sii ñiyivi ña vaha, sa cuenda ñiyivi ña tyaa yahvi sii ra Ndyoo ta ña cuñi ñu sii ra. Iyo si sa cuenda ñiyivi iyo cuatyí, ñiyivi sa cahan ndya vaha ñi, cuenda ñiyivi sahñi

sii zutu ñu a sii zihí ñu a sii inga ñiyívi.

¹⁰Iyo ley ra Ndyoo sa cuenda ra iyo sihin inga ñaha sa yívi ñazihí ra cuu a ra iyo sihin inga ra ta sa cuenda ra zuhu ñiyívi, ra vatya, ra catyi “sito vaha Ndyoo” ta ña ndisa ra. Sa cuenda tandíhi cuhva cuan iyo ley maa ra Ndyoo a ñaa inga cuhva zavaha ñiyívi ta ña vaha si.

¹¹Ta tandíhi tuhun sa quehin sihin ndo ihya, sasi tahan si sihin tuhun vaha xaan sa cuenda ra Cristo, cuhva cacu yo. Maa ra Ndyoo saha tyiño sii, sa nacatyí sii si, ta cahnu xaan cuu maa ra.

Saha ra tyahvi ndyoo sii ra Ndyoo vatyi cundahvi iñi ra Ndyoo sii ra

¹²Sehi tyahvi ndyoo sii ra Jesucristo ra ndyaca ñaha sii yo vatyi sito maa ra vatyi cuu zavehi tyiño ra, ta saha ra tyiño ya sii, ta saha ra tundyee iñi sii, ta cuu zavehi sii si.

¹³Tacuan i zavaha ra vazú nu quisi quívi i cui minoo ra cahan xaan ndya vaha ñi sii ra. I zayuhu xein sii ñiyívi sino iñi sii ra, ta i quehin ndya vaha ñi sii ñu. Zoco i cundahvi iñi ra Ndyoo sii vatyi quívi i zavehi cuhva cuan tañaha ca sino iñi sii ra, ta ñá site vatyi yívi cuhva vaha cuu cuhva zavehi.

¹⁴Ta i tyindyee xaan ra ndyaca ñaha sii yo sii, ta yucuan cuenda sino xaan iñi sii ra, ta cuñi xein sii inga ñiyívi tañi cuñi maa ra Jesucristo sii ñu.

¹⁵Cuñi si vatyi tandíhi cuii yo cua sino iñi yo vatyi i quisi ra Cristo Jesús ñuu ñiyívi vatyi cua zacacu ra sii ñiyívi iyo cuatyí tañi mi. Cuaha

ca cuatyí i zavehi ta ziqui inga ñiyívi iyo cuatyí.

¹⁶Ta yucuan cuenda i cundahvi iñi ra Ndyoo sii, vatyi cua cuu si sa xihna ñi nu zañaha ra Jesucristo vatyi ndyee xaan iñi ra sihin ñiyívi iyo cuatyí. Zañaha si cuhva sii ñu ta cua sino iñi ñu sii maa ra, ta tacuan ta ma cuu ca ñu.

¹⁷Ta yucuan cuenda zacahnu xaan yo sii ra Ndyoo ta saha xaan yo tyahvi ndyoo sii ra tandíhi cuii tyiemvu vatyi ra ndyaca ñaha cuu ra tandíhi cuii tyiemvu, ta ma cuu ra ndaha cuii ñi. Ma cuu ndyehe yo sii ra vityí. Minoo ñi ra cuu Ndyoo, ta casi xaan iñi ra. Ta tacuan cuu si.

¹⁸Yoho Timoteo zehi, sa nacohon iñun cuhva i catyi ra yañi yo suhun quívi i cahan ra cuenda maa ra Ndyoo. Yucuan cuenda catyi suhun inga saha vatyi zatyiño vohon tyiño maa ra Ndyoo.

¹⁹Ma zañon cuhva sa sino xaan iñun. Ta tandíhi sa zavohon, zavohon sii si sihin minoo sa siñi tuñi vaha. Vatyi iyo zuhva ñiyívi ña tyaa ñu yahvi sa catyi sa siñi tuñi vaha ñu, ta naa iñi ñu sii Ndyoo.

²⁰Tacuan iyo ra Himeneo ta ra Alejandro. Yucuan cuenda i nacuhve sii ra sii cuihna zuhva quívi vatyi ndoho ra ta cutuhva ra ta ma cahan ra ndya vaha ñi sii ra Ndyoo.

Cuhva tahan si cahan yo sihin ra Ndyoo

2 Sa xihna ñi sehi tyiño vatyi cahan ndo sihin ra Ndyoo sa cuenda tandíhi ñiyívi. Caca ndo tumañi iñi sii ra, ta nacuhva ndo tyahvi ndyoo sii ra cuenda tandíhi cuii ñu.

²Caca ndo sii ra sa cuenda ra ndyaca ñaha ta tandihî cuii ra cu tyiño. Caca ndo vatyî coo xaan sa vaha sii yo ta ma coo cuatyî ñuu ñiyivî. Tacuan ta cua cuu tyaa yo yahvi sii ra Ndyoo tandihî cuii cuhva ta zavaha yo tandihî cuii sa vaha.

³Vatyî ihya cuu cuhva vaha sa tahan iñi maa ra Ndyoo, ta maa ra cuu ra zacacu sii yo.

⁴Cuñi maa ra vatyî cacu tandihî cuii ñiyivî ta coto ñu ñaa sa cuu sa ndisa.

⁵Vatyî minoo ñi ra Ndyoo iyo, ta minoo ñi ra cua cahan sa cuenda yo nuu ra Ndyoo Zutu yo, ra Jesucristo. Ta ñiyivî cuu tucu maa ra tañi maa yo.

⁶I saha maa ra Jesús sa cuu ra, ta cuhva cuan i tyiyahvi ra vatyî cuu cacu tandihî ñiyivî. Ta i quita tuhun cuan nu tahan si coto ñiyivî.

⁷Ta sa cuenda ya i saha ra Ndyoo tyiño sii, vatyî zacote sii ñiyivî tuhun ra ta cui minoo ra apóstol ta zacuehi sa ndisa sii ñiyivî sa yivî ñiyivî hebreo cuu. Cua zacuehi sii ñu cuhva sino iñi ñu. Tañi minoo ra sino vaha iñi sii ra Cristo quehin sa ndisa. Ña quehin cuendu.

⁸Yucuan cuenda cuñi vatyî nacahnu cuii ñi nacahan rayii sihin ra Ndyoo. Nazandaa ra ndaha ra. Ta ndihî vaha coo añima ra. Ta ma cuxaan ra a cahñi tahan ra.

⁹Ta tacuan tucu ñuzihî. Ta ma ndihvi ñu zahma cuitî xaan zoco minoo cuhva vaha ta sa ña yahvi xaan. Ta ma zandutyaquí xaan ñu sii ñu sihin cuaha xaan cuhva zavaha ñu sihin ixi xiñi ñu a sihin xuhun cuaan a perla a zahma yahvi xaan.

¹⁰Zoco nazavaha ñu tandihî nuu sa vaha tañi tahan si zavaha minoo ñiyivî tatu sito ñu sii ra Ndyoo sa ndisa.

¹¹Cuñi si vatyî taxi ñi tyizoho ñuzihî Tuhun Ndyoo nu zacuaha ñiyivî sii si ta tyaa ñu yahvi tandihî sa siñi ñu.

¹²Ña sehi sa zacuaha ñuzihî Tuhun Ndyoo (nuu cuaha ñiyivî) a sa cundyaca ñaha ñu sii rayii vatyî cuñi si sa coo taxi ñu.

¹³Vatyî sa xihna ñi i zavaha ra Ndyoo sii ra Adán ta ziqui cu Eva.

¹⁴Ta yivî sii ra Adán i zandavi ñaha cuihna. Sii ñaha cuan i zandavi ñaha ra, ta tacuan i quisaha sicoo cuatyî.

¹⁵Zoco cua cacu añima ñuzihî tatu zavaha ñu tandihî cuhva zavaha ñiyivî cuu zihî sa ndyihî ta tatu sino vaha iñi ñu ta cuñi ñu sii ra Ndyoo sa ndisa ta zavaha ñu tandihî cuii cuhva vaha ta coo minoo sa siñi tuñi vaha sii ñu.

Cuhva cuñi si coo minoo ra tatu ndyizo ra tyiño ra Ndyoo

3 Ndisa cuii tuhun ya vatyî tatu cuñi minoo ra cuizo ra tyiño nu iyo ñiyivî sino iñi Tuhun Ndyoo, vaha xaan cuu tyiño ya tatu cuñi ra cuizo ra sii si.

²Yucuan cuenda, tatu cuñi ra cuizo ra tyiño sa cundyaca ñaha ra sii ñiyivî sino iñi, cuñi si vatyî coo ra minoo cuhva vaha xaan ta yoñi cuu tyaa cuatyî sata ra. Cuñi si vatyî minoo ñi ñazihî ra coo, ta ma coo uu tahan. Cuñi si vatyî ñihî zatyiño ra sa ndisa ta coo vaha xaan sa siñi tuñi ra ta cuu ra minoo ra tyaa ñiyivî yahvi sii. Cuñi si

vatyí cuhva ra xita casi ñiyivi saa vehe ra. Cuñi si vatyí zacuaha vaha ra sii ñiyivi.

³Ma cuu ra ra siñi a ra nanducu tizihí. Ta ma cuñi ra zahacanaa ra xuhun sihin minoo cuhva ña vaha. Cuñi si vatyí coo xaan tundyee iñi sii ra sihin ñiyivi, ta ma cahñi tahan ra sihin ñu, ta ma cuu caca xaan iñi ra tuhun xuhun.

⁴Cuñi si cuu ra minoo ra cundyaca ñaha vaha vehe ra, ta nacoto zehe ra tyaa si yahvi tandihí saha.

⁵Vatyí tatu ña sito minoo ra cundyaca ñaha ra vehe ra ýozo caa cuu cundyaca ñaha ra sii ñiyivi sino iñi? Ma cuu.

⁶Ra sa cuñi cuizo tyiño cuan, ma cuu cuu minoo ra saa, coto zacahnu xaan ra sii ra, ta cua tasi tuñi ra Ndyoo sii ra tañi i tasi tuñi ra sii cuihna.

⁷Ta ra sa cua cuizo tyiño, cuñi si minoo ra vaha ñiyivi cuu nuu ñiyivi ña sino iñi coto quisaha tyaa ñu cuatyí sata ra ta canacava tucu ra inga saha sisi xayu cuihna.

Cuhva cuñi si coo minoo ra tyindyee sii ñiyivi sino iñi

⁸Ta tacuan tucu sihin ra cuñi tyindyee sii ñiyivi sino iñi, cuñi si vatyí cuu ra minoo ra vaha xaan. Ta cuu ra minoo ra ndoo xaan cahan ta zavaha ra cuhva catyí ra. Ma cuu coho xaan ra ndixi a cuñi ra zahacanaa ra xuhun sihin minoo cuhva ña vaha.

⁹Cuñi si vatyí quihin vaha xaan ra tuhun ndisa, cuhva sino iñi yo. Ta minoo ñi cuhva ndoo vaha coo sa siñi tuñi xiñi ra.

¹⁰Cua ndyehe xihna ñiyivi tatu tacuan iyo ra, ta tatu ña quiñi iyo ra, tacuan ta cuu cuizo tyiño ra.

¹¹Ta tacuan tucu ñazihí ra, cuñi si vatyí cuu ñu ñiyivi vaha xaan. Ta ma cahan ñu ndya vaha ñi sii ñiyivi. Cuñi si vatyí coo taxi xaan ñu ta zavaha ñu sa vaha tandihí cuii tyiemvu.

¹²Ta ra ndyizo tyiño ya, nacoo minoo ñi ñazihí ra. Ta cuñi si vatyí cundyaca ñaha vaha ra sii zehe ra ta tacuan tucu tandihí tyiño vehe ra.

¹³Vatyí ra ndyizo tyiño ya tatu zatyíño vaha ra cua ñihi ñiyivi cuhva tyaa xaan ñu yahvi sii ra. Ta ma yuhu ca ra cahan ra sihin ñiyivi cuhva sino iñi ra sii ra Cristo Jesús.

Minoo tuhun sa tyindyee xaan sii yo ta cuu cundyico yo Tuhun Ndyoo

¹⁴Zacote zuhva tuhun ya suun, ta cuñi cuhin cundyehi suun,

¹⁵zoco tatu nducuei sa siton yozo caa cuñi si zavohon. Vatyí maa yo cuu vehe ñuhu ra Ndyoo ndito. Ta cuñi si vatyí ñihi xaan sino iñi yo sii sa ndisa ta zacuaha yo sii si sii ñiyivi.

¹⁶Ndisa cuii vatyí iyo minoo sa vaha xaan sa sino iñi yo:

I quisi ra Ndyoo ñuu ñiyivi, ta caa ra cuhva caa maa yo.

I catyí Tatyí li vatyí ñahñi cuatyí ra.

I ndyehe ángel sii ra.

Nacahnu ñuu ñiyivi i nacatyí ñiyivi cuhva i zavaha ra.

Ta sino iñi ñiyivi nacahnu ñuu ñiyivi.

Ta ziquí cuahan ra ndya gloria nu zacahnu ñu sii ra tandihí tyiemvu.

Ñiyivi sa cua zaña cuhva sino iñi ñu

4 Ta casi xaan catyi Tatyí li vatyi nu sa cuñi ndihi tyiemvu cua coo ñiyivi sa cua zaña cuhva sa sino iñi ñu. Cua sino iñi ñu sii tatyí ña vaha sa zandavi ñaha. Ta cua cundyico ñu tuhun zacuahá cuihna.

2Ma cucahan nuu ñu cahan ñu sa vatya. Ñahñi ca sa siñi tuñi vaha xiñi ñu. Zavaha xaan ñu sa ña vaha ndya cuhva ña tuu ca iñi ñu vatyi ña vaha si.

3Ihya ñiyivi catyi vatyi cuatyí cuu si tatu tindaha ñiyivi, ta cuatyí cuu si sa casi yo zuhva nuu ndyayu, catyi tucu ñu. Zoco maa ra Ndyoo i zavaha tandihi, ta ñiyivi sa sino iñi ta sito ñu sa ndisa, cuu casi ñu ñaa ñi maa ndyayu ta nacuhva ñu tyahvi ndyoo sii ra Ndyoo.

4I zavaha ra Ndyoo tandihi nuu quiti, ta vaha ti. Ta ña vaha sa ma casi yo sii ti tatu sa nacuhva yo tyahvi ndyoo sii ra Ndyoo ta casi yo.

5Vatyi ndu-ii si sa cuenda Tuhun Ndyoo ta sa cuenda sa nacuhva yo tyahvi ndyoo sii ra.

**Cuhva iyo minoo muzu
vaha ra Jesucristo**

6Tatu nacatyí moo tuhun ya sihin ra yañi yo, minoo ra zatyíño vaha sa cuenda ra Jesucristo cua cuun. Vaha xaan cua cuu cuhva sino iñun ta cuhva ndyicon.

7Zoco ñáha tyoon yahvi cuendu sa nacatyí ñiyivi ñuu ñiyivi ya, costumbre sa zacuahá ñiyivi sahnu. Nducun cuhva zavohon cuhva cuñi ra Ndyoo tandihi tyiemvu.

8Tyindyee si zuhva sii coño ñuhu yo sa cuziqui yo, zoco sa zavaha

yo cuhva cuñi ra Ndyoo, yucuan tyindyee sii yo tandihi cui cuhva. Vatyi tyindyee si sii yo ihya ñuu ñiyivi, ta cua tyindyee tucu si sii yo nu cua cundito yo sihin ra.

9Ndisa cuii cuu cuhva ya, ta cuñi si sa sino iñi tandihi ñiyivi.

10Ta sa catyi ya zatyíño ndi ta ndyehe ndi tundoho vatyi ndatu ndi sii ra Ndyoo ndito. Tyindyee ra sii tandihi ñiyivi ta ñihi ca sii ñiyivi sino iñi vatyi cua zacacu ra sii yo.

11Ihya tuhun zacuothon, ta zañiñun sii ñiyivi vatyi cutuhva ñu.

12Ndisa minoo ra yoco cuun, zoco zañohon minoo cuhva vaha sii ñiyivi sino iñi sihin cuhva zavohon, sihin tuhun cohon, sihin cuhva cuñun sii ñiyivi, sihin cuhva sino iñun ta sihin cuhva sa ñahñi maa sa ña vaha zavohon.

13Ñi ñi sa cumañi sei nu yucu ndo, nducun cuhva cahvun Tuhun Ndyoo nuu ñiyivi. Zacuothon sii ñu, ta nacatyun sihin ñu yozo caa cua cuu ñu ñiyivi vaha.

14Ra ndyizo tyiño cuenda tandihi ra yañi yo i tyizo ra ndaha ra xiñun quivi cuan, ta i saha ra Ndyoo minoo cuhva suun vatyi zatyíñon tyiño ra. Coto ñáha naa iñun cuhva cuan, ta zatyíñon tyiño ra Ndyoo cuhva i catyi ra cuan.

15Tyaa xoon yahvi sii tandihi tuhun ya vatyi cua ndyehe tandihi ñiyivi vatyi vaha xaan i cutuhvon.

16Zacuendon suun sihin cuhva ndyicuun ta cuhva zacuothon, ta ñáha zañon sa vaha. Tatu tacuan zavohon, cua cacun, ta cua cacu ñiyivi tyizoho sa cohon.

Ihya cuu cuhva zavohon sihin
ñiyivi sino iñi Tuhun Ndyoo

5 Ma cuxoon ta cohon sihin minoo hermano sahnu. Cuñi si vatyí cuhvon tuhun sii ra tañi sa zutun sii ra. Ta cahan vohon sihin ra yoco tañi sa yañun sii ra.

²Cahan vohon sihin ñuzihí sahnu tañi sa zihun sii ñu. Ta sihin ñu yoco tañi sa cuhvon sii ñu. Ta ma zavohon sa ña vaha sihin ñu.

³Tyindyeeun sii ñu ndahvi sa sihi yíi tatu ndisa vatyí cumañi sii sii ñu.

⁴Zoco tatu iyo zehe minoo ña ndahvi a zehe ñañi ña, cuñi si sa cutuhva xihna maa ra sa tyindyee ra sii ña. Nanacohon iñi zehe ña cuhva i tyindyee xaan zutu ra ta zihí ra sii ra ta luhlu ra. Ta yucuan cuenda cuñi si vatyí natyindyee ñiyivi sii zutu ñu a sii zihí ñu. Vatyí ihya cuu sa vaha, ta tacuan ta zii cua cuñi ra Ndyoo.

⁵Iyo ñuzihí sa ndoo ndahvi sa ndisa cuii sa maa ñi maa ñu. Yucuan cuu ñu ndatu sa vaha iin ñi sii maa ra Ndyoo, ta ña zaña ñu sa cahan ñu sihin ra ora ta sa cuaa.

⁶Zoco ñu ndahvi sa cuzihí iñi cuhva cuñi maa ñu, tañi sa sihi ñu nuu Tuhun Ndyoo cuu si ñii ñi sa ndito ñu.

⁷Tacuan cuhvon tyiño sii tandihí yañi yo ta cuhva yo vatyí coto ñu ta zavaha ñu sa vaha.

⁸Zoco tatu iyo ra yañi yo ña tyindyee ra sii ñiyivi sii ra, ta nu ñiyivi vehe ra ta ña saha ra sa casi ñu, minoo ra ña sino ca iñi cuu ra. Cahnu ca ra ña vaha nduu ra ta ziquí ñiyivi ta sino ca iñi.

⁹Nacoo minoo tutu sihin ziví ñu ndahvi sa yaha uñi xico cuiya, ñu i sicoo minoo ñi yíi.

¹⁰Cuñi si sa coto ñiyivi sii ña saha sa catyí sa vaha sa zavaha ña, tatu zacuahnu vaha ña sii zehe ña ta tyaa nuu vaha ña sii ñiyivi saa vehe ña. Tatu saha vaha ña sa casi yañi yo, ra saa vehe ña. Tatu tyindyee ña sii ñiyivi ndyehe tundoho, ta tatu zavaha ña tandihí nuu sa vaha.

¹¹Zoco ma tyihí ndo ziví ñu ndahvi ñu tañaha ca cusahnu vaha vatyí cua cuñi ñu tindaha ñu inga saha, ta cua zaña ñu tyiño zavaha ñu sa cuenda ra Cristo.

¹²Ta cua coo cuatyí ñu vatyí zaña ñu cuhva i catyí ñu sa cua zavaha ñu.

¹³Ta inga tucu cuhva, tatu tañaha ca cusahnu vaha ñu ndahvi, cua nduzusa ñu ta cua caca noo ñu tahan tahan vehe. Ta ña tacuan ñi, zoco cua quisaha cahan ñu cuendu. Cua natuhun xaan ñu ziquí tyiño inga ñiyivi ta ziquí tuhun ña tahan si cahan ñu.

¹⁴Yucuan cuenda cuñi vatyí ñu ndahvi ña sahnu xaan, natindaha tucu ñu. Nacoo zehe ñu. Nazacuenda ñu vehe ñu, ta ma cuhva ñu cuhva cahan xaan ñiyivi xaan iñi sii yo.

¹⁵Vatyí iyo ñu ndahvi sa quita ñu ityí ra Ndyoo, ta nanduu nandyico ñu sii cuihna.

¹⁶Tatu iyo ra yañi yo a cuhva yo ta iyo ñiyivi ndahvi tahan ñu, natyindyee maa ñu sii ñu, ta ma cuhva ñu sa ñihí xaan tyindyee inga yañi yo. Ta ziquí cuu tyindyee tandihí yañi yo sii ñiyivi sa yoñi ca ñiyivi sii, iyo sa ndisa.

¹⁷Ta ra sahnu zatyíño tyiño ra Ndyoo, ra ndyaca ñaha vaha sii tandihí ra yañi yo, cuñi si vatyí

tyaa xaan yo yahvi sii ra, ta ñihi ca tatu nacatyí ra ta zacuahá ra Tuhun Ndyoo.

¹⁸Vatyí catyí Tuhun Ndyoo: “Ma cuhñi ndo yuhu zindiquí nu sañi ti siti yutu sa quita zoo si.” Ta tacuan tucu: “Ra zatyíño tyíño ra Ndyoo cuñi si vatyí coo yahvi ra vatyí yucuan cundito ra.”

¹⁹Tatu yoñi uu a uñi tahan sa ndaa ma tyizohon tatu tyaa ñiyívi cuatyí sata minoo ra sahnu zatyíño tyíño ra Ndyoo.

²⁰Zoco ñiyívi sa ña zaña cuatyí, ñihi cohon sihin ñu nu yucu tandíhi yañi yo vatyí tacuan ta cua cuyuhu tandíhi ñu ta ma zavaha ñu sa ña vaha.

²¹Sehi tyíño ya suun ityí nuu ra Ndyoo ta nuu ra ndyaca ñaha sii yo, ra Jesucristo, sihin tandíhi ángel ra, ta catyí suhun vatyí zavohon tandíhi cuhva ya inuu ñi sihin tandíhi ra yañi yo. Ta tatu cuñi con sii minoo ra, zoco ma cuhvon sa zavaha ra sa ña vaha.

²²Ma numi xaan cuhvon tyíño sii minoo ra sa cuu ra ra cuizo tyíño nu iyo ra yañi yo coto coo cuatyun tatu zavaha ra sa ña vaha. Ta ñahñi maa sa ña vaha zavohon caña ñi.

²³Tuhva xoon huhu sihin sisun, yucuan cuenda ma cohon maa ndutya ñi. Coho tucun huhva vino.

²⁴Iyo ñiyívi casi xaan naha cuatyí ñu vazu cumañi ca huhun ñu nu cua ndoho ñu. Ta iyo tucu inga ñiyívi ña sito yo ñaa sa cuu cuatyí ñu ndya cuee ca ta cua quituu si.

²⁵Ta zuun ñi cuhva cuan, casi xaan naha si tatu zavaha ñiyívi sa vaha. Ta vazu iyo si sa ña ndyehe yo, zoco ma cuu coo xehe si tandíhi tyiemvu.

6 Ra cuu muzu, cuñi si sa tyaa xaan ra yahvi sii patrón ra. Tacuan ta ma cahan ñiyívi ndya vaha ñi sii ra Ndyoo ta sii Tuhun ra.

²Ta tatu sino iñi patrón ra Tuhun Ndyoo, ña cuñi si sa ma tyaa ra yahvi sii ra vatyí yañi yo cuu sii ra. Ña tacuan. Ñihi ca cuñi si tyindyee ra sii ra sihin sa vaha ca vatyí zuun ñi ra sino iñi cuu ra. Ta nacuñi ra sii patrón ra vatyí yañi yo cuu sii ra. Nacatyun tuhun ya, ta zañiñun sii ñiyívi vatyí zavaha ñu sii si.

Tuhun sa saha sa cuzii iñi yo

³Tatu iyo minoo ra zacuahá minoo cuhva ña ndisa ta ña sasi tahan si sihin cuhva cahan ra Jesucristo, ra ndyaca ñaha sii yo, ta sihin cuhva zacuahá maa yo,

⁴zacahnu xaan ra cuan zuun ñi sii maa ra, ta ñahñi maa sa sito ra. Zoco tahan xaan iñi ra natuhun xaan ra, ta sahñi tahan xaan ra ziqui minoo tuhun ta inga tuhun. Ta sa cuenda cuhva ya vasi sa cuñi xaan ñiyívi cundyaca ñaha ñu sii yañi yo. Ta nduu si tizíhi, ta cahan ñiyívi ndya vaha ñi, ta ña cutuñi iñi ñiyívi yoo cuu yañi yo cahan sa ndoo.

⁵Ta ña ndíhi tuhun sahñi tahan ñu vatyí ñahñi sa vaha iyo xiñi ñu. Ta ña sito ñu ñaa sa cuu sa ndisa. Sica iñi ñu vatyí minoo cuhva vaha xaan cuu sa zahacanaa yo xuhun sihin Tuhun Ndyoo.

⁶Ndisa vatyí sa ñihi yo minoo sa vaha xaan tatu zavaha yo tandíhi sa catyí ra Ndyoo ta tatu ñahñi ca sa ndyíyo iñi yo.

⁷Ñahñi sa ndaha yo sa saa yo ñuu ñiyívi ya, ta nu siin ta ma cuu cuizo yo huhun yo.

⁸Zoco tatu iyo sa casi yo ta zahma yo, sihin ñi si cuan nandoo yo vaha.

⁹Ta ñiyivi sa cuñi xaan sa cucuca ñu, nducu coto cuihna sii ñu ta canacava ñu sisi cuaty. Vaty cuaha xaan sa cuñi ñu, ta ña ñiñi, ta zativi si sii ñu. Ta cua ndoyo ñuhu ñu sa cuenda ndaha tyiño ñu ta cua naa ñu.

¹⁰Vaty tatu cuñi xaan yo xuhun, cuaha xaan sa ña vaha ndyicuu yo. Ta iyo ñiyivi quisaha ndyio iñi ñu xuhun, ta zandoo ñu sa sino iñi ñu Tuhun Ndyoo, ta cuaha xaan tundoho ndyehe ñu.

**Cuhva zatyño yo tatu sino
iñi yo sii ra Ndyoo**

¹¹Zoco yoho Timoteo, sii ra Ndyoo cuu suun. Zandoon tandihi cuii sa ña vaha. Cuñi si vaty cundyicon minoo cuhva vaha xaan, cuhva cuñi maa ra Ndyoo. Ta sino xaan iñun. Cuñi xoon sii inga ra yañi yo ta cundye xaan iñun. Ta vii ñi cohon sihin ra.

¹²Ñihi zatyño ra Ndyoo. Ta ma zañon cuhva cundito añimon tandihi tyiemvu vaty yucuan cuenda i casi ra Ndyoo suun vaty cunditon sihin ra. Sa i zavohon minoo cuhva vaha xaan vaty i nacatyun cuhva sino iñun nuu cuaha xaan ñiyivi.

¹³Ta vityi ndyehe ra Ndyoo. Maa ra saha sa cundito tandihi sa ndito. Ta ndyehe tucu ra Jesucristo cuhva sehi tyiño ya suun. Ta maa ra, vaha xaan i zavaha ra, ta i saha ra sa ndaa nuu ra Poncio Pilato.

¹⁴Ta catyi suhun vaty tyoon yahvi tuhun ya, ta ma zamon

numinoo cuhva sihin si ndya quivi quisi tucu ra Jesucristo, ra ndyaca ñaha sii yo. Tacuan ta ma ñihi ñiyivi cuhva catyi ñu vaty ña vaha tuhun cahan maa ra Ndyoo.

¹⁵Tatu tahan si quivi, cua zandyehe tucu ra Ndyoo sii ñiyivi sii ra Jesús inga saha. Ta minoo ñi ra Ndyoo cuu ra ndyaca ñaha. Cahnu xaan ra, ta cuu xaan sa zacuu ra. Rey cuu ra sii tandihi inga rey ta ra ndyaca ñaha sii tandihi inga ra ndyaca ñaha.

¹⁶Maa ñi maa ra Ndyoo cuu ra ña sihi. Iyo ra nu ndisi xaan, nu yoñi sa cuu tuhva. Ta yoñi ca ndyehe sii ra, ta ma cuu ndyehe yo sii ra vityi. Nazacahnu ñiyivi sii ra, ta nacundyaca ñaha ra tandihi cuii tyiemvu. Ta tacuan cuu si.

¹⁷Cuhvon tyiño sii ñiyivi cuca xaan ihya ñuu ñiyivi vaty ma zacahnu xaan ñu sii ñu ta ma ñii xaan cuu iñi ñu sihin xuhun ñu coto coo quivi ta ndihi si. Vaha ca cua sino iñi ñu iñ ñi sii ra Ndyoo ndito vaty maa ra cuu ra saha tandihi. Ta sihin sa saha maa ra, ta cua cuzii iñi yo.

¹⁸Ta catyun sihin ñiyivi cuca vaty nazavaha ñu maa ñi sa vaha. Nanducuca ñu ityi nuu ra Ndyoo sihin cuhva zavaha ñu sa vaha. Nandoo ñu vaha cuhva ñu sa sii ñu sii inga ñiyivi, ta nazasa ñu sii si.

¹⁹Tacuan ta cua coo sa cuca ñu ndya gloria, ta ma cunaa si. Ta cua cundito ñu sihin ra Ndyoo.

**Saha ra minoo ca tyiño
sii ra Timoteo**

²⁰Yoho Timoteo, zacuenda vohon tyiño sa i saha ra Ndyoo suun. Ma

tyizohon sa cahan ñiyivi ndya vaha ñi ta tuhun cahan ñiyivi ña sito. Cahan xaan ñu sa ña vaha ta sa ña ndisa, ta catyi ñu vatyi sito xaan ñu.

²¹Vaty iyo ñiyivi sa i quita ñu ityi vaha. Ta ña sino vaha ca iñi ñu Tuhun Ndyoo. Ña sino vaha ca iñi ñu cuhva iyo si sa ndisa. Natyindyee xaan maa ra Ndyoo suun. Ndihi si vityi.

Sa Cu Uu Carta I Tyaa Ra San Pablo Sii Ra Timoteo

**Sa cu uu carta i tyaa ra
Pablo sii ra Timoteo**

1 Yuhvi ra Pablo cui minoo apóstol ra Jesucristo, cuhva cuñi maa ra Ndyoo. Vasi nacaty sihin ñiyivi cuhva cacu ñu tatu ndu-iiñ ñu sihin ra Jesucristo.

²Tyei carta ya suun, Timoteo. Cuñi xein suun; tañi minoo zehi cuu suun. Cuñi sa cua cuhva xaan ra Ndyoo Zutu yo sa vaha suun. Ta cua cundahvi iñi ra suun. Ta cua cuhva ra sa coo sa taxi añimon. Ta tacuan cua zavaha tucu ra Jesucristo, ra ndyaca ñaha sii yo, suhun.

**Nanacaty maa ra Timoteo vaty
cuenda ra Cristo cuu sii ra**

³Ora ta sa cuua sehi tyahvi ndyoo sii ra Ndyoo cuhva quehin sihin ra cuendon. Zavehi tyiño maa ra sihin minoo sa siñi tuñi vaha tañi i zavaha tandiñi ñiyivi sahnu sii.

⁴Nacohon iñi cuhva i sacun (quivi i quite yucuan). Ta cuñi xein ndyehi suun inga saha. Ta tacuan ta ziqui zii xaan cua cuñi.

⁵Nacohon iñi cuhva sino xaan iñun. Maha Loida siton sihin maha

Eunice zihun, yucuan ñu i sino iñi sa xihna ñi ta ziqui moo. Ta sito vehi vaty tacuan tucu sino iñi moo.

⁶Yucuan cuenda zanacohin iñun vaty zatyño vohon tyiño ra Ndyoo tañi i saha maa ra Ndyoo cuhva suun quivi i tyize ndehi xiñun.

⁷Vaty ña cuñi maa ra Ndyoo sa cuyuhu xaan yo. Saha ra Taty li ra vaty cua cuu zatyño yo tyiño ra. Ta cua cuñi xaan yo sii inga ñiyivi, ta cua coo sa siñi tuñi vaha xiñi yo.

⁸Yucuan cuenda ma cucahan nuun nu sohon sa ndaa sa cuenda ra ndyaca ñaha sii yo. Ta ma cucahan nuun sa cuenda mi vaty ñohi vehe caa sa cuenda maa ra. Zoco ndoon vaha sa ndyehun tundoho sihin mi sa cuenda Tuhun Ndyoo. Zandyeyun iñun vaty cua tyindyee ra Ndyoo suun.

⁹Zacacu ra Ndyoo sii yo, ta casi ra sii yo vaty cu-ii yo tañi maa ra. Ñá casi ra sii yo sa cuenda minoo sa vaha i zavaha yo. I casi ra sii yo vaty tacuan cuñi maa ra. I tahan si sii yo sa cuu yo sa cuenda cuaty yo. Ta i zavaha maa ra Ndyoo minoo sa vaha xaan sa cuenda maa yo vaty i ziqui ra sii ra Cristo, ta i sihi ra sa cuenda maa yo. Cumañi ca sino

ñuu ñiyivi, ta sa sito maa ra Ndyoo vatyí cua zavaha ra cuhva cuan.

¹⁰Ta zañaha ra cuhva cuñi ra sii yo vatyí i zaquisi ra sii ra Jesucristo vatyí zacacu ra sii yo. I zanaa ra tyiño sa cuu yo, ta sihin Tuhun Ndyoo nu cacu yo i zañaha ra sii yo minoo nu ma cuu ca yo.

¹¹I saha ra Ndyoo tyiño sii, vatyí nacatyí tuhun ra cuhva cacu ñiyivi. Ta i tava ra tyiño sii, vatyí zacuehi sii ñiyivi sa yivi ñiyivi hebreo cuu.

¹²Ta yucuan cuenda tehin tundoho sa ndyehi vityi. Zoco ña cucahan nui vatyí site yoo ra cuu ra sa sino iñi, ta sito vehi vatyí ra cuan, cuu zacuenda ra tandihi sa saha cuende sii ra ndya quivi cua quisi ra.

¹³Cundyico vohon cuhva vaha xaan sa zacuehi suun. Sino xaan iñun ta cuñun sii inga ñiyivi vatyí cuenda ra Cristo Jesús cuu suun.

¹⁴Sihin tundyee iñi sa saha maa Tatyí li suun, zacuendon tandihi tyiño i saha ra Ndyoo suun.

¹⁵Taño sa siton, tandihi ñiyivi nu cu si Asia sa i zandoo ñu sii, taño maa ra Figelo ta ra Hermógenes.

¹⁶Nacundahvi iñi maa ra ndyaca ñaha sii yo sii ñiyivi ra Onesíforo ta natyindyee ra cuan sii ñu vatyí i tyindyee xaan ra Onesíforo sii. Ta ñá cucahan nuu ra vatyí ñohi vehe caa.

¹⁷Nu ndihi tuhun, quivi i sindyaa ra ñuu Roma ñá zaña ra sa nanducu ra sii, ndya cuhva ndya i nañihi ra sii.

¹⁸Nacuhva ra ndyaca ñaha sii yo tumaño iñi sii ra quivi cua tyicuhva ra sii ñiyivi. Sa sito vohon cuhva i tyindyee xaan ra Onesíforo sii, ndya ñuu Efeso.

Minoo zandaru vaha sa cuenda ra Jesucristo

2 Zehe luhli, cundyee iñun sihin tundyee iñi sa saha ra Cristo Jesús suun.

²Tandihi tuhun sa i siñun catyí suhun nuu cuaha xaan ñiyivi, yucuan tuhun nacatyun sihin inga ra vaha, ra sa siton vatyí sino vaha iñi ra ta cuu zacuaha ra sii inga ñiyivi.

³Ta nacundyee iñun ndyehun tundoho taño minoo zandaru vaha ra Jesucristo.

⁴Yoño minoo zandaru nu sahañi tahan ra ta cuu nazaca ra tyiño maa ra sihin si vatyí coto ma tahan iñi ra i casi sii ra sa cuu ra zandaru.

⁵Ta inga tucu cuhva, minoo ra siziqui tatu ma cuziqui vaha ra cuhva tahan si, ñahñi cua zahacanaa ra.

⁶Ta ra zatyño sisi cuhu, xihna ca sii maa ra tahan si naquihin ra tyiño i zacuu ra.

⁷Nacaño vaha iñun sa catyí suhun ihya, ta cua cuhva ra ndyaca ñaha sii yo vatyí cutuño iñun tandihi si.

⁸Nacohon iñun cuhva i nandoto ra Jesús sa i sihi ra. Ta maa ra cuu ñiyivi ra rey David. Ihya cuu Tuhun Ndyoo cuhva cacu yo taño sa nacatyí sihin ñiyivi.

⁹Ta sa cuenda Tuhun Ndyoo ta ndyehi tundoho ndya cuhva nuhñi taño minoo ra iyo cuatyí. Zoco Tuhun Ndyoo ña nuhñi si.

¹⁰Yucuan cuenda cundyee iñi ndyehi tandihi nuu tundoho sa cuenda ñiyivi i casi ra Ndyoo vatyí tacuan ta cua cuu cacu ñu. Sa cuenda ra Cristo Jesús, ta cua ñihi

ñu sa cacu ñu tandihi cuii tyiemvu. Ta vaha xaan cua cuu si.

¹¹Ndisa cuii cuu si nu catyi si: “Tatu cuu yo sa cuenda ra cuan, cua cundito yo sihin ra.

¹²Tatu ndyehe yo tundoho, cua cundyaca ñaha yo sihin ra. Tatu catyi yo vatyí ña sito yo sii ra, cua catyi tucu maa ra vatyí ña sito ra sii yo.

¹³Tatu ña nii iñi yo ta zatyíño yo tyíño ra, zoco maa ra cua zacuu cuhva sa catyi ra tandihi saha vatyí tacuan iyo ra.” (Ta cua tyindyee ra sii yo.)

**Tatu zatyíño vaha ra Timoteo
cua quita vaha ra**

¹⁴Zanacohon iñi ñiyivi, ta cuhvon tyíño sii ñu sa cuenda ra ndyaca ñaha sii yo vatyí ma natuhun xaan ñu cuenda ñaa minoo tuhun sisi Tuhun Ndyoo vatyí ñahñi maa tyindyee si sa tacuan. Cua zatívi si sii ñiyivi tyizoho.

¹⁵Ñihi xaan nducun cuhva zavohon tandihi sa cuñi ra Ndyoo tañi minoo ra zatyíño vaha ta quita vaha ra. Tacuan ta ma cucahan nuun ityi nuu maa ra Ndyoo vatyí i zatyíño vohon sihin Tuhun ra.

¹⁶Ma cuhun nu natuhun xaan ñiyivi sa cuenda ñaa sa iyo ñuu ñiyivi ya, tuhun ña ñiñi. Vatyí ñiyivi cahan tacuan, tahan saha sa cahan ñu ta cua quihvi cuaha ca tuhun ña vaha sa ña tahan iñi ra Ndyoo.

¹⁷Ta ihya tuhun cua zatívi si sii ñiyivi tañi sa tyahyu ñu sihin minoo cuehe. Ta tacuan iyo ra Himeneo ta ra Fileto.

¹⁸Vatyí sa i quita ra ityi vaha, ta catyi ra vatyí sa yaha nandoto ñiyivi i sihi. Ta iyo ñiyivi sa zatívi ra cuhva sino iñi ñu.

¹⁹Zoco i cahan ra Ndyoo minoo cuhva, ta ma cuu nazama ca si. Ihya cuu cuhva catyi si: “Nacoto maa ra ndyaca ñaha sii yo yoo cuu ñiyivi ra.” Ta catyi tucu si: “Tandihi ñiyivi sa catyi vatyí cuenda ra Cristo cuu ñu, nazandoo ñu sa zavaha ñu sa ña vaha.”

²⁰Sisi minoo vehe cahnu, iyo ndaha tyíño xuhun cuaan ta xuhun cuisí. Ta iyo tucu ndaha tyíño vitu ta ndyahyu. Iyo si cutyíño ñu maa ñi nu tyaqui, ta iyo si sa cuenda nu ña ñiñi.

²¹Ta tacuan tucu maa yo, tatu zaña ndisa cuii yo tandihi sa ña vaha, tacuan ta ziqui cua cuu yo minoo ñiyivi vaha xaan. Cua zandundi ra Jesucristo añima yo, ta ziqui cua cuu cutyíño ra sii yo sa cuenda tandihi tyíño vaha.

²²Zacuenda xoon suun, ta ma zavohon tandihi sa ña vaha tañi zavaha ra yoco. Cundyicon minoo cuhva vaha xaan. Sino xaan iñun. Cuñun sii inga ñiyivi. Ta coo taxun sihin tandihi inga ra yañi yo, ra vaha añima, ra tuhva caca tahvi sii ra ndyaca ñaha sii yo.

²³Ma tyizohon nu natuhun xaan ñiyivi tuhun ña ñiñi ta sa ña ndisa. Sa siton vatyí sihin tuhun cuan ta quisaha cahñi tahan ñiyivi.

²⁴Ta minoo muzu cuenda ra ndyaca ñaha sii yo, cuñi si sa ma nanducu ra tizihi. Inga cuhva cuñi si vatyí vii ñi cahan ra sihin tandihi ñiyivi. Cuñi si vatyí cua cuu

zacuaha ra sii ñiyivi ta coo xaan tundyee iñi sii ra sihin ñu.

²⁵Ta ma caca iñi ra vatyi sito xaan ra, zoco vii ñi nazacuaha ra sii ñiyivi ña tyaa yahvi. Vazu cua tyindyee ra Ndyoo sii ñu, ta cua zama ñu cuhva iyo ñu, ta cua coto ñu ñaa sa cuu sa ndisa.

²⁶Tacuan ta ziqui cua quita ñu sisi xayu cuihna nu i tiin ra sii ñu cuhva cuñi ra.

**Cuhva cua nduu ñiyivi nu
sa cuñi ndihi tyiemvu**

3 Cuñi si sa coton vatyi ityi nuu ca cua coo quivi yii xaan.

²Vatyi cua cuñi xaan ñiyivi sii maa ñu, ta ma cuñi ñu sii inga ñiyivi. Cua ndyioo xaan iñi ñu xuhun. Cua zacahnu xaan ñu sii maa ñu. Cua cahan ñu ndya vaha ñi sii ra Ndyoo. Ma tyaa ñu yahvi sii zutu ñu ta sii zihii ñu. Ma nacuhva ñu tyahvi ndyoo sii ra Ndyoo a sii ñiyivi. Cuaha xaan cuatyí ñu cua coo.

³Ma cuñi ñu nu sii ñiyivi sii ñu. Ta nu tucahnu iñi, ma coo sii ñu sihin ñiyivi. Cua cahan xaan ñu cuendu ziqui ñiyivi. Nu maa ñu ta ma cundyee iñi ñu cundyaca ñaha ñu sii ñu sa catyi cuatyí ñu. Quiñi xaan cua nanduu ñu. Ta cua cuxaan xaan ñu sii tandihi sa vaha.

⁴Cua xico tuhun ñu sii amigo ñu. Ñihi xaan iñi ñu. Sica iñi ñu vatyí sito xaan ñu. Nanducu xaan ñu ñaa sa cuñi maa ñu, ta ma nanducu ca ñu sii ra Ndyoo.

⁵Cua cundyico ñu minoo cuhva tañi sa sino iñi ñu sii ra Ndyoo, zoco ña ndisa. Ña sino iñi ñu vatyí iyo xaan cuhva sii ra Ndyoo. Ñahñi

cuenda cua cu-iun sihin ñiyivi sa tacuan caa.

⁶Vatyí nu iyo ñiyivi sa tacuan, iyo ra quihvi vehe ñiyivi. Zandavi ñaha ra sii ñuzihii sa ñahñi sa siñi tuñi xiñi, ñiyivi sa iyo xaan cuatyí. Zavaha ñu ñaa ñi maa sa catyi inga ñiyivi sihin ñu.

⁷Ihya ñiyivi cuñi ñu coto ñu tandihi cuí nuu cuhva. Cutuhva xaan ñu, zoco ña cuu coto ñu ñaa sa cuu sa ndisa.

⁸Tañi maa ra tazi, ra Janes ta ra Jambres, i sahñi tahan ra sihin ra Moisés. Ta tacuan tucu ñiyivi sa quehin tuhun ya, sahñi tahan ñu sihin sa ndisa. Yaha xaan ña vaha sa siñi tuñi xiñi ñu. Sa zama ñu cuhva iyo ñu, ta ña sino ca iñi ñu sii sa ndisa.

⁹Zoco ma cucahnu ca ñu sihin cuhva ña vaha cuan vatyí vatyí xaan ta cua coto tandihi ñiyivi vatyí ñahñi sa siñi tuñi xiñi ñu. Tañi i tahan sa uu tahan ra sahñi tahan sihin ra Moisés.

**Nu ndihi saha ra Pablo
tyiño sii ra Timoteo**

¹⁰Zoco sito vohon cuhva i zacuehi suun ta cuhva iye. Siton ñaa sa cuñi ta cuhva sino iñi. Siton cuhva cundyee xaan iñi sihin ñiyivi ta cuhva cuñi xein sii ñu ta cuhva ña zañe Tuhun Ndyoo vazu ndyehe xein tundoho.

¹¹Sa cuenda Tuhun Ndyoo ta ndyehe xein tundoho, ta quiñi xaan zavaha ñiyivi sihin. Siton tandihi tundoho sa i tehin ñuu Antioquía, ta ñuu Iconio ta ñuu Listra sa catyi Tuhun Ndyoo. Zoco maa ra Ndyoo i zacacu sii, sisi tandihi si cuan.

¹²Ndisa vatyi tandihi yo sa cuñi cundito cuhva cuñi ra Cristo Jesús, cua ndyehe xaan yo tundoho cua zacuu ñiyivi sii yo sa cuenda ra.

¹³Zoco ñiyivi ña vaha ta ñiyivi zandavi ñaha, yaha xaan ca cua nduquiñi iyo ñu. Zandavi ñaha ñu, ta cua zandavi ñaha tucu ñiyivi sii ñu.

¹⁴Zoco cundyico moo cuhva vaha sa i cutuhvon. Siton yoo sa zacuaaha suun, ta sito vohon vatyi sa ndisa cuu si.

¹⁵Ndya luhlun ta sa siton tutu ra Ndyoo, ta yucuan cuu sa zacuaaha suun. Ta saha si coo sa siñi tuñi vaha suun. Ta cua cacun vatyi sino iñun sii ra Cristo Jesús.

¹⁶Tandihii cuii tutu Tuhun Ndyoo cuu tuhun sa i cahan maa ra Ndyoo. Ta vaha xaan sa zacuaaha yo sii si sii ñiyivi. Zañaha si sii yo tatu iyo sa ña vaha sii yo. Zaquihin si ityi vaha sii yo. Ta zañaha si cuhva cundito yo minoo cuhva vaha.

¹⁷Tacuan iyo si sa vatyi ra sito sii ra Ndyoo ta ñahñi cua cumañi sii ra. Cua cuu zavaha ra tandihii cuii nuu sa vaha.

4 Cua quisi ra Jesucristo tañi minoo ra ndyaca ñaha, ta cua tyicuhva ra sii ñiyivi ndito ta ñiyivi i sihi. Sito maa ra cuan, ta sito maa ra Ndyoo vatyi ñihi xaan sehi tyiño suun

²vatyi nacatyun Tuhun Ndyoo tandihii tyiemvu vazu cuñi ñiyivi tyizoho ñu a vazu ña cuñi ñu. Ñihi xaan cuhvon tyiño sii ñu tatu ña vaha ndyicuu ñu ta zayuhun sii ñu. Cuhva vohon tuhun sii ñu. Nacoo xaan tundyee iñi suun sihin ñu ta zacuaaha vohon sii ñu.

³Vatyi cua saa quivi sa ma cuñi ca ñiyivi tyizoho ñu ñaa sa catyi Tuhun Ndyoo sa ndisa. Cuaha xaan cua nduu maestro sa cua zacuaaha sii ñu cuhva cuñi maa ñu tyizoho ñu.

⁴Cua zama ñu cuhva iyo ñu. Ma tyizoho ca ñu sa ndisa. Ta cua sino iñi ñu tandihii cuii nuu cuendu.

⁵Zoco yoho nacoo sa siñi tuñi vaha xiñun. Cundyee iñun tundoho. Nacatyí vohon Tuhun Ndyoo cuhva cacu ñiyivi. Zatyíño vohon tyiño ra Ndyoo cuhva cuñi si.

⁶Vatyi sa vatyi cua cui sa cuenda Tuhun Ndyoo. Sa cua saa quivi cua quite ihya ñuu ñiyivi, ta cua cuhin nu ndyaa ra Ndyoo.

⁷I zatyíño vaha xein tyiño ra Ndyoo cuhva ndya zahacanei ta ndehi sihin tyiño cuan. Ñá zandoi cuhva sino iñi.

⁸Ta vityi sa ndati minoo sa vaha sa cua cuhva ra Ndyoo sii, vatyi vaha xaan cuhva i sindite ihya ñuu ñiyivi. Ta vaha xaan ndyaca ñaha maa ra ndyaca ñaha sii yo. Ta maa ra cua cuhva sii si quivi cuan. Ta yivi sii sa maa ñi mi cua cuhva ra, zoco cua cuhva tucu maa ra sii tandihii ñiyivi ndatu sii ra.

Minoo ca tuhun cahan ra Pablo sa cuenda maa ra Timoteo

⁹Zanumun ta quisi ndyehun sii.

¹⁰Vatyi i zandoo ra Demas sii, vatyi cuñi ca ra ñuu ñiyivi ya. Cuahan ra ndya ñuu Tesalónica. Cuahan ra Crescente ndya nu cu si Galacia. Ta ra Tito ndya nu cu si Dalmacia.

¹¹Maa ñi maa ra Lucas i ndoo sihin ihya. Naquisi ra Marcos suhun vatyi cuu tyindyee ra sii.

¹²I zacuhin sii ra Tíquico ndya ñuu Efeso.

¹³Quivi quisun, cundohon minoo zahma coque sa zandoi ñuu Troas vehe ra Carpo. Ta tacuan tucu libro mi, ta ñiñi ca cuu si sa ma naa iñun tuti quisi ndyacon.

¹⁴Ra cañi caa, ra nañi Alejandro, cuaha xaan sa ña vaha i zavaha ra sihin. Zoco maa ra ndyaca ñaha sii yo cua tasi tuñi sii ra cuhva i zavaha ra sihin.

¹⁵Zacuendon suun sihin ra vatyí sahñi tahan xaan ra sihin Tuhun Ndyoo sa zacuahaha ndi.

¹⁶Sa xihna ñi nu sehi sa ndaa nuu ra cu tyiño, yoñi numinoo ra i tyindyee sii. Tandíhi cuii ra i zandoo ra sii. Nazandasi ra Ndyoo cuatyí cuan ziqui ra cuan.

¹⁷Zoco i tyindyee maa ra ndyaca ñaha sii yo, ra Jesús, sii. Saha ra tundyee iñi sii, ta i cuu nacatyí Tuhun Ndyoo cuhva cacu yo. Ta i siñi tandíhi ñiyívi sa yívi ñiyívi hebreo cuu. Ta ñá saha

maa ra Ndyoo sa vatyí cahñi ñiyívi sii.

¹⁸Ta cua zacacu ra sii, sii tandíhi cuii sa ña vaha. Ta cua naquihin vaha ra sii, cua cuhin sihin ra nu ndyaca ñaha ra andívi. Cahnu xaan ca cuu maa ra tandíhi cuii tyiemvu. Ta tacuan cuu si.

**Nu sa cuñi ndíhi cahan ra i saha
ra minoo nacumi sii ñiyívi**

¹⁹Nacumi sii ndo, yoho maha Prisca ta yoho ra Aquila. Ta tacuan tucu ñiyívi ra Onesíforo.

²⁰I ndoo ra Erasto ñuu Corinto. Zoco i zandoi sii ra Trófimo ñuu Mileto vatyí cuhu ra.

²¹Zañiñun ta quisun cuee ca sa nduvisi xaan. Maa ra Eubulo, ta ra Pudente, ta ra Lino, ta ña Claudia ta tandíhi inga yañi yo ta cuhva yo zaquisi ñu minoo nacumi suun.

²²Ta nacundyaa maa ra ndyaca ñaha sii yo, ra Jesucristo, suhun. Ta natyindyee xaan ra sii tandíhi ndo. Ndíhi si vityí.

Minoo Carta I Tyaa Ra San Pablo Sii Ra Tito

Tyaa ra Pablo minoo carta sii ra Tito

1 Yuhvi ra Pablo minoo muzu ra Ndyoo cui ta minoo apóstol ra Jesucristo cui vatyí cua tyindyeyi sii ñiyivi i casi ra Ndyoo ta cua sino iñi ñu. Cua nacoto ñu sa ndisa, ta cua sino ca iñi ñu. I casi ra Ndyoo sii ñu vatyí coto ñu cuhva zacahnu vaha ñu sii ra.

²Ta cua coto ñu yozo caa cua ñihi ñu sa cundito ñu sihin ra Ndyoo. Ña tuhva maa ra Ndyoo sa cuvatyá ra, ta sa i catyi ra cuee ca sa zavaha ra ñuu ñiyivi vatyí cua cuhva ra sa cundito ñiyivi sino iñi sii ra tandihi tyiemvu.

³Ta vityi sa saa quivi sa saha ra Ndyoo sa nacoto yo Tuhun ra. Ta i saha ra tyiño sii, sa nacatyí Tuhun ra vatyí maa ra zacacu sii yo, ta i tava ra tyiño sii.

⁴Tyei carta ya suun Tito vatyí zehi sa ndisa cuii cuu suun vatyí iin ñi cuhva sino iñi yo. Cuñi sa cua tyindyee ca ra Ndyoo suun. Nacuhva ra tumañi iñi suun ta sa coo sa taxi añimon. Ta tacuan tucu nacuhva ra ndyaca ñaha sii yo, ra Jesucristo. Maa ra zacacu sii yo.

**Tyiño sa cua zavaha ra
Tito nu cu si Creta**

⁵I zandoi suun nu cu si Creta vatyí zandundoon tyiño ra Ndyoo

nu cumañi cundoo si. Tahan tahan ñuu nu iyo ra sino iñi Tuhun Ndyoo cua tyaa tyiñon sii ra cua cuu anciano tañi sa catyi suhun.

⁶Ra sa cua cuizo tyiño cuan, cuñi si vatyí cuu ra minoo ñiyivi vaha xaan tacuhva yoñi cuu tyaa cuatyí sata ra. Cuñi si vatyí coo minoo ñi ñazihí ra, ta ma cuu coo uu a uñi tahan ñaha ra. Ta zehe ra cuñi si sa sino iñi tandihi ñu tacuhva ma tyaa ñiyivi cuatyí sata ñu sa zavaha ñu sa ña vaha a sa ña tyaa ñu yahvi sii zutu ñu.

⁷Vatyí ra ndyizo tyiño cahnu sa cuenda Tuhun Ndyoo, zacuenda ra tyiño ra Ndyoo. Yucuan cuenda cuñi si vatyí cuu ra minoo ñiyivi vaha xaan, ta yoñi cuu tyaa cuatyí sata ra. Ña vaha tatu zavaha ra maa ñi cuhva cuñi maa ra a tatu vatyí xaan cuxaan ra. Ta ma cuu sa cuu ra minoo ra siñi a ra nanducu tizihí a ra zandavi ñaha ta ñihi ra xuhun.

⁸Cuñi si sa ndyehe vaha ra sii ñiyivi saa vehe ra ta cuhva ra sa casi ñu. Cuñi si vatyí cuu ra minoo ra zavaha sa vaha, cuu ra minoo ra iyo sa siñi tuñi xiñi, minoo ra ndoo xaan, ra zacahnu sii ra Ndyoo sa ndisa cuii. Ta ma cuñi ra zavaha ra ñaa ndihi sa ña vaha.

⁹Cuñi si vatyí sino vaha iñi ra maa ñi sa ndisa, Tuhun Ndyoo, sa i cutuhva ra, vatyí sihin cuhva cuan ta cua cuu cuhva ra tundyee iñi sii ñiyivi sihin minoo tuhun vaha. Ta cua cuu zama ra sa siñi tuñi xiñi ñiyivi cahan sa ña vaha ziqui Tuhun Ndyoo.

¹⁰Vatyí iyo cuaha xaan ñiyivi ña tyaa yahvi, ta cuaha ca ra cuu ra yañi yo, ra hebreo. Ñahñi sa ñiñi cahan ra, ta zandavi ñaha xaan ra sii ñiyivi.

¹¹Cuñi si sa nacazi yo yuhu ra vatyí zativi ra sa siñi tuñi xiñi cuaha xaan ñiyivi. Sa catyí xuhun ta zacuaha ra sii ñiyivi tuhun sa ña tahan si zacuaha ra.

¹²Minoo ra sa siñi tuñi vaha nu cu si Creta i cahan ra sii ñiyivi ñuu ra, ta catyí ra: “Vatya xaan ra ñuu Creta. Tañi quití iyo sisi huhu cuu ra. Yaha xaan cuaha sasi ra, ta susa xaan ra.” Tacuan catyí ra cuan.

¹³Ta ndisa cuii sa cahan ra. Yucuan cuenda cuxoon sihin ra zavaha cuhva ña vaha cuan, nanazama ra cuhva iyo ra ta nasino vaha iñi ra.

¹⁴Tacuan ta ma tyizoho ra cuendu sa cahan ra hebreo, ra ña sino iñi, ta tuhun cahan ñiyivi sa zama inga cuhva ta ña sino ca iñi ñu sii sa ndisa.

¹⁵Sa cuenda ñiyivi vaha sa siñi tuñi, tandihi ta vaha si. Zoco ra ña sino iñi, ñahñi maa sa ndoo iyo sii ra vatyí ndya cuhva sica iñi ra ta ndya sa siñi tuñi xiñi ra, quiñi iyo si.

¹⁶Catyí ra vatyí sito ra sii ra Ndyoo, zoco sihin sa ndyicuu ra ta ndyehe yo vatyí ña ndisa. Ña

cundyee ca iñi maa ra Ndyoo ndyehe ra sii ra cuan. Cuaha xaan sa ña vaha ndyicuu ra, ta numinoo cuhva vaha ña tyaa ra yahvi. Ta ña zavaha ra numinoo cuhva vaha.

Minoo cuhva vaha

2 Tuhun zacuaha moo, nacuu si maa ñi maa sa vaha. (Nacasi tahan sa cohon sihin sa cahan Tuhun Ndyoo.)

²Nacatyun sihin ra sahnú vatyí nacuu ra minoo ra vaha. Nacoo ra minoo cuhva sa cuu tyaa tandihi ñiyivi yahvi sii ra. Nanacañi vaha iñi ra tandihi saha. Nasino vaha xaan iñi ra Tuhun Ndyoo. Nacuñi ra sii ñiyivi sa ndisa cuii, ta nacundyee xaan iñi ra tatu ndyehe ra tundoho sa cuenda Tuhun Ndyoo.

³Ta tacuan tucu ñu sahnú. Catyun sihin ñu vatyí nacuu ñu ñiyivi vaha xaan tañi tahan si coo ñiyivi sito sii ra Ndyoo. Ta yoñi maa sii ziqui cahan ñu. Ma coho xaan ñu ndixi. Nazañaha ñu minoo cuhva vaha

⁴sii ñu nacaá tindaha vatyí tacuan ta cua cuñi ñu sii yí ñu ta sii zehe ñu.

⁵Nazañaha ñu sii ñu vatyí coo sa siñi tuñi vaha xiñi ñu, ta minoo ñi cuhva vaha cua cuñi ñu sii yí ñu. Ta nazacuenda vaha xaan ñu vehe ñu ta cuu ñu ñiyivi vaha ta tyaa ñu yahvi sii maa yí ñu. Vatyí tatu zavaha ñu tandihi cuhva ya, yoñi cua cahan ndya vaha ñi sii Tuhun Ndyoo.

⁶Zañiñi tucun sii ra yoco nacoo vaha sa siñi tuñi xiñi ra.

⁷Ta zuun ñi moo, zañohon maa ñi sa vaha sii ra sihin cuhva iyon. Zacuohon maa ñi sa ndisa cuii. Cuñi si sa cuun minoo ñiyivi vaha.

⁸Maa ñi tuhun vaha cohon, ta yoñi cua cuu tyaa cuatyí saton cuhva cohon. Ta cua cucahan nuu ra sica iñi inga cuhva vatyí ma ñihi ra cuhva cahan ra ndya vaha ñi sii yo.

⁹Cuhvon tyiño sii ra yañi yo, ra cuu muzu ñiyivi, vatyí natyaa ra yahvi sii patrón ra. Nazavaha ra tandihi sa catyí patrón ra, ta ma nacahan ra sa cahan patrón ra.

¹⁰Ma zuhu ra sa sii patrón ra. Tandihi cuii cuhva nazavaha ra sa vaha. Ta cua coto patrón ra vatyí sino iñi ra Tuhun Ndyoo sa ndisa, ta cua coto ñu vatyí vaha xaan cuu Tuhun Ndyoo, tuhun sii ra zacacu sii yo.

¹¹Vatyí sa zañaha ra Ndyoo vatyí saha xaan ra tumañi iñi sii tandihi cuii ñiyivi ta cuñi ra zacacu ra sii yo.

¹²Ta cuhva iyo ra Ndyoo, zañaha si sii yo vatyí nazaña yo cuhva ña vaha sa zavaha ñiyivi ña sito sii ra ta sa ña vaha sa cuñi coño ñuhu yo ihya ñuu ñiyivi ya. Natyaa yo yahvi sii ra Ndyoo. Nazavaha yo tandihi sa vaha ta sa catyí sa siñi tuñi vaha sii yo. Ta nazacahnu yo sii maa ra Ndyoo sa ndisa cuii ñi ñi sa ndito yo ñuu ñiyivi ya.

¹³Vatyí ndatu maa yo minoo quivi vaha xaan, quivi cua quisi tucu ra Jesucristo. Maa ra cuu Ndyoo yo ta ra zacacu sii yo. Cua quisi ra sihin cuaha xaan tundyee iñi sii ra ta ndisi xaan ra.

¹⁴Saha maa ra sii ra sa cuu ra sa cuenda cuatyí maa yo vatyí cua zacacu ra sii yo sii ityi ña vaha, ta cua zandasi ra tandihi cuii cuatyí yo. Cuñi ra vatyí sii maa ra cua cuu

sii yo ta cua cuñi xaan yo zavaha yo sa vaha.

¹⁵Tandihi cuii cuhva ya nacatyun sihin ñiyivi. Zañiñun sii ñu nazavaha ñu sa vaha. Catyí casun sihin ñu ñaa sa cuu cuatyí ñu tatu ma tyaa ñu yahvi vatyí tacuan i saha ra Ndyoo tyiño suun. Ma cuhvon sa cahan ñiyivi ndya vaha ñi suun vatyí zavohon sa vaha.

Cuhva cuñi si zavaha yo tatu sino iñi yo Tuhun Ndyoo

3 Zanacohon iñi ñiyivi vatyí natyaa ñu yahvi sii ra ndyaca ñaha ta sii ra ndyizo tyiño ñuu ñiyivi ya. Nazavaha ñu sa catyí ra cuan, ñaa ndihi ca tyiño vaha.

²Ta ma cahan ñu ndya vaha ñi sii numinoo ñiyivi. Ta ma nanducu ñu tizihí. Nazañaha ñu vatyí vaha aña ñu sihin cuhva iyo ñu sihin inga ñiyivi. Vii ñi cuñi si coo ñu sihin tandihi inga ñiyivi.

³Vatyí ndya maa yo ta i cuu yo ñiyivi tondo xiñi. Ñiyivi sa ñá tyaa yahvi sii ra Ndyoo i cuu yo. I zandavi ñaha cuihna sii yo, ta i tyaa xaan yo yahvi sii sa cuñi coño ñuhu yo ta zavaha yo sa catyí si. Cuaha xaan sa ña vaha i zavaha maa yo, ta ndyio xaan iñi yo ndaha tyiño inga ñiyivi. Ña cuu ndyehe ñiyivi sii yo, ta ña cuu ndyehe yo sii ñu.

⁴Zoco i zañaha maa ra Ndyoo cuhva cuñi xaan ra sii ñiyivi ta cuhva vaha xaan iyo ra. Maa ra i zacacu sii yo.

⁵I zacacu ra sii yo, zoco yivi sa cuenda sa vatyí vaha xaan i zavaha yo. I zacacu ra sii yo vatyí cundahvi iñi ra sii yo. I zandasi ra

cuatyí yo, ta i nacacu saa yo. Ta i saha ra Tatyí Ii ra. Tacuan cuu cuhva ñíhi yo sa cacu añima yo, ta ndito yo minoo cuhva saa ihya ñuu ñiyívi ya.

⁶Vaha xaan saha maa ra Ndyoo Tatyí Ii ra sii yo sa cuenda ra Jesucristo, ra zacacu sii yo.

⁷Ta sihin tumañi iñi sa saha maa ra Ndyoo sii yo, ta catyí ra vatyí ñahñi ca cuatyí yo, ta ñíhi yo cuhva cundito yo tandíhi tyiemvu, cuhva sa ndatu xaan yo.

⁸Tandíhi tuhun ya, ndisa xaan si. Cahan tañi minoo ra sito vaha, ta nacatyun tandíhi tuhun ya sihin ñiyívi. Tacuan zavohon ta ziquí ñiyívi sa sino iñi sii ra Ndyoo cua nacañi iñi ñu minoo cuhva vaha, ta cua zavaha ñu tandíhi sa vaha. Vaha xaan cuu tuhun ya, ta cua tyindyee xaan si sii tandíhi ñiyívi tatu zavaha ñu sii si.

⁹Zoco ma tyizohon nu natuhun xaan ñiyívi tuhun ña ñíhi xaan tañi yoo sa cuu ñiyívi sahnu sii yo a ñaa ndíhi sa catyí ley ra Moisés a ñaa inga tuhun natuhun xaan ñiyívi ta sahñi tahan ñu sa cuenda si. Ta yívi sa ñíhi cuu si. Ta ma cuu tyindyee si sii yo.

¹⁰Tatu iyo minoo ra ta natuhun xaan ra ta zacahñi tahan ra sii ra yañi yo. Cana sii ra ta cahan vohon sihin ra minoo saha ta inga tucu saha. Ta tatu ña cuñi ra tyizoho, ma tyisaha con sii ra.

¹¹Siton vatyí ña vaha añima ra tatu tacuan zavaha ra. Ta sihin cuhva zavaha ra ta zuun ñi maa ra cua cuu ña vaha iñi vatyí ña vaha zavaha ra.

Mínoo ca tuhun cahan ra Pablo sihin ra Tito sa cuenda ñi maa ra Tito

¹²Quiví cua tasi sii ra Artemas a sii ra Tíquico nu ndyoon, zanumun ta cuhun ndya ñuu Nicópolis cua ñíhi tahan yo vatyí sa cundaa iñi sa cuhin yucuan tyiemvu sa cua nduvisi ihya.

¹³Tyindyeeun sihin tandíhi cuhva sa cuu suun sii ra Zenas, ra cuu yuhu ñiyívi tañi minoo abogado, ta sii ra Apolos. Tacuan ta cua cuu cuhun ra ityí nuu, ta ñahñi cua cumañi sii ra.

¹⁴Zacuohon sii ñiyívi sino iñi Tuhun Ndyoo vatyí nazavaha ñu sa vaha sihin tandíhi ñiyívi tandíhi saha. Nacuhva ñu sa siñi ñuhu sii ñiyívi tatu cumañi si sii ñu sa ndisa. Ña vaha sa cuyucu ñi maa ñiyívi sa sino iñi ta ma zatyíño ñu a ma tyindyee ñu sii inga ñiyívi.

Nu ndíhi cahan ra Pablo

¹⁵Tandíhi ñiyívi sa ndyaa sihin ihya tasi ñu minoo nacumi sii moo Tito. Tacuan tucu tasi ndi minoo nacumi sii tandíhi ñiyívi cuñi sii ndi sa cuenda Tuhun Ndyoo. Ta maa ra Ndyoo cua tyindyee sii tandíhi ndo. Ndíhi si vityi.

Filemón

Tyaa ra Pablo minoo carta sii ra Filemón

¹Yuhvi ra Pablo ñohi vehe caa sa cuenda ra Jesucristo. Sihin ra Timoteo yañi yo tyaa ndi carta ya suun yoho Filemón. Cuñi xaan ndi suun vatyí ñi zatyíño yo sa cuenda Tuhun Ndyoo.

²Ta tyaa tucu ndi carta ya sii ña Apia, hermana yo, ta sii ra Arquipo vatyí zatyíño xaan tucu maa ra tyíño ra Ndyoo, ta tyaa tucu ndi sii tandíhi inga hermano, ra titahan vehe moo.

³Cuñi xaan ndi sa cua cuhva xaan ra Ndyoo tandíhi cuii sa vaha sii ndo ta sa coo sa taxi ñi sii ndo sihin ra, cuhva saha ra Ndyoo Zutu yo ta ra Jesucristo sii yo. Ra Jesucristo cuu ra ndyaca ñaha sii yo.

Cuhva cuñi xaan ra Filemón sii tandíhi ñiyívi ta cuhva sino xaan iñi ra sii ra Jesús

⁴Saha xein tyahvi ndyoo sii ra Ndyoo cuhva quehin sihin ra cuendon,

⁵vatyí i catyí ñiyívi sihin, cuhva sino xaan iñun sii ra Jesucristo ta cuhva cuñi xoon sii tandíhi ñiyívi sa sino iñi sii ra Ndyoo.

⁶Ta sique sii ra Ndyoo sa cuenda ñiyívi sa sino iñi sa cuenda cuhva sino iñi moo. Sique sii ra vatyí nacutuñi ca iñi ñu tandíhi cuii sa vaha xaan sa iyo sii yo sa cuenda maa ra Jesucristo.

⁷Ta zii xaan cuñi ta tyindyee xaan si sii, yoho hermano, vatyí site cuhva cuñi xoon sii ñiyívi vatyí sa cuenda moo hermano ta ñihi tandíhi inga hermano cuaha xaan tundyee iñi.

Sica ra Pablo minoo tumañi iñi sii ra Filemón sa cuenda ra Onésimo

⁸Yucuan cuenda vazú iyo xaan cuhva sii, sa saha ra Cristo sii, ta cuu catyí suhun ñaa sa cua zavohon,

⁹zoco vaha cuñi sa caque tumañi iñi suun vatyí cuñi suun, ta cuñi tucu yoho sii. Ta tañi sa sito moo, yuhvi ra Pablo cui minoo ra sahnú, ta vityí ñohi vehe caa sa cuenda maa ra Jesucristo.

¹⁰Sica xein tumañi iñi suun sa cuenda ra Onésimo. I nduu ra tañi zehi sa cuenda Tuhun Ndyoo ñi ñi sa ñohi vehe caa ya.

¹¹Ta quívi cuan, ñahñi maa i tyindyee ra suun, zoco vityí tyindyee xaan ra sii, ta cua tyindyee tucu ra suun.

¹²Cua natasi sii ra nu ndyoon. Natiin cuendon sii ra minoo cuhva vaha xaan vatyi cuñi xein sii ra.

¹³Cuñi sa vatyi ndoo ra ihya sihin vatyi tyindyee ra sii sa cuenda moo ñi ñi sa ñohi vehe caa sa cuenda Tuhun Ndyoo.

¹⁴Zoco ña cuñi zavehi sa tacuan tatu ma vatyi moo vatyi ña cuñi zañiñi suun ta cua zavohon minoo tumañi iñi sii. Sica iñi sa cua zavohon sii si vatyi ñiyivi vaha cuun ta yivi sa vatyi zañiñi suun.

¹⁵Vaziqui i zandoo ra Onésimo suun zuhva quivi ta vityi cua cuu natiin cuendon sii ra tandihi cui tyiemvu.

¹⁶Ta ña maa ñi muzun cuu sii ra vityi, zoco minoo cuhva vaha ca vatyi cuu tucu ra minoo hermano, ra sa cuñi xaan yo. Cuñi xein sii ra, ta cuñi si sa cuñi xaan ca moo sii ra ñihi ca. Ta yivi tañi ñiyivi ndya vaha ñi, zoco cuñun sii ra tañi minoo hermano yo sa cuenda ra ndyaca ñaha sii yo.

¹⁷Yucuan cuenda tatu cuñun sii mi tañi sa ra tohon, tiin cuendon sii ra tañi sa yuhvi cuu ra.

¹⁸Ta tatu iyo sa ña vaha i zavaha ra suhun a tatu tavi ra suun, tyoon sii si sa cuenda mi.

¹⁹Yuhvi ra Pablo tyei zuun ñi sihin letra mi ihya vatyi yuhvi cua

tyiyahvi. Ta cuu vatyi suhun vatyi yoho tavun sii, sa cuenda cuhva cacu añimon, zoco ma vatyi.

²⁰Tacuan cuu si hermano, ta cuñi vatyi zavohon minoo tumañi iñi sii, sa cuenda ra ndyaca ñaha sii yo. Zanduziun añime sa cuenda ra.

²¹Ta tyei carta ya suun vatyi ñi xaan iñi suun vatyi cua tyoon yahvi sa quehin. Ta sa site vatyi cua zavohon cuaha ca.

²²Ta zanduvaha tucun minoo nu cua cundyei vatyi sica iñi vatyi cua cuhva maa ra Ndyoo sa sica ndo sii ra ta cua cuu quisi ndyehi sii ndo.

**Tasi inga ra hermano minoo
nacumi sii ra Filemón, ta
ziqui ndihi cahan ra Pablo**

²³Iyo minoo ra ñoho vehe caa iin ñi sihin mi sa cuenda ra Cristo Jesús. Epafra nañi ra, ta tasi ra minoo nacumi suun.

²⁴Ta inga ra tyindyee sii, sa cuenda tyiño maa ra Ndyoo, Marcos nañi ra, ta ra Aristarco, ra Demas, ta ra Lucas. Tasi tucu tandihi ra minoo nacumi suun.

²⁵Cuñi xein sa cua cuhva xaan ra Jesucristo sa vaha sii ndo. Maa ra ndyaca ñaha sii yo. Ta nacuu si tacuan.

Minoo Carta I Tyaa Ra San Pablo Sii Ñiyivi Hebreo Sa Sino Iñi Tuhun Ndyoo

I cahan ra Cristo zehe ra Ndyoo
sihin yo sa cuenda zutu ra

1 Ta sa naha i cahan ra Ndyoo
cuaha xaan saha ta cuaha xaan
cuhva sihin ñiyivi sa cuu profeta, ta
i nacaty i ra cuan sihin ñiyivi sahnú
sii yo tandihi sa i catyi ra Ndyoo.

²Zoco vityi nu sa cuñi ndihi
tyiemvu i tasi ra Ndyoo sii Zehe ra,
ta i cahan ra sihin yo sa cuenda ra
Ndyoo Zutu ra. Ta i saha cuenda ra
Ndyoo tandihi cuii sa iyo sii ra sii
Zehe ra. Ta sihin Zehe ra i zavaha
ra Ndyoo ñuu ñiyivi.

³Ta ndisi xaan Zehe ra Ndyoo
sihin sa ndisi sa iyo sii Zutu ra. Ta
tandihi cuii sa zavaha Zehe ra
Ndyoo, zañaha si vaty i Ndyoo cuu ra.
Ndyaca ñaha ra tandihi cuii sa iyo
sihin tuhun cahan ra. Maa ra cuu ra
i sihi vaty i cua zandasi ra cuaty i yo,
ta i zanaa ra sii si. Ta ziqui i nandoto
ra, ta i sicundyaa ra siyo cuaha
ra Ndyoo Zutu ra, ra ndyaca ñaha
andiivi. Ta ndyaca ñaha ra sihin ra.

Cahnu ca Zehe ra Ndyoo
ta ziqui ángel

⁴Cahnu xaan ca i nduu Zehe ra
Ndyoo ta ziqui ángel, ta sito yo

vaty i cahnu ca ra vaty i Zehe Ndyoo
cuu sii ra. I saha ra Ndyoo zivi
cuan sii ra, ta ñiñi ca si ta ziqui zivi
ángel.

⁵Numinoo saha ta ñá catyi ra
Ndyoo sihin numinoo ángel:

Yoho cuu Zehi,

Vityi zañehi vaty i Zehi cuu suun.
Zoco i catyi ra Ndyoo sa cuenda ra
Jesús:

Yuhvi cua cuu zutu ra,

Ta maa ra cua cuu zehi.

⁶Ta quivi i cacu Zehe ra, ra cahnu
ca, ñuu ñiyivi ya, i catyi ra Ndyoo:

Nazacahnu tandihi cuii ángel

Ndyoo sii ra.

⁷Caty i ra Ndyoo sa cuenda ángel
vaty i:

Tañi taty i cuu ra, ta tañi ñúhu
cuu ra.

⁸Zoco sa cuenda Zehe ra catyi ra
Ndyoo:

Ndyoo cuun, ta cua cundyaca
ñohon tandihi cuii tyiemvu.

Ndoo xaan cua cundyaca ñohon.

⁹Cuñi xoon sa zavaha ñiyivi sa
ndoo, ta cuxaan xoon sihin sa
ña vaha.

Yucuan cuenda saha ra Ndyoo
sa zii xaan ca cuñun ta ziqui
tandihi inga ñiyivi.

¹⁰Ta inga saha i catyi tucu ra Ndyoo sihin ra:

Ra ndyaca ñaha cuun, ta nu i quisaha si i zavohon ñuu ñiyivi,

Ta i zavohon andivi sihin ndohon.

¹¹Cunaa si cuan, zoco cua ndoo moo.

Cua ndusahnu ñuu ñiyivi ta andivi tañi ndusahnu minoo zahma.

¹²Ta cua natuun sii si tañi minoo zahma ñi cuu si, ta cua nazama si tañi nazama ñiyivi sii zahma ñu.

Zoco yoho ma zamon, ta ma cuu moo ndaha ñi.

¹³Zoco numinoo saha ñá catyi ra Ndyoo sihin minoo ángel:

Cundyoon siyo cuehi ndya cua zahacanei sii tandihi ra xaan iñi suun ta ziqui cua cuhve sa cundyaca ñohon sii tandihi ra.

¹⁴Ña tacuan catyi ra Ndyoo sihin ángel vaty muzu ñi cuu ra cuan. Tasi ra Ndyoo sii ra sa cua tyindyee ra ta zacuenda ra sii ñiyivi cua zacacu ra Ndyoo.

Cahnu xaan cuu cuhva zavaha ra Ndyoo sa cua zacacu ra sii ñiyivi

2 Yucuan cuenda cuñi si sa sino xaan iñi yo sii sa ndisa sa siñi yo, coto zandoo yo sii si.

²I sityiño ra Ndyoo ángel, ta i nacaty ra ley ra Ndyoo sihin ra Moisés. Sihin ley cuan i sindyaca ñaha maa ra Ndyoo quivi cuan, ta ñu ñá tyaa yahvi i ndoho ñu tandihi saha tañi tahan si.

³Ta maa tucu yo, ma cuu cacu yo tatu ma tyaa yo yahvi cuhva i

cahan ra Jesucristo ra ndyaca ñaha sii yo, cuhva cua zacacu ra sii yo. Cahnu xaan cuu cuhva i zavaha ra. Ta ra i siñi sa cahan ra Jesús i nacaty ra sihin yo cuhva i catyi ra.

⁴Ta i zañaha casi ra Ndyoo vaty sa ndisa cuu tuhun cuan vaty i zavaha ra zeña ta cuaha nuu sa ndyityi, ta i saha ra cuaha cuhva sa cuu zavaha ñiyivi sihin cuhva sa saha Taty i ra, cuhva cuñi maa ra Ndyoo.

Ra Jesús cuu ra cua cuhva sa cacu ñiyivi

⁵Ña saha ra Ndyoo sa cua cundyaca ñaha ángel sii ñuu ñiyivi sa cua coo ityi nuu ca, ñuu ñiyivi sa cahan maa yo tuhun.

⁶Zoco iyo nu catyi Tuhun Ndyoo tyehen cuhva cahan minoo ra profeta sihin ra Ndyoo sa cuenda ra Cristo:

¿Ñaa ra cuu minoo rayii ta nacohon xaan iñun sii ra, Ta ñaa cuenda zacahnu xoon sii ra cu zehe ñiyivi?

⁷Zuhva ni quivi, quivi ndyaa ra ñuu ñiyivi cua zanduluhlu xoon sii ra ta ziqui ángel, Ta cuee ca cua zanducahnu xoon sii ra,

Cua cuhva xoon cuhva sii ra, ta tyaa xoon yahvi sii ra;

⁸Ta sohon sa cundyaca ñaha ra tandihi cuii sa iyo.

Quivi i saha ra Ndyoo sa cundyaca ñaha ra sii tandihi, ñahñi sa cua cumañi sa ma cuu cundyaca ñaha ra. Zoco tañaha ca cua ndyehe yo sa cundyaca ñaha ra sii tandihi cuii.

⁹Zoco ndyehe yo sii ra Jesús, ra i quisi ndya gloria. Luhlu ca i nduu

ra ta ziqui ángel zuhva ñi quivi. Ta vityi zacahnu xaan ra Ndyoo sii ra ta saha xaan ra cuhva sii ra vatyi i sihi ra sa cuenda maa yo. Vaha xaan cuu maa ra Ndyoo, ta yucuan cuenda i sihi ra Jesús sa cuenda tandihi ñiyivi ñuu ñiyivi.

¹⁰Maa ra Ndyoo i zavaha tandihi, ta sa cuenda maa ra i sino si. Vaha cuu si sa saha ra sa ndyehe ra Jesús tundoho vatyi cuhva cuan cua cuu ra Jesús sa cuenda tandihi ñiyivi ñuu ñiyivi. Sihin cuhva i zavaha ra Jesús ta i zacacu ra sii cuaha xaan ñiyivi, ta cuu nduu ñu ñiyivi ra Ndyoo ta cuhun ñu gloria. Ta sihin tundoho sa i ndyehe ra Jesús ta i nduu ra ra cua cuhva sa cua cacu ñiyivi. Cuhva cuan i zavaha ra tandihi sa cuñi maa ra Ndyoo.

¹¹Ñiyivi sa sa nduvaha sihin ra Ndyoo ta ra i zanduvaha sii ñu, iin ñi Zutu ñu. Yucuan cuenda ña cahan nuu ra zanduvaha sii ñu sa catyi ra vatyi tahan ra cuu sii ñu.

¹²Tyehen catyi ra:

Ndyoo Zuti, cua quehin tuhun nuu yañi,

Cua zacahni suun nu yucu ñiyivi sino iñi suun.

¹³Ta inga saha i catyi ra:

Nii xaan cua cuu iñi sii Zuti.

Ta inga tucu saha i catyi ra:

Ica vii ya sihin zehi, ñiyivi i saha ra Ndyoo sii.

¹⁴Zehe ra Cristo, coño ñuhu ta ñiñi cuu ñu. Yucuan cuenda i nduu tucu ra Jesús minoo ñiyivi sa iyo coño ñuhu ta ñiñi. Vatyi tatu cua nduu ra minoo ñiyivi cua cuu cuu ra, ta sihin cuhva cuan zanaa ra cuhva iyo sii cuihna. Vatyi maa ra cuihna cuu ra i quisaha sihin tuhun sa sihi ñiyivi.

¹⁵Zoco sihin cuhva sa sihi ra Jesús ta i zanaa ra cuhva sa sahñi cuii cuihna sii ñiyivi, ta zacacu ra Jesús sii ñiyivi sihin tuhun sa yuhu xaan ñu coto cuu ñu. Tañi sa nuhñi ñiyivi tandihi quivi i cuu si vatyi i yuhu xaan ñu sa cuu ñu.

¹⁶Ndisa cuii vatyi ñá quisi tyindyee ra Jesús sii ángel. Zoco quisi tyindyee ra sii tandihi zehe ra Abraham.

¹⁷Yucuan cuenda i nduu ra ñiyivi sa ndisa tañi tandihi maa yo, ra cu yañi ra. Ta sa cuenda cuan cundahvi xaan iñi ra sii yo. Zavaha ra tandihi sa catyi ra Ndyoo, ta cuu ra zutu ya cahnu sa cuenda yo ityi nuu ra Ndyoo. Ta i tyiyahvi ra sa cuenda cuatyí ñiyivi.

¹⁸Maa ra i ndyehe xaan tundoho cuhva i nducu coto ihñi cuihna sii ra, zoco ñahñi sa ña vaha i zavaha ra. Ta yucuan cuenda cuu xaan tyindyee ra sii ñiyivi quivi nducu coto ihñi cuihna sii ñu.

Ra Jesús, cahnu ca ra ta ziqui ra Moisés

3 Yucuan cuenda, ndoho hermanos, i casi ra Ndyoo sii ndo vatyi cua zanduvaha ra sii ndo. I casi ra sii ndo vatyi cuhun ndo gloria. Vityi cuñi sa cua nacañi iñi ndo sa cuenda ra Jesús. Maa ra cuu ra i tasi ra Ndyoo sihin tyiño ra. Ta ra cu zutu ya cahnu cuu ra sa cuenda maa yo, ta sino xaan iñi yo sii ra.

²I tava ra Ndyoo tyiño sii ra Jesús sa cuu ra zutu ya cahnu sa cuenda yo, ta i zavaha ra tandihi sa cuñi maa ra Ndyoo. Tañi ra Moisés i zavaha ra tandihi sa cuñi ra Ndyoo

nu i siyucu ñiyivi hebreo quivi cuan. Ta ñiyivi hebreo i cuu ñiyivi sii maa ra Ndyoo.

³Ta cahnu ca ra cuu ra Jesús ta ziqui ra Moisés vatyí ñiñi ca cuu ra zandaa minoo vehe ta ziqui maa si.

⁴Tahan tahan vehe sa iyo, iyo ra zandaa sii si, zoco ra i zavaha tandihi cuu maa ra Ndyoo.

⁵Vaha xaan sa i zavaha ra Moisés sihin ñiyivi ra Ndyoo quivi cuan, zoco minoo muzu ra Ndyoo ñi i cuu maa ra ta minoo ra saha sa ndaa ñi i cuu ra. I nacatyí ra sihin ñiyivi tandihi sa i catyí ra Ndyoo sihin ra.

⁶Zoco ra Cristo cuu ra zehe ra Ndyoo, ta i zavaha ra tandihi sa i catyí ra Ndyoo. Ndyaca ñaha ra sii tandihi ñiyivi sa sino iñi sii ra Ndyoo. Ta maa yo cuu vehe ra Ndyoo tatu ma yuhu yo cahan yo tuhun ra ndya cuhva ndya cua quisi tucu ra Jesús. Ta tatu zii xaan cuñi yo ñi ñi sa ndatu yo sii ra.

Cua quitatu ñiyivi sa sino ndisa cuii iñi sii ra Ndyoo

⁷Yucuan cuenda catyí Tatyí Ii ra Ndyoo:

Vityí tatu siñi ndo sa cahan ra Ndyoo,

⁸Ma zandundava xaan ndo iñi ndo,

Tañi i zavaha ñiyivi hebreo quivi i nducu coto ihñi ñu sii ta i zacuxaan xaan ñu sii nu i sica noo ñu minoo nu ityí xaan.

⁹Yucuan i nducu coto ihñi xaan ñu sii vazú i ndyehe ñu cuhva i zavehi uu xico cuiya.

¹⁰Yucuan cuenda i cuxein sihin ñiyivi cuan,

Ta i catyí: “Tandihí saha zandoo ñu ityí vaha ta sica noo ñu minoo ityí ña vaha, ta zandavi ñaha si sii ñu, Ta ña cuñi ñu coto ñu cuhva cuñi sa cua zavaha ñu.”

¹¹Ta i cuxaan xein, ta i catyí: “Sa ndisa cuii vatyí ma cuhva mi sa cua saa ñu nu i zanduvehi nu cua quitatu ñu.”

¹²Tacuan i catyí ra Ndyoo. Yucuan cuenda coto vaha ndo sii ndo hermano coto ñaha ma sino ndisa cuii iñi ndo sa cahan ra Ndyoo, ta cua zaña ndo sii ra Ndyoo ndito ta cuhun ndo inga ityí.

¹³Cuhva ndo tundyee iñi sii minoo ndo ta sii inga ndo tandihí quivi ñi ñi sa cuu ca, ta cuhva cuan, yoñi ndo cua zandavi ñaha cuatyí sii. Vatyí tatu zandavi ñaha cuatyí sii ndo cua zanduñihi ndo iñi ndo ta ma tyaa ca ndo yahvi sii ra Ndyoo.

¹⁴Tatu ñi xaan cuu iñi yo sii ra Ndyoo ndya cuhva ndya cua ndihi ñuu ñiyivi, iñi ñi cua ñihi yo sa vaha sihin ra Cristo.

¹⁵Ta ma naa iñi ndo vatyí vityí cuu nu catyí ra Ndyoo:

Vityí tatu cuiñi ndo sa cahan ra Ndyoo,

Ma zanduñihi ndo iñi ndo tañi i zavaha ñiyivi hebreo quivi i zacuxaan ñu sii.

Catyí ra Ndyoo.

¹⁶¿Ta yoo cuu ñiyivi i siñi sa cahan ra Ndyoo ta i zacuxaan ñu sii ra? Ñiyivi cuan cuu ñu cuahan sihin ra Moisés. Ta cuahan ra ityí nuu, ta i tava ra sii ñu ñuu Egipto quivi cuan.

¹⁷¿Ta yoo sihin i cuxaan ra Ndyoo uu xico cuiya? Zuun ñi sihin ñiyivi

cuan i cuxaan ra vatyi i zavaha ñu cuaty, ta yucuan cuenda i sihi ñu sisi cuhu ityi cuahan ñu.

¹⁸¿Ta yoo sii saha ra Ndyoo tuhun ra vatyi ma cuhva ra sa cua saa ñu nu cua quitatu ñu? I saha ra tuhun cuan sii ñiyivi ñá tyaa yahvi sii ra.

¹⁹Ta cuhva cuan ndyehe yo vatyi ñá cuu quihvi ñu vatyi ñá sino ca iñi ñu sa catyi ra Ndyoo.

4 Vityi iyo ca tuhun i saha ra Ndyoo sa cuenda sa quihvi ñiyivi ra nu cua quitatu ñu. Yucuan cuenda cuñi si sa cuyuhu yo coto coo zuhva maa ndo sa cua catyi ra Ndyoo vatyi ma cuu quihvi ndo.

²Ndisa vatyi sa ñihi maa yo Tuhun Vaha ra Ndyoo tañi i ñihi ñiyivi sahnu hebreo sii si. (Tuhun cuan cuu nu i catyi ra Ndyoo vatyi cua cuhva ra minoo nu cua quitatu yo), zoco ñá tyindyee si sii maa ñu vatyi ñá sino ndisa cuii iñi sii si.

³Ta maa ñi maa yo sa sino iñi, cuu quihvi yo nu cua quitatu yo tañi sa catyi maa ra Ndyoo:

Sa cuxein ta sehi tuhin vatyi ñiyivi ña sino iñi sii,

Ma cuu quihvi ñu nu cua quitatu ñu.

Catyi ra Ndyoo. Tacuan i catyi ra vazú sa ndyaa listo si ndya quivi i ndihi zavaha ra ñuu ñiyivi.

⁴Vatyi iyo nu i catyi ra tyehen sa cuenda quivi cu usa cuan: “I quitatu ra Ndyoo quivi cu usa cuan, ta ñá zatyño ca ra quivi cuan.”

⁵Ta iyo tucu nu catyi si tyehen: “Ndaha cuii ñi ma cuu quihvi ñu nu cua quitatu ñu sihin.” Catyi ra Ndyoo.

⁶Iyo ca ñiyivi cua quihvi vatyi ñiyivi i ñihi tuhun cuan sa xihna ñi,

ñá cuu quihvi ñu vatyi ñá tyaa ñu yahvi sii ra Ndyoo.

⁷Yucuan cuenda i saha tucu ra Ndyoo inga saha sa cua cuu quihvi ñiyivi. I cahan ra Ndyoo sihin ra David, ta i nacaty i ra David tyehen, cuhva i catyi tucu ra Ndyoo inga saha zuun ñi cuhva tañi i catyi ra sihin ñiyivi hebreo ta sa naha:

Vityi tatu cuiñi ndo sa quehin, Ma zañihi ndo iñi ndo.

⁸Tatu sa i sindyaca ra Josué sii ñiyivi nu cua quitatu ñu sa ndisa cuii, ma cahan ca ra Ndyoo inga saha sa cuenda inga quivi nu cua cuu quihvi ñiyivi nu cua quitatu ñu.

⁹Zoco i cahan ra cuhva cuan vatyi cumañi ca quihvi ñiyivi ra Ndyoo nu cua quitatu ñu sa ndisa cuii.

¹⁰Tatu sa quihvi minoo ra nu saha ra Ndyoo nu cua quitatu ra, sa zandoo ra cuan tyiño ra ta quitatu ra tañi i quitatu ra Ndyoo quivi sa ndihi zavaha ra ñuu ñiyivi.

¹¹Yucuan cuenda nanducu xaan yo cuhva quihvi yo nu cua quitatu yo yucuan; natyaa yo yahvi sii ra Ndyoo coto cuu yo tañi i cuu ñiyivi hebreo ta sa naha ta ma cuiñi yo saa yo.

¹²Vatyi tandihi cuii tuhun cahan ra Ndyoo, ndito si, ta iyo xaan cuhva sihin si. Ñihi xaan si tañi minoo espada ta cuiñi si saa si ndya añima yo ta ndya sa siñi tuñi sii yo. Ta zañaha casi Tuhun Ndyoo sii yo ñaa sa sica iñi yo sihin añima yo tatu vaha si a ña vaha si.

¹³Ñahñi maa sa cuu cuxehe nuu maa ra Ndyoo. Sito maa ra tandihi cuii sa zavaha tandihi ñiyivi nacahnu ñuu ñiyivi. Ta cua

nacuhva cuenda yo sii ra tandihí cuii sa zavaha yo.

Ra Jesús cuu ra cu zutu ya cahnu

¹⁴Ra Jesús, zehe ra Ndyoo cuu sii ra, ta maa ra cuu zutu ya cahnu sa cuenda yo ityi nuu ra Ndyoo ndya gloria. Yucuan cuenda natiin cuenda vaha yo kuhva sa sino xaan iñi yo sii ra.

¹⁵Vatyi ra cu zutu ya cahnu sa cuenda maa yo, cutuñi iñi ra ñaa cuenda cuñi yo zavaha yo cuatyí vatyi i nducu coto ihñi cuihna sii ra tandihí cuii kuhva tañi nducu coto ihñi ra sii maa yo, zoco ñá zavaha ra Jesús numinoo cuatyí.

¹⁶Yucuan cuenda ña vaha sa yuhu yo. Nacaca xaan yo sii ra Ndyoo vatyi tyindyee ra sii yo. Ta cua tyindyee ra sii yo vatyi cua cundahvi iñi ra sii yo, ta cua zaha ra tumañi iñi ra sii yo ta tyindyee ra sii yo tatu iyo sa siñi ñuhu sii yo.

5 Tandihí ra cu zutu ya cahnu sa cuenda ñiyivi hebreo, ñiyivi cuu maa ra. I casi ra Ndyoo sii ra vatyi cua cahan ra sa cuenda tandihí ñiyivi ityi nuu ra Ndyoo. Sahñi ra quití ta saha tucu ra inga sa saha maa ñiyivi sa cuenda cuatyí ñu.

²Iyo saha i zavaha tucu maa ra sa ña vaha. Yucuan cuenda cutuñi iñi maa ra kuhva iyo ñiyivi, ta vii xaan i sicoo ra sihin ñiyivi tondo ta sihin ñu i zaña ityi vaha tatu i ndu-uu iñi ñu cuatyí ñu.

³Ta sa cuenda cuatyí ñiyivi ta cuatyí tucu maa ra, ñiñi xaan cuñi sí sa cua cahñi ra quití.

⁴Zoco yivi maa ra i catyi vatyi cua quihin ra tyiño sa cuu ra ra

cu zutu. Maa ra Ndyoo i casi sii ra, zuun ñi kuhva tañi i casi ra sii ra Aarón.

⁵Ta zuun ñi kuhva cuan, ñá zanduñiñi ra Cristo sii ra, ta yivi maa ra catyi vatyi cua nduu ra minoo ra cu zutu ya cahnu. Ña tacuan. Maa ra Ndyoo cuu ra i casi sii ra Cristo. I catyi ra Ndyoo sihin ra:

Yoho cuu zehi;

Vityi zanducahnu mi suun.

⁶Ta inga saha i catyi ra Ndyoo sihin ra tyehen:

Minoo ra cu zutu cua cuun tandihí cuii tyiemvu.

Cua cuun tañi ra Melquisedec.

⁷Quiví i cuu ra Jesús minoo ñiyivi ihya ñuu ñiyivi, i cahan xaan ra sihin ra Ndyoo, ta ñihi xaan i sacu ra ta i sica xaan ra tumañi iñi sii ra vatyi cuu zacacu ra Ndyoo sii ra ta ma cuu ra. Ta i siñi ra Ndyoo sa cahan ra vatyi cua zavaha ra tandihí sa catyi ra Ndyoo.

⁸Ta vazu zehe ra Ndyoo cuu sii ra Jesús, zoco sihin kuhva i ndyehe ra tundoho ta i cutuhva ra tyaa ra yahvi sii ra Ndyoo.

⁹Ta sa yaha cutuhva ra tandihí sa cuñi ra Ndyoo sa coto ra, ta ziquí i ñihi ra kuhva saha ra sa cundito ñiyivi tandihí cuii tyiemvu, tandihí ñiyivi tyaa yahvi sii ra

¹⁰vatyi i casi ra Ndyoo sii ra sa cuu ra minoo ra cu zutu ya cahnu zuun ñi kuhva tañi i cuu ra Melquisedec.

**Ica xaan zandoo yo Tuhun
Ndyoo tatu sa sino iñi yo**

¹¹Iyo cuaha xaan sa cuñi catyi sa cuenda ra Cristo, zoco yii xaan cua

zacutuñi vehi iñi ndo vatyi zoho xaan ndo.

¹²Vityi sa naha sino iñi ndo, ta tahan si cuu ndo maestro sii inga ñiyivi. Zoco sii maa ndo siñi ñuhu ca sa zañaha ñiyivi sii ndo inga saha zuhva zuhva ñaa sa catyi Tuhun Ndyoo. Cuu ndo tañi sa lee. Ndyo vityi sihi ca ndo zicui, ta ña cuu casi vaha ndo xita. Quehin ziqui minoo cuhva, cuhva iyo ndo sihin Tuhun Ndyoo.

¹³Tatu sihi ca ndo zicui cuñi si catyi si vatyi ña cutuñi vaha iñi ndo Tuhun Ndyoo, ta cuu ndo tañi sa lee.

¹⁴Ta ña cuu casi vaha ndo xita ta cuu ndo tañi ñiyivi sahnu sa cuenda Tuhun Ndyoo tatu ma quisaha nacoto xihna ndo ñaa sa cuu sa vaha ta ñaa sa cuu sa ña vaha ta zavaha ndo maa ñi sa vaha.

6 Yucuan cuenda, nazandoo yo cuhva i cuu yo ta nu quisaha sino iñi yo sii ra Cristo, ta nacuahnu yo sa ndisa cuii sihin Tuhun Ndyoo. Ma nacani tucu ndo inga saha Tuhun Ndyoo añima ndo ta ziqui naquisaha ndaca tucu ndo tucahnu iñi sii ra Ndyoo ta quisaha sino tucu iñi ndo uu a uñi tahan saha.

²Ma zacuahha xaan ca yo ziqui cuhva yozo caa cua coo ndutya ñiyivi ta yozo caa ñihi ñiyivi Tatyí Ii. Ta ma zacuahha xaan ca yo sa cuenda yozo caa cua nandoto ñiyivi ta cuhva cua tasi tuñi ra Ndyoo sii ñu.

³Tatu cua cuhva ra Ndyoo, vityi cua yaha yo ityi nuu ca ta cahan yo inga ca tuhun.

⁴⁻⁶Ñiyivi sa sito Tuhun Ndyoo sa ndisa ta ñihi ñu sa vaha sa saha

ra Cristo sii ñu ta tiin cuenda ñu sii Tatyí Ii, ta tatu sa sito ñu vatyi vaha xaan cuu Tuhun Ndyoo ta tuu iñi ñu vatyi saha xaan ra Cristo cuhva sii ñiyivi sino iñi sii ra. Tatu sa sito ñu tandihi cuhva cuan ta zandoo ñu sii ra Cristo ta catyi ñu vatyi ña vaha ra ta ña sino ca iñi ñu, ma cuu ca zasino yo iñi ñiyivi sa caa tacuan. Ma zama tucu ñu cuhva iyo ñu inga saha. Inuu ñi nduu ñu sihin ñiyivi i sañi sii ra Cristo nuu cruz vatyi sihin cuhva zavaha ñu ta sihin cuhva sa quiñi cahan ñu saha xaan ñu ticahan nuu sii maa ra Cristo vatyi cahan xaan ñiyivi sii ra sa cuenda cuhva zavaha ñu.

⁷Tañi cuhva sii minoo ñuhu. Tatu coon vaha zavi nuu si ta sahnu vaha itu a ñaa sa tasi ñiyivi yucuan, tyindyee ñuhu cuan sii ñu, ta ñihi ñuhu cuan sa vaha sii ra Ndyoo.

⁸Zoco tatu saha si maa ñi iñu ta yucu sa ñahñi yahvi ndyaa, ñahñi yahvi ndyaa tucu ñuhu cuan. Cua catyi ñiyivi vatyi ña vaha si, ta cua cayu si.

**Nii xaan cuu iñi yo vatyi
sa sito yo vatyi cua ñihi yo
sa vaha xaan cuee ca**

⁹Ndoho hermanos, cuñi xein sii ndo, ta vazú quehin sa tacuan, zoco site vatyi iyo vaha maa ndo sihin Tuhun Ndyoo, ta ña iyo ndo tañi ñuhu ña vaha cuan. Site vatyi zavaha maa ndo sa vaha tañi zavaha ñiyivi cua cacu.

¹⁰Vatyi ndoo xaan cuu maa ra Ndyoo, ta ma naa iñi ra cuhva i zatyíño ndo tyíño ra ta cuhva cuñi xaan ndo sii ñiyivi ta tyindyee ndo sii inga ñiyivi sino iñi sii ra vatyi

cuñi xaan ndo sii maa ra. Ta tacuan zavaha ndo ndya cuhva ndya vityi.

¹¹Ta cuñi xein sa cua sino vaha iñi tahan tahan ndo sii ra Cristo ndya cua cuhva ra Ndyoo sa cundito ndo tandihi cuii tyiemvu.

¹²Ta cuhva cuan ma cuzusa ndo, zoco cua zavaha ndo cuhva zavaha ñiyivi sino xaan iñi sii ra Ndyoo. Vatyí maa ñu zandyee xaan ñu iñi ñu ndyehe ñu tundoho, ta ma zaña ñu sa sino iñi ñu vatyí sihin cuhva cuan cua ñihi ñu sa vaha sa catyi ra Ndyoo sa cua cuhva ra sii ñu.

¹³Quivi i catyi ra Ndyoo sihin ra Abraham vatyí ndisa cuii cua cuhva maa ra minoo sa cua cuhva ra sii ra Abraham, ñá ñihi ra Ndyoo zivi inga ra cahnu ca cua cahan ra ta cua coto ra Abraham vatyí ndisa cuii sa cahan ra. Yucuan cuenda i cahan ra Ndyoo zuun ñi sihin zivi maa ra vatyí ñahñi inga ca zivi cahnu ca tañi zivi maa ra Ndyoo.

¹⁴Tyehen i catyi ra Ndyoo sihin ra Abraham: “Ndisa cuii cua tyindyeyi suun, ta cua zanducuaha xein suun.” Catyi ra.

¹⁵Ta ra Abraham i zandyee ra iñi ra ta i ndatu ra quiivi cua cuhva ra Ndyoo sa sa catyi ra. Ta ndisa i ñihi ra Abraham sii si.

¹⁶Cuhva iyo ñiyivi ñuu ñiyivi, tatu saha minoo ra tuhun ra sii ñu sa cuenda minoo tyiño sa cua zavaha ra, saha tucu ra cuan zivi inga ra cahnu ca ta zivi tucu maa ra vatyí tatu ma zavaha ra cuhva catyi ra, cua tasi tuñi ra cahnu cuan sii ra. Ta sihin cuhva cuan ta ndoo ñiyivi vaha vatyí sito ñu vatyí cua zavaha ra cuhva sa sa catyi ra.

¹⁷Ta zuun ñi cuhva cuan i zavaha ra Ndyoo. I cuñi ra zañaha ra

sii ñiyivi vatyí ndisa cuii ra sa cahan ra ta ña zama ra inga cuhva, yucuan cuenda i cahan ra zuun ñi sihin zivi maa ra.

¹⁸Tacuan i zavaha ra. I saha ra tuhun ra ta i saha ra zivi ra, ta nduu tahan si cuan ma cuu zama si vatyí ma cuu cuvatyá ra Ndyoo. Ta yucuan cuenda maa yo, ra sa quihvi nu cua zacacu ra Ndyoo sii yo, cuu cuniñi xaan iñi yo ta cuu tiñi cuenda vaha xaan yo cuhva i catyi ra Ndyoo vatyí cua cuhva ra sii si sii yo.

¹⁹Tañi minoo barco, iyo minoo caa vee xaan sa zanoo ñiyivi sisi ndutya ityi zuhma barco ta ma cuu cahun barco cuan ndya vaha ñi. Ta tacuan tucu maa yo. Ma caca xaan iñi yo tatu cacu yo a ma cacu yo vatyí tuhun i saha maa ra Ndyoo sii yo, ndoo si sihin yo tandihi cuii tyiemvu. Ta vityí sa cuenda sa ñi iñi yo sii sa catyi maa ra Ndyoo sihin yo ta cuu si tañi sa sá saa yo gloria

²⁰vatyi sa cuahan maa ra Jesús ndya indyacuan. Sa cuahan maa ra ityi nuu ca sa cuenda maa yo. Ta yucuan i ñihi ra minoo tyiño sa ma ndihi sa cuu ra ra cu zutu ya cahnu zuun ñi cuhva tañi i cuu ra Melquisedec.

Zutu ya cahnu cuu ra Jesús zuun ñi cuhva tañi i cuu ra Melquisedec

7 Ra Melquisedec i cuu ra rey ñuu Salem, ta i cuu ra ra cu zutu cuenda ra Ndyoo cahnu. Ta minoo saha i tahan ra sii ra Abraham sa nasaa ra ta sa yaha sañi ra sii ohon tahan rey. Ta i zoco ñaha ra Melquisedec sii ra Abraham.

²Ta tandihi ndaha tyiño ta xuhun i nama ra Abraham sii rey ra i sahñi ra, i saha maa ra minoo sa tahan tahan usi tahan si sii ra Melquisedec. Zivi maa ra Melquisedec cuñi si catyi si “rey ra ndoo xaan”. Ta rey i cuu ra ñuu Salem. Ta sa yucuan cuñi si catyi si minoo nu cua cuyucu ñiyivi sihin sa taxi ñi.

³Ñahñi nu catyi si yoo ra cuu zutu ra Melquisedec a yoo ña cuu zihhi ra a yoo cuu inga ñiyivi sii ra. Ta ñahñi nu catyi si ama i cacu ra a ama i sihi ra. Cuu ra minoo ra cu zutu tandihi cuii tyiemvu tañi ra cu Zehe ra Ndyoo.

⁴Zaha ndo cuenda vatyí minoo ra ñiñi xaan cuu ra vatyí ra Abraham i cuu ra zutu sii tandihi ñiyivi sa sino iñi sii ra Ndyoo, ta i saha xaan ra sa vaha sa i nama ra sii ra Melquisedec.

⁵Catyí ley ra Ndyoo vatyí tandihi zehe ra Leví, ra cuu ra cu zutu, cuu quihin ra xuhun ñiyivi. Cuu quihin ra minoo sa tahan tahan usi tahan xuhun ñu. Cuu quihin ra xuhun cuan sii ra tahan ra.

⁶Zoco yivi ra tahan ra Abraham i cuu sii ra Melquisedec, zoco zuun ñi i quihin ra Melquisedec xuhun ra Abraham ta i zoco ñaha ra sii ra Abraham. Ta sii ra Abraham, i saha xaan ra Ndyoo tuhun ra.

⁷Sito tandihi ñiyivi vatyí ra cahnu ca cuu ra zoco ñaha sii inga ra.

⁸Ra cu zutu, ñiyivi sii ra Leví, quihin ra xuhun ñiyivi, ta cuee ca ta cua cuu ra, zoco cahan Tuhun Ndyoo sa cuenda ra Melquisedec tañi sa ndito ca ra.

⁹Ta ra Leví ta zehe ra, cuu ra tuhva quihin xuhun ñiyivi sa

cuenda tyiño ra sa cuu ra ra cu zutu, zoco cuu catyi yo vatyí i tyiyahvi ra Leví xuhun sii ra Melquisedec quivi i tyiyahvi maa ra Abraham vatyí ñiyivi sahnu ra Leví i cuu sii ra Abraham.

¹⁰Vatyí cua cuu ra Leví tata ra Abraham quivi i tahan ra Melquisedec sii ra Abraham.

¹¹Saha ra Ndyoo ley ra sii ra Moisés zehe ra Leví. Ta catyi ley cuan vatyí tata ra Leví cua cuu ra cu zutu. Tatu sa vatyí cuu nduvaha ñiyivi sihin ra Ndyoo sihin cuhva i zavaha zehe ra Leví, ra cuu ra cu zutu, ña siñi ñuhu sa tasi ra Ndyoo sii inga ra cu zutu tañi ra Melquisedec (ta ra Cristo cuu ra i tasi ra Ndyoo). Tatu ñá siñi ñuhu ra Cristo, cua tasi tucu ra Ndyoo sii inga ra cu zutu, ra cu zehe ra Leví, zoco ñá zavaha ra tacuan.

¹²Ta quivi i tasi ra Ndyoo sii inga nuu ra cu zutu, yucuan ta i nazama ley ra.

¹³Ta ra sa cahan yo tuhun ihya (ra Cristo cuu ra) ta yivi zehe ra Leví cuu sii ra. Ta ñiyivi sii ra ña tahan si sii ñu cahñi ñu quití ta cuhva ñu sii ti sii ra Ndyoo nu altar.

¹⁴Ra Judá i cuu ñiyivi sahnu sii ra Jesús, ta ñá catyi ra Moisés vatyí cua coo ra cu zutu sii ñiyivi sii ra Judá.

¹⁵Zoco ndisi xaan ndyehe yo vatyí i zama ra Ndyoo cuhva tuhva ñiyivi sii ra vatyí i quisi ra Cristo ta cuu ra ra cu zutu ya cahnu zuun ñi cuhva i cuu ra Melquisedec.

¹⁶Yivi tata ra Leví i cuu sii ra Cristo. Ta yucuan cuenda ña tahan si sa cuu ra ra cu zutu. Zoco cuu ra zutu vatyí iyo xaan cuhva sii ra ta vatyí ma cuu cuu ra.

¹⁷Ta tacuan i catyi minoo ra tyaa Tuhun Ndyoo nu i tyaa ra tyehen:

Yoho cua cuu minoo ra cu zutu tandihi cuii tyiemvu

Zuun ñi cuhva tañi i cuu maa ra Melquisedec.

¹⁸I tyaa siyo ra Ndyoo sii ley sahnu cuan vatyí ñá cuu tyindyee si sii ñiyivi

¹⁹vatyí ñá zanduvaha si sii ñiyivi sihin ra Ndyoo. Zoco vityi iyo inga cuhva vaha ca, ta sa cuenda maa si cuu tuhva yo sii ra Ndyoo (vatyi zanduvaha ra Cristo sii yo sihin ra Ndyoo).

²⁰I saha ra Ndyoo zivi ra quivi i catyi ra vatyí ma naa cuhva sa cuu ra Cristo minoo ra cu zutu tandihi cuii tyiemvu.

²¹Ñá cahan ra Ndyoo cuhva cuan sa cuenda inga ra cu zutu, zoco ñihi xaan i cahan ra Ndyoo ta i saha ra zivi ra quivi i saha ra tyiño sii ra Cristo, ta i catyi ra:

Sa cahan ra Ndyoo, ta ma zama ra inga cuhva:

“Yoho cua cuu minoo ra cu zutu tandihi cuii tyiemvu

Tañi ra Melquisedec.”

²²Sa cuenda ra Cristo, vaha xaan ca tyiño saa ya ta ziqui tyiño sahnu.

²³Cuhva i sicoo tyiño sahnu cuan, cuaha xaan ra cu zutu i sicoo vatyí tuhva ra cuan sihi ta ziqui ñá cuu ca zavaha ra tyiño cuan.

²⁴Zoco ra Cristo cuu ra cu zutu tandihi cuii tyiemvu vatyí ma cuu ca ra cuan.

²⁵Yucuan cuenda cuu zacacu ndisa cuii ra sii tandihi ñiyivi natuhva sii ra Ndyoo sa cuenda maa ra vatyí ndito ra tandihi cuii tyiemvu, ta cuu cahan ra sihin ra Ndyoo sa cuenda yo.

²⁶Maa ra cuu ra cu zutu sa siñi ñuhu sii yo vatyí ii xaan ra; yoñi cuu tyaa cuatyí sata ra. Numinoo saha ta ñá zavaha ra sa ña vaha. Vazu ñiyivi cuu ra tañi maa yo, zoco ñahñi cuatyí ra, ta iin ñi ndyaa ra sihin ra Ndyoo gloria.

²⁷Ña zavaha ra tañi i zavaha ra cu zutu ta sa naha vatyí ña cuñi si sa cahñi ra quiti tandihi quivi sa cuenda cuatyí maa ra ta sa cuenda cuatyí ñiyivi vatyí sa yaha zavaha ra cuhva cuan quivi i saha ra sii maa ra ta i sihi ra sa cuenda maa yo.

²⁸Cuhva i sicoo ley sahnu, ndya maa ra cu zutu ta i sicoo cuatyí ra, zoco cuee ca i saha ra Ndyoo zivi ra ta i tyaa tyiño ra sii zehe ra sa cuu ra ra cu zutu, ta ñahñi cuatyí ra iyo tandihi cuii tyiemvu.

Cahan ra Jesús sihin ra Ndyoo sa cuenda yo

8 Ihya cuu minoo sa ñiñi sa i catyi ndi sihin ndo. Iyo minoo zutu ya cahnu sa cuenda maa yo. Vaha ca ra ta ziqui ra cu zutu i zatyíño tyiño ra Ndyoo cuhva sahnu. Ndyaa ra gloria siyo cuaha ra Ndyoo nu ndyaca ñaha ra Ndyoo tandihi.

²Yucuan zatyíño ra Cristo nu ii, nu cu si vehe ñuhu ra Ndyoo sa ndisa vityí. Maa ra Ndyoo i zavaha sii si ta yivi ñiyivi.

³Tahan tahan ra cu zutu ya cahnu cuñi si sa cua coo sa cua cuhva ra sii ra Ndyoo. Yucuan cuenda cuñi si sa coo tucu sa cua cuhva ra Cristo sii ra Ndyoo.

⁴Tatu sa vatyí ndyaa ra Cristo ñuu ñiyivi vityí, ma cuu ra minoo zutu

ya cahnu ihya ñuu ñiyivi vatyi sa iyo ra saha sa saha ra sii ra Ndyoo cuhva catyi ley sahnu.

⁵Ra yucuan zavaha ra minoo cuhva ñi, ta zacahnu ra sii ra Ndyoo sisi minoo vehe sa caa tañi caa sa iyo sisi gloria. Vatyi quivi sa cuñi zandaa ra Moisés sii si i catyi ra Ndyoo sihin ra vatyi nazacuenda vaha ra ta zavaha ra sii si tañi cuhva i zañaha ra Ndyoo sii ra xiñi yucu Sinaí.

⁶Zoco ra Cristo, i ñihi ra minoo tyiño vaha xaan ca ta ziqui tyiño i zavaha ra cu zutu ta sa naha. Sa cuenda tyiño saa i zandaa ra Ndyoo sihin ñiyivi sino iñi sii ra Cristo ta vityi cahan ra Cristo sa cuenda yo sihin ra Ndyoo. Vaha ca tyiño saa ya ta ziqui tyiño sahnu cuan vatyi vaha ca cuhva i cahan ra Ndyoo quivi i zandaa ra sii si.

⁷Ñá zatyño vaha tyiño sahnu cuan vatyi tatu sa vatyi i zatyño vaha si ma cuñi si sa coo inga sa saa.

⁸Zoco zuun ñi maa ra Ndyoo catyi vatyi cuñi si sa zama tyiño sahnu cuan vatyi i catyi ra:

Cua coo quivi sa cua zandei inga tyiño sihin ñiyivi hebreo, ñu ndyaa nu cu si Israel ta ñu ndyaa nu cu si Judá.

⁹Ma cuu si tañi tyiño i zandei sihin ñiyivi sahnu sii ñu quivi i tave sii ñu ñuu Egipto;

Vatyi maa ñu, ña tyaa ñu yahvi tyiño i zandei sihin ñu,

Ta yucuan cuenda i zandoo ihne sii ñu.

Catyi ra Ndyoo.

¹⁰Zoco ihya cuu tyiño saa sa cua zandei sihin ñiyivi hebreo cuee ca, catyi ra Ndyoo.

Cua tyei ley sisi sa siñi tuñi xiñi ñu ta sisi añima ñu;

Ta yuhvi cua cuu Ndyoo sii ñu, Ta maa ñu cua cuu ñiyivi sii.

¹¹Ta ma cuñi ca si sa zacuaha ñu sii ñiyivi yucu vatyi sihin ñu a sii ra tahan ñu.

Ma cuñi si sa catyi ñu: “Nacoto ndo sii ra Ndyoo”;

Vatyi tandihi cuii ñu cua coto sii mi, ndya ra sahnu ca ta ndya ra ndyahi.

¹²Vatyi cua cundahvi iñi sii ñu sa cuenda sa ña vaha sa i zavaha ñu,

Ta ma nacohon ca iñi cuatyi ñu.

¹³Quivi i cahan ra Ndyoo cuhva ya sa cuenda minoo tyiño saa, cuñi si catyi si vatyi sa zandihí ra cuhva sa cuenda tyiño sahnu. Ta sa cua naa si.

Vehe ñuhu sa iyo ñuu ñiyivi ta vehe ñuhu sa iyo andivi

9 Sa xihna ñi tyiño i zandaa ra Ndyoo sihin ñiyivi, saha ra cuhva sii ñu yozo caa cua zacahnu ñu sii ra. Ta i sicoo minoo vehe ñuhu ihya ñuu ñiyivi nu i zacahnu ñu sii ra.

²⁻³I zavaha ñiyivi tañi minoo vehe zahma. Ta sisi si i sicoo uu tahan cuarto vatyi tyazi zava ñu sihin zahma. Sa xihna ñi cuarto cuan nañi si Nu Ii, ta sisi si i siyucu minoo candelero ta minoo mesa nu siyozo pan ii. Ta cuarto sa cu uu cuan, nañi si Nu Ii Xaan Ca.

⁴Sisi sa cu uu cuarto cuan i siyucu minoo altar xuhun cuan nu i sahmi ra cu zutu ya cahnu cutu ta minoo caja iñi xuhun cuan sa ñoho yuu nu ndyaa sa usi tahan

nduzu ñuhu ta tutatu ra Aarón ta minoo quiyi xuhun cuaan sa ñoho zuhva maná.

⁵Xiñi caja cuan nandyaa uu tahan ángel xuhun cuaan. Nañi si querubines. Ta ndyaa sa ndisi xaan sii maa ra Ndyoo nuu si. Ta zaaa nduu tahan ángel cuan ndisi si nuu caja cuan nu nañi si Nu Zaha Ra Ndyoo Tucahnu Iñi Sii Niyivi. Ma cuu nacatyí casi tandihi ca si sihin ndo vityi.

⁶Ta tatu sa ndyaa listo tandihi ndaha tyiño cuu quihvi ra cu zutu sisi cuarto sa xihna ñi cuan ñaa ñi cuhva cuñi ra sa cuenda sa zavaha ra tyiño ra.

⁷Zoco minoo tuhun ñi ra cu zutu ya cahnu cuu quihvi sisi cuarto cu uu cuan. Cuu quihvi ra minoo tuhun ñi saha sa minoo cuiya. Ta ñaa ra ñiñi quití sa cua quití ra nu nañi si Nu Zaha ra Ndyoo Tucahnu Iñi Sii Niyivi. Tacuan i zavaha ra sa cuenda cuatyí maa ra ta sa cuenda cuatyí tandihi ñiyivi.

⁸Ta sihin tandihi cuhva cuan zañaha Tatyí Ii sii yo vatyí quivi cuan ñá cuu quihvi ndya vaha ñi ñiyivi nu ndyaa ra Ndyoo vatyí ndyaa inga vehe ñuhu cuan, ta maa ñi ra cu zutu cuu quihvi yucuan.

⁹Ta cuhva cuan zañaha si minoo cuhva ñiñi xaan sii maa yo vatyí sihin cuhva sahnu cuan i saha maa ra cu zutu sa saha maa ñiyivi sii ra Ndyoo, zoco ñá zanduvaha si sii ñu sa ndisa cuii.

¹⁰Vatyí cuhva sahnu cuan i cahan si maa ñi sa cuenda ñaa sa cuu casi ñiyivi ta ñaa sa cuu coho ñu ta yozo caa cua ndundií ñu, ta saha si cuaha nuu ley sa cua tyaa ñu

yahvi. Tandihi ihya zañaha si sii ñiyivi vatyí iyo cuatyí ñu ityi nuu ra Ndyoo. Cuhva sahnu cuan cuu sa cuñi ra Ndyoo sa cua zavaha ñiyivi ndya cua cuhva ra minoo cuhva saa sa vaha xaan ca.

¹¹I quisi ra Cristo vatyí cua cuu ra ra cu zutu ya cahnu sa cuenda minoo cuhva vaha ca, ta i quihvi ra sisi vehe ii sa ii xaan ca vatyí ndyaa si gloria. Yivi ñiyivi i zavaha sii si, ta ña ndyaa si nuu ñiyivi ya.

¹²Ta ñá quihvi ra Cristo yucuan sihin ñiñi mvee ta sihin ñiñi minoo zindiqui luhlu. I quihvi ra nu ii xaan ca sisi gloria nu ndyaa ra Ndyoo vatyí sa sati ra ñiñi maa ra, ta sihin cuhva cuan i ñihi ra cuhva zandasi ra cuatyí tandihi yo tandihi cuii tyiemvu.

¹³Ta tatu sihin cuhva sahnu sa sati ñiñi mvee ta ñiñi zindiqui ta sa sahmi ñiyivi sii zindiqui ta cuu nduvaha ñiyivi zuhva sihin ra Ndyoo,

¹⁴vaha xaan ca cuu si vityí sihin ñiñi ra Cristo vatyí ñahñi cuatyí maa ra, ta i saha ra sii ra sii ra Ndyoo vatyí cua cuu ra sa cuenda cuatyí maa yo. I tyindyee Tatyí Ii sii ra, ta i cuu zavaha ra cuhva cuan. Zanduvaha si sii yo sa ndisa cuii, ta vityí ma caca xaan ca iñi yo yozo caa cua cuu ndasi cuatyí yo. Vityí tyaa yo yahvi sa ndisa cuii sii ra Ndyoo ndito.

¹⁵Ra Cristo cuu ra cahan saha ñiyivi ityi nuu ra Ndyoo sa cuenda tyiño saa i zandaa ra Ndyoo. Tacuan zavaha ra vatyí tacuan ta ñiyivi i casi ra Ndyoo cua cuu ñihi ñu sa ndasi cuatyí ñu tandihi cuii tyiemvu vatyí yucuan cuu

sa catyi ra Ndyoo sa cua cuhva ra sii ñu. Cua ñihi ñu sii si vatyi i sihi ra Cristo, ta yucuan cuenda ma tyiyahvi ca maa ñu sa cuenda cuaty i zavaha ñu quivi i sindyaa ñu sihin tyiño sahnu i zandaa ra Ndyoo, quivi tañaha ca zandaa ra tyiño saa.

¹⁶Tatu sa sihi minoo ñiyivi ta i zandoo ra minoo tutu ta catyi si ñaa ndaha tyiño ra cua ñihi minoo minoo ñiyivi sii ra, yoñi cua ñihi ndaha tyiño cuan tatu ma cuu zañaha ñu vatyi i sihi ndisa cuii sito ho si.

¹⁷Zoco tatu i sihi ndisa cuii ra, tacuan ta ziqui cuu cutyiño ñu tutu i tyaa ra sa cuenda ndaha tyiño ra, ta cacu ndisa cuii tyiño i zandaa ra sa cuenda si.

¹⁸Yucuan cuenda ndya sa xihna ñi tyiño i zandaa ra Ndyoo ta i sati niñi quiti sa cuenda si vatyi cuñi si sa coo minoo sa cuu ta cua coto ñiyivi vatyi cua zavaha ra Ndyoo cuhva catyi ra.

¹⁹Vatyi sa yaha nacaty i ra Moisés tandihi usi tahan ley maa ra Ndyoo sihin tandihi ñiyivi, ta ziqui i quihin ra niñi zindiqui lee ta niñi mvee, ta i tyihi ra ndutya, ta i zatyii ra zuhva zoco yutu sa nañi hisopo sa nuhñi sihin yuhva cuaha, ta i quiti ra sii si nuu tutu nu ndyaa ley cuan, ta i zatyii ra sii si ta sii tandihi ñiyivi sihin niñi ta ndutya cuan.

²⁰Ta i catyi ra Moisés: “Ihya cuu niñi sa cuenda tyiño zandaa ra Ndyoo sihin ndo. Ihya cuu cuhva catyi ra cua zavaha ndo.” Tacuan i catyi ra Moisés.

²¹Ta zuun ñi cuhva cuan i quiti ra niñi sisi vehe ñuhu cuan ta nuu

tandihi ndaha tyiño sa sityiño ñiyivi sa cuenda sa zacahnu ñu sii ra Ndyoo quivi cuan.

²²Cuhva catyi ley sahnu cuan cuñi si catyi si sa sa vatyi tandihi nduvaha ityi nuu ra Ndyoo sihin sa quiti ñiyivi niñi nuu si. Ta tatu ñahñi niñi cua cati, ma cuu ndasi cuaty i ñiyivi.

I zandih i ra Cristo cuhva iyo sii cuaty i quivi i saha ra sa cuu ra

²³Ta ndaha tyiño sa iyo ñuu ñiyivi ya, minoo cuhva ñi cuu si sii sa iyo sisi gloria. Ta zuun ñi cuhva sa nduvaha si ityi nuu ra Ndyoo, ta tacuan tucu cuñi si sa ndu-ii sa iyo sisi gloria, zoco sihin minoo cuhva vaha xaan ca.

²⁴Vatyi ra Cristo ñá quihvi ra sisi minoo vehe i zavaha ñiyivi sa caa cuhva caa vehe sa cuu vehe ra Ndyoo sa ndisa. I quihvi maa ra sisi gloria, ta cahan ra sihin ra Ndyoo sa cuenda maa yo.

²⁵Ña cuñi si sa cuu ra Cristo cuaha saha tañi zavaha ra cu zutu ya cahnu hebreo ihya ñuu ñiyivi nu quihvi ra vehe ii sihin niñi quiti tahan tahan cuiya.

²⁶Vatyi tatu tacuan cuñi si sa cuenda ra Cristo, cua ndyehe ra tundoho cuaha saha ndya ta sino ñuu ñiyivi ta ndya vityi. Zoco ña tacuan cuu si. I quisi ra Cristo minoo saha ñi, ta i quisi ra vatyi cua zandih i ra cuhva iyo sii cuaty i. Ta i zandih i ra cuhva iyo sii si quivi i saha ra sa cuu ra.

²⁷Ta ñuu ñiyivi ya, minoo saha ñi cua cuu yo, ta ziqui cua tyicuhva ra Ndyoo sii yo.

²⁸Ta zuun ñi cuhva cuan i cuu si sihin ra Cristo. I sihi ra minoo saha

ñi sa cuenda cuatyí cuaha ñiyivi. Ta cua quisi ra inga saha zoco yivi ca sa cuenda sa cua cuu ra sa cuenda cuatyí yo. Inga saha cua quisi ra vatyí cua zacacu ra sii ñiyivi sa ndatu xaan sii ra.

10 Ley sahnu cuan, i cuu si tañi minoo xiñahñu ñi sii sa vaha sa cua coo cuee ca, zoco yivi sa vaha cuan cuu ley sahnu cuan sa ndisa vatyí sa cuenda cuhva sahnu cuan ta tahan tahan cuiya ta saha maa ñiyivi sa saha ñu sii ra Ndyoo, zoco ñá cuu zanduvaha si sii ñu sihin ra Ndyoo sa ndisa cuii.

²Tatu sa vatyí i nduvaha ñu sihin ra Ndyoo sa ndisa sihin cuhva cuan, minoo tuhun ñi saha cua zavaha ñu sii si ta sa ndasi ñi cuatyí ñu ta ma caca ca iñi ñu sa iyo ca cuatyí ñu.

³Zoco i saha ñu sa saha ñu sii ra Ndyoo tahan tahan cuiya, ta i nacohon iñi ñu cuatyí ñu cuhva cuan.

⁴Vatyí niñi zindiqui ta niñi mvee, ma cuu zandasi si cuatyí yo.

⁵Yucuan cuenda quivi i quisi ra Cristo ñuu ñiyivi i catyí maa ra sihin ra Ndyoo Zutu ra:

Ña cuzii iñun sihin sa sahañi ñiyivi quiti ta saha ñu suun a ñaa inga sa cua cuhva ñu suun.

Yucuan cuenda i zavohon coño ñuhi vatyí cua cuu cuhve sii si suun.

⁶Ñá tahan iñun ñaa sa cua cahmi ñiyivi a ñaa sa cua cuhva ñu sa cuenda cuatyí ñu.

⁷Ta ziqui i catyí mi: “Ndyehe Ndyoo Zuti sa vasi zavehi cuhva cuñun

Tañi catyí si nuu tutu moo.”

⁸Tacuan i catyí ra Cristo, ta nu i catyí ra: “Ña cuñun ta ña tahan iñun ñaa sa saha maa ñiyivi ta sa saha ñu sa cuenda cuatyí ñu cuhva catyí ley sahnu”,

⁹ta ziqui i catyí tucu ra: “Ndyehe, vasi zavehi cuhva cuñun.” Ta sihin cuhva cuan ta zandihí ra Cristo cuhva sahnu ta quisaha tucu ra inga cuhva saa.

¹⁰Ta sihin cuhva saa ya, ndasi cuatyí yo, ta nduvaha yo sihin ra Ndyoo tandihí cuii tyiemvu vatyí sihi ra Cristo sa cuenda yo.

¹¹Sihin cuhva sahnu cuan nandyaa ra cu zutu ityi nuu altar tandihí quivi, ta tandihí quivi saha xaan ra sa saha ra sii ra Ndyoo, zoco ñá cuu zandasi si cuan cuatyí ñiyivi numinoo saha.

¹²Zoco i saha maa ra Cristo zuun ñi sii maa ra sii ra Ndyoo sa cuenda cuatyí yo minoo tuhun ñi saha, ta ziqui i sicundyaa ra siyo cuaha ra Ndyoo.

¹³Ndatu ra quivi sa cua tyihi ra Ndyoo sii tandihí ra xaan iñi sii ra sisi saha ra.

¹⁴Vatyí sihin sa minoo tuhun ñi saha i sihi ra Cristo ta ndisa cuii i zanduvaha ra ityi nuu ra Ndyoo sii tandihí ñiyivi cua sino iñi sii ra.

¹⁵Ta saha tucu Tatyí Ii sa ndaa sa cuenda si vatyí catyí ra:

¹⁶Ihya cuu tyiño cua zandei sihin ñiyivi hebreo

Vazu ñá zavaha ñu cuhva catyí inga tyiño i zandei sihin ñu sa xihna ñi.

Cua tyei lei sisi añima ñu, Ta cua tyei sii si sisi sa siñi tuñi xiñi ñu.

(Tacuan ta cua zavaha ñu sii si.)

¹⁷Ta ziqui i catyi tucu ra Ndyoo:

Ta ma nacohon ca iñi cuatyí ñu ta cuhva ñá tyaa ñu yahvi sii.

¹⁸Ta tatu sa zandasi ra Ndyoo cuatyí ñiyivi, ña cuñi ca si sa cahñi ñiyivi quití a sa cuhva ñu inga sa cua cuhva ñu sii ra Ndyoo sa cuenda cuatyí ñu.

Cuñi si sa natuhva yo sii ra Ndyoo

¹⁹Yucuan cuenda, ndoho hermanos, cuu quihvi maa yo nu ii xaan ca nu ndyaa ra Ndyoo vatyí i sati ra Jesús niñi ra.

²⁰Ihya cuu cuhva saa i nuña ra Cristo sa cuenda maa yo vatyí i saha ra sa cuu ra. Ta cuhva cuan i ndata minoo zahma sa ndita caa nuu ra Ndyoo, ta vityí cuu quihvi yo nu ndyaa ra Ndyoo, ta cua cundito yo tandihi cuii tyiemvu.

²¹Vityí ra cu zutu ya cahnu sa cuenda maa yo ndyaca ñaha ra tandihi vehe ra Ndyoo.

²²Yucuan cuenda natuhva yo sii maa ra Ndyoo. Ta ma ndu-uu iñi yo. Niñi xaan cuu iñi yo vatyí cua tiñ cuenda ra sii yo vatyí sa nacatya niñi ra Cristo añima yo, ta ma caca xaan ca iñi yo sa cuenda cuatyí yo vatyí ñahñi ca si, ta sa sicoo ndutya yo.

²³Ta vityí ma ndu-uu iñi yo, ta ma caca xaan iñi yo tatu cua zacacu ra Ndyoo sii yo a ma zacacu ra vatyí sa i catyi ra vatyí cua zacacu ra sii yo, ta niñi xaan cuñi si cuu iñi yo sii ra.

²⁴Ta nanducu yo cuhva tyindyee tahan yo sii tahan yo, ta cuhva cuan cua cuñi xaan ca yo sii tandihi hermano, ta cua zavaha xaan ca yo sa vaha.

²⁵Iyo ñiyivi ña sahan ca ñu culto, zoco maa yo ma zandoo yo sa tatahan yo. Ta nacuhva yo tundyee iñi sii minoo yo ta sii inga yo, ta ñihi ca cuñi si vityí vatyí ndyehe ndo vatyí sa cuñi saa quivi cua tyicuhva ra Ndyoo sii ñiyivi.

²⁶Ta vityí sa sito yo ñaa sa cuu sa ndisa, ta tatu catyi yo vatyí ña sino ca iñi yo, ma cuu ca zandasi ra Ndyoo cuatyí yo tatu tacuan zavaha yo.

²⁷Ma cuu caca iñi yo vatyí cua ñihi yo sa vaha, tatu tacuan zavaha yo. Cua cuxaan xaan ra Ndyoo sihin yo quivi cua tasi tuñi ra sii ñiyivi. ñin ñi cua cayu yo sihin ñiyivi xaan iñi sii ra Ndyoo.

²⁸Ta sa naha tatu ñá tyaa minoo ñiyivi yahvi sii ley i saha ra Ndyoo sii ra Moisés, ta tatu i saha uu a uñi tahan ñiyivi sa ndaa sa cuenda cuatyí ra, ñá cundahvi iñi ñiyivi sii ra. I sahñi ñu sii ra.

²⁹¿Atu ña sito ndo vatyí ñihi xaan ca tahan si ndoho ñiyivi ña sino iñi sii Zehe ra Ndyoo? Ña tyaa ñu yahvi sii niñi ra Cristo sa sati ra quivi i zandaa ra Ndyoo tyiño saa sihin yo. Ta zacuxaan ñu sii Tatyí Ii cuhva cuan. Ta saha ra Ndyoo Tatyí Ii ra sii yo vatyí tyindyee ra sii yo.

³⁰Ta sito maa yo sii ra i catyi: “Yuhvi cuu ra cua cañi sii ñiyivi. Cua tasi tuñi sii ñu sa cuenda sa ña vaha sa i zavaha ñu.” Ta iyo tucu inga nu catyi si tyehen: “Cua tyicuhva ra ndyaca ñaha sii yo sii ñiyivi sii ra.” Catyi si.

³¹Minoo sa zayuhu xaan sii yo cua cuu si tatu tahan si sii yo sa cañi ra Ndyoo sii yo.

³²Zoco nacohon iñi ndo cuhva i cuu si sihin ndo quivi nacaa

quisaha sino iñi ndo sii ra Cristo. I ndoo ndo sihin ra Cristo vazu yii xaan i cuu si, ta i ndyehe xaan ndo tundoho sa cuenda ra.

³³Iyo saha i zacucahan xaan ñiyivi nuu ndo ityi nuu cuaha xaan ñiyivi. Quiñi xaan i cahan ñu sii ndo, ta i zandyehe xaan ñu tundoho sii ndo. Ta iyo saha i ndyehe ndo tundoho vaty i zandyehe ñiyivi tundoho sii inga ra tahan ndo.

³⁴Vaty i cundahvi iñi ndo sii ra ñoho vehe caa. Ta zii xaan i cuñi ndo vazu i nama ñiyivi ndaha tyiño ndo vaty sito ndo vaty cua ñihi ndo ndaha tyiño vaha ca sa ma tiv i ta ma cunaa.

³⁵Yucuan cuenda ma zaña ndo sa sino iñi ndo sii ra Cristo vity vaty cuee ca cua ñihi xaan ndo sa vaha sa cuenda si.

³⁶Cuñi si sa zandyehe xaan ndo iñi ndo, ta cua cuu zavaha ndo cuhva cuñi ra Ndyoo, ta ziqui cua ñihi ndo sa sa catyi ra Ndyoo vaty cua cuhva ra sii ndo.

³⁷Vaty catyi Tuhun Ndyoo: “Ña cucuee xaan ca ra. Sa cuñi quisi ra cua quisi.

³⁸Ta ra sa nduvaha ityi nuu ra Ndyoo vaty sino iñi ra sii ra, cuñi si sa ñii xaan cuu iñi ra sii ra tandihi saha vaty tatu quisaha nayuhu ra ta ndu-uu iñi ra, ma cuzii ca iñi maa ra Ndyoo sihin ra.” Tacuan catyi ra Ndyoo.

³⁹Zoco maa yo, yivi ñiyivi cunanuhu sata cuu yo. Maa ñu cuu ñiyivi cunaa. Zoco maa yo cuu ñiyivi sa ña zandoo sa sino iñi yo, ta cua cacu aña yo.

**Cuhva cuñi si sa cunii
iñi yo sii ra Ndyoo**

11 Tatu ñii cuu iñi yo sii ra Ndyoo sa ndisa cuii, sito

vaha yo vaty tatu iyo minoo sa sa catyi ra Ndyoo sa cua cuhva ra sii yo ta vazu ña ndyehe yo sii si vityi, zoco cuee ca cua ñihi yo sii si.

²Ñiyivi i sino xaan iñi sii ra Ndyoo ta sa naha ñii xaan i cuu iñi ñu sii ra, ta yucuan cuenda i catyi ra Ndyoo vaty vaha ñu.

³Sihin sa ñii iñi yo ta sito yo vaty i cahan ra Ndyoo ta i sino ñuu ñiyivi. Cuu ndyehe yo sii si, zoco i sino si sihin sa ña cuu ndyehe yo.

⁴Ñii xaan i cuu iñi ra Abel, ta yucuan cuenda vaha ca sa i saha maa ra sii ra Ndyoo ta ziqui sa i saha ra Caín. I quihin ra Ndyoo sii sa i saha ra Abel, ta sihin cuhva cuan i zañaha ra vaty ndoo xaan i cuu ra Abel. Ta vazu sa naha sihi ra Abel, zoco siñi ca yo tuhun ra vazu ndya vityi cuhva i sino xaan iñi ra sii ra Ndyoo.

⁵I sino xaan iñi ra Enoc sii ra Ndyoo, ta yucuan cuenda ñá sihi ra. Cuahan ra sihin ra Ndyoo ñi vaty zii xaan i cuñi ra Ndyoo sihin ra.

⁶Tatu ña ñii cuu iñi yo sii ra Ndyoo, ña zii cua cuñi ra sihin yo vaty yoo ra cuñi tuhva sii ra Ndyoo, cuñi si vaty cua sino iñi ra vaty iyo ra Ndyoo, ta cuñi si vaty cua sino iñi ra vaty saha ra Ndyoo sa vaha sii ñiyivi nanducu sii ra.

⁷Ñii i cuu iñi ra Noé sii ra Ndyoo. I cahan ra Ndyoo sihin ra sa cuenda minoo sa cua coo ityi nuu ca, ta vazu tañaha ca ndyehe ra Noé minoo sa tacuan, zoco i tyaa ra yahvi sa cahan ra Ndyoo ta i zavaha ra minoo barco, ta cuhva cuan i zacacu ra sii ñiyivi sii ra. Sihin cuhva i sino iñi ra Noé sii ra Ndyoo ta i zañaha si vaty ñá sino

iñi tandihí inga ñiyivi. Ta sa cuenda sa sino iñi ra Noé ta i ndyehe ra Ndyoo sii ra tañi sa ñahñi cuatyí ra.

⁸Nñi iñi ra Abraham sii ra Ndyoo, ta i cana ra Ndyoo sii ra vatyí cua quita ra ñuu ra ta cuhun ra inga ñuu sa cua cuhva ra Ndyoo sii ra. Ta vazu ñá sito ra Abraham ndyamaa cua cuhun ra, zoco i tyaa ra yahvi ta cuahan ra.

⁹Ta quivi i saa ra inga ñuu cuan, nñi xaan i cuu iñi ra sii ra Ndyoo ta ñá zandaa ra minoo vehe vaha vatyí sa sito ra vatyí yivi ñuu maa ra cua cuu si ta yivi yucuan cua ndoo ra. Ta tacuan tucu i zavaha ra Isaac ta ra Jacob.

¹⁰Tacuan i zavaha ra Abraham vatyí ndatu ra sa cua cundyaca ra Ndyoo sii ra ndya inga ñuu vaha ca, ñuu i zavaha maa ra Ndyoo.

¹¹Nñi xaan cuu iñi maa ña Sara sii ra Ndyoo, ta i sicoo zehe ña vazu sa sahnu xaan ña, ta yivi ca ñaha coo zehe cuu ña. Zoco i ñihi ña zehe vatyí sica iñi ña vatyí cua zavaha ra Ndyoo cuhva catyí ra.

¹²Ta yucuan cuenda i sicoo xaan ñiyivi sii ra Abraham. Vazu sa sahnu xaan ra ta ma cuu ca coo zehe ñu, zoco i sicoo minoo, ta i sicoo cuaha xaan ñiyivi sii ra tañi iyo cuaha xaan tiñoo andivi a tañi ñiyiti sa iyo yuhu tyañuhu.

¹³Tandihí ñiyivi sa quehin tuhun ihya, nñi xaan i cuu iñi ñu sii ra Ndyoo, zoco i sihi ñu ta ñá ñihi ñu tandihí sa catyí ra Ndyoo vatyí cua cuhva ra, zoco i sito ñu vatyí cua quisi si cueue ca ta zii xaan i cuñi ñu, ta i catyí ñu vatyí yivi ñuu ñu cuu ñuu ñiyivi ya sa ndisa.

¹⁴Ta ñiyivi cahan cuhva cuan, zacoto ñu vatyí cuñi xaan ñu cuhun

ñu sica ca (ndya gloria nu cu ñuu ñu sa ndisa cuii).

¹⁵Vatyí tatu sa vatyí i ñoho xaan iñi ñu ñuu ñu nu i quita ñu, cuu cunanuhu ñu tatu cuñi ñu.

¹⁶Zoco ñá cuñi ñu cunuhu ñu ndya ñuu ñu vatyí cuñi ñu cuhun ñu inga ñuu vaha ca sa cuu gloria. Yucuan cuenda ña cahan nuu ra Ndyoo catyí ra vatyí Ndyoo cuenda ñu cuu sii ra, ta i zavaha ra minoo ñuu ndya andivi nu cua cuhun ñu.

¹⁷Quivi i nducu coto ihñi ra Ndyoo sii ra Abraham nñi xaan i cuu iñi ra Abraham vazu i catyí ra Ndyoo vatyí cahñi ra sii ra Isaac zehe ra. Ta ra Isaac i cuu minoo tuhun ñi zehe ra Abraham. Zoco i tyaa xaan ra Abraham yahvi sii ra Ndyoo vatyí i sino xaan iñi ra tuhun i saha ra Ndyoo sii ra.

¹⁸Vatyí sa i catyí ra Ndyoo sihin ra Abraham: “Sa cuenda ra Isaac ta cua coo cuaha xaan ñiyivi suun.”

¹⁹I sino iñi ra Abraham vatyí cuu zanandoto ra Ndyoo sii ñiyivi vazu sa sihi ñu. Ta cuu catyí yo vatyí i nandoto ra Isaac vatyí sa ndyaa sa cua cuu ra, ta ziqui i nacuhva ra Ndyoo sii ra sii zutu ra, ta ñá sihi ra.

²⁰Sa cuenda sa vatyí i sino iñi ra Isaac vatyí zavaha ra Ndyoo cuhva catyí ra, ta i sica ra sii ra Ndyoo vatyí cua cuhva xaan ra sa vaha ityi nuu ca sii ra Jacob ta ra Esaú zehe ra.

²¹Sa cuenda sa vatyí i sino iñi ra Jacob vatyí zavaha ra Ndyoo cuhva catyí ra, ta i sica xaan ra sa vaha sii ra Ndyoo sa cuenda tahan tahan zehe ra José. Quivi sa cuñi cuu ra Jacob ta si-iñi ndyaa ra sihin tutatu

ra, ta i zacahnu ra sii ra Ndyoo, ta i sica ra sa vaha cuan sii ra.

²²Sa cuenda sa vaty i sino iñi ra José vaty zavaha ra Ndyoo cuhva caty ra, ta quivi sa cuñi cuu ra i cahan ra sa cuenda yiqui ra. Ta caty ra vaty cuñi ra vaty naquihin ñiyivi yiqui ra cahun sihin ñu quivi cua quita ñu ñuu Egipto.

²³Nii xaan i cuu iñi zutu ta zih i ra Moisés sii ra Ndyoo, ta yucuan cuenda ñá saha ñu sa cuu ra. Quivi i cacu ra ta i ndyehe ñu vaty ndasa xaan ra, ta i tyixehe ñu sii ra uñi tahan yoo vaty ñá yuhu ñu sii ley i cahan rey ñuu cuan nu i caty ra vaty cua cuu tandihi rayii ndiyi zehe ñiyivi.

²⁴Ta ra Moisés tucu nii xaan i cuu iñi ra sii ra Ndyoo, ta quivi i sahnu ra, ñá cuñi ra cuu ra zehe ñaani ra rey Faraón.

²⁵Tahan ca iñi maa ra sa cua ndyehe ra tundoho sihin ñiyivi sino iñi sii ra Ndyoo, ta ma cuzii iñi ra zuhva quivi zavaha ra cuaty tañi zavaha ñiyivi ñuu Egipto.

²⁶I sica iñi ra vaty vaha ca cua ndyehe ra tundoho sa cuenda ra Cristo, ra cua quisi cuee ca. Vaha xaan ca cuhva cuan ta ziqui tandihi xuhun cuan ñuu Egipto cuñi ra Moisés vaty ndatu ra sa cua cuhva ra Ndyoo minoo sa vaha xaan ca sii ra cuee ca.

²⁷Nii xaan i cuu iñi ra sii ra Ndyoo, ta yucuan cuenda i quita ra ñuu Egipto, ta ñá yuhu ra vazu i cuxaan xaan ra rey sihin ra. I zandyee xaan ra iñi ra vaty sito ra vaty cuahan ra Ndyoo sihin ra.

²⁸Nii i cuu iñi ra sii ra Ndyoo, ta i zavaha ra cuhva caty ra sa

cuenda sa cua cuu minoo mvee ticaty lee tahan tahan vehe ta cua cahyi ñiyivi niñi ti yutu yuvehe ñu. Tacuan i zavaha ra vaty ma cahñi ángel ra Ndyoo sii ra cu zehe nuu ñiyivi hebreo.

²⁹Ta nii i cuu iñi tandihi ñiyivi hebreo sii ra Ndyoo. Yucuan cuenda i yaha ñu Tyañuhu Cuaha cuan tañi sa sica ñu nu ñuhu ityi. Zoco ñiyivi ñuu Egipto cuan, ñá cuu yaha ñu. I sihi ñu sisi tyañuhu cuan.

³⁰Zuun ñi sa cuenda sa nii cuu iñi ñu hebreo, ta i nduva nuzama siconduu ñuu Jericó vaty i siconduu tandihi ñu yuñuu Jericó usa tahan quivi tañi i caty ra Ndyoo.

³¹Sa cuenda sa nii cuu iñi ña Rahab sii ra Ndyoo ta ñá sihi ña sihin ñiyivi ñá tyaa yahvi sii ra Ndyoo ñuu ña. Vazu minoo ñaha zii iñi i cuu ña, zoco ñá sihi ña vaty i tiin cuenda vaha ña sii ra hebreo, ra i sindyehe tatu cuu quindyaa ra ñuu ña.

³²¿Ta ñaa ca sa cuñi si sa caty vityi? Ma cuyaty ca quehin sa cuenda tandihi cuii ñiyivi i cunii xaan iñi sii ra Ndyoo, tañi ra Gedeón, ra Barac, ra Sansón, ra Jefté, ra rey David, ra Samuel ta tandihi inga ra profeta.

³³Sa cuenda sa nii xaan cuu iñi ñu sii ra Ndyoo ta i zahacanaa ñu sii inga rey. I zavaha xaan ñu sa ndoo. I ñiñi ñu sa sa caty ra Ndyoo vaty cua cuhva ra sii ñu. I tyazi ñu yuhu ndicaha.

³⁴I ndahva ñu ñúhu sa ñihi xaan cayu. I cacu ñu quivi i cuñi ñiyivi cahñi ñu sii ñu sihin espada. Vazu ña ñihi ñu, zoco i zandundyeey ra Ndyoo

sii ñu. I cuu zahacanaa xaan ñu nu sahn̄i tahan ñu, ta i sino sihin ñu cuaha xaan ityi zandaru inga ñuu.

³⁵Ta iyo ñuzihi nii xaan i cuu iñi ñu ta i nandoto ñiyivi sii ñu sa yaha i sihi ñu. Zoco inga ñiyivi, nii xaan i cuu iñi ñu sii ra Ndyoo, zoco i ndyehe xaan ñu tundoho ta i sihi ñu vatyí ñá zandoo ñu sii ra Ndyoo vazu sihi ñu sa catyi ra. Sito ñu vatyí tatu ma zandoo ñu sa sino iñi ñu cua nandoto ñu minoo cuhva vaha xaan ca.

³⁶Inga ñiyivi tahan xaan ñu tundoho vatyí sacu ndyaa xaan ñiyivi sii ñu, ta i cañi ñu sii ñu, ta cuhva ndya sihn̄i ñu sii ñu sihin cadena ta tyihi ñu sii ñu vehe caa.

³⁷I cañi ñiyivi sihin yuu sii inga ñiyivi sino iñi sii ra Ndyoo, ta sii inga ñu i sahn̄ya zava ñu. I nducu coto ihñi xaan ñu sii ñu. I sahn̄i ñu sii ñu sihin espada. Inga ñiyivi, ñahñi zahma ñu sicoo. I ndihvi ñu ñii mvee ticatyí ta ñii mvee. Ndahvi xaan ñu. Ndyehe xaan ñu tundoho. Ta quiñi xaan i zavaha ñiyivi sihin ñu.

³⁸Vaha xaan vaha xaan maa ñu sino iñi cuan, ta yaha xaan quiñi i zavaha ñiyivi ñuu ñiyivi sihin ñu. I sica noo ñu nu yoñi ñiyivi iyo ta yucu. Ta i quihvi xehe ñu yavi yuu ta yavi ñuhu.

³⁹Tandihí ñu cuan, nii xaan i cuu iñi ñu sii ra Ndyoo, ta vaha i cahan ra Ndyoo sa cuenda ñu, zoco ñá ñihi ñu sa sa catyi ra Ndyoo vatyí cua cuhva ra sii ñu.

⁴⁰Vatyí cuñi ra Ndyoo sa cua cuatu ñu ta ñihi ñu sa vaha ca ñin ñi sihin maa yo. ñin ñi sihin maa yo cua nduvaha xaan ñu ityi nuu ra.

Nanacohon iñi yo sii ra Jesús tandihí saha

12 Cuaha xaan ñiyivi sa nii xaan i cuu iñi sii ra Ndyoo ta sihi ñu ta ndyehe ñu sii maa yo vityí. Yucuan cuenda nazandoo yo sii tandihí sa zayanga sii yo, ta cua cuu cundyico yo sii ra Cristo. Ta nazandoo yo cuatyí yo vatyí cuu si tañi minoo xayú saha yo. Ta nazandyee xaan yo iñi yo ta zañihi yo cuhun yo ityi nuu sihin Tuhun Ndyoo.

²Nanacohon iñi yo sii ra Jesús tandihí saha. Maa ra cuu ra zañaha sii yo cuhva cuñi si sa cunii xaan iñi yo sii ra Ndyoo. I sito ra vatyí zii xaan cua cuñi ra cuee ca, ta yucuan cuenda i saha ra sa sahn̄i ñiyivi sii ra. Ñá tyaa ra yahvi sii ticahan nuu sa cuu ra. Ta vityí ndyaa ra siyo cuaha ra Ndyoo.

³Tatu cuñi ndo sa ma cundihi iñi ndo ta ma ndu-uu iñi ndo sa zatyíño ndo tyiño ra Ndyoo, zaha ndo cuenda cuhva i zandyee xaan ra Jesús iñi ra sihin cuhva i zavaha xaan ñiyivi sa ña vaha sihin ra.

⁴Vatyí maa ndo tañaha ca cundyee iñi ndo sa zavaha ndo sa vaha cuhva ndya cati niñi ndo saha sa ñá zavaha ndo sa ña vaha.

⁵Ta çatu sa i naa iñi ndo cuhva vaha cahan Tuhun Ndyoo sihin ndo tañi sa zehe ra Ndyoo cuu sii ndo? Ta catyi si tyehen:

Zehe luhli, tyoon yahvi tatu zandoho ra Ndyoo suun,
Ta zandyeeun iñun tatu cañi ra suun;

⁶Vatyí tatu cuñi xaan ra Ndyoo sii minoo ra, zandoho ra sii ra,

Ta ñihi xaan cañi ra sii tandihi ñiyivi tiin cuenda ra.

⁷Cañi ra Ndyoo sii ndo vatyí cuñi ra sa cua cutuhva vaha ndo. Tacuan zavaha ra vatyí zehe ra cuu sii ndo. Yoñi zehe ñiyivi sa ma ndoho si zacuu zutu si.

⁸Tuhva ra Ndyoo cañi zuhva sii tandihi yo sa cuu zehe ra. Tatu ma cañi ra sii ndo, cuñi si catyi si vatyí yivi zehe ra cuu sii ndo sa ndisa.

⁹Ta inga tucu cuhva, tyaa yo yahvi sii zutu yo, ra ñuu ñiyivi ya, tatu zandoho ra sii yo. ¿Atu ña ñiñi xaan ca sa tyaa yo yahvi sii ra Ndyoo ta cundito yo tandihi cuii tyiemvu?

¹⁰Vatyí zutu yo sa iyo ñuu ñiyivi ya, i cañi ra sii yo zuhva quivi cuhva cuñi maa ra. Zoco ra Ndyoo Zutu yo, cañi ra sii yo minoo cuhva sa cua tyindyee sii yo. Ta cuhva cuan, cua nduu yo ñiyivi vaha xaan tañi maa ra.

¹¹Quivi sa ndoho yo, ña zii cuñi yo. Nducuihya iñi yo zacuu si. Zoco cuee ca ta nduu yo ñiyivi vaha sa ndisa cuii ta zii cuñi yo tatu cutuhva yo sa zañaha ra Ndyoo sii yo quivi cañi ra sii yo.

Ica xaan tatu ma tyaa yo yahvi sa cahan ra Ndyoo

¹²Yucuan cuenda zandyee ndo iñi ndo, ta ma caca iñi ndo vatyí ma cuu ca cundyico ndo ityi ra Cristo.

¹³Caca tandihi ndo ityi vaha. Tacuan ta yoñi ndo cua ndoyo ñuhu vazú ta sino vaha ca iñi ndo. Cua ndundyee xaan ca iñi ndo sihin Tuhun Ndyoo.

¹⁴Nducu ndo cuhva coo sa taxi sii ndo sihin tandihi ñiyivi. Ta

nducu ndo cuhva cuu ndo ñiyivi vaha xaan tañi tahan si cuu ñiyivi ra Ndyoo. Vatyí tatu ña tacuan iyo ndo, ma ndyehe ndo sii ra Ndyoo.

¹⁵Zaha vaha ndo cuenda sii minoo ndo ta sii inga ndo coto coo minoo ndoho ma sino ca iñi sii ra Cristo, ta ma ñihi ca ra cuan sa cua cuhva ra Ndyoo sii ndo. Ta coto quita minoo ra sa tacuan ta cua zañaha ra minoo cuhva ña vaha nu yucu ndo ta ma sino ca iñi ndo, ta cuaha xaan ndo cua tiví.

¹⁶Ta coto ñáha cuzu ndo sihin minoo ñaha tatu yivi ñazihí ndo cuu, ta coto ñáha zavaha ndo minoo sa ña vaha ta cua zañaha si vatyí ña sino iñi ndo sii ra Ndyoo sa ndisa cuii. Tañi ra Esaú ta sa naha, i cuñi ra sa cuzama ra, ta yucuan cuenda i xico ra tandihi ndaha tyiño sa cua tahan si sii ra sii yañi ra, ta ñá ñihi ra sii si.

¹⁷Sa sito ndo vatyí cuee ca i cuñi ra nañihi ra sa vaha cuan, zoco ñá cuu ca. Ñá cuu ca ndu-uu iñi ra cuatyí ra vazú i sacú xaan ra.

¹⁸Ta maa ndo, ma tahan ca si sii ndo tañi i tahan si sii ñiyivi hebreo vatyí ña vasi ndo nu ndyaa minoo sa cuu ndyehe ndo. Ma ndyehe ca ndo sa cayu xaan ñúhu ta cuaha xaan inga sa iyo tañi sa ñaa ta tyiyatyí. (Tacuan i tahan ñiyivi hebreo quivi i saha ra Ndyoo ley ra sii ñu.)

¹⁹Ñá siñi maa ndo nduzu cutu ta nduzu ra Ndyoo tañi quivi i cahan ra sihin ñu hebreo ndya cuhva sica ñu tumañi iñi sa ma cahan ca ra.

²⁰Ñá cuu cundyee iñi ñu tyiño i tava ra Ndyoo vatyí i catyi ra vatyí tatu vazú minoo quiti cua tiin sii

yucu Sinaí cuan, cuñi si sa cahñi ñiyivi sii ti.

²¹Iyo xaan i cuu tandihi cuhva cuan ndya cuhva ndya i catyi ra Moisés: “Yuhu xein ndya cuhva ñihi.” I catyi ra quivi cuan.

²²Zoco maa ndo cuahan ndo ndya inga yucu sa ñaŋi Sión. Yucuan cuu ñuu maa ra Ndyoo ndito. Ñuu Jerusalén sa ndyaa andivi cuu si. Nu iyo cuaha xaan cuaha xaan ángel sa zii xaan cuñi.

²³Ta nu yucu tandihi ñiyivi sino iñi, ñu sa ndyaa zivi andivi. Ta nu ndyaa ra Ndyoo, ra cua tyicuhva sii tandihi ñiyivi, ta nu yucu añima ñiyivi vaha, ta sa nduu ñu ñiyivi ñahñi ca cuatyí.

²⁴Ta nu ndyaa ra Jesús, ra sa cahan saha ñiyivi sa cuenda tyiño saa i zandaa ra Ndyoo sihin ñiyivi. I sati niñi ra Jesús vatyí cua ndasi cuatyí ñiyivi, ta ña sica si sa cuu ñu tañi i zavaha niñi ra Abel.

²⁵Yucuan cuenda coto vaha ndo sii ndo ta tyaa ndo yahvi sii ra cahan sihin ndo vatyí tatu ñá cacu ñiyivi hebreo sa ñá tyaa ñu yahvi sii ra Moisés, vihi cuui ca maa yo tatu ma tyaa yo yahvi sii ra cahan ndya andivi.

²⁶Quivi i cahan ra ndya Yucu Sinaí i zacanda nduzu ra sii ñuhu. Ta vityí catyi ra: “Inga saha cua zacande ñuhu ñuu ñiyivi ta andivi tucu.”

²⁷Ta sa cahan ra cuhva cuan cuñi si catyi si vatyí quivi cua zacanda ra sii si ta cua zanaa ra sii tandihi sa cuu naa, ta cua nandoo maa ñi sa ma cuu cunaa. Nu ndyaca ñaha ra Ndyoo cuu sa ma cuu cunaa,

²⁸ta yucuan cua cundyaa maa yo. Yucuan cuenda nazacahnu xaan yo sii ra Ndyoo cuhva cuñi maa ra. Ta nayuhu xaan yo sii ra.

²⁹Vatyí ra cu Ndyoo maa yo ñúhu cuu ra, ta cua zanaa ra sii tandihi sa ña vaha.

Cuhva cuñi si zavaha yo ta cua tahan iñi ra Ndyoo

13 Ma zandoo ndo sa cuñi xaan ndo sii tandihi hermano.

²Cuhva ndo sa casi ñiyivi saa vehe ndo vazu ña sito vaha ndo sii ñu vatyí iyo saha i zacasi ñiyivi sii ángel cuhva cuan, ta ña sito ñu tatu ángel cuu ra.

³Ma naa iñi ndo sii ra ñoho vehe caa. Cundahvi iñi ndo sii ra tañi sa maa ndo ñoho vehe caa. Ta cundahvi iñi ndo sii ra zavaha xaan ñiyivi sa ña vaha sihin vatyí sa tuu iñi ndo yozo caa iyo tundoho cuan vatyí ñiyivi cuu tucu maa ndo.

⁴Tatu sa tindaha ndo, tyaa ndo yahvi sii si, ta ma zavaha ndo sa quiñi sihin inga ñaha a sihin inga rayii. Cua tasi tuñi xaan ra Ndyoo sii ñiyivi zavaha sa quiñi tañi ra quixi sihin inga ñaha sa yivi ñazihí ra cuu.

⁵Ma cuu ndo ñiyivi sa cuñi xaan xuhun. Ndo ndo vaha sihin sa iyo sii ndo vatyí sa i catyi maa ra Ndyoo: “Ma zandoi sii ndo, ta ma zañe sii ndo.”

⁶Yucuan cuenda nii xaan cuu iñi yo ta catyi yo:

Ra Ndyoo cuu ra tyindyee sii;
Ma yuhi ñaa sa cua zavaha ñiyivi sii.

⁷Nacohon iñi ndo sii ra i zacuaha Tuhun Ndyoo sii ndo. Nacañi iñi ndo sa cuenda cuhva i quita vaha maa ra, ta nii xaan cuu iñi ndo tañi sa nii iñi maa ra.

⁸Ña záma ra Jesucristo. Zuun ra cuu ra icu, ta zuun ra cuu ra vityi ta tandihi cuii tyiemvu.

⁹Ma zandoo ndo ityi vaha, ta ma sino iñi ndo ñaa tuhun saa a ñaa sa ziiñi cua zacuaha ñiyivi. Saha maa ra Ndyoo tumañi iñi sii yo, ta tacuan ta cua ndundyee iñi yo sihin Tuhun Ndyoo ta yivi sa caca xaan iñi yo sa cuenda ñaa sa ma cuu casi yo vatyi ña tacuan ta nduu yo ñiyivi vaha ityi nuu ra Ndyoo. Ñahñi tyindyee cuhva cuan sii ñiyivi tyaa xaan yahvi sii si.

¹⁰Iyo minoo altar sa cuenda maa yo. Cruz nu i sihi ra Cristo cuu si. Ta ma cuu tyindyee si sii ñiyivi nducu cuhva cacu ñu sihin sa tyaa xaan ñu yahvi sii cuhva sahnu cuan tañi zavaha ñiyivi hebreo sa ña sino iñi sii ra Cristo.

¹¹Sihin cuhva sahnu cuan, i sahñi ra cu zutu ya cahnu quití sa cuenda cuatyí ñiyivi. I sindyaca ra niñi ti sisi vehe ñuhu nu ii, ta i sahmi ra sii ti ndya zava yuñuu.

¹²Yucuan cuenda i ndyehe tucu ra Jesús tundoho ndya zava yuñuu vatyí cua zanduvaha ra sii ñiyivi sihin niñi maa ra.

¹³Yucuan cuenda nacuhun maa yo ndya zava yuñuu sihin ra Cristo. (Cuñi si catyi si vatyí ma cundyico ca yo costumbre sahnu tañi zavaha inga ñiyivi. Cua cundyico yo sii ra Cristo ta ziiñi ñiyivi cuu yo.) Natyaa siyo yo sii yo sii costumbre sahnu

vazu ndyehe yo tundoho sa cuenda si.

¹⁴Vatyí ñuu ñiyivi ya; yivi ñuu maa yo cuu si; nanducu maa yo sii minoo ñuu sa cua coo cuee ca.

¹⁵Nanducu yo sa cua tyindyee ra Jesús sii yo, ta ziquí cua nacuhva yo tyahvi ndyoo sii ra Ndyoo tandihi cuii cuhva. Cua catyi yo sihin ñiyivi vatyí sito yo sii ra.

¹⁶Ma zaña ndo sa zavaha ndo sa vaha ta sa zasa ndo sa sii ndo sii ñiyivi ndahvi vatyí zii xaan cuñi ra Ndyoo tatu zacahnu yo sii ra cuhva cuan.

¹⁷Tyaa ndo yahvi sii ra cu nuu sii ndo sa cuenda Tuhun Ndyoo. Zavaha ndo cuhva catyi ra vatyí zacuenda ra sii ndo ta ma ndoyo ñuhu ndo. Cua nacuhva ra cuenda sii ra Ndyoo sa cuenda tyiño ra. Tatu zavaha maa ndo sa vaha, zii cua cuñi ra quivi cua cuhva cuenda ra, zoco tatu ma zavaha ndo sa vaha, ña zii cua cuñi ra, ta cua ndoho ndo.

¹⁸Cahan ndo sihin ra Ndyoo sa cuenda ndi vatyí sito vaha ndi vatyí zavaha ndi sa vaha, ta cuñi xaan ndi zavaha ca ndi sii si.

¹⁹Ta zañiñi sii ndo vatyí caca ca ndo sii ra Ndyoo sa cuende vatyí tacuan ta cua cuu quite ihya ta quisi nanuhi nu yucu ndo yatyí ca.

²⁰Maa ra Ndyoo cuu ra saha sa coo sa taxi añaima yo. I zanandoto ra sii ra Jesucristo, ra ndyaca ñaha sii yo. Ra Jesús cuu ra zacuenda xaan sii yo tañi zacuenda minoo ra cu pastor sii mvee ticatyí zono ra. Sa cuenda sa i sati niñi ra Jesús quivi i zandaa ra Ndyoo tyiño saa

sihin yo ta i nduu ra pastor cuenda yo.

²¹Natyindyee maa ra Ndyoo sii ndo sihin tundyee iñi maa ra sa cuenda ra Jesucristo, ta cua cuu zavaha ndo tandihi cuhva cuñi maa ra. Ta nazacahnu yo sii ra Jesucristo tandihi cuii tyiemvu. Ta nacuu si tacuan, ta nacuu si sa ndisa.

²²Zoco sa ndyoo ñi ndoho hermanos tyizoho vaha ndo sa catyi ihya vatyí ña cuaha xaan tyei.

²³Cuñi sa cua coto ndo vatyí sa quita ra hermano Timoteo vehe caa vityi. Tatu saa ra ihya yatyí, cua cuhin sihin ra nu yucu ndo.

²⁴Cuhva ndo minoo nacumi sii tandihi ra hermano ta sii ra hermano ra cu nuu sii ndo. Ra hermano nu cu si Italia tasi ra minoo nacumi sii ndo.

²⁵Nacuhva xaan ra Ndyoo tumañi iñi sii tandihi ndo.

Minoo Carta I Tyaa Ra Santiago

Tyaa ra Santiago carta ya sii ñiyivi hebreo ñu i sitya cuatyi

1 Yuhvi ra Santiago cui minoo muzu sii ra Ndyoo ta sii ra Jesucristo, ra ndyaca ñaha sii yo. Tasi carta ya sii tandihi ndoho ñiyivi hebreo. Vityi sino iñi ndo sii ra Jesucristo, ta yucu ndo ityi cuan ityi ya. Tasi minoo nacumi sii tandihi ndo.

Sa siñi tuñi sa saha ra Ndyoo

²Zii xaan cuñi ndo hermanos tatu ndyehe xaan ndo tundoho

³vatyi sa sito ndo vatyi tatu saha ra Ndyoo prueba sii ndo, cuñi ra coto ra tatu sino ndisa cuii iñi ndo sii ra. Ta sihin cuhva cuan, ta cua ndundyee xaan ca iñi ndo sihin Tuhun Ndyoo.

⁴Ta nandundyee xaan iñi ndo minoo sa ndisa cuii ta ñahñi ca cua cumañi sii ndo. Cua cuu ndo ñiyivi vaha sa ndisa cuii, ta yoñi cua cuu tyaa cuatyi sata ndo.

⁵Tatu iyo ndo ña sito ndo ñaa sa cuñi ra Ndyoo cua zavaha ndo, nducu tuhun ndo sii ra. Cua catyi casi ra sihin ndo, ta ma cahan ra sii ndo.

⁶Zoco nii cuu iñi ndo ta nducu tuhun ndo vatyi tatu ña nii cuu iñi

ndo cuu ndo tañi tyañuhu. Ndaa noo ñi maa si cuhva tyindaha tatyi sii si.

⁷⁻⁸Minoo ra ña nii vaha iñi sii ra Ndyoo, uu sica iñi ra tandihi saha, ta ma cuu caca iñi ra vatyi cua cuhva ra Ndyoo sa sica ra sii ra.

⁹Ra hermano ra ndahvi, nacuzii xaan cuñi ra vatyi zanducahnu xaan ra Cristo sii ra.

¹⁰Ta ra hermano ra cuca, nacuzii xaan cuñi ra vazu cua nduluhlu ra vatyi tañi minoo ita ñi sa iyo sisi cuhu cuu ra. Cua cuu ra, zoco cua cuhun ra gloria.

¹¹Caña ñicandyi, ta ndu-ihñi xaan, ta xii cuhu ta coyo ita si. Ña tyaqui ca caa si. Zuun ñi cuhva cuan cua tahan si sii ra cuca, vazu zatyño xaan ra.

Cundyee iñi ndo tatu nducu coto ihñi cuihna sii ndo

¹²Zii xaan cua cuu sii minoo ra tatu cundyee iñi ra ta ma ndoyo ñuhu ra tatu nducu coto ihñi cuihna sii ra. Vatyi tatu quita vaha ra sa ndyehe ra tundoho cuan, cua cuhva ra Ndyoo minoo corona sii ra sa cua cundito ra tandihi cuii tyiemvu. Sa catyi ra Ndyoo vatyi cua cuhva ra sii si sii ñiyivi cuñi xaan sii ra.

¹³Tatu vasi minoo prueba ziqui ndo ta cuñi ndo zavaha ndo cuatyí, ma catyí ndo: “Maa ra Ndyoo nducu coto ihñi sii.” Vatyí ña cuñi ra Ndyoo sa zavaha ndo sa ña vaha, vatyí maa ra ña cuñi ra zavaha ra sa ña vaha numinoo saha, ta yucuan cuenda ña cuñi ra sa zavaha ñiyivi sa ña vaha.

¹⁴Minoo minoo yo iyo cuatyí añima yo, ta yucuan cuenda cuñi xaan yo zavaha yo sa ña vaha.

¹⁵Xihna ca cuñi xaan yo zavaha yo sa ña vaha, ta ziqui cacu cuatyí. Ta tatu sa yaha zavaha yo cuatyí, ta ziqui nducuaha xaan ca sa ña vaha zavaha yo. Ta nu ndihí tuhun cua cahñi cuii si añima yo.

¹⁶Ndoho hermanos cuñi xein sii ndo. Ma zandavi ñaha ndo sii ndo ta caca iñi ndo inga cuhva.

¹⁷Tandihí sa vaha ta sa ndoo sa cuenda ra Ndyoo cuu si. Maa ra cuu ra i zavaha ñúhu. Ña zama ra cuhva iyo ra, ta ñahñi sa ñaa iyo sii ra. (Sa ñaa cuan cuu sa ña saha coto ñiyivi sa vaha.)

¹⁸Sa cuenda sa cuñi maa ra, ta i saha ra minoo cuhva saa coo yo sihin Tuhun Vaha ra. Tacuan i zavaha ra vatyí maa yo cua cuu sa vaha xaan ca sii tandihí sa i zavaha ra.

**Cuhva zavaha yo cuhva cuñi
ra Ndyoo sa ndisa cuii**

¹⁹Coto ndo cuhva ya, ndoho hermanos. Tandihí cuii maa yo cuñi si sa tyizoho vaha yo. Ma vatyí xaan cahan yo, ta ma vatyí xaan cuxaan yo.

²⁰Vatyí tatu cuxaan yo, ña zavaha yo cuhva cuñi ra Ndyoo sihin cuhva cuan.

²¹Yucuan cuenda zaña ndo sii tandihí sa quiñi ta sa ña vaha, ta vii ñi tiin cuenda vaha ndo sii Tuhun Ndyoo sa iyo añima ndo vatyí cua zacacu si cuan sii ndo.

²²Zoco zavaha ndisa cuii ndo cuhva catyí Tuhun Ndyoo ta yivi sa tyizoho ñi maa ndo sii si vatyí tatu cuenda tyizoho ñi maa ndo, zuun ñi sii maa ndo zandavi ñaha ndo.

²³Tatu cuenda tyizoho ñi maa minoo ra cuhva catyí Tuhun Ndyoo ta ña zavaha ra sa catyí si, cuu ra tañi minoo ra ndyehe sii sihin ino.

²⁴Ndyehe ra sii ra ta ziqui cuahan ra, ta vatyí xaan naa iñi ra cuhva caa ra.

²⁵Zoco tatu ndyehe minoo ra cuhva catyí Tuhun maa ra Ndyoo, nacatyí si sihin ra tandihí sa cuñi ra Ndyoo sa coto ra, ta yucuan cuu ley ra Ndyoo sa ndasi sii yo. Tatu zavaha ra cuhva catyí si ta ma naa ñi iñi ra sii si, cua tyindyee ra Ndyoo sii ra sihin tandihí sa zavaha ra.

²⁶Zoco tatu sica iñi minoo ra vatyí zavaha ra cuhva cuñi ra Ndyoo ta ña zacuenda ra yuhu ra, zuun ñi sii maa ra zandavi ñaha ra, ta sa caha ñi catyí ra vatyí sino iñi ra sii ra Ndyoo.

²⁷Cuhva zavaha yo cuhva cuñi ra Ndyoo sa ndisa cuii ta cuhva zacahnu yo sii ra cuhva cuñi maa ra sa ndisa, cuu sa tyindyee yo sii ñu ndahvi, ñu i sihi yii, ta sii sa ndyihi ndahvi sihin tundoho sa ndyehe ñu ta ma zavaha yo cuhva zavaha ñiyivi ña sito sii ra Ndyoo.

**Ña vaha tatu tyaa ca yo yahvi
sii ra hermano cuca ta ziqui
sii ra hermano ndahvi**

2 Hermanos, tatu sino ndisa cuii iñi ndo sii ra Jesucristo ra

ndyaca ñaha sii yo, ma tyaa xaan ca ndo yahvi sii minoo hermano ta ziqui sii inga.

²Vatyí vasi ra hermano nu yucu ndo ta ñoho ra zahma vaha xaan, ta ñoho xehe xuhun cuaan nu ndaha ra. Ta vasi tucu inga hermano, ndahvi ñi caa vasi ra.

³Ta tyaa ca ndo yahvi sii ra ñoho zahma vaha ta catyi ndo: “Ihya cundyoön nu tyayu vaha.” Ta sihin ra ndahvi catyi ndo: “Yucuan cuiñi ndyoön a cundyoön nu ñuhu ñi ña.”

⁴Cuhva cuan zaziiin ndo sii ra tahan ndo. Ta nduu ndo ñiyivi sica iñi minoo cuhva ña vaha vatyí tyaa ca ndo yahvi sii ra cuca.

⁵Cuñi xein sii ndo hermanos. Tyizoho vaha ndo sa quehin. I casi ra Ndyoo sii ñiyivi ndahvi vatyí cua sino xaan iñi ñu sii ra, ta cua ñihi ñu sa saha maa ra ta cuhun ñu nu ndyaca ñaha ra tañi sa i catyi ra. Cua tiin cuenda ra sii ñiyivi cuiñi xaan sii ra nu ndyaca ñaha ra.

⁶Zoco maa ndo ña tyaa ndo yahvi sii ra ndahvi. ¿Atu yivi ra cuca cuu ra zavaha xaan sa ña vaha sihin ndo ta sindyaca sii ndo nuu ra juez?

⁷¿Atu yivi ra cuca cuu ra quiñi xaan cahan sii ra Jesucristo? Ta maa ndo cuu ra sino iñi sii ra Jesús.

⁸Zavaha ndo sa vaha tatu tyaa ndo yahvi sa ndisa cuii sii ley maa ra Ndyoo sa zacuaha ra Jesús. Sa ñiñi xaan ca cuu nu catyi si tyehen: “Cuñi xoon sii inga ñiyivi tañi cuiñun sii moo.”

⁹Zoco tatu tyaa ca ndo yahvi sii minoo ñiyivi ta ziqui sii inga, zavaha ndo cuatyí, ta catyi ley ra Ndyoo vatyí ra iyo cuatyí cuu ndo.

¹⁰Tatu catyi yo vatyí tyaa yo yahvi sii ley ra Ndyoo, ta ña tyaa

yo yahvi sii minoo si, ndoo cuatyí ziqui yo sa cuenda tandihi si.

¹¹Maa ra Ndyoo i catyi: “Ma cuzu ndo sihin minoo ñaha tatu yivi ñazihi ndo cuu.” Ta i catyi tucu ra: “Ma cahñi ndo ñiyivi.” Vazu ña zavohon cuatyí sa xihna ñi, zoco tatu cahñun ñiyivi, zuun ñi ña tyoon yahvi ley ra Ndyoo, ta iyo cuatyun ityi nuu maa ra.

¹²Cua tyicuhva ra Ndyoo sii ndo cuhva catyi tyiño saa i zandaa ra. Yucuan cuenda zacuenda ndo sii ndo sihin cuhva cahan ndo ta sihin cuhva zavaha ndo.

¹³Vatyí ma cundahvi iñi ra Ndyoo sii ndo quivi tyicuhva ra sii ndo tatu ña cundahvi iñi ndo sii ñiyivi. Zoco tatu cundahvi iñi ndo sii ñiyivi, cua cundahvi tucu iñi maa ra Ndyoo sii ndo.

Tatu nii cuu iñi yo sii ra Ndyoo sa ndisa, cua zatyíño yo tyiño ra

¹⁴Hermanos, ¿yozo caa cua tyindyee si sii minoo ra tatu catyi ra vatyí nii xaan cuu iñi ra zoco ñahñi tyiño ra Ndyoo zavaha ra? Sihin sa nii ñi iñi ra cuan ¿atu cuu cacu ra?

¹⁵Tatu iyo minoo hermano a minoo hermana ta ñahñi zahma ñu iyo ta sizoco ñu

¹⁶ta minoo ndo catyi ndo sihin ñu: “Natyindyee ra Ndyoo suun. Vaha xaan tatu coo zahmon ta sa casun.” Tatu tacuan cohon ta ña sohon sa siñi ñuhu sii ñu ¿yozo caa tyindyee si?

¹⁷Zuun ñi cuhva cuan, vazu nii xaan iñi ndo catyi ndo, zoco tatu ñahñi maa sa zavaha ndo, ña nii iñi ndo sa ndisa cuii tatu tacuan caa iyo ndo.

¹⁸Iyo ndo cua catyi ndo: “Tatu nii iñi yo sii ra Ndyoo, sa vaha tacuan ñi.” Zoco yuhvi catyi vatyí ñiñi xaan sa zavaha yo sa vaha vatyí tatu ma zavaha yo sa vaha yoñi cua coto tatu nii iñi yo sii ra Ndyoo a ña nii iñi yo. Yuhvi zavehi sa vaha, ta cuhva cuan cuu ndyehe ñiyivi vatyí nii xaan iñi.

¹⁹Iyo ndo catyi ndo vatyí sino iñi ndo vatyí iyo minoo ñi Ndyoo. Vaha catyun sa sino iñun sa iyo minoo Ndyoo, zoco cuhva cuan sino tucu iñi tandihí cuihna, ta yuhu xaan si ndya cuhva ñihí si.

²⁰Ñahñi sa siñi tuñi vaha iyo sii ndo. ¿Ama cua cutuhva ndo vatyí ñahñi maa cuu si sa catyi yo vatyí sino iñi yo tatu ma zavaha yo cuhva cuñi ra Ndyoo?

²¹Nduvaha ra Abraham ñiyivi sahnú sii yo ityi nuu ra Ndyoo sa cuenda cuhva i zavaha ra quivi cua cuhva ra sii ra Isaac zehe ra sii ra Ndyoo ta cua cahñi ra sii ra. I saha ra Abraham sii ra Isaac sii ra Ndyoo vazu ndaha cuu ra cuñi ra.

²²Nii xaan i cuu iñi ra Abraham sii ra Ndyoo, ta yucuan cuenda i zavaha ra cuhva i catyi ra. Ta sa cuenda cuhva i zavaha ra ta nii ca i nduu iñi ra.

²³Ta i cuu si cuhva catyi Tuhun Ndyoo: “I sino xaan iñi ra Abraham sii ra Ndyoo, ta i ndyehe ra Ndyoo sii ra tañi sa ñahñi cuatyí ra.” Ta i catyi ra Ndyoo vatyí amigo ra cuu sii ra Abraham.

²⁴Cuhva cuan cuu ndyehe ndo vatyí nduvaha yo ityi nuu ra Ndyoo sa cuenda cuhva zavaha yo, ta yivi sa cuenda sa sino ñi iñi yo sii ra.

²⁵Ta zuun ñi cuhva cuan i cuu si sihin ña Rahab minoo ñaha zii iñi. I catyi ra Ndyoo vatyí ñahñi ca cuatyí ña vatyí i zavaha ña minoo sa vaha quivi i tiin cuenda vaha ña sii ra i tasi ra Josué. I tyixehe ña sii ra, ta ziqui i natasi ña sii ra inga ityi vatyí ma cahñi ñiyivi ña vaha sii ra.

²⁶Tañi sa quita añima yo tatu sa sihi coño ñuhu yo, zuun ñi tacuan tucu cuu si tatu catyi yo vatyí sino iñi yo sii ra Ndyoo ta ñahñi sa zavaha yo sa cuenda ra. Ñahñi yahvi ndyaa tuhun cahan yo sa sino iñi yo. Ña sino ndisa cuii iñi yo.

Cuhva cuñi si zacuenda yo yuhu yo

3 Ma cuaha xaan ndoho cuñi ndo cuu ndo ra zacuaha sii inga ndo vatyí sa sito ndo vatyí nduhvi ra zacuaha, ñihí ca cua tyicuhva ra Ndyoo sii ndi quivi cua tasi tuñi ra sii ñiyivi tatu ña vaha zacuaha ndi.

²Ta tandihí cuii yo iyo saha zavaha yo sa ña vaha a zama yuhu yo. Tatu iyo minoo ra cuu zacuenda ra yuhu ra, ñahñi maa cuatyí ra iyo. Cuu cundyaca ñaha ra sii ra sa ndisa cuii.

³Cuu cundyaca ñaha yo sii minoo caballo cahnu tatu tyihí yo minoo freno yuhu ti.

⁴Nahnú xaan barco, zoco vazu ñihí xaan caa tatyí cuu zacuhun ra zacaca sii tu ndya ityi cuñi maa ra sihin minoo caa luhlu sa ndyaa xiñi tu.

⁵Ta zuun ñi cuhva cuan, luhlu xaan yaa yo, zoco cuaha xaan sa ña vaha cuu zavaha si. Tañi minoo

ñúhu luhlu tatu sa natiin si cua cahmi si candii cuhu cahnu.

⁶Ta tañi minoo ñúhu cuu yaa yo. Cuaha xaan sa ña vaha cahan si. Zativi si sii tandihi yo, ta zativi si sii yo tandihi quivi iyo yo ihya ñuu ñiyivi. Andyaya cuu nu quita tandihi tyiño ña vaha sa zavaha yaa yo.

⁷Vatyí cuu zandumazu ñiyivi sii tandihi cuii nuu quiti xaan a zaa a coo a quiti iyo sisi tyañuhu, ta cuu cundyaca ñaha ra sii ti.

⁸Zoco yaa ra ña cuu cundyaca ñaha ra. Ndyá vaha ñi cuhva ndyaa listo si sa cahan si sa quiñi caa ta zativi si sii inga ñiyivi.

⁹Sihin yaa yo zacahnu yo sii ra Ndyoo Zutu yo, ra ndyaca ñaha sii yo. Ta zuun ñi sihin yaa yo cahan yo ndya vaha ñi sii ñiyivi, ta maa ra Ndyoo i zavaha sii ñu vatyí cuu ñu zehe ra.

¹⁰Zuun ñi sihin yuhu yo zacahnu yo sii ra Ndyoo. Ta zuun ñi sihin yuhu yo cahan yo ndya vaha ñi sii ñiyivi. Hermanos, ña tahan si zacuu yo cuhva cuan.

¹¹¿Atu quita ndutya cuii ta ndutya quiñi caa iin ñi zoco?

¹²¿Atu cuu quihin yo mango numinoo tundyica a quihin yo visi numinoo tuticaha? Ma cuu. Ta zuun ñi cuhva cuan ma cuu cuhun yo tyañuhu ta tava yo ndutya vaha.

Sa siñi tuñi sa saha ra Ndyoo

¹³Tatu iyo cuaha sa siñi tuñi vaha suun, zañohon vatyí tacuan iyon sihin cuhva zavohon. Ta ma zacahnun suun ta ma catyun vatyí sito xoon.

¹⁴Zoco tatu cucuihna iñun, a tatu cuñun vatyí iin ñi sii moo cua tyaa

ñiyivi yahvi, ma zacahnun suun ta catyun vatyí iyo xaan sa siñi tuñi suun. Cuhva cuan nduun minoo ra vatya vatyí ña zavohon sa vaha.

¹⁵Ihya cuu sa siñi tuñi sa iyo ñuu ñiyivi ya, cuhva sica iñi maa ñiyivi, ta yivi cuhva sica iñi Tatyí Ii. Sa siñi tuñi sii ra cuihna cuu si.

¹⁶Vatyí tandihi nu iyo sa cuihna iñi ñiyivi ta cuñi xaan ñu sa iin ñi sii maa ñu tyaa ñiyivi yahvi, yucuan iyo xaan tizihí ta iyo tandihi cuii nuu cuatyí.

¹⁷Zoco sa siñi tuñi vaha sa saha ra Ndyoo, maa ñi sa vaha cua zavaha ñiyivi tatu iyo si sii ñu. Ma coo tizihí nu yucu ñu. Vii ñi cua coo ñu. Ta cuu natuhun tahan vaha ñu iyo sa siñi tuñi vaha sii, ta ma cuxaan ñu. Iyo tumañi iñi sii ñu sihin ñiyivi. Ta cuaha xaan inga nuu tyiño vaha zavaha ñiyivi iyo sa siñi tuñi sa saha ra Ndyoo. Ma ndu-uu iñi ñu, ta ma zandavi ñaha ñu.

¹⁸Ta ñiyivi nducu cuhva coo sa taxi, yucuan cuu ñu tasi siti vaha. Ta sa cua naquihin ñu cuu maa ñi sa vaha. (Cuñi si catyí si vatyí cua cuu ñu ñiyivi vaha xaan tandihi saha.)

Ma cuñi xaan yo sa iyo ñuu ñiyivi

4 ¿Ñaa cuenda iyo tizihí nu yucu ndo ta sahñi tahan ndo? Tacuan iyo ndo vatyí iyo cuaha xaan sa ña vaha sa cuñi ndo zavaha ndo.

²Cuñi xaan ndo coo sa sii ndo. Yucuan cuenda sahñi ndo ñiyivi. Cuñi xaan ndo sa sii inga ñiyivi, ta ma cuu ñihi ndo sii si. Yucuan cuenda iyo tizihí nu yucu ndo, ta sahñi tahan ndo.

Ñahñi sa sii ndo iyo vatyi ña sica ndo sii si sii ra Ndyoo.

³Ta iyo saha sica ndo sii si ta ña ñihi ndo vatyi ña vaha cuhva sica ndo. Sica ndo maa ñi sa cuenda sa cuziï iñi ndo.

⁴Cuu ndo tañi minoo ñaha i zandoo sii yïi cuhva zandoo ndo sii ra Ndyoo. ¿Atu ña sito ndo vatyi tatu cuñi xaan ndo sii sa iyo ñuu ñiyivi ya, nduu ndo ñiyivi xaan iñi sii ra Ndyoo? Yoo ra cuñi xaan sa ña vaha sa iyo ñuu ñiyivi ya, nduu ra minoo ra xaan iñi sii ra Ndyoo.

⁵¿Atu sica iñi ndo vatyi sa caha ñi cuu sa catyi Tuhun Ndyoo vatyi Tatyï Ii sa tyihi ra Ndyoo añaïma yo zacuenda xaan si sii yo? Cuñi ra Ndyoo vatyi ñin ñi sii maa ra cua cuñi xaan yo.

⁶Tyindyee xaan ra Ndyoo sii yo. Yucuan cuenda catyi si: “Sii ñiyivi zanduluhlu sii, saha ra Ndyoo tumañi iñi. Zoco ra zacahnu sii, ña tyindyee ra Ndyoo sii ra.”

⁷Yucuan cuenda zanduluhlu ndo sii ndo, ta tyaa ndo yahvi sii ra Ndyoo. Cuxaan ndo sihin cuihna, ta cua cono ra sii ndo.

⁸Tuhva ndo sii ra Ndyoo, ta cua tuhva ra sii ndo. Zaña ndo sii sa ña vaha, ndoho ra iyo xaan cuatyï. Ta ndoho ra cuñi zuhva sa iyo ñuu ñiyivi ya, ta zuhva cuñi tucu ndo sii ra Ndyoo, zandu-ñin ndo iñi ndo ta minoo ñi cuhva caca iñi ndo, ta ñin ñi sii ra Ndyoo cuñi xaan ndo.

⁹Zanducuihya ndo iñi ndo ta vacu xaan ndo sa cuenda cuatyï ndo. Nacoo tucuihya iñi sii ndo ta ma cuziï xaan iñi ndo.

¹⁰Zanduluhlu ndo sii ndo ityi nuu ra Ndyoo, ta ziqui cua zanducahnu ra sii ndo.

Ma cahan ndo sii yañi ndo

¹¹Ma cahan ndo sii minoo ndo ta sii inga ndo. Yoo ra cahan sii inga hermano, saññi tahan ra sihin ley ra Ndyoo sihin cuhva cuan ta ña tyaa ra yahvi sii ley ra Ndyoo vatyi yoo ra ña zavaha cuhva catyi ley ra Ndyoo, ña tyaa ra yahvi sii si.

¹²Zoco iyo minoo ñi ra sa cuu tava ley, ta minoo ñi ra cuu catyi tatu vaha si a ña vaha si. Iyo cuhva sii ra sa zacacu ra sii ñiyivi a sa zanaa ra sii ñu. ¿Ta yoo ra cuu oo vatyi cuu catyun atu vaha a ña vaha sa zavaha ra tohon?

Ña sito yo ñaa sa cua cuu sii yo ityaan

¹³Tyizoho ndoho ra tuhva catyi: “Vityi a ityaan cua cuhun ndi inga ñuu, ta cua yaha ndi minoo cuiya. Yucuan cua zatyïño ndi, ta cua ñihi ndi xuhun.” Catyi ndo.

¹⁴Zoco ña sito ndo ñaa sa cua cuu sii ndo ityaan. Tañi minoo vico nuhu ñi cuu ndo. Ta vico nuhu cuan zuhva ñi cuhva ndyehe yo sii si, ta ziqui naa ñi si.

¹⁵Yucuan cuenda inga cuhva cuñi si cahan ndo. Tyehen catyi ndo: “Tatu cuhva cuñi ra Ndyoo cuu, cua cundito ca ndi ta zavaha ndi cuhva ya.”

¹⁶Zoco ndoho, cahnu zaha ndo sii ndo. Ta cuhva zacahnu ndo sii ndo, ña vaha.

¹⁷Ta yoo ra sito ñaa sa cuu sa vaha ta ña zavaha ra sii si, cuatyï cuu si.

Minoo cuhva cua cuu sii ra cuca

5 Tyizoho ndoho ra cuca, vacu ndo ta vacu saa ndo sa cuenda tundoho sa vasi ziqui ndo.

²Sa cuñi tyahyu sa cuca ndo, ta zahma vaha xaan ndo cua casi tiquixi.

³Cua cuxi xuhun cuaan ndo ta xuhun cui si ndo ta cua cuu si minoo sa ndaa vatyi ma cuu coo si tandihí tyiemvu. Ta tañi zativi cuxi cuan sii xuhun ndo, tacuan cua tiví tucu coño ñuhu maa ndo sihin ñúhu. Ihya cuu sa sicumi vaha xaan ndo, ta cua ndyehe ndo tundoho quivi cua tasi tuñi ra Ndyoo sii ñiyivi.

⁴Tyizoho ndo cuhva sa sacu ra i zatyíño tyiño ndo ta ñá tyiyahvi vaha ndo sii ra. Saa nduzu ra nuu ra Ndyoo, ra ndyaca ñaha sii yo.

⁵Vaha xaan i sicoo ndo ñuu ñiyivi ya. I zata ndo ñaa ñi maa sa cuñi maa ndo. I zandunahnu ndo sii ndo, ta vityi tahan si cuu ndo tañi zindiqui xahan.

⁶I tyaa ndoho, ra cuca, cuatyí sata ñiyivi vaha, ta sahñi ndo sii ñu, vazu nducu ñu cuhva zacacu ñu sii ñu.

Zandyee ndo iñi ndo tandihí cuhva ta cahan ndo sihin ra Ndyoo

⁷Ta ndoho hermanos, zandyee ndo iñi ndo ndya quivi cua quisi tucu ra ndyaca ñaha sii yo. Tañi minoo ra zatyíño sicuhu, zandyee ra iñi ra ta ndatu ra ndya coon zavi uu a uñi saha ta ziqui cuu tasi ra ta cua coo vaha itu ra.

⁸Tacuan tucu zandyee ndo iñi ndo, ta ma yuhu ndo vatyi sa cuñi quisi tucu ra ndyaca ñaha sii yo.

⁹Ma cahan ndo sii minoo ndo ta sii inga ndo hermanos coto catyi ra Ndyoo vatyi zavaha tucu maa

ndo sa ña vaha. Sa ndyaa ra cu juez yuvehe.

¹⁰Zaha ndo cuenda cuhva i sicoo ra profeta ta sa naha, cuhva i zandyee xaan ra iñi ra quivi i ndyehe xaan ra tundoho.

¹¹Sito yo vatyi zii xaan cuñi ra vityi vatyi i zandyee ra iñi ra. Ta sa sito ndo cuhva i tahan ra Job ta cuhva i zandyee xaan ra iñi ra. Ta sito ndo cuhva i quita vaha ra Job quivi nu ndihi nducu coto ihñi cuihna sii ra vatyi vaha xaan maa ra Ndyoo, ta cundahvi xaan iñi ra sii ñiyivi.

¹²Ta minoo tuhun ñiñi xaan cuu sa cua catyi vityi hermano. Ma tyiñaha ndo Ndyoo nuu ñiyivi ta catyi ndo ñaa sa cua zavaha ndo a ma zavaha ndo. Ta ma cahan ndo ñaa inga zivi cuhva cuan. Tatu cuñi ndo cahan ndo minoo cuhva catyi ndo: “Tyehen cua zavehi” a catyi ndo “ma zavehi sii si”, ta ma zama tucu ndo inga cuhva cuee ca. Tacuan ta cua coto ñiyivi vatyi tuhva ndo cahan sa ndisa, ta ma tasi tuñi ra Ndyoo sii ndo.

¹³¿Atu iyo ndo ndyehe ndo tundoho? Nacahan ra cuan sihin ra Ndyoo. ¿Atu zii cuñi ndo? Nacata ra zii cuñi yaa, ta nazacahnu ra sii ra Ndyoo.

¹⁴¿Atu iyo ndo cuhu ndo? Nacana ra cuhu sii tandihí ra sahnu vehe ñuhu, ta nacahan ra sahnu cuan sihin ra Ndyoo sa cuenda ra ta natyihi ra zuhva azetye xiñi ra cuhu ta cahan ra zivi ra Jesús.

¹⁵Ta tatu nii iñi ra, cua nduvaha ra cuhu cuan. Cua zanduvaha ra Jesús sii ra, ta tatu cuhu ra vatyi

i zavaha ra cuatyí, cua zandasi ra Ndyoo cuatyí ra.

¹⁶Yucuan cuenda nacatyí ndo sihin ra tahan ndo ñaa cuatyí i zavaha ndo, ta cahan ndo sihin ra Ndyoo sa cuenda minoo ndo ta inga ndo vatyí cua nduvaha ndo. Tatu iyo minoo ra ndoo xaan ta cahan ra sihin ra Ndyoo, iyo xaan cuhva sihin oración ra. Ta ñihi xaan zatyíño si.

¹⁷Ra Elías i cuu ra minoo ñiyívi tañi maa yo. Ta sica xaan ra sii ra Ndyoo vatyí ma coon zavi. Ta ñá coon ra nu ñuhu ñuu ñiyívi uñi cuiya zazava.

¹⁸Ta ziqui i cahan ra sihin ra Ndyoo inga saha ta i coon xaan zavi, ta i zatyíño vaha tucu ñuhu inga saha, ta i nacoo ndaha tyíño.

¹⁹Hermanos, tatu iyo minoo ndo quita ndo ityi vaha ta zandoo ndo tuhun ndisa, ta tatu quita inga ra zanaquihin ityi vaha sii ra ta natiin cuenda tucu ra Tuhun Ndyoo,

²⁰cuñi si sa coto ra zanaquihin ityi vaha sii ra vatyí i zacacu ra sii minoo ra iyo cuatyí, ta ma cuhun ra andyaya. Ta zanaa ra Ndyoo tandihi cuii cuatyí ra.

Sa Xihna Ñi Carta I Tyaa Ra San Pedro

Tyaa ra Pedro minoo carta
sii ñiyivi sino iñi sii ra
Jesucristo, ñu i sitya cuatyí

1 Yuhvi ra Pedro, minoo apóstol ra Jesucristo cui. Maa ra i tava tyiño sii. Ta tasi carta ya sii ñiyivi ña ndyaa ca ñuu ñu. Tandihí ñu i sitya cuatyí. Ta ndyaa ñu nu cu si Ponto ta Galacia ta Capadocia ta Asia ta Bitinia.

²Maa ra Ndyoo Zutu yo i casi sii ndo vatyí tacuan i cuñi maa ra ta sa naha. Sihin Tatyí Ii ra i zanduvaha ra sii ndo vatyí cua tyaa ndo yahvi sii ra, ta zandasi ra cuatyí ndo vatyí sati ñiñi ra Jesucristo sa cuenda maa yo. Natyindyee xaan ra Ndyoo sii ndo, ta nacuhva ra sa coo sa taxi añima ndo.

Zii xaan cuñi yo, ta ndatu yo sii minoo sa cua ñihi yo cuee ca

³Zacahnu ndi sii ra cu Ndyoo, Zutu ra Jesucristo, ra ndyaca ñaha sii yo vatyí i cundahvi xaan iñi ra sii yo, ta i zanacacu saa ra sii yo vatyí i nandoto ra Jesucristo sisi sa i sihi ra. Ta vityí zii xaan cuñi yo, ta ndatu yo sii minoo sa cua ñihi yo cuee ca.

⁴Iyo sa cumi maa ra Ndyoo ndya andívi sa cuenda maa ndo, ta ma

tivi si ndaha ñi, ta ñahñi sa quiñi cuu cahun nu iyo si, ta ma naa si.

⁵Ta cua ñihi ndo sii si vatyí zacuenda vaha ra Ndyoo sii ndo sihin tundyee iñi sii maa ra. Nii xaan cuu iñi ndo sii ra, ta nu cua ndihí tyiemvu cua zañaha ra Ndyoo cuhva cua zacacu ndihí ra sii ndo vatyí sa ndyaa listo cuhva cuan.

⁶Yucuan cuenda zii xaan cuñi ndo vazu ndyehe xaan ndo tundoho vityí.

⁷Sa nii xaan iñi ndo sii ra Ndyoo, cuu si tañi xuhun cuaan. Cuñi si sa cua tyicuhva ra Ndyoo sii si sihin ñúhu, ta ziquí cua ndyehe ra tatu vaha si a ña vaha si. Tatu nii xaan cuu iñi ndo sa ndisa cuii, cua cundyee iñi ndo vazu ndyehe ndo tundoho, ta sa nii xaan iñi ndo cuhva cuan vale ca si ta ziquí xuhun cuaan vatyí xuhun cuaan sa iyo ñuu ñiyivi ya cua cunaa si. Tatu nii xaan iñi ndo sa ndisa cuii quivi ndyehe ndo tundoho, quivi quisi ra Jesucristo ta cua zacahnu ra Ndyoo sii ndo. Cua catyí ra vatyí vaha xaan cuu cuhva i cunii iñi ndo, ta cua tyaa xaan ra yahvi sii ndo.

⁸Cuñi xaan ndo sii ra Jesucristo vazu ta ndyehe ca ndo sii ra. Sino xaan iñi ndo sii ra vityí vazu ta

ndyehe ca ndo sii ra, ta yucuan cuenda zii xaan zii xaan cuñi ndo ndya cuhva ndya ña cuu ca nacatyí maa ndo.

⁹Ta sa cuenda sa ñii xaan iñi ndo sii ra, ta cuee ca cua ñihi ndo sa cacu ndihi ndo.

¹⁰Ta sa naha, ra i cahan tuhun i saha ra Ndyoo sii ra, ra profeta cuan, ñá cutuñi vaha iñi ra yozo caa cua cacu ñiyivi, zoco i tyaa ra cuhva i catyi ra Ndyoo sihin ra sa cuenda si, ta i zacoto ra yozo caa cua ñihi maa ndo sa vaha sii ra Ndyoo cuee ca.

¹¹I zacoto Tatyí li ra Cristo sii ra profeta vatyí cua ndyehe xaan ra Cristo tundoho, ta i zacoto si cuhva cua nandoto ra ta cua tiin cuenda ra Ndyoo sii ra andivi, zoco i nducuu coto xaan ra profeta yoo ra cuu ra Cristo ta ama cua quisi ra.

¹²Ta i zacoto ra Ndyoo sii ra vatyí ma saa ñaha cuhva cuan ñii ñi sa ndito ra profeta, zoco i quisi si cuee ca, quivi maa yo. Ta vityí sa sito maa ndo tuhun cuan vatyí iyo ra zacoto Tuhun Vaha sii ndo sihin tundyee iñi Tatyí li sa i tasi ra Ndyoo ndya andivi. Ta ndya cuhva ndya ángel andivi ta cuñi xaan ra coto ra cuaha ca sa cuenda cuhva ya.

Cuñi xaan ra Ndyoo vatyí coo yo minoo cuhva vaha sa ndisa cuii

¹³Yucuan cuenda nacañi vaha iñi ndo cuhva cua zavaha ndo, ta nacoo vaha sa siñi tuñi sii ndo. Cuatu vaha xaan ndo sii sa cua cuhva ra Ndyoo sii ndo quivi cua quisi tucu ra Jesucristo vatyí vaha xaan añima maa ra Ndyoo, ta cua cuhva ra sii si sii ndo quivi cuan.

¹⁴Zehe ra Ndyoo cuu sii ndo. Yucuan cuenda tyaa ndo yahvi sii ra, ta ma zavaha ca ndo cuhva ña vaha sa i zavaha ndo quivi ta coto ca ndo sii ra.

¹⁵Ii xaan cuu maa ra Ndyoo, yucuan cuenda cuu ndo ñiyivi vaha sa ndisa cuii sihin tandihi cuii cuhva zavaha ndo.

¹⁶Vatyí catyi Tuhun Ndyoo: “Cuu ndo ñiyivi sa ñahñi cuatyí vatyí yuhvi ra ñahñi cuatyí cui.” Catyi ra Ndyoo

¹⁷Minoo cuhva ndoo xaan cua ndyehe ra Ndyoo tyiño zavaha sa minoo minoo yo. Tatu catyi ndo vatyí Zutu ndo cuu sii ra, yuhu ndo sii ra ta zavaha ndo sa vaha ñii ñi sa iyo ndo ñuu ñiyivi ya.

¹⁸I tyiyahvi ra Ndyoo, ta i tava ra sii ndo sii cuhva sahnu sa i zañaha ñiyivi sahnu sii ndo, cuhva i tyaa xaan ndo yahvi sii costumbre sahnu. Ta ñá tyiyahvi ra Ndyoo sihin minoo sa cuu tivi tañi xuhun cuii a xuhun cuaan.

¹⁹Zoco i tyiyahvi ra sihin minoo sa yahvi xaan ca, sihin niñi ra Cristo. Mvee ticatyí ra Ndyoo cuu sii ra. Ñahñi cuatyí ra, ta ñahni sa ña vaha i zavaha ra.

²⁰Cuee ca sa zavaha ra Ndyoo ñuu ñiyivi ta sa i catyi ra sihin ra Cristo vatyí cua zavaha ra cuhva ya, zoco ñá quisi ñaha ra ndya vityí vatyí cua tyindyee xaan ra sii maa ndo.

²¹Sa cuenda ra Cristo, ta sino iñi ndo sii ra Ndyoo. Ra Ndyoo cuu ra i zanandoto sii ra sisi sa i sihi ra, ta i natiin cuenda ra sii ra nu ndyaa ra. Vityí sino xaan iñi ndo ta ñii xaan cuu iñi ndo sii ra Ndyoo vatyí ityi nuu ca cua cuyucu ndo sihin ra Cristo nu ndyaa ra.

²²Vityi iyo ca cuhva cuñi xaan ndo sii tandihî ra hermano vatyî sa ndundîi añima ndo sa ndisa cuii vatyî tyaa ndo yahvi sii sa ndisa. Cuñi xaan ndo sii minoo ndo ta sii inga ndo minoo sa ndisa ta sihin tandihî cuii añima ndo.

²³Sa i nacacu saa ndo. Ta ra cuu Zutu ndo vityi, ma cuu ca ra. Maa ra Ndyoo cuu ra catyi yozo caa cua cuu si. Ta ma naa tuhun ra. Ndito si, ta tandihî cuii tyiemvu cua coo si.

²⁴⁻²⁵Vatyî catyi Tuhun Ndyoo:

Tandihî ñiyivi ñuu ñiyivi cuu tañi itya ñi,
ta tañi minoo ita itya ñi cuu ñu.
Na-ityi itya cuan, ta canacava ita si, zoco Tuhun ra Ndyoo cua coo si tandihî cuii tyiemvu.

Ta ihya cuu tuhun cuhva cua cacu ñiyivi, tañi sa i zacoto ñiyivi sii ndo.

2 Yucuan cuenda zandoo ndo tandihî sa ña vaha. Ma zandavi ñaha ca ndo sii ñiyivi. Ma zaha ndo tuhun vatyî vaha xaan ndo tatu ña ndisa. Ma cuxaan ndo ndyehe ndo sii ñiyivi tatu iyo sa vaha sii ñu, ta ma cahan ndo cuendu ziqui ñiyivi.

²Cuu ndo tañi lee sa naca cacu ta cuñi xaan si caxi si. Nanducu ndo zicui vaha, zicui sa ñahñi sa ndya vaha ñi zaca sihin. Zicui cuan cuu Tuhun Ndyoo, ta sihin si cua cuahnu ndo.

³Tacuan zavaha ndo vatyî sa cutuhva ndo sa ndisa cuii vatyî vaha xaan ñiyivi cuu maa ra Cristo.

Ra Cristo cuu minoo yuu ndito

⁴Tuhva ndo sii ra ndyaca ñaha sii yo. Minoo yuu ndito cuu ra. I catyi

ñiyivi vatyî ña vaha yuu cuan, zoco i casi ra Ndyoo sii si, ta ñiñi xaan si.

⁵Maa ndo cuu tucu tañi yuu ndito. Cuhva ndo sa cutyiño ra Ndyoo sii ndo, ta cua zavaha ra vehe ñuhu ra sihin ndo. Ta cuu tucu ndo ra cu zutu sa cuenda ra. Cuhva ndo sii ndo sii ra, zacahnu ndo sii ra, ta cuhva ndo ñaa inga sa cua cuhva ndo sii ra, ta cua quihin ra sii si sa cuenda ra Jesucristo.

⁶Tyehen catyi Tuhun Ndyoo sa cuenda ra Cristo:

I casi minoo yuu ñiñi xaan, ta tyei sii si nu cuu siqui vehe ñuhi.

Tandihî ñiyivi cua sino iñi sii ra cuan, ma coo ticahan nuu sii ñu sa cuenda ra.

⁷Sa cuenda ndoho, ra sino iñi, ta sa sito ndo vatyî vaha xaan ra, zoco sa cuenda ñiyivi ña sino iñi ta cuu si tañi catyi Tuhun Ndyoo:

I zavita ihno ñiyivi zandaa vehe sii yuu sa siñi ñuhu sa cuenda siqui vehe.

Ta vityi yuu cuan cuu sa ñiñi ca ta ziqui tandihî sa cuenda vehe cuan.

⁸Ta tañi nu catyi tucu si:

Yuu sa cua catyihi saha ñiyivi cuu ra. Cua zanduva cuii ra sii ñu.

Nduva ñu vatyî ña tyaa ñu yahvi sii Tuhun Ndyoo. Tacuan i tyaa ra Ndyoo cuhva cua tahan ñu.

Ñiyivi sa cuu cuenda ra Ndyoo

⁹Zoco maa ndo cuu minoo ityi ñiyivi i casi ra Ndyoo. Ra cu zutu cuu ndo sa cuenda rey. Ñiyivi ñahñi cuatyî cuu ndo; iin ñi sa cuenda ra Ndyoo cuu ndo. Yucuan cuhva iyo

ndo vatyí cua zacoto ndo sii ñiyivi tyiño vaha xaan ra Ndyoo, cuhva i cana ra sii ndo vatyí cua quita ndo nu ñaa ta quihvi ndo nu iyo ñúhu vaha xaan ra.

¹⁰Quívi tañaha ca sino iñi ndo, ñahñi ñiyivi i cuu ndo, zoco vityi sa nduu ndo ñiyivi ra Ndyoo. Quívi cuan yoñi i cundahvi iñi sii ndo, zoco vityi cundahvi iñi ra Ndyoo sii ndo.

Zatyíño ndo tyiño ra Ndyoo

¹¹Ndoho hermanos, cuñi xein sii ndo. Tañi ñiyivi ndihvi noo ndahvi cuu ndo vatyí yivi ñuu ndo cuu ñuu ñiyivi ya, ta yucuan cuenda zañiñi sii ndo vatyí ma zavaha ndo cuhva ña vaha sa cuñi coño ñuhu ndo vatyí cuhva cuan cua zatívi si sii añima ndo.

¹²Zacuenda ndo sii ndo sihin cuhva zavaha ndo ityi nuu ñiyivi ña sino iñi. Ta vazu cahan ñu ndya vaha ñi sii ndo vityi tañi sa ra ña vaha cuu ndo, zoco cua ndyehe ñu tandihí sa vaha zavaha ndo ta ziquí cua zacahnu ñu sii ra Ndyoo quívi cua ndyehe ra Ndyoo cuhva i zavaha tandihí ñiyivi.

¹³Sa cuenda ra Cristo, tyaa ndo yahvi sii tandihí cuii ra cu tyiño. Tyaa ndo yahvi sii ra gobierno vatyí ra cahnu ca cuu ra.

¹⁴Ta vazu ra gobernador cuu ra, tyaa tucu ndo yahvi sii ra vatyí tava ra gobierno tyiño sii ra sa cua tasi tuñi ra sii ñiyivi ña vaha, ta cua zacahnu ra sii ñiyivi zavaha sa vaha.

¹⁵Vatyí cuñi ra Ndyoo sa cua zavaha maa ndo sa vaha, ta sihin cuhva cuan cua cazí ndo yuhu

ñiyivi sa ñahñi maa sito ta cahan ñu sa tondo ñi sa cuenda ndo.

¹⁶Ña ndyaca ñaha ca ley sii ndo sa ndisa, zoco ma caca iñi ndo vatyí cuu zavaha ndo ndya vaha ñi. Vityí cuñi si cuu ndo muzu maa ra Ndyoo ta tyaa ndo yahvi sii maa ra.

¹⁷Ta tyaa ndo yahvi sii tandihí ñiyivi. Cuñi xaan ndo sii tandihí ra hermano ta ñu hermana. Yuhu ndo sii ra Ndyoo. Ta tyaa ndo yahvi sii ra gobierno.

I ndyehe xaan ra Cristo tundoho sa cuenda maa yo, ta zandoo ra minoo cuhva cua cundyico yo

¹⁸Ndoho ra cu muzu, tyaa ndo yahvi sii patrón ndo tandihí cuii cuhva. Ña iin ñi sii ra vaha ta ra mazu iñi, zoco vazu ra quíni iyo, tyaa tucu ndo yahvi sii ra.

¹⁹Vatyí tahan iñi ra Ndyoo tatu sa cuenda sa tyaa ndo yahvi sii maa ra ta ndyehe ndo tundoho, vatyí zavaha ndo sa vaha.

²⁰Zoco tatu zavaha ndo sa ña vaha, ta tasi tuñi ñiyivi sii ndo sa cuenda maa si, ta zandyee ndo iñi ndo tundoho cuan, ¿yozo caa tyindyee si sii ndo ityi nuu ra Ndyoo? Ña tyindyee si. Zoco tatu zavaha ndo sa vaha ta zandyee ndo iñi ndo vazu ndyehe ndo tundoho sa cuenda si, yucuan cuu sa tahan iñi ra Ndyoo.

²¹Vatyí yucuan cuenda i casi ra Ndyoo sii ndo. Vatyí i ndyehe ra Cristo tundoho sa cuenda maa ndo, ta zandoo ra minoo cuhva cua cundyico ndo. Cuhva zavaha maa ra, tacuan zavaha tucu maa ndo.

²²Ñahñi maa numinoo cuatyí i zavaha ra. Ta yoñi sii i zandavi ñaha ra.

²³Tatu cahan ñiyivi ndya vaha ñi sii ra, ñá nacahan ra sa cahan ñu. Tatu zandyehe ñiyivi tundoho sii ra, ñá zayuhu ra sii ñu. I tyaa ra tandihi tyiño cuan ndaha ra Ndyoo vaty ra Ndyoo, ndoo xaan zandaa ra tyiño.

²⁴Zuun ñi maa ra Cristo i ndyehe tundoho sa cuenda cuaty yo sihin coño ñuhu ra quivi i sihi ra nu cruz. Ta vityi cuu zandihi yo tuhun sa zavaha yo sa ña vaha ta coo yo minoo cuhva ndoo xaan sa ndisa cuii. I ndoho maa ra sa cuenda maa yo, to yucuan cuenda i nduvaha yo iin ñi sihin ra.

²⁵Nu quisi quivi i sica noo ndo tañi mvee ticaty sa cua naa, zoco vityi sa naquita ndo nu ndyaa ra zacuenda sii ndo. Tañi minoo ra cu pastor, zacuenda xaan ra sii añima ndo.

**Cuhva cuñi si zavaha ra
iyo ñazihí ta ñu iyo yii**

3 Zuun ñi cuhva cuan, cuñi si sa tyaa xaan ñuzihí yahvi sii ra cu yii ñu vaty tatu ña sino iñi yii ñu Tuhun Ndyoo, zoco cuu sino iñi ra sihin cuhva vaha zavaha ñu vazu ña cahan ñu Tuhun Ndyoo sihin ra.

²Cua ndyehe yii ndo vaty yuhu ndo sii ra Ndyoo ta zavaha xaan ndo sa vaha.

³Ma zandutyacui xaan ndo sii ndo sihin cuhva zavaha ndo sihin ixi xiñi ndo ta cuhva sa sityiño xaan ndo ndaha tyiño xuhun cuaan a zahma yahvi xaan.

⁴Vaha ca sa caca iñi ndo yozo caa cuu ndo ñiyivi vaha sa ndisa sihin añima ndo. Ihya cuu sa tyaqui sa ma tiví, tatu cuu ndo ñiyivi vii

xaan ta ma nducu ndo tizihí. Ihya cuu sa cahnu ca nuu ra Ndyoo.

⁵Cuhva ya i zanduvaha ñuzihí sii ñu ta sa naha ta yivi sihin zahma vaha. I sino xaan iñi ñu sii ra Ndyoo, ta vaha xaan ñiyivi i cuu ñu, ta i tyaa xaan ñu yahvi sii yii ñu.

⁶Tacuan i cuu ña Sara. I tyaa ña yahvi sii ra Abraham, ta catyi ña vaty maa ra ndyaca ñaha sii ña. Cua cuu ndo tañi maa ña tatu zavaha ndo sa vaha ta tatu ña yuhu ndo sa tyaa ndo yahvi sii ra Ndyoo.

⁷Ta zuun ñi cuhva, ndoho ra iyo ñazihí, nacao vaha sa siñi tuñi sii ndo sihin ñazihí ndo. Tyaa ndo yahvi sii ña tañi tahan si. Cundahvi iñi ndo sii ña vaty vita ca ña ta ziqui ca maa ndo. Ta tyaa tucu ndo yahvi sii ña vaty iin ñi cuhva cua ñihi ndo sa cundito ndo tandihi cuii tyiemvu. Tacuan zavaha ndo ta ma cundazi nu cahan ndo sihin ra Ndyoo.

**Iyo saha cua ndyehe ñiyivi
tundoho vaty zavaha ñu sa vaha**

⁸Ihya tuhun tyaa tucu ndo yahvi. Nacao sa vaha nu yucu ndo sihin minoo ndo ta sihin inga ndo tañi sa iin ñi ñiyivi cuu ndo. Cundahvi xaan iñi ndo sii tahan ndo ta ma zacahnu ndo sii ndo.

⁹Tatu zavaha ñiyivi sa ña vaha sihin ndo, ma zavaha ndo sa ña vaha sihin ñu. Ta tatu cahan ñu ndya vaha ñi sii ndo, ma nacahan ndo nu cahan ñu. Inga cuhva zavaha ndo. Cahan ndo sihin ra Ndyoo vaty cua cuhva ra sa vaha sii ñu. Vaty i cana ra Ndyoo sii maa ndo vaty cua cuhva ra sa vaha sii ndo.

¹⁰Ta catyi Tuhun Ndyoo vatyi:

Ra cuñi coo vaha ñuu ñiyivi ta cuzii iñi ra, nazacuenda vaha ra yuhu ra ta ma cahan ra sa ña vaha, ta ma zandavi ñaha ra.

¹¹Cuñi si sa zacuenda ra sii ra ta ma zavaha ra sa ña vaha, ta nazavaha ra sa vaha.

Nanducu xaan ra cuhva coo sa taxi sii ra sihin tandihi ñiyivi.

¹²Vatyi zacuenda xaan ra Ndyoo sii ñiyivi ndoo iyo, ta siñi ra sa cahan ñu sihin ra, zoco cua tasi tuñi ra sii ñiyivi zavaha sa ña vaha.

¹³Yoñi ra cua zavaha sa ña vaha sihin ndo tatu maa ñi sa vaha zavaha maa ndo.

¹⁴Zoco vazu zandyehe ñu tundoho sii ndo sa cuenda sa zavaha ndo sa vaha, zii xaan cua cuñi ndo. Ta ma yuhu ndo sii ñiyivi zayuhu sii ndo, ta ma caca xaan iñi ndo.

¹⁵Zoco sihin tandihi añima ndo tyaa ndo yahvi sii ra Cristo, ra ndyaca ñaha sii ndo. Ta cundyaa listo ndo sa nacaty i ndo sihin ñiyivi ndaca tuhun sii ndo ñaa cuenda sino iñi ndo Tuhun Ndyoo. Zoco vii ñi cahan ndo sihin ñu minoo cuhva cua zañaha si vatyi tyaa ndo yahvi sii ñu.

¹⁶Zavaha ndo sa vaha vatyi sino iñi ndo sii ra Cristo, ta ziqui tatu cahan ñiyivi ndya vaha ñi sii ndo ta tyaa ñu cuaty i sata ndo, zuun ñi maa ñu cua cucahan nuu vatyi maa ñi sa vaha zavaha ndo. Ta maa ndo cua coto ndo vatyi ñahñi cuaty i ndo.

¹⁷Tatu cuhva cuñi maa ra Ndyoo cuu, vaha ca cua ndyehe ndo

tundoho vatyi zavaha ndo sa vaha ta ziqui sa ña vaha.

¹⁸Vatyi zuun ñi maa ra Cristo i ndyehe ra tundoho minoo saha sa cuenda cuaty i maa yo. Nahñi cuaty i maa ra, zoco i ndyehe ra tundoho sa cuenda maa yo vazu ñiyivi ña vaha i cuu yo vatyi cuhva cuan cuu zanduvaha ra sii yo sihin ra Ndyoo. I sahñi ñiyivi sii coño ñuhu ra, zoco ñá sihi añima ra.

¹⁹I sahan ra sihin añima ra, ta i nacaty i ra Tuhun Ndyoo sihin añima sa ñoho ndazi.

²⁰Añima ñiyivi ñá tyaa yahvi sii ra Ndyoo quivi i cahan ra Noé. Ta i cundyee xaan iñi ra Ndyoo sihin ñu ñi ñi sa zavaha ra Noé barco cuan, zoco zuhva ñi ñiyivi i cacu sisi tu nu ndutya. Uña tahan ñi ñu.

²¹Ta tañi i cacu ñiyivi nu ndutya quivi cuan, tacuan tucu zañaha si cuhva cua cacu maa yo quivi sa sicoo ndutya yo vatyi i nandoto ra Jesucristo sisi sa i sihi ra. Zoco ma caca iñi yo vatyi sa coo ndutya yo cuu sa cua zacacu sii yo, zoco sa caca yo sii ra Ndyoo ta nduvaha sa siñi tuñi vaha sii yo vatyi sino iñi yo sii ra Jesús.

²²Ta vityi cuahan ra andivi, ta ndyaa ra ityi siyo cuaha ra Ndyoo. Ta ndyaca ñaha ra sii ángel ta sii inga ra ndyaca ñaha ta ra nahnu.

Cuñi si sa zatyño yo tyiño ra Ndyoo sihin cuhva saha ra sii yo

4 Yucuan cuenda, tañi i ndyehe ra Cristo tundoho sihin coño ñuhu ra, tacuan tucu tahan si sii maa ndo. Cundyaa listo ndo sa ndyehe ndo tundoho sa cuenda ra. Ra sa ndyehe tundoho sihin coño

ñuhu ra, ña ndyaca ñaha ca cuatyí ra sii ra.

²Ta vityí zavaha ra cuhva cuñi ra Ndyoo. Ña zavaha ca ra cuhva ña vaha sa cuñi coño ñuhu ra tandihi quivi sa iyo ra ñuu ñiyivi.

³Sa vaha ñi cuu si cuhva i zavaha ndo quivi ta sino ca iñi ndo, tañi zavaha ñiyivi ña sito sii ra Ndyoo. I zavaha ndo ñaa sa ña vaha sa cuñi ndo sihin coño ñuhu ndo, tandihi sa quiñi. I sihi xaan ndo ndixi ta i siñi ndo. I zacahnu xaan ndo vico, ta i zacahnu ndo sii zandu yutu sihin minoo cuhva ña cuñi ra Ndyoo.

⁴Ta ñiyivi ña sito sii ra Ndyoo, iyo xaan cuñi ñu vatyí ña cutahan ca ndo sihin ñu sihin tandihi cuhva ña vaha sa zavaha ñu. Ta yucuan cuenda cahan ñu ndya vaha ñi sii ndo.

⁵Zoco cua cuhva maa ñu cuenda sii ra cua tyicuhva sii ñiyivi ndito ta sii ñiyivi i sihi.

⁶Yucuan cuenda i nacatyí ra Jesús Tuhun Ndyoo sihin ñiyivi i sihi. Ñiyivi cuu ñu, ta yucuan cuenda i sihi coño ñuhu ñu, zoco cua cundito añima ñu tañi ndito maa ra Ndyoo.

⁷Sa cuñi naa ñuu ñiyivi. Yucuan cuenda cuu ndo ñiyivi iyo sa siñi tuñi vaha, ta cuaha xaan cahan ndo sihin ra Ndyoo.

⁸Ta sa ñiñi ca ta ziqui tandihi cuu sa cuñi xaan ndo sii minoo ndo ta sii inga ndo vatyí tatu cuñi xaan yo sii tahan yo ma ndyehe xaan yo ñaa cuatyí zavaha ñu.

⁹Tiin cuenda vaha ndo sii minoo ndo ta sii inga ndo vehe ndo, ta ma cuxaan ndo tatu saa ra hermano vehe ndo.

¹⁰Ta tahan tahan cuhva saha ra Ndyoo sii sa minoo minoo ndo, tacuan tyindyee ndo sii tahan ndo sihin cuhva saha ra Ndyoo sii ndo vatyí saha xaan ra cuaha xaan nuu sa vaha sii tandihi ndo iin ñi.

¹¹Yoo ndo nacatyí Tuhun Ndyoo, cahan ndo tañi sa maa ra Ndyoo cahan, a tatu tyindyee ndo sii ñiyivi, tyindyee ndo sihin tandihi tundyee iñi sa saha ra Ndyoo sii ndo. Ta tandihi sa zavaha ndo, zavaha ndo sii si sihin minoo cuhva sa cua zacahnu sii maa ra Ndyoo sa cuenda ra Jesucristo. Ta nazacahnu xaan yo sii ra, ta nacundyaca ñaha ra tandihi cuii tyiemvu. Ta nacuu si tacuan, ta nacuu si sa ndisa.

**Cua ndyehe yo tundoho vatyí
sino iñi yo sii ra Cristo**

¹²Ndoho hermanos, cuñi xein sii ndo. Ma cu-iyo xaan cuñi ndo sa cuenda tundoho cahnu xaan sa vasi ziqui ndo vatyí tacuan cua tahan si sii tandihi yo ra sino iñi sii ra Cristo.

¹³Zoco zii xaan cuñi ndo sa cuenda sa ndyehe ndo tundoho sihin ra Cristo vatyí tatu ndyehe ndo tundoho sa cuenda ra, quivi cua quisi ra ta cundyaca ñaha ra ñuu ñiyivi, zii xaan ca cua cuñi ndo.

¹⁴Tatu cahan ñiyivi ndya vaha ñi sii ndo sa cuenda ra Cristo, zii xaan cua cuñi ndo vatyí situ xaan Tatyí Ii sii ndo. Ta Tatyí Ii cuu sa zañaha vatyí vaha xaan maa ra Cristo. Quiñi xaan cahan ñiyivi sii maa ra, zoco maa ndo zacahnu ndo sii ra.

¹⁵Zoco ma cahñi ndo ñiyivi ta ma zuhu ndo; ma nducu ndo tizihí, ta ma tyihí ndo sii ndo sihin

inga ñiyivi vatyí cua ndyehe ndo tundoho sa cuenda cuhva cuan. Ta yivi tundoho sa cuñi maa ra Ndyoo sa ndyehe ndo cuu tundoho cuan.

¹⁶Zoco tatu ndyehe ndo tundoho sa cuenda Tuhun Ndyoo, ña tahan si sa cucahan nuu ndo. Zacahnu ndo sii ra Ndyoo sa cuenda tundoho sa ndyehe ndo vatyí ñiyivi ra Cristo cuu ndo.

¹⁷Sa cua saa quivi cua tyicuhva ra Ndyoo sii ñiyivi cuenda ra. Ta tatu cua quisaha cuhva cuan sihin maa yo, ¿ta yozo caa cua tahan ñiyivi ñá tyaa yahvi sii Tuhun Vaha ra Ndyoo?

¹⁸Ta tatu sihin tundoho ta cua cacu ñiyivi vaha, ¿yozo caa cua tahan si sii ñiyivi ña vaha ta ñiyivi iyo cuatyí?

¹⁹Yucuan cuenda tatu ndyehe ndo tundoho vityí vatyí tacuan cuñi ra Ndyoo, cuñi si sa zavaha ca ndo sa vaha ta cuhva cuenda ndo añima ndo sii ra Ndyoo. I zavaha ra sii ndo, ta ma zandoo ra sii ndo.

Saha xaan ra tyiño sii ñu sino iñi

5 Vityí sehi tyiño sii ra sahnu, ra ndyizo tyiño nu yucu ndo. Mínoo ra sahnu cuu tucu ii, ta i ndyehi sii ra Cristo quivi i ndyehe ra tundoho. Ta cua ñihi tuqui sa vaha sihin ra Cristo cuee ca.

²Tañi zacuenda mínoo ra cu pastor sii mvee ticatyí zono ra, tacuan zacuenda maa ndo sii ñiyivi cumi ndo. Ma cuatu ndo ndya sa zañiñi ñiyivi sii ndo, zoco cuñi ndo zavaha ndo sii si sihin sa vaha. Ta ma zavaha ndo sii si vatyí cuñi ndo xuhun zoco sa cuenda sa vatyí cuñi ndo zatyíño ndo tyiño ra Ndyoo.

³Ma ñihi xaan cundyaca ñaha ndo sii ñu, zoco zañaha ndo mínoo cuhva vaha sii ñu sihin cuhva vaha iyo maa ndo.

⁴Ta quivi cua quisi tucu ra cu pastor cahnu ca, cua ñihi maa ndo mínoo sa vaha xaan sa ma tiví, ta ma cunaa si.

⁵Ndoho ra cuatyí, tyaa ndo yahvi sii ra sahnu. Ta tandíhi ndo, tyaa ndo yahvi sii tahan ndo ta zanduluhlu ndo sii ndo, vatyí:

Cuxaan ra Ndyoo sihin ñiyivi sa zacahnu sii, zoco saha ra sa vaha sii ñiyivi zanduluhlu sii.

⁶Yucuan cuenda quivi ndyehe ndo tundoho, tiin cuenda ndo sii si tañi mínoo sa tasi ra Ndyoo sii ndo, ta cuee ca, quivi tahan si, cua tyaa siyo ra sii si ta zii xaan cua cuñi ndo inga saha.

⁷Nacatyí ndo sihin maa ra tandíhi sa sica xaan iñi ndo ta zandoo ndo sii si sihin maa ra vatyí sica iñi maa ra sa cuenda ndo, ta zacuenda ra sii ndo.

⁸Zacuenda vaha xaan ndo sii ndo vatyí ra xaan iñi sii ndo, ra cuihna, sica noo ra tañi mínoo ndicaha cuahyi. Nanducu ra yoo sii cua casi ra.

⁹Sino vaha iñi ndo sii ra Ndyoo, ta tava ndyizo ndo sii ra cuihna. Ta cundyee iñi ndo vatyí sa sito ndo vatyí nacahnu ñuu ñiyivi ndyehe ñu sino iñi tundoho zuun ñi cuhva tañi ndyehe maa ndo.

¹⁰Saha xaan ra Ndyoo sa vaha sii yo tandíhi quivi. Maa ra catyí vatyí cua ndyehe xihna ndo zuhva tundoho, ta ziqui cua coo sa vaha xaan sii ndo tandíhi cuii tyiemvu vatyí iin ñi cuu ndo sihin

ra Jesucristo. Tatu sa ndyehe ndo zuhva tundoho, maa ra Ndyoo cua zanduvaha sii ndo sihin tundoho cuan. Cua zandundyee xaan ra iñi ndo. Cua cuhva ra tundyee iñi sii ndo, ta ma ndoyo ñuhu ndo ndaha ñi.

¹¹Nazacahnu xaan yo sii ra, ta nacundyaca ñaha ra tandihi cuii tyiemvu. Ta nacuu si tacuan ta nacuu si sa ndisa.

**Saha ra minoo nacumi sii
ñu nu ndihi cahan ra**

¹²Tasi carta ya sii ndo sihin ra Silvano. Sica iñi vatyi minoo

hermano vaha cuu ra. Zuhva ñi i tyei ihya. Saha xein tyiño sii ndo vatyi ma zaña ndo cuhva sino iñi ndo. Sa ndisa sa saha maa ra Ndyoo cuu cuhva sino iñi ndo; ma zaña ndo sii si.

¹³Ñu sino iñi ihya ñuu Roma tasi ñu minoo nacumi sii ndo. I casi tucu ra Ndyoo sii maa ñu tañi i casi ra sii maa ndo. Ta ra Marcos, zehi, tasi tucu ra minoo nacumi sii ndo.

¹⁴Cuhva ndo minoo Ndyoo nacucumi xaan sii minoo ndo ta sii inga ndo. Nacoo sa taxi añaima tandihi ndo, ra cuu cuenda ra Jesucristo. Amén.

Sa Cu Uu Carta I Tyaa Ra San Pedro

Tyaa ra Pedro inga carta
sii ñiyivi sino iñi

1 Yuhvi ra Simón Pedro, minoo muzu ra Jesucristo cui ta minoo apóstol ra. Tyei carta ya sii ndoho ra sa nañihi cuhva vaha ta nii xaan cuu iñi ndo sii ra Jesucristo tañi nii iñi maa ndi. Ñihi ndo cuhva cuan tañi ñihi maa ndi sii si vatyí ndoo xaan cuu ra Ndyoo ta ra Jesucristo, ra ndyaca ñaha sii yo.

²Nacoo xaan ca sa vaha sa saha ra Ndyoo sii ndo, ta nacoo sa taxi añima ndo cuhva cuahan nacoto ca ndo sii ra Ndyoo ta sii ra Jesús, ra ndyaca ñaha sii yo.

Cuhva iyo ñiyivi sino ndisa
cuii iñi sii ra Cristo

³Sihin tundyee iñi sa iyo sii maa ra Ndyoo, ta i saha ra sii yo tandihi cuii sa cuñi si sa cuenda cuhva cundito yo ta zavaha yo cuhva cuñi maa ra. I saha ra cuhva cuan sii yo quivi i quisaha nacoto yo sii ra. I cana ra sii yo sihin cuhva vaha xaan iyo ra ta sihin sa vaha xaan i zavaha ra.

⁴Ta zuun ñi sihin cuhva cuan i saha ra tuhun ra sii yo sa cuenda

cuhva cua zavaha ra. Cahnu xaan cuu tuhun ya, ta vale xaan si. Ta sa cuenda tuhun i saha ra Ndyoo sii yo, cuu nduu ndo ñiyivi vaha xaan tañi maa ra Ndyoo, ta cuu zandoo ndo sii sa ña vaha sa cuñi coño ñuhu ndo, sa cuñi zativi sii ndo. Ta ma cuu ca zacuu si sihin ndo.

⁵Ta sa cuenda ya cuñi si sa zañiñi ndo sii ndo. Nii xaan cuu iñi ndo, ta vityi nducu tucu ndo cuhva zavaha ndo sa vaha. Ta sihin sa zavaha ndo sa vaha, nducu ndo cuhva coto ca ndo sii ra Ndyoo.

⁶Ta tatu sa sito vaha ndo sii ra Ndyoo, cutuhva ndo cundyaca ñaha ndo sii maa ndo. Ta tatu sa cuu cundyaca ñaha vaha ndo sii ndo, cutuhva ndo cundyee xaan iñi ndo. Ta tatu sa cuu cundyee iñi ndo, yuhu ndo sii ra Ndyoo ta nducu xaan ndo cuhva zavaha ndo sa cuñi ra.

⁷Tatu sa cuñi ndisa cuii ndo sii ra Ndyoo, cuñi ndisa cuii ndo sii tandihi hermano, ta tatu sa cuñi ndisa cuii ndo sii tandihi hermano, cuñi xaan ndo sii tandihi ñiyivi.

⁸Tatu iyo tandihi cuii cuhva ya sii ndo ta cuahan nduñihi ca cuhva iyo si sihin ndo, cua cuu ndo ñiyivi sityiño ra Ndyoo sa ndisa, ta yivi

sa caha ñi cuu sa sito ndo sii ra Jesucristo, ra ndyaca ñaha sii yo.

⁹Zoco ra sa ñahñi cuhva ya iyo sii, cuu ra tañi minoo ra cuaa a ra ña ndisi ndyehe. Sa naa iñi ra sa catyi ra vatyí cua zavaha ra cuhva cuñi ra Ndyoo quivi i zandasi ra Ndyoo cuatyí i zavaha ra quivi cuan.

¹⁰I cana ra Ndyoo sii ndo ta i casi ra sii ndo hermanos vatyí cua cuu ndo ñiyivi cua cuahnu vaha sihin Tuhun ra. Yucuan cuenda nducu xaan ndo cuhva zañaha ndo vatyí ñiyivi sii maa ra cuu sii ndo sa ndisa cuii. Vatyí tatu zavaha ndo tandihi cuii cuhva ya, ma ndoyo ñuhu ndo nu yozo cuii ca.

¹¹Ta cua nuña vaha ra Ndyoo andivi quihvi ndo nu ndyaca ñaha ra Jesucristo. Maa ra cuu ra ndyaca ñaha, ta zacacu ra sii yo.

¹²Ta ma zandoi sa zanacohin iñi ndo tandihi cuhva ya vazu sa sito ndo sii si ta sa ndyee xaan iyo ndo sihin sa ndisa sa iyo sii ndo.

¹³Ta sica iñi vatyí vaha tatu ñi ñi sa ndito que ta zanacohin iñi ndo ta cuhve zuhva tyiño sii ndo.

¹⁴Sa i zañaha ra Jesucristo, ra ndyaca ñaha sii yo, sii vatyí ña naha ca ta cua cui.

¹⁵Zoco ñi ñi sa ndite ta tyei tandihi cuhva ya, ta tatu sa sihi zoco cua nacohon iñi maa ndo tandihi cuhva ya ndya vaha ñi cuhva.

Ñiyivi sa ndyehe cuhva vaha xaan iyo ra Cristo

¹⁶Cuhva i nacatyí ndi sihin ndo sa cuenda tundyee iñi sa iyo sii ra Jesucristo, ra ndyaca ñaha sii yo ta sa cuenda cuhva cua quisi tucu ra,

yivi xemvlu sa cahan ñiyivi ñi cuu cuhva cuan. Maa ndi sa sihin nuu ndi i ndyehe ndi vatyí minoo ra cahnu xaan cuu ra ta zehe ra Ndyoo cuu sii ra.

¹⁷I ndyehe ndi cuhva i zandutyaqui xaan ra Ndyoo Zutu yo sii ra, ta siñi ndi cuhva i zacahnu xaan sa zuun ñi maa ra Ndyoo sii ra nu i cahan ra sihin ra, ta i catyi ra: “Ihya ra cuu zehi. Cuñi xein sii ra. Zii xaan cuñi sihin ra.”

¹⁸Ta maa ndi siñi ndi nduzu cuan sa quita andivi, ñi ñi sa yucu ndi sihin ra Jesús xiñi yucu nu i zacahnu xaan ra Ndyoo sii ra.

¹⁹Ta sa sito ndi vatyí ndisa xaan cuu tuhun i tyaa ra profeta sa cuenda ra Cristo. Vaha tatu tyaa maa ndo yahvi sii si tañi minoo lámpara zandisi nu ñaa ndya quivi cua coo sa ndisi aña ndo vatyí cua cuhva ra Cristo sa cutuñi ca iñi ndo quivi cua quisi ra. Maa ra cuu tañi minoo tiño sa caña tatu sa vasi cundisi.

²⁰Zoco coto vaha ndo vatyí tuhun i tyaa ra profeta, ñahñi numinoo si sa cuu cutuñi vaha iñi yo sa maa ñi maa yo.

²¹Vatyí ra i tyaa cuhva cuan, ñá tyaa ra cuhva cuñi ñi maa ra. Ra i sityiño ra Ndyoo cuu ra, ta i cahan ra cuhva cahan Tatyí Ii ra Ndyoo sihin ra.

Ra zacuaha sa ña ndisa

2 I sicoo tucu ra zandavi ñaha sii ñiyivi hebreo ta sa naha. I catyi ra vatyí cahan ra tuhun i saha ra Ndyoo sii ra, zoco ña ndisa ra. Ta cua coo tucu ra zandavi ñaha nu yucu maa ndo. Zuhva zuhva ñi

cua zacuaha ra tuhun sa cua zativi sii ñiyivi. Cua cahan ra tuhun ra ndyaca ñaha sii yo, zoco cua zacuaha ra tuhun sa ña ndisa. Yaty xaana cua zanaa ra Ndyoo sii ra sa cuenda cuhva ña vaha zacuaha ra.

²Cuaha xaana ñiyivi cua cundyico sii ra, ta cua zavaha ñu cuaha xaana cuaty sihin coño ñuhu ñu. Ta sa cuenda maa ñu, ta cua cahan ñiyivi ndya vaha ñi sii Tuhun Ndyoo ta sii sa ndisa sa zañaha si.

³Cuñi ra ña vaha cuan xuhun, ta yucuan cuenda cua zandavi ñaha ra sii maa ndo sihin tuhun sa ña ndisa. Zoco ma cacu maa ra cuan. Cua ndyehe xaana ra tundoho vaty ndya ta sa naha sa catyi ra Ndyoo yozo caa cua zavaha ra sihin ñiyivi zavaha tacuan. Ñahñi inga ca cuhva sa cuenda maa ra.

⁴Ná zandasi ra Ndyoo cuatyí ángel quivi i zavaha ra cuatyí. I zavita ra sii ra sisi andyaya, ta yucuan i zandoo ra sii ra nuhñi ra sihin cadena nu ñaa. Ndatu ra quivi cua tasi tuñi ra Ndyoo sii ra. ⁵Ta ñá zandasi ra Ndyoo cuatyí ñiyivi i zavaha sa ña vaha ta sa naha. I zacoona ra zavi xaana ziqui ñu, ta i situ ndutya ñuu ñiyivi, ta sii ñi ra Noé i zacacu ra sihin usa tahan ñiyivi sii ra vaty i nacaty i ra sihin ñiyivi cuhva cuñi si sa zandoo ñu cuatyí ñu. ⁶Ta i zanaa tucu ra Ndyoo ñuu Sodoma ta ñuu Gomorra. I sahmi ra sii si, ta i nduu si ñiyaa vaty cuñi ra vaty cua cuu si sa ndaa nuu ñiyivi cua zavaha sa ña vaha cuee ca vaty tacuan cua tahan tucu maa ñu. ⁷Zoco i zacacu ra Ndyoo sii ra Lot ñuu Sodoma cuan vaty minoo ra vaha i cuu ra

Lot, ta ñá cundyee iñi ra ndyehe ra cuhva quini xaana zavaha ñiyivi ña vaha cuan. ⁸Tandihi quivi i sindyaa ra vaha cuan ticui ñiyivi ña vaha cuan, ta uhu xaana cuu añima ra sa ndyehe ra ta sa siñi ra tandihi sa ña vaha i zavaha ñu. ⁹Ta zuun ñi cuhva cuan, sito maa ra Ndyoo yozo caa cua tyindyee ra sii ñiyivi yuhu sii ra ta zavaha ñu cuhva cuñi maa ra, ta cua zacacu ra sii ñu quivi nducu coto ihñi cuihna sii ñu. Ta cua tyaa ziin ra sii ñiyivi ña vaha ndya quivi cua tyicuhva ra sii ñu, ta ziqui cua tasi tuñi ra sii ñu. ¹⁰Ta ñihi ca cua tasi tuñi ra sii ñiyivi catyi vaty sito ñu sii ra ta zavaha ñu tandihi sa ña vaha sa cuñi maa ñu sihin coño ñuhu ñu, ta ña saha ñu sa cundyaca ñaha ra sii ñu. Zacahnu xaana ñu sii ñu, ta maa ñi sa cuñi maa ñu cuu sa zavaha ñu. Ña yuhu ñu cahan ñu ndya vaha ñi sii ra nahnu ca.

¹¹Zoco ángel, vazu nahnu ca ra ta iyo ca sa ndyaca ñaha ra, zoco ña caña iñi ángel tyaa ra cuaty sata ra nahnu ca cuan ta ña cahan ra ndya vaha ñi sii ra ityi nuu ra ndyaca ñaha sii yo.

¹²Zoco ñiyivi sa quehin tuhun, tañi quití cuu ñu. Ñahñi sa siñi tuñi vaha iyo sii ñu. Ndito ñi maa ñu tañi ndito quití. Cahan ñu ndya vaha ñi sii sa ña cutuñi iñi ñu. Ta sa cuenda cuatyí ñu, ndaha cua tiví ñu, ta cua coo quivi ta ta sica ñi cua zanaa ra Ndyoo sii ñu.

¹³Cua ñihi ñu sa tahan si sii ñu sa cuenda sa ña vaha i zavaha ñu. Zii xaana cuñi ñu zavaha ñu sa ña vaha vazu ora. Saha ñu ticahan nuu, ta zativi ñu tyiño ra Ndyoo nu sasi

ñu sihin ndo nu zacahnu ndo vico. Ñiyivi quiñi caa cuu ñu, ta zandavi ñaha ñu ta zaha ñu tuhun vatyí ñiyivi vaha cuu ñu.

¹⁴Ta ra quiñi caa cuan, cuñi ra sa tandihí ñu zihí cuzu sihin ra. Ñahñi cuhva sa zandihí ra sa zavaha ra cuatyí. Nducu ra cuhva zandavi ñaha ra sii ñu ña cutuñi vaha iñi ta cuzu ñu sihin ra. Cuñi xaan ra cuaha ca xuhun ta ndaha tyiño. Cua tasi tuñi ra Ndyoo sii ra sa ndisa cuii.

¹⁵Sa zandoo ra ityi vaha, ta cua naa ra. Ndyico ra cuhva i zavaha ra Balaam zehe ra Beor vatyí i cuñi xaan ra Balaam cuan xuhun, ta yucuan cuenda i zavaha ra cuhva sa ña tahan iñi ra Ndyoo.

¹⁶Ta i cahan burro zono ra sihin ra sihin minoo nduzu tañi cahan ñiyivi, ta i cuxaan ti sihin ra, ta i catyi ti vatyí ma zavaha ca ra cuhva ña tahan iñi ra Ndyoo.

¹⁷Ra ña vaha sa zacuaha sa ña ndisa cuan, cuu ra tañi zoco sa ñahñi ndutya ñoho, ta cuu ra tañi vico cuahan sihin tatyí. Cua cuhun ra nu ñaa xaan, ta yucuan cua ndoo ra tandihí cuii tyiemvu.

¹⁸Vatyí zacahnu xaan ra sii ra sihin cuhva cahan ra, ta cuaha tuhun cahan ra sa ñahñi yahvi ndyaa. Ta nu iyo ñiyivi naca sino iñi ta cuñi ca ñu zavaha ñu sa ña vaha, tyihi ra tyiño ta cuñi ra zativi ndihí ra sii ñu.

¹⁹Catyí ra cuan vatyí cuu zavaha ñiyivi ñaa sa cuñi maa ñu, ta caca noo nuña ñu catyi ra, zoco zuun ñi maa ra sa cahan cuan, ta minoo muzu cuu ra sii sa ña vaha. Tahan tahan yo cuu yo muzu sii sa ndyaca ñaha sii yo.

²⁰Ta ñiyivi sa sito sii ra Jesucristo, ra zacacu ta ndyaca ñaha sii yo, ta sa quita ñu sisi sa ña vaha sa iyo ñuu ñiyivi ya, ta ziqui cuee ca ta nandihvi tucu ñu ta quisaha zavaha tucu ñu sii sa ña vaha cuan ta ndyaca ñaha si sii ñu. Yaha ca cua cuu ñu ta ziqui sa xihna ñi.

²¹Vaha ca tatu sa ñá nacoto ñu ityi ndoo ta ziqui sa sito ñu sii si ta zandoo tucu ñu sii ley vaha ra Ndyoo.

²²Ta sa cuenda ñu cuan, quita ndisa cuii minoo cuhva tuhva ñiyivi cahan. Catyi ñu: “Nandusa ina ta ziqui nacasi tucu ti. Ta quiñi naca sityi ta cua nandihvi tucu ti nu ndyahyu.”

Cuhva cua quisi tucu ra ndyaca ñaha sii yo

3 Ihya cuu sa cu uu carta tyei sii ndo, ndoho hermanos. Cuñi xein sii ndo. Nu nduu tahan carte nduqui cuhva zanacohin iñi ndo tandihí tuhun vaha sa sa sito ndo.

²Cuñi si sa nacohon iñi ndo cuhva i cahan ra profeta ta sihin ley ra ndyaca ñaha sii yo sa i zacuaha nduhvi ra apóstol sii ndo. Ta maa ra ndyaca ñaha sii yo cua zacacu sii yo.

³Sa xihna ñi cuñi zanacohin iñi ndo vatyí tatu sa cuñi naa ñuu ñiyivi cua coo ñiyivi cua vacu ndyaa sii Tuhun Ndyoo. Ta cua zavaha ñu ñaa ndihí sa ña vaha sa cuñi maa ñu.

⁴Ta cua catyi ñu: “¿Ñacu yoñi ra Cristo? Ta maa ra i catyi vatyí cua quisi tucu ra. Zoco ndya quivi i sihi ñiyivi sahnu sii yo ta ña zama maa si, ta inuu ñi cuu tandihí si ndya quivi i zavaha ra Ndyoo ñuu ñiyivi.”

⁵Tacuan cua catyi ñu vatyi cuñi ñu sa naa iñi ñu vatyi i cahan ra Ndyoo ta tyiemvu ta i sino andivi. Ta sihin tuhun cahan ñi ra ta i sino ñuu ñiyivi mahñu tyañuhu ta ndoo tucu zuhva ndutya sa cu yuu nu ñuhu.

⁶Ta zuun ñi sihin ndutya i naa ñuu ñiyivi minoo saha vatyi i situ cuii ndutya ñuu ñiyivi.

⁷Zoco andivi ta ñuu ñiyivi sa iyo vityi, i catyi tucu ra Ndyoo vatyi cua ndoo si cuhva ndya quivi cua cayu si, quivi cua tyicuhva ra sii ñiyivi, ta cua zanaa ra sii ñiyivi ña sino iñi sii ra.

⁸Zoco ma naa iñi ndo yañi xaa vatyi sa cuenda ra Ndyoo, inuu ñi cuu minoo ñi quivi ta minoo mil cuiya. Ta minoo mil cuiya cuu si tañi minoo quivi ñi nuu Ndyoo.

⁹Ma naa iñi ra ndyaca ñaha sii yo cuhva i catyi ra, ta ña cucuee xaan ra tañi sica iñi ñiyivi. Zoco ndyee xaan iñi ra sihin maa yo. Ña cuñi ra sa cunaa numinoo ñiyivi. Cuñi ra vatyi zaña ñu sa zavaha ñu sa ña vaha ta cacu ñu.

¹⁰Zoco quivi cua quisi tucu ra ndyaca ñaha sii yo, cua saa ra tañi saa minoo ra zuhu sa sa cuaa vatyi ña sito yo ñaa cuhva cua saa ra. Quivi cuan cua naa andivi sihin minoo nduzu ñihi xaan. Cua cayu ñicandyi ta yoo ta tiño ta cua naa si, ta cua cayu ñuu ñiyivi sihin tandihi sa iyo.

¹¹Cua naa candii cuii sa iyo. Yucuan cuenda, icuñi si sa cuu ndo ñiyivi vaha sa ndisa cuii, ta cuñi xaan ndo sii ra Ndyoo!

¹²Cuatu ndo sii quivi cuan, ta zavaha ndo ñaa cuhva cuu sii minoo minoo ndo, ta cua quisi

si vatyi ca. Quivi cuan cua cayu andivi ta ñicandyi ta yoo ta tiño, ta cua naa si.

¹³Zoco maa yo ndatu yo sa cua coo minoo andivi saa ta inga ñuu ñiyivi saa vatyi i catyi ra Ndyoo vatyi cua coo si. Ta ma zavaha ca ñiyivi cuaty yucuan.

¹⁴Sa sito ndo ñaa sa cua tahan ñuu ñiyivi ya, yucuan cuenda nducu xaan ndo cuhva sa ñahñi ca cuaty ndo coo quivi cua quisi tucu ra Cristo, ta cua coo vaha ndo sihin ra Ndyoo.

¹⁵Ta nacohon iñi ndo vatyi iyo xaan tucahnu iñi sii ra ndyaca ñaha sii yo sihin ñiyivi, yucuan cuenda ndatu ra vatyi cua cuu cacu ñu. Zuun ñi cuhva ndyaa ya i tyaa ra Pablo yañi yo nuu carta i tasi ra sii ndo. Cuñi xaan yo sii ra, ta i tyaa ra sihin sa siñi tuñi i saha ra Ndyoo sii ra.

¹⁶Ta i cahan tucu ra cuhva ya tandihi nuu carta i tyaa ra. Iyo zuhva si yii xaan cutuñi iñi yo. Ta iyo ñiyivi ña sino vaha iñi ñu ta zama ñu cuhva cahan si tañi zama ñu sii inga parte Tuhun Ndyoo. Ta zuun ñi sii maa ñu zandoyo ñuhu ñu.

¹⁷Vityi sa zacote tandihi cuhva ya sii ndo cuee ca sa tahan si; yucuan cuenda ndoho yañi xaa zacuenda vaha ndo sii ndo coto zandavi ñaha ñiyivi ña vaha sii ndo, ta cua coo cuaty ndo, ta ma sino vaha ca iñi ndo.

¹⁸Nacoto vaha ndo sii ra ndyaca ñaha sii yo. Maa ra Jesucristo cuu ra, ta zacacu ra sii yo. Ta naco xaan ca tumañi iñi sa saha maa ra sii yo sihin ndo. iTa nazacahnu xaan yo sii ra vityi ta tandihi cuii tyiemvu! Ta nacuu si tacuan ta nacuu si sa ndisa. ta ñicandyi ta yoo ta tiño, ta cua naa si.

Sa Xihna Ñi Carta I Tyaa Maa Ra San Juan

Cuhva cundito ñiyivi tandihi cuii tyiemvu

1 Ra sa iyo ndya ta xihna ñi quivi nu i sino tandihi cuii sa iyo, siñi maa ndi sa cahan ra quivi i sica noo ndi sihin ra. I ndyehe ndi sii ra sihin siti nuu ndi. I cutuñi iñi ndi sa ndyehe ndi. Ta ndya cuhva ndya i tiin tucu ndi sii ra. Maa ra cuu Tuhun Ndyoo, ta saha ra sa cundito ñiyivi tandihi cuii tyiemvu sihin ra.

²I ndyehe ndi sii ra, ta saha ndi sa ndaa cuenda ra vatyí saha ra sa cundito ñiyivi sihin ra tandihi tyiemvu. I sindyaa ra sihin ra Ndyoo Zutu yo, ta zañaha ra sii ra sii ndi.

³Ta cuhva sa ndyehe ndi ta sa siñi ndi, zacoto ndi sii maa ndo vatyí ndu-iin tucu maa ndo sihin ndi. Ta cua ndu-iin tandihi yo sihin ra Ndyoo Zutu yo ta sihin ra Jesús zehe ra, ra i zaquisi ra.

⁴Ta tyaa ndi tuhun ya sii ndo vatyí tatu sito ndo sii si, cua cuzii xaan iñi tandihi yo.

Maa ra Ndyoo cuu ra tañi minoo ñúhu

⁵Ihya cuu tuhun i cutuhva ndi sihin maa ra Cristo, ta zacoto ndi

sii ndo. Maa ra Ndyoo cuu ra tañi minoo ñúhu, ta ñahñi sa ña vaha (tañi sa ñaa) iyo sii ra.

⁶Tatu catyi yo vatyí iin ñi cuu yo sihin ra Ndyoo Zutu yo, ta zuun ñi sica noo ca yo nu ñaa, vatya xaan yo sa tacuan cahan yo. Ña zavaha yo sa ndoo. Ña iin ñi iyo yo sihin ra Ndyoo.

⁷Zoco tatu maa yo ta sica noo yo nu ndisi ta zavaha yo sa vaha tañi maa ra ndisi xaan ra ta zavaha ra maa ñi sa vaha, tatu tacuan iyo tucu maa yo, iin ñi iyo yo sihin minoo yo ta sihin inga yo. Ta niñi ra Jesús zehe ra Ndyoo zandasi si tandihi cuii cuatyí yo.

⁸Tatu catyi maa yo vatyí ñahñi cuatyí yo iyo, zuun ñi sii maa yo zandavi ñaha yo. Ta ñahñi sa ndisa iyo sii yo.

⁹Zoco tatu nahma yo cuatyí yo, cuu sino iñi yo vatyí cua zaha ra Ndyoo tucahnu iñi sii yo ta cua zandasi ra cuatyí yo. Vatyí maa ñi sa vaha ta sa ndoo zavaha maa ra, ta cua nacatya ra tandihi cuii cuatyí yo.

¹⁰Zoco tatu catyi yo vatyí ñahñi cuatyí yo, tañi zacuu yo minoo ra vatya sii ra Ndyoo cuu si (vatyi

catyi maa ra vatyi iyo cuatyí yo). Tatu tacuan iyo yo, ña sino ndisa cuii ñiñi yo Tuhun ra.

**Ra Cristo cuu ra caha
cahan sa cuenda yo**

2 Tyei cuhva ya sii ndoho, zehe ndiyihi, vatyi ma zavaha ndo cuatyí. Zoco tatu iyo minoo ndo sa zavaha minoo cuatyí, iyo minoo ra cahan sa cuenda yo nuu ra Ndyoo Zutu yo. Ta ra cahan cuan, Jesucristo nañi ra. Maa maa ñi sa vaha zavaha ra.

²Ta maa ra cuu ra i tyiyahvi sa cuenda cuatyí yo. Ta ña ñiñi ñi sa cuenda cuatyí maa yo. Tyiyahvi tucu ra ndya sa cuenda tandiñi cuatyí zavaha tandiñi cuii ñiyivi ñuu ñiyivi.

³Ta tatu tyaa yo yahvi sa cahan ra, sito yo vatyi sito vaha yo sii ra.

⁴Zoco tatu minoo yo catyi yo: “Nacote sii ra”, catyi yo, ta ña tyaa yo yahvi sa cahan ra, minoo ra vatya cuu yo, ta sa ndisa cuan ñahñi si iyo sii yo.

⁵Zoco minoo ra zavaha cuhva catyi ra Ndyoo, cuñi xaan ra sii ra Ndyoo sa ndisa cuii. Ta sihin cuhva cuan ta sito yo vatyi ñiñi cuu yo sihin ra Cristo.

⁶Tatu catyi minoo ra vatyi sa ndu-ñiñi ra sihin ra Cristo, cuñi si vatyi coo ra cuhva i sicoo maa ra Cristo.

Minoo cuhva saa cuñi si zavaha yo

⁷Ndoho yañi xaa, yivi minoo tuhun saa sa ndisa cuii cuu sa zacote sii ndo vatyi sa iyo si sihin ndo ndya quivi quisaha sino ñiñi ndo. Ihya tuhun sahnu cuu tuhun sa siñi ndo sa xihna ñi.

⁸Zoco tañi sa zacote minoo tuhun saa sii ndo cuu si vatyi sa ndusaa si sa ndisa cuii sa cuenda maa ra Cristo ta sa cuenda maa ndo vatyi sa cua ndiñi cuhva sica noo ñiyivi nu ñaa, ta vityi sa iyo inga cuhva vatyi vityi zandisi minoo ñúhu sa cuu ñúhu sa ndisa cuii.

⁹Tatu iyo yo catyi yo vatyi ndyaa yo nu ndisi zoco ña cuu ndyehe yo sii hermano yo, sica noo ca yo nu ñaa cuu si cuan.

¹⁰Ra cuñi sii hermano ra, ndyaa ñúhu cuan sihin ra. Ta ñahñi sa cuu zandoyo ñuhu sii ra.

¹¹Zoco ra ña cuu ndyehe sii hermano ra, iyo ra ta sica noo ra nu ñaa. Ta ña sito ra ndya ityi cuahan ra vatyi sa ñaa cuan zacuaa si sii ra.

¹²Tyei carta ya sii ndo, zehe ndiyihi, vatyi sa i zandasi ra Ndyoo cuatyí ndo sa cuenda maa ra Jesucristo.

¹³Ta tyei sii tucu maa ndoho, ra sahnu, vatyi nacoto ndo sii ra Cristo. Sa iyo ra ndya quivi cumañi ca sino ñuu ñiyivi. Ta tyei sii maa ndo, ra yoco, vatyi vazu cuñi cuihna zandavi ñaha ra sii ndo, zoco sa i zahacanaa maa ndo. Tyei carta ya sii maa ndo, zehe ndiyihi, vatyi sa sito ndo sii maa ra Ndyoo Zutu yo.

¹⁴Ta tyei sii maa ndo, ra sahnu, vatyi sito ndo sii ra sa iyo ndya quivi cumañi ca sino ñuu ñiyivi. Ta tyei carta ya sii ndoho, ra yoco, vatyi iyo xaan tundyee ñiñi sii ndo. Ta iyo xaan Tuhun ra Ndyoo sihin ndo, ta yucuan cuenda zahacanaa ndo sii cuihna.

¹⁵Ma ndyiyi ñiñi ndo ñuu ñiyivi ya ta nu sa iyo ñuu ñiyivi ya. Tatu cuñi

xaan ndo sa iyo ihya ñuu ñiyivi ya, ña cuñi ndo sii ra Ndyoo Zutu yo.

¹⁶Vatyi tandihi cuhva sa iyo ñuu ñiyivi ya tucuñun sa ña vaha sa cuñi coño ñuhu yo a sa ndyehe siti nuu yo ta ndyiyo iñi yo sii si a sa zii xaan cuñi yo sihin ndaha tyiño yo ihya ñuu ñiyivi ya, yivi cuenda ra Ndyoo cuu tandihi cuhva ya. Sa cuenda ihya ñi ñuu ñiyivi ya cuu cuhva cuan.

¹⁷Ta cunaa ñuu ñiyivi ya. Ta tandihi sa ndyiyo iñi ñiyivi ihya, cunaa si. Zoco ñiyivi zavaha cuhva cuñi ra Ndyoo, cua cundito ñu tandihi cui tyiemvu.

**Minoo ra cua cahan ndya
vaha ñi sii ra Cristo**

¹⁸Zehe ndyihi, sa cuñi cundihi tyiemvu, ta tañi sa i siñi ndo, vasi ra cua cahan ndya vaha ñi sii ra Cristo. Ta vityi sa iyo cuaha xaan ra zavaha cuhva cuan. Ta sihin cuhva cuan ta sito yo vatyi sa cuñi cundihi tyiemvu.

¹⁹I quita ra zavaha cuhva cuan zuun ñi ticui maa yo vatyi yivi ra tahan yo cuu sii ra sa ndisa cuii. Vatyi tatu ra tahan yo cuu sii ra sa ndisa cuii cua ndoo ra sihin yo. Zoco i quita ra, ta sihin cuhva cuan ndisi xaan ndyehe yo vatyi yivi ñiyivi cuenda maa yo cuu tandihi ra cuan.

²⁰Zoco sii maa ndo sa saha ra Cristo Taty Ii ra, ta sa sito ndo Tuhun maa ra sa ndisa cuii.

²¹Ta tyei carta ya sii ndo vatyi sa sito ndo sa ndisa, ta yivi sa cuenda sa vatyi ña sito ndo. Ta sito ndo vatyi ñahñi tuhun vatya quita sisi tuhun ndisa.

²²¿Yoo ra cuu ra vatya? Ra catyi vatyi yivi ra Ndyoo i zaquisi sii ra Cristo. Ra cahan tacuan, yucuan ra cuu ra cahan ndya vaha ñi sii ra Cristo. Zaha ra cuan tuhun vatyi yoñi Ndyoo iyo ta yoñi zehe ra.

²³Tandihi cuii ra cahan tuhun sa yoñi zehe Ndyoo iyo, yoñi ra Ndyoo Zutu yo a ra Cristo ndyaa sihin ra cuan. Zoco ra catyi sihin ñiyivi vatyi Zehe ra Ndyoo cuu sii ra Cristo, ndyaa tucu maa ra Ndyoo Zutu yo sihin ra cuan.

²⁴Yucuan cuenda, cucumi vaha xaan ndo tuhun i siñi ndo ndya quivi i quisaha sino iñi ndo. Ta tatu tuhun cuan coo vaha xaan si sihin ndo, tacuan tucu maa ndo cua coo vaha ndo sihin Zehe ra Ndyoo ta sihin ra Ndyoo Zutu yo.

²⁵Ta ihya cuu minoo sa vaha xaan sa i catyi ra sihin yo vatyi cua cuhva ra sa cundito yo tandihi cui tyiemvu.

²⁶I tyei cuhva ya sii ndo sa cuenda ra cuñi zandavi ñaha sii ndo.

²⁷Zoco sii maa ndo sa iyo Taty Ii sa i saha maa ra Jesucristo sii ndo. Ta ña cuñi si yoo ca ra cua zacuaha sii ndo vatyi zuun ñi Taty Ii cuan cuu sa zacuaha sii ndo tandihi. Ta cuhva sa zacuaha maa ra, maa ñi sa ndisa cuu si, ta yivi sa vatya. Ta tañi sa zacuaha Taty Ii cuan sii ndo, tacuan cuu cuhva cuñi si vatyi iin xaan cuu ndo sihin ra Cristo.

²⁸Ta vityi ndoho, zehe ndyihi, iin xaan cuu ndo sihin ra Cristo vatyi tatu tacuan zavaha ndo ñahñi maa sa cua yuhu ndo, ta ma cucahan nuu ndo ityi nuu ra quivi quisi ra.

²⁹Sa sito ndo vatyi maa maa ñi sa vaha zavaha ra Cristo. Ta cuñi tucu

si coto ndo vatyi tandihî cuii ñiyivi zavaha maa ñi sa vaha, zehe ra Ndyoo cuu sii ñu.

Ñiyivi sa cuu zehe ra Ndyoo

3 Nacañi iñi ndo cuhva cuñi xaan maa ra Ndyoo Zutu yo sii yo ndya cuhva ndya nduu yo zehe ra Ndyoo. Zuun ñi yucuan cuu sa cuu maa yo, ta yucuan cuenda ña nacoto ñiyivi ñuu ñiyivi ya sii yo vatyi ña nacoto ñu sii maa ra Ndyoo.

²Ndoho yañi xaa, cuñi xein sii ndo. Vityi sa cuu yo zehe ra Ndyoo, ta tañaha ca cucasi si cuhva cua cuu yo ityi nuu ca. Zoco sito yo vatyi quivi cua quisi ra Jesús inga saha ta cua nduu yo tañi maa ra vatyi cua ndyehe yo sii ra tañi iyo ra sa ndisa.

³Ta tandihî ñiyivi sa ndatu cuhva cuan, zanduvaha ñu cuhva iyo ñu. Zandoo ñu cuatyî ñu, ta ma zavaha ca ñu sii si. Tañi maa ra Jesús, ñahñi cuatyî ra.

⁴Ta tandihî ñiyivi zavaha cuatyî, ña tyaa ñu yahvi cuhva cuñi ra Ndyoo. Vatyi sa zavaha ñu cuatyî, yucuan cuu cuhva ña tyaa ñu yahvi cuhva cuñi ra Ndyoo.

⁵Ta sa sito ndo vatyi i quisi ra Jesucristo ñuu ñiyivi ya vatyi cua zanaa ra tandihî cuatyî ñiyivi. Ta ñahñi cuatyî maa ra iyo.

⁶Yucuan cuenda tandihî ñiyivi sa iyo vaha sihin ra Cristo, ñahñi ca cuatyî zavaha ñu. Zoco ñiyivi sa tuhva zavaha cuatyî, tañaha ca cua ndyehe ñu cuhva iyo ra Cristo, ta tañaha ca nacoto ñu sii ra.

⁷Zehe ndyihî, ma cuhva ndo sa zandavi ñaha ñiyivi sii ndo. Ñiyivi

zavaha sa vaha, yucuan ñu cuu ñiyivi vaha tañi maa ra Jesús vaha xaan ra.

⁸Zoco ñiyivi zavaha cuatyî cuu cuenda cuihna. Vatyi cuihna cuu ra zavaha sa ña vaha ndya quivi i quisaha cuatyî. Ta yucuan cuenda i quisi Zehe ra Ndyoo vatyi cua cani ra tyiño cuihna.

⁹Ta tandihî ñiyivi sa nacacu saa sa cuenda maa ra Ndyoo, ña tuhva ca ñu zavaha cuatyî vatyi ndito ñu sihin tundyee iñi sa saha maa ra Ndyoo sii ñu. Ma cuu ca zavaha ñu sa ña vaha vatyi zehe ra Ndyoo cuu sii ñu.

¹⁰Sihin cuhva ya zañaha casi si yoo ñiyivi cuu zehe ra Ndyoo ta yoo cuu zehe cuihna vatyi tandihî ñiyivi ña zavaha sa vaha a ña cuñi ñu sii tandihî hermano, yivi cuenda ra Ndyoo cuu sii ñu.

Nacuñi yo sii minoo yo ta sii inga yo

¹¹Vatyi ihya cuu tuhun sa siñi ndo ndya sa xihna cuii ñi: Cuñi si vatyi cuñi xaan yo sii minoo yo ta sii inga yo.

¹²Ña tahan si coo yo cuhva i sicoo maa ra Caín. Cuenda cuihna i sicoo ra, ta i sahñi ra sii yañi ra. ¿Ta ñaa cuenda i sahñi ra sii yañi ra? I sahñi ra sii ra vatyi maa ñi maa sa ña vaha i zavaha ra, ta i cuxaan ra vatyi maa ñi maa sa vaha i zavaha yañi ra.

¹³Ma iyo xaan cuñi ndo, hermano, tatu ña cuu ndyehe ñiyivi ñuu ñiyivi ya sii ndo.

¹⁴Sito yo vatyi sa i yaha yo sisi tuhun nu cua cuu cuii yo, ta sa i saa yo inga cuhva nu cua cundito yo. Cuñi xaan yo sii tandihî hermano.

Ta cuhva cuan sito yo vatyí ndito ndisa cuii yo ityi nuu ra Ndyoo. Ra sa ña cuñi sii inga hermano, nu ñoho ra sisi tuhun sa cua cuu cuii ra.

¹⁵Yoo ra ña cuu ndyehe sii inga hermano, minoo ra sahñi cuu ra. Ta sito ndo vatyí yoñi ra sahñi ñiyivi ta ndito añima ra ityi nuu ra Ndyoo. Tañi sa i sihi ndisa cuii ra cuu si.

¹⁶Ta nacoto yo cuhva cuñi xaan maa ra Ndyoo sii yo vatyí saha maa ra Jesucristo sa cuu ra sa cuenda maa yo. Ta tacuan tucu maa yo, cuñi si vatyí cuñi xaan yo sii inga ñiyivi sino iñi ta vazu cuu yo sa cuenda ñu.

¹⁷Tatu iyo minoo yo ta iyo tandihi cuii sii yo ta iyo xaan ndaha tyiño yo ta ndyehe yo sii minoo hermano yo vatyí siñi ñuhu xaan si sii ra ta ña cundahvi iñi yo sii ra ta ña tyindyee yo sii ra, ma cuu catyi yo vatyí cuñi xaan yo sii ra Ndyoo tatu ña tyindyee yo sii hermano yo.

¹⁸Zehe ndyihí, ma cuu cuñi yo sii inga ñiyivi sihin tuhun cahan ñi yo. Nacuñi yo sii ñu sa ndisa cuii, ta nazañaha yo sa cuñi yo sii ñu sihin cuhva vaha zavaha yo sihin ñu.

Cuhva sa ma cuyuhu yo ityi nuu maa ra Ndyoo

¹⁹Ta sihin cuhva ya, sito yo vatyí ndyico yo sa ndisa, ta cuu zanaa yo cuhva sica xaan iñi yo vatyí sa sito yo vatyí iyo vaha yo ityi nuu maa ra Ndyoo.

²⁰Ta tatu sica iñi yo vatyí iyo cuatyí yo, zoco sito ca maa ra Ndyoo ta ziquí cuhva sica iñi maa yo vatyí sito ra tandihi.

²¹Ndoho hermanos, cuñi xein sii ndo. Tatu ñahñi maa sa catyi sa siñi tuñi vaha sii yo vatyí iyo cuatyí yo, ma cuyuhu yo ityi nuu maa ra Ndyoo.

²²Ta ñaa ndihi ca sa cua caca yo sii ra, cua ñihi yo sii si vatyí tyaa xaan yo yahvi tuhun ra, ta zavaha yo tandihi sa tahan iñi maa ra.

²³Ta ihya cuu tuhun i saha ra sii yo vatyí sino iñi yo sii ra Jesucristo vatyí zehe ra Ndyoo cuu sii ra ta zacacu ra sii yo. Ta cuñi si vatyí cuñi xaan yo sii minoo yo ta sii inga yo cuhva i catyi maa ra Cristo sihin yo.

²⁴Ta ñiyivi sa tyaa xaan yahvi tuhun cahan ra Ndyoo, iyo ñu sihin ra Ndyoo, ta maa ra Ndyoo ndyaa sisi añima ñu cuan. Ta sito yo vatyí ndyaa maa ra Ndyoo sisi añima yo vatyí saha maa ra Tatyí Ii ra sii yo.

Ihya cahan si cuenda Tatyí Ii maa ra Ndyoo ta cuenda tatyí cuihna sa cahan ndya vaha ñi sii ra Cristo

4 Ndoho ra sa cuñi xein, ma sino iñi ndo yoo ñi maa ñiyivi catyi vatyí cahan ñu sa cuenda maa ra Ndyoo. Cuñi si vatyí nducu coto vaha ndo sii ñu, ta cua coto ndo tatu Tatyí Ii maa ra Ndyoo cuu sa iyo sihin ñu a yivi. Vatyí sa cuaha xaan ra vatya quita coyo nacahnu ñuu ñiyivi, ta catyi ra vatyí cahan ra sa cuenda maa ra Ndyoo.

²Ihya cuu cuhva cuu nacoto ndo tatu cahan ñiyivi sa cuenda Tatyí Ii maa ra Ndyoo a yivi. Tatu catyi ñu vatyí i quisi maa ra Jesucristo, ta i nduu ra ñiyivi sa ndisa cuii, ta sihi ra sa cuenda maa yo, iyo Tatyí

Ii maa ra Ndyoo sihin ñu tatu sino ndisa cuii iñi ñu cuhva cuan.

³Zoco ñiyivi ña sito sii ra Jesús cuhva cuan, ñahñi Tatyí Ii maa ra Ndyoo iyo sihin ñu. Tatyí cuihna cuu sa iyo sihin ñu, tatyí sa cahan ndya vaha ñi sii ra Cristo. Ta sa sito maa ndo vatyí tahan si quisi tatyí ña vaha cuan, ta vityí sa iyo si ihya ñuu ñiyivi.

⁴Maa ndo cuu ñiyivi cuenda maa ra Ndyoo, zehe ndyihí, ta sa zahacanaa ndo sii ñiyivi cahan tuhun vatyá cuan vatyí Tatyí Ii maa ra Ndyoo sa iyo sihin maa ndo, iyo xaan ca tundyee iñi sii si cuan ta ziquí tatyí cuihna sa iyo sihin ñiyivi ityí sata.

⁵Maa ñu cuu cuenda ñuu ñiyivi ya. Ta yucuan cuenda cahan ñu sa cuenda sa iyo ñuu ñiyivi ya. Ta inga ñiyivi sa cuu cuenda ñuu ñiyivi ya, tyizoho ñu sa cahan ñu.

⁶Zoco maa yo cuu cuenda ra Ndyoo. Ta ñiyivi sa sito sii ra Ndyoo, tyizoho ñu sa cahan maa yo, zoco ñiyivi sa yivi cuenda ra Ndyoo, ma tyizoho ñu sa cahan yo. Ta sihin cuhva ya ta cuu nacoto yo yoo cuu ñiyivi sa iyo Tatyí Ii maa ra Ndyoo sihin ñu ta yoo cuu ñiyivi sa iyo tatyí cuihna sa zandavi ñaha.

Cuñi xaan maa ra Ndyoo sii ñiyivi

⁷Ndoho hermanos, nacuñi xaan yo sii minoo yo ta sii inga yo vatyí sa cuenda maa ra Ndyoo cuu cuhva cuan. Tandihí ñiyivi sa cuñi xaan sii inga ñiyivi, yucuan cuu ñu sa cuu zehe ra Ndyoo, ta sito ñu sii ra.

⁸Ra sa ña cuñi sii ñiyivi, ña sito ra sii maa ra Ndyoo vatyí maa ra Ndyoo cuñi xaan ra sii ñiyivi.

⁹Ihya cuu cuhva i zañaha maa ra Ndyoo cuhva cuñi xaan ra sii yo vatyí i zaquisi ra sii sa minoo tuhun ñi ra cuu zehe ra. I zaquisi ra sii ra ñuu ñiyivi vatyí cua cuu cundito yo tandihí cuii tyiemvu sa cuenda maa ra.

¹⁰Ta ihya cuu cuhva i cuñi xaan maa ra Ndyoo sii yo. Yivi maa yo i cuñi sii maa ra Ndyoo. Maa ra i cuñi sii yo sa xihna ñi. Ta i zaquisi ra sii zehe ra vatyí cua cuu ra sa cuenda cuatyí yo.

¹¹Tacuan cuu cuhva sa cuñi xaan maa ra Ndyoo sii yo, ndoho hermanos. Ta cuñi si vatyí cuñi tucu maa yo sii minoo yo ta sii inga yo.

¹²Yoñi maa sa ndyehe sii ra Ndyoo numinoo saha, zoco tatu cuñi xaan maa yo sii minoo yo ta sii inga yo, iyo maa ra Ndyoo sisi añaima yo. Ta vaha xaan cuu cuhva sa cuñi yo sii ñu, tañi cuñi maa ra Ndyoo sii ñu.

¹³Ihya cuhva cuu coto yo vatyí ñin ñi iyo yo sihin maa ra Ndyoo, ta ñin ñi iyo tucu maa ra sihin yo vatyí saha maa ra Tatyí Ii ra sii yo.

¹⁴Ta maa ndi sa ndyehe ndi ta saha ndi sa ndaa vatyí i zaquisi maa ra Ndyoo Zutu yo sii zehe ra vatyí cua zacacu ra sii ñiyivi ñuu ñiyivi.

¹⁵Tandihí ñiyivi sa cua catyí sihin inga ñiyivi vatyí ra Jesús cuu zehe ra Ndyoo, ñin xaan cuu ñu sihin ra Ndyoo, ta maa ra Ndyoo iyo sisi añaima ñu.

¹⁶Ta vityí sa sito yo ta sino iñi yo vatyí cuñi xaan maa ra Ndyoo sii yo. Cuñi xaan ra Ndyoo sii ñiyivi, ta tatu cuñi xaan maa yo sii maa

ra Ndyoo ta sii ñiyivi, sa ndu-iin yo sihin ra Ndyoo. Ta iyo ra sisi añima yo.

¹⁷Ihya cuhva cuahan nduvaha ca cuhva cuñi xaan maa yo sii ra Ndyoo, ta sihin cuhva ya ta ma yuhu yo quivi cua zanahma ra Ndyoo sii ñiyivi vatyí cuhva iyo maa ra Jesucristo ta tacuan tucu iyo maa yo ñuu ñiyivi ya.

¹⁸Tatu cuñi xaan yo sii maa ra Ndyoo sa ndisa cuii, ma yuhu yo sii ra. Sihin sa cuñi xaan yo sii ra Ndyoo ta tyaa siyo si sa yuhu yo. Vatyí tatu yuhu yo, yuhu yo coto ndoho yo zacuu ra Ndyoo sa cuenda cuatyí yo. Yucuan cuenda tatu yuhu xaan yo, cuñi si catyí si vatyí ña cuñi vaha yo sii maa ra Ndyoo sa ndisa cuii.

¹⁹Cuñi xaan yo sii ra Ndyoo vatyí xihna ca maa ra i cuñi xaan ra sii yo.

²⁰Tatu catyí minoo yo: “Yuhvi cuñi xein sii maa ra Ndyoo”, catyí yo. Zoco ña cuu ndyehe yo sii minoo hermano. Sa nduu yo minoo ra vatyá sihin cuhva cuan. Ña ndisa yo sa catyí yo vatyí cuñi xaan yo sii ra Ndyoo vatyí tatu ña cuñi yo sii hermano yo ta ndyehe yo sii ra ihya ñuu ñiyivi ya çyozo caa cua cuu cuñi yo sii maa ra Ndyoo ta ña ndyehe yo sii ra?

²¹Ihya cuu tuhun sa i saha ra Ndyoo sii yo: Tatu cuñi xaan yo sii maa ra Ndyoo, cuñi si vatyí cuñi xaan tucu yo sii hermano yo.

Cuhva zahacanaa yo ziqui cuhva ña vaha sa iyo ñuu ñiyivi ya

5 Tandihí ñiyivi sa sino iñi vatyí i nduu ra Jesús ñiyivi ta i sihi

ra sa cuenda maa yo, ñiyivi sa sino iñi cuhva cuan, yucuan ñu cuu zehe maa ra Ndyoo. Ta ñiyivi sa cuñi sii maa ra Ndyoo Zutu yo, cuñi tucu ñu sii tandihí ñiyivi sa sino iñi sii ra vatyí zehe ra Ndyoo cuu sii ñu.

²Ihya cuu cuhva sito yo vatyí cuñi yo sii tandihí zehe ra Ndyoo vatyí cuñi yo sii maa ra Ndyoo ta tyaa yo yahvi tuhun cahan ra.

³Vatyí cuhva cuñi yo sii maa ra Ndyoo sa ndisa cuii cuu sa tyaa yo yahvi tandihí sa catyí ra. Ta ña yíi xaan sa tyaa yo yahvi tuhun cahan ra.

⁴Vatyí tandihí ñiyivi sa cuu zehe maa ra Ndyoo, zahacanaa ñu ziqui cuhva ña vaha sa iyo ñuu ñiyivi ya, ta zavaha ñu cuhva cuñi maa ra Ndyoo. Ta ihya cuu cuhva zahacanaa yo ziqui cuhva ña vaha sa iyo ñuu ñiyivi ya, sihin sa ñii xaan iñi yo sii ra Jesús.

⁵Maa ñi ñiyivi sa ñii xaan iñi vatyí ra Jesús cuu zehe ra Ndyoo, yucuan cuu ñu sa zahacanaa ziqui cuhva ña vaha sa iyo ñuu ñiyivi ya, ta ñihi ñu cuhva zavaha ñu cuhva cuñi ra Ndyoo.

Sa ndaa sa cuenda Zehe ra Ndyoo

⁶I tava ra Ndyoo tyiño sii ra Jesucristo, ta i quisi ra, ta i yaha ra sihin ndutyá, ta i yaha ra sihin niñi; ña iin ñi sihin ndutyá zoco ndutyá ta niñi. Ta zuun ñi Tatyí Ii maa ra Ndyoo cuu sa saha sa ndaa cuhva cuan, ta maa maa ñi sa ndisa nacatyí ra.

⁷Ta iyo uñi tahan ra saha sa ndaa ityí ziqui: ra Ndyoo Zutu yo, ra cuu Tuhun Ndyoo, ta Tatyí Ii. Ta iin ñi cuu sa uñi tahan ra.

⁸Ta iyo uñi tahan sa ndaa ñuu ñiyivi: Tatyí li, ta ndutya, ta ñiñi. Ta ñin ñi cuhva nacatyí tandíhi uñi tahan sí.

⁹Sino ñiñi yo sa ndaa sa saha ñiyivi, zoco cahnu xaan ca cuu sa ndaa sa saha maa ra Ndyoo vatyí sa ndaa cuu si sa zuun ñi maa ra Ndyoo saha sa cuenda Zehe ra.

¹⁰Ra sa sino ñiñi sii Zehe ra Ndyoo, zuun ñi sisi añima ra iyo sa ndaa. Ra sa ña sino ñiñi sa catyí ra Ndyoo, zacuu ra tañi minoo ra vatya sii maa ra Ndyoo vatyí ña sino ñiñi ra sa ndaa sa saha maa ra Ndyoo sa cuenda Zehe ra.

¹¹Ta ihya cuu sa ndaa cuan. I saha maa ra Ndyoo sa cundito yo tandíhi cuii tyiemvu. Ta ñiñi yo cuhva cuan sa cuenda Zehe ra.

¹²Ra sa ndu-ñin sihin Zehe ra Ndyoo, sa ndu-ñin ra sihin cuhva cua cundito ra. Zoco ra ña ndu-ñin sihin Zehe ra Ndyoo tañaha ca cua ñiñi ra cuhva cua cundito ra tandíhi tyiemvu.

**Nu ndíhi cahan ra Juan
ta saha xaan ra tyiño**

¹³I tyei tandíhi cuhva ya sii ndoho sa sino ñiñi sii Zehe ra Ndyoo vatyí coto ndo vatyí sa ndito añima ndo. Ta cua cundito ndo tandíhi cuii tyiemvu.

¹⁴Ta vityí ñahñi maa sa yuhu yo ityí nuu maa ra Ndyoo, ta sito yo vatyí ñaa ndíhi ca sa caca yo sii ra, tyizoho ra sa cahan yo tatu caca yo minoo cuhva cuñi maa ra.

¹⁵Ta tañi sa sito yo vatyí tyizoho ra Ndyoo sa cahan yo, ñaa sa caca

yo sii ra. Sito tucu yo vatyí cua ñiñi yo tandíhi cuii sa sica yo sii ra.

¹⁶Tatu ndyehe yo sii minoo hermano vatyí zavaha ra cuatyí zoco tañaha ca cua quihin ra ityí andyaya sa ndisa cuii, cuñi si vatyí cahan yo sihin ra Ndyoo sa cuenda ra, ta cua zandasi ra Ndyoo cuatyí ra, tatu tañaha ca quihin ra ityí andyaya sa ndisa cuii. Zoco iyo tucu cuatyí ñiyivi sa ma zandasi maa ra Ndyoo, ta ña catyí vatyí cahan ca ndo sihin ra Ndyoo sa cuenda ñiyivi zavaha cuatyí cuan.

¹⁷Tandíhi cuii sa ña vaha sa zavaha yo, cuatyí cuu si. Zoco iyo cuatyí zavaha ñiyivi ta cua zaha ra Ndyoo tucahnu ñiñi sii ñu tatu nandaca ñu tucahnu ñiñi sii ra, ta ma cahun ñu andyaya.

¹⁸Sito yo vatyí tandíhi ñiyivi sa cuu zehe ra Ndyoo, ña zavaha ca ñu cuatyí vatyí zacuenda maa Zehe ra Ndyoo sii ñu. Ta ñahñi sa cuu zacuu cuihna sihin ñu.

¹⁹Ta sito yo vatyí maa yo cuu zehe ra Ndyoo, ta ndyaca ñaha cuihna sii tandíhi cuii ñiyivi sa iyo cuenda ñuu ñiyivi ya.

²⁰Ta sito yo vatyí sa i quisi Zehe ra Ndyoo. Ta sito yo vatyí i saha ra minoo sa siñi tuñi vaha sii yo vatyí coto yo sii ra cuu Ndyoo sa ndisa cuii. Ta ñin ñi iyo yo sihin ra sa cuenda Zehe ra, ra Jesucristo. Ihya cuu maa ra cuu Ndyoo sa ndisa cuii, ta ihya cuu cuhva cundito yo tandíhi cuii tyiemvu.

²¹Zehe ndyíhi, zacuenda ndo sii ndo, ta coto ñáha zacahnu ndo sii inga ndyoo.

Sa Cu Uu Carta I Tyaa Maa Ra San Juan

**Tasi ra Juan minoo nacumi sii
ñiyivi sino iñi Tuhun Ndyoo**

¹Yuhvi ra sahnu tyei carta ya suun, hermana. Sa i casi maa ra Ndyoo suun ta sii tandihi zehun. Sa ndisa cuii vatyí cuñi xein sii tandihi ndo. Ta tacuan tucu tandihi ñiyivi sa sito sa ndisa ta cuñi xaan ñu sii ndo.

²Cuñi ndi sii ndo sa cuenda sa ndisa sa iyo añima yo. Ta tandihi cuii tyiemvu cua coo si sihin yo.

³Cuñi sa cua cuhva xaan maa ra Ndyoo Zutu yo sa vaha sii ndo, ta nacuhva xaan ra tumañi iñi sii ndo, ta natyindyee ra sii ndo ta cua coo sa taxi ñi sii ndo sihin ra ta sihin ñiyivi. Ta tacuan tucu nacuhva maa ra Jesucristo tandihi cuhva cuan sii ndo vatyí Zehe Ndyoo cuu sii ra. Nacuhva ra sii si vatyí sino iñi ndo sii ra sa ndisa cuii ta cuñi xaan ndo sii inga ñiyivi.

**Coto ñáha cuiñi siyo ndo sii sa
ndisa sa iyo cuenda ra Jesucristo**

⁴Zii xaan cuñi vatyí sa ñihi tyiño sa cuenda zuhva zehun vatyí vaha xaan ndyico ñu sii sa ndisa, cuhva saha maa ra Ndyoo Zutu yo tuhun ra sii yo.

⁵Ta vityí ñihi xaan sique suun hermana vatyí nacuñi yo sii tahan yo. Ta yivi minoo tuhun saa cuu sa zacote sii ndo vityí. Zuun ñi si cuu si sa iyo sihin yo ndya quivi i quisaha sino iñi yo.

⁶Ta cuhva cuñi yo sii tahan yo ta sii maa ra Ndyoo sa ndisa cuu si tatu coo yo cuhva saha ra tuhun ra sii yo. Ta tañi sa i siñi ndo ndya sa xihna cuii ñi, ihya cuu tuhun i saha ra sii yo sa vatyí nacuñi yo sii tahan yo.

Ra zandavi ñaha

⁷Sa cuaha xaan ra zandavi ñaha sica noo ñuu ñiyivi ya. Ta catyi ra cuan vatyí ñá nduu ra Jesucristo minoo ñiyivi sa ndisa cuii quivi i quisi ra ihya ñuu ñiyivi. Ñiyivi zacuaha cuhva cuan cuu cuenda ra zandavi ñaha. Yivi cuenda ra Cristo cuu ñu vatyí cahan ñu ndya vaha ñi ziqui ra Cristo.

⁸Zacuenda xaan ndo sii ndo sa ma ndoyo ñuhu tyiño ndo vatyí tacuan ta cua ñihi ndo tandihi sa vaha sa cuñi ra Ndyoo cuhva ra sii ndo.

⁹Ñiyivi ña cuñi zacuaha cuhva vaha tañi zacuaha ra Cristo ta quita ñu ityi ndisa ta nazaca ñu inga tuhun sihin si, ña iin ñi iyo ñu sihin

ra Ndyoo. Zoco ñiyivi zacuaha maa ñi cuhva zacuaha ra Cristo, iin ñi cuu ñu sihin ra Ndyoo Zutu yo ta sihin Zehe ra.

¹⁰Tatu saa minoo ra nu yucu ndo ta ña zacuaha ra cuhva zacuaha ra Cristo, ma cuhva ndo sa ndoo ra vehe ndo ta nu ma catyi ndo nacumi suun tatu saa ra.

¹¹Vatyí tatu saha yo nacumi sii ra, cuu si tañi zatyíño yo cuhva ña vaha tañi zatyíño maa ra cuan.

Nu ndihi cahan ra Juan

¹²Iyo cuaha xaan sa cuñi catyi sihin ndo, zoco ña cuñi tyei sii si nuu tutu vatyí cuñi quisi nu yucu ndo. Cuñi ndyehi sii ndo ta natuhin sihin ndo vatyí tacuan ta zii xaan cua cuñi tandihi yo.

¹³Zehe cuhun tasi ñu minoo nacumi suun. I casi tucu maa ra Ndyoo sii cuhun.

Sa Cu Uñi Carta I Tyaa Maa Ra San Juan

Saha ra minoo nacumi sii ra Gayo

¹Yuhvi ra sahnu tyei carta ya suun, yoho Gayo. Sa ndisa cuii vatyi cuñi suun.

²Hermano, sica xein tumañi iñi sii maa ra Ndyoo vatyi naquita vaha tandihi cuii tyiñon ta nacoo vaha xoon tañi sa sino vaha xaan iñun.

³Zii xaan i cuñi quivi i quisi zuhva ra hermano vatyi i nacatyi ra sihin, cuhva zavohon tandihi cuhva catyi Tuhun Ndyoo. Ta catyi ra vatyi vaha xaan iyon sihin tandihi cuii cuhva catyi tuhun ndisa.

⁴Tatu ñihi tuhun vatyi ndyico zehe luhli tandihi cuii cuhva catyi tuhun ndisa, yaha xaan zii cuñi.

⁵Hermano, vaha xaan cuhva zavohon cuhva catyi Tuhun Ndyoo tatu tyindyeyun sii inga hermano ta ra cahan Tuhun Ndyoo, ra quisi inga ñuu.

⁶Saha ra hermano cuan sa ndaa ityi nuu tandihi ca hermano sa cuenda cuhva i cuñi xoon sii ra. Sa ndyoo ñi tyindyee con sii ra sihin minoo cuhva sa tahan iñi maa ra Ndyoo vatyi tacuan ta cua cuu cuhun ca ra ityi nuu nu cuahan ra.

⁷Vatyi i quita ra cuan ñuu ra sa cuenda tyiño maa ra Jesús. Ta ña saha ra sa tyindyee ñiyivi ña sito sii ra Ndyoo sii ra sihin xuhun.

⁸Yucuan cuenda cuñi si sa ñihi xaan tyindyee maa yo sii ra sihin xuhun a ñaa sa cumañi sii ra vatyi tacuan ta zatyiño tucu maa yo sihin ra nu nacatyi ra tuhun ndisa.

**Cuhva ña vaha sa zavaha
ra Diótfefes**

⁹Sa tasi minoo carta sii tandihi ñiyivi sino iñi. Zoco cuñi xaan ra Diótfefes cuu ra ra cu nuu, ta ña saha ra sa cundyaca ñehi.

¹⁰Yucuan cuenda tatu quisi nu yucu ndo cua zacote sii ñiyivi cuhva zacuu ra vatyi cahan ra ndya vaha ñi sii ndi, ta vatya tucu ra. Ta yivi sa yucuan ñi, zoco inga cuhva tucu vatyi ña tiin cuenda vaha ra sii ra hermano saa coyo nu yucu ndo. Ta tatu cuñi inga hermano tiin cuenda ra sii ra saa coyo cuan, ña saha ra Diótfefes, ta tava ndyizo ra sii ra cuñi tiin cuenda sii ra saa coyo yucuan.

¹¹Hermano, ma cundyicon numinoo cuhva ña vaha. Maa ñi cuhva vaha cundyicon. Ñiyivi

zavaha sa vaha, yucuan ñu cuu
cuenda ra Ndyoo. Zoco ñiyivi
zavaha sa ña vaha, ña sito ñu cuan
sii maa ra Ndyoo.

**Cuhva vaha xaan sa
zañaha ra Demetrio**

¹²Vaha cahan tandihi cuii ñiyivi
sa cuenda maa ra Demetrio. Ta
zuun ñi sa ndisa sa ndyico ra,
zacoto si sii yo vaty vaha ra. Ta
maa tucu ndi catyi ndi vaty vaha
xaan ñiyivi cuu ra, ta sito ndo vaty
cahan ndi sa ndisa.

Nu ndihi cahan ra Juan

¹³Iyo cuaha xaan ca sa cuñi catyi
suhun, zoco ña cuñi tyei sii si.

¹⁴Vaty ña naha ca ta cua ndyehi
suun cuñi, ta cua cuu natuhun vaha
maa ñi maa yo.

¹⁵Nacuhva ca ra Ndyoo vaty
coo ca sa taxi ñi suun sihin ra ta
sihin ñiyivi. Tandih ra amigun
ihya tasi ra minoo sa nacumi
suun. Sa ndyoo ñi cuhvon minoo
nacumi sii sa minoo minoo amigo
mi yucuan.

Carta Sa I Tyaa Ra San Judas

Tyaa ra Judas minoo carta sii ñiyivi i casi ra Ndyoo

¹Yuhvi ra Judas cui minoo muzu ra Jesucristo. Ta yañi ra Jacobo cuu sii. Tyei carta ya sii ñiyivi i casi ra Ndyoo Zutu yo. Sa zama ra cuhva iyo ndo vatyi cuenda maa ra cuu sii ndo. Ta zacuenda ra Jesucristo sii ndo.

²Cuñi sa cua cundahvi xaan iñi maa ra Ndyoo sii ndo. Nacuhva ra sa coo sa taxi ñi sii ndo sihin ra, ta nacuñi xaan ca maa ra sii ndo.

Ra zacuaha sa vatya

³Ndoho amigo, cuñi xein sii ndo. I cuñi xein tyei minoo carta sii ndo cuhva cacu añima yo. Zoco vityi zañiñi ca si sii, sa tyei minoo carta sii ndo ta zañiñi sii ndo vatyi nducu xaan ndo cuhva, cuhva sino iñi ñiyivi tuhun ndisa sa ndyico yo. Yucuan cuu tyiño i zandoo maa ra Ndyoo sii maa yo sa cuu yo ñiyivi ra.

⁴Catyi cuhva ya vatyi sa i quihvi zuhva ra zandavi ñaha ticui maa ndo. Catyi ra cuan vatyi saha xaan ra Ndyoo tumañi iñi sii yo ta cuu zacuu yo ñaa ñi maa sa cuñi maa yo ta ma tasi tuñi ra Ndyoo sii yo,

catyi ra cuan. Sa naha xaan ndyaa si nuu tutu cuhva cua ndoho ñiyivi cuan vatyi sa nanuhu sata ñu, ta ña zacahnu ca ñu sii ra Ndyoo. Minoo tuhun ñi maa ra ndyaca ñaha sii yo, ta tacuan tucu ra Jesucristo.

⁵Sa sito maa ndo yozo caa iyo si, zoco cuñi zanacohin iñi ndo cuhva i zacacu ra Ndyoo sii ñiyivi hebreo ndya ñuu Egipto, zoco sa yaha cuan ta ziqui i zanaa ra sii ñiyivi ñá sino iñi sii ra ticui ñiyivi sa i zacacu ra.

⁶Ta ángel tucu, i cuu ra ra ii xaan, ta ñahñi cuatyi ra. Zoco sa nanuhu sata zuhva ra, ta i zandoo ra cuhva vaha sa i zavaha ra. Ta vityi nuhñi ra sihin cadena zacuu ra Ndyoo minoo nu ñaa xaan. Ndatu ra quivi cahnu sa cua tasi tuñi ra Ndyoo sii ra.

⁷Ta zuun ñi cuhva, ñuu Sodoma ta ñuu Gomorra ta inga tucu ñuu yatyi ñi, i zavaha tucu ñiyivi cuan sa ña vaha. I quixi rayii sihin ziin ziin ñaha. Ta iyo tucu ra quixi ra sihin inga rayii. Ta ndya vityi ta sito yo vatyi yaha xaan cuhva ña vaha i zavaha ñiyivi ñuu cuan. Ta zacoto si sii yo vatyi iyo minoo nu cua ndoho ñu sisi ñúhu sa ma ndahva ca.

⁸Zoco vazu sa sito ñiyivi cuhva cuan, zoco ra sa ñoho sihin maa

ndo cuu ra tañi ra quixi ta ndeche ra ñimahna vatyí zavaha ra tandíhi nuu sa ña vaha sihin coño ñuhu ra, ta ña yuhu ra sii ra Ndyoo. Ña saha ra cundyaca ñaha ra tahan si cundyaca ñaha sii ra. Ta cahan ra ndya vaha ñi sii ángel ta sii inga ra nahnu ca.

⁹Zoco zuun ñi ra ángel cahnu sa nañi Miguel quívi i tusi tahan ra tuhun sihin cuihna sa cuenda coño ñuhu ra Moisés, ñá caña iñi ra Miguel cahan ra ndya vaha ñi sihin cuihna. Ihya ñi tuhun i cahan ra: “Nacuxaan maa ra Ndyoo suhun.” Catyi ra.

¹⁰Zoco ra sa ñoho sihin maa ndo caña iñi ra cahan ra ndya vaha ñi ziqui tandíhi vazu ñahñi maa sa sito ra sa cuenda si. Cuhva sa nacoto maa ra, nacoto ra tañi nacoto quití vatyí ña nacañi iñi ra tatu vaha si a ña vaha si. Zavaha ra sa ña vaha, ta zuun ñi sii maa ra zatívi si.

¹¹iNdahvi ra cuan! vatyí zavaha ra cuatyí nuu ra Ndyoo tañi i zavaha maa ra Caín. Ta sa cuenda sa cuñi xaan ra xuhun ta i quita ra ityi vaha tañi zavaha ra Balaam. Ta tañi ra Coré quívi ñá tyaa ra yahvi sii ra ndyaca ñaha, ta tacuan tucu ra ya, zatívi xaan ra zuun ñi sii maa ra.

¹²Cuu ra tañi minoo ra quiñi xaan caa nu titahan ndo cua casi ndo ta zacahnu ndo minoo vico sihin tandíhi ra hermano. Vatyí ra cuan, sasi ra, sihi ra, ta zii xaan cuñi ra. Ña cahan nuu ra, ta ña sica iñi ra sa cuenda inga hermano. Maa ñi sa cuenda maa ra sica iñi ra. Cuu ra tañi minoo vico sa cuahan sihin

tatyí ta ñahñi zavi coon. Cuu ra tañi yutu sa ñahñi siti saha quívi tahan si cuhva tu. Sa sihi ra, ta yívi sa minoo tuhun ñi saha. Sa uu saha sihi ra tañi sihi minoo yutu i quita ndya yoho.

¹³Yaha xaan, yaha xaan cuhva zavaha ra, ta saha ra sa cahan nuu. Cuu ra tañi tyañuhu tatu yaha xaan coon zavi. Ndaa noo tyañuhu, ta cuxi xaan caa tiñi nuu ndutyá. Tañi tiñi cuxi caa cuan, tacuan iyo sa zavaha ra. Cuu ra tañi tiño sa cua naa vatyí cua cuhun ra nu ñaa xaan. Yucuan cua ndoo ra tandíhi cuii tyiemvu.

¹⁴Ra Enoc i cuu minoo ñiyívi ra Adán ta tyiemvu, ta i cahan ra Tuhun i saha ra Ndyoo sii ra. Ta i cahan ra sa cuenda ñiyívi ña vaha ya, ta catyi ra: “I ndyehi sii ra ndyaca ñaha. Vasi ra sihin cuaha xaan cuaha xaan ángel ra
¹⁵vatyí cua tasi tuñi ra sii tandíhi ñiyívi, ta cua catyi ra cuhva cua ndoho ñiyívi zavaha sa ña vaha. Cua ndoho ñu sa cuenda sa ña vaha sa zavaha ñu ta sa cuenda tandíhi cuii tuhun ndya vaha ñi sa i cahan ñu sii ra Ndyoo.”

¹⁶Ñahñi minoo tuhun vaha cahan ñu. Cahan ñu ndya vaha ñi sii inga ñiyívi. Nanducu xaan ñu maa maa ñi sa cuñi maa ñu ta cuhva cuzii iñi ñu. Zacahnu xaan ñu sii ñu sihin cuhva cahan ñu. Ta tatu cahan vaha ñu sihin minoo ñiyívi, zavaha ñu tacuan vatyí iyo minoo sa cuñi ñu ñihi ñu sihin ñu cuan.

**Nacatyí ra cuhva cua zavaha
ñiyívi sa sino iñi Tuhun
Ndyoo sa ndisa cuii**

¹⁷Zoco ndoho hermanos, nacohon iñi ndo tuhun i cahan ra apóstol ra Jesús ta quívi cuan

¹⁸vaty i nacaty ra huhva cua coo si nu sa cua ndihi tyiemvu. Catyi ra vaty nu sa cua ndihi tyiemvu cua coo cuaha xaan ñiyivi sa cua vacu ndyaa sii Tuhun Ndyoo. Minoo huhva ndya vaha ñi cua coo ñu, huhva cuñi maa ñu.

¹⁹Yucuan cuu ñiyivi cua quiti cuaty sii hermano. Tyaa xaan ñu yahvi sii sa cuñi coño ñuhu ñu. Ta ñahñi maa Taty Ii maa ra Ndyoo iyo sihin ñu.

²⁰Zoco ndoho hermanos, tyindyee ndo sii minoo ndo ta sii inga ndo vaty tacuan ta ndoo xaan cua cuu tandihi ndo sihin huhva sino ñi ndo. Cahan ndo sihin ra Ndyoo sihin huhva sa saha Taty Ii maa ra sii ndo.

²¹Cuñi xaan maa ra Ndyoo sii ndo. Ñaha quita ndo ityi vaha sa ndyico ndo ta zavaha ndo sa ña vaha, ta ma cuñi ca ra Ndyoo sii ndo. Zoco cuatu vaha ndo quivi sa cua huhva ra Jesucristo sa cundito yo tandihi cuii tyiemvu. Tacuan cua zavaha ra vaty cundahvi xaan ñi ra sii yo.

²²Cahan vaha xaan ndo sihin ñiyivi cumañi sino vaha ñi, ta zasino vaha xaan ndo ñi ñu.

²³Tyindyee ndo sii ñiyivi ta huhva cacu ñu. Tavon sii ñu nu cayu ñuhu. Ta cundahvi ñi ndo sii inga ñiyivi, zoco zacuenda ndo sii ndo vaty ndya zahma ñu ta ña vaha si sa cuenda cuaty sa zavaha ñu sihin coño ñuhu ñu. Yuhu ndo coto zavaha tucu ndo tacuan.

**Zacahnu ra sii ra Ndyoo,
ta i ndihi cahan ra**

²⁴⁻²⁵Ta sa minoo tuhun ñi ra cuu Ndyoo sa ndisa, cuaha xaan sa siñi tuñi iyo sii ra. Ta maa ra cuu ra zacacu sii yo. Iyo xaan huhva sii ra sa zacuenda ra sii ndo, ta ma canacava ndo sisi cuaty. Ta ñahñi ca cuaty ndo cua coo quivi cua zacuhun ra sii ndo ityi nuu maa ra, ta zii xaan zii xaan cua cuñi ndo. Nazacahnu xaan yo sii ra. Nacaty yo vaty tyaqui xaan nu ndyaca ñaha ra. Cuaha xaan tundyee ñi iyo sii ra. Ndyaca ñaha ra ziqui tandihi cuii sa cuenda huhva i zavaha ra Jesucristo ndya ta sa naha, ta ndya huhva ndya vityi, ta tandihi cuii tyiemvu. Ta nacuu si tacuan.

Cuhva I Ndyehe Ra San Juan

Cuhva i zañaha ra Jesucristo sii ra Juan

1 Ihya cuu sa i zañaha ra Ndyoo sii ra Jesucristo vatyí cua zañaha ra sii muzú ra cuhva sa cua cuu. Ta i sityiño ra Jesucristo minoo ángel, ta i zañaha ra cuhva sa zañaha ra Ndyoo sii ra sii ra Juan, ra cu muzú ra.

²Ta ra Juan cuu ra nacatyí tandíhi sa i ndyehe ra. Saha ra sa ndaa sa cuenda tandíhi sa i catyí ra Ndyoo sihin ra Jesucristo ta i nacatyí Jesucristo sihin maa ra.

³Zii xaan cuñi ñiyivi cua cahvi tuhun ya, ta zii xaan cuñi ñiyivi cua tyizoho cuhva catyí tuhun ya sa i saha ra Ndyoo ta tyaa ñu yahvi cuhva catyí si vatyí sa ndyaa yatyi quivi cua tahan si cuhva cahan si ihya.

Tyaa ra Juan carta ya sii ñiyivi sino iñi sii ra Jesús usa tahan ñuu nu cu si Asia

⁴Yuhvi ra Juan tyei carta ya sii ñiyivi sino iñi usa tahan ñuu nu cu si Asia. Nacuhva xaan ra Ndyoo tumañi iñi sii ndo ta sa coo sa taxi añima ndo vatyí maa ra cuu ra ndya vityí, ta maa ra cuu ra ta sa

naha, ta cua coo ra tandíhi cuii tyiemvu. Ta cuhva cuan nacuhva tucu sa usa tahan cuhva sa iyo sii Tatyí Ii sa ndyaa ityi nuu ra Ndyoo nu ndyaa ra.

⁵Ta tacuan tucu nacuhva xaan maa ra Jesucristo tumañi iñi sii ndo. Maa ra cuu ra cu sa ndaa ra cahan sa ndisa cuii. Xihna ca maa ra i nandoto sisi tuhun sihi, ta ndyaca ñaha ra sii tandíhi inga ra ndyaca ñaha ñuu ñiyivi. Cuñi xaan ra sii yo. Sati ñiñi ra, ta zanaa ra cuatyí yo sihin ñiñi ra.

⁶Maa ra cuu ra saha sa nduu maa yo ra ndyaca ñaha nahnu ta sa nduu yo ra cu zutu ityi nuu ra Ndyoo Zutu ra. Nazacahnu yo sii ra Jesucristo, ta nacundyaca ñaha ra tandíhi cuii tyiemvu. Ta nacuu si tacuan.

⁷iNdyehel, sa vasi ra sisi vico, ta tandíhi cuii ñiyivi cua ndyehe sii ra. Ñiyivi i cuxaan sihin ra ta catyí ñu vatyí cua cuu ra nuu cruz cua ndyehe ñu sii ra. Ta cua vacu saa xaan tandíhi ñiyivi ñuu ñiyivi cuhva cua ndyehe ñu sii ra. Ta tacuan cua cuu si sa ndisa.

⁸Catyí ra Ndyoo ra ndyaca ñaha sii yo: Yuhvi cui ra ndya ta xihna cuii ñi tañi letra A, ta ra cua coo

ca nu cua ndihî tandihî sa iyo cui tañi letra Z, catyi ra Ndyoo. Ta iyo tandihî cuii tundyee iñi sii maa ra. Maa ra cuu ra iyo vityi, ta maa ra cuu ra iyo ndya ta xihna cuii ñi, ta cua coo ra tandihî cuii tyiemvu.

**Ndyehe ra Juan minoo cuhva
tyaquî xaan caa ra Cristo**

⁹Yuhvi ra Juan cui yañi ndo. Zuun ñi ndyehe xaan tucu mi tundoho ta cua cuhun tuqui nu ndyaca ñaha ra Ndyoo iin ñi sihin maa ndo. Ta ñihi tuqui cuhva sa cundyee xaan iñi vatyî saha maa ra Jesucristo cuhva cuan sii yo. I siñohi vehe caa minoo ñuhu mahñu tyañuhu sa nañi Patmos vatyî i nacatyî Tuhun Ndyoo sihin ñiyivî, ta i sehi cuenda yozo caa iyo ra Jesucristo.

¹⁰Minoo quivî tumingu i situ cuii Tatyî Ii ra Ndyoo sii, ta i siñi minoo nduzu ñiyivî saa xaan ityi sate. Tañi minoo nduzu cutu, tacuan i cuu nduzu cuan.

¹¹Ta catyi nduzu cuan: Yuhvi cui ra iyo ndya ta xihna cuii ñi tañi letra A, ta ra cua coo ca nu cua ndihî tandihî sa iyo cui tañi letra Z. Cuaha xaan sa cua ndyehun vityî. Tyoon sii si nu tutu, ta tasun sii si nu yucu ñiyivî sino iñi usa tahan ñuu nu cu si Asia. Tasun sii si ndya ñuu Efeso, ñuu Esmirna, ñuu Pergamo, ñuu Tiatira, ñuu Sardis, ñuu Filadelfia ta ñuu Laodicea.

¹²Ta sa ndihî cahan nduzu cuan ta i nasico cave ta i ndyehi ityi sate vatyî cua ndyehi yoo ra cahan. Ta ityi sate i ndyehi usa tahan candelero xuhun cuaan.

¹³Ta mahñu candelero cuan nandyaa minoo ra caa ra tañi caa

ra Jesús, ra i quisi ndya gloria. Ñoho ra minoo zahma cañi xaan ndya cuhva ndya nu saha ra, ta ñuhñi minoo yoho xuhun cuaan yiquî ndyica ra.

¹⁴Cuisi xaan ixi xiñi ra tañi ixi mvee ticatyî a tañi caa ñieve. Ta tañi caa ñuhu, tacuan caa siti nuu ra.

¹⁵Ta saha ra ndisi xaan tañi caa minoo caa sa nañi bronce tatu cayu si. Ta saa xaan quita nduzu ra tañi cucayu yuu nahnu.

¹⁶Ndaha siyo cuaha ra ñaa ra usa tahan tiño. Ta yuhu ra quita minoo espada sa xaan nduu siyo yuhu. Ta nuu ra ndisi xaan si tañi sa ndisi ñicandyî quivî sa ndisi vaha si.

¹⁷Ta cuhva sa ndyehi sii ra i nduve saha ra, ta i ndui tañi minoo ra sihi. Zoco i tyizo ra ndaha siyo cuaha ra sii, ta i catyi ra sihin: Ma yuhun. Yuhvi cui ra iyo ndya ta xihna cuii ñi, ta cua coo que vazú sa naa tandihî sa iyo.

¹⁸Yuhvi cui ra ndito. I sihi, zoco vityî ndite. Ta cua cundite tandihî cuii tyiemvu. Cumi ndaha ticui andyaya. Ta cuu catyi ama cua cuu ñiyivî.

¹⁹Tyoon cuhva sa ndyehun, cuhva iyo si vityî ta cuhva cua coo cuee ca.

²⁰Sa usa tahan tiño sa ndyehun ndaha siyo cuehi cuu sa cuenda sa usa tahan ra zacuenda sii sa usa tahan vehe ñuhu ñiyivî sino iñi ziin ziin ñuu. Ta sa usa tahan candelero cuu sa cuenda sa usa tahan vehe ñuhu cuan.

Tyño i tasi ra sii ñu ñuu Efeso

2 Tyoon minoo carta sii ra zacuenda sii ñiyivî ñuu

Efeso, ta tyehen catyun: “Ihya cuu tuhun cahan ra ñaa sa usa tahan tiño ndaha siyo cuaha ra ta sica ra mahñu sa usa tahan candelero xuhun cuaan.

²Site tandihi sa zavaha ndo ta cuhva sa ñihi xaan zatyño ndo ta cuhva cundye xaan iñi ndo ta zatyño ndo. Ta site vaty ña cuu cundye iñi ndo tatu zavaha ñiyivi cuaty. Ta site cuhva nducu coto ihñi ndo sii ra catyi vaty apóstol cuu ra ta ña ndisa ra. Ta sa nacoto ndo sii ra vity vaty ra vaty cuu ra.

³Ta i zandye xaan ndo iñi ndo ta cundye iñi ndo ta zatyño ndo sa cuenda mi. Ta ña sitatu ndo sa zavaha ndo sa vaha.

⁴Zoco site vaty iyo ca sa cumañi sii ndo vaty ña cuñi ca ndo sii, tañi i cuñi xaan ndo sii, sa xihna ñi.

⁵Yucuan cuenda nacohon iñi ndo cuhva i sicoo ndo sa xihna ñi ta ndyehe ndo cuhva iyo ndo vity ta zandoo ndo cuaty ndo, ta zavaha tucu ndo cuhva i zavaha ndo sa xihna ñi. Tatu ma zama ndo cuhva iyo ndo, vaty xaan cua cuhin nu yucu ndo ta cua quindyey candelero ndo. (Cuñi si catyi si vaty cua nduu tucu ñu tañi ñiyivi ña sino iñi.)

⁶Zoco iyo minoo cuhva vaha sii ndo vaty ña tahan maa iñi ndo cuhva zavaha ñiyivi ndyico sii ra Nicolás. Ta tacuan tucu mi. Ña tahan maa iñi cuhva zavaha ñu.

⁷Tatu ndyaa zoho ndo tyizoho ndo cuhva catyi Taty Ii sihin sa usa tahan vehe ñuhu ñu sino iñi. Catyi ra: Tatu cundye iñi ndo ta zahacanaa ndo (sii cuhna) cua cuhve sa casi ndo yucu vixi sa iñi

nu minoo yutu nandyaa ndya gloria, ta cua cundito ndo tandihi cui tyiemvu.”

Tyño i tasi ra sii ñu ñuu Esmirna

⁸Tyaa tucun minoo carta sii ra zacuenda sii ñiyivi sino iñi ñuu Esmirna, ta tyehen catyun: “Ihya cuu tuhun cahan ra iyo ndya ta xihna cui ñi, ta cua coo ca ra vazu sa naa tandihi sa iyo. Zuun ra cui ra i sihi ta i nandote.

⁹Site cuhva iyo ndo. Cuhva ndyehe xaan ndo tundoho ta cuhva ndahvi xaan iyo ndo. Zoco cuca xaan ndo ityi nuu ra Ndyoo. Ta site sii ñiyivi catyi vaty ñiyivi hebreo cuu ñu, ta cahan ñu ndya vaha ñi sii ndo, zoco yivi ñiyivi hebreo cuu maa ñu sa ndisa cui. Vehe ñuhu ra cuhna cuu sii ñu.

¹⁰Ma yuhu ndo tundoho cua ndyehe ndo. Cua tyihi cuhna sii zuhva ndo vehe caa vaty cuñi ra nducu coto ihñi ra sii ndo. Ta cua ndyehe ndo tundoho usi tahan quivi, zoco ma ndu-uu iñi ndo vazu cuu ndo sa cuenda mi, ta cua cuhve sa vaha sii ndo sa cundito ndo tandihi cui tyiemvu.

¹¹Tatu ndyaa zoho ndo, tyizoho ndo cuhva catyi Taty Ii sihin sa usa tahan vehe ñuhu ñu sino iñi: Tatu cundye iñi ndo ta zahacanaa ndo sii cuhna, ma cuu cui ndo.”

Tyño i tasi ra sii ñu ñuu Pérgamo

¹²Tyaa tucun minoo carta sii ra zacuenda sii ñu sino iñi ñuu Pérgamo, ta tyehen catyun: “Ihya cuu tuhun cahan ra cumi espada sa xaan nduu siyo yuhu.

¹³Site vaty ndyaa ndo minoo ñuu nu ndyaca ñaha cuhna, zoco

ña ndu-uu iñi ndo, ta ña catyi ndo vaty i ña sino iñi ndo sii, vazu i ndyehe ndo cuhva i sahñi ñiyivi sii ra Antipas ñuu cuan nu ndyaa cuihna vaty saha vaha xaan ra Antipas sa ndaa sa cuenda mi.

¹⁴Zoco iyo zuhva sa zavaha ndo ta ña tahan iñi sii si vaty ñuu Pérgamo cuan iyo zuhva ndo ndyico ca ndo cuhva i zacuaha ra Balaam vaty i nacaty ra sihin ra Balac vaty vaha cua zavaha ñiyivi hebreo cuaty sa casi ñu ndyayu sa saha maa ñiyivi sii inga ndyoo ta cua cuzu rayii sihin ñaha vazu yivi ñazih i ra cuu, catyi ra cuan.

¹⁵Ta nu yucu ndo iyo tucu zuhva ndo ña cuñi ndo zandoo ndo sa ndyico ndo cuhva zacuaha ra Nicolás.

¹⁶Yucuan cuenda zama ndo cuhva iyo ndo vaty tatu ma zama ndo, vaty xaan cua quisi nu yucu ndo ta cua cahñi tehin sihin ra zavaha sa ña vaha sihin espada sa quita yuhi.

¹⁷Tatu ndyaa zoho ndo tyizoho ndo cuhva catyi Taty i sihin sa usa tahan vehe ñuhu ñu sino iñi: Tatu cundyee iñi ndo ta zahacanaa ndo sii cuihna cua cuhve sa casi ndo pan maná sa ñoho xehe, ta cua cuhve minoo yuu cui si tahan tahan ndo. Ta nu yuu cuan ndyaa minoo zivi saa, zoco yoñi sito sii si. Maa ñi ñiyivi ñihi yuu cuan cua coto ñaa zivi ndyizo si.”

Tyño i tasi ra sii ñu ñuu Tiatira

¹⁸Ta tyaa tucun minoo carta sii ra zacuenda sii ñu sino iñi ñuu Tiatira. Tyehen tyoon: “Ihya cuu tuhun cahan zehe ra Ndyoo, ra sa caa siti nuu tañi caa ñúhu. Ta saha

ra caa tañi caa sa nañi bronce sa xiño xaan.

¹⁹Site tandihi sa vaha sa zavaha ndo. Site cuhva cuñi xaan ndo sii ñiyivi ta cuhva nii xaan iñi ndo ta cuhva tyindyee ndo sii tahan ndo ta cuhva cundyee xaan iñi ndo. Ta site vaty zavaha ca ndo sa vaha vaty ta ziqui ndya ta xihna ñi.

²⁰Zoco iyo zuhva sa zavaha ndo ta ña tahan iñi vaty saha ndo sa zavaha minoo ñaha ña vaha nu yucu ndo ndya vaha ñi, cuhva i zavaha ña Jezabel ta sa naha. Catyi ña vaty cahan ña tuhun saha ra Ndyoo sii ña, zoco zandavi ñaha ña ta zacuaha ña sii ñiyivi cuu muzu mi vaty vaha cua cuzu rayii sihin ñaha vazu yivi ñazih i ra cuu, ta cuu casi ndo sa saha maa ñiyivi sii inga ndyoo, catyi ña.

²¹Sa ndatu xein sa zama ña cuhva iyo ña ta zandoo ña cuaty zavaha ña sihin rayii, ta ña cuñi ña.

²²Cua tasi tuñi sii ña ta sii tandihi ñiyivi zavaha ndya vaha ñi cuhva zavaha maa ña. Tatu ma zama ñu cuhva zavaha ñu cua tasi cuehe ziqui ñu, ta ma cuu nduvita ñu.

²³Ta cua cahñi sii tandihi ñu. Ta cua coto tandihi ñiyivi sino iñi vaty yuhvi cui ra sito tatu vaha sica iñi ñiyivi sihin aña ñu a ña vaha. Ta sii sa minoo minoo ndo cua cuhve cuhva tahan si sii ndo sa cuenda tyiño i zavaha ndo.

²⁴Ta sii inga ndo ñuu Tiatira, ndoho ña zavaha cuhva ña vaha cuan ta ña zavaha ndo tandihi sa ndya vaha ñi cuhva cuñi cuihna, ña cua cahan que inga ca tuhun sihin maa ndo vaty vaha ñi cuhva yucu ndo.

²⁵Zoco ma zaña ndo sa zavaha ndo sa vaha. Cuhva sa zavaha ndo vityi, tacuan zavaha ndo ndya quivi cua quisi tuqui.

²⁶Ta tatu zahacanaa ndo sii cuihna ta zavaha ndo cuhva catyi ndya quivi cua cuu ndo, cuee ca cua cuhve sa cundyaca ñaha ndo sii ñiyivi ñuu ñiyivi.

²⁷Ta ñihni xaan cua tasi tuñi ndo sii ñu

²⁸tañi saha Zuti cuhva sii, sa tasi tuñi sii ñu. Ta cua cundyei sihin maa ndo.

²⁹Tatu ndyaa zoho ndo, tyizoho ndo cuhva catyi Tatyí li sihin ñu sino iñi.”

Tyíño i tasi ra sii ñu ñuu Sardis

3 Tyaa tucun minoo carta sii ra zacuenda sii ñu sino iñi ñuu Sardis. Tyehen catyun: “Ihya cuu tuhun cahan ra iyo sa usa tahan cuhva sii Tatyí li ra. Ta cumi tucu ra sa usa tahan tiño, ta tyehen catyi ra: Site cuhva iyo ndo. Catyi ñiyivi vatyí sino xaan iñi ndo ta sa ndito ndisa cuii añima ndo, zoco ña ndisa sa ndito añima ndo vatyí sa ndoyo ñuhu ndo.

²Zacuenda ndo sii ndo, ta zanduvaha ndo cuhva zavaha ndo coto ndoyo ñuhu ndihni ndo. Sa ndyehi vatyí ña vaha cuhva zavaha ndo ityi nuu ra Ndyoo.

³Nacohon iñi ndo cuhva i zacuahá ñiyivi sii ndo, ta zavaha ndo sii si. Zandoo ndo sa ña vaha sa zavaha ndo. Tatu ma cundyaa listo ndo ta zavaha ndo sa vaha, cua quisi ziqui ndo tañi cua quisi minoo ra zuhu vatyí ma coto ndo ñaa cuhva cua sei.

⁴Iyo zuhva ca ñiyivi nu yucu ndo sa ña zavaha cuatyí. Cua cuhun ñu sihin mi, ta cua ndihvi ñu zahma cuisí vatyí ñiyivi vaha xaan cuu ñu.

⁵Ta ñiyivi zahacanaa sii cuihna, zuun ñi cua ndihvi ñu zahma cuisí, ta ma zanei zivi ñu nu libro sa ndyaa zivi ñiyivi cua cundito sihin ra Ndyoo. Ityi nuu ra Ndyoo Zuti ta ityi nuu ángel cua catyi vatyí ñiyivi sii mi cuu sii ñu.

⁶Tatu ndyaa zoho ndo tyizoho ndo cuhva catyi Tatyí li sihin ñu sino iñi.”

Tyíño i tasi ra sii ñu ñuu Filadelfia

⁷Tyaa tucun minoo carta sii ra zacuenda sii ñu sino iñi ñuu Filadelfia, ta tyehen catyun: “Ihya cuu tuhun cahan ra ii xaan, ta ra ndisa cuii cuu ra. Cumi ra ndaha ticui ra rey David (cuñi si catyi si vatyí iyo xaan cuhva sii ra tañi i sicoo sii ra rey David), tatu nuña ra yoñi cuu nacazi. Ta tatu nacazi ra, yoñi cuu nuña.

⁸Site tandihni sa vaha sa zavaha ndo. Sehi cuhva sii ndo sa nacatyí ndo Tuhun Ndyoo, ta yoñi cua cuu cazi. Ta vazu zuhva ñi tundyee iñi iyo sii ndo, zoco zavaha ndo cuhva catyi, ta ña catyi ndo sa ña sito ndo sii.

⁹Iyo ñiyivi zavaha xaan cuhva cuñi cuihna. Catyi ñu vatyí ñiyivi hebreo cuu ñu, ta zavaha ñu cuhva cuñi mi catyi ñu, zoco vatyí xaan ñu. Cua zañiñi sii ñu, ta cua quisi ñu nu yucu ndo, ta cua zacahnu ñu sii ndo. Ta cua coto ñu vatyí cuñi xein sii maa ndo.

¹⁰Cundyee xaan iñi ndo tañi i cundyee xaan iñi mi, ta yucuan

cuenda cua zacuende sii ndo, ta ma ndyehe ndo tundoho cahnu sa vasi ziqui tandihi ñiyivi ñuu ñiyivi vatyí cua nducu coto ihñi sii tandihi ñiyivi ñuu ñiyivi, ta cua cote tatu cuñi ñu sii, sa ndisa a ña cuñi ñu sii.

¹¹Sa cuñi quisi tuqui. Ma zaña ndo cuhva vaha iyo sii ndo coto ma ñihi ndo sa vaha sa cuñi ra Ndyoo cuhva ra sii ndo.

¹²Tandihí ñu zahacanaa sii cuihna cua zandui ñiyivi ñiñi sii ñu ityi nuu ra Ndyoo, ta ma cuu ca ndoyo ñuhu ñu. Cua tyei zivi ra Ndyoo mi ta zivi ñuu ra Ndyoo nuu tandihí ñu cuan. Ñuu cuan cuu ñuu Jerusalén saa. Cua quita si andivi nu iyo ra Ndyoo, ta cua noo si. Ta tandihí ñu zahacanaa sii cuihna, cua tyei zivi sei nuu ñu.

¹³Tatu ndyaa zoho ndo tyizoho ndo cuhva catyi Tatyí Ii sihin ñu sino iñi.”

Tyiño i tasi ra sii ñu ñuu Laodicea

¹⁴Tyaa tucun minoo carta sii ra zacuenda sii ñu sino iñi ñuu Laodicea, ta catyun: “Ihya cuu tuhun cahan minoo ra zavaha ndisa cuii cuhva catyi ra. Sa ndaa, ra cahan sa ndisa cuii cuu ra. Ta maa ra i zavaha tandihí sa i zavaha ra Ndyoo.

¹⁵Site yozo caa iyo ndo, ta ña vaha cuhva iyo ndo. Nu sa ña zandoo ndo sii, ta nu sa ña zatyíño vaha ndo tyiñe. Vaha ca tatu zandoo ndihí ndo sii a nduñihi ca zatyíño ndo tyiñe. Ña vaha sa zuhva cuñi ndo sii, ta zuhva ña cuñi ndo.

¹⁶Zoco maa ndo zuhva cuñi ndo sii, ta zuhva ña cuñi ndo. Ta nu

ña zandoo ndihí ndo sii, ta nu ña cuñi ndo zatyíño vaha ndo tyiñe. Yucuan cuenda cua tava ndyize sii ndo.

¹⁷Tacuan catyi vatyí catyi maa ndo vatyí iyo xaan sa vaha sii ndo. Iyo xuhun ndo. Ñahñi sa cumañi sii ndo cuñi maa ndo, ta ña nacoto ndo vatyí ñahñi cuenda cuzii iñi ndo. Ndahvi xaan ndo; cuaa ndo; ta ñahñi sa vaha iyo sii ndo sa ndisa cuii.

¹⁸Yucuan cuenda catyi sihin ndo vatyí zata ndo sa vaha sa iyo sii mi ta cua cucuca ndo sa ndisa cuii. Zata ndo xuhun cuaan vaha ta zahma cuisí sa cua ndihvi ndo ta ma cucahan ca nuu ndo. Ta zata ndo colirio quehe nuu ndo ta cua cuu nandyehe ndo. (Cuñi si catyi si vatyí nazama ñu cuhva iyo ñu ta nanducu ñu sa vaha iñi ñi sii maa ra Ndyoo.)

¹⁹Saha xein tuhun vaha sii ñiyivi, ta cañi sii ñu vatyí cuñi xein sii ñu. Yucuan cuenda zavehi cuhva cuan sihin maa ndo. Ta vityí cuñi si sa zama ndo cuhva iyo ndo ta zavaha ndo sa vaha sa ndisa cuii.

²⁰Ndyehe ndo vatyí nandeyi yuvehe ta cati. Yoo ra cua cuiñi nduzi ta nuña ra yuvehe, cua quihvi ta cua ndoi sihin ra. Ta iñi ñi cua cuu ra sihin.

²¹Ta ñiyivi cua zahacanaa sii cuihna, cua cuhve sa cundyaa ñu sihin mi nu ndyaca ñehi tañi i zahacanei sii cuihna ta vityí ndeyi sihin Zuti nu ndyaca ñaha ra.

²²Tatu ndyaa zoho ndo tyizoho ndo cuhva catyi Tatyí Ii sihin ñu sino iñi.”

Cuhva zacahnu ñu sii ra Ndyoo ndya gloria

4 Yaha cuan ta ziqui i ndyehi vatyí tacoho minoo yuvehe

andivi. Ta i siñi tuqui nduzu ra cahan sihin sa xihna ñi. Ñihi cahan ra tañi nduzu minoo cutu. Ta i catyi ra sihin: Ñaha ihya ta cua zañehi suun ñaa sa cua coo cuee ca. Catyi ra.

²Ta zuun ñi caa cuhva cuan i situ cuii Tatyí li ra Ndyoo sii, ta i ndyehi vatyí ndyaa minoo tyayu ra rey andivi ta ndyaa minoo ra nuu si.

³Ta ra ndyaa tyayu cuan, xiño xaan ra tañi xiño yuu vaha sa nañi jaspe ta cornalina. Ta siconduu minoo coo yahndyi sii tyayu cuan ta xiño xaan si tañi yuu sa nañi esmeralda.

⁴Ta nu ndyaa tyayu cuan i ndyehi vatyí siconduu yucu oco cumi tahan ca tyayu rey. Ta yucuan ndyaa oco cumi tahan ra sahnu ndyaca ñaha. Ñoho ra zahma cuisí, ta minoo corona xuhun cuaan ñoho xiñi tahan tahan ra.

⁵Ta tyayu sa ndyaa mahñu cuan quita tasa zavi ta sa cahan zavi ta inga nduzu ndihi ca. Ta ityi nuu tyayu cuan cayu usa tahan ñúhu. Núhu cuan cuu sa cuenda sa usa tahan cuhva iyo sii Tatyí li.

⁶Ta ityi nuu tyayu cuan iyo tucu minoo sa caa tañi caa tyañuhu, zoco xiño xaan si tañi ino. Ta siconduu nu nandyaa tyayu cuan nandyaa cumi tahan quiti. Situ cuii siti nuu sii ti. Ityi nuu ti ta ityi sata ti.

⁷Minoo ti caa ti tañi caa minoo ndicaha. Ta quiti cu uu cuan, caa ti tañi caa minoo toro. Quiti cu uñi cuan caa nuu ti tañi caa nuu rayii. Quiti cu cumi cuan, caa ti tañi caa minoo tazu sa ndava.

⁸Ta sa cumi tahan quiti cuan iyo iñu tahan ndisi ti sa minoo minoo ti. Ta iñi siti nuu nacahnu tandihi ndisi ti. Ñiyaca ta ndiyiyaca ñá sicuita quiti cuan sa catyi ti: Yoho ra ndyaca ñaha nacahnu cuii cuun. li xaan; ii xaan cuun. Iyon vityi, ta ndya ta xihna cuii ñi iyon, ta cua coon tandihi cuii tyiemvu.

⁹Tacuan zacahnu quiti cuan sii ra ndyaa nu tyayu cuan. Ra ndito tandihi cuii tyiemvu cuu ra, ta saha xaan tucu quiti cuan tyahvi ndyoo sii ra.

¹⁰Ta cuhva sa zavaha quiti cuan cuhva cuan, i sicuñi siti sa oco cumi tahan ra sahnu ndyaca ñaha ityi nuu ra ndyaa nu tyayu rey cuan, ta i zacahnu ra sii ra ndito tandihi cuii tyiemvu. I tava tandihi ra sahnu cuan corona ra, ta i saqui ra sii si ityi nu tyayu cuan, ta i catyi ra:

¹¹Yoho ra ndyaca ñaha ta Ndyoo cuun sii ndi.

Ra cahnu xaan ca cuun.

Tahan si sa zacahnu xaan ndi suun ta tyaa xaan ndi yahvi suun.

Ta tahan si sa cundyaca ñohon sii tandihi cuii sa iyo.

Vatyí i zavaha moo tandihi si.

I sino si vatyí tacuan cuñi moo.

Ihya cahan si sa cuenda minoo libro ta sa cuenda ra cu Mvee Ticatyi ra Ndyoo

5 Tacuan ta ziqui i ndyehi vatyí ra ndyaa tyayu mahñu, ndaha ra minoo libro ndaha siyo cuaha ra. Ndyaa letra sisi si, ta sata si. Ta iyo usa tahan sa nacazi sii si.

²Ta i ndyehi sii minoo ángel ñihi xaan, ta saa xaan cahan ra, ta catyi ra: ¿Yoo ra cuu ra cahnu sa ndisa cuii ta sii ra tahan si sa nuña ra sa nacazi libro ya? ¿Yoo ra cua nuña libro ya? Catyi ra.

³Tacuan ta yoñi i cuu nuña libro cuan ta ndyehe sisi si. Yoñi minoo ra ñiñi xaan andivi a nu ñuhu a xu ñuhu ta cuu nuña ra sii si.

⁴Ta i sacu xein vatyí yoñi sa cuu nuña sii si ta ndyehe sisi si.

⁵Tacuan ta minoo ra sahnu ndyaca ñaha i catyi ra sihin: Ma vacun. Iyo minoo ra cahnu, ñiyivi ra Judá. Ta zuun tucu ñiyivi ra David cuu ra. Sa i zahacanaa maa ra, ta cuu cani ra sii sa usa tahan sa nacazi libro cuan ta nuña ra sii si.

⁶Ta i ndyehi vatyí mahñu nu yucu tyayu ta sa cumi tahan quití ta tandíhi ra sahnu ndyaca ñaha cuan nandyaa minoo ra caa tañi caa minoo mvee ticatyí sa i sahñi ñiyivi. Usa tahan ndiquí ti, ta usa tahan siti nuu ti sa cuu cuenda sa usa tahan cuhva iyo sii Tatyí li ra Ndyoo sa tasi ra Ndyoo nacahnu ñuu ñiyivi.

⁷Tacuan ta i sahan ra cu mvee ticatyí cuan, ta i quihin ra libro sa ñaa ra ndyaa tyayu cahnu cuan ndaha cuaha ra.

⁸Ta cuhva i quihin ra libro cuan ta sa cumi tahan quití cuan sihin sa oco cumi tahan ra sahnu ndyaca ñaha cuan i sicuñi siti ra ityi nuu ra cu mvee ticatyí cuan. Tahan tahan ra cuan ndaha ra arpa ra ta ndaha ra minoo coho xuhun cuan. Sisi coho cuan cayu cutu. Ta cutu cuan cuu xico sa sica tahvi ñiyivi ra Ndyoo sii ra.

⁹Ta cuhva sa yucu ra yucuan, i sata ra minoo yaa saa. Tyehen catyi si:

Yoho, minoo ra vaha xaan cuun. Yucuan cuenda cuu cuhun libro ta canun sa ndazi yuhu si.

Vatyí yoho, sohon sa cahñi ñiyivi suun. Satun ñiñun, ta sihin si zanduvohon sii ndi sihin ra Ndyoo.

Ta ñiyivi nacahnu ñuu ñiyivi cuu ndi, ta ziin ziin cuhva cahan ndi.

Ñiyivi ziin ziin tata cuu ndi.

¹⁰I sohon cuhva sii ndi ta cuu ndi rey ta cuu ndi ra cu zutu sa cuenda ra Ndyoo, ta cua cundyaca ñaha ndi ñuu ñiyivi.

¹¹Tacuan i sata ra cuan yaa cuan, ta ziquí i nandyehi inga saha ta siñi nduzu ángel sa nandyaa siconduu nu ndyaa tyayu cahnu ta nu yucu sa cumi tahan quití sihin sa oco cumi tahan ra sahnu ndyaca ñaha. Cuaha xaan cuaha xaan ángel cuenda millón.

¹²Saa xaan i cahan si, ta catyi si:

Ra cu mvee ticatyí sa sahñi ñiyivi, ra vaha xaan cuu ra.

Yucuan cuenda iyo xaan cuhva sii ra.

Iyo xaan sa sii ra.

Iyo xaan sa siñi tuñi sii ra.

Cuu xaan cundyaca ñaha ra.

Tahan si sa zacahnu xaan ñiyivi sii ra.

Ra cahnu xaan ca cuu maa ra.

Catyí ángel cuan.

¹³Ta ziquí siñi vatyí cahan tandíhi sa i zavaha ra Ndyoo, sa iyo ityi ziquí, ta sa iyo nu ñuhu ta sa iyo xu ñuhu ta sa iyo sisi tyañuhu. Tandíhi cuii sa i zavaha ra Ndyoo i cahan si ta catyi si:

Cahnu xaan cuu ra ndyaa tyayu
cahnu cuan sihin ra cu mvee
ticaty i cuan.

Iyo xaan cuhva sii ra, ta cuu
xaan cundyaca ñaha ra.

Tahan si zacahnu yo sii ra
tandih i cuii maa tyiemvu.

¹⁴Ta sa cumi tahan quit i cuan i
caty i ti:

iNacuu si tacuan, ta nacuu si sa
ndisa!

Tacuan ta tandih i sa oco cumi
tahan ra sahnu ndyaca ñaha i
sicuiñ i siti ra, ta i zacahnu ra sii ra
ndito tandih i cuii maa tyiemvu.

**Nuña ra usa tahan sa
ndazi yuhu libro**

6 Tacuan ta ziqui i ndyehi vaty i
ra cu Mvee Ticatyi ra Ndyoo,
i nuña ra minoo sa usa tahan sa
ndazi yuhu libro cuan. Ta siñ i sa
cahan minoo sa cumi tahan quit i
sa yucu yucuan. Saa xaan i cahan
ti tañ i cahan zavi ta caty i ti: iÑaha
ihya ta ndyehun! Caty i ti.

²Ta ziqui i ndyehi minoo caballo
cuisi. Yozo minoo ra sii ti, ta ndaha
ra minoo nduva. I ñih i ra minoo
corona ñoho xiñ i ra vaty i sahñ i
tahan ra ta zahacanaa ra, ta cua
zahacanaa ca ra nu cuahan ra.

³Ta ra cu Mvee Ticatyi i nuña ra
sa cu uu sa ndazi yuhu libro cuan.
Ta siñ i sa cahan sa cu uu quit i cuan,
ta caty i ti: iÑaha ta ndyehun!

⁴Tacuan ta i quita inga caballo.
Caballo cuaha cuu ti. Ta ra yozo
sii ti, iyo cuhva sii ra quindyaa ra
cuhva vaha yucu ñiyivi ñuu ñiyivi.
Ta cua quisaha cahñ i ñiyivi sii
tahan ñu. Ta ra yozo caballo cuan i
ñih i ra minoo espada cahnu xaan.

⁵Yaha cuan ta ziqui i nuña ra
cu Mvee Ticatyi cuan sa cu uñ i sa
ndazi yuhu libro cuan ta siñ i sa
cahan sa cu uñ i tahan quit i cuan,
ta i caty i ti: iÑaha ta ndyehun! Ta
i ndyehi inga caballo toon. Ta ra
yozo sii ti ñaa ra minoo ticaty a.

⁶Ta mahñ u nu yucu sa cumi
tahan quit i cuan, siñ i minoo nduzu
tañ i cahan ñiyivi ta caty i si:

Minoo kilo nuñ i, yahvi xaan cua
cundyaa si.

Ta tacuan tucu siti cebada,
yahvi xaan cua cundyaa si.

Zoco cua coo cuaha azetye ta
vino.

Caty i nduzu cuan.

⁷Cuhva sa nuña ra cu Mvee
Ticatyi sa cu cumi tahan sa ndazi
yuhu libro cuan, i siñ i vaty i cahan
sa cu cumi tahan quit i cuan ta
caty i ti: iÑaha ta ndyehun!

⁸Ta i ndyehi sii minoo caballo
cuaan. Ta ra sa yozo sii ti, nañ i
ra Tuhun Sihi Ñiyivi. Ta ity i sata
ra vasi inga ra sa nañ i Andyaya. I
ñih i ra cuan cuhva ziqui zuhva
ñuu ñiyivi sa cahñ i ra ñiyivi. Sahñ i
ra sii ñu sihin cuhva i zacanda ra
cuaty i ta sihin tama, ta sihin cuehe
ta sihin quit i xaan.

⁹Yaha cuan, ta ziqui i nuña ra cu
Mvee Ticatyi sa cu ohon tahan sa
ndazi yuhu libro cuan, ta i ndyehi
minoo altar, ta xuu si i ndyehi
añima ñiyivi i sihi sa cuenda Tuhun
Ndyoo ta sa cuenda sa nacaty i xaan
ñu Tuhun Ndyoo sihin ñiyivi.

¹⁰Ta i cana saa ñu sihin minoo
nduzu saa xaan, ta caty i ñu: Zutu
mañ i yuu, ii xaan moo, ta ndoo
xaan zavohon, çta ama ta cua
tyicuhvon sii ñiyivi ta cua tasi

tuñun sii ñiyivi ñuu ñiyivi vatyí maa ñu cuu ñu i sahñi sii ndi? Catyí ñu.

¹¹Tacuan i cuu si, ta i saha ra zahma cuisí ndihvi tandíhi ñu cahan, ta i catyí ra sihin ñu vatyí naquitatu ñu zuhva ca quívi vatyí cumañi ca casi tahan ñu, tandíhi ca ñu sa cua cahñi ñiyivi sa cuenda ra Cristo cuhva i sihi maa ñu.

¹²Ta ziquí i ndyehi vatyí sa nuña ra cu Mvee Ticatyí sii sa cu iñu tahan sa ndazi yuhu libro cuan. Sa yaha i nuña ra sii si, ta ziquí i taan minoo sa ñihi xaan. I ndutoon xaan ñicandyí tañi zahma toon. Ta luna, i nducuaaha si tañi caa ñiñi.

¹³Ta tiñoó sa iyo andívi, i canacoyo tí ndya nu ñuhu tañi coyo tandíhi yucu vixi tatu nu yutya si tatu ñihi xaan caa tatyí.

¹⁴Ta ziquí i ndata zava yutyí andívi, ta i natuu si tañi natuu minoo tutu. Ta tandíhi yucu ta tandíhi ñuhu sa ndyaa mahñu tyañuhu, i nacanda si ta i nazama si nu ndyaa si.

¹⁵Ta tandíhi ra cu rey ta ra nahnu ta ra cuca ta ra ñiñi ta ra ndyaca ñaha sihin tandíhi ra cu muzu ta tandíhi inga ñiyivi ndya vaha ñi, cua quihvi xehe ñu sisi ñuhu ta sisi yavi yuu ta ticuí yuu sa iyo yucu.

¹⁶Ta cua cahan ñu sihin yucu ta sihin yuu, ta catyí ñu: Canacava ndo ziquí ndi, ta tyixehe ndo sii ndi sii ra ndyaa tyayu cahnu cuan ta sii ra cu Mvee Ticatyí cuan vatyí sa cuxaan xaan ra vityí.

¹⁷Sa saa quívi cuxaan xaan ra sa ndisa, ta yoñi cua cuu cundyee iñi sii si. Catyí ñu.

**Ñiyivi hebreo sa cuu ñiyivi
ra Ndyoo sa ndisa**

7 Yaha cuan ta ziquí i ndyehi cumi tahan ángel. Nandyaa

ra sa cumi tahan siquí ñuu ñiyivi, ta ñá saha ra yaha tatyí. Yucuan cuenda ñá cuu cava tatyí ñuu ñiyivi ta nu nu tyañuhu ta nu nu yutu. Ñahñi maa tatyí i caa.

²Ta i ndyehi sii inga ángel. Vasi ra ndya ityí caña ñicandyí, ta ndyizo ra zeyu ra Ndyoo ndito. I cana saa ra ta cahan ra sihin inga cumi tahan ángel cuan vatyí sa cumi tahan ra cuan iyo cuhva sii ra sa zatívi ra ñuu ñiyivi ta tyañuhu.

³Zoco ángel sa vasi cuan, i catyí ra sihin ra: Cuatu noo ndo. Ma zatívi ñaha ndo sii ñuu ñiyivi ta sii tyañuhu ta nu sii yutu ndya cua tyaa xihne zeyu ra Ndyoo Zutu yo yíqui nuu ñiyivi sa cuu muzu maa ra Ndyoo.

⁴Tacuan i cuu si, ta siñi nacatyí ra yozo tahan ñiyivi i tyaa ra zeyu cuan. Ta cuu si minoo ziendu uu xico cumi mil ñiyivi sisi tandíhi sa usi uu ityí ñiyivi hebreo.

⁵Usi uu mil ñu cuu ñu ñiyivi ra Judá. Usi uu mil ñu cuu ñu ñiyivi ra Rubén. Usi uu mil ñu cuu ñu ñiyivi ra Gad.

⁶Usi uu mil ñu cuu ñu ñiyivi ra Aser. Usi uu mil ñu cuu ñu ñiyivi ra Neftalí. Usi uu mil ñu cuu ñu ñiyivi ra Manasés.

⁷Usi uu mil ñu cuu ñu ñiyivi ra Simeón. Usi uu mil ñu cuu ñu ñiyivi ra Leví. Usi uu mil ñu cuu ñu ñiyivi ra Isacar.

⁸Usi uu mil ñu cuu ñu ñiyivi ra Zabulón. Usi uu mil ñu cuu ñu ñiyivi ra José. Ta usi uu mil ñu cuu ñu ñiyivi ra Benjamín.

**Ndyehi ra cuaha xaan
ñiyivi ñoho zahma cuisí**

⁹Yaha cuan ta ziquí i ndyehi sii cuaha xaan ñiyivi. Ñiyivi tandíhi

cuii tata cuu ñu ta tandihi cuii naci6n ta tandihi cuii ñuu. Ta ziin ziin yuhu cahan ñu, tandihi nuu zahan ta tyehen ñi sa iyo ñuu ñiyivi. Nandyaa ñu cuan ityi nuu tyayu cahnu, ta nandyaa ñu ityi nuu ra cu Mvee Ticatyi. Cuaha xaan cuaha xaan ñiyivi cuu ñu ndya kuhva yoñi cuu cahvi sii ñu. Ñoho ñu zahma cuii, ta ñaa ñu ndaha ticaha.

¹⁰Tandihi ñu cana saa ñu sihin minoo nduzu saa xaan, ta catyi ñu:
Ra Ndyoo, ra ndyaa tyayu
cahnu cuu ra zacacu sii ndi,
Ta ra cu Mvee Ticatyi cuu ra
zacacu sii ndi.

Catyï ñu.

¹¹Ta tandihi cuii ángel cuan nandyaa ra siconduu ra nu ndyaa tyayu cahnu cuan ta nu yucu tandihi ra sahnu ndyaca ñaha ta nu yucu sa cumi tahan quitï. Ta tandihi cuii ángel cuan i sicava ndyayu ra nu ñuhu ityi nuu tyayu cahnu cuan, ta i zacahnu ra sii ra Ndyoo.

¹²Ta i catyi tandihi ángel:
Yoho Ndyoo Zutu ndi,
nazacahnu xaan maa ndi suun.
Tyaqui xaan coon. Cuaha xaan
sa siñi tuñi iyo suun.
Nacuhva xaan ñiyivi tyahvi
ndyoo suun, ta nazacahnu ñu
suun.
Cuaha xaan kuhva iyo suun, ta
cuaha xaan sa ndyaca ñohon.
Ta nacuu si tacuan, ta nacuu si
sa ndisa tandihi cuii tyiemvu.

¹³Tacuan i cuu si, ta ziqui minoo ra sahnu ndyaca ñaha i ndaca tuhun ra sii, ta catyi ra: ¿Yoo ñiyivi cuu ñu sa ñoho zahma cuii ña? ¿Ta ndya ityi i quisi ñu? Catyi ra.

¹⁴Ta i catyi sihin ra: Tata, sa sito moo. Ta ziqui i catyi ra sihin mi: I quita ñu ndya nu iyo tundoho cahnu xaan. Sa nacatya ñu zahma ñu ta nducuisi zahma ñu sihin niñi ra cu Mvee Ticatyi. (Cuñi si catyi si vatyi sa nduvaha añima ñu sa cuenda ra Cristo.)

¹⁵Ta vityi nandyaa ñu ityi nuu tyayu maa ra Ndyoo. Ndyiyaca ta ñiyaca zatyño ñu tyiño ra sisi vehe nu zacahnu ñiyivi sii ra. Ta maa ra sa ndyaa tyayu cahnu cuan zacuenda ra sii ñu vatyi ndyaa ra sihin ñu.

¹⁶Ma cuzoco ca ñu. Ta ma cu-ityi ca ñu. Ma cahmi ca ñicandyi sii ñu, ta ma quehe ca yoco sa ihñi sii ñu.

¹⁷Vatyi ra cu Mvee Ticatyi, ra ndyaa vatyi ñi tyayu cahnu cuan, cua zacuenda ra sii ñu tañi sa mvee ticatyi zono ra cuu sii ñu, ta cua cundyaca ra sii ñu nu iyo ndutya coho ñu, ta cua cundito ñu tandihi cuii tyiemvu. Ta cua zanaa ra Ndyoo tandihi cuii tucuihya iñi sii ñu.

Nuña ra sa cu usa tahan sa ndazi yuhu libro

8 I nuña ra cu Mvee Ticatyi sii sa cu usa tahan sa ndazi yuhu libro, ta kuhva cuan i cutaxi gloria tañi zava ora.

²Ta ziqui i ndyehi vatyi sa usa tahan ángel sa nandyaa ityi nuu ra Ndyoo, i ñihi minoo minoo ra minoo cutu.

³Ta ziqui i quisi inga ángel, ta i sicuñi ndyaa ra ityi nuu altar. Ñaa ra minoo cuun xuhun cuan. Ta i ñihi ra cuaha xaan cutu vatyi cua cahmi ra sii si nuu altar xuhun

cuaan sa ndyaa ityi nuu tyayu cahnu. Cua cahmi ra sii si ityi nuu ra Ndyoo cuhva sa cahan tandihi ñiyivi sa cuu cuenda ra Ndyoo sihin ra. Ta cua quihin ra Ndyoo xico cutu ta oración cuan.

⁴Ta i quita ñuhma cutu cuan sisi sa ndaha ángel cuan, ta i ndaa si ndya nuu ra Ndyoo iin ñi sihin oración sa zavaha ñiyivi sa cuu cuenda ra.

⁵Ta ziqui i zacutu ángel cuan cuun cuan sihin ñúhu sa cayu nu altar. Ta i cañi ra ñúhu cuan nu ñuhu ñiyivi. Ta sicoo minoo nduzu ñihi xaan tañi cahan zavi, ta sicoo xaan inga nduzu ta tasa zavi, ta i taan ndihi ca.

Tivi ángel cuan cutu

⁶Tacuan i cuu si, ta i nacundyaa listo tandihi sa usa tahan ángel cuan vatyi cua tivi ra cutu ra.

⁷Ta ángel sa xihna ñi cuan i tivi ra cutu ra, ta zaca noo yuu zavi ta ñúhu ta niñi i canacava nu ñuhu ñiyivi. Ta i cayu sa yatyi zava ñuu ñiyivi sihin yutu ta cuhu.

⁸Ta ziqui sa cu uu ángel cuan, i tivi ra cutu ra, ta i canacava tañi minoo yucu cahnu sisi tyañuhu. Cayu si i canacava si. Ta sa yatyi zava tyañuhu i nduu si niñi.

⁹Ta quití sa iyo sisi tyañuhu nu nduu niñi cuan, i sihi ti. Ta i tivi cuaha xaan barco.

¹⁰Tacuan ta ziqui i tivi tucu ángel sa cu uñi cuan cutu ra ta i canacava minoo tiñoocahnu xaan. Cayu xaan ti tañi minoo ñúhu. I canacava ti nuu sa yatyi zava yuu sa iyo ñuhu ñiyivi ta nu cuaha xaan zoco ndutya.

¹¹Nañi tiñoocuan Ajenjo vatyi ndu-uva tandihi ndutya nu canacava ti, ta cuaha xaan ñiyivi i sihi vatyi sihi ñu ndutya cuan, ta uva xaan si.

¹²Tacuan ta i tivi tucu sa cu cumi tahan ángel cuan cutu ra. Cuhva cuan ta i tivi sa yatyi zava ñicandyi ta sa yatyi zava yoo ta sa yatyi zava tiñooc. I nduñaa sa yatyi zava ñicandyi ta sa yatyi zava yoo ta sa yatyi zava tiñooc. Yucuan cuenda ñá ndundisi vaha ca ora, ta i nduñaa ca sa sa cuaa.

¹³Ta ziqui i ndyehi vatyi ndava minoo ángel ta cuahan ra zava mahñu andivi. Ta saa xaan i cahan ra ta siñi sa cahan ra. Tyehen catyi ra: iNdahvi ñi cuu ñiyivi iyo ñuu ñiyivi!, vatyi sa cuñi tivi inga uñi tahan ángel cutu ra.

9 Tacuan i cuu si, ta ziqui ángel cu ohon cuan i tivi ra cutu ra, ta i ndyehi sii minoo ra caa tañi caa minoo tiñooc. I quita ra ndya andivi, ta i canacava ra ndya nu ñuhu. Ta ñaa maa ra ndaha ticui sa cuu nuña yavi cono xaan nu ñoho ñiyivi zavaha sa ña vaha.

²Ta i nuña ra sii si, ta i quita ñuhma tañi quita ñuhma minoo nu cayu siin. Ta i nduñaa ñicandyi, sihin ñuhma sa quita yavi cuan, ta ñuhma xaan i nduu nacahnu.

³Ta i quita quití tañi caa tica sisi ñuhma cuan, ta i ndava ti ñuu ñiyivi. Ta quití xaan cuu ti, tañi xaan tizuhma sa iyo nu ñuhu.

⁴Ta tica xaan cuan, cuu zandyehe ti tundoho sii tandihi ñiyivi sa ñahñi zeyu ra Ndyoo ndyaa yiqui nuu. Zoco ma cuu zativi ti cuhu ta nu yutu sa iyo ñuu ñiyivi.

⁵Ta ña cuu cahñi ti sii ñiyivi. Maa sa ndyehe ñi ñu tundoho ohon yoo. Cua zandyehe quití cuan tundoho sii ñu tañi zandyehe tizuhma tundoho sii yo vatyi cua tyaa ti sii ñu.

⁶Quiivi cuan cua cuñi ñiyivi sa cuu ñu, zoco ma ñihi ñu cuhva. Cua nanducu xaan ñu cuhva cuu ñu, zoco ma cuu cuu ñu.

⁷Tica cuan caa ti tañi caa caballo nahnu. Quití cuahan nu iyo cuatyí. Ta xiñi ti caa si tañi sa ñoho minoo corona xuhun cuaan. Ta nuu ti caa tañi caa nuu ñiyivi.

⁸Ixi xiñi ti caa tañi caa ixi xiñi ñu zihí. Ta noho ti caa tañi caa noho ndicaha.

⁹Ta iyo minoo zoo ti ndava xaan si tañi caa. Ta tatu cua ndava ti, cuaha xaan nduzu zavaha ndisi ti tañi nduzu zavaha cuaha xaan carreta sa xita caballo tatu cuahan ti nu iyo cuatyí.

¹⁰Zuhma ti cuu tañi zuhma tizuhma. Iyo minoo iñu xaan nuu si. Ta sihin zuhma ti cua zandyehe ti tundoho sii ñiyivi ohon yoo.

¹¹Iyo ra ndyaca ñaha sii tica xaan cuan. Zuun ra cuu ra sa ndyaca ñaha yavi nu ñoho ñiyivi i zavaha sa ña vaha. Nañi ra Abadón sihin zahan hebreo. Ta ñiyivi cahan zahan griego catyi ñu vatyi Apolión nañi ra. Cuñi si catyi si ra zatívi.

¹²Yucuan cuu sa xihna ñi tundoho. Ndyaa coo uu tahan ca.

¹³Ra ángel cu iñu cuan i tivi ra cutu ra ta siñi nduzu cahan minoo ra. Quita nduzu cuan nu ndyaa tandíhi sa cumi tahan tutu altar xuhun cuaan sa ndyaa ityi nuu ra Ndyoo.

¹⁴Ñaa ángel cu iñu cuan cutu ra, ta i catyi ra cahan cuan sihin ra: Ndasun sii sa cumi tahan ángel nuhñi nu ndyaa yutya cahnu Eufrates.

¹⁵Ta tacuan ta i ndasi sa cumi tahan ángel vatyi sa ndatu listo ra sa cuenda cuhva cuan ta sa cuenda quiivi cuan ta sa cuenda yoo cuan ta cuiya cuan. Ta sa tahan si cuhva sa ndatu xaan ra, ta cua zavaha ra tyiño sa tahan si sii ra. Cua cahñi ra sa yatyi zava ñiyivi ñuu ñiyivi.

¹⁶I ndyehi cuaha xaan zandaru ángel cuan; yozo ra caballo ta cuahan ra. Ta siñi vatyi uu ziendu millón ra cuu ra.

¹⁷Tyehen cuu cuhva caa caballo cuan sisi sa i ndyehi. Ra yozo sii ti ñoho minoo caa yiqui ndyica ra. Iyo si cuaha si. Iyo si azu si, ta iyo si cuaan si. Xiñi caballo cuan caa si tañi caa xiñi ndicaha. Ta yuhu ti quita ñúhu ta ñuhma ta azufre.

¹⁸Ta sihin ñúhu ta ñuhma ta azufre sa quita yuhu caballo cuan, i sihi sa yatyi zava ñiyivi ñuu ñiyivi.

¹⁹Vatyi iyo cuhva sii ti sihin yuhu ti ta sihin zuhma ti. Zuhma ti caa tañi caa coo sihin xiñi ti. Ta sihin si zañicuehe ti sii ñiyivi.

²⁰Zoco numaa sihi xaan ñiyivi sihin tundoho cuan, zoco inga ñiyivi sa ñá sihi, ñá ndu-uu iñi ñu cuatyí ñu. Ñá zaña ñu sa zacahnu ñu sii cuihna ta sii ndyoo xuhun cuaan ta ndyoo xuhun cuisí ta ndyoo caa ta ndyoo yuu ta ndyoo yutu. Zacahnu ñu sii si vazú ña ndyehe si ta ña siñi si ta ña cuu caca si.

²¹Ta ñá zaña ñu tuhun sa sahñi ñu sii ñiyivi ta sa zatazi ñu ta sa

zuhu ñu ta sa quixi rayii sihin ñaha ta ñá tandaha ra ta sa quixi ra sihin ñazihí inga ra. Ñá zaña ñu sii tandihí cuui cuatyí zavaha ñu.

**Minoo ángel sa ndyizo
minoo libro luhlu**

10 Tacuan ta ziquí i ndyehi sii inga ángel ñihí xaan. I quita ra andívi ta vasi noo ra ndya nu ñuhu. Ñoho ra sisi minoo vico, ta ñoho minoo coo yahndyí xiñi ra. Ndisi xaan nuu ra tañi ñicandyi, ta saha ra ndisi xaan si tañi cayu ñúhu.

²Ta ndaha ra minoo libro luhlu, ta nuña si. Ta i sañi ra saha siyo cuaha ra nu tyañuhu, ta i sañi ra saha siyo zatyí ra nu ñuhu.

³Ta ziquí i cana saa ra sihin minoo nduzu ñihí xaan tañi tana minoo ndicaha. Cuhva sa cana saa ra, i siñi usa tahan nduzu tañi nduzu zavi.

⁴Ta sa yaha cahan zavi cuan ta ziquí cua tyei sii si, zoco siñi mino nduzu sa quita andívi ta tyehen catyí si sihin: Cucumi xehun cuhva i cahan sa usa tahan nduzu zavi cuan, ta ma tyoon sii si.

⁵Ta ziquí i ndyehi ángel sa sañi saha siyo cuaha ra nu tyañuhu ta saha siyo zatyí ra nu ñuhu vatyí i zandaa ra ndaha siyo cuaha ra ndya andívi.

⁶Ta i tyíñaha ra Ndyoo. Cahan ra sa cuenda ra Ndyoo ra ndito tandihí cuui tyiemvu, ra i zavaha andívi ta ñuhu ñuu ñiyívi ta tyañuhu ta tandihí cuui sa iyo. Ta i catyí ángel cuan: Sa cua ndihí tuhun

⁷vatyí tatu sa quisaha tiví ra ángel cu usa cuan cutu ra, cuñi

si catyí si vatyí sa yaha zavaha ra Ndyoo cuhva xehe sa cua zavaha ra tañi sa zacoto ra sii ra cu muzu ra, ra cu profeta.

⁸Tacuan i catyí ángel cuan, ta ziquí i siñi tuqui nduzu sa tuhve siñi. Minoo nduzu sa quita andívi cuu si, ta i cahan si sihin inga saha, ta catyí si: Cuahan ta cuhun libro luhlu sa ndaha ángel ra nandyaa nu tyañuhu ta nu ñuhu ñuu ñiyívi. Catyí ra.

⁹Ta i sehin nu nandyaa ángel cuan, ta i sique libro luhlu cuan sii ra, ta i catyí maa ra sihin: Cuhun sii si, ta casun sii si. Vixi xaan cua cuu si sisi yuhun tañi tyahiñu ñuñu. Zoco cua ndu-uva xaan si sisun.

¹⁰Ta tacuan i zavehi. I quihin libro luhlu sa ndaha ángel cuan, ta i sasi sii si. Sisi yuhi vixi xaan i cuu si tañi tyahiñu, zoco i ndu-uva xaan si sisi sa yaha sasi sii si.

¹¹Ta ziquí i catyí ra sihin: Vityi cuñi si sa nacatyí moo cuhva catyí ra Ndyoo nu libro cuan yozo caa cua cuu si sa cuenda cuaha xaan ñiyívi ta cuaha xaan nación ta sa cuenda ñiyívi cahan ziiñ ziiñ zahan ta sa cuenda ra ndyaca ñaha sii ñu, ndihí ca.

Uu tahan ra saha sa ndaa

11 Tacuan ta ziquí i saha ra minoo tuñi sii, ta cua tyicuhve sihin si, ta i catyí ángel cuan sihin: Nduviton ta tyicuhvon vehe ñuhu ra Ndyoo ta altar si ta cahvun yozo tahan ñiyívi zacahnun sii ra Ndyoo yucuan.

²Zoco nu cuu nuquehe vehe ñuhu, ma tyicuhvon vatyí cua ndoo si cuenda ñiyívi sa yivi ñiyívi hebreo

cuu, ta cua zanduquiñi caa ñu sii ñuu vaha xaan ya uu xico uu yoo.

³Ta cua tasi sii uu tahan ra cua cuhva sa ndaa sa cuenda mi. Cua ndihvi ra zahma toon, ta cua cahan ra sa cuenda mi mil uu ziendu uñi xico quivi.

⁴Sa uu tahan ra ya cua cuu ra tañi uu tahan yutu olivos ta cua cuu ra tañi uu tahan candelero sa ndyaa ityi nuu ra Ndyoo ra ndyaca ñaha sii tandihi yo.

⁵Tatu iyo ñiyivi cuñi cuhva tundoho sii ra, cua quita ñuhu yuhu ra ta cua cahmi si sii ñiyivi cuxaan sii ra. Cuhva cuan cua cuu ñiyivi tatu cuñi ñu cuhva ñu tundoho sii ra.

⁶Sa uu tahan ra ya, iyo cuhva sii ra ta cuu cazi ra andivi ta ma coon zavi tandihi quivi sa cua cahan ra sa cuenda ra Ndyoo. Ta iyo tucu cuhva sii ra sa nazama ra ndutya ta cua nduu si niñi, ta cua cuu zandyehe xaan ra tundoho sii ñiyivi. Cua quihin cuehe sii ñu, ta cua coo inga tundoho sii ñu yozo cuhva cuñi maa ra.

⁷Zoco quivi sa yaha saha ra tandihi sa ndaa, cuhva cua nacaty i ra sihin ñiyivi, ta ziqui cua quita minoo quit i xaan sisi yavi nu ñoho ñiyivi zavaha sa ña vaha, ta cua cahni tahan ti sihin ra, ta cua zahacanaa ti ta cua cahni ti sii ra.

⁸Cua cava coño ñuhu ra ityi cahnu ñuu cahnu nu i sahni ñiyivi sii ra ndyaca ñaha sii yo. Catyi tucu ñiyivi vaty i nañi ñuu cuan Sodoma ta nañi si Egipto vaty i cuaha xaan cuaty i zavaha ñiyivi ñuu cuan.

⁹Ta uñi quivi zazava ñiyivi ziin ziin ñuu ta ziin ziin tata ta ñiyivi

ziin ziin naci3n, ñu cahan ziin ziin zahan cua ndyehe ñu sii coño ñuhu ra, ta ma cuhva ñu sa quihvi si ñuhu.

¹⁰Ta zii xaan cua cuñi ñiyivi ñuu ñiyivi vaty i sihi ra cuan. Cua cuzii xaan iñi ñu, ta cua tasi ñu regalo sii amigo ñu vaty i sihi uu tahan ra saha sa ndaa cuan ta zayanga xaan ra sii ñu.

¹¹Zoco cua yaha uñi quivi zazava, ta ziqui cua zanandoto ra Ndyoo sii ra, ta cua nduvita ra inga saha. Ta tandihi ñiyivi ndyehe, cua yuhu xaan ñu.

¹²Ta ziqui sa uu tahan ra saha sa ndaa, cua cuiñi ra minoo nduzu saa xaan sa quita andivi, ta cua catyi si sihin ra: Ñaha ndo. Ndaa ndo ihya. Catyi si. Ta cua ndaa ra ndya andivi sisi minoo vico, ta cua ndyehe ra xaan iñi sii ra cuhva cuan.

¹³Ta zuun ñi caa cuhva cuan i taan minoo sa ñihi xaan, ta i nacoyo xaan vehe minoo parte ñuu cuan, ta i sihi usa tahan mil ñiyivi sa cuenda sa taan cuan. Ta ñiyivi sa nandoo i yuhu xaan ñu, ta i zacahnu ñu sii Ndyoo ra ndyaa andivi.

¹⁴Tacuan cua cuu sa cu uu tundoho, ta sa yaty i cua coo tucu sa cu uñi tundoho.

Tivi ángel sa cu usa cuan cutu ra

¹⁵Tacuan ta ziqui i tivi ángel sa cu usa cuan cutu ra, ta ziqui saa xaan i quisaha cahan ñiyivi sisi gloria, ta i catyi ñu: Vityi cua cundyaca ñaha ra Ndyoo ta ra Cristo sii tandihi sa i sindyaca ñaha ñiyivi. Ta cua cundyaca ñaha ra tandihi cuii maa tyiemvu.

¹⁶Ta sa oco cumi tahan ra sahnu, ra ndyaa nu tyayu ityi nuu ra Ndyoo, i sicava ndyayu ra, ta i zacahnu ra sii ra Ndyoo.

¹⁷Tyehen i catyi ra:

Nacuhva ndi tyahvi ndyoo suun,
Ndyoo ra ndyaca ñaha, ra iyo tandihi cuii cuhva sii.

Moo cuu ra sa iyo nu quisaha si,
ta ndito moo vityi,

Ta cua cunditon tandihi cuii tyiemvu.

Nacuhva ndi tyahvi ndyoo suun
vatyi cahnu xaan cuhva iyo suun,

Ta vityi sa quisaha cundyaca ñaha moo sii tandihi.

¹⁸I cuxaan xaan ñiyivi ñuu ñiyivi
sihin moo, zoco vityi sa saa quivi
cua cuxoon sihin maa ñu.

Vityi sa saa si quivi cua tyicuhvon
sii ñiyivi i sihi, Zoco cua cuhvon
sa vaha sii ra cu profeton ta sii ra cu muzun,

Ta cua cuhvon sa vaha sii tandihi
ñiyivi cuñi xaan suun ta sii ñu yuhu
suun vazú cahnu ñu a vazú luhlu ñu.

Ta sa saa si cuhva cua zanaa moo
sii ñiyivi i zativí ñuu ñiyivi.

¹⁹Tacuan i catyi tandihi ra sahnu
ndyaca ñaha ta ziqui i nuña yuvehe
vehe maa ra Ndyoo sa iyo andivi,
ta sisi vehe ra i ndyehi minoo satu
sa cuenda tyiño sahnu i zandaa ra
Ndyoo. Ta i sicoo xaan tasa zavi ta
nduzu ñihi, ta cahan zavi. Ta i taan,
ta i coon xaan yuu zavi.

**Cuhva i zavaha minoo
dragón sihin minoo ñaha**

12 Tacuan i cuu si, ta ziqui i
sicoo minoo sa iyo cahnu

xaan andivi. I ndyehi sii minoo ñaha,
ta zahma ña cuu ñicandyi ta sañi ña
nu yoo. Iñi usi uu tahan tiño xañi ña,
ta cuu si corona ña.

²Ñoho zehe ña, ta sacú saa ña.
Uhvi sisi ña vatyi sa cuñi cacú si.

³Ta ziqui i quituu tucu inga sa iyo
andivi. I ndyehi sii minoo dragón
cahnu. Cuaha ti, ta iyo iñu tahan
xiñi ti. Usi tahan ndiqui ti. Ta ñoho
minoo corona tahan tahan xiñi ti.

⁴I xita cañoho ti sa yatyi zava
tiño andivi sihin zuhma ti, ta i cañi
ti sii ti nu ñuhu ñuu ñiyivi. Ta ziqui
i sicuñi ndyaa ti ityi nuu ñaha sa
cuñi cacú zehe vatyi cua casi ti sii
zehe ña tatu sa cacú si.

⁵Ta i zacacu ña sii zehe ña, ta
rayi cuu ra, ta ityi nuu ca ñihi
xaan cua cundyaca ñaha ra sii
tandihi ñiyivi ñuu ñiyivi. Ta i
quihin ra Ndyoo sii zehe ña, ta i
sindyaca ra sii ra ndya nu ndyaa
maa ra.

⁶Ta ziqui i sino ñaha cuan, ta i
ndihvi ña sisi cuhu minoo nu sa i
zanduvaha maa ra Ndyoo cuenda
ña vatyi yucuan cua casi ña mil uu
ziendu uñi xico quivi.

⁷Ta ziqui i sicoo minoo cuatyí
andivi. Minoo ángel cahnu, ra sa
nañi Miguel sihin ángel sa ndyaca
ñaha ra, i sañi tahan ra sihin
dragón cuan ta sihin ángel ndihi
sihin ra dragón cuan.

⁸Ta ñá cuu zahacanaa dragón
cuan. Yucuan cuenda ñá cuu ca
ndoo quití cuan andivi.

⁹I tava ra Ndyoo sii ra andivi, ta
i quisi ra ñuu ñiyivi sihin ángel sa
sino iñi sii ra vatyi i tava tucu ra
Ndyoo sii tandihi ra cuan. Ta ra
dragón cuan, zuun ñi ra cuu coo ta

sa naha, ta nañi ra cuihna, ta nañi ra Satanás, ta zandavi ñaha ra sii tandihi cuii ñiyivi ñuu ñiyivi.

¹⁰Ta ziqui i siñi vatyí saa xaan cahan minoo ra andivi, ta catyi ra: Vityi sa saa cuhva zacacu ra Ndyoo sii ñiyivi. Vityi iyo xaan cuhva sii ra, ta ndyaca ñaha xaan ra, ta tacuan tucu ra Cristo vatyí saha xaan ra Ndyoo cuhva sii ra. Tacuan cuu si vityi vatyí i tava ra Ndyoo sii cuihna, ta maa cuihna cuu ra sahan ityi nuu ra Ndyoo ta tyaa ra cuatyí sata ñu sino iñi ndiyiaca ta ñiyaca.

¹¹Zoco i zahacanaa ñiyivi sino iñi sii ra Ndyoo sii cuihna vatyí i sati ra cu Mvee Ticatyí ra Ndyoo niñi ra. Ta i zahacanaa tucu ñu sii ra vatyí i nacatyí ñu sihin ñiyivi cuhva i sino iñi ñu sii ra Ndyoo, ta ná yuhu ñu sa cuu ñu cuenda ra.

¹²Yucuan cuenda cuzii xaan iñi ndo, ndoho sa iyo andivi, zoco ndahvi ndoho sa iyo ñuu ñiyivi ta ndoho sa iyo tyañuhu vatyí sa i noo cuihna ndya nu ndyaa ndo. Ta cuxaan xaan ra vatyí sito ra vatyí ñahñi ca quivi ra.

¹³Ta cuhva sa ndyehe ra dragón cuan vatyí i zavita ra Ndyoo sii ra ndya ñuu ñiyivi ya, ta ziqui i quisaha zayanga ra sii ñaha sa i zacacu sii lee cuan.

¹⁴Ta i saha ra Ndyoo uu tahan ndisi sii ñaha cuan tañi sa iyo sii minoo tazu cahnu. Yucuan cuenda i cuu ndava ña, ta i quihvi ña sisi cuhu nu cua ñiñi ña sa casi ña uñi cuiya zazava, ta ma nañiñi coo cuan sii ña.

¹⁵Zoco coo cuan, i tava ti cuaha xaan ndutyá yuhu ti, ta i nduu si

tañi minoo yuu, ta cua zatyañi si sii ñaha cuan.

¹⁶Zoco i tyindyee ñuhu sii ña vatyí i ndata ñuhu, ta i quihvi ndutyá sa i tava coo cuan sihin yuhu ti.

¹⁷Ta ziqui i cuxaan xaan coo cuan sihin ñaha cuan, ta yucuan cuenda i quita ti ta cuahan ti vatyí cua cahñi tahan ti sihin tandihi inga ñiyivi sa cuu zehe ñaha cuan. Maa ñu cuu ñiyivi sa zavaha cuhva catyi ra Ndyoo. Ta ndyico ñu sii sa ndisa sa i zañaha ra Jesucristo.

Uu tahan quití quiñi caa

13 I sicuñi ndyei nu ñiyiti yuhu tyañuhu, ta i ndyehi vatyí minoo quití quiñi caa i quita sisi tyañuhu. Usa tahan xiñi ti, ta usi tahan ndiqui ti. Tahan tahan ndiqui ti ñoho minoo corona. Ta tahan tahan xiñi ti ndyizo si minoo tuhun quiñi.

²Quití sa i ndyehi, caa ti tañi caa minoo cuiñi. Zoco saha ti caa tañi saha oso, ta yuhu ti cuu tañi yuhu ndicaha. Ra dragón saha cuhva maa ra sii ti. Saha ra sa cundyaca ñaha ti, ta sa coo xaan cuhva sii ti.

³Minoo xiñi quití cuan, ndyehi vatyí sa ñicuehe si, ta yucuan cuenda cuñi cuu ti. Zoco i nduvaha ti nu ñicuehe ti, ta iyo xaan i cuñi tandihi ñiyivi ñuu ñiyivi, ta i sindyico ñu sii quití quiñi caa cuan cuhva i ndyehi.

⁴Cua zacahnu ñu sii ra dragón vatyí saha xaan ra cuhva sii quití cuan, ta cua zacahnu tucu ñu sii quití cuan, ta catyi ñu: Yoñi sa iyo cuhva sii tañi iyo cuhva sii quití

ya. Tatu cahñi tahan ñiyivi sihin ti, zoco ma zahacanaa ñu sii ti.

⁵Saha dragón cuan vatyi zacahnu quití cuan zuun ñi sii maa ti sihin cuhva cahan ti, ta cua cahan ti ndya vaha ñi sii ra Ndyoo. Ta uu xico uu yoo cua cundyaca ñaha ti.

⁶Ta quiñi xaan cua cahan ti sii ra Ndyoo, ta cua cahan ti ndya vaha ñi sii zivi ra Ndyoo ta cuenda nu ndyaa ra Ndyoo ta cuenda tandihi ñu sa iyo andivi.

⁷Ta cua ñihi ti cuhva cahñi tahan ti sihin ñiyivi ñoho cuenda ra Ndyoo, ta cua zahacanaa ti. Ta cua ñihi ti cuhva cundyaca ñaha ti sii tandihi ñiyivi ñuu ñiyivi vazu ziin ziin tata ñu ta ziin ziin zahan cahan ñu ta ziin ziin ñuu ñu.

⁸Ta ra cu Mvee Ticatyi ra Ndyoo, cueue ca sa sino ñuu ñiyivi ta sa tyaa ra Ndyoo cuhva vatyi cua cuu ra, ta cumi ra minoo libro ndyaa zivi ñiyivi cua cacu. Ta tandihi ñiyivi ñuu ñiyivi tatu ña ndyaa zivi ñu nu libro cuan, cua zacahnu ñu sii quití quiñi caa cuan.

⁹Tatu ndyaa zoho ndo, tyizoho ndo sa quehin.

¹⁰Tatu cua tiin ñiyivi sii ndo ta tyihi ñu sii ndo vehe caa, cueue ca cua quihi ndazi tucu maa ñu cua zacuu ra Ndyoo. Ta ra cua cahñi sii ndo sihin mityi, cua cuu tucu maa ra sihin mityi. Yucuan cuenda cundyee xaan iñi ndo, ta cunii xaan iñi ndo sii ra Ndyoo.

¹¹Yaha cuan ta ziqui i ndyehi vatyi quita inga quití quiñi caa sisi ñuhu. Ndyaa ndiqui ti tañi ndiqui mvee ticatyi, zoco cahan ti tañi cahan minoo dragón.

¹²Iyo tandihi cuii cuhva sii ti tañi iyo sii inga quití sa quisi sa xihna ñi,

ta yucuan cuenda zañiñi ti sii ñiyivi ñuu ñiyivi vatyi zacahnu ñu sii inga quití sa xihna ñi cuan. Maa ti cuu quití yaha xaan iñi cuehe xiñi, zoco i nduvaha ti, ta ñá sihi ti.

¹³Ta quití sa quita sisi ñuhu cuan, i zavaha xaan ti sa ndyityi nahnu ndya cuhva cuu sii ti zacoon ti ñúhu sa quita andivi nu ñuhu ñuu ñiyivi. Ta i ndyehi ñiyivi cuhva zavaha ti.

¹⁴Ta sihin sa ndyityi sa cuu zavaha ti ityi nuu quití sa xihna ñi cuan, cua zandavi ñaha ti sii ñiyivi ñuu ñiyivi ta ziqui cua catyi ti sihin ñu vatyi nazavaha ñu minoo ndyoo yutu cuhva caa inga quití cuan. Maa ti cuu quití ñicuehe xiñi sihin mityi, zoco ñá sihi ti.

¹⁵Ta cua ñihi quití cu uu cuan cuhva ta cua cuhva ti sa cundito sa i zavaha ñiyivi cuhva caa quití sa xihna ñi cuan. Ta cua cuu cahan si, ta cua catyi si vatyi cua cahñi ñiyivi sii tandihi ñiyivi ña zacahnu sii si.

¹⁶Ta cua tava tucu si tyiño vatyi cua cundyaa minoo marca sii tandihi ñiyivi a siyo ndaha cuaha ñu a yiqui nuu ñu. Cua ñihi tandihi ñiyivi marca cuan vazu cahnu ñu a luhlu ñu a cuca ñu a ndahvi ñu ta vazu muzu cuu ñu ta vazu yivi.

¹⁷Ta yoñi cua cuu zata ta yoñi cua cuu xico tatu ña ndyaa marca cuan sii ñu a ndyaa zivi quití cuan sii ñu a minoo número sa cuenda zivi ti.

¹⁸Ihya cuñi si sa coo xaan sa siñi tuñi sii yo. Yoo ndoho iyo xaan sa siñi tuñi sii, nacañi iñi ndo sa cuenda número sii quití cuan vatyi número sii minoo rayi cuu si. Iñu ziendu uñi xico iñu cuu número cuan.

**Cuhva i sata ñiyivi cuu
cuenda ra Ndyoo yaa**

14 Tacuan ta ziqui i ndyehi vatyí nandyaa ra cu Mvee Ticatyí ra Ndyoo xiñi yucu Sión. Ta sihin ra ndíhi ziendu uu xico cumi mil tahan ñiyivi. Maa ñi ñiyivi sa ndyaa zivi ra cu Mvee Ticatyí ta zivi Zutu ra yiqui nuu ñu.

²Ta ziqui i siñi minoo nduzu sa quita andivi. Cuu si tañi nduzu sa cucayu cuaha xaan yuu ta tañi nduzu iyo tatu ñihi xaan cahan zavi. Ta siñi nduzu sa zavacu ñiyivi arpa.

³Ta sata ñiyivi minoo yaa saa ityi nuu ra ndyaa nu tyayu cahnu ta nuu sa cumi tahan quiti sa yucu sihin ra ta nuu ra sahnu ndyaca ñaha, ndíhi ca. Ta yoñi ca cuu cutuhva yaa cuan, maa ñi sa ziendu uu xico cumi mil tahan ñiyivi sa i cacu nu yucu ñiyivi ñuu ñiyivi sito sii si.

⁴Maa ñu cuu ñu sa ñá zavaha ndya vaha ñi. Ná quixi zana rayii sihin ndya vaha ñi ñaha. Ñahñi maa cuatyí zavaha ñu caña ñi. Ta ndyico ñu sii ra cu Mvee Ticatyí vazú ndyaca maa cuahan ra. Cacú ñu nu yucu ñiyivi ñuu ñiyivi, ta cuu ñu tañi sa xihna cuí ñi ofrenda cua ñihi ra Ndyoo ta ra cu Mvee Ticatyí.

⁵Yoñi cuu catyi vatyí vatyá ñu vatyí ña tuhva ñu cahan cuendu. Ta ñahñi maa cuatyí ñu iyo ityi nuu ra Ndyoo.

Tyiño i zacoto uñi tahan ángel

⁶Tacuan i cuu si ta ziqui i ndyehi vatyí ndava minoo ángel ta cuahan ra zava mahñu andivi sa quisi catyi ra Tuhun Ndyoo sa ma cunaa, ta

nacatyí ra yozo caa cua zacacu ra Ndyoo sii ñiyivi. I zacoto ra tuhun cuan sii ñiyivi iyo ñuu ñiyivi, sii ñiyivi ziin ziin nación ta ziin ziin ñuu ta ziin ziin tata. Ta sii ñiyivi cahan zahan ta sii ñiyivi cahan tyehen ñi.

⁷Saa xaan i cahan ra, ta i catyi ra: Nayuhu ndo sii ra Ndyoo, ta zacahnu ndo sii ra vatyí sa saa cuhva cua tyicuhva ra sii ñiyivi. Zacahnu ndo sii ra i zavaha andivi ta ñuu ñiyivi ta tyañuhu ta tandíhi zoco ndutya.

⁸Ta i sindyico inga ángel sii ángel sa xihna ñi cuan, ta catyi ra: Sa tiví ñuu cahnu Babilonia vatyí i zativi ñiyivi ñuu cuan sii tandíhi ñuu ñiyivi sihin tandíhi cuatyí sa quiñi xaan i zavaha ñu.

⁹Tacuan i catyi ángel cu uu cuan, ta i sindyico inga ángel sii ra, ta saa xaan cahan tucu ra ta catyi ra: Yoo ñiyivi cua zacahnu sii quiti cuan a sii sa zavaha ñiyivi cuhva caa tí, a tatu saha ñiyivi sa cundyaa marca tí yiqui nuu ñu a ndaha ñu.

¹⁰Cuaha xaan cuaha xaan tundoho cua ndyehe ñu zavaha cuhva cuan vatyí cua zandoho ra Ndyoo sii ñu. Sa cuxaan xaan ra vityí, ta cua tasi tuñi ra sii ñiyivi zavaha cuhva cuan ityi nuu ángel ra ta ityi nuu ra cu Mvee Ticatyí vatyí cua tyihi ra sii ñu nu cayu núhu sihin azufre.

¹¹Ñiyivi zacahnu sii quiti cuan a sii sa zavaha ñiyivi cuhva caa tí, a tatu saha ñu cundyaa marca a zivi tí sii ñu, cua cayu ñu. Cua cayu ñu ñiyaca ta ndyiyaca, ta cua ndaa ñuhma ñu tandíhi cuí tyiemvu.

¹²Yucuan cuenda cuñi si vatyí ñiyivi cuenda ra Ndyoo, yoo ñu

tyaa yahvi sa cahan ra ta sino xaan iñi ñu sii ra Jesucristo, cuñi si vatyi nacundyee xaan iñi ñu. Catyi ángel cuan.

¹³Ta ziqui i siñi minoo nduzu sa quita andivi, ta catyi si sihin: “Vityi ta ityi nuu ca zii xaan cuu sii ñiyivi sino iñi sii ra ndyaca ñaha sii yo cuae ca sa cuu ñu. Avi, catyi Tatyí Ii ra Ndyoo vatyi cua quitatu ñu sihin tyiño ñu, ta sa vaha sa i zavaha ñu cua cuhun si gloria sihin ñu.”

**Cuhva cua tasi tuñi ra
Ndyoo sii ñiyivi**

¹⁴Tacuan ta ziqui i nandyehi, ta i ndyehi minoo vico cuisí, ta nuu si ndyaa minoo ra caa tañi caa ra i quisi ndya gloria. Ñoho minoo corona xuhun cuaan xiñi ra, ta ndaha ra minoo mityi cutya, xaan xaan si.

¹⁵Ta i quita inga ángel ndya nu ndyaa ra Ndyoo, ta i cana saa ra ta cahan ra sihin ra ndyaa nu vico cuan, ta i catyi ra: Sa saa si cuhva nacuhun ndaha tyiñon vatyi sa sityi xaan sa iyo ñuu ñiyivi. Cahndyon sii si ta nacuhun. Catyi ra.

¹⁶Ta ziqui ra ndyaa nu vico cuan i zayaha ra mityi ra nuu ñuu ñiyivi, ta i naquihin ra ndaha tyiño ra.

¹⁷Yaha cuan ta ziqui i quita inga ángel ndya nu ndyaa ra Ndyoo andivi, ta ndyizo tucu maa ra minoo mityi cutya ta xaan xaan si.

¹⁸Ta i quita inga tucu ángel ndya nu ndyaa altar. Maa ra ndyizo tyiño nu cayu ñúhu nu altar. Ta i cana saa ra ta catyi ra sihin ra ndyizo mityi xaan cuan: Sa sityi xaan yucu vixi uva sa iyo ñuu ñiyivi. Yucuan cuenda cahndyon sii si.

¹⁹Ta ziqui i zayaha ángel cuan mityi ra nu ñuu ñiyivi ta sahndya ra yucu vixi uva sa iyo ñuu ñiyivi, ta i tyihi ra sii si nu cua quita ndutya si vatyi yucuan cuu nu cua cuxaan xaan ra Ndyoo sihin ñiyivi.

²⁰Sata ñuu cuu nu i sañi ra yucu vixi uva cuan. Ta cuaha xaan niñi si i quita nu i sañi ra sii si. Yaha xaan cuaha niñi i quita. Cono xaan i nduu si. I ndaa si, ta saa si ndya freno caballo sa zucu. Ta i saa si uñi ziendu kilómetro nu ñuhu cuhva i sino si.

**Cua coo inga usa tahan
tundoho, ta ziqui cua ndihi si**

15 Tacuan ta ziqui i ndyehi inga sa iyo cahnu xaan andivi, ta i zayuhu xaan si sii. I ndyehi usa tahan ángel, ta iyo cuhva sii ra sa zaquisi ra usa tahan ca tundoho. Sihin ihya tundoho cua ndihi si vatyi cua ndihi sa cuxaan ra Ndyoo sihin ñiyivi.

²Ta i ndyehi minoo sa caa tañi caa tyañuhu. Xiño si tañi ino, ta zaca ñúhu sihin ndutya cuan. Ta nandyaa ñiyivi yuhu tyañuhu cuan. Ndaha ñu arpa sa saha ra Ndyoo sii ñu. Maa ñu cuu ñu i zahacanaa sii quití quiñi caa cuan ta sii sa i zavaha ñiyivi cuhva caa ti ta sii número sa cuu cuenda zivi ti.

³Sata ñiyivi cuan yaa ra Moisés muzu ra Ndyoo ta yaa ra cu Mvee Ticatyi. Tyehen catyi ñu:

Cahnu xaan ta iyo xaan cuu tandihi sa i zavohon, yoho Ndyoo, vatyi iyo tandihi cuii cuhva suun;
Ndoo xaan ta ndisa xaan cuu cuhva zavohon,

Ta rey cuun sii tandihi ñiyivi
ñuu ñiyivi.

⁴Yoñi ñiyivi iyo sa ma yuhu suun
ta ma zacahnu ñu zivun
Vatyí maa tuhun ñi moo cuu ra
ii.

Ta cua quisi tandihi ñiyivi ñuu
ñiyivi ta cua zacahnu ñu suun
Vatyí sa ndyehe ñu cuhva ndoo
xaan zavohon.

⁵Yaha cuan ta ziqui i ndyehi
vatyi i nuña minoo nu ii xaan ca
sisi gloria nu ñoho yuu sa ndyaa ley
maa ra Ndyoo.

⁶Sisi vehe cuan i quita sa usa
tahan ángel sa ndyizo sa usa tahan
tundoho cuan. Ñoho ra zahma
vaha xaan. Cuisi xaan zahma ra, ta
xiño xaan si. Ta nuhñi yoho xuhun
cuaan yiqui ndyica ra.

⁷Minoo sa cumi tahan quiti sa
yucu vatyi ñi sihin ra Ndyoo i saha
ti minoo coho xuhun cuaan sii sa
minoo minoo sa usa tahan ángel
cuan. Sisi coho cuan ñoho cuhva
cuxaan xaan maa ra Ndyoo, ra
ndito tandihi cuii maa tyiemvu.

⁸Ta i situ cuii nu ndyaa ra Ndyoo
sihin ñuhma vatyi minoo ra cahnu
xaan cuu maa ra Ndyoo, ta iyo
tandihi cuii cuhva sii ra. Ta yoñi
i cuu quihvi nu ndyaa ra ndya sa
i yaha sicoo tandihi sa usa tahan
tundoho sa ndyizo sa usa tahan
ángel cuan.

Tundoho sa cua zaquisi sa usa tahan ángel cuan

16 Tacuan ta ziqui i siñi vatyi
saa xaan i cahan minoo ra
ñoho nu ndyaa ra Ndyoo, ta i catyi
ra sihin sa usa tahan ángel cuan:
Cuahan ndo ta coyo ndo sa ñoho

sisi coho sa ndyizo ndo ziqui ñuu
ñiyivi vatyi sa cuxaan xaan maa ra
Ndyoo.

²Ta cuahan ángel sa xihna ñi
cuan, ta i sicoyo ra sa ñoho sisi
coho ra ziqui ñuu ñiyivi, ta tandihi
ñiyivi sa ndyizo marca quiti cuan
ta zacahnu ñu sii sa i zavaha ñiyivi
cuhva caa ti, i quita ityi sii ñu.
Nahnu xaan si, ta uhu xaan si.

³Ta ángel sa cu uu cuan i sicoyo
ra sa ñoho sisi coho ra nu tyañuhu,
ta i nduu si niñi tañi niñi cuxi
caa sa quita sii minoo ra tatu sa i
sihi ra. Ta tandihi quiti ndito sisi
tyañuhu, i sihi ti.

⁴Ta sa cu uñi ángel cuan i sicoyo
ra sa ñoho sisi coho ra nu tandihi
yuu, ta nu tandihi zoco ndutya, ta i
nduu si niñi.

⁵Ta ziqui i siñi vatyi ángel ra
ndyizo tyiño sa cuenda ndutya i
catyi ra: Ndoon xaan cuun vatyi
tacuan tasi tuñun, yoho ra ndyaca
ñaha. Ii xaan cuun ta tandihi cuii
tyiemvu iyo moo.

⁶Ndoon xaan cuhva zavohon vatyi
ñiyivi ñuu ñiyivi i sati ñu niñi
ñiyivi cuñi xaan suun ta niñi ra
profeta. Ta vityi cua coho ñiyivi ña
vaha ña ndutya niñi vatyi tacuan
tahan si sii ñu.

⁷Ta i siñi vatyi cahan inga ra
ñoho nu ndyaa altar, ta catyi ra:
Ndisa, yoho ra ndyaca ñaha. Ra
Ndyoo sa iyo tandihi cuii cuhva cuu
suun, ta vaha xaan ta ndoon xaan
tasi tuñun.

⁸Tacuan ta ángel sa cu cumi
cuan i sicoyo ra sa ñoho sisi coho
ra nu ñicandyi, ta i ñihi ñicandyi
cuan cuhva ñihi ca cua cahmi si sii
ñiyivi.

⁹Ta yaha xaan i ndiyi tandihi ñiyivi, zoco ñá zama ñu cuhva zacuu ñu. Ta ñá ndu-uu iñi ñu cuatyí ñu, ta ñá zacahnu ñu sii ra Ndyoo sino ca i cahan ñu ndya vaha ñi sii ra vatyí maa ra i tasi tundoho cuan.

¹⁰Ta ángel cu ohon cuan i sicoyo ra sa ñoho sisi coho ra nu ndyaca ñaha quiti cuan, ta i nduñaa xaan nacahnu nu ndyaca ñaha ti. Ta i sacu xaan ñiyivi vatyí ña cundyee iñi ñu tandihi sa uhu ñu.

¹¹Zoco i cahan ñu ndya vaha ñi sii ra Ndyoo ra ndyaa andivi vatyí uhu xaan ñu ta cahvi xaan ñu, zoco ñá ndu-uu iñi ñu cuatyí ñu.

¹²Ta ángel cu iñu cuan i sicoyo ra sa ñoho sisi coho ra nu yuu cahnu sa nañi Eufrates, ta i ndoco yuu cuan vatyí tacuan ta cua cuu yaha tandihi ra rey, ra ndyaca ñaha ityi caña ñicandyi.

¹³Tacuan i cuu si, ta ziqui i ndyehi vatyí i quita tatyí cuihna yuhu dragón cuan ta yuhu inga quiti cuan ta yuhu minoo ra i catyí vatyí cahan ra sa cuenda ra Ndyoo zoco yivi. Ta caa tatyí cuihna cuan tañi caa zahva izu.

¹⁴Ta yucuan cuu tatyí cuihna sa cuu zavaha sa ndyityi, ta cuahan si cua zandu-iin si sii tandihi ra cu rey ra ndyaca ñaha ra iyo nacahnu ñuu ñiyivi vatyí cua cañi tahan ra quivi tahan si sihin ra Ndyoo ra iyo tandihi cuu cuhva sii.

¹⁵Ta i catyí ra Ndyoo: Zaha ndo cuenda vatyí zana ñi iñi ndo ta cua quisi tañi quisi minoo ra zuhu cuhva sa ña sica iñi ñiyivi. Zii xaan cua cuu sii ñiyivi ndatu sii, ta ndyaa listo ñu, ta ñahñi sa cumañi

sii ñu. Zoco ñu ña ndyaa listo, cua cucahan xaan nuu ñu. Catyí ra.

¹⁶Ta cua titahan tandihi ra cu rey sihin tandihi zandaru ra minoo nu nañi si Armagedón sihin zahan hebreo.

¹⁷Ta ángel cu usa cuan i sicoyo ra sa ñoho sisi coho ra nu tatyí. Ta saa xaan i quita nduzu cahan minoo ra ñoho nu ndyaa tyayu ra Ndyoo. Ta catyí ra ndyaa nu tyayu cuan: Sa cuu vityí. Catyí ra.

¹⁸Tacuan ta ziqui i sicoo tasa zavi ta nduzu ñihi, ta i sicoo xaan nduzu zavi, ta i sicoo minoo sa taan ñihi xaan ca ta ziqui tandihi sa taan sa iyo cuhva ndya quisaha ñuu ñiyivi.

¹⁹Sihin sa taan i ndata ñuu cahnu cuan. Uñi cuhva i ndata si. Ta i tani xaan vehe tandihi inga ñuu sa iyo ñuu ñiyivi. Sihin cuhva cuan i nacohon iñi ra Ndyoo sii ñuu cahnu Babilonia cuan cuhva quiñi xaan zavaha ñiyivi ñuu cuan, ta i zandoho xaan ra sii ñu vatyí sa cuxaan xaan ra sihin ñu.

²⁰Ta i naa tandihi ñuhu sa iyo sisi tyañuhu sihin sa taan, ta i nduva tandihi yucu.

²¹Nahnu xaan yuu zavi i coon ziqui ñiyivi. Ta iyo si vee si uu xico kilo. I cuxaan xaan ñiyivi sihin ra Ndyoo sa cuenda tundoho i zacuu yuu zavi cuan vatyí cahnu xaan tundoho i saha si, ta i cahan ñu ndya vaha ñi sii ra Ndyoo.

Cuhva cua tyicuhva ra Ndyoo sii minoo ñaha ziqui

17 Ta ziqui i quisi minoo sa usa tahan ángel sa ndyizo sa usa tahan coho cuan, ta i cahan ra sihin, ta catyí ra: Ñaha ihya.

Cua zañehi suun cuhva cua tahan minoo ñaha zii ñni, ñaha sa ndyaa nuu tandihi tyañuhu.

²I zavaha ra rey ra ndyaca ñaha ñuu ñiyivi cuatyí sihin ña. Ta ñiyivi ñuu ñiyivi, yaha xaan i tiví ñu sa cuenda sa ña vaha sa zavaha ña. Catyi ra.

³Ta ziquí sihin cuhva i zandyehe Tatyí li ra Ndyoo sii, ta i sindyaca ángel cuan sii sisi cuhu, ta yucuan i ndyehi sii minoo ñaha. Yozo ña ziquí minoo quití cuaha. Usa tahan xiñi tí, ta usi tahan ndiquí tí. Ta ñni xaan tí tuhun quiñi, tuhun cahan ndya vaha ñi sii ra Ndyoo.

⁴Noho ñaha cuan zahma tyacu tixinda ta tyacu cuaha, ta yaha xaan i cucutu ña sihin ndaha tyiño xuhun cuaan ta yuu vaha ta perla. Ndaha ña minoo coho xuhun cuaan situ cuii si sihin tandihi nuu sa ña vaha vatyí cuaha xaan sa ndya vaha ñi zavaha ña.

⁵Yiquí nuu ña ndyaa minoo zivi, zoco ña sito ñiyivi ñaa zivi cuu si, ta catyi si: “Ihya ñaha cuu ñuu Babilonia cahnu, maa ña cuu zihí tandihi ñu zii ñni ta sii tandihi sa ña vaha sa iyo ñuu ñiyivi.”

⁶Ta ziquí i ndyehi vatyí siñi ñaha cuan vatyí i sihi ña ñniñi ñiyivi cuñi xaan sii ra Ndyoo ta ñiyivi i sihi sa cuenda ra Jesús, ta i yuhu xein.

⁷Ta ziquí i catyi ángel cuan sihin: ¿Ñacu yuhu xoon? Cua zacote suun yoo ña cuu ña ya ta ñaa sa cuñi si catyi si sa cuenda quití sa iyo usa tahan xiñi ta usi tahan ndiquí ta ndyizo tí sii ña.

⁸Quití sa i ndyehun ihya, i sindito tí, zoco ña ndito ca tí, zoco cua quita tí sisi yavi cono ñu ñoho

ñiyivi i zavaha ndya vaha ñi, ta cua cuhun tí nu cua cuu ndihi tí. Ta ñiyivi ñuu ñiyivi tatu ña ndyaa zivi ñu nu libro i zavaha ra Ndyoo ndya ta cumañi ca sino ñuu ñiyivi, libro sa catyi yoo cuu ñiyivi cua cundito tandihi cuii tyiemvu, tatu ña ndyaa zivi ñu nuu libro cuan, iyo xaan cua cuñi maa ñu ndyehi ñu sii quití sa sicoo ta i sihi tí, zoco cua naquita tucu tí inga saha.

⁹Ta ihya cuu minoo sa cuu coto ñiyivi tatu cuu cutuñi ñni ñu sii si. Sa usa tahan xiñi tí cuu usa tahan yucu nu ndyaa ñaha cuan.

¹⁰Ta iyo tucu usa tahan rey. Ohon tahan ra sa i ndoyo ñuhu ra, ta minoo ra ndyaca ñaha vityí. Ta rey sa cu usa cuan cumañi ca quisi ra. Cua quisi ra, zoco zuhva ñi quivi cua cundyaca ñaha ra.

¹¹Ta sa cu uña tahan rey cuu quití sa i sicoo ta i sihi tí, ta zuun ñi ra i cuu tucu rey sa cu usa cuan, ta cua cuhun ra nu cua naa ra.

¹²I ndyehun vatyí iyo usi tahan ndiquí quití cuan. Sa usi tahan ndiquí tí cuu usi tahan rey. Tañaha ca cundyaca ñaha ra. Cua cundyaca ñaha sa usi tahan rey cuan zuhva ñi quivi ñni ñi sihin quití cuan.

¹³Ñn xaan cua cuu sa usi tahan rey cuan, ta cua cuhva ra tandihi cuhva iyo sii ra sii quití cuan. Cua cuhva ra sa cundyaca ñaha quití cuan sii sa ndyaca ñaha maa ra.

¹⁴Cua cahñi tahan tandihi ra sihin ra cu Mvee Ticatyi, ta cua zahacanaa ra cu Mvee Ticatyi sii tandihi ra cuan vatyí ra cu Mvee Ticatyi, ra ndyaca ñaha cuu ra sii tandihi inga ra ndyaca ñaha ta rey sii tandihi inga rey. Ta ñiyivi sa

cuu cuenda ra cu Mvee Ticatyi, ra i casi ra Ndyoo cuu sii ra, ta i cana ra sii ra, ta ma ndu-uu iñi ra ta ma zandoo ra sii ra Ndyoo.

¹⁵Tacuan i catyi ángel cuan, ta i catyi tucu ra sihin: I ndyehun vatyí ndyaa ñaha zii iñi cuan nuu tandihi tyañuhu. Tyañuhu cuan cuu tañi ñuu sa iyo ñuu ñiyivi, ta tañi ñiyivi ziiñ ziiñ nación ta ñiyivi cahan ziiñ ziiñ zahan ta ziiñ ziiñ tyehen ñi.

¹⁶Ta sa usi tahan ndiqui sa ndyehun xiñi quiti cuan cuu rey sa cua cuxaan xaan sihin ñaha zii iñi cuan, ta ñaha cuan cuu tañi minoo ñuu, ta cua zanaa ra cu rey cuan sii si sihin tandihi sa iyo sii si. Cua cahñi ra sii ñiyivi, ta cua cahmi ra ñuu cuan.

¹⁷Tacuan cua zavaha ra vatyí maa ra Ndyoo saha minoo sa siñi tuñi sii ra, ta cua zavaha ra cuhva cuñi maa ra Ndyoo cuhva cuan vazú ña sito ra. Yucuan cuenda cua cu-iin ra ta cua cuhva ra tandihi cuhva iyo sii maa ra sii quiti cuan ndya quivi cua cuu tandihi cuii tyiño cuhva i catyi maa ra Ndyoo.

¹⁸Ta ñaha sa sindyehun cuan cuu minoo ñuu cahnu sa ndyaca ñaha sii tandihi ra cu rey sa iyo ñuu ñiyivi.

Cuhva cua tiví ñuu Babilonia

18 Tacuan i cuu si, ta ziqui i ndyehi sii inga ángel. I quita ra andivi, ta noo ra ndya nu ñuhu. Cuaha xaan cuhva iyo sii ra, ta ndisi xaan nduu ñuu ñiyivi sihin sa ndisi maa ra.

²Ta i cana saa ra sihin minoo nduzu saa xaan, ta catyi ra: Sa i tiví ñuu cahnu Babilonia. Maa ñi

ca tatyí cuihna iyo ñuu cuan vatyí, maa ñi ca tandihi cuii nuu tatyí ña vaha ta tyasii ta inga zaa quiñi caa.

³Tacuan iyo ñuu cuan vatyí vatyí ñiyivi ñuu cuan i zatívi xaan sii ñiyivi ñuu ñiyivi, ta i zavaha ñu ndya vaha ñi. Ra rey ra ndyaca ñaha ñuu ñiyivi iin ñi cuhva ndya vaha ñi i zavaha ra sihin ñiyivi ñuu cuan. Ta ra xico ndaha tyiño, cua xaan nduu ra sa xico ra ndaha tyiño sii ñiyivi ñuu cuan vatyí zanaa xaan ñu xuhun ñu tandihi cuii cuhva.

⁴Tacuan i catyi ángel cuan, ta ziqui i siñi vatyí cahan inga ra andivi ta catyi ra: Quita ndo ñuu cuan, ndoho sa cuu ñiyivi sii. Ma zavaha ndo sa quiñi xaan tañi zavaha ñiyivi yucuan ta ndoho ndo tañi cua ndoho maa ñu.

⁵Cuaha xaan cua nduu cuatyí zavaha ñu ndya cuhva ndya sa saa si ndya andivi, ta ma naa iñi ra Ndyoo cuatyí zavaha ñu.

⁶Uu saha cua zandyehe ra tundoho sii ñu sa cuenda minoo minoo sa ña vaha i zavaha ñu. Uu saha cua nacuhva ra coho ñu sa xaan cuhva i zacoho tucu maa ñu sii ñiyivi.

⁷I zacahnu xaan ñu sii ñu, ta i cuzii xaan iñi ñu zavaha ñu tandihi cuii cuhva cuñi maa ñu. Yucuan cuenda nandyehe xaan maa ñu tundoho vatyí sica iñi ñiyivi ñuu cuan: “Ñuu ndi cuu tañi minoo ñaha ndyaca ñaha. Ña ndahvi ndi, ta ñahñi tucuihya iñi cua ndyehe ndi.”

⁸Sa cuenda cuhva zacahnu ñu sii ñu, ta minoo ñi quivi cua quisi xaan tundoho ziqui ñu. Cua cuu

ñu; cua nducuihya xaan iñi ñu; cua cuzoco ñu. Ta cua cayu ndihi ñuu cuan vatyí iyo xaan cuhva sii ra Ndyoo ra ndyaca ñaha sii yo, ta sa tyaa ra cuhva tasi tuñi ra sii ñuu cuan.

⁹Ra rey ra ndyaca ñaha ñuu ñiyivi, ra i zavaha ndya vaha ñi ñuu cuan, cua vacu xaan ra ta cua nducuihya xaan iñi ra quivi ndyehe ra vatyí cayu ñuu cuan vatyí i zavaha ra rey cuan ñaa ndihi sa cuñi maa ra iin ñi cuhva sihin ñiyivi ñuu cuan.

¹⁰Cua cuiñi ndyaa ra ndya zava vatyí yuhu ra tundoho cahnu xaan sa cua coo ñuu cuan, ta cua catyí ra: Ndahvi yoho ñuu cahnu Babilonia. Tañi tyehen ñi ta sa i zanaa ra Ndyoo suun.

¹¹Ra xico ndaha tyiño tucu, cua vacu xaan ra, ta cua nducuihya iñi ra sa cuenda sa cua tahan ñuu cuan vatyí yoñi ca zata ndaha tyiño ra

¹²tañi xuhun cuaan, xuhun cui, yuu vaha, perla, zahma yahvi xaan, zahma seda, ta zahma yuhva tixinda ta yuhva cuaha, ta tandihi nuu vitu vaha sa tyaqui sahan xico ta ndaha tyiño sino sihin noho nahnu uru yucu ta vitu vaha ta caa ta yuu.

¹³Yucuan i cuyahvi tucu yutu canela, ta yucu ta cutu ta perfume ta vino ta azetye ta yutyí pan vaha ta trigo, ta i cuyahvi tucu quití tañi quití ndyizo ndaha tyiño ta mvee ticatyí, ta caballo, ta carreta. Ta yucuan i cuyahvi tucu ñiyivi ndihi ca vatyí cua cuu ñu muzu ñiyivi.

¹⁴Ta ra xico ndaha tyiño, cua catyí ra sihin ñuu cuan: iÑa cumi con tandihi ndaha tyiño vaha xaan

sa tahan xaan iñun; sa ndaha cua naa tandihi cui sa cucon! Catyí ra.

¹⁵Ndya zava cua cuiñi ndyaa ra i nducuca sa xico xaan ra ndaha tyiño ra ñuu cuan. Ndya zava cua cuiñi ndyaa ra vatyí yuhu xaan ra ndyehe ra cuhva ndoho xaan ñuu cuan. Ta cua vacu saa xaan ra, ndya cuhva cana saa ñi ca ra, ta catyí ra:

¹⁶iNdahvi ñuu cahnu xaan cuan! Tañi minoo ñaha i cuu si vatyí ñiyivi ñuu cuan i siñoho ñu zahma vaha xaan, zahma yuhva tixinda ta zahma cuaha, ta i sityiño ñu ndaha tyiño xuhun cuaan ta yuu vaha ta perla.

¹⁷iTa tañi tyehen ñi cua naa tandihi cui sa cuca xaan ñu! Tandihi ra xu sii barco ta ra zacaca sii tu sihin ra zatyíño sihin tu, cua cuiñi ndyaa ra ndya zava.

¹⁸Ta cuhva sa ndyehe ra cuhva cayu ñuu cuan, cua catyí ra: Ñahñi inga ñuu iyo tañi ñuu cahnu ya. Cua catyí ra.

¹⁹Ta cua tyizo ra ñuhu xiñi ra vatyí nducuihya xaan iñi ra, ta cua vacu saa xaan ra ndya cuhva cana saa ñi ca ra, ta cua catyí ra: ¡Ay! iNdahvi ñuu cahnu cuan! Tandihi ñiyivi sa iyo barco, nducuca xaan ra ñuu cuan vatyí i zata xaan ñiyivi ndaha tyiño ra yucuan. Ta vityí, tañi tyehen ñi ta sa cua naa ñuu cuan. Tacuan cua catyí ra.

²⁰Zoco vityí cuziñ xaan iñi maa ndo ndoho sa yucu andivi ta ndoho ra apóstol ta ndoho ra profeta vatyí vityí tasi tuñi ra Ndyoo sii ñiyivi ñuu cuan sa cuenda sa ña vaha i zavaha ñu sihin maa ndo.

²¹Tacuan ta ziquí i ndyehi vatyí i cañihi minoo ángel sii minoo yuu.

Cahnu xaan yuu cuan tañi minoo yuu molino cahnu, ta i zavita ángel cuan sii si sisi tyañuhu, ta catyi ra: Zuun ñi cuhva ya cua zavita ra Ndyoo sii ñuu cahnu Babilonia. Ta yoñi cua ndyehe ca sii si.

²²Ñahñi ca yaa cua coo ñuu cuan vatyi yoñi ca cua zavacu ndyalin, ta yoñi ca cua tiví tiyoo a cutu. Yoñi ca cua zatyíño yucuan, ta yoñi ca cua ndyico nuñi.

²³Ñahñi ca ñúhu cua cayu ñuu cuan sa sa cuaa. Ta ma coo ca vico tindaha vatyi ra ñuu cuan cuca xaan ra, ta cahnu xaan i nduu ra sa xico ra ndaha tyiño ra nacahnu ñuu ñiyivi. Ta i zandavi ñaha xaan ñiyivi ñuu cuan sii tandihí ñiyivi ñuu ñiyivi (sihin sa ña vaha sa i zavaha ñu.)

²⁴Ta ñuu cuan i sahñi ñiyivi sii ra profeta ta sii ñiyivi cuñi xaan sii ra Ndyoo, ta nacahnu ñuu ñiyivi i sahñi tucu ñu sii ñiyivi vaha.

19 Yaha cuan ta ziqui i siñi minoo nduzu ñihi xaan vatyi cuaha xaan ñiyivi cahan sisi gloria, ta catyi ñu: ¡Aleluya! Maa ra Ndyoo Zutu yo cuu ra zacacu sii yo. Iyo tandihí cuui cuhva sii maa ra. Nazacahnu yo sii ra.

²Vatyi ndoo xaan ta vaha xaan zandaa ra tyiño. Ta sa i tasi tuñi ra sii ñaha zii ñi cuan. Ta maa ña i zativi xaan sii ñiyivi ñuu ñiyivi vatyi yaha xaan i zavaha ña sa ña vaha. Sa tasi tuñi ra sii ñaha cuan. (Ta ñaha cuan cuu ñuu Babilonia sa cahan si tuhun.) Ta i tasi tuñi ra sii ñuu cuan vatyi i sahñi ñiyivi ñuu cuan sii muzu ra.

³Tacuan i catyi ñiyivi cuan, ta ziqui i catyi tucu ñu: ¡Aleuya! Cua cayu ñuu cuan tandihí cuui tyiemvu.

⁴Ta sa oco cumi tahan ra sahnú ndyaca ñaha ta sa cumi tahan quiti sa yucu yatyi ñi nu ndyaa ra Ndyoo i sicava ndyayu ra, ta i zacahnu ra sii ra Ndyoo, ra ndyaa nu tyayu cuan, ta i catyi ra: ¡Nacuu si tacuan, ta nacuu si sa ndisa! ¡Aleyuya!

⁵Nu ndyaa tyayu cuan i cahan minoo ra, ta catyi ra: Ndoho ra cuu muzu maa ra Ndyoo, ndoho sa yuhu sii ra vazu ñiyivi cahnu cuu ndo a vazu ñiyivi ndyihí cuu ndo zoco zacahnu ndo sii ra, catyi ra.

Cuhva cua coo vico tandaha ra cu Mvee Ticatyi ra Ndyoo

⁶Ta ziqui i siñi vatyi cahan cuaha xaan ñiyivi, ta i cuu si tañi sa cucayu cuaha xaan yuu ta tañi nduzu tatu ñihi xaan cahan zavi. Tyehen i catyi ñu: ¡Aleyuya! Vatyi ndyaca ñaha ra ndyaca ñaha sii yo, ta iyo tandihí cuui cuhva sii maa ra Ndyoo, ta ñihi xaan ra.

⁷Nacuzii xaan cuñi yo, ta nazacahnu xaan yo sii ra vatyi sa saa cuhva cua tindaha ra cu Mvee Ticatyi ra Ndyoo. Ta sa ndyaa listo ñiyivi cua cuu tañi ñazihí ra.

⁸Ñoho ñu zahma vaha; ndii xaan si, ta cuisí xaan si. Vatyi zahma cuan cuu tañi cuhva ndoo xaan zavaha ñiyivi sa cuu cuenda maa ra Ndyoo. Catyi ñu.

⁹Ta ziqui i catyi ángel cuan sihin: Tyehen tyoon: “Zii xaan cuu sii ñiyivi i cana ra Ndyoo vatyi cuyucu ñu nu iyo vico tandaha ra cu Mvee Ticatyi ra.” Ta i catyi tucu ra: Ihya cuu tuhun i cahan maa ra Ndyoo sa ndisa cuui.

¹⁰Ta ziqui i sicuñi siti nuu ángel cuan vatyi cua zacahni sii ra, zoco

i catyi ra sihin: Ma zavohon tacuan. Yuhvi cui muzu maa ra Ndyoo tañi moo ta tañi inga hermanon, tandihi ndoho ra ma zandoo sa ndisa sa i zacoto ra Jesús. Zacahnun sii ra Ndyoo. Vatyí tandihi tuhun sa cahan ra profeta, iyo si vatyí cua zacahnu si sii ra Jesús.

**Minoo ra yozo sii minoo
caballo cui si**

¹¹Ta ziqui i ndyehi vatyí nuña andivi, ta i ndyehi sii minoo caballo cui si. Ra sa yozo sii ti nañi ra, Ra Vaha Xaan ta Ra Ndisa Xaan vatyí ndoo xaan ndyaca ñaha ra, ta minoo cuhva vaha xaan sahñi tahan ra.

¹²Ndisi xaan i cuu siti nuu ra tañi ñúhu, ta cuaha xaan corona ñoho xiñi ra, ta ndyaa tucu zivi sii ra, zoco yoñi sito sii si; maa ñi maa ra sito.

¹³Zahma sa ñoho ra, lehle si sihin niñi, ta zivi ra cuu Tuhun Ndyoo.

¹⁴Tandihí zandaru maa ra Ndyoo sa iyo andivi, ndyico ra sii ra. Ñoho tandihí ra zahma vaha. Cuisi si, ta ndii xaan si. Ta yozo tandihí ra caballo cui si.

¹⁵Ta ra cu nuu sii zandaru cuan, ñoho minoo espada xaan yuhu ra vatyí cua cañi ra sii ñiyivi ñuu ñiyivi sihin si. Ñihi xaan cua cundyaca ñaha ra sii ñu. Cua zañaha ra cuhva sa cuxaan xaan maa ra Ndyoo cahnu sihin ñiyivi. Tañi ra sañi ziqui yucu vixi uva sihin saha ra ta quita ndutyá si, tacuan cua zandyehe ra tundoho sii ñu.

¹⁶Ta zahma ra ta nu zihin ra ndyaa letra ta catyi si tyehen:

“Rey cuu ra sii tandihí inga rey, ta ndyaca ñaha ra sii tandihí inga ra ndyaca ñaha.”

¹⁷Ta ziqui i ndyehi vatyí nandyaa minoo ángel nu ñicandyi, ta saa xaan i cana saa ra sii tandihí zaa sa ndava andivi, ta catyi ra: Ñaha ndo. Titahan ndo vatyí ra Ndyoo cahnu cua cuhva ra sa cuxiñi ndo.

¹⁸Cua casi ndo coño ñuhu ra cu rey ta coño ñuhu ra ndyaca ñaha sii zandaru ta coño ñuhu ra nahnu ta coño ñuhu caballo zono ra ta coño ñuhu ra yozo sii ti. Cua casi ndo coño ñuhu sii tandihí ñiyivi, sii ra cu muzu ta sii sa yivi ra cu muzu ta sii ñiyivi ñiñi ta ñiyivi ña ñiñi.

¹⁹Ta ziqui i ndyehi sii quití sa quiñi xaan caa cuan vatyí cu-ñin ti sihin ra cu rey ra ndyaca ñaha ñuu ñiyivi ta sihin zandaru ra. Cu-ñin tandihí ra vatyí cua cahñi tahan ra sihin ra yozo caballo cui si cuan ta sihin zandaru ra.

²⁰Ta ra yozo caballo cui si cuan sihin zandaru ra, i tiin ra sii quití cuan sihin ra cahan cuendu sihin ti vatyí maa ra cuu ra i zavaha sa ndyityi ityi nuu quití cuan. Ta i zandavi ñaha ra sii tandihí ñiyivi, ñu i saha sa cundyaa marca quití cuan sii ñu, ta i zacahnu ñu sii sa i zavaha ñiyivi cuhva caa ti. Ta sa yaha i tiin zandaru ra yozo caballo cui si cuan sii nduu tahan ra cuan, ta ziqui i tyihi ra sii ra sisi núhu sa cayu sihin azufre. Ndito ra cuan ta quihvi ra yucuan.

²¹Ta tandihí ñiyivi ñoho cuenda ra, i sahñi ra yozo caballo cui si cuan sii ñu sihin espada sa ñoho yuhu ra. Ta i sasi xaan zaa sii coño ñuhu tandihí ñu cuan, ta i ndaha xaan iñi ti.

Cuenda sa minoo mil cuiya

20 Tacuan ta ziqui i ndyehi vatyí i quita minoo ángel ndya andívi ta i noo ra, ta ndaha ra ndaha ticuí cuenda minoo yavi cono nu ñoho ñiyívi i zavaha sa ndya vaha ñi, ta ndaha ángel cuan minoo cadena cahnu.

²I ndyehi vatyí tiin ra sii ra dragón. Zuun ra cuu ra i cuu minoo coo ta sa naha. Cuihna cuu ra cuan, ta nañi ra Satanás. Cua cuhñi ángel cuan sii ra minoo mil cuiya.

³Ta cua tyihi ra sii ra sisi yavi cono cuan, ta cua nacazi ra yuhu si, ta cua tyaa ra minoo zeyu yuhu si vatyí ma cuu quita ra ta ma cuu zandavi ñaha ra sii ñiyívi ñuu ñiyívi minoo mil cuiya. Tatu sa yaha sa minoo mil cuiya cuan ta ziqui cua ndasi ra zuhva ñi quívi.

⁴Tacuan i ndyehi, ta ziqui i ndyehi tyayu nahnu nu ndyaa ra sa ñihi cuhva sa cua tyicuhva ra sii ñiyívi. Ta i ndyehi añima ñiyívi i sahndya yuu ñiyívi zucu vatyí i nacatyí ñu Tuhun Ndyoo sa cuenda ra Jesús. Maa ñu ñá zacahnu sii quítí cuan, ta ñá zacahnu ñu sa i zavaha ñiyívi cuhva caa tí. Ta ñá saha ñu sa cundyaa marca tí yíqui nuu ñu ta nu ndaha ñu. Ta i ndyehi vatyí cua nandoto maa ñu, ta cua cundyaca ñaha ñu sihin ra Cristo minoo mil cuiya.

⁵Ihya cuu ñiyívi cua nandoto sa xihna ñi. Zoco inga ñiyívi i sihi, ma nandoto ñaha ñu ndya sa yaha minoo mil cuiya cuan.

⁶Zii xaan cua cuu sii ñiyívi sa cua nandoto sa xihna ñi cuan, ta ma coo cuatyí maa ñu icaña ñi. Ma

cuhun ñu nu cua cayu ñúhu sa ma ndahva maa. Ta cua cuu ñu tañi ra cu zutu ityi nuu ra Ndyoo ta ra Cristo, ta cua cundyaca ñaha ñu sihin ra minoo mil cuiya.

⁷Tatu sa yaha sa mil cuiya cuan, ta ziqui cua ndasi Satanás ta quita ra nu ñoho ndazi ra.

⁸Cua quita ra, ta cua zandavi ñaha ra sii ñiyívi nacahnu ñuu ñiyívi. Cua zandavi ñaha ra sii ñiyívi ñuu Gog ta ñuu Magog, ta cua zatitahan ra sii zandaru ñiyívi ñuu cuan. Cuaha xaan zandaru ra cua coo, tañi ñiyítí yuhu tyañuhu.

⁹Ta cua ndaa ra ndya minoo nduhva cahnu ndya nu yucu ñiyívi cuñi xaan sii ra Ndyoo ndya ñuu Jerusalén cu si, ta cua vico nduu ra nu yucu ñu vatyí cuñi ra cahñi ra sii ñu. Zoco cuhva cuan cua tasi ra Ndyoo ñúhu ndya andívi, ta cua cayu tandíhi zandaru cuan.

¹⁰Ta cuihna, ra cua zandavi ñaha sii ñu, cua tyihi ra Ndyoo sii ra nu cayu ñúhu sihin azufre sa ma ndahva maa nu sa ñoho quítí quiñi caa cuan sihin ra i cahan cuendu sihin tí. Ta yucuan cua ndyehe tandíhi uñi tahan ra cuan tundoho ñiyaca ta ndiyiyaca ta tandíhi cuii tyiemvu.

Cua cutuñi ñiyívi ityi nuu minoo tyayu cahnu ta cuiis nu ndyaa ra Ndyoo

¹¹Ta ziqui i ndyehi sii minoo tyayu cahnu, ta cuiis xaan si, ta i ndyehi sii ra ndyaa nuu si. Ta i sino ñuhu ñuu ñiyívi ta andívi sii ra, ta cua naa si vatyí ñahñi ca nu cua cundyaa si.

¹²Ta i ndyehi vatyí nandyaa tandíhi ñiyívi i sihi ityi nuu ra

Ndyoo, ñiyivi ñiñi ta ñiyivi ña ñiñi. Ta cua nuña ra Ndyoo libro ra sa nacatyí cuhva i zavaha ñu, ta cua nuña tucu ra inga libro nu ndyaa zivi ñiyivi cua cundito tandíhi cuii tyiemvu sihin ra Ndyoo. Ta cua zandaa ra Ndyoo tyiño ñiyivi i sihi sa cuenda cuhva i zavaha ñu, cuhva catyi si nu libro cuan.

¹³Ta ndiyi sa ñoho sisi tyañuhu cua naquita ñu ta tacuan tucu ñu ñoho sisi ñuhu a inga nu yucu ndiyi, ta cua zandaa ra Ndyoo tyiño sii sa minoo minoo ñu, cuhva i zavaha ñu.

¹⁴Ta ziqui ma cuu ca cuu ñiyivi, zoco ndito ñu ta quíhi ñu sisi ñúhu sa ma ndahva maa. Ihya cuu sa cu uu tuhun sihi sii ñu, zoco yivi sa ndaha cua cuu ñu. Cuenda cua cayu ñi ñu.

¹⁵Tatu ña ndyaa zivi ñiyivi nu libro sa cumi ra Ndyoo sa cuenda ñiyivi cua cundito tandíhi cuii tyiemvu, cua tyihi ra sii ñu sisi ñúhu cuan.

**Cua coo minoo andívi saa
ta minoo ñuu ñiyivi saa**

21 Yaha cuan ta ziqui i ndyehi sii minoo andívi saa ta minoo ñuu ñiyivi saa vatyí sa i naa ñuu ñiyivi sa sicoo sa xihna ñi. Ta ñahñi ca tyañuhu cua coo.

²Ta yuhvi ra Juan i ndyehi sii minoo ñuu ii, ñuu Jerusalén saa cuu si, ta i quita si andívi nu ndyaa ra Ndyoo, ta i noo si. Tyaqui xaan i cuu si vatyí sa ndyaa listo si tañi minoo ñaha sa cua tandaha, tyaqui xaan ña.

³Ta i siñi vatyí saa xaan cahan minoo ra sisi gloria nu ndyaa tyayu maa ra Ndyoo, ta catyi ra: Ndyehi

vatyí vityi ndyaa maa ra Ndyoo sihin ñiyivi. Iñ ñi cua cuyucu ñu sihin ra. Maa ñu cua cuu ñiyivi ra, ta maa ra cua cuu Ndyoo ñu.

⁴Cua zanaa ra tandíhi cuii sa cuihya iñi ñu, ta ma cuu ca ñu. Ma nducuihya ca iñi ñu. Ma vacu ca ñu, ta ñahñi ca tundoho a sa uhu cua coo sii ñu vatyí cuhva i cuu ityi sata, sa i yaha si cuan.

⁵Ta ziqui i catyi tucu ra ndyaa nu tyayu cahnú: Ndyehi vatyí tandíhi sa iyo ta vityi zandusei sii si. Ta i catyi tucu ra: Tyaa, vatyí ndisa xaan cuu tuhun ya, ta cuu cuníi xaan iñun sii si.

⁶Ta ziqui i catyi ra sihin: Sa cuu tandíhi si vityi. Yuhvi cuu ra sa iyo nu quisaha tandíhi, ta cua cundite tandíhi cuii maa tyiemvu. Yucuan cuenda cui tañi letra A ta tañi letra Z. Tatu ityi ndo cua cuhva mi sa caha ñi ndutyá coho ndo, ta cua cundito ndo tandíhi cuii tyiemvu.

⁷Tatu zahacanaa ndo sii cuihna, cua ñihi ndo tandíhi sa vaha ya. Yuhvi cua cui ra Ndyoo ra zacahnú ndo, ta maa ndo cua cuu zehe ndyíhi.

⁸Zoco ñiyivi yuhu xaan ta ñiyivi ña sino iñi ta ñiyivi quiñi xaan iyo ta ñiyivi sahñi sii ñiyivi ta ra quixi sihin ñaha sa yivi ñazíhi ra cuu a ñu quixi sihin rayíi sa yivi yíi ñu cuu ta ñiyivi zatazi ta ñiyivi zacahnú sii ndyoo yutu ta tandíhi ñiyivi vatya, cua cuhun tandíhi ñu cuan nu cayu ñúhu sihin azufre sa ma ndahva maa. Ihya cuu sa cu uu saha cua cuu ñu.

Cuhva cua cuu ñuu Jerusalén saa

⁹Tacuan ta ziqui i saa minoo sa usa tahan ángel sa i sindaha coho

xuhun cuaan sa siñooho tundoho cua ndyehe ñiyivi ñuu ñiyivi, ta i catyi ángel cuan sihin: Ñaha ta cua zañehi suun sii ñaha sa cua tindaha sihin ra cu Mvee Ticatyí. Catyi ra.

¹⁰Ta sisi sa i ndyehi sa sindyaca ra sii, ndya xiñi minoo yucu cahnu xaan ta zucu xaan, ta i zañaha ra ñuu Jerusalén sii. Cahnu xaan ta ii xaan si, ta i quita si ndya andivi ndya nu ndyaa maa ra Ndyoo.

¹¹Ndisi xaan ñuu cuan tañi sa ndisi maa ra Ndyoo ta tañi minoo yuu vaha xaan sa nañi jaspe. Ta xiño si tañi minoo ino.

¹²Siconduu ñuu cuan i ndyehi vatyí ndyaa minoo nuzama cahnu ta zucu. Ta iyo usi uu tahan yuvehe si. Nandyaa minoo ángel tahan tahan yuvehe. Ta minoo minoo yuvehe ndyaa zivi sa minoo minoo sa usi uu tahan ityi ñiyivi hebreo.

¹³Ityi caña ñicandyi ndyaa uñi tahan yuvehe nuzama cuan, ta uñi tahan tucu ityi yucu, ta uñi tahan ityi tyañuhu, ta uñi tahan ityi cua iñi.

¹⁴Nu cimientu nuzama cuan yozo usi uu tahan yuu nahnu, ta tahan tahan si ndyaa zivi minoo sa usi uu tahan ra i cuu apóstol ra cu Mvee Ticatyí.

¹⁵Ra ángel ra cahan sihin, ndaha ra minoo tuñi xuhun cuaan vatyí cua tyicuhva ra ñuu cuan sihin yuvehe si ta nuzama si.

¹⁶Cumi tahan siqui ñuu cuan, ta inuu cuii ñi caa tandihi cumi tahan si. I tyicuhva ángel cuan ñuu cuan sihin tuñi ra ta cuu si uu mil uu ziendu kilómetro iin iin siqui si, ta tacuan tucu sa zucu si.

¹⁷Ta i tyicuhva tucu ra nuzama si, ta cuu si uñi xico cumi metro sa quehen si. I tyicuhva ángel cuan tañi tyicuhva ñiyivi.

¹⁸Nuzama cuan cuu si yuu vaha sa nañi jaspe, ta ñuu cuan maa ñi xuhun cuaan cuu si, ta xiño xaan si tañi ino vaha.

¹⁹Usi uu tahan toto nuzama cuan. Maa maa yuu vaha cuu si, ta ñoho inga yuu vaha ticui si. Sa xihna ñi yuu yozo toto cuu si yuu sa nañi jaspe. Sa cu uu cuu zafiro. Sa cu uñi cuu ágata. Sa cu cumi cuu esmeralda.

²⁰Sa cu ohon cuu ónice. Sa cu iñu cuu cornalina. Sa cu usa cuu crisólito. Sa cu uña cuu berilo. Sa cu iin cuu topacio. Sa cu usi cuu crisoprasa. Sa cu usi iin cuu jacinto. Ta sa cu usi uu cuu amatista. (Ziin ziin tyacu tahan tahan yuu vaha cuan.)

²¹Sa usi uu tahan yuvehe ñuu cuan, maa ñi perla cuu si. Minoo perla cahnu xaan cuu iin iin yuvehe. Ta calle cahnu ñuu cuan xuhun cuaan vaha xaan cuu si, ta xiño xaan si tañi ino.

²²Ñahñi vehe ñuhu i ndyehi ñuu cuan. Ndyaa maa ra Ndyoo Cahnu ra ndyaca ñaha sii yo ta ra cu Mvee Ticatyí, ta zacahnu ñiyivi sii maa ra, ta ña cuñi si minoo vehe.

²³Ta ñahñi ñicandyi ta ñahñi yoo zandisi sii ñuu cuan vatyí ndisi xaan maa ra Ndyoo ta ndisi xaan ra cu Mvee Ticatyí, ta sa nduu tahan maa ra saha sa ndisi yucuan.

²⁴Sa ndisi sii ñuu cuan, cua zandisi si nacahnu ñuu ñiyivi. Ta ra rey ra ndyaca ñaha ñuu ñiyivi, cua

cundyaca ra sa vaha sa iyo sii ra ndya ñuu cuan.

²⁵Ma cundazi yuvehe nuzama ñuu cuan ndyiacaa. Ta ma coo sa sa cuaa yucuan.

²⁶Ta tandihi sa cuca ta sa vaha sa iyo sii ñiyivi ñuu ñiyivi, cua cundyaca ñu ndya ñuu cuan, ta ñuu cuan cua cundyaca ñaha sii tandihi cuii sa iyo.

²⁷Ñiyivi sa ndyaa zivi nu libro ra cu Mvee Ticatyí vatyí cua cundito ñu tandihi cuii tyiemvu, yucuan ñu cuu ñu cua quihvi yucuan, zoco ma cuu quihvi cuatyí ndaha cuii ñi a ñiyivi vatyá a ñu zacahnu sii inga ndyoo.

22 Ta ziqui i zañaha ángel cuan minoo yuu cuii xaan sii. Ndutya sa saha sa cundito ñiyivi tandihi cuii tyiemvu cuu si, ta quita si nu ndyaa tyayu cahnu maa ra Ndyoo ta ra cu Mvee Ticatyí.

²Mahñu calle cahnu ñuu cuan, ta nduu siyo yu yuu iyo yutu sa cua cuhva sa cundito ñiyivi tandihi cuii tyiemvu. Tahan tahan yoo ziin ziin nuu yucu vixi cua cuhva tu. Cua cuhva tu yucu vixi usi uu saha sa minoo cuiya. Ta ndaha tu cua cuu tata sa cua zanduvaha sii ñiyivi.

³Ñuu cuan, ñahñi maa sa ña vaha cua coo vatyí maa ra Ndyoo cua cundyaa ñuu cuan sihin ra cu Mvee Ticatyí. Ta yucuan cua zacahnu ñiyivi ra sii ra.

⁴Cua ndyehe ñiyivi nuu ra, ta cua cundyaa zivi ra yiqui nuu ñu.

⁵Ñahñi sa cuaa cua coo ñuu cuan. Ta ñiyivi sa yucu yucuan, ma cuñi si sa coo lámpara sii ñu, ta ñahñi ñicandyi cua coo vatyí maa ra Ndyoo ra ndyaca ñaha sii yo

cua zandundisi ra yucuan, ta cua cundyaca ñaha ñu sihin ra.

Sa cuñi quisi ra Jesucristo

⁶Ta ziqui i catyí ángel cuan sihin: Sa ndisa cuii cuu tuhun ya, ta cuñi xaan iñun sii si. Maa ra Ndyoo ra ndyaca ñaha sii yo cuu ra i cahan sihin ra profeta ta sa naha. Ta vityí i tasi ra sii ángel ra vatyí cua zañaha ra sii muzu ra tandihi sa vatyí xaan cua cuu.

⁷iSa cuñi quisi! Catyí ra. Ziñi xaan cuu sii ñiyivi tyaa yahvi cuhva catyí si nuu libro ya.

⁸Yuhvi ra Juan cuu ra i siñi ta i ndyehi tandihi sa tyei ihya. Ta sa yaha siñi sii si ta ndyehi sii si, ta ziqui i sicuñi siti ityí nuu ángel sa i zañaha sii, vatyí cua zacahni sii ra.

⁹Zoco i catyí maa ra sihin: Ma zavohon tacuan vatyí yuhvi cui minoo muzu ra Ndyoo tañi moo ta tañi inga hermanos, tandihi ra profeta ta tandihi ñiyivi cua tyaa yahvi cuhva catyí si nuu libro ya. ñin ñi sii ra Ndyoo zacahnu.

¹⁰Ta ziqui i catyí tucu ra sihin: Ma cucumi xehun tuhun sa zacoto ra Ndyoo nuu libro ya vatyí sa cua saa cuhva catyí si.

¹¹Ñiñi ñi sa cumañi ca tahan si, nazavaha ca ñiyivi ña vaha sa ña vaha, ta ñiyivi zavaha xaan cuatyí, nazavaha ca ñu cuatyí. Zoco ñiyivi ndoo iyo, nazavaha ca ñu sa ndoo, ta ñiyivi vaha sa ndisa cuii, nazavaha ca ñu sa vaha xaan.

¹²Ndisa, sa cuñi quisi, catyí maa ra Ndyoo. Ta cuize sa cua cuhve sii sa minoo minoo ñiyivi sa cuenda cuhva i zavaha ñu.

¹³Yuhvi cuu ra sa iyo nu quisaha tandihi, ta cua cundite tandihi cuii

maa tyiemvu. Yucuan cuenda cui tañi letra A ta tañi letra Z.

¹⁴Zi xaan cua cuu sii ñiyivi cua ndoo zahma vatyí cua cuu quihvi ñu yuvehe ñuu cuan, ta cua cuu casi ñu yucu vixi sa iñi nu yutu sa cua cuhva sa cundito ñu tandihi cui tyiemvu.

¹⁵Zoco ñiyivi zavaha sa ña vaha cua nandoo ñu ityi sata tañi ñiyivi zavaha ndya vaha ñi ta ñiyivi zatazi ta ra quixi sihin minoo ñaha sa yivi ñazihí ra cuu, ta ñiyivi sahñi sii ñiyivi, ta ñiyivi zacahnu ndyoo yutu a zandu, ta tandihi ñiyivi tahan xaan iñi cuvatyá.

¹⁶Yuhvi ra Jesús sa tasi sii ángel mi vatyí cua zacoto ra sii tandihi ra hermano tandihi tuhun ya. Yuhvi cui ñiyivi sahnu sii ra rey David, ta cuu tucu ra ñiyivi sahnu sii mi. Ta cui minoo tiño ndisi xaan sa quita sa ñaa ca tatu sa vasi cundisi.

¹⁷Ta Tatyí Ii maa ra Ndyoo ta ñiyivi cuu tañi ñazihí ra cu Mvee Ticatyí, catyí ñu sihin ra: iÑaha! Ta tacuan tucu catyí tandihi ndo sa siñi tuhun ya. iÑaha! catyí ndo sihin ra. Ta tatu iyo ra ityi xaan

naquisi ra nu ndyei ta nacoho ra ndutyá sehi sa caha ñi sa cua cuhva sa cundito ñiyivi tandihi cui tyiemvu.

¹⁸Ta tyehen nacatyí sihin tandihi ñiyivi tyizoho Tuhun Ndyoo sa ndyaa nu libro ya vatyí tatu iyo ra natyihí zuhva ca tuhun sihin si, cua zandyehé ra Ndyoo sii ra tandihi cui nuu tundoho sa cahan si nuu libro ya.

¹⁹A tatu iyo ra cua tava zuhva sa catyí Tuhun Ndyoo nuu libro ya, cua tava ra Ndyoo zivi ra nuu libro sa nacatyí yoo sa cua cundito tandihi cui tyiemvu, ta ma cuu cahun ra ñuu vaha xaan cuan, ta ma ñihí ra tandihi sa vaha sa nacatyí libro ya.

²⁰Ta ra sa nacatyí tandihi tuhun ya, catyí ra: Ndisa vatyí sa cuñi quisi. Ta catyí yuhvi ra Juan: Vaha xaan. iÑaha! yoho ra Jesús ra ndyaca ñaha sii ndi!

²¹Ta nacuhva xaan ra Jesucristo ra ndyaca ñaha sii yo tandihi nuu sa vaha sii tandihi cui ndo. Ta nacuu si tacuan, ta nacuu si sa ndisa.